


Ja øgyajpxy ja ømyadya'aky midi xukpaajtimp

ja nitso'ok'ajtin



New Testament in Mixe, Tlahuitoltepec (MX:mxp:Mixe,
Tlahuitoltepec)

Ja ɔgyajpxy ja ɔmyadya'aky midi xukpaajtamp ja nitso'ok'ajtin

New Testament in Mixe, Tlahuitoltepec (MX:mxp:Mixe, Tlahuitoltepec)

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxc], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

422dcf73-46a5-5403-b423-8406ed76ac1d

Contents

MATEO	1
MARCOS	50
LUCAS	83
JUAN	134
HECHOS	173
ROMANOS	222
1 CORINTIOS	242
2 CORINTIOS	262
GÁLATAS	274
EFESIOS	281
FILIPENSES	288
COLOSENSES	293
1 TESALONICENSES	298
2 TESALONICENSES	302
1 TIMOTEO	305
2 TIMOTEO	311
TITO	315
FILEMÓN	318
HEBREOS	319
SANTIAGO	333
1 PEDRO	338
2 PEDRO	344
1 JUAN	348
2 JUAN	353
3 JUAN	354
JUDAS	355
APOCALIPSIS	357

JA ØGYAJPX Y JA ØMYADYĀ'ĀKY MIDI JA MATEO YJAAY

Ja Jesucristo tyety'aptøjk

¹ Ja' idø'øn ja yiknajtskajpxip pøn jaty ja nwindson'ajtim Jesucristo tyety'apip ku ja teety'api ja Abraham jøts ja David,

² ku Abraham t'u'ngi ja Isaac, jøts ja Isaac t'u'ngi ja Jacob, jøts ja Jacob t'u'ngi ja Judá. Namay ja'adi møøt y'uch myigu'ukti.

³ Ja Judá møøt ja ñidø'øxy Tamar ja'ats t'unaj'k'ajttip ja Fares jøts ja Zara. Jøts ja Fares t'u'nk'aty ja Esrom, jøts ja Esrom t'u'nk'aty ja Aram.

⁴ Jøts ja Aram t'u'nk'aty ja Aminadab, jøts ja Aminadab t'u'nk'aty ja Naasón, jøts ja Naasón t'u'nk'aty ja Salmón.

⁵ Jøts ja Salmón møøt ja ñidø'øxy Rahab tmajnk'atti ja Booz, jøts ja Booz møøt ja ñidø'øxy Rut tmajnk'atti ja Obed, jøts ja Obed t'u'nk'aty ja Isai.

⁶ Jøts ja Isai t'u'nk'aty ja rey David, jøts ja rey David møøt ja tø'øxyøjk midi ja Urías wyinaty tø'tatsnidø'øxy'aty, ja'ats idø'øn tmajnk'ajttip ja Salomón.

⁷ Jøts ja Salomón t'u'ngi ja Roboam, jøts ja Roboam t'u'nk'aty ja Abías, jøts ja Abías t'u'nk'aty ja Asa.

⁸ Jøts ja Asa t'u'ngi ja Josafat, jøts ja Josafat t'u'ngi ja Joram, jøts ja Joram t'u'nk'aty ja Uzías.

⁹ Jøts ja Uzías t'u'ngi ja Jotam, jøts ja Jotam t'u'nk'aty ja Acáz, jøts ja Acáz t'u'ngi ja Ezequías.

¹⁰ Jøts ja Ezequías t'u'ngi ja Manasés, jøts ja Manasés t'u'ngi ja Amón, jøts ja Amón t'u'nk'aty ja Josías.

¹¹ Jøts ja Josías t'unaj'k'aty ja Jeconías, namay ja'adi møøt y'uch myigu'ukti. Winet ets ja israelit jaa'y idø'øn yiknajtswa'wigyøjxtøø jam jadu'ukpi etjotp midi yiktejp Babilonia.

¹² Tøts ja jade'en wyinaty y'ukjaty ku ja Jeconías tpaajty ja y'u'nk midi txøw'ajtp Salatiel, jøts ja Salatiel ja Zorobabel ja y'u'ngip.

¹³ Jøts ja Zorobabel t'u'ngi ja Abiud, jøts ja Abiud t'u'ngi ja Eliaquim, jøts ja Eliaquim t'u'ngi ja Azor.

¹⁴ Jøts ja Azor t'u'ngi ja Sadoc, jøts ja Sadoc t'u'ngi ja Aquim, jøts ja Aquim t'u'ngi ja Eliud.

¹⁵ Jøts ja Eliud t'u'ngi ja Eleazar, jøts ja Eleazar t'u'ngi ja Matán, jøts ja Matán t'u'ngi ja Jacob.

¹⁶ Jøts ja Jacob t'u'ngi ja José midi tñidø'øxy'ajtp ja María midi tyaagip ja nwindson'ajtim Jesús, ja Cristo midi yiknitsokp.

¹⁷ Makmajkts najtska'axits idø'øn ja tpaajty ku ja cho'onda'aky Abraham ñikøjxp jøts ja ttamigugøxi ja David. David ñikøjxpts jadu'uk cho'onda'aky jøts ja jaduk jade'en ñajtska'axidyøø kunim ja israelit jaa'y yikwaanøjkxtøø aguwaní'ampy jam Babilonia. Winetnimts jadu'uk cho'ondaajky, ja'ats najtska'axidøø jaduk jadine'en ja makmajkts najtska'axi kunim kyaxi'jky ja Cristo ja yiknitsokpi.

Ku ja Jesucristo kyaxi'jky

¹⁸ Yide'en idø'øn y'ejxi tyi'i sá jaty yjajty kyubejty ku nwindson'ajtim Jesucristo ojts kyaxi'iky: Ja María midi tyaagip, ja' idø'øn wyinaty najts'awani'ejtnip jøts ja tmøøt'amajtskit ja José; nawyaawajnidipnim ja wyinaty ku ja María jam tñikøjxp'ajtni ja mutsk, Dios idø'øn ja tuujnip jøts ja Espiritu Santo myø'ajtin jade'en tyikmajada'aky.

¹⁹ Øy yikxonts ja José yjaa'y'aty midi idø'øn ñiyaa'y'ajtpy, ka'ap ja pøn sa tjadyimñøjmi jøts ja María kyayikpøky'ext; myajtsu'utwampy ja' jøts ja ka'ap pøn tñuknijawiwya'añ.

²⁰ Ixam idø'øn ja wyinaty jade'en wyinmay ku ja ojts agumaa'y'ampy tyuk'ijxyi ja Dios y'ankilis jøts ja ojts ñii'mxyi:

—José, metsxi mdeety'amøjip ja David, kidits mdsø'øgi, møøt amajtski yø María. Yikaxø'økwapmy mutsku'nk tu'uk, Dios y'Espiritu Santo jade'en myø'ajtin tyikwingaxø'økp.

²¹ Mixyu'nk ja yikaxø'kp, ja'ats meets ja xyøøw mbiktaajkip JESÚS. Jade'en'ampy idø'øn ja jade'en txøw'att ja'agøjxp ku ja pojkipitumbi jaa'y ja tñuknitso'ok'att ja pyøky.

²² Tyimyjajt tyimgyubajts idø'øn ja jade'en sá nwindson'ajtim Dios wyinaty tø tyikwa'añ ja kyugajpxy ku ja wyaañ:

²³ Jøtpyip tu'uk ja kiixye'dø'øxy midi amaay tsinaapy, yikaxø'økpts ja tu'uk myajnk'u'nk, Emanuel ja xyøøw'atp,

midi ayuujk pidsømp: Dios adøm møøt.

²⁴ Xjats kuts ja José ojts ñiwijy, jøts idø'øn ja jade'en tpaduun sá Dios y'ankilis ja wyinaty tø'yane'emyi'i, jøts ja ojts tñidø'øxyky ja María.

²⁵ Jøts idø'øn ja ka'ap jade'en tmøøtsøøninim sam amajtsk'ajtin ñaxy kunim ja tø'øxy tyikaxi'iky ja myijawyeenu'nk; jøts ja ojts txødijy JESÚS.

2

Ku ja wijyjaa'y ojts t'ats'ejxti ja maxu'nk Jesús

¹ Jam ja Jesús ojts kye'exy Belén, jam kajpjtóp midí Judeit etjót, ja Herodes idø'ón jam wyinaty windsøn'ajtp, ja' wyinaty tuki'iyi tñitanaapy ja naajx jøts ja kajp. Xjats jam Jerusalén yja'attøø winaagin wijyjaa'dyi midí tsoo'ndíp xøøbidsimy,

² ja'ats jam ojts tyiknidøwidi, yide'en ja wyandøø:

—¿Ma dø'ón ja tø kye'exy ja' pøn tñiwindsøn'atp ja ya'it israelit jaa'y? Tøts øøts ja n'ejxpaajti ja myaadsa' ma øø tø ndsøøñ, icyaats øøts ja tø nñimiñ jøts øøts ja nwindso'ogiwya'añ.

³ Kuts ja windsøn Herodes ja ojts jade'en tñimadøy jøts ja tyatøjkiyi ja jotmay, nayide'en niduki'iyi ja Jerusaléngit jaa'dyi.

⁴ Winets ja windsøn Herodes tñankñamyujki niduki'iyi ja israelit teety windsøndøjkti jøts nayide'en pøn jaty tkajpxwejtíp ja jaa'y, ja'ats idø'ón ja ojts tñiibyiky ma et idø'ón ja Cristo wyinaty kyaxø'økwa'añ.

⁵ Xjats ja tñimaadyøø:

—Jam Judeit etjót ma kajp jam txøøwi Belén; pø yide'enimxi ja Dios kyugajpxy jekyíp tjaadyañ.

⁶ Ja kajp midí yiktejp Belén, midí jam Judá etjót,

kidi tyimñugo kajpíp yø' sam o midí kajp ma jaty jam yikutukti ja windsøndøjkti wine'enin yjam'atti jam Judá;

jam ja kyaxø'økt tu'uk ja møj windsøn,

midí øts nIsraelit kajp x'ejx'ejtíp.

⁷ Winets ja Herodes amaa'tsk twaadsøøy ja wijyjaa'dyi midí idø'ón jam wyinaty tø choondi xøøbidsimy, jøts ja ojts tñiibyiky juuni dø'ón ja wyinaty tø t'ejxpaati ja maadsa'.

⁸ Jøts ja ojts tkexy jøts ja ñøjktit jam Belén, yide'en ja tñimaay:

—Nøjktit jam, øyim yikxonim idø'ón xyiknidøwidit ja mixyu'nk; kuts xpaattit, jatyits meets ja xnigajpxt jøts meets ja xukmado'ot, jøts øts ja nayide'en n'atswindsø'ogit.

⁹ Kuts idø'ón ja windsøn Herodes ja jade'en ñimaajyidøø, xjats idø'ón ja wijyjaa'y choo'ndøø. Jøts ja maadsa' ja wyinyø'øyi midí ja jam wyinaty tø t'ejxti ma dø'ón ja jam choo'ndi xøøbidsimy, yø'øpy idø'ón ja' kunim ja yja'jty jam ma dø'ón ja mutsku'nk Jesús wyinaty, jamnims ja yø'øy'amøjkiyi'ñ.

¹⁰ Ku dø'ón ja wijyjaa'y ja jade'en t'ejxti ja maadsa', xjats ja yjantyimxyondaktøø;

¹¹ Kuts ja tyøjkidøø jam tøjktóp, jajtts ja tpaattøø t'ejxtøø ja mutsku'nk jøts ku ja tyaak María ja jap møøt. Winets ñagyuxendyaajkidøø jøts ja twindsø'jkidøø ja mutsku'nk. Ojts ja tyikni'awa'atsti ja oori, ja poom, jøts ja pa'akxuu'kpi midí tyejtíp mirra. Jade'en ja tyikni'awa'atstøø, ja'ats ja ojts ttamay'atti, ja' ja ojts ttawindsø'ogidi.

¹² Kuts idø'ón ja wyinaty jade'en tø t'ukwindsø'ogidi, xjats ja yiktukmadoodøø agumaa'yjøtpy jøts ku ja ka'ap nayide'en y'ukwimbejtñidit midí ja wyinaty tø tmendi, ma ja windsøn Herodes ja jam wyinaty tø t'ukpaati. Xjats idø'ón ja wyimbejtñidøø, abiktyuu' t'pøjktøø jøts ja ñøjknidi jam pyuxkøjxp kyajpkøjxp.

Ku ja maxu'nk Jesús ojts yikmiguy'oxy jøts yikminijky jam Egipto

¹³ Tøts idø'ón ja wijyjaa'y jam wyinaty choondi, ku ja nwindso'najtm ja y'ankilis ñanky'ejxøø jøts ja José ja agumaa'yjøtpy ojts t'ixy, yide'en ankilis ja ñimaajyøø:

—Tsojki pidø'øk, møøt tsoon yø mutsk møøt yø tyaak jøts mgaknøjktit jam Egiptit etjót, taa'nidi jam. Pøni wine'en jam mdaa'nidi øtsnim ja kø'øm nñigajpxp, ja'agøjxp ku Herodes yø t'ixa'awa'añ yø mutsk jøts yø tyik'lookwa'añ.

¹⁴ Xjats ja José ojts pyidi'iky, jøts ja ojts koots tsa'angue'eky ja mutsku'nk, jøts ja tmøødiyøø ja tyaak jøts idø'ón ja ojts tmøøtnijky jam Egipto.

¹⁵ Jam ja chinaadyi jeky kunim ja Herodes yø'jky. Jade'en'ampy idø'ón ja jade'en tyimyjajty ti mibaat ja Dios kyajpxy jadi'iñi y'uknaxt pø patyxi wyinaty yide'en tø tyikwaañ ja kyugajpxy: “Egiptit etjót pøts ja n'U'nk nyiktsø'øñ ku øts ja nwaadsøøy.”

Ku ja Herodes tyikutuky jøts ja mutsk mixyuna'jk y'oo'køxtit

¹⁶ Kuts ja Herodes tñija'wiyi'ñ jøts kudam ja wijyjaa'y ja wyinaty tø wyin'ñiñyi, xjats ja yjantyim'yambijky; jøts ja ojts tñi'ane'emy ku y'oo'køxtit ja mixyuna'jk. Majtsk jumøjtpibaat ja ojts tñankyik'øøgyiyi wine'enin ja mixyuna'jk jam wyinaty Belén, jøts nayi wine'en ja kajp jam tñi'wington'aty. Ja jumøjt idø'ón ja pyayo'øpy sa ja wijyjaa'y ja wyinaty tø tyukmadøyi.

¹⁷ Ka'pxy idø'ón ja jade'en yjajty sa ja kugajpxy Jeremías wyinaty ja nøky tø tja'ay ku ja wyaañ:

¹⁸ Yikmadoop ayuujk jam Ramá,

sam yjawi' øy pøn ti tpaji'y tpayaxp jade'en;

ja tø'øxyøjk Raqueldam idø'øn y'u'nk y'una'jk tpajipy tpayaxp jade'en,

jøts ja ka'ap tkupiky jøts ja yikpa'ayo'ot, pø tøxi y'u'nk y'una'jk ja y'oo'køjxni.

¹⁹ Xjats ku y'o'jky ja Herodes, winets nay'agumaa'yjotpy tja'wiyi'i'n ja José jøts ku t'ijxy tu'uk ja Dios y'ankilis jam Egiptit etjotp, jøts ja ñimaa'jyøø:

²⁰ —Pidø'øk, jøts xmøødit yø mixyu'nk yø Jesús møøt yø tyaak, wimbejtñidi nøjkxñidi jam Israelit etjotp, tø ja y'oo'køjxñidi pøn jaty y'ijty tyik'ookwandip yø mutsku'nk.

²¹ Winets ja José pyidi'jky jøts ja tyiktsøø'ñ ja mutsku'nk. Ja Jesús idø'øn yikwaadsø'omp møøt ja tyaak jøts ja ojts ñøjkxti jam Israelit etjotp.

²² Kuts ja José tñija'wiyi'i'n jøts kudam ja Arquelao jam wyinaty wyindsøn'aty Judeit etjotp, ja tyeety Herodes ja kyudanaapy ku dø'øn ja wyinaty tø y'øøky, jøts ja José tsø'jkip ja', jade'ents ja jade'en'ampy kyanijkxy; tøts idø'øn ja wyinaty yiktukmadoogojmi agumaa'y'ampy jøts ja ojts ñøjkxti jam Galileit etjotp.

²³ Kuts idø'øn ja jam yja'attøø, jøts ja ñøjkxti tsinaabyi mā kajp txøøwi Nazaret. Ka'pxy idø'øn ja jade'en tyuujni yjajty sã Dios kyugajpxy wyinaty tø wya'andi jøts ku ja nwindsøn'ajtim Jesús jam kyugajpi Nazaret.

3

Ku ja Juan Bautista kya'amaa'y jam abak etjotp

¹ Tøts ja tiempi wyinaty ñaxy jøts ja Juan Bautista midi yiknøbajtp, jam wya'kaxi'jky Judeit y'abak'etjotp, jøts ja jam kyajpxwa'kxy,

² yide'en ja jam wya'añ:

—Jawidi mbøky, yiktigajtsti mdsinaa'yindi, ja wyingøñ ja Dios kyutujk midi ja tyanitanaapy ja yjaa'y.

³ Yø Juan idø'øn ja'ni midi ja kugajpxy Isaias ñigajpx ku ja yide'en tjaadyaañ: Yikmadoop ayuujk jam abak etjotp ku wya'añ møk'ampy:

“Awejixidi ja nwindsøn'ajtim y'ixpøjkin;

yiktøwdi yiktuuda'akti mwinaa'ñ.”

⁴ Kameeyi pøjk idø'øn ja Juan jam wyinaty wyet'ajtpy, jøts jiyujk'ak tendsum'aty, ja mu' dø'øn ja jam chu'chpy jøts jiyujk pa'ak ja tji'kxy midi jam muum ujtsjotp, ja'ats idø'øn ja jam ñidsinaapy.

⁵ Jøts idø'øn ja jam øy pøn jaa'y ñimiñiyi jøts ja tmadowdi sã wya'añ, mendip ja' pøn tsoo'ndip jam møj kajpkøjxp Jerusalén, nayide'en wine'enin jam pøngapøn chøøñidi jam Judeit etjotp, midi tmiwington'ajtp ja nøø midi txøøwip Jordán;

⁶ kuts idø'øn ja jaa'y ja pyøky tmayatsti, jøts ja Juan ja tyiknøbety mā ja Jordángit nøø jam.

⁷ Jøts ku dø'øn Juan ojts t'ixy jøts ku ja fariseotøjk may'ampy yjanchmendi nøbajtpi møøt ja saduceotøjkti, jøts ja tñimaa'y:

—Mee miku! ¿Pøn mee tø mni'mxyi jøts ku jade'en mgayiktabayø'odyit ja mbøky, jøts ku yø'øyi chøkyi ku meets yã nøbajtpi tø mmiñ?

⁸ Yikxon idø'øn mjaa'y'attit, wan idø'øn tyik'ijxy jøts ku ja mdsinaa'yin tø xyiktigatsti,

⁹ jøts kidi mee kø'øm mnawya'añidi namyikajxim: “Tixi ka'ap ti chøkyi kumi ja Abraham adøm n'apteety'amø'ajtyindip”; jøts ka'ats yjade'eni ti Dios kamajyip øy ja pøn ttukmigu'uk'att ja Abraham pøni pøn ja kø'øm y'a'ejxip.

¹⁰ Jøts tsojk ja nøjkx yiktiidyuñ pøn jaty tkami'øy'ajtip ja Dios.

¹¹ Tiy janch ixyam ndyimdyukmadowdi jøts ku øts yø'øyi tø nñimiñ jøts meets nøø nduktanøbattit. Jade'en'ampy yiknijawit jøts ku mdsinaa'yindi tø xyiktigatsti; jats øts tu'uk ix'oojk xpamiñ pøn meets Espíritu Santo mduktatøkiyip jøts ja' tñime'ent ja tiidyu'unin. Møk'ampy kutujk ja tmimiñ, niyuuni øts ja møøt nganamyaabaat'atit.

¹² Jade'en ja ttu'unt ja na'xwii'ñit jaa'y sam ariindøøm yikwigumy'in, abiky ja tpiktaajkit ja y'ak jøts ja tñitø'ety ja jøøn midi niyuuni kape'tsp, jøts ja ariinbajk abiky yikpøjkjø'økt. Jade'ents idø'øn ja jaa'y yiktu'undit sã pønjabøn tmi'øy'aty tkami'øy'aty ja Dios.

Ku ja Jesús ñøbejty

¹³ Xjats idø'øn ja Jesús yja'jty jam mā ja Jordánk nøø, jam ja chøøñ Galileit etjotp jøts idø'øn ja jam yja'jty mā ja Juan wyinaty, ja' ja ñinijkxpy jøts ja yiknøbatit.

¹⁴ Ka'ap ja Juan ja twa'añ jøts ja tyiknøbatt, yide'en ja Jesús yiknimaay:

—¿Jawyeen me xtsøky jøts me nyiknøbatt? Pø metsxi dø'øn ndijy xyiknøbatp.

¹⁵ Yide'en ja Jesús y'adsøøy:

—Wan idø'øn t'ukjaty; jade'en ne'egi ndyimdyøø'jint jøts ku ja'ayi nbadu'unint sã Dios Teety tyiy'ajtin wya'añ.

Kyupøjk idø'øn ja Juan ja jade'en.

¹⁶ Ja'ayi ja Jesús ñøbejty, jøts ja pyidsiimyy jam nøøjotp. Winets nay jatyi adsu'jky y'awaajch ja tsajp, jøts ja ojts t'ejxpaatti ja Dios y'Espiritu Santo ku ja ñigida'agyi sam tsapakin jøts ja tyakakpajti.

¹⁷ Winets ja Dios Teety y'ayuujk yikmadøøy, yide'en ja jap tsajpjøtpty wya'añ:

—Yā'at øts idø'on n'U'nk'ajtpy, yø' øts idø'on ndsøky'ajtpy, njantyajotkujk'ajtpyts øts yø'.

4

Ku ja Jesús yikjot'amutsk'ejxwa'añ

¹ Xjats ja Dios y'Espiritu Santo ojts yiknijkxyi ja Jesús jam abak etjotp, jøts miku' ja jam yjot'ejxit.

² Wixijkxyøøw wixijxchuu' idø'on ja jam y'ayuu'ajty, jøtsnim yuu ja pyaajti.

³ Winets miku' ja jam ñimeejni jøts ja yikpøkyunwa'añi, yide'en ja ojts ñi'imxyi:

—Pøni janch ku me mjanchdiosu'ngi, yiktsapkaakyjat yø tsaa.

⁴ Xjats ja Jesús y'adsøøy:

—Yide'en Dios kyajpxy wya'añ: “Kuuyi Dios kyajpxy myøji, kidi ja'ajip naqxwii'ñit jaa'y nugo tyajujky'attip ti jaty yikjøø'kxp.”

⁵ Winets miku' ja ojts yiknijkxyi jam Jerusalén midi Dios kyunuu'kxkyajp'ajtpy, jamts ja ojts yikøpxetyi tsaptøjk kubajk

⁶ jøts ja ojts ñii'mxyi:

—Pøni janch Dios U'nk mets, kajtswoon ya; pø nømpxi ja Dios kyajpxy jøts ku:

Ja tnøjmit y'ankilis jøts me myik'ejx'ett jøts ku me ka'ap ti mjattit.

Jøts ku mets ja ankilis mdsa'anjøø'okit,

jøts mdeky tsaa kyakumit kyayo'odsit.

⁷ Xjats ja Jesús t'adsøøy jøts ja tnimaay:

—Janch nayinømts Dios kyajpxy: “Kidi mDios xjot'ixy.”

⁸ Xjats ja miku' ja ojts wyaanøjkxkojmiyi jam møj kojpkøjxp, jøts ja jam tyuk'ejxøø wine'en ja kajp naqxwiiñ jøts ku janchkumeeñ janchjotkujk;

⁹ yide'en ja ojts ñii'mxyi:

—Ngøyajjøjxp øts yø kajp tuki'iyi jøts mets yø xja'bøkøxt, pøni xwinguxanaapy øts, pøni xwindsø'jkip øts.

¹⁰ Winets ja Jesús wyaañ jøts ja tnimaay:

—Miku', jiwa'ak, kidi øts ya xwin'ixy, pø yide'ents Dios kyajpxy wya'añ: “Ja Dios Teety tu'ugyi mwindsø'ogip, ja' mbadu'ump pøni sa ja wya'añ.”

¹¹ Xjanimts ja nwindsøn'ajtim Jesús ja miku' myajtstuijyøø, jøts ja ankilis ja ñimeejnøø, ja'ats ja ojts pyudøkiyi.

Ku ja Jesús tpadøjkii'ñ ja tyunk

¹² Kuts ja nwindsøn'ajtim Jesús tñimadøøy jøts ku ja Juan jam wyinaty puxøjkjotp, winets ja ojts ñijky jam Galileit etjotp.

¹³ Jøts nika'ap ja tyaan'iyi'ñ jam Nazaret, ne'egi ja ojts ñijky tsinaabyi ma ja kajp jam mejy'am midi Zabulón etjotp jøts Neftali etjotp, jam idø'on ja ojts ñijky Capernaumit kajpkøjxp.

¹⁴ Ka'pxy idø'on ja jade'en tyuujni yjajti sa ja Dios kyugajpxy Isaias wyinaty tø wya'añ ku ja yide'en tjaadyaañ:

¹⁵ Meets Zabulónit jaa'y, meets Neftalít jaa'y, ma tuu' wingon ñaxy jam mejy'am, midi yiknido'onip xøøbidsimy ku nnøjkxint jam Jordán. Meets Galileit tsinaabyidi, pøn ka'israelit jaa'dyi.

¹⁶ Jade'en meets x'ejxpaattit midi Dios Teety ñajtskajxip sam ja jajin pøn wimbeets kugoots tyim'y'ejtnidip,

nisudso mgawinmaa'nbyaatti pøni sadam idø'on ja Dios mdsøkyidi, tøts ja tyikujajtaagi tyikudøø'kxaagi pøn ja pyøky tmi'ookwanidip jadi'iñi, jøts tø ja Dios mduu'mø'øyidi sudso mnitso'ok'attit.

¹⁷ Kuts ja Jesús ja'ayi jam Capernaum kyajpkøjxp yja'aty, yide'en ja kyajpxwa'kxnibøjkii'ñ:

—Jawidi mbøky, yiktigatsti mdsinaa'yindi, ja'agøjxp ku ja wyingøñ ja Dios kyutujk midi ja tyanitanaapy ja naqxwii'ñit jaa'y.

Ku ja Jesús twaadsøøy nimaktaxk ja ajkxmakpi

¹⁸ Jam ja Jesús wyinaty ñaxy mejpya'am midi jam Galilea etjotp, ku ja t'ejxpaajty namajtsk ja jaa'y midi ttukmiga'ax'ajttip, tu'uk txøøw'aty Simón, nayi yikxøømøøpy ja Pedro, jøts jadu'uk Andrés. Ajkxmakk idø'on ja tyunk'ajttip ixam ja wyinaty tyimñiwejtspatti ja tya'ajkxmajk.

¹⁹ Winets ja nwindsøn'ajtim Jesús ja ñimaajyidøø:

—Mada'akti, mōōt widettik ōts jōts nduknijawidit sudso jaa'y ja nitso'ok'ajtin tpaatt.

²⁰ Jōts idō'on ja nay jatyi tnaitswōjidōō ja tya'ajkxmajk jōts ja ojts tmōōdidi.

²¹ Tō wyinaty waani yō'ōdyi, jamts ja Jesūs ojts t'ejxpatkojmi nayi namajtsk ja jaa'dyi midit tukjaa'dyi: tu'uk yJacobō'aty jōts jadu'uk Juan txōōwi, ja Zebedeo dō'on ja y'una'jk. Jam ja wyinaty mōōt ja tyeety barkijotp, ja tya'ajkxmajk ja jam wyinaty y'adajkidip. Winets Jesūs ja ojts yaa'jxiyidi,

²² Jōts ja nay jatyi tmajtstuttōō ja tyeety jam barkijotp, jōts idō'on ja tmōōdidōō ja Jesūs.

Ku ja Jesūs tyik'ixpijky ja mayjaa'y

²³ Ōy ja Jesūs ōy madsoo tyimwyidity jam Galileit etjotp, ku ja ōy magajp yja'aty jōts ja yik'ixpijky jam tsaptōjkjotp, jōts ja tkajpxwa'kxy ja Dios y'ōgyajpxy midit ja tyanitanaapy ja yjaa'y, jōts ja ōy pōnjabōn tyiktsō'ōky pōn jam tigati pa'am pōjkip.

²⁴ Jōts ja Jesūs yiknija'wiyi'i'ñ, ñija'wigyōjxtōō ja' pōnity tsinaadyip jam Siria etjotp, ja'ats ojts ja pyamaa'y tyikmendi pōn jaty jam o tigati pa'am pōjkidip ajnidip, jōts ñayikmemidi ja' pōn ja miku' tō tyatōkiyidi jōts pōn ja mō'ōdyi pa'am pōjkidip, pōn kōxujxtip pakxujxtip. Xjats idō'on ja nwindson'ajtim Jesūs ja tyiktsokijxy.

²⁵ Jōts idō'on ja mayjaa'y jam jade'en yja'atti choondi pōn tso'ondip jam Galileit etjotp, jōts ja yikpawidity ja Jesūs. Jam ja'adi pōn kugajp'ajttip ma jaty ja kajp midit kyutujktaajk tjagyajptip Decápolis jōts Jerusalén, jōts nayide'en pōn tso'ondip Judeit etjotp, jōts nayide'en jamidi pōn kugajp'ajttip jaduktamajñ'ampy ma ja Jordánit nōō tyañ.

5

Ku ja Jesūs ojts kya'amay jam kojpkōjxp

¹ Xjats ku ja Jesūs ojts t'ixy ja mayjaa'y jam, winets ja ñijky kojpkōjxp jōts ja jam y'ixaajky, jamts pyabōjkpitōjk ja ñachinaa'y'awidejtōō,

² jōts ja ojts yide'en tyik'ixpōjktōki:

Ja' pōn nekim t'ejxtip

³ —Tya'ōy'ajtidip ja' Dios kyunuu'kxin pōn ja y'amutsk'ajtin yja'wip, ja'ats pyaattip ja Dios kyutujk midit ja tyanitanaapy ja yjaa'y.

⁴ Tya'ōy'ajtidip Dios kyunuu'kxin ja'adi pōn jotmayaxtip pōn jotmay'oo'ktip, ja' idō'on Dios ayo'ejxidip.

⁵ Tya'ōy'ajtidip ja' Dios kyunuu'kxin pōn myiduda'aky'ajttip ja y'awe'jx'ajtin, ja'ats pyaattip ja ōy'ajtin midit ja Dios tō tni'adsowi.

⁶ Nayide'ents ja tta'ōy'ajtmidit ja Dios kyunuu'kxin pōn tjantymtyojktip ja ōy'ajtin ja tiy'ajtin midit Dios yja'ajip, pudōkiyidipts ja' jōts ja jade'en ttu'undit sam idō'on ja tsokti.

⁷ Ñayi tya'ōy'ajtidip Dios kyunuu'kxin ja'amidi pōn t'ayo'ejxtip ja myigu'uk, ayo'ejxidipts Dios ja nayide'endi.

⁸ Tya'ōy'ajtidip Dios kyunuu'kxin ja'adi pōn ja yjanchja'win tu'ugyi yik'ejttip, kuwanits ja Dios ja tpaattit.

⁹ Tya'ōy'ajtidip Dios kyunuu'kxin ja'adi pōn yikxon tkajpx'ōyidip jōts tsep tkananktyuñidi, ja'abi jaa'y idō'on Dios u'nk'atidip una'jk'atidip.

¹⁰ Ñayi tya'ōy'ajtidip Dios kyunuu'kxin ja'amidi pōn tku'ayo'ombaa'ajtidip ja ōy chinaa'yin, jōts yikjemdundi yiktedundi, ja'abits idō'on paat'ajtidip ja Dios kyutujk midit ja tyanitanaapy ja yjaa'y.

¹¹ Ñayi tya'ōy'ajtidip Dios kyunuu'kxin ja'amidi pōn yikjemnimaadyip yiktenimaadyip uk yikjemdundi yiktedundi, yikniwambatti a'ōy'ampy ōts kōjxp.

¹² Kidits xkumayjawidi, xonjajti jotkujk'atti meets, mōj'ampy meets ja nōjxk mwingaxō'jkxiy ja'ap tsajjōtpy, pō nayide'enxi ja yikjemdundōō yiktedundōō pōn jaty tō y'atstōōnidi y'atstaniid pōn kugajpxy'ajtidip ja Dios.

Ja' pōn jade'en naxwiñ tundip sam ja jaj tyuñin sam ja kaan tyuñin

¹³ Jade'en meets idō'on sam kaan tyuñin midit wa'ats midit naxwiñ'fiit jaa'y yiktundip jōts chul'ch kyawindigō'ōdyit. Nayide'en idō'on ndejint mdunkpaattit ku mmigu'uk xuk-mado'odit ja Dios yja' sudso'ampy y'anmija'win kyawindigō'ōdyit. Kuts ka'ap jade'en mdu'undit tō wyinaty mbidsōm'di ejxim ja kaanin midit kawa'ats midit katump.

¹⁴ Kuwanit myik'ejxtit myiknijawidit nayide'en sami kajp yik'ijxyin midit jam ejxin'am midit jam kojpkōjxp. Jade'en meets idō'on ejxpajt mwa'andip sam jaj yjajyin tyi'kxyin.

¹⁵ Kidi ja'apxi yō jaj tniidōbyōki jōts ja yikpikta'akt kajuun patki'py, pō ja'axi ja wya'ant jōts ja yikpikta'akt jam ejxin'am ma ja tyikujajit tyikudōō'kxit pōn jaty tsinaadyip jam tōjkjotp.

¹⁶ Nayide'ents meets idø'ønmi, tuk'ejxti ja jaa'y ja øy'ajtin ja xondaajkin jøts t'ejxtit tnijawidit jøts kudam meets xuñ ja tiy'ajtin, mjaotwamp tam meets, myijawidipts kyunuukxyjawidipts ja' ja Dios Teety midì mee mnitanajyip o madsoo midì jap tsajpjøtpy.

Ku ja nwindson'ajtim Jesús tnigajpxy sa tyu'unt ja Moisés kyutujk

¹⁷ 'Kidi meets jade'en mwinmaañidi jøts ku øts ja' tøn nmiñ jøts øts ja Moisés kyutujk jøts øts ja Dios kyugajpxy y'ixpøjkin nyikudigøjyidit; kidi ja'a'pts ø tøn nmiñ, ja'axi ø nnimimpy jøts øts ja jade'en yikxon njaaktyimñigajpxy sa jaty ja tø wya'andi.

¹⁸ Janch øts idø'øn nwa'añ, pøni wine'en iiy tyaa'ni yø naajx yø tsajp, niwine'enints ja kutujk kyagudigø'ty kunim ja tuki'iyi ka'pxy jade'en tyimyjatt pøni ti jaty idø'øn tunipnim.

¹⁹ Paty ja ka'ap yikmøj'ext ku Dios kyutujk ttanitanit ja yjaa'y pøni pøn yiin waan tkayikmøjip ja Dios kyutujk, kuts ja myigu'uk ja nayide'n ttukpabiky sam ja kø'øm tpaduñ yiin waan, ja'ats idø'øn ja Dios kamøj'ejxip nayide'en. Pønts ka'pxy tpadump jøts myigu'uk ja nayide'en ttukpabiky, møj'ejxipts Dios ja' ku kyutujk ja ttanitanit ja yjaa'y.

²⁰ Paty mee ndukmadø, pøni ka' øy yikxon mjaa'y'atti, pøni mdundip nayide'en sam yø fariseotøjkti sam yø kajpxwejpitøjkti, nijuunits meets Dios kyutujk jade'en xkapaajtyidit midì yjaa'y ja tyanitanaapy.

Ku ja Jesús tnigajpxy sa kya'øyi ja aki jøts ja jotma'jtin

²¹ 'Tøxi xnimadowdi ku ja n'apteety'amøj yiknimaadyøø: "Kidi myikjaa'y'øøky, pøni pøn yikjaa'y'oo'kp yktüdyu'ump ja'."

²² Yide'ents mee nnøjmi pøni pøn ja myigu'uk tmi'ambøjip, nayi yktüdyu'ump ja'. Uk jam o pøn ja myigu'uk tjemnøjmi ttenøjmi, tüdyunidipts ja' ja kutujk adsinaabyidi ma ja kutujktaajk jam; uk pøn tnimaapy ja myigu'uk jøts ku ja myø'øty, paa't'ajtip ja' jøts ja y'ayo'ot ma jøøn jap ayodaajkjotpy.

²³ 'Paty pøni mbikta'akwandip ja myøxy jam altajrwemp, kuts jam mja'atti jøts winet xja'myatsti jøts kudam ja mmigu'uk jap tu'uk pøn mmidsep'ajtip,

²⁴ jamyits ja altajrwemp xmajtstu'uttit midì myoxwandip, jøts ja jawyeen x'atskajpx'øyidit møøt ja mmigu'uk. Pøni ti dø'øn mnadyama'ambøjkidip jøts mnamyjotjimbetidit xem yam møøt ja mmigu'uk, winetnims jadigojk mnøjxkt jam altajrwemp, jøtsnim ja xyoxtit midì jam tø x'ukyiknøjxkti.

²⁵ 'Ku pøn mni'øøniwya'añidi jøts ja myiknøjxwaa'ñidi jam kudunk wyindum, nanga'anim jam myiknijkxyidi, tiku yikxon xkakajpx'øyidi jøts ja møøt mnamyjotjimbetidit jadigojk, jøts kidi myiknijkxyidi jam windsøn tüdyumbi wyindum. Ja ti nø'ømp ja windsøn jam? Pø mgøyakidipxi ja jam jøts mee myikøyakt ma ja tajk mayojr jamdi, ja'ats mee myikpuxøjktøkiyip jøts mee myiktsu'umt.

²⁶ Øts idø'øn wamp, jøts ku jaanim mbidsø'ømdit ku wyinaty tø ja multi xkubatøkøjti.

Ku ja Jesús tnigajpxy pøn tø øxy yaa'y nabyøjkxidip

²⁷ 'Tø meets inet ja xnimadowdi ku jekyip yide'en yjawa'andi: "Kidi mmigu'uk ñiyaa'y ñidø'øxy xpøjkiyi."

²⁸ Yide'ents øts nwa'añ, pøn ja'ayi t'ejxkip ja tø'øxyøjk øy ja nugo y'am yjotp yjawnmay, pøkytumpt idø'øn ja jade'en.

²⁹ Pøni ka'ap yø mween y'øyi ku yø mduktunk'aty jøts myikpøkyunwaa'ñ, jade'en ne'egi mdyimdyø't jøts ku mnawyenuudit, jøts jagam xpikta'akt ja mween; ne'egi øy'ajtp jade'en ku ja'ayi wyindigø'ty midì myikpøkyunwajnip, jøts kidi amuum mwindigøøgyixy, jøts kidi amuum mnijkyx jap ayodaajkjotpy.

³⁰ Uk nayide'ents mgø' myikpøkyunwaa'ñi, ne'egits xkajtspoott jøts køtuk mda'ant; ne'egi øy'ajtp jade'en ku ja'ayi wyindigø'ty midì myikpøkyunwajnip, jøts kidi amuum mwindigøøgyixy, jøts kidi amuum mnijkyx jap ayodaajkjotpy.

Ku ja Jesús kyajpxwiyi sudso ja amajtsk'ajtin ñaxy

³¹ 'Nayi tø jekyip yiknigajpxy: "Pøni pøn ñidø'øxy tmajtstu'utwamp, tiy'ajtingøjxpts ja tminawya'kxit, kojp tu'uk ja nøky."

³² Yide'ents ø nwa'añ, ku pøn yaa'dyøjk ñidø'øxy tminawya'kxyi a'ø'yampy, ku ka'ap ja wyinaty ja wenk yaa'dyøjk tmøøt'aty, møj tundigø'øyin ja tyumpy, jøts ja tø'øxy pyøkyuñ ku ja wenk yaa'dyøjk ja møøt y'amajtskimyi. Nayi pøky ja yaa'y nayide'en taja'jtipp pøni myøøt'amajtskip ja tø'øxyøjk ja' midì tø wyinaty yikmajtstu'uty.

Ku ja Jesús tnigajpxy ku ka'ap Dios køjxp nugo ndaay'ajtin

³³ 'Nayi tøts inet xnimadowdi ku ja mdeety'aptojk jekyip yiknimaadyi: "Pøni ti mni'adso'owip Dios wyingujkp, kidits meets ja xka'ukyik'adujkni ja mgajpxy ja m'ayuuk."

³⁴⁻³⁵ Øtsts wamp jøts pøni ti ja mmigu'uk mdamini'adso'owip, ka'ap ja Dios nugo xyik-testigi'att. Ni xkakajpxpaattit ja tsajp jøts ja naajx, jabi Diosxi ja nayide'en yja'ajtpy; ni ja Jerusalén kajp xkakajpxpaattit, jabi nay ja Dios møj yikutujkpixi kyajp ja'.

³⁶ Uk kò'òmbaat mgubajk x'awanidi ku ja kyayikmibiky midì mjadukjanchjawiwiyandip o pòn, kidits jade'en nugo mwa'andi, kidi kò'òmìpxi meets mwaay mgubajk xyik'òyi, pò nay Dios ja jade'en kò'òm nmòòjyidip.

³⁷ Ka'ap nugo ti xkajpxjimbettit xkajpx'adòjtìt pòni ka'adam ja ka'pxy xnijawidi, jade'ents idò'òn ja miku' ja tyunkjòòp tyikyò'òy ku xkajpxyondi.

Ku ja Jesús tnigajpxy sa pòn ja pyòky ñanktyukubetyidi

³⁸ Nayi tò net xnimadowdi ku ojts jekyip yide'en yiknigajpxy: "Jòts nayide'en pòngapòn ja myigu'uk tyik'ayo'ombaat pòni ti ayo'on ja jade'en ttuñ, nayide'ents idò'òn ja tyimiyktu'unt."

³⁹ Yide'ents ø nwa'añ: Jòts kidi mee nayide'en xuñ sam ja ka'òyjaa'yindi; pòni mgojxip mdse'jkìp, ja' øy ku xmaa'kxuktit.

⁴⁰ Kuts øy pòn mniwambatwa'añidi jòts adsepjøxp myikpøjkxiwya'andi ja mnijan, mo'odits, jòts pòni yjaaktyimbyòkwampy ja yukwop, kidits ayuujk nugo xyikyondi, mo'odi.

⁴¹ Pòni myiktaguwa'anidip jòts tsimy xpadsò'òmdit, jòts ja jam xyikja'attit pòni ma tò t'a'ejxidi, mjaaktyimdyuujnidipts ja may'ajt ja' jòts ja jawaani jagam xyikja'jtìdit.

⁴² Jade'en'ampy meets ja Dios Teety tsajpjotpit mja'bòkidit jòts ja m'u'nk'atidit; pò tum ja'axi tyikni'amp tyiknijajp ja øyjaa'y ja ka'òyjaa'y, uk ku tyu'uy ja'ats ja nòò tuu tkajxp.

⁴³ Kuts meets ja'ayi mòòt mnamyayi pòn mee mmiyuy'ajtip, ÷tits ja jade'en ñiwya'ant, ti may'ajt meets ja jade'en myiktagumøyip? Pòn ja jade'en tkajajtp, yikugubajtpi paat ja jade'en ttuñ.

Sudso yikminamyayit ja midseptøjk

⁴³ Nayi tò xnimadowdi ku jekyip yide'en yiknigajpxy: "Ja' mòòt mnamyayit pòn mòòt mnamyig'ukwa'añi, jòts ja kawin'ijxyim xjawit pòn mòòt mnamyidsep'atyi."

⁴⁴ Yide'en ø nwa'añ: Jòts xtsoktìt xmiyuy'attit ja mmidseptøjkti, ødyejti ja' pòn mga'ødyejyidip, pudøki ja mmigu'uk pòn mjami'ajkidip mjamijotma'jtìdip, ku'amidowidi meets ja' pòn mjemnimaa'jyidip mdenimaa'jyidip, pòn mjemduujnidip mdeduujnidip.

⁴⁵ Jade'en'ampy meets ja Dios Teety tsajpjotpit mja'bòkidit jòts ja m'u'nk'atidit; pò tum ja'axi tyikni'amp tyiknijajp ja øyjaa'y ja ka'òyjaa'y, uk ku tyu'uy ja'ats ja nòò tuu tkajxp.

⁴⁶ Kuts meets ja'ayi mòòt mnamyayi pòn mee mmiyuy'ajtip, ÷tits ja jade'en ñiwya'ant, ti may'ajt meets ja jade'en myiktagumøyip? Pòn ja jade'en tkajajtp, yikugubajtpi paat ja jade'en ttuñ.

⁴⁷ Uk xkajpxpoo'kxtits ja'ayi pòn jaty mmigu'uk'ajtip pòn tu'ugyi ja mdsinaa'yin mòòt ñabyaadyi, ÷ti øy'ajtin meets idò'òn jade'en mdumpy? Ti pòn ja jade'en tkajajtp, pò nayide'enxi ja y'adò'òtsti pòn Dios tkajanchja'widip.

⁴⁸ Yikxonts mjaa'y'attit øy wa'ats, nayide'en sam ja mgunuu'kxtyeety midì jap tsajpjøtpy.

6

Ku ja Jesús tnanky'ixpiky ja ødyu'unin

¹ Øyim x'ejxtit, jòts kidi mdsinaa'yin nugo xa'ødyøki ñadyjyi ja mmigu'uk xuk'ejxti øy paat. Pòni m'adò'òtswandipts jade'en, niwine'enints meets Dios Teety may'ajtin ja mgadagumøyidit ja' midì jap tsajpjøtpy.

² Paty ku xpudøkidit øy pòn ayoobi jaa'y, kidits meets ja niduki'iyi jaa'y xamimadyakixy, kidi mee nayide'en m'adò'tsni sam ja jaa'dyi midì jam tsajptøjkjotp, midì jam nòò'am tuu'am win'òò'ndip. Jade'en'ampy meets idò'òn ja jade'en y'adò'òtsti jòts ja kajxa'aky pyidsò'òmdit, jade'eñits myay'ajtin ja tpøkti.

³ Jòts ku xmo'ot øy ti ja ayoobi jaa'y, tunts idò'òn jade'en jòts kidibaat ja xuknijawi pòn me mjadyimyjamøjmigu'uk'ajtpy,

⁴ ne'egi øy ku ka' pòn xuknijawit ku jade'en xu'unt. Jòts ja Dios Teety wa'ats ja t'ixy ti jaty me mdumpy øy ja pòn xjadaduknijawi, mbaajtipts mets ja myay'ajtin ja'.

Ku ja Jesús tnanky'ixpiky ja Dios'ajot'ajtin

⁵ Jòts ku mdsapakjpxtit, kidi jade'en xundi sam ja jaa'y midì win'òò'ndip, ja' midì tsojktip jòts ja tani Dios'ajot'attit jap tsaptøjkjotpy, uk ma jaa'y y'ejxidit jòts ja jade'en yikajxa'aktit. Jade'eñits ja kò'òm ñadyukpikyidi ja myay'ajtindi.

⁶ Kuts ja Dios x'ajot'attit, tøkidi mdøjkjøtpy, agò'odi ja mdøjk jòts xminuu'kxa'aktit anadyu'uk'ampy ja mDios Teety, pò ixajpxi ja nayide'en jòts y'ijxpy ja' ti jaty mee mdumpy, øy meets ja pòn xjadaduknijawi.

⁷ Jòts ku dò'òn jade'en ja Dios x'ajot'attit, kidi ja xkajpxjimbettit xkajpx'adòjti midì tò xja'ukajpxti, kidi jade'en m'adò'tsni sam ja jaa'dyi pòn Dios tkanija'widip, pòn winmaadyip ku ja y'òòmayidit kyajpxmayidit winets Dios ja myadowidit.

⁸ Kidits meets nayide'en m'adi'ich sam ja y'adò'òtstin; pò wa'atsxi Dios Teety ja ne'egi tnijawi pòni ti meets idò'òn mga'ejtxip, pòni ti meets idò'òn mdsøjkpy, wa'ats ja tnija'wiñi yam meets ja xka'amidøynim.

⁹ Paty idø'øn yide'en ja Dios x'ajot'atti:

Dios Teety tsajpjotpit,
kuuyi mets jadu'uk øy wa'ats.

¹⁰ Øyts ku xmimiñ ja mgutujk midì mdanitanaapy ja mjaa'y.

Yikjatts yä naxwiññ nayide'en kø'ømdsojkingøjxp pøni sä xamidsøky nayide'en säm jap xuñin tsajpjotpy.

¹¹ Møøkyts øøts ixyam ja ngaajyik n'uujkik midì øøts xka'ejtxip.

¹² Maa'kxik øøts ja nga'øy'ajtin ti jaty øø tø nduñ, kumi tø øøts nayide'en mmaa'kxuky pøn øøts xjemdump xedump.

¹³ Agidyujk øøts axajtujk øøts, kidi øøts xmajtstu'uty jøts kidi myajada'aky ja miku' yja'.

Pø metsxi ja' mgutujk midì ja mjaa'y mdanitanaapy, mets amuum møk'ajtin, jøts ja øy'ajtin xondaajkin midì xemikøjxp. Jade'en idø'øn ja yjatt.

¹⁴ Pøni mmaa'kxuktip ja jaa'y pøn mjemduujnidip mdeduujnidip, nayide'ents meets ja Dios Teety mmaa'kxukidit pøn jap tsajpjotpy;

¹⁵ kuts pøn xkamaa'kxuktit, ka'ats meets ja Dios Teety mbojkipmaa'kxidit.

Ku ja Jesús tnigajpxy ja amaay'ajtin

¹⁶ Jøts ku m'amaay'attit ku ø xkagugayidit xkagu'uugidit, kidi meets jotmay'øøgyim x'ejxnidi, kidi meets ja jade'en xyknigaxi'iky säm y'adø'øtsti ja win'øø'mbi jaa'dyi; jade'en'ampy ja jade'en ttundi jøts ja ttuk'ejxti øy pøn jaa'y ku ja jade'en y'amaay'atti. Jade'eñi ja tpaatti ja may'ajtin jøts ja ka'ap Dios yja' tpaajtidi.

¹⁷ Kuts mee m'amaay'att, nawyooigi nagyaaxi, puj mween m'aagw,

¹⁸ jøts ja jaa'y kidi tnijawidi jøts kudam me m'amaay'aty. Ja Dios Teety ja tu'ugyi tnija'wip, pø ixajpxi mets ja møøt. Øy mets ti xuñ xkajpxy, ñija'wipits ja wa'ats; nay ja'ats mets ja may'ajtin mmo'ojip.

Ja kunuu'kxy jujky'ajtin midì jap tsajpjotpy

¹⁹ Kidi meen kidi pikta'aky ya naxwiññ nugo x'abøjktøkidi ma ja'ambi jøø'kxpi tyikudigøy ja pikta'aky, jøts ma maa'tspi kadye'ebyi tyøkidi jøts ja tuki'iyi tyikpidsømguixy ja pikta'aky.

²⁰ Ne'egi øbyidsø'omp jade'en ku xjøp'ijxy'attit jøts xpaattit ja jujky'ajtin midì jap tsajpjotpy, midì ka'ap mwindigø'xiyidip.

²¹ Pøni ma xnajtsjawidi xpaatwa'andi ja jujky'ajtin, nay japts meets ja mwinmaa'ñ y'ity.

Ja øy jaj midì ja jaa'y tyikja'gyukip

²² Xjats ja Jesús yjaakwaañ:

—Jade'en idø'øn yø mween n'ukpiktaajkint säm ja jajin, yøøts tyikujajtaajkip tyikudøø'kxaajkip amuum ja mne'kx mgojpk; kuts ja mween y'øy'aty, nayide'ents ja amuum tjagyepy ja ne'kx ja kojpk, ka'ap ja ttuktuñ ja kya'øbyi;

²³ kuts ja mween kya'øyi, nayide'ents ja tyikjaty ja ne'kx ja kojpk säm pøn kube'ets kugoots y'ity. Pøni jamts ja jaj xmøødi jøts kuts ja xjaaktyimiyik'ookni ku ja jade'en yjaaktyimiyajtni säm kyooost'ityin, jjaaktyimiyinajxpts ja' yam ja tø yjakoodsimyi!

Ku ka' tuk'ojkyi majtskjøøp n'ajot'ajtin jade'en ja Dios jøts jade'en ja meen

²⁴ Ka' pøn tumbi namajtsk wyindsøn tmiduñ, ku ja jade'en ttu'unt, tu'ukts ja pyidsø'ømt pøn ja wyinjawip, jøts ja yjadu'ukpi ja tkawinjawit, tu'uk ja t'ømyidu'unt jøts ja yjadu'ukpi ja tka'ømyidu'unt. Paty nayide'en ka' pyaatt'aty jøts nmidu'unin ja meen ixyadamts Dios njamidu'unma'andi, tu'ugyi Dios n'ajot'ajtin.

Ku ja Dios t'ejx'ity pøn jaty ja y'u'ngipy'una'jkip

²⁵ Ja'agøjxp øts idø'øn nwa'añ, jøts kidi xjotmay'atti pøni ti dø'øn mga'adyip m'uuktip, pøni ti dø'øn mdajujky'attip, ni ja mwet mnaamy xkajotmay'attit ti dø'øn mnadyaxoxidip. ¿Ti jade'en ja jujky'ajtin yikpaaty sami kaaky jii'kxyin? Pø ka'axi. ¿Jøts ja wet naamy mibaat ja t'uk'amibaat nayide'en pøni sä dø'øn ja ne'kx ja kojpk yikmøøt'aty?

²⁶ Ejxti yø joon, ejxti yø jiyujk midì kakwidejttip jam tsajpwemp, ka'axi yø ñe'epti kyojti, ka'axi pyikta'aky yø tyikpidø'økti, ka'axi pyikta'aky yø tpøkjø'økti jøts pikta'aktit jap tsajpjotpy; øy yø jade'en yjagatundi, yikmøødyipts yjii'kxy yø', ja' yø tmøøpy pøn mee m'ajot'ajttip, ja Dios Teety pøn jap tsajpjotpy. ¡Tits mee mdsow sä ja jiyujk jade'en ja yja' yikmo'odi!

²⁷ ¿Pøn kø'ømdsøky tyimy'uknankyojnip jagujkp metrin, øy ja mabaat jade'en tjadyimy-jatsøky?

²⁸ ¿Jøts tiku xjotmay'atti ja wet ja xox? Ejxti yø ujts ejxti yø pijy midì yomp aayjøøjty ujtsjøøjty, ka'axi yø pyeetti kyojti, ka'axi yø ti ttundi;

²⁹ jøts øts idø'øn yam wamp, jøts ku ni ja rey Salomón jade'en ojts kyanadyaxøxyi ja xyox ti jaty ja jam wyinaty myøøt'ajtpy, säm yø ujts säm yø pijy tmdisujkaxi'iky ja xyox.

³⁰ Pøni xyøjxpy tamts Dios jade'en ja ujts midi ja ixyam yomp ja aayjøøjty ja ujtsjøøjty, øy ja jabom wixøjkr yjayiknitsaafit, jtits mee mdsow sa ja ujts sa ja pijy jade'en yjaakiykxøxy, meets kaja'gyukibiidi meets ka'ajot'ajtpidi!

³¹ Paty kidi mmaydi mdajti, jøts kidi mwa'andi: "¿Ti døøon ngaa'yim njøø'kxim? uk ¿ti døøon n'uujkim? uk ¿ti døøon nwet'ajtim nnaamy'ajtim?"

³² Tum yø yjade'embj pikta'aky pyawinmaadyip ja jaa'y pøn Dios yja' tkaja'gyukiyidip; meetsts mjagyajpip ja Dios Teety midi jap tsajpjøtpty, ja' ja tnija'wip pøni ti mee mga'ejtxip.

³³ Ja'ats meets jawyeen mjotmay'atp sa xpaattit ja Dios kyutujk midi ja tyanitanaapy yjaa'y, jøts nayide'en ja y'øy'ajtin chu'ajtin midi yja'ajtpy, mbaatpts meets ja yjade'embj pikta'aky tuki'iyi.

³⁴ Paty kidi nugo xjotmay'atti pøni ti me'emp kida'akp jabom wixøjkr, jabi kø'ømxi ja ñanky'ejxit ñankñijawiyit ja jabomit'ajtin.

7

Kidi pøn o ti xawindsø'ødyi

¹ Kidi pøn nugo o ti xapøky'ejxti, jøts Dios nayide'en mgapøky'ejxidit.

² Nayide'en meets Dios ja mdagubatiyt pøni sa meets ja mmigu'uk xuñ, nay ja'ats ja yik'awetsp.

³ ¿Sudso døøon ja mmigu'uk pyøky x'ejxpaajtyi, jøts ja mja' ne'egi xka'ixy kudam ja jawaani mõj?

⁴ Jøts, ¿sudsots mets idøøon namyikajxim xkajpx'øyiywya'añ yam mets ja mdsinaa'yin øy xkayikyø'øy?

⁵ Meets win'øø'mbi ataadyi! yik'øyidi jawyeen ja mga'øchinaa'yindi, winetnimts ja mmigu'uk chinaa'yin xkajpx'øyiyidit.

⁶ Jøts kidi nugo ajawi øy pøn xmo'odi midi ja Dios yja'ajip, kidi jade'en xundi sam uk'otigati nugo ajawi yikmø'øy, ku ja nay ja'ayi m'uktanibidø'jkniyidit, jøts tsojk tatsu'tsa'am m'ukyik'ejxnidit. Jøts kidi nugo ajawi kukmadowdi Dios kyajpxy pøn tkaja'gyukidip, ku ja nugo t'uk'amnixeknidi t'uktsaachnixeknidi, taxi'iky nugo tjawidi.

Amidowdi pøktsowdi, ixq'adi kugajpxidi øy ma

⁷ Amidowdi pøktsowdi, jøts Dios mmo'o'jidit; ixq'adi pøni ti mga'ejtxidip, mdukpaadipts meets Dios ja'; uk ku mgugajpxidit muum, yik'awa'atspts øy pøn ja tøj'aaaw.

⁸ Ti ja kidyimy'ukyikmøøpy pøn t'amidoop pøn t'pøktsoop, pyajtpy ja' pøn tigati t'ixaapy; uk ku pøn kyajpxwidity kyugajpxi, øy muum yik'awajtsxiypts ja tøj'aaaw ja øy pøn.

⁹ ¿Ti wan meets ja ndejin winaagin pøn y'u'nk y'una'jk tmøøpy tsaq ku ja t'amidøy tsapkaaky?

¹⁰ ¿Uk tmøøy tsaq'ñ ku ja t'amidøy ajkx tsa'ay?

¹¹ Øyts mee mabaat mjagatyimy'øyjaa'y'atti, mjajtipts ku xmo'odit m'u'nk m'una'jk midi øy tsuj pidsømp, jtits Dios tyungip pø tsajpjøtptyxi ja', myo'opts ja' ja øy'ajtin ja tsuj'ajtin pøni pøn ja amido'oxiyip!

¹² Jade'en idøøon xun'ettit, meets idøøon ja mmigu'uk mwindsø'øgip sam meets ja kø'øm xjatsøky ja nawyindsø'øgi; kumi yø' idøøon ja Moisés kyutujk ñ'ane'empy, jøts nayide'en wya'añ ja kugajpxtyøjk ja ñøkyti.

Ja mutsk tøj'aaaw

¹³ Jap idøøon mdøkidit ma ja tøj'aaaw kadanaxyim midi mutsk midi xu'uts. Møj ñidøjk'aaaw ja', mõj ñiduu' ja' midi nøjkxp jap ayodaajkjøtpty manim idøøon tuki'iyi wyindigøøgyixy, may ja' pøn jap tøjkidip;

¹⁴ Jøts ja tøj'aaaw, jøts ja tuu' midi nøjkxp jap ma tsinaa'yin xemikøjxp nbaajtindit, mutsk ja' xu'uts ja', niwaani ja iidiy pøn idøøon ja tøjkidip.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

¹⁵ Øyim mnay'ejx'etidit, øyim x'ejxtit ja jaa'y pøn win'øø'ndip, ñadyijiywya'andi jøts ku Dios yja' ja tkajpxidi. Ñadyijiy ja mninijkyidi amyuyj tsaachyuyj, ja' y'aawidip yjojtidip ja kubety'ajtin, ja' wyinmaa'ñ'ajttip ja kya'øybi.

¹⁶ Ja' meets ja mda'ejxkap pøni ti jaty tyundip, pøni sa jaty y'adø'øtsti; ka'axi uvi tsa'am yikwiduky jam kujp kipkyøjxp, ni iigi tsa'am kyawinaky jam kujp'aagyipkyøjxp.

¹⁷ Paty idøøon ja kipy midi øy, pøni øgyipy ja', nayide'ents tyøøm ja øy tyikpidsimy; midi'its ka'øy, nayide'ents tyøøm ja tyikwingaxi'iky ka'øy.

¹⁸ Ka'ap ja øgyipy tyøøm tyikwimbidsimy ka'øy, ni ja ka'øgyipy ka' tyøøm tyikwingaxø'økmi janch øy.

¹⁹ Ja kipy midi jaty ja tyøøm ka'øy, jøts kumi nayide'en idøøon ja kipy kya'øyi, yikpootp ja' jøts ja ñitø'øty jap nønjøtpty.

²⁰ Jade'en meets idø'øn ja jaa'y x'ejxkapt, ja' ja tniġajpxp pøni ti jaty tyundip pøni sa jaty y'adø'øtsi.

Ku ka'ap pøn nugo ajawi tyøkit ma Dios ja kyutujk ja naxwii'ñit jaa'y ttanitani

²¹ Pøni pøn jaty øts jade'en nugo xkajpxpatp, jøts nika'ap ja Dios Teety yja' tpaduujniyidi, ja'ats ka' tpaatti ja Dios kyutujk.

²² Ku tpaatt ja'abi tiempi, ku yja'att ja xøøw jumøjt, may øts ja jaa'y xnøjmidit: "Windsøn'ajtim, windsøn'ajtim, ja'ats øøts tø ngajpxwa'kxy mets ja mja', mets køjxp øøts ja jade'en tø nduñ ku øøts ja miku' tø ngajpxpidsimy jøts øøts jaa'y ja ndukmajtstu'uty, jøts ku øøts ja milagri nayide'en may'ojk tø nduñ."

²³ Kuts ja jaa'y jade'en xnøjmit, winets n'adso'ot: "Ka'axi mee ma møøt nnay'ijxy'aty, j'awa'akti ya kidi øts ya xwin'ejxti, ku meets kawine'en tø mgawindiy'aty jøts xundi ja kya'øybi."

Majtsk jøøjp ja pøch kyojpk

²⁴ Pøn ø xmimadoop jøts jade'en ttuñ sa nwa'añ, jade'en idø'øn ja' sam ja jaa'y midu wiyi midu tyøjk tkojp tsaagøjxp, tum tsaaj ja amuum tyukojpk'ajtpy.

²⁵ Kuts ja tuu myiñ, jøts ja nøgom pyidi'jky, amuum ja nøø'aaw nøøjoojt kyombejty, jøts ja poj jadi'iñi tyikpojwimbetwani ja tøj; jøts ja nigidi kyidaay, kumi tum tsaaj ja jap wyinaty amuum kyojpk'ajtpy.

²⁶ Pønts ø xkamimadoop ku ka'ap jade'en ttuñ sa nwa'añ, jade'en idø'øn ja' sam ja jaa'y midu tkaja'gyukip o ti, midu ja tyøjk ojts tkøjy jam pu'jotp.

²⁷ Ku ja tuu ojts myiñ, jøts ja nøø'aaw nøøjoojt kyøømy, jøts ja poj jadi'iñi tyikpojwimbetjni ja tøj, ojts ja tøj kyiday. ¡Adsø'jkibim ja ojts yjanchkujeti!

²⁸ Ku dø'øn ja nwindson'ajtim Jesús kyajpx'abajtiy'ñ jøts ja jaa'y janchñigyumaap tja'widøø ja ixpøjkin;

²⁹ pø jade'enxi ja yik'ixpikyidi sam o pøn møk'ampy kutujk tjagyepy, ka'ap ja jade'en yik'ixpikyidi sam ja kajpxwejpitøjkti.

8

Ku ja Jesús tyiktsøøjky ja jaa'y pyu'uts

¹ Ku Jesús chøø'ñ jam kojpkøjxp jøts kyidaajky, may jaa'y ja ojts pyadsøøñi.

² Xjats jaa'y ja ojts tu'uk wingon ñinijkxyi, møj pu'uts pa'am ja øjkip, ja'ats idø'øn jam ojts ñagyuxendya'agyj jam nwindson'ajtim Jesús wyingujkp, jøts ja tnimaay:

—Teety, mmøøt'ajtpy ja møk'ajtin jøts xyiktso'okt, yiktsokts øts mdsojk'ajtingøjxp.

³ Xjats ja ojts ja'ayi tkønixajy, yide'en ja tnimaay:

—Ndsøky'ajtpy øts jøts mdso'okt. Tsokni.

Ja'ayi ja jade'en wyaañ, jøts ja pu'uts øjkiabi jaty: ñajxy ja pya'am, jaty: tyaagyixy ja pyu'uts.

⁴ Jøts nwindson'ajtim ja ojts ñii'mxyi:

—Øyim x'ext, kidi pøn xukmadø; øy ja'ayi xninøjkxt ja teety ja', ja'ayi m'atspaatp jøts ja myøxy ja'ayi xpikta'akt midu ja Moisés ojts tni'ane'emy, jøts ja jaa'y t'ejxtit jøts ku tø mdso'øky.

Ku ja Jesús tyiktsøøjky ja romanit soldadi tyumbi

⁵ Xjats ku ja Jesús kyajptøjkiy'ñ ma ja kajp jam txøøwi Capernaum, jamts ja tu'uk ñimejni ja romanit jaa'y midu wyinaty tni'windsøn'ajtp nidukpiky ja soldadidi, ja'ats ja møk'ampy nimaajyøø,

⁶ yide'en ja wyaañ:

—Teety, ixajp øts tu'uk ndumbi pa'am tmigo'kni ndøjkjøtpy, jadi'iñi tø myujkni xyujxni, yjanchkupijky idø'øn ja jap ja jayyi tøøyi.

⁷ Winets ja nwindson'ajtim Jesús ja tnimaay:

—Øy øts ja n'atsyiktso'okt.

⁸ Jøts ja jaa'y yide'en y'adsowimbijty midu idø'øn twindsøn'ajtp nidukpiky ja soldadidi:

—Teety, ka'ap ø xpaat'aty jøts mets mdøkit ndøjkjøtpy; ana'am ja'ayi jøts cho'okt øts ja ndumbi.

⁹ Nayide'en øts ane'emy n'lity, nay jats øts ndumbimi midu ø n'ana'amp. Ku øts nidu'ugin nnojmidu, nøjx, nøjkpts ja jaty; uk nnojmits øts jadu'uk jøts mye'ent, mempts ja jaty; uk nduktunwā'añ øts ja ndumbi øy ti pøn øts jadi'iñi ñiyiktumpy ndøjkjøtpy, tyumpts ja' pøni sa øts ja n'ane'emy.

¹⁰ Xjats ku Jesús ja jade'en tmadøø, ñigyumaap ja tja'wiyi'ñ, jøts ja tnimaay pøn jaty ja jam wyinaty payø'øyiyip:

—Janch øts idø'øn nwa'añ, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy.

¹¹ Øts idø'øn wamp jøts ku may najjade'embi jaa'y øy madsoo choondit, jøts møøt jujky'ajtpi y'ixa'aktit ja Abraham, ja Isaac jøts ja Jacob; yik'ejxti jap ma Dios kyutujk ttanitani ja yjaa'y;

¹² Jøts pøn japaat'ajtidip jøts ja yjap'attit ma Dios kyutujk ttanitani ja yjaa'y, yika-jxpidsø'ømdipts ja jap jøts ñøjkxtit ma kube'ets kugoots, jøts ja jap chabaawidettit y'amdøtskaattit chaachtøtskaattit.

¹³ Jøts idø'øn ja nwindson'ajtim Jesús tnimaay ja jaa'y midi tniwindsøn'ajtp tukpiky ja soldadidi:

—Nøjkxni mdøjkwindum, jøts sa tø xjanchjawi yiktu'umpts ja jade'en.
Jøts ja tumbi nay jatyi myøkpiky.

Ku ja Jesús tyiktsøøjky ja Pedro tyaaqmøjt

¹⁴ Winets ja Jesús ojts ñijkxy Pedro tyøjkwindum, jøts ja jam ojts tpaajti ja tyaaqmøjt, jøts kudam ja møk jømba'am ja jam tmigo'kni.

¹⁵ Ojts ja tnixaji kyø'køjpx, jøts jømba'am ja ojts jatyi ñiwa'a'achiyi; ojts ja jatyi wya'kuki jøts ja nay jatyi wyindsø'jkidyøjkiydøø.

Ku ja Jesús tyiktsøøjky ja maabyamaay

¹⁶ Xjats ku kyoodsiyi'ñ, jøts ja nwindson'ajtim Jesús may'ampy ja jaa'y yiktanimiñ midi ja miku' wynaty tø tyatøkiydi; jøts ja ojts ja 'ayi tuk'aawy tmigajpxy, ja 'ayits ja tyuktapidsøøm ja maamyiku' jøts ja tyikmøkøpkijxy niduki'iyi ja pamaa'y.

¹⁷ Jade'en'ampy idø'øn ja jade'en yjajty, jøts idø'øn ja jade'en tyimyjaty sa wynaty tø tñigajpxy ja kugajpxy Isaias, ku ja yide'en wyaañ: "Ja' tuki'iyi tmdanaagyøjpx adøm n'ayo'on, nay ja' tmdanaapy adøm ja nbøjkin n'a'a'nin."

Ja jaa'y midi wynaty tpawidewamp ja Jesús

¹⁸ Xjats ku ja nwindson'ajtim Jesús ojts t'ixy ku mayjaa'y ja yjanchtamujkniyi, winets ja ojts wya'añ jøts ttanaxtit ja nøø jøts ñøjkxtit jam jaduktamajñ.

¹⁹ Winets tu'uk ja kajpxweipi myiñ ma ja Jesús jam wynaty, jøts ja Jesús ojts yiknøjmi:

—Windsøn, tsoomp øts, nbanøjkxp mets øy madsoo pøni ma me mnijkxy.

²⁰ Jøts ja nwindson'ajtim Jesús y'adsøø, yide'en ja wyaañ:

—Ne'egi jaa ja waa'jx yjut, ne'egi jaa ja joon pya'an; øtsts, niti ø xka'ejtxi øyik øts idø'øn ma n'øøni'int.

²¹ Xjats ja jaa'y jadu'uk wyami midi ja wynaty pyabøjkpi'ajtpy, yide'en ja ñimaajyøø:

—Windsøn'ajtim, tñijkxy øts jawyeen ja ndeety t'atsyiknaxøki.

²² Winets ja Jesús y'adsøø jøts ja wyaañ:

—Møødik øts, majsttu'ut yø oo'kpi, wan ja tyikpidø'økti ja myi'oo'kpi pøn y'anmija'win jajujkyi tø tyik'oo'knidi.

Ku ja Jesús tyiknaxjy ja møk poj jøts ku ja tyik'amøkiyi'ñ ja mejy

²³ Jøts ja nwindson'ajtim Jesús tyøjkifaa jam barkijøtp møøt ja pyabøjkpitøjk.

²⁴ Winets ja poj møk'ampy yjantyimyñ jam mejyjo'tp, jadi'iñi ja nøø yjanchtojmjø'kni jøts jap barkijøtpy yjanch'ayø'øiyini. Maapts ja nwindson'ajtim Jesús wynaty.

²⁵ Winets pyabøjkpitøjk ja ojts yuxyiyi, yide'en ja ojts ñi'mxyiyi:

—Windsøn'ajtim, ejx øø nnøøjøø'kxni, yiknitsok øøts! iPø nøøøjkijy'adøjtsnampts!

²⁶ Jøts ja t'adsøø yide'en:

—¿Ti mdsø'jkidip ku mdsø'øgidi? jJanch yii'nim meets ja janchja'win xmøøt'aty!

Xjats ja tyanaagyukiyi'ñ, jøts ja ojts tñøjmi ja poj jøts wan tñaxy jøts ja mejy kya'uk'adøtsnit; jøts idø'øn ja jadi'iñi myøøñ, nayide'en jotkujk'atyim tyaañ sam idø'øn ku ja et kyapøjy.

²⁷ Jøts ñigyumaap ja tyimyja'widøø, nømdip ja'!

—¿Ti pøn jaa'y yø jade'en, mimadoojipaap poj yø', mimadoojipaap mejy yø'?

Ja Gadarit jaa'y pøn wynaty ja miku' tø tyatøkiyi

²⁸ Xjats ku ja nwindson'ajtim Jesús yja'jty jaduktamajñ mejy'agøøm, jamts ñaxwimbidsøømdøø Gadara y'etjotpti, winets jaa'y namajtsk pyidsøømdøø jam kamisantjotp ma oo'kpi ñaxøkidi, jøts ja ojts tñimendi ja nwindson'ajtim Jesús. Miku' ja wynaty tø tyatøkiydi tum jade'en ja namajtskti, janch tyimgyubetyts idø'øn ja'adi, ka'ap idø'øn ja jam øy pøn tkunaxi jam tu'am.

²⁹ Jøts ja yjanchabaabinaxwa'aktøø:

—¿Ti øø xanibøjkpi, ti tsepxik adøm njagyejpyim, mets Jesús, mets Dios U'nk? ¿Ja' mets ya tø xnimiñ jøts øøts ixamyi xtyimyk'ayo'ombaawangøjy?

³⁰ Nay jamyts idø'øn wingon wynaty y'øjkwidejtmidi maagyuch;

³¹ winets ja miku' nuu'kxaajkingøjxp t'amidoodøø ja Jesús, yide'en ja tnimaadyøø:

—Pøni xyikpidsømwaamp øøts, wants øøts yø' kuch ttatøki.

³² Xjats ja Jesús wyaañ, yide'en ja tnimaay:

—Nøjkxti.

Jøts idø'øn ja miku' jade'en pyidsømdøø, øjts tmatjstu'tutti ja jaa'y jøts ja maagyuch ja ttøjkidyøø; winets ja kuch niduki'iyi yjanchnabyagunajxidøø jap jaa'jøtpy jøts ñaxkidaktøø jap nøøjøtpy, japt ja ñøøjøø'kxkøjxtøø.

³³ Jøts ja jaa'y midu' winaty kuch'ejxtip, øjts ja kya'akti, janch tsø'jkidip ja', jøts ku ja jam kajpjotp yja'ttøø, jamts ja tuki'iyi tnimadyakøjxtøø sa wyinaty ja jaa'y tø yjatti kyubatti pøn ja miku' wyinaty tø y'uktatøkiyidi.

³⁴ Winets ja jaa'y niduki'iyi cho'ondøø pøn jaty jam wyinaty kajpjotpti, jøts ja øjts ñøjkxti ma ja Jesús jam wyinaty; kuuyits ja øjts t'ejxti, jøts ja tnimaadyøø møk'ampy jøts ja jam tymbyidsø'omt ja y'etjotpti.

9

Ku ja Jesús tyiktsøøjky ja køxujxpi pakxujxpi

¹ Xjats ja Jesús tyøjkiyii'ñ barkijotp, jøts ja øjts ñijky jam jaduktamajñ, øjts ja ñøønaxy jøts ja yja'jty kyajpkøjxp.

² Jamts jaa'y ja øjts tu'uk yiktaninijky midu' køxujxpi pakxujxpi, ki'iy ja jam øjts tyiknøjkxti. Jøts ku dø'øn ja nwindson'ajtim Jesús øjts jade'en t'ixy ja jaa'y jøts kudam ja møk'ampy ja janchja'win tjanchmøødidi, jøts ja pamaa'y ja tnimaay:

—Kidi u'nk nugo mdyimyjotmay'øøky; nbojkmee'kxpy mets.

³ Winets winaaagin ja kajpxwejpitøjk wyinmaadyøø jøts ja wyandøø: “Dios yø jade'en kya'ømyigajpxpy, pø nugo jaa'yxi yø'.”

⁴ Jøts kumi wa'ats ja nwindson'ajtim Jesús ja tñijawi sa jaty ja wyinmaydi, jøts ja tnimaay:

—¿Tigøjxp ku jade'en ka'øwyyinmaa'ñ xjagyapti?

⁵ ¿Ja ti ne'egi jawaani jajtni, kuts yø pa'amjaa'y nnøjmit: “Nmee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjkxni mdigam?”

⁶ Ixymnim meets inet x'uk'ext mabaat øts idø'øn ja møk'ajtin nmøø'taty ya ñaxwiñ jøts ø nmaa'kxt ja pøky.

Xjats ja tnimaay ja køxujxpi pakxujxpi:

—Pidø'kni wa'kukiñ, wejtsjø'øk yø mmaabajt jøts mnøjkxni mdigam.

⁷ Winets ja pamaa'y jaty wya'kukiyyii'ñ jøts ja øjts ñijky jam tyøjkwindum.

⁸ Kuts ja mayjaa'y ja øjts jade'en t'ejxti, xjats ja yjancho'jkiñidi, winets ja tja'myajtsti ja Dios jøts ja tmøja'widøø tkunuu'kxyja'widøø, ja'agøjxp ku ja jade'en t'ejxti jøts kudam ja Dios Teety møk'ajtin tmøø'tajtti, pø niñugo jaa'yxi ja ttejti.

Ku ja Jesús tpawaay ja Mateo

⁹ Xjats ja nwindson'ajtim Jesús jam øjts chøøñ, jøts ja øjts t'ejxpaaty tu'uk ja jaa'y pøn txøøw'ajtp Mateo, jam ja wyinaty chøøni ma ja yikugubajtpi y'ixa'akti, jøts idø'øn ja tnimaay:

—Mada'ak, møøt widetk øts.

Winets ja Mateo tyanaagyukiyii'ñ, jøts ja øjts pyadsøøñiyi.

¹⁰ Ku wyinaty ja nwindson'ajtim Jesús jam kyay Mateo tyøjkjotp, winets ja mayjaa'y jam mendøø pøn yikugubajtp, møøt ja'adi pøn ka'øy jaa'y yiktejitp. Ja'ats idø'øn øjts yjam'atti, jøts ja tmøø'tixaktøø jam kaadyaajk windum møøt ja Jesús jøts ja pyabøjkpitøjkti.

¹¹ Ja'ayi ja fariseotøjk ja øjts jade'en t'ejxti, xjats ja nwindson'ajtim Jesús pyabøjkpitøjk yik'amidoodøø:

—¿Tigøjxp ku yø mwindsøn tmøøtkay yø yikugubajtpitøjkti møøt yø kawindiyjaa'dyi?

¹² Øjts ja nwindson'ajtim Jesús ja tmadø, xjats ja kø'øm tnimaay ja fariseotøjk:

—Pøn møk pøn kasajajtp, ¿ti ja tyikwa'andit ja tsøøyibi? Ja' ja ttsojktip pøn pøjkidip.

¹³ Kidi ja'ajtp ø tø nnimiñ pøn øy pøn wa'atsti, ja' ø tø nnimiñ pøn pøkyundip jøts ja chinaa'yin tyiktigatstip. Nøjkxti jiw'a'akti, pamaadyi padajti pøni ti dø'øn tyijpy ya'at Dios kyajpxy: “Ja' ø ndsøjkpy jøts xmøø'tattit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaa midu' jaty myojxtip.”

Ku ja Jesús yiktibyijky tigøjxp ku ja kya'ayuu'atti

¹⁴ Winets ja Juan Bautista tyumbi myendøø ma ja nwindson'ajtim Jesús jam wyinaty, jøts ja øjts tyiktowdi, yide'en ja tnimaadyøø:

—¿Tigøjxp ku øø n'amaay'aty møøt ja fariseotøjkti, ngakay nga'uuky øøts jøts mets yø mbabøjkpitøjk jaayi yjanckaydi yjanckjøø'kxti, niwine'en kya'amaay'atti?

¹⁵ Xjats ja nwindson'ajtim Jesús y'adsøø yøts ja tnimaay:

—¿Ma meets jade'en tø x'uknijawi jøts ku tø'øxñigaabyi tø'øxñi'ukpi winet y'amaay'atti winet kyakaydi kya'uukti ku ja jemyaa'y jamni? Abikñimts ja tiempi tyimya'tmit ku

ja jemyaa'y wyinaty kya'uk'ejtni ku ja jam wyinaty tō cho'oni, jaanims idø'øn tiy pøn kya'ukaañit kya'uk'uknit; jaanim idø'øn ja y'amaay'attit.

¹⁶ 'Ka'axi pøn wyetpach tta'agiyi jemwyet midi tyimyjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'.

¹⁷ Jøts nayide'en ka' y'øyi jøts yikpikta'akt ja vino jap po'dukjøtpy midi namii'kxñim; ku ja jade'en ndu'unint, takøø'tsipsi ja po' jøts jade'en nugo wyindingøy, windigøøpy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak jøts jade'en nimidi kyawindigø'øty.

Ja Jairo ñøøx, jøts ja tø'øxyøjk pøn ja Jesús ja wyet ojts ttojni

¹⁸ Ixam idø'øn ja nwindsøn'ajtim Jesús jade'en wyinaty wya'añ, ku yja'jty tu'uk ja windsøn pøn tngubajk'ajtip ja israelit jaa'y, jøts ja ojts ñagyuxendya'agyi'yi ja' wyinguikp, jøts ja ñimaajyøø:

—Tø øts nnøøxu'nk y'øøky tyimy'ixanim; kudsik mets inet ja'ayi mme'ent jøts waani xkønixajt, jujkpyøjkp inet ja jadigojk.

¹⁹ Xjats ja nwindsøn'ajtim Jesús wya'kukiyii'ñ jøts ja ojts tmøødi ja jaa'y møøt ja pyabøjkpitøjk.

²⁰ Winets tu'uk ja tø'øxyøjk myiñ jam nwindsøn'ajtim Jesús yjixkø'øm jøts wyet pa' ja ojts yiktøñ. Myakmajtsk jumøjtip idø'øn ja wyinaty tō pyaajtniyi ja taxnaxyi jøts ja jadine'en tmi'ity;

²¹ Jøts kumi yide'en idø'øn ja wyinmay: "Ja'ayik øts ja wyet inet yø ndojnit jøts øts inet ndso'okt."

²² Jøts ja nwindsøn'ajtim Jesús ojts wya'kjimbity, ojts ja tyim'yixy ja tø'øxyøjk jøts ja tñimaay:

—Kidi u'nk mdsø'øgi; ja'agøjxp tō mdsø'øky ku ø tō xjanchjawi.

Jøts idø'øn ja nay jatyi myøkpikjy.

²³ Kuts ja nwindsøn'ajtim Jesús yja'jty jam israelit windsøn tyøjkwindum, jøts ojts t'ixy ku ja xuxpi ixapnidi, ja oo'kpi ja yikpidø'økwañdip, jøts ja mayjaa'y xem yam yjanchya'aexti,

²⁴ xjats ja tñimaay:

—Pidsømdi; ka'ap yø kiixyu'nk y'øøgyi, maap yø ja'ayi.

Jøts ja yjanchyikñixixkxy ku dø'øn ja jade'en wyaañ.

²⁵ Kuts ja tyikpidsømgijxy ja mayjaa'y, winets ja tyøjkiyii'ñ jøts ja ojts kyø'køjxp tmach ja kiixyu'nk, jøts ja nay jatyi pyidi'jky.

²⁶ Jøts idø'øn ja jam jade'en øy ma yikni'ja'wiyii'ñ ja kajpxy ja ayuujk midi wyinaty tō tyuñi.

Ku ja Jesús tyikwin'ejxwa'kxy ja winap jaa'y

²⁷ Kuts ja nwindsøn'ajtim Jesús jam chøø'ñ, winets ja winap jaa'y namaajtsk tuu'ajy pyadso'oniyi, møk ja yjanchnømdi:

—jRey David me m'ap'ajtip, ayø'ejxk øøts!

²⁸ Kuts ja Jesús tyøjkiyii'ñ jap tøjkjøtpy, winets ja namaajtskpi winap jaa'y ñimejni, xjats ja tñimaay jøts ja ttiibyijky:

—zMwandip idø'øn amumjoojt jøts ku øts yø yjade'embu xma'aty?

Jøts ja ñømdøø:

—Windsøn'ajtim, wamp øøts idø'øn jade'en.

²⁹ Winets ja nwindsøn'ajtim Jesús ja mimøj twingudo'oniyii'ñ, yide'en ja tñimaay:

—Wan idø'øn jade'en tjaty pøni mabaat mee nayide'en ja mjanchja'win xmøøt'aty.

³⁰ Jøts wyeen ja øy tyandøø, ojts ja wyin'ejxpøkti. Jøts ja nwindsøn'ajtim Jesús ja møkta'aky tñimaay:

—Øyim mnay'ejxidit jøts kidi pøn xuknijawidi.

³¹ Jøts ja'ayi ja jap ñibyidsømdøø, ojts ja tñimadyakøxti sa nwindsøn'ajtim Jesús ja wyinaty tō yikmøkpiyki, ojts ja tñimadya'akti øy maðsoo wine'enin ja et jam.

Ku ja Jesús tyikajpxpiky ja uum jaa'y

³² Kuts ja jam wyinaty wya'kpidsoømdi, winets winaaggin ja jaa'y tñanimendi ja nwindsøn'ajtim Jesús tu'uk uum jaa'y, miku' idø'øn ja wyinaty mi'ejtuyip, ja'ats ja ka'ukyikajpxniyip.

³³ Ja'ayits ja nwindsøn'ajtim Jesús tyikpidsimy ja miku', jøts ja uum jaa'y jatyi jadigojk y'awijy. Jøts idø'øn ja mayjaa'y ñigyumaap yjajtøø, yide'en ja wyandøø:

—Ka'anim ya Israel pøn jade'en t'ijxñim sam ixyam yik'ijxyin.

³⁴ Ja fariseotøjkti yide'en ja wyamidi:

—Jade'en'ampy yø jaa'y tyikpidsimy yø miku' ku yø nayi' wyindsøn myøk'ajtin tyiktu-ujniyi.

Ku ja Jesús t'ayo'ixy ja mayjaa'y

³⁵ Widejtp idø'øn ja nwindson'ajtim Jesús øy madsoo wan tkamjotpi wan tkajpjotpi, jøts ja yik'ixpiky ma jaty ja tpaaty ja tsaptøjk kajp kajp. Ja Dios y'øgyapxy y'ømyadya'aky ja kyajpxwa'kxip sa ttanitanit ja yjaa'y, jøts ja tyiknaxy øy ti pa'am, øy ti pøjkin aa'nin.

³⁶ Ku ja ojts t'ixy ja mayjaa'y, jøts ja ojts t'ayo'ixy ku ja tsaach'ixyimdi, janchjot-may'oo'ktip ja', nugo ja jadi'iñi myondi tyukti, jade'en ja yjawi yajtnidi sam borreek ñi'ejxpi kya'ejtxiyidi.

³⁷ Xjats ja tnimaay ja pyabøjkpitøjk:

—Janch øts idø'øn nwa'añ, ku ja jaa'y may pøn tnijawiwiyandip ja Dios yja', jats ka'ejtip pøn ttukmadowidip.

³⁸ Paty x'amido'odit ja Dios Teety jøts ja tyumbi ttanigaxt ja'abi jaa'y.

10

Ku ja Jesús twiwijch nimakmajtsk pøn wyinaty kyudanaaby'atwampy

¹ Xjats ja nwindson'ajtim Jesús tyaxmujky ja pyabøjkpitøjk mididi nimakmajtskti, jøts myø'ajtin ja ojts tmø'øy, ja'ats ja ttuktabsø'ømdit ja miku' jøts ja tyikmøkpøktit pøn øy tigati pa'am pøjkidip.

² Yide'en idø'øn ja nimakmajtskpi pabøjkpitøjk ja xyøowdi: tu'uk Simón txøøwi, nayi yiktejp ja Pedro, jøts ja y'uch txøøwi Andrés; Jacobo møøt ja y'uchmi mididi txøøw'ajtp Juan, ja Zebedeo y'una'jk;

³ Felipe, Bartolomé, Tomás, jøts Mateo ja yikugubajtpi; jøts ja Alfeo myajnk pøn txøøw'ajtp Jacobo; jøts Lebeo pøn nayi yiktejp Tadeo;

⁴ jøts jadu'uk Simón cananista; jøts ja Judas Iscariote pøn tnankmyajtsip ja nwindson'ajtim Jesús.

Ku ja Jesús tkexy ja pyabøjkpitøjk kajpxwa'kxpi

⁵ Yide'en ja nwindson'ajtim Jesús t'ane'emy ja ñimakmajtskpi pabøjkpitøjk ku ja ojts tkajxtsø'ñ:

—Kidi jam etjotp mnøjkxti ma chøønidi pøn ka'israelit jaa'dyi, ka'abaat mnøjkxtit ma jaty ja kajp jam Samaria;

⁶ ja'ayi mee mninøjkxp mididi ya Israelit naxjøøjty, ja' idø'øn ejtnidip sam ja borreek tyigøydi.

⁷ Nøjkx xkajpxwa'kxti jøts ku Dios kyutujk wyingøñ mididi ja tyanitanaapy yjaa'y.

⁸ Yiktso'okti pøn pøjkip ja møk pu'uts pa'am, jøts pøn tigati jajtidip, yikjujkyøkti ja oo'kpidi, jøts kajpxpidsømdidi ja miku' jøts tmajtstu'utt ja jaa'y. Meets idø'øn yø yjade'embidi mø'ajtin tø mniyikmø'øy; nayide'ents xyiktunkpaattit sam tø myikmo'odi.

⁹ Kidi ti meefi xkondi, ni oori, ni plati, ni cobre,

¹⁰ ni pejnbæat xkawetstit. Mnimdajk niti xkako'ondit, tu'ugyi mwet xminøjkxtit mididi ixja mwet'ajttip; tumbixi mnøjkxti, mgaabyaæatp meets.

¹¹ Ku øy ma mja'attit wan tkamjotpi, jamts x'ixa'adit tu'uk ja jaa'y mididi nijawi, mididi tsojpk ja Dios yja', ja' tyøjkjotp mja'da'aktit kunim mdsoondit jam kajpjotp, winetnimts jam mbidsø'ømdit.

¹² Ku mdøkidit tøkjøtpy, kajpxpoo'kxti ja jaa'y.

¹³ Pøni m'adsojidip ja jaa'y, øy'ajtp; kuts ja ka' t'adsojimbity, majtstu'uttits ja'.

¹⁴ Jøts ku pøn mgagupøkidit, uk ka' paat tmadowa'andi pøni sa me mjawa'añ, pidsømdits jam ja'abi tøkjøtp uk ja'abi kajp. Winapti ja pu'ux mididi jam mdekyøjxp, jøts jade'eñi xuk'ejxtit jøts ku jade'eñi tø mnañiwa'achidi.

¹⁵ Øts idø'øn wæmp ku wyinaty yja'aty ja tiidyu'unin, ne'egi kajaa yø yjade'embidi jaa'y ja ayo'on tyimbyaattit, jøts nigididi jade'en y'ayo'ombaattit ne'egi ja kawindiy jaa'dyi pøn jam tsinaadyøø jam Sodoma jøts jam Gomorra.

Ku ja yiknigajpxy jøts ku ja pabøjkpitøjk yikmætswa'andit

¹⁶ Øyim xmado'odit jøts xnijawidit jøts ku meets jam nguexy ma ka'ap nugo ajawi øy pøn tyøki! Mjadyimñay'ejx'etidip, yikxonim mnañiwijy'atidit, kidi øy ti xtsepøkti, yuyj kø'øom mnabyikta'agidit.

¹⁷ Øyim x'ejxtit, øyxi dø'øn jaa'y mgøyakidit ma kudunktøjk jamdi, jøts myikwinwoptit myikjøpwoptit jam tsaptøjkjotp.

¹⁸ Myiknøjkxi paat meets ja jaa'y jam ma jaty ja møj windsøn yikutukti, ja'agøjxp ku øts nja' xpabøjkidi; jats idø'øn ja ñibidsømit jøts meets ja xukmado'ot pøni sa øts idø'øn ja n'ixpøjkin, ja'abaat meets xukmado'odit pøn ka'israelit jaa'dyi.

¹⁹ Kuts myikøyaktit jam kudunk wyindumdi, kidi xkumayjawidi, kidi meets ja xpamaañi xpadajni pøni ti dø'øn jam mgajpxtip, uk pøni sa dø'øn jam mwæ'andit; ja'ayi ja y'ukja'att pøni juuni dø'øn mgajpxtit, nagyø'ømts Dios mmo'ojidit ja ayuujk pøni sa dø'øn mwæ'andit.

²⁰ Kidi meedsipxi ja mmiwinmaa'nbyaatp ku mee mgajpxt, pø ja Dios Teetyxi y'Espiritu Santo myikajpxidip.

²¹ Jade'en nøjx jaty kyubety pøni pøn øts nja' wynaty xkupøjkjyip, jøts ja myigu'uk paat ja tyamidsepøkit jøts ja tñankyk'loogit, jøts ja u'nkteety jøts ja u'nktaak nayide'en ttumidit ja y'una'jk nay ja'agøjxp ku øts nja' janchpabøjkidi nidu'ugin; jøts ja u'nk una'jk nayide'ents ttumidit ja teetyt tyaak, tyik'ookit paat ja'adi.

²² May jaa'y mee mmi'akiyip mmiotma'adiyip ja'agøjxp ku meets nja' xpabøjkjy; pønts tmdanaapy øy wine'en paat, ja yjade'embj jaa'yts idø'on nitso'ok'atp.

²³ Ku myiktabawidetit ja kipy ja tsaa, kaknøjxtits ma kajp jam jadu'uk; øts idø'on wamp, jøts ku øts wynaty jawyeen tønmeni yammim meets ja kajp xka'ayø'ø'y'abidsømdi midj jaty ja israelit jaa'y kyajp'ajttip.

²⁴ Ka' pøn ixpøjkpi tjaaktyimyjinaxy ja mya'estri, jøts ni ja tumbi tkajinaxy ja wyindsøn.

²⁵ Tyajotkujk'attip idø'on ja ixpøjkpi, janch møj idø'on ja wynaty ku yja'attit jade'en sam ja mya'estri, jøts ja tumbi sam ja wyindsøn. Pøni mikudam ø nyiktijy ku mee nniwindsøn'aty, çtits meets mdsow, ti meets jade'en mjaakayiktejp?

Ja' midj yiktsø'ogip

²⁶ Paty ka' pøn xtsø'ogidit. Ka'axi ti kyanigaxi'iky øy pøn ti tjadyimy'ama'atsk'aty, ka'ats ja kyayiknija'wi øy pøn ti tjadyimyjayu'uch'ity.

²⁷ Pøni ti mee nda'agajpxip, tukmadowdits meets ja jaa'y ja'; nigajpxtits ja yikxon pøni ma x'a'ejxidi myikmadowdi ømyadsowi.

²⁸ Kidi yikjaa'y'oo'kpi xtsø'ogidi, pø ka'axi annija'win ja tjadyimyik'ookti; ja Dios ja' idø'on tiy ne'egi mdsø'ogidip, pø ja'axi møk'ajtin tjagyajp jøts ja jaa'y tyikwindigøy møøt ja y'annija'win jap ayodaajkjøtpy.

²⁹ O dø'on ja joon mabaat kyidyimchobaaty, nayide'en idø'on ja Dios Teety ja t'ejx'ity. Ni tu'ugin ja kyawindigøy pøni ka'ap ja kø'øm tyikutuky.

³⁰ Tu'uk tu'uk meets mwaay machø y'ity.

³¹ Kidi mdsø'ogidi, ne'egi jawaani jinaxy mee mnibayø'øyi, çti ti meets mdsow, ti sa ja mayjoon chobaaty?

Pøn tmøjpiktaktip ja Jesucristo jam mayjaa'y agujkp

³² Pøn jaty ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nnitanit jam Dios Teety wyingujkp pøn jap tsajpjøtpy.

³³ Pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejximbett, niwine'enin nganitanit jam Dios Teety wyingujkp.

Jesús køjxp ja jaa'y ñawya'kxyidi

³⁴ Kidi mee mwani jøts ku øts jaa'y kuwani xtyimyjatytajotkujk'attit, pø may idø'on ja nøjx kyanachokidit øts køjxp.

³⁵ Jade'en ja tpatni jøts jaa'y ja y'u'nk y'una'jk y'ukmidsepøjkniyit, ja u'nk ja xa'kxy ja u'nk ja nøøx ñamyatsidit;

³⁶ tukmigu'uk ja jade'en y'uknamyidsepøjkniyidit.

³⁷ Pøn teety tyaak jawaani tyikmøjtøjkp sam ø ka'ap xmøjpkta'agyin, ka'ap øts ja mibaat nja'aty; jøts nayide'en pøn y'u'nk y'una'jk jawaani tyikmøjtøjkp jøts nigidi ka'ap øts, nayide'en øts ja ka'ap mibaat nja'biky;

³⁸ jøts pøn ø xkagu'ayo'ombaadiwyamp ku jaa'y yik'ookwa'anit, jøts øts ja nja' jade'en xkatunwajni, ka'ats øts ja mibaat nja'bøkt.

³⁹ Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtin tpaaty; pønts kanabya'ayojip wan tjaty sa jyaty øts køjxp, ja'ats idø'on tpaatp ja nitso'ok'ajtin.

Ja may'ajt

⁴⁰ Ja jaa'y pøni pøn mgupøjkidip, øts idø'on ja wynaty jade'en xkupøjktip; jøts pøn øts jade'en xkupøjkp, ja'ats ja nayide'en kyupijky pøn ø xkajxp.

⁴¹ Pøni pøn tkajpxkyupøjkp ja Dios kyugajpxy, jøts kumi Dios ja kajxip, nayide'en ja jaa'y yikmay'att sam ja Dios kyugajpxy yikmay'atyin; jøts pøn tkajpxkyupøjkp ja øyjaa'y ja'agøjxp ku y'øyjaa'y'aty, nayide'en ja yikmay'att sam ja øyjaa'y yikmay'atyin.

⁴² jøts pøn ø xmøjyip ja n'u'nk n'una'jk øy tukvasin ja tsujxk nøø jøts kumi øts ja nja'ajtpy, jøts janch øts idø'on nwa'añ ku ja nayide'en yikmay'att.

11

Ja jaa'dyi pøn ja Juan Bautista ojts tkexy

¹ Xjats ku nwindson'ajtim Jesús tta'ana'am'abajtyi'ñ ja nimakmajtskpi pabøjkpitøjk, winets ja ojts chøøñ, jøts ja ñijxxy yik'ixpøjkpi kajpxwa'kxpi ma jaty ja kajp jam ja'abi etjotp.

² Jøts ja Juan Bautista, ku ja jam wyinaty puxøjkjotp, jøts ja tnija'wiyii'ñ ti jaty wyinaty tyump ja Cristo ja yiknitsokpi, winets ja tkejxy namajtsk ja pyabøjkpi jøts ja t'ats'ejxtit ja nwindson'ajtim Jesús,

³ jøts ja t'atsyiktø'ødit yide'en:

—¿Mjanchjacristo mets idø'øn, ja yiknitsokpi miditijy menwamp, uk njøp'ejxp øøts idø'øn jadu'ukpi?

⁴ Xjats ja nwindson'ajtim Jesús y'adsojimbijty:

—Nøjkxti jøts jade'en xukmado'odit ja Juan sa jaty ti jaty m'ejxtip mnija'widip.

⁵ Tamimadya'akti sa winap jaa'y wyin'ejxwa'kxti, sa pakma'at jaa'y yø'øyjø'økti, sa yø pu'uts pøjkibi cho'okti tuki'iyi, sa nat jaa'y myadoobøkti, sa oo'kpi yjujkpyøkti, jøts sa ayooobi jaa'y ja Dios kyajpxy yiktukmadowdi.

⁶ Nekim ja'adi pøn tu'ugyi ja janchja'win tmøøt'ajttip, ka'ap winguwopi jøpkuwopi tmijattit ku ø xjanchjawidi.

⁷ Xanim idø'øn ja wyinaty tymchoondi ja Juan Bautista yjaa'y miditijy ja pyabøjkpi'ajtpy, ku ja nwindson'ajtim Jesús tnmadyaktøjkii'ñ ja Juan, yide'en ja tniimaay ja mayjaa'y:

—¿Ti ojts x'ejxti jam abak etjotp ku jam ojts mnøjkxti? ¿Ojts meets jam yjawi x'ixy tu'uk ja jaa'y miditijy jade'en jajt p sam kapy pyojimbity pyoj'adij? Pø ka'axi, pø tu'ugyixi ja tmi'ity ja wyinmaa'ñ.

⁸ ¿Tits idø'øn ojts x'ats'ejxti? ¿Uk ojts x'ejxti tu'uk ja jaa'y miditijy janchweti janchnaamyi, miditijy janch tsuj ja wyet tø tyikpety? Pø wa'atsxi xnijawidi pøn jade'en naxyojxidip jøts ku ja jam fiachøkyidi ma ja windsøndøjk jam chøøni.

⁹ ¿Tits inkwan idø'øn mjantyim'ats'ejxtø? ¿Tu'uk ja Dios kyugajpxy? Janch ja'ats idø'øn pøn jawaani tjaaktyimyoj, nigidibaat ja yjadu'ukpi jade'endi.

¹⁰ Ja Juan idø'øn jade'en yiknigajpx ku wya'añ Dios kyajpxy yide'en:

Ngajxjawyenip øts, u'nk, ja ngugajpxy tu'uk,

jøts ja jaa'y ja wyinmaa'ñ ja tyiktøjtit tyiktuudaajkit, jøts mets ja m'ixpøjkin yikjøp'ext.

¹¹ Tyii'byi øts idø'øn nmadya'aky, jøts ku ka'ap jade'en pøn myajada'akñim Dios kyugajpxy sam ja Juan Bautista; pøni pønts øts nja' xpaduujnip jøts ku tyøki ma øts ngutujk ttanitanit ja jaa'y, ja'ats ne'egi yikmøjpiktaktip jøts nika'ap ja Juan Bautista.

¹² Jaayip ja Dios kyutujk cheptak'okwani ku yø Juan Bautista myiñ jøts ixymbaatnim kyakixy kyanaxy. Aguwani ja tjadyimyjammajada'akwa'andi pøn nadya'aja'wiyidip ja yjotmøk'ajtindi.

¹³ Pøn ja Dios kyutujk yjawi tka'uknigajpxip, ni'ijtyi ja tniigajpxti pøn Dios kugajpxy'ajtidip, jøts nayide'en ja Moisés kyutujk tyikwa'añ jøts jaabaatnim ja tø yikni'amøñ ku ja Juan Bautista yam tø myiñ;

¹⁴ jøts pøni mjantyimyjanchjawiwandip, ja Juan idø'øn ja' pøn yiknigajpxp jøts ku mye'ent jadigojk ja Dios kyugajpxy miditijy txøøw'ajtp Elías.

¹⁵ Pøni pøn yikxon tniadoop, wants tja'gyuki.

¹⁶ Jade'en meets mdami'ejxi sam ja mutskuna'jk muum y'adø'øtsti jam maayjotp, ku ja myi'unaj'jk nisudso'ampy tkagupøjkiiyidi ja kyuyajtin miditijy ja yja' ttsøjkpy yjaguyatwampy, jade'en ja yikniimaadyi:

¹⁷ “Tø øø njaxu'uxy, ka'ats m'atswa'andi; tø øøts ja cancion jotmay'øøgyim nja'øømi, ni jade'ents tø mgaya'axti.”

¹⁸ Tøxi yø Juan myiñ jøts ka' yø kyay jøts ka' yø y'uuky, jøts mw'a'andi jøts ku mik'u yø myøøt'ajtpy.

¹⁹ Xjats ø tø njamemi, kaapy ukpts øts, jøts mw'amidi jøts ku øts janchkaxim ngay n'uuky, jøts ku øts ja møøt nnamyayi pøn yiktejtijy jantyimbyojkpitumbijaa'dyi, jøts nayide'en møøt ja yikugubajtpitøjkti. Pøni pønts ja Dios yja' tkupøjkpi, ja'ats tja'gyukip sam ja Dios yja' tsøkyin.

Ja kajp miditijy kamadoodip

²⁰ Xjats ja nwindson'ajtim Jesús ttamigajpxkixy ja kajp ma jaty ja wyinaty tø ttuñ ja milagri'ajtin, ku dø'øn ja jaa'y jam ka' tyimiyiktigatstiniim ja chinaa'yin. Yide'en idø'øn ja wya'añ:

²¹ —¡Mjanch'ayøøy meets, Corazingit jaa'dyi! ¡Mjanch'ayøøy meets Betsaidit jaa'dyi! Ku jeexyip ja milagri'ajtin tyuñi jam Tiro jøts jam Sidón miditijy meets ya tø myiktu'unxi, ku ja jeexyip jam yiktuujnidi ja milagri'ajtin, windi'ixyip ja jeexyip tyiktigajtsnidi ja chinaa'yindi, ku ja pyøky jeexyip tymchaachjawidi.

²² Øtsts yam wamp jøts ku nøjkx ja tiidyu'unin ñaxy, mgu'ayowip meets ja jinaxy, nika'ap ja ne'egi jade'en y'ayo'odit pøn tsinaadyip jam Tiro jøts Sidón.

²³ Jøts meets Capernaumit jaa'dyi, ¿ma mee xijy mnøjkxti tsajpjøtpty? Pø japxi meets ayodaajkjøtpty mnøjkxtit. Ku jeexyip ja milagri'ajtin yiktuñ jam Sodoma mido meets ya tø myiktu'unxi, ne'egi nay jaa ja kajp jeexyip, ka'ap ja jeexyip sa yjaty.

²⁴ Øtsts idø'on tyimwyamp ku wyinaty ja tiidyu'unin ñaxy, ne'egi yikxon mee ne'egi mjaaktyimy'ayo'onbaat, jøts nigidi jade'en pøn jaty tsinaadyøø jam Sodoma.

Yq mendi jøts mboo'kxtit

²⁵ Xjats ja nwindson'ajtim Jesús yjaakwaañ:

— Dios Teety tsajpjøtptit, yikjujky'ajtpi ya naxwiin, nmøja'wip mets ngunuu'kxyja'wip mets, ja'agøjxp ku tø xamidsøky o pøn ja mnitsoojkin jøts yø wijy jaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'on ka'ejxiyimdi.

²⁶ Jade'ents Teety tø xun sa kø'øm xamidsøky øy pøn.

²⁷ Xjats ja Jesús tnimaay ja mayjaa'y:

— Tum ja' øts ndeety xuktump mido ja kø'øm tyunwampy. Ka'ap øts pøn jade'en xnijawi sam øts ndeety kø'øm xnijawi; nika'ats øts ndeety pøn wa'ats ñijawiyi sam øts ja kø'øm ndyimñijawi, jøts pøn øts ja nduknijawiwampy, ja'ats tnijawidip ja Dios Teety.

²⁸ Øts idø'on xnime'endip pøn jaty agøjxtip jotkøjxtip, pøn jaty ø xku'ayo'ombaaajtidip, øts mee nyikpoo'kxp.

²⁹ Kupøjkidik øts ja n'ixpøjkin jøts mwimmaa'nbyaattit jade'en sa meets tø ndaniwinmayi, yuyi øts winmaa'n njagyepy; pyaattpts meets ja m'anmija'win ja øy'ajtin ja kunuu'kx'ajtin.

³⁰ Yø ixpøjkin mido meets yam nmøøpy, ka'ap yø chepi, jajtnei yø', ja'ayi xka'ixmatsttit.

12

Ku ja Jesús ttøjtøø ja ariin yam poo'kxin xøøw

¹ Tuu'yø'øpy ja nwindson'ajtim Jesús wyinaty, poo'kxin xøøwts idø'on, jøts ja jam wyinaty ñaxti ma kam jam. Janch yuu'oo'kktipts ja pyabøjkpitøjk jøts ja ariin uun ja ttøjpinaaxwa'ktøø, jøts ja pyajk ja tjøø'kxiyidi.

² Xjats kuts ja fariseotøjk ja jade'en t'ejxtøø, winets ja ttamajstøø ja nwindson'ajtim Jesús: — Eix yø mbabøjkpitøjk jade'en y'adø'øtsti, jøts ka'ats pya'at'aty jøts yø jade'en y'adø'øtstit ku poo'kxin xøøw.

³ Xjats ja yide'en yiknimaadyøø:

— ¿Ti ka'anin meets ja Dios kyajpxy x'ixy mido tniagajpxp sa ja David tuk'ojk tmøøt'adijch ja myigu'uk, ku yuu ja wyinaty yik'ookwa'aninyidi?

⁴ Tsaptøjkjøtptyxi ja ojts tyøki, japts ja ojts tkay ja kunuu'kxy chapkaaky mido ja Dios yiktamiyoxp, mido ja ka'ap pya'at'aty jøts ja tka'aty, uk jøts ja tuuka'aty ja myigu'uk, ja'ayi ja paat'ajtidip pøn teety'ajtip.

⁵ Jøts nigidibaatnim meets ja kutujk x'ejxni mido ja Moisés yjaay, mido wamp jøts ku teetyøjk ka' pyoo'kxti jap tsaptøjkjøtpty ku poo'kxin xøøw, jøts nika'ats ja pyøkyi?

⁶ Øts wamp jøts ku ja jadu'uk jawaani møj, nika'ap tsaptøjk yja' jade'en.

⁷ Ka' meets yø xnimadøy pøni sa dø'øn yø tjatijy ya'at Dios kyajpxy ku ja Dios Teety wyaañ: "Ja' ø ndsøjkpy jøts xmøøt'attit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaa mido jaty myoxtip." Kuk y'ijty xja'gyukidit, ka'abik mmigu'uk y'ijty xpøky'ejxtit øy ja ti pøky tjabatundi.

⁸ Ngudanaapy øts ja naxwiin'ñit jaa'y jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y mido ja kyø'jadi'iñi tøtsnip

⁹ Xjats ja nwindson'ajtim Jesús jam chøø'n jøts ja ojts ñijky, tyøjkijy'iñ jam tsaptøjkjøtp

¹⁰ ma wyinaty jam tu'uk ja jaa'y mido ja kyø'jadi'iñi tøtsnip tuktamajñ; jøts kumi øy idø'on ja tyimy'ixa'adi ti ja yjadyimy'uuktani'øønidip ja nwindson'ajtim Jesús, jøts ja tyiktøødøø t'amidoodøø ñadyjy:

— ¿Kutujk yø' ku pamaa'y jaa'y nyiktsojkin ku poo'kxin xøøw, u ka'?

¹¹ Jøts ja nwindson'ajtim Jesús ja ojts t'adsøy, yide'en ja tnimaay:

— ¿Wan meets ja mborreek ndejin jadi'iñi xmajststu'utt ku ja wyinaty tø kyunaxy jap jutjøtpty yam poo'kxin xøøw? Pø kuwanixi ja xninøjkxtit jøts ja x'atsjuuttit.

¹² ¿Ti sats ja jiyujk jade'en yjaakyikjotmay'aty, jøts ja jaa'y jadi'iñi yikmajststu'utt? ¡Pø ka'axi, pø jaa'yxi ja! Paat'ajtip n'ødyu'unin øy pøn ku poo'kxin xøøw.

¹³ Xjats ja yiknimaay mido ja kyø' wyinaty tøtsp:

— Xajtøw.

Jøts ku dø'øn ja ojts xyajtji, tyimyøkpøjk ja kyø' ja, nayide'en ja tyimya'wiyi'iñ sam ja yjadu'ukpi kø' mido møk.

¹⁴ Winets ja fariseotøjk wya'kpidømdøø, jøts ja tkajpxy'ajtpinibøjkidøø sudso ja tjadyim'yukyik'ooktit ja nwindson'ajtim Jesús.

Ku ja Dios kyugajpxy Isaías tñigajpxy sa ja Jesús jyatwa'añ kyubatwa'añ

¹⁵ Kuts ja nwindson'ajtim Jesús ja tñija'wiyi'ñ, winets ja jam ojts cho'oni jòts mayjaa'y ja ojts pyadsòòñi. Yikmòkpojkiixy idò'on ja pamaa'y ja',

¹⁶ jòts ja yikxon ttukmadòy jòts ja ka'ap ñimadya'ag'idit pòni pòn idò'on ja'.

¹⁷ Jade'en'ampy idò'on ja jade'en yjaty, jòts ja jade'en ka'pxy tyimyjatt sa wyaañ Dios kyugajpxy midì Isaías'ajtp, ku ja yide'en wyaañ:

¹⁸ Yò' òts idò'on tò n'a'ejxi, òts yò' ndumbi,

yò' ò ndsòjkpy jòts yò' ò ndajotkujk'ajtpy.

Nmo'op òts yò' ja nmòk'ajtin ja n'Espiritu Santo,

jòts òts yò xñigajpxit ja ndiy'ajtin o magajp.

¹⁹ Ka'ap yò cheekt, ka'ap yò wyopt, ka'ap yò ya'axt yjokt, niduk'aawin yò kyayikmado't ja y'aaw y'ayuujk ja nòò'ajy tuu'ajy.

²⁰ Ka'ap yò òy pòn nugo tyimdy'a'oo'kpety,

ka'ap yò nugo tukmajada'ak tyimyajada'aky òy pòn mabaat tyimyjatundigòy,

kunim yò yikxon tpiкта'akt ja kyutujk ja tyiy'ajtin.

²¹ Jòts yò òdyimbyòngajpi y'ajot'attit.

Ku ja Jesús yiknimaay jòts ku miku' myòk'ajtin ja tyiktuujni

²² Xjats ja nwindson'ajtim Jesús ojts yiktaninijkxy tu'uk ja jaa'y midì winap midì uum, jòts tò miku' ja wyinaty tyatòkiyi. Ojts ja tyikmòkpojky jòts ja jaa'y wyin'ejxwa'kxy jòts ja y'awijy jadigojk.

²³ Jòts idò'on ja jaa'y ja ñigyumaap tyimyj'a'widòò, yide'en ja ojts wya'andi:

— ¿Ti ya'at ndejin, ja rey David y'apip?

²⁴ Xjats ja fariseotòjkti ja ayi ja ojts jade'en tñimjadowdi, xjats ja wyandòò:

— Jade'en'ampy ya'at jaa'y tyikpidsimy yò miku' kumi ja mòj miku' myòk'ajtin yò yiktuujnip, jòts yò ttuktabsimy ja myimiku', yò'òts yò wyindsòn'ajtip.

²⁵ Wa'ats ja nwindson'ajtim Jesús ja tñijawi sa jaty ja wyinaty wyinmaydi, jòts ja tñimaay:

— Ñimidi'ibi kutujk kò'òmyi ñamyidsep'aty, kuts ja cheptundi ja xem yam jadi'ñits ja ñankyudigòyidi; u ku kajp u ku jaa'y tukmigu'uk ñamyidsepikyidi jòts ñawya'kxyidi, ka'ap ja yikjò'ijxy'aty jòts ja jeky ñankchòòniyidit.

²⁶ Jòts nayide'en yjaty ku ja mòj miku' tyikpidsimy ja myimiku', tòts idò'on ñamyayi ñawya'kxniyi; ¿sudso'ampyts ja jade'en y'ett ja myòk'ajtin?

²⁷ Pò jade'enxi mee mw'a'añ jòts ku òts jade'en'ampy ja miku' nyikpidsimy ku òts ja mòj miku' myòk'ajtin nyiktuujniyi; pòni janch jade'ents, ¿pònts meets ja mmigu'uk ja myòk'ajtin yiktuujnip ku ja miku' ja nayide'en tyikpidsòmdi? Ja'axi mee mni'òò'niyidip jòts ku nugo jade'en nugo mjadyimgyajpxigòydi.

²⁸ Kuts òts, jade'en'ampy òts ja miku' nyikpidsimy ku òts ja Dios myòk'ajtin nyiktuujniyi, jade'ents meets idò'on yò xja'gyukit jòts ku Dios ja kyutujk tò mdanija'adyidi midì ja tyanitanaapy yjaa'y.

²⁹ ¿Pònts òy nugo tyimy'uknidòjkp ja jaa'y jap tyòjkjòtpy midì janch kamaabyim, òy ja pòn tyimyjapòjkxiwyajni ja pyikta'aky? Jawyeenxi ja yikòwòont yikpakwòont, winetnims ja yikpòkòjxit ja pyikta'aky, pò tòxi òts nayide'en ja miku' yja' nmimajada'aky.

³⁰ Pòn ò xkabudòjkp, ja' òts idò'on xmidsèpwamp; jòts ku òts pòn ti mòòt njapòkmukwa'añ, jòts ja jinaxy tpòkwa'kxy.

³¹ Paty meets idò'on nnòjmi, jòts ku òy tyimyjapòni yikmaa'kxkòjxp ja' pyòky, pòni ti jaty pòn tyumpy kyajpxpy; kuts pòn tka'uk'òmyigajpxt ja Espiritu Santo, niwindem ja mibaat kyayikpojpmee'kxy.

³² Jòts òy òts pòn xjaga'òmyigajpxy, jaakyikpojkpimaa'kxp ja'; jòts ja' pòn tka'òmyigajpxp ja Espiritu Santo, ka'ap ja mibaat yikpojpmee'kxy ya' naxwiñ, jòts òy tyimyjamadso'ji.

Pòni sa wyimbidsimy òy ti, ja'ats tyiknigaxò'kp pòni sa ti y'òyi kya'òyi

³³ Ku kipy y'òyi, nayide'en ja òy tyòòm tyikwingaxi'iky; jòts midì ka'òy, nayide'ents tyòòm ja tyikwingaxi'ika'òy. Ja tyòòmts ja kipy yikta'ejxkajp pòni sa òy ka'òy tyòòmi.

³⁴ Meets win'òò'mbidi! ¿Sudso mee m'ògyajpxt jòts ka'ats m'òyjaa'yidi? Jòts pòni sa y'awa'kxy yò aaw, tum jamts yò chòòñ midì jam ujts abòki yikmòòt'ajtp jam amjotp.

³⁵ Pòn òy jaa'y, jade'en'ampy ja tyikpidsimy ja ògyajpxy ja òwvinmaa'ñ, kumi tum'òwvinmaa'ñ ja yjagyèjpy jam y'am yjotp; jòts idò'on ka'òyjaa'myidi jade'en'ampy tkayikpidsimy ja òwvinmaa'ñ, kumi tum ja ka'òybi ja jam myòòt'ajtpy'am yjotp.

³⁶ Òtsts mee nnimaapy jòts ku wyinaty ja tiidyu'unin ñaxy, ja'abi xòòwts tuki'iyi yikòyajkòxt ja ògyajpxy ja ka'ògyajpxy pòni sa pònjabòn tò wya'añ.

³⁷ Pòni sa ja m'ayuujk pòni sa ja mwinmaa'ñ, nayide'ents myiktiidyu'undit, nay ja' myiktapòky'ejxtip, nay ja'ats mgayiktapòky'ejxtip.

Ku ja ka'øyjaa'y t'amidowdi jøts yiktuk'ejxtit ja milagri

³⁸ Winets ja nwindson'ajtim Jesús ja fariseotøjk ñimaaǰyøø møøt ja kajpxwejpitøjkti:

—Windsøn, ja' øø n'ejxwampy jøts øøts xuk'ext tu'ugin ja milagri'ajtin, pøni janch ku mjanchdiosu'ngi:

³⁹ Xjats ja nwindson'ajtim Jesús ja t'adsøøy:

—Ja' idø'øn ja milagri'ajtin amidoodip pøn kawindiyjaa'y'ajttip; ka'ats ti milagri'ajtin y'ukyiktuk'ejxnidit, wan ja'ayi sa yjajty kyubejty ja Jonás ja Dios kyugajpxy.

⁴⁰ Nayide'en ja Jonás y'ijty tigøøk xøøw tigøøk tsuu jam ajkx yjotp jøts pyidsiimy jujky, nayide'ents øts idø'øn jap naxpatki'py n'ett tigøøk xøøw tigøøk tsuu jøts nbidsø'ømt jujky.

⁴¹ May'ampy pyidø'øktit ja jaa'y pøn jaty tsinaadyøø jam Nínive ku yja'att ja tiidyu'unin xøøw, ku yø jaa'y yiktiidyu'undit pøn jaty ixyam tsinaadyip jujky'ajttip ya naxwiin, yø'øts idø'øn yikpøky'ejxtip; kumi ne'egi yiktigajstøø ja Nínive jaa'y chinaa'yindi ku ja Jonás ja ojts tyukmadøyidi ja Dios kyajpxy, jadyimy'ixyats idø'øn ja' mididi jawaani møj jøts nika'ap jade'en Jonás, jøts ka'ap meets ja xmøjpikta'aky.

⁴² Nayi pidø'økp nayide'en ja windsønø'øxy ku tiidyu'unin xøøw, ku ya'at naxwii'ñit jaa'y yiktiidyu'undit jøts pyøky ja yiktani'øønidit; kumi jagam et ja ojts chøøñ, jøts ja ojts jadine'en tñimiñ ja Salomøn ku ja tpatmadoowajni ja kyajpxwejin, ixyats jadu'uk mididi jawaani tñija'wip jøts nigidi jade'en Salomøn, jøts ka'ap meets ja xmøjpikta'aky.

Ku ja miku' jadigojk t'awimbeti ja chinaadyaajk

⁴³ Ku miku' tmajtstu'uty ja jaa'y, jøts ñijkxy widejtpi tø'øts etjotp, tja'ixa'ay ja pyoo'kxaajk; jøts kuts nima tkapaaty, xjats wyimmay:

⁴⁴ “Nay ja ndøjk ø n'awimbetip ma ø tø ndsøøñ.” Kuts wyimbity, jøts ja jaa'y jade'en yikpaaty sam tøjkwat'ats, pe'ety jaaxy ja jap.

⁴⁵ Xjats ja chøøñ, jøts ja tjaaktyimy'atsway ja niwixujk ja myimiku' mididi jawaani ka'øydi, jøts ja niduki'iyi ttatøkidi ja jaa'y, tsinaadyaajk ja tyikwa'andi. Nayide'ents idø'øn yø kawindiy jaa'y yjattit.

Ja Jesús tyaak jøts ja y'uch

⁴⁶ Ixam idø'øn ja nwindson'ajtim Jesús wyinaty jade'en tmigajpxñim ja jaa'y, ku ja tyaak yja'jty jøts y'uchti myigu'ukti. Japyi ja ojts tøk'agui'py y'awejxti, ja' ja tyimy-jamigajpxwandip.

⁴⁷ Jøts ja nwindson'ajtim Jesús yiktukmadøøy, jam idø'øn ja pøngapøn tñigajpxkøyj:

—Ixap ja mdaak tøjkwimpy y'awixy møøt ja m'uch, jøts mets mmigajpxwajnip.

⁴⁸ Jøts ja tñimaay pøn wyinaty jade'en tø tyukmadøyi:

—¿Pøn øts ndaagip, pøn øts idø'øn n'uchip?

⁴⁹ Winets ja tñigu'umiyi'ñ ja pyabøjkpitøjk jøts wyaañ:

—Yø' øts idø'øn ndaagidip, yø' øts idø'øn n'uchidip.

⁵⁰ Pøn øts ja ndeety kyutujk tpaduujniyip mididi jap tsajppitøpy, yø' øts idø'øn nmigu'ugidip, yø' øts idø'øn ndaagidip.

13

Ku ja Jesús tmdyakaaty ja jaa'y pøn nøjkk neppi

¹ Jøts ja nwindson'ajtim Jesús jam tøjkjotp pyidsiimy, jøts ja ojts ñijkxy jam mejy'am, jamts ja y'ixaajky.

² Jøts kumi janch may ja jaa'y ñamyujkidi ma ja jam wyinaty, winets ja nwindson'ajtim Jesús tyøjkiyi'ñ jap barkijøtpy, japts ja y'ixaajky, jøts ja mayjaa'y jam niduki'iyi tyandøø nøø adsayjotp.

³ Xjats ja ttuk'ixpijky ja y'ixpøjkin, ñimyyay idø'øn ja ojts tñigajpxkøyj. Tum ejxpajtin madya'aky ja tyanimadyakpy pøni mididi idø'øn ja y'ukyiktamija'gyukip, yide'en ja wyaañ:

—Tu'uk ja jaa'y chøøñ neppi;

⁴ Jøts ku ja ojts twijy ja tyømt, xjats ja tømt winaagin ñaxkidaajky jam tuu'am, ja'ats ja joon ojts tñimendi jøts ja wa'ats tpeemujkøjxtøø.

⁵ Winaagin ja tømt ñaxkidaajky jam tsaajotp ma ja naajx kyamaajpxyi; ja'ats ojts tsojk myujkkojti kumi ka'ap ja naajx kyøjki.

⁶ Kuts ja xøøw ja'ayi pyidsiimy, ja'ats ja ojts chaa'yiyi, yats y'aats ja yjaakidyimy'ejtnidi, xjats ja tuki'iyi ojts tyøtskøjxni.

⁷ Jøts ja tømt winaagin ñaxkidaakmøø jam maagyujp'agujkp, jøts ku ja maagyujp yøøñ, ja'ats ja ojts ñi'aa'mbajtniyi.

⁸ Jøts ja tømt ojts waani ñaxkidaakmi ma øñaajx, ja'ats janch'øyiyi'ñ; winaagin magø'pxy pyajkpejty ja tu'ukpi tømt, winaagints tugui'pxy, jøts winaagin ee'pxmajk.

⁹ Pøni pøn ja ja'gyukin tmøøt'ajtp, wan tja'gyukidi.

Tigəjxp idə'ən ja Jesús ejxpajtin madya'akyəjxp ja y'ixpəjkin tyaky

¹⁰ Winets ja nwindson'ajtim Jesús ja pyabəjkitəjk nimejniyi wingon jəts ja tyiktəəðəð:
—ǂjadits ku yə jaa'y jade'en xamimadya'aky ejxpajtin madya'aky ku xyik'ixpiky?

¹¹ Jəts ja t'adsəy:
—Meets Dios ja 'ayi mduknija'wiyip ja kyutujk jap tsajpjətpy mididi pən tkanija'wipnini; jəts ka' yə mibaat tnijawidit.

¹² Pənts tjagyajp ja ja'gyukin, jaaktyimyikmo'opts ja' jəts yikxon tyimya'gyukit; jəts pən kaja'gyukip, jaaktyimyikpəjkxipts ja' pəni wine'en paadin ja jap tjaakjaməðədi ja wyijy'ajtin.

¹³ Paty əts yə jade'en ndukmadowdi wenk madya'akyəjxp; yjadyimyejxtipxi jade'ents yjatti sam tə tkidyimyejxti, yjadyimjamadoodip jade'ents yjatti sam ti tkidyimnimadowdi, uk sam pən ti tkidyimadəyin.

¹⁴ Jade'en idə'ən ixyam tyimyjati sam wyaan ja Isaias ja Dios kyugajpxy, ku ja yide'en wyaan:

Mjadyimjamado'odip jəts ka' xnimado'odit;
mjadyimya'ejxtip jəts jade'en mjattit sam pən ti tkidyimyejxtin.

¹⁵ Nisudsə'ampy yə yjade'embə jaa'y kya'ukmadoonidi ja y'anmija'win,
tum ka'əy tnamadowdi,

jəts wimbeets kugoots y'ejtnidi;
ka'ap ja wyeen ttawin'ejxti,
nika'ap ja tyatsk ttamadowdi,
nika'ap ja kyubajk yja'gyukidi,
jəts ni əts xkanimendi əyik əts idə'ən nyiktso'oktit.

¹⁶ Xjats ja Jesús tjaaknimaay ja pyabəjkitəjk:
—Meets idə'ən janchjotkujk'atim, kumi mda'ejxtip ja mween jəts kumi mdamadoodip ja mdatsk.

¹⁷ Jəts janch əts idə'ən nwa'an, jəts ku may ja jaa'y pən jaty Dios kugajpxy'ajtidip, pən jaty əyjaa'y'ajttip, jade'en tyimyjawemp'ejxwandi pən meets ixyam m'ixpxy, jəts nijuunits tə tka'ejxti; yjadyimjamadoowandi ya'at jade'en mididi meets ixyam mmadəpy, nijuunits ja tkamadowdi.

Ku ja Jesús tngajpxy sudso də'ən yikja'gyukit ku jaa'y neppi nixxy

¹⁸ Ukpatmadowdim meets, jəts xja'gyukidit pəni sudso'ampy idə'ən ya'at madya'aky tijy ku ja jaa'y chəə'n neppi.

¹⁹ Pən tjamadojidip ja Dios kyajpxy sə ja ttanitanit ja yjaa'y jəts nika'ap tməjpkita'akti, ja'ats idə'ən jade'en jajtip sam ja təmt mididi naxkidaajk jam tuu'am; jəts miku' ja jaty niniiniyi jəts ja pyəjkxiyi ja Dios kyajpxy mididi ja tə tja'ukja'gyuki.

²⁰ Jəts ja təmt mididi naxkidaajk jam tsajjotp, jade'en idə'ən ja niamyayi yjaty sam jadu'uk ja jaa'y pən tpatmadojidip ja Dios kyajpxy jəts ja jotkujk'atim tkupəjkoiti,

²¹ Jəts kumi jade'ents yjatti sam ja ujts y'aats kya'ejtxiyi, jəts ja nigidi jeky tmi'etti; ku ja tku'ayo'ombaadi ja Dios kyajpxy uk yiktabawopti paat, jəts ja jaty tyimyejxti.

²² Jəts ja təmt mididi yikwəj jam maagyujp agujkp, jade'en idə'ən ja n'ukpiktaajkin sam ja jaa'y pən tpatmadojidip ja Dios kyajpxy, jəts ja pikta'aky jəts ja jotkujk'ajtin ja' ne'egi yjotmay'ajttip, ja' ja win'əə'nidip, jəts ja Dios yja' tyigəəni jəts ja jaa'y ja yjanchja'win nika'ap tyikwingaxi'iky.

²³ Ja təmt mididi ojts naxkida'aky jam ənaxjotp, jade'en ja nbiktaajkin sam ja jaa'y pən tpatmadojidip ja Dios kyajpxy jəts yja'gyukidip, jəts yikwingaxə'əktip. Jade'en ja winaaginidi sam ja tu'ukpi təmt pyajkpety magə'pxy, jəts winaagin jade'en sam ja' mididi pajkpajtp tuguipxy uk ee'pxmajk.

Ku ja ariin yiktamineepi ja ka'əy ujts

²⁴ Jəts ja nwindson'ajtim Jesús tjaaktamimadyaajky jadu'uk ja madya'aky, jəts ja mayjaa'y yide'en tnimaay:

—Jade'en idə'ən ja Dios kyutujk mididi yjaa'y ja tyanitanaapy sam tu'uk ja jaa'y twijyin ja ədyəmt jam kyamjotp,

²⁵ Jəts ku ja wyinaty ixjam myaanidi niduki'iyi, winets ja kugam myidsep ojts tyatəjkxiyi ja kyam, jəts ja ojts t'atswijy ja ka'əy ujts jam ariinjotp.

²⁶ Kuts ja ariin yəəni ku ja y'uuniyi'n, jəts ja ka'əy ujts jam nayide'en pyidsiimy.

²⁷ Winets ja tumbi t'atsnimaadyəə ja wyindsən: “Windsən, pə janch tum ədyəmts mets ojts xijy xwijy jam mgamjotp, ǂmats yə ka'əy ujts tə chəə'n?”

²⁸ Jəts ja wyindsən ja nimaajyidəə: “Ja ta'ajkibi ja tajotmə'tpi net jade'en tə y'adə'əstti.” Xjats ja tumbi tyiktəwidi jəts ja wyandəə: “ǂMdsəjkpy jəts əəts ja ka'əy ujts n'atswejxkəxt?”

²⁹ Yide'ents ja ojts y'adsəyidi: “Ka', ku net ja ka'əy ujts yjayikwəxt, nayide'ents inet ja ariin yikwejxnit.

³⁰ Ne'egi tyimy'oy'atp jøts jade'en xmajststuttit, wan jade'en tyondi, jaanim ku wyinaty tø tymbyaaty jøts yikwejnit; winets øts ja tumbi ngaxt jøts ja jawyeen twejxmujkøxtit ja ka'øy ujts, yikxon t'adsu'umdit tuk'øøxy jaty jøts ja jade'en yiknitsa'at, jøts ja ariin yikpøkjøøkt jap abøjk'i'ñjøtpy."

Ku ja Jesús tmadyakpaaty ja mortas tømt

³¹ Ñayi myadyaajk ja nwindson'ajtim Jesús jadu'uk ja madya'aky:

—Jade'en idø'on ja Dios kyutujk midi yjaa'y ja tyanitanaapy sam ja møj mortas tømðin midi jaa'y wyijpy kyamjøtpy.

³² Jøts kumi jaaktyimchuu'kxñi ja ñidømt yø', ka'ap jadu'uk jade'en ujts midi yjamigu'uk'ajtpy; kuts yøñ, yikxon yjantyimyøñ møj tukmøj kipyin, janch møj idø'on yøñ ti sa øy ti joon myendi kixy kida'aky, jøts ja ñabye'eñidi jam kipy awajkjøxp.

Ku ja Jesús tmadyakpaaty ja levaduri

³³ Ñayi tyamimadyaajk jadu'uk madya'aky:

—Jade'en idø'on ja Dios kyutujk midi yjaa'y ja tyanitanaapy sam ja levaduri midi tø'øxyøjk tyamimøø'kxyip ja ariin way ku ja tøkijpxy tigøøk ojk a'ejxi, jøts ja jich yikxon yaa'kpijy.

Tigøjpx ku Jesús xumi jade'en tyik'ixpiky ja jaa'y ejxpajtin madya'akyøjpx

³⁴ Ejxpajtin madya'akyøjpx idø'on ja nwindson'ajtim ja y'ixpøjkin tñigajpxy, jøts tum jade'en idø'on ja tñigajpxy pøni ti dø'on ja ñimadya'akwampy.

³⁵ Ja'agøjpx ja jade'en yjajty jøts ka'pxy wyimbidsø'ømt sa wyaañ ja Dios kyugajpxy ku ja yide'en tjaadyaañ:

Ejxpajtin madya'aky ø nyiktu'ump ku ti ngajpxw'a'ant;

jøts tñigajpxy øts ja' midi ka' pøn tñigajpxñim, wine'en yam kujk y'ity kuuyip ja Dios tyik'øyi'i'ñ ja naxwii'ñit jøts ixymba'at.

Ku ja Jesús tñigajpxy sudso dø'on yikja'gyukit ku ja ariin yiktamineeppi ja ka'øy ujts

³⁶ Xjats ja nwindson'ajtim Jesús øjts tminawya'kxyi ja jaa'y jøts ja tyøjkii'i'ñ tøkjøtpy, japts pyabøjkpøtøjk ja øjts ñimiñiyi, jøts ja ñimaajjiyi:

—Tuknimadook øøts yikxon ja madya'aky ku tø xnimadya'aky ja ka'øy ujts midi yomp jam kamjotp.

³⁷ Winets nwindson'ajtim Jesús ja ñimaajjiyi:

—Ja tømt wøjpi, øts idø'on ja',

³⁸ Jøts ja kam, naxwii'ñit ja'. Jøts ja ødyømt, ja jaa'dyi pøn Dios kyutujk tpaduujnidip, jøts ja ka'øy ujts, ja jaa'yts ja'adi pøn ja miku' yja' tpaduujnidip,

³⁹ Jøts ja ta'ajkibi tajotma'atpi midi tnepp ja ka'øy ujts, nay ja miku' ja kø'øm. Jøts ku tpaaty ja ariin wejxk'aats, ja dø'on ja' ku naxwii'ñit jaa'y yiktiidyu'undit, jøts pøn tøkømkutip ja pikta'aky, ja ankilis ja'adi.

⁴⁰ Nayide'en idø'on yjatt ku naxwii'ñit kyøxt sam ja ka'øy ujts yikpøkmukyin, sam ja yikpikta'agyin jap jønjøtpy jøts ja jap ñitøy.

⁴¹ Ngaxp øts ja n'ankilis jøts ja twaamujkøxtit pøn jaty ja myigu'uk tyikpøkyundip, jøts pøn nayide'en ttunk'ajttip ja pøktyunk, jøts ja ttukmajststuttit øts ja ngutujk jøts kidi miba'at ttatøkidi.

⁴² Jap ja møj jøndøodyajkjøtpy pikta'aktit ma ja yikxon tmijøødit tmiya'axtit, tmiwingidsettit tmi'agidsettit ja jøøn.

⁴³ Jøts pønts ja Dios tpadundip pøni sa ja wya'añ, ja'ats idø'on jap ja møj kunuu'kxin tmøø'ajttip ma ja Dios Teety ja kyutujk ttanitani ja yjaa'y. Pøni mmøø'ajttip ja ja'gyukin, jja'gyukidits!

Ku ja Jesús tmadyakpaaty ja meen jaa'y yikyu'uch y'ijtpy naxjøtpy

⁴⁴ Nayide'en idø'on ja Dios kyutujk sam meen yu'uch'ityin ya naxjøøjty kamjøøjty. Xjats jaa'y ja tpaaty jøts ja nay jap jadigojk tyu'uch; jøts kumi yjantyaxondakpy winets ñijkxy jøts t'atsto'okixy tuki'iyi ja pyikta'aky ti jaty jam yjagyepjy, jøts ja naajx tjuy ma tø t'ukyu'uch ja meen midi tø tpaaty.

Ku ja Jesús tmadyakpaaty ja tsaa meen

⁴⁵ Nayide'en idø'on ja Dios kyutujk midi yjaa'y tyanitanaapy sam tu'uk ajuubyi agajpxpi, pøn t'ixaaapy tum ja øybi tsaa meen midi ja chow kawinmaañi,

⁴⁶ kuts ja tpaaty tu'uk midi janch tso'atp, winets ñijkxy jøts tuki'iyi y'atsnawyyidoo'kixyi ti jaty jam yjagyepjy, jøts ja tjuy ja tsaa meen.

Ku ja Jesús tmadyakpaaty ja xuummy midi' yikta'ajxmakp

⁴⁷ Nayide'en idø'on ja Dios kyutujk sam tu'uk ja xuummy midi yikta'ajxmakp, kuts ja yiknøøwetspety jam mejjotp, jøts ja tyikpidsimy køx kida'ak ja ajkx.

⁴⁸ Jøts ku ja xuummy tø y'uch, winets ja ajkxmakpi ja twejtspidsømdi jøts ja tyiknøjkxti jam nøø'adsayjotp, jøts jam y'ixa'akti jøts ja jam twi'ejxti ja ajkx; kachjotpy ja tpiakta'akti midi janch tum'øy jøts ja ka'øy ajkx yik'ixwiji.

⁴⁹ Jade'ents idø'øn yjatt ku naxwii'niit jaa'y kyøxt; nibidsømidip ja' ja ankilis jøts ja abiky pyikta'agidit pøni sa pønjabøn y'øyi kya'øyi,

⁵⁰ Jøts ja ka'øysi yikpikta'aktit jap møj jøndøødyajkjøtpy ma ja yikxon yjødødit ya'axtit, wyingidsetstet y'agidsetstet.

Sa ja Dios kyutujk nyiknigaxø'jka'ant

⁵¹ Winets ja nwindson'ajtim Jesús ja yiktøøjidi:

—¿Mnimadoodip idø'øn tuki'iyi?

Xjats ja wyandøø:

—Nnimadøøpy øø nwindson'ajtim yø'.

⁵² Winets ja ñimaajyidi:

—Ku tu'uk ja kajpxwejpi t'ukni'ixpøki sudso tñijawit ja Dios kyutujk midi yjaa'y ja tyanitanaapy, jade'ents ja pyidsimy sam tu'uk ja windsøn midi tjajtp tyikwingaxø'kp ja yjotkujk'ajtim ku ja tñanky'ijxyi øy ti køx kida'ak, wan tjemyi wan tku'aamyi.

Ku ja Jesús yja'jty jadigojk Nazaretit kajpjotp

⁵³ Xjats ku ja nwindson'ajtim Jesús jade'en tñimadyak'abajtysi'ñ, winets ja jam chøø'ñ ⁵⁴ jøts ja ojts yja'aty jam kyø'øm etjotp ma ja kyugajpi. Jamts ja yik'ixpøjktøjkøø tsajtøjkjøtp midi jam wyinaty, jøts ja jaa'y ñigyumaap yjanchjajtøø, yide'en ja wy'a'andi:

—¿Ma yø jaa'y jade'en tø tjaty yø'øbi ixpøjkin? ¿Sudso yø jade'en ttuñ milagri'ajtim?

⁵⁵ Pø ja tsajtspits yø' y'u'nk, jøts ja María ttaagi. Kidi ja Jacobo yø' y'ajchti, jøts ja José møøt ja Simón, jøts Judas.

⁵⁶ Nayats ja y'uch kiixy yø chinaamyidi ma adøm ya. ¿Ti mats yø jade'en tuki'iyi tø tjaty?

⁵⁷ Patyts idø'øn ja jade'en ka' tmøjpikta'akti. Xjats ja nwindson'ajtim Jesús ja ñimaajyidi:

—Tum yiktsojpk ja Dios kyugajpxy øy ma, kuts kyø'øm kajpkixy ku kyø'øm tøjkjøøjty, ka'abimts ja tiyy yiktsøky.

⁵⁸ Jøts idø'øn ja jam ka'ap jadine'en ttuñ ja milagri, kumi ka'ap ja tjanchjawidi.

14

Ku ja Juan Bautista ja o'jkin tpaajty

¹ Nayi winet ets ja nwindson'ajtim Jesús yiknimadøøy jam Galilea, ja Herodes idø'øn ja tñimadøøp pøn jam wyinaty windsøn'ajtp,

² jøts ja tñimaay pøn jaty ja wyinaty møøt tyuñ:

—Ja Juan Bautista net ja' midi y'ijty yiknøbajtp, ja' inet tø yjujkpyiky jadigojk. Paty yø jade'en tmøø'taty ja møk'ajtim jøts yø jade'en ttu'unt ja milagri'ajtim.

³ Jøts kumi ja Herodes ja Juan wyinaty tø chumyi, ja' ja wyinaty tø ñi'ane'emyi jøts ja pujx kadeen ja yiktagøwøønt yiktabakwøønt jap puxøjkjøtpy, ja'agøjpx ku ja ojts ttamigajpxy ja Herodias, pøn ja Herodes ja y'uch Felipe ñidø'øxy'ajtpy.

⁴ Yide'en idø'øn ja Juan wyinaty tø tñimaafi ja Herodes:

—Ka' pyaat'aty jøts yø jade'en xtyimñidø'øxy'att.

⁵ Jøts idø'øn ja Herodes tyimyjayik'ookwa'añ ja Juan, ja mayjaa'yts chø'jkip; kumi tyumnija'widip ja' jøts ku ja Juan tum ja Dios yja' tkajpxi.

⁶ Kuts ja Herodes ja xøøw ja yjumøjt txøduuñ, winets ja Herodias ñøøx pyidsiimy ajtspi ma ja mayjaa'y jam wyinaty tø yikwawdi yikwetsti migaabyi mi'ukpi, ja'ats ja Herodes jyantaxondaajk,

⁷ jøts ja tñimaay møk'ampy jøts ku ja tmo'ot øy ti pøni ti ja kø'øm y'amidoowampy.

⁸ Xjats ja kiixy, tø tyaak ja wyinaty jawyeen y'agajpxiyi ku ja tñimaay ja Herodes:

—Møøky øts platijotp ja Juan Bautista kyubajk.

⁹ Ja'ats ja windsøn Herodes kyujotmaadyøjkiiyi'ñ; jøts kumi tøts ja wyinaty kø'øm møk'ampy ñimy jøts ku ja tmo'ot øy ti, tøts ja jaa'y ja wyinaty tmadowdi pøn jaty jam wyinaty migaadyip mi'uktup, xjats idø'øn ja ojts wya'añ jøts yikmo'ot.

¹⁰ Ojts tyikutuky jøts ja Juan Bautista ja kyubajk y'atsyikajtspoot jap puxøjkjøtpy;

¹¹ jaty dø'øn ja ojts tyikmendi jap platijøtpy jøts ja kiixy ja yikmøøy, jøts tyaak ja tmøøy.

¹² Xjats ja Juan Bautista yjaa'y yja'atti, ja'ats ja ñine'kx ja ojts yiktsoo'nxiyi jøts ja y'atsyiknitajt; kuts ja t'ukyiknaxøjikidøø, winets ja ñøjktøø jøts ja ojts t'atstukmadowdi ja nwindson'ajtim Jesús.

Ku ja Jesús tyikaay ja nimagoxk milbi jaa'y

¹³ Kuts ja tnija'wiyii'ñ, jøts ja chøø'ñ nadyu'uk jap barkijøtpy, jøts ja ñijky ma jam nipøn kya'ity. Jatyts ja jaa'y ja tnija'widøø, winets ja ojts choondi ma jaty ja kajp jam, jøts ja tpanøjkxti tekyjø'øn.

¹⁴ Kuts ja Jesús pyidsiimy jam barkijøtp, jøts ja ojts t'ixy jøts kudam jaa'y jam wyinaty janch namaydi, jøts idø'øn ja ojts t'ayo'ixy, may tyikmøkpiky ja pamaa'y midi ja jam yiktanimeen.

¹⁵ Tsuu'jiñipts wyinaty, winets ja pyabøjkpitøjk ja ojts ñimiñiyi jøts ja ñimaajyøø:

—Tøts ja et chuu'jiñi, jøts ka' ya pøn chøøni. Kajxni yø jaa'y, jøts wan tnøjkxnidi ma jaty kajp jøts jam tju'udyit kyaaky tyojax.

¹⁶ Xjats nwindson'ajtim Jesús ja tnimaajy:

—Ka' yø ñøjkxtit; yikaydi meets yø'.

¹⁷ Jøts ja wyandøø:

—Ka'ap øøts ya ti nmøødi, ja'ayi tsapkaaky jap ja magoxkyi, jøts ajkx jamajtskyi.

¹⁸ Winets ja nwindson'ajtim Jesús ja ñimaajyidi:

—Ya yikmendi.

¹⁹ Jøts ja ojts tnøjmi jøts y'ixa'aktit jam miyjøtp. Xjats ja tnixajiyii'ñ magoxk ja tsapkaaky jøts majtsk ja ajkx, jøts ja ojts tkunuu'kxy jøts ja ttatujkiyii'ñ, jøts ja tkømøøy ja pyabøjkpitøjk, ja'ats ja ojts tyikwa'kxti jøts ja tmøødyi ja mayjaa'y.

²⁰ Niduki'iyi ja kyaydi ku'uxyi; jøts ja makmajtsk kach ujts wyindaañ ja aga'ak abu'xk.

²¹ Nimagoxk mil ja jaa'y kyaydi tum yaa'dyøjk, jøts abiky ja tøøxyøjkti møøt ja mutsk una'jkti, ka'ap ja yikmachowdi.

Ku ja Jesús yøøy jam mejwyingøjxp

²² Xjats ja nwindson'ajtim Jesús nay jaty tyiktøjkii'ñ ja pyabøjkpitøjk jap barkijøtpy, jøts ja ñøjkxtit jawyeen jam jaduktamajñ, yam ja ixjam tyañim jøts ja tminawya'kxti ja mayjaa'y.

²³ Kuts ja t'ukminawya'kxøø, xjats ja nadyu'uk pyatøjkii'ñ tsapkaajpxi jam kojpkøjxp. Jøts ku kyoodsiñaa, ixjam idø'øn ja wyinaty nadyu'uk,

²⁴ jøts ja barki ixjamni ja mejkyujk'am jagamni ja wyinaty. Janch jadi'iñi ja jam yikwibejpyø'øñi ku ja nøø tyojmji'iky, jade'en'ampy ja poj myiñ midi ja ñøjkxtip.

²⁵ Xjats ku jyøpkyoøts'ajty, winets ja nwindson'ajtim Jesús ja jam ñimejnidøø, jadi'iñi ja yøøy jam nøøwingøjxp.

²⁶ Kuts ja pyabøjkpitøjk ja ojts jade'en y'ijxyiyi jøts ku ja yøøy jam nøøwingøjxp, xjats ja jyantyimchø'jkidøø, jøts nay ja tsø'øgi ja møk'ampy yikwajnidøø:

—iTi miku' yø jade'en!

²⁷ Jøts ojts ja nwindson'ajtim Jesús ja myigajpxyidi, jøts ja ñimaajyidøø:

—ikidi mdsø'øgidi, yikmøjkidi m'aaw mjoøt; øts idø'øn wamp!

²⁸ Winets ja Pedro wyaañ, xjats ja tnimaajy:

—Windsøn'ajtim, pøni janch mets idø'øn, yikyø'øky øts nøøwingijxy jøts øts xyiknøjkxt ma mets ixjam.

²⁹ Xjats ja nwindson'ajtim Jesús ja ñimaajyøø:

—Men.

Winets ja Pedro pyidsiimy jam barkijøtp, jøts ja yøøchøø'ñ nøøwingøjxp, jøts ja ñijky ma ja nwindson'ajtim Jesús jam wyinaty.

³⁰ Kuts tja'wiyii'ñ ja møk poj, ja'ats chø'jkii'ñ; jøts enkyi køjk jyøptak'adøtsni, winets møk chabaguejky jøts wyaañ:

—iWindsøn'ajtim, yikpidsømk øts!

³¹ Jøts ja nwindson'ajtim Jesús nay jaty tmajch kyø'køjxp, jøts ja tnimaajy:

—¿Tyimwyinii'nxyip mets mjanchja'win? ¿Tiku tø mnayjøpjawiyi?

³² Xjats ku ja tyøjkidøø jap barkijøtpy, jøts ja poj jaty y'amø'jty.

³³ Winets ja jaa'y ja wyinguxanaajyi pøn jaty jap wyinaty jap barkijøtpy, yide'en ja wya'andi:

—Mets tam idø'øn mjantyimdiosu'nk.

Ku ja Jesús tyiktsøøjky ja mayjaa'y jam Genesaret

³⁴ Xjats ja ttanajxtøø ja mej jøts ja naajx ja tpaattøø yja'ttøø Genesaret.

³⁵ Xjats ku ja jaa'y t'ejxkapti ja nwindson'ajtim Jesús pøn jaty jam kugajp'ajttip, ja'ats ja ayuujk tyikyø'dyøø, jøts tnija'wigyøjxtøø pøn jaty jam tsinaadyip ja'abi et, jøts ja tyikmendøø niduki'iyi pyamaa'y ma ja nwindson'ajtim Jesús wyinaty.

³⁶ Møk ja ttanuu'kxa'akti øy ja ja'ayi tyukpaadidit ja wyet pa'; jøts pøn ja wet jade'en jyøjxtøø, møkpkøjxtøø ja'.

¹ Winets ja fariseotøjk winaagin tñimendøø ja nwindson'ajtim Jesús, møøt ja kajpxwejpitøjkti midì jam wyinaty tø choondi Jerusaléngit kajpkøjxp, jøts ja ojts yiktøwdi:

² —¿Tigøjxp ku yø mbabøjkpitøjk tkabadundi ja møjaa'ychinaa'yin? Ka'ats ttundi ja windsø'jkin ku kyøbujti ku kyawya'andi.

³ Jøts ja nwindson'ajtim Jesús ja ojts nayide'en tyiktøøjimbity:

—¿Jøts tigøjxpts ku meets ja Dios Teety kyutujk xkamimadojiyi, jøts ja' mee myikmadakpy ja møjaa'ychinaa'yin?

⁴ Jøts yide'ents Dios wyaañ: “Windsø'øgi mdeety mdaak”, jøts “Pøni pøn tyeety tyaaak tka'ømyigajpxp, wan tpa'øøky.”

⁵ Jøts ka' meets jade'en mwa'añ, pø mnømpxi meets jøts wan jaa'y tñøjmi ja tyeety tyaaak: “Niwine'enin ngabudøkit, tø øts Dios ndamay'ajtkøjxni ti jaty øts jap nmøøt'ajtpy”;

⁶ jøts ku jade'en pøn wya'añ, ka'ats tyeety tyaaak ja t'ukpudøjkifi. Jade'ents meets ja Dios kyutujk xka'ukmøjpktaajkniiyi jøts meets ja mgostumbri xyikmajadakni.

⁷ ¡Meets win'øø'mbidi! Yikxon yjawaañ ja Isaias ja Dios kyugajpxy jøts mdi meets msø meets, ku ja nøky ja yide'en tjaay:

⁸ Nugo aaw nugo ayuujk, yø' øts yø jaa'y xawindsø'jkidip,

pø ma yø y'aaw yjoøjt yø'ødi.

⁹ Jøts ti yø ñiwy'a'ant øy øts yø wine'en xjawindsø'øgidi,

pø ja'axi y'ixpøjkin'ajtip pøni sà jaa'y kø'øm tyikutuky.

¹⁰ Winets ja tyaxtsøøy ja mayjaa'y jøts ja tñimaay:

—Ukmadowdi meets jøts xja'gyukidit:

¹¹ Kidi yø'øjip jaa'y yikpøkpyajtip midì tøjkip y'aawjøtpy. Yø' jaa'y yikpøkpyajtip midì pidsømp y'aawjøtpy.

¹² Xjats ja pyabøjkpitøjk ja ñimejniyi, jøts ja ñimaajyøø:

—¿Tø x'ixy yø fariseotøjk, ku jade'en tø tñadowdi sà tø xnøjmi jøts yikxon tø yjanty-imy'ambøkti?

¹³ Jøts ja Jesús yide'en y'adsojimbijty:

—Øy ja tyimyidi ixpøjkin, pøni ka'ap ja tminabyaadyi ja Dios yja' møøt, windigøøpy ja y'ity.

¹⁴ Ixmatsti; jade'en yjatti sam ja winap jaa'y ttuu'wawdi ja myiwinap jaa'dyi. Jøts ku ja winap jaa'y tjanch'uktuu'way ja myiwinap jaa'y, kuts jut ja tpaattit namajtskts ja jap kyunaxtit.

¹⁵ Winets ja Pedro wyaañ, jøts ja tñimaay ja nwindson'ajtim Jesús:

—Tukmadoo øøts ti yø yjade'embi madya'aky tyijpy.

¹⁶ Xjats ja nwindsin'ajtim Jesús wyaañ:

—¿Ni meets paat yø xkanimadooni?

¹⁷ ¿Yø' idø'on mgaja'gyukidip, midì tøjkip aawjøtpy jøts ja ñijkxy jam maatsjotp, jøts pyidsimy ku nnawyiyø'øyin?

¹⁸ Midì'its yø aaw yikpidsimpy, jam idø'on ja chøøñ amjotp; yø'øts idø'on jaa'y yikpøkpyajtip.

¹⁹ Jam ja amjotp chøøñ ja ka'øwynmaa'ñ ku jaa'y myigu'uk tyik'øøky, ku jaa'y ñiyaay' uk ñidø'øxy tpøjkxi, ku jaa'y kyawindiy winmaa'ñ tyiktuñ, ku jaa'y myeech, ku jaa'y tyaa'y, jøts ku jaa'y øy ti tumjwimbet tmadyaknaxy.

²⁰ Yø yjade'embi winmaa'ñ idø'on ja jaa'y yikpøkpyajtidip; jøts kidi yø'øjip ku jaa'y tkatuñ jade'en ja windsø'jkin ku tkapujy ja kyø' ku kyaawya'añ.

Ku ja Tiro tø'øxyøjk tjanchja'wiyi'ñ ja Jesús

²¹ Xjats ja nwindson'ajtim Jesús jam choo'nā, jøts ja ojts ñijkxy ma ja jaa'y y'et jamdi, pøn kugajp'ajttip Tiro jøts Sidøn.

²² Jøts tu'uk ja tø'øxyøjk myiñ midì tso'omp cananea, midì jam wyinaty tsinaapy ja'abi etjotp, jøts ja tñimiñ ja nwindson'ajtim Jesús, yide'en ja møk'lampy tñimaay:

—¡Windsøn'ajtim, metsxi rey David m'u'nk'ajtip m'ap'ajtip, ayø'ejxk øts! Yø nøøx øts idø'on ja miku' tø tyatøjkiniyi, jøts yø' møk yjanchyik'ayøjip.

²³ Jøts ja nwindson'ajtim Jesús ka'ap ja t'adsøy niwine'enin ja'agøjxp ja tkamigugajpi, winets ja pyabøjkpitøjk myendøø, jøts ja møkta'aky wyandøø, møkta'aky yiknimaay:

—Kajxni, janch na'ambim adøm yø xpayø'øyim.

²⁴ Winets ja nwindson'ajtim Jesús wyaañ:

—Yø'øyi øts Dios Teety xanigajxp pøn ja Dios kyutujk kapaajtipnim yā Israelit naxjøøjty, yā Israelit kajpjøøjty.

²⁵ Jøts ja tø'øxyøjk myiñ wíngon jøts ja ojts wyínguxaniyi, yide'en ja wya'añ:

—¡Windsøn'ajtim, pudøjkik øts!

²⁶ Jøts yide'en nwindson'ajtim Jesús ja t'adsøøy:

—Ka' y'øyi ku u'nk unā'jk yikpøjkxit ja chapkaaky jøts uk ja yikmo'ot.

²⁷ Jøts ja tø'øxyøjk wyaañ:

—Nwindsøn'ajtim, janch jade'en idø'øn ejx ixa mwa'añ; ja ukts yjøø'kxmukøxtip ja kaaky abu'xk midi ja wyindsøn yika'adip jap mesi patki'py.

²⁸ Jøts ja nwindsøn'ajtim Jesús ja ñimaajyøø:

—Janch mõj mjanchja'win! Wan jade'en tyiktuñ sam idø'øn xtsøky'aty. Jøts ja nay jatyi myøkpiky ja ñøøx.

Ku ja Jesús tyiktsøøjky ja mayjaa'y

²⁹ Xjats ja nwindsøn'ajtim Jesús jam chøø'ñ, jøts ja ñajxy Galileit mejpya'am; winets ja pyatøjkiyi'ñ ma jam ja kojpk tu'uk jøts ja y'ixaajky.

³⁰ Janch namay ja jaa'y jam yja'tti ma jam wyinaty, jade'en ja tyikmendi pøn tekmya'at, pøn winap, pøn uum, pøn koma'at, jøts pøn tigati pa'am pøjkidip. Jøts ja jam tyimwyington tpiaktakøø ma ja nwindsøn'ajtim wyinaty, xjats ja tyikmøkpøjkixy.

³¹ Janch ñigyumaap idø'øn ja jaa'y ja tyimya'widøø ku ja jade'en t'ejxti y'awijy ja uum jaa'y, jøts ku kyø' ja myøkpøkti pøn koma'atti, jøts ku yø'øvjø'økti pøn tekmya'atti, jøts ja winap jaa'y wyin'ejxwä'kxti. Xjats ja tjanchtukmøja'widøø ja Dios Teety pøn ja Israelit jaa'y Dios'ajtim.

Ku ja Jesús tyikaay ja ñimaktaxk milbi jaa'y

³² Winets ja nwindsøn'ajtim Jesús tyaxtsøøy ja pyabøjkpitøjk jøts ja tñimaay:

—Njanch'ayo'ijxpy øts yø jaa'y, tigøøk xøøw øts yø kujk xmøøtsinaañidi, jøts tø ja kyaaky kyøxnidi. Ka' øts yø ayuu ngaxwä'andi jam tyøjkwindum, kuts yø jadi'iñi tuu'ajy y'uktojxñidit.

³³ Xjats ja pyabøjkpitøjk ñimaajyiyi:

—¿Mats ya jadine'en nbøjkin ja kaaky ja jii'kxy jøts yø mayjaa'y jadine'en kya'adyit, jøts nipønts ya?

³⁴ Jøts ja ojts tyiibyikyidi:

—¿Winaak mdsapkaaky japti?

Jøts ja wyandøø:

—Wixujkyi, jøts ja ajkxuna'jk waani.

³⁵ Xjats ja wyaañ jøts ku ja jaa'y y'ixa'aktit,

³⁶ jøts ja tñixajiyi'ñ wixujk ja tsapkaaky møøt ja ajkx, jøts ttamøja'wiyi'ñ ja Dios Teety. Jøts ja ttatujkiyi'ñ jøts ja ojts tmø'øy ja pyabøjkpitøjk, ja'ats ja yikwä'kxti jøts ja tmøødyi ja mayjaa'y.

³⁷ Niduki'iyi ja jaa'y ojts kyaydi jøts niduki'iyi kyujxidi. Yjaaktyimbyøkmujktinim ja' ja kaakwyindank ja wixujk kach.

³⁸ Nimaktaxk mil idø'øn ja jaa'y ojts kyaydi tum yaa'dyøjk, abiky ja tø'øxyøjkti møøt ja mutskuna'jkti, ka'ap ja yikmachowdi.

³⁹ Jøtsnim ja nwindsøn'ajtim Jesús tminawya'kxi ja jaa'y, jøts ja ojts ttatøjkiñi ja barki jøts ja ñijxy jam Magdala etjotp.

16

Ku ja fariseotøjk t'amidoodøø ja Jesús jøts ja ttuk'ejxtit ja myilagri'ajtin

¹ Kuts idø'øn ja jam jade'en ñijxy, xjats ja fariseotøjk ja nimejniyøø møøt saduceotøjkti, jøts ja nugo kyajpxy'ejxwä'añiyi. Ja' ja ojts t'amidowdi jøts ja myilagri'ajtin ja ttu'unt, jøts tyuk'ejxidit ja myø'ajtin jam tsajpwemp, pøni janch ku dø'øn ja y'ukdiosu'ngi.

² Jøts ja yide'en t'adsøøy:

—Ku ja et chuu'ji, pø mnømpxi meets: “Tø'kxwamp tam yø et, kumi tsajpts yø tsajp kyaxi'iky”;

³ jøts ku yjøpy'aty jøts mnømidi: “Ka' tam yø et yam tyø'kxwä'añ, kumi tsajpts yø tsajp kyaxi'iky jøts yooøts møøt.” iMeets win'øø'mbidi! ¿Sa ja tsajp wä'ats xñijawidi ku ja jade'en kyaxi'iky, jøts meets øts nja' ka' xñija'wiyi ku ja mjayiktuk'ejxti?

⁴ Yø tsaachka'øyyaa'y øts idø'øn jade'en x'amidoodip jøts yiktuk'ejxtit ja milagri; ja'ayits jadu'uk y'ukyiktuk'ejxnidit nayide'en sa ja Dios ttuun ja Jonás.

Xjats ja twinwä'ktuujty, jøts ja tyuu'døjkiyi'ñ.

Ja fariseit jaa'y y'xpøjkin

⁵ Kuts ja pyabøjkpitøjk ñajxtøø jam nøø agøøm jam jaduktamajñ, jøts ja tjä'dyigøydi ja chapkaaky, ka'ap ja wyinaty tø tkondi.

⁶ Winets ja nwindsøn'ajtim Jesús ja ñimaajyidi:

—Ukmadowdim; øyim mnay'ejx'etidit, ejxim yø fariseotøjk, ejxim yø saduceotøjk xkaajyidi yø chapkaaky midi wenk levaduri møøt.

⁷ Jøts ja pabøjkpitøjk agøømyi ñawyaambi ñaxwä'jkidøø:

—Ja'agõjxp yõ jade'en wya'añ ku ndsapkaaky tõ ngakõ'õñindi.

⁸ Myadoow ja nwindson'ajtim Jesús ja', jõts ja tnimaay:

—¿Tigõjxp ku jade'en mwa'andi jõts ku mdsapkaaky kya'etti? ¡Niwine'enin meets ja janchja'win xkidyimyjagyepy!

⁹ ¿Ka'ap meets ja xja'gyuki, jõts ka' meets ja xja'myech ja tsapkaaky midì magõk, midì õts ojts nyikwa'kxy, jõts õts ja ojts nmo'odi ja ñimagoxk milbi jaa'y, jõts ka' meets ja xja'myech winaaq kach ojts xpõkmukti ja abu'xk?

¹⁰ ¿Jõts ni ja'baat xkaja'myatsti ja wixujkpi tsapkaaky midì ndagumaay ja maktaxk milbi jaa'y, jõts winaaq kach ojts xjaakpõkmukti?

¹¹ ¿Sudso'ampyts ka' xja'gyukidi jõts ku õts ka' ndijj ja tymchapkaaky midì wenk levaduri mõõt, midì yja'ajttip ja fariseotõk mõõt ja saduceotõktti?

¹² Xjaanims ja tja'gyukidi jõts ku ja nwindson'ajtim Jesús kidi tymjatsapkaagyip ja wyinaty tõ tnigajpxy midì wenk levaduri mõõt, põ ja xpojkinxi ja wyinaty tõ tijj jade'en midì ñanky'ixpõjkidip ja fariseotõktti mõõt ja saduceotõktti.

Ku ja Pedro wyaañ jõts ku ja Jesús yja'aji yiknitsokp, ja Cristo

¹³ Xjats ku ja nwindson'ajtim Jesús yja'jty jam etjotp midì ja Cesarea de Filipit kajp y'etip, jamts ja tyiktiy ja pyabõjkpitõk, jõts ja tnimaay:

—¿Sa jaa'y wya'andi, põnik õts?

¹⁴ Jõts ja wyandi:

—Jade'en winaagin wya'andi jõts ku mets Juan Bautista; jõts jadu'uk wyamidi jõts ku mets mElías, jõts põmbits wamidip jõts ku mets mJeremías, uk põngapõn Dios kyugajpxy.

¹⁵ Winets ja Jesús tyiktiy:

—Jõts meets, ¿sa mee mwa'añ, põn õts idõ'õn?

¹⁶ Xjats ja Simón Pedro t'adsõoy:

—Ja yiknitsokpi mets, ja Cristo, ja Dios U'nk.

¹⁷ Jõts nwindson'ajtim Jesús ja t'adsõoy, jõts ja tnimaay:

—Mets Simón idõ'õn janchjaakxõnim, Jonás myajnkun'k, ka' põn jaa'yip mets yõ jade'en mduk'ejxip, ja Dios Teetyxi dõ'õn yõ jade'en mduknija'wiyip põn jap tsajpõtpy.

¹⁸ Tiy me mwinmay, mõk me nwinmay, patyts idõ'õn myikxomõ'õy Pedro midì tyijpy tsaa. Tõts mets nikõjxp õts yam nyiktso'onda'akwa'añ ja nja'; jõts õts ja nyikmõjta'akt, ni o'jkin niti ja mibaat kyamimada'agit.

¹⁹ Õts me nmõopy ja kutujk'ajtin; põni põn mets ya ja pyõky maa'kxujkip, nayide'en ja tsajpõtpy yikmaa'kxukt. Jõts põni põn mets ya mgamaa'kxujkpy, nayide'en ja tsajpõtpy kyayikmaa'kxukt.

²⁰ Xjats ja nwindson'ajtim Jesús tnimaay mõkta'aky ja pyabõjkpitõk, jõts ja ka'ap põn ttukmado'odit ku ja' Cristo, ku ja yiknitsõ'õky.

Ku ja Jesús tnigajpxy ja y'o'jkin

²¹ Winetyipts ja nwindson'ajtim Jesús wa'ats tnigajpxõjkiyi'ñ, jõts ja ttukmadõy ja pyabõjkpitõk jõts ku ja ñõjkt jam Jerusalén, jõts ku ja mõjaa'dyõjk ja yikxon yik'ayo'ombaa'diyit mõõt ja teetywindsõndõktti jõts ja kajpxwejpõtõktti. Ojts ja ttukmadõy jõts ku ja yik'oogit, juikpyõkpts ja jadigojk, jõts ja kyidigõok xõõw pyidsõ'õmt jadigojk oo'kpi jutjõtpy.

²² Winets ja Pedro ja ojts yiknijkxyi abiky, jõts ja mõkta'aky ñimaajyi:

—¡Windsõn'ajtim, katsojknim Dios Teety jõts jade'en mjatt! ¡Ka'ap jade'en mdyimyjatt mdyimgyubatt!

²³ Xjats ja nwindson'ajtim Jesús tnìwa'k'jimbijj ja Pedro, jõts ja tnimaay:

—¡Mets miku' jìwa'ak, majstutk õts!, nugo mets mjanchyik'adukti. Ka' mets jade'en mwinmay sam Dios Teety wyinmayin, jade'en me mwinmay sam õy põn naxwii'ñit jaa'y.

²⁴ Winets ja nwindson'ajtim Jesús tnimaay ja pyabõjkpitõk:

—Põni põn tsojkin tmõõt'ajtp jõts õts nja' jade'en xpaduujnit, ka' mibaat kõ'õm ñadyunk'atit, ja'ayi ku amumjoojt ñadyamiyoxit ja ayo'on jõts idõ'õn jade'en tpadu'unt.

²⁵ Põnts kajade'enduñim nay'ejxip, niwindem ja tkapaaty ja nitso'ok'ajtin; jõts põn õ xku'ayo'ombajtip, ja' idõ'õn tpaatp ja nitso'ok'ajtin.

²⁶ ¿Ja ti ja ñi'wya'ant õy ja jaa'y tjaja'bõjkixy ja naxwiiñ'ajtin, jõts ja y'anmija'win ne'egi wyindingõy? Jabi ka'axi mibaat ja ñitso'ok'ajtin ja tkuju'uty.

²⁷ Ja Dios Teety õts myõk'ajtin nmimejnip mõõt ja ankilistõktti, jõts õts nwandu'undit sa jaty nidu'uk nidu'uk pyaat'aty yiktu'undit.

²⁸ Janch õts idõ'õn nwa'añ, jõts ku ya ja winaagindi põn ka'oõktip kunim ja jawyeen tymy'uk'ejxtit ku õ nmime'ent ja Dios Teety kyutujk midì yjaa'y ja tyanitanaapy.

17

Ku ja Jesús adsu'jky y'atstigajch, amuum chamambøjkiyx

¹ Xjats ku kyidudujk xøow'ajty, winets ja nwindson'ajtim Jesús tmøødiyii'n ja Pedro, jøts ja Juan møøt ja y'ajch Jacobo, jøts ja ojts ñøjkxti ma ja kojpk jam janch køjpx;

² jamts ja ñanktyigajtsi, wemp am ja tyimy'ejxti ku wyeen y'aaw ja jade'en y'ajty sam xøow y'añin, jøts ja wyet jade'en pyoobiyii'n sam ja jajin.

³ Jøts ja jotmøn t'ejxpaatti ja Moisés jøts ja Elías, ku nwindson'ajtim Jesús ja tmøøtmadya'aky.

⁴ Winets ja Pedro tnimaay ja nwindson'ajtim Jesús:

—Windsøn'ajtim, jtyimy'øy'ajtp ku øø ndyimyam'aty! Pøni mdsøjky jøts øøts ujts'aadyøjktigøøk nyik'øyt; tu'uk mets mja', tu'uk Moisés yja' jøts tu'uk Elías yja'.

⁵ Nay ixamnim ja Pedro jade'en wya'añ ku ja yoots jam yja'jty janchyikwin'oo'kpim, jøts ja tuki'iyi tyik'adigøoy; jøts jap yootsjøtpy ja Dios Teety y'ayuujk yikmadøoy ku yide'en wya'añ:

—N'u'nk øts idø'øn ya'at, yø' øts idø'øn njaaktajotkujk'ajtpy. Mimadowdi pøni sa wya'añ.

⁶ Kuts ja jade'en tmadowdi, xjats ja winda'ak ñaxkidakti, yikxon ja yjantymchø'jkidøø.

⁷ Jøts nwindson'ajtim Jesús ja ñimejnidi, jøts ja tyojnidi, yide'en ja ñimaajyidi:

—Pidø'økti; kidi mdsø'øgidi.

⁸ Xjats ku ja y'ejxjøktøø nimä ja pøn tka'uk'ejxpatnidi, nadyu'uk ja nwindson'ajtim Jesús jam.

⁹ Jøts ja kyidäknidi, ku kojpkøjpx choondi, jamts ja nwindson'ajtim Jesús ja møktä'aky y'ana'amidøø:

—Kidi yø pøn xamimadya'akti midi tø x'ejxti, jaanim ku øts wyinaty tø njujkyiky jadigojk.

¹⁰ Winets ja pyabøjkpitøjky ja tyiibyøjkiyi:

—¿Tigøjxpmits yø kajpxwejpitøjky jade'en wya'andi jøts ku ja Elías jawyeeen mye'ent, jøts ix'oojknim ja yiknitsokpi?

¹¹ Xjats ja nwindson'ajtim Jesús ja ojts yide'en t'adsøy:

—Janch me'emp idø'øn ja Elías, jøts ja tuki'iyi tyik'øyigyøxt.

¹² Østts wamp jøts meets nnøjmi jøts ku Elías tø y'atmengojmi, jøts nigidi tø t'ejxkapti, tø ja twandundi sam y'anmija'win tyimñekti. Nayide'ents øts yø xyik'ayo'ombaaattit.

¹³ Jaanimts ja pyabøjkpitøjky ja tja'gyukidøø, jøts kudam ja nwindson'ajtim Jesús ja ja' tyamimadya'agyidi ja Juan Bautista ku ja Elías tijy tø y'atmengojmi.

Ku ja Jesús tyikmøpkijky tu'uk ja mixyu'nk pøn wyinaty ja miku' tø tyatøkiyi

¹⁴ Xjats ku ja ojts yja'atti ma jaa'y jam wyinaty, jamts ja nwindson'ajtim Jesús tu'uk ja jaa'y ñimejniyi jøts ja ojts wyinguxanay'øyiyi, yide'en ja ñimaajyi:

¹⁵ —Me teety, ayo'ejxik øts n'u'nk, adsu'jky adsu'jky mø'ødyi pa'am yø pyaadyiyi jøts tsaach'ijxim tyuñiyi; atsnaaxkidakp may'ojk jam jønnotp, uk nøøjøtpy paat ñøøki.

¹⁶ Ixyats mets yø mbabøjkpitøjky yø tø njadanimiñ, ka'ats yø myayidi jøts yø tyikmøpkøktit.

¹⁷ Jøts ja nwindson'ajtim Jesús y'adsøoy, jøts tnøjmi pøn jam wyinaty:

—¿Mee kajanchja'wibidi, yø mbøky nugo myikmajadaktip! ¿Ma windemnim meets nga-jpxy n'ayuujk xpabøjkit? ¿Jøts windemnim meets yø yjade'embi suktatso'okt ku øts yø ejtp njanchjanigajpx'ity? Meets, yikmen yø pamaa'y.

¹⁸ Jøts ja nwindson'ajtim Jesús ojts tkajxpidisimy ja miku', ojts ja ttukmajstutu'uty ja mixy jøts idø'øn ja jade'en jatyi tyimyøkpijky.

¹⁹ Winetnimts ja nwindson'ajtim Jesús ja pyabøjkpitøjky myigajpxi jibiky'ampy, jøts ja ojts yiktiiyiyi:

—¿Tigøjxp ku øøts yø miku' tø ngayikpidsimy?

²⁰ Xjats ja nwindson'ajtim Jesús ja ñimaajyidi:

—Ja'agøjpx ku mjanchja'win kyamøkidi. Janch øts idø'øn nwa'añ ku jeexyip ja mjanchja'win ñiyjade'en xmøøt'atti sam mortas pajkin, øyts meets yø kojpk xnøjmit: "Jiwa'ak ya jøts mnøjkt abikytsoo"; jiwa'akpts ja kojpk. Ka' mee ti mgamayit ku janchja'win møk xjanchmøøt'attit.

²¹ Yø yjade'embi miku' ja yø iiy pyidsimy ku Dios n'ajot'ajtint, ku n'amaay'ajtint ngagugaa'yint ngagu'uujka'ant.

Ku ja Jesús tnigajpxy jadigojk ja y'o'jkin

²² Nay ixjamnim idø'øn ja wyinaty wyidetinim ma ja et txøøwi Galilea, ku ja nwindson'ajtim Jesús ja ojts tyukmadøoyidi jøts ku mayjaa'y ja kyøykati,

²³ jøts ja yik'ooigt, jujkyøkpts ja jadigojk kyidigøøk xøow. Ja'ats ja tyimchaachjot-mayja'widøø ku ja jade'en tnija'widøø.

Ku ja tsaptøjk yikugubety

²⁴ Xjats ku ja nwindson'ajtim Jesús tmøtja'jty ja pyabøjkpitøjk jam Capernaumit kajpkøjxp, jamts ja jaa'dyi pøn yiktsaptøjkugubajttip, ja'ats idø'on ojts tninøjkxti ja Pedro, jøts ja ojts tyiktøwdi:

—¿Ka' meets yø myik'ixpøjkpi tkugubety yø tsaptøjk?

²⁵ Jøts ja Pedro y'adsøøy:

—Kyugubejtpyxi yø'.

Xjats ku ja Pedro tyøjkii'ñ tøjktøpty, japts ja nwindson'ajtim Jesús ja jawyeen ñimaajyi:

—¿Sā me Simón mwinmay? ¿Pøn yjawi yø windsøndøjk tyukugubajttip, ja kyø'ømig'u'uk uk ja wenk jaa'y?

²⁶ Jøts ja Pedro y'adsøøy:

—Ja wenk jaa'y yø tyukugubajttip.

Jøts ja nwindson'ajtim Jesús y'adsowimbijty:

—Aaa ka'ats tam adøm idø'on xpaat'ajtyim nyajkint ja tsaptøjk kugubajtin, pøni abiky jaa'y tyukugubajttip.

²⁷ Jøts nipøn ngayik'ambøjkin, nøjxk mejy'agø'øm jøts jam xjuutt ja ajkx, pøni midi inet mijawyeen mjuu'tpy, ja' y'aawjøtpyts inet meeñ xpaatt tu'uk. Pyaatpts inet ja' jøts ja namajtsk ngugubajtin'ajtin; ja'ats myiknøjkxp jøts x'atsmø'ot ja yikugubajtpi.

18*Pøn idø'on jawaani møj mā Dios ja yjaa'y ja kyutujk ttanitani*

¹ Ñiñayi winets ja nwindson'ajtim Jesús pyabøjkpitøjk ñimejniyi, jøts ja ojts yiktiiyiyi:

—¿Pømbi øø nidu'ugin ja tyimy'ukmøjtøkip ku ja mgutujk xyikna'xkida'akt?

² Winets ja nwindson'ajtim Jesús tyaa'xiyi'ñ tu'uk mutsk mixyu'nk, jøts ja tyikwā'k'ø'iyiyi'ñ ja' y'agujk'amdi,

³ jøts ja tnimaagy ja pyabøjkpitøjk:

—Janch øts idø'on nwa'añ, pøni ka' meets ja mdsinaa'yin xyiktigach, pøni ka' meets jade'en mnabyikta'agyi sam ne'egi mutskuna'jk yja'gyukindi, ka' mee mibaat jade'en myikupøkt jøts mdøkidit mā Dios ja kyutujk ttanitani ja naxwii'ñit jaa'y.

⁴ Patys ja' myøjtøkit jam mā Dios ja kyutujk ttanitani ja naxwii'ñit jaa'y ja' pøn yik'ayowim jaa'y'ajtp, pøn jade'en nabyiktaajkip sam ya'at mutsku'ngin.

⁵ Jøts øy pøn pøni xukpøjkidip øts ja nja' midi yik'ayowim jaa'y'ajttip sam ya'at mutsku'ngin, øts idø'on ja wyinaty kø'øm xkupøjkp.

Ja' midi yikpøkpyajtp

⁶ Jøts pøni pøn t'ukyikpøktyu'ump øts ja nja' pøn ø xjanchja'widip, ne'egi ja øyik y'ijty jøts ja mejyjøtpy yikuwibejpit, ku møj paandaak ja y'ukyiktayukxotsit.

⁷ Janch kawindøøp yø naxwii'ñit ku ja y'ity midi jaa'y tyikpøkpyajtp! Nøjxk naxpyim yø jade'en, jøts ijyanch'ayøøy ja' pøn ja myigu'uk yikpøktyu'undip!

⁸ Paty nayide'en pøni myikpøkpyajttip mgø' mdeky, ja'ayi ku xtyimwyiboottit jøts jagam xpikta'aktit; ne'egi øy'atp ku køtuk paktuk mdøkit jap mā Dios jam, jøts kidi ka'pxy xminijxxy ja mgø' mdeky jap inferno.

⁹ Jøts pøni yø mwéen myikpøktyu'ujnip, nawyeenjuudits jøts abiky xpikta'akt; ne'egits øy'atp ku ne'egi wendu'uk mdøkit jap mā Dios, jøts kidi yø mwéen ka'pxy xmidøki ku myikuwibejpit jap jønjøtpy midi jap inferno.

Ku ja Jesús tmaadyakpaajty tu'uk ja borreek midi tigøøpy

¹⁰ Kidits øts ja n'u'nk n'una'jk xmijotmā'jtidi. Janch øts idø'on nwa'añ jøts ku y'ankilis ja jap tsajpjøtpyti Dios Teety wyingujkpy.

¹¹ Pø ja'axi tøn nimiñ jøts øts ja nyiknitso'ok'attit pøn ja pyøky yikwindigø'øyiñidip.

¹² ¿Sā mee m'ukwa'añ? Ku jaa'y jam wyinaty tmøø'aty nimagø'pxy ja borreegi, jøts kuts ja tu'uk tyigø'øty, žti ka'ap ja t'ats'ixa'at? Kuwanixi ja jam kojpkøjxp tyikta'ant ja ñimakta'pxy myakta'xujkpi, jøts ja t'ats'ixa'at midi tøn tyigøy.

¹³ Kuts ja tpaatt, ne'egi tyaxonda'akpts ja' midi tøn y'uktigøy jøts nika'ap ja jade'en ne'egi yiktaxonda'akti ja ñimakta'pxy myakta'xujkpi midi kadigøødyip.

¹⁴ Jade'ents meets idø'on ja Dios Teety mjawiyidi pøn jap tsajpjøtpy, ka'ap ja ttsøky jøts y'u'nk y'una'jk ja jade'en tyigø'øty.

Sā nmigu'uktøjk nmaa'kxuujkint

¹⁵ Pøni jam mmigu'uk mga'ødyuñiyi, nagyajpxidits anadyu'uk jøts xukwinjawit ja pyøky. Pøni kyupijkypts, tøts ja mja' wyinaty myajada'aky jøts ja pyøky nayide'en tk-agu'ayo'ombaaadit.

¹⁶ Kuts mgagupøkit ku ka' mmadoowa'anit, winets tu'uk majtsk jaa'y xwaadso'ot jøts ja t'ejxtit tnijawidit pøni sa jam pøn wya'añ.

¹⁷ Kuts ja kyayikmøjpiktakmidit, winets xukmado'ot ja mayjaa'y pøn tjanchnja'widip ja Dios: jøts ku ni ja'baat kyayikmøjpiktakmidit, winets ja jade'en xpikta'aktit sam ja jaa'y pøn Dios tkajanchja'widip, uk jade'en sam yikugubajtpitøjk yikwa'andi yiktejt.

¹⁸ 'Janch meets idø'øn nnøjmi, pøni pøn meets ya ja pyøky maa'kxuujkip, nayide'en ja tsajpjøtpty yikmaa'kxukt. Jøts pøni pøn mets ya mgamaa'kxuujkpy, nayide'en ja tsajpjøtpty kyayikmaa'kxukt.

¹⁹ 'Nayi ndukmadoodip icyam, pøni pøn tu'uk majtsk nagyajpxidip, jøts t'amidoowa'andi tpøktsoowa'andi tigati ja Dios Teety, mo'ojidipts ja'.

²⁰ Pøni ma tu'uk majtsk ñamyukyidi ja jaa'y øts køjxp, jamts øts ja møøt n'ity.

²¹ Xjats ja Pedro ojts tñinijky ja nwindson'ajtim Jesús, jøts ja ttiibyijky:

—Windsøn'ajtim, ¿winaak ojkin øts ja nmigu'uk nmaa'kxt ku øts ja xka'ødyu'unt kawinaak ojk? ¿Øy ku wixujk ojkin?

²² Jøts ja nwindson'ajtim Jesús y'adsøøy:

—Ka'axi me nnøjmi jøts ku ja'ayi wixujk ojk. Nømpxi øts yam nwa'añ jøts kawinaak ojk pøni winaak ojk meets ja jaa'y mmidundigøyi.

Ku ja Jesús tmadyakpaajty ja tumbi pøn tkamaa'kxuujk ja myigu'uk

²³ 'Jade'en idø'øn ja Dios kyutujk sam tu'uk ja windsønin pøn ja tyumbitøjk ojts tyøj-payø'øy.

²⁴ 'Ixam idø'øn wyinaty tñibøkinim, ku ja ojts yiktaniway tu'uk ja tyumbi mididi ja wyinaty kawine'en miyoj'ajtiyip.

²⁵ Kumi ka'ats ja tyumbi myeeñ ti ja tyagubatp ja yoj, winets ja windsøn wyaañ jøts wan tyiknitooakti møøt y'u'nk ñidø'øxy, jøts pøni ti jaty jam pyikta'aky'ajtip. Jøts pøni wine'en ja choobaatti, ja'ats ja yoj kyudøkip.

²⁶ Xjats ja tumbi tminuu'kxaaajky ja wyindsøn, ojts ja twinguxani, yide'en ja tñimaay: "Windsøn, miduda'aky'ajtk øts, ngubatp øts ja tuki'iyi."

²⁷ Xjats ja windsøn ja ojts y'ayo'ijxyi, jøts ja yoj ja tyamaa'kxuujkiyi jøts ja yik'awa'atspidsøøjmiyi.

²⁸ Kuuyi ja tumbi ja'ayi pyidsiimy, jøts ja ojts tu'uk tminabyaadyiyi ja myigu'uk ja myøøtumbi, ja' ja miyoj'ajtiyip tu'uk pesi majtsk pesi. Yukupajkiixpy ja ojts tyimyach jøts ja jadi'ini tyukpani, yide'en ja møk'ampy tñøjmi: "i'Pe'tpy xkubatt ja yoj, yak puty!"

²⁹ Winets ja myigu'uk ñagyuxendyaajkøø ja' wyindum jøts ja ojts myinuu'kxa'agyiyi: "Miduda'aky'ajtk øts, ngubatp øts ja tuki'iyi."

³⁰ Jøts ja yjadu'ukpi, ka'ap ja tkupijky, ojts ja ñijky jøts ja ojts tpiakta'aky ja myigu'uk jap puxøjkjøtpty kunim ja tyimgyubatt ja yoj.

³¹ Kuts ja yjadu'ukpi ja jade'en t'ejxtøø, tyimy'ayojidi ja' jøts ja ojts t'atstukmadowdi ja wyindsøn sa jaty ja wyinaty tø t'ejxti.

³² Winets ja windsøn ja tyumbi tñankwyadsojøø mididi idø'øn jade'en adøtsp, jøts ja tñimaay: "i'Mets miku!, burri! Tø mets ja myoj ndamee'kxy ku me tø xminuu'kxa'aky.

³³ Nayide'en me ndijy jeexyip ja mmigu'uk x'ayo'ijxy sa me tø n'ayo'ijxyin."

³⁴ Yikxon ja windsøn yjantiyimy'ambijky, jøts ja tkejxy ayooobi kunim ja myigubajtkøxit.

³⁵ Jøts ja nwindson'ajtim Jesús yide'en myadyak'abajtiyi'ñ:

—Nayide'en meets ja Dios Teety mduniyit pøni ka' amumjoojt xmaa'kxukti ja mmigu'uk.

19

Ku ja Jesús kyajpxwijy sudso ja amajtsk'ajtin ñaxy

¹ Ku ja nwindson'ajtim Jesús jade'en wyinaty tø wya'añ, xjats ja chøø'ñ Galilea etjotp, jøts ja ñijky jam Jude'it etjotp mididi tãmp nøøbukø'øm Jordån.

² May jaa'y ja pawidejtiiyip, jøts ja jam may tyiktsøøjky ja pamaa'y.

³ Winets ja fariseotøjk winaagin tñimendi ja nwindson'ajtim Jesús jøts ja tkajpxy'ejxwa'andi, ojts ja tyiktøwdi:

—¿Kutuky yø jade'en jøts øy pøn tñajtsstu'utt ñidø'øxy ku ja yiin waan tyundigøy?

⁴ Jøts ja t'adsøøy:

—¿Ka'anim meets ja Dios kyajpxy x'ejxi? Pø patyxi ja yaa'y ja tø'øxy tyik'øyi'ñ pøn xyiktso'ondaajkindip.

⁵ Nayi nøøm ja': "Ja'agøjxp ja yaa'dyøjk ja tyeety ja tyaak tñajtsstu'utt, jøts ja ñidø'øxy ja møøt tu'ugyi ja'ayi chøønit."

⁶ Tu'ugyi ja ñamyayi tyimbyaaty øy ja jaa'y yjanamajtskidi, paty ka'ap pyaat'aty jøts jaa'y ja tñankñawa'kxit mididi Dios tø tñanibiktaagi tu'uk yaa'y jøts tu'uk tø'øxy.

⁷ Xjats ja ttiibyøjkti:

—¿Jøts tigøxpts ja Moisés tyajky ja tiy'ajtin ja tø'øxyøjk jøts øy ja yikmajtstu'tutt?

⁸Jøts ja nwindson'ajtim Jesús ja t'adsøøy:

—Meets jade'en ja mgawindiy'ajtin myikmajadakpy ku ja Moisés ojts tyikutuky jøts øy xminawya'kxidit ja mnidø'øxy; ka'a'pts yø y'ijty jade'en tso'onda'agyip.

⁹Øts wamp, pøni pøn tminawya'kxip ja ñidø'øxy a'ø'y'ampy, ku ja wenk yaa'dyøjk ja wyinaty tjagamøø'aty, jøts ja tmøø't'amajtskiyøjmi ja wenk tø'øxyøjk, ja' idø'øn pøkyump; nayi pøky ja nayide'en pøn tmøø't'amajtskiyip ja tø'øxyøjk midi tø yikmajtstu'uty.

¹⁰Xjats ja pyabøjkpitøjk ja ñimaajyiyøø:

—Pøni jade'endam yaa'dyøjk tmøøtsøøni ja ñidø'øxy, ne'egi øy tamts ja' ku nguidy-imy'amajtska'ant.

¹¹Jøts ja nwindson'ajtim Jesús ja ñimaajyidøø:

—Pø janch jade'en, ka'a'pts niduki'iyi tkupøkti. Ka'ap ya'at winmaa'ñ pøn nugo ajawi tja'gyuki, ja'ayi dø'øn tkupøjktip pøn Dios møøjyidip.

¹²Ja mayjøøjp ja winmaa'ñ jøts jaa'y kya'amajtskidi: ku winaaggin ka'pxy kyamendi naqxwiñ, winaagints kø'øm ñadyuñidi ku ñay'isabikyidi jøts ka'y'amajtskidit, jøts ja winaaggin pøn tkagu'amajtskip ja Dios kyutujk. Pøni pøn jade'en ttunwamp, wants jade'en ttuñ.

Ku ja Jesús tkunuu'kxy ja mutskuna'jk

¹³Winets ja nwindson'ajtim Jesús yiktanimiñ mutsk mixyuna'jkti jøts ja tkønixajt jøts ja tku'amidowit; jøts ja pyabøjkpitøjk yide'en ja tnimaay ja jaa'y pøn twaamendip ja mutskuna'jk jøts kyatøkidit ja mutskuna'jk.

¹⁴Yide'ents ja nwindson'ajtim Jesús wyaañ:

—Majtstu'utti, wan øts yø mutskuna'jk xnimendi, kidi meets yø xkayiknajxni; yø' dø'øn Dios ja'ajtidip pøn jade'endi sam yø mutskuna'jkindi, ja'ats tpaattip ja Dios kyutujk.

¹⁵Jøts ja ojts tkunuu'kxy ja mutskuna'jk, jøts ja jam ojts cho'oni.

Ja kumeeñ jaa'y

¹⁶Tu'uk idø'øn una'jk jaa'y, ja'ats ojts t'ats'ixy ja nwindson'ajtim Jesús, jøts ja t'atsnimaay:

—Mets øyjaa'y yik'ixpøjkpi, ¿ti øy'ajtin ø ndu'ump jøts øts ja n'anmija'win ja juiky'ajtin tpaatt xemikøjxp?

¹⁷Xjats ja nwindson'ajtim Jesús ja tnimaay:

—¿Tiku ø xnøjmi jøts ku ø n'øyi? Tu'ugyi ja' midi øy, jøts ja Dios idø'øn ja'. Pøni mbaatwampyts ja juiky'ajtin xemikøjxp, paduujnits ja Dios kyutujk.

¹⁸Jøts ja una'jk jaa'y wyaañ:

—¿Midi'ibi?

Jøts ja nwindson'ajtim Jesús tnimaay:

—Kidi myikjaa'y'øøky; kidi mmigu'uk ñidø'øxy xpøjkxi; kidi mmeech; kidi pøn xwindaay'aty;

¹⁹windsø'øgi mdeety mdaak; jøts tsok mmigu'uk sam kø'øm mnachøkyin.

²⁰Jøts ja una'jk jaa'y yide'en tnimaay ja nwindson'ajtim:

—Tø øts yø jade'en njatunguixy, jaayim øts yø jade'en mbaduñ ku nmutsk'aty. ¿Tits øts idø'øn njaaktu'ump?

²¹Jøts ja nwindson'ajtim Jesús ja ñimaajyøø:

—Pøni øy yikxon mjaa'y'atwa'añ, nøjkk x'atsto'okjø'økixy ti jaty jam mjagyeypy jøts xmo'ot ja ñimeeñ ja ayooobi jaa'y, winets xpaatt ja øy'ajtin ja xondaajkin jap tsajjptøpy; ku jade'en x'uktu'unt, winets mme'ent jøts ø xpawidett.

²²Xjats ku ja jade'en tmadoøy, jøts ja yjotmadyøjkijyi'ñ, kumi jantymgyumeeñ, kumi jantymgyubiktā'aky idø'øn ja'.

²³Winets ja nwindson'ajtim Jesús tnimaay ja pyabøjkpitøjk:

—Øts yam tyimwyamp jøts ku møk y'adukyi jøts kumeeñ jaa'y tpaajtit ja Dios kyutujk midi jap tsajjptøpy.

²⁴Jøts jaaktyimwyamp øts jøts ku ja kumeeñ jaa'y janch apeni ñaxti ma Dios ja kyutujk ttanitani tuki'iyi, pø ne'egi tsojñ ñaxt ja møj jiyujk jap xu'unjutjøpy.

²⁵Kuuyi ja pyabøjkpitøjk ja jade'en tmadoodøø, janch ñigyumaap ja tyimyja'widøø, jøts ja xem yam ñayiktøøjidøø:

—¿Pønimts idø'øn nitso'ok'atp?

²⁶Xjats ja nwindson'ajtim Jesús ja ojts y'ijxyidi, jøts ja ñimaajyøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøø't'ajtpy ja møk'ajtin sudso xyikñitsoojkint, niti Dios ktatsepjawi.

²⁷Xjats ja Pedro tyiktiy:

—Windsøn'ajtim, tø øø tuki'iyi n'ixmajtskixy ti jaty øøts y'ity njagyeypy, jøts øø tøndsoñ jøts me myikpawidity. ¿Tits øøts idø'øn nbaatp, ti øøts idø'øn nbøkp?

²⁸Jøts ja nwindson'ajtim Jesús ja t'adsøøy:

—Janch óts idø'øn nwa'añ, ku yja'att ja xøøw ja jumøjt ku tuki'iyi yjemyigyøxt jadigojk, ku ø n'ixa'akt ngutujktaajkjøtpy ku óts ja møk'ajtin nmi'ixa'akt, jøts meets wine'enin meets ixa xpawidity, xnayimøøt'ixa'akp meets nayide'en nimakmajtsk jap kutujktaajkjøtpy, jøts xiidyu'undit ja Israelit jaa'y niduki'iyi.

²⁹ Jøts nayide'en pøn jaty tø tmajstutkøxti ja tyøjk, ja myigu'uktøjk, chø' y'uch, tyeety tyaak, y'u'nk ñidø'øxy, uk ñaajx kyam tmajstut'uttibaat óts ngutujkøjxp, yikmo'odipts ja jinaxy jinaxy øy ti, jøts pyaattip ja' ja jujky'ajtin midu xemikøjxp.

³⁰ Jøts may ja wyindigø'ødyit pøn ixyam namyøjpktaajkidip kø'øm; jøts pøn ixyam ne'egi windigøy'ejtíp, ja'ats ne'egi nøjkx møjtkidip.

20

Ku ja Jesús tmdyákpaajty ja tumbitøjk

¹ Jade'enin idø'øn ja Dios kyutujk midu yjaa'y tyanitanaaapy sam tu'uk jaa'y kyugam'atyin jøts ja chøøñ jøpyi jøpyi tumbi ixaabyi jøts ja y'uvitsa'am pyidø'økt.

² Ojts ja tyikwin'øyidi møøt ja tumbitøjk, øy ja tmiju'uty tu'uk puxmeeñ tukxøøw, jøts ja ojts tkexy tumbi jam kyamjotp.

³ Jøts idø'øn ja ojts cho'ongojmi, ja xøøw wyinaty tuk'ajopu'nk, jøts ja jap maayjotpy ojts tjaak'ixy ja jaa'y pøn awatsidip.

⁴ Yide'en ja tnimaay: “Nøjkx mee nayide'en mduñ jap kamjotpy, jøts nmiju'udyit nayide'en sam pyaat'aty.” Winets ja ojts ñøjkxti.

⁵ Xjats ja windsøn cho'ongojmi ku ja xøøw kyukiyi'ñ, nayide'en winakxyøøw nay ja tumbi dø'øn ja y'ats'ejxkojmip.

⁶ Jøts ku ja xøøw jawaani kyajaxni, xjats ja ojts cho'ongojmi tumbi ixaabyi, jøts ja ojts ñijky nay jap maayjotpy, jøts ja ojts tjaakpaaty ja jaa'y pøn wyinaty awatsidip, yide'en ja tnimaay: “¿Tiku meets ya nugo mxinaxy, ti kidi mee mduñwa'añ?”

⁷ Yide'ents ja y'adsodøø: “Kumi ka'ap øø pøn xyiktunkpaatwa'añ.” Xjats idø'øn ja tnimaay: “Nayi nøjkxts mduñdi óts ngamjotpy, jøts nmiju'udyit.”

⁸ Xjats ku y'ux'ajty, winets ja windsøn tnimaay ja tyumbi midu yiktump: “Yaajxi yø tumbitøjk jøts xmo'ot myijuu'ñ yø' jawyenidip pøn ix'oojk tø tyøkidi tumbi, jøts ja ix'oojk xmiju'uty pøn jawyeen tø tyøkidi tumbi.”

⁹ Winets ja myendøø pøn wyinaty ix'oojk tø tyøkidi tumbi ku ja xøøw jawaani kyajaxni, jøts ja myijuu'ñ ja ojts ka'pxy t'axajidi tu'uk puxmeeñ nidu'uk nidu'uk.

¹⁰ Xjats ku yja' ja tyaja'jidøø pøn wyinaty jawyeen tø tyøkidi tumbi, jade'en ja wyinmaydi yikmiju'udyip ja tijy jawaani tsowi; nayide'en myijuu'ñ ja ojts t'axajidi tu'uk puxmeeñ nidu'ukjaty.

¹¹ Ku ja jade'en ojts t'axajidi ja myijuu'ñ, xjats ja tmi'ambøjktøø ja wyindsøn,

¹² yide'en ja tnimaadyøø: “Pøn ne'egi oojk tø yja'atti, ja'ayi tø tyundi tuk'hori; jøts ne'egi nayide'en tø xmiuju sam øø tø xmiujuyn, jøts tøts øøts yikxon nduñ jøts øøts yikxon tukxinaxy tø nni'añ.”

¹³ Jøts ja windsøn y'adsøø, yide'en ja winaagin yiknimaadyøø: “Ka' me migu'uk yam sa nduñ. ¿Ti kidi tø nnagyajpxyin jøts ku nmiju'uty tu'uk puxmeeñ?”

¹⁴ Axaji yø mmijuu'ñ jøts mnøjkxnit. Nayide'en óts yø nmijuu'wy'añ pøn oojk tø tyøkidi tumbi sam mee tø myikmijuyin.

¹⁵ ¿Pøn óts yø ndejin jade'en xkaduktu'ump pøni sa óts nmeef kø'øm nyiktunkpaatwa'añ? ¿Uk yø' idø'øn m'ama'at'ajtpy ku n'øyyaa'y'aty?”

¹⁶ Jøts ja Jesús jadigojk yide'en wya'añ:

—Jade'ents idø'øn ejx øts ja nwa'añ, pøn tandip ix'oojk, ja'ats ne'egi jawyenidip, jøts pøn jawyenidip, ja'ats ta'andip ix'oojk. Kumi may ja'adi pøn yiktukmadoodip jøts mye'endit, niwaanits ja'adi pøn yik'a'ejxidip jøts ty'a'andit. Nayide'ents ja Dios Teety ttu'unt ja ñaxwii'ñit jaa'y.

Ku ja Jesús tniqajxy jadigojk ja y'o'jkin

¹⁷ Xjats ku ja nwindsøn'ajtin Jesús jam wyinaty tuu'amni midu Jerusalén nøjkxp, winets ja abiky tjiwaay ja pyabøjkpitøjk midu nimakmajtskti, jøts ja tnimaay:

¹⁸ —Ixya tø nbejtyindi Jerusalén ma óts nyikøyakt, jøts øts ja teetywindsøndøjk, jøts øts ja kajpxwejpitøjk nyiktagidøkit pøn ø xyik'ooktip.

¹⁹ Ja'ats ø xkøyaktip jøts øts ja xagidøkidit pøn ka'israelit jaa'dyi, ja'ats ø xnixe'ektip xjaxe'ektip, ja'anim ø xwinwøotip xjipwøotip jøts øts ja xyikruspattit; kidigøøk xøøwts øts ja o'jkin nmimada'akt jøts ø njujkyøkt jadigojk.

Ku ja tø'øxyøjk t'amidøøy ja may'ajtin midu tyaak'ajtp ja Jacobo møøt ja Juan

²⁰ Winets ja Zebedeo y'una'jik jam myendøø møøt ja tyaak ma ja nwindson'ajtim Jesús jam wyinaty. Ja Juan idø'on ja' møøt ja Jacobo, ja'ats idø'on ja tyaak jam ojts twinguxani ja nwindson'ajtim Jesús, jøts ja t'amidoowa'añ tu'uk ja may'ajt.

²¹ Jøts nwindson'ajtim Jesús ja ojts yiktiiyiyi:

—¿Ti dø'on mdsøjkpy?

Jøts ja t'adsøøy, yide'en ja tnimaay:

—Tun may'ajt, jøts øts n'u'nk xyik'ixajkit adsow aduuk ku mgutujk xyiknaxkida'akt, tu'uk aga'n jøts jadu'uk anajy, jøts jade'en ja kutujk tmid'a'andit.

²² Jøts ja nwindson'ajtim Jesús ja y'adsoojidøø:

—Ka' mee xnijawidi pøni ti mee m'amidoodip. ¿Mgupøkp meets ja ayo'on mididi ø nbaatp?

Jøts ja wyandi:

—Ngupøkp øøts ja'.

²³ Xjats ja tnimaay:

—Janch tiiyayjpxy. Mgupøkp meets ja' sa jaty ø njatt ngubatt; jøts kuts øts idø'on xmøøtsinaawya'andi tu'uk aga'n jøts jadu'uk anajy, ka'øtsip ja xpaat'ajtip jøts meets jade'en nyik'ixa'akt, ja' ja yikmo'odip pøni pøn ja Dios Teety kø'øm jade'en tø tyanibiktaagiyidi.

²⁴ Xjats ku ja jade'en tmadowdi ja yjanimajkpidi, jøts ja tjantyimy'i'ambøjktøø ja ñamajtskpidi mididi tukjaa'dyi.

²⁵ Jøts nwindson'ajtim Jesús ja ojts yjayajxniyidi niduki'iyi, jøts ja ojts ñi'mxyidi:

—Jade'en sam x'ejxtin xnijawidi, ja jaa'y pøn tnitanaadyip ja naajx ja kajp, øy ja sagasa y'adøtsnidi pøni sa ja kø'øm ttsokti; kuts jam pøngapøn møk yjaakyikutujkni, tu'ugyits yja' ja tyikmøji.

²⁶⁻²⁷ Jøts ka' meets mja' jade'endi, ne'egi yide'en meets mja'. Pøni pøn namyøjkpikta'akwajnip, ja' idø'on paat'ajtip jøts ja tuki'iyi ttu'unt pøni ti myigu'uk ejtxidip ka'ejtxidip, ja' idø'on ja twindsø'øgip,

²⁸ jade'en sam ø nduñin, kaja'ajipxi ø tø nnimiñ jøts øts jawyeen nyikwindsø'øgit, pø ja'axi ø tø nnimiñ jøts øts ja windsø'jkin nyakt, jøts øts kø'øm ngudanit ja pojkpitumbi jaa'y pyøkyti, jøts ja may ñitso'ok'attit.

Ku ja Jesús tyikwin'ejxwa'kxy ja winap jaa'y

²⁹ Xjats ku ja jam wyinaty cho'onidi jam Jericó, jøts nwindson'ajtim Jesús may ja jaa'y ja ojts pyadsøøñiyi.

³⁰ Jamts wyinaty namajtsk winap jaa'y chøønidi tuu'am, jøts ku ja tmadowdi ku ja nwindson'ajtim Jesús jam wyinaty ñaxy, jøts ja møkta'aky tnimaadyøø:

—jWindsøn'ajtim, rey David y'u'nk y'ap, ayo'ejxk øøts!

³¹ Jøts ja mayjaa'y ja ojts y'øjyidi, ojts yiknøjmidi jøts y'amo'ondit, jøts ja tjaaktyimyikjinajxtøø jawaani møk:

—jWindsøn'ajtim, rey David y'u'nk y'ap, ayo'ejxk øøts!

³² Winets ja nwindson'ajtim Jesús wya'k'øyyii'ñ, jøts ja tyaajxyii'ñ ja winap jaa'dyi jøts ja ttiibyijky, yide'en tnimaay:

—¿Ti dø'on mdsøjktip, ti ø ndu'ump?

³³ Jøts ja ojts y'adsowdi:

—Windsøn'ajtim, jawin'ejxwamp øøts.

³⁴ Winets ja nwindson'ajtim Jesús ja jaa'y ojts t'ayo'ixy jøts ja ojts twinguxaji. Jøts ja winap jaa'y nay jatyi wyin'ejxwa'kxtøø, jøts ja ojts tpadsoondi ja nwindson'ajtim Jesús.

21

Ku ja Jesús kyajtpøjkyii'ñ Jerusalén

¹ Kuts jam Jerusalén wyinaty yja'atwanidi, jøts ja kajp ojts tpaatti mididi txøøw'ajtp Betfagé, mididi jam tniwington'ajtp ja kojpk mididi yiktejp Olivos, winets ja nwindson'ajtim Jesús tkejxy namajtsk ja pyabøjkpi,

² yide'en ja tnimaay:

—Nøjkxti ixø kajpjøøjty ixø wingon. Jamts inet buuri tu'uk xpaattit kuwiiñ møøt y'u'nk. Ja'ats inet migajidip jøts ya xyikme'endit.

³ Jøts ku pøn sa wya'ant, jade'en xnøjmidit jøts ku ø ndsøky, jøts ku ø tsojk ngøyajkojmit.

⁴ Jade'en'ampy idø'on ja jade'en yjajty, jøts tyimyjade'en yjatt sa wya'añ ja Dios kyugajpxy ku ja yide'en tjaay ja nøky:

⁵ Nøjmidi ja Israelit kajp:

“Ejx yø mwindsøn mnimiñiyi mnija'adyiyi, amyuyj tsaachuyj, taku'xni byuuri'u'nk.”

⁶ Xjats ja pyabøjkpi ojts choondi jøts ja ojts ñøjkxti, ojts ja jade'en ttundi sa nwindson'ajtim Jesús ja wyinaty tø y'ane'emyidi.

⁷ Ojts ja twetsti ja buur mōøt y'u'nk, jōts ja ojts wyet ttajiba'andi jōts nwindson'ajtim Jesús ja ojts ttawaa'tspety.

⁸ Jōts ja jaa'dyi janch namay ja'adi, jōts ja ojts tya'apti ja wyet jam tuu'am; pōmbi twidōjti ja ujts'aay jōts ja ojts tpikta'akti jam tuu'am.

⁹ Jōts ja jaa'y mōk wyambinaxwā'ktōø pōn jawyeen yō'odyip, jōts nayide'en pōn ix'oojk payō'odyip:

—iDios Teety tsajjpotpit! iKunuu'kx yō rey David y'ap y'u'nk pōn me tō xkexy! iKuuyi Dios Teety jadu'uk yjaak'ōyi!

¹⁰ Xjats ku ja nwindson'ajtim Jesús kyajtpōjkiy'i'n jam Jerusalén jōts ja kajp kyajotkukidi, may ojts ja jaa'y wya'andi:

—iPōn yō jade'en?

¹¹ Jōts ja jaa'y wyandōø:

—Ja Jesús yō' ja Dios kyugajpxy, pōn kyugajp'ajtp Nazaret jam Galile'it etjotp.

Ku ja Jesús twojpidsonmguixy ja too'kpitōjk jam tsaptōjkjotp

¹² Jōtsnim ja nwindson'ajtim Jesús tyōjkiy'i'n mōj tsaptōjkwimpy, jōts ja ojts tka-jxpidsōmguixy pōn jaty jap wyinaty too'ktip yajkti, juudyip kajpxtip jap tsaptōjkwimpy. Ojts ttejtsapwajkixy ja mesi midī ja jaa'y yiktundip pōn ja myigu'uk myeeñ tkugojnidip, jōts nayide'en chinaabyajt ja yiktejimbejtōø ja paktōo'kpidi;

¹³ jōts ja tnimaay:

—Yide'en jap nōkyijpxy wya'añ, jōts ku ajot'ajtaajk ja chaптōjk wya'ant, jōts jade'ents meets yō tō xpiktakni sam maa'tspitōjk chinaadyōjkti.

¹⁴ Jōts ja nwindson'ajtim Jesús jam tsaptōjkjotp winaagin ñimejniyi ja jaa'dyi pōn winapti pōn pakma'atti, jōts ja ojts tyikmōkpojkixy.

¹⁵ Kuts ja teetywindsōndōjk jōts ja kajpxwejpitōjk ojts t'ejxti ku ja jade'en ttuñ milagri, jōts ku ja ojts tmadowdi ku ja mutskuna'jk jap tsaptōjkjōtpy mōk wya'andi: “iDioskujuyip rey David y'ap y'u'nk!", jōts ja yjantyimy'ambōjktōø

¹⁶ jōts ja ojts tnōjmidi ja nwindson'ajtim Jesús:

—iMadōopy yō' ku yō ixa jade'en wya'andi?

Jōts ja nwindson'ajtim Jesús ja t'adsōy:

—Nmadōopy ots yō'. iTi ka'anīm meets ja Dios kyajpxy x'ejxi ku yō tō tjanigajpxy? Yide'enxi ja wya'añ:

Tō ndanibiktaagi jōts ots mutskuna'jk xjanchjawidit xjanchkunuu'kxyjawidit.

¹⁷ Xjats ja Jesús tmajtstuujt, jōts ja ojts chōōñ jam Jerusalén jōts ja ñijky Betania, jamts ja ojts mya'ay.

Ku ja Jesús ojts t'ayo'onmigajpxy ja iigi tsa'amguipy midī ja tyōøm ka'ejtp

¹⁸ Xjats ku yjōpy'ajty, jōts ja wyimbejtōjmi ñōjkkōjmi jam kajpjotp, winets yuu ja ojts pyaadyiyi.

¹⁹ Xjats ja t'ejxpaajty tu'uk iigi kipy jam tuu'ba'am, jōts ja ojts tninijky, ojts ja kipy tjawi'ixy jōts ja ni tu'uk tyōøm tkapajtōø, nugo janchtum'aay ja'. Winets ja nwindson'ajtim Jesús ojts tnōjmi ja iigi kipy:

—iNijuuni mga'uktōømiñit!

Jade'en ja ojts wya'añ, jōts ja iigi kipy jaty tyimdyi'ich.

²⁰ Xjats ku ja pyabōjkpitōjk ja ojts jade'en t'ejxti, jōts ja jantyimyñigyumaap tjanty-imyja'widōø, winets ja tyiktōødōø ja nwindson'ajtim Jesús jōts ja tnimaadyōø:

—iSudo yō iigi kipy tsojk tō tyimdyi'ich?

²¹ Jōts ja nwindson'ajtim Jesús ja t'adsōy:

—Janch ots idō'on nwa'añ, pōni mjanchmōøt'ajttip ja janchja'win, jōts ku kō'øm ka' xwinma'adyit majtsk'aaw majtskjojt, kidi yō'oyipts mee mjatp sam ots yō iigi kipy ixa tō nduñin, yō kojpk paat mee xnōjmit: “Jiwa'ak ya jōts mnōjkt mejjjotp”, jantyimyjatpts idō'on ja jade'en.

²² Jōts ku oty ti x'amido'odit xpōktso'odit ajot'ajtingōjpx, pōni amumjoojt ja janchja'win xmōøt'atti, myikmo'odipts ja' pōni ti m'amidoodip.

Ja Jesús myōk'ajtin

²³ Jōts ja nwindson'ajtim Jesús tyōjkiy'i'n tsaptōjkjōtpy, ixap ja wyinaty yik'ixpiky ku winaagin jap myendōø ja teetywindsōndōjkti jōts ja mōjaa'dyōjkti, jōts ja ojts tyiibiyikyiyi, yide'en ja ñimaajyōø:

—iPōn yō yjade'embī mdanigutujk'ajtip jōts yō jade'en xu'unt? iPōn yō kutujk jade'en tō mmō'ōyi?

²⁴ Jōts ja nwindson'ajtim Jesús t'adsōy:

—Nayide'en meets yam nyiktøwami; jøts pøni m'adsowimbejtj inet, winets meets ja ndukmado'ot pøni pøn øts yø jade'en xanigutujk'ajtp ku øts yø jade'en nduñ.

²⁵ ¿Pøn ojts Juan Bautista tyangitukyiyi? jøts ja ya yiknøbatt? ¿Dios, uk jaa'y?

Jøts ja xem yam køømyi tkajpxy'ajtpinaxwa'ktøø, yide'en ja ñawya'añidi:

—Ku net yø njanima'ayin jøts ku Dios ja tni'ane'emy, yide'ents inet yø x'adso'owin: “Jøts ¿tigøxp ku ja ojts xkajanchjawidi?”

²⁶ Jøts ku net njanima'ama'y'an jøts ku nugo jaa'y ja ojts kyexyi yiknøbatpi, winets yø mayjaa'y xnibidø'jka'andit; kumi niduki'iyi yø jade'en tnija'widip jøts ku ja Juan tum ja' tkajpxy midi Dios yja'ajip.

²⁷ Jøts ja ojts nugo t'uknimaañidi ja nwindson'ajtim Jesús:

—Ka'ap øø nnija'awi.

Winets ja ojts ñii'mxyidi:

—Ni øts meets inet ja ngadukmado'ot pøni pøn øts yø jade'en xanigutujk'ajtp ku øts yø jade'en nduñ.

Ku ja Jesús tmadyakpaajty namajtsk ja jaa'y tukmiga'axpi

²⁸ Xjats ja tjaaknimaay:

—¿Sa meets idø'øn x'ukja'gyuki ya'atpi ayuujk? Tu'uk idø'øn jaa'y, jamts namajtsk myajnk; jøts ja tu'uk tniimaay: “Mets u'nk, icyam mnøjkxt tumbi jøts ø x'atstujkit ja n'uvi tsa'am.”

²⁹ Jøts ja myajnk ojts yide'en y'adsøiyi: “iKa' nnøjkxwa'añ!” Winmaadyigajts ja jadigojk xjats ja ñijky tumbi.

³⁰ Jøts ja u'nkteety ojts ja tniinijky ja yjadu'ukpi majnk, jøts ja ojts nayide'en tnøjmi, jøts ja ojts yide'en y'adsøiyi: “Øyip teety, øy ø nnøjkxt.” Jøts ja nigidi y'uknøjkxni.

³¹ ¿Pømbits ja tpaðuun jade'en sa ja møjaa'y tjatsøky?

Jøts ja wyandøø:

—Ja' midi ja jawyeen y'uknimaay.

Xjats ja nwindson'ajtim Jesús wyaañ:

—Janch øts idø'øn nwa'añ, jøts ku ja ne'egi jawyeen ja Dios kyutujk ttatøjkiyidit ja'adi pøn pøkyun'ejt kunajxtip, jøts nigidi meets.

³² Kumi ja' meets ja Juan Bautista tø mdanimiñiyi jøts ja mduk'ixpikyidi sa mdsøønidit mdanidit sa mjujky'attit, jøts ka'ats ja tø xmiðøkti; ne'egi ja' ja ojts tjanchjawidi ja jaa'dyi pøn pøkyun'ejt kunajxtip. Jøts kuts meets øy ja ojts jade'en xja'ejxti, ka' meets ja ojts xjanchjawidi, jøts ka' mdsinaa'yin xyiktigajtstøø.

Ku ja Jesús tmadyakpaajty ja ka'ødyumbi

³³ Ukmadowdim jadu'uk ya'at madya'aky: Tu'uk ja jaa'y midi ja kam kaja'ampy tjagyajp, ja'ats ojts tni'ipy ja uvi kipy jam kyamjotp, jøts ja ojts tnuagemy; jøts ja ojts tyik'øyi tu'uk ja abøjk'ii'ñ ma ja uvi nøø yik'amøø'kxat, jøts tu'uk ja ne'ey janch køjxp ma ja kam yik'ejx'ett.

'Xjats ja ojts winaagin ja tyumbi tmøø'y ajuudyujk ja kyam, jøts ja ojts tkøø'ø y jøts ja chøø'ñ widejtpi.

³⁴ Xjats ku tpaajty ja uvi tujk'aats, winets ja ojts tkexy winaagin ja tyumbi, jøts ja ttaniguexy ja yjadu'ukpi tumbidi midi ja wyinaty tyuk'ajuudyujkpy ja kyam, jøts ja yik'amido'odit ja pikta'aky midi ja paa't'ajtiyip.

³⁵ Ka'ap ja ñømdøø, ojts ja tmajtsi ja tumbi midi yikajxtip, pømbi yikwojp yiktse'jk, pømbi ø'jk jøts pømbi yikwinga'jts yikjøpkajts.

³⁶ Jøts ja kugam ojts tjaakajxkojmi ja tyumbi jawaani namay, nigidi jade'en sam ja yjawyeembidi; nayide'ents ja kam ejx'ejtpi ja ojts tyungojmiyidi.

³⁷ 'Jøtsnim ja ojts tkexy ja kyø'm'u'nk, yide'en idø'øn ja y'ukwinmay: “Yikwindsø'øgip øts n'u'nk.”

³⁸ Jøts kuts ja ojts ja'ayi yik'ixy, winets ja kam ejx'ejtpi ñawajnidøø: “Yø' yø kam yø' yø pikta'aky tmidanwangøjxp, yø' yø tmaabyøkwamp; wan tyimyikpa'ø'jkyindi jøts adøm yø nmidaangøjxint.”

³⁹ Xjats idø'øn ja tmajtstøø, jøts ojts tyikpidsømdi jam kamjotp, jøts ja ojts tyik'ookti.

⁴⁰ Winets ja nwindson'ajtim Jesús ttiüyijky, jøts ja wyaañ:

—Ku mye'ent ja kugam, ¿sats ja tumbitøjk yiktu'undit midi kam'ejx'ejtip?

⁴¹ Jøts ja teetywindsøndøjk jøts ja møjaa'dyøjk wyandøø:

—Niwine'en ja tkidyimy'ayo'ext yø yjade'embid ka'ø y jaa'dyi, yikpa'ookp ja', jøts ja t'ayajknaxt jadigojk ja ñaa'x, jøts ja abiktyumbi ja tmo'ot pøn ja mo'ojiyip ja pyikta'aky pøni wine'enin ja pyaat'aty.

⁴² Winets ja nwindson'ajtim Jesús ja ñimaajyidøø:

—¿Niwindinim meets Dios kyajpxy xka'ejxi? Yide'enxi ja wya'añ:

Ja tsaq midi ja pojtspi kya'uk'a'ejxidøø,

ja'ats ne'egi icyam tō y'uikyipiktakni jam pōch kyubajkp jōts ja t'amajtsmujkixy ja pōch. Ja Dios Teety idō'ōn yō jade'en tō ttuñ, ōy yō ñigyumaap njaja'wandi.

⁴³ Jade'ents ja Dios kyajpxy wya'añ, paty mee nnōjmi jōts ku ka' myikmo'odit jōts xatōjkidit ja Dios kyutujk, ja' ja ne'egi yikmo'odip pōn tyikwingaxō'jkidip ja Dios yja' midī ja yja'ajtpy. ⁴⁴ Jōts ja tsaa ku jam pōn y'uknaaxkida'akt, windigō'ōpy ja ayooobi; jōts ku ja tsaa pōn y'uktanaxkidakpatit; yikpu'xkiyip ja'.

⁴⁵ Kuts ja teetywindsindōjk jōts ja fariseotōjk jade'en tmadoodōō ja madya'aky midī ja nwindson'ajtim Jesús ja tamimadyaajkidip, ojts ja tja'gyukidi jōts ku ja' yiknimadya'akti.

⁴⁶ Winets ja tjadyimyjamatswandōō, ja mayjaa'yts chō'jkidip pōn tñija'widip jōts ku ja nwindson'ajtim Jesús ja Dios Teety yja' tkajpxi.

22

Ku ja Jesús tmadyakpaajty sam tu'uk windsōn tyik'amajtski ja myajnk

¹ Xjats ja nwindson'ajtim Jesús ojts jadigojk ttamimadyaktōjkigyojmi jadu'uk madya'aky, yide'en ja wyaañ:

² —Jade'en ja Dios kyutujk midī yjaa'y ja tyanitanaapy sam tu'uk windsōn pōn xōdump jōts myajnk ja tyik'amajtski,

³ jōts ja tyumbi ja ttaniguexy pōn jaty ja yikaawyampy yik'uukwampy jōts ja t'atswa'adit, ka'ats ja jaa'y ja pyadsōō'nidōō.

⁴ Jōts ja ojts abiktyumbi tjaniganajxkojmi, yide'en ja t'uknimaay: “Nōjxk ja x'atstukmadowdi pōn jaty ō nwaawampy, jōts ku ja kaaky jii'kxy ya abaadi y'eitni. Tō ōts ndsakaā nyik'ōōky jōts tyimdyumjane'kxpi tyimdyumjayeekpyi, abaadi a'eixi y'eitni, wan tmenidi tō'ōxñigaabyi tō'ōxñi'ukpidi.”

⁵ Kidyimyōjpiktakti ja' pōn idō'ōn jayikwaaadsoodip migaabyi mi'ukpi. Pōmbi nōjxkni kyamjōtp, jōts pōmbi tyunk tñiyō'ōyini mā jaty pōngapōn myeemyiky,

⁶ jōts pōmbi axaji tyikja'ittōō ja windsōn tyumbi jōts ja tjemdunidi tedunidi, yik'oo'ktibaat ja'.

⁷ Winets ja windsōn yikxon yjantyimy'ambijky, jōts ja ojts tkexy syoldaditōjk jōts ja tyikpa'ooktit ja jaa'y pōn tyimykjaa'y'oo'knidip, jōts ja tñitsaajyidit ja kyajp.

⁸ Winets ja tñimaay tyumbitōjk: “Tum ja abaadi y'eitni jōts xōōw yiktu'unt, ka'adamts yō yjade'embi jaa'y pyaat'atyidi jōts yō nyikmiga'ayin nyikmi'uujkin.

⁹ Nōjxktits jam mā jaa'y ñaxy tyōki, jōts ja niduki'iyi xwa'adit tō'ōxñigaabyi tō'ōxñi'ukpi pōni pōn jaty jam mbattip.”

¹⁰ Jōts ja tumbi cho'ondōō ñōjxktōō jam tuu'am, jōts ja ojts twaamukti pōn jaty ja jam pyattōō, jam ōyjaa'byi ka'ōyjaa'byi; jōts ja mayjaa'y jade'en tyik'ujtstōō ja tōjkjōot.

¹¹ Xjats ja windsōn jam tyōjkixy'ñ jōts ja t'eixwa'añ pōn jaty tō yja'atti migaabyi mi'ukpi, winets ja jap t'eixpaajty tu'uk ja yaa'dyōjk, jōts ku ja ka'ap jade'en xyōxyi sam idō'ōn pyaat'atyidi ñaxyoxidit ja tō'ōxñigaabyidi ja tō'ōxñi'ukpidi.

¹² Jōts ja tñimaay: “¿Sudso mets ya tō mdōki, jōts ka'ats jade'en mxōxyi sam idō'ōn pyaat'atyidi ku tō'ōxñigaaky ku tō'ōxñi'ukk ñaxy?” Jōts ja nisa kidyimwya'añ, amōñi ja y'ity.

¹³ Winets ja windsōn ja tñimaay pōn jaty jam wingidyip wimbōjktip, yide'en ja tñimaay: “Ixe kōwōōndi pakwōōndi jōts xwibōjpsidō'ōmdit, wan tñiikxy agugootstujpy mā yjō'ōt mā ya'axt, mā wyingidsetst y'agidsetst.”

¹⁴ Kumi may ja yjayikwaaadsoowdi ōy pōn, jōts waanits ja'adi pōn yik'a'ejidip.

Ku yikajpxy'aty ja kugubajt

¹⁵ Jōts ja fariseotōjk jam ojts choondi, jōts ja ojts tkajpxy'eixwa'andi, ja'ats ja tyikpōky'attip jōts ja ttani'ōōnidit pōni sa yjadyimy'ukwa'añ.

¹⁶ Xjats ja jade'en winaagin tkajxtōō ja yjaa'y mōōt ja Herodes yjaa'myi, jōts ja t'atstuknimaawya'andi ja nwindson'ajtim Jesús:

—Windsōn, tō ōō nnijawi jōts ku tiy mgajpxy, jōts ku tiy janch ja Dios yja' xnigajpxyiyi, ka' xmōjpkita'aky ōy jaa'y sa yjawa'andi kumi ka' mets pōn xkupiky xkagupiky.

¹⁷ Tukmadookts ōōts sa me m'ukwa'añ: ¿Nmo'op ōōts kugubajt ja mōj windsōn midī jam Roma tsinaapy? ¿Nmo'op ōōts u ka'?

¹⁸ Yja'wiyii'ñits ja nwindson'ajtim Jesús ja' jōts ku ja kya'ōdyunwa'añiyi, jōts ja tñimaay:

—Meets win'ōōmbidi, ¿tiku ōts jade'en xkajpxy'eixti?

¹⁹ Tuk'eixtik ōts ja meen midī myiktundip ku ja kugubajt xyakti.

Jōts ja ojts t'atskondi tu'uk ja pujxmeeñ.

²⁰ Ku ja ojts t'uk'ixy ja nwindson'ajtim Jesús, jōts ja tyiktiiy:

—¿Pōn yō' wyeen y'aaw, jōts pōn yō' xyōōw ixa kyōxja'ayi?

²¹ Jōts ja t'adsoodōō:

—Ja nwindson.

Winets ja ñimaajyidi ja nwindson'ajtim Jesús:

—Yø'òts meets yø windsøn mmo'op midi yø yja'ajtpy, jøts Dios yø xmo'odit midi Dios yja'ajtpy.

²² Xjats ku ja jade'en tmadoodøø, ñigyumaap idø'on ja tyimyjajtøø; jøts ja ojts jade'eñi tmajstututti jøts ja choo'nidi.

Ku ja jaay tyiktøwði pøni janch idø'on ja' ku oo'kpi jadigojk yjujkpyøktit

²³ Jøts nay ja'abi xøøw ja saduceotøjk ojts t'ats'ejxti ja nwindson'ajtim Jesús. Jade'en idø'on ja' ja wyinmaa'ñ tjagyapti jøts ku oo'kpi ka' y'ukjujkpyøjknidit; paty ja yide'en tñimaadyøø ja nwindson'ajtim Jesús:

²⁴ —Windsøn, yide'en ja Moisés wyaañ: kuk pøn tku'ookt ñidø'øxy jøts ku ka' tyiktañ ni tu'uk y'u'nk, pøni jamts y'ajch uk y'uch, ja'ats ja ku'øktyø'øxy tmøøt'amajtskip jøts ja tyika'axt, jøts ja myigu'uk kyagudigø'øty midi tø y'øøky.

²⁵ Jats øøts y'ity nmigu'uk tu'uk midi jaay'ajttip niwixujk yaa'y. Jøts ja jagyoop y'amajtskiy'ñ, o'jks ja'. Jøts kumi ka' y'u'nk y'una'jk tyiktaañ, jøts ja y'uch ojts tmidañ ja kyap, ja ku'øktyø'øxy.

²⁶ Jøts nayide'en yjajty ja myimajtskpi, jøts ja myidigøøkpi nayide'en, tumjade'en ñajxkøjxti niwixujk.

²⁷ Jøts ku ja jade'en y'oo'køjxtøø, jøts ja tø'øxyøjk yjaaktyimy'ø'jky.

²⁸ Jøts kuts ja jadigojk pyidsø'ømdit jujky'ajtpi, ðmidi'ibits ja tñidø'øxy'atp, pø tøxi ja t'atsnidø'øxy'ajtkøxti?

²⁹ Jøts ja ojts yide'en y'adsøyidi ja nwindson'ajtim Jesús:

—Kajaa mdigøydi, ja'agøxp ku ka' xnija'wiyidi ja Dios kyajpxy, ni ja myø'ajtin xkanija'wiyidi.

³⁰ Kuts jadigojk ja oo'kpi yjujkpyøktit nipøn kya'uk'amajtskiñit, ka' pøn y'u'nk ñøøx tkøyakt jøts ja y'amajtskit, jade'ents ja chinaañidit sam anklisti midi jap tsajppøtpy.

³¹ Jøts ku ja oo'kpi yjujkpyøkti, ðka'aním meets ja nøky x'ixy sa Dios kø'øm tø wya'añ? Nøømxi ja':

³² “Tum øts xDios'ajttip ja Abraham, ja Isaac, jøts ja Jacob.” Kidi oo'kpipts ja ñiDios'ajtpy, pø ja'axi ja ñiDios'ajtpy jøts ja tyikjujky'att øy pøn.

³³ Ku ja jaay jade'en tmadoodøø, jøts ja ñigyumaap tja'widøø ku ja jade'en yik'ixpikyidi.

Ja møj kutujk midi ja Dios ñi'ane'empy

³⁴ Winets ja fariseotøjk ojts tñimadowdi jøts ku ja nwindson'ajtim Jesús wyinaty tø tyik'amøñ ja saduceotøjkti, jøts ja ñamyujkidøø;

³⁵ jamts tu'uk kajpxwejpi tmøødidi, ja'ats ja tja'ukajpxy'ejxwaan ja nwindson'ajtim Jesús. Jøts ja tyiktiy:

³⁶ —Windsøn, ðmidi'ibi kutujk jawaani møj midi ja Dios kyutujk myøøt'ajtpy?

³⁷ Jøts nwindson'ajtim Jesús t'adsøøy:

—“Windsø'øgi ja Dios amumjoojt, jade'en xtsokt mabaat myajada'aky m'anmija'win, mabaat myajada'aky m'aaw mjoojt.”

³⁸ Yø' idø'on møj jøts yø' idø'on jawyenip.

³⁹ Jøts ñiñayjade'en ja myimajtskpi, yide'en ja wya'añ: “Jade'en mmigu'uk xtsokt sam kø'øm mnachøkyin.”

⁴⁰ Yø'øbi kutujk majtsk møj midi ja Moisés tø tja'ay jap kyutujkjøtpy, jøts midi ñigajpxtip ja Dios kyugajpxy ku yik'ixpøkti.

ðjanch idø'on ku ja David t'ap'aty ja Cristo?

⁴¹ Nay ixamnim ja fariseotøjk wyinaty amuki y'etininim,

⁴² jøts ja nwindson'ajtim Jesús ttiijy'jky:

—ðSa mee mwinmay, pøn yø Cristo? ðPøn yø' y'u'nk?

Jøts ja tñimaadyøø:

—Ja rey David yø' y'ap.

⁴³ Winets ja nwindson'ajtim Jesús ja tñimaay:

—ðJøts sudsomts ja rey David ja Espíritu Santo yikwajinøø jøts ja ojts tijy windsøn? Tiku ja David yide'en wyaañ:

⁴⁴ Nømp ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy, kunim øts yø nmimajadakøxt pøn jaty mmidsep'ajtip.”

⁴⁵ ðSudso ja Cristo ja yiknitsokpi, sudso ja David ja y'ap'aty, jøts yide'ents ja David kø'øm wya'añ jøts ku ja twindsøni?

⁴⁶ Jøts nipøn nisa kidyimwya'añ, jøts ja'abi xøøw ttamajstuttøø, jøts ka'ap pøn yuktii'byøjkniyi tigati.

23

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

¹ Xjats ja nwindson'ajtim Jesús tnimaay ja mayjaa'y jøts ja pyabøjkpitøjk:

² —Yø kajpxwejpitøjkti jøts yø fariseotøjkti, jade'en yø wya'andi jøts ku yø tyim-byaat'atyidi, yø' idø'øn ja tyimnigajpxtip wa'ats, yø' idø'øn ja tyimnija'widip ja Moisés kyutujk.

³ Jade'ents meets yø xpadu'unt, tundi dø'øn jade'en tuki'iyi pøni sa mnii'mxyidi; kidits nayide'en m'adø'øtsti sam yø y'adø'øtsti, kumi jade'en'ajttip yø', wenk yø jaayi y'ukwa'andi jøts wenk y'adøtskojmidi.

⁴ Nugo tukmajada'ak myajada'akti midi janch kamaabyim, jøts ja'ats ja jaa'y tyuk-padunwandip; jøts niwine'enin ja kø'øm jade'en tkatunwa'andi.

⁵ Jade'en'ampy jade'en y'adø'øtsti jøts ja kajp y'ejxidit, jøts ja mayjaa'y y'ejxidit. Wyet nikijxy tkøxja'adi wan jaty ja Dios kyutujk, jøts yik'agajpxtip ku ja tjantymbyadundi, jøts nayide'en ñachojkmiyiidi jøts wyet tum yøn tnajtskudiiyi tmiwidettit, ka'ap jade'en tyiktundi sam o pøn jaa'y.

⁶ Ja' chojktip jøts tum jam tyimy'ixa'aktit ma ja windsøn tsinaabyajt jam ku xøøw ku ti tyuñi tsaptøjkjøtpy,

⁷ jøts jade'en ttsokti jøts ja jaa'y nøø'ajy tuu'ajy wyindsø'øgiyidit kyajpxpoo'kxiyidit, jøts ja tyimyktejtiti ku ja kyajpxwejti.

⁸ Jøts meetsts kidim jade'en jaa'y xnimaañidi jøts jade'en myiknøjmidit jøts ku mee mgajpxwijy, pø tu'ugyixi mee tum jade'en mnay'uch'atidit mnay'ajch'atidit, jøts tu'ugyits ja mgajpxwejpidi midi mgajpxwejidip, ja Cristo ja', ja yiknitsokpi.

⁹ Jøts kidi pøn xejti teety ya naxwiiñ naxkijxy, tu'ugyixi meets mdeety ja' pøn jap tsajjpøtpy.

¹⁰ Jøts nika' mnawyindsøndejidi, pø tu'ugyixi ja' pøn mwindsøn'ajtip, ja Cristo, ja yiknitsokpi.

¹¹ Pøn ja myigu'uk twindsø'jkip, ja' idø'øn møj, ja' idø'øn nmigubajk'ajtidip.

¹² Pøn ja namyøjpikta'akwajniyip kø'øm, yik'amutski ja nøjxk yjaty, jøts pønts nabyiktaajkip yik'ayowim, ja'ats idø'øn nøjxk møjtojkip.

¹³ 'iTi jade'en mnadyatuujnidip meets kajpxwejpitøjkti meets fariseotøjkti, wine'enin win'øø'ndsøñidi! Meets ja m'agajpxujkpy jøts mmigu'uk xkaduktatøkiwya'andi ja Dios kyutujk. Jøts ka'ats kø'øm mdøkidi, jøts nika' xyiktøkiwyamidi pøn ja tsojkin tjajagyajp.

¹⁴ 'iMjanch'ayøøy meets kajpxwejpitøjkti, meets fariseotøjkti, wine'enin xnidunk'atti ja win'øø'nk!, ku ja ku'økytø'øxy ja tyøjk ja pyikta'aky xpøjkkidi jøts ñadyijyi xkayiknigaxø'økti, ñadyijyi ja tsapakajpxy janch yøn xkajpxti, yø' meets yikxon myiktagubatp.

¹⁵ 'iTi jade'en mnadyatuujnidip meets kajpxwejpitøjkti, meets fariseotøjkti, wine'enin ja mmigu'uk xwin'øøñidi! Mjantymyijotigøødyip meets, jøts ja jaa'y xukupøktit ja mdsinaa'yindi sa mee m'adø'øtsti, jøts kuts ja jaa'y jade'en tø xundi, ne'egi jawaani ka'øy meets ja jaa'y xjaaktyimdyuñ, jade'en ja tpatni sa ja øy øy tyimnøjxkt jap inferno, jøts nigidi meets jade'en mdyimyjatt.

¹⁶ 'iMjanch'ayøøy meets tuu' niwaañidi, jade'ents xundi sam winapjaa'yindi!, ku mee mwa'añ: “Ku pøn wyanda'aky jøts tyiktestigi'aty ja tsaptøjk, jade'ents ja yikpikta'aky sam pøn kyawanda'agyni; jøts pønts wandakp jøts tyiktestigi'aty ja oori midi ja tsaptøjk yja'ajtpy, ja'ats idø'øn tiy janchwandakp.”

¹⁷ 'iMeets mo'otpidi, jade'en xundi sam winap jaa'yindi! ¿Midi'ibi dø'øn jawaani jaaktyimyoj: ja oori, uk ja tsaptøjk midi tyikunuu'kxy jajtp ja oori ku ja yikajpxpaaty?

¹⁸ Jøts nayide'en mwamidi: “Ku pøn wyanda'aky jøts tyiktestigi'aty ja altajr, ka'ap ja wyanda'agyi; kuts pøn wyanda'aky jøts tyiktestigi'aty ja limunsi midi yikyoyxp jam altajrkøjxp, ja'ats idø'øn tiy janch wand'a'aky.”

¹⁹ 'iMee mo'otpidi, mee wimbeets kugoots ejtpidi! ¿Midi'ibi jawaani jaaktyimyoj: ja yojxin, uk ja altajr midi tyikunuu'kxyajajtp ti jaty jam yikyoyxp?

²⁰ Jøts pønts tyiktestigi'ajtp ja altajr ku wyanda'aky, kidi ja'ayip ja nugo yiktestigi'ajtpy, nayide'en ja tyestigi'aty ti jaty jam altajrkøjxp;

²¹ Jøts pøn tyiktestigi'ajtp ja tsaptøjk, kidi ja'ayip ja nugo yiktestigi'ajtpy ku ja wyanda'aky, nayide'en Dios ja tyiktestigi'aty pøn ja chaptøjk'ajtpy.

²² Nayide'en pøn wandakp jøts tyiktestigi'aty ja tsajp, ja Dios idø'øn chinaadyaajk ja tyiktestigi'ajtp, jøts ja Dios kø'øm midi jap tsinaapy.

²³ 'Mjanch'ayooŷy meets kajpxwejpitøjkti, meets fariseotøjkti, ku ja win'øø'nk xunk'atti! Køx kida'ak meets xjanchkugubatkiŷy, jøts ka'ap ne'egi xpadu'unxidi midi ja Dios kyutujk jawaani ne'egi yjani'ane'empy ku ja ttsøky ja ødyiidyu'unin, ja pa'ayo'ejxk jøts ja janchja'win. Ya'atpi meets idø'øn ne'egi jawaani mjapaat'ajtip mbadu'ump.

²⁴ 'Meets winap tuu'waaŷbidi, ku ti x'uukti tum axity ja xyknaxti jøts ja uux jam kyatøki, jøts nika'ats xjawiŷi ja møjpi jiyujk ku ja amuum xjøøndi!

²⁵ 'Ti jade'en mnadyatuujnidip meets kajpxwejpitøjkti jøts meets fariseotøjkti ku xunk'atti ja win'øø'nk! Ja'ayi mee mjanchkamijotkukip sudso ja texy ja tas nikixxy nadyijyi wa'ats y'ett, jøts ka'ap ja xunk'atti pøni sadam ja yjøtpy. Ni xkaja'gyukidi kudam m'amap mjotp tum ja axøøkpi yigaappi xjamøø'tatti, ku jaa'y nugo xwin'øøndi xwimaatsti.

²⁶ Meets fariseo winapti: jawyeen yø mga'øy'ajtin xmajtstu'uttit, jøts jade'en ja m'anmija'win ttaniwa'ats'attit ejxim n'uk'ejxint tasi nyikwaaŷtsin, jade'en nikixxy jade'en jøtpyi.

²⁷ 'Mjanch'ayooŷy meets kajpxwejpitøjkti jøts meets fariseotøjkti, meets win'øø'mbidi!, jade'en mee mgaxi'iky sam ja oo'kpi nipotsin midi tø yikpoobi jøts ja janch tsuj nikixxy kyaxi'iky, jøts ku jap jøtpy uŷts abøki oo'kpi pajk jap, jøts tum ja axøøk ja jap myøøt.

²⁸ Jade'enxi meets idø'øn; wemp am ñadyijyi xuk'ejxti ja jaa'y jøts ku mee m'øyjaa'y. Mide'its jap m'aaŷwidip mjootidip, tum ja taay'ajtk, tum ja taay'ajtk, tum ja kya'øybi jap mwinmaa'fi'ajtip.

²⁹ 'Mjanch'ayooŷy meets kajpxwejpitøjkti jøts meets fariseotøjkti, meets win'øø'mbidi! Meetsxi ja Dios kyugajpxy ja ñipots myik'ø'yidip ku ja y'oookti, jøts ja xyo'om yik'ø'yidi wying'i'jy pøn tø y'ats'øyjaa'y'atti,

³⁰ jøts mjanch'uknømdi: "Kuk adøm jeexyyp n'ukja'ajtyindi, ka'ap adøm ja møjaa'dyøjk jeexyyp tø nbudøjkindi ku ja tø tyik'oookti ja Dios kyugajpxty."

³¹ Yø'øyits meets kø'øm mnadyani'øø'niyyp jøts ku ja xeety'apidi pøn ja Dios kyugajpxy tø tyik'oookti.

³² 'Yik'abaŷadidits inet midi ja mdeety'aptøjk tø ttunjøpidi!

³³ 'Meets win'øø'mbidi! 'Meets kawindiyjaa'dyi! 'Sudso meets xiyy ja ayo'on m'ukniwaaŷtsniyidit midi jap ayodaajkjøtpy mbaattip?

³⁴ Yø'øŷjøpx øts kugajpxy ngaxt møøt ja wijyaa'dyi møøt ja yik'ixpøjkpidi. Jøts myik'oookts meets ja winaagin jøts ja xyikruspattit, jøts pømbi yiktseekp yikwopp jap tsaptøjkjotp, jøts pømbi yik'ixa'ap yikpawidētp kajp kajp.

³⁵ Jade'ents meets ja pøky mdaja'adit, jøts ja xkubattit ku ja øyjaa'y kawine'en tø xyik'oo'knidi, Abel ñikøjxp cho'onda'aky pøn øy pøn yikxon jaa'y'ajtp, kunim ja Zacarias ttamigugøxi pøn ja Berequias myajnk'ajtpy, pøn mee myik'o'jk jap tsaptøjkjøtpy ma ja altajr y'ity.

³⁶ Janch øts idø'øn nwa'añ, ku jade'en yiktuñ yø'øbi pøky, yø ya'atpi jaa'y yø taja'adidip jøts yø yiktagubattit pøn jaty ja ixyam tsinaadyip.

Ku ja Jesús t'ayo'ijxy ja Jerusaléngit kajp

³⁷ 'Jerusaléngit kajp, Jerusaléngit kajp, meetsxi myik'øø'kpy ja Dios kyugajpxy, jøts xwinga'atsti xjøpk'a'atsti pøn ja Dios kyajpxy tyikyø'øyidip, pøn ja Dios mjadaniŷaxidip! 'Tø meets njapeemukwa'añ njakonmukwa'añ kawinaak ojk, sam tsikuna'jk ja tyaak ñimu'uxy, ka'ats meets ja jade'en tø xkupiky!

³⁸ Ejxtits inet ja tsaptøjk ku ja abak tyani;

³⁹ øts idø'øn wamp jøts ku meets xka'uk'ejxnit tsojk, jøts ku meets jaanim x'ejxtit pøni juuni ja tiempi yja'aty ku mnø'ømdit: "Ejxik Dios ja kyunuu'kxyu'nk ñadyaguguexyi midi mmime'enxiyyp ja kyutujk."

24

Ku ja Jesús tnigajpxy jøts ku ja tsaptøjk kyida'att

¹ Xjats ja nwindson'ajtim Jesús pyidisimy jam tsaptøjkjotp, jøts ixam ja wyinaty ñajxni ku ja pyabøjkpitøjk ja jam wingon ñimejniyøø, jøts ja tyukmadoobinaxwa'jkøø sa jaty ja tsaptøjk jam t'ijxy ku ja janch tsuj janch øy.

² Jøts nwindson'ajtim Jesús ja t'adsøøy:

—'M'ejxtip ixa jade'en tuki'iyi? Øts wamp jøts ku ya nitu'ugin ja tsaa kyata'ant nikibyety, kuja'jigyøxp yø tuki'iyi.

Ja ejxa'an midy yik'ejxp ku wyinaty yiktidyunwanidi ja naxwii'ñit jaa'y

³ Winets ja oŷts ñøjxxti jam kojpkøjxp midy yiktejp Olivos; jøts ku ja nwindson'ajtim Jesús ixam wyinaty tø y'ixa'aky, winets ja pyabøjkpitøjk ja oŷts ñinijxyiyi, jøts ja oŷts ñimaajyidi amaa'tsk:

—Ja' øø ndsøjkpy jøts øøts xukmado'ot windem idø'øn ja jade'en yjatt. 'Ti ejxpajt ti ejxa'an øø n'ejxp jøts ku wyinaty mmenwa'añ, jøts ku wyinaty yja'atwa'añ ja tiidyu'unin xøøw?

⁴ Jøts nwindson'ajtim Jesús ja ñimaajyidøø:

—Oyim mnay'ejx'etidit jøts kidi øy pøn nugo mwin'iiñidi.

⁵ Kumi may ja jaa'y mye'endit jøts ja jade'en ñadyejidit jøts ku ja y'øtsi, yide'en ja wya'andit: “Øts idø'øn Cristo ja yiknitsokpi”; jøts mayts ja jade'en twin'øøndit ja jaa'y.

⁶ Jøts mmado'op meets jøts ku jaa'y tñigajpxtit ja tsep, uk tñigajpxtit sa jaty ja tsep yjaak'untit, sa jaty ja ayo'on yikpaatt; kidits mdsø'øgidit, jatp idø'øn ja jade'en; ka'anims wyinaty tmbaata'at jøts ja naxwii'ñit jaa'y yiktiidyu'undit.

⁷ Kumi tseptu'undip ja jaa'y pøn ki'abikñaa'jx ki'abikyajpti jøts ñañibidø'øgidit xem yam, jøts ja windsøndøk nayide'en cheptu'undit ja xem ja yam pøn jaty ja kajp ja ñaa'jx tñitanaadyip naxwiiñ; etp yuu xøøw, jøts pa'am køx kida'ak jøts u'jx ñaxt maawyeen.

⁸ Tso'ondakpnim ja ayo'on wyinaty jade'en midit yikxon yik'ejxpnim.

⁹ Winets meets myikø'yakt jøts myikjemdu'undit myiktedu'undit, jøts jaa'y yik'oogidit, jøts nipøn mgatsokidit o magajp, ja'agø'jx ku mee xjanchjawi.

¹⁰ Winet ets ja jaa'y may ja yjanchja'win t'ixmatstet, yja'dyigøøgyxñidip ja Dios yja' ja'ami jøts ja myigu'uktø'jx t'kø'yajknidit.

¹¹ May ja windaa'y'ajtpi pyidsø'ømdit, ñadyijiywya'andit jøts ku Dios yja' ja tñigajpxidi, jøts may ja myigu'uk twin'øøndit.

¹² Kawine'en ñaxt ja ka'ødyu'unin jøts ja ka'øwynmaa'ñ, may ja jaa'y xem yam kawin'ijxyim ñayjawiyyidit.

¹³ Jøts pøn tmidanaapy jøts pøn tu'ugyi winmaapy, ja'ats idø'øn nøjx nitso'ok'ajtp ja y'anmija'win.

¹⁴ Jøts ya'at øy maðso yikajpxw'akxt wine'enin naxwii'ñit y'ity, ya'at Dios y'øgyajpxy y'ømyadya'aky, jøts ñaa'jx kajp ja møj ja mutsk tñijawidit; jats idø'øn tmbaata'att jøts naxwii'ñit jaa'y yiktiidyu'undit.

¹⁵ Ja Daniel, pøn ja Dios kyugajpxy'ajtpy, ja' yide'en tñajtsja'wiyii'ñ jøts tñigajpxy ti yikpø'pyajtp, ti midundigøøpy; jøts kuts x'ejxtit jøts ku ja'baat jap yik'ejxni yikpatni ma ja tsaachjagunuukxy chaptø'jx jap, japtis ja mga'ukmaa'kxniyyidit. Pøni pøn ya'atpi nøky kajpxp, wan tja'gyuki.

¹⁶ Wants ja tka'akti pøni pøn tsinaadyip jam Judea jøts kyaknø'jxktit jam kojpkø'jx.

¹⁷ Jøts pøni jam wyinaty pøngapøn tø pyety tyø'jxø'jx ja'abi xøøw, ka'ats t'ukniwinajknit ok idø'øn ti tjaak'atsjuutt jap tyø'jxø'jx;

¹⁸ Jøts pøni jam wyinaty pøngapøn wyidity kyamjotp, wan ka' t'ukwimbejtñi, ni wyet ni ñaamy tka'atswetst.

¹⁹ Ayo'ijxyim ja tø'øxyø'jx yjanchjattit pøn jaty mutsk jam wyinaty tñikø'jx'ajttip, pøn jaty myaxu'nk jam wyinaty tø tyikaxø'økti!

²⁰ Amidowdi pø'ktsowdi Dios jøts kidi ja et mga'akti ku ja et y'amxuxy chaachxuxy, jøts kidi wyinaty jyaty ku poo'kxin xøøw;

²¹ Møk ja ayo'on yik'ext sam ka' windi jyatyin wine'en ixyam kujk ñaxy ku ñaxwii'ñit cho'ondaajky. Jøts ku ja ñaxt ni kya'ukyik'ejxñit jadu'uk nayide'en.

²² Jøts ku Dios tyikjajkt ja ayo'on jøts jeky'y'ett, ka' pøn ñitso'ojkn tpaatt; jøts ka'apts jade'en ttu'unt, ja'agø'jx ku ttsøky ja jaa'y jøts tpa'ayø'jx pøn ja kø'øm tø twi'ixy.

²³ Jøts ku winet pøn mnøø'mxidit: “Ejxti, ixya ja Cristo midit yiknitsokp”, uk ñø'ømdit “Ejxti, ixem ja”, kidi xmibø'kti.

²⁴ May ja windaa'y'ajtpi mye'endit jøts myikwin'øøndit, ñadyijyi ja ñadyejidit Cristo midit yiknitsokp, uk ñadyijyi ja ñabyikta'agit jade'en sam ja jaa'y pøn Dios yja' tkajpxidip; jøts tñanky'ejxidit ja ejxa'an ja ejxpajt, ñadyijyi ttu'undit ja mlagri jøts ja jaa'y ttawin'øøndit, ja'baat ja twin'øønwa'andit pøn ja Dios kø'øm tø wyi'ijxyidi.

²⁵ Patki'jyi meets yø ixyam ndukmadøy,

²⁶ kuxip myiknø'jmidit: “Ejxti, ixem ja abak etjotp”, kidits jam mnø'jxkti; uk mjayiknø'jmidits; “Ejxti, ixyajp tam ja tøjxø'jx”, kidits meets ja xmibiky.

²⁷ Ku ø nme'ent, jade'en ø nme'ent sam wyidsukyin ku ja kyaxi'iky jam xø'øbidsimy, nayide'ents ja nay jaty kyaxø'kmi xø'jexy jam tsajpwemp.

²⁸ Niduki'iyi meets ja xñijawit ku nme'ent.

Sa mye'ent ja Dios ja myø'jkudanaabyi ja yiknitsokpi

²⁹ Kuuyi ja ayo'on jade'en y'uknaxt, winets ja xøøw y'ookt, winets ja po' ka' y'uk'anit, jøts ja maadsa' kya'adit. Ku ja tsajp y'adø'psø'jxø'knit, tuki'iyi tum jade'en yjattit ti jaty jam ejtp tsajpwemp.

³⁰ Winetnims ja x'ejxtit jam tsajpwemp midit øts jawyeen nanky'ejxip, jøts ja naxwii'ñit jaa'y ni'ijtyi ya'axtit, jøts t'ejxtit jøts ku ø nmime'ent yootsø'jxpy ja nmøk'ajtñ jøts ja kunuu'lxkin.

³¹ Winets ja puxujx yikmado'ot møk'ampy jøts ø ndanigaxtit ja ankilistøjk, ja'ats twaamukøjxp pøn jaty ø nja'ajtpy wine'en naxwii'ñit jaa'y amuum tuk'ojkyi tuktsajp'agida'aky.

³² 'Øy x'ukja'gyukidit yø madya'aky ku yø iigi kipy yiknimadya'aky: Ku ja y'awaj y'axeen u'nkniim, jøts pyidsimy ja y'aay, jade'ents meets ja xnijawwi ku ja y'anda'akwani.

³³ Nayide'ents idø'øn ja nbiktaajki ku ja ayo'on jade'en x'ejxtit, jade'ents meets ja xnijawit jøts ku wyingøn juuni ja tiidyu'unin ñaxkida'akt, tyimy'ixaani dø'øn ja wyinaty jøts ja jade'en yjatt.

³⁴ Jade'en øts idø'øn nwa'añ, jøts ku ja jaayi jade'en yjatt namga'anim y'oo'køxti pøn jaty ja juiky'ajttip icyam.

³⁵ Najxp y'ity yø naajx tsajp, øy yø juuni kyudigø'øty, jøts øts n'ayuujk ni juuni yø kyakixy kyanaxy kunim jade'en tyimyjatt.

³⁶ 'Ka'ats pøn tnijawwi pøni ti xøøw pøni ti jumøjt ja jade'en yjatt, ni ja ankilistøjk ja tkanijawidi pøn jap tsajpjøtpyti, jøts ni øts ja kø'øm nganijawi. Tu'ugyi ja Dios Teety ja tnijawwi.

³⁷ 'Nayide'en sam ja Noe yjajty, nayide'ents jadigojk yjatt ku ø nme'ent.

³⁸ Ku dø'øn jekyip, ku ja ayo'onduu wyinaty ka'anim myiñ, jøts ja jaa'y wyinaty yikxon yjanchkaydi yjanch'uukti jotkujk, pømbi amajtskip, pømbi y'u'nk ñøøx jam tni'adso'owip jøts yaa'byøkt, jaabaat jade'en yjaaktyimy'adø'østi ku ja Noe tyøjkii'ñ jap møj barkijøtpy;

³⁹ jøts nigidiyi ja tyimy'ejxtøø ku ja møktuu ku ayo'onduu myiñ, jøts ja nøøgom ja ojts yiktso'onguixyidi. Nayide'ents idø'øn nøjx yjaty ku ø nmemit, ka'ap pøn xjøp'ejxtit.

⁴⁰ Winaagin jaa'y jam wyinaty namajtsk tyundi jam kamjøtp; tu'ukts ja ñitso'ok'att jøts jadu'uk wyindigø'øty.

⁴¹ Jøts winaagin tø'øxyøjk jam wyinaty namajtsk yjøtsti; tu'ukts ja ñayide'en ñitso'ok'att jøts jadu'uk wyindigø'øty.

⁴² 'Nayjøp'ejxidits meets, kumi ka' xnijawidi pøni juuni ø nme'ent.

⁴³ Ukmadowdam ya'at, ku n'ukmadyaajkint ku pøn kudøjk wyinaty t'uknijawwi juuni yja'att ja maa'tspi ku koots, çti jats ja juiky kyadsunaxt, ti jaa ja tmajtstu'utt ja tyøjk jøts wan ja maa'tspi tyik'awatsnidi?

⁴⁴ Paty idø'øn nnøjmidi, jøts jøp'ijxy xyik'ettit yam meets ja xkagumay ku øts jotmøñ nme'ent.

Ja ødyumbi ejx'ejtpi

⁴⁵ 'Pømbi tumbi dø'øn wijy, ja'ats idø'øn ja tyimyida'amp pøn jaty ja windsøn jam yiktisinaapy tyøjkjøtp, jøts ja abaadi tmo'ot kyaaky yjii'kxy.

⁴⁶ 'Kidi ja'ajip nekim pøn ja wyindsøn paajtip, jøts ku ja ixam ka'pxy tpaduñ sa ja tø yik'ane'emy ku ja wyindsøn yja'aty?

⁴⁷ Janch øts idø'øn nwa'añ, ja'abi tumbi dø'øn ja windsøn pyikta'akp jøts ja ttuk'ejx'ett tuki'iyi pøni ti jaty ja jam yjagyejpy.

⁴⁸ Kuts ja tumbi kya'ø'y'att, ku nichøky wyinma'aty jøts ku wyindsøn ka' chojkja'aty,

⁴⁹ jøts ja tjemdumbinaxwa'jki ttedumbinaxwa'jki ja wyindsøn tyumbi, uk myu'ugyi kyu'uxyi møøt ja amu'ukyjaa'dyi,

⁵⁰ jøts kuts ja wyindsøn wyimbett agumoni yam ja tkajøp'ijxy ja'abi xøøw;

⁵¹ jøts ja yikxon tyagubatit, nayide'en yiktu'unt sam ja jaa'dyi pøn ja win'øø'nk ttunk'ajttip. Jøts ya'axt yjø'øt tmiwingidsetst tmi'agidsetst ja ayo'on.

25

Ku ja Jesús tmadyakpaajty nimajk ja kiixye' una'jk

¹ 'Jøts ja Dios kyutuujk jade'en yjatt mididi yjaa'y ja tyanitanaapy sam nimajk ja kiixye' una'jkindi, mididi ja yjaj øjts t'ukondi jøts ja tminøjkxti ma ja jaa'y jam y'amajtskiwya'andi, jøts ja jemyaa'y twindsø'øgiwya'andi.

² Nimagoxk ka' ti møj tjawidi, jøts ja nimagoxk janchwijy ja yjaa'y'atti.

³ Pønts ka' ti møj tjawidi ku ja tkondi yjaj, nika'ap ñøø ja øjts tkojnidi, ka'ap ja te mididi ja tyukta'utstip jadigojk ku ja kyøxt ja yjaj;

⁴ pønts wijtyi øjts ja abiky tkondi ja nøø mididi ja yjaj tyuktatøødyip, jøts abiky ja' mididi ja jaj jap yjaakmøøt'ajtpy.

⁵ Jøts kumi ka'ap ja jemyaa'y chojkja'tni, xjats ja niduki'iyi maa'y'øøgyi pyaajtniyidøø, jøts ja øjts yjadyimy'ukma'oo'køjxnidi.

⁶ Xjats tsuu'm et tmdaodøø ja ayuujk kuk yjawi wya'añ møk: "i'ixa myiñ ja jemyaa'y; pidsømdi jøts xjøpkubaadidit!"

⁷ Jøts ja kiixye' una'jk pyidø'køjxtøø, jøts ja yjaj ja t'a'ejxidøø.

⁸ Jøts ja ñimagoxkpi mididi ka'ap øy ti tmøjawidi, ja'ats ja yjanimagoxkpi tniimaadyøø mididi wijtyi mididi winmaadyip: "Møøky øøts yø mjajnøø waani, oo'kniip øøts yø njaj."

⁹ Jøts ja ñimagoxkpi y'adsoodø: "Ka' øøts yø nyaky, ku øøts inet yø nyakt ka' øøts inet nja' tpaatt, jøts ni meets inet mja' yø tkapatmit. Jam ne'egi mninøjkxtit ma tyøøgyi jøts jam mnadyanijuyidit."

¹⁰ Exam ja wyinaty tø tymñøjkxti jøts ja t'atsjuuwy'a'andi ja jajnøø, ku ja jemyaa'y yja'jty. Jade'ents ja tyøjkidi pøn a'ejxi najyagyajpidip, jøts ja ojts tmøøtøkidi ja jemyaa'y ma ja jap y'amajtskiwya'añ, jøts ja tøjka'aw y'adujknaa.

¹¹ Jøts ja yjanimagoxkpi kiixye' oojknim yja'ukja'tnidøø, jøts ja yja'ukwanidi: "iYik'awa'ats windsøn yø tøjkl!"

¹² Jøts ja ojts yide'en yik'adsowdi: "Ka'axi mee nnijawi pøni mbøn meets."

¹³ Jøts idø'øn ja nwindson'ajtim Jesús ja pyabøjkpitøjk yide'en tnimaay:

—Jøp'ijxy mnanky'etidit, kidi nugo mdyimyaanøjkxti, kumi ka' xnijawidi pøni juuni øts ja tiidyu'unin nmime'ent.

Ku ja Jesús tmadyakpaajty ja tumbiktøjk pøn ja wyindsøn ja myeeñ tyanipiky

¹⁴ Nayide'en idø'øn Dios kyutujk midì yjaa'y ja tyanitanaapy, sam tu'uk jaa'y wyinaty choonwani, jøts ja ñøjkxwani abikñaa'ax abikyajp, winets ja ojts twaadsøy pøn jaty ja jam yiktumpy jøts ja ttanipiky ja myeeñ.

¹⁵ Tu'uk tmøøy magoxk mil, jøts jadu'uk majtsk mil, jøts jadu'uk tukmil, jade'en ja ojts tmøøy sa pønjabøn ja wijy'ajtin tmøødi. Jøts ja chøøñ'ñ ijikxy widejtpi abiky'et.

¹⁶ Ja tumbi pøn ja meeñ yikmøøy magoxk mil, ojts ja tta'ajuy tta'agajpxy jøts ja tyik'u'nkjajty ja nayidinøøni.

¹⁷ Nayide'en jadu'uk ja meeñ ojts tyiktunkpatmi pøn yikmøøy majtsk mil, jøts jaa ja nayide'en tyik'u'nkjajty majtsk mil.

¹⁸ Pønts ja meeñ yikmøøy tukmil, myidsø'on ja' jøts ja ayu'uch etjotp tu'uk ja jut tyik'ø'yii'ñ, japts ja meeñ ja tñitajy.

¹⁹ Xjats kyimjekñim ja tumbitøjk wyindsøn wyimbijty, xjats ja tyikwingukidi ja meeñ.

²⁰ Jawyeen yja'jty pøn ja meeñ wyinaty tø yikmøøy magoxk mil, jøts ja tjaakmøøy jamagoxk mil ja wyindsøn midì ja wyinaty tø tyik'u'ngi, yide'en ja tnimaay: "Magoxk milxi, windsøn, ojts xyaky ja meeñ, ixysats jamagoxk mil midì tø nyik'u'ngi."

²¹ Xjats ja windsøn ja ojts y'adsøyi: "Øy'ajtp, øy idø'øn mduñ jøts øy idø'øn mjaa'y'aty; nayide'en sam øy tø x'ejx'lity yø meeñ øy yø kyamabaadi, ndanipøkp inet ja myayjawibi. Jøts ya men, nax, jøts jawaani may xpøkt ja n'øy'ajtin."

²² Jøts jadu'uk yja'tmi pøn ja meeñ yikmøøy majtsk mil, jøts ja wyaañ: "Windsøn, ixya ja meeñ majtsk mil midì øts ojts xmoøøy, jøts ixya ja majtsk mil midì tø nyik'u'ngi."

²³ Jøts ja wyindsøn ja y'adsøji: "Øy'ajtp, øy idø'øn mduñ jøts øy idø'øn mjaa'y'aty; nayide'ents sa tø x'ejx'lity yø meeñ øy yø kyamabaadi, njaakmo'opts nayide'en jawaani may. Men, tøki ndøjkøøjtjy, paat ja m'øy'ajtin."

²⁴ Jøts ku yja'jty ja tumbi pøn ja meeñ wyinaty tø yikmøøy tukmil, yide'en ja tnimaay ja wyindsøn: "Windsøn, nnija'wipxi øts ku mets ka' ti jadi'iñi xnajtsjawi, ja'baat me xpayø'øy øy mets ja xjagaja'aji, myikpidø'økwambyaat mets ja pikta'aky øy me mjagani'ipy.

²⁵ Paty ø ndsø'øgi, paty øts ojts n'atsyu'uch ja meeñ jap naxjøtpy. Ixyats ja', pø mja'ajtpxi yø'."

²⁶ Jøts ja wyindsøn ja ojts yide'en y'adsøyyi: "Tsaachnuuxjaa'y mets ka'ødyumbi, pøni nnija'wip tam ku øts jade'en njaa'y'aty, ku øts nbøkmuky midì ø ngapiktakpy, ku øts ja xijy nyikpidø'økt paat midì ø ka' nni'ipy,

²⁷ jøts tti kuts øts ja nmeen tø xka'anuu'kxyajki, jøts ja meengyojpk ja jeexyip tø nbaaty møøt ja meeñu'nk ku tø nja'aty?"

²⁸ Winets ja windsøn tnimaay ja jaa'y pøn jaty jam wyinaty jam'ajttip: "Pøjkxidi yø meeñ midì tukmil, jøts ja xmo'odit pøn ja yja' majk mil.

²⁹ Pøn ja yja' jam, jaaktyimykmo'opts ja', jøts ja may'ampy tjagyapt; pønts niti tkamøøt'ajtp, jøts ku jap yii'nim tjaakjamøødi, ja'baats ja yjaaktyimykpøjkxiti.

³⁰ Yø yjade'embì tumbi midì niti kawamp, ixep wibejpidømdì agugootstujpy, japts ya'axt yjøt' tmiwingidsetst tmi'agidsetst ja ayo'on."

Ku ja naxwii'ñit jaa'y yikt'idyu'undit

³¹ Ku ø nme'ent windsøn'ajtpi, ni'awidity niduki'iyi ja ankilistøjk nmøøtme'ent, jøts ø n'ixa'akt jam kunuu'kxy kyutujktaajk jøp'am.

³² Jøts ja naxwii'ñit jaa'y niduki'iyi ñamyukidit øts nwingujkp, jøts øts ja nwejtswa'kxtit jade'en sam ja jiyujk'ejxpi ja byorreek t'awojpakyin møøt ja chiibi.

³³ Aga'ñ'ampy øts ja borreek nbikta'akt jøts anajy'ampy ja chiibi ndejint.

³⁴ Jøts winets ø nnøjmìt ja n'aga'ñ'amybyitti: "Ya mendi pøn tø tpaajtidi ja Dios Teety kyunuu'kxin; kupøjkidi ja Dios kyutujk midì yjaa'y ja tyanitanaapy, jaayip yø myik-tanibiktaajkniyidì ku Dios ja naxwii'ñit tyik'øyyii'ñ.

³⁵ Tø nyu'øøky nxø'øøky, meetsts ojts xyikay; tø øts adøødsi n'ity, jøts meets ojts xyik'uuky; jøts ku øts ojts nja'aty ndsøøñ øy magajp, meets ojts xmø'øy nja'ataajk.

³⁶ Ku øts nwet ojts xka'ejtxi, meets ja ojts xmø'øy; jøts ku øts ojts nbiky, meets ojts x'atskajpxjot'amøki; ku øts ojts nyiktsumy, jap meets ojts xkugajpxi."

³⁷ Jøts pønts wyinaty tø yikupøkti jøts øts ja xnøjmidit: "Windsøn'ajtim, ¿windiixik me n'ijxy jøts ku me myu'øøky, jøts øø nyaky kaaky? ¿Uk windits me myik'ijxy mdøødsi, jøts øø nyaky ja nøø?"

³⁸ ¿Uk windits øø n'ijxy jøts ku me mja'aty mdsøøñ mā jaty kajp, jøts øø nyaky ja ja'taajk, uk windits øts ja wet naamy nyaky? ¿Juuni øøts ja tø n'uk'ixy jøts ku ja mga'ejtxyi?"

³⁹ ¿Uk windits me m'ukyik'ijxy jøts ku me mbiky, uk windi øø n'uk'ijxy ku me myiktsumy, jøts øø n'atsku'ejxi jap puxøjkjøtpy?"

⁴⁰ Jøts yide'en ø n'adso'ot: "Janch øts idø'øn nwa'añ, øy yiini wyaani midit tø xuujnidi, midit øts tø xmøøjyidi ja nmigu'uk pøn ka'ejtxidip ja pudøjkin, øts idø'øn ja jade'en ñamyayi tø xundi."

⁴¹ Winets øts ja nnøjmidit ja n'anajy'ambyitti: "Jiwa'akti, kidi øts ya xwin'ejxti meets kawindiidyumbidi; nøjxiti jap mā ja jøøn jap nijuuni kya'øøky, midit ja miku' yiktajøp'ejxtip møøt ja miku'ankilistøjkti.

⁴² Tøxi ø nyu'øøky, jøts meets ojts ka' xmø'øy ja ngaaky; ojts ø ndøødsi, jøts meets ojts ka' xyik'uuky;

⁴³ ojts ø nja'aty ndsøøñ mā jaty kajp, jøts mee ka' xyikja'taajky. Ku øts nwet ojts kya'ity, jøts meets ja nwet ojts ka' xmø'øy; ka' meets ojts xku'ejxi ku øts ojts nbiky, ku øts ojts nyiktsumy."

⁴⁴ Jøts øts ja xnøjmidit: "Windsøn'ajtim, ¿windixik me n'ijxy jøts ku mets wyinaty yuu xøøw myik'ookwa'aniyi, uk tøødsi wyinaty myik'ookwa'aniyi, uk ku me mja'aty mdsøøñ øy magajp, uk ku mwet mnaamy kya'ityxi, uk mbiky m'añi, uk myiktsumy myiktiy, jøts øøts idø'øn niti pudøjkin nguidyimdyuñ?"

⁴⁵ Jøts øts ja yide'en n'adso'odit: "Janch øts idø'øn nwa'añ, øy yiini wyaani jøts ku ka' tø xuujnidi niti pudøjkin pøn ja ayo'on tyanaxpy, ni øts køjxp ja tø xkatuujnidi."

⁴⁶ Winets ja jaty ñøjxiti ayoobi xemikøjxp, jøts pøn wyinaty yikupøkti jøts ja ñøjxmidit tsinaabyi xemikøjxp mā ja tpaajtidit ja Dios kyunuu'kxin jøts ja tsinaa'lyin øy yikxon.

26

Ku ja Jesús yikajpxy'aty sudso ja yikmatst

¹ Ku ja nwindson'ajtim Jesús jade'en y'ukwan'abajtyi'ñ, jøts ja tnimaay ja pyabøjkpitøjk:

² —Mñija'widipxi jøts ku ja paski xøøw ja majtsk xøøwni; jade'ents ø nyikøyakt jøts øts jaa'y xyikruspattit.

³ Jøts ñiñayjaty ñamyujkidøø ja teetywindsøndøjk, ja kajpxwejpøjtø, jøts ja israelit møjaa'dyøjk, jam ja tøjkwemp ñamyujkidøø mā ja Caifás jam kyutujktaajk midit ja teetywindsøndøjk wyindsøn'ajttip.

⁴ Jam ja ojts tkajpxy'atti jøts ja ttanibiktaajkidøø sudso ja yiknidaayit ja nwindson'ajtim Jesús jøts ja tyimyatst, jøts ja tyimyk'ooktit.

⁵ Jøts yide'en idø'øn ja wyandøø:

—Ka' y'øyit ku xøjøjty jade'en ndu'unindit, jøts jaa'y kidi xem yam nañibidi'igyidi.

Ku ja Jesús yiktatagutajmji'iky ja pa'akxuu'kpi

⁶ Jøts ja nwindson'ajtim Jesús jam ja wyinaty Betania, jam Simón tyøjkwindum pøn ja møj pu'uts pa'am pøjkip;

⁷ jøts tø'øxyøjk ja jam ñimejni pøn t'ukoön tukmøj abøjk'i'ñu'nk ja aceite midit pa'akxuu'kp, ujtskoni ja tmimiñ jøts ja'abi midit idø'øn janch tsowi. Xjats ku ja nwindson'ajtim Jesús jam wyinaty tø twingu'ixaagi ja mesi, winets ja tø'øxyøjk tpiaktaajky ja aceite midit pa'akxuu'kp jam nwindson'ajtim Jesús kyubajkøjxp.

⁸ Jøts ku ja pyabøjkpitøjk jade'en ojts t'ejxti, jøts ja yjantymy'ambøjktøø jøts ñømbinaaxwa'ktøø:

—¿Jøts tigøjxp ku yø jade'en nugo wyindigøy?

⁹ Tøxik yø jeexyip yiktøøky jøts maamyeeñ jeexyip yikpøjpk, jøts ayoobi jaa'y ja jeexyip yiktatubøkidi.

¹⁰ Tyimyooww ja nwindson'ajtim Jesús ja', jøts ja tnimaay ja pyabøjkpitøjk:

—¿Tigøjxp ku yø tø'øxyøjk jade'en jotkøjxpim xnøjmidit? Pø yø'øxi dø'øn øy'ajtp ku øts yø jade'en tø xuiñ.

¹¹ Jaakmibaat yø ayoobi jaa'dyi, ka'axi yø mā ñøjxiti, ejtpyim yø xmøøt'ejtkunaxtit; øtsts ka', ka' mee xumi ya nwindsonaagyunaaxt.

¹² Yø' midì'ibi yø tø'øxyøjk tø ttuñ, ku øts nne'kx aceite yø tø xpiktaajkiyi midì pa'akxuu'kp, ja'agøjxp yø jade'en tø ttuñ kuts ja n'o'jkin wyingoni.

¹³ Janch øts idø'øn nwa'añ, ømyadso'att pøni ma yikajpxwa'kxy ya'at øgyajpxy ya'at ømyadya'aky midì tñigajpxp sa nitsø'ok'ajtìn yikpaaty, jøts yiktukmidø y ja naxwii'ñit jaa'y, yikajpxpim yikmadya'akpim yø' midì yø tø'øxyøjk yam tø ttuñ.

Ku ja Judas ñay'awajniyi jøts ja tkøyakt ja Jesús

¹⁴ Xjats nidu'ugin ja ñimajmajtspki pabøjkpitøjki, pøn txøøw'ajtp Judas Iscariote, ja' ojts tñinijky ja teetywindsøndøjki, jøts ja ojts tñinagyajpxyi,

¹⁵ yide'en ja tñimaay:

—¿Wine'en ø xmiju'udyit jøts øts ja nwindson'ajtm Jesús ngøyakt?

Xjats ja ojts tñijuydi ee'pxmajk, jade'en ja meeñ ja ojts tmo'odi tum puxplati.

¹⁶ Jøts jaayip ja Judas ja twinmaa'ñ'ajtñi juuni ja tjadyimy'ukøyakt ja nwindson'ajtm Jesús.

Ku nwindson'ajtm yjaak'uk'a'ux'ajtni møøt ja pyabøjkpitøjk

¹⁷ Xjats ku ja xøøw midukxøøw tyuujnøø, ku ka' pyaat'aty jøts ja tsapkaaky yika'aty levaduri møøt, ja'abi xøøwts idø'øn ku ja nwindson'ajtm Jesús ja pyabøjkpitøjk ñimejniyi wingon jøts ja ojts tyii'byikyiyi, yide'en ja wyandøø:

—¿Ma xtsøky nyiknaxjint ja paski a'ux jøts øøts ja n'a'ejxit?

¹⁸ Jøts ja tñimaay:

—Nøjkxti jam kajpjtøp ma chøøni ja jaa'y, tø xnijawidi pøni pøn, ja'ats mnøjmidip: “Yide'en ja windsøn wya'añ: Wingomp øts ja n'o'jkin, jøts mets mdøjkøtpy øts ja paski a'ux nyiknaxw'a'añ møøt øts ja nbabøjkpitøjk.”

¹⁹ Jøts ja ojts jade'en tpadundi sa ja nwindson'ajtm Jesús ja wyinat yø'ane'emyidi, ojts ja tyik'øyiidi ja paski kaaky jøts ja yik'a'ux'att.

²⁰ Xjats ku kyoodsiyi'ñ, winets ja nwindson'ajtm Jesús tmøøt'ixaajky nimajmajtsp ja pyabøjkpitøjk ma ja mesi jam wyinaty;

²¹ jøts ixam wyinaty tyimgyaydi ku tñimaay ja pyabøjkpitøjk:

—Janch øts idø'øn nwa'añ jøts ku mee nidu'ugin amaa'tsk'ampy xkøyakw'a'añ.

²² Jøts ja yjotmadyøjkidøø, jøts xem yam wyandøjkidøø:

—¿Øts me windsøn'ajtm ndejint xejp?

²³ Jøts nwindson'ajtm Jesús ja ojts yide'en y'adsøyiidi:

—Pøn ø møøt tø ngay tø nji'kxy, ja'ats øts idø'øn xkøyakwamp.

²⁴ Janch jajtp øts inet ixyam jade'en sam ja Dios kyajpxy wya'añ. jYjanch ayøø y ja jaa'y'u'nk pøn x'ukøyajk'oo'kp! Ne'egi tyimdyøøbik jeexyip ku jeexyip kyidyimgye'exy.

²⁵ Winets ja Judas ojts kyajpxy, pøn idø'øn wyinaty køyakwajñip, jøts ja wya'añ:

—Windsøn, ¿ti wan ja ndejin y'øtsi?

Jøts nwindson'ajtm Jesús ja t'adsøø y:

—Paty mets.

²⁶ Ixam wyinaty kyaydi, jøts ja nwindson'ajtm Jesús tñixajiyi'ñ tu'uk ja tsapkaaky, jøts ja ttukmøja'wiyi'ñ ttukunuu'kxyja'wiyi'ñ ja Dios Teety, jøts ja ojts t'adujkpaky, winets ja tmøø y ja pyabøjkpitøjk, yide'en ja wya'añ:

—Kaydi ya'at; yø' øts idø'øn ñamyayi nne'kx'ajtpy.

²⁷ Winets ja tñixajigyøjmi tu'uk ja uuik'ii'ñ, jøts ja ojts ttukmøjawi ttukunuu'kxyjawi ja Dios Teety, jøts ja ojts tmø'ø y ja pyabøjkpitøjk, jøts ja t'ukw'a'kxtit, yide'en ja tñimaay:

—Uukti ya'at niduki'yii,

²⁸ øts idø'øn yø' ñamyayi nni'jpy midì yam jadigojk tñank'ñamyi'øbyøjkip ja jaa'y møøt Dios, midì ø nyikwidsump nyikwidajpxy ja'agøjxp jøts pojkipitumbi jaa'y yikpojkipimaa'kxtit, jøts ja Dios Teety ja wyanda'aky jade'en tyik'adukt.

²⁹ Janch øts idø'øn nwa'añ jøts ku øts ya'at uvi nøø ka' tsojk n'uk'uknit, jaanim jadigojk n'uujkindit jotkujk ku Dios Teety ja kyutuujk tyiknaxkida'akt midì yjaa'y ja tyanitanaapy.

Ku Jesús ja ojts kø'øm tñigajpxy jøts ku Pedro ja kyu'øøniyt

³⁰ Xjats ku ja t'øøøjxtøø ja iy midì ja Dios yja'ajpty, winets ja ñøjktøø jam kojpkøjxp midì yiktejp Olivos.

³¹ Jamts ja nwindson'ajtm Jesús ja ojts ñii'mxyidi:

—Kuwanì meets inet xmajtstutkøxt ya'atpi koots; pø yide'enxi jap nøkyijpxy wya'añ: “Nyik'ookp øts ja borreegi ejxpi, wan ja byorreek jadi'iñi tyø'øwya'kxy.”

³² Kuts øts ja o'jkin n'ukmimajada'akt ku øts jadigojk njujkpyøkt jøts ø nbidsø'ømt jap oo'kpi jutjøtpy, winets ø nnøjkt jawyeen jam Galilea, ñamga'anim meets jam wyinaty mñijky.

³³ Xjats ja Pedro ja ojts y'adsøyiidi:

—Ōy me niduki'iyi jaa'y mjaja'dyigoo'gyixyi, øts niwindem ø ngaja'dyigoy.

³⁴ Winets nwindson'ajtim Jesús ja yide'en tnimaay:

—Janch øts idø'on nwa'añ, jøts ku yam koots inet ku ka'ap tsapni'aaw y'ayajxi'ikñim, tigøøk ojk mets wyinaty tø xku'iñ jøts ku me xka'ijxy'aty.

³⁵ Jøts ja Pedro tjaaktyimñimaay ja nwindson'ajtim:

—Nijuuni øts jade'en nga'adi'ich, njadyimyja'øøky me møøt.

Jøts ja yjadu'ukpimidi, nayide'en ja wyamidi.

Ku ja Jesús t'ajot'ajty ja Dios Teety jam Getsemani

³⁶ Jøts idø'on ja nwindson'ajtim Jesús tmøøtja'jty ja pyabøjkpitøjk mā ja et jam txøøwi Getsemani, jamts ja tnimaay:

—Ya awejxti, wan øts ja Dios Teety t'ats'ajot'aty.

³⁷ Jøts ja tmøødiyii'ñ ja Pedro møøt namajtsk ja Zebedeo y'unaj'jk, jøts ja jotmay yjanch-tatøjkiniiyi.

³⁸ Xjats ja tnimaay ja pyabøjkpi mididi ja y'ukwaaw nidigøøk:

—Janch køjxp øts njoojt jadi'iñi, o'jkin'ampy ø tø njotmaadyøki. Awejxtits ya, kidim mma'oo'knidi, møøtwijy'ejtik øts.

³⁹ Winets ja nwindson'ajtim Jesús jawaani yjaaknajtsyø'oyiyii'ñ, jøts ja ojts jadi'iñi ñagyuxendya'agiyi, jøts ja ojts t'ajot'aty ja Dios Teety, yide'en ja wyaañ:

—Dios Teety, øyik jade'en xjanchkayikjatt, jøts øts kidi jadine'en ayo'on ndyimbaay; øy idø'on kidyimjade'eni sam ø ndyimyjatsøkyin, jade'en øts idø'on ngupøkt pøni sã me xamidsøky.

⁴⁰ Xjats ja wyimbijty nay jam mā ja pyabøjkpi jam wyinaty nidigøøk tø t'ukyiktañ, kuts ja tpaajty tødamik ja mya'oo'knidi; winets ja ojts tnøjmi ja Pedro:

—¿Niwine'enin mee tø mguidyimyjada'aky jøts meets jeexyip xmøøtwijy'ity?

⁴¹ Wejti kajti, ajot'ajti ja Dios Teety, nay'ejx'etidi jøts kidi mmimajada'agidi ja ayo'on mididi wingomp. Janch øts idø'on nwa'añ ku ja winmaa'ñ yjanchja'ødyunwa'añ, ja ne'kxts jaayi ja ka'øybi tumbi amuts'ejxyip.

⁴² Xjats ojts ñjokxkojmi nay jam jadigojk, winets ojts yide'en t'ajot'aty ja Dios Teety:

—Dios Teety, pøni ka'ap jade'en xyikjaty jøts øts ja ayo'on xkadukpaatt, wants idø'on jade'en tjaty pøni sã me kø'øm xamidsøky.

⁴³ Xjats jam yjaakwimbijty jøts ja pyabøjkpitøjk jadigojk tpatkojmaa, janchmaa'ap ja jam, wimbeets ja tsuu ja yik'ejtniiyi.

⁴⁴ Jøts ja nay jam tnikejky, jøts midigøøk ojk ñijky Dios Teety ajot'ajtpi, nayide'en wyangojmaa.

⁴⁵ Winetnimts ojts ñijky mā ja pyabøjkpitøjk jam wyinaty, jøts ja tnimaay:

—Tøts inet, maanidi poo'kxniidi, wan jade'en tjaty. Tø dø'on tymbyaayt jøts ku ø nyikøyakt jøts ø nyiktagidøkit ja pojkipitumbi jaa'dyi.

⁴⁶ Pidø'økti, wan tjaa'myindi; ixa wyingøñ pøn ø xkøyakwamp.

Ku ja Jesús yikmajch

⁴⁷ Nay ixamnim ja nwindson'ajtim Jesús wyinaty jade'en wya'añ ku yja'jty ja Judas, pøn ja y'ukpabøjkpi'ajtpy jøts ja møøt tyika'pxy nimakmajtsk ja pyabøjkpitøjk, ja'ats idø'on jam tmøøtmeen ja mayjaa'y tum tsujx møøt jøts tum kipyapidi. Ja teetywindsøndøjk, ja israelit møjaa'dyøjk, ja' dø'on ja kajxidip.

⁴⁸ Jøts ja Judas, pøn ja nwindson'ajtim tkøyajkp, yide'en ja wyinaty ja tiy'ajtin tø tyaky, yide'en ja wyinaty tø wya'añ:

—Pøni pøn øts inet ndsu'kxpy, ja' idø'on ja wyinaty; jøts ja' idø'on mmatstip.

⁴⁹ Xjats ja myiñ jøts ja nwindson'ajtim Jesús yiknimiñ, yide'en ja tnimaay:

—jøts windsøn memp!

Jøts ja ojts ttsu'kxy.

⁵⁰ Jøts ja nwindson'ajtim Jesús ja ojts yide'en y'adsøyyi:

—¿Ti migu'uk mnimimpy? ¿Ti mdsøjkpy?

Winets ja jaa'y ja wjngon ñimejniyøø jøts yiknaxajiyii'ñ ja nwindson'ajtim Jesús, ojts yikmajtsni.

⁵¹ Winets tu'uk ja nwindson'ajtim Jesús myigu'uk tju'jty tu'uk ja tsujx, jøts ja ojts ttaxikpo'otu'uty tu'uk ja teetywindsøn tyumbi.

⁵² Winets ja nwindson'ajtim Jesús ja tnimaay:

—Øødyuñ yø mdsujx nay jap xtyimbyikta'akt mā yø tø xjuuty. Pøni pøn ttatseptump ja tsujx, nay ja'ats ja tya'ookp.

⁵³ ¿Ka' xnijawi jøts ku øts jotmøñ n'amido'ot ja Dios Teety, jøts øts ja xanigaxt ixymyi naxy nimakmajtsk piky ja ankilistøjk mididi tseptundip?

⁵⁴ Kuts ja jade'en yjatt, ¿ti jats jade'en y'adukt ja Dios kyajpxy? Pø yide'enxi ja wya'añ jøts ku tyimyjade'en yjatt sa dø'on yam yjatwa'añin.

⁵⁵ Xjats ja nwindson'ajtim Jesús tnimaay ja mayjaa'y:

—Ja tsujx, ja kipy, ja tsaa meets yam x'uktanimenip, tø øts yjawi nmaa'tsni! Ejtp meets jam y'ijty jabom jabom nmøøt'ixakunaxy, jøts mee nyik'ixpiky jam tsaptøjkjotp, ¿tikuts øts jamyi xkamajstøø?

⁵⁶ Ja'agøjxp ya'at jade'en yjaty jøts ka'pxy pyidsø'ømt sa jaty ja Dios kyugajpxy wyandøø, ku ja tnigajpxidi ja Dios kyajpxy.

Winets ja nwindson'ajtim Jesús pyabøjkpitøjk ojts kyaakøxti jøts ja nadyu'uk y'ukykmaajstutnaa.

Ku ja Jesús yikwaanijkxy jam kutujktaajkjotp

⁵⁷ Jøts ja jaa'dyi pøn ja majtsiyi, jam ja tyiknøjkxti Caifas wyindum, ja teetywindsøndøjk myøjwindsøndi mā wyinaty tø ñamyukyidi ja kajpxwejpitøjkti møøt ja mōjaa'dyøjkti.

⁵⁸ Jøts ja Pedro ja ojts pyaniijkxy, jagam ja pyayø'øyi jøts ja ojts tpaja'aty jap møj windsøn tyøk'agui'py, jøts ja jap tyøjkiyi'ñ jøts ja tmøøt'ixaaiky ja ejx'ejtpitøjkti, jøts ja t'ejxwa'añ sa dø'on ja yjade'embi yjadyimy'ukugøxit.

⁵⁹ Jøts ja teetywindsøndøjkti, jøts ja mōjaa'dyøjkti, jøts niduki'iyi ja kutujk adsinaabyidi, ja' ja yjadyimy'ixaaadyip ti ja yjadyimy'uktani'øønidip ja nwindson'ajtim Jesús, øy ja yjaga-jade'eni jøts ja ttaguwañiwy'a'andi ja o'jkin.

⁶⁰ Ja'ats kyapattip sudso tyidyøkit, may ja jaa'y yjamendøø, jøts ja tjadyimñi'øø'ndaagidi ja nwindson'ajtim. Xjats yja'tinim namaajtsk ja ni'øø'ndaajkbidi midi ñadyijyi tsaach'a'ejxnaxtip,

⁶¹ Jøts ja yide'en wyandøø:

—Yø jaa'y yide'en waan: “Ixe øts yø Dios chaptøjk nyikiday, jøts øts yø kyidigøøk xøøw nyik'øyigyojmit.”

⁶² Winets ja teetywindsøndøjk myøjwindsøn wya'kukiyi'ñ, jøts ja nwindson'ajtim Jesús yik'amidøøy:

—¿Niwine'enin yø xka'adsowimbetwa'añ? ¿Ti dø'on yø'ixa jade'en myiktani'øøni?

⁶³ Jøts ja Jesús ka'ap ja ojts t'adsøy. Xjats ja wyindsøn ojts ñii'mxyi:

—Tuk'ejx Dios, jøts xnigajpxt tiy janch. Tukmadook øøts pøni mets idø'on mjanchCristo pøn ja Dios Teety y'u'nk'ajtpy.

⁶⁴ Jøts ja nwindson'ajtim Jesús ja tnimaay:

—Øts ja', sam ixa tø mwa'añin. Jøts nayi ndukmadoodip icyam jøts ku ø'ejxtit ku n'ixa'akt jam Dios Teety kyutujktaajk jøp'am.

⁶⁵ Winets ja teetywindsøndøjk myøjwindsøn ttakø'jtsiyi'ñ ja wyet, jøts ja wyaañ:

—Tø ya'at jaa'y tmgajpxigøy ja Dios; ¿ti ejxpi ti ni ja'wibi jaaktsojkiyip? Tøxi xmadojidi ja y'ayuujk jøts ku kya'øgyajpxy;

⁶⁶ ¿sa mee m'ukwa'añ?

Xjats ja wyandøø:

—Taja'jtip pøky yø', wan t'øøky.

⁶⁷ Winets ja ojts twingutsujidi, jøts twojptøø jøts ttsee'ktøø, pømbi ja kojxiyip wemp'am,

⁶⁸ jøts ja yiknøjmi:

—Pø metsxi mCristo, iuknaajtsjawits pøn tø mgøxyi!

Ku ja Pedro tku'iñ jøts ku ja ka' t'ijxy'aty ja Jesús

⁶⁹ Ixap idø'on ja Pedro chøøni tøkwiumpy, jøts ja tu'uk tø'øxyøjk ñimejni midi jam tump, jøts ja ojts ñii'mxyiyi:

—¿Kidi metsip y'ijty mmøøtwidijtpy yø Jesús midi Galileit etjotp tsoo'mp?

⁷⁰ Ka'ats ja Pedro ja tkupiky mā ja mayjaa'y jam wyinaty, yide'en ja wyaañ:

—Ka' ñnijawi pø ti mets jade'en mgajpxpy.

⁷¹ Ixap ja Pedro wyinaty pyidsømwan mā ja tøk'aaw, ku ja ojts jadu'uk ja tø'øxyøjk y'ijxyi, jøts ja ojts ttukmadøy pøn jam wyinaty:

—Yø jaa'yxi tmøøtwidejtp yø Jesús pøn Nazaret kugajpip.

⁷² Jøts ja Pedro jadigojk tkagupøjkjomi, yide'en ja tyimwyaañ:

—Ka' øts yø jaa'y n'ijxyi.

⁷³ Xjats ku jawaani y'ijty, jøts ja Pedro ja jaa'y ñimejnøø pøn jaty jam wyinaty, jøts ja ojts ñii'mxyiyi:

—Janch nayide'endam mets, nayi Jesús tam me mjanchmigu'uk'ajtpy, kø'ømts yø m'aaw m'ayuujk myiknigaxi'igy.

⁷⁴ Jøts ja Pedro janch wenk ja kø'øm ñawya'añi ñadyijyi, ka'ap ja tyimgyupiky, tyuk'ejx ja Dios ja', tiy janch ja tyimwya'añ ku ja tka'ijxyi:

—Nguidyimy'ijxy'ajtpy øts yø jaa'y.

Winets ojts nay jatyi y'aya'axy tu'uk tsapni'aaw.

⁷⁵ Xjats ja Pedro ja tja'myejchnim ku ja nwindson'ajtim Jesús ja wyinaty tō ñii'mxyiyi: "Yam ja tsapni'aaw kya'aya'axñim, tō mets wyinaty tigōok ojk mwani jōts ku me xka'ixy'aty." Jōts ja Pedro jam pyidsiimy, jōts ja nugo y'uk'amyaaxni y'uktsaachyaaxni.

27

Ku ja Jesús yiktagidōjkiyi'ñ ja Pilato

¹ Xjats ku yjōpy'ajty, jōts ja teetywindsōndōjk mōōt ja israelit mōjaa'dyōjkti ojts ja tka-jpxy'atti, jōts ja tu'ugyi tñiwinmaa'yidōō jōts ja tyik'looktit ja nwindson'ajtim Jesús.

² Xjats ja kōwññ tyiknōjkxti jōts ja yiktagōdōkiyi'ñ ja Poncio Pilato, pōn jam wyinaty windsōn'ajtp.

Ku ja Judas y'ō'jky

³ Jōts ku ja Judas ojts t'ixy, pōn tkōyajkp ja nwindson'ajtim, jōts ku ja nwindson'ajtim Jesús tō yiktaguwa'a'niñi ja o'jkin, ja'ats ja ojts jadigojk tsaachkuwinmayi jōts ja tyikwimbijty ja meēñ ee'pxmajk tum plati, jade'en ja tkōmōōy jadigojk ja teetywindsōndōjk jōts ja israelit mōjaa'dyōjkti,

⁴ yide'en ja tñimaay:

—Tō njantyimdyundigōy, mōk o tō njantyimdyundigōy ku ots yō tō ngōyaky jōts yō y'ookt, jōts niti tundigō'ōyin yō tkamōōt'aty.

Jōts ja ojts yide'en yik'adsōy:

—Jōts, žti oōts ja ndungi? iMgō'ōmwinmaa'ñixi mets yō'!

⁵ Winets ja Judas tñajtswōjjiyi'ñ ja meēñ jap tsaptōjkjōtpy, jōts ja chōō'ñ jōts ja ñijky nayuksuujmibi.

⁶ Jōts ja teetywindsōndōjk tkonjō'ktōō ja meēñ jōts ja wyāndōō:

—Ka'ap yō kyutujkyi jōts yō meēñ jap ngugo'ona'andit jap limunsi abōjk'ii'ñjōtpy, kumi jaa'y chow yō'.

⁷ Jōts ja nay jatyi tkajpxy'ajttōō, tyiktunkpaatwa'andi ja meēñ jōts ja ttaju'udyit naajx jōts y'ōyit jadu'uk kami santi mā ñaxōkidit ja jaa'y pōn tso'ondip abikyajp. Campo del Alfarero, ja' ja naajx xyōōw.

⁸ Ja'agōjxpts ixymbaat ja naajx yiktijy Ni'jpkyam.

⁹ Jade'ents ja Jeremias ja y'ayuujk tyiyy ku ja Dios ja wyinaty yide'en jekyip yikwa'añiyi: "Jōts ja tñixajidōō ja meēñ ee'pxmajk tum plati (ja' ñimeēñ midi ja Israelit jaa'y ja wyinaty tō pyiktaajkxiyi),

¹⁰ jōts ja ttajuudyōō ja naajx, jade'ents ots ja Dios Teety xnimaay."

Ku ja Jesús twinguwā'jkyi'ñ ja Pilato

¹¹ Jōts idō'ōn ja nwindson'ajtim Jesús ja jaa'y yiknōjkxiyi jam oykutujkpi wyingujkp, jōts ja yide'en tyiibyōjkiyi:

—ŽMets idō'ōn israelit jaa'y mjanchniwindsōn'ajtpy?

Jōts ja nwindson'ajtim Jesús yide'en tñimaay:

—Janch jade'en idō'ōn ja', sam ixa tō mwa'añin.

¹² Jōts ku ja teetywindsōndōjk kyajpxjō'ktōō mōōt ja mōjaa'dyōjkti, jantyimy'ōō'ndip idō'ōn ja', jōts ja nwindson'ajtim Jesús ja tkidyimy'adsōy.

¹³ Winets ja Pilato ja ñimaajyōō:

—ŽKa'ap yō xmadōy sa jatyi ixa myikni'ōōni?

¹⁴ Jōts ja nwindson'ajtim Jesús ka'ap y'adsōy; ja'ats ja yikutujkpi ñigyumaap yja'wiyi'ñ jōts ka'ap ja y'uktaabyatni.

Ku ja Jesús ñidujkiyi'ñ jōts ja y'ookt

¹⁵ Jade'ents idō'ōn ja yikutujkpi tsumikostrumbri'aty ku xōōw tyuñi, jōts ja tu'uk tyik'awa'atpidsimy ja tsumyjaa'y, ja mayjaa'y ja kō'ōm twi'ejxtip, pōni pōn ja chojktip ja'ats ja yik'awa'atpidsōmdip.

¹⁶ Jamts idō'ōn tu'uk ja tsumyjaa'y wyinaty, Barrabás ja xyōōw. Tyimyanijawi ja' ku ja mōj tundigōōbyi;

¹⁷ jōts ku ja jaa'y ñamyujkōjxidōō, winets ja Pilato yiktiiy:

—ŽPōmbi mdsojktip jōts o nyik'awa'atpidsō'ōmt: yō Barrabás, uk yō Jesús, midi yiktejp Cristo?

¹⁸ Tōts ja wyinaty tñijawi ja yikutujkpi jōts ku ja ja'agōjxp tkōyakti ku ja nawyinaxi tjawidi.

¹⁹ Exam ja Pilato wyinaty chōōni kyutujktaajkjōtp, ku ja ñidō'ōxy ñimaajyōō: "Ti yō yōjjaa'y tō xanibōjkiñi; majtsu'ut, janch wenk o ngumaay tsu'uuy yō'ōgōjxp."

²⁰ Jōts ja teetywindsōndōjkti mōōt ja mōjaa'dyōjkti ojts ja ttukmibōkti ja mayjaa'y jōts ja t'amido'odit jōts wan t'awa'atpidsimy ja Barrabás, jōts y'ookt ja nwindson'ajtim Jesús.

21 Xjats ja yikutujkpi ja jadigojk ñimaajyidøø, jøts ja ojts tyiktiy:

—¿Pømbi mee ndsøjkpy jøts ø nyik'awa'atspidsø'ømt?

Jøts ja mayjaa'y ñømdøø:

—Wan yø Barrabás t'awa'atspidsimy.

22 Jøts ja Pilato tjaaktyiktiy:

—¿Jøts sa øts yø ndu'unt yø Jesús midi yiktejp Cristo?

Jøts ja ojts niduki'iyi y'adsowdi:

—¿Yikruspat!

23 Winets ja Pilato ja ñimaajyidøø:

—¿Ti tundigø'øyin yø tø tuuñ?

Jøts ja jadigojk jawaani møk wyandøø:

—¿Yikruspat!

24 Xjats ku ja Pilato ojts t'ixy jøts ku nisudso'ampy kya'øyi, ne'egi jinaxy ja jaa'y tseeni mo'tsni y'adøtsnidi, winets ja nøø ja ojts t'atsnankyi'iyi, jøts ja kyøbujy jam mayjaa'y wyingujk, yide'en ja wyaañ:

—Kidi øtsip wamp jøts yø y'ookt, ka' øts yø nbøky'ixy. Meets yø mnija'wip pøni sa yø xunwa'andi.

25 Xjats ja jaa'y niduki'iyi y'adsoodøø:

—¿Niduki'iyi øøts yø xpaat'aty ja y'o'jkin, nayide'en ja møj ja mutsk, u'nk una'jk, pøn yø kapaadip!

26 Xjats ja Pilato tyik'awa'atspidsiimy ja Barrabás; jøts ja ojts tni'ane'emy jøts ja nwindson'ajtim Jesús yikwopt, jøts ja ojts tkøvaky jøts wan tyikruspatti.

27 Jøts nay ja' ja syoldadi tyiknøjkxtøø ja nwindson'ajtim Jesús jam kutujktaajk agø'øm, jøts ja jam ojts twaamujkøxti niduki'iyi ja soldadi, jøts ja ojts tnabejkidi ja nwindson'ajtim Jesús.

28 Jøts ja wyet ja ojts tjanidi, jøts ja tsajpts wet ja ttanijandøø,

29 jøts koroni ja ojts ttagujandi tum kujp awiiji ja', jøts ja kipy ja ttagøkajpidøø y'aga'ngyøjø'øm. Winets ja twinguxanaadyøø jøts ja ojts tjanchaxe'ekti, yide'en ja tnøjmidi:

—¿Dios kunuu'kxip ya'at israelit jaa'y wyindsøn!

30 Jøts ja tniutsjidi, jøts ja jamyi tniaxajidi ja kipy jøts ja ttaguwojppø'økti.

31 Xjats ku ja jade'en t'uktagyajtøø, t'uknixektøø t'uktaxe'ektøø, winets ja ttanijanduttøø ja tsajpts wet jøts tpiaktaajkidi jadigojk ja kyø'øm wet. Jøts ja tyiknøjkxti jøts ja kyiruspatt.

Ku ja Jesús kyiruspejty

32 Tyimy'ixam wyinaty tø choondi ku ojts tpaatti tu'uk jaa'y pøn kugajp'ajtp Cirene, Simøn'ajtp ja'; ja'ats ja ojts ttaguwaniidi jøts ja ttsøøjmit ja nwindson'ajtim Jesús kyirus.

33 Jøts idø'øn ja jade'en yja'ttøø ma ja et txøøwi Gølgota, midi yide'en ayuujk pidsøømp: Oo'kpi Kyubajk Pajk.

34 Jamts ja tmøødyi ja vino adaamuky møøt ja ujts ta'am nøø; kuts ja tja'gyajpy xjats ja nika'ap t'uujky.

35 Kuts ja wyinaty tø tyikruspajtnidi, winets ja soldadi tniguyajtidøø ja nwindson'ajtim Jesús wyet, jøts ja ojts twejtswa'lkxti. Jade'ents ja Dios kyugajpxy tyimdyiy ja y'ayuujk ku ja wyaañ: “Tø øts nwet ja xwejtswa'lkxidi, tø ja tniguyatti jøts ja t'ejxti pøn uktaja'atip.”

36 Winets ja jamyi y'ixaktøø jøts ja t'ejx'etwa'andi.

37 Jøts ja jam y'agubajkp ojts tkøxajyidi ja letri'idi wamp jøts ti tyuku'o'jkidip. Yide'en ja wyaañ: “Ya'at idø'øn txøøw'ajtp Jesús, israelit jaa'y wyindsøndi.”

38 Namajtsk møj maa'tspi ja ojts tmøøtkruspety, tu'uk y'aga'ngyøjø'øm jøts tu'uk y'anajkyøjø'øm.

39 Jøts ku jam pøn ñaxy tum wenk ja myigajpxyi, tum kubajkwibejttip ja',

40 jøts ja wya'andi:

—Metsxi xijy tsaptøjk myikidaapy jøts jadigojk xyik'øyi kyidigøøkxøøwyi, wants mga'uk'øøky. Pøni mjanchDiosu'nk tam mets, winak jam kruskøjxp.

41 Nayide'en ja tyaxejkmiyi ja teetywindsøndøjkti ja kajpxwejpitøjkti, ja fariseotøjkti, jøts ja møjaa'dyøjkti, yide'en ja agø'ømyi ñawya'añidi:

42 —Tø wyenkpi tyiktsø'øky, ka'ats tjaty jøts kø'øm ñankcho'ogit. Pøni janchts ku ja Israelit jaa'y tjanchwindsøndi, wan jam t'ukwinaky kruskøjxp, jaanims idø'øn njanchja'want.

43 Pø Diosxi y'ajoojtip; wants inet idø'øn t'ukpidøkyi jøts kyayik'oojit, pøni janch ku ja yjançhøkyi; tøxi yø kø'øm wya'añ jøts ku yø Dios U'ngi.

44 Ja maa'tspibaat ja nayide'en yjançhka'uk'ømyigajpxmiyi midi ja jam wyinaty møøt tø kyiruspety.

Ku ja Jesús y'ø'jky

45 Winets ja et kyoodsyi'ñ kujkxyøøw, jøts møj winakxyøøwnim yjajtaajky jadigojk.

46 Jøts nay jatyi ja nwindson'ajtim Jesús møk wya'añ:

—Elí, Elí, ¿lama sabactani? —midi yide'en tyijpy: Dios Teety, Dios Teety, ¿tigøjxþ ku øts jade'en tø xnanktyuñi?

⁴⁷ Ojts ja winaagin tmadowdi pøn jaty jam wyinaty, jøts ja ñømdøø:

—Ja Elías yø jaa'y wyaadsøøpy, ja Dios kyugajþxy.

⁴⁸ Winets ja jaty nidu'uk putyi t'atskøøñ tu'uk ja tanøxe'ljts, jøts ja ojts ttabadijy ja vino ta'am, winets ja kipy jøp'am tkøxkøøñ, jøts ja ojts tta'agonji'iky jøts ja txeetst.

⁴⁹ Yide'ents abiky wyamidøø:

—Majtstu'ut; wan tu'uk'ijxyim pøni janch nimejnip inet ja Elías jøts ja o'jkin kyadukpaadit.

⁵⁰ Jøts ja nwindson'ajtim Jesús jadigojk ojts møk ja y'ayuujk pyidsimy, jøtsnim ja y'o'jky.

⁵¹ Winets ja møj tsaptøjk awejstuk nay jaty tyakø'øtsiyi'ñ, kubajkp ja kyø'øts'awiyi'ñ jøts ja ok'am kyø'øtskidaajky. Jøts ja uþx ñajxy jøts ja tsaa kyu'kx'awigyijxy,

⁵² ojts ja oo'kpi nipots may y'awa'ach; jujkpyøjktibaat ja oo'kpidi pøn wyinaty ja Dios tø tjanchjawidi ku ja yjujky'ajttøø.

⁵³ Jøts ja pyidsømdi jap yjutjøtpy ku ja nwindson'ajtim Jesús wyinaty tø yjujkpyiky jadigojk, jøts ja kyajptøjkidøø jam Jerusalén midi ja Dios kyunuu'kxkyajp'ajtpy, ma mayjaa'y ja ojts y'ijxyidi.

⁵⁴ Xjats ku dø'øn ja capitán pøn jaty ja jam wyinaty møøt t'ejx'ity ja nwindson'ajtim Jesús, ku ja ojts t'ejxti jøts ku ja uþx ñaxy jøts tuki'iyi sa jaty ojts jyaty, jøts ja jyadyimchø'jkidøø, yide'en ja wyandøø:

—Janch ja' tam yø jaa'y tø y'ity, ja Dios U'nk.

⁵⁵ Jøts ja maadyø'øxyøjk jam wyinaty a'ejxujktip jagam, tum ja' pøn jam wyinaty Galilea tø tpadsoondi ja nwindson'ajtim Jesús, jøts pøn jaty ja wyinaty tø pyudøkiyi.

⁵⁶ Ja María Magdalena dø'øn jam, jøts jadu'uk ja María pøn ja Jacobo tyaagip møøt ja José, jøts ja Zebedeo ñidø'øxy.

Ku ja Jesús ja ñine'kx yikpiktaajky jap oo'kpi tsaa jutjøtpy

⁵⁷ Xjats ku ja et yjoo'xni jøts kyoodsiwyani, winets myiññ tu'uk kumeeñ jaa'y pøn txøøw'ajtp José, jam ja kyugajpi Arimatea, jøts nayi tø dø'øn ja wyinaty tþabøjki ja nwindson'ajtim Jesús yja'.

⁵⁸ Ja'ats ojts t'ats'ixy ja Pilato jøts ja t'amidøøpy ja nwindson'ajtim Jesús ñine'kx. Jøts ja Pilato ja ojts tyikutuky jøts wan tyikøømø'øxy.

⁵⁹ Winets ja José ja t'axajøø, jøts ja wa'ats wet ja tta'abijty,

⁶⁰ jøts ja t'atspiktaajky jam oo'kpi jutjøtpy midi ja wyinaty tø tyimykjemy'øyinim. Kø'øm jap y'uktøkiwya'añ ma ja tsaa jut jam. Xjats ku ja møj tsaa ja tu'uk t'ukta'agiñaa ma ja yiknidøki, jøts ja ojts ñøjxni.

⁶¹ Nay ixam idø'øn ja wyinatymidi ja María Magdalena møøt jadu'uk ja María, jam ja wyinaty chøøniidi jam oo'kpi jut agø'øm.

Ja soldaditøjk pøn jam y'ejx'ejtþp ja oo'kpi jut

⁶² Xjats ku kymjabom'ajty ku wyinaty tuki'iyi tø yik'a'ejxigyøxni, tum abaadi y'ejtni ti jaty tsojkip ku poo'kxin xøøw, winets ja teetywindsøndøjk møøt ja fariseotøjk ojts t'ats'ejxti ja Pilato,

⁶³ jøts ja t'atsnimaadyi:

—Windsøn, ja' øøts yam tø ñja'myech ku yide'en wyaan ja windaay'ajtpi jaa'y, ku ja wyinaty jaak ja yjujk'aty, ku ja tijy kyidigøøk xøøw yjujkpyøkt jadigojk, jade'en pyidsø'ømt jadigojk jap oo'kpi jutjøtpy.

⁶⁴ Paty jade'en tigøøk xøøw xjadyimñanky'ejx'etit ja oo'kpi jut, jøts ja pyabøjkpitøjk kidi myendi koots jøts ja kidi tmaatsti ja oo'kpi ñine'kx ku ja tñøjmidit ja jaa'y: “Tø ja tmimajada'aky ja o'jkin, tø ja yjujkpyiky jadigojk.” Kuts jade'en tyaay'attit, yø'øts ne'egi janchka'ukmaañip, ne'egi ka'ap ja jawyeembi taay.

⁶⁵ Winets ja Pilato ja ñimaajyidøø:

—Xyadi yø mdsoldadi ka'pxy niwine'enin yø y'ejx'etti. Nøjxiti meets jøts yikxon xyik'adujkøxtit mabaat meets jam kø'øm x'ixy.

⁶⁶ Winets ja ñøjxøø jøts ja ojts yikxon tyik'adujkøxti ja oo'kpi jut, ojts ja t'axotsti ja tsaa midi tya'agiidyip jøts ja t'adsaadyøø, ojts ja seeyi tþikta'akti jøts ja jam tyiktandøø ja soldaditøjk pøn jam ejx'ejtþp.

28

Ku ja Jesús yjujkpyiky jadigojk

¹ Xjats ku wyinaty tø ñaxy ja poo'kxin xøøw, jøts wyinaty kyujajta'aky kyudøø'kxa'aky myidukxøøw ja yjadu'ukpi samaan, winets ja María Magdalena møøt jadu'uk ja María tñinøjxiti ja oo'kpi jut jøts ja t'ats'ejxwa'andi.

² Jøts jotmøñ myiñ ja uyx janch møk, ja nwindson'ajtimdamik ja y'ankilis jam wyinaty kidakp tsajpwemp, jøts ku ja ojts yja'aty ma ja oo'kpi jut jam, jøts ja tjigiyy ja tsaa midi ja tø yikta'agi'iy, jøts ja tta'ixakpejty.

³ Jade'en ja yjajy tyii'kxy sam widsukin, jøts ja wyet jade'en pyoobi sam tsap'øø'pkyin.

⁴ Xjats ku ja soldadi jade'en t'ejxtøø, jøts tsø'øgi ja yjanchyikmiibejpnjyidi, jøts jade'en tyandøø sam ja jaa'y øøgyindi.

⁵ Winets ja ankilis tnimaay ja tø'øxyjkti:

—Kidi mdsø'øgidi. Nnija'wip øts jøts ku ja nwindson'ajtim Jesús x'ixä'adi pøn kruskøjxp o'jk.

⁶ Ka'ap ja ya ukpøni, tø ja yjujkpyiky, tø ja tmimajada'aky ja o'jkin, tø ja jade'en jyaty sam ja ojts kø'øm tnigajpxyin. Men x'ejxti ma ojts yikpikta'aky.

⁷ Tsojk nøjkxti, jøts x'atstukmadø'odit ja pyabøjkpitøjk jøts ku ja tø yjujkpyiky jadigojk, jøts ku ja jawyeen ñjøkxt jam Galilea jøtsnim mee mnøjkxt; jamts ja x'ejxtit. Yø'øyi dø'øn ja ndukmadoowandip.

⁸ Xjats ja tø'øxyøjk jam putyi cho'ondøø ma ja oo'kpi jut jam, jade'en ja chø'øgidi jøts jade'en ja yjanchxonda'akti; jøts ja ojts tsojk tyiknøjkxti ja kajpxy ja ayuujk ma ja nwindson'ajtim Jesús pyabøjkpitøjk jam.

⁹ Exam ja wyinaty jade'en ñaxti ku ja nwindson'ajtim Jesús wya'kaxi'jky jøts ja ojts kyajpxpøø'kxyidi. Winets ja wingon twingunøjkxidøø jøts ja twinguxanaay'øyidi, nagyumajtsidi ja t'yekeyøjx,

¹⁰ jøts ja yide'en ñimaajyidi:

—Kidi mdsø'øgidi. Nøjkx øts ja nmigu'uktøjk x'atstukmadojidi pøn jaty ø nbabøjkpi'ajtip jøts ñjøkxtit jam Galilea, jam øts ja xpaattit x'ejxtit.

Ku ja soldadi t'atstukmadowdi ja teetywindsøndøjk sa ja jut y'awajch

¹¹ Examnim ja tø'øxyøjk wyinaty yø'ødyi, jøts ja soldadi winaagin ñjøkxtøø jam kajpjotp pøn ejx'ejttip, jøts ja t'atstukmadoodøø ja teetywindsøndøjk ti jaty wyinaty tø tyuñi.

¹² Winets ja teetywindsøndøjk ojts tninøjkxti ja møjaa'dyøjk jøts ja tkajpxy'ajtti kyijpxy kyajpxy; ojts yikxon ja maamyeeñ tmo'odi ja soldaditøjk,

¹³ jøts ja tnimaadyøø:

—Jade'en mee mwa'ant jøts ku koots, ixap mee wyinaty mma'ay, ku ja Jesús pyabøjkpitøjk ojts yja'atti jøts ja ojts t'atsmaatsti ja oo'kpi ñine'kx.

¹⁴ Jøts øy ja windsøn ja wyinaty tjanijawi, øøts ja møøt nnagyajpxit jøts ja ka' sa wyä'ant, jøts mee ka' ti pøky mdaja'adit.

¹⁵ Xjats ja soldaditøjk t'axajidøø ja meeñ, jøts ja ojts jade'en tpadundi sa jaty ja wyinaty tø yik'ana'amdi. Jøts jade'en ixymbaät tnimadya'akti ja israelit jaa'dyi.

Ku ja Jesús ttaguwa'anij'ñi ja tunk ja pyabøjkpitøjk

¹⁶ Jøts jade'en ñjøkxtøø ja ñimaktu'ukpi jaa'dyi jam Galilea, ja nwindson'ajtim pyabøjkpitøjk. Ja'ttøø ja jam kojpkøjxp midi ja wyinaty tø tyukmadøyidi.

¹⁷ Jøts ku ja t'ejxpattøø ja nwindson'ajtim Jesús, jøts ojts ja ñagyuxendya'agyidi, øy ja jam winaagindi kø'øm pøn ja tkamibøjktip.

¹⁸ Winets ja nwindson'ajtim Jesús wingon wyingunøjkxyidi jøts ja ñimaajyidi yide'en:

—Tø øts møk'ajtim nyikmøøy jøts øts ja nyiktu'unt wan tsajpjøtpyi jøts wan tnaxwiñi.

¹⁹ Ninøjkxtits ja jaa'y øy manaaax øy magajp jøts ø xukpabøjkpi'attit; myiknøbattipts ja' Dios Teety køjxp, Dios y'U'nk køjxp, jøts Dios y'Espiritu Santo køjxp,

²⁰ jøts yik'ixpøkti jøts tpadu'undit tuki'iyi ti jaty mee tø ndani'ane'emy. Jøts nimadowdi jøts ku meets ejtp nmøø'tity øy juuni xøøw, kunim ø nme'ent jadigojk. Jade'en idø'øn ja y'ejxi.

JA ØGYAJPXJ JA ØMYADYA'AKY MIDI JA MARCOS YJAAJ

Ku Juan Bautista kya'amaqy abak etjotp

¹ Yide'en yiknimadyak'okwaañ ja øgyajpxj ja ømyadya'aky midi ja nwindson'ajtim Jesu-cristo yja'ajtpy, ja Dios U'nk.

² Yide'en ja y'ejxi tyiyi tø dø'øn ja Dios wyinaty kø'øm tñimaañi ja kyugajpxy Isaías, jøts ja yide'en tjaadya'ant ja ayuujk ku ja Dios Teety ja y'u'nk yide'en tñimaay: Ngajxjawyeenip øts, u'nk, ngugajpxy tu'uk pøn nøjkxp jawyeen kugajpxy'ajtpi, ja'ats ja naqxwii'ñit jaa'y tñøjmip, jøts wan ja tyiktøwdi tyiktuuda'akti ja wyinmaa'ñ, jøts mets ja m'ixpøjkin jade'en yikupøkt.

³ Pø patyxi ja kugajpxy ñijky jawyeen abak etjotp jøts myigu'uk ja tñøjmit møk'ampy:

“Awejxidi Dios y'ixpøjkin, yiktøwdi yiktuuda'akti mwinmaa'ñ yikxon.”

⁴ Ja Juandam idø'øn jam jade'en memp abak etjotp jøts jaa'y ja tyiknøbety, yide'en ja wya'añ jøts ku ja jaa'y tuki'iyi tja'dyigøøgyøxti ja kya'øyjaa'y'ajtin jøts wan tñøbajtkøxti, kuts idø'øn ja jade'en ttu'undit winets ja yikpojkip'maa'kxtit.

⁵ Mayjaa'y idø'øn ja jam nimejñiyip jøts ja pyatmadøyi, mendip ja jaa'y jam pøn tsinaadyip Jude'it etjotp, jøts nayide'en pøn kugajp'ajtmidip Jerusalén; jade'en Juan ja mayjaa'y jam ñimiñiyi møj nøøjotp midi txøow'ajtp Jordán, jøts ja jam ñøbatti ku pyøky ja tkajpxnaækkøxti.

⁶ Kameeyi pøjk wyet'ajtpy idø'øn ja Juan wyinaty, jøts po'ak ja tsum'aty; ja' ja tø ñadyatsumyi jøts møj mu' ja jam tñidsøøni møøt ja jiyujk pa'ak, ja' ja jam yji'kxpy.

⁷ Yide'en idø'øn kya'amay mayjaa'y agujkp:

—Ja øts ja jaa'y tu'uk ix'oojk xpamiñ pøn møkta'aky yikutukp ja agøjxp ku kutujk ja tmimiñ møk'ampy, ka'ap øts ja nmi'abaaty jade'en sa yikutuky, nijuuni øts ja møøt nganamyibaat'atyyit.

⁸ Paty meets ixyam tiy janch ndyimdyukmadøy, jøts ku øts ja'ayi tø nnimiñ jøts meets nøø nduktanøbatt; jøts ku dø'øn ja yja'att pøn øts idø'øn ndijpy ix'oojk memp, jawaani øy ja tyunk ja ttu'unt kumi Espiritu Santo ja tyuktatøkip ja jaa'y.

Ku ja Jesús ñøbejty

⁹ Xjats ja Jesús winet et chøø'ñ Nazaret, jam kajpkøjxp midi wyinaty Galile'it jaa'y y'etjotp, jøts ja ñijky nøbajtpi møj nøøjotp midi txøow'ajtp Jordán, ma Juan ja yiknøbajti.

¹⁰ Xjats ku ja pyidsiimy møj nøøjotp, winets ja ojts t'ixy ja tsajp jøts ku ja y'awa'ach, jøts Espiritu Santo ja jade'en ñigida'agy sam ja tsapak.

¹¹ Xjats yikmadøøy ja Dios Teety y'ayuujk jap tsajpjøtpy, yide'en ja wya'añ:

—Øts me n'u'nk'ajtpy; njanchøjky mets jøts njanchtajotkujk'ajtpy mets.

Ku ja Jesús miku' øjts yjot'ijxyi

¹² Winets ja Espiritu Santo yiknøjkkøø jam abak etjotp,

¹³ jøts ja Jesús jam wixijkyøøw chinaay. Xjats ja miku' ja yikpojkipitunwa'añi, jøts ja nijuuni tkamimadøøy. Jam idø'øn ja chinaay ma ja may awa'añ jiyujk jam chøøni, xjats ja ankilis ja pyudøjkøø.

Ku ja Jesús tpadøjkyyi'ñ ja tyunk

¹⁴ Jøts ku ja Juan wyinaty tø yikpiktakni jap puxøjkjøtpy, winets ja Jesús chøø'ñ jøts ja ñijky Galile'it etjotp, ma ja tñiga'amaay ja øgyajpxj ja ømyadya'aky, midi ñigajpxpy sa Dios ja yjaa'y ttanitanit ja kyutujk.

¹⁵ Yide'en ja wya'añ:

—Tønim inet ja xøøw ja et yja'aty, wingomp ixyam ja Dios kyutujk midi ya tu'ump. Yiktigatsti ja mdsinaa'yindi, ja'dyigøøgyøxti tuki'iyi ja mga'øyjaa'y'ajtindi, jøts janchjawidi ja øgyajpxy ja ømyadya'aky.

Ku ja Jesús twaadsøøy nimaktaxk ja ajkxmakpi

¹⁶ Jam idø'øn mejpya'am midi txøow'ajtp Galilea, jam ja Jesús wyinaty ñaxy ku ja t'ejxpaajty namaajtsk ja jaa'y, ja Simón jam wyinaty møøt ja y'uch Andrés. Ajkxmaktip idø'øn ja tyunk'ajtpi, xyuumy ja jam wyinaty ñøøwejtspajtip midi ja tya'ajkxmaktip.

¹⁷ Xjats Jesús ja tñimaay:

—Mada'akti, møøt widettik øts jøts nduknijawidit sudso jaa'y ja nitso'ok'ajtin tpaaty.

¹⁸ Ku ja jade'en yiknimaydi, winets ja jatyi tmajstuttøø ja xyuumy midi ja wyinaty tya'ajkxmaktip, jøts ja tpadsoo'ndøø.

¹⁹ Jawaani ja Jesús ojts yø'øy xjats ja ojts t'ejxpaaty ja Jacobo, pøn ja Zebedeo wyinaty myajnk'ajtpy. Ja' jam wyinaty barkijotp t'adajkyidip ja xyuumy møøt ja y'uch Juan.

²⁰ Xjats ja tyaa'xixiyii'ñ, wyaadsoow ja'; winets ja tyeety ja tunk ja ttukmidandøø jam barkijotp møøt ja tyumbi, jøts ja Jesús ja tmøøtnøjkxti.

Tu'uk ja yaa'dyøjk pøn ja miku' wyinaty tø tyatøkiyi

²¹ Xjats ja ojts yja'atti Capernaum, jam møj kajpkøjxp; jøts ku poo'kxin xøøw tpaajty, winet ja Jesús ñijky yik'ixpøjkpi jam israelit jaa'y chaptøjkjotp.

²² Xjats ja jaa'y ja jam ñigyumaap tjawidi, ku Jesús ja jade'en yik'ixpikyidi sam ja jaa'y pøn ja møk kutujk tmøø'tajtp, ka'ap ja jade'en yik'ixpikyidi sam ja kajpxwejpitøjk pøn yik'ixpøjktp jap israelit jaa'y chaptøjkjotpy.

²³ Japts wyinaty tu'uk ja jaa'y tsaptøjkjotpy pøn wyinaty ja miku' tø tyatøkiyi, ja' møk yide'en waan:

²⁴ —¿Mets Jesús, Nazaretit jaa'y, tiku øø tø xnimiñ, sa øø xunwa'añ? ¿Ja' mets tø xnimiñ jøts øø xyikudigøøgyøxt? Wa'ats me n'ejxkapy pøni pøn mets. Ka'axi me mbøkmyøødi, Dios jaa'yxi mets.

²⁵ Xjats ja Jesús møk twingugajpxiyii'ñ ja miku', jøts ja tñimaay:

—iAmøñi, kidi nugo mgajpxy, tsojk majtstu'ut yø jaa'y!

²⁶ Xjats ja miku' møk'ampy tyikmibejpiky ja jaa'y, jøts ja møk chabaay, winets ja pyidsiimy.

²⁷ Xjats ja mayjaa'y janchnigyumaap tjawidøø, jøts ja xem yam ñadyiibyikyidi kø'øm, yide'en ja ñawya'añidi:

—¿Ti wenk ixpøjkin ya'at? ¿Ti tunk yø jade'en tyumpy? ¿janch møk kutujk tmøødi, mímadojip paat ja miku' yø' ku yø t'ane'emy!

²⁸ Xjats ja jaa'y ja tñimadoogøxti pøni niwine'en ja jam wyinaty chøøniidi Galile'it etjotp. Niduki'iyi ja tñija'wigyøjxtøø ku ja Jesús jade'en t'ødyuñ ja jaa'y.

Ku ja Jesús tyikmøpkijky ja Simón Pedro tyaaqmø'jt

²⁹ Xjats ku ja Jesús pyidsiimy jam tsaptøjkjotp, winets ja tmøøtnijky ja Jacobo møøt ja Juan jam Simón tyøjkwindum, ma ja wyinaty tmøøtsøøni ja y'uch Andrés.

³⁰ Jamts pamaa'y ja wyinaty tmøødidi, tyaaqmø'jt ja Simón wyinaty pøjkp, mowa'añ jømba'am ja yjanchpiky; jøts ja Jesús ja ttukmadowdi ku ja jade'en pyiky.

³¹ Xjats ja Jesús twingume'eniyii'ñ ja pamaa'y, jøts ja ojts twejtsji'iky; ja'ayi ja jade'en tuuñ, winets ja pya'am jatyi ñiwaajtsøø; kuts ja jade'en yjajty, xjats ja tø'xyøjk ja yikaajyidi nayjatyi ku ja chøøjky.

Ku ja Jesús tyikmøpkijky ja maabyamaqa'y

³² Waani y'ijty ku ja xøøw yjejxy jøts ku kyoodsiñaq, winet ja Jesús yiktaniamiñ ja mayjaa'y pøn wyinaty pøjkidip, jøts ja jaa'y pøn wyinaty tmøø'tajttip ja miku';

³³ niduki'iyi ja kajp jaa'y myendøø tøk'agø'øm ma ja Jesús jam wyinaty.

³⁴ Xjats ja may tyiktsøøjky ja pamaa'y pøn wyinaty tigati pøjkidip, ojts ja tyiktsokixy jøts ja miku' ja tyikpidsømgijxy mididi ja jaa'y wyinaty myøø'tajttip; jøts ka'ap ja miku' ja tyikajpxy, kumi ñija'wip ja' paty ja jade'en tuuñ jøts ja kyadamigajpxiyit jøts ku ja Dios U'ngi.

Ku ja Jesús kya'amaay

³⁵ Xjats ku yjøpkyoost'ajty, jaakmøñim ja et wyinaty, winets ja Jesús myaabi'iky jøts ja chøø'ñ jam kajpjotp, Dios Teety ja wyinaty y'ajot'atwampy, paty ja ñijky abak etjotp.

³⁶ Xjats ja Simón choo'ndøø ixaabyi møøt ja myigu'uk, jøts ja tpaatwa'andi ja Jesús,

³⁷ xjats ku ja tpattøø winets ja tñimaadyøø:

—Mdum'ixaajyip jaa'y ixyam.

³⁸ Winets ja ñimaajyidøø:

—Wan tjaa'myindi abikyajp mididi wíngon tandip, jøts øts jam nayide'en nniga'ama'aty ja øgyajpxy ja ømyadya'aky; kumi ja' ø tø nnimiñ jøts øts jade'en ndu'unt.

³⁹ Xjats ja Jesús jade'en t'ayo'øy ja kajp mididi jam wyinaty Galile'it etjotp, jøts ja kya'amay jam tsaptøjkjotp, jøts ja nayide'en tyikpidsimy ja miku' mididi ja jaa'y wyinaty winaaqin myøø'tajttip.

Ku ja Jesús tyiktsøøjky ja jaa'y pyu'uts

⁴⁰ Xjats Jesús ja jaa'y tu'uk ñimejnøø pøn wyinaty axøø'kpim putsp, jøts ja wyinguxanaajyi, yide'en ja wyaañ:

—Møø'tajtpy mets ja møk'ajtin jøts ø xyiktso'okt, yiktsokts øts mdsøjk'ajtingøjxp.

⁴¹ Xjats ja Jesús ja y'ayo'ejxi, jøts ja tñixajiyii'ñ, yide'en ja tñimaay:

—Ndsøky'ajtpy øts jøts mdsø'okt, tsokni.

⁴² Ja'ayi ja jade'en wyaañ, xjats ja jaa'y ja pyu'uts jatyi ñiwaajtsiyøø jøts ja myøpkijky, møk møjaa'w ja ñayja'wiyøø.

⁴³ Winets ja Jesús ja pyagajxøø, yikxon ja y'ukyik'ane'emy, yide'en ja tñimaay:

⁴⁴ —Madow, kidi jaa'y xukmadø, ka'ap pøn sã xnøjmit, nøjx jam teety wyindum jøts ja xuk'ext ku tø mdsø'øky, jøts nay jam idø'øn mdamiyoxp ja Dios ja jiyujk sã Moisés jekyip tyikutuky, jade'en ja jaa'y tñijawidit jøts ku me tø mjanchø'øky.

⁴⁵ Xjats ja jaa'y ñijxy, jøts ja tuki'iyyi ttamimadyakijxy ja mayjaa'y sudso pu'uts ja wyinaty tø ñiwa'a'chiyi. Paty ja Jesús øy mǎ kya'ukajptøjkini, jagam ja wyidity mǎ ja et janch abæk; jamts ja øy magamǎ pøn ñidsø'ñi jøts ja yikniijxy.

2

Ku ja Jesús tyikpidi'jky ja kǎxujxpi pakxujxpi

¹ Ku wyinaty kawinaak xøøw tø ñajxni, xjats Jesús jadigojk kyajptøjkijyi'ñ jam Capernaum; jøts jaa'y ja tñija'widøø ku ja wyinaty tø yja'aty jam tøjktøtp.

² Xjats ja mayjaa'y jatyi ñamuyjikidøø, yikxon ja tøjx yjanch'ujch, ka'ap ja y'ukniǎajntini; jøts ja Jesús jam tñiga'amay ja øgyajpxy ja ømyadya'aky.

³ Winets ja jaa'y yja'ttøø nimaktaxk pøn tkijja'ttøø tu'uk ja pamaa'y pøn wyinaty kǎxujx pakxujxp.

⁴ Xjats ja Jesús ja tjpaatwa'andi, jøts kumi nima kya'awa'adsi kumi tø ja mayjaa'y wyinaty t'awa'kta'tsnidi ja tøjka'aw, winets ja tñitajuttøø ja tøjx jøts jut ja tyik'awatstøø. Japts pamaa'y ja tyikwinajktøø møøt ja myaabajt jap Jesús wyindujpy.

⁵ Xjats ku ja Jesús øjts t'ixy ja jaa'y pøn tyikmendøø ja pamaa'y jøts ku ja amuum yjanchjawiyi, winets ja pamaa'y ja tñimaay:

—Nbojxpimee'kxpy mets u'nk.

⁶ Jamts wyinaty ja kajpxwejpitøjk chøøni pøn wyinaty ttuk'ixpøjktp ja Moisés kyutujk jam tsaptpøjkjøtp, ja'ats yide'en winmaadyøø:

⁷ “¿Ti yø jaa'y jade'en kyuwa'anip, sã yjaty? ¿Tiku yø jade'en wya'añ? ¡Ka'ap idø'øn jade'en y'øyi! ¿Pøn ja pøky yǎ t'ukmaa'kxp, kidi Diosip tu'ugy tmaa'kxp ja pøky?”

⁸ Xjats ja Jesús ñija'wip ja wa'ats ku ja jaa'y jade'en wyinaty wyinmaydi, winets ja tñimaay:

—¿Tiku jade'en nichøky mwinmaydi?

⁹ ¿Ja ti ne'egi jawaani jajtni, kuts yø pa'amjaa'y nnøjmit: “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjxni mdigam?”

¹⁰ Ixyannim meets inet x'uk'ext mǎbaat øts idø'øn ja møk'ajtn nmøøt'aty yǎ nǎxwiñ jøts ø nmaa'kxt ja pøky.

Xjats ja tñimaay ja kǎxujxpi pakxujxpi:

¹¹ —Pidøkni, wa'kukiñi, wejtsjø'øk yø mmaabajt jøts mnøjxni mdigam.

¹² Xjats ja pamaa'y jatyi pyidi'jky; øjts ja myaabajt ja twejtsji'iky, jøts ja jam cho'oni mayjaa'yjøtp. Paty ja jaa'y niduki'iyyi ñigumaap tjǎ'widøø ku ja pamaa'y jade'en myøkpiky, xjats ja Dios ja ttamøja'widøø, jøts ja wyandøø:

—Nima niwindinim jade'en nga'ijxyindi.

Ku ja Jesús tpawaay ja Levi

¹³ Waani y'ijty, winets jadigojk chøø'ñ ja Jesús jøts ja ñijxy jam mejy'agø'øm; jamts jaa'y ja yikxon yjanchniñi, jøts ja jam tyik'ixpiky.

¹⁴ Xjats ku dø'øn ja øjts ñijxy, winets ja t'ejxpaajty ja Levi, ja Alfeo y'u'nk, jam ja wyinaty chøøni mǎ ja ttukugubety ja jaa'y ja pyikta'aky, xjats ja Jesús wyaañ jøts ja Levi yikniimaay:

—Wan tjaa'myim jøts øts n'ixpøjkin xpabøjkkit.

Winets ja Levi jatyi tyanaagyukiyyi'ñ, jøts ja Jesús ja tpanijxy.

¹⁵ Xjats ja Jesús yikwaay migaabyi Levi tyøjkwindum, winets ja yikugubajtpi yǎ'tmidøø, møøt jadu'ukpi jaa'y pøn kyabadundip ja myigu'uk chinaa'yin, jøts ja tu'ugyi twinguwa'jtsidøø ja kaabyajt møøt ja Jesús jøts ja pyabøjkpitøjk; janch namay ja jaa'y jam wyinaty pøn ja Jesús pawidejtiyip.

¹⁶ Xjats ku ja kajpxwejpitøjk jøts ja fariseotøjk jade'en t'ejxtøø jøts ku ja Jesús jam wyinaty tmøøtkay tum ja ka'øyjaa'dyi, winets ja tñimaadyøø ja pyabøjkpidi:

—¿Jadits ku yø mwindsøn tmøøtkay yø yikugubajtpidi jøts yø ka'øyjaa'dyi?

¹⁷ Xjats ku Jesús ja jade'en tmadøø, winets ja wyaañ:

—Ka'ap øts nyiktaniguexy jøts nbudøkit pøni pøn janch wa'ats ñajja'winiyip, ja'agøjx ku ja pyøky kapøkyjawidi. Ja'ayi ja nbudøkip pøni pøn ñadyapøkyja'wiyidip ja pyøky. Nayide'en øts idø'øn njaty sam ja tsøyibi kyanijxky mǎ ja pamaa'y kya'ity. Jamyi ja ja'ayi ñijxy mǎ ja pa'amjaa'y jam.

Ku ja Jesús yiktibyijky tigøjx ku ja kya'ayuu'atti

¹⁸ Tuk'ojk idø'øn yjaty, ixam idø'øn Juan Bautista pyabøjkpitøjk wyinaty y'amaay'atti møøt ja fariseotøjk, ayuu'ajttip ja jam wyinaty, Dios idø'øn ja jade'en wyindsø'jkidip, winets ja jaa'y winaaagin tñimendøø ja Jesús mǎ ja wyinaty jøts ja tñiyøkti, yide'en ja tñimaadyøø:

—¿Jadits ku Juan pyabøjkpitøjk y'amaay'atti jøts ja fariseotøjk nayide'endi, ka'axi ja kyaydi, jøts sudso meets yø mbabøjkpitøjk nayide'en kya'amaay'atti, sudso meets yjaw'i amgujk jotkujk mgaydi? Ka'ap meets yjaw'i ti xkumay.

¹⁹ Jade'en ja wyandøø, xjats ja Jesús yide'en y'adsøøy:

—¿Winaak ojkimts meets jade'en tø x'uktani'ixy, winaak ojk meets jade'en tø x'uknijawi ku tø'øxñigaabyi tø'øxñi'ukpi tø y'uk'ayuu'atti ku ja jemyaa'y jam tø yja'tni? Ka'axi jade'en pøn y'ayuu'aty, ka'ap jade'en pøn tø t'amaay'aty.

²⁰ Jaanim idø'øn tiy yjanch'amaay'atti pøni ku ja wyinaty tø yiktawinwaadutni ja jemyaa'y, jam ja jade'en kyaydi amgujk jotkujk jøts ja jemyaa'y ja myidsep ja o'jkin jaty: tyuk'anøjkxiyi. ¿Pønts jade'en kidi yjotmay'øøky? ¿Sudso dø'øn jotkujk ngaa'yint n'uujkint? Pø nayide'enxi øts idø'øn yø nbabøjkpitøjk yam xjawidi ku njaakyam'aty.

²¹ 'Ka'axi pøn wyetpach tta'agiyi jemwyet midi tyimjemñim; ku ja jade'en yiktu'unt, jøts kumi mujkpi ja jemwyet, jøts ja tjaaktyimgyøøtsni ja wetpach, jaaktyimyiwenip ja kyøøts'ajtín ja'.

²² Jøts nayide'en ka' y'øyi jøts yikpikta'akt ja vino jap po'dukjøtpy midi namii'kxñim; ku ja jade'en ndu'unint, takøø'tsipts ja po' jøts jade'en nugo wyindigøy, windigøøpy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak, jøts jade'en nimidi kyawindigøøty.

Ku ja Jesús pyabøjkpitøjk poo'kxin xøøw et y'ariindøjtøø

²³ Tuk'ojk idø'øn yjajty ku poo'kxin xøøw wyinaty tø tpaaty, winet et ja Jesús ja pyabøjkpitøjk tmøøtnajxy jam kamjotp mā ariingam jam wyinaty; jam idø'øn ja wyinaty ñaxti ku ja pyabøjkpitøjk ttøjpinaaxwa'ktøø ja ariindøøm.

²⁴ Xjats ku ja fariseotøjk ja ojts jade'en y'ijxyidi jøts ku ja jade'en y'adø'øtsti, winet ja Jesús jaty yiknimaay:

—¡Ejx yø mbabøjkpitøjk! ¿Tiku yø jade'en y'adø'øtsti, tiku ariin yø ttøjti, kumi ka'ap jade'en kyutukyi jøts yø jade'en y'adø'øtstit ku poo'kxin xøøw?

²⁵ Winets ja Jesús y'adsøøy, jøts ja wyaañ:

—Nugo meets mjanchkajpxy. Tø meets ja nøky xja'ixy midi wamp jøts ku ja David yide'en y'adiijch møøt ja myigu'uk ku yuu ja pyaajtjøø, ku ja wyinaty niti kya'ijtxyidi.

²⁶ Winets ja ñøjktøø jap tsaptøjkjøtpy mā ja Abiatar jap wyinaty tyeetywindsøn'aty, japts ja t'amidøøy ja tsapkaaky midi ja Dios yja'ajtpy jap wyinaty. Ja'a'ts ja ojts tkaydi midi ka'ap kyutukyi jøts nugo jaa'y ja tka'adyit. ¿Jøts tiku dø'øn ja jade'en y'adiijch pøni ka'adam ja jade'en kyutukyi? ¿Tiku myigu'uk ja nayide'en ttukaay ja tsapkaaky, pøni jade'endam ja kyutukyi jøts ja ja'ayi tka'adyit pøn teety'ajttip?

²⁷ Nayi waan ja Jesús yide'en:

—Ja'agøjxp ja poo'kxin xøøw yikpiktaajky jøts ja jaa'y yikpudøkit, kidi ja'ajip poo'kxin xøøw yiktanibiktaajkiyi'ñ jøts jaa'y niti kyidyimdyu'undit.

²⁸ Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

3

Ja jaa'y pøn wyinaty ja kyø'jadi'iñi tøøtsnip

¹ Xjats ja Jesús jadigojk tyøjkiyi'ñ jam tsaptøjkjøtp mā yaa'dyøjk ja tu'uk tpaajty, midi wyinaty tuktamajñ køxujxp.

² Jøts ja Jesús jam a'ejxuky y'ity, ja' ja jaa'y y'ejxwandip pøni y'ukyiktsøkpy idø'øn ja jaa'y ku poo'kxin xøøw, winets ja jaty tni'øønidit.

³ Xjats ja Jesús tnimaay ja yaa'dyøjk pøn ja kyø' wyinaty xujxp:

—Pidø'øk jøts ixø nøjcx mdani kuk'ajy.

⁴ Xjats ja Jesús ttiibiyiky ja jaa'y pøn ja jam wyinaty a'ejxujkiydip, yide'en ja tnimaay:

—¿Midi'ibi ixyam kutuky, ku jaa'y n'ødyu'unint, uk ku jaa'y nga'ødyu'unint? ¿Nyiknitsoojkimp ja jaa'y, uk nyik'oo'kimp ku poo'kxin xøøw, midi'ibi øy?

Xjats ja jaa'y amøñi y'etti, nipøn sã kyawa'añ.

⁵ Winets ja Jesús ja twin'ejxi'jky ambøjkin'ampy, jøts ñiyjotmay'oo'kni dø'øn ja Jesús y'ejxi'jky, ja'agøjxp ku ja jaa'y niwine'en tka'ajgyukidi. Jøts ja tnimaay ja jaa'y midi wyinaty køxujxp:

—Xajtøw.

Xjats ja xyajtiy, jøts ja kyø' ja møk tyaañ, ojts ja chø'øky.

⁶ Winets yø'øpyidsømdøø ja fariseotøjkti, jøts tminagyajpxidi ja Herodes myigu'uk, ja' ja kyajpxy'ajttøø sudso t'ukyik'ooktit ja Jesús.

Ja mayjaa'y pøn jam wyinaty mejy'agø'øm

⁷ Xjats ja Jesús chøø'ñ, jøts ja pyabøjkpitøjk ja ojts tmøøtniikxy jam mejy'agø'øm, winets mayjaa'y ja pyanøjkxidøø pøn jam wyinaty Galilea kugajp'ajttip.

⁸ Xjats ku mayjaa'y ja ojts tñimadowdi jøts ku ja Jesús jade'en tjanch'ødyuñ ja jaa'y, winets jam øy pøn jaa'y myendøø, pømbi tsoo'ndip jam Jude'it etjotp, pømbi Jerusaléngit kajpjotp, pømbi Idume'it etjotp, pømbi tsoo'ndip jamwgon ma ja møj nøø midit tæøw'ajtp Jordán, pømbi tsoo'ndip jam Tiro etjotp, jøts pømbi tsoo'ndip jam Sidón etjotp, jade'en ja mayjaa'y ja jam ñimejniyøø.

⁹ Ja'agøjxp ja Jesús ojts t'ane'emy ja pyabøjkpitøjk jøts ja jam tyik'awejxtit tu'uk ja barki, jøts mayjaa'y ja kya'adejmukiyit.

¹⁰ Kumi tø ja wyinaty kawinaak tyiktsø'øky ja jaa'y, tum jam ja pamaa'y wyinaty tø ñaxkida'akti ja' ñikøjxp jøts ja cho'okti.

¹¹ Jøts ku ja Jesús maamy'iku' y'ejxpaaadyiyi midit ja mayjaa'y jam myøøt'ajttip y'am yjotp, jaty ja wyinguxaniyi jøts ja ñi'mxyi:

—Dios U'nk mets.

¹² Xjats ja møk tnøjmi jøts ja ka'ap ttukmado'odit ja mayjaa'y jøts ku ja Dios U'ngi.

Ku ja Jesús twiwijch ja jaa'y nimakmajtsk pøn ja wyinaty kyudanaaby'atwampy

¹³ Xjats ja Jesús pyatøjkii'ñ kojpkøjxp, ma ja jaa'y ja twaaðsøøy pøni pøn idø'øn ja kø'øm chøjkpy, winets ja jam ñimejniyøø ja jaa'y pøn ja wyinaty tø twaaðsøy.

¹⁴ Jøts ja nimakmajtsk twiwijch pøn ja ejtp myøøtwidewampy, jøts pøn tniga'ama'adyip ja øgyajpxy ja ømyadya'aky;

¹⁵ xjats ja tkutujkmøøy jøts ja tyiktso'oktit ja pamaa'y, jøts ja miku' ja tyikpidsø'ømdit midit ja jaa'y winaagin myøøt'ajttip. Jade'en tyajky ja kutujk.

¹⁶ Nimakmajtsk idø'øn ja jaa'y jam wyinaty: jam ja Simón wyinaty pøn nayide'en yiktejp Pedro;

¹⁷ jøts nay jam ja Jacobo wyinaty møøt ja y'uch Juan, ja Zebedeo y'unaj'k midit xøbajtøø Boanerges, ja' idø'øn tyijpy midit møk møk ja jaa'y myigajpxtip ejxim ja anaaw pyijy, ka'ap idø'øn chø'øgidi;

¹⁸ Nay jam ja jaa'y wyinaty midit tæøw'ajttip Andrés, Felipe, Bartolomé, Mateo, Tomás, Jacobo ja Alfeo y'u'nk, Tadeo, jøts ja Simón midit tsoo'mp canaangit jaa'y y'etjotp,

¹⁹ jøts nay jam ja Judas Iscariote wyinatymi midit tkøyajk ja Jesús.

Ku ja Jesús yiknimaqy jøts ku miku' myøø'ajtin ja tyiktuujni

Xjats ku ja Jesús wyimbijty kojpkøjxp, winets pyabøjkpitøjk ja tmøøtøjkii'ñ tøjkjøtpy,

²⁰ jøts ja jaa'y yikxon ñamyujkidi jadigojk, nigidibaat ja Jesús y'ukaañidi møøt ja pyabøjkpitøjk.

²¹ Xjats ku ja Jesús myigu'uk ñimadojyøø jøts ku ja jam wyinaty, winets ja ñimejni jøts ja yiktsønwa'añi kumi jade'en ja wyinaty wyinmaydi jøts ku myøøty ja Jesús.

²² Nayi tø ja kajpxwejpitøjk wyinaty myeemidi jam pøn tsoo'ndip Jerusalén, xjats ja wya'andi:

—Miku' windsøn yø jaa'y myøøt'ajtpy, ja Beelzebú, ja' yø tyamøj paty yø myayi jøts yø tyikpidsimy myimiku' midit yø jaa'y jadu'uk myøøt'ajttip.

²³ Xjats ja Jesús twaaðsøøy ja jaa'y, jøts ja ttukwinjawiwya'añ tu'uk ja madya'aky, paty ja wya'añ:

—¿Sudso ndejint miku' kø'øm ñankpyidsømiyit aguwaniøkøjxp?

²⁴ Jøts nayide'en ku tu'uk kajp ñawya'kxyi, jøts ja tsep ttundi agø'ømyi, ka'ap ja kajp jeky y'ity, jaty ja jaa'y jadi'iñi ñankyixyidi;

²⁵ nayide'en yjaty ku jaa'y ñachiigyidit ni'u'nk ni'unaj'k, ka'ap ja jeky chøøni.

²⁶ Jøts ku miku' kø'øm ñañibidø'øgyit, tø dø'øn ja wyinaty kyawindiy, ñankyudigøjyip idø'øn ja wyinaty kø'øm.

²⁷ Nipøn midsep jap jadi'iñi kyatøki jap jøtmøk jaa'y tyøkjøtpy, kunim ja tkøwøøndit tpaqwøøndit; winetnims ja tøkøjxidit ja pyikta'aky. ¿Ti sudso øts yø jaa'y jeexyip ja miku' ndukmajtsu'uty kuk øts ja miku' windsøn jawyeen tø ngamimada'aky?

²⁸ Janch meets idø'øn nnøjmi, jøts ku ja jaa'y ja pyøky tuki'iyi yikmee'kxy, tuki'iyi yikmaa'kxkxy ja ka'øñigajpxy ja ka'øñimadya'aky;

²⁹ ja' niujuuni kyayikpojkpimaa'kxp pøni pøn tka'øñigajpxp tka'øñimadyakp ja Espiritu Santo, ejtp ja pyøky ja tmi'ity.

³⁰ Ja'agøjxp ja Jesús jade'en wyaañ ku ja wyinaty jade'en tø yiktijy jøts ku miku' ja tmøødi, jøts Espiritu Santo tkamøøt'aty.

Ja Jesús tyaaq jøts ja y'uch

³¹ Waani y'ijty, xjats ja Jesús y'uch yja'ttøø møøt ja tyaaq, jøts ja jap tøk'agi'py wya'k'øyidi, japts ja tñankwyaadsojidøø ja Jesús.

³² Winets Jesús ja jaa'y ñimaajyøø pøn ja jap wyinaty wingon windsinaajyip, yide'en ja wyandøø:

—Ixap ja mdaak y'awijxy tøk'agi'py møøt ja m'uch, mets myik'ixaapy.

³³ Xjats ja tnimaay:

—¿Pøn øts idø'øn xuktaak'ajttip, jøts pøn øts idø'øn xuk'uch'ajttip?

³⁴ Winets ja twin'ejxji'jky ja mayjaa'y, jøts ja tnimaay:

—Yø' øts idø'øn ndaak'ajtpy, jøts yø' øts idø'øn n'uch'ajtpy pøn øts ya wingon xwindsinaadyip.

³⁵ Ja' øts idø'øn n'uchip, jøts ja' øts idø'øn ndaagip pøni pøn tpadundip sa ja Dios chojkin.

4

Ku ja Jesús tmadyakpaaty ja jaa'y midi nøjck neppi

¹ Xjats ja Jesús jadigojk yik'ixpøjktøjkiyi'ñ jam mejpya'am ma ja jaa'y ja ojts ñimiñiyi may'ampy, jøts ja jam ñañimukpajtidøø. Ku dø'øn ja jade'en janch namaydi, winets ja Jesús tyøjkiyi'ñ jam barkijotp midi wyinaty nøøjotp, jamts ja y'ixaajky jøts ja mayjaa'y jam nøø adsayjotp tyandøø.

² Jamts ja tyik'ixpijky jade'en, may ja ejxpajtin madya'aky ja jam tñigajpxy, yide'en idø'øn ja tnimaay ja mayjaa'y ku ja jam yik'ixpijky:

³ —Øyim idø'øn xmado'odit: Tu'uk idø'øn jaa'y chøø'ñ ariin wøjpi.

⁴ Jøts ku dø'øn ja ojts twøjwidity ja tyømt, winet ja tømt waani ñaxkidaajky jam tuu'ba'am, ja'ats ja joon jam ñimeen jøts ja wa'ats tpeemujkixy.

⁵ Nayide'en ja tømt jam waani ñaxkidaakmøø tsaajotp ma ja naajx øy kya'ity; xjats ja ariindømt jam janch tsojk myujxy, kumi ka'ap ja naajx wyinaty myajpxy.

⁶ Jøts ku ja xøø'an myiñ, winets ja tyiñch, ja'agøjxp idø'øn ja jade'en yjajty ku y'aats ajawi kya'ity.

⁷ Nayi ñaxkidaajk ja tømt jam kujp agujkp; jamts ja yjanchni'aa'mbejty ku ja kujp yikxon yondøø jøts ja jade'en kyatøømiyi'ñ.

⁸ Nayi ñaxkidaajk ja tømt jam øñaxjotp. Ojts ja yikxon yøñ, yikxon ja jam yjanchtøømiyi'ñ midi'ibi: ee'pxmajk ja pyajkwimbejt tu'ukpi tømt, midi'ibi tugi'pxy pajkiyi'ñ, jøts midi'ibi magø'pxy, jade'en ja ariindømt pyajkpejty.

⁹ Xjats ku ja Jesús jade'en myadyakijxy, winets ja tnimaay ja mayjaa'y:

—iPøni pøn ja'gyukiwyampy, wan tja'gyuki!

Tigøjxp idø'øn ja Jesús ejxpajtin madya'akyøjxp ja y'ixpøjkin tyaky

¹⁰ Xjats ku ja mayjaa'y choo'ndi, jøts ja Jesús jam tyaañ, winets ja tyiktøødi ja namakmajtsk pyabøjkitøjk, jøts nay ja pyabøjkitøjk pøn ja jam wyinaty myøøt'ajtpy, ja' ja ñijawiwiyandip ti dø'øn ja madya'aky jade'en tyijpy, sudso ja yikja'gyuki.

¹¹ Xjats Jesús ja ñimaajyidøø:

—Meets nugo myiktukmadoop ja' midi ka'ap y'ijty yikñijawi pøni sa ja Dios kyutuujk y'ejxi tyiyi midi ja tyanitanaapy ja yjaa'y; jøts pøn øts ngutuujk xkababøjkitøjk ja jade'en tiy yiktukmadowdi, ejxpajtin madya'akyøjxp ja yiktukmadowdi;

¹² Jøts ja jade'en kyawinmaa'nbyaattit ku ja ti tjaninwinmayidi, ka'ap ja tmadoogukidit pøni sa jaty ja yjayiknøjmidi, paty idø'øn ja jade'en yjatti ku øts ja kø'øm xkajanchjawidi, kø'øm idø'øn ñadyuñidi paty ja pyøky kyayikmaa'kxtit.

Ku ja Jesús tñigajpxy sudso dø'øn yikja'gyukit ku jaa'y neppi ñijky

¹³ Winetnims ja wyaañ:

—¿Ka'ap xja'gyukidi yø ejxpajtin madya'aky, sudsomts meets ja xjanchja'gyukigyøxt jadu'uk ja ejxpajtin madya'aky?

¹⁴ Pøn ja ariindømt twøjp, jade'en idø'øn ja n'ukpiktaajkint ejxim ja jaa'y midi ja øgyajpxy ja ømyadya'aky tkajpxwa'kxp.

¹⁵ Jøts winaagin jaa'y jade'endi ejxim ja tømt midi ñaxkidaajk jam tuu'ba'am: y'amidoodujktip ja' ja øgyajpxy ja ømyadya'aky, jøts ku ja jade'en tmadowdi, winets ja miku' ja jatyi ñimiñidi jøts ja pyøjkxyidi ja øgyajpxy ja ømyadya'aky midi ja wyinaty tø y'ukjotøkiyidi.

¹⁶ Nayide'en ja jaa'y winaagin n'ukpiktaajkma'ant ejxim ja tømt midi ñaxkidaajk jam tsaajotp: pyatmadoodip ja' ja øgyajpxy ja ømyadya'aky ñixyondakni, jøts kumi ka'ap ja tmimøk'etti,

¹⁷ jade'en ja yjatti ejxim ja ariin y'aats ajawi kya'ityin; ka'ap ja jeky tmi'etti ja'agøjxp ku ja tku'ayo'ombaadidi ja øgyajpxy ja ømyadya'aky, winets ja tmajststutti, ka'ap ja tu'ugyi tpadundi.

¹⁸ Nayide'en jaa'y winaagin yjatti ejxim ja tømt midi jam yikwøj kujp agujkp: yjapatmadoodip ja' ja øgyajpxy ja ømyadya'aky,

¹⁹ Jøts ja' ja ne'egi tyajotigøodyip ja pyikta'akty; ja juky'ajtindi midi ya naxwiin, ja' mõtjõkidip jøts ja tyikudigøy ja øgyajpxy ja ømyadya'aky, jøts ja jaa'y tkayikwingaxø'øktit ja Dios kyajpxy.

²⁰ Ja jaa'y nayide'en winaagindi pøn tpatmadoodip ja øgyajpxy ja ømyadya'aky jøts ja yjotøkyyidi, winets ja tyikwingaxø'økti jade'en ejxim ja tõmt midi yikwøjp jam øñaxjotp. Winaagin ja jaa'y jade'endi ejxim ja tõmt midi tyøøm tyikwimbeytp may, midi'ibi ee'pxmajk pajkiyii'n, midi'ibi tugi'pxy jøts midi'ibi magø'pxy.

Niti jadi'iñi kyatañ, kuwañim ja tyimyiknijawi

²¹ Nayide'en pyabøjkpitøjk ja tnimaay:

—¿Ti ja' ndejint jaj wya'añ jøts ja yiknijupt jap kajuun patki'py, uk jøts ja yikpikta'akt jap maabajt patki'py? Ka'ap ja jade'en pøn tyiktuñ, køjxp ja yikpikta'aky, jams ja yjajy.

²² Ti yjawi ka'ukyikpatp ku ti yjaju'uch'ity, ti tunk uk ti winmaa'n yjawi ka'ukyiknija'wip ku ti yik'amaa'tsk'aty.

²³ Jamxi mdatskti, tamadowdi yikxon.

²⁴ Nayide'en pyabøjkpitøjk ja tnimaay:

—Øyim xpatmado'odit yø ixpøjkin midi myiktukmadoodip. Nayide'en meets ja wijy'ajtin myikmo'ot pøni sa meets ja jaa'y xukniweji ja Dios y'ixpøjkin; jøts mjaaktyimñijawip meets ja jawaani pø xmadoopxi meets yam kø'øm.

²⁵ Jaaktyimiyikmøøpy ja wijy'ajtin ja' pøn ja'gyukip; jøts pøn kaja'gyukip, jaaktyimiyikpøkøjxp tuki'iyi ja' ja wijy'ajtin.

Ku yiknimadyaajky ja tõmt midi mujxp jøts midi yomp

²⁶ Nayide'en pyabøjkpitøjk ja tnimaay:

—Jade'en idø'øn ja Dios kyutujk midi ja tyanitanaapy ja yjaa'y, jade'en idø'øn ja n'ukpiktaajkint sa ja jaa'y yjatyin ku tyømt ja twøjy naxjotp;

²⁷ mya'ay ja koots pyidi'iky ja jøpy, najxpts idø'øn ja xøøw tsuu jade'en, mujxp ja tõmt jap, yomp idø'øn ja jap, jøts ja jaa'y ka'ap tñijawi tigøjxp idø'øn ja jade'en yjaty.

²⁸ Jøts kumi ja naajx idø'øn ja jade'en ñamyayi kø'øm nanktyøømbidsøjmiyip; ku jawyeen pyidsimy ja ariindeky, jøtsnim ja kyojki, jøtsnim ja tyøømbajtñi;

²⁹ kuts ja myijay, winets ja jaa'y choondi jøts ja twejxwa'andi, kumi tø ja ariin wejxk'aats tpaaty.

Ku ja Jesús tmadyakpaaty ja mortas tõmt

³⁰ Nayide'en ja Jesús tnimaay ja pyabøjkpitøjk:

—¿Ti ja Dios kyutujk mõøt ndami'ejxi'int midi ja tyanitanaapy ja yjaa'y, ti ixpøjkin ti madya'aky ja ndamimado'owint?

³¹ Jade'en idø'øn ja n'ukpiktaajkint ejxim ja mortas tõmt midi yikwøjp jam naxjotp. Ka'ap jadu'uk ujtspajk te ja naxwiin midi janch mutsk sa ja mõj mortas tõømdin;

³² jøts ku ja yikwiyj, janch yikxon ja yøñ, wyinajxkijpxy ja tuki'iyi ja ujts midi yikjagyajp jap kemyjøtpy, yikxon ja janch mõj y'awaji y'axeeñi, japs ja joon patki'py y'aptso'okti.

Tigøjxp ku Jesús xumi jade'en tyik'ixpijy ja jaa'y ejxpajtin madya'akyøjxp

³³ May ja Jesús ja jaa'y jade'en ejxpajtin madya'akyøjxp tyik'ixpijky ku ja tnanky'ixpøjkøø ja øgyajpxy ja ømyadya'aky, jade'eñi paat ja y'ijty tmadya'aky mabaat ja kø'øm tñajtsjawi ja jaa'y tñimadowdi.

³⁴ Jøts ejtp idø'øn ja Jesús jade'en tyik'ixpijky ja jaa'y ejxpajtin madya'akyøjxp, jøts tyukmadøøpy pyabøjkpitøjk ja wa'ats pøni ti dø'øn ja jade'en tyijpy.

Ku ja Jesús tyiknajxy ja mõk poj, jøts ku ja tyik'amøkiyii'n ja mejy

³⁵ Xjats ku kyoodsiyii'n ja et nay ja'abi xøøw, winets ja tnimaay pyabøjkpitøjk:

—iWan tjaa'myindi jaduktamajñ'ampy jam nõøba'am!

³⁶ Xjats ja jade'en tminawy'kxidøø ja mayjaa'y, jøts ja jap barkijøtpy tyiktsøø'ndøø ja Jesús mayim ja jap wyinaty, ojts abikbyarki ja pyadsøøñidi, ja' ja ojts tmøøtnøjxkti.

³⁷ Xjats ja poj jam janch mõk myiñ, jøts ja nõø mõk'ampy y'adøtspinaaxwa'jky, yikxon ja yjanchtojmji'jky jøts ja kom nõø tyøjkii'n jam barkijotp, ujtsnip ja wyinaty.

³⁸ Jams ja Jesús wyinaty mya'ay barki ix'am, tø ja jam wyinaty ñaguyøkyyi; winets pyabøjkpitøjk ja ojts yuxyi, jøts ja ojts ñii'mxyi:

—iWindsøn! ¿Kidi mdsø'øgi ku nnøjøø'kxin uk ku n'oo'kin?

³⁹ Xjats ja Jesús pyidi'jky jøts ja mõk twingugajpxiyii'n ja poj; jøts yide'en ja mejy tnimaay:

—iMimadook øts et, kidi m'adi'ich!

Winets ja mejy jatyi y'amøkiyii'n jøts ja tu'ugyi tyaañ.

⁴⁰ Xjats ja tnimaay pyabøjkpitøjk:

—¿Jadits ku mdsø'øgidi, tigøjxp ku ø xkajanchjawidi?

⁴¹ Winets ja yjanchø'jkidøø, yide'en ja kø'øm ñawyajnidøø:

—iPønimts idø'øn ya'at ndejint, sudso poj sudso mejy yø myimadøyi!

5

Ja Gadarit jaa'y pøn wyinaty ja miku' tø tyatøkiyi

¹ Xjats ja ttayø'øñajxtøø ja nøø, jøts ja yja'ttøø jam nøøba'am ma dø'øn ja naajx wyinaty txøøw'aty Gadara.

² Xjats ku ja Jesús yø'øpyidsimy jam barkijotp, winets jaa'y ja tu'uk ñimejnøø midi jam wyinaty tsoo'mp jam kami santijotp ma ja oo'kpi ñaxøkidi, miku' ja wyinaty myøøt'ajtpy.

³ Jam idø'øn ja wyinaty tyimchinaadyakni ma ja oo'kpi ñaxøkidi, jøts ka'ap idø'øn ja pøn pujx kadeen y'uktaxigoxjotsiniyi y'uktabakxoxjotsiniyi.

⁴ Kumi tø ja wyinaty kawinaak ojk jade'en yjayiktuñ, xjats ja jaty'i ttapoti, jadi'iñi ja pu'xk tanuki, ejtp idø'øn ja jade'en txumituñ jøts ja jade'en nipøn kyamayi.

⁵ Ejtp idø'øn ja xyumiwidity xinaxy tsunaxy, jam ja kojpkøjxp jam ja kami santijotp muum chabaawidity, jøts tsaa ja jam kø'øm yjanchnadyuktatsaachiyi.

⁶ Xjats ku ja jagamyi t'ejxpaajty ja Jesús, winets ja ojts putyi tñinijxxy jøts ja twinguxanaay, yide'en ja møk'ampy tñimaay:

—¿Jesús, Dios U'nk, ti ø xanimemp, sa ø xunwa'añ? Njanchminuu'kxakpy tun may'ajt Dios køjxpit, kidi ø xyik'ayo'ombaaaty.

⁸ Ja idø'øn ja jade'en kyuwa'aniiyi'ñ kumi yide'en Jesús ja wyinaty tø ñii'mxyi:

—iMiku', majtstu'tut yø jaa'y!

⁹ Xjats ja Jesús wyangojmøø:

—¿Ti me mxøøw'?

Winets ja miku' y'adsøøy jam jaa'y y'am yjotp, jøts ja wyaañ:

—Legión øø nxøøw, ja'agøjxp ku øø nnamayi.

¹⁰ Yikxon idø'øn ja tjanchminuu'kxa'jky ja Jesús, jøts idø'øn kyayikajxpidso'ømt jam najjotp ma ja wyinaty chøøni.

¹¹ Jøts kumi jamdam magyuch wyinaty tyimyjøø'kxwidejtmidi jam kojpk wingon,

¹² xjats ja miku' ñuu'kxaktøø, jøts ja wyandøø:

—Tanigajxk øøts yø kuch; wan øøts jam ttøki.

¹³ Xjats ja Jesús tyajky ja tiy'ajtin, yikjajt idø'øn ja jade'en, winets ja miku' tñajtstut-tøø ja jaa'y, jøts kuch ja tñimajtskojmidi, ja' ja tyatøjkidøø. Namajtsk milin idø'øn ja kuch jam wyinaty tyanidi, ja'ats kø'øm ñanktyejmidøø jap jaa' jutjotpy jøts ja nøøjotpy tyimñaxkidaktøø, japts ja ñøøjøø'kxkøxtøø.

¹⁴ Xjats ja jaa'y ojts kyakøxti pøn jam wyinaty kuch'ejxtip, jøts ja t'atsnimadya'akwa'andi jam møj kajjotp, jøts nayide'en jam kamjotp. Winets ja jaa'y myendøø, jøts ja t'ejxwa'andi tñijawiwya'andi ti dø'øn wyinaty tø tyuñi.

¹⁵ Ja Jesús idø'øn ja ñimendøø, winets ja ojts t'ejxti ja jaa'y pøn wyinaty t'ukmøøt'ajtp ja miku' jøts ku ja jam chinaañi wet xøøw, tø ja yikxon wyejni kyajni; winets ja jaa'y yjanchø'jkidøø.

¹⁶ Pøn ja jaa'y wyinaty tø twin'ejxti, ja'ats ja tñimadyaktøø sa jaty ja wyinaty tø jyaty tø kyubety ja jaa'y pøn tñøøt'ajtp ja miku', jøts maagyuch ja nayide'en tñimadyaktøø ku ja wyinaty tø y'oo'køjxnidi.

¹⁷ Winets ja tminuu'kxakaktøø ja Jesús jøts wan ja jam tyimbyidsimy etjotp midi ja ñax'ajttip.

¹⁸ Xjats ku ja Jesús tyøjkiyi'ñ jam barkijotp, winets ja jaa'y ja ñimaajyøø midi ja miku' wyinaty jekyip t'ukmøøt'ajtp jøts ku ja pyadsoonwa'añiyi.

¹⁹ Xjats Jesús ka'ap tkupijky, yide'en ja tñimaay:

—Nøjx mdøjkwindum, ninøjx mñigu'uk jøts xukmado'tot ku Dios tø mjanchpudøkiyi, tamimadya'ak sudso Dios tø m'ayo'ijxyi.

²⁰ Xjats ja jaa'y ojts ñijxxy, jøts ja tñimadyakwidejtøjkiyi'ñ kajp kajp jam Decápolis etjotp sa Jesús ja wyinaty tø yjanchpudøkiyi; winets jaa'y ja ñigyumaap tjanchja'widøø.

Ja Jairo ñøøx, jøts ja tø'øxyøjk pøn ja nwindson'ajtm Jesús wyet ojts ttojni

²¹ Xjats ku ja Jesús wyimbijty jap barkijotpy, ku ja ojts ñijxxy jam nøøba'am, winets mayjaa'y ja jam ñimejnøø, jøts ja Jesús jamyi tyaañ.

²² Tø dø'øn ja jam wyinaty tyañ ku jaa'y jam tu'uk yja'jty midi yik'ixpøjpk jam tsaptojkjotp. Jairo, ja' ja xyøøw'ajtpy. Xjats ku ja t'ejxpaajty ja Jesús, winets ja ñagyuxendyaajkøø jam Jesús wyindum

²³ jøts ja tjanchminuu'kxaajky, yide'en ja tñimaay:

—Jotkøjxnip øts n'u'nk xjap; men mgø' xanixajy, jøts myøkpøkt jøts yjujky'att.

²⁴ Xjats ja Jesús ojts tñinijxxy ja jaa'y; namay ja ñøjxkti, may jaa'y ja janchpadsoo'nøø, yikxon ja yjanchyik'atejmujky.

²⁵ Jamts ja tø'oxyøjk wyinaty tu'uk jam mayjaa'yjotp midi wyinaty pøjkjip, myakmajtsk jumøjtjip taxnaxyi ja wyinaty tø pyaajtniyyi, jade'en jumøjt ja wyinaty kujk tmi'ity ja pa'am.

²⁶ Yikxon ja wyinaty tø tku'ayow'i ja pya'am ku tsøyi'i ja may tjayiktuñ, tø myeeñu'nk ja wyinaty tyik'oo'køjxni pøni wine'en ja jam wyinaty tmøødi, jøts niwine'en ja wyinaty tø tkadamøkpiky, ne'egi ja pa'am yjinax'adøtsni.

²⁷ Xjats ku ja ojts tmadøj jøts ku yiknimadya'aky ja Jesús, winets ja tpamiñ jap mayjaa'yjotp, jøts ja ttojni ja wyet.

²⁸ Kumi yide'en idø'øn ja ñawya'añiyyi: "Ja'ayi øts wyet inet yø ndojnit, tso'okp øts inet jatyi."

²⁹ Xjats ku dø'øn ja jade'en ttuñ, winets ja taxnaxyi jatyi y'amøkiyyi'ñ; tyimyja'wiyii'ñ ja kø'øm jøts ku ja wyinaty tø chø'øky ku pya'am ja wyinaty tø ñaxy.

³⁰ Xjats ja Jesús tja'wiyii'ñ, jøts kudam ja wyinaty tø tyiktsø'øky tu'uk ja jaa'y ku ja myøk'ajtin ja wyinaty tø tyik'awa'añ; xjats ja t'ejxwimbijty ja mayjaa'y, jøts ja ojts tyiktyi yide'en:

—¿Pøn øts nwet tø xojni?

³¹ Winets ja pyabøjkpitøjk y'adsoji:

—Jabi kawine'ents ja jaa'y mjanch'atejmuky, jøts mjanch'ukwa'añ: "¿Pøn ø xomp?"

³² Ejxwidejtjip idø'øn ja Jesús, ja' ja tyimy'ejxwampy pøn idø'øn ja wyinaty tø jyaty-imy'uktøñi.

³³ Winets ja tø'oxyøjk tsø'øgi yjanchyikmibejpniiy, ñija'wipts ja' jøts ku ja wyinaty ja tyaxnaxyi tø ñaxy, xjats ja ojts twinguxanaay'øyi ja Jesús, tyamimadyakøjx ja tuki'iyi pøni sa' jatyi ja y'ejxi tyiyyi.

³⁴ Winets ja Jesús tnimaay ja tø'oxyøjk:

—Ja'agøjx u'nk tø mdsø'øky ku ø tø xjanchjawi. Nøjkxni, Dios mgunu'kxip, jøts kidi pa'am m'ukpaajtniyyi.

³⁵ Exammim ja Jesús jade'en wyinaty wya'añ, ku jaa'y jam yja'ttøø midi wyinaty tso'ondip jam møjaa'y tyøjkwindum, ja møjaa'y midi wyinaty tump jam tsaptøjkjotp, xjats ja yiknimaay:

—Tø ja mnøøx y'oo'kni. ¿Tiku yø windsøn nugo xyikjotkøjx'adi'ich?

³⁶ Myadøøpy idø'øn Jesús ja' ku ja møjaa'y jade'en yiknøjmi, xjats ja tnimaay:

—Kidi mdsø'øgi; ja'ayi amumjoojt xjanchjawit.

³⁷ Jøts ja ojts ñøjkxti, ka'ap ja Jesús tkupijky ja mayjaa'y jøts ja myøøtwidetyit, Pedro ja nugo myøøt'ajt, møøt ja Jacobo, jøts ja Juan midi ja Jacobo y'uch'ajtpy.

³⁸ Xjats ku ja jam yja'ttøø ma ja jaa'y jam wyinaty chøøni pøn tump tsaptøjkjotp, winets ja ojts t'ixy jøts ku ja jaa'y nugo xem yam y'adøtsnidi, pømbi jap waani yaxp, jøts pømbi jap janch møk yaxp.

³⁹ Xjats ja Jesús tyøjkii'ñ jap tøkjøtpy, jøts ja tnimaay ja jaa'y:

—¿Tiku jadine'en mna'amdi, jadits ku mya'axti? Ka'ap yø kiixyu'nk y'øøky, maap yø'.

⁴⁰ Winets ja jaa'y ja ojts tnixe'ekti. Xjats ja Jesús t'ixkajxpidømgijxy ja jaa'y, nugo u'nkteety u'nktaak ja ojts tmøødi jøts ja pabøjkpitøjk midi ja jam wyinaty myøøt'ajtpy, xjats ja tyøjkii'ñ ma ja kiixyu'nk jap wyinaty,

⁴¹ jøts ja ojts tnixaji kyø'køjx, yide'en ja tnimaay:

—Talita, cumi —yide'en idø'øn ja tijy: Mets u'nk idø'øn nnimaapy, pidø'øk.

⁴² Xjats ja kiixyu'nk jatyi tyanaagyukii'ñ jøts ja yø'øbyijky jadigojk, makmajtsk ja yjumøjt ja wyinaty. Winets ja jaa'y yjanchø'jkityigøødyøø ku ja jade'en t'ejxtøø.

⁴³ Jøts ja Jesús møk'ampy t'ane'emy ja jaa'y, jøts ka'ap pøn ttuknijawidit ku ja kiixy jade'en wyinaty tø yjujkpyiky, yide'en ja møjaa'y yiknimaadyøø jøts wan kyaaky tmo'odi ja kiixyu'nk.

6

Ku ja Jesús yja'jty jadigojk Nazaretit kajjotp

¹ Xjats ja Jesús jam chøø'ñ jøts ja ñøjkxnimøø jadigojk y'etjotp, ja pyabøjkpitøjk ja myøøtnøjkx.

² Xjats ku tpaajty ja poo'kxin xøøw, winets ja yik'ixpøjkjøtkii'ñ jam tsaptøjkjotp. Jøts ja mayjaa'y pøn ja wyinaty patmadojiyip, ñigyumaap ja tyimyja'widøø ku ja jade'en yik'ixpiky, xjats ja wyandøø:

—¿Ma yø jade'en tø y'ixpiky? ¿Ti wijy'ajtin yø jade'en tø yikmø'øy, jøts sudso yø jade'en ja tunk tjaty midi naxwii'ñit jaa'y ni tu'ugin kyajajtip?

³ ¿Ti kidi ya'at ja tsajtspi, ja Mariyixi yø y'u'nk, ja Jacobo y'ajch, møøt ja José, møøt ja Judas, jøts ja Simón? Pø yø'øxi ja y'ajch'ajttip, jøts nayø' ja kiixyuna'jk y'ay'ajttip pøn ya tsinaadyip, ¿kidi?

Jade'en ja wyandøø, xjats ja jade'en tkamibøjkidøø ja Jesús y'ixpøjkin.

⁴ Winets Jesús ja ñímaajyidøø:

—Niduki'iyi jaa'y twindsø'ogidi ja Dios kyugajpxy, ja'ayi ja nugo kawindsø'jkiiyip pøn ja myigugajp'ajtpy, pøn ja møøt tyukjaa'y'aty, jøts pøn ja myøøtsinaapy jam tyøjkjotp.

⁵ Xjats ja jam jade'en niti tkatuuñ, nugo ja waani tyiktsøøjky ja pamaa'y ku ja ojts tkønixajy.

⁶ Jøts nugo ja jadi'iñi tkumaa'yiyi'iñ tkudajiyi'iñ ku jaa'y ja kyajanchja'wiyøø. Xjats ja jade'en kajp kajp wyidijty ma jaty ja kajp jam wyinaty wingon tyañ, jamts ja yik'ixpijky.

Ku ja Jesús tkexy ja pyabøjkpitøjk kajpxwa'kxpi

⁷ Ku dø'øn ja wyinaty jade'en tø yik'ixpiky, winets ja tyaajxyi'iñ ja myakmajtskpi jaa'y, jøts ja tpagejxy namaajtsk jaty, ojts ja tkutujkmøøgyixy sudso ja kuwani tyikpidsø'ømdit ja miku'.

⁸ Yikxon ja ojts t'ane'emy jøts ja niti tkako'ondit ñiduu'yø'øyik, nugo tyajk ja ja'ayi kyaptip. Ka'ap ja ti tminøjkxtit, ni pejni, ni tsapkaagy, ni meeñi, niti tkako'ondit.

⁹ Nugo kyø'øku'nk ja ja'ayi ttuktawa'agidit, jøts nijan tu'ugyi twetstet, ka'ap majtsk, jade'en ja yik'ana'amdøø.

¹⁰ Xjats ja yjaaktyimyiknimaadyøø:

—Ku muum tøjkjøøjty mdøkidit, tu'ugyi mja'ta'aktit, jam idø'øn mja'attit mdsoondit kunim mdsoondit jam kajpkøjxp, winetnims mbidsø'ømdit jam.

¹¹ Jøts pøni magajp gayayikupøkt, pøni ma pøn niwine'enin mgapatmadoowa'añidi, jøts ku jam mdsoondit, winets pu'ux xwinaptit mdekyøjxp, jøts jade'eñi xuk'ejxtit jøts ku jade'eñi tø mnañiwa'achidi. Janch øts idø'øn nwa'añ, janch meets idø'øn nnøjmi, ku Dios mye'ent tu'ukpi xøow jøts tiidyunwa'ant ja jaa'y, winets ja kajp nøjkk jinaxy yiktiidyuñ pøni ma gayayikupøkti, jøts ne'egi ka'ap ja Sodomit kajp møøt ja Gomorrit kajp jade'en nøjkk yiktiidyundi sa ja nøjkk yiktiidyundi.

¹² Xjats ja pyabøjkpitøjk ojts choondøø, jøts ja ojts yide'en kya'amaawiyidetti jøts wan ja jaa'y chinaa'yin tyiktigatsti, wan tja'dyigøøgyøxti tuki'iyi ja kya'øyyaa'y'ajtindi pøni sa ja wyinaty tø chøøni.

¹³ Jøts may ja nayide'en tyikpidsømdøø ja miku' mididi jaa'y jam wyinaty myøøt'ajttip, jøts ja nayide'en tyiktsøktøø may ja pamaa'y ku aceite ja ojts ttajaaxti.

Ku ja Juan Bautista ja o'jkin tpaajty

¹⁴ Xjats ja windsøn Herodes ja tñimadøøy ku ja Jesús øy pøn jaa'y ñija'winiyi jøts ku ja tyikutuky, winets ja Herodes wyaañ:

—Ja Juan mididi ja jaa'y ojts tyiknøbety, ja' inet tø pyidsimy jadigojk jap oo'kpi jutjøtpy.

¹⁵ Xjats jadu'ukpi jaa'y ñømididi:

—Elias ja'.

Jøts pømbi wamip:

—Dios ja' kyugajpxy, nayide'en sam jekyiy myemidi ja Dios kyugajpxy.

¹⁶ Winets ja Herodes wyaañ ku ja jade'en tñimadøøy:

—Ja Juan inet ja' pøn øts ojts nnankyajtspøødyi ja kyubajk, ja' inet yø tø pyidsimy jadigojk jap oo'kpi jutjøtpy.

Jade'en ja Herodes wyaañ.

¹⁷ Kumi ja' ja wyinaty tø tsumy, ja' ja wyinaty tø tkøwiñ tpaakwiñ jap puxøjkjotpy ja'agøjxp jøts ja Herodias yjotkujk'att, ja tø'øxyøjk pøn ja Felipe jawyeen y'atsnidø'øxy'ajt, pøn ja Herodes wyinaty tø t'atskap'aty. Ja'ats ja Herodes nugo myøøtsinaapy.

¹⁸ Paty ja Juan ja wyinaty yide'en tø ñi'mxyi:

—Ka'ap kyutuky jøts m'uch ja ñidø'øxy nugo xmøøt'atit.

¹⁹ Xjats ja Herodias wyinaty jade'en tø tjanchmi'ambiky ja Juan jøts ja tyimyik'ookwa'añ, xjats ja ka'ap tñiwinmaa'nbyaaty sudso ja t'ukyik'ookt;

²⁰ kumi ñija'wip ja Herodes wyinaty jøts ku ja Juan wyinaty øy tsuj yjaa'y'aty ku pøky tkamøødi, paty ja ttsø'øgi jøts paty ja ñidø'øxy ja sa tkaduktuñ. Pyatmadoojip yikxon ja kyajpxy ku ja Juan janch tsuj myadya'aky, øy ja mabaat tjaganimadøy.

²¹ Xjats ja tiempi tpaajty ku ja Herodias jotkumoni wyaañ sudso ja tyik'ookt ja Juan. Winet et ja Herodes twaadsoøy ja tyumbitøjk migaabyi mi'ukpi, ja'agøjxp ku syandi xøow ja wyinaty tyiknaxy. Ja may soldadi windsøn ja wyaadsoow møøt ja riki jaa'y, jøts nayide'en ja mōjaa'dyøjkti pøn ja kutujk jam wyinaty t'adsinaadyip Galilea.

²² Winets ja Herodias ñøøx tyøjkii'iñ jap ma ja jaa'y jap wyinaty kyaydi y'uukti jøts ja jap y'ejch, xjats ja Herodes ja ojts tjanchuj'ixy ja y'ajtsk, nayide'en ja jaa'myidi pøn ja jap wyinaty myøøtkaapy. Winets ja tñimaay ja kiixy mididi jap wyinaty tø y'eich:

—Amidook øts pøni ti mdsøjky, nyakp øts inet øy mididi.

²³ Ojts Dios ja ttuk'ixy jøts ku ja tmo'ot pøni ti ja kiixy kø'øm y'amidøøpy, pikta'aky paat kutujk paat ja kukwa'lxy tyakwa'añ.

²⁴ Xjats ku ja kiixy jade'en tmadøoy winets ja pyidsiimy, jøts tyaaak ja t'atsnimaay:

—¿Ti n'amido'op?

Xjats ja ojts ñi'lxxyi:

—Ja Juan kyubajk m'amidooyiyip pøn ja jaa'y tyiknøbajt.

²⁵ Winets ja kiixy jatyi tyøjkijii'n nay jap ma ja windsøn jap wyinaty, jøts ja tnimaay:

—Ixvamyi ndsøky ja Juan kyubajk pøn jaa'y tyiknøbajt, ja' øts kyubajk xmøøjiyip tetsyjøtpy.

²⁶ Winets ja windsøn yjanchjotmay'oo'kpijky ku ja kiixy jade'en wyaañ; jøts kumi tø ja wyinaty Dios ttuk'eixni jøts ku ja tyakt tuki'iyi pøni ti ja kiixy y'amidøøpy, tø migaabyi mi'ukpi ja wyinaty jade'en tmadowdi, xjats ja jade'en sa tkanimaay, kyupøjk ja' mididi ø'øn ja kiixy wyinaty y'amidøøpy.

²⁷ Jatyi syoldadi tu'uk tkejxy pøn wyinaty y'eix'ejtíp, jøts ja t'atsyikwinajkit ja Juan kyubajk, jøts tyikme'ent møkta'aky'ampy.

²⁸ Xjats ja soldadi chøø'n, jøts ja ojts ñijky jap puxøjkjøtpy, japts Juan kyubajk ja ojts tkajtspo'jtíyi, jøts ja tyikmiñ texyjotp. Jade'en ja kiixy ja yikmøøpy, jøts ja jade'en tmøøpy ja tyaaak.

²⁹ Xjats ku ja Juan pyabøjkpitøjk ñija'wiyøø, winets ja yikpøkjø'knøø, ojts pyabøjkpitøjk ja yikpidøøgiyi, ja' ja ojts yiknaxøkiyidi.

Ku ja Jesús tyikaay ja nimagoxk milbi jaa'y

³⁰ Xjats ja Jesús ja kyudanaabyi tminabyaajtøø, jøts ja ojts tyamimadyakixyi ti jatyi ja wyinaty tø ttundi, jøts ti ja wyinaty tø ttuk'ixpøkti ja jaa'y.

³¹ Xjats Jesús ja tnimaay:

—Mendi, wan tjaa'myindi poo'kxpi ma et abak.

Ja'agøjxp idø'øn ja jam jade'en ñøjkxwa'andi ku ja mayjaa'y ja myiyø'owyimbityidi myiyø'ø'y'adijyidi, niwine'enin ja yikxon kyakaydi kya'uukti.

³² Winets ja barki ja ttatøjkidøø, jøts ja ñøjkxtøø abak etjotp.

³³ Mayjaa'y ja y'eixidøø ku ja jade'en choo'ndøø. Yik'eixkajp ja Jesús; xjats ja choo'ndøø puipim, kawinaak kajp ja jaa'y jam ñøjkxtøø jøts ja ojts t'anajxukti ja Jesús, jawyeen ja mayjaa'y jam ne'egi yja'ttøø ma ja wyinaty y'ukja'atwa'andi.

³⁴ Xjats ku ja jam yja'ttøø, ku ja Jesús pyidsiimy jap barkijøtpy, winets ja t'eixpaajty ja mayjaa'y, jøts ja ojts t'ayo'ixy ku ja jam yik'ayowim tyanidi mabyorreegin mididi ñi'eixpi ka'ejtj; jøts ja tyik'ixpøjktøjkijii'n, jeky ja tyik'ixpijky.

³⁵ Xjats ku ja et chuu'ñøø, winets ja pyabøjkpitøjk ja wingon ñimejnøø, jøts ja ñimaajyøø:

—Tøts ja et chuu'ñi, pø ka'afts yä pøn chøøni.

³⁶ Kajxni yø jaa'y, wan tnøjknidi kamjøøjtj, wan tnøjknidi ma kajp wingon, jamts tju'udyit ja jii'kxy, kumi janch yu'oo'knidip yø'.

³⁷ Winets ja Jesús y'adsøøpy jøts ja wyaañ:

—Ka'ap idø'øn mwa'ant, mo'odi chapkaaky, yikaydi.

Xjats ja pyabøjkpitøjk wyandøø:

—¿Nøjkxp øøts jøts øøts tsapkaaky n'atsju'uty majtsk magø'pxy denario, jøts øøts yø jaa'y nyika'aty?

³⁸ Winets ja Jesús wyaañ:

—¿Ja winaak jap mdsapkaaktyi? Nøjkk x'ats'ejxti.

Xjats ku ja t'eixtøø, winets ja tnimaadyøø:

—Magoxk ja tsapkaaky jap jøts majtsk ja ajkx.

³⁹ Xjats ja Jesús tyikutujky jøts wan ja jaa'y wanjaty t'ixa'akti jam tsuxk miyjotp;

⁴⁰ winets ja jaa'y y'ixaktøø tukpiky jatyi, pømbi niwixijkmayjk ixaktøø, jøts pømbi nimago'pxy.

⁴¹ Xjats ja Jesús magoxk tnixajiyii'n ja tsapkaaky jøts majtsk ja ajkx, winets ja ojts tpat'ixy yø tsajp, jøts ja ojts tkunuu'kxy ja tsapkaaky xjats ja ojts ttukwa'kxy, jøts ja pyabøjkpitøjk ja tmø'øpy jøts ja ttagama'adyit ja jaa'y jøts ja tyikwa'kxidit. Tuki'iyi ja jaa'y ajkx yiktagumaagyøjxtøø, ojts ja yikmøøgyøxti,

⁴² xjats ja kyaadyøø ku'uxyi;

⁴³ winets ja tsapkaaky windank makmajtsk kach yikpøkmujky møøt ja ajkx windank.

⁴⁴ Janch namay ja jaa'y jam wyinaty yjøø'kxti, ja yaa'dyøjk ja yikmachodøø nimagoxk mil.

Ku ja Jesús yø'øpy jam mejwyngøjxp

⁴⁵ Xjats ja Jesús ja pyabøjkpitøjk tkugajxigyiyxy jap barkijøtpy, jøts ja ojts tyikniykxy jawyeen jam Betsaida, kyajxjawyeeni jaa jøts ja nøø ja ttanaxtit. Xjats ja yjaaktaañ jøts ja jaa'y ja tminawya'kxixt.

⁴⁶ Xjats ku ja jade'en tminawya'kxøø ja mayjaa'y, winets ja ñijky Dios'ajot'ajtpi kojpkøjxp.

⁴⁷ Jøts ja barki jam ja wyinaty kujk ñaxy mejkyujk'am ku ja et kyoodsiyii'n, jøts ja Jesús jam wyinaty nadyu'uk tø tyañ jam naxkøjxp.

⁴⁸ Xjats ja ojts t'ixy ja pyabøjkpitøjk jøts ku ja ka'ap y'ukmaa'niyidi sudso tkaaptit ja nøø, ja'agøjxp ku ja poj wyinaty yø'ø y wimbet'ampy. Xjats ku yjøkpyoots'ajty winets ja Jesús ojts t'ninijxy wingon ja pyabøjkpitøjk, jadi'lifi ja nøøwingøjxp yø'ø y, jøts tyim'y'ukwinaxwampy ja pyabøjkpitøjk ja wyinaty.

⁴⁹ Ku ja ojts y'ejxpaadyi jøts ku ja yø'ø y jam nøøwingøjxp, winets ja pyabøjkpitøjk yjanch-abaagaktøø, mik'u' ja wyinaty tø tyimwyinmaydi;

⁵⁰ kumi tø ja wyinaty niduki'y'i t'ejxti, janch tsø'jkidip ja'. Xjats Jesús ja ojts myigajpxyidi, yide'en ja ojts yiknøjmidi:

—Jotmøkpøkti; øts idø'øn, kidi mdsø'øgidi!

⁵¹ Xjats ja kyøxpejty jam barkijotp ma ja jam wyinaty, jøts ja poj jatyi ñajxy; ñigyumaap ja tyimya'widøø,

⁵² kumi ka'anim ja wyinaty tnijawidi yikxon pøni pøn ja Jesús, ø y ja tsapkaaky ja' t'jayikmayi, janch kujuun idø'øn ja'adi, ka'ap idø'øn ja tja'gyukidi.

Ku ja Jesús tyiktsøøjky ja mayjaa'y jam Genesaret

⁵³ Xjats ja ttanajxtøø ja mejy, jøts ja ojts yja'atti jam Genesaretit jaa'y y'etjotp, jamts byarki ja ojts tmixojtspatti nøøba'am.

⁵⁴ Ja'ayi ja pyidsømdøø jap barkijøtpy, winets ja Jesús jatyi yik'ejxkajpy.

⁵⁵ Jøts ja jaa'y jatyi ttukmadow'abidsømdøø ja myigu'uk ma jatyi ja kajp jam wyinaty jøts ku ja Jesús tø yja'aty, xjats ja jaa'y t'kiyja'tp'inibøjkidøø maabajtkøjxp ja pamaa'y ma ja jam wyinaty tnijawidi ja Jesús.

⁵⁶ Jøts ku ja Jesús yja'jty ømyadsowi, ku ja tniyø'ø y ja kajp møj mutsk, uk ku ja yja'aty kamjotp, ejtp idø'øn ja jaa'y tuu'am t'pikta'akti ja pamaa'y, jamts ja tminuu'kxa'akti ja Jesús jøts wyetpaa' ja wine'enin tyukpaadidit; jøts pøni pøn ja wet paajtyiy, jatyi ja cho'okti.

7

Ja ka'øwyinmaa'ni ja jaa'y tyikpøkpyajtp

¹ Winets ja Jesús yiknimiin ma ja jam wyinaty, ja fariseotøjk ja ojts ñimifi møøt ja kajpxwejpitøjk, pøn jam wyinaty winaagin tø choondi Jerusalén.

² Ja'ats t'ejxtøø kudam ja Jesús pyabøjkpitøjk kyøbujti ku kyaydi, jøts ka'ap idø'øn ejxim ja møjaa'y chinaa'yin, ja'agøjxp ja ojts wenk t'nigajpxti t'nimadya'akti.

³ (Kumi yide'en ja fariseotøjk kostumbri tmøøt'atti jøts nayide'en ja myigu'uk israelit jaa'y, ja' idø'øn ja pyadundip pøni sa jatyi ja møjaa'ydyøjk wyinaty tø y'atsøonidi, ka' pøn kyay kunim ja kyagøbujti may ojk, winetnims ja wa'ats ñajawiyidi.

⁴ Nayide'en pøni pøn maayjøtpy tsoo'mp, jøts pøni ku ja ka'ap kyøbujnim kawinaak ojk, ka'ap ja nayide'en kya'aty. May idø'øn ja kostumbri jade'en mido ja pyadundip, ejtp idø'øn yikpujy uujk'i'i'ni, tsajpts'øø y, møøt texy tas mido tum pujx, jøts maabajt, jade'en ja wa'ats tyik'etti.)

⁵ Paty fariseotøjk møøt ja kajpxwejpitøjk t'nimaadyøø ja Jesús:

—Tigøjxp ku yø mbabøjkpitøjk jade'en ja kyø' tkapujti ku yø kyaydi sa ja møjaa'y chinaa'yin wya'añ?

⁶ Xjats ja Jesús y'adsøø y jøts ja wya'añ:

—Meets win'øø'mbi, yikxon ja Isaías mido Dios kyugajpxy'ajtpy ojts tja'ay ja Dios kyajpxy ku ja wya'añ:

Nugo yø jaa'y jade'en y'aaw ttakajpxy ku øts yø xwindsø'øgi, jøts niwine'enin øts n'ayuujk yø xkaja'gyukiyi.

⁷ Niti yø kyawa'añ jade'en, ø y øts yø mabaaxt xjawindsø'øgi, ja'agøjxp ku tyikyø'ødyi ja jaa'y ixpøjkin jøts wya'andi kuts ja nja'aji.

⁸ Nayide'en ja Jesús wyami:

—Jøts meets idø'øn jade'en, kumi jade'en meets Dios kyutujk x'ixwejtsi, jøts xpadundi mido jaa'y kyostumbri'ajtpy: ja texpuyjk, ja taspujk, jøts pøni ti jatyi meets jade'en mdumpy.

⁹ Jade'en ja t'nimaay:

—Janch wijy mee mnayjawiniyi jøts ku mgostumbri jade'en xpadundi, m'ixwijchp meets ja Dios kyutujk.

¹⁰ Ø y ja Moisés yide'en yjawa'añ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan ja jatyi t'øøky.”

¹¹ Jøts ku meets, mdanigutujk'ajtpy meets ja jaa'y, ka'ap idø'øn tyim'y'aguwanikøjxpi jøts ja tyeety tyaak ja tyimwyindsø'øgit, wan ja tnøjmidi ja tyeety ja tyaak: “Ka'ap inet ixyam nbudøkit, ka' ti nmo'owa'añ, ja'agøjxp ku øts nbikta'aky tmøøt'aty Corbán.” (Corbán, ja' tyijpy ayuujk, tø ndamiyøxy ja Dios tuki'y'i nbikta'aky);

¹² Jøts ku ja jade'en wya'añ, nijuunits meets ja xka'uktukpudøjkyini ja tyeety ja tyaak.

¹³ Jade'en'ampy meets ja xka'ukyikmøjtøjkiñi ja Dios kyajpxy, ja'agøjxp ku ja mgostumbri xuk'ixpøkti xem yam ja u'nk ja una'jk, jøts nayide'en ja mdsinaa'yin xyikyø'odyi.

¹⁴ Xjats ja tyajxmujkøjx ja jaa'y jadigojk, jøts ja tnimaay:

—Patmadoodik øts ni'ijtyi, jøts xnimado'odit tu'uk ja ayuujk:

¹⁵ Niti jii'kxy jaa'y kyayikpøkyetyi ku jaa'y ti tjii'kxy. Ja' jaa'y yikpøkyajtip mido tsoo'mp jam anmija'winjotp.

¹⁶ Madowdi yixxon, pø jamxi mdatskti, yø'øts mdamado'odip.

¹⁷ Xjats ku ja Jesús tminawya'kxøø ja jaa'y, winets ja tyøjkiyii'ñ tøjkjøtpy, japts pyabøjkpitøjk ja ojts yiktiyi ti ja'abi madya'aky jade'en tyijpy.

¹⁸ Xjats ja tnimaay:

—¿Ni meets pøat yø xkanimadooni? ¿Ka'ap xnijawidi ku jaa'y niti jii'kxy kyayikpøkyetyi ku jaa'y ti tjii'kxy?

¹⁹ Ka'ap jii'kxy tyøki anmija'winjotp, maatsjotp ja jii'kxy tyøki ma ja tinch, jøts pyidsimy ku jaa'y ñijkxy nawyiyø'yibi.

Jade'en idø'øn ja ojts tniagjpxy jøts ku jii'kxy tum wa'ats mido yikjøø'kxp, ka' yikpøkyetyi.

²⁰ Yide'en ja wyaañ:

—Ja' jaa'y yikpøkyajtip mido pidsømp y'anmija'winjotp.

²¹ Kumi jam pyidsimy ja ka'øwynmaa'ñ ku jaa'y kya'øwynmay, jam pyidsimy ku jaa'y ñiyaa'y ñidø'øxy ñabyøjkxiyidi, ku nadyu'uk jaa'y ñamyøø'tatyidi, ku jaa'y yikjaa'y'øøky,

²² ku jaa'y myeech, ku jaa'y wenk jaa'y pyikta'aky tsojkiyi, ku jaa'y ti tka'ødyuñ, ku jaa'y tyaa'y'aty, ku jaa'y najts'aa'w najtsjoojt yjaa'y'aty, ku jaa'y myigu'uk ti ttami'ama'at'aty, ku jaa'y pyagajpxy, ku jaa'y ñamyikexyi, ku jaa'y niti tkawinmay.

²³ Tum anmija'winjotp yø ka'ødyunk jade'en chøøñ mido jaa'y tyikpøkyajtp.

Ku ja Tiro t'øxyøjk tjanchja'wiyii'ñ ja Jesús

²⁴ Xjats ja Jesús jam chøø'ñ jøts ja ñijkxy Tiro jøts Sidón, jade'en ja et jam txøøw'aty ma dø'øn ja ñijkxy. Xjats ku tøjx ja jam tpaajty jamts ja tyøjkiyii'ñ, ka'ap ja pøn t'uktuknijawiwya'añ ku ja jam. Ma ka'ap ja jade'en yjaty ojts ja jaty yiknijawii.

²⁵ Jaty t'øxyøjk ja tu'uk ñija'wiyøø pøn ñøøxu'nk jam wyinaty miku' tmøø'tajtp; ja'ats jam meen jøts ja wyinguxanaajyi.

²⁶ Ojts ja t'øxyøjk wya'añ jøts ja Jesús tyikpidsø'ømt ja miku' mido ja kiixyu'nk jam wyinaty myøø'tajtpy, sirofenicyit jaa'y idø'øn ja t'øxyøjk pøn jam jade'en meen, jøts griego ayuujk ja kyajpxy.

²⁷ Xjats ja Jesús y'adsøø y jøts ja wyaañ:

—Jawyeen øts ja israelit jaa'y nbudøkit, jøts meets ix'oojknim.

²⁸ Winets ja t'øxyøjk y'adsøø y jøts ja wyaañ:

—Janch jade'en teety, ka'ap kyajade'eni. Jade'en øts ixyam nnayjawiyi ejxim ja uku'ngin, jøts ja israelit jaa'y ndejint ejxim jaa'y una'jkin kyaydi, jøts ja kyaaky abu'xk tyika'adi jøts ja uku'nk ja jaty tkaamyuky. Paty teety nnøjmi jøts md'uump may'ajt jøts ø xpudøkit.

²⁹ Xjats ja Jesús tnimaay ja t'øxyøjk:

—Janch idø'øn mwa'añ; nøjxiti. Tø ja m'u'nk ja miku' myajtstuujtñyi.

³⁰ Xjats ja t'øxyøjk ojts ñijkxy tyøjkjotp, kuts ja jam yja'aty jøts ja ñøøxu'nk ja tpaajty maabajtkøjxp. Ka'ap miku' ja wyinaty t'ukmøø'tajtni, tø ja wyinaty myajtstuujtñyi.

Ku Jesús ja nat jaa'y tyatsk tyik'awajtsyi

³¹ Xjats ja Jesús jam choo'ngojmøø Tiro, jøts ja ñijkxy Sidón, tyimñajxts ja jam jøts magyajp ja ttanajxy jam Decápolis etjotp, jøts ja yja'jty ma ja mejy txøøw'aty Galilea.

³² Jamts jaa'y jadu'uk yiktanimiñ pøn wyinaty nat, pøn wyinaty atoojts, ka'ap ja y'øgyajpxy, winets ja yikniimaay jøts ja kyø' ja ttanixajt jøts ja tyiktso'okt.

³³ Xjats Jesús ja ojts abiky tsoo tyikniyxxy, ojts ja nadyu'uk tjiway ma ja mayjaa'y jam wyinaty, jøts kyøtsa'jx ja ojts tkudeji jap nat jaa'y tyatskjøtpy, ojts kyø' ja ttsujwyee y jøts jaa'y tyoojts ja ojts tpaajti.

³⁴ Winets ja Jesús chajp'ixy, jøts ojts myøkkejy, xjats wyaañ:

—¡Efata! —mido ayuujk tyijpy: ¡Awa'ats!

³⁵ Winets ja nat jaa'y jaty ja tyatsk y'awaajch, jøts ja tyoojts nayide'en y'øyiyii'ñ, xjats ja jade'en kyajpxijky øy, ojts ja yixxon y'awijy.

³⁶ Winets ja Jesús yixxon ojts t'uk'ane'emy jawyeen ja mayjaa'y jøts ja pøn ka'ap ttuk-mado'odit; ku ja jade'en tnimaay, ne'egi jinaxy ja ojts tniadya'a'akti.

³⁷ Xjats ja jade'en ñigyumaap tjawidi, yide'en ja wyandøø:

—Tyum'ødyumpy øy ti; yikmadøøpy nat jaa'y, jøts yik'awijpy uum jaa'y.

8

Ku ja Jesús tyikaay ja ñimaktaxk milbi jaa'y

¹ Winet ets mayjaa'y jam wyinaty tɔ ɲamykyidi, jɔts ja kyaajjik ja kya'etti. Xjats ja Jesús tyaaixiyii'ɲ ja pyabɔjkpitɔjk, jɔts ja tɲimaay:

² —Njanch'ayo'ijxpy ɔts yɔ jaa'y, kumi tyigɔɔkxɔɔwyp ɔts yɔ yɔ xnimenidi, jade'en ɔts yɔ yɔ kujk nmɔɔtsinaañidi jɔts ja kyaaky tɔ kyɔjxnidi.

³ Ku ɔts inet yɔ ayuu axɔɔw njakaxt jam tyɔjkjɔp, jadi'iɲi net yɔ muum yjɔtkɔjxnidit tuu'ajjy, kumi ja winaagin pɔn tɔ choondi jagam et.

⁴ Xjats pyabɔjkpitɔjk ja ojts y'adsɔy, jɔts ja ɲimaajjyɔɔ:

—ɛSudso yɔ jaa'y yɔ yjanchka'adyit, pɔ ka'ats yɔ pɔn chɔɔni?

⁵ Winets ja Jesús tyiktiiy ja pyabɔjkpitɔjk, yide'en ja tɲimaay:

—ɛWinaak tsapkaaky jap xmɔɔdidi?

Winets ja wyandɔɔ:

—Wixujk.

⁶ Xjats Jesús tɲimaay ja jaa'y jɔts wan t'ixakɔxti jam ɲaxkɔjxp, winets ja tɲixajiyii'ɲ ja tsapkaaky, jɔts ja ttamɔja'wiyii'ɲ ja Dios. Xjats ja ojts ttukwa'kxy ja tsapkaaky jɔts ja tmɔɔy ja pyabɔjkpitɔjk, winets ja ttagumaadyɔjkidɔɔ ja jaa'y.

⁷ Jamts winaagin ja mtsak ajkxu'nk ja wyinaty tmɔɔt'ajtmidi, ja'ats ja Jesús ojts tkunuu'kxy, jɔts pyabɔjkpitɔjk ja ttaguwa'anii'ɲ jɔts wan ja jaa'y ja ttagumaagyɔxti.

⁸ Xjats ja jaa'y ɲi'ijtyi kyaagyɔjxtɔɔ, ojts yikpɔkmuky wixujk kach.

⁹ Jɔts ja jaa'y pɔn wyinaty tɔ kyaydi, nimaktaxk milin ja jam wyinaty ɲamay'atti. Xjats ja Jesús ja ojts tminawya'kxniyi,

¹⁰ jɔts ja tyɔjkinaa jap barkijɔtpy mɔɔt ja pyabɔjkpitɔjk, jɔts ja ɲɔjktɔɔ jam Dalmanutit jaa'y y'etjɔp.

Ku ja fariseotɔjk t'amidoodɔɔ ja Jesús, jɔts ja ttuk'ejxtit ja myilagri'ajtin

¹¹ Winets ja fariseotɔjk jam myendɔɔ, jɔts ja tminagyajpxɔjkidɔɔ ja Jesús. Ja' ja ojts t'amidowdi, jɔts ja Jesús ja dios'ajtin tyikwingaxɔ'ɔkt yɔ ɲaxwiin, nugo dɔ'ɔn jade'en tjɔt'ejxti.

¹² Xjats Jesús ja tkumɔkxajiyii'ɲ, jɔts ja wyaan:

—ɛTigɔjxp ku jaa'y ya'atpi xɔɔw ya'atpi jumɔjt t'amidowdi jɔts yiktuk'ejxtit ja dios'ajtin? Janch meets idɔ'ɔn nnɔjmi, jɔts ku jade'embj jaa'y ni tuk'ojkin kyayiktuk'ejxtit ja dios'ajtin.

¹³ Xjats ja tɲajtstuujiy, jɔts ja tyɔjkiyii'ɲ jap byarkijɔtpy, jɔts ja ɲijky jaduktamajɲ'ampy jam nɔɔba'am.

Ja fariseit jaa'y y'ixpɔjkin

¹⁴ Nika'ap kyaaky ja wyinaty tɔ tkondi, tɔ ja wyinaty tjɔ'dyigɔydi, tu'ugyi tsapkaakyu'nk ja wyinaty jap tkonidi jap barkijɔtpy.

¹⁵ Xjats ja Jesús tɲimaay ja pyabɔjkpitɔjk:

—Ejxim Herodes, ejxim fariseotɔjk lyevaduri xkupɔjkidi, ɔyim mnay'ejx'etidit.

¹⁶ Winets ja pyabɔjkpitɔjk jatyi myadyaktɔjkidɔɔ, yide'en ja ɲawyajnidɔɔ:

—Ja'agɔjxp yɔ jade'en wya'an ku adɔm tsapkaaky tɔ ngayikmi'iɲindi.

¹⁷ Wa'ats Jesús ja tɲijawi ti ja wyinaty kyajpxy'ajttip. Ka'ap ja tsapkaaky ja tijy mido ɲimadoodip ja pyabɔjkpitɔjk, ja Herodes ja fariseotɔjk ndejnt ja y'ixpɔjkin ja y'ayuujk tyijpy. Paty ja Jesús yide'en tyiktiiy:

—ɛTiku mwa'andi ku mdsapkaaky xijy kya'etti? ɛKa'anin xnimadowdi, jɔts nika'ap xnijawidinim, janch juun mgubajk xmɔɔdidi?

¹⁸ ɛKa'anin mgɔ'ɔm ween xawin'ejxti, jɔts ni mdɔtsk xkadamadoodinim, niwine'enin xkaja'myatsti?

¹⁹ Ku ɔts ojts tsapkaaky magoxk nyikwa'kxy, jɔts ojts nmɔ'ɔy ja magoxk milbi jaa'y, ɛwinaak kach ja kaaky windank ojts xpɔkmukti?

Xjats ja wyandɔɔ:

—Makmajtsk kach.

²⁰ —ɛJɔts mja'myajtstip nayide'en ku ɔts ojts ja tsapkaaky wixujk nyikwa'kxy, jɔts ɔts ja myaktaxk milbi jaa'y ojts nmɔ'ɔy? ɛJɔts winaak kach ja kaaky windank xpɔkmuktɔɔ?

Xjats ja wyandɔɔ:

—Wixujk.

²¹ Winets Jesús ja pyabɔjkpitɔjk tɲimaay:

—Ka'anindam meets idɔ'ɔn xja'gyuki. Ja tsapkaaky yɔ meets ja'ayi mdajotmay'ɔɔ'kpy.

Ku ja Jesús tyikwin'ejxwa'kxy tu'uk ja winap jaa'y jam Betsaida

²² Jawaani y'ijty, xjats ja yja'tti jam Betsaida ma ja kajp wyinaty jade'en txɔɔwi; jamts ja Jesús yiktanimiin tu'uk ja winap jaa'y, jɔts ja ojts yikminuu'kxa'aky, jɔts ja tɲixajit jɔts ja tyiktso'okt.

²³ Xjats ja jade'en tnixajiyii'ñ kyø'køjxp, jøts ja tyikpidsii'my kajpjoṭp. Winets tsujy ja ojts ttawenjaaxy jøts ja tnixajiyii'ñ, xjats ja tyiktiy jøts pøni kujk wyinaty wine'enin t'ixy øy ti.

²⁴ Winets ja winap jaa'y wyin'ejxwa'kxy, jøts wyaañ:

—N'ijxpy øts yø jaa'y ku yø'ødyi, ja ku jade'en kyaxø'økti sã kipyin.

²⁵ Winets ja Jesús jadigojk twinguxajiyii'ñ ja winap jaa'y, jøts ja yikxon tyik'ejxmøkiyii'ñ, ojts ja winap jaa'y ja wyeen y'awa'ach, tum wa'ats ja t'ejxni øy tyii'ji.

²⁶ Xjats Jesús ja tkaxjni jam tyøjkwindum, yide'en ja tñmaay:

—Kidi mgajpṭøki, jøts nipøn jam sã xkanøjmit.

Ku ja Pedro wyaañ jøts ku ja Jesús yja'aji yiknitsokp, ja Cristo

²⁷ Tø dø'on ja jade'en wyinaty y'ukjaty, xjats ja Jesús ja pyabøjkpitøjk tmøøtsøø'ñ jøts ja ñøjkxti jam Cesarea Filipino. Jade'en ja et xyøøw ma dø'on ja ñøjkxti. Xjats ja Jesús tuu'ajy ja pyabøjkpitøjk tø tñmaay, jøts ja tyiktiy:

—¿Pønik øts, sã jaa'y wya'andi?

²⁸ Winets ja pyabøjkpitøjk y'adsøødø, jøts ja wyandøø:

—Winaagin jaa'y wya'andi jøts ku mets Juan Bautista, pømbi nømidip jøts ku mets Elías midi jekyibim yiknija'wip, jøts ku mets Dios kyugajpx'ajtpi midi jekyibim yiknigajpxp yiknimadyakp.

²⁹ Xjats ja kø'øm ja Jesús yiktøøjidøø yide'en:

—Jøts meets, ¿sã meets m'ukwa'añ, pøn øts idø'on?

Winets ja Pedro y'adsøø y jøts ja wyaañ:

—Ja yiknitsokpi mets, ja Cristo.

³⁰ Xjats Jesús ja ñmaajyidøø jøts ka'ap pøn ttukmado'odit jøts ku ja kyiristi.

Ku ja Jesús kø'øm tñigajpxy jøts ku ja y'oookt

³¹ Xjats ja Jesús tyik'ixpøktøjkijiyii'ñ ja pyabøjkpitøjk, ja' ja tyukmadoow sã ja y'ayo'ombaatt ja Dios, ja naxwii'ñit jaa'y ja myøjkudanaabyi, kø'øm idø'on ja jade'en ñadyiyji. Yide'en ja Jesús ttukmadøø y jøts ku ja møjaa'dyøjk, ku ja israelit jaa'y tyeetywindson, jøts ku ja kajpxwejpitøjk ja y'ixwetsiyit. Jade'en ja tñmaay ja pyabøjkpitøjk jøts ku ja ja' yik'oogit, tyukmadoow ja' ku ja jade'en y'oookt jøts ku ja kyidigøøk xøøw pyidsø'ømt jap oo'kpi jutjōṭpy ku ja yjujkyøkt.

³² Wa'ats ja ttukmadoogixy ja pyabøjkpitøjk. Xjats ja Pedro ka'ap t'øyja'wiyii'ñ ku ja wyinaty tø wya'añ kuk ja y'oookt. Ja'agøjxp ja Pedro møk twingugajpxiyii'ñ ja Jesús.

³³ Xjats ja Jesús wya'kjimbijty, jøts ja pyabøjkpitøjk ja ojts twin'ixy, xjats ku Pedro mikujin wyinaty tø kyajpxy, winets Jesús ja twingugajpxiyii'ñ nayide'en, jawaani møk'ampy ja tñmaay:

—¡Mets miku!, jiwa'ak, majststutk øts! Ka' mets jade'en mwinmay sã ja Dios Teety wyinmayin, jade'en me mwinmay sã øy pøn naxwii'ñit jaa'y.

³⁴ Winets ja Jesús ja pyabøjkpitøjk tyaa'jyiyii'ñ, tuki'iyi ja tyajxmukijxy ja mayjaa'y jøts ja tñmaay:

—Pøni pøn tsojkin tmøøt'ajtp jøts øts ja nja' jade'en xpaduujnit, ka' mibaat kø'øm ñadyunk'atit, ja'ayi ku amumjoojt ñadyamiyoxit ja ayo'on jøts idø'on jade'en tpadu'unt.

³⁵ Pønts kajade'enduñim nay'ejxip, niwindem tkapaaty ja nitso'ok'ajtin; jøts pøn ø xku'ayo'ombaajtip, ja' idø'on tpaatp ja nitso'ok'ajtin.

³⁶ ¿Ja ti ja ñiwyala'ant øy ja jaa'y tjaja'bøjkixy ja naxwii'ñajtin jøts ja y'anmija'win ne'legi wyindigøy?

³⁷ Jabi ka'axi mibaat ja ñitso'ok'ajtin ja tkuju'uty.

³⁸ Jøts pøni pøn ø xatsø'ødyum, pøni pøn øts n'øgyajpxy n'øy'ayuujk xatsø'ødyuujnip ja jaa'y wyinduujy midy jekyip t'ukpadundip ja Dios, ja pojkipi jaa'y wyinduujy, nayide'ents øts ja tsø'ødyumbi nøjx ndatsø'ødyuñ ku øts ja Dios Teety kyutujk nmimejnit, ku øts ja ankilis nmøøtme'ent pøn tsinaadyip jap tsajpjoṭpy. Øts idø'on ja naxwii'ñit jaa'y nmøjkudanaabyi'ajtpy.

9

¹ Janch meets idø'on nnøjmi, ja jaa'y ya winaagin tyanidi pøn ka'oooktip kunim ja t'ejxtit tñjawidit ja Dios kyutujk ku ja tpi'kta'akt møk'ampy.

Ku ja Jesús adsu'jky tuki'iyi y'atstigajch, amuum chamambøjkijxy

² Tyudujkxøøwip ja Jesús wyinaty jade'en tø wya'añ, xjats ja pyabøjkpitøjk ja nidigøøk t'ukwaay, ja Pedro ja y'ukwaaw møøt ja Jacobo jøts møøt ja Juan, jade'en ja ojts tmøøtnijxxy jam kojpkøjxp ma ja Jesús adsu'jky tyigajch, jamts ja pyabøjkpitøjk wyinaty t'ukmøøtani.

³ Yikxon wyet ja chamambijky janch poop ejxim tsap'øø'pkyin, nipøn jaa'y wyet ja jade'en tkayikwa'ach sã dø'on wyet ja pyoobiyii'ñ.

⁴ Winets ja pyabøjkpitøjk t'ejxpattøø ja Elías møøt ja Moisés, jøts ku ja tmøøtmadya'akti ja Jesús.

⁵ Xjats ja Pedro tnimaay ja Jesús:

—Windsøn, ityimy'øy'ajtp ku øø nyam'aty! Nyik'øyip øøts ujts'aadyøjk, tu'uk mets mja', tu'uk Moisés yja', jøts Elías yja' tu'uk.

⁶ Tø ja pyabøjkpitøjk wyinaty yjanchø'øgidyøjkinidi, ka'ap ja y'ukwinmaa'nbyatnidi sa ja tnøjmidi ja Jesús paty ja Pedro jade'en nugo y'ukwaaq.

⁷ Winets yoots myiñi ma ja jam wyinaty, ja'ats ja ojts yik'adigøyidi, jøts jap yikmadøøy ja Dios y'ayuujk midi waan:

—Ya'at n'U'nk øts idø'øn njanchøjkpy, mimadojidi pøni sa wya'añ.

⁸ Xjats ku ja jaty y'ejxj'øktøø, winets ja nipøn tka'ejxpattøø ma ja Jesús jam wyinaty, ja'ayi jam wyinaty nadyu'uk tanaapy.

⁹ Xjats ku ja choo'nidøø jam kojpkøjxp ku ja kyidaknidi, winets Jesús ja tya'ana'amidøø, jøts ja ka'ap pøn ttamimadya'aktit midi ja wyinaty tø t'ejxti, jaanim ja tmadya'akyø'ødyit kunim ja kø'øm oo'kpi jutjøtpy pyidsø'ømt jadigojk, jaa pøn myøjkudanaabyi'ajtpy ja naxwii'ñit jaa'y.

¹⁰ Xjats ja pyabøjkpitøjk jade'en kø'ømyi t'amaa'tsk'ajttøø, kø'ømyi ja jade'en tkajpxy'atti ti dø'øn ja jade'en tyijpy ku ja pyidsø'ømt jap oo'kpi jutjøtpy jadigojk.

¹¹ Xjats ja tyiktøødøø ja Jesús, yide'en ja tnimaadyjøø:

—¿Tigøjxp ku ja kajpxwejpitøjk yide'en wya'andi jøts ku Elías jawyeen mye'ent, jøts ix'oøjknim ja yiknitsokpi?

¹² Winets ja Jesús y'adsøøy jøts ja tnimaay:

—Janch me'emp ja Elías jawyeen, ja'ats nøjx nayide'en tyikjajtp ja øgyostumbri midi Dios ojts tpikta'aky. ¿Jøts sa ja Dios kyajpxy wya'añ, sa øts ja nyiknigajpxy pøn møj kudanaabyi'ajtp, sak njatt? Yide'en ja Dios kyajpxy wya'añ jøts kuk ø n'ayo'ombaa'tt, ka'abik øts ja jaa'y xtsokt, x'ixwetspik øts ja jaa'y.

¹³ Jøts ndukmadøøpy meets ixyam ku ja Juan Bautista tø y'atsmiñ, jøts tø kyugajpx'aty nayide'en ejxim Elíasin, jøts jaa'y ja ojts yjemduñi tyeduñi pøni sa y'anmija'win ja tymñe'kti, jajt idø'øn ja jade'en sa Dios kyajpxy wyinaty wya'añ.

Ku ja Jesús tyikmøpkijky tu'uk ja mixyu'nk pøn wyinaty ja miku' tø tyatøkiyi

¹⁴ Jawaani y'ijty xjats ja Jesús tmøøtja'aty ja nidigøøk ja myigu'uk ma ja pyabøjkpitøjk jam wyinaty tø yjaaktandi, jøts ja t'ejxpattøø ja mayjaa'y ku ja pyabøjkpitøjk jam wyinaty tø yiknabejkinidi; jøts kajpxwejpitøjk ja jam tmøøtnay'øyidi.

¹⁵ Xjats ku ja Jesús yik'ejxpaajty, winets ja jaa'y niduki'iyi ñigyumaap yjajttøø, jaty ja tnibujtj'øktøø ja Jesús, jøts ja ojts tkajpxpoo'kxti.

¹⁶ Xjats Jesús ja yiktøøjidøø, yide'en ja ñimaajyidøø:

—¿Sats yø nbabøjkpitøjk xnøjmidi, ti yø møøt mnadyamigajpxidip?

¹⁷ Winets ja mayjaa'y nidu'ugin y'adsøøy jøts ja wya'añ:

—Windsøn, ixya me tø ndanimiñ tu'uk nmajnk'u'nk pøn ja miku' tmøøt'ajtp, jøts ja' yø kayakjpxip.

¹⁸ Jaty miku' yø myachi ku yø ma ñijxy, ja'ats yø yiknaxkidajkip, jamts yø yjanch'a'øøpy jøts yjanchtøtskaaty, jade'en'ampy yø tø yjanchwindigøøfi, ka'ap myøjaa'w yø ukteeni. Tø øts yø mbabøjkpitøjk njanøjmidi jøts tyikpidsø'ømdit yø miku' midi øts yø n'u'nk myøøt'ajtpy, jøts ka'ap yø tø myayidi.

¹⁹ Xjats ja Jesús y'adsøøy jøts ja wya'añ:

—Mee kajanchja'wibidi, yø mbøky nugo myikmajadaktip. ¿Ma windemnim meets ja ngajpxy ja n'ayuujk xpabøjkit, jøts windemnim meets yø jade'embj suktatso'okt ku øts yø ejtp njanchjanigajpx'ity?

²⁰ Winets ja tyikmendøø, xjats ku Jesús ja miku' y'ejxpaajti, winets ja mixy yikxidejtyø'jy møk'ampy, ja miku' ja ojts jade'en tyuñi, xjats ja kyidaay, kawinaak ojk ja kyibej'awidijty jøts ja yjanch'a'øøpy.

²¹ Winets ja Jesús tyiktiiy ja u'nkteety, yide'en ja tnimaay:

—¿Windii yø jade'en pyaadyi, windii yø jade'en yjajt'okwa'añ?

Xjats ja u'nkteety wya'añ:

—Jaayip yø pyaajtniyi ku yø myutsk'ajty,

²² may ojk ja miku' yø jønjøtpy tø yiktøkiyi, may ojk yø tø yiktøkiyi møj nøøjøtpy, jøts yø jade'en yik'ookwa'añi. Ukwanik sa xu'unt, ayo'ejxk øøts, pudøjkik øøts.

²³ Xjats ja Jesús wya'añ:

—Pøni mjanchja'wip ja Dios, tum'øy jaa'y pyidsø'ømxiyi øy tyii'ji pøni ku tjanchjawi ja Dios.

²⁴ Winets ja mixy tyeety møk'ampy wya'añ:

—iNjanchja'wip øts ja Dios; jøts pudøjkik øts jøts njaakjanchjawit!

²⁵ Xjats ku ja Jesús ojts t'ixy ja mayjaa'y jøts ku ja ñamyuk'adi'ichidi, winets ja møk'ampy twingugajpxiyi'ñ ja miku', yide'en ja tnimaay:

—Miku', mets ja jaa'y myik'uu'mpy jøts mets ja jaa'y myiknaajtpy, øts nyikutujkpy jøts mbidsø'omt; majtstu'tut yø mixy, jøts kidi m'uktøjkini jadigojk.

²⁶ Xjats ja miku' møk'ampy chabaaguejky, jøts ja mixy ojts møk'ampy yikxidejtyø'øy, winets miku' ja ojts myajtstu'udyi, jade'en ja yiktaajni ejxim ja jaa'y y'øøky, may ja jaa'y wyanidi jøts ku ja tø y'oo'kni.

²⁷ Xjats Jesús ja ojts twejtsji'iky; jøts ja mixy tyanaagyukyiyi'ñ.

²⁸ Winets ja Jesús tyøjkini tøjktøtpy, jøts ja pyabøjkpitøjk ja yiktøøjiyøø yide'en:

—¿Tigøjxp ku øøts yø miku' tø ngayikpidsimy?

²⁹ Xjats ja Jesús wyaañ:

—Yø miku' jade'en'ajttip, winet yø pyidsømdi ku ja Dios n'ajot'ajtin jøts ku yø ngu'amaay'ajtin.

Ku ja Jesús tñigajpxy jadigojk jøts ku ja y'oojt

³⁰ Xjats ku ja ojts choondi jam, winets ja ñajxtøø Galilea. Jøts ka'ap Jesús ja pøn ttuknijawiywa'añ ku ja jam wyinaty,

³¹ kumi yide'en ja pyabøjkpitøjk ja wyinaty yik'ixpiky, yide'en ja tnøjmi:

—Øts idø'øn nmøjkudanaabyi'ajtpy ja naaxwii'ñit jaa'y, jøts meets idø'øn nduknijawi sa njatt sa ngubatt ya naaxwiiñ. Jade'en øts ja jaa'y xkøyakt, ku øts ja mayjaa'y xmatst jøts ø jatyi xyik'oojt; jøts ku jade'en n'uk'oojt, winets øts kyidigøøk xøøw nbidsø'omt jap oo'kpi jutjøtpy.

³² Xjats ja pyabøjkpitøjk ja ka'ap tñimadowdi ku ja jade'en yiknøjmidi, jøts tsø'jkidip ja' øyik idø'øn ja tyiktø'ødit ti jade'en tyijpy.

Pøn idø'øn jawaani møj mā Dios ja yjaa'y ja kyutujk ttanitani

³³ Xjats ja Jesús jam tnøøtsøø'ñ ja pyabøjkpitøjk jøts ja yja'tti Capernaum, jade'en ja møj kajp xyøøw mā dø'øn ja ojts yja'tti; jøts ku ja tyøjkidøø tu'ugyi tøjktøtpy, japts ja Jesús pyabøjkpitøjk tyiktøiy, yide'en ja tnimaay:

—¿Ti meets ukwan ja mgajpxy'ajtpy tuu'ajy?

³⁴ Xjats ja pyabøjkpitøjk amøni y'amidoodukti, ka'ap ja sa wya'andi, kumi ja' ja jam wyinaty tø tnadyamigajpxyidi pøn pyabøjkpitøjk idø'øn ja tyimjawaani møj pidsømp.

³⁵ Winets ja Jesús y'ixaajky jøts ja tyaaixiyi'ñ ja ñimakmajtskpi jaa'y pøn ixpøjktip, jøts ja tnimaay:

—Pøni pøn namyøjpkitā'akwajni, wan ja myigu'uk tpudøki, øy ti tunk ttu'unt ejxim ja jaa'y pøn ja ñitanaabyi ka'ejtp.

³⁶ Winets ja tñixajiyi'ñ tu'uk ja mutsku'nk jøts ja tpiktaajky jam agujk'am, jamts ja ojts tsa'anji'iky, jøts ja wyaañ:

³⁷ —Pøni pøn tkupøjpk øy midi una'jku'nk øts køjxp, øts ja wyinaty jade'en xkupøjpk, kumi tum øts ja una'jk nja'ajtpy; jøts pøni pøn øts idø'øn jade'en wyinaty xkupøjpk, kidi øtsip ja wyinaty nadyu'uk xytingyupøkp, nayi kyupøkp ja nøjcx pøn ø xkajx.

Ku ja Jesús wyaañ: Adøm ja' nbudøjkibi pøni ka'ap adøm ja xmidsep'ajtyindi

³⁸ Winets ja Juan tnimaay ja Jesús:

—Windsøn, tø øøts ja jaa'y tu'uk n'ixy pøn tyiktump mets mmøk'ajtin, jøts miku' ja ttukmajtstu'uty ja jaa'y, jøts kumi ka'ap ja yik'ixxyi xjats øøts ja tø ndukmajtstu'uty jøts ja ka'ap jade'en y'uk'adøtsnit.

³⁹ Winets ja Jesús wyaañ:

—Janch øy midi yø jaa'y tyumpy, kidi xukmajtstu'utti; pøni yø' ja jaa'y tyiktsojpk øts køjxp, sudso øts yø jadigojk xmigajpxigøøgyojmit.

⁴⁰ Pøn adøm xkamidsep'ajtmip, xmigu'ukwā'animp adøm ja'.

⁴¹ Jøts ku pøngapøn ja tsuxk nøø mmø'ojidit tuktsenu'ngin, ku ja ttaguyakit øts køjxp, jøts kumi øts meets njaaktyimyjaa'y'ajtnip, wimbejtxiyip tigajtsxiyip ja nøjcx jawaani øy, kumi øts idø'øn meets xkristi'ajtp.

Ja' midi yikpøkpyajtp

⁴² Øy pøngapøn pøni pøn øts n'una'jk nidu'ugin xyikpøjkpituujiyip, pøni pøn øts n'una'jk nidu'ugin xyiktundigøjiyip pøn jaty ø xjanchja'widip, ne'egi ja øyik y'ijty jøts paandaak yiktayukwøønt ja jaa'y pøni pøn jade'en adøtsp jøts ja mejjotp yikuwibepit.

⁴³ Pøni myikpøkyuujiyip yø mgø', ne'egi øy ku xkajtspooit jøts mjaakayikpøjkpitunit; ne'egi øy jade'en ku mgø' tuktamajñ xmidøkit jap tsajpjøtpy, jøts kidi xmidøki ka'pxy jap miku' ku'py mā jøønyow nijuuni kyapi'ich,

⁴⁴ mā tinø'øk nijuuni kya'øøky.

⁴⁵ Põni myikpojkipituujnip yø mdeky, ne'egi øy ku xkajtspoott jøts mjaakayikpojkipitunit; ne'egi jade'en paktuk mdøkit jap tsajpjøtpy, jøts kidi myikpikta'aky ka'pxy møøt mdeky jap miku' ku'py,

⁴⁶ ma tinø'øk nijuuni kya'øøky jøts ma jøøn nijuuni kyapi'ich.

⁴⁷ Jøts põni ku yø mween myikpojkipituniyi, ne'egi øy jøts mnawyenjuudiyit; ne'egi øy jade'en ku windu'uk mdøkit ma Dios kyutujk tnitani ja jaa'dyi, jøts kidi myikpikta'aky miku' ku'py møøt mween ka'pxy,

⁴⁸ ma nijuuni kya'øøky, ma jøøn ejtp tyøøy.

⁴⁹ Niiduki'iyi ja Dios yjaa'y nøjxk ayo'ombaaty ya naxwiif, jøts ku dø'øn jade'en tpaaty t'ixy winets ja nøjxk jawaani øy pyidsømni. Jade'en idø'øn ndejint n'ukpiktaajkint ejxim ja jiyujk yøxy ku ja kaan ja møøt yiktamiyoxi, jawaani øy ja nøjxk pyidsømni.

⁵⁰ Kaan amuum tyik'øygyøjxp o ti, nayide'en meets idø'øn ndejint m'ødyu'unt ku mmigu'uk xukmado't ot ja Dios yja' sudso y'anmija'win kyawindigø'ødyit. Kuts ka'ap jade'en md'u'undit, tø wyinaty mbidsømdi ejxim ja kaanin midi kawa'ats midi katump. Møøt mnamyayidi o põngapøn.

10

Ku ja Jesús kyajpxwiyj jøts kidi amajtsk jaa'y ñawya'kxyidi

¹ Xjats ja Jesús jam chøø'ñ Capernaum, jøts ja ñijxxy Judea, jøts ku ja jam ñajxy winets ja møj nøø ja ttanajxy midi txøøw'ajtp Jordán. Jøts ja niyø'øyi ja kajp midi jam wyinaty tãmp jaduktamajñ'ampy, jamts ja jaa'y may'ampy ñamyukojmiyidøø ma ja wyinaty, jøts ja ojts tyik'ixpiky jade'eñim sayim ja wyinaty jekyip tø ttuñ.

² Xjats ja fariseotøjk winaagin tñimendøø ja Jesús jøts ja nugo tkajpxy'ejxwa'andi, yide'en ja tñimadyi põni øy idø'øn jade'en ku ñiyaa'y ja tñajtstu'utwa'ãñ ja ñidø'øxy, jade'en ja ojts tyiktøwdi.

³ Xjats ja Jesús y'adsøøy jøts ja wyaãñ:

—¿Sã Moisés yikutujky?

⁴ Winets ja y'adsoodøø jøts ja wyandøø:

—Ojts Moisés tyikutuky jøts ja nøky tu'uk kyojt ku ja yaa'dyøjk tñajtstu'utt ja ñidø'øxy.

⁵ Xjats ja Jesús y'adsøøy jøts ja wyaãñ:

—Ja'agøjxp ja Moisés jade'en tyikutujky ku mee niwine'enin mgamadøy, ku mee niwine'enin mgaja'gyuki.

⁶ Kumi Dios tyiktso'ondakijxy tuki'iyi ku yaa'dyøjk ku tø'øxyøjk tyiknajtskojiyi'ñ jøts ja jaa'y y'amajtskidit.

⁷ Paty yaa'dyøjk kuwãni tñajtstu'utt ja tyeety ja tyaak, jøts ñidø'øxy tu'ugyi tmøøtsøønit nadyu'uk,

⁸ ku jaa'y y'amajtsk'atti ka'ap ja y'uknamajtskinidi, tu'ugyi ja ñamyayi ñabyaajtñiyidi.

⁹ Paty ka'ap y'øyi ku jaa'y tyiknawya'kxit midi ja Dios tø tyik'amajtski.

¹⁰ Xjats ku ja tyøjkidøø tøjkjøtpy, winets ja pyabøjkpitøjk tyiktødøø jadigojk midi ja Jesús wyinaty tø tñadya'aky.

¹¹ Ñigajpx idø'øn ja Jesús ja', yide'en ja wyaãñ:

—Põni põn ja ñidø'øxy tñajtstutp jøts jadu'uk tmøøt'amajtskigyojmi, ja jawyeen ñidø'øxy idø'øn ja wyinaty kya'ødyumpy jøts ja pyøkyuñ;

¹² jøts ku ja tø'øxyøjk tñajtstu'uty ja ñiyaa'y, jøts ja tmøøt'amajtskimi ja wenk yaa'dyøjk, pøkyump idø'øn ja nayide'en.

Ku ja Jesús tkunuu'kxy ja mutskuna'jk

¹³ Xjats ja jaa'y y'una'jku'nk tyikmendøø, ja' ja tyuknimendøø jøts ja Jesús ja tkønixajt, jøts ja mõjaa'y jade'en yja'attøø jam møøt ja mutskuna'jk; winets ja pyabøjkpitøjk ja ojts møk'ampy wyingugajpxiyidi.

¹⁴ Xjats ku ja Jesús ja jade'en ojts t'ixy ja pyabøjkpitøjk, winets ja yjanch'ambijky jøts ja wyaãñ:

—Majtstu't yø una'jk, wan øts yø xnimendi, kidi xnøjmidi kuts yø xkanime'endit, kumi tum jade'embj jaa'y nøjxk nitanaajyip ja Dios kyutujk.

¹⁵ Janch øts idø'øn nwa'ãñ, põni põn tkagupøjkp ja Dios kyutujk midi ja tyanitanaapy ja yjaa'y, niwindem xøøw ja jaa'y ja nøjxk tkadatøki jadigojk põni ku ja wyinaty jade'en tø tkagupiky ejxim mutsku'nk yikupikyin.

¹⁶ Winets ja tsa'anji'jky ja mutskuna'jk jøts ja ojts tkunuu'kxy, ojts ja kyø' ja ttanixajkixy.

Ja kumeeñ jaa'y

¹⁷ Xjats ku ja yjaakwidijty, winets ja jaa'y ja tu'uk putyi ñimejnøø jøts ja wyinguxanaajyi, yide'en ja ñimaajyøø:

—Mets øyjaa'y yik'ixpøjkpi, ¿ti ø ndu'ump jøts øts n'anmija'win tpaatt ja nitso'ok'ajtin xemikøjxp?

¹⁸ Xjats ja Jesús wyaañ:

—¿Ti jade'en myikwajnip ku øts jade'en xnøjmi jøts ku øts janchtyimy'øyjaa'y? Ka'ap pøn y'øyjaa'yi, tu'ugyi Dios y'øyi.

¹⁹ Mnija'wipxi dø'øn ja Dios kyutujk midi nømp: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwindaay'aty; windsø'øgi mdeety mdaak.”

²⁰ Xjats ja jaa'y y'adsøøy jøts ja wyaañ:

—Windsøn, jaayip øts yø tuki'iyi nbadundøjkini ku nmutsk'aty.

²¹ Winets ja Jesús twin'ejxji'jky ja jaa'y amyujy tsaachuyuj, jøts ja tnimaay:

—Jap jadu'uk midi mjaakabadumpy: nøjx, tuki'iyi x'atsto'okixy ti jaty jam mmøøt'ajtpy, jøts ja ayooobi jaa'y xabudøkit, winets ja Dios mjotkujk'ajtin mmo'o'ojyit jap tsajpøtpy; nøjx x'atstuñ midi ndlijpy, winets ø xpadosont.

²² Xjats ku ja jaa'y jade'en tmadøøy, winets ja nugo tkumaa'yiyi'ñ tkudajyiyi'ñ, janch ñiyjotmay'oo'kpin ojts ñøjxni, kumi janch kumeeñ jaa'y idø'øn ja wyinaty.

²³ Xjats ja Jesús twin'ejxjø'kijxy ja jaa'y pøn ja jam wyinaty nidanaajyip, winets pyabøjkpitøjk ja tnimaay:

—iøy yjanchepi sudso ja kumeeñ jaa'y tkupøjk ja Dios kyutujk midi yjaa'y ja tyanitanaapy!

²⁴ Xjats ja pyabøjkpitøjk jadi'iñi myondi tyukti ku ja Jesús jade'en wya'añ; winets ja Jesús wyaañ jadigojk:

—U'nk una'jkti, ijanch tyimchep sudso ja kumeeñ jaa'y ttatøkidit ja Dios kyutujk, kumi myeeñ ja amuum yikmøjtøjkidip!

²⁵ Ne'egi tsojk ñaxt tu'uk ja møj jiyujk jap xuu'ñ jutjøtpy, jøts nigidi tu'uk ja kumeeñ jaa'y tyøkit jade'en ma Dios kyutujk ttanitani ja yjaa'y.

²⁶ Xjats ku ja jade'en tjaaktyimyadoodøø ku ja Jesús wya'añ, winet ja tyimñigyumaap yjajttøø, jøts ja xem yam ñawyajnidøø:

—¿Jøts pønims idø'øn nitso'ok'atp?

²⁷ Xjats ja Jesús y'ejxji'jky, jøts ja wyaañ:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint; ti Dios tkatsepjawi.

²⁸ Winets ja Pedro kyajpxøjkijy'ñ jøts ja wyaañ:

—Tø øø tuki'iyi nmajtstutkixy ja nbikta'aky, jøts ixyam øøts idø'øn jade'en nwidity mets møøt.

²⁹ Xjats ja Jesús y'adsøøy:

—Janch meets idø'øn nnøjmi, pøni pøn tmajtstuttip tyøjk, pøn tmajtstuttip y'ajch y'uch, jøts chø', ja tyeety ja tyaak, uk ja y'u'nk ñidø'øxy tmajtstututy møøt ja naajx ja kam, pøni pøn jade'en tmajtstutp ja pyikta'aky øts køjxp, ja øgyajpxkøjx ja ømyadya'akyøjxp,

³⁰ pyaap ja nøjx ja tøj may'ampy, may'ampy ja nøjx tpaaty y'uch y'ajch, ja tyeety ja tyaak, ja ñaajx ja kyam, øy ja tjaku'ayo'ombaaði øts køjxp; pøni myidanaapy idø'øn ku sa yiktu'unt, winets n'anmija'win ñøjxnt ma Dios.

³¹ Jøts may ja jaa'y Dios nøjx yik'amutskiyidi, pøn nugo namyøjpiktak'ejtp; ja' ne'egi ja Dios kajxa'aky yikpidsøømp, pøn yik'ayo'om'ejtp.

Ku ja Jesús tnigajpxy jadigojk jøts ku ja y'ookt

³² Jam idø'øn ja wyinaty pyatti ma jam ja tuu' pyety midi nøjxpx Jerusalem, ja Jesús wyinaty jawween yø'øpy jøts ja pyabøjkpitøjk ix'oojk yø'ødyi. Xjats ja pyabøjkpitøjk ja ñigyumaap tjawidi ku ja Jesús jade'en ñijky, jøts janch tsø'jkidip ja'. Winets Jesús ja yjiwa'widøø nimakmajtsk, jøts ja ojts tyukmadoowinibøjkidi jadigojk sa jaty ja wyinaty yjatwa'añ kyubatwa'lgxañ.

³³ Yide'en ja ñimaajyidøø:

—M'ejxtip ku ixyam nbejtyindi jøts nnijkxyindi jam Jerusalem ma øts jaa'y xkøyakt, pøn møj kudanaabyi'ajtpy ja naaxwi'ñit jaa'y, jøts øts ja israelit jaa'y tyeetywindsøn jam xmatst jøts ja kajpxwejpitøjk, ja'ats tyikutuktip jøts ø n'ookt, jam øts ja xkøyaktit ma ja wenk jaa'y yikutuktin møk'ampy.

³⁴ Yikxon ø nyiktaxe'ekt, yikwop yikoxp øts, xnidsujip øts ja jaa'y, jøts øts ja jaa'y xyik'ookt; jøts ku øts wyinaty jade'en tø n'øøky, kyidigøøk xøøw øts jadigojk nbidsø'ømt jap oo'kpi jutjøtpy.

Ku ja Jacobo møøt ja Juan t'amidoodøø ja may'ajtin

³⁵ Xjats ja Jacobo, møøt ja Juan pøn ja Zebedeo myajnk'ajttip, ja' ojts tnimendi ja Jesús jøts ja tnimaadyi:

—Windsøn, ja' øø ndsøjkpy jøts øø xuujnit ja may'ajt, ja' øø n'amidoowampy.

³⁶ Winets ja Jesús tyiktiiy yide'en:

—¿Ti dø'øn mdsøjktp, ti ø ndu'ump?

³⁷ Xjats ja wyandøø:

—Xmøøtsøøni øøts ku myikutukt, adsow aduuk øøts xyiktsøønit mgutujktaajkjøtpy, jøts øøts ja jaa'y xwindsø'øgit.

³⁸ Winets ja Jesús wyaañ:

—Ka'ap meets yø xnijawi pø ti mee m'amidøøpy. Ngupøkp øts ja ayo'on jøts pøni sã øts ja jaa'y x'uktu'unt. ¿Jøts meets, mgupøktip meets nayide'en ja ayo'on jøts pøni sã meets ja jaa'y m'uktunit?

³⁹ Xjats ja y'adsoodøø jøts ja wyandøø:

—Ngupøkp øøts, tiku øøts ndejint ngagupøkt.

Winets Jesús ja tnimaay:

—Janch jade'en, mjanchkupøkp meets nayide'en ja ayo'on midi ø ngupøkp, jøts mjanchkupøktip meets nayide'en pøni sã øøts ja jaa'y x'uktu'undit;

⁴⁰ tyimyo' ku meets xmøøtsinaawya'añ adsow aduuk, kidi øtsip meets ja nmo'op, ja Dios Teety ja tyakp jøts ja' ja myo'op pøni pøn ja jade'en tø ttamidsøky.

⁴¹ Xjats ku ja yjadu'ukpi pyabøjkpitøjk tmadoodøø jade'en, winets ja yjanch'ambøjktøø, jøts ja Jacobo yikmi'ambøjktøø møøt ja Juan.

⁴² Winets ja Jesús pyabøjkpitøjk tyajxmujky, jøts ja tnimaay:

—Yide'en'ampy ja jaa'y wyindsøn'aty pøn Dios kyajpxy tkabadundip, ja'ayi nugo ja jaa'y tyiktuñ, jøts ja tu'ugyi tja'abøjkøxni.

⁴³ Jøts ka' mee nøjkx jade'en mjatti. Wenk meets mja'ami, pøni pøn namyøjpikta'akwajnip, ja' idø'øn jade'en møjtkøip pøni pøn ja myigu'uk twindsø'jkip;

⁴⁴ jøts pøni pøn tsuj windsøn'atwamp, ja' idø'øn windsøndøkip pøni pøn tuki'iyi ja jaa'y jade'en tpudøjkip.

⁴⁵ Ja'agøjpx ø nmiñ jøts ja jaa'y nbudøkit øy ti tunk ndu'unt, kidi ja'ajip øts tø nmiñ jøts øts jaa'y øy ti tunk xuujnit, ja' ø tø nmiñ jøts øts økyjaa'y ngubajit ja pyøky ku n'ookt winets ja mayjaa'y yikpojkpimaa'kxt. Øts idø'øn ja' myøjkudanaabyi'ajtpy ja naxwii'ñit jaa'y.

Ku ja Jesús tyikwin'ejxwa'kxy ja winap jaa'y pøn txøøw'ajtp Bartimeo

⁴⁶ Xjats ja yja'ttøø Jericó. Jøts ku ja Jesús pyabøjkpitøjk jam wyinaty tmøøtpidsimy kajpjtøp møøt ja mayjaa'y, winets winap jaa'y ja tu'uk tpattøø pøn txøøw'ajtp Bartimeo, ja Timeo y'u'nk, jam ja wyinaty chøøni tuu'am jøts ja tigati tyikmuky.

⁴⁷ Xjats ku ja tnimadøøpy jøts ku ja Nazaretit jaa'y jam wyinaty ñaxy midi txøøw'ajtp Jesús, winets ja winap jaa'y møk'ampy kyajpxkejky jøts ja wyaañ:

—j'Windsøn'ajtim, rey David y'ap y'u'nk, ayo'ejxk øts!

⁴⁸ Xjats ja mayjaa'y ja møk'ampy wyingugajpxiyøø jøts ja y'amo'ont, ka'ap ja winap jaa'y y'amøñ, ne'egi ja tjaakyikjinajx'adi'ich, yide'en ja wyaañ:

—j'Mets myimajtsk'ap'ajtip ja møj windsøn David, ayo'ejxk øts!

⁴⁹ Xjats ja Jesús wya'k'øyiyi'ñ, jøts ja pyabøjkpitøjk ja tnøjmi:

—Nøjkx x'atswawdi.

Winets ja winap jaa'y y'atsyikwaay, yide'en ja t'atsnimaadyøø:

—Tsojk, pidø'øk, ixam idø'øn myikwaadsøy.

⁵⁰ Xjats ja jatyi tñajtswøjyiyi'ñ ja yukwop, wo'onjø'kp inet ja adsu'jky, jøts ja tninijkxy ja Jesús.

⁵¹ Winets Jesús ja yiktøøjøø:

—¿Ti mdsøjkpy, sã me ndu'unt?

Xjats ja winap jaa'y y'adsøøpy jøts ja wyaañ:

—Windsøn, ja win'ejxwamp øts.

⁵² Winets ja Jesús ja tnimaay:

—Nøjkxni; tø me mdsokni kumi tø me xjanchjawi.

Xjats ja winap jaa'y jatyi wyin'ejxwa'kxy, jøts ja tpaniijkxy ja Jesús jam tuu'am.

11

Ku ja Jesús kyajtpøjkxyi'ñ Jerusalén

¹ Xjats ku ja jam wyinaty yja'atwanidi Jerusalén, winets ja tyandøø jam Betfagé midi ja kajp Betania wyinaty møøt ñamyiwingon'aty, ja kajp midi jam wyinaty tãndip kojpk ix'am midi txøøw'ajtp Olivos, jamts ja Jesús pyabøjkpitøjk namaajtsk tkajxtsøø'ñ,

² jøts ja tnimaay:

—Nøjxkti ixem mā yø kajpu'nk wingon, jøts ku net jam mja'attit, jamts inet buuru'nk tu'uk kuwiiñ xpaattit midit tsotsnim, midit ka'anim pøn ttatsøøni. Nøjxk x'atmigajidi jøts xwejtsme'endit.

³ Jøts ku pøn myiktøwidit tiku jade'en m'adø'øtsti, jade'en xnøjmidit jøts ku t'anuu'kxwā'āñ nwindson'ajtim, jøts ku ja jaty: tyikwimbejtkojmit.

⁴ Xjats ja pyabøjkpitøjk ñøjxkti, jøts ja buuru'nk ja ojts tjanchpaatti kuwiiñ jam tøk'agø'øm, jam ja tpaatti tuu'am jøts ja tmigajidøø.

⁵ Winets ja jaa'y winaagin tyiktøødøø pøn jam wyinaty, yide'en ja ojts ñii'mxyidi:

—¿Ti mdundip? ¿Tigøjxp ku yø buur xmigajidi?

⁶ Xjats ja pyabøjkpitøjk y'adsodøø jade'en sa Jesús ja wyinaty tø ñii'mxyidi; winets ja ojts yikmajtsu'utti jøts ja jam choo'ndi.

⁷ Xjats ja jade'en tyiktso'ondøø ja buur, jøts Jesús ja ojts ttaninøjxkti; winets ja wyet ja ttajiba'andøø ja buur, jøts Jesús ja ttawaa'tspejty ja jiyujk.

⁸ May jaa'y ja wyet ojts tya'apti jam tuu'am, jøts may ujts'aay ja ojts ttu'kxti jøts ja jam nayide'en tptaktøø, jøts ja Jesús jade'en tpaatsowa'andi ejxim möj windsønin.

⁹ Xjats ja niduki'iyi møk'ampy kyajpxkaktøø, jøts ja niduknax wyandøø:

—¡Dios Teety tsajpjotpit, kunuu'kx yø windsøn pøn me tø xkexy!

¹⁰ ¡Kunuu'kx yø windsøn midit mgutujk mimejniyip, wan ja tyeety'ap David tyikmøjtaajki ja kyutujk jadigojk! ¡Kuuyi ja Dios Teety jadu'uk yjaak'øyi!

¹¹ Xjats ja Jesús jade'en tyøjkiiy'ñi Jerusalén, jade'en ja yja'ljty jam tsaptøjkjotp. Jøts ja ojts t'ejxkixy tuki'iyi ti jaty jam wyinaty ejtp; jøts ku ja ojts jade'en t'uk'ejxkixy, winets ja ñøjxkni jam Betania møøt nimakmajtsk pyabøjkpitøjk, ja'agøjxp ja ojts ñøjxknidi ku ja et wyinaty tø chuu'ñi.

Ku ja Jesús t'ayo'onmigajpxy ja iigi tsa'amguipy midit ja tyøøm ka'ejtp

¹² Xjats ku ja Jesús kymjabom choo'ndøø Betania, winet yuu ja pyaajtøø.

¹³ Jøts ja jagam t'ejxpaajty tu'uk ja iigi kipy midit jam wyinaty janch'aamyøøt; xjats ja ojts t'ninijxxy jøts ja t'ats'ejxwā'āñ pøni jam idø'øn ja tyøøm. Jøts ku ja ojts t'ixy, ni tu'ugin ja tyøøm ja tkapaajti, nugo ja wyinaty janch'aay ja ñaxy, kumi ka'anim ja tiempi wyinaty tpaajty ku ja iigi tyøømi.

¹⁴ Winets ja Jesús tmigajpxy ja iigi kipy, yide'en ja tnimaay:

—¡Nijuuni mga'uktøømiñit!

Ku ja Jesús jade'en wyaañ, myadowdi ja pyabøjkpitøjk ja'adi.

Ku ja Jesús twojpidso'mguixy ja too'kpitøjk jam tsaptøjkjotp

¹⁵ Jawaani y'ijty, xjats ja yja'ttøø jam Jerusalén. Jøts ku ja Jesús tyøjkiiy'ñi tsaptøjkjotp, winet ja t'ixwojpidso'mgijxy ja jaa'y pøn jap wyinaty too'kpit yajktip, midit jam wyinaty juudyip kajpxtip, tuki'iyi ja t'ixkajpxidso'mgijxy. Nayi yikpidsoøm ja jaa'y ja' pøn jam wyinaty meeñ tkugondip, tuki'iyi myesi ja yiktejsapwajkjøxtøø, jøts nayide'en ja pak too'kpi chinaabyajt yiktejimbejtjøxtøø;

¹⁶ jøts ja Jesús ja jaa'y tka'uktuk'anajxni ja tsaptøjk ku ja jam tigati tjatsømnaxwā'andi.

¹⁷ Yide'en ja Jesús tnimaay ja jaa'y ku ja yik'ixpijky:

—Yide'en jap nøyijxpy wyā'āñ: “Ja' øts ndøjk wyā'ant jøts naxwii'ñit jaa'y jap t'ajot'attit ja Dios Teety”; jøts ka'ap meets ja jade'en ti xyiktuñ, maa'tstaajk meets ja' tø xyikwani.

¹⁸ Xjats ku ja jade'en tmadoodøø ja israelit jaa'y tyeetywindsøn møøt ja kajpxwejpitøjk, winets ja t'ixaadyøjkidøø ja taay jøts ja ttuku'oogiwyā'andi, cho'lkidip idø'øn jaa ku ja yjaa'y yikpøjkøxniyidit, paty ja jade'en tnidaayiwya'andi kumi tummyija'winiyip ja mayjaa'y ja wyinaty ku ja janchnigyumaap yik'ixpiky.

¹⁹ Xjats ku ja et chuu'ñaa kyoodsiñaa, winets ja Jesús tmøøtsoo'naa ja pyabøjkpitøjk jam möj kajpjotp, jøts ja jam ñøjxkti mā ja chøøni.

Ku ja iigi tsa'amguipy tyiijch

²⁰ Xjats ku kymjabom'ajty, winets ja jam jøpyi ñajxtøø mā ja iigi kipy jam wyinaty tyani, jøts ja ojts t'ejxti ku ja wyinaty tø tyøjtsø'kni y'aatsjotpy.

²¹ Winets ja Pedro ja tja'myejch, jøts ja tnimaay ja Jesús:

—Windsøn, ejx ja iigi kipy tø tyøøtsni midit ojts x'ayo'onmigajpxy.

²² Winets ja Jesús y'adsøø y jøts ja wyaañ:

—Janchjawidi Dios møk'ampy.

²³ Janch meets idø'øn nnøjmi, pøni pøn tnimaapy ya'at kojpk: “Nøjxk mejjotp, jamts mdøkit”, pøni ku amumjoojt jade'en mwinmay ku ka'ap mmay mdajy, jøts ku kø'øm xjanchjawi ja m'ayuujk pøni sa wyinaty tø mwā'āñ, jatp idø'øn ja jade'en pøni ku wyinaty jade'en ja janchja'win xmøøt'aty.

²⁴ Paty mee nnøjmi pøni ti jaty m'amidoodip ja Dios, pøni ti mgu'amidoowidip jøts ku xjöp'ejxtit jade'en, jatpts ja jade'en.

²⁵ Jøts ku mdios'ajot'attit, pøni jam ja mmidsepti, maa'kxukti, jøts Dios Teety nayide'en mbojkipmaa'kxidit pøn jap tsajpjøtpty.

²⁶ Pøni ku ka'ap xmaa'kxukti ja mmigu'uk, nayide'en meets ja Dios Teety mgapojkpmāa'kxat pøn jap tsajpjøtpty.

Ja Jesús myøk'ajtin

²⁷ Xjats ja jade'en jadigojk ñøjktøø jam Jerusalén. Jøts ku ja Jesús jap wyinaty wyidity jap tsaptøjkjøtpty, winets ja jap ojts ñimiñi ja teetywindsøn, ja kajpxwejpitøjk, jøts ja møjaa'dyøjkti pøn ja kutujk jam wyinaty t'adsinaadyip,

²⁸ ja'ats ja ojts yiktiyi, yide'en ja wyandøø:

—ǃPøn jade'en tø mdanigutujk'aty ku jade'en m'adi'ich ya tsaptøjkjøtpty? ǃPøn mets jade'en mgutujkmø'øyi?

²⁹ Xjats ja Jesús y'adsøø y jøts ja wyaañ:

—Nayide'en mee nyiktøøwami; pøni x'adsoowimbejtíp øts inet, winets inet ndukmado'odit pøn øts yø jade'en tø xanigutujk'aty ku øts jade'en n'adi'ich.

³⁰ Ku ja Juan Bautista ojts yiknøbety, ǃpøn ja ojts tyanigutujk'aty ku ja jade'en y'adiijch? ǃSā mee m'ukwā'añ, Dios ja ojts tyanigutujk'aty jøts ja jade'en y'adø'øst? Adsoojimbejtík øts.

³¹ Winets ja kø'ømyi ñagyajpxkaajkidøø, yide'en ja ñawya'añidi:

—ǃSā njanch'uknīmaa'yint? Ku net yø njanīmaa'yint: “Dios ja ojts kyutujkmø'øyi”, yide'en adøm inet yø x'adso'owint: “ǃJøts tigøjpx ku ka'ap xjanchjawi pøni jade'endam ja'?”

³² Jøts ja jaa'y inet xmi'ambøjkma'ant ku net njawa'ānma'ant jøts ku jaa'y ja ojts kyutu-jkmø'øyi.

Jade'en ja kø'øm ñawajnidøø, jøts kumi ñija'widip ja jaa'y wyinaty may ku ja Juan ja Dios kyugajpxy'aty, paty ja jade'en chø'jkidøø.

³³ Jøts ja yide'en tnīmaadyi ja Jesús:

—Ka'ap øøts ja nnijawi.

Xjats ja Jesús tnīmaay ja jaa'y:

—Nayide'en meets ja ka'ap ndukmado'ot pøn øts jade'en xanigutujk'ajtp ku øts jade'en n'adi'ich.

12

Ku ja Jesús tmadyakpaajty ja ka'ødyumbi

¹ Winets ja Jesús tmigajpxøjkīyīñ ja jaa'y ejxpajtin madya'akyøjpx, yide'en ja wyaañ:

—Jaa dø'øñ jaa'y wyinaty tu'uk pøn ja uvi tsa'am ojts tteñ kyamjotp; jøts ja yixxon tnaageemy tnabijky, jøts ku ja jade'en t'uktuuñ winets ja tyik'øyiñiñ tu'uk ja uvi kumdaajk mā ja uvi tsa'am nøø ojts idø'øñ ja jade'en tyik'øyi, xjats ja tpojch tu'uk tøj janch køjpx jam kyamjotp. Kam ejx'etaajk idø'øñ ja yik'øyiñiñ, ojts idø'øñ ja jade'en tyik'øyigyixy.

Winets ja tamuky tkøyajknā ja kyam, tumbi ja ojts ttukmidañ, jøts ja ñøjkmni abiky et.

² Xjats ku ja tiempi tpaajty juuni cha'amy ja uvi tsa'am, winets ja windsøn tkejxy tu'uk ja tyumbi jam mā ja jaa'y ja tsa'amgam jam wyinaty tø tmidāndi jøts ja jam t'atstuk'amidoowa'añ ja tsa'am kikujkp midi jam wyinaty ejtp kyamjotp.

³ Xjats ku ja tumbi jam yja'jty, winets ja jaty yikmajch jøts ja kam ejx'etpi ja ojts chiigyiyi, ka'ap ja ti yikmøø, jadi'iñi ja jam wyimbijty.

⁴ Winets ja kugam tkejxy jadu'uk tyumbi nay jam; ojts ja ñijxy jøts ja jam nayide'en yiktuuñ, yixxon ja jam ojts tyika'ach, ojts ja chaachi kyubajkixpy, janchiktsepmigajpx ja jam.

⁵ Xjats ku ja nay jadi'iñi wyimbijty, winets ja kugam tjaakejxy jadu'uk tyumbi pøn ja kam ejx'etpi ojts tyik'ookti. Janch namay ja tumbi tmøø'aty jøts ja xyumikexy tu'uk jaty ja tsa'am tsømbi; ja'ats jam ojts ja kam ejx'etpi kya'ødyuñidi, pømbi yikwojy yikojx, jøts pømbi winaagin oo'ktøø.

⁶ Jamts ja kugam myajnkun'k wyinaty tø tmøøtañ, tu'ugyi ja t'u'nk'aty, ja'ats ja jam kø'øm myøøtañ, ja'ayi ja yjanchøjkpy; xjats ja ojts ix'oojk tkexñim, yide'en ja wyaañ: “Yikwindsø'øgip yø kumi øts n'u'nk yø.”

⁷ Jøts ja tumbitøjk pøn jam wyinaty t'ejx'ejtpp ja tsa'amgam, ka'ap ja jade'en wyandøø jøts ja twindsø'øgidit, t'ixwibejpidsojmidøø ne'egi jinaxy ja ñawya'añidøø: “Ya'at inet ja' pøn kugam'atp; wan tyikpa'ø'jkyimp jøts adøm yø tsa'amgam nja'bøjkna'ant.”

⁸ Xjats ja jade'en tmajtstøø, jøts ja tyik'oo'ktøø, ojts ja ñine'kx ja t'ixwibejpidsojmidøø jam tsa'amgamjotp.

⁹ Jòts, çiti tyu'ump ja kugam kò'òm ku ja y'u'nk jade'en y'ò'jky? Ku wani ja kò'òm tnime'ent, winets ja tyikudigògyòxt ja kam ejx'etpi, jòts ja abikyjaa'y ja t'ixa'att, ja'ats ja myo'op ja cha'amgam.

¹⁰ ÇKa'aním ja nõky xkajpxidi ma yide'en wya'añ?

Ja tsaa midi ja pojtspi kya'uk'a'ejxidøø,

Ja'ats ne'egi ixym tø y'ukyikpiktakni põch kyubajk jòts ja ttamajtsmujkixy ja põch.

¹¹ Ja Dios Teety idø'øn jade'en tø ttuñ, øy yø nigyumaap njaja'wandi.

Jade'en ja Dios kyajpxy wya'añ.

¹² Winet et ja israelit tyeetywindsøn tmajtswandøø ja Jesús, ja'agøjxp ku ja wyinaty tø myigajpxyidi jade'en. Jòts kumi chø'jikidip ja mayjaa'y ja wyinaty, paty ja ojts jadi'iñi tmajtsu'utti, jòts ja jade'en choo'nidøø.

Ku yikajpxy'aty ja kugubajt

¹³ Waani y'ijty, xjats ja Jesús winaagin yiktaniguejxy ja fariseotøjk møøt ja Herodes myigu'uk, jòts ja nugo yjot'ejxwã'añi, ja' ja nugo chojktip jòts ja kyajpxigø'øty, ja'ats ja yiktani'øønip.

¹⁴ Ojts idø'øn ja Jesús jam yiknimiñ, jòts ja yiknimaay:

—Windsøn, nnija'wip øøts jòts ku mets tiy janch mgajpxy, ku me ka'ap xmøjpickta'aky põni sa jaty ja jaa'y wya'andi, jòts kumi ka'ap mets põn x'ejxkapy xka'ejxkapy, mdum'ejxkajpxixy mets ja jaa'y, jòts tu'ugyi mets tiy janch xuk'ixpiky ja jaa'y sudso nnøjxin ma Dios, paty øø nyiktøwã'añ: çØy ku øøts ja windsøn César nmiyakt nmigubatt, uk ka'ap? ÇNmo'op øøts ja meeñ, uk ka'ap?

¹⁵ Xjats kumi ñija'wip ja Jesús wyinaty jòts ku nugo yjot'ejxwã'añidi, winets ja tnimaay:

—ÇTiku ø xjot'ejxti? Yakti tu'uk meeñ, wan ø t'uk'ijxy.

¹⁶ Xjats ja ojts tmo'odi, xjats ku Jesús ja twin'ixy winets ja ojts tyiktij, jòts ja wyaañ:

—ÇPøn ya'at ja wyeen y'aaw, jòts pøn ya'at ja xyøw ixya kyøjxa'ay?

Xjats ja y'adsøødøø jòts ja wyandøø:

—César yø'yja'.

¹⁷ Winets Jesús ja tnimaay:

—Mo'odi ja César ja yja' põni midi ja yja'ajtpy, jòts ja Dios xmo'odit põni midi ja yja'ajtpy.

Jòts ku ja Jesús jade'en wyaañ, winets jaa'y ja ñigyumaap tja'widøø ku ja jade'en y'adsøøy.

Ku ja jaa'y tyiktøwãdi põni janch idø'øn ja' ku oo'kpi jadigojk jyujkpyøktit

¹⁸ Xjats ja Jesús ja saduceotøjk ojts ñimiñiyi. Ja' ñimejniyi pøn nømdip jòts ku oo'kpi nijuuni kya'ukpidsømnidit jap oo'kpi jutjøtpy; ja'ats ja ojts yiktiyi jòts ja ojts ñii'mxyi:

¹⁹ —Windsøn, yide'en ja Moisés ojts tjaadyañ tu'uk ja kutujk põni põnik tku'oo'kp ja ñidø'øxy, jòts ku ja y'u'nk ja ni tu'uk tkayiktañ, winets ja ku'økytø'øxy tmøø'amajtskit ja ñiyaal'y oo'kpi myigu'uk midi nadyu'uk jòts ja jade'en yika'axiyit.

²⁰ Jòts ja dø'øn ja jaa'y wyinaty niwixujkti, jade'en ja tyukjaa'y'atti. Xjats ja myøjpi jawyeen y'amajtskiyi'ñ, jòts ja jatyi tku'ø'jky ja ñidø'øxy, ka'aním ja y'u'nk ja wyinaty tpaatinim.

²¹ Ku dø'øn ja jade'en y'ò'jky, winets ja mutskpi midi ja oo'kpi wyinaty myijidsimy'ajtpy, ja' ojts tmøø'amajtski ja ku'økytø'øxy, jòts ja nayide'en y'oo'knimøø, ni tu'ugin ja y'u'nk ja tkayiktaañ, nayide'en ja myidigøøkpi yaa'y yjajty.

²² Niduki'iyi ja tø'øxy ja tyiknajxkixxy ja yaa'dyøjk niwixujk yaa'y, jòts nipøn ja y'u'nk ja ojts kyadukpaadyi, nipøn ja y'u'nk tkayiktaañ. Xjats ja tø'øxyøjk nayide'en y'oo'knimøø.

²³ Jòts ku ja jadigojk pyidsømdit jap oo'kpi jutjøtpy, çpømbi ja tø'øxy nøjx jadigojk tñidø'øxy'aty, kumi tø ja niduki'iyi t'atsnidø'øxy'ajtkøxti?

²⁴ Xjats ja Jesús y'adsøøy jòts ja wyaañ:

—Ka' mee m'øwynmay, ja'agøjxp ku xkanijawidi ja Dios kyajpxy, ku xkanijawidi ja Dios myøk'ajtin.

²⁵ Ku dø'øn ja oo'kpi nøjx pyidsømdi jadigojk jap oo'kpi jutjøtpy, nipøn nøjx kya'uk'amajtskiñi, nipøn nøjx kya'uktø'øxmyiø'øñi, nipøn y'u'nk tka'ukyik'amajtskiñit. Jade'en ja tsinaa'yin ja nøjx tyiknaxti ejxim ankilis pøn tsinaadyip jap tsajjøtpy.

²⁶ ÇKa'ap mees xñijawi, jòts ku ja Dios kyajpxy wya'añ ku ja oo'kpi pyidsøømt jadigojk jap oo'kpi jutjøtpy? ÇKa'aním ja nõky x'ixpøkti midi ja Moisés ojts tja'ay, ma ja tnigajpxy sudso Dios ja ojts myigajpxy jam ujts aayjotp? Ku ja ojts ñii'mxyi: “Tum øts xdios'ajttip ja Abraham, ja Isaac jòts ja Jacob.”

²⁷ Kidi oo'kpipts ja ñidios'ajtpy, pø ja'axi ja ñidios'ajtpy jòts ja tyikujky'att øy pøn. Jòts mga'øwynmaapy mees idø'øn ku xkajanchjawidi.

Ja møj kutujk midi ja Dios ñi'ane'empy

²⁸ Xjats winet yja'jty tu'uk ja kajpxwejpitøjk ja myigu'uk midi wyinaty tø tmadø y ku ja Jesús jam jade'en tminagyajpxyi ja saduceotøjk, jøts kumi ja wyinaty tñjawi ku ja Jesús wyinaty ø y t'adsø y, winets ja tyiktiy, yide'en ja tñimaay:

—¿Midi'ibi ja Dios ja kyutujk jawaani møj jøts nmimado'owint?

²⁹ Xjats ja Jesús y'adsø y jøts ja wyaañ:

—Ja' Dios jawaani møj kyutujk'ajtpy midi wamp yide'en: “Israelit jaa'y, ukmadowdi meets, tu'ugyi ja Dios pøn adøm ndios'ajtindip.

³⁰ Jøts tsokti ja jawaani ejxim niti jade'en xkatsokti, amumjoojt ja xwindsø'øgidit, ja' tu'ugyi mjotmay'attip, ja' tu'ugyi møk n'ajot'attip.” Ya'at idø'øn øgyutujk'ajtp.

³¹ Jøts jap jadu'uk midi ññaayjade'en møj, yide'en ja wyaañ: “Tsok mmigu'uktøjk, windsø'øgi mmigu'uktøjk, jade'en xtsokt jøts jade'en xwindsø'øgit sa kø'øm mnachøkyi, jøts sa kø'øm mnawyindsø'øgiyi.” Ka'ap jadu'uk kutujk te midi jawaani møj sa ya'adindi.

³² Xjats ja kajpxwejpitøjk wyaañ:

—Windsøn, ka' me mgajpxigø y. Tiy janch me mwa'añ jøts ku Dios ja tu'ugyi, ku ka'ap jadu'uk pøn.

³³ Janch me mwa'añ jøts ku Dios amumjoojt ndsojkint, jøts ku ja amumjoojt nwindsø'jkint, jøts ku ja tu'ugyi møk n'ajot'ajint, tymdy'igyaipxy jade'en ku nmigu'uk ndsojkint jade'en sa kø'øm nnachøkyi'imp. Ne'egi tyimy'ø yø jade'en ne'egi Dios chøjkpy, jøts ka'ap jadine'en yiktsøky ku jiyujk ku ja ti ndawindsø'jk'int, ku ja ti ndamiyojxin jam altajrkøjxp.

³⁴ Xjats ku ja Jesús ojts t'ixy ja jaa'y ku ja Dios kyajpxy twinmadooji, ku ja yikxon ø y tsuj y'adsoojyøø, winets ja tñimaay:

—Tyimyjawaani kya'ity jøts mets ja Dios kyutujk xkupøjk'it midi yjaa'y ja tyanitanaapy. Jøts jade'en ka'ap pøn y'uknay'a'ejxiniyi jøts tyiktø'adø'tst ø y tyii'ji.

¿Janch idø'øn ku ja David t'ap'aty ja Cristo?

³⁵ Jam ja Jesús wyinaty yik'ixpiky tsaptøjkjotp, jamts ja yide'en wyaañ:

—¿Sa dø'øn ja kajpxwejpitøjk wya'andi? ¿Pønik idø'øn tity pøn ja Dios Teety ya pyiktaajk naxwiñ jøts wyindsøn'att? ¿Nugo ja møj windsøn David y'ap ja tity, kidi?

³⁶ Janch jade'en wya'andi, ka'ap idø'øn ja kya'pxyi kumi kø'øm ja David wyaañ ku Espiritu Santo ja ojts y'agajpxyi, winets ja Dios kyajpxy ja ojts tjaajyi ma wyaañ yide'en:

Yide'en ja Dios Teety tñimaay ja nwindsøn'ajtim:

“Exa'ak jøts ø xpudsø'øn n'aga'ñ'ampy, jøts øts yø mmidsep nmimajada'køxt.”

³⁷ ¿Pøni yø' wyindsøn'ajtim, sudso yø ndejint nugo t'ap'att?

Jade'en ja Jesús wyaañ. Janch namay ja jaa'y jam wyinaty, jøts janch jotkujk ja jam wyinaty pyatmadøyi.

Ku ja Jesús ttamigajpxy sa y'adø'tsti ja jaa'y midi yik'ixpøjk'it jam tsaptøjkjotp

³⁸ Yide'en ja Jesús wyaañ ku ja jam wyinaty yik'ixpiky:

—Øyim mnay'ejx'etidit, ejxim meets kajpxwejpitøjkin, mnay'ejxniiyidi pøn ja wyet yøñjawi tpajidø'jtipp ku yø'ødyi, pøn muum tuu'ajy nagyajpxpoo'kxi ttsojktipp windsø'øgi winjawi,

³⁹ pøn ja øybi tsinaabyajt ttsojktipp jap tsaptøjkjotpy, pøn ja tsinaabyajt twi'ejxtipp ku kyaawya'andi,

⁴⁰ jøts ja' ja ku'økytø'øxyøjk pyøjkidip ja myeeñ, jøts ja jaty tku'ø'ndi, ñadyiyyi ja ø y Dios'ajot'atti. Janch møk ja nøjx tku'ayowidi ku jade'en y'adø'tsti.

Ku ja ku'økytø'øxy tpiktaajky ja lyimunsi

⁴¹ Tuk'ojk ja Jesús y'ixaajky jap møj tsaptøjkjotpy, jap ja wyinaty chøøni jap kajuun windujpy ma ja jaa'y ja myeeñ tpikta'akti midi ja yojxtip, jap ja t'a'ejxuky ja jaa'y sa jaty jap pøn myeeñ wyinaty tpikta'akti, namay idø'øn ja'adi.

⁴² Winets yja'jty tu'uk ja ku'økytø'øxy pøn wyinaty janch ayoop, pøn wyinaty niti ka'ejtxip. Ja'ats pyujxmeeñu'nk majtsk tkugo'oniyi'ñ jap meeñ abøjk'i'ñjotpy, tuki'iyi dø'øn ja tpiktaajky midi ja wyinaty myøøt'ajtpy.

⁴³ Winets ja Jesús tyaajxyi'ñ ja pyabøjkpitøjk, jøts ja tñimaay:

—Janch meets idø'øn nnøjmi ku yø ku'økytø'øxy janch ne'egi jawi ndejint ja myeeñ tø tyøxy. Nipøn jaa'y ja myeeñ jade'en tø tkayøxy pøn jaty ja myeeñ tø tja'agonidi jap kajuunjotpy;

⁴⁴ kumi ja myeeñ windank yø jap nugo tø tpikta'akti; jøts yø tø'øxyøjk ø y idø'øn yø ayø y, ne'egi tø yø tpikta'ixy ja ñidsinaajyk midi yø jam myøøt'ajtpy.

13

Ku ja Jesús tñigajpxy jøts ku ja tsaptøjk yjett

¹ Xjats ku ja Jesús pyidsiimy jam møj tsaptøjkjotp, winet ja pyabøjkpitøjk ja tu'uk ñimaajyøø:

—jWindsøn, ejxik mets, ti tsaá yø jade'en jøts ti tøjx yø jade'en!

² Xjats ja Jesús y'adsøoy jøts ja wyaañ:

—¿M'iixpy yø møj tøjx? Ni tu'ugin yø tsaá ya nøjx kyatañ nikiibyety. Me'endip ja jaa'y jøts ja nøjx tjaagøxtø tuki'iyi yø tøjx.

Ja ejxa'an midi yik'exp ku wynaty yiktiidyunwanidi ja naxwii'ñit jaa'y

³ Xjats ja jade'en ñøjxxtøø jam kojpkøjxp midi txøøw'ajtp Olivos, ja kojpk midi jam wynaty tsaptøjk awemp tamp. Jamts ja Jesús y'ixaajky, jøts pyabøjkpitøjk ja jam amaa'tsk yiktøøjyøø, yide'en ja Pedro wyandøø møøt ja Jacobo, møøt ja Juan, jøts møøt ja Andrés:

⁴ —Ja' øø ndsøjkpy jøts øøts xukmado'to windem idø'on yø tsaptøjk jade'en yjatt. ¿Ti tiy'ajtin øøts jawyeen n'exp jøts ku dø'on ja jade'en wynaty yjatwa'añ?

⁵ Xjats ja Jesús y'adsøoy jøts ja wyaañ:

—Øyim mnay'ejx'etidit, ejxim mee pøn mwini'øø'niyi.

⁶ Kumi may jaa'y nøjx myendi jøts øts ja x'adunaxtit, jøts ja ñøø'mdit: “Cristo øts”, mayjaa'y ja jade'en wyindaay'attip.

⁷ Jøts ku meets ja tsep øy ma xnimado'ot ku ja tsep wyingoni, kidi mdsø'ogidi kumi jatp idø'on ja jade'en, ka'ap ja ñaxt jøts ka'ap ja' tiidyu'unin xøøwi.

⁸ Kumi ja møj ja mutsk ja kajp nøjx cheptundi xem yam, windsøndøjk ñañibidø'ogidit pøn jaty yikutujktip ya naxwiiñ, maawyeen ja uix nøjx ñaxy, me'emp ja yuu, may'ampy ja jaa'y nøjx ja myigu'uk tmidsepøkti a'ø'y'ampy pøn ja nugo tyikma'attip. Jøts ku dø'on ja jade'en yjatt tso'ondakpnim idø'on ja ayo'on wynaty jade'en.

⁹ Jøts øyim mnay'ejx'etidit; kumi myikøyakp meets ma kudunktøjk yikutukti, jøts mee nøjx myiktsiiky myikwøpy jap tsaptøjkjotpy. Mwinguwa'agip mee nøjx ja møj windsøndøjk; øts meets jap xkunøjxip jøts ja windsøndøjk myikmadya'agidit, xjats meets idø'on ja nja' xnigubojkit.

¹⁰ Namga'anim ja tiidyu'unin xøøw tpaaty ku ja øgyajpxy ku ja ømyadya'aky øy magajp yikajpxwa'kxt.

¹¹ Jøts ku jade'en ja kudunk øy madsoo myiktawinguwawidit, kidi xkumayidi xkudajidi sudso x'adsojimbettit. Jade'en idø'on mwa'andit pøni sa Espiritu Santo winet myik'ayukpaadyidi; kidi meedsip kø'øm mgajpxp, ja Espiritu Santo meets m'agajpxiyip.

¹² May ja jaa'y ttukmiga'axwa'kxy ñagyøyakidit jøts y'ooktit, may ja u'nkteety ja y'unaj'jk nøjx tmidsepøkti jøts ja tkøyaktit, nayide'en ja unaj'jk nøjx tmidsepøkti ja tyeety ja tyaak kunim o'jkin ja ttukpaattit kø'øm.

¹³ Jøts mdumidsep'attip meets ja jaa'y ja agøjxp ku meets øts xjanchjawi; jøts pøni pøn ja ayo'on jade'en tmidanaapy kunim y'ookt, ja' idø'on nøjx nitso'ok'ajtp.

¹⁴ Jade'en ja Dios kyugajpxy Daniel tjaay tu'uk ja nøky ma ja øjts tñigajpxy midi ja jaa'y tyikma'atp, jøts ku meets ja jade'en x'ext ku ja ma tøyikpikt'a'aky ma ja kyapaat'aty —pøni pøn ya'at nøkyajpxy, wan tja'gyuki—, jøts pøni pøn jam Judea tsinaadyip wan tkaknøjkxti jam kojpkjotp.

¹⁵ Jøts pøni jam wynaty tøy tyøjkøjxp ja'abi xøøw, jøts ku ja wynakt ka'ap ja yjaaktyimy'atstøkit jap tøjxjotpy jøts ja tjaakyikpidsø'møt øy ti, me'egi tø'øp ja' ku ja jadi'iñi yjaaka'akt;

¹⁶ Jøts pøni pøn jam wynaty kyamjotp, ka'ap ja y'ukwimbejtñit jam tyøjk windum jøts ja wyet ja tjaak'atswetst.

¹⁷ ¿Ti yjanch'ayøøy ja tø'øxyøjk pøn wynaty jøtpyti, pøn jam wynaty myutsku'nk tmøøt'ajttip ja'abi xøøw!

¹⁸ Ajot'att amidowdi ja Dios jøts kidi yja'aty ja tiempi winet et ku ja et wynaty xyuxy, jøts kidi ja'abi xøøw mga'akti;

¹⁹ kumi ja dø'on nøjx ja møk ayo'on tyuñiyi midi ka'anim yik'ixy niyuuni wine'en ñaxy kujk ja tiempi jaayip ku Dios tyiktso'ondaajky yø naxwii'ñit, nika'ap nøjx jadu'uk ja ayo'on jade'en yik'ixy sa ja'ajin midi idø'on me'emp.

²⁰ Jøts ku Dios Teety ja jeexyip tøy tka'agajpxuky kon ja ayo'on, ti pøn xiy jade'en nitso'ok'atp; jøts ja agøjxp Dios Teety ja tøy tyikøñ ku ja ttsøky ja yjaay pøn ja tøy twiwich.

²¹ Pøni pøn mdukmadøjidip, pøni pøn mnimaajyidip: “Ejxti, ixya dø'on ja Cristo”, uk ku myiknøjmidit “Ejxti, ixem ja Cristo tyani”, kidi xmibøkti.

²² Ja' idø'on nøjx jade'en wandip pøn ñadyiyi jade'en sa Cristo sa ja Dios kyugajpxy, pøn ja miku' myøk'ajtin nøjx tyiktuujnidip jøts ja nayide'en ttu'unt sa Diosin, yjawan'øø'mbaatwa'amp ja nøjx pøn ø tøy nwiwich.

²³ Jøts nay'ejx'etidi meets, nayjöp'ejxidi jøts kidi mwindaay'atyidi ja miku'; patki'iyi meets yø yam ndukmadøy.

Sa mye'ent ja naxwii'ñit jaa'y myøjkudanaabyi

²⁴ 'Ku dø'øn ja tiempi ñaxt ma et ja ayo'on tyuniyit, winet ja xøøw y'ookt, winet ja po' y'ookt, jøts ja ka'ap y'uk'anidit,

²⁵ ka'agøjxp yø maqdsa' jam tsajpwerp, jøts naxp ja uxp jam tsajpwerp.

²⁶ Xjats t'ejxti ja naxwii'ñit jaa'y ja myøjkudanaabyi ku ja kyutujk tmime'ent møk'ajtingøjxp yoots agujkp.

²⁷ Winets øts ja n'ankilis ngajxw'a'kxt, ja'ats øts ja njaa'y xwaaumujkip pøn øts tø nwiwetsti øy maqdsø, yikwaaumuktup ja' øy ja wyinaty ma tyimyjatsøøni.

²⁸ 'Uk patmadojidik øts ja n'ixpøjkin: Ku ja iigi kipy y'awaj y'u'nk'aty jøts ku ja kujk xyimumbøjki, jade'en yiknijawi ja et jøts ku y'anda'akwani.

²⁹ Nayide'en idø'øn ja n'ukpiktaajkint sa ja ayo'on nøjx ñaxy; jøts ku ja jade'en x'ejxtit, jade'ents meets ja xnijawidit jøts ku øts wyinaty nmenwani.

³⁰ Janch meets idø'øn nnøjmi, jatp idø'øn ja jade'en namga'anim jaa'y wyinaty y'ookti.

³¹ Najxp yø naajx yø tsajp y'ity, jøts niwindem øts n'ayuujk kyanaxy.

³² 'Ka'ap ja et ja xøøw yiknijawi pøni juuni dø'øn ja jade'en yjatt, nipøn ja tkanijawi, ni ankilis ja tkanijawi, jøts ni Dios U'nk ja tkanijawi. Ja Dios Teety ja tu'ugyi tnija'wip.

³³ 'Jøts nayjöp'ejxidi meets ejtp, ejtp ja Dios x'ajot'attit kumi ka'ap meets ja xnijawi pøni juuni øts wyinaty nwinbejtkojmit.

³⁴ Jade'en idø'øn ja ndejint n'ukpiktaajkint ejxim ja jaa'y midi nøjx jagam widejtpi, jøts ku ja chøøñ y'uk'ane'empy ja tumbi ja', tu'uk jaty tyumbi ja t'uktunkmø'øy jøts y'ukpiktakpy tøj adinaabyi ja tu'uk, pøn t'ejx'etp ja tøj.

³⁵ Jøts ejtp idø'øn mjöp'ejxtit, kumi ka'ap meets ja xnijawi pøni juuni yja'att ja mwindsøn midi kudøjk'ajtp, jotmøn ja yja'aty ux, uk jotmøn ja yja'aty tsuu'm, jotmøn ja yja'aty ku tsapni'aaw y'ayajxnidi, uk jotmøn ja yja'aty jøpkooths;

³⁶ ka' ti nnija'win pøni juuni ja yja'att, kuts meets ja jotmøn mmaagubaa'ayit yam meets jap wyinaty mmaa'y.

³⁷ Midi mee ndukmadøpy, niduki'iyi øts idø'øn ja jaa'y jade'en nnøjmi jøts tjöp'ejx'ettit.

14

Ku ja Jesús yikajpxy'aty jøts ja yikmatst

¹ Ja majts xøøw wyinaty kya'ity jøts ja paski xøøw tpaatt ku ja jaa'y tkaydi ja tsapkaaky jadi'iñi midi ja levaduri tkamøø'ajtp. Winet et idø'øn ja teetywindsøn møøt ja kajpxwejpitøjk t'ixa'adi ja taay ja winmaa'ñ sudso ja tjadyimy'ukmatsttit ja Jesús awin'øøni'ampy, jøts ja tyik'ooktit.

² Xjats ja yide'en kø'øm ñawayjnidøø:

—Ka'ap ja jade'en y'ø'y'att ku ja nmajtsint xøjøjty, tsojk ja jaa'y jade'en xem yam pyidø'øktit jøts adøm ja sagasa xu'unindit.

Ku ja Jesús yiktagutajmji'tky ja pa'akxuu'kpi

³ Jam ja Jesús wyinaty ma ja kajp txøøw'aty Betania, jam ja wyinaty tyøk'ayø'øy Simón wyindum, ja jaa'y pøn wyinaty axøø'kpin puts; jam ja Jesús wyinaty twindsøøni ja mesi ku tø'øxyøjk tu'uk tnija'jty ja poop tsaadu'jts midi wyinaty tmøø'ajtp ja aceite midi janch pa'akxuu'kpi, jøts midi janch tsowi to'jkip. Ja'ats ja tø'øxyøjk ojts tkupu'udu'uty, jøts ja Jesús kyubajk ja ojts ttanitajmji.

⁴ Winets ja jaa'y y'ambøjktøø pøn jam wyinaty winaagindi, yide'en ja ojts ñawya'añidi:

—Tigøjxp ku yø pa'akxuu'kpi jade'en nugo tø wyindigø'y?

⁵ Tø yø jeexyip ne'legi yiktøøky tigøøk magø'pxy denarios, jøts ayoobi jaa'y ja jeexyip ja meen yiktabudøki.

Jøts ja tjanchmyi'ambøjktøø ja tø'øxyøjk.

⁶ Winets Jesús ja ojts ñii'mxyidi:

—Majtsu'utti; zti yø mdamigajpxtip? Øts yø jade'en tø x'ødyuñ.

⁷ Kumi ejtp meets ayoobi jaa'y xpaatt x'ext, jøts ødyundi meets ja' pøni juuni meets ja kø'øm xmay'atwa'añ; jøts kidi xjöp'ejxti jøts øts meets ejtp xpaatt x'ext.

⁸ Tø øts idø'øn yø tø'øxyøjk jade'en xuñ pøni sa øts idø'øn yø xamidsøkyin; tø øts ja pa'akxuu'kpi yø xanitemy kumi x'ookjöp'ejxnip øts idø'øn ja', paty idø'øn xyik'øø'y'iñi xyikpaajtiñi kumi wingonip øts ja n'o'jkin.

⁹ Janch meets idø'øn nnøjmi, ku øy maqdsø yikajpxw'a'kxt ja øgyajpxy ja ømyadya'aky ya naxwiiñ, nayide'en yø øy maqdsø yiknimadya'akt ku øts yø tø'øxyøjk jade'en tø xmay'aty, yikja'myatsp yø øy juuni ku yiknimadya'akt.

Ku ja Judas ñay'awajniyi jøts ja tkøyakt ja Jesús

¹⁰ Winets ja Judas Iscariote chøø'ñ pøn ja Jesús pyabøjkpitøjk wyinaty møøt ñimakmajtsk'aty, jøts ja ojts tniinjxxy ja teetywindsøn, ja'ats ja møøt tkajpxy'ajty jøts ku ja tkøyakt ja Jesús.

¹¹ Xjats ku ja jade'en tmadoodøø, winets ja jyanchxondaktøø, jøts ja Judas ja meeñ jaty: yiktami'awa'aniyi'ñ. Ja'agøjxpts ja Judas t'ixaay ja taa'y ja winmaa'ñ juuni et ja t'ukøyakt ja wyindsøn.

Ku ja nwindson'ajtm yjaak'a'ux'ajtni møøt ja pyabøjkpitøjk

¹² Xjats ku ja xøøw tpaajty midi ja israelit jaa'y yjanch'amaay'ajttip, ku chapkaaky ja jadi'iñi tkaydi midi levaduri tkamøøt'ajtp, ja'abi xøøw idø'on wyinaty tø tpaajty jøts ku ja xøøw midukxøøw tyuñi, ja' ja tyejtíp paski, ja'abi xøøw idø'on ja tyukni'o'jkidip ja borreegi maxu'unlk, paty ja pabøjkpitøjk winet et tyktøødøø ja Jesús jøts ja tñimaadyøø:

—¿Ma øøts ja paski a'ux nyik'awext jøts ni'amuki n'a'ux'ajttidit?

¹³ Xjats ja Jesús ja pyabøjkpitøjk namajtsk tkajxtsøø'ñ, yide'en ja t'uknimaay:

—Nøjkxti jam møj kajpjotp, jamts inet jaa'y tu'uk x'e'jxpaattit pøn jam wyinaty tsiy tyanigo'onip, ja'ats mbanøjkxtip,

¹⁴ jøts pøni ma ja yja'aty, japts ja kudøjk xnøjmidit: “Yide'en ja windsøn wya'añ: ¿Mak idø'on ja tøjkojot, mak idø'on ja pyabøjkpitøjk ja tmøøtka'aty tmøøt'uukt, mak idø'on paski a'ux ja tka'adyit?”

¹⁵ Winets meets inet ja myiktuk'ext tu'uk ja tøjkojot jap nipat tøjkiixpy midi jap a'ejxi abaadi ejtnip; japts meets ja jii'kxy xyik'øyidit midi njøø'kxindip.

¹⁶ Xjats ja pyabøjkpitøjk namajtsk ñøjktøø jøts ja ojts yja'atti jam møj kajpjotp, jamts ja jade'en tjanchpaattøø sa Jesús ja wyinaty tø tyukmadøyidi, jøts ja jam tyik'øyidøø ja paski a'ux, winets ja wyimbejtøø ma choo'ndøø.

¹⁷ Xjats ku ja et kyoodsiyi'ñ, winets ja Jesús ja pyabøjkpitøjk nimakmajtsk jam tmøøtja'jty.

¹⁸ Jøts ku ja twinguwa'atsidøø ja kyaabyajt, kuts ja jam wyinaty kyaañidi, winets ja Jesús ja pyabøjkpitøjk tñimaay:

—Janch meets idø'on nnøjmi jøts ku ja ixyam nidu'ugin nmøøtkay pøn øts inet amaa'tsk'ampy xkøyapk.

¹⁹ Xjats ja pyabøjkpitøjk yjanchjotmay'oo'kpøjktøø, jøts ja nidu'uk jaty tyiktøødøø:

—¿Wan ja ndejint y'øtsi?

Nayide'en jadu'uk wyamøø:

—¿Øts ndejint jade'en adø'øtsp?

²⁰ Winets ja Jesús y'adsøoy jøts ja wyaañ:

—Tu'ugyi ja' pøn øts idø'on jade'en xu'ump, jøts ka'ap ja yjagami, ixya adøm idø'on ja nmøøt'a'ux'ajtindi, nidu'ugin meets jade'en xunwa'añ.

²¹ Jade'ents idø'on yjatt ja naxwii'ñit jaa'y myøjkudanaabyi sam ja Dios kyajpxy wya'añin; jøts iti ja jaa'y yjanch'ayøoy pøn øts jade'en xkøyapk amaa'tsk! Tø ja jeexyip ne'egi tyiy ku jeexyip kyidyimgye'xy.

²² Ku dø'on ja jade'en ixam wyinaty kyaydi, winets ja Jesús tñixajiyi'ñ tu'uk ja tsapkaaky, jøts ja ttamøja'wiyi'ñ ja Dios Teety, xjats ku ja t'adujkpaiky, winets ja tmøoy ja pyabøjkpitøjk, yide'en ja wyaañ:

—Kaydi, ya'at øts idø'on ñamyayi nne'kx'ajtpy.

²³ Xjats ja nayide'en t'adam'ujch tu'uk ja uujk'i'ñ, jøts ku ttamøja'wiyi'ñ ja Dios Teety, winets ja ttuk'uk'abidsiimy ja pyabøjkpitøjk midi ja wyinaty tø t'adami jap uujk'i'ñjotpy, niduki'iyi ja t'uktamujktøø.

²⁴ Yide'en Jesús ja ojts ñi'mxyidi:

—Yø øts idø'on ñamyayi nni'jpy'ajtpy midi widsu'ump widaxp øts nnikøjxp øts ngubajkp ku nyikpikta'akt jam kruskøjxp. Ja'ats may jaa'y y'ajot'attip jøts ja ñitso'ok'attit. Jade'en'ampy idø'on ja Dios Teety tyik'adukwa'añ ja wyanda'aky sam idø'on ja ttami'awa'aniyi'ñ ja nitso'ok'ajtin.

²⁵ Janch meets idø'on nnøjmi, jøts ku ka'ap n'uk'uknit yø vino, jaanim øts yø nøjxx n'uuky jadigojk ku Dios kyutujk yja'att, ku kyutujk ja ttanitanit ja yjaa'y.

Ku ja Jesús køøm tñigajpxy jøts ku Pedro ja kyu'øøniyt

²⁶ Xjats ku ja t'øøgøjxtøø ja Dios kyajpxy, winets ja ñøjktøø jam kojpkøjxp midi txøøw'ajtp Olivos.

²⁷ Jøts ja Jesús pyabøjkpitøjk tñimaay:

—Niduki'iyi meets inet xatsøødyu'unt ixyamgoots; kumi yide'en Dios kyajpxy wya'añ: “Yikøyapk ja borreegi ejxpi jøts ja y'ookt, jøts ja borreegi jadi'iñi kyaakwa'kxndit.”

²⁸ Jøts ku ø nbidsøømt jadigojk jap oo'kpi jutjøtpy, winets ø nnøjkxjawyenit jam Galilea, jamts mee xpaatt.

²⁹ Xjats ja Pedro tnimaay ja Jesús:

—Øy mets mbabøjkpitøjk niduki'iyi; mjadatsø'ødyuñiyi, nijuuni me ngadatsø'ødyuñ.

³⁰ Winets Jesús ja ñimaa'yøø:

—Janch mets idø'øn nnøjmi jøts ku yamgoots inet mnø'ømt ku me ka'ap x'ijxy'aty, ka'anim tsapni'aaw wyinaty myajtsk'aya'axy ku mets inet tigøøk ojk mwā'ant jade'en jøts ku me ka'ap xnijawi.

³¹ Xjats ja Pedro møk'ampy tyimwyindani ja Jesús, yide'en ja tnimaay:

—Nja'øøky me møøt, nijuuni øts jade'en ngawa'ant.

Tum jade'en ja yjadu'ukpi pabøjkpitøjk wyandøø sam ja Pedro wyaañ.

Ku ja Jesús t'ajot'ajty ja Dios Teety jam Getsemani

³² Xjats ja yja'ttøø ma ja et txøøw'aty Getsemani, jamts ja Jesús pyabøjkpitøjk tnimaay:

—Ya tsøøniidi, wan ø t'ats'ajot'aty ja Dios Teety.

³³ Winets ja t'ukwaay ja Pedro, ja Jacobo, jøts ja Juan, jøts ja ojts tmøøtnijky, xjats ja Jesús yjantymchø'jkii'ñ, ka'ap ja y'ukwinmaa'nbyatni, ja agøjxp ku ja y'ayo'on wyingøñ.

³⁴ Jøts pyabøjkpitøjk ja tnimaay:

—Janch tyimyjotmay'oo'kp øts, øy øts yø yjawi jadi'iñi ngu'oogit. Awejxti ya ejxim mma'oo'knidi, wijy m'ettit.

³⁵ Xjats ja Jesús jawaani yjaaknajtsyø'øyyi'ñ, japts ja ojts ñagyuxendya'agiyi, jøts Dios Teety ja ojts t'amidøy jøts ja jade'en kidi tyimy'ayo'ombaaty sa dø'øn ja wyinaty yjatwā'añ ja'abi xøøw.

³⁶ Yide'en ja wyaañ ku dø'øn ja ojts dios'ajot'aty:

—Mets Teety, øyik jade'en xjanchkayikjatt, jøts øts kidi jadine'en ayo'on ndymbyaaty; øy idø'øn kyidyimyjade'eni sam ø ndymyatsøkyin, jade'en øts idø'øn ngupøkt pøni sa me xamidsøky.

³⁷ Ku ja jade'en wyaañ, xjats pyabøjkpitøjk ja tnimiñ, maadip ja jap wyinaty ku ja ojts tpaaty; winets ja tnimaay ja Pedro:

—Simón, ztø me ma'oo'kni? ¿Niwine'en me waani tø mgawijy'ity?

³⁸ Wejti kajti jøts ja Dios x'ajot'attit, nay'ejx'etidi jøts kidi mmimajada'agidi ja ayo'on midi wingomp. Janch øts idø'øn nwa'añ ku ja winmaa'ñ janchja'ødyunwā'añ, ja ne'kxts jaayi ja ka'øybi tumbi amutsk'ejxiyip.

³⁹ Xjats ja ñøjkxkojmøø Dios Teety ajot'ajtpi, nayide'en ja ojts wyangojmi sa ja wyinaty jawyeen tø wya'añ.

⁴⁰ Winets ja myengojmøø ma pyabøjkpitøjk ja jam, maagojmidip ja wyinaty ku ja tpaajty, kumi janchmaa'y'oo'ktip ja'.

⁴¹ Jøts ku ja tigøøk ojk ojts t'ixy ja pyabøjkpitøjk, jaanims ja tnimaay:

—Tøts inet, maanidi poo'kxnidi. Wan jade'en tjaty, tø dø'øn tyimbyaaty jøts yikøyakt ja naxwi'l'ñit jaa'y myøjkudanaabyi.

⁴² Pidø'økti, niwejti, wan tjaa'myindi; ixa ja ixyam wyingøñ pøn øts inet xkøyakp.

Ku ja Jesús yikmajch

⁴³ Nay jamnim ja Jesús wyinaty jade'en wya'añ ku ja Judas yja'jty, pøn ja pyabøjkpitøjk wyinaty møøt ñimakmajtsk'atti, ja'ats ja mayjaa'y jam tmøøtja'jt tsujx møøt jøts kip-kyapidi. Ja teetywindsøn idø'øn ja wyinaty tø kyexyidi, møøt ja kajpxwejpitøjk, jøts møøt ja møjaa'dyøjkti.

⁴⁴ Yide'en idø'øn ja Judas wyinaty tø wya'añ jøts ja tu'uk tpikta'akt ja eja'anin midi ja y'ejxtip ku ja tkøyakt ja Jesús, yide'en ja wyinaty tø wya'añ:

—Pøni pøn øts inet ndsu'kxpy, ja' idø'øn ja wyinaty; ja'ats idø'øn mmatstip, jøts ja xyiknøjxtit ta'tspiky'ampy.

⁴⁵ Xjats ku dø'øn ja jam jade'en yja'jty, winets ja twinguwā'jkii'ñ ja Jesús, yide'en ja tnimaay:

—Øts, windsøn, memp.

Jøts ja ojts jade'en ttsu'kxy.

⁴⁶ Xjats ja Jesús yiknixajiyi'ñ, jøts ja jade'en yikmajch.

⁴⁷ Jøts ja jaa'y pøn ja Jesús jam wyinaty myøøt'ajtpy, ja' tsujx tu'uk tnixajiyi'ñ jøts ja ttaxikja'tstuujty ja teetywindsøn tyumbi, ojts ja tyatsk ja tyikwinajki.

⁴⁸ Winets ja Jesús tnimaay ja jaa'y pøn ja wyinaty tø myachi.

—¿Ti mee x'ejxni ku xanimenidi ja kipy jøts ja tsujx? ¿Ti mee x'ejxni, maa'tspi, ku meets jade'en xmatswā'añ?

⁴⁹ Jabom jabom meets jam y'ijty nyik'ixpiky tsaptøjkjotp, ¿ti kuts meets jam xkamajch? Paty idø'øn ya'at ixyam jade'en yjaty kumi Dios kyajpxy jade'en wamp, ¿sudsø'ampy idø'øn ja kyatø'øt?

⁵⁰ Winets ja pyabøjkpitøjk tmatjstuttøø nadyu'uk ja wyindsøn Jesús, jøts ja ojts jadi'iñi y'agakpajknidi.

Ja una'jk jaa'y pøn jadi'iñi kaktigøø

⁵¹ Jamts ja Jesús wyinaty pyawø'øyi tu'uk ja una'jk jaa'y pøn ja poop wet wyinaty tyukwop'ajtp, ja'ats ja yikmach;

⁵² winets ja wyet ja tmatjstuupty, jøts ja jadi'iñi niwa'ats kyejky.

Ku ja Jesús yikwaanijkxy jam kutujktaajkjotp

⁵³ Xjats ja Jesús yiknajtswa'awiyii'ñ jam møj windsøn wyindum pøn ja teety wyindsøn'ajtip, jam idø'øn ja windsøndøjk ñamyujkøjxidøø møøt ja møjaa'dyøjkti.

⁵⁴ Jagam idø'øn ja Pedro tpayø'øy ja wyindsøn ku ja yiknajtswa'awiyii'ñ jam windsøn kyutujktaajk agø'øm, jade'en ja tpaja'jty, jamts ja Pedro tmøøt'ixaajky ja tajk, ja' ja jam myøøtjo'kxpjiky ma ja jøøn jam wyinaty tø myøji.

⁵⁵ Jøts ja teetywindsøndøjk møøt tuki'iyi ja kutujk adsinaabyidi t'ixaadyøø tu'uk ja pøky, jade'en ja t'ixaadyøø ja pøky jøts ja tuku'oogiwya'andi ja Jesús; xjats ja niti tkapattøø.

⁵⁶ Kumi øy ja tigati ttaniwambatti jøts ja jade'en xem yam kyanabyaadyidi ja y'ayuyjk.

⁵⁷ Winaagin pyidø'økti møk'ampy jøts ja nugo tni'øønidi øy ja yjagajade'eni, yide'en winaagin wyandøø:

⁵⁸ —Tø øøts yø nmadøy ku yø yide'en wya'añ: “Nyikida'ap øts yø tsaptøjk midu yø jaa'y tø tyik'øyi, jøts øts kyidigøøk xøow jadu'uk nyikwa'kukit midu ja jaa'y kyayik'øyip.”

⁵⁹ Jøts ni jade'embaaat ja kø'øm kyanagyupikyidi ku ja øy sa yjawa'andi.

⁶⁰ Winets ja teetywindsøn tyanaagyukyii'ñ jam mayjaa'yjotp, jøts ja tyiktüy ja Jesús, yide'en ja tnimaay:

—¿Ka' idø'øn m'adsø? ¿Ti dø'øn jade'en myiktani'øø'nip?

⁶¹ Xjats ja Jesús amøñi tyik'ity, jeky ja niwine'enin kyidyimy'adsøø. Winets ja teetywindsøn ja ojts jadigojk tyiübyikyiyi, yide'en ja ojts ñii'mxyiyi:

—¿Mets idø'øn ja' pøn Dios Teety pyiktaajky jøts mets mwindsøn'att? ¿Mets idø'øn ja Dios Teety m'U'nk'ajtip?

⁶² Xjats ja Jesús y'adsøø yøts ja wya'añ:

—Øts idø'øn ja'. Øts idø'øn ja naxwi'i'ñit jaa'y nmøjkudanaabyi'ajtpy, jøts x'ejxtip meets ku n'ixa'akt aga'ñ'ampy ma Dios Teety, jøts ku nayide'en ø nme'ent yoots agujkpy jap tsajpøtpy.

⁶³ Winets ja teetywindsøn ja wyet kø'øm ttakø'jtsiyii'ñ ku ja y'oj'abajtiyii'ñ, ja' idø'øn tyijpy ku tø ja jaabaat y'oj'amø'øty, xjats ja wya'añ:

—¿Ti ejxpi ti nija'wibi jaaktsøjkiyiyi?

⁶⁴ Tøxi xmadowdi sa tø wya'añ ku ja Dios Teety yø tø twingajpxnaxy; ¿sa dø'øn xjawidi ku jade'en wya'añ?

Winets ja niduki'iyi ttanikajpxtøø ja o'jkin.

⁶⁵ Jøts winaagin jatyi tñidsujidøø, jatyi twinmatjstøø jøts ja ttsee'ktøø, yide'en ja wya'adø'øtsti ku ja jade'en ttundi:

—¡Najtsjawi pøn tø mgøxyi!

Jøts ja tajk ja twingoxti tjøpkoxti awa'an'ampy.

Ku ja Pedro tku'iiñ jøts ku ja ka' t'ijxy'aty ja Jesús

⁶⁶ Jap ja Pedro wyinaty tøk'agi'py ku yja'jty tu'uk ja tø'øxyøjk pøn ja teetywindsøn tyumbi'ajtpy;

⁶⁷ ja'ats ja ojts y'ijxyiyi ku ja jap wyinaty jøn'ajpy yjo'kxpiky, tøyim ja wyinaty wyin'ejxniyi xjats ja yide'en ñimaajyøø:

—Nayide'en mets y'ijty xpawidity ja Jesús ja Nazaretit jaa'y, ¿kidi?

⁶⁸ Xjats ja Pedro ja ka'ap tñigajpxy, yide'en ja wya'añ:

—Ka'ap øts ja n'ijxy'aty pø pøn ja', jøts nguidyimñija'wip øts pø ti me mgajpxpy.

Xjats ja jade'en yø'øpyidsimy jam tajjöp'am. Winets ja tsapni'aaw y'ayajxi'jky.

⁶⁹ Jøts ja tø'øxyøjk ojts twin'ixy jadigojk ja Pedro, xjats ja ttukmadoobinaxwa'jky ja jaa'y pøn jam wyinatyi, yide'en ja wya'añ:

—Ya'at jaa'y tmøøtwidejtp yø Jesús.

⁷⁰ Winets ja Pedro ja ka'ap tkupijky jadigojk. Waani y'ijty, xjats Pedro ja jaa'y ñimaajyøø jadigojk pøn jam wyinatyi:

—Mets inet mdyimyøøtwidijtpy yø Jesús; kumi Galile'it jaa'y mets, jøts jade'en me mgajpxy sa yø kyajpxti.

⁷¹ Winets ja Pedro kø'øm kyanay'ømyigajpxiyøø møk'ampy ja jaa'y yide'en:

—Tyimy'ijxpy ja Dios jøts ku nguidyimñijawi pøni pøn jaa'y meets jade'en mdijpy.

⁷² Xjats ja tsapni'aaw myajtsk'ayajxy. Winets ja Pedro tja'myejch ja Jesús y'ayuujk sa ja wyinaty tō ñii'mxyi: "Ka'aním wyinaty ja tsapni'aaw myajtsk'aya'axy ku mets inet wyinaty tigōok ojk tō mwani ku me xka'ijxy'aty." Jōts ja tkuyajxyi'ñ ku ja jade'en tja'myejch jōts ku ja wyinaty jade'en nichōky tō wya'añ.

15

Ku ja Jesús twinguwa'jkiyi'ñ ja Pilato

¹ Xjats ku xyiijndyaaky, winets ja teetywindsōn ñamyujkidōō mōōt ja mōjaa'dyōjkti, mōōt ja kajpxwejpitōjkti, tuki'iyi wine'en ja t'adsōōnidi ja kutujk jam tsaptōjktōp. Jōts ja ojts tyiknōjkxti ja Jesús kōwiiñ jam Pilato wyindum, jamts ja tkōyakti.

² Xjats ja Pilato tñimaay ja Jesús:

—¿Janch mets idō'ōn windsōn'ajtp ya israelit jaa'y y'etjōjty?

Winets ja Jesús y'adsōōy jōts ja wya'añ:

—Ōts ja'.

³ Xjats ja teetywindsōn janch may ja ōō'nin tpiaktōō, yikxon ja Jesús yikni'ōō'niyi'ñ.

⁴ Winets ja Pilato tyiktiiy jadigojk, yide'en ja tñimaay ja Jesús:

—¿Ka'ap idō'ōn m'adsōy? ¡Ejx! Yikxon mjanchyikni'ōōni. ¡Ejx! Ja pōky kawinaqjōōp myiktani'ōōni.

⁵ Jōts kyidyimy'adsoop ja Jesús ku Pilato ja jade'en ñii'mxyi; jōts ñigyumaap idō'ōn ja Pilato ja kō'ōm tjawi ku ja jade'en kyidyimy'adsōy.

Ku ja nwindsōn'ajtim Jesús ñidujkiyi'ñ jōts ja y'ookt

⁶ Yide'en idō'ōn ja Pilato wyinaty ja kostumbri tmōōt'aty ku ja paski xōōw tpaaty, winets ja tyik'awa'atpidsimy nidu'ugin ja tsumyjaay, pōni pōn ja mayjaa'y yik'awa'atpidsōmwandip.

⁷ Jamts wyinaty tu'uk ja pōkyjaa'y tsumy pōn txōōw'ajtp Barrabás, ja' ja jap mōōt chum'ity pōn ja wyinaty mōōt tō yikjaa'y'ōōky ku tsep ja wyinaty tō ttundi mōōt ja kudunktōjk.

⁸ Xjats ja mayjaa'y jam jade'en myendōō, jōts ja t'amidoobinaxwa'aktōō ja Pilato jōts tsumyjaay ja tyik'awa'atpidsō'ōmt nidu'ugin sa kyostumbri ja wyinaty tmōōt'aty.

⁹ Winets ja Pilato y'adsōōy jōts ja tñimaay:

—¿Sa mee m'ukwa'añ, wan yō israelit windsōn tyikmajtstu'uty?

¹⁰ Jade'en ja wya'añ kumi tō dō'ōn ja wyinaty tja'gyuki jōts ku ja teetywindsōn wyinaty nugo tō tkōyakti ja Jesús tanejkingōjxp.

¹¹ Xjats ja teetywindsōn tkajpxwejkōjxtōō ja mayjaa'y. Ojts ja t'agajpxidi, jōts ja wya'andit jōts wan ja Barrabás t'awa'atpidsimy jōts ka'ap ja Jesús.

¹² Xjats ja Pilato tyiktiiy ja mayjaa'y, yide'en ja tñimaay:

—¿Jōtsimts yō israelit windsōn, sa yō yiktu'unt?

¹³ Winets ja y'adsōōdōō jōts ja wyandōō mōkta'aky:

—¡Yikruspat!

¹⁴ Xjats ja Pilato tñimaay ja mayjaa'y:

—¿Ti tundigōō'yin yō tō ttuñ, ti yō kyubatp?

Winets ja tjaaktyimyikjinajxtōō, mōk'ampy ja yjaaktyimwyandōō:

—¡Yikruspat!

¹⁵ Jōts kumi yikjotkukiwyampy ja Pilato wyinaty ja mayjaa'y, xjats ja tyik'awa'atpidsiimy ja Barrabás; jōts ku ja t'uknankwoyōpōō ja Jesús, winet ja ojts tkōyaky jōts ja kyiruspatt.

¹⁶ Xjats ja soldaditōjk tyiknōjkxtōō ja Jesús jap kutujktaajk'agui'py ma ja tteji Pretorío, ma ja masyōdadi jap wyinaty chōōnidi, japs ja t'waisoldadi ja twaamukōxti.

¹⁷ Winets ja tsuu'nk wet ja ttuktatōjkidōō ja Jesús mido ja windsōndōjk nugo myiwindsōn'ajtip, jōts ja kujp awiiti ttukoroni'atti.

¹⁸ Jōts ku ja jade'en t'uktundōō, winets ja wyambinaxwa'ktōō mōk'ampy, yide'en ja tkajpxpoo'kxtōō:

—¡May xōōwim may jumōjtim mdsōōnit mdanit mets israelit jaa'y wyindsōn!

¹⁹ Jōts ja kipy ja ttaxikwojpi'ktōō, ojts ja tñidsujidi jōts ja ñadyijyi twinguxanidi, ñadyijyi ja twindsō'ōgidi.

²⁰ Xjats ku dō'ōn ja jade'en t'uktaxecktōō, winets ja tsuu'nk wet ja ojts tñajniidi jōts ja ttuktatōjkidōō ja wyet mido ja wyinaty wyet'ajtpy. Xjats ja jatyi twaābidsōmdōō jōts ja kyiruspatt.

Ku ja nwindsōn'ajtim Jesús kyiruspejty

²¹ Xjats ku ja Cirenit jaa'y jam wyinaty ñaxy pōn txōōw'ajtp Simón, kyamjōtp ja wyinaty chōōñ; ja'ats ojts yiktaguwani jōts Jesús kyirus ja tpadsōjmit, ja' idō'ōn jade'en jajtp pōn ja Alejandro mōōt ja Rufo tyee'tajtip.

²² Xjats ja mayjaa'y tyiknøjkxtøø ja Jesús jam Gólgota, ma ja et jade'en txøøw'aty midí jade'en tyijpy ayuujk Oo'kpi Kyubajk Pajk.

²³ Jamts ja tmøødyøø ja vino midí wyinaty tø yik'adamuky møøt ja tšøøy midí yiktejp mirra, ja' ja ojts tmo'odi ja Jesús, jøts ja ka'ap tkupijky, ka'ap ja t'uujky.

²⁴ Winets ja tyikruspajttøø; jøts ja soldaditøjk tyikwa'kxtøø ja Jesús wyet, ojts ja tniguyatti, jøts pøni pøn majadaq ja 'ats ja wet tweitstøø.

²⁵ Jaa dø'øn ja xøøwu'nk wyinaty waani pyety ku dø'øn ja jade'en tyikruspajttøø.

²⁶ Jøts letri ja jam tkøøxaadyi; yide'en ja tyikwa'andi: "Israelit jaa'y ya'at ja wyindsøn." Ja' dø'øn ja ojts ttagubatti kidi tii'jip.

²⁷ Namajtšk ja maa'tspi ja tyikruspajttøø nay jam møøt ja Jesús, tu'uk aga'n'ampy jøts tu'uk anaj'ampy.

²⁸ Janch jajt idø'øn ja jade'en sa jap nøkyijxpy wya'añ, ku yide'en wya'añ: "Møøt ja yiktamimacho'owiyii'ñ ja møj ka'øy jaa'y."

²⁹ Xjats ku dø'øn ja jaa'y jam ñaxti kruswemp, ka'ap ja tjanch'ømyigajpxti, wyibejptip ja kyubajk ja jam, jøts ja tnøjmídi:

—jøj! Metsxi xijy tsaptøjk myikidaapy, jøts mets ja xijy jatyi kyidigøøk xøøw xyik-tanaagyukigyojmi,

³⁰ ñankñitso'ok'atits me kø'øm jøts mwinakt jam kruskøjxp.

³¹ Jade'en ja jaa'y wya'andi, nayide'en ja teetywindsøn wyamídi møøt ja kajpxwejpitøjkti, yide'en ja kø'ømyi ñawya'añidi:

—May abiky jaa'y tø tyiknitso'ok'aty, jøts ka'ap kø'øm tjaty sudso ñankñitso'ok'atiyit.

³² Pøni ku net njanch'eixint yø Israelit jaa'y wyindsøn wyinakt jam kruswemp, winet inet njanchja'win jøts ku yø yjanchja'aji ja Cristo.

Ja jaa'ybaat ja kya'ømyigajpxøø pøn ja jam wyinaty møøt tø yjakruspety.

Ku ja nwindøn'ajtim Jesús y'ø'jky

³³ Xjats ku kyujkxøøw'ajty, winets kyoodsiyii'ñ ja naqxwii'ñit, jaanim ojts yjajta'aky møj winakxyøøw.

³⁴ Jøts ja Jesús møk'ampy wyaañ:

—Eloi, Eloi, ¿lama sabactani? —midí tyijpy: Dios Teety, Dios Teety, ¿jadits ku ø tø xnanktyuñi?

³⁵ Winaagin ja jaa'y jade'en tmadoodøø pøn jam wyinaty jøts ja wyandøø:

—Madowdi, ja Elías yø wyaadsøøpy.

³⁶ Xjats tu'uk myiñ janch pujtšim pøn tnixajiyii'ñ ja tanøxe'jts midí jade'en t'ejxp ejxim ja xa'akjoptsin, ja 'ats ja ojts tyikxøøky jap vino ta'amjøtšpy jøts ja tpiktaajky jam kipy jøp'am, winets ja jade'en tta'adejii'ñ ja Jesús jøts ja ttukwimuukwa'añ, yide'en ja wya'añ:

—Majtstu'utti; wan t'uk'ijxyim pøni janch'ukyikwinajkip inet idø'øn ja Elías jam kruskøjxp ku inet ja mye'ent.

³⁷ Winets ja Jesús møk'ampy yaajxy, jøtsnim ja y'ø'jky.

³⁸ Jøts nay jatyi ja wet kujkwa'kxy y'akø'øtšpajky midí ja tsaptøjk jam wyinaty y'awejtštuk'ajtpy, kubajk'ampy ja kyø'øtstøjkii'ñ jøts ja kyø'øtskidaajky ok'am'ampy.

³⁹ Jøts ku ja soldadi windsøn jade'en ojts t'ixy pøn ja Jesús jam wyinaty twindanaapy, winets ja wyaañ ku ja Jesús wyinaty jade'en møk'ampy tø ya'axy, jøts ku ja wyinaty tø y'øøky, yide'en ja wyaañ:

—Janch tiy tam idø'øn Dios tam ya'at y'ity y'U'nk.

⁴⁰ Jam ja tø'øxyøjk wyinaty tyanaamyidi pøn jam jagam a'ejxujktip; ja Salomé, jøts ja María Magdalena jam wyinaty møøt jadu'uk ja María midí ja Jacobo tyaak'ajttip møøt ja José.

⁴¹ Ja tø'øxyøjk idø'øn wyinaty tø tpawidetti ja Jesús, jøts ja' ja wyinaty tø t'ejx'etti ku ja Jesús jam Galilea wyidijty. Jøts jam ja tø'øxyøjk wyinaty y'a'ejxujkmídi pøn ja Jesús jam wyinaty tø pyanijkyxi Jerusaleñ, møøt ja jam wyinaty tø yja'atti.

Ku ja nwindøn'ajtim Jesús ñe'kx yikpiktaajky jap oo'kpi tsaq jutjøtšpy

⁴² Xjats ku chuu'wiyii'ñ ku ja poo'kxin xøøw wyinaty kyimjabom tpaatwani,

⁴³ winet ja José myiñ, ja Arimate'it jaa'y pøn wyinaty ja kutujk t'adsinaadyip. Ja'ats idø'øn tjøp'ejxp jøts ja ttatøkiwya'añ ja Dios kyutujk midí ja yjaa'y ja tyanitanaapy, jøts ja ojts amumjoojt myñ ma dø'øn ja Pilato jam wyinaty, jøts ja t'amídooji ja Jesús ñe'kx ku ja wyinaty tø y'øøky.

⁴⁴ Xjats ja Pilato ñigyumaap yjajty ku dø'øn ja wyinaty tø y'oo'kni, winets ja tyaajxyii'ñ ja soldadi windsøn jøts ja tyiktiiy pøni janch ku dø'øn ja wyinaty tø y'øøky.

⁴⁵ Xjats ku ja soldadi windsøn ja ojts tnigajpxy jøts ku ja janch jade'en, winets ja Pilato tkøøjky ja oo'kpi jøts José ja yikmøøy.

⁴⁶ Xjats ja tjuuy tu'uk ja poop wet midi øy midi majpxy, jøts ku ja tyikwinajky ja oo'kpi, ja'ats ja tya'amøjts, jøts ja tpiktaajky jutjøtpy midi ja wyinaty tø tyikjuty jam tsaajotp. Jøts ku dø'øn ja jade'en tpiktaajky, winets ja møj tsaā ja tta'agiiy.

⁴⁷ Ojts idø'øn ja Maria Magadalena møøt jadu'uk ja Maria, pøn ja José tyaak'ajtpy, t'ejxtøø mā ja Jesús wyinaty tø yikpikta'aky.

16

Ku ja nwindson'ajtim Jesús yjujkyjky jadigojk

¹ Xjats ku ja poo'lxin xøøw ñajxy, winet ja María Magdalena t'atsjuudyøø ja pa'akxuu'kpi møøt Jacobo tyaak, møøt ja Salomé, jade'en ja ojts t'atsjuudyi jøts Jesús ja t'atspikta'akwajniidi ku ja wyinaty tø y'oo'kni.

² Xjats ja ojts ttaninøjkxti jøpyi ku ja samaan wyinaty tø y'abety, xøbidsimyu'nk ja yja'ttøø jam møj tsaā agujkp mā ja Jesús jam wyinaty tø yikpikta'aky.

³ Yide'en ja kø'øm ñawayajniidøø:

—ZPøn inet ja tsaā tjanch'agiidyyu'ut jøts ndøjki'aint?

⁴ Xjats ku ja yja'ttøø, winets ja t'ejxtøø ku ja møj tsaā ka'ap ja jap wyinaty ukteeni jap jut'agui'py, tø ja wyinaty yiki'ø'øñi.

⁵ Jøts ku ja tyøjikidøø jap mutsk tøjkjøtpy, winets ja t'ejxpattøø tu'uk ja ankilis midi ja wyinaty pya'ajpy tsinaapy, jøts midi wyinaty nayide'en ja poop wet myøøt'ajtpy. Xjats ku ja t'ejxpattøø waajtyøjk ja tujy, jøts ja ojts jantyimchø'jkidi.

⁶ Jøts ja ankilis ja ojts ñii'mxyidi:

—Kidi mdsø'øgidi; nnija'wip øts ku meets ja Jesús ja ñe'kx x'ixajjyidi. Tø ja jadigojk yjujkyjky, øy xtyimyejxtit mā ja yikpiktaajky.

⁷ Nøjx ja pyabøjkpitøjk xukmadøjidi møøt ja Pedro, jøts ñøjkxtit jam Galilea; jamts meets ja x'ejxtit jadigojk, jamts meets ja xminabyaadiyit jade'en sa ja kø'øm mnimaajjyidøø.

⁸ Xjats ja choo'ndøø jam møj tsaā agujkp mā Jesús ja wyinaty tø yikpikta'aky, jøts ja ñøjktøø. Jadi'iñi tsø'øgi ja yjantyikmi'bejpnjyidi jøts nipøn ja sa tkanøjmidi, kumi jantyimchø'jkidip ja wyinaty.

Ku ja Jesús ñanky'ejxøø jadigojk mā ja María Magdalena jam wyinaty

⁹ Ku ja Jesús domingi jøpy wyinaty tø pyidsimy jadigojk jap oo'kpi jutjøtpy, ja María Magdalena ja ojts jawyeen y'ijxyiyi, pøn ja wyinaty tø tyikpidsøjmi niwixujk ja miku'.

¹⁰ Ja'ats ojts ñijky jøts ja ojts t'atstukmadøy pøn jaty ja Jesús wyinaty tø tmøøtwidetti, pøn jam wyinaty jüdyip yaxtip, maadyip tajtip.

¹¹ Jøts ku ja jade'en tñimadoodøø ku ja Jesús yjujky'aty, ku ja tø'øxyøjk ja wyinaty tø t'ixy, ka'ap ja tjanchja'widøø.

Ku ja Jesús ñanky'ejxøø jadigojk mā wyinaty ja namajtsk pyabøjkpitøjk

¹² Xjats ku dø'øn ja jade'en y'uknajxy, winets ja Jesús ñanky'ejxkojmiyøø abiky tsoo ku wyinaty ja pyabøjkpitøjk namajtsk yø'ødyi jam tuu'am. Ka'ap idø'øn ja pyabøjkpitøjk y'ejxkapyidi kumi wenk idø'øn ja kyaxi'jky.

¹³ Jawaani y'ijty, jøts ku ja t'ejxkajptøø winets ja jaty jam wyimbejtøø kyamjotp, jøts ja ñøjktøø Jerusalén mā ja myigu'uk ja t'atstukmadoowa'andi. Kuts ja jam yja'ttøø, winets ja myigu'uk ttukmadoodøø jøts ja nika' yjanchja'wiyi.

Ku ja Jesús ttaguwa'aniyü'ñ ja tunk ja pyabøjkpitøjk

¹⁴ Waani et xøøw ñajxy, xjats ja Jesús ñanky'ejxkojmiyøø ku pyabøjkpitøjk ja jam wyinaty nimaktu'uk twindsøøniidi ja kaabyajt; jamts ja møk'ampy twingugajpxiyi'ñ ja'agøjpx ku ja niti janchja'win tkamøøt'atti ku ja jadine'en kyuuunidi, kumi ka'ap ja wyinaty tø tjanchjawidi ku ja yiktukmadoodøø jøts ku ja Jesús wyinaty tø yik'ixy, ku ja wyinaty tø jadigojk yjujkyjky.

¹⁵ Yide'en ja yikni maadyøø:

—Niyø'øygyøxti naxwii'ñit, jøts ja øyajpxy jøts ja ømyadya'aky xkajpxwā'kxtit mā jaty ja jaa'y yjujky'atti.

¹⁶ Pøni pøn øts xjanchja'wip jøts pøni pøn nøbajtp, ja' nøjx nitso'ok'ajtp ja y'anmija'win; jøts pøni pøn øts xkajanchja'wip, ja' yiktagubatp ja pyøky.

¹⁷ Ja jaa'y pøn øts xjanchja'widip, yide'en idø'øn ttu'undit øts køjxp: Yikpidsø'ømdip ja' ja miku'; kyajpxtip ja wenk ayuujk ja'.

¹⁸ Pøni ayo'ombattip ja', pøni tsu'utsidip ja' ja tsaā'ñ adsu'jky, jøts pøni y'uuktip ja veneni ja', ka'ap idø'øn ja sa yjattit; jøts nayide'en ku pamaā'y ja ja'ayi tkønixajtit, jaty ja tyiktso'oktit.

Ku ja Jesús chajpejty

¹⁹ Xjats ku ja pyabøjkpitøjk ja jade'en t'uknimaay, winets ja chajpejty, ojts Dios Teety ja tsajpjøtpty yikpatøkiyi, jøts ja tpuwa'jtsiyii'n aga'ngyø'ampy.

²⁰ Xjats ja pyabøjkpitøjk choo'ndøø, jøts ja ojts tkajpxwa'kxti ja øgyajpxy ja ømyadya'aky øy maðsoo. Ja nwindson'ajtim Jesucristo ja kø'øm pudøjkiyidip, jøts nay ja Jesús ja tmøøy ja myøk'ajtim jøts ja ttu'undit jade'en midí nípøn ja'a'y ya naxwiiñ kyajajtpy, paty ja mayjaa'y ja tjanchja'widi dø'øn ja pyabøjkpitøjk ja kyajpxy. Jade'en idø'øn ja y'ejxi.

JA ØGYAJPHY JA ØMYADYA'AKY MIDI JA LUCAS YJAAY

Ja Teófilo ya'at yiktanija'ayi

¹⁻⁴ Migu'uk Teófilo, may ja jaa'y tɔ tjajaadyanwa'andi tyimjade'en ja madya'aky sam øøts ja nmigu'uk tɔ t'ejxti pɔn ja Jesús kyudanaadyip. Nayide'en sam øøts ja tɔ nyiktuk'ejxyin, sam øøts ja tɔ n'ixpikyin, jade'ents ja tjaja'wa'andi pɔn jaty t'ejxtøø tnija'widøø sá jaty cho'ondaajky. Ja'ats tɔ pyudøkiyidi jøts ja øgyajpy ømyadya'aky ja tkajpxwa'kxtit. Nay tøts øts ja nbemuky ngonmuky ti jaty tuujnøø ku ya'at øgyajpy ømyadya'aky cho'ondaajky. Ixamts mets ja jade'en ndyimdyanijayi, jøts wa'ats xnijawit ja ty'ajtin, sá jaty tɔ myiknøjmi ku ja tɔ myiktukmadø yø'øbi ixpøjkin.

Ku ja ankilis tniqajpy jøts ku ja Juan Bautista kyaxø'økwa'añ

⁵ Ixam idø'on cho'onda'aky ja madya'aky. Ku dø'on ja Herodes wyinaty rey'aty jam Judea, jamts ja teety wyinaty tu'uk chøøni pɔn txøøw'ajtp Zacarias, ja' y'ijty møøt tyuñ tukpiky ja teetyøjkti pɔn yikejtp Abias. Elisabet ja ñidø'øxy xyøøw, teety Aaron ja ty-eety'ap'ajtmip.

⁶ Janch øy jaa'y idø'on ja amaajtskti, pyaduujnidip idø'on Dios kyutuujk ja' pøni ti ja yikta'ana'amdip. Jade'ents ja ka'ap pɔn sá ñii'mxyidi, jade'en ja ka'ap pɔn pyøky'ijxyidi.

⁷ Ka'ats ja y'u'nk ja teedi, ni ja Elisabet ka'ap ja y'u'nkpaaty, tyimyajaa'ñidi ja namajtsk wyinaty.

⁸ Xjats tuk'ojk ja Zacarias yjaa'y tyaja'jtidoø jøts ja ttuujnidit ja windsø'jkin ja Dios.

⁹ Jade'en idø'on ja tkostumbri'atti ku ja teetyøjk ja jade'en tyaja'adyidi, winets ja tniwøjti pɔn jap uktøkip jap mǝ ja Dios yikwindsø'øgi, mǝ poom tyø. Xjats Zacarias ja ojts tyimdyaja'adyi, ja' ja poom ojts tyiktø.

¹⁰ Ixam ja poom wyinaty jade'en tyø, jøts niduki'yiyi ja mayjaa'y ixap yjanchapkaajpxmidi jap tsaptøjkwimpy.

¹¹ Winets ja Zacarias t'ejxpaajty tu'uk ja Dios y'ankilis jøts ku ja jap aga'ñ'ampy tyani mǝ ja poom yikpikta'aky.

¹² Ku Zacarias ja ojts jade'en t'ejxpaaty, ni sudso'ampy ja kya'ukwinmaa'nbyatni, tsø'øgi ja janchyik'o'jkniiyip.

¹³ Xjats ja ankilis ja ñimaajyøø:

—Zacarias, kidi mdsø'øgi, tɔ Dios mgajpxaajkin mmado'oxiyi jøts pyaatp mnidø'øxy Elisabet tu'uk ja mutsku'nk. Mbaattip m'u'nk tu'uk, Juan ja mduxøøw'attip.

¹⁴ Mdaxonda'akp ja' mdajotkujk'atp ja', jøts may ja jaa'y ja nayide'en ttajotkujk'attit ku ja kyaxø'økt.

¹⁵ Ja'ats møk nøjx ja kunuu'kxin tmøøt'aty jam Dios wyingujpk. Niwine'enin ja nøø ja ktatunk'att, ka'ap ja y'amu'ukyjaa'y'att. Jaayip ja Espiritu Santo tyuktatøjkniiy ja wyinmaa'ñ yam ja ka'anim myiñ naxwiñ.

¹⁶ Ja'ats ja Israelit jaa'y tyukja'myatsp tyukja'byaatp ja Dios Teety jadigojk.

¹⁷ Jawyeen ja Juan mye'ent, jaanims ja nwindson'ajtim mye'ent. Nayide'en winmaa'ñ nayide'en kutujk ja tmime'ent sam ja Dios kyugajpxyyn, ja Elias'ajtpi. Jade'ents ja u'nkteety u'nktaak ja tyikjotimbett, jøts ka' ti tsep niti aki møøt chøønidit y'u'nkti y'una'jkti, jøts ñayikmado'op ja' pɔn kidyimyadoodip. Jade'ents ja tyiktøøjit tyiaktuadaajkit ja jaa'y wyinmaa'ñ jøts ja tjøp'ejxtit ja nwindson'ajtim.

¹⁸ Jade'en ja Zacarias yiknimaay, xjats ja ankilis ja t'amidøøy:

—¿Sudso'ampy øts ya'at ndajotkujk'att jøts ku yø ty janch, pø tum møjaa'ñits øøts amajtsk?

¹⁹ Xjats ankilis ja y'adsojøø:

—Gabriel'ajtp øts, jøts Dios ø nmidumpy; ja' øts idø'on tɔ xkexy jøts mets ya'at aaw ayuujk ndukmado'ot.

²⁰ Jabi ka'apxi jaty tɔ xmibiky sǝ me tɔ nnøjmi, tants inet uum, jaanim me mgajpxt ku ja m'u'nk kya'axt. Jatp kubatp idø'on ya'at jade'en sǝ tɔ nwa'añ.

²¹ Ixap idø'on mayjaa'y t'awejxti ja Zacarias, maadyip tajtip ja jap ku ja jadine'en ty'a'ñini jeky jap tsaptøjkjøtpy.

²² Xjats ku ja pyidsiimy, ka'ap y'aaw y'ayujk ja t'ukyajkni, jøts ja tyimyjaty tja'gyukidøø kudamik ja wyinaty tɔ y'ejxøøxy y'ejxma'aty jap tsaptøjkjøtpy. Nugo ja ja'ayi tñidoni, tøyi ja wyinaty y'uu'mni.

²³ Kuts xyøøw ja ojts tyika'pxy winaaq xøøw ja wyinaty tɔ yiktaguwani t'adsøønit ja tsaptøjk, winets ja ñøjxni tyigam.

²⁴ Jøts ja ñidø'oxy Elisabet ja nay jatyi yjōtpy'ajtni ku ja et ja xōōw jade'en y'uknajxy, magoxk po' ja y'ijty jap tyōkjōtpy jadine'en ja kya'ukpidsōmni. Yide'en ja wyinmay jōts ja wya'añ:

²⁵ "Ja'agōjxp Dios tō tuñi ja may'ajt jōts øts ja jaa'y xka'ukmi'ajkniiyt."

Ku ja ankilis tñigajpxy jōts ku ja Jesús kyaxø'økwā'añ

²⁶ Xjats ja Dios kidudujk po' tkejxy ja y'ankilis Gabriel jam Galileit ñaxjotp mā ja kajp txōōw'aty Nazaret,

²⁷ jōts ja t'ats'ext ja t'ø'oxyōjk pōn txōōw'ajtp María, øy yikxon ja yjaa'y'aty. Niwa'añ ja wyinaty y'eitni jōts ja tmōøt'amajtskit tu'uk ja yaa'dyōjk midi txōōw'ajtp José, ja rey David y'aptatsk.

²⁸ Xjats idø'øn ankilis ja jam tñidōjkiiy'iñ mā ja jam wyinaty chōōni jōts ja tñimaay:

—iDios kōjxp ngajpxpøø'kxy, tō ja mmay'atyiyi! İxa mets ja nwindson'ajtim mōøt m'eitni; tō ja Dios njantymgyunuu'kxyi ku nadyu'uk tō myik'a'ejxi wine'enin mdø'oxyōjk'atti ñaxwiñ.

²⁹ Kuts ja twin'ejxpejty ja ankilis jōts ku ja jade'en myigajpxyi, ñigyumaap ja tyimya'wyiyi'iñ, jade'en ja kō'øm ñawyinmaa'nxxyi ti ja jade'en ttakajpxpoo'kxiyip.

³⁰ Jøts ja ankilis ñimaajyøø:

—María, kidi mdsø'øgi, tō Dios m'øy'ijxyiyi, mjanchtajotkujk'ajtip ja'.

³¹ Mjōtpyip mets, mbaatp tu'uk mmajnku'nk, JESÚS ja mdukkxōōw'atp.

³² Møk winmaa'ñ møk kutujk ja myøø'atp; Dios U'nk ja yiktejt, yikutujkpi Dios Teety ja pyikta'agiyit sam ja y'apteety'amōj David,

³³ jōts ja wyindsøn'att jam Israelit y'etjotp xemikōjxp; niwindem ja kyutujk ja kyakōxt kyanaxt.

³⁴ Xjats ja María tyiktiiy ja ankilis:

—¿Ti sudso dø'øn ja ndejin jade'en yjatt? Pø ka'anims øts nniyaa'y nbaaty.

³⁵ Winets ja ankilis y'adsøø yōts ja wya'añ:

—Ja Espiritu Santo mnimeniyip, jōts ja Dios Teety tsajpōtpyit ja' myø'ajtin jade'en mduniyip. Jōts paty ja niwine'enin tkayikpøkyu'unt, wa'ats ja y'ett midi idø'øn myika'axp. Tō ja jade'en ttanibiktaagi jōts ja Dios U'nk yiktejt.

³⁶ Nayi pyaatp ja mnigu'uk Elisabet myajnku'nk tu'uk, øy idø'øn ja yjamōjaa'yñi. İxym ja tudujk po' kujk ttsøm'ity ja y'u'nk yam ja ka' tyimy'ukyikjōp'ijxy jōts y'u'nk ja tpaat.

³⁷ Ka' Dios ti kyamayiyi.

³⁸ Xjats ja María wya'añ:

—Ane'emy øts ja Dios xyik'ity; wan øts ja jade'en xuñ sam ja tō wya'añin.

Winets ja ankilis jatyi choo'naa.

Ku ja María ñijky jōts t'ats'ijxy ja Elisabet jam tyōjkwindum

³⁹ Jøts ja María nayi winet et anøø adsu'jky ojts ñijky jam kojpkjotp mā ja kajp wyinaty tu'uk jam Judeit ñaxjotp,

⁴⁰ jōts ja ojts tyōki Zacarías tyōjkjotp, jamts ja ojts tkajpxpøø'kxy ja Elisabet.

⁴¹ Kuts Elisabet ja jade'en tmadøøy ku María ja jade'en kyajpxpøø'kxyi, jatyi ja tyimya'wyiyi'iñ yjotp ku ja mutsk y'adiijch, winets ja Espiritu Santo ja amuum tyatōjkiiyøø.

⁴² Jøts ja yide'en møk yjantymwya'añ:

—Tō Dios mjantymgyunuu'kxyi ku tō myik'a'ejxi wine'enin ndø'oxyōjk'ajtindi ñaxwiñ, jōts yø m'u'nk nayide'en tō yikunuu'kxyi.

⁴³ Tyimdyi øts tymbyøn øts ku øts nwindson'ajtim tyaa'guk'nk xkugajpxi!

⁴⁴ Ja'ayi ja mgajpxpoo'kxin tō ndyimyadøy, jatyi øts n'u'nk ja xonda'agyi tō yjantymyik'adi'ichiyi.

⁴⁵ Nekim xōñim mets ku ja tō xjanchjawi xkunuu'kxyjawi, jatp kubatp idø'øn yø jade'en sa yø Dios tō tyikutuky.

⁴⁶ Xjats ja María wya'añ:

Øy tsuj ngunuu'kxyjawi ja nwindson'ajtim,

⁴⁷ myinijxpy øts n'aaw njojt ja nDios Teety Yiknitskpi.

⁴⁸ Tōnim ja Dios tñijawi jōts tō t'ejxjimbity ja y'u'nk ja myaaay, yamnim øts inet ejtp ejtni xoni nyiktejt wine'enin ja ñaxwiñ'ñit jaa'y yja'atti ya ñaxwiñ.

⁴⁹ Janch mōj ja Dios myø'ajtin ku øts ja jade'en tō xuñ; pø wyandijpyts idø'øn yjanchwa'adi yjanchkapøkyøødi.

⁵⁰ Ejtp ja tpa'ayo'ot pōn jatyi ja windsø'jkiiyip.

⁵¹ Tō tyikwingaxi'iky ja myø'ajtin ku ja tō tmimajadaajki ja namyikaxi jaa'dyi wyinmaa'ñ.

⁵² Tō tyik'amutski pōn jatyi kamaabyim yikutujktip, jōts ja tō tyikjot'amøkpiky ja ayoo'bididi pōn jatyi aay pista'ak yik'ejxtip.

⁵³ Pōn jatyi ayoodip winmaadyip, tōts ja tmø'øy ja jotkujk'ajtin,

jòts ja kumeeñ jaa'y jadi'iñi wa'ats wiwøpy tø yikpagajxnidi.

⁵⁴ Tø ja tpudøki ja Israelit kajp ejxim ja y'u'nk t'ejxkapyin;

ka'ap ja tja'dyigøpy paty ja tø t'ayo'ixy,

⁵⁵ sam ja ojts yiktukmadowdin ja n'oktaakti ja n'apteetyi, møøt ja Abraham, ku ja y'u'nk y'unaj'jk jade'en kyakøxt kyanaxt.

⁵⁶ Xjats ja Maria jam tmøøt'aa'niyii'ñ tigøøk po' ja Elisabet; ku jade'en ñajxy, jaanims ja ñøjkxnaa tyøjkwindum.

Ku ja Juan Bautista kyaxi'iky

⁵⁷ Xjats ja xøøw ja po' tpaajty juuni et ja Elisabet kya'axt. Jade'ents idø'on yikaxi'iky tu'uk ja myajnk'u'nk.

⁵⁸ Jatyi ja myigu'uktøjkti myigujøøndi myigudøjkti ñimejnidi. Janch yikajxakp ja' ku ja tnija'widøø jøts ku ja Dios wyinaty ja kunuu'kxin møj tø myø'øyi.

⁵⁹ Jøts ja kiduktujk xøøw tyiknøjxktøø ja maxu'nk jøts ja ejxa'an yikmo'ot ñe'kxkøjxp, jamts ja tpiкта'akwajniidi ja xyøøw sam ja tyeety xyøøw'atyiñ Zacarias.

⁶⁰ Jøts ja tyaak, ka'ap ja tkupiky, yide'en ja wyaañ:

—Ka', ka'ap yø jade'en txøøw'att. Juan yø xyøøw'atp.

⁶¹ Xjats ja yikniimaay:

—¿Tiku yø jade'en yiktejt? Pø ka'ats ja mmigu'uktøjk jade'en pøn txøøw'aty.

⁶² Winets ja tyiktøødøø ja u'nkteety ti tyukxøøw'atp ja y'u'nk, nugo ja ttanidonidi.

⁶³ Jøts ja ojts t'amidøpy tu'uk pedasi ja puu'yu'nk ma ja tkøxajyit ja xyøøw, xjats tpiктаajky: "Juan yø xyøøw." Jøts ja jaa'y ñigyumaap yjanchjajttøø ku ja t'ejxtøø jade'en.

⁶⁴ Jøts ja Zacarias nay jatyi ojts y'awijy jadigøjk, jatyi Dios ja tkajpxpøø'kxy, møk ja tukmøjawi.

⁶⁵ Ja'agøjxp ja ñigyumaap tja'widøø ja tøk'ayø'øbyidi, jatyi ja ojts tkajpxyø'øgyoiti sa wyinaty tø jyaty kyubety, jøts ja yiknija'wiyii'ñ wine'enin ja Judeit jaa'y jam chøøndi y'etjotp.

⁶⁶ Pøn jatyi ja jade'en tñimadoodip, nugo ja tkumayidi tkudajidi jøts ja xem yam ñayiktiyidi ñay'amidøyidi:

—¿Ti yø tyu'ump, ti yø pyaap yø mutsku'nk ku yø yaakt?

Jabi janchmøøjyipts ja Dios kyunuu'kxin yø'.

Ku ja Zacarias ja Dios yikajpxøø

⁶⁷ Xjats ja Zacarias ja Dios tyukajpxøø ja ayuujk ku ja wyinaty tø tyatøkiyi ja Espiritu Santo, jøts ja wyaañ:

⁶⁸ Janch møj ja Dios ja kyunuu'kxin tmø'øpy ja Israelit kajp,

ku tø tñimiñ tnija'aty ja y'u'nk y'unaj'jk wine'enin adøm ja xja'ajtindi, tøts nitsoojkin ja xukpaajtyim.

⁶⁹ Tø ja tu'uk tkexy ja yikutujkpi pøn xuknitso'ok'ajtindip ja nbøky,

nay ja David y'ap y'ok pøn y'ijty ja Dios tmidump.

⁷⁰ Jade'en sa ja Dios Teety jawyeenip ojts ttuknigajpxy ja kyugajpxy,

⁷¹ jøts ku ja xaniguwandujtin ja nmidsep ja nmi'ajkibi jøts niduki'iyi pøn x'øy'ejxim xka'øy'ejxim,

⁷² jøts ku ja ndeety'ap yik'ayo'ejxtit ku ja ka'ap tja'dyigøpy ja y'ayuujk.

⁷³ Ku ja wyinaty tø twanda'aky, jade'en ja ndeety'amø Abraham yiktamiwandaagi

⁷⁴ jøts ku ja xukmimadaajkin ja nmidsep,

jøts ja jotkujk nmidu'unin, nisudso ngatsø'jka'ant,

⁷⁵ øy tsuj tiy janch ndsinaa'yindit, jade'en ja nwindsø'jka'andit ejtp.

⁷⁶ Jøts mets u'nk, mets ja Dios tsajppøtpyit mgugajpxy'atipyip,

kumi mets ja jaa'y wyinmaa'ñ ja myiktøøjip myiktuudaajkip jøts ja nwindsøn'ajtim yikjøp'ext,

⁷⁷ jade'ents ja jaa'y tñijawidit jøts ku ja mye'ent yiknitsokpi jøts ku ja pyojkpmaa'kxt.

⁷⁸ Jadine'en ja Dios xtsøkyim xpa'ayø'øyindi jøts ja xanikejxyim ja y'u'nk ja yiknitsokpi,

⁷⁹ ja'ats xyikwejim xyikajim, kujaj kudøø'kx xyiktsinaa'yindit. Ja' xukmajstujtim ja nga'ødyu'unin ja ngugoots'ajtin,

jøts ja xuk'ejxint xuknija'wa'ant ja tsinaa'yin midi øy midi tsuj, jotkujk'atym Dios wyingujkp.

⁸⁰ Jade'ents ja mutsku'nk ye'jky, møk møjaaaw, wijy quejy, jøts øy tsuj ja winmaa'ñ tjagyepy. Jøts ja y'atsinaay jawyeen jam abak etjotp ma niti kya'ity, winetnims ja ñanky'ejxi ma ja Israelit jaa'y jamdi.

2

Ku ja Jesús kyaxi'iky

¹ Xjats ja møj windsøn Augusto winet et ojts tni'ane'emy møk'ampy jøts ja naxwii'ñit jaa'y niduki'iyi yikjaamyuktit.

² Ja Cirenio jam wyinaty Siria kudunk'ajtp ku dø'øn ja jade'en miduk'ojk tjaamyuk'okwandøø ja jaa'xyøøw jøts ja jumøjt.

³ Xjats ja jaa'y jade'en ñjokxti kyø'ømgajpkøjxpti, jøts ja xyøøw jøts ja yjumøjt tkøyaktit jam.

⁴ Jade'en'ampyts ja José jam Galilea chøø'ñ ma ja kajp txøøwi Nazaret, jøts ja ñjokxtøø Belén jam Judeit y'etjotp ma ja David wyinaty tø kyaxi'iky, kumi ja' ja José tyeety'ap'ajtpy.

⁵ Patyts ja jam tmøøtnijky ja María jøts ja tkøyaktit ja xyøøw ja yjumøjt, tøts wyinaty ja kajpxy ttunidi jøts y'amajtskidi. Jøtpynim ja wyinaty.

⁶ Winets ja y'u'nk ja nay jam pyaajtøø, jam ja ojts pyo'ga'pxy.

⁷ Jøts ja tpaajty ja yjagyoo'u'nk, ojts t'abity jøts ja ojts tkø'øky jam jiyujkjøø'kx'i'ñjotp. Ka'ap ja ja'taajk jam wyinaty tø ñibaadi, patyts ja jami tyandøø.

Ku ja borreek'ejxpi ja ankilis pyaadyidi

⁸ Jamts wyinaty jiyujk'ejxpidi tsi'gejxpidi wingon ma ja kajp txøøwi Belén, ja'ats t'ejx'ejttip tsunaxy'ampy ja byorreegidi.

⁹ Xjats ja jam jøtmøñ t'ejxpattoø ja Dios y'ankilis. Jade'en'i ja jam tymiyikjajtaajky ma ja wyinaty, jøts ja yjantyimchø'jkidøø.

¹⁰ Nimaajyidibik ja ankilis inet ja'adi:

—Kidi mdsø'ogidi, øgyajpxy øy'ayuujk ø nmimimpy. Ja' mee ndukmadoowampy, ni'ijty ja jaa'y ja tjantyajotkujk'attit:

¹¹ tø icyam kye'exy ja CRISTO, ja nwindson'ajtim, ja yiknitsokpi ma ja David jam kyugajp'ajty, ja' kyajpkøjx.

¹² Ja' idø'øn ja wyinaty ku inet xpaattit tu'uk ja maxu'nk mots'abidity kyø'øgyi jam jiyujkjøø'kx'i'ñjotp.

¹³ Jaaktyimgyaxø'ktip inet ja may ankilis jam ma ja tyu'ukpi wyinaty, jøts ja Dios ja møk ttukmøjawidi ttukunuu'kxyjawidi, yide'en ja wya'andi:

¹⁴ jKunuu'kxy mets Dios Teety tsajjotpit ku øy'ajtin tsuj'ajtin tyaky ja naxwiiñ naxkijxy, jøts ja jaa'y yikmo'odi pøn tmijotkujk'atwandip ja Dios!

¹⁵ Xjats ku ja ankilis wyimbejtnidøø ku ja ñjokxnidøø jap tsajjotpy, winets ja jiyujk'ejxpidi nixem niyam ñawyambinaxwa'jkidøø:

—Wants idø'øn tja'myindi Belén, jamts ja t'ats'ijxyindi midi Dios tø xuknija'windi.

¹⁶ Xjats idø'øn puty: ñjokxtøø, jøts ja María jam ojts tjanchpaatti møøt ja José, janch jamdamik ja mutsku'nk tø yikø'øky jiyujkjøø'kx'i'ñjotp.

¹⁷ Kuts ja jade'en t'ejxtøø, winets ja tñimadyaktøjkidøø sa ja ankilis ja wyinaty tø tyamimadya'agyidi ja maxu'nk,

¹⁸ jøts ja ñigyumaap yjanchajttøø pøn jaty jam wyinaty.

¹⁹ Jøts ja María ja'myech ja tyik'ity sa ja wyinaty tø yiknøjmi, ja' ja wyinmaa'ñ'ajtnip.

²⁰ Xjats ja jiyujk'ejxpi wyimbejtnidøø. Møk ja Dios ja ttukmøjawidi ttukunuu'kxyjawidi ja'agøjxp ku ja wyinaty jade'en tø t'ejxti tñijawidi jøts ku ja jade'en tø yjantyimjyaty.

Ku ja maxu'nk Jesús y'atsyiktuk'ijxy ja Dios Teety tsaptøjkjotp

²¹ Kiduktujk xøøw ja mutsk ojts yikpiktaajki ja ejxa'an ñe'kxkøjxp jøts ja yikxøømøøy JESÚS. Nay ja' ttukxøøw'ajty midi ja María ja ankilis wyinaty tø tyukmadøyi ku ja wyinaty ka'anim tjøtpy'aty.

²² Xjats ku ja tiempi tpaajty wine'en ja wyinaty tø t'ajxidi wya'atsti sam ja Moisés kyutujk wya'añin, winetnimts ja maxu'nk ja jam Jerusalén ttaninøjxtøø ja Dios.

²³ Jade'en'ampy idø'øn ja jade'en ttundøø kumi yide'en ja Dios kyutujk yja'ayi: “Tum Dios ja mixyuna'jk yiktamiyoxtip pøn jagyooobi'ajtp.”

²⁴ Xjats idø'øn ja jade'en t'atswindsø'jkidøø sam ja Dios Teety tø tyikutukyin: namajtsk naxpak, pøni ka'ats ja te winets ja tsapak nayide'en namajtsk yiktawindsø'ogit.

²⁵ Jamts wyinaty ja jaa'y tu'uk chøøni Jerusalén pøn txøøw'ajtp Simeón. Janch øy jaa'y idø'øn ja'. Yjanchja'myechp idø'øn Dios ja'. Ja'ats idø'øn tjøp'ejx'ejtp ja Israelit kajp juunim idø'øn ja yjadyim'yuknitsø'ok'att. Jam ja Espiritu Santo ja wyinaty tmøødi,

²⁶ jøts tø ja wyinaty twanda'aky jøts kunim ja jawyeen t'uk'ext ja Cristo pøn ja Dios Teety kyaxp, winetnimts ja y'ookt.

²⁷ Xjats ja winet ñijxy tsaptøjkjotp, ja Espiritu Santo ja yiknøjkxip; kuts ja maxu'nk Jesús jam wyinaty ja tyeety tyaak tø yiknijkyi jøts ja jade'en tpadundi ja kutujk,

²⁸ jøts Simeón ja jam tñixajy'i'ñ kyø'køjxp jøts ja tsaan'ijty, jøts Dios ja ojts ttukmøjawidi ttukunuu'kxyjawi, yide'en ja wyaañ:

²⁹ Dios Teety, tøts inet, wan øts inet jotkujk t'oo'kni.

Tø xpaduñ ja m'ayuujk sa ø xnimaay.

³⁰ Tønim ø nwemp'ixy ja yiknitsokpi

³¹ midi tø xanibiktaagi ja naxwii'ñit jaa'y.

³² Yø' idø'n tu'ump ja may'ajtin jøts ja jaa'y mja'myatstit mja'byaadit pøn ka' y'Israelitjaa'yidi.

Yø'øgøjxp idø'n yik'ejxkaptit ja Israelit kajp midi tø xw'i'ixy.

³³ Xjats ja José janchñigymaap yjajtøø møøt ja ñidø'øxy ku Simeón ja mutsk jade'en tniagjpxy.

³⁴ Winets Simeón ja kyunuu'kxmyigajpxidøø. Yikajxaktip ja' jøts ja María yiknimaay, ja Jesús tyaak:

—Ejx madow, ja' yø mixyu'nk tø yiktanibiktaagi jøts Dios Teety y'øy'ajtin ttukpaajtit may ja Israelit jaa'y. Nay mayts ja tkapaattit ku jaa'y yø may kyagupøkit.

³⁵ Jade'ents idø'n ja yiknijawit sa pønjabøn wyinmay y'am yjotp. Mdyimchaachkuwinmayip mets ja øy, tyimchaachjawip mets m'anmija'win ja'.

³⁶ Jamts wyinaty tu'uk Dios kyugajpxymi, Ana ja tø'øxyøjk xyøøw, ja Fanuel ñøøx, ja Aser ja y'aadsidip kyugojidip. Møjaa'tyigøynits idø'n ja'. Tyimy'una'jkyi ja y'amajtskiy'iñ jøts ja ja'ayi wixujk jumøjtyi tmøøtsinaay ja ñiyaa'y.

³⁷ Makta'pxy myaktaxk jumøjts ja wyinaty, jøts ejtpts idø'n ja jap tsaptøjkjotpy tmiduñ ja Dios xinaxy tsunaxy, y'amaay'ajtpy idø'n ja', ka'ap ja tkugayi tku'uugi, ejtp Dios ja t'ajot'aty.

³⁸ Ja Ana dø'n jap ojts myiñ winet, jøts ku Dios ja ojts ja t'uktukmøjawi t'uktukunuu'kxyjawi, winets ja tniagjpxøjkij'iñ ja mixy Jesús. Ja' ja tyukmadøøpy pøn jaty wyinaty tjøp'ejxtip jøts ku ja Jerusaléngit jaa'y ñitso'ok'attit.

Ku ja wyimbettøø yja'ttøø jadigojk Nazaret

³⁹ Xjats ja wyimbejtnidøø ñøjxñidi jam kyajpkøjxp Nazaret, jam Galileit y'etjotp, ku ja jade'en wyinaty tø tpadungøjxidi ja Dios kyutujk.

⁴⁰ Jøts idø'n ja mixyu'nk jam jade'en yeeky, møj møjaaaw, wijy kejy. Dios ja amuum jantyimkyunuu'kxyip.

Ku ja mixy Jesús yikpaaty jam tsaptøjkjotp

⁴¹ Xumi nøjxktipts idø'n ja tyeety tyaak jam Jerusalén winjumøjt ku ja paski xøøw jam tpaaty.

⁴² Jøts ku ja Jesús yjumøjt wyinaty makmajtskni, winets ja ojts ñøjxkti niduki'iyi Jerusalén, jøts ja xøøw ja t'anøjxidi kumi jade'en ja kostumbri.

⁴³ Xjats ku ja wyimbejtnidøø xøøguixy, winets ja mixy Jesús jamyi tyaanaa Jerusalén, ka'ap ja José ja tkumaydi.

⁴⁴ Jade'en ja wyinmaydi, jam ja tijy pyamiñidi mayjaa'y agujkp, jøts ja jade'en yø'øxyinajxtøø; jøts ja tja'ixaadyøø tjayiktøødøø tjayik'amidoodøø ja myigu'uktøjkti pøn jaty ja møøt ñay'ijxy'atyidi,

⁴⁵ ñima ja tkapatøø. Xjats ja tniwimbejtnidøø jadigojk Jerusalén jøts ja jam t'ixaadyøjkidøø.

⁴⁶ Kidigøøk xøønim ja tpatøø, jamdamik ja wyinaty tsaptøjkjotp chøøni jam may kyajpxwejpi y'agujkp, jamik ja pyatmadøø jøts ja jam t'amidøø tyiktij tyiktu'ugi.

⁴⁷ Jøts ku ja jaa'y ja jade'en tmadoodøø, ñigymaap ja tyimyja'widøø ku ja amwijy tsaachwijy, jøts ku ja tijy janch y'adsøy.

⁴⁸ Xjats ku ja tyeety tyaak ojts y'ijxyi, ñigymaap ja tyimyjaa'widøø jøts ja tyaak ojts ñi'i'mxyi:

—¿Ti, u'nk, jade'en myik'adøøjstip? ¿Ti øøts jade'en xjantyatump? Møk øø tø xjanty-imyikjotmadyøki wine'enin øøts ixa njawidity, mjayik'ixa'ay.

⁴⁹ Xjats ja Jesús y'adsøø jøts ja wyaañ:

—¿Tiku ø x'ixa'adi? ¿Ti kidi xnijawidi ku øts nDeety yja' nduujniyit?

⁵⁰ Niwine'enin ja tkaja'gyukidøø ku ja jade'en ñimaajyidøø.

⁵¹ Xjanimts ja tmøødidøø Nazaret, etpts idø'n ja myimadøøyidi jøts ja tyaak nugo tja'myats'ijty sa yjajty.

⁵² Yaa'adøøtsps ja Jesús, wej'adøøtsp kaj'adøøtsp ja'. Jade'ents Dios ja tyajotkujk'aty ku ja jade'en y'ijxyi, jøts myigu'uk nayide'en yjotkujk'atti.

3

Ku ja Juan Bautista kyajpxwa'kxy abak etjotp

¹ Makmojkx jumøjt wyinaty kujk yikutuky ja møj windsøn Tiberio ku ja Poncio Pilato wyinaty wyindsøn'aty jam Judea, jøts ja Herodes jam Galilea, jøts ja myiga'ax Felipe jam Iturea jam Traconite, jøts ja Lisianas jam Abilinia wyindsøn'aty.

² Ja Anás møøt ja Caifás ja' idø'n wyinaty møjteetywindsøn'ajttip ku ja Juan, ja Zacarías myajnk, ja Dios tyukmadoji ja y'øgyajpxy ja y'øy'ayuujk jam abak etjotp.

³ Xjats ja ojts t'ayə'əy'abidsimy ja et jam məj nəəba'am miditəxəw'ajtp Jordán, jəts ja jaa'y ttukmadəy jəts ku ja nəəbattit, jəts ja tyiktə'ədit tyiktuuda'əktit ja wyinmaa'n, wan tyiktigatsti ja chinaa'yindi winets ja yikpojkpimaa'kxtit.

⁴ Xjats ja jade'en yjanchtuujnəə yjanchjajtəə sə ja Dios kyugajpxy Isaias wyinaty tə tjaadya'n ja ayuujk ku ja wya'a'n:

Paty ja kugajpxy nəəjkt jawyeen jam abak etjotp jəts ja myigu'uk ja nəəjmit mək'ampy: "Awejxidi ja Dios y'ixpəjkin, yiktəwədi yiktuuda'əkti ja mwinmaa'n yikxon.

⁵ Pənts ja kya'ukupəp wan ja tyimyjapəni, ni'ijtyi ja tum jade'en tkupəkt.

Yik'əyip yiktuuda'əkp ja' winmaa'n ku wyinaty pənjabən tə wyinmaamya'aty.

⁶ Jade'ents ja naxwii'nit jaa'y ni'ijtyi t'ejxtit sə də'ən ja Dios tyaky ja nitsə'ok'ajtin."

⁷ Xjats ku ja Juan ja mayjaa'y jam nimejniyəə jəts ja tyiknəəbatt, jəts ja tniimaa'y:

—iMee miku'! İPən mee tə mni'mxyi jəts ku jade'en mgayiktabayə'ədyit ja mbəky, jəts ku yə'əyi chəkyi ku meets yə nəəbajtpi tə mni'n?

⁸ Yikxon idə'ən mjaa'y'attit, wan idə'ən tyik'ijxy jəts ku ja mdsinaa'yin tə xyiktigatsti. Kidi mee kə'əmyi mnawya'a'niiyi: "Tixi ka'ap ti chəkyi, kumi ja Abraham adəm n'əpteety'aməj'ajtyindip"; jəts ka'ats yjade'eni, ti Dios kamaajyip, əy ja pən ttukmigu'uk'ətt ja Abraham pəni pən ja kə'əm y'a'əjxip.

⁹ Jəts tsojk ja nəəjkk yiktədyu'n pən jaty tkami'əy'ajtpi ja Dios.

¹⁰ Xjats ja mayjaa'y ja yiktəəjəə y'amidəəjəə:

—İTi əə ndu'ump? İSudso'ampy əə nwinmaa'nbyaətt?

¹¹ Jəts ja Juan y'adsojimbijty:

—Pəni pən ja pyikta'əky, pəni pən ja yujky'ajtin may'ampy tjagyajtpi, wants ja tmo'odi kujkwa'əky pən niti kidyim'y'ejtxidip; pənts ja kyaajyik yjəə'əkkik jam, wan ja nayide'en məət tjəə'əkwə'kxtit pən ja kyaajyik y'uujkik kidyim'y'ejtxidip.

¹² Winets ja yikugubajtpidi myemidi jam nəəbajtpi, jəts ja Juan yik'amidəəy:

—Windsən, jəts əəts, İti əə ndu'ump?

¹³ Jəts ja Juan ja y'adsoojidəə:

—Kidi kugujuu'n ne'egi ne'egi x'amidəwədi, ja'ayi də'ən mbadu'undip sə kyutukyi.

¹⁴ Jəts ja tseptumbidi winaagin tyiktəəmidəə:

—İJətsimts əəts, ti əə ndumip?

Xjats ja t'adsəəy:

—Kidi pən o ti xpəjkkidi aguwanikəjpx, kidi pən o ti xanitäayibyatti; tajotkuk'ətti ja mmijuu'ndyi.

¹⁵ İxjam idə'ən ja mayjaa'y wyinaty y'awejxti, ja' ja tyajotkukiwyəndip, yide'en idə'ən ja wyinmaydi jəts ku ja Juan ja' idə'ən Cristo.

¹⁶ Jəts ja Juan ojts tnigajpxy, ttukmadəəy ja mayjaa'y:

—Tiy janch ixyam ndyimdyukmadəwədi jəts ku əts yə'əyi tə nniimi'n jəts meets ja nəə nduktanəəbattit; jats tə'u'uk ix'oojk xpami'n pən meets ja Espiritu Santo mduktatəkiyip, jəts ja' tmime'ent ja tiədyu'unin. Mək'ampy kutujk ja tmimi'n, ni'ja'baat ə xkapaat'aty jəts əts ja nugo nwinəxt.

¹⁷ Jade'en ja ttu'unt ja naxwii'nit jaa'y səm ariin yikwigumy'in. Abiky ja tpiktaajkit ja y'ək jəts ja tniə'əty ja jəən miditəni juuni kape'tsp, jəts ja ariinbajk abiky yikpəkjə'əkt, jade'ents idə'ən ja jaa'y yiktu'undit səm pənjabən tmi'əy'aty tkami'əy'aty ja Dios.

¹⁸ Jade'en idə'ən ja Juan ja t'ana'amin'aty, jade'ents ja ttukmadəy ja mayjaa'y ja əgyajpxy ja əy'ayuujk.

¹⁹ Nəyi wyingugajpxy'i'n ja mək ja windsən Herodes ku ja tniə'əxy'aty ja Herodias, ja myiga'əxy Felipe ja nidiə'əxy, jəts nəyi tyamigajpx ja' sə jaty ja jam wyinaty tyundigəy;

²⁰ xjats ja Herodes ka'ap ja tməjpikta'əky, jaəkyimdyundigəy ja', ojts Juan ja tyikpuxəktəki.

Ku ja Jesús nəəbety

²¹ Ku ja Juan wyinaty ka'anim yiktsumy, ku ja jam tyiknəəbejty ja mayjaa'y, winets ja Jesús jam nəəbajtməə; ixjam ja wyinaty Dios'ajot'aty ku ja tsajp y'awaajch

²² jəts ja Espiritu Santo ja jade'en nīgida'əgyi əxim tsapak, wa'ats ja yik'ijxy, winets ja Dios Teety y'ayuujk yikmadəəy, yide'en ja jap tsajpjətpy wya'a'n:

—Əts me n'U'nk'ajtpy; ndsəky'ajtpy mets jəts njantyaotkuk'ajtpy mets.

Ja jaa'dyi pən jaty ja Jesús tyeety'əp

²³ E'əpxmajkin ja Jesús wyinaty ja yjuməjt ku ja tyunk ja tjəpwə'jkii'i'n. Nəmdip idə'ən jəts ku ja teedyi ja José. Jəts ja José tteety'aty ja Eli,

²⁴ jəts ja' ja Matat, jəts ja Matat ja Levi. Jade'en nabyayə'əyi Levi ja Melqui, Melqui ja Jana, Jana ja José,

²⁵ José ja Matatias, Matatias ja Amós, Amós ja Nahum, Nahum ja Esli, Esli ja Nagai,

²⁶ Nagai ja Maat, Maat ja Matatías, Matatías ja Semei, Semei ja José, José ja Judá,
²⁷ Judá ja Joana, Joana ja Resa, Resa ja Zorobabel, Zorobabel ja Salatiel, Salatiel ja Neri,
²⁸ Neri ja Melqui, Melqui ja Adi, Adi ja Cosam, Cosam ja Elmodam, Elmodam ja Er,
²⁹ Er ja Josué, Josué ja Eliezer, Eliezer ja Jorim, Jorim ja Matat,
³⁰ Matat ja Leví, Leví ja Simeón, Simeón ja Judá, Judá ja José, José ja Jonán, Jonán ja Eliaquim,
³¹ Eliaquim ja Melea, Melea ja Mainán, Mainán ja Matata, Matata ja Natán,
³² Natán ja David, David ja Isai, Isai ja Obed, Obed ja Booz, Booz ja Salmón, Salmón ja Naasón,
³³ Naasón ja Aminadab, Aminadab ja Aram, Aram ja Esrom, Esrom ja Fares, Fares ja Judá,
³⁴ Judá ja Jacob, Jacob ja Isaac, Isaac ja Abraham, Abraham ja Taré, Taré ja Nacor,
³⁵ Nacor ja Serug, Serug ja Ragau, Ragau ja Peleg, Peleg ja Heber, Heber ja Sala,
³⁶ Sala ja Cainán, Cainán ja Arfaxad, Arfaxad ja Sem, Sem ja Noé, Noé ja Lamec,
³⁷ Lamec ja Matusalén, Matusalén ja Enoc, Enoc ja Jared, Jared ja Mahalaleel, Mahalaleel ja Cainán,
³⁸ Cainán ja Enós, Enós ja Set, jøts Set tteedyi ja Adán, jøts ja Adán ja Dios Teety.

4

Ku ja Jesús ja miku' tyaguanäyi jøts ja yikpøktyunwa'añi

¹ Xjats ja Jesús wyimbijty jam Jordángit nøø agø'øm. Tø ja Espíritu Santo ja tyatøjiniyi jøts ja jam yiknøjkxøø tø'tøts etjotp ma niti kya'ity.

² Jamts ja ojts chøøni wixikxyøøw jøts ja miku' ja jam yjot'ejxwa'añi. Niti ja tkajii'kxy jadine'en jøtsnim ja pyaajtøø ja yuu.

³ Winets ja miku' ja ñimaajyøø:

—Pøni janch ku me mjanchDios U'ngi yik'øyi yø tsaa tsapkaaky.

⁴ Jøts ja Jesús t'adsojimbijty:

—Yide'en jap nøkyjxpy wya'añ: “Kuuyi Dios kyajpxy møj, kidi ja'ayip ja naẏwii'ñit jaa'y nugo tyajujky'ajttip ti jaty yikjøø'kxp.”

⁵ Xjats ja miku' ja ojts wyaanijxxyi jam møj kojpkøjxp, jøts ja jam tyuk'ejxøø wine'enin ja kajp naẏwiiñ.

⁶ Yide'en ja miku' ñimaajyøø:

—Nmøøgyøxp mets ya'at tuki'iyi wine'en øts yø kajp nnitani ja møj ja mutsk. Jade'en øts yø tø nyikmø'øy, øyts øts yø pøn ndyimyot'ot pøni pøn øts yø nmo'owampy.

⁷ Pøni xwinguxanaapy øts jøts ø xwindsø'øgit, winets mets yø tuki'iyi xja'ajtkøxt.

⁸ Xjats ja Jesús t'adsøøy:

—Miku' jiwa'ak. Kidi øts ya xwin'ixy, pø yide'ents ja Dios kyajpxy wya'añ: “Ja Dios Teety tu'ugyi mwindsø'øgip, ja' tu'ugyi mduujnip ja yja' pøni sa ja wya'añ.”

⁹ Xjats ja miku' ja wyaanøjkxkøjmiyøø jam Jerusaléngit kajpkøjxp jøts ja tsaptøjkøjxp yikpajtyøø, jøts ja ñimaajyøø:

—Pøni janch Dios U'nk mets, katswoon ya;

¹⁰ pø nømpxi Dios kyajpxy jøts ku ja tnøjmit ja y'an kilis jøts me myik'ejx'ett, jøts ku me ka'ap ti mjatit.

¹¹ Mets ja mdsa'anjø'øgit jøts mdeky ja tsaa kyakumit kyayo'odsit.

¹² Xjats ja Jesús t'adsøøy:

—Janch nayide'ents ja Dios kyajpxy wya'añ: “Kidi mDios xjot'ixy.”

¹³ Jade'ents ja miku' nisudso'ampy kya'ukwinmaa'nbyatnaa sa ja tjaakjot'ejxkojt ja Jesús, jøtsnim ja jade'en ñimyajtstuujtøø.

Ku ja Jesús tjøptøki ja tyunk Galileit etjotp

¹⁴ Jøts ja Jesús ñøjkxnaa Galilea, møk'ampy ja Espíritu Santo ja wyinaty tø tyatøkiyi, jade'en ja tmøøt'aty, tum ja' idø'øn ja jaa'y wyinaty y'aawidip y'ayuujkidip o maðsoo.

¹⁵ Yats ja yik'ixpiky ma jaty ja tsaptøjk jam, jade'ents ja o pøn kyajxa'agiyi.

Ku ja Jesús yja'jty jadigojk Nazaretit kajpjotp

¹⁶ Jøts ja ojts ñijky Nazaret, jam kojpkøjxp ma ja wyinaty tø myutsk'aty. Poo'kxin xøøw wyinaty ku ja tyøjkiyiñ jam tsaptøjkjotp, jade'en idø'øn ja tkostumbri'aty, xjats ja tmiwa'kukiyiñ ja Dios kyajpxy jøts ja tkajpxy.

¹⁷ Ja nøky ja wyinaty tø yikømo'øy midí ja Dios kyugajpxy Isaías yjaay; jøts ku ja ojts t'agiibyaky, ja' ja jap pyaajt ma jap wyinaty yide'en kyøxja'ayi:

¹⁸ Dios Teety øts ja y'Espíritu Santo xpudøjkp,

ja' ø xmøøpy, ja' ø xpiktakp jøts øts ja ayoobi jaa'y ndukmado'odit ja øyajpxy ja øy'ayuujk; ja' ø tø xkexy jøts øts ja ngajpxjot'amøkidit pøn amjotmay'oo'ktip tsaachjotmay'oo'ktip, jøts øts ja nyik'awa'atpsidsø'ømmit pøn jade'en ejtnidip sam tsumy jaa'yindi,

jøts øts ja nyikwin'ejxwá'lkxtit pøn wimbeets kugoots ejttip;
jøts øts ja nyik'awa'atpidsø'ømdit pøn øy sagasa yiktundip;

¹⁹ jøts øts ja Dios Teety ja yiknitso'ok'ajtin nnigajpxiyit.

²⁰ Winets ja Jesús t'agimuyjky ja nøky, jøts ja ojts tkømo'øy ja tumbi, jøts ja y'ixaajky, jøts ja mayjaa'y ka'ap ja y'ukni'ejxujtniyyi.

²¹ Xjats ja kyajpxøjkijyi'n jøts ja wyaañ:

—Ixamts idø'øn yø jade'en tø yjaty tø kyubety mee mwingujky sa ja Dios kyajpxy wya'añin.

²² Jøts ja ni'ijtyi t'ødyejtøø ja Jesús, ñigyumaapts idø'øn ja tjawidi ku myadya'aky ja amdusj tsaachuj pøni sa jaty ja ñii'mxyidi, jøts ja xem yam ñayiktiyidi:

—¿Kidi ja Joséjip idø'øn ya'at ja y'u'nk?

²³ Jøts ja Jesús wyaañ:

—Tügyajpxy yide'en meets inet mdyimwya'añ: “Tsøøyibi, nachøøyi kø'øm”; mnayinømdipts inet: “Jade'en sa øø tø nnimadøy m'adi'ich jam Capernaum, tu'unts inet ya nayide'en mgø'ømnaxkijxy mgø'ømkajpxkijxy.”

²⁴ Jøts ja yjaakwaañ:

—Tiy janch meets idø'øn nnøjmi jøts ku ni tu'ugin Dios kyugajpxy kyayikupiky kyø'ømnaxkijxy kyø'ømgajpxkijxy.

²⁵ Tyimñømp øts, kawinaak ja ku'oktyø'øxy ja wyinaty ya Israelit etjøøjty ku ja Dios kyugajpxy Elías y'atsinaay, ku et kyatuuy tigøøk jumøjt jagujkp winets ja yuu yjanch'ijty o magajp;

²⁶ ni tu'ukts ja kyayiktanigajxtøø ja Elías ya Israel, ne'egi ja' Dios ja tyanigajx pøn jam wyinaty tsinaapy Sarepta, jam Sidón kajp wingon.

²⁷ Nay jats jaa'y wyinatymidi ya Israel pøn putstip ku ja Dios kyugajpxy Eliseo yjaa'ajty, jøts ja ni tu'ugin kyataadyøø ja pyu'uts. Pøn txøøw'ajtp Naamán, ja' ojts ne'egi ja yja' tyay pøn jam Siria kunaajx'ajtp kugajp'ajtp.

²⁸ Xjats ku ja jade'en tmadoodøø jøts ja yjantyimy'ambøjktøø pøn jaty jam wyinaty tsaptøjkjotp.

²⁹ Ojts ja tñibidø'økti ja Jesús, jøts ja tkajxpidsømdit jam kajpjotp, jøts ja tyknøjkxtøø jam kojpkubajkp ma jam tu'uk ja kats'aaw, jamts ja tkutejnaxwá'andi.

³⁰ Jøts ja Jesús jadi'ifiñ jam mayjaa'y agujkp ñajxy jøts ja jade'eñi chøø'ñ.

Tu'uk ja yaa'dyøjk pøn ja miku' tø tyatøkiyi

³¹ Jøts ja ojts ñijky Capernaumit kajpkøjxp midi jam Galileit etjotp tamp, jamts ja tyik'ixpiky ja jaa'y ku poo'kxin xøøw.

³² Ñigyumaap ja tjawidi ku ja jade'en yik'ixpikyidi, kumi tum ja' ja kyajpxy midi kutujk møøt.

³³ Jamts tsaptøjkjotp wyinaty tu'uk ja jaa'y pøn ja miku' wyinaty tø tyatøkiyi, ja'ats ja møk yikwajnøø:

³⁴ —Majstutk øøts; ¿ti øø xanibøjkjip, mets Jesús Nazaretit jaa'y? ¿ja' me tø xnimeni jøts øø xyikudigø'øty? Wa'ats me n'ejxkapy mbøn mets, pø Diosxi me m'u'nk'ajtip.

³⁵ Xjats Jesús ja miku' t'adsøøy, yide'en ja tnimaay:

—¡Amøñi et, kidi mgajpxy, jøts majstutu'ut yø jaa'y!

Winets ja miku' tyiknaxkidaajky ja jaa'y jøts ja ttawaajch ja jaa'y, nika'ap ja sa ttuuñ.

³⁶ Ni'ijtyi ja jaa'y yjantymchø'jikidøø jøts ja xem yam ñawajnidøø:

—¿Ti kajpxy ti ayuujk yø jade'en kyajpxy? ¡Møjtá'aky yø t'ane'emy yø miku' jøts yø jatyi chø'øgi!

³⁷ Ja Jesús idø'øn yik'aawip yik'ayuuujkip øy maðsøo.

Ku ja Jesús tyikmøkpiky ja Simón Pedro tyaaqmø'jt

³⁸ Xjats ja pyidsimy jam tsaptøjkjotp jøts ja ojts ñijky jam Simón tyigam, jamts ja tyøjkijyi'ñ. Pøjkjip tamik ja Simón jam wyinaty ja tyaaqmø'jt, jantyimyjøn'oo'kp ja wyinaty. Winets ja Jesús yiknimaay jøts ja ttu'unt ja may'ajtp jøts ja t'ext.

³⁹ Jøts ja ojts t'ixy, ojts ja ñaxkøy ma ja pamaa'y jam wyinaty, jøts ja møk twingugajpxiyi'ñ ja jøømba'am, jøts ja jatyi wyinaajky, jøts ja jaa'y nay jatyi tyanaagyukiyi'ñ, jøts ja kø'øm t'ejxpinaxwá'aky ja kaaky ja jii'kxy.

Ku ja Jesús tyikmøkpiky ja maabyamaa'y

⁴⁰ Kuts ja xøøw yjaxnaa, winets ja Jesús ojts yiktaninijky ja maabyamaa'y pønity jam sagasa jajtp; jøts ja ojts tu'uk tu'uk tkønixajy, jøts ja jade'en tyiiktsokijxy.

⁴¹ Nay jamts ja winaaqinmidi pøn ja miku' ttawajtsidøø nayide'en, jøts ja yjanchnømdit møk:

—Dios U'nkxi mets.

Jøts Jesús ja møk twingugajpxiyi'ñ, ka'ap ja tyikjaty jøts ja kyajpxtit, pø ñijaa'widipxi ja jøts ku ja' Cristo.

Ku ja Jesús kyajpxwa'kxy jam Galilea

⁴² Xjats ku xyiiindyajky, jøts ja Jesús chøø'ñ kajpjotp jøts ja ñijky jam ma pøn kyafity. Jøts ja mayjaa'y ja yjanch'ixa'ayi jøtsnim ja yikpaajty ma ja jam wyinaty. Yikta'anwiwandip idø'on ja', ka'ap ja tmajtstu'utwa'andi jøts ja choont,

⁴³ yide'ents Jesús ja ñimaajyidøø:

—Nayi nnigajpxwampy øts ja Dios y'øgyajpxy y'ømyadya'aky o magajp, pø ja'agøjpxi ø tø nyikexy.

⁴⁴ Jøts ja Jesús jam jade'en kyajpxwa'kxy ma jaty ja tsaptøjk jam Galilea.

5

Ku ja ajkx may'ampy yikma'aky Jesús myilagri'ajtingøjxp

¹ Tuk'ojk idø'on ja Jesús jam yikpaajty mejy agø'øm ma txøøwi Genesaret; jamts ja mayjaa'y ja ñimejniyøø jøts ja t'amidodukwa'andi ja Dios y'øgyajpxy y'ømyadya'aky. Janch yik'atejmujknipst idø'on ja Jesús jam wyinaty

² ku ja t'ejxpaajty majtsk ja barki tawa'ats jam nøø adsay agø'øm, tø ja ajkxmakpi jam wyinaty pyidsømgøxti, jam tya'ajkxmaajk ja wyinaty tpujti.

³ Winets ja Jesús tu'uk ja barki ttatøjkii'ñ midi ja Simón yja'ajtpy jøts ja tnimaay wan tniyikjiwa'aky waani jøts jam wingon kidyimdy'a'ant møøt ja tsayjojt. Jøts ja jam jade'en y'ixaajky, jøts ja jam tyik'ixpøjktøjkii'ñ ja mayjaa'y.

⁴ Xjats ku ja kyajpx'abajtyii'ñ jøts ja tnimaay ja Simón:

—Yiknøjx yø barki jam ma yø nøø køjnkjawi, jamts xniwejtspattit yø mda'ajkxmaajk.

⁵ Jøts ja Simón t'adsøøy:

—Windsøn, tuktsunaxy øø tø njanchjatuñ, ni tu'ukts øøts n'ajkx tø ngapaaty; nøøwejtspatp øts inet yø nda'ajkxmaajk jadigojk, pø tøxi me mwa'añ møk'ampy.

⁶ Jøts ku ja jade'en ttundøø, may ja ajkx ja ojts tmatsti, janch køøtswambim ja tya'ajkxmaajk ja'adi.

⁷ Winets ja tniyamdøø ja myigu'ukti pøn jam wyinaty; jadu'ukpi barkijotp jøts ja pyudøkiyidit. Nøjkxti dø'on ja jam, ojts ja barki ja majtsk tyik'ujtskøxti øy ja yjawi yjanchkøjntøjkinidit.

⁸ Xjats ku ja Simón Pedro ja ojts jade'en t'ixy, winets ja twinguxanaay ja Jesús jøts ja tnimaay:

—Windsøn'ajtim, majtstutk øts, ka'ap øts yø xpaat'aty jade'en, pojkkpitumbi jaa'y øts.

⁹ Janch tsø'jkiñip idø'on ja Simón wyinaty jøts nayide'en ja myigu'ukti, ja'agøjxp ku ja ajkx ja wyinaty jadine'en tø tma'akti.

¹⁰ Nayi tsø'jkips idø'on ja Jacobo møøt ja Juan, ja Zebedeo y'una'jkti pøn ja Simón møøt ñamyigu'uk'atyyi. Jøts ja Jesús tnimaay ja Simón:

—Kidi mdsø'øgi, icyamyi nduknijawidit sudso jaa'y ja nitsø'ok'ajtin tpaatt.

¹¹ Jøts ja byarki ja jam nøøba'am tyikja'attøø, jøts ja jamyi tnikakøjxtøø tuki'iyi, jøts ja tmøødidøø ja Jesús.

Ku ja Jesús tyiktsø'øky ja jaa'y pøn jadi'iñi putsnip

¹² Kuts ja Jesús jam wyinaty tu'ukpi kajpjotp, winets yja'jty tu'uk ja jaa'y, møj pu'uts pa'am ja pøjkip, jøts ku ja Jesús yik'ejxpaajty jøts ja twinguxanaay. Jamyi ja ñamyujstaajkøø jøts ja tminuu'kxaaajky, yide'en ja tnimaay:

—Teety, mmøøt'ajtpy mets ja møk'ajtin jøts ø xyiktsø'okt, yiktsokts øts mdsojk'ajtingøjxp.

¹³ Jøts ja Jesús ja ojts tkønixajy, yide'en ja tnimaay:

—Ndsøky'ajtpy øts jøts mdsø'okt, tsokni.

Ja'ayi ja jade'en wyaañ, jatyi ja pu'uts wyinajky.

¹⁴ Xjats ja Jesús møk'ampy tnimaay ja jaa'y jøts kidi ja pøn ttukmadøy. Yide'en ja tnimaay:

—Jamyi dø'on mnøjkxt jam teety wyindum, jamts xpikta'akt ja myøjxin midi ja Moisés ñi'ana'am, ja'agøjxp ku tø wya'ach ja mbu'uts. Jade'ents ja jaa'y ja t'ejxtit tnijawidit jøts ku tø mdsø'øky.

¹⁵ Yikmøjpiaktak'adøøsp idø'on ja Jesús, may ja jaa'y ja ñimen'adi'ichiyi, namay ja ñamyuyidi jøts ja pyatmadøyi, jøts ja tnanikyiktsø'okwa'añidi ja pya'am.

¹⁶ Ja Jesús jam ja ñijky ma abak et ma ñiti kya'ity, jamts ja Dios Teety t'ajot'ajty.

Ku ja Jesús tyiktsø'øjky ja køxujpxi pakxujpxi

¹⁷ Tuk'ojk idø'on, jam ja Jesús wyinaty yik'ixpiky, jamts idø'on ja fariseotøjk møøt ja kajpxwejpitøjk wyinaty chøønidi wine'enin ja wyinaty tø choondi o magajp, pømbi mendip

Galileit etjotp, Judeit etjotp, jøts Jerusalengit etjotp; ku ja Jesús tnankyjay'ijxyi ja Dios Teety myøk'ajtín ku ja pamaa'y ja tyiktsø'øky.

¹⁸ Winets ja jaa'y tkiijja'jttoø tu'uk ja pamaa'y pøn køxujxp pakxujxp, jøts ja jap tøjktøpy tyiktøkiwya'andi jøts ja ttawingugii'yidit ja Jesús.

¹⁹ Nimåts kya'awa'adsi ma ja tyøkidit kumi janch mayjaa'y jam wyinaty. Xjats ja tøjkiixpy pyajttøø, jøts ja ojts tnikiidyu'utti ja tøjki, japts ja tyikwinajktøø ja pamaa'y jøts ja ttawingugii'yidøø ja Jesús jap mayjaa'y agujkpy.

²⁰ Kuts ja Jesús ja ojts jade'en t'ixy kudam ja amumdu'uk ja yjanchja'win tjagyapti, jøts ja pamaa'y ja tnimaay:

—U'nk, nbøkmyee'kxpy mets.

²¹ Winets ja wyinmaadyøjkidøø ja kajpxwejpitøjkti møøt ja fariseotøjkti, yide'en ja wyinmaydi: “¿Pøn yø jaa'y jade'en, tigøjxp ku Dios yø jade'en twingajpxnaxy? ¿Pøn ja pøky ya t'ukmaa'kxp, kidi tu'ugyip Dios pyøjkpimee'kxy?”

²² Wa'ats ja Jesús ja tnijawi sa ja wyinaty wyinmaydi, jøts ja tnimaay:

—¿Tigøjxp ku jade'en mwinmaydi?

²³ ¿Ja ti ne'egi jawaani jajtni, kuts yø pa'amjaa'y nnøjmit, “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjknxi mdigam?”

²⁴ Xyamnim meets inet x'uk'ext mabaat øts idø'on ja møk'ajtín nmøøt'aty ya naxwiiñ jøts ø nmaa'kxt ja pøky.

Xjats ja tnimaay ja køxujxpi pakxujxpi:

—Pidøkni, wa'kukiñi, wejtsj'øk yø mmaabajt jøts mnøjknxi mdigam.

²⁵ Jatyi ja køxujxpi pakxujxpi pyidi'ijky, jøts ja tyanaagyukii'y'iñ jam mayjaa'y agujkpy. Wyejtsmujk ja myaabajt ja' ma ja jam wyinaty kyo'kni, jøts ja ñøjknxaa tyøjkwindum, møk ja Dios ja ttamøjawi.

²⁶ Jøts ja ñigyumaap tja'widøø ni'ijtyi, ojts Dios ja ttukmøjawiidi ttukunuu'kxyjawiidi, yide'en ja wya'andi ja ñichø'øgi adøtsni:

—Xyamnim inet ja tø n'ijxyindi midi niwindi kayik'eixpnim.

Ku ja Jesús tpawaay ja Levi

²⁷ Ku ja jade'en y'ukjajty, xjats ja Jesús jam pyidsimyi, ojts chøøñ jøts ja t'eixpaajty tu'uk ja yikugubajtpi, jam ja wyinaty chøøni ma ja ttukugubety ja jaa'y øy tyii'ji, jøts ja tnimaay:

—Møødik øts, møøt widejtk øts.

²⁸ Winets ja jatyi tyanaagyukii'y'iñ, jøts ja tuki'iyi tum jam tnikakijxy, jøts Jesús ja tmøødiyii'ñ.

²⁹ Jøts ja Levi xøøw ttuuñ jam tyøjkwindum jøts ja twindsø'jkii'y'iñ ja Jesús, mayts ja yikugubajtpi jam wyinaty møøt jadu'ukpi jaa'dyi. Jade'en ja jam møøt twindsøøniidi ja kaabyajt.

³⁰ Xjats ja fariseotøjkti møøt ja kajpxwejpitøjkti tpaagajpxnibøjkidøø ja Jesús pyabøjkpi, jøts ja tnimaadyøø:

—¿Tiku meets yø xmøøtkay yø yikugubajtpitøjkti møøt yø ka'øyjaa'dyi?

³¹ Winets ja Jesús y'adsøøy jøts ja tnimaay:

—Pøn tkaja'widip ja pya'am, ti tsøøyibi ja t'ukyikwa'andit. Ja' ja tyik'amaadyaktip pøn pamaa'dyi, pøn pya'am tja'wiy'ejtipp.

³² Kidi ja'ajipts ø tø nnimiñ pøn niwine'en kanabyøkyja'wiyidip. Ja' ø tø nnimiñ pøn tja'widip ja pyøky jøts ku ja pyøkmyøødidi, jøts tyiktigatstip ja chinaa'yindi.

Ku ja Jesús yiktibyijky tigøjxp ku ja kya'ayuu'atti

³³ Xjats ja tiibyøjktøø ja Jesús jøts ja tnimaadyøø:

—¿Tiku yø mbabøjkiptøjk janch nekim kyaydi tyøjxkti, jøts yø Juan yja' yjanch'amaay'atti møøt yø fariseotøjkti? Ni kyakaydi kyajøø'kxti, janch tsapakjpx'ejtipp yø'.

³⁴ Winets ja Jesús t'adsøøy:

—¿Ma meets jade'en tø x'uknijawi jøts ku tø'øxy ñigaabyi tø'øxy ñi'ukpi winet y'amaay'atti winet kyakaydi kya'uukti ku ja jemyaa'y jamni?

³⁵ Abikñimts ja tiempi tyimya'tmit ku ja jemyaa'y wyinaty kya'uk'ejtni ku ja jam wyinaty tø cho'onii; jaanims idø'on tiy pøn kya'uakaanit kya'uk'uknit, jaanims idø'on ja y'amaay'attit.

³⁶ Jøts ja nay ja'agøjxp ya'at ttanimadyaktøjkii'y'iñ:

—Ka'axi pøn wyetpach tta'agiyi jemwyet midit tyimjemñim, ku ja jade'en yiktu'unnt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimiywenip ja kyøøts'ajtín ja'.

³⁷ Jøts ka'ap pøn vino tta'adami po'duk midit namii'kxñim, ku ja jade'en ndu'unint jatyi ja tyiknigøødsi ja po'duk, windigøøpys tuki'iyi, windigøøpy ja vino, windigøømyipts ja po'ak.

³⁸ Paty ja vino midit ñamii'kxñim nda'ada'amyiñ ja jembyo'ak jøts jade'en nimidi kyawindigøøty.

³⁹ Nayide'ents ka' pøn t'uukwa'añ ja vino mididi nãmii'kxñim. Pøn tø t'uukuyjni ja vino mididi jekyip mii'kxñi, xumi ja' ja chøjky, kumi nømp ja tukajpxy: "Yø jekyip mii'kxyip tyimy'øy, ka'ap yø mididi tmi'abaaty."

6

Ku ja Jesús ttøjtøø ja ariin yam poo'kxin xøøw

¹ Poo'kxin xøøw idø'øñ, winets ja Jesús jam wyinaty ñaxy jam kamjotp møøt ja pyabøjkpitøjk, ja'ats jam wyinaty ttøjtjip ja ariin tøøm; jøts ja twixatsti ja ariinbajk jøts ja tjøø'kxti.

² Jøts ja fariseotøjk winaagin yiktøøjidøø, yide'en ja yiknimaadyøø:

—¿Tiku jade'en m'adø'øtsti mididi ka'ap pyaät'aty yiktu'unt poo'kxin xøøw?

³ Xjats ja Jesús y'adsøøy:

—¿Ka'anin meets ja Dios kyajpxy x'ijxy mididi tnigajpxp sã ja David tuk'ojk tmøøt'adijch ja myigu'uk ku ja wyinaty yjantyimyyu'ookti?

⁴ Pø tsaptøjkjotpyimxi ja tyøjkii'ñ, japts ja tnixajiyi'ñ ja kunuu'kxy tsapkaaky, jøts ja tkaadyøø møøt ja myigu'uk pøn jaty ja jam wyinaty myøøt. Yam ja ka'ap yjapaat'atyidi jøts ja tka'adyit ja'abi tsapkaaky, ja teetyøjkti ja paat'ajtidip kya'adyip.

⁵ Nayide'ents ja wyaañ:

—Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y pøn ja kyø'jadi'iñi tøtsnip

⁶ Jadu'ukpi poo'kxin xøøwts idø'øñ ja'agøjmyi ku ja Jesús tyøjkii'ñ jam tsaptøjkjotp, jamts ja yik'ixpøjkjotpyimxi ja tyøjkii'ñ. Japts wyinaty tu'uk jaa'y mididi y'aga'ngyø' xujxp;

⁷ jøts ja kajpxwejpitøjk jam tpa'ejxti tpagowdi ja Jesús, ja' ja y'ejxwandiip pøni y'ukyiktsøky idø'øñ ja pamaa'y ja' ku poo'kxin xøøw, jade'ents ja tni'øøniwya'andi.

⁸ Ti wa'ats ja tnijawii sã jaty ja wyinaty wyinmaydi jøts ja jaa'y ja tnimaay mididi wyinaty kyø' xujxp:

—Tani, jøts ixem nøjkx mdani kujk'am.

Jaty ja jaa'y tyanaagyukiyi'ñ jøts ja jam ñijxy tanaabyi.

⁹ Winets ja Jesús tnimaay ja mayjaa'y:

—Nyiktø'dip nyik'amido'odip inet yam: ¿Midi'ibi ndu'unimp ku poo'kxin xøøw, mididi'ibi kutuky ku n'ødyu'unint u ku nga'ødyu'unint? ¿ku nyiktsoojkint u ku nyik'o'jkint?

¹⁰ Jøts ja twin'ejkixxy pøn jaty ja jam wyinaty ttamujkiyip, jøts ja tnimaay ja pamaa'y:

—Xajtøw.

Tsoojk ja' jøts ja xyajtiy.

¹¹ Jøts ja yjadu'ukpi jaa'y yjanch'ambøjktøø, jøts ja xem yam ñawajnidøø, agø'ømyi sudso'ampy ja tjadyimy'ukyikpøky'a'adit ja Jesús.

Ku ja Jesús twiwijch nimakmajtsk pøn wyinaty kyudanaabyi'atwampy

¹² Winet ets ja Jesús ñijxy Dios'ajot'ajtpi jam kojpkøjxp, jam ja Dios Teety ja tnigajpxy tuktsunaxy.

¹³ Jøts ku xyiijndyaajky, jøts ja twaadsogijxy pøn jaty ja pabøjkjip, jøts ja twiwijch nimakmajtsk pøn ja tyejtjip kudanaabyitøjkti.

¹⁴ Ja'ats idø'øñ ja'adi ja Simón mididi ja xyødejtigajts jøts ja tpiktaajky Pedro; møøt y'uch Andrés ja', møøt ja Jacobo, møøt ja Juan, møøt ja Felipe, jøts møøt ja Bartolomé.

¹⁵ Jam ja Mateo, Tomás, Jacobo pøn ja Alfeo myajnk'ajtpy; jøts ja Simón ja cananista;

¹⁶ jam ja Judas ja Jacobo y'uch; jøts ja Judas Iscariote, pøn wyinaty tkøyawkwamp ja Jesús.

Ku ja Jesús tyik'ixpijky ja mayjaa'y

¹⁷ Xjats ja Jesús tmøøtkidaaajky ja kyudanaabyitøjk, jøts ja tmøøtja'jty jap jøyyøtpty niduki'iyi møøt ja pyabøjkpitøjk; nay jam wyinaty øy pøndi pøn jaty tso'ondip jam Judea, jam Jerusalén, jøts jam mejy agø'øm jam Tiro jam Sidón. Ja' ja jam wyinaty tø tnmendi jøts ja tpatmado'odit ja Jesús, jøts ja pyamaa'y ja tnankyiktsø'okwa'añidi.

¹⁸ Winaagin jam pøn ja miku' tø tyatøkiyidi, tsokøxtits ja'.

¹⁹ Jøts ja jaa'y ni'ijtyi tnixajiwya'andi ja Jesús. Pyaätwandiip ja' ku ja ttuktatsø'øky ja myøk'ajtin ja pamaa'y.

Ja xondaajkin jøts ja ayo'owin

²⁰ Winets ja Jesús y'ejxji'jky ma ja pyabøjkpitøjk jam wyinaty jøts ja tnimaay:

—Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaättip ja Dios kyutujk mididi ja tyanitanaapy ja yjaa'y.

²¹ Nay Dios ja tkunuu'kxp pøn yu'oo'ktip xø'oo'ktip, ja' ja tyiknajkxøjxp.

¹⁷Jøts pøn yaxtip jiidyip, kunuu'kxy Dios ja nayide'en yik'ityidi, ja'ats ja ttukpaadidip ja xondaajkin.

²²'Mgunuu'kxip meets Dios øy meets ja jaa'y mjamidsep'atyidi øts køjxp, øy ja mjabawøpyidi, øy ja mjaga'ømyigajpxyidi, øy mjagayiktsokti, øy mxøøw mguya'axy kamadøyim yjayikjawidi ja'agøjxp ku ø xpabøkti.

²³Kidits mjotmay'ookti, kidi x'ayoojidi, japnim ja tsajpjøtpty mwingaxø'økxiyidit; pøn jade'en mduujnidip, yø jade'embi jaa'y tyeety'ap tka'ødyundøø nayide'en ja Dios kyuga-jpxtyi.

²⁴Jøts mjanch'ayøøy mee kumeeñ jaa'y, yaa'y meets iiy jotkujk mdsinaagyotji.

²⁵'Mjanch'ayøøy meets pøn tum jaa o ti tmøøt'ajttip, mjanch'ayuu'ajttip mjanch'axøøw'ajttip meets nøjkk.

'M'ayøøy meets pøn yam aguik jotkujk yiknajxtip, mdaya'axtipts meets ja mwinnmaa'ñ jadigojk.

²⁶'M'ayøøy meets ku mee myik'ødyijy myik'øñøjmi, pø nayide'ents ojts yiktejti yik'ødyejti pøn ojts nugo ñadyijyi ja Dios kyugajpxy.

Paat'ajtip jøts ja mmidsep yikmijotjimbett

²⁷'Ni'ijtyi madowdi wine'enin mja'atti: Tsokti miyujy'atti ja mmidsepøjki, pudøkidi ja' pøn mjagatsojkidip,

²⁸amidowdi ja Dios jøts tkunuu'kxt ja mmidsep pøn o sagasa mnimaajyidip, ku'amidowi pøni pøn mmi'ambøjkidip pøni pøn sagasa mdunwajnidip.

²⁹Pøni mgojxip mdse'ekip, ja' øy ku xmaa'kxuktit; jøts ku pøn mbøjkkidit ja yukwop, jaaktyimyo'odipts ja mnijan.

³⁰Kidi kanajtsjawim xjawidi ku tigati myik'amidowdi; jøts kidi jatyi o pøn xamatsti ku pøn o ti tø tñaxji.

³¹Kidi meets ja jawyeen jade'en xjøp'ixy pøni sã mee xjatsøky, meets idø'øn mbaat'ajtip jawyeen mnajstunip sã dø'øn ja yjawi tsoktin jøts meets ja jade'en xu'unt.

³²'Øy meets ja'ayi møøt mjanamyaawya'añiyidi pøn mee møøt mnachøkyiyi, ¿ti øy'ajtints meets jade'en mdumpy? ¿Ti ja' ja' ka'øy jaa'y kyajajtip? Pø tyundipxi ja nayide'en.

³³¿Ti øy'ajtin meets jade'en mdumpy øy meets ja'ayi xjamay'aty pøn mee nayide'en mdu'unxiyip? Pø tyundipxi ja ka'øy jaa'y ja nayide'en.

³⁴Uk ja'ats meets o tigati mduk'anuu'kxpy pøn mee m'a'ejxip tyikwimbetp jawaani mayjawi, ¿ti øy'ajtints meets jade'en mdumpy? ¿Ti ja ka'øy jaa'y ja jade'en tka'anuu'kxyajktip o tigati ja yja' jøts ja myiga'øy jaa'y ja nayide'en ttukubatti jawaani may?

³⁵Ka'ats meets idø'øn xmidsepøkt ja mmidsep, tsokti xmiyujy'attit, mduujnip meets ja may'ajt ja'. Øy meets ja tigati xuk'anuu'kxt jadi'iñi, kidits meets ja xjøp'ixy'aty jøts ja mmigubajtxidit jawaani møj jawaani may. Møjts meets ja myikwimbetjtxiyidit, ja Dios Teety tsajpjøtptyit jade'en meets ja m'u'nktejyit; ti sã ja Dios Teety tmi'øy'aty nayide'en ja ka'øy jaa'dyi ja namyikaxi jaa'dyi.

³⁶Mja'myatstip meets jøts mba'ayo'odip o pøn nayide'en sãm ja Dios Teedyin ja tpa'ayøyin.

Kidi pøn o ti xawindsø'ødyi

³⁷'Kidi pøn nugo o ti xapøky'ejxti, jøts Dios ja nayide'en mgapøky'ejxidit. Maa'kxukti, jøts ja Dios nayide'en mmaa'kxukidit.

³⁸Mo'odi o ti pøn, winets o ti nayide'en mmo'ojidit ja Dios. Nayide'en meets ja mmo'ojit mgamo'ojit pøni sã meets ti xyaky xkayaky møj may o ti. Nayide'en meets ja Dios mdunit pøni sã meets mmigu'uk xufi. Nay ja'ats ja yik'awetsp.

³⁹Xjats ja Jesús ttanimadyaktøjkiyii'ñ jadu'uk ja madya'aky, yide'en ja wyaan:

—¿Ma ja winap jaa'y tø t'uktuu'niiway ja myiwinap jaa'y? Pø namajtskxi dø'øn ja tyimgunaxtit ku et'aaw ja ma tpaattit.

⁴⁰Uk kuts pøn, pøn tni'ixpøjkimyidip o ti tunk, ka'axi mibaat twinaxtit ja yik'ixpøjkipidi; pø wan idø'øn jaanim wyinaty.

⁴¹'Jøts meetsmi, ¿suso dø'øn ja mmigu'uk pyøky x'ejxpajtyi jøts ja mja' ne'egi xka'ixy kudam ja jawaani møj?

⁴²Jøts, ¿sudsots mets idø'øn namyikajxibim xkajpx'øyiwyaa'ñ yam mets ja mdsinaa'yin øy xkayikyø'øy? iMeets win'øø'mbi ataadyi! Yik'øyidi jawyeen ja mga'øchinaa'yindi, winetnims ja mmigu'uk chinaa'yin xkajpx'øyiyidit.

Pøni sã wyimbidsimy øy ti, ja'ats tyikwingaxø'kp pøni sã ti y'øyi kya'øyi

⁴³'Ma meets øcha'amguipy tøk'uk'ixy jøts ku ja tyiktøømi ja ka'øcha'am; uk ja ka'øcha'amguipy tyiktøømi ja øcha'am, nima.

⁴⁴ Ja tyøøm ja kipy yikta'ejxkajp pøni sa ja tyøømi øy ka'øy: ka'axi ja iigi tsa'am yikwiduky kujp kipykøjxp, ni jam ja uvi tsa'am kyawinaky jam kujp aatskøjxp.

⁴⁵ Jade'ents idø'øn ja øyjaa'y pøn øyjaa'y, ka'ap ja t'aawi tjoojti ja ka'øybi winmaa'ñ, ka'ap ja yjemwa'añ tyewa'añ kumi øyjaa'y ja'; pønts ka'øyjaa'y'ajtp ja ka'øybits ja y'aawip yjoojtip, yjemwa'andi tyewa'andi kumi jam idø'øn ja tyimyøødidi ja kya'øy'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Majtsk jøøp ja pøch kyojpk

⁴⁶ Niti øy'ajtin meets jade'en xkatuñ ku mee xjanøjmi, "Nwindsøn'ajtim, nwindsøn'ajtim", jøts ka'ats xpadundi pøni sa njawa'añ.

⁴⁷ Yā net ndukmado'odit pønin ja kyaxø'økti ja jaa'y pøn ø xnimemp jøts øts n'ayuujk ja xpatmadoojidi, jøts ja jade'en tpadundi sa nwa'añ:

⁴⁸ jade'enin idø'øn ja nbiktaajkin sam ja jaa'y tyøjkøjyin, jawyeeen ja køjnk øy øy tñidajiyii'ñ ja tyøjk, jøts ja tsaq ja amuum ttukpøchkojpk'ajty. Xjats ku ja møj nøøgom jam wyinajky, aguwanī ja tyimiykjø'tjø'økwa'añ ja tøj, jøts ja niwine'enin nisā tkatuuñ, kumi tsaq ja wyinaty tyeky'ajtpy.

⁴⁹ Pønts ø xjapatmadoojidip ja n'ayuujk jøts ka'ap jade'en tpadundi sa nwa'añ, ja'ats idø'øn jade'endi sam ja jaa'y midi tyøjk tkoj xixñaxkijxy. Niti ja tkadukpøchkojpk'ajty, jøts ku ja møj nøøgom jam wyinaajky jatyi ja tmimajadaajky, ojts ja tyikiday jøts ja tyimiykudigøøy.

7

Ku ja Jesús tyiktsø'øky ja romanit soldādi ja tyumbi

¹ Xjats ku ja Jesús jade'en tñimaagyijxy ja jaa'y, winets ja ñijky Capernaum.

² Jamts wyinaty chøøni ja soldādi windsøn, romanit jaa'y ja'. Jamts tyumbi ja tu'uk midi ja janchkamajsttu'udyim yja'wip, mowa'añ ja yjanchpiky, ookwanip ja wyinaty.

³ Ku ja soldādi windsøn tñimadøøy ja Jesús, winets ja ttaniguejxy winaaagin ja israelit møjaa'dyøjkti, jøts ja t'atstuk'amidoowa'añ ja may'ajt, wan tñiñ ja Jesús jøts cho'økt ja tyumbi.

⁴ Xjats idø'øn ja tñinøjkxtøø ja Jesús jøts ja ojts t'amidowdi ja may'ajt møk'ampy, yide'en ja tñimaadyøø:

— Paat'ajtip xpudøkit yø soldādi windsøn;

⁵ kumi chøjkpy yø' adøm ngajp, nayø'øts tø tñi'ane'emy jøts ja tsaptøjk tø kyøjy.

⁶ Winets Jesús ja tmøødiyii'ñ. Jøts ku ja jam wyinaty yja'atwanidi ma ja tøj jam, jøts ja soldādi windsøn ttukjøpkubajtyii'ñ pøn jatyi ja minamyaajyip, jøts ja ttuknimaay ja Jesús:

— Mets teety, kidi xka'øyjawi, ka'ap ø xpaat'aty jøts mets ya mdøkit ndøjkjøøjty;

⁷ paty ø kø'øm tø nganay'a'ejxyi jøts mets jeexyip kø'øm tø n'ats'ixa'ay. Ana'am ja'ayi, jøts øts ja ndumbi cho'økt.

⁸ Ane'emy ø nayide'en nwindsøn xyik'ity, nay ja øts ndumbitøjkmidi pøn ø n'ana'amidip. Ku pøn nnøjmi: "Nøjx", nøjxpts ja'. Uk nnøjmits øts yø ndumbi o ti, jatyits yø jade'en tpaduñ.

⁹ Ja'ayi Jesús ja jade'en tñimadøøy ñigyumaap ja tja'wiyii'ñ ku ja jaa'y jade'en, jøts ja tñiwa'akjimbijty pøn jatyi ja jam wyinaty payø'øyip, jøts ja tñimaay:

— Tyimyjanch, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy.

¹⁰ Jøts ku ja waabi yja'ttøø møøt ja jøpkuyø'øyibidi jam tøjkjotp ma ja pamaa'y jam wyinaty, tødamik ja wyinaty myøkpøjkni ja pamaa'y.

Ku ja Jesús tyikjujkyiky ja ku'økyø'øxy myajnkun'nk jam Nañ

¹¹ Ukajjts ja jade'en, xjats ja Jesús ñijky jam ma kajp txøøwi Nañ, mayjaa'yts idø'øn ja jam wyinaty pawidejtip, may ja pyabøjkpitøjk ja jam tmøødi.

¹² Kuts ja yja'jty jam kajpwingon, jøts ja ojts t'ejxpaaty tu'uk ja oo'kpi yikpagi'iy jøts ja y'atsnaxøkit, tu'umchi dø'øn ja tø'øxyøjk ja t'u'nk'aty, jøts ku'økyø'øxy ja'. Mayts ja yik'oo'kpi pidø'kpi jamdi.

¹³ Jøts ku ja nwindsøn'ajtim ojts t'ixy ja ku'oogi, yik'ayo'ijxyim, jøts ja tñimaay:

— Amon, kidi mya'axy.

¹⁴ Winets ja Jesús twingunøjkxyii'ñ ja oo'kpi, jøts ja kajuun ja tñixajiyii'ñ, jøts ja oo'kpi kii'byi ja tkii'dyaktøø, jøts ja Jesús tñimaay ja oo'kpi:

— Mets u'nk idø'øn nnimaapy: i'Pidø'øk!

¹⁵ Xjats ja kyu'xkukiyii'ñ pøn idø'øn wyinaty tø y'øøky jøts ja kyajpxpinibøjkxyii'ñ, xjats ja u'nktaak ja yiktagidøjkxyii'ñ ja y'u'nk, ja Jesús ja kømøøjyiyip.

¹⁶ Jøts ku ja jade'en niduki'iyi t'ejxtøø, jøts ja yjanchø'jkidøø, jøts ja ttukmija'widøø ttukunuu'kxyja'widøø ja Dios, nømdip ja':

— Yā Dios ja myøjkugajpxy tø kyaxi'iky adøm njaa'yjøøjty.

Nayide'en ja wya'andi:

—Dios tō tñimiñ ja kyajp jōts tpuðokit.

¹⁷ Yiknija'wigyōjx ja jam wine'enin ja jaa'y jam chōōnidi jam Judeit etjotp, ku wyinaty ja Jesús tō tyikjujkyiky ja oo'kpi.

Ku ja Juan Bautista tkexy ja kyugajpxy

¹⁸ Xjats ja Juan Bautista ja tñija'wiyii'ñ, nayide'en ja pyabōjkpi ja wyinaty tō tyamimadya'agiyi, winets ja tyaajxiyii'ñ namajtsk ja pyabōjkpi,

¹⁹ jōts ja ojts ttaniguexy ja Jesús, jōts ja t'atsyiktō'odit pōni ja' idō'on janch Cristo pōn wyinaty menwamp yiknitsokpi. Uk kidi ka'ats, winets ja abikpyi ja tjōp'ejxtit.

²⁰ Jōts ja wingon twingunōjkxidōō ja Jesús pōn ja Juan wyinaty tō tyaniguexyidi, jōts ja tñimaadyōō:

—Ja Juan Bautista oō tō xkexy jidsik oō nyiktō'ot pōni janch ja Cristik mets idō'on midy yikniagajpxp menwamp yiknitsokpi. Pōni ka'ats, winets oōts jadu'ukpi njōp'ext.

²¹ Ku ja wyinaty tō yja'atti, winets ja Jesús nay jatyi tyiktsōōjky may ja jaa'y pōmbi pa'am pōjkidip, pōmbi o ti ja'ambi tmōōt'ajttip, pōmbi ja miku' tmōōt'ajttip, ñayikwin'ejxwā'kxmip ja' ja may winap jaa'y.

²² Jōtsniim ja y'adsojimbijty jōts ja wyaañ:

—Nōjkxti jōts xukmado'odit ja Juan ti jatyi yā tō x'ejxti xmadowdi. Tamimadya'akti jade'en sa yō winap jaa'y wyin'ejxwā'kxxti, sa yō pakpamaa'y yō'ōdyi, sa yō putspi cho'okti, sa jatyi yō nat jaa'y myadowdi, sa oo'kpi yujkyōkti, jōts sa ayoobi jaa'y yiktukmadowdi ja ogyajpxy ja omyadya'aky midy yiknitsokp.

²³ Ejtñi xoni ja'adi pōn o xmiōbjktip, ka'ap twinmayimbettit twinmay'adōjtīt sats o xjanchjawidi.

²⁴ Xjats ku ja wyimbejtnidōō midy ja Juan wyinaty tō tkexy, jaats ja Jesús ttamimadyaktōjkiiyii'ñ ja mayjaa'y, ja Juan yiknimadyakp, yide'en ja wyaañ:

—¿Ti meets ojts x'ats'ixy jam abak etjotp? ¿Tu'uk ja jaa'y midy jade'en ejxim kapy midy poj yik'ō'yimbejtīp yik'ō'y'adōjīp? Ka'axi ja yjade'eni, pō tu'ukyixi tñi'ity ja wyinmaa'ñ.

²⁵ ¿Tits idō'on ojts x'ats'ejxti? ¿Tu'uk ja jaa'y pōn janch oyi wet tō ñadyaxoxiyi? Pō wā'atsxi mee xñijawidi pōn tsuj wet nadyaxojxidip, pōn nekim taxondip pyikta'aky, jamts ja ñachojk'ityidi jam windsōn tyōjkjotpti.

²⁶ ¿Tits idō'on mjanch'ats'ejxtōō? ¿Tu'uk Dios kyugajpxy? Janch ja', ja' midy jawaani mōj, nika'ap yjade'eni sam yjadu'ukpidi.

²⁷ Yō Juan idō'on yiktejp ku Dios kyajpxy yide'en wyaañ:

Ʒxy ngajxjawyeni tu'uk ja nngugajpxy, pōn tyiktōōjīp tyiktuudaajkip ja jaa'y wyinmaa'ndyi jōts myikupōkt ku xipōjkin xminōjkt.

²⁸ Ndukmadoodip ixyam jōts ku ni madsoo ka'ap pōn jade'en pyidsimñim ja Dios kyugajpxy sam yō Juan Bautista; pōni pōnts ots nja' xpaduujnip jōts ku tyōki ma' ots ngutuik ndanitanit ja njaa'y, ja'ats ne'egi mōj yikpiktakp jōts nika'ap ja Juan Bautista.

²⁹ Jōts ku ja jaa'y ni'ijtyi jade'en tmadoodōō pōn jatyi wyinaty tō yiknōbetyidi ja Juan, nayide'en ja yikugubajtpidi, jōts ja tjanchmiōbjktōō ja Dios jōts kudam ja ka'ap jade'en mibaat wyinmaamy'a'ty;

³⁰ ka'ats ja tmōjpiaktōō ja fariseotōjkti jōts ja kajpxwejpitōjkti sa Dios ja wyinaty tō tyamidsōkyidi, jōts ja ka'ap tkupōjktōō jōts Juan ja yiknōbatidit.

³¹ Jōts ja nwindōn'ajtm wyaañ:

—¿Pōnxik ots jade'en meets n'uktami'ejxip?

³² Jade'en meets ndami'ejxi sam mutsk unaj'kindi muum y'adō'otsti jap maayjōtpy ku myi'unaj'k tkagupōjkiiyidi ja kyuyajtm midy yjatsōjky yaguyatwampy, jade'ents ja ñawya'añidi: “Tō oō yikxon njaxu'uxy jōts ni mga'atsti; tō oō jotmay'ōōgyim nja'ōōmi, nijade'ents mgajotmay'oo'kmidi.”

³³ Kuts ja Juan Bautista tō myiñ jōts ja kyakay kya'uuky ku ja ka'ap vino t'uuky, jōts meets mnimy jōts ku miku' ja myōōt'ajtpy.

³⁴ Jōts ku o tō njamemi jōts ku o ngaamyi n'ukmi, jōts mnōmidy jōts ku ots janch kaxim ngay n'uuky, jōts ku ots ja mōōt namyigu'uk'atyiyi ja yikugubajtpidi mōōt ja ka'ōyjaa'dyi.

³⁵ Pōni pōnts ja Dios yja' tkupōjkīp, ja'ats tja'gyukip sam ja Dios yja' tssōkyin.

Ku ja Jesús jam fariseo tyōjkjotp wyinaty pōn txōōw'ajtp Simōn

³⁶ Xjats ja fariseit nidu'uk tñimaay ja Jesús jōts ja tmōōdit kaabyi tyōjkwindum. Jōts idō'on ja ojts tmōōdi, ojts ñijky, tyōjkiiyii'ñ jam fariseit tyōjkjotp, ja kaabyajt twinguwa'jtsiyii'ñ.

³⁷ Winets ja tō'ōxyōjk tu'uk pōn ka'ōyjaa'y'ajtp midy jam tsinaapy jam kajpōtp, ku ja tñija'wiyii'ñ jōts ku ja Jesús wyinaty tō ñijky kaabyi jam fariseit tyōjkjotp, jamts ja ojs tñija'aty ja pa'akxuu'kpi, tsagueegi tu'jtsjōtpy.

³⁸ Ñiyaxpim ja twingugu'xiyiñ ja Jesús tyeky, jøts ja wyeenøø ja ttuktaxø'jky. Jøts ja nay jatyi ja wyaay ttawibø'øty jøts ja ojts tsu'lkxy, ojts ja ttapakja'axy ja pa'akxuu'kpi.

³⁹ Jøts ku ja fariseo ja ojts jade'en t'ixy pøn ja Jesús wyinaty tø wyaay migaabyi, yide'en ja wyinmaa'ñ ja jap tyikyø'y: "Pøni janch Dios kyugajpxy yø jaa'y jeexyip, tø yø jeexyip tja'wyini pøn yø ixa tojnip majtsip, pøni pøn tø'øxyøjk yø', pø ejtpts yø yjantyimpøkytun'ity yø tø'øxyøjk."

⁴⁰ Winets ja Jesús tnimaay ja fariseo:

—Simón, nmigajpxwampy.

Jøts ja fariseo y'adsøøy:

—Yinet Windsøn.

⁴¹ Xjats ja Jesús wyaañ:

—Namajtsk idø'øn ja jaa'dyi pøn tmiyoj'ajttip tu'uk ja meeñ'anuu'kxyajkpi. Tu'uk tmiyoj'aty magoxk magø'pxy denario jøts jadu'uk wixijxkmyajk;

⁴² Jøts kumi ka' idø'øn ja tkubattit nipøn tkagubety ja voj, jøts ja meeñ'anuu'xyajkpi ka'ap ja sa tijy øy ja tkagubattit, ojts ja ttamee'lkxy ja myiyoj. Nigajppts inet, çpømbi ja jawaani tsojkip, pømbi ja jawaani takajxajkip?

⁴³ Jøts ja Simón y'adsøøy:

—Ja' yjawi pøn ja voj kajaa tmøøt'ajtp.

Jøts ja Jesús wyaañ:

—Janch tiy idø'øn mwa'añ.

⁴⁴ Xjats ku ja Jesús ojts t'ixy ja tø'øxyøjk jøts ja tnimaay ja Simón:

—M'ijxpxyi yø tø'øxyøjk, ku tø ndøki ya mdøjkjøøty ka' mets ja nøø tø xmø'øy ja ndekpyujik; tøts øts yø tø'øxyøjk ne'egi xapakpujy ja wyeenøø jøts ja wyaay yø tø ttuktati'ich.

⁴⁵ Ka'ats mets ndeky tø xtsu'lkxi, jøts ku yø tø'øxyøjk, jaayip ku tø ndøki ixa øts ndeky yø jade'en xtsu'lkxi.

⁴⁶ Ka' mets ngubajk aceite tø xpiktaajkxiyi, tøts øts yø tø'øxyøjk ja pa'akxuu'kpi ndeky xpiktaajkxiyi.

⁴⁷ Paty mets idø'øn nnøjmi, pøni pøn ja tsojkin waani tmøøt'ajtp nayide'ents ja waani yikpojkipmaa'lkxt; jøts yø tø'øxyøjk møj ja tsojkin yø tmøøt'aty paty pyaat'aty jøts ja pøky yikmaa'kxkøxt.

⁴⁸ Jøts ja tnimaay ja tø'øxyøjk:

—Nmee'kxpy øts, u'nk, yø mbøky.

⁴⁹ Winets ja migaabyidi pøn jatyi ja jam wyinaty møøtsinaajyip yjanch-nawyambinaxwa'jkidøø:

—çPøn jaa'y ya'at ndejint, sudso pøky paat yø tmeek'xy?

⁵⁰ Jøts ja Jesús yide'en ja tnimaay ja tø'øxyøjk:

—Ja'agøjxp mets ja mbøky tø nmaa'kxi ku me tø xjanchjawi, nøjknits jotkujk.

8

Ja tø'øxyøjk pøn jatyi ja Jesús pyudøjkidip

¹ Tøts ja wyinaty y'uknaxy jade'en, jøts ja Jesús t'ayø'øgyiixy ja kajp ja møj ja mutsk møøt ja pyabøjkpitøjk namakmajtsk, jøts ja tkajpxwa'lkxy ja øgyajpxy ja øy'ayuujk mididi yjaa'y ja tyanitanaapy.

² Nay jam idø'øn ja yjamyøøt'ajtmiyidi ja tø'øxyøjkmidi pøn ja wyinaty tø tyiktsø'øky, jøts pøn ja wyinaty tø tkajpxpidsøjmi ja miku' jøts ja ttukmajtsu'uty. Ja María dø'øn jam wyinaty pøn yiktejp Magdalena, pøn ja miku' wyinaty niwixujk tø myajtsu'udyiyi;

³ nay jam ja Juana wyinatymi, ja Chuza ñidø'øxy, ja' ñidø'øxy pøn ja Herodes tumbi'ajtip, pøn tuki'iyi t'ejxp tnija'wip ti jam ejtp ka'ejtp ma ja Herodes jam wyindsøn'aty; jam ja Susana wyinatymi jøts may abikpyi jaa'dyi pøn jatyi ja tigati tabudøjkiyidip.

Ku ja Jesús tmadyakpaaty ja jaa'y pøn nøjlx neppi

⁴ May jaa'y ja Jesús jam ojts ñimiñiyi pøn jatyi tsoo'ndip o ma abikyajp jøts ja Jesús yik'ejxwa'añ; jøts ku ja jaa'y may'ampy myujkpejty, jøts ja ttamimadyaktøjkiyiñ tu'uk ja ejxpajtin madya'aky. Jøts ja wyaañ:

⁵ —Tu'uk idø'øn ja jaa'y chøø'ñ tømtpøjpi. Jøts ku ja twijy, øy ja tømtp o ma ñaxkidaajky. Midi'ibi ñajtswøjjiyiñ jam tuu'am, ja'ats yiktaa'nbu'uxkigyøjx jøts ja joon ja wa'ats tpeemujkixy.

⁶ Midi'ibits ñajtswøjjiyiñ jam tsaag agujkp, ojts ja jam yjamuxy jøts ja jatyi tyøtsjønkaag ja'agøjxp ku ja naajp jam kyaneki.

⁷ Midi'ibits ñajtswøjjiyiñ ma ja magyujp jam wyinaty myuxwa'añ, ja'ats ja ojts ñi'aa'mbajtiniyi. Ku ja myujxmi winet jøts ja niwine'en kyayikyonmøjkiyøø.

⁸ Midi'ibits ñajtswøjyiyii'ñ jam pu'uty ñaxkøjxp, jøts ku ja yøøñ jøts ja ojts yikxon yjanty-imdyøømi, magø'pxy magø'pxy ja pyajkpjety ja tu'ukpi tømt.

Ku ja Jesús jade'en myadyak'abajtyiyii'ñ, jøts ja møkta'aky wyaañ:

—Pøni pøn ja'gyukiwyamp, wan tjä'gyuki.

Tigøjxp idø'øn ja Jesús ejxpajtin madya'akyøjxp ja y'ixpøjkin tyaky

⁹ Winets ja pyabøjkpitøj k ja yiktøøjyioø ti dø'øn jade'en tyijpy, sudso yikja'gyukit ja'abi madya'aky.

¹⁰ Xjats ja t'adsøø y jøts ja tñimaay:

—Meets yø Dios mduknija'wiyip ja y'ayu'uch winmaa'ñ sa ja' kyutujk midi ja tyanitanaayep ja yjaa'y, jade'ents meets ja mdyimyiktumadøø; ka'ats ja abiky jaa'y nayide'en madya'akyøjxp tñijawidit, ejxpajtin madya'akyøjxp øts yø ja'ayi ndamimadya'aktit jøts kø'øm tñimado'odit tñanimado'odit nayide'en pøni sa ø xpabøkti xkapabøkti.

Ku ja Jesús tñigajpxy sudso dø'øn yikja'gyukit ku jaa'y neppi ñijky

¹¹ Yide'en idø'øn yø madya'aky tñy: Jade'en ja tømt yikpikta'aky sam ja Dios kyajpxy y'ayuujkjin;

¹² Jøts midi yiknajtswøjyiyii'ñ jam tuu'am jade'en ja yikpikta'aky sam ja jaa'y pøn ja tpatmadoodip ja Dios kyajpxy, jøts ku ja t'ukja'gyukidi xjats ja miku' ja jatyi pyøjkxiyidi jøts ja ka'ap tñibøktit, jøts ja nisudso'ampy kyanitso'ok'attit.

¹³ Jøts ja tømt jade'en yikpikta'aky midi yiknajtswøjyiyii'ñ jam tsaä agujkp sam ja jaa'yindi pøn tmadoodip ja øgyajpxy ja øy'ayuujk, jøts ja ejtni xoni t'ukpabøkojti y'ukjanchja'widip ja'; kuts ja yiin waan sa tkujatidi jøts ja jatyi tñajtstu'utti, jatyi ja ñajyibikpyikta'agyidi ja'agøjxp ku ja jade'endi sam ja ujts kya'aa'tsmiweninim.

¹⁴ Jøts ja tømt midi ñajtswøjyiyii'ñ jam kujp agujkp, jade'en ja yikpikta'aky sam ja jaa'dyi pøn tñamadoodip ja øgyajpxy ja øy'ayuujk, yjajanchja'widip jøts nika'ap t'ukpadunidi, ja' ja ne'egi yikmajadaktip ja pyikta'aky, ja myeeñ, ja yjingaap, ja yjotkujk'ajtindi. Jade'ents ja tka'ukyikmøjtøjkinidi ja øgyajpxy ja øy'ayuujk jøts ja niti tkayikwingaxø'økti Dios wyindum.

¹⁵ Jøts ja tømt midi ñajtswøjyiyii'ñ jam pu'uty ñaxkøjxp, jade'en ja'ami sam ja jaa'dyi pøn amumjoojt nadyamiyojxidip ja Dios, jøts ja jade'en tpatmadojidi ja y'øgyajpxy y'øy'ayuujk. Møk ja yjanchja'win ja tpiakta'akti, ka'ap ja juuni ttamajststu'utti, ja'ats idø'øn tyikwingaxø'ktip ja øgyajpxy ja øy'ayuujk.

Niti jadi'iñi kyatañ, kuwañim ja tyimiyiknijawi

¹⁶ 'Kidi ja'ajip ja jaj yiktaguno'kp jøts ja yikumutst uk jøts ja yikpikta'akt jap maabajt patki'py; ja' ja wyaa'ñ jøts ja yikpikta'akt jam køjxp ma yjajt tyøø'kxt, jøts ku jam pøn tyøkit ka'ap ja jam kube'ets kugoots yja'attit.

¹⁷ Ti ka'ukyikpatp ku ti jyayu'uch'ity. Øy kajpxy ayuujk yjagayiknigajpxwä'añ, kuwanits ja yiknijawi pøni sa ja y'ejxi tyiyi.

¹⁸ Jade'ents idø'øn øy xmodo'odit; pøn tñabøjktip jøts tñadogukiwya'andi øy øy, jaakyikpudøkipts ja yikxondi jøts ja tjä'gyukidit. Pønts ka', jaaktyimiykøjxixidip ja' ja wyijy'ajtindi midi ja jaakjanadyaja'wiyidip jøts ja nisudso'ampy tkidyimya'gyukidit.

Ja Jesús tyaaq jøts y'uch

¹⁹ Winets ja Jesús y'uch yja'ttøø møøt ja tyaaq ma ja jam wyinaty, nika'ap idø'øn ja tpaatti wingon kumi janch mayjaa'y jam wyinaty.

²⁰ Xjats ja Jesús yiktukmadøø y jøts ja yiknimaay:

—Ja mdaak møøt ja m'uchti ja' mmigajpxwajnip, ixap ja tøjkwimpty.

²¹ Jøts ja t'adsøø y:

—Ja' øts idø'øn ndaagip, ja' øts idø'øn n'uchidip nmigu'ugidip, pøn tñadoodip ja Dios y'øgyajpxy y'øy'ayuujk jøts ja jade'en tpadundi pøni sa nwa'añ.

Ku ja Jesús tyiknajxy ja møk poj jøts ku ja tyik'amøkiyii'ñ ja mejy

²² Winets ja nay ja'abi xøøw tyøjkiyii'ñ barkijøtpy møøt ja pyabøjkpitøj k, jøts ja tñimaay:

—Wan tjaa'myindi jam jaduktamajñ.

Jøts ja ñøjkxtøø,

²³ jam ja wyinaty mejkyujk'amdi ku ja Jesús mya'oo'knaa. Jøts ja møk poj ja jam jotmøñ pyaajtidoø, yikxon ja nøø jam barkijøtp yjanchtøjkyini øy ja tyiknitiøøñit.

²⁴ Jøts ja tyujxtøø ja Jesús jøts ja tñimaadyøø:

—iWindson! iWindson! iNøøjøø'kxwaa'nindip!

Winets ja Jesús pyidi'jky jøts ja møk'ampy twingugajpxiyii'ñ ja møk poj ku ja nøø ja tyiktojmi'iky adso'jkibim; jøts ja poj jatyi yjanch'amø'jty, jadi'iñi ja myøøñ.

²⁵ Jøts ja tñimaay ja pyabøjkpitøj k:

—¿Ma dø'øn ja mjanchja'windi xyiktunwä'andi?

Tø ja yjanchnichø'jkidyigøøñidi, ñiguyumaap ja tyimya'widøø jøts ja xem yam ñawajnidøø:

—¿Ti pønims ya'at jade'en, pø mimadojïpts ja poj yø', pø mimadojïpts ja nøø yø' ku yø t'ane'emy?

Ja Gadarit jaa'y pøn wyinaty ja miku' tø tyatøkiyi

²⁶ Jøtsnim ja yja'ttøø jam Gadarit etjotp midì idø'øn ja jaduktamajñ tãmp Galileit et wingon.

²⁷ Jøts ku ja Jesús jam wyinaajky, yø'øpyidsiimy, jøts ja ñimejnøø tu'uk ja kugajp pøn ja miku' wyinaty jekyip tø tyatøjkniiyi. Niwa'ats ixwa'ats ja wyidejtni, ka'ap ja tyøjkjotp y'uhtsinaañi, jam ja chinaadyakni ma ja oo'kpi ñaxøkidi.

²⁸ Jøts ku ja t'ejxpaaity ja Jesús jøts ja jatyi twinguxanaay, yide'en ja tjantyimñøjmi møkta'aky:

—Jesús, Dios U'nk tsajpjøtpyit, ¿ti ø xanibøjkip? Tun may'ajt kidi xjantyimy'ayo'ondun.

²⁹ Ja' idø'øn ja jade'en tyikwãmp ku ja Jesús ja miku' møk'ampy t'ane'emy jøts ja jam pyidsø'omt ja jaa'y y'am yjotp. Ejtp idø'øn ja miku' ja xyumim'adi'ichiyi ku ja yjayiktagiwiiñ yjayiktapakwiiñ pujx kadeen; jatyi ja ttapojtiqixy yam ja jaa'y ja jade'en tø yja'uktajotkujk'ajtmiiyi jøts ja nima kyanøjkxt, jøts idø'øn ja miku' ja yikakwidityi o ma jam abak etjotp.

³⁰ Jøts ja Jesús yide'en tyiktiyi:

—¿Ti mxøøw?

Jøts ja y'adsøøy:

—Legiøn ø nxøøw.

Ja'agøjxp ja jade'en ñaxyøømo'øyi kumi janch may miku' ja wyinaty tø tyatøkiyi.

³¹ Ja'axi idø'øn jade'en kø'øm wãndip jøts ja tñimaadyøø ja Jesús jøts ja ka'ap kyaxidit jap ma miku' y'ayo'ombaatti.

³² Jamts wyinaty ja kuch yjøø'kxwidejtmidi jam kojpkøjxp ku ja miku' ñuu'kxãktøø jøts ja ttatøkidit ja kuch; yikjajt idø'øn ja Jesús ja jade'en.

³³ Xjats ja miku' tñajstuttøø ja jaa'y jøts ja kuch ja ttatøjkidøø, winets ja jiyujk niduki'iyi yjanhepkuwo'ongøjxtøø jøts ja nøøjotpy ñaxkidakøjxtøø, japt ja ojts ñøøjøø'kxkøxti.

³⁴ Jøts ja jaa'y pøn wyinaty kuch'ejxtip ku ja jade'en t'ejxtøø yjatti kyubatti ja kyuch, jøts ja yjantyimchø'jkidøø, jøts ja kyaknøjkxtøø jam ma jatp pøngapøn chøøni kamjotp jøts nayide'en jam kajpjojp, jamts ja tuki'iyi ttamimadyakøjxtøø.

³⁵ Jøts ja jaa'y ja tñidso'ongøjxtøø jøts ja t'ejxwa'andi pøni janch idø'øn jade'en. Jøts ku ja yja'ttøø jam ma ja Jesús jam wyinaty, xjats ja t'ejxpattøø ja jaa'y pøn ja maamyiku' wyinaty tø myajtstu'udiyi jøts ku ja jam chøøni wijy kejy, xøxy piky ja jam ma ja Jesús wyinaty tyani, jøts ja yjantyimchø'jkidøø.

³⁶ Jøts ja jaa'dyi pøn wyinaty kø'øm tø tyimye'ejxti, ja'ats ja tmadyãktøø sudso'ampy ja ja jaa'y wyinaty ja maamyiku' tø myajtstu'udiyi.

³⁷ Ja'agøjxpts ja jaa'y ni'ijtyi ñuu'kxãktøø pøn jatp jam wyinaty tsinaadyip Gadara jøts ja Jesús jam pyidsø'omt etjotp, pø jantyimchø'jkidipxi idø'øn ja'adi. Jade'ents ja Jesús ttatøjkii'ñ ja byarki jøts ja chø'jñ.

³⁸ Jøts ja jaa'y pøn wyinaty tø myajtstu'udyi ja maamyiku', ja'ats møk'ampy nuu'kxãkmaa jøts ja yikmøødit jøts Jesús ja tmøøtnøjkxt, jøts ja ojts t'ane'emy jøts ku ja ne'egi tyã'ant, yide'en ja tñimaay:

³⁹ —Nøjkx mdøjkwindum, jamts xnigajpxt xnimadya'akt sã Dios tø m'ødyuñiyi.

Nøjkx idø'øn ja jaa'y jøts ja ttamimadyãktøjkiyi'ñ amuum ja mayjaa'y sã Jesús ja wyinaty tø yikmøpkikyiyi yik'ø'y'atyiyi.

Ja Jairo ñøøx, jøts ja tø'øxyøjk pøn ja Jesús wyet ojts ttojni

⁴⁰ Jøts ku ja Jesús wyimbejtñaã ñøjkxnimaa jam jaduktamajñ, pøkpaat may jaa'y ja jam yjanchnja'wiyøø, pø tum awejxipxi ja jaa'y ja wyinaty.

⁴¹ Xjats tu'uk yaa'dyøjk yja'jty pøn txøøw'ajtp Jairo, ja' idø'øn jam wyinaty tñiwindsøn'ajtp ja tsãptøjk. Jøts ja ñagyuxendyaajkøø jam Jesús tyekyjø'øm jøts ja tñimaay, ojts ja ñuu'kxa'aky jøts ja myøøtnøjkxiyt jam tyøjkwindum.

⁴² Jam ja tyu'ukpi nøøxu'nk, makmajtskin ja y'jumøjt ja wyinaty, ja'ats jam wyinaty oo'kp ka'oo'kp. Jøts ku ja Jesús ojts ñijky, janch may jaa'y ja pyadso'onøø, janch yikxon ja yik'atejmuky.

⁴³ Jamts tu'uk tø'øxyøjk pamaa'y, myakmajtsk jumøjtyip ja tajxnaxyi ja pyaajtniiyi. Tø ja tñidya'ayodøjkini ku tsøøyibi ja jadine'en tjamijuy jøts ja nipøn yjanchnkayiktsø'øgyiyi.

⁴⁴ Xjats ja ojts wingon tjiguyø'øyi ja Jesús, jøts ja wyet pa' ja ojts tjøjxi, jøts ja tyajxnaxyi ja nay jatyi y'adujky.

⁴⁵ Jøts ja Jesús yide'en tyiktiyi:

—¿Pøñ ø tø xøñ?

Kuts nípøn tkanigajpxy, jøts ja Pedro møøt ja myigu'uk wyandøø:

—Windsøn, pø mjanchyik'atejmujkpts, nugots mjanchyik'tejmiñ mjanchyiktejxipy, jøts mnimy: “¿Pøñ ø tø xøñ?”

⁴⁶ Jøts ja Jesús wyaañ:

—Tø ø nyiktøñ, tø njawi jøts ku øts nmøk'ajtin tø nduktamøkpiky tu'ugin ja jaä'y.

⁴⁷ Xjats ja tøøxyøjk, pø ja'axi tam idø'øn yiktejp, jøts ja ojts ñimybejpni ñichiyuufi ñagyuxendya'agyi jam Jesús tyekyjø'øm, jøts ja ojts ttukmadøy jam mayjaa'y agujkp tigøjxpx ku ja wyinaty tø ttøñ jøts ku ja nay jatyi myøkpiky.

⁴⁸ Winets ja Jesús ja ñimaajyøø:

—Ja'agøjxpx u'nk tø mmøkpiky ku ø tø xjanchjawi. Nøjkxni amgujk jotkujk.

⁴⁹ Ixam ja Jesús wyinaty jade'en wya'añim, ku yja'jty tu'uk ja jaä'y pøn tsoo'mp jam tsaptøjk windsøn tyøjkwindum, ja Jairo. Jøts ja Jairo yiknimaay:

—Tøts ja mnøøx y'anuu'kxiñi, kidi yø windsøn nugo x'adsejp'adi'ich.

⁵⁰ Jøts ku Jesús ja jade'en tmadøøy, jøts ja tñimaay:

—Kidi mdsø'øgi, møk m'aaw mjoojt xpikta'akt, tu'ugyi ø xjanchjawit, jujkpyøkp ja m'u'nk inet.

⁵¹ Jøts ku ja jam tøjkwindum yja'ttøø, ka'ap ja jap tøjkjøtpty pøn tyiktøjkjy'i'ñ, ja Pedro ja ja'ayi myøøtøjkyi'i'ñ møøt ja Jacobo møøt ja Juan jøts ja u'nkteety u'nktaak jade'eñi.

⁵² Janchyaxtip ja wyinaty, ja y'u'nk ja tyimchaachpa'ayoodip. Jøts ja Jesús ja ñimaajyidøø:

—Kidi mya'axti; ka'ap yø kiixy y'øøky, maapts yø ja'ayi.

⁵³ Jøts ja yjanchyikniixijky, pø ñija'widipxi ja' jøts ku ja wyinaty tø y'oo'kni.

⁵⁴ Xjats ja Jesús ja tmajch kyøjøp'am, jøts ja møk'ampy tñimaay:

—Pidø'øk, u'nk.

⁵⁵ Jøts ja yjujkpyijky, nay jatyi ja pyidi'jky; jøts ja Jesús ja ojts tni'ane'emy jøts ku ja tyika'adyit.

⁵⁶ Ñigyumaap ja møjaa'y ja tyimya'widøø jøts ja Jesús ja tñimaay jøts ka' pøn ttukmado'odit ku dø'øn ja wyinaty jade'en tø tyuñi jyaty.

9

Ku ja ñimakmajtskpi pabøjkpitøjk yiktanipøkti ja tunk jøts ja yikajxtsoondi

¹ Xjats ja Jesús tñankñamyujkøø ñimakmajtsk ja pyabøjkpitøjk jøts ja myø'ajtin ja tmøøy, ojts ja tkutujkmø'y jøts ja tyikpidsøjmidit ja jaä'y ja miku', jøts ja tyikmøkpøktit ja pamaa'y.

² Ojts ja tkexy jøts ja Dios y'øgyajpxy y'ø'yayuujk ja tkajpxwä'kxidit midi ja tyanitanaaapy ja yjaa'y jøts ja tyiktso'oktit ja pamaa'y.

³ Jøts ja tñimaay:

—Ka' mniyø'yøyk xko'ondit, niti xkako'ondit, ni tajk, ni pejñ, ni tsapkaaky, ni meeñ. Tu'ugyi mwet xminøjkxtit midi ixja mwet'ajttip.

⁴ Jøts ku mdøjk'amido'odit o mā pøni mā mja'atti, tu'ugyits jam mja'tä'aktit kunim jam mdsøonditnim.

⁵ Jøts ku mā pøn mgagupøkidit, tanaxtits ja kajp, ja'ayi ja pu'ux x'ukwinapitit jøts jade'eñi xuk'ejxtit jøts ku jade'eñi tø mñañiwä'achidi.

⁶ Jøts idø'øn ja yø'øwya'kxtøø, ñøjkxtøø o magajp, jøts ja jam tkajpxwä'kxti ja øgyajpxy ja øy'ayuujk jøts ja pamaa'y ja tyiktso'okti o mādsøo.

Ku ja Juan Bautista ja o'jkin tpaajty

⁷ Xjats ja windsøn Herodes ku ja tñija'wiyi'i'ñ sa jatyi ja Jesús wyinaty y'adi'ich, jøts ja ka'ap ti tabyajtin tpaajty pømbi ja nimaajyip jøts ku ja Juan wyinaty tø yjujkpyiky, ja' wyinaty tø pyidsimy jadigojk jap oo'kpi jutjøtpty.

⁸ Pømbits wändip jøts ku ja yja'aji ja Dios kyugajpxy Elías, jøts ku ja' wyinaty tø kyaxi'iky; pømbits nømidip jøts ku ja yja'aji ja Dios kyugajpxy pøn wyinaty windi'ixyip tø y'atsmendi, ja' nidu'ugin tø pyidsimy jadigojk.

⁹ Jøts ja Herodes wyaañ:

—Pø øtsimpts ja Juan kyubajk kø'øm nankyikwinajkøø. ¿Pønts idø'øn ndejin yø' ixa njamado'ity yiknimadya'aky janch ñigyumaap?

Jøts idø'øn Herodes ja tjadyimwyin'ejxwaañ.

Ku ja Jesús yikaay ja nimagoxk milbi jaä'y

¹⁰ Xjats ku ja Jesús kyudanaabyi wyimbejttøø, ojts ja tyamimadyakixyi ti jatyi ja wyinaty tø ttundi. Winets ja ojts twaaðsøøñ jøts ja tmøøtnijkxy mā nípøn kya'ity jam Betsaida kajp wingon.

¹¹ Kuts ja jaa'y ja tñija'widøø, jøts ja ojts tpanøjkxti; kyupøjkts ja Jesús ja' jøts ja ojts ttamimadya'aky sa ja y'ejxi tyiyi ja Dios kyutujk midi ja tyanitanaapy ja yjaa'y, jøts ja tyioktøjkty may ja pamaa'y.

¹² Jøts ku ja et chuu'ña, xjats ja ñimajmajtstskpi kudanaabyi ja ñimejnøø jøts ja ñimaajyøø:
—Kajxni yø mayjaa'y, jøts nøjx pyoo'kxnidi jøts nøjx t'ixaañidi ja kyaajyik yjøø'kxik o magajp midi ja wingon tãmp, nitits ya kya'ity ma adøm yaadi.

¹³ Jøts ja Jesús ja ñimaajyidøø:

—Yikaydi meets.

Jøts ja tñimaadyøø:

—Ja'ayits tsapkaaky jap jamagoxkyi jøts ajkx majtskyi, pø winet inet idø'on pøni nda'ajuu'yigyøjxp øøts inet yø jaa'y ja kaaky ja jii'kxy.

¹⁴ Nimagoxk milin ja jaa'y jam wyinatyi. Xjats ja Jesús tñimaay ja pyabøjkpitøjk:

—Yik'ixa'akti tukpik jaty niwixijxmyajk jaty.

¹⁵ Jøts idø'on ja jade'en tpadundøø, ojts ja jaa'y y'ixakøxti.

¹⁶ Winets ja Jesús tñixajiyii'ñ magoxk ja tsapkaaky jøts majtsk ja ajkx. Ojts chajp'ixy jøts ja ttamøja'wiyii'ñ ja Dios Teety. Jøts ku ja t'aduajkpajky, jøts ja ojts ttagøðeki ja pyabøjkpitøjk jøts ja mayjaa'y ja ttagama'adyit.

¹⁷ Ojts idø'on ja niduki'iyi kyay'abidsømdi, niduki'iyi ja kyujxidøø; jøts ja kaaky wyindank ja makmajtsk kach ujts ujts yikpøkmujky.

Ku ja Pedro wyaañ jøts ku ja Jesús yja'aji pøn yiknitsokp

¹⁸ Tuk'ojk idø'on ku ja Jesús jam wyinatyi ja Dios Teety t'ajot'aty nadyu'uk, jamts idø'on pyabøjkpitøjk ja pyawidityiyi jøts ja tyiktiy:

—¿Sa jaa'y wya'andi kyajpxti, pønik øts idø'on?

¹⁹ Xjats ja y'adsoodøø:

—Pømbi wandip jøts ku mets Juan Bautista; pømbits wamidip jøts ku mets m'Elías, nømidipts jadu'uk jøts ku me mja'aji ja Dios kyugajpxy pøn mendøø jekyip jøts ja' nidu'ugin tø wyimbity jadigojk.

²⁰ Jøts ja tjaakyiktüy:

—Jøts meets, ¿sa mee mwa'añ, pøn øts yjawi?

Jøts ja Pedro wyaañ:

—Cristoxi mets, ja yiknitsokpi, ja Dios U'nk.

Ku ja Jesús tñigajpxy ja y'o'jkin

²¹ Winets Jesús ja ojts møkta'aky t'ane'emy jøts ja ka'ap tmadyakyø'odyit.

²² Yide'en ja yiknimaadyøø:

—Møk øts ja ayo'on nbaatt, ka' øts ja møjaa'dyøjk xkupøktit, ka' øts ja teetywindsøndøjk xkupøktit, ni ja kajpxwejpitøjk ø kragupøktit. Xyik'ooktip øts ja', ja kidigøøk xøøwts ø nbidsø'ømt jadigojk oo'kpi jutjøtpy.

²³ Jøts ku ja jade'en wyaañ, winets ja tñimaay niduki'iyi pøn jam wyinatyi:

—Pøni pøn ø xpabøkwamp, jawyeen ja kø'øm kyanabya'ayowit, jabom jabom øts ja xku'ayowit, ja'ats øts idø'on xpabøjkp.

²⁴ Pønts kø'øm nabya'ayojip, pøn kasaduñim nay'ejxip, windigøøpyts y'anmija'win ja y'ity; pønts ø xku'o'jkp xkudigø'oyip, ja'ats ja yja' nøjx nitso'ok'ajtp.

²⁵ ¿Ja ti ja ñiwyaa'ant øy ja jaa'y tjaja'bøjkixy ja naqxwii'ñajtin jøts ja y'anmija'win ne'egi wyindigøy?

²⁶ Jøts pøni pøn ø xatsø'dyump, pøni pøn øts n'øgyajpxy n'øy'ayuujk xatsø'dyuuynip, nayide'ents øts ja tsø'dyumbi nøjxk ndatsø'dyufi, ku ø nme'ent yikutujkpi, ku øts ja ndeety kyunuu'kxy'ajtin nñimejnit møøt ja anklistøjk yja'adi. Øts idø'on ja naqxwii'ñit jaa'y nñøjkudanaabyi'ajtpy.

²⁷ Tiy janch mee nñømi jøts ku jaa ja jaa'y ya winaagin tyanidi, pøn ka'ooktip kunim ja tyimy'uk'ejxtit sa Dios kyutujk tñime'ent midi ja tyanitaniy yjaa'y.

Ku ja Jesús adsu'jky y'atstigajch amuum chamambøjkixy

²⁸ Tø dø'on ja wyinatyi tyuktujkxøøwip jade'en y'ukjaty, jøts ja Jesús pyatøjkiiyii'ñ jam kojpkøjxp Dios'ajot'ajtpi, myøødiyii'ñ ja Pedro ja', møøt ja Jacobo jøts ja Juan.

²⁹ Kuts ja Jesús jam wyinatyi Dios'ajot'aty, xjats ja wyeen y'aaw ja tyigajch, jøts ja wyet ja ñaamy ja pyoobiyii'ñ tøø'kxpm tsamambim.

³⁰ Winets jam kyaxøktøø namajtsk ja jaa'y, ja'ats ja jam møøt myadya'aky, ja Moisés idø'on ja' møøt ja Elías,

³¹ nabejk'ampy aju'uk ja ñi'awidityidi jøts ja tkajpxy'atti ja o'jkin midi ja Jesús wyinatyi pyaawampy jam Jerusalén.

³² Oj ja Pedro mōōt ja myigu'uk yjamaa'y'ookti, wijy'ejttip idō'on ja'. Jōts ja ojts t'ejxidi ja Jesús y'aju'uk mōōt ja űamajtskpi yja' nayide'endi pōn ja jam wyinaty mōōt tyani.

³³ Jōts ku ja jaa'y jam wyinaty jagamnidi, jōts ja Pedro tñimaay ja Jesús:

—Windsōn, ityimy'ōy'ajtp ku oō nyam'aty! Nyik'ōyip oō tigōōk ja ujts'aadyōjk; tu'uk mets mja', tu'uk Moisés yja', jōts tu'uk Elías yja'.

Ka'ap idō'on ja Pedro y'aaw tjawi pō ti dō'on ja kyajpxy.

³⁴ Exam ja jade'en wya'añ ku yoots jam űaxkidaajky, jōts ja yjanchō'jkidōō ku ja jap yoots agujkpy űay'ejxpajtidōō.

³⁵ Winets ja tmadoodōō ku jap yoots agujkpy kyajpxy ku jap űimy:

—Ots idō'on ya'at n'u'nk njanchōjkpy; mimadojidip pōni sa wya'añ.

³⁶ Ku ja wyinaty jade'en tō tmadowdiwya'añ, xjats ja t'ejxpattōō ja Jesús jōts ku ja jam nadyu'uk. Amōñi ja y'ejttoō, ka'ap ja pōn ttukmadowdi ku ja wyinaty jade'en tō t'ejxti.

Ku ja Jesús tyikmōkpijky tu'uk ja mixyu'nk pōn wyinaty ja miku tō tyatōkīyī

³⁷ Jōts ku kyimjabom'ajty, ku ja ojts kyidāknidi jam kojpkōjxp, jōts mayjaa'y ja Jesús yjōpkubajtiyōō.

³⁸ Jōts ja jam nidu'ugin mōk'ampy űimaajyōō:

—Windsōn, tun may'ajt, win'ejxik ots n'u'nk, yō'ōyi o tu'ugyi n'u'nk'ajtpy;

³⁹ miku' idō'on yō xumitatōjkiyīp, jōts yō yjanchxumiyiktsabaayi, yikmō'jtñiyīp yō', jōts janchyik'a'oo'pnīyīp tñankwyīnwōpyi tñankjyōpwōpyi. Nijade'ents kyamajststūdyi, am'ijxyim tsaach'ijxyim yjaty.

⁴⁰ Tō ots yō mbabōjkpi njanōjmidi jōts jeexyīp yō miku' tyikpidsōmīdi, nika'ats yō tō myayīdi.

⁴¹ Xjats ja Jesús wyaqañ:

—iMee kajanchja'wībīdi, yō mbōky nugo myikmajadaktip! űMa windemnim meets nga-jpxy n'ayuujk xpabōjkit? űWindemnim meets yō yjade'embī xuktatso'okt ku ots yō ejtp njanchjanigajpx'ity? Mets, yikmen yō m'u'nk.

⁴² Xjats ku ja mixy wingon myiñ, jōts ja miku' ja ojts yiknaxkida'agyīyī jōts ja tyukpatkojmīyī ja mō'ōdyī; winets ja Jesús ja miku' twingugajpxīyī'ñ jōts ja tyikmōōy mōk mōjaaw.

⁴³ űNīgyumaap ja jaa'y ja ni'ijtyi tjā'widōō ku ja Dios ja myōk'ajtin jade'en tyikwingaxī'iky.

Ku ja Jesús tñigajpxy jadigojk jōts ku ja y'ookt

Exam idō'on ja jade'en wyinaty ku ja Jesús tñimaay ja pyabōjkpitōjk:

⁴⁴ —Madowdi ya'at, jōts kidi xja'dyīgōyīdi niijuuni; ots, yikōyākp ots jōts ots ja mayjaa'y nyiktagōdōkit.

⁴⁵ Jōts ja pyabōjkpitōjk ka'ap ja tjā'gyukīdi ku ja jade'en wyaqañ, jōts nika'ap idō'on ja ttuknimadōy; tsō'jkimīdīpts ja' jōts ja tyiktō'ōdit ti dō'on ja jade'en tyijpy.

Pōn idō'on jawaani mōj mā Dios ja yjaay ja kyutujk tñanītani

⁴⁶ Xjats ja tkajpxy'ajtpinībōjkidōō pōmbī jadyīmy'ukmōjtōjkp,

⁴⁷ wa'ats ja Jesús ja tñijawī sa ja wyinaty wyīnmaydi. Winets ja ojts tsa'anji'iky tu'uk ja mutsku'nk jōts ja űnadyawingudsaa'niyōō,

⁴⁸ jōts ja wyaqañ:

—Pōni pōn ots ya'at mutsku'nk xkupōjkxp, ots idō'on ja wyinaty xkupōjkp; pōni pōnts ots jade'en xkupōjkp, ja'ats idō'on ja wyinaty kyupijky pōn o xkajxp. Pōnts kanamyōjpiktaajkp wine'enin meets ixaadi, ja'ats idō'on nōjkx mōjtōjkp.

Ku ja Jesús wyaqañ: Adōm ja' nbudōjkibī pōni ka'ap adōm ja xmidsep'ajtyīndī

⁴⁹ Xjats ja Juan tñimaay ja Jesús:

—Windsōn, tō oō n'ixy tu'uk ja jaa'y tyikpidsīmy ja miku' mets mmōk'ajtingōjxp; tōts oōts ja ndukmajststūty kumī ka'ap adōm ja xmōōtwīdījtyim.

⁵⁰ Jōts ja Jesús ja űimaajyōō:

—Kidi xuktamajststū'utti; adōm ja' nbudōjkibī pōn ka'ap adōm ja xmidsep'ajtyīndī.

Ka'ap ja Jesús tyikjajty sa wya'andi ja Jacobo mōōt ja Juan

⁵¹ Jōts ku ja et ja xōōw tpaajty ku ja Jesús wyinaty űōjkxwani tsajpjōtpy, xjats ja jotmōk'ampy chōō'ñ jōts ja űijky jam Jerusalén.

⁵² Ojts ja tkajxjawyeni kyugajpxy, jōts ja űōjkxtōō jam Samariit etjōtp jōts ja jam t'ixaajyīdid ja yja'taajk;

⁵³ ka'ats ja Samariit jaa'y ja tkupōjktōō ja'agōjxp ku ja tñija'widōō jōts ku ja űijky jam Jerusalén.

⁵⁴ Kuts ja Juan ja jade'en t'ejxtōō mōōt ja Jacobo midī ja pyabōjkpi'ajtpy, jōts ja ojts űi'ixy:

—Windsøn'ajtim, ztuñ øø nayide'en sam ja kugajpxy Elias y'adiijch, n'amido'op øøts ja jøøn tsajpøtjpy, wan yø jaa'y tkudigøøgyøxti?

⁵⁵ Jøts Jesús ja nugo twini'ijxy jøts ja møk'ampy twingugajpxiyii'n, yide'en ja tniimaay:

—Ka' meets yjawi xja'gyukidi pøn meets myøk'ajtin mmøøt'ajtxiyip.

⁵⁶ Nmøjkudanaabyi'ajtpy øts ja naxwii'ñit jaa'y, kaja'ajip ø tø nniimiñ jøts øts ja jaa'y nyik'ookt nyiktigø'øty, ja' ø tø nniimiñ jøts øts ja jaa'y nyiknitsø'ok'att.

Xjats ja choo'ndøø jøts ja ñøjkxtøø abikyajp.

Ja jaa'y pøn tpawidetwandip ja Jesús

⁵⁷ Jøts ku ja wyinaty jam tyuu'yø'ødyi, jøts ja Jesús ja jaa'y tu'uk ñimaajyøø:

—Windsøn, tsoomp øts, nbanøjkxp mets o madsøo pøni mā me mniijxy.

⁵⁸ Jøts ja Jesús y'adsøøy:

—Ne'egi jaa ja waajx ja yjut, ne'egi jaa ja joon ja pya'an; jøts øts niti ø xka'ejtxi øyik øts idø'on mā n'ønø'ønt.

⁵⁹ Xjats ja Jesús jadu'ukpi jaa'y tniimaay:

—Møødik øts.

Jøts ja wyaañ:

—Windsøn'ajtim, wan øts ndeety jawyeen t'atsyiknaøkxi.

⁶⁰ Jøts ja Jesús y'adsøøy:

—Majtsu'ut, wan ja tyikpidø'økti ja myi'oo'kpi pøn y'anmija'win jajujky; tø tyik'oo'knidi; jøts mets, nøjkx mets ja Dios y'øgyajpxy y'øy'ayuujk xkajpxwa'kxi.

⁶¹ Jøts ja jade'en ñimaajyøø:

—Windsøn'ajtim, nmøødiwyampy mets, nijkxy øts nmigu'uk t'atstukmadøy, nijkxy øts t'atsnagajpxpidsimi; jawyeen jap ndøjkjøtjpy.

⁶² Jøts ja Jesús ja tniimaay:

—Ku jaa'y yu'uy, ja' ja y'ijxpy ja tyunk; pønts ejxjimbejt'adøtsp, tits ja nyikwa'anint. Jade'ents idø'on ja Dios wyingujkp mā ja ttanitani kyutujk ja yjaa'y; pøn ja tu'ugyi amunjoojt kamiduujniyip, tits ja jam ñiwyā'ant.

10

Ku ja Jesús tkajxwa'kxy ja ñidugui'pxmyajkpi jaa'y

¹ Jøts ku ja jade'en y'ukjajt, jøts ja nwindsøn'ajtim twiwijch ja ñidugui'pxmyajk ja yjaa'y, jøts ja tpagejxy namajtsk jaty. Jade'en ja ojts tyiknijkxy o magajp mā dø'on ja køøm wyinaty ñøjkxwa'añ,

² jøts ja tniimaay:

—Janch may pikta'aky pyidø'økwa'añ, ka'ats ja tumbi myayidi. Paty mee x'amido'ot ja kubikta'aky jøts tjaakaxt ja tyumbi jøts pyidø'økt ja pyikta'aky.

³ Nøjkxtits meets; jade'enxi mee nmøjkxt sam borreek ñijkxy mā may miy'uk jamdi.

⁴ Ni mbejn xkawetstit, ni mmeen'abøjk'ii'n, ni mgø'ok, niti xkako'ondit; jøts kidi pøn xmi'øømayidi xmi'gajpxmayidi ku pøn xkajpxpoo'kxtit tuu'ajy.

⁵ Jøts ku mā mja'taajk x'amidowa'andit yide'en jawyeen mgajpxpoo'kxtit: “Mā meets, Dios mjagyepyidi.”

⁶ Pøni jamts pøn jotøjkiyip ja Dios, ja'ats idø'on Dios janchjagyapip; pøni ka'ats pøn m'adsojimbejtxiyidi ja mgajpxpoo'kxindi, anaxtits ja tøjx.

⁷ Jøts jam mda'andit ja' tyøjkjotpti pøn Dios jotøjkiyidip, mga'adyip mjøø'kxtit idø'on pøni ti ja mmøøjyidip, mbaat'ajttip ku jade'en myikmo'odit. Kidits tøjkp tøjkp nugo mwidetti.

⁸ Ku o magajp mja'attit, pøni mā myikupøkti mga'adyipts mjøø'kxtipts ja' pøni ti myik-møødyip;

⁹ myikmøkpøktip ja pamaa'y jam, jøts ja jaa'y xnøjmidit: “Jaani Dios kyutujk ya midi ja tyanitanaapy yjaa'y, ja adøm ja nmøøt'ajtna'andi.”

¹⁰ Kuts mā ja kajp xpaattit mā mgayikupøktit, yø'øpyidsømdits jam jøts tuu'am nmøømdit:

¹¹ “Pu'uxpaat øø ndekyijxy tø tya'tspøjkni midi ya kajpøøjty, ixyamts øøts nyikwa'ach meets køjxp, ejxti sa x'ejxti, nañi'waajtsip øøts jade'en. Ja ti winets xkanijawidit, jaa Dios kyutujk wyingøñ midi ja tyanitanaapy ja yjaa'y.”

¹² Ixyamts mee ndukmadøy jøts ku nøjkx ja tiidyu'unin ñaxy, ne'egi kaja ja yjade'embj jaa'y ja ayo'on tyimbyaattit, jøts nigidi jade'en y'ayo'ombaattit ne'egi ja kawindiy jaa'dyi pøn jam Sodoma kugajp'ajttøø.

Ja ayo'on midi tyanaxtip ja ka'øgyajp

¹³ iCorazingit jaa'dyi, Betsaidit jaa'dyi, mjanch'ayøøy meets, ti jade'en mnadyatuujnidip! Ku jeexyip jam kajpøtj jam Sidøn jam Tiro ne'egi yiktuñ ja milagri'ajtin midi meets ya tø myiktu'unxi, windi'ixyip ja jeexyip ja chinaa'yin tyiktigajtsnidi, ku ja pyøky jeexyip tyimchaachjawidi.

¹⁴ Kuts nõjkk ja tiidyu'unin ñaxy, mgu'ayowipts meets ja jinary, nika'ap ja ne'egi jadine'en y'ayo'odit ja jaa'dyi pøn tsinaadyip jam Tiro jøts jam Sidón,

¹⁵ jøts meets Capernaumit jaa'dyi, ¿ma mee xijy tø mdyimya'aty, tsajpjøtpy? Pø japxi meets ayodaajkjøtpy mnøjkxtit.

¹⁶ Jøts ja Jesús ja pyabøjkpitøjk ja tnimaay:

—Pøni pøn mbatmadøjidip, øts idø'øn ja wyinaty xpatmadoodip; pønts mgagupøjkidip, øts idø'øn ja wyinaty xkagupøjktp; pønts øts jade'en xkagupøjkp, ja'ats idø'øn ja wyinaty kyagupøjktp pøn ø xkajxp.

Ku wyimbejtø ja ñidugui'pxmyajkpi jaa'y

¹⁷ Xjats ja ñidugui'pxmyajkpi jaa'y ejtni xoni yjanchwimbejtnidøø, jøts ja wyandøø:

—Windsøn'ajtm, tøbaat øøts ja miku' xnimadøy ku øøts ja tø ngajpxpidsimy mets mmøk'ajtingøjxp.

¹⁸ Jøts ja Jesús ja tnimaay:

—Janch jade'en, ojtsts øts ja miku' n'ixy ku ja kya'ukmajadañni ja myøk'ajtm ja'agøjxp ku ja pyidsimy jap tsajpjøtpy.

¹⁹ Øtsts meets ja nmøk'ajtm tø nmø'øy jøts ka' sa mjattit. Øy meets ja tsaa'ñ øy meets ja kajpy xjadawa'kpety, øy meets ja miku' ja myøk'ajtm sa mjadatunwa'añidi, mimajadaajkip meets yja' ja' jøts meets ja ka' sa mdunit.

²⁰ Kidits yø'øyi tu'ugyi xajotkujk'atti ku yø miku' mmimadøyidi, ja' mdajotkujk'attip ku ja Dios m'ejxkapyidi xemikøjxp jap tsajpjøtpy.

Ku ja Jesús xyonda'aky

²¹ Winets ja Jesús tjantjyaxondaajky ja Espíritu Santo, jøts ja wyaañ:

—Dios Teety tsajpjøtpit, yikjujky'ajtpi ya naxwiin, nmøja'wip ngunuu'kxyja'wip ja'agøjxp ku tø xamidsøky o pøn ja mnitsoojkin, jøts yø wijyjaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'øn ka'ejxiymidi. Jade'ents Teety tø xuñ sa kø'øm xamidsøky o pøn.

²² Tum ja' øts nDeety xuktump midi ja kø'øm tyunwampy. Ka'ap øts pøn wa'ats xnijawi sam øts nDeety kø'øm xnijawin, nika'ats øts nDeety pøn wa'ats ñijawiyi sam øts ja kø'øm nnijawin. Jøts pøni pøn øts ja nduknijawiwypy, ja'ats tnijawidip ja Dios Teety.

²³ Winets ja pyabøjkpitøjk ja twin'ejxji'jky jøts ja yide'en ja'ayi yiknimaadyøø:

—Janch nekim meets ku meets ja kø'øm xtyim'yijxy xtyimñijawi midi meets ixa kø'øm mdyim'yijxpy mdyimbyatpy;

²⁴ may Dios kyugajxpy, may windsøndøjk yø kø'øm tja'ejxwandøø tjanijawiwya'andi midi meets ixyam kø'øm m'ijxpy mnija'wip, nika'ats ja t'ejxtøø; ojts ja tjamadowa'andi midi meets ixyam kø'øm mmadøøpy, nika'ats ja tmadoodøø.

Ku ja samariit jaa'y yjotwa'añ

²⁵ Xjats tu'uk wya'kukiyi'ñ ja kajpxwejpidi jøts ja nugo kajpxy'ejxwa'añ ja Jesús, yide'en ja tyiktiy:

—Windsøn, ¿sudso ø ndu'unt jøts øts n'anmija'win ñitso'ok'att xemikøjxp?

²⁶ Jøts ja Jesús ja y'adsojimbejtøø:

—¿Kidimts jap tø x'ixy nõkyjøtpy midi ja Moisés kyutujk myøø'ajtpy, sa ja xja'gyuki?

²⁷ Jøts ja kajpxwejpi y'adsøø jøts ja wyaañ:

—“Amumjoojt x'ajot'att ja Dios, ma'in m'anmija'win ma'in mwimmaa'ñ myajada'aky jade'en ja xwindsø'øgit; jøts nayide'en ja mmigu'uk xpa'ayo'tot sam kø'øm mnabya'ayøyin.”

²⁸ Winets ja Jesús ja ñimaajyøø:

—Tiy janch idø'øn mjanchwa'añ. Pøni mbadumpy yø jade'en, nitso'ok'atpts ja m'anmija'win.

²⁹ Jøts ja kajpxwejpi ka'ap ja ttajotkuki ku ja jade'en yik'adsøy, jøts ja tnimaay ja Jesús:

—¿Pøndsik øts idø'øn ndsaachmigu'uk'ajtpy?

³⁰ Jøts ja Jesús y'adsøø jøts ja tnimaay:

—Tu'uk idø'øn ja jaa'y, jam ja wyinaty kyida'aky ma ja Jerusaléngit tuu' jøts ja ñijky Jericó, xjats maa'tspi ja pyajttøø jøts ja wa'ats yikwimaa'tskijxy, wyet ñaamy yikpøjkijxy; øy øy yikwinwøjpy yikjøpøjpy jøtsnim ja yiknikejky, jawaani ja tkayik'oo'knidi.

³¹ Xjats jam jøtmøñ wyinaajky nay jam tu'uk ja israelit teety; øy ja tja'ijxy, wyinaajk ja'.

³² Jøts jadu'uk kyidakmøø ja Leví yjaa'y jøts ja nayide'en twininaajkmaa, øy ja tja'ijxy.

³³ Winets jadu'uk ja tuu'yø'øbyi kyidaajky Samariit jaa'y, jøts ku ja ojts jade'en t'ixy xjats ja wyimmaa'ñ ja tymchaachmiiñ ku ja jade'en yik'ayowim.

³⁴ Jøts ja wingon twingunøjkxyi'ñ ja tsaachibi, xjats chaachi ja tsøøyiyi, ojts ja tpiktaajki ja aceite møøt ja vino jøts ja t'adsujmi ja chaachi. Winets ja ojts tyikpety kyø'øm jiyujkøjxp jøts ja ojts tyikja'aty ja'taajkjotp, jamts ja tpa'am'ejx tsunajxy.

³⁵ Jøts ku kyimjabom'ajty ku ja samariit jaa'y wyinaty choonwani, jøts ja tju'ljty majtsk ja myeeñu'nk jøts ja tkømøø y ja kudøjk, yide'en ja tnimaay: "Ejx'let yø jaa'y, mo' pøni ti ka'ejtxip, jøts pøni ka' yø meeñ tpaaty ixa nmø'ø y, yiktunts mgø'ø meeñu'nk, ja øts ja ngubat ku nwimbett jadigojk."

³⁶ Xjats ja Jesús tyiktiy:

—¿Pønts me m'a'ejxip migu'uk'ajtip ja jaa'y pøn ja maa'tspi yiktsaachidyøø?

³⁷ Jøts ja kajpxwejpi wyaañ:

—Ja' ja migu'uk'ajtip pøn ja ojts y'ayo'ijxyi.

Jøts ja Jesús ja ñimaajyøø:

—Nøjkxts jøts nayide'en xu'unt, jøts nayide'en mjaa'y'att sam ja jaa'yin pøn ja myigu'uk ojts t'ayo'ixy.

Ku ja Jesús yja'aty jam Marta jøts María tyøjkwindum

³⁸ Xjats ja Jesús jade'en wyidity jøts ja yja'ljty ma kajp wyinaty tu'uk, jamts ja tø'øxyøjk ja tu'uk wyadsøø jøts ja ojts wyayi tyøjkøtpy, Marta dø'øn ja xyøøw.

³⁹ Jamts myiga'ax ja tu'uk, María'ajtp ja', ja'ats twingu'ixajkiyi'ñ ja Jesús jøts ja tpatmadø pøni sa ja wya'añ.

⁴⁰ Jøts ja Marta, ja' ja jam kyami'awatsip ja tyøjkunk, jøts ja tnimiñ ja Jesús jøts ja tnimaay: —Windsøn'ajtim, ¿kidi sa mwa'añ ku øts yø nmigu'uk nadyu'uk xuktunwanguixy yø tunk? Nøjmi waani jøts ø xpudøkit.

⁴¹ Jøts ja Jesús y'adsøø y:

—Marta, Marta, yø' me nugo mdajotkijxpy mdajotmay'øø'kpy yø mdunk.

⁴² Ka' mets yø ne'egi x'øjawi yø øybi winmaa'ñ midu xemikøjxp tamp, ja'ats yø María tø tja'gyuki midu paat'ajtip. Ti pønts yø xijy ukpøjkiniyip jadigojk.

11

Ku ja Jesús tnanky'ixpiky ja Dios'ajot'ajtin

¹ Xjats idø'øn ja Jesús jam ja wyinaty ja Dios Teety t'ajot'aty, jøts ku ja y'abajtyi'ñ, winets ja pyabøjkpitøjk ja nidu'ugin ñimaajyøø:

—Windsøn'ajtim, tukjajtk øøts ja Dios'ajot'ajtk, ti sa ja Juan ttukjajty ja Dios'ajot'ajtk ja pyabøjkpitøjk.

² Jøts ja Jesús y'adsøø y ja wyaañ:

—Ku mdsapkajpxtit, yide'en mwa'andit:

Dios Teety tsajpjotpit,

kuuyi mets jadu'uk øy wa'ats.

Øyts ku xmimiñ ja mgutujk midu mdanitanaaapy ja mjaa'y.

Yikjatts ya naxwiñ nayide'en kø'ømdsojkingøjxp pøni sa xamidsøky nayide'en sam jap xuñin tsajpjøtpy.

³ Møøkyts øøts ixyam ja ngaajyk n'uujkik midu øøts xka'ejtxip.

⁴ Maa'kxik øøts nbøky, kumi tø øøts nayide'en nmaa'kxuky pøn øøts xjemdump xedump.

Agidyujk øøts axajtujk øøts, kidi øøts xmajstsu'uty, jøts kidi myajada'aky ja miku' yja'.

⁵ Jøts ja yjaakwaañ:

—Jade'enin n'ukpiktaajkin jøts ku o pøn ja myigu'uk jam tu'uk, jøts ja tnidsøñ møjtsuu'm jøts ja t'atsnøjmi: "Migu'uku'nk, tun may'ajt t'uk'anuu'kxk øts tigøøk ja mdsapkaaky, ngubatp øts.

⁶ Nmigu'uk øts idø'øn tø yja'aty ndøjkøtpy, ja'ats øts idø'øn njadukaawyampy, ka'ap øts nja' tyimñiti."

⁷ Jøts ja yjadu'ukpi yide'en n'ukpiktaajkmant y'adsø y japyi tyøjkøtpy: "Kidi øts jadine'en nugo xjanchne'emy; aduky yø tøjk jøts ixyp øts n'unaj'jk nmøøtma'ay maabajtkijxpy; ka'ap øts yap nbidø'økwa'añ, jade'ents øts inet ka' ti nyakt."

⁸ Yide'ents øts ja ndyimy'a'ejxi pø myigu'ukxi ja', øy ja yjagabidø'økwa'añ jøts ja t'atsmo'ot midu ja myigu'uk ja amidøjyip, kuwanits ja tjanchjatu'unt jade'en, y'atsmøøgyøxp idø'øn ja' pøni ti jaty ja chøjkpy jøts ja jade'en ka'ap y'ukna'amniyit, pø naña'amixi ja kyatsøjkpy.

⁹ Paty mee yikxon ndukmadø y: Jøts x'amido'odit xpøktsø'odit ja Dios, mmo'ojpts meets ja'; mdukpaadip meets ja' pøni ti meets mga'ejtxidip; myik'awaajtsxiyidip meets tøjk'aaw ja' ku øy ma mgugajpxidit.

¹⁰ Paty ku pøn o ti t'amidø y, yikmøøpyts ja'; ku pøn o ti t'ixa'ay, pyatpyts ja'; ku pøn tøjk'agaj twingøxy, yik'awaajtsxiyipts ja o pøn.

¹¹ ¿Ku mee wyinaty m'uk'u'nkteety'aty jøts ku m'u'nk m'amidowidit ja tsapkaaky, wan meets m'aaw mjoajt ndejin myajada'akt jøts meets tsaa ja xkøjyit? ¿uk xmo'odit ja tsaa'ñ yam meets ja ajkx ja mja'amidøyiyi?

¹² ¿uk xmo'odit ja kajpy yam meets ja tutu'uty ja tø mja'amidøyiyi?

¹³ Øyts mee mabaat mjagatyimy'øyjaa'y'atti, mjaajttipts ku xmo'odit ja m'u'nk m'unaj'jk midt øy tsuj pidsomp, itits ja Dios tyungip, pø tsajpjøtpyxi ja', myo'opts ja' ja Espiritu Santo pøni pøn ja amido'oxiyip!

Ku ja Jesús yiknimaay jøts ku ja miku' myø'ajtin ja tyktuujni

¹⁴ Xjats idø'on jade'en ngøjmyi, jam ja Jesús wyinaty tyikpidsimy ja miku' midt jam wyinaty tyik'ejtnip uum tu'uk ja jaa'y; jøts ku ja miku' pyidsiimy jøts ja jaa'y jatyi kyajpxpijky. Jøts ja mayjaa'y janch ñigyumaap ja tyimyja'widøø ku ja jade'en,

¹⁵ jøts ja winaagin ñømdøø:

—Ja møj miku' yø jaa'y ja myø'ajtin yiktuujni, ja' yø tyuktapidsimpy yø myimiku' midt yø jaa'y myøø'ajtp, yø' wyindsøn myø'ajtindi yiktuujni.

¹⁶ Pømbits nugo ttatundip jøts ja tjot'ejxwa'andi, ja milagri'ajtin ja y'amidoodip jøts ja tyimdyuk'ejxidit midt kidakp tsajpjøtpy.

¹⁷ Wa'ats ja tñajawi sa jatyi ja wyinaty wyinmaydi, jøts ja tñimaay:

—O pøn windsøn, ku kyutujk ja chepta'aky jøts yjaa'y ja ñawya'kxyi kawinakpiky jøts ja xem yam cheptundi agø'omyidi, nanxyøxidipts ja jade'eñi jøts ni ja kutujk niti kya'ukwani, uk kuts tu'uk migu'uk agø'omyi cheptundi jøts ja ñawya'kxniyidi, agø'omyits ja xem yam ñanxyudigøoyidi.

¹⁸ Nayide'ents miku'mi pøni nawyanwa'kxip ja kø'omyi jøts ja agø'omyi ñanky'ayo'ombaaadyi, ¿windemts ja jeky y'ejtnit ja myø'ajtin, kidi ja jatyi kyudigøøñit? Yø' øts idø'on jade'en xyikwamp ku meets mw'a'añ jøts ku øts ja miku' myø'ajtin nyiktuujniyi ku øts yø jaa'y ja miku' ngajpxpidsøjmiyi;

¹⁹ pøni ja'ats øts ja myø'ajtin njanchyiktuujni, ¿pønts meets mmigu'uk yja' yiktuujnidip ku ja tkajpxpidsømdi ja miku'? Pø yø'øxi mee kø'øm mni'øø'niyip jøts ku mee nugo mgajpxigøy.

²⁰ Diosts øts ja myø'ajtin nduktapidsøjmiip yø miku'di, yide'en idø'on xja'gyukidit jøts ku ja Dios tø tyikmeni ja kyutujk midt ja tyanitanaapy yjaa'y.

²¹ 'Ku tu'uk jotmøkjaa'y t'ej'xity tøj, janch yikxon ja ta'tspiky tø tsøøjmjø'kixy ja ta'o'jk, pønts ja mayip jade'en, jade'ents pyikta'aky ja jap tøjkjøtpy jotkujk tyik'ity, ka'ap ja ti tkumay.

²² Jøts kuts jam jadu'uk jawaani jotmøk yja'aty jøts ja myimajada'agiyi, tuki'iyi tya'o'jk ja pyøjkxyi midt ja y'uktamøj, jøts pyikta'aky ja yikja'abøkøjni ti jatyi ja jam yjagyejpy.

²³ Pøn ø xkabudøjkip, ja' øts idø'on xmidsøwamp; jøts ku øts pøn ti møøt njapøk mukwa'añ jøts ja jinaxy tpøkwa'kxy.

Ku ja miku' jadigojk t'awimbeti ja chinaadyaajk

²⁴ 'Ku ja miku' tmajtstu'tuty ja jaa'y, jøts ja nugo wyidity o ma tø'øts etjøøjty, tja'ixa'ay ja pyoo'kxaajk; jøts ku ja nima tkapaaty, jøts ja wyinmay: "Tiku øts ndøjk jadigojk nga'awimbeti ma tø ndsøøñ."

²⁵ Jøts ku ja wyimbity, jade'ents ja jaa'y ja tpaaty sam tu'uk ja tøj tawa'ats, pe'ety jaaxy ja jap.

²⁶ Winets ja chøøñ jadigojk jøts ja janixwixujk tjaaktyimy'atsway ja myimiku' jawaani ka'øydi sam ja kyamajada'agyni, jøts ja jadine'en ttatøkidi ja jaa'y, tsinaadyaajk ja tyikwa'andi, jøts ja jaa'y jade'en jinaxy myøwa'añ, nigidi ja y'ijty jade'en øyim idø'on wyinaty ja miku' ja jam tjamøø'taty tu'umchi.

Pøn ja xemikøjxpit xondaajkin myøø'ajtpy

²⁷ Exam idø'on ja Jesús wyinaty jade'en wya'añ ku tu'uk tø'øxyøjk jam jaa'y agujkp møk'ampy wya'añ:

—Janch kawinmaafi tmøø'taty ja xondaajkin pøn tø myike'exy; jøts pøn ja che'tsk tø mduktayeegy!

²⁸ Xjats yide'en ja Jesús y'adsøøy:

—Janch nekim ja'adi pøn tpatmadoodip ja Dios kyajpxy jøts ja jade'en tpadundi!

Ku ja ka'øyjaa'y ttamidowdi jøts yiktuk'ejxtit ja milagri

²⁹ Namyuk'adøjtsidip ja jaa'y jam wyinaty ma ja Jesús, jøts ja tñimaabyinaxwa'jky:

—Niwine'en ja yambi jaa'y kya'øydi, ñadyijyi tñajawiywa'andi pøni janch ku nDios U'ngi, paty t'amidowdi jøts yiktuk'ejxtit ja milagri'ajtin; niwine'ents kya'ukyiktuk'ejxnidit, wan ja'ayi midt ja kugajpxy Jonás øjts tyuk'ijxyidi.

³⁰ Nayide'ents sa ja Jonás øjts t'ejxpaj'taty ja Ninive jaa'dyi, nayide'ents øts ya'atpi jaa'y x'ejxpaj'tatt.

³¹ Ku wyinaty kyutuky ja et ja xøøw, ku ya'atpi jaa'y nøjkx yiktidyundi, jøts ja windsøndø'øxy yø ñidanaagyukiyidit jøts ja ñi'øøniyidit pøn tniidso'on jagam et ja Salomøn,

jøts ja t'ejxøø tnija'wiyøø ja wyijy'ajtin; ixyats jadu'uk tø kyaxi'iky jawaani wijy midi tjinajxp ja Salomón, nayide'ents meets ja xkagupiky.

³² Nay jats ja Nínive jaa'y wya'kukidit ku ja tiidyu'unin ñaxt ku yiktiidyu'undit ya'atpi jaa'dyi, jøts yikni'øønidit; ja agøjxp ku ja Nínive jaa'y ne'egi tyiktigajstøø ja chinaa'yindi ku ja Jonás ja ojts tyukmadøyiidi ja Dios kyajpxy ja Dios y'ayuujk; ixyats jadu'uk tø kyaxi'iky pøn tyimñija'wip wa'ats, nigidi ja Jonás y'ijty jade'en tnijawi, nayide'ents meets ja yam xkagupiky.

Ja øy jaj midi jaa'y tyikja'gyukip

³³ 'Ka'axi pøn jaj ttuknidøøbyøki jøts ja yikyu'utst o ma, uk jøts ja yikujupt kajuun patki'py, ja agøjxp ja tyøøbyiky jøts ja yikpikta'akt ma yjajt, kuts jam pøn tyøkit tyuk'ejxpaatpts ja o ti.

³⁴ Jade'en idø'øn yø mwēen n'ukpiktaajkint sam jajin, yø'øts tyikujajtaajkip tyikudøø'kxaajkip amuum ja mne'kx ja ngojpk; kuts ja mwēen y'ø'y'aty nayide'ents ja amuum tjagyeyjy ja ne'kx ja kojpk, ka'ap ja ttuktuñ kya'øbyi.

³⁵ Øyimts x'ejxtit jøts kidi xyik'ookti ja jaj midi wa'ats jajp, jøts kidim jade'en mjatti sam jaj kya'ityin, sam ja jajin midi kawa'atsjajp jøts yik'ayowin kube'ets kugoots.

³⁶ Pøni mwinmaa'nbyattipts øy yikxon, ja jajts idø'øn ndejint mgayik'oo'ktip jøts ka' jade'en m'etti sam o pøn kugootstujpy chøønin niti winmaa'ñ, o nugo chaach-jawin'ejx'ookti. Kuts meets, wa'ats meets ja mduk'ejxpaadyidi pøni ti dø'øn m'ejxwandip, ka' ti jadu'uk chøkyi, jade'en ja myikujajtaagiyidi myikudøø'kxaagiyidi sam jaj wa'ats mduk'ejxpaadyidi o ti.

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

³⁷ Kuts ja Jesús jade'en kyajpx'abajtyi'ñ, xjats fariseo ja tu'uk wyaajøø tyigam kaabyi. Kuts ja jam tyøjkiyi'ñ jøts ja y'ixaajky, kaabyajt twinguwa'atsiyi'ñ.

³⁸ Jøts ja fariseo janch ñigyumaap tyimya'wiyi'ñ ku ja t'ijxy ja Jesús kyagøbujy yam ja kyaawya'andi, jade'en idø'øn ja tsinaa'yin'atti ka'ap ja nugo kyøbujti, yide'en ja tyikajpxti jøts ja' ja tyaniwa'ats'ajttip ku ja kyøbujti, jøts ja kyapøkpyatti.

³⁹ Yide'ents nwindson'ajtim ja tnimaay ku ja jade'en t'ijxy wyinmay:

—Jade'en mee fariseotøjk mjaa'y'aty, ja'ayi mee mjanchkamijotkup sudso ja texy ja tas nikijxyi nadyijyi wa'ats y'ett, jøts ka'ap ja xunk'atti pøni sadam ja yjøtpy. Ni xkaja'gyukidi kudam m'amp mjotp tum ja axøøkpi yigaappi xjamøø'tatti ku jaa'y nugo xwin'øøndi xwimaatsti.

⁴⁰ 'Nugo mee mdyimyo'øty! ¿Ka' xnijawidi ku tu'ugyi ja kojpi tø tyik'øyi ja m'anmija'windi jøts ja pikta'aky?

⁴¹ Jade'en Dios mgupøkiyidit ku amunjoojt mdsojkingøjxp xunk'attit ja pudøjkin. Jade'en ja m'anmija'win ja wa'ats'ajtin tpaattit.

⁴² 'iMjanch'ayøøy me fariseotøjkti! Køx kida'ak meets xjanchkugubatkiy jøts ka'ap ne'egi xpadu'unxidi midi ja Dios kyutujk jawaani ne'egi yjani'ane'empy, ku ja ttsøky ja øy tiidyu'unin, ja pa'ayo'ejxk, jøts ja janchja'win. Ya'atpi meets idø'øn ne'egi jawaani mjapaat'ajtip mbadu'ump.

⁴³ 'iMjanch'ayøøy mee fariseotøjkti!, ku mee tum jam mnachøkyidi mdsinaawya'andi tsaptøjk'okp windsonin. Jøts ku tuu'ajy, øy paat meets ja nagyajpxpoo'kxi xtsokti, myikwindsø'øgip myikwinjawip meets, ejxim meets jadi'iñi myikwinajxni.

⁴⁴ 'iMeets tsaach'ataayjaa'dyi, jøts m'ayøøy mee kajpxwejpitøjkmidi! Jade'en mee mnankyaxji'igy sam ja oo'kpi kajuunin øy nikøjx kyaxji'iky jøts ka' nadyijyi tyikaxji'iky pøni sadam ja yjøtpy.

⁴⁵ Xjats ja kajpxwejpitøjk nidu'uk y'adsøøy jøts ja wyaañ:

—Windsøn, ku jade'en mwaa'añ xuk'ayojip øøts yø nayide'en.

⁴⁶ Jøts ja Jesús yide'en y'adsøøy:

—iMjanch'ayøøy mee kajpxwejpitøjk nayide'endi!, ku ja kutujk xyik'øyiidi kamaabyim, ka' meets ja kø'øm x'uktuni, ja pujx ja kajp meets ja mdukmidanaapy, kamadøyim meets ja x'ukja'wiñi.

⁴⁷ 'iMjanch'ayøøy meets!, ku yam xjanch'ukyik'øyiidi xyikpaadidi ja oo'kpi nipots pøn ja m'apteety yik'ooktøø, ja Dios kyugajpxy.

⁴⁸ Jade'en yø yikja'gyukiñi sam o ti pøn kajpxy'aty tyik'ity, kajpxy meets ja yjawi xyik'ejtni møøt ja mdeety'apti ku ja tyik'oo'ktøø ja Dios kyugajpxy, jøts meets ixyam xyik'øymi xyikpajtimyi ma ja ñaxøjkidøø. Mdsaaçpa'ayøøpy meets ja xijy jade'en.

⁴⁹ 'Paty tam idø'øn ja Dios kyajpxy wya'añ yide'en: "Ndanigaxp meets nguga-jpxy møøt ngudanaabyidi, myik'ookpts meets ja winaagin; jøts pønts jaakjata'andip, myik'ayo'ombaattipts meets ja'."

⁵⁰ Meets Dios ja mdagubatidip wine'enin ixa mnaxwii'ñitjaa'y'atti ku ja m'apteetyi tø tyik'ookti ja Dios kyugajpxy. Tuki'i'yi ja tpayø'øgyøxt, jaayip ja tpayø'øbyinaxwa'akt kuuyip ja naxwii'ñit cho'ondaajky,

⁵¹ kuuyip ja Abel t'oo'k'awiyii'ñ jabaat ku ja Zacarias y'o'jky, ku jaa'y ja yik'o'jkøø jap tsaptøjkjotpy ma ja altajr jap. Paty me ndukmadø yøts ku Dios ja ttabayø'ty ja yamit naxwii'ñit jaa'y.

⁵² 'iMjanch'ayøøy mee kajpxwejpitøjkti!, ku x'ama'at'ajtidi ja Dios kyutujk; kø'ømyi meets ja mnadyamidsøkyi, ni xkabadumidits ja', jøts ni xkaduknija'wimidits ja abikpyidi pøn ja tjanijawiwandip.

⁵³ Ku ja Jesús jade'en wyaañ, jøts ja kajpxwejpitøjk møøt ja fariseotøjk yjantyim'ambøjktøø. Jantyimyikmi'ambøjk ja Jesús jøts ja tanejkin'ampy tjantyimyiktøwdi ñadyijyi tigati.

⁵⁴ Øyik idø'øn ja ti t'ukmado'odit, y'amaa'tsk'ejxwãndipxi ja' jøts ja jatyi ttan'øønidit pøni ti ja kya'uk'ømyadoodip.

12

Ku ja Jesús tñigajpxi ja fariseotøjk kya'øwvinmaa'ñ jøts yikjøpjawit

¹ Yikxon ja jaa'y yjantyim'ñañimujkpajtidøø mil'ampy, nugo yjanch'adøtsnidi, xem yam yjanchnadyateeni. Jøts ja Jesús ja pyabøjkpitøjk tñimaabyinaxwa'jky:

—Øyim mnay'eix'etidit ejxim yø fariseotøjk kya'øwvinmaa'ñ mdawin'iiñidi ti sa yø iiy wyanidi, jabi wa'atsts yø iiy ñadyijyidi.

² Wants uk jade'en, ka'axi ma ti yu'uch'ity, kuwanixi ja øy juuni yjadyimyikpaaty; uk kuts o ti yjayik'amaa'tsk'aty, kuwanits ja yiknijawi.

³ Jade'en'ampy ja wa'ats nøjkk yiknijawi ti jaty mee mdumpy amaa'tsk, ti jaty mee mgayiknigaxji'kpy, adsu'jkyts ja y'uknigaxjø'kniit sam o ti xinaxy wa'ats kyaxji'iky. O me ti amaa'tsk xjakajpxy, øy meets ja pøn xjagadukmadø, wa'ats ja nøjkk yikajpxnaxy ejxim ti tøjköjpx yikajpxwa'kxyin jøts yiknijawit.

Ku ja Jesús tñigajpxy jøts ku ja tu'ugyi pøn yiktsø'øgip

⁴ 'Mee migu'uktøjkti pøn jaty ø xpabøjkp, meets idø'øn nnimaapy jøts kidi xtsø'øgidi ja yikjaa'y'oo'kpidi, pø ka'axi anmija'win ja tjadyimyik'ookti øy ja wyinaty tø tjayik'øøky ja ñine'kx.

⁵ Ja'ats mee ndukmadoowampy jøts ku ja' xtsø'øgidit ja Dios pøn tyikutujkp jøts mnøjktit ayodaajkjotpy yam meets ja o'jkin tø xja'ixy. Ja'ats idø'øn mdsø'øgidip.

⁶ 'Ka' meets Dios m'eixjøyi, zti sa ja nimagoxkpi joon chobaaty jøts ja yiktagujuy majtsk ja puxmeeñ?

⁷ Machøybaat meets mwaay ja myik'ejtniyi. Paty ka' mdsø'øgidit, ti sa ja mutsk jonuna'jk ja tkaja'dyigøy; mats meets ja ndejnt mja'dyigøø'ñiyit.

Pøn jaty t'øñigajpxp t'øñimadyakp ja nwindson'ajtim Jesucristo jam mayjaa'y agujkp

⁸ 'Yikxon mee x'ukmado'ot, pøn ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nñitanit jam Dios wyingujkp ma myay'ankilis ja jam møøt;

⁹ pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejxkapt, niwine'enin nganitanit jam Dios wyingujkp ma may'ankilis ja jam møøt.

¹⁰ 'Jaa'kyikmaa'kxtip ja ne'egi pøn ø tø xkaguidyimy'ødyejti, ja'ats nima niwindem ja kyayikmaa'kxtit pøni pøn tka'ømyigajpxtip ja Espiritu Santo.

¹¹ 'Kuts pøn myiknøjkkidit jam tsaptøjkjotp uk myikwaa'øjktit ma kutujktaajk ma kudunk ma tñdyumbi, kidits meets ja xajotmay'oo'kni, kidi meets ja xkumayjawi sa dø'øn jap mwã'andit, sa dø'øn jap m'adso'odit,

¹² pø ja Espiritu Santoxi meets ja mda'awa'aniyip pøni sa dø'øn jap mwã'andit, ja' meets jap myikajpxiyip ku tpaatt ja et ja xøøw juuni mgajpxtit.

Sa ja kumeeñ'ajtin xyikwinmaa'nmyaj'tint

¹³ Xjats jam tu'uk wyaañ jam mayjaa'y agujkp jøts ja tñimaay ja Jesús:

—Windsøn, nimaajyk øts yø nmigu'uk jøts wan ø xmø'øy ja nmaay.

¹⁴ Jøts ja Jesús wyaañ:

—Yikxon me waani m'ukjaa'y'att. Ka'axi ø pøn tø xpikta'aky jøts meets ja mbikta'aky nyikwa'kxyit, uk jøts øts jade'en ndu'unt sami kudungin.

¹⁵ Nayide'en ja wyaañ:

—Øyim x'ejxtit, nay'eix'etidim jøts kidi o ti kayakyim x'ejxti, kaja'ajip jaa'y ja y'anmija'win tyajujky'ajtpy xemikøjpx ku pyikta'aky ja may'ampy tñøøt'aty.

¹⁶ Jøts ja yide'en tmadyakpaajty tu'uk ja ejxpajtin madya'aky midu ja kə'om ñajtsja'wip jøts ja yiktamija'gyukit midu ja ñimadya'akwampy, jøts ja wyaañ:

—Jaa də'əon wyinaty tu'uk kumeəñ jaa'y jøts jantyimy'ejtp idə'əon pyikta'aky ja jam kyamjotp.

¹⁷ Winets ja tniwinmaa'yiyi'ñ jøts ja wyaañ: “ǂTi sudso ndəbyaəatt, sudso əts yə nbikta'aky ndu'unt? Ka'ats əts n'abəjk'i'ñ ma əts yə nbəjkjə'əkt.”

¹⁸ Jøts ja yjaakwaañ: “Tə nniwinmayi sudso əts yə ndu'unt. Yə ndsa'jx tam ə nyikida'ap jøts ə nyik'əyit jawaani məjpi, japts əts ja nbikta'aky nbəjkjə'kəxt ti jaty əts ja nməət'ajtpy.

¹⁹ Winets ə kə'əom nnañ'əmxiiyit: Ja tidsik winmaa'ñu'nk xijy mjadyimyjadsojky jabi ixyats may pikta'aky midu kawinaak juməjt m'ajot'atp; poo'kx pək mets, kay uuk mets jotkujk xoni.”

²⁰ Yam ja wyinaty jade'en wya'añ jøts Dios ja ñimaaajyə: “Jaa'gyumo'tpi, ixyam koots inet m'ooknit; jøts midu jap tə xpəkj'i'ky, ǂpəon yə tja'atp?”

²¹ Jade'en idə'əon jaa'y yjaty pəon ja pyikta'aky nugo tniəpkajtp jøts ja yə jotkujk ttuktanaxy ja et ja xəəw, ayoopts ja y'anmija'win ja yjaty jam Dios wyingujkp ja'agəjxp ku pyikta'aky ja yə kə'əomyi tə t'ajot'aty.

Ku ja Dios t'ejx'ity pəon jaty ja y'u'ngip y'una'jkip

²² Xjats ja Jesús oojknim tniimaay ja pyabəjkpitəjk:

—Yikxon ndukmadowdi: Kidi nugo xpamaydi xpadajti ja mgaajyik m'uujkitti, ti mnidsəənidip, ni ja mwet ni ja mnaəmy mee xkaguma'aty ti mwet'attip.

²³ ǂTi jade'en ja jujky'ajtin yikpaaty sam ja kaaky jii'kxyin? Pə ka'axi. ǂJøts ja wet ja naəmy mibaat ja t'uk'amibaat nayide'en pəni sa də'əon ja n'ə'kx ja kojpk yikməət'aty?

²⁴ Ejxti yə jəəky, ka'axi yə ñe'epti kyoyti, ka'axi pyikta'aky yi tyikpidə'əkti, ka'axi pyikta'aky yə təkəjkə'əkti jøts təkta'aktit jap tsa'jxjətpy; əy yə jade'en yjagatundi, ja Diosts yə yikjujky'ajtidip. ǂTits mee mdsow sa ja jiyujk jade'en ja yja' yikmo'odi!

²⁵ ǂPəon kə'əomdsəky tyimy'uknənyojnəp jagujkp metrin əy ja mabaat jade'en tjadyimy-jatsəky?

²⁶ Pəni ka'ats tam ja jade'en yjaty, ǂtigəjxpts ja yikmijotmay'ookt?

²⁷ 'Uk'ejxtim sa o ti pijy yəñ, ǂti pee'tip kojtip yə? Jøts tiy janch meets idə'əon nnəjmi jøts ku ja windsəon Salomón nijade'en kyanaxyəjxəə sam yə pijyin, əy ja mabaat tjabiktakijxy ja xyox.

²⁸ Sats idə'əon ja Dios jade'en təxy ja pijy midu jaty ixyam o mdsow yondip əy ja jabom yjayiknitsaañit; kuts meets, ǂtiku meets idə'əon ja mğaxoxit? ǂSudso meets ja xpamay xpadajti ti jaty mğa'ejtxiyidip?

²⁹ Paty wingujk jotkujk mwidəttit, kidi meets ja xkumayja'wiñi ma xpəktit ti mğa'adyip m'uuktip.

³⁰ Jade'en naxwii'ñit jaa'y ixyamdi pəon ja Dios yja' tkaja'gyukidip, ja' pyawidejtip tpa-maydi tpadajti ja pikta'aky ti jaty chojktip; kuts meets, wa'ats meets Dios Teety mnija'wiyidi ti jaty mğa'ejtxidip.

³¹ Ne'egi kupəjkidits ja Dios chinəa'yin ja kyutujk midu ja tyanitanaapy jja'a'y, jade'ents meets ja mmo'ojidit ti jaty mğa'ejtxidip.

Ja kunuu'kxy jujky'ajtin midu jap tsajpjətpy

³² 'Kidits mdsə'əgidi, jade'en me n'ejx'ity sam pəon ja byorreegu'nk t'ixy; o meets idə'əon mğanamayi, mdanitaniiyipts meets Dios Teety ja kyutujk, jade'en meets ja mdamidsəkyi.

³³ Tookti pəni ti jaty jam mmoəət'ajttip jøts ja Dios jade'en'ampy xamiyoxtit ku xmo'odit pəon jam ti ka'ejtxidip pəon ayoodip; jade'en y'əpyidsə'əmt ku xpaəttit ja jujky'ajtin midu jap tsajpjətpy, midu ka'ap mwindigə'xyidip.

³⁴ Pəni ma xnajtsja'widi xpaətwə'andi ja jujky'ajtin, nay japts meets ja mwinaa'ñ y'ity.

Ku ja Jesús wya'añ ku jəp'ejx'ity n'ejtindit

³⁵ 'A'ejxi abaadi mna'ny'etidit.

³⁶ Jade'en sam tumbi tjəp'ixy ja wyindsəon ku ja ñijky tə'əxñi'ukpi, jøts kuts ja wyimbətt jøts ja jaty tyik'awaajtsit ja tək'aaw ja'ayi ja yja'att, ja'ayi ja kyugajpxit.

³⁷ Nekim ja tumbidi pəon kajxa'aky pidsəmdip ku ja wyindsəon ja pyaadyidi wijy kejjy, ku ja kyama'adi kya'ətti yam ja yja'aty; jøts tiy janch meets idə'əon nnəjmi, wan ja tka'uknagymay kə'əom jøts ja tyik'ixa'akt ja tyumbitəjk jøts ja ttukwinguwaadsit ja kaabyajt, wan ja tka'uktawindsə'əgi ja kaaky ja tojkk.

³⁸ Əy ja juuni yjaja'aty, yjaja'aty ja tsuu'm yjaja'aty ja jəpkyoots, kuts ja kyayikməa'gyubaadidi ja'abi tumbits idə'əon nekim t'ejxtip.

³⁹ Ku o pəon pyikta'aky t'ejx'ity tyəjkətpy, ejtp ja tjəpja'wigyunaxy ja maa'tspi, ka'ap ja ñagymaədigəyi pəni juuni də'əon ja y'ukja'att.

⁴⁰ Nayide'ents meets idø'øn mjøp'ext ejtp; ku øts jade'en jotmøñ nme'ent yam ø ngayikumay, pøn ja naẏwii'ñit jaǎ'y ja myøjkudanaaby'i'ajtpy.

Ja tumbi pøn øy ejx'ejtp

⁴¹ Winets ja Pedro wyaǎñ jøts ja tyiktiy:

—Windsøn'ajtim, ǔøøts yø dø'øn yø jade'en xamimadyǎkp, uk niduki'i'yi dø'øn xnøjmi?

⁴² Jøts ja nwindson'ajtim wyaǎñ:

—Ja tumbi pøn yiktump ku ja myadøy ku ja yǎ'gyuki, ja'ats ja wyindsøn tanipøjkip pøn jaty ja jap tyøjkjøtpy jøts ja tyika'aty sa pyaat'atyin.

⁴³ Nekimts ja'adi pøn jade'en tpadundip ti jaty ja wyindsøn ja tø tyanipikyidi. Øy ja juuni yǎ'aty, ixapts ja jade'en ttayø'øbyety, ixap ja jade'en tyundi.

⁴⁴ Ndyimñajtsja'wip øts jøts ku ja wyindsøn ja pyikta'agit jøts ja tyuk'eix'etit tuki'i'yi pøni ti jaty ja jam yjagyeyjpy.

⁴⁵ Pønts tkajøp'eixp ja wyindsøn, pøn jade'en winmaapy, jekñim ja tijy yǎ'att, ku ja yiktaminikaagi ja myøøtumbi jøts ja jaty øy sagasa ttuñ ja myøøtumbi, ja yaa'y ja tø'øxy, ja'ayi ja chøøn ja wyindsøn nekim ja winet kyay y'uuky, jøts ja myuktigøøñi,

⁴⁶ kuts ja wyindsøn wyimbity øy juuni yam ja ka' tjøp'ixy yam ja niwine'enin tkagumay; ixjadam ja yǎ'aty jøts ja tyagubety; ja'agøjxp ku kya'ø'y'aty, ǔma dø'øn ja yiktumbi jade'en?

⁴⁷ Pønts wǎ'ats tjaniǎ'wip sa dø'øn ja wyindsøn tjatsøky jøts ja nika' tjøp'ixy jøts ja nika' tmimadøy pøni sa ja yjawa'añ, yikxonts ja nøjx yiktagubety, yikxon ja yjantyimykwowjpmatst.

⁴⁸ Pønts tkidyimñija'wip pøni sa tam idø'øn ja wyindsøn ja tjatsøky, jøts ja ka'ap tjøp'ixy jøts ja ka'ap tmimadøy, niwyaanits ja ne'egi yiktagubatt, ka'ap ja ne'egi jadine'en yikwopt. Ti sa o ti jade'en pøn o ti may yikmøøpy, nayide'ents ja yik'amido'oxit may'ampy; pønts o ti yiktami'ajot'ajtip, jinaxys ja yikxon yiktabayø'øty.

Jesús køjxp jaǎ'y ñawya'kxyidi

⁴⁹ Ja tiidyu'unin øts yǎ tø nmimiñ naẏwiiñ; janch tyimjyawamp øts idø'øn jøts ja jeexyip yam nyiktunkpatni!

⁵⁰ Nniǎ'wip øts ku ndanǎxt ja møj ayo'on, indajotmay'oo'kunǎxp øts ja jaanim kunim øts ja wyinaty tø ndanaxy!

⁵¹ Sa mee m'ukwinmay, ǔø'y'ajtin xondaǎjkin ti øts yǎwi tø ndanimiñ naẏwii'ñit jaǎ'y? Nømp øts jøts ku ka', nanñawya'kxip øts jaǎ'dyi.

⁵² Yamnim inet tø cho'onda'aky, nøjxpx nǎxpts idø'øn jade'en tukmigu'uk xyiktseptǎ'aktit øy ja tu'ugyi yjatsøøniidi, nideety nidaǎkti, ni'u'nk ni'una'jkti. Pøn nimagoxkti, nawya'kxidipts ja', jøts ja ñayjibøkidit jagam ixkø'øm namajtsk jaty nidigøøk jaty.

⁵³ Øts køjxp ja kawin'ijxyim ñayjawiyidit ja u'nkteety ja u'nktaǎkti møøt ja y'u'nk y'una'jkti, ja yaa'y ja tø'øxy, tum jade'en y'adø'østtit ja tsu' ja xa'kxy, ja u'nk ja mø'jt.

Ja ejxa'an sudso yikniǎawit jøts ku wyinaty tø tmibaat'aty jøts kyøxt ja naẏwii'ñit

⁵⁴ Nayi ñimaamyøø ja Jesús ja mayjaa'y:

—Ku x'ejxti ja yaak pyidi'iky ma xøøw yjexy winets mnømdi, tu'up tam inet, janchjajpts idø'øn ja jade'en.

⁵⁵ O kuts ja poj wimbet'ampy yø'øy ku kyaxuxpyøjy, jats mnømdi, janch'anwamp tam, janch tøødipts idø'øn ja m'ayuujk, janchjajtpxi dø'øn ja jade'en.

⁵⁶ Mee win'øø'mbidi! Pøni mniǎ'widip tam sa kyaxi'iky ja et ja tsajp ku ti tyunwa'añi, ǔtikuts nayide'en xkanijawidi pøni ti dø'øn tunwajñip ya'atpi xøøw ya'atpi jumøjt ku ja møk'ajtin wyingaxi'iky jøts ja øy sagasa mjayiktuk'ejxti?

Kajpx'øyidi jøts mnamyijotjimbetidit møøt ja mmidsep

⁵⁷ ǔTiku yikxon xkawinmagyukidi pøni sa dø'øn chøkyi, pøni sa dø'øn pyaat'aty?

⁵⁸ Ku pøn mni'øøniwya'añidi jøts ja myiknøjxw'añidi jam kudunk wyindum, namga'anin jam myiknijkxyidi tiku yikxon xkakajpx'øyidi jøts ja møøt mnamyijotjimbetit jadigojk, jøts kidi myiknijkxyidi jam tiidyumbi wyindum; ǔja ti nø'ømp ja windsøn jam? Pø mgøyǎkidipxi ja jam jøts mee myikøyǎkt ma ja tajk ma ja mayojr jamdi, ja'ats mee myikpuxøktøkiyip jøts mee myiktsu'umt.

⁵⁹ Øts idø'øn wǎmp jøts ku jaanim mbidsø'ømdit ku wyinaty tø ja multa xkubatkøxti.

13

Yajkpy øy'ajtin ja' ku ja tsinaq'yin tyigach

¹ Nayi winet et idø'øn ja Jesús jam ñimejnøø wingaagin ja jaǎ'dyi jøts ja ojts tyamimadya'agyi ku ja Pilato wyinaty tø tyik'øøky ja Galileit jaǎ'y, jøts ku ja jaǎ'ñi'jpy ja ttukmiyø'øyiyi'ñ ja jiyujkni'jpy mididi ja wyinaty kø'øm tø t'ukyik'ookti mididi ja wyinaty kø'øm tø tyoxti.

² Jøts ja Jesús wyaañ:

—Jade'len mee mwinmay jøts ja' ja Galileit jaa'y kyujajtidi jade'len ku ja yjantyim-byoktyundi sam jam jade'len ka' pøn jam y'etjotpti kyajpjotpti.

³ Øts wamp jøts ku ka'; ti pøn idø'øn ka'ookp, nayide'len mee m'ookt pøni ka' mdsinaa'yin xyiktigatsti.

⁴ Jade'len meets yjawi mwinmaañi, ja jaa'y pøn oo'ktøø nimaktuktujk ku ja pøch ja pyajtidøø midi wyinaty janch køjxp tanaapy midi yiktejp Siloé, jade'ents meets yjawi mwinmay jøts ja' ja kyubajtip ku ja jawaani pøky tyaja'adyidi sam ka' pøn pøn jaty jam Jerusalén tsinaadyip.

⁵ Nømpst øts ku ka'; nayide'len mee m'oo'køxt sam ja'ajindi pøni ka' mdsinaa'yindi xyiktigatsti.

Ku ja Jesús tmadyakpaaty ja iigi kipy midi' katøømp

⁶ Xjats ja Jesús ttamadyakpaaty tu'uk ja ejxpajtin madya'aky jøts ja wyaañ:

—Tu'uk idø'øn jaa'y, jamts ja y'iigi tsä'am kam ja', ja'ats ja y'ats'ijxpy pøni tø dø'øn ja wyinaty tyøømi, jøts ja ni tu'ugin tkapaajtøø ja tyøøm.

⁷ Jamts idø'øn tyumbi tu'uk pøn ja kam t'ejx'ejtp jøts ja tnimaay: “Ukmadowim, tigøøk jumøjt øts icyam kujk njamiyø'y jøts øts ja iigi tsä'am njatukwa'añ, nijuunits ø ni tu'uk ngapaatynim. Yikidaagøjxnits yø ñiguipy; nugots ja naajx yø yjawi tyikwindujkni.”

⁸ Jøts ja kam ejx'ejtpi y'adsøø y jøts ja wyaañ: “Wanims, windsøn, tjaak'uk'ity jadukjumøjt; n'ukuyu'up øts, n'uktajyuu'ngip øts yø naajx jøts øts ja pu'uty nbiktaajkit.

⁹ Kidi wan jade'len tyøømi; pøni ka'ats, winets yikpo'tjøøkt.”

Ku ja Jesús tyikmøkpiky tu'uk ja tø'øxyøjk poo'kxin xøøw et

¹⁰ Jøts idø'øn ngøjmyi, poo'kxin xøøw wyinaty, jøts ja Jesús yik'ixpiky jam tsaptøjkjotp.

¹¹ Jamts idø'øn tu'uk tø'øxyøjk myaktuktujk jumøjtíp pa'am ja wyinaty tø pyaajtniyyi. Jøts ja jadine'len kyatsø'øky, tø ja yjigujkxidyigøøñi, miku' idø'øn ja wyinaty jade'len tø tyuñi jøts ja niwine'enin kya'ukoogukini.

¹² Ku Jesús ja y'ejxi, winets ja yaajxiyi, xjats ja ñimaajyøø:

—Tø mba'am mniwaajtsniyyi, møk mōjaawni mets.

¹³ Jøts ja ojts tkønixajy, jøts ja tø'øxyøjk nay jatyi kyoogukiyi'ñ jøts ja tiy tyaañ jadigøjk, winets ja ttukmija'wiyi'ñ ttukunuu'kxyja'wiyi'ñ ja Dios.

¹⁴ Jøts ja mōjaa'y midi tñigubajk'ajtp ja tsaptøjk tjantyami'ambijky ja Jesús, tigøjxp ku ja yiktsø'øky poo'kxin xøøw, tuds myigu'uk ja tnimaay:

—Paty tu'unin xøøw jaa tudujk xøøw tø yikpikta'aky jøts jaa ndu'unindit; mendits øy juuni nugo ku kyapoo'kxinxøøwi, jade'len mme'endit pøn jaty ja nanckho'ogi ttøjktip.

¹⁵ Jøts nwindsøn'ajtim yide'len t'adsøøy:

—Mee win'øø'mbidi, ðm'ukyk'ijtpy meets mjiyujk mdsakaa miwø'ømbety, jøts adøødsi xyik'etti ku pyoo'kxinxøøwi? ðTi kidi meets ja xyikwinaky jøts meets nøø ja xaniwøpy?

¹⁶ Tiits ya'at tø'øxyøjk kyubatp ku yø kyatsø'økt ku poo'kxin xøøw, pø Abrahamts yø tyeety'apip jøts ja miku' yø myaktuktujk jumøjtíp yikpa'ambajtniyyi, ðsudsø'ampyts yø kyamøkpøkt øy yjapoo'kxinxøøwi?

¹⁷ Ku ja Jesús jade'len wyaañ, jøts ja myidsep chø'dyunbattøø; jøts ja mayjaa'y tyax-ondäktip ja' ku ja t'ejxti jade'len ja Jesús myøk'ajtin tyikwingaxi'iky.

Ku ja Jesús tmadyakpaaty ja mortas tømt

¹⁸ Yide'ents ja wyaañ:

—ðTixik ja y'ukyiktami'ejxip ja Dios Teety kyutujk midi ja tyanitanaapy yjaa'y? ðTixik jade'len?

¹⁹ Jade'len idø'øn n'ukpiktaajkin ja' sa møj mortas tømt midi ja jaa'y wyøjpy kyamjotpy, kuts ja myuxy jøts ja jade'len yøn sam o ti møj kipy yøn paxax paxax, jamts ja joon kyøxke'eky jøts tyik'øyibaat pya'an ja jam ma jaty y'awaj y'axeeñ ja jam.

Ku ja Jesús tmadyakpaaty ja levaduri

²⁰ Nayinøøm ja Jesús:

—Tixik øts jadu'uk n'uktami'ejxip ja Dios kyutujk midi ja tyanitanaapy yjaa'y.

²¹ Jade'len idø'øn ndejint sa ja levaduri midi yiktamimøø'kxip ja ariin way jøts ja amuum tyakaagiyit, jøts ja jich yaakt.

Ja mutsk tøjk'aaw

²² Xjats ja Jesús ñajxy jøts ja jam ojts ñijxxy Jerusalén, yik'ixpøjpk yik'ixpøjpk idø'øn ja', pøni ma jaty kajp ja tpaaty ja møj ja mutsk.

²³ Winets ja jaa'y ja tu'uk yiktøøjøø:

—Windsøn'ajtim, ðjanch niwaani dø'øn ja jaa'y ñitso'ok'att?

Jøts ja Jesús ja t'adsøøy:

²⁴—Janch jade'en jaa ku jap ka' pøn nugo ajawī nāxti, øyimts x'ejxtit mā mdøkīdit, jade'en ja n'ukpīktaajkin sam jaa'y ttanaxy mutsk tøjka'aw; øy jap pøn yja'uktøkiwyañidi, ka'ats ja y'uknājxnīdit.

²⁵ Kuts ø ndanaagyukit, jade'en ø ndanaagyukit sam kudøj k tyanaagyukin jøts tyøjka'aw ja t'atsyik'aduky. Pøni tøts meets jap wyinaty mdāndi tøjkwimpy, mjaagujpxxiidi mjaatøjkwingoxiti meets jap, uk mjanømdi meets jap: “Windsøn'ajitim, yiktøjki øøts.” Jade'ents mee nnøjmit sǎ ja kudøjkw wyā'añin: “Ka' mee nnijawī pø mbøn meets, pø mā mee mdsøøñ.”

²⁶ Jats mee mwināmbināxwā'akt: “Tiku me ndejint øøts xka'ijxyi, jabi tøts adøm ngaamyujkin n'uukmuujkin, jabi mets ojts o madsoo myik'ixpiky.”

²⁷ Yide'ents mee n'adso'ot: “Tø nwa'añ jøts ku mee ka' nnijawī pøni mbøn meets. Jiwa'akti ya, kidi øts ya xwin'ejxti, zpønxi ø x'abajxtip, kidi meedsip?”

²⁸ Japs mjø'ødit myā'axtit, m'amdøtskaattit mdaachtøtskaattit ku x'ejxtit ja Abraham, ja Isaac, ja Jacob jøts ku ja jap ne'egi møøt niduki'iyi ja Dios kyugajpxy j'etti, mā Dios kyutujktaajk mā yjaā'y ja ttanitiini kyutujk. Ka'ats meets jap jade'en mdøkīt.

²⁹ Yø'omyujkøxtip nāxwii'ñit jaa'dyi, o madsoo choondit, jøts ja tpaajttidit ja Dios myøjkunuu'kxin midī nīpøn kyapatpynim, midī ja tya'awijpxy ja yjaā'y.

³⁰ Pøn yam yik'ejxtip ka'ejxiyimi, pyadundipts ja ne'egi sǎ nwa'añ, ja'ats idø'øn ne'egi nøjx yikmøjpiaktip, pønts ñadyijyi ixyam møj nija'wibimidi jøts ja ka' tpadundi sǎ nwa'añ, ja'ats idø'øn yik'ayowim jattip.

Ku ja Jesús t'ayo'ijxy ja Jerusalēngit kajp

³¹ Jøts ja fariseotøj nay ja'abi xøøw yjajtøø mā dø'øn ja jam wyinaty jøts ja ñimaajyøø:

—Jade'en ne'egi tyim'yø'y'att ku mnøjkxnit, myik'ookwajnipts ja Herodes.

³² Jøts ja t'adsøøy:

—Nøjx x'atsnøjimidi ja tsaach wyax'atøøy jøts ku yamyi jabomyi wixøjkyi njaakajpxpidsimy ja miku', njaakyiktsø'øky ja jaa'y jøtsnim ø n'abaqdit.

³³ Nøjxpipts øts jam Jerusalēn, tuu'døjkip ø tsojk, ti mā Dios kyugajpxy abikyajp y'uk'øøky.

³⁴ iMets Jerusalēngit kajp, meets Jerusalēngit jaa'y, pø meetsxi myik'øø'kpy Dios kyugajpxy, meetsxi mnānyā'jtsip pøn Dios kyajpxy y'ayuuj tyikyø'yip ku Dios ja ya mjadāniguxeyidi! iTø njapeemukwā'añ njakonmukwā'añ ja m'u'nk ja m'unā'jk sam tsikunā'jk tyaak ñimū'uxyi tu'ugyi, ka'ats jade'en tø xkupiky!

³⁵ Ejxtits inet ja mdsaptøj abak tyandi; øts idø'øn wamp jøts ku meets xka'uk'ejxnit tsojk jøts ku meets jaanim x'ext pøni juuni ja xøøw ja jumøjt wyinaty yja'aty ku mnø'ømdit: “Ejxik Dios kyunuu'kx u'nk ñadyaguguxeyi midī mmimejnīp ja kyutujk.”

14

Ku ja Jesús tyikmøkpiky ja jaa'y pøn wyinaty kexp

¹ Xjats idø'øn yide'en yjajty ku poo'kxin xøøw tpaajty, ojts ja Jesús kaabyi ñijxy jam windsøn tyøjkwīndum pøn ja fariseotøj wyindsøn'ajtip. Jamts idø'øn ja'adi ja ti mā ja y'etti, jam ja tpa'ejxti tpaowdi.

² Jamts wyinaty tu'uk jaa'myi pøn ke'expa'am pøjkip.

³ Jøts ja Jesús tñimaay ja kajpxwejpitøjkti møøt ja fariseotøjkti, yide'en ja tyiktiy:

—iKutuky jøts ja pamaa'y cho'okt poo'kxin xøøw u ka'?

⁴ Jøts ka'ap ja y'adsowdi, amøñi ja y'etti. Winets ja tñixajjiy'iñ ja pamaa'y jøts ja tyiktsøøjky, yide'en ja tñimaay jøts ku ja ñøjkxnit.

⁵ Winets ja tñimaay ja fariseotøjkti:

—iPøn yjiyujk chakaa jatyi tka'ukyikpidsømp ku ja ja'jøtpy kyunaxy øy yjapoo'kxinxøøwi?

⁶ Nika' idø'øn y'adsojimbetti, nisǎ ja kyawa'andi.

Ja tø'øxñigaabyi tø'øxñi'ukpidi

⁷ Jamts idø'øn ja Jesús t'ijxy ja migaabyidi jøts ku ja twi'ejxti ja chinaabyajti ku ja twinguwaadsidi ja kaabyajt jam, jam ja y'ixa'akti mā dø'øn ja myøjtøkīdit jøts ja ojts t'ane'emy:

⁸—Ku pøn mwawidit tø'øxñigaabyi tø'øxñi'ukpi, kidi jam jatyi m'ixa'akti mā ja tsinaabyajt jam ja windsøn tø yiktanibiktaagi, jaa ku ja wyinaty yja'aty yam meets jam tø m'ixajkni;

⁹ jøts ja kujøøn kudøj mnøø'mxiyidit pøn wyinaty tø mwayidi: “Tani me waani, wan ya'at jam tsøøni.” Xjats kuwāni mjanchnajiwā'aktit tsø'ødyumbim jøts jam m'ixa'aktit mā o pøn y'ixa'akti.

¹⁰ Ku pøn jade'en mwawidit, ne'egi øyts ku m'ixa'aktit mā o pøn y'ixa'akti; kø'ømnimts ja kujøøn kudøj ja mdukmadowidit ku ja jam wingon mye'ent, jøts ja mnøø'mxidit: “Ya, nigu'uk, nax mdsøøñidi mā jam yik'ayowim tø mdyimy'ixākñidi.” Jade'ents meets ja

xajotkujk'attit ne'egi ku jade'en kə'om myiktukmado'odit, yam ja jam chəonidi pən jaty ja kaabyajt tə twinguwaadsidi.

¹¹ Pən kə'om namyōjpiktaajkip, yik'amutskpiktakpts ja nōjx, pənts kanamyōjpiktaajkidip pən ka'ejxiyimi, ja'ats ne'egi mōjtōkidip, ja' yikmōjpikta'aktip.

¹² Ņayi űimaay ja jaa'y ja' pən ja wyinaty kaabyi tə wyayi:

—Ku pən xyikaawya'ant, kidi ja'ayi nugo xway pən jaty mōət mnamyayiyi, ni ja mmigu'uktōjk xkawa'at, ni ja kumeēñ jaa'y xkawa'at pən jaty jam mmigujōon'ajtpy mmigudōjk'ajtpy. Ka'ap ja'ayi xwa'at pən jaty miyimbejtxiyip pəni ti jaty mets myajkpy.

¹³ Ja ne'egi mwa'ap ja ayooobi jaa'y, ku ti xəəw xu'unt, waw ja' pən kati'ejtxidip, pən kyō' tyeky ma'atti, uk y'eixidi sagasa, pəmbi tyeky ka'ejtp, pəmbi jam winap.

¹⁴ Ne'egi nekimts jade'en mnayjawayit, pə ka'axi ja mdunwimbejtxiyi nayide'en pəni ti mets ja tə xmō'oy, jaanimts ja xwin'ext sa ja mwingaxōjkxiyit ku jadigojk jujky'ajtpi pyidsō'ōmdit pən jaty tə tpadundi pəni sa jaty pyaāt'aty.

Ku ja Jesús tmadyakpaajty ja mōj a'ux

¹⁵ Xjats nidu'ugin ja fariseotōjk wyaāñ pən jam wyinaty tə twinguwaadsidi ja kaabyajt, jōts ja tñimaay ja Jesús:

—Nekim xəñim ja'adi pən ka'adyip jade'en ku Dios ja kyutujk ttanitanit ja yjaa'y.

¹⁶ Ja'ats ja Jesús tñimaay:

—Tu'uk idō'ōn jaa'y t'a'ejxiyiñ ja a'ux mōj'ampy, təts ja wyinaty ttukmadōy ja mayjaa'y pən jaty idō'ōn ja wyaawampy.

¹⁷ Kuts ja a'ux'aats tpaajty, xjats ja tkejxy tyumbi jōts ja t'atstukmadoowa'āñ pən jaty idō'ōn ja wyaawampy jōts ja t'atsnōjmit: “Jamstik, jamik tuki'iyi a'ejxi abaadi y'ejtni.”

¹⁸ Jōts ja tum jade'en ñañikajpxu'udyidi jōts ku ja ka' ñōjktit, yide'en ja yjawyembi wyaāñ: “Naajx ə tə njuy, ja'ats ə n'ats'ejxwampy, mee mjan'ch'ukmaa'kxp.”

¹⁹ Jōts jadu'uk yide'en wyaamaa: “Ndsakaa ə magoxk yuundi tə njuy, ja'ats ə n'ejxmatšwampy pəni yuup idō'ōn uk ka'; mjan'ch'ukmaa'kxp inet idō'ōn, ka' əts inet ndsoot.”

²⁰ Jōts jadu'uk wyamōə: “Tyimjemy'amajtskpnim əts, patyts əts inet ka' nmajada'akt jōts əts inet ka' nnōjkt.”

²¹ Kuts ja tumbi wyimbijty jōts ja ttukmadōy ja wyindsən sa jaty ja wyinaty tə yiknōjmi. Jōts ja windsən yjantyimy'ambijky jōts ja tñimaay ja tyumbi: “Tsojk nōjx nōə'ajy tuu'ajy wine'en yə kajpoojt, jōts xwaame'ent ja ayooobi jaa'dyi mōət ja'adi pən sagasa ejxidip, pən kyō' tyeky ma'atti, pən winapti.”

²² Jōts ja tumbi yjats'ongojmi jōts ku wyimbijty jōts tñimaay ja wyindsən: “Tə əts windsən idō'ōn jade'en nduñ sa tə mwa'añin, jaakwindampts ja tsinaadyaajk ja poo'kxaajk.”

²³ Winets ja windsən ja tyumbi tñimaay: “Nōjx tuu' xkuuyō'oy ma jaty paduu' ma jaty ti, jōts pən jaty mbatpy mōk'ampyts ja xwaame'ent jōts ya xkuwawit, ujts əts yə ndōjkoojt n'ejxwa'āñ.

²⁴ Tyimñōmp əts ixyam, kawindem xəəw əts ja xja'gyajpidi ja n'a'ux pən jaty əts ja jawyeen tə njadaniway.”

Tuki'iyi nndyamiyoxant ku Cristo nbadu'unint

²⁵ May jaa'y ja Jesús o madsoo padso'onip jōts ja pyawidityiyi; jōts ja tuk'ojk tñiwa'k'awidiyty jōts ja tñimaay:

²⁶ —Pən jaty əts ya xpawidejtip, pəni jaa pəngapən, pən tpa'ayoodip tyeety tyaak, y'u'nk ñidō'oxy, chō' y'uch, myigu'uktōjk, uk kə'om paat ñabya'ayōyi, ka'ats əts ja mibaat nbabōjkpi'att.

²⁷ Kaja'ajip ə nbabōjkpi'ajtpy pən ja ayo'on tkamidanaadyip pən ə xkabaduujnidip ja nja', xjapawidewandipts əts, ka'ats əts yjade'embii jaa'y nbabōjkpi'aty.

²⁸ Ti ka' meets ja jawyeen xanipaaty, ku pən pəch kōjxp t'ukykpidō'okwa'āñ pəni ti jaty idō'ōn tsojkip jōts ja y'abaadit pəni wine'enin ja chōkyi ja gasti, jawyeents ja yixtanipatkixy.

²⁹ Kuts nugo ja pəchkojk pyidō'okixy jōts ja nika' y'abaadi, janch nigajpxy nmadya'akts ja yjaty ku ja jade'en pən t'ixy,

³⁰ jōts ja wya'andi: “Tə yə jaa'y y'ukpojtsōñ jōts yə nika' tə t'ukyk'abajtiñi.”

³¹ Uk kuts o pən windsən tsep t'uktunwa'āñ mōət jadu'uk ja miyiwindsən midii ja syoldadi ja tyikmemp ni'ee'px mil, ətii kidits ja jawyeen ttanibiktaagit pəni sudso dō'ōn ja tukwa'ktso'ot pəni ja'ayi tam ja syoldadi tmōət'aty nimajk mil?

³² Pəni ka'ats ñay'a'ejxiyi, jōts ku jagammim ja myidsep myiñ, kyaxpts ja tu'uk ja kyuga-jpxy jōts ja t'amido'ot jōts ka' cheptu'undit.

³³ Nayide'ents meets pəni ka'ap jawyeen xpawinmaadyi pəni ti jaty idō'ōn m'ixmatštip əts kōjxp, ka'ap meets jade'en mibaat nbabōjkpi'att.

Sa kaan amuum tyik'oyigyijxy

³⁴ Kaan amuum tyik'oyigyijxp o ti, nayide'en meets idø'øn ndejint m'ødyu'unt ku mmigu'uk xukmado'tot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømdi ejxim ja kaanin midi kawa'ats midi katump.

³⁵ Nima ja jade'en kyatu'unt ok naajx ok ti tyiktu'unt, ja ti nøø'mimp ok idø'øn ja nda'abu'jta'ant, pø nugoxi ja jadi'iñi ñiyik'ixkø'øy. Ja'gyukidi pøni mja'gyukiwyandip.

15

Ku ja Jesús tmadyakpaajty tu'uk ja borreegi midì tigøøpy

¹ Nimejnip idø'øn ja Jesús jam ja yikugubajtpitøjkti, ja jaa'dyi pøn amuum tyimykitejtip poktyumbi jaa'dyi, jøts ja jam myendi amidodujkpi.

² patyts ja fariseotøjkti møøt ja kajpxwejpitøjkti tjanchpagajpxti ja Jesús, jøts ja wya'andi: —Tum ka'øy jaa'y yø kyupijky jøts yø jotkujk tmøøtkay tmøøt'uuky.

³ Ja'agøjxpts ja Jesús ttamadyakpaajty tu'uk ja ejxpajtin madya'aky midì yide'en wamp:

⁴ —Ku meets wyinaty x'ukyiktigøy tu'ugin ja mborreek midì nimagø'pxy, ðti kidi meets ja ñimakta'pxy myaktaxujkpi borreek jam xyikta'ant jam pejyotp, jøts ja tyu'ukpi x'ats'ixa'adit kunim meets ja xpaatt?

⁵ ðjøts kidi meets ja xaxonda'akt ku meets ja xpaatt? ðTi kidi meets ja xkøxkapt mguejnkyøjxp? ðPøn kidi jade'en xyonda'aky ku ja nbaajtin jadigojk midì tø y'uk'atstigøy?

⁶ Kuts jam mdøjkjøtp mja'atti, ti kidi meets ja mmigu'uktøjk, ti kidi meets ja mgudøjk ja xukmadøy, jøts ti kidi meets ja xnøjmi: “Xonda'akti meets, tøts øts ja nborreek nbaaty midì tø y'atstigøy.”

⁷ Janch øts idø'øn nwa'añ jøts ku nayide'en yiktaxonda'aky jap tsajpjøtpy ja pojkpitumbi jaa'y ku ja tyiktigach ja chinaa'yin, jøts ja' ne'egi yiktaxonda'p midì tu'uk jøts nigidi ja myakta'pxy myaktaxujkpi jaa'dyi pøn chinaa'yin tø tyiktigatsnidi, ñadyijyi øy ñayjawiyidi.

Ku ja Jesús tmadyakpaajty ja meeñ midì tigøøpy

⁸ 'Uk pøn tø'øxyøjks myeeñ tka'uk'ixaapy ku ja tyiktigøy tu'ugin yam ja majk t'ukmøøt'aty? Kuwanits ja tyiktøøbyiky ja yjaj jøts ja pyøknaxy yja'axnaxy jap tyøjkjøtpy, yixxonts ja tyimy'ixaadyøki jøts kunim ja tymbyaatt.

⁹ Kuts ja tpaaty, jøts myigujøøn myigudøjk jøts myigu'uktøjk ja ttukmadøy, yide'en ja tnøjmi: “Tø øts ja nmeñ nbaaty midì tø y'atstigøy.”

¹⁰ Janch øts idø'øn nwa'añ jøts ku Dios møøt y'ankilis ttaxonda'aktit ja pojkpitumbi jaa'y pøn tyiktigajtsp ja chinaa'yin.

Ku ja Jesús tmadyakpaajty ja jaa'y y'u'nk pøn tyik'o'jkøjxp ja tyeety myeeñ

¹¹ Nayide'en ja Jesús wyaañ:

—Tu'uk idø'øn jaa'y, namajtsk myajnu'nk,

¹² jøts ja mutskpi ja ñimaajyøts: “Teety, møøñik øts ja pikta'aky midì øts idø'øn nmaay'atp.” Winets ja u'nkteety ja ojts tyikwa'kxy ja pyikta'aky jøts ja ttagumaay ja y'una'jk.

¹³ Ñiñamnim idø'øn ja wyinaty jade'en yjaty ku ja myutskmajnk tpoøkmujkni t'ejxmujkni ja pyikta'aky tuki'iyi jøts ja ojts ttoo'kni, jøts ja ojts abikyajp abikñaajx tminijky jam jagam, jamts ja ojts tyik'o'jkixy ja myeeñ kyawindiy'ajtingøjxp.

¹⁴ Kuts ja wyinaty tuki'iyi tø tyikøjxni, jøts ja yuu jam winet et yjantyimdyøjkijyi'ñ mǎ dø'øn ja naajx ja kajp jam, jøts ja y'ayodøjkña.

¹⁵ Winets ja t'ixaay tunk mǎ ja kugajp jaa'y jam, jøts ja ojts kyexyi kyamjøtpy kuch'ejxpi.

¹⁶ Janch tsojk jøø'kxkixyim ja t'ejxi ja kuch yji'kxy, kumi niiti ja kyayikmø'øy.

¹⁷ Jøts jotmay ja tyatøjkiyøø, yide'en ja ojts ñawynmaa'nxyi: “Janch ku'uxyi ndeety tyumbi net jam kyaydi yjøø'kxti, yikwindandip paat ja o ti, jøts øts ja yuu njanch'oo'kni!

¹⁸ Tiku øts ndeety nga'awimbeti mǎ ja jam chøøni, jøts øts ja jam nnøjmit: Tø teety Dios nmidundigøy; jøts mets, tø me nayide'en nmidundigøy;

¹⁹ ka'u'nk'atym ø tø njantyimyjaty; yiktunkts ø nayide'en sam o pøn tumbi xyiktuñin.”

²⁰ Jøts idø'øn ja yjanchtuu'døjkijyi'ñ jøts ja wyimbijty jam tyeety wyindum.

Jøts kuts tyeety ja jagamyi y'ejxpajttøø, xjats ja ojts y'am'ijxyi chaach'ijxyi. Jøts ja ñibujtø'jkøø jøts ja ojts pyatsøyi, jigøxy jib'kxy ja yja'jty.

²¹ Winets ja tnimaay ja tyeety: “Teety, tø øts Dios nmidundigøy møk'ampy, jøts nayide'en me tø nmidundigøy; ka'u'nk'atym ø nnayjawiyi.”

²² Jøts ja u'nkteety tnimaay ja tyumbitøjk: “Tsojk nøjx xjuutti ja øybi wet jøts xuktatøkidit, piktaajkidi kyøjeets, tuktawa'agidi kyø'øk.

²³ Nøjx x'atswetsti ja tsakaq midì yaa'kpidsoøpnim jøts xyik'oøktit. jWan txøduu'ñindi, wan tkaq'yint t'uujkyindi!

²⁴ Tø øts yø n'u'nk ndiyy tyimy'oo'kni, ixyats jujky xwindanaa'yindi; tø jeky y'atstigø'yity, ixyats jadigojk tø nbaajtyindi." Jøts ja xyødundøjkidøø.

²⁵ Jøts ja myømajnk jam wyinaty wyidity kamjotp; kuts ja wymbijty, yja'jty wingon ma ja tøjk jam, jøts ja tmaðøø ja iy ja ech.

²⁶ Winets ja tu'uk tyaajxyi'i'n ja tumbi jøts ja ttiibijky ti dø'øn jam jade'en tuujnip.

²⁷ Jøts ja tyukmadoojøø, yide'en ja ñimaajyøø: "Tøts ja m'uch yja'aty; tøts mdeety ja tsakaaj tñankyik'øøgyiyi midy y'ity yaa'kpety, ja'agøjxp ku møk møjaaaw tø yja'aty ja m'uch."

²⁸ Jøts ja myøjpi yjantymy'ambijky, jøts ka'ap ja twa'añ jøts ja jap tyøkit, tyeetynim ja ojts kø'øm ñibidsimy' jøts ja møk ñimaajyøø jøts tyøkit tøjkjøtpy.

²⁹ Xjats tyeety ja tñimaay: "Mñija'wipxi teety winaak jumøjt me tø nmiduñ, jøts juuni me nga'ukmimadøø, nijade'ents me tu'ugin xkamø'øy øyik chivi'u'nk øyik ti, jøts øts nmigu'uk jeexyip nmøøtxøduñ.

³⁰ Aa kudamts yø m'u'nk tø yja'aty, mdukni'o'jkip tam meets yø' mdsakaa winet midy yikxon tø yaa'kpety, ku mmeen yø' tø myik'o'jkyiyi kawine en møøt kawindi tø'øxyøjk."

³¹ Winets ja u'nkteety wyaañ: "Ti sa u'nk mjaty, pø yaayimpts me nmøødi, ti jaty øts ixa nmøøt'ajtpy tum mets yø' mja'.

³² Kuwanits pyaat'aty, çti ja ti nguidymdyu'uñin? çti jadam yø nguidymdyax-ondaajkyim? Patyts ixyam nxødu'uñindi ku yø m'uch tø yja'aty, pø nøø'mimpts adøm jøts ku yø tø y'oo'kni, ixyats jujky xwin'ijxyim, jeky tø y'atstigø'yity, tøts inet nbaajtyim jadigojk."

16

Ku ja Jesús tmadyakpaajty ja ka'ødyumbi'ejx'ejtpi

¹ Ñayñimaay ja Jesús ja pyabøjkpitøjk:

—Ja dø'øn wyinaty tu'uk kumeeñ jaa'y midy yiktump, jøts jats idø'øn ja' tyumbi tu'uk wyinaty midy t'ejx'ejtp ja myøøtumbi, jøts ja windsøn yikñimaay jøts ku pyikta'aky ja nugo yikwindigø'øxyiyi ja tyumbi.

² Winets ja windsøn tñajtswa'wiyi'i'n ja tyumbi jøts ja tñimaay: "çjanch idø'øn ku dø'øn jade'en myikñimadya'aky ti øts jade'en nnimadøøpy? Køyajkøjxni mdunk, ka' me n'ukyiktumbi'ejx'ejtnit."

³ Jøts ja tumbi'ejx'ejtpi yjanchmaañi yjanchtajni, yide'en ja kø'øm ñawya'añi: "çTits ø ndu'ump, ejx øts yide'en nwindson xka'ukyiktunwani? Ka'ats ø n'ukmajadañki øyik øts idø'øn nyu'ut ndu'unt, tsø'ødyumipts øts ku øts inet njayiklimunsimujkmit."

⁴ Xjats ja tyabyaajty jøts ja wyaañ: "Tø ø nnijawi sudso ø ndabyaagat, sudso øts pøngapøn xkupøkt tyøjkjøtpy ku øts yø ndunk wyinaty tø yikpøjkni."

⁵ Winets ja tu'uk jaty tñajtswa'wiyi'i'n pøn jaty ja wyindsøn wyinaty miyoj'ajtip. Jøts ja yjawyeembi ja tyiktiiy: "çWine'en øts nwindson xmiyoj'ajti?"

⁶ Jøts ja y'adsøø jøts ja wyaañ: "Magø'pxy tambø øts aceite ja ndamiyoj'aty." Winets ja tumbi'ejx'ejtpi wyaañ: "Ixya ja ñinøky; pe'tpy ixa'ak jøts xjaadyigatst, wixijxmyajk tambø ja'ayi xpikta'akt."

⁷ Jøts yjadu'ukpi ja tñimaay: "Jøts mets, çwine'en mets ja xmiyoj'aty?" Jøts ja ñimaajyøø: "Magø'pxy kyunchi ariin." Xjats ja tñimaay: "Ixya ja ñinøky midy ojts xja'ay; wants tkajtswijchim jøts makta'pxy kyunchi nbiktaajkin."

⁸ Jøts idø'øn ja windsøn tjanchnija'wiyi'i'n jøts kudam ja tyumbi'ejx'ejtpi yikxon o ti tñiwinmayi ku dø'øn o ti ttuñ. Jade'eñimts yikñijawidi pøn jaty Dios yja' tkababøjkidip, yikxon ja ne'legi tyimiyukyati ja tyaay yam nigidi jade'en wyinmaa'nbyaatti pøn Dios ja'ajtidip.

⁹ Kajpxwejin øts idø'øn nyajkpy jøts kidi mbikta'aky nugo x'amnipøjkpatti xtsaañipøjkpatti; pøni jam mbikta'aktyi, yikxon xyiktunkpaattit, øy yø' ka' kya'øyi. Ku yaayi, xabudøkidit o pøn, nugo ku xñijawidi tigøjxp idø'øn ja jade'en xundi. Øy ja yjakixy, wa'atsts meets ja xñijawi jøts ku meets m'anmija'win yikupøkt jap tsajpjøtpy.

¹⁰ Pøn øyjaa'y'ajtp, øyjaa'y'ajtpimpts ja øy ma, wan o ti tmayi tkamay: nayide'ents ja øy yikxon tyiktunkpaaty; pønts kidyim'øyjaa'y'ajtpim, jade'eñimts ja øy ma, nayide'en ja ka'ap tyik'ødyunkpaaty ja pyikta'aky øy ja wine'en myayi kyamayi.

¹¹ Pøni ka'ats yikxon xyiktunkpaatti ja mmeen ja mbikta'aktyi sa pyaat'aty, çti sudsots meets Dios yja' mjaakmo'ojyit midy ja yakwampy?

¹² Pøni ka' meets nmigu'uk yja' xwingudsø'jkyyi, çpønts meets ja mja' jade'en xijy tsø'øgyip, pøn meets ja xijy mmo'owajnip o meets ja xjakø'ømja'aji?

¹³ 'Ka' pøn tumbi namajtsk wyindsøn tmiduñ; ku ja jade'en ttu'unt, tu'ukts ja pyidsø'ømt pøn ja wyinjawip jøts ja yjadu'ukpi tkawinjawit, tu'uk t'ømyidu'unt jøts jadu'uk tka'ømyidu'unt. Jade'ents ka' y'øyi ku Dios yikmiduñ, ixyaptamts meen nayide'en myøjtøjkyimi. Paty ka' y'øyi adsow aduuk, tu'ugyi Dios n'ajot'ajtin.

¹⁴ Tyimyjade'ents idø'øn ja fariseotøjk yjaa'y'atti, ja meen ja yjanchmøjmigu'uk'ajttip, ixams idø'øn ja wyinaty jade'en pyatmadowdi jøts ja jam tjanchpagajpxti ja Jesús.

¹⁵ Winets ja Jesús wyaan jøts ja tnimaay:

—Meets idø'øn jade'en mjaay'ajttip, ñadyijyi mjanch'uknawya'atspikta'agyidi, ka' meets yjawi mbøkyuñ, jade'en ja mayjaa'y xwin'øøndi, wa'atsts ja Dios mnijawiyidi sa jaty mwa'andi mgajpxti m'am mjotp; yø' idø'øn Dios kyatsøjkpy, ka' Dios jade'en tkupiky jøts ku jaa'y jade'en kø'øm ñamyøjpikta'agyidi.

Ja Moisés kyutujk jøts ja' midi Dios tyanitanaapy yjaa'y

¹⁶ Ku ja Juan Bautista ya myiñ, jaayip ja kugajpxtyøjk ja y'aaw y'ayuujk y'aduktøø. Nay jaabaat ja Moisés kyutujk kya'pxy sa Dios ja wyinaty tø myø'øyi. Jøts nay jaty cho'onda'aky ja Dios y'øgyajpxy y'ø'yayuujk, yiknigajpxy yiknimadya'aky ja kyutujk midi ja tyanitanaapy yjaa'y, xjats jade'en kuwani o pøn tjanchjadatøkiwya'añ ja'abi kutujk.

¹⁷ Kuwani do'øn jade'en yjatt kyubatt sa Dios kyutujk wya'añ, nijuumi ja jade'eñi kyakixy kyanaxy pø ne'egi køjxp najxp naajx tsajp jøts niwine'enin kyagudigø y kyutujk.

Ku ja Jesús kyajpxwijy sa amajtsk'ajtin ñaxy

¹⁸ Ku pøn tmajtsu'uty ñidø'øxy uk ja tø'øxy tmajtsu'uty ñiyaa'y, ja'ats idø'øn møj pøky; uk kuts pøn yaa'dyøjk tmøø't'amajtski ja tø'øxy midi tø yikmajtsu'uty, møj pøkyts ja nayide'en.

Ja kumeen jaa'y jøts ja Lázaro

¹⁹ Tu'uk idø'øn ja jaa'y janch kumeen, janch xøxy piky idø'øn ja', tum ja y'øybi ja yikpejtpy jøts idø'øn ja xymixøduñ jabom jabom, pijy xuugyin tpiakta'aky ja xyox.

²⁰ Jamts idø'øn jaa'y jadu'ukmi pøn txøøw'ajtp Lázaro, janch ayoop janch pøktsoop ja' jøts janch amuum pu'uts ja', ka'ap ja yøwøjki jøts idø'øn ja jam xyumi'ixa'aky jam kumeen jaa'y tyøk'agø'øm, jam ja kyu'uxnay'ity.

²¹ Tsojk kaagyixyim ja tja'ijxy ja kaaky abu'xk midi jam kumeen jaa'y kyaabyajt patkø'øm najtska'jip; jøts idø'øn uk ja jam yjanchnimiñiyi jøts ja twiweedyi ja pyu'uts.

²² Jøtsnim idø'øn ja ayoobi y'ø'jky, winets ja ojts yiknijkxyi tsajpjøtpy ja ankilistøjk ma ja Abraham jap. Jøts ja kumeen jaa'y nayide'en y'oo'knimaa, ojts ja ñaxøki.

²³ Kuts idø'øn ja jap ayodaajkjøtpy tja'ejxni jøts kudam ja Abraham jam jagam møøt ja Lázaro.

²⁴ Winets ja møk'ampy wyaan: “Teety Abraham, ayo'ejxk øts, kax yø Lázaro, wan tmiñ, wan yø kyø' tyikxøøky jøts øts yø ndoojts xuktaxujxit; janch møk øts yap jønjøtpy n'ayøy.”

²⁵ Jøts ja Abraham ja ñimaajyøø: “Ja' u'nk mja'myatsp, tøxi me xaxøñ ku me tø m'atsøøni m'atstani, ka' mets jade'en mjaty sa yø Lázaro tø y'ats'ayøyin, wants yø taxoni jøts me m'uk'ayoomit.”

²⁶ Jøts ti tits nnidyu'unim, abikyxi meets jami, abikyts øøts yami; ma pøn y'uknaxt øy yam pøn yjamenw'añ nidu'ugin, uk øyts jam pøn yjanøjkxwami, nisudso'ampyts pøn kyamajada'aky.”

²⁷ Winets ja kumeen jaa'y wyaan: “Tixi teety Abraham, pøni jade'en tunts may'ajt jøts yø Lázaro kxaxt jam ndeety tyøjkwindum,

²⁸ jaak jam øts nmigu'uk ja nimagoxk, jøts t'atstukmado'ot jøts kidi ya nayide'en myendi ayoobi ya ayodaajkjøtpy.”

²⁹ Jøts ja Abraham wyaan, yide'en ja tnimaay: “Jøts timts ja wya'ant midi ja Moisés yjaa'y midi ja Dios kyugajpxtyøjk tø tniagajpxti. iTi wan ja jam tnijawidi pøni myøjpiktaktip!”

³⁰ Jøts ja kumeen jaa'y y'adsoøy: “Janch ja jade'en teety Abraham ja', yjayiktigatstibik chinaa'yin ja y'ijtyi ku ja pøn jam juky ñinøjkxidit pøn tø y'oo'knidi.”

³¹ Jøts ja Abraham ñimiy: “Tixi pøni ka' ja tkupøjkti midi ja Moisés yjaa'y jøts sa jaty ja Dios kyugajpxy wyandøø, çti ja'ats ja yjaakjanchjawidip øy oo'kpi ja juky yjaninijkxyidi?”

17

Ja' midi yikpøkyajtp

¹ Yide'en ja Jesús tnimaay ja pyabøjkpitøjk:

—Juuni øy ti kya'ukyikpøkyuñ, kø'øm tsøkyts ja'. Pønts myigu'uk tyikwinmaa'nmya'atp jøts ja tyikpøkyuñ, ipø tinim sanim ja yjanchjatt y'anmija'win!

² Ne'egi tyimyapaa'ajtip jøts ja mejyotp yikniwibejpatt ku møj paandaak ja y'ukyiktayukxotsit, jøts øts n'u'nk n'una'jk ja kidi mibaat xyikpøkyuujni.

³ Øyimts mnay'ejx'etidit jøts kidi nayide'en m'adø'tstsi sam o pøn y'adi'ichin.

'Pøni m'ejxtp ku ja mmigu'uk mmidundigøyidi, tukmadowdits jøts kidi jade'en y'adø'tstsi, uk pøni nagyumaajyidipts, maa'kxuktits ja'.

⁴ Øy ja wixujk ojkin tjayiknipati, øy ja jade'en mjamidundigøyi, pøni nadyagumaajyidipts ja nayide'en wixujk ojk pøni mnimaajyidip ja': "Ka' øts jade'en n'uktunit", maa'kxpts meets ja'.

Ja møj janchja'win

⁵ Xjats ja nwindson'ajtim ja kyudanaabyitøjk ñimaajyøø:

—Møøky øøts janchja'win møj.

⁶ Winets ja tnimaay:

—Kuk meets jeexyip wine'enin xmøøt'aty ja janchja'win sam tu'uk mortas pajkin, tøts meets ya'at kipy jeexyip xnimaañidi: "Pidø'øk ya jøts mejyiotp mnøjkxt, jamts myo'ont", nay jatyits meets ja jeexyip tø mmimadøyi.

Ja tumbi tyunkjøøjp

⁷ Ku pøn ja tumbi t'ukyiktuñ kyamjotp, tyikyuy tyiktuñ uk tyiktsakaa'ixy ja jam, kuts ja wyimbity jam wyindsøn tyøjkjotp, ku ja jam yja'aty, çti jaty ja jam tyimyknøjmi: "Ya tyimñax jøts mga'aty?"

⁸ Pø ka'axi ja jade'en yiknøjmi, pø yiknimaapyxi ja jam: "Yik'øyik øts n'a'ux jøts ø xwindsø'øgit, wan øts jawyeen tkay t'uuky jøtsnim me mga'aty m'uukt."

⁹ Kuts ja tumbi ja jade'en tø tja'uktumi pøni sa dø'øn ja tø yik'ane'emy, çja ti winets ja yiktakajxa'aky? Pø ka'axi.

¹⁰ Nayide'ents meets idø'øn Dios xmidu'unt, ku ti xun'abaadidit pøni ti ja mduktuujnidip jøts meets ja xnøjmit: "Ti tumbi øøts idø'øn, ja'ayi øøts iiy tø nduñ, midi paat'ajtup øø ndu'ump."

Ku ja Jesús tyiktsøøjky nimajk ja jaa'y pøn jadi'iñi putsnidip

¹¹ Kuts idø'øn ja Jesús tyuu'døjkigyojmi jøts ja ñijkxy jam Jerusalén, najx idø'øn ja Samariit etjotp jøts nayide'en jam Galilea.

¹² Jøts kuts ja yja'jty jam ma tpaajty tu'uk ja kajp, jamts ja pyajtøø nimajk ja jaa'dyi pøn pu'uts pa'am wyinaty pøjkidip, jøts ja jagamyi wya'k'øydøø,

¹³ jamts ja møk'ampy ñimaajyøø:

—jWindsøn Jesús, ayo'ejxk øøts, ejx øøts yide'en njaty!

¹⁴ Kuts ja t'ejxpaajty jøts ja tnimaay:

—Nøjkx x'ats'ejxti ja teetyøjkti.

Xjats ja jaty ñøjkxtøø, jamnim ja wyinaty ñaxti ku ja tsø'øky ñayja'winyidi.

¹⁵ Winets nayjaty tu'uk t'ejxpaajty ja pyu'uts jøts kudam ja tø tyaagyøjxni, jøts ja jaty wyimbijty, møk ja Dios ja ttukmøja'wiyii'ñ ttukunuu'kxyja'wiyii'ñ, ñiyaxni niyjojkni ja wyimbijty.

¹⁶ Jøts ja twinguxanay'øyi'ii'ñ ja Jesús jøts ja jamyi ñamyujtstaajkøø, ttukmøja'wiyii'ñ ttukunuu'kxyja'wiyii'ñ ku ja wyinaty jade'en tø yiktsø'øgyi. Samariit jaa'y idø'øn jade'en tump.

¹⁷ Xjats ja Jesús wyaañ:

—çTi kidimts meets nimajk tø mdsokixy? çMa net ja yjanidaxujkpidi?

¹⁸ Jabyøø'kxyik øts ya ne'egi xnimemp nadyu'uk, yø'øjik øts ya ne'egi x'atskajxajkp.

¹⁹ Jøts ja tnimaay ja jaa'y:

—Wa'kuki jøts mnøjkxnit; ja'agøjxp tø tyay yø mbu'uts ku ø tø xjanchjawi.

Sa ja Dios ja kyutujk tyikme'ent midi ja tyanitanaapy ja yjaa'y

²⁰ Xjats idi'ingøjmyi, ja fariseotøjk tyiktøøðøø ja Jesús juunin idø'øn ja yja'att ja Dios kyutujk midi ja tyanitanaapy ja yjaa'y, jøts ja t'adsøøy:

—Ka'ap ja ti ejxin pøni sa Dios ja kyutujk tyikja'aty.

²¹ Kidi xjøp'ijxy'atti jøts pøn wya'ant: "Ixya ja", uk ñø'ømdit "Ixem ja"; ka'ats, pø jaanixi meets ja ya xjamøøt'ajtni.

²² Jøts ja tnimaay ja pyabøjkpitøjk:

—Ja'atp ja xøøw ja jumøjt ku mee tsojk ejxpaadyim xja'ejxwa'ant ja naxwii'ñit jaa'y ja myøjkudanaabyi, ka'ats meets ja jaty x'ext.

²³ Mjadyimjyayknøjmidi meets: "Ixya ja", uk møkknøjmidi meets "Ixem ja". Kidits xmibøkti.

²⁴ Ku ø nme'ent, wa'ats x'ejxtit xnijawidit jade'en sam ja et wyidsukyin xem yam tyikjajta'aky, jats idø'øn wyinaty tmibaat'aty.

²⁵ Jawyeents ø n'uk'ayo'ot øy øy, ka' øts ja jaa'y xkupøktit pøn jaty ja ixyam jujky'ajttip.

²⁶ Nayide'en ø njatt sam ja Noé yjajtyin ku ja ya y'atsinaay, nayide'en øy pøngapøn y'adø'øtst.

²⁷ Kya'adyit y'uuktit sam ja y'adõtstøø, y'amajtskidi ja jotkujk, ja y'u'nk ja ñøøx ja tyik'amajtskidi tyimjyaakja'abi xøøw ku ja Noé tyøjkiiy'iñ jam barkajotp, kuts ja møk tuu myiini xjats ja ojts ñi'ijtyi y'oo'køxti.

²⁸ Nayide'ents yjajty ku y'atsja'ajty ja Lot: jotkujk kyaydi y'uukti, yjuydi kyajpxti, yakti tyoookti, ñe'epti kyojti, ña'adi pyotsti, ja tyøjk tyik'øyidi jotkujk;

²⁹ kuts ja Lot jam Sodoma kajpjotp ja y'ayi pyidsiimy, jøts ja jøønduu jatyi myiini jøkmyøøt, jøts ja niduki'iyi tyikna'x'o'jkijxy ja jaa'y.

³⁰ Nayide'ents idø'on winet et yjatt ku ø x'ejxpaattit jotmøñ.

³¹ Pøni jam wyinaty øy pøn jam tøjkjøxp tø pyety, ka'ats ja t'uk'atsnidøjkinit pøni ti jatyi ja jap tyøjkjøtpy myøøt'ajtpy jøts ja tpøkpidsømwa'ant; pøni pønsts jam wyinaty widejtp kamjotp, ne'egi tø'øpts ku ja ne'egi kya'ukwimbejtnit tyøjkwindum.

³² Ja'myajtsidi ja Lot ñidø'øxy sa ja yjajty.

³³ Pøn kagu'øøgyim pyikta'aky t'ejxp, windigø'øpyts y'anmija'win ja Dios wyingujk; pønsts tkayikmøjtøjkip øy ti, pøn ø ne'egi tu'ugyi xnadyamiyojxip, ja'ats idø'on y'anmija'win nøjx nitso'ok'ajtp.

³⁴ Øts idø'on wamp jøts ku jam wyinaty o pøn namajtsk ttamaamukti tu'ugyi ja maabajt, tu'ukts ja ja'ayi yikpøkjø'økt jøts ja yjadu'ukpi wyindigø'øty.

³⁵ Pøni jam tø'øxyøjk wyinaty namajtsk yjøjtsmukti, tu'ukts ja nayide'en yikpøkjø'økt ja y'anmija'win jøts ja yjadu'ukpi nayide'en wyindigø'øty.

³⁶ Nayide'en ja yaa'dyøjkmidi, pøni jam ja namajtsk wyinaty jam kamjotp, tu'ukts ja yikpøkjø'økt jøts ja yjadu'ukpi ka'.

³⁷ Kuts idø'on ja jade'en tmadoodøø jøts ja ojts tyiktøwdi:

—¿Ma windsøn'ajtim idø'on ja jade'en yjatt?

Jøts ja y'adsøøy:

—Kidi mwa'andi ku ja kyayiknijawit, jabi niduki'iyi meets ja xnijawit ku ø nme'ent.

18

Ku ja Jesús tmadyakpaajty ja ku'økytø'øxy jøts ja kudunk tiidyumbi

¹ Xjats Jesús ja ttamadyakpaajty tu'uk ja ejxpajtin madya'aky. Ja' idø'on ja tyukmadogukiwyampy jøts ja Dios'ajot'aj'tettit jøts niujuuni kya'amutsk'attit.

² Jøts idø'on ja tñimaay:

—Jam idø'on kudunk tiidyumbi wyinaty tu'uk jam kajpjotp, niwine'enints idø'on Dios ja tkidymwyindsø'øgi, nipøn ja tkamø'ijxy øy yjapøni.

³ Nayjamts idø'on ku'økytø'øxy tu'uk chinaamyi, ja'ats ja kudunk tiidyumbi jam tmiyø'øy'ejtp, ejtp ja yja'øø'ngunaxy, jøts idø'on ja tja'amidøy ja tiidyu'unin, ja myidsep tjani'øøni jøts ja yikpayø'øty.

⁴ Jeky idø'on kudunk tiidyumbi ja tkamøjpikta'aky jøts ja ka'ap tpayø'øy, xjanimts ja wyinmaay: “Øy øts idø'on Dios ngawindsø'øgi, øy øts idø'on nipøn ngatunk'aty,

⁵ kuwanits øts idø'on jade'en ndu'unt, pø ejtpts øts yø xjanchmiyø'øy'ity, janch møk ø xyikjotkixy, tikuts øts yø nganitanit jøts jade'en kya'ukmenit jøts øts yø xka'ukyikjotma'tnit.”

⁶ Jøts ja nwindsøn'ajtim yide'en yjaakwaañ:

—Ja ka'øy kudunk tiidyumbi dø'on jade'en wamp.

⁷ Kuts idø'on Dios, ¿ti jaa ja tkidymñitanit ja yja' pøn ja xinaxy tsunaxy ja'myajts'ejttip? ¿Ti kidi ja jatyi tpudøjkifiit?

⁸ Øts idø'on wamp jøts ku ja jatyi tñitanit ku ja jatyi tñikajpxu'utt. Kuts ø nme'ent, ¿windem øts na'xwii'ñit jaa'y n'ukpaaty tum jade'en tu'ugyi ja yjanchja'win?

Ku ja Jesús tmadyakpaajty ja fariseotøjk jøts ja yikugubajtpi

⁹ Jøts ja Jesús ttanimadyaktøjkiiy'iñ jadu'uk ja madya'aky, jøts ja ttukmadøy pøn namyikaxi jaa'y'ajttip, kø'ømyi ñay'ødyijyidi ñay'øbyikta'agyidi jøts ja myigu'uk ja kawin'ijxyim tjawidi. Ja'ats idø'on ja ñimaay:

¹⁰ —Namajtsk idø'on ja jaa'y ñøjxktøø Dios ajot'ajtpi jam tsaptøjkjotp: tu'uk fariseo, jøts ja yjadu'ukpi yikugubajtpi jaa'y.

¹¹ Tanaapy ja fariseo jøts ja yide'en tmigajpxy: “Dios Teety, ndukmøja'wip ndukunuu'kxyja'wip mets ku ø ka' nayide'en nduñ sam o pøn myaatsti kyawindiyjaa'y'atti, sam øy pøn axøøk pyøkyundi; ni ngajade'eni paat øts sam yø yikugubajtpi ixa tyani.

¹² Majtsk ojk me n'amaay'aty tuksamaan, ngagugayi ngagu'uugi mets, jøts ndamiyøjpxy mets nbikta'aky wan jatyi ti jatyi ø nbatpy n'ijxpy.”

¹³ Jøts idø'on ja yikugubajtpi jagam ja ne'egi wya'k'øyiyi'iñ, ka'ap ja jadine'en y'aaw yjoajt myajada'aky jøts ja wine'enin y'ejxjø'økt jøts ja wine'enin chajp'ext, jøts ja ne'egi ñagyachkoxi, yide'en ja wya'añ: “iDios Teety, ayo'ejxk øts, janch pojkpitumbijaa'y øts!”

¹⁴ Xjats ja Jesús yide'en wyaañ: “Øts nømp jøts ku ja yikugubajtpi ojts ne'egi yikmee'kxy, jøts ja ojts wyimbejtini ñøjkxni tyøjkwindum, tø ja yiktamee'kxy ja pyøky. Jøts ja fariseo nigidi yikmee'kxy pøn namyikaxi jaa'y'ajtip, pøn kø'ømyi nay'ødyejidip nawya'atspiktaajkidip, ka'ats ja mibaat tminaxti ja wyinmaa'ñ jam Dios wyindum. Pønts tpøkja'widip ja pyøky, pøn yik'ayowim tminuu'kxaktip ja Dios, ja'ats idø'on ne'egi møjtpøjkidip jam Dios wyingujkp.”

Ku ja Jesús ojts tkunuu'kxy ja mutsk una'jk

¹⁵ Nayi yiktanimemp idø'on ja Jesús ja mutsk una'jk jøts ja tkønixajt; jøts kuts ja pabøjkpitøjk jade'en t'ejxtøø, winets ja ojts møk twingugajpxidi pøn jaty ja mutsk una'jk tyikmendip.

¹⁶ Winets ja Jesús ja mutsk una'jk tyaajxmiñ, jøts ja pyabøjkpitøjk ojts tnøjmi:

—Wan yø mutsk una'jk tmendi, kidi meets yø xkaduknimiñ; ja yjade'embii jaa'y idø'on Dios kyutujk nitanaajyidip.

¹⁷ Janch meets idø'on nnøjmi, pøn tkagupøjkip ja Dios kyutujk midi ja tyanitanaapy yjaa'y sam ja mutsk una'jk ja tkupikyin, niwindemts ja tkpaaty tka'ixy ja Dios ñitso'ok'ajtin pøni ka'ap ja tkupøkti.

Ja kumeeñ jaa'y

¹⁸ Jøts idø'on ja Jesús tu'uk ja kumeeñ jaa'y ñimaajyøø:

—Mets øyjaa'y yik'ixpøjkpi, ζti ø ndu'ump jøts øts ja n'anmija'win tpaatt ja nitso'ok'ajtin xemikøjxp?

¹⁹ Jøts ja Jesús wyaañ yide'en:

—ζTi jade'en myikwajnip jøts ku øts øy? Ka'ap ma pøn tu'ugin y'øyi sam Dios.

²⁰ Mnija'wipts ja Dios kyutujk sa ja wya'añ: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwin'ñiñ; windsø'øgi mdeety mdaak.”

²¹ Jøts ja jaa'y wyaañ:

—Jaayim øts yø jade'en nbaduñ ku nmutsk'aty.

²² Kuts ja Jesús ja jade'en tmadøøy, xjats ja tnimaay:

—Jap jadu'uk midi mgabadumpñim: too'køx ti jaty jam mmøø'tajtpy jøts ayoobi jaa'y ja xabudøkit, jøts ja jap tsajpjtøpy nøjkx mwingaxø'jkxi ja jujky'ajtin; winets mdsoont jøts øts xmøødit.

²³ Kuts ja jade'en tmadøøy jøts ja jaty yjanchjotmadyøjkii'ñ kumi janch kumeeñ idø'on ja', ka'ap ja tmajtstu'utwa'añ ja pyikta'aky.

²⁴ Kuts ja Jesús t'ixy jøts ku ja jaa'y jade'en yjotmay'øøky, jøts ja wyaañ:

—iWindemnim ja kumeeñ jaa'y jade'en tpaajtniyidi ja Dios kyutujk midi ja tyanitanaapy yjaa'y!

²⁵ Ne'egi tsojk ñaxt tu'uk møj jiyujk jap xuu'ñ jutjtpy, jøts nigidi tu'uk kumeeñ jaa'y tyøkit jade'en ma Dios kyutujk tñitani tuki'iyi.

²⁶ Pøn jaty ja jade'en tmadøøy, ja'ats wandøø:

—ζPømbits idø'on nitso'ok'atp?

²⁷ Winet Jesús ja ñimaajyidøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøø'tajtpy ja møk'ajtin sudso xyikñitsoojkint, niti Dios tktatsepjawi.

²⁸ Jøts ja Pedro wyaañ:

—Windsøn'ajtim, tøts øøts nbikta'aky tuki'iyi nmajtstutkixy ti jaty øøts y'ijty nmøø'tajtpy, ixys øøts jade'en nwidity møøt mets.

²⁹ Jøts ja t'adsøøy:

—Janch øts idø'on nwa'añ, pøn yjøøn tyøjk tkaba'ayoop, pøn tyeety tyaak, y'uch myigu'uk, y'u'nk ñidø'øxy tkajotmay'ajtp, ja'agøjxp ku ja ne'egi tyikmøjyiyi ja Dios kyutujk midi yjaa'y ja tyanitanaapy;

³⁰ pøni wine'enin ja ya naxwiñ yjaaktsøøni, pyaajtipts Dios kyunuu'kxin ja' jøts nitso'ok'atp y'anmija'win ja xemikøjxp ku ja Dios jadu'ukpi tsinaa'yin ja myo'ojiyit.

Ku ja Jesús jadigojk tñigajpxy jøts ku ja y'ookt

³¹ Xjats ja Jesús abiky tyaajxiyi'ñ ja nimakmajtskpi pabøjkpitøjk, jøts ja tnimaay:

—Yamnims inet jam Jerusalén nnøjkxindit, ma jade'en yjatt sa jaty ja kugajpxtyøjk tjaadyandøø jøts ja tñigajpxti ti ø ndu'ump, ti nbaatp.

³² Yikmatsp øts jøts ø nyikøyakt nyiktagøðøkit pøn ø ngamigugajp, nyiknixe'ekt nyik-taxe'ekt øts, nyikwidsujt nyikjøptsujt, kawine'en nyikjemnøjmit nyiktenøjmit.

³³ Ku øts jawyeen n'ukyikwinwopt n'ukyikjøpwopt, jøtsnim øts ja xyik'ooktit; pidsø'ømpts øts jap øø'kpi jutjtpy kidigøøk xøøw.

³⁴ Jøts ja ka'ap tja'gyukidi nisudso'ampy, pø ti ja jade'en yiktamimadyaktip, nisudso'ampy ja tkaja'gyukidi.

Ku ja Jesús tyikwin'ejxwa'kxy ja winap jaa'y

³⁵ Kuts ja Jesús jam wyinaty Jericó yja'atwani, jòts jam tuu'pa'am tu'uk chòoni ja winap jaa'y, jam ja yiklimunsimuky.

³⁶ Kuts ja tmadøoy jòts ku ja mayjaa'y jam yjanchnaxti, jòts ja ojts tyiktiy ti dø'on tuujnip jajtíp.

³⁷ Jòts ja yiktukmadøoy jòts ku ja Jesús jam wyinaty ñaxy pøn jam Nazaret tsoo'mp.

³⁸ Winets ja møk'ampy wyaañ:

—Jesús, mets m'aats'ajtpy mgugoj'ajtpy ja David, ayo'ejxk øts!

³⁹ Pønts jam wyinaty jawyeen yø'odyip, ja'ats ja møk'ampy nimaajyøø jòts y'amo'ont, jòts yjaaktyimykjinajxpy ja', ka'ap ja y'amøn, jinaxy ja wyan'adi'ich:

—Jesús, ayo'ejxk øts!

⁴⁰ Winets ja Jesús wya'k'øyiyi'ñ jòts ja wyaañ jòts y'atsyikwa'at ja winap jaa'y. Kuts ja wyingume'eniyøø wingon, xjats ja tyiktiy jòts ja tnimaay:

⁴¹ —¿Ti dø'on mdsøjkpy, ti øts idø'on xuktunwamp?

Jòts ja winap jaa'y y'adsøoy:

—Windsøn'ajtim, win'ejxwamp øts.

⁴² Jòts ja Jesús ja ñimaajyøø:

—iWin'ejxst inet! Ja'agøjxpy yø mween tø y'øyi ku ø tø xjanchjawí.

⁴³ Jòts idø'on ja winap jaa'y jade'en wyin'ejxpiky, jòts ja tpadso'jñ ja Jesús, møk ja ttukmøjawi ttukunuu'kxyjawi ja Dios. Jòts ja nayide'en wyamidi pøn jaty jam ja jade'en t'ejxtøø.

19

Ja Jesús jòts ja Zaqueo

¹ Xjats ja Jesús yja'jty jam Jericó, kyajtpøjkii'ñ,

² jamts kumeeñ jaa'y wyinaty tu'uk, Zaqueo ja xyøøw midí ja yikugubajtpitøjk wyindsøn'ajtip.

³ Ja'ats idø'on tyimyjawin'ejxwamp ja Jesús jòts ja t'ejxkapt. Janch mayjaa'yts jam wyinaty nisudso'ampy ja tka'ext, jaa ku ja kon yjaaktyimtyanaañimi.

⁴ Xjats ja ojts jawyeen putyi t'anøjkxi mā dø'on ja Jesús jam wyinaty ñaxwa'añ, jòts ja jam kipkyøjxpy kyøjxpejty.

⁵ Kuts ja Jesús jam ñajxy, ixam ja Zaqueo kipkyøjxpy, jòts ja Jesús pyat'ejxøø, yide'en ja ñimaajyøø:

—Zaqueo, putyi winak, jap øts ixyam mets mdøjkjøtpy nja'da'akwa'añ.

⁶ Jòts ja Zaqueo jatyi wyinaajky, janch ejtni xoni dø'on ja tyikja'jty ja Jesús jam tyøjkjotp.

⁷ Pøn jatyts ja jade'en t'ejxtøø, jòts ja pyagajxpinaxwa'ktøø, ja' ja kyajpxtip jòts kuk ja Jesús jam wyinaty tø ñijxky mā ja ka'øyjaa'y tyøjk jam.

⁸ Jòts ja Zaqueo wya'kukiyi'ñ jòts ja nwindson'ajtim yiknimaay:

—Windsøn'ajtim, ndamay'atp øts ayoobi jaa'y kujkwa'kxy ti jaty øts ixja nmøøt'ajtpy; pøni tøts øts o pøngapøn o tigati nbøjkxi awin'øøni'ampy, nyik'u'nkipts øts ja' jòts øts ja jawaani may nyikwimbajtixit, maktaxk ojk tukjadine'en jaty y'u'nk'att pøni sa ja kyøjpk.

⁹ Xjats ja Jesús wyaañ jòts ja tnimaay:

—Ixym ja nitso'ok'ajtin tø yja'aty ya tøjkjøjty, kumi nay Abraham meets m'aadsip mgugojip.

¹⁰ Pø ja'abixi ø tø nnimendi jòts øts ja ndukpaattit nduk'ejxtit ja nitso'ok'ajtin pøn ja y'anmija'win y'ijty tigøy'ejtnidip.

Ku ja Jesús tmaryakpaajty ja meen kyøjpk

¹¹ Exam ja mayjaa'y ja pyatmadøoyi ku ja jade'en wya'añ, jòts ja tthanimadyaktøjkii'ñ tu'uk ja ejxpajtin madya'aky, ku ja jam wyinaty kujk wyingoni jam Jerusalén. Nømpxi dø'on ja jaa'y wyinmaydi, ja'ayi ja jam y'ukja'att jòts ja jatyi wyindsøndøkit, jòts Dios kyutujk ja tyiktuujnit midí ja tyanitanaapy yjaa'y.

¹² Jòts idø'on ja tnimaay:

—Jaa dø'on jaa'y y'ijty tu'uk, jotkujk jaa'y. Ja'ats ojts abikyajp t'anøjkxi jòts ja jam y'atwindsonødkit. Ku ja wyimbett, møjwindsøn ja wyinatyni.

¹³ Jòts idø'on tyumbi ja nimajk twaadsøoy ku ja wyinaty choonwa'añ, jòts ja nidu'uk jaty ttagøðøjkii'ñ tu'uk møj mukmyeeñ, jòts ja tnimaay: "Mda'aju'udyip mda'agajpxtip idø'on yø mmeen, wan tmayi kunim ø nwimbett."

¹⁴ Mi'ajkiyipts idø'on ja jaa'y ja' pøn jaty jam tsinaadyip, jòts ku ja chø'jñ jòts kexy yø'øbyi ja yiktabaguejxy jòts ja jam yide'en y'atswa'andit: "Ka' øts ya'at jaa'y ndsøky jòts øøts yø nwindson'att."

¹⁵ Jøts yikpiktaajkim idø'øn ja' jøts ja wyindsøn'att, winets ja wyimbijty jam mā ñaajx kyajp. Ku ja jam yjə'jty jøts ja twaadsøøy ja tyumbi pøn jaty ja wyinaty tø tkømø'øy ja meeñ, ja' ja ñijawiwamymp wine'en jaty ja wyinaty tø tyik'u'ngdi.

¹⁶ Jøts ja yjawyeembi myiñ jøts ja tyukmadoojø: "Windsøn, majk ojk øts ja jaduk-jadine'en jaty tø nyik'u'nk'aty ja mmeeñ."

¹⁷ Xjats ja wyindsøn y'adsøøy: "Øy'ajtp, øyxi dø'øn jade'en mduñ, mjotwampxi dø'øn jade'en; ti sə metsxi yjadini'iñibi meeñ jade'en tø xyikmayi, ja'agøjxpts mets ndukwindsøn'atwə'añ majk ja kajp."

¹⁸ Jøts jadu'uk myiñ, ja'ats waan: "Windsøn, magoxk ojk øts jadukjadine'en jaty tø nyik'u'nk'aty ja mmeeñ."

¹⁹ Jøts ja nayide'en yik'adsoomø: "Windsøn'atp mets ja magoxkpi kajp."

²⁰ Winets jam jadu'uk myiñ jøts ja wyəa: "Windsøn, ixyaani ja mmeeñ. Konji'iky øts yø nbaayjətpy tø nyik'ity;

²¹ kumi mnija'wip øts jøts ku mets ka' ti jadi'iñi xnajtsjawi, ja'agøjxpts øts ndsø'øgi, ja'abaat me xpəyø'øy øy mets ja xjagaja'aji, myikpidø'økwyabyaat mets ja pikta'aky øy me mjagani'ipy."

²² Winets windsøn ja ñimaajyø: "Mets ka'ømyidumbi, kø'øm yø m'aaw mnadyani'øøniyi, yø' me kø'øm mdiidyuujiñip. Pøni mnija'wip tam ku øts jade'en nja'y'aty ku øts ja nbøkmuky midì ø ngabiktakpy, ku øts ja xijy nyikpidi'ikpyaat midì njaganipy,

²³ jøts, zti kuts øts ja mmeeñ tø xka'anuu'kxyaky, jøts øts ja meengyojpk jexyyp tø nbaaty møøt ja meeñ'u'nk?"

²⁴ Jøts ja tnimaay pøn jaty jam wyinaty: "Pøjkxidi yø meeñ, jøts ja xmo'odit pøn øts ja nmeengyojpk majk ojk tø xyik'u'nk'ajtyi."

²⁵ Jøts ja wyəndø: "Pø jamimts windsøn ja' myeeñ, pø majkts meeñ muky ja jam tmøødi."

²⁶ Jøts ja windsøn y'adsøøy: "Øtsts idø'øn wəmp, jøts ku ja yjaaktyimyikpudøkit pøn tyikmøjtəkp ku ja o ti yin waan yikmø'øy; pønts kø'øm o ti tkidyimyikmøjtəkp ku ja o ti yin waan yjayikmø'øy, jaaktyimyikpøjkøjxpts ja ne'egi tuki'iyi.

²⁷ Jøts ja' pøn ø xmi'ajkidip pøn ø xkatsojktip jøts ø nwindson'att, nøjkxts ja x'atswəwdi jøts yə xyikme'endit jøts yə xtyimyikpa'ookit øts nwingujky."

Ku ja Jesús kyajtpøjkijy'iñ jam Jerusalén

²⁸ Kuts ja Jesús jade'en myadyak'abajtyi'iñ, jøts ja ñajxy, jamxi ja Jerusalén ñijxxy.

²⁹ Jawaani ja jam wyinaty kyidyimya'atti jam Betfagé jøts jam Betania, jade'en ja kajpxøøw jam, ku ja tkejxy namaajtsk pyabøjkpi ku ja jam wyinaty wingondi mā ja kojpku'nk jam txøøwi Olivos,

³⁰ jamts ja tnimaay:

—Nøjkxti ixem kajjotp, ixə wingon. Kuts inet jam mja'attit, jam inet buur tu'uk kuwiñ xpaattit midì ka'anim pøn ttatsøøni. Ja'ats m'atmigajidip jøts xyikme'endit.

³¹ Pøni pønts myiktøøjidip tigøjxp ku xmgajidi, nøjmidits jøts ku ø ndsøky.

³² Jøts idø'øn ja pyabøjkpi namaajtsk ñøjktøø tpəttøø jade'en sə Jesús ja wyinaty tø ñii'mxyidi.

³³ Jam ja wyinaty tyimyigajidi ja kujiyujk ku ja jiyujk ja ñimaajyidøø jøts ja yiktøjidøø:

—zTigøjxp ku yø jiyujk xmgajidi?

³⁴ Jøts ja t'adsoodø:

—Kumi ja nwindson'ajtim yø ttsojpk.

³⁵ Jøts ja twejtsnøjktøø mā ja Jesús jam wyinaty y'awijxy, jamts wyet ja ttajiba'andøø jøts Jesús ja ttawa'atspejty.

³⁶ Kuts idø'øn ja Jesús wyingon'adøtsni, xjats wet ja nøø' tuu' yiktabatya'abi.

³⁷ Ku ja wyinaty wyingoni ja kajp, ku ja jam kyida'aky Olivos kojpkwəmp, winets pyabøjkpitøjk ja ejtni xoni yjançpaya'axyi yjançpajøky, jøts ja møk'ampy ttukmøjəwidi ttukunuu'kxyjəwidi ja Dios ku miləgr'i'ajtin ja wyinaty jade'en tø tyuk'ijxyidi.

³⁸ Yide'en ja wyə'andi:

—jØy'ajtp ku Dios xuknami'iñim kyunuu'kxy wyindsøn! jotkujk'atyim idø'øn jap tsajpjətpy! jkuuyi Dios jadu'uk yjaak'oyi!

³⁹ Winets ja fariseotøjk winəəgin tnimaadyøø ja Jesús pøn jam wyinaty jaə'y agujkpti:

—Windsøn, tiku waani sə xkanøjmi yø mbabøjkpitøjk.

⁴⁰ Jøts ja y'adsojøø ja Jesús:

—Øts idø'øn wəmp jøts ku øts inet yø njayik'amo'ondit, wenkpits inet kajpxkojmidip møk'ampy, nijuuni yø kya'amondi øy yø pøn yjayik'amonwə'añidi.

⁴¹ Kuts ja t'ejxpəajty ja Jerusaləngit kajp ku ja jam wyinaty jawaani kyaja'atni, jøts Jesús ja tkudsaachwinmə'ayiyi'iñ jøts ja yaajxy,

⁴² yide'en ja wyəa:ñ.

—jKuk jeexyip iij wine'enin xja'gyuki jøts ku ja mxøow ja mjumøjt tø mjataja'adyi, jøts jeexyip ni'iijtyi ja mjaaly tpaatti ja Dios kyunuu'kxyin! Tøts ja tiempi ñaxy, iti jaa ja xijy, jatyi myiktami'awa'anigyojmit!

⁴³ Jaa'atp ja xøow ja jumøjt ku tiempi kya'øoyit, ku mmidsep mdamukit, amuum myikna'awidejtkøxt, nima awa'ats mgata'ant, ja xem ja yam myiknidøkit,

⁴⁴ naxjøtpy myikjaagida'akt jøts ja mjaaly may'ampy kyudigø'ødyit. Niwine'en niti kyata'ant; ja'agøjxp ku tø xkagupiky ja Dios ku ja kø'øm tø mjanimiñi.

Ku ja Jesús twojpidšomguixy ja too'kpitøjk jam tsaptøjk agø'øm

⁴⁵ Xjats ja Jesús chaptøjktøjkiyi'ñ jøts ya tuki'iyi tyikpidsømbina'xwa'jky pøn jaty jam wyinaty yajktip too'ktip, juudyip kajpxtip,

⁴⁶ yide'en ja tnimaay:

—Yide'ents Dios kyajpxy jap kyøjxja'ayi: “Ja' øts ndsaptøjk wya'añ jøts øts njaa'y jap Dios'ajot'attit”; ma meets yø ya jade'en xyiktuni sa maa'tspi chinaadyaajkindi.

⁴⁷ Jabom jabom idø'on ja Jesús jam tsaptøjktøp yik'ixpijky; yam idø'on ja teetywindsøndøjkti, møøt ja kajpxwejpitøjkti møøt ja mōjaa'dyøjkti midi tñigubajk'ajttip ja kajp, tñiwinmayidi sudso ja yjadyimy'uk'ooktnim.

⁴⁸ Jøts ja nisudso tkamidabyaatti ti sa ja ttu'undit, pø amuumts ja jaa'y ja jam pyat-madøyi, ti pøn ja jam kabatmadøjiyp.

20

Ja Jesús kyutujk

¹ Xjats idø'on yide'en tuk'ojk yjajty ku ja Jesús jam wyinaty tsaptøjktøp tyik'ixpijky ja mayjaa'y, ja øyvjpxy ja øy'ayuujk ja jam wyinaty kyajpxwa'kxpy sudso nniitso'ok'ajtin, ku ja teetywindsøndøjk jam yja'jtøø, møøt ja kajpxwejpitøjkti, møøt ja mōjaa'dyøjkti pøn tñigugajp'ajttip ja kajp,

² ja'ats idø'on jam yide'en wandøø:

—Yø' mnigajpxp pøn jade'en tø mdagutujk'aty; jøts jade'en m'adø'øtst. ¿Pøn yø kutujk jade'en tø mmø'øyi?

³ Winets Jesús ja t'adsojimbijty jøts ja tnimaay:

—Nayide'en mee nyiktøowami, jøts m'adso'odip idø'on:

⁴ ¿Pøn ja Juan ojts tya'ane'emyi jøts ja yiknøbatt? ¿Dios ja ojts jade'en tyanigutujk'ajtxyi, uk ja naxwii'ñit jaa'y?

⁵ Winets ja agø'ømyi tkajpxy'ajttøø, yide'en ja ñawya'añidi:

—¿Sa nñima'ayin? Ku net yø njanima'ayin jøts ku Dios ja tyanigutujk'ajttøø, yide'ents inet yø x'adso'owin: “Jøts ¿tigøjxp ku ja xkajanchja'widøø pøni jade'en tam?”

⁶ Jøts kuts inet yø njanima'ayia'andit jøts ku ja yaayi jade'en yikntyanigutujk'aty, tsojk inet yø jaa'y xjanchka'tspa'o'jkindit, kumi wa'ats yø tñijawidi jøts ku ja Juan ja Dios kyexyi.

⁷ Xjats ja t'adsoodøø jøts ku ja ka' tñijawidi pøni pøn ja Juan jade'en wyinaty tø tyanigutujk'aty; jøts ja jade'en yiknøbatt.

⁸ Jøts Jesús ja ñimaajyidøø:

—Pøni jade'en tam, ni øtsts meets ja ngadukmado'ot pøni pøn øts jade'en tø xanigutujk'aty ku øts jade'en n'adi'ich.

Ku Jesús tmaryakpaqjty ja ka'ødyumbidi

⁹ Winets ja Jesús tnimaabyina'xwa'jky ja mayjaa'y, yide'en ja ejxpajtin madya'aky ja tu'uk tñimadyaktøjkiyi'ñ:

—Ja dø'on jaa'y y'iijty tu'uk pøn jam kyamjotp tnejp ja uvi tsa'am, jøts ja ttukmidagañ ja tyumbi winaagin ku jeky'ampy widejtpi ñijxxy.

¹⁰ Kuts tpaajty ja uvi tsa'am tujk'aats, jats ja tkejxy tu'uk tyumbi jøts ja t'atstuk'amidowa'añ pøn ja kam jam wyinaty tø tmidandi jøts ja tyaktit ja nidsa'am ni'ipy, mididi paat'ajtip jøts ja yikmo'ot. “¿Maa?” “Ka'ap.” Ja tumbi ñømdøø. Yikxon ja jam ojts yjantyimyikwøpy, jøts ja yikajxjimbijty wa'ats jadi'iñi.

¹¹ Xjats ja kugam tkejxy jadu'uk tyumbi; nayide'en ja ojts yikjømno'jmi yiktenøjmi, yikxon ja jam yjanhyikipwøjpy jøts ja nayi wa'ats jadi'iñi yikajxjimbijty, niti ja kyayikmøøy.

¹² Jøts idø'on ja ka' tñimøñ, ojts tyumbi ja jadu'uk tkajxkøjmi jøts ja jam nayide'en ttundøø, tyikwindsaachidi tyikjøpstaachidøø jøts ja tyiaktøø.

¹³ Jøts yide'en ja kugam wyaañ: “¿Sudsom tsøky ndu'unt? Nmajnku'ngin n'ukaxp, ja ku yø t'ejxpaattit, ¿ja kidi yø tso'ogidit?”

¹⁴ Ja'ayi ja tumbitøjk ja ojts y'ejxpaadyiyi jøts ja xem yam ñawyanidøø: “Ya'at yø kam tñidanwamp; wan tyikpa'o'jkyim jøts adøm yø kam nmida'anindit.”

¹⁵ Winets ja tjidøjtpidsømdøø jam kamjotp jøts ja ojts tyik'ookti.

—¿Sats idø'on kugam ja yjawi tyunidit?

¹⁶ Me'emp ja kò'òm jòts ja tyikugòxixit ja yjade'embì tumbìdi pòn jadyimyjade'en'ajttip, jòts ja ne'egi tmo'ot ja kyam ja abiky tumbìdi.

Ku ja nidaay'ajtibì ja jade'en tmadoodòò, jòts ja wyandòò:

—iPò katsojknim ja Dios!

¹⁷ Tiy Jesús ja wyin'ijxyidi, jòts ja yiknimaadyòò:

—¿Tits idò'on yò Dios kyajpxy ñigajpxy ku yò jap yide'en yja'ayi? ¿Nugo yò jap jade'en wya'añ?

Ja tsaà midì ja pojtspi kya'ejxidòò,

ja'ats yam ne'egi tò y'uknòjxni jam pòch kyubajkp jòts ja t'amajtsmujkòjxp yò pòch.

¹⁸ Ku ja y'ukyiktanaxkidakpatt ku jam o pòn y'uknaxkida'akt, pò ma ja nay'ejxpaadit; u kuts o pòn tyanaxkidakpattit ja tsaà, pu'uxints ja yiktawayit.

Ku yikajpxy'aty ja kugubajt

¹⁹ Xjats ja teetywindsòndòjk mòòt ja kajpxwejjitòjk ja tjadyimy'ukmatswandòò ja Jesús, wa'ats ja tyimyjaja'gyukidi jòts ku ja ja'agòjxp ja madya'aky yikmadyakpaajty; yjadyimy'ukmatswandip ja' ja Jesús, ja jaa'yts ja chò'jkidip paty ja jade'en tkatundòò.

²⁰ Winets ja tpiktaktòò myigu'uk pòn tpa'ejxtip tpago'odip jòts ja ñadyiji nugo jade'en ñanky'ijxyidi sam òy jaa'y, ja'ats ja chojktip jòts ja tkajpxy'ejxtit kuuyi ja y'ukajpxigò'òty, ja'ats ja jatyi tyani'òònidip jòts ja jam tkòyaktit ma wyindsòn ja jamdi.

²¹ Paty ja yide'en tyiktòòdòò:

—Windsòn, nnija'wip òòts jòts ku myik'ixpiky òy tsuj, tiy janch tuki'iyi xnigajpxy jòts ka' me pòn xkupiky xkagupiky ti sà me mwa'añ, ne'egi yikxon mets ja ne'egi xnànkni'ixpòkiyi tiy janch ja Dios tyiy'ajtin sudso ja yiknijawit.

²² Tukmadookts òòts: ¿Nmo'op òòts kugubajt ja mòj windsòn midì jam abiky'ampy nichòky tò myiñ yikutujkpi, uk ka'?

²³ Yja'wiyii'ñ Jesús ja jatyi jòts ku ja kya'òdyunwa'añi, jòts ja tnimaay:

—¿Tiku òts jade'en xkajpxy'ejxti, tigòjxp ku òts jade'en xniwambatwa'andi?

²⁴ Uktuk'ejxtik òts tu'uk meen. ¿Pòn ja wyeen y'aaw yò jam myòòt'ajtip, jòts pòn ja xyòòw jam kòxja'ay?

Jòts ja wyandòò:

—Ja mòj windsònimts yò' yja'.

²⁵ Xjats ja tnimaay:

—Ja'ats meets ja mmo'op midì ja yja'ajtpy, jòts ja Dios ja' xmo'odit midì ja paat'ajtmiiyip.

²⁶ Jòts ja nisudso'ampy tkakajpxy'ejxti òyik idò'on ja ttaniwambattit sà jatyi ja jam wyinaty wya'añ jam mayjaa'yjotp; jinaxy ja ñigyumaap yjajtòò ku ja jade'en yik'adsòodòò, jòts ja ne'egi y'aaw amòni t'ukyik'ejtnidi.

Ku ja jaa'y tyiktòwdi pòni janch idò'on ja' ku oo'kpi jadigojk yujukpyòktit

²⁷ Jòts idò'on ja saduceotòjk jam winaa'gin yja'tmidòò jòts Jesús ja t'ejxwa'andi. Ka'ap idò'on ja saduceotòjk ja tkupòkti jòts ku oo'kpi y'anmija'win jadigojk pyidsimyi jujky'ajtpi xemikòjxp mòòt ñine'kx; paty ja tnimaadyòò ja Jesús:

²⁸ —Windsòn, yide'en ja Moisés tjaadyaañ, pònik ñidò'òxy ku'òòky tyiktamp yam ja ka'anim y'u'nk tpaati, pòni jamts ja' y'uch y'ajch, ja'adsik tmòòt'amajtskip ja ku'òktyò'òxy jòts ja ttukpaat y'u'nk, jòts ja jade'en tkayikudigò'òty ja myigu'uk.

²⁹ Jats idò'on jaa'y y'ijtyi, niwixujk ja tyukyaad'òyòj'atti jòts ja yjagyooòbi jawyeeen y'amajtskiyii'ñ jòts ja tku'ò'jky ja ñidò'òxy, nitu'uk y'u'nk ja ojts tkapaati.

³⁰ Xjats ja mutskpi ja tmòòt'amajtskiyii'ñ ja ku'òktyò'òxy jòts ja nayide'en tku'ò'jky, ka'ap ja tyik'y'u'nkpaajty.

³¹ Jòts ja midigòòkpi ja twaa'y ja ku'òktyò'òxy jòts ja nayide'en tku'ò'jky. Tum jade'en yjajtkòjxti niwixujk, ni tu'ugin pòn y'u'nk tkayiktaañ.

³² Jòts ja tò'òxyòjk nayide'en y'o'jknimaa.

³³ Kuts idò'on ja nòjx jadigojk yujukpyòkti, ¿pòmbits idò'on ja nòjx tnidò'òxy'aty jadigojk, pò niwixujkxi ja tò t'atsnidò'òxy'atti?

³⁴ Xjats ja Jesús ja ñimaajyidòò:

—Yaayi dò'on yò jade'en yjaty, yaayi naxwiñ jade'en y'amajtskidi ja yaa'y ja tò'òxy.

³⁵ Pòn paat'ajtidip jòts ja ñòjxktit jam ma Dios ja tò t'a'ejxi, ku ja yujukpyòktit jadigojk ka'ap jam pòn t'ukjotmay'ajtnit ja amajtsk'ajtin, ni tka'ukyik'amajtskyinidit y'u'nk y'una'jk jam pòn,

³⁶ ka'ap pòn y'uk'òò'knit y'uktigòòñit. Tum jade'en ja jam chinaañidit sam ankilstòjkti. Tum Dios ja amuum y'u'nk'ajtidip una'jk'ajtidip, ja'agòjxp ku dò'on ja jemchinaa'yin tò tpaati ku ja jadigojk tò yujukpyòkti jap oo'kpi agujkpy ja nwindson'ajtimgòjxp.

³⁷ Kò'òm paatxi Moisés ja xuknija'windi jòts ku oo'kpi yjujkyòkti jadigojk ku ja jam ojts t'ixy ja ximùm ñitòowyidity. Pò yide'enxi ja jam tmadòø y jòts ku ja Abraham, jòts ku ja Isaac, jòts ku ja Jacob ja tdios'atti ja Dios Teety.

³⁸ Kidi oo'kpipts ja ñidios'ajtpy, pò ja'axi ja ñidios'ajtpy jòts ja tyikjujky'att øy pòn.

³⁹ Winets ja kajpxwejpitòjk winaaggin ñòmdòø:

—Janch tiigyajpxy, windsòn.

⁴⁰ Jòts ja ka' y'uknay'a'ejxiniyidi jòts ja tyiktòø'adòø'tstii, ne'egi ja y'amondòø.

¿Janch idò'òn ku ja David t'ap'aty ja Cristo?

⁴¹ Xjats Jesús ja tnimaay:

—¿Jòts sudso jade'en mwà'andi jòts ku David ja Cristo t'ap'aty?

⁴² Pò yide'ents ja David tyikwa'añ ja nòky ku ja tjaay ja Salmos:

Yide'en ja nwindsòn'ajtim ja Dios Teety ñimaajyòø:

“Putsinaaky øts n'aga'ñ'ampy,

⁴³ kunim øts yò nmimajadakòxt pòn jaty mmidsep'ajtip.”

⁴⁴ ¿Sudso'ampyts ja David t'ap'aty ja Cristo, pò wyindsòn'ajtpyts ja kò'òmbaag?

Ku ja Jesús tñigajpxi ja kajpxwejpitòjk ja kya'òwysinmaa'ndyi

⁴⁵ May jaa'y idò'òn ixam amidodujktip ku ja Jesús tnimaay ja pyabòjkpitòjk:

⁴⁶ —Øyim mnay'ejx'etidit, ejxim yò kajpxwejpitòjk mdawin'iñidi kya'òwysinmaa'ñ, jade'en yò ñachòkyidi jòts wyet yò tyeky'ok'am paat tpaajidòttit, jòts ja' yò chojktip ja nawyindsòøgi jòts yò yikajpxpoo'kxtit jam mayjaa'y agujkp, jòts ku yò tsaptòjkjòtpy tyòkidi tum ja tsinaabyajt yò tyatsinaawyandip midì jam tsaptòjk'okp, jòts ku kyaamyidi tum jam yò ñaxti tsinaabyi mà dò'òn yò myòjtòkikit.

⁴⁷ Nayò'òxi ku'òktyò'òxy ja pyikta'aky tpaajxidip jòts ñadyijyi ñadyagubòjkyidi ja Dios'ajot'ajtin. Ja ti pòn ja', ja ti pòn ñadyijyi jeky'ampy tsapajpxtip, nayò'òxi ja'adi pòn ka' ti tyiknigaxò'òkti, ñadyijyi øy jaa'y'atti. Yò yjade'embi jaa'yts idò'òn Dios mòj yik'ayo'op.

21

Ku ja ku'òktyò'òxy tpiqtaajky lyimunsi

¹ Xjats idò'òn ja Jesús ojts t'ixy jap tsaptòjkjòtpy ku ja kumeeñ jaa'y jam wyinaty tkugonidi ja lyimunsi jam meeñ'abòjk'ii'ñjotp.

² Jòts ku'òktyò'òxy majtsk ja pyujxmeeñu'nk jam tkugo'onimòø;

³ winets ja Jesús ja pyabòjkpitòjk tnimaay jòts ja wyaañ:

—Janch meets idò'òn nnòjmi, jòts ku yò ku'òktyò'òxy ayooobi ne'egi myinajpxy lyimunsi yò jam Dios wyingujkp øy idò'òn yò kyamabaadi sam o pòn yja' tpiqta'akti.

⁴ Ja' yò iiy yojxtip midì yò winda'anxixidip yam yò ku'òktyò'òxy ayooobi ne'egi tpiqta'aky ja yiktuujnik ja ñidsinaajyik.

Ku ja Jesús tñigajpxy jòts ku ja tsaptòjk yjett

⁵ Jòts idò'òn niwinaaggin jam wyinaty tñimadya'akti ja tsaptòjk, ku ja janch tsuj kyaxi'iky, ku tsaa ja jade'en janch tsuj tmòø'taty, jòts ja nayide'en chujkaxi'iky midì jam wyinaty pøngapòn tò tyoxti. Xjats ja Jesús wyaañ:

⁶ —Ja'atp ja tiempì ku ya'at kyuja'wigyòxt ixa jade'en x'ejxti, ku yò tsaa ni tu'ugin kyata'ant nikiibyety.

Ku ejxa'an jawyeen yikpiqta'akt ku wyinaty ja tiidyu'unin xòøw wyingòñ

⁷ Winets ja tyiktòødòø jòts ja tnimaadyòø:

—¿Juuni windsòn idò'òn ja jade'en yjatt? ¿Ti dò'òn ja yiktanijawip jòts ku dò'òn ja wyinaty jade'en yjatwa'añ?

⁸ Jòts ja Jesús wyaañ:

—Øyim mnay'ejx'etidit, jòts kidi mee tò mniyajtjni ñiwyindaay'ajtk. Kumi may ja mye'endit pòn øts nxòøw nugo nadyanikajpxidip ku ja ñò'òmdit: “Cristo øts”; “Tò kya'pxy ja tiempì.” Kidits mets ja xpanijky jaty.

⁹ Jòts ku xnimado'attit ja tsep, uk tyiktigatsti ja kyutujk adsepkojpx, kidits me mdsòøgi; pò jawyeenxi dò'òn ya'at jade'en ñajxkòxt, ka'anims idò'òn wyinaty kya'pxy jòts kyugòxii ja naxwii'ñit.

¹⁰ Winets ja tjaaknimaay:

—Ja mòj ja mutsk kajp nòjx ñañibidi'igyidi, jòts ja windsòndòjk cheptu'undit ja xem ja yam pòn jaty ja naajx ja kajp tñitanaadyip ya naxwiñ.

¹¹ Mòk'ampy uix ñaxt, yuu pa'am ñaxkida'akt øy maðsoo, adsò'jkyibim ja tuki'iyi myik-tuk'ejxtit ku ja Dios ejxa'an mòk tpiqta'akt jam tsajpwemp.

¹² Jawyeents mee myikmajtsmukòxwa'ant, myik'ixa'adit o maðsoo. Kuts myikpaattit jòts myikwanòjkxtit jam tsaptòjkjotp mà myiktiidyu'undit, myikti'idyit myiktsu'umdit

puxøjkjøtpy, ja møj windsøndøjk myiktawinguwawidit pøn jaty yikutujktip, ja'ats idø'øn ja mdukpøky'atidip ku øts nja' xpaðøjkidi.

¹³ Jats meets idø'øn ja nja' xnigubojkit.

¹⁴ Kidits meets ja xwandijy pøni sà mee mnagyubokit ku mee mnagyu'adsowiyit.

¹⁵ Øts meets ja wijy'ajtin nmo'op, øts meets nyik'ayukpaatp sà mee mwa'ant jøts ja mmidsep nisudso'ampy kya'adsojimbettit, jadi'iñi ja tmi'amo'ondit.

¹⁶ Mdeety paat mdaak paat mee nga'ødyuniyit. Tiits ja chow ja mmigu'uktøjkti jøts ja'adi pøn mminamyaajyidip, myik'oogidip winaagin meets ja'.

¹⁷ Tum midsep meets o pøn m'ejxit ja'agøjxp ku mee xjanchjawi.

¹⁸ Ka'ats meets jadi'iñi myik'ejxigø'øty, ni tu'ugin meets mwaay kyawindigø'øty.

¹⁹ Pøni mmidanaadyip tu'ugyi amumjoojt, mbaatpsts meets ja nitso'ok'ajtin jøts meets m'anmija'win yjucky'att xemikøjxp.

²⁰ Ku x'ejxtit yø Jerusaléngit kajp jøts ku amuum tseptumbitøjk tø ñi'awidejtniyi, jade'ents meets ja xnijawit jøts ku yø kajp wyinaty tsojk kyudigøøwya'añ.

²¹ Pøni pønts jam Judeit naxjøtp wyinaty, wants ja tkaknøjkxti jam kojpkøjxp; pøn jaty jam Jerusaléngit kajpjotp, wan ja jam tkakpidsømdi, jøts pøn jaty jam o muum awa'ats etjotp wiedejtipp, kidi ja winet et wyimbetti jøts ja ñøjkxtit jam kajpjotp.

²² Ja'abi xøøw idø'øn ja ayo'on mye'ent, jaa dø'øn ja jade'en yjatt kyubatt sà jaty Dios kyajpxy wya'añ.

²³ |Ayo'iixyim ja tø'øxyøjk yjattit pøn jaty ja myutsk jam wyinaty tnikøjxp'ajttip, pøn jaty ja myaxu'nk jam wyinaty tø kyaxø'økti! Pø ji'i'iyim ya'axymixi dø'øn ya naxwiifñ yjatt, møk ja jaa'y ayo'on tpaattit t'ejxtit.

²⁴ Pømbi ooktip jam tseptundaajkjotp, pømbits yikmatstip jøts ja yiktsu'umdit o magajp, øy yø Jerusaléngit kajp øy sà yiktu'unt, øy ja ja'at jaa'y yø sà tyuniyit, kunim ja y'ayo'on yø ttanajxkøxt winetnimts yø yikmajststutt.

Sà mye'ent ja naxwiifñit jaa'y myøjkudanaabyi

²⁵ Wenk yø xøøw yø po' yjatt, yø maadsa' nayide'en; jøts naajx kajp jadi'iñi tya'andit, niti tabyajtin tkapaattit, øy ja tsø'øgi yik'o'jknijidit ku tmado'odit ja mejy tyojmjø'økt øy madsøo.

²⁶ Yik'oo'kjimbetidip jaa'y tsø'øgi ku ja tnmado'odit jøts ku jade'en naxwiifñ yjatwa'añ; jøts ku ja'abaat jade'en yjatt ti jaty jam tsajpwemp ejtp.

²⁷ Jaanims t ø'ejxtit, ja naxwiifñit jaa'dyi myøjkudanaabyi, ku nmime'ent yootsjøtpy ja nmøk'ajtin, jajpim tsamambim ja n'aju'uk nyikaxø'økt.

²⁸ Ku dø'øn ja jade'en yjatt'ukwa'ant, møk mnabyikta'agidit jøts xjøp'ejxtit jøts ku tsojk mye'ent pøn myiknitsø'ok'atidip.

²⁹ Nayi tyamimadyakpajtyi'ñ ja' jadu'uk ejxpajtin madya'aky jøts ja wya'añ:

—Ku x'ejxti ja iigi kipy uk øy ti kipy kya'adigach ja y'aay.

³⁰ Ku kujk xyimurni, jats ja wa'ats xnijawidi jøts ku poot wyingøñ ku ja nøø ja tuu myenwani.

³¹ Nayide'ents idø'øn ja' ku x'ejxtit jade'en ja ayo'on, jade'ents ja xnijawidit jøts ku wyingøñ ja Dios kyutujk midi ja tyanitanaapy yjaa'y.

³² Janch øts idø'øn nwa'añ jøts ku dø'øn ja jaa yjatt namga'anim y'oo'kixy pøn jaty ja ixyam jujky'ajttip.

³³ Najxp y'ity ja naajx ja tsajp, øy yø juuni kyudigø'øty, jøts øts n'ayuujk nijuuni yø kyakixy kyanaxy.

³⁴ Øyim mjaa'y'attit, kidi m'aaw mjoojt xamiyoxti midi yiktundigøøpy, kidi ja nøø ja mu'uk xunk'atti, kidi meets ja ne'egi xajotigøydi ti jaty ja ejtp naxwiifñ jøts jade'en adsu'jky mgayikubaadidit

³⁵ sam naky myukyin, jade'en ja yiknime'endit pøn jaty jujky'ajttip øy madsøo ya naxwiifñ.

³⁶ Jøp'ejxtits meets, ajot'at'etti ja Dios jøts mniwa'adsidit ja ayo'on midi tunip jatip, jøts ø xwinguwa'agidit amgujk jotkujk, ja naxwiifñit jaa'y myøjkudanaabyi.

³⁷ Xinaxy idø'øn ja Jesús jam yik'ixpiky tsaptøjkjøtp, jøts ja koots ñijky jam kojpkøjxp midi yiktejp Olivos.

³⁸ Jøts ja mayjaa'y jam tsaptøjkjøtp ejtp xyuminøjkxti jøpyi jøts ja jam pyatmadøyiyi.

22

Ku ja Jesús yikajpxy'aty jøts ja yikmatst

¹ Ja paski xøøw idø'øn wyinaty pyatpy ku ja tsapkaaky yikay jadi'iñi midi kalevaduri møøt.

² Jøts ja teetywindsøndøjkti jøts ja kajpxwejpitøjkti tjanch'ixā'adi ja taay sudsonim ja t'ukyik'ooktit ja Jesús, ja mayjaa'yts ja chø'jkidip.

³ Xjats ja Judas Iscariote ja miku' tyatøjkiyøø, ja' idø'øn ja pabøjkitøjk møøt kya'pxti nimakmajtsk.

⁴ Jøts ja ojts tniinjxxy ja teetywindsøndøjkiti møøt ja tajk mayut, jøts ja ojts tminagyajpxyi, ojts ja tkajpxy'atti sudso ja tkøyakt ja Jesús jøts ja tmatstít.

⁵ Jøts ja jade'en yjotkujk'atti, ojts ttami'awanidi meeñ ja Judas, jøts ja ttamiju'udyit ku ja tkøyakt ja Jesús;

⁶ kyupøjk ja jade'en jøts ja t'ixaadyøjkii'ñ ja taay, jøts ja winet tkøyakt ku ja mayjaa'y jam kya'ettit.

Ku ja nwindson'ajtim yjaa'uk'a'ux'ajtni ja pyabøjkpitøjk

⁷ Xjats ja xøw tpaajty ku ja tsapkaaky kyayikay levaduri møøt, xjats idø'on ja borreegi maxu'nk wyinaty y'ookwa'añ, jøts ja idø'on yikyøxy'ajtp ku ja paski xøw ñaxy.

⁸ Winets ja Jesús tkejxy ja Pedro møøt ja Juan, yide'en ja tnimaay:

—Nøjkxti jøts ja paski a'ux xyik'awejxtit.

⁹ Jøts ja tyiktøødøø yide'en:

—¿Mamts øøts ja xuk'a'ejxiwya'añ?

¹⁰ Jøts ja Jesús ja y'adsoo'idøø:

—Ku net jam mgajptøkidit, jam inet tu'uk xpaattit jaa'y pøn jam wyinaty nøø twejtsp tsiijøtpy. Ja'ats mbanøjkxtip jam tøjktjøtp, pøni ma yja'aty jamts mja'attit,

¹¹ jøts ja kudøjk xnøjmidit: “Yide'en ja windsøn wya'añ: ¿Mak idø'on ja tøjkjooit ma ja tmøøt'a'ux'att ja pyabøjkpitøjk, mak idø'on ja tka'adyit ja paski a'ux?”

¹² Winets meets inet ja tøjkjooit myiktuk'ejxtit jap nipatøjkijxpy a'ejxi abaadi; japts xyik'awejxtit ja a'ux.

¹³ Xjats idø'on ja ojts ñøjkxti jøts ja jam jade'en tjanchpattøø sa Jesús ja wyinaty tø ñii'mxyidi, jøts ja jam t'a'ejxidøø ja paski a'ux.

¹⁴ Kuts ja a'ux'ajtk tpaajty, xjats ja Jesús møøt ja kyudanaabyitøjk twinguwa'adsiyii'ñ ja kaabyajt.

¹⁵ Jøts ja tnimaay:

—ixyamnim meets inet ja paski a'ux jade'en nmøøtkaamyuky sam ø ndyimchøkyin namga'aním ø n'øøky!

¹⁶ Janch øts idø'on nwa'añ jøts ku meets ixymyi jade'eñi njaakmøøtkay jaanim jadigojk ku mye'ent ja Dios kyutujk midi ja tyanitanaapy yjaa'y.

¹⁷ Winets ja tnixajiyii'ñ tu'uk uujk'ii'ñ, jøts ja jawyeen ttukmøja'wiyii'ñ ttukunuu'kxyja'wiyii'ñ ja Dios Teety, jøtsnim ja wya'añ:

—Axajidi ya'at jøts x'ukwa'kxtit;

¹⁸ øts kø'øm wamp jøts ku ø ka'ap tsojk n'uk'uknit yø uvi tsa'am nøø'u'nk, jaanim jadigojk ku Dios ja kyutujk tyikme'ent midi ja tyanitanaapy yjaa'y.

¹⁹ Jøts ja tnixajiyii'ñ tsapkaaky, ojts nayide'en ttukmøjawi ttukunuu'kxyjawi ja Dios Teety, jøts ja t'adujkpačkxi ja kyudanaabyitøjk jøts ja tmøø'y, yide'en ja tnimaay:

—Kaydi ya'at, yø' øts idø'on ñamyayi nne'kx'ajtpy midi meets mnitsoojkingøjxp inet mniyoxp. Mdu'undip ya'at jade'en øts nja'myajtsingøjxp.

²⁰ Nayide'en ja uujk'ii'ñ ja ttuuñ ku ja y'a'ux'ajtkøjxtøø, jøts ja wya'añ:

—Ya'at tsapnøø'uujkin idø'on ixyam tamp ejxpajtin ku ja Dios Teety ja wyanda'aky tyik'aduky samdam ja ttami'awa'aniyii'ñ ja naχwii'ñit jaa'y ja nitso'ok'ajtin. Ixymts idø'on ja cho'onnda'aky ku øts ja nni'jpy inet wyidsu'unt wyidaxt.

²¹ Pønts ø xkøyapk, pøn ø xka'ødyunwamp, ixya øts ja møøt ngay, kidi majip ja'.

²² Ja' ø nbadumpy midi ø tø nyiktanipiky; jja' ayo'ijxyim jajtp pøn ø xkøyakwamp!

²³ Jøts ja ñayiktøønaxwa'jkidøø agøømyi, pøn idø'on jade'en ka'øy'adøøtswamp.

Ku ja Jesús kyudanaabyitøjk tkajpxy'atti pøn idø'on jawaani møj pidsøømp

²⁴ Xjats ja xem yam tkajpxy'ajtpinibøjkidøø pømbi dø'on jadyimy'ukmøjtøkøp.

²⁵ Jøts Jesús ja ñimaajiyidøø:

—Jade'en møj windsøn t'ana'amdi ja naajx ja kajp pøni sa ja ttsokti; jøts pøn jaty tnigubajk'ajttip o ti, ja'ats yiktejtíp jøts ku ja t'ødyundi øy pøn.

²⁶ Ka'ats meets idø'on jade'en mjaa'y'attit; pøni pøn møjtojkíp, pøni pøn ana'amp, kidi ja jawyeen namyiduni ttsøky; ja' idø'on paat'ajtp ja myigu'uk tpuðøkip.

²⁷ ¿Pømbi dø'on møjtojkíp? ¿Ja' pøn yikwindsø'jkíp, uk ja' pøn windsø'jkíp ma ja kaadyaajk jam? ¿Kidi ja'ajip møjtojkíp pøn jam tø twinguwaadsa ja kaabyajt jøts ja yikwindsø'gi? Ixyats meets jade'en nmøøtwidity sam ja' pøn ja myigu'uk wyindsø'jkíp.

²⁸ Tøts meets xmøøt'ayo'ombaaty, tø nayide'en xmidanidi wine'enin øts ixyam xmøøtwidetti.

²⁹ Paty meets mbaat'aty; nmo'ot ja Dios Teety kyutujk midi ja tyanitanaapy yjaa'y, nayide'en sam øts ja tø xmøø'yin,

³⁰ jøts mga'adyit m'uuktit øts ngaabyajtkøjxp ku øts ja njaa'y ja kutujk ndanitanit, jøts m'ixa'aktit ma ø nyikutukt jøts xiidyu'undit ja Israelit jaa'y niduki'iyi.

Ku ja Jesús kò'òm tnigajpxy jòts ku ja Pedro ja kyu'òòniyit

³¹ Nayide'en ja nwindson'ajtim wyaañ:

—Simón, Simón, tyimdyò jòts miku' yja' myòjtòkit. Tò ja t'amidoy ja Dios Teety ja tiy'ajtin jòts meets ja oy oy myik'ayo'ombaađit, yikxon meets ja mduktani'ejxw'a'añi;

³² tòts me nni'amidow'i jòts kidi yikmimajada'aky ja mjanchja'win ku jade'en m'ukjatt m'ukubatt. Kuts ja m'ajot'ajtin jadigojk tu'ugyi xyik'ett, kajpxjot'amòjiks ja mmigu'uk pòn jaty o nja'ajtpy.

³³ Jòts ja Simón wyaañ:

—Windsøn'ajtim, ku me m'ukyiktsu'umt, nayide'ents òts nyiktsu'umt, ¿ti ti o nnida'amp? Mjadyimya'òòky mets, nmòòt'ookpts mets.

³⁴ Winets Jesús ja ñimaajyòò:

—Òts Pedro dò'òn wamp jòts ku tsapni'aaw wyinaty ka'aním y'ayajxi'ikñim, ku mets wyinaty tigòòk ojk tò xku'òò'ni jòts ku me xka'ijxy'aty.

Ku Jesús tnimaay kyudanaabyitòjk jòts ku ja tyagòda'akwa'añidi ja ayò'on

³⁵ Xjats Jesús ja yiktòòjidòò:

—Ku meets ojts nguexy jadi'iñi, ku ja pejn ngadukwejtstòò, ku ja meeñ abòjk'i'i'ñ ngadukondòò, ku ja mgò'òk paat xkakondòò, ¿sats meets ojts mdyimyjaty? ¿Ti ojts mguidyim'ijtxyidi o dò'òn ja jade'en xkakondòò?

Jòts ja yjanchwandòò:

—Janch ka'ap òòts ojts ti xka'ejtxi.

³⁶ Winets ja ñimaajyidòò:

—Yamnims inet ja pejn xwetstit pòni pòn yja' jam, nayide'en ja meeñ abòjk'i'i'ñ; pòni pòn ja chujx ka'ejtxip, wan ja ñijan ttòòky jòts ja ttaju'uty.

³⁷ Òts wamp, wan idò'òn jade'en tjaty, jabi kuwanyimxi jade'en yjatt sà Dios kyajpxy wya'añ: “Mòòt ka'oy jaa'y ja yik'amachomujky.” Jade'ents òts idò'òn nyiktu'unt sà òts jap tò nyiknigajpxy. Ka'pxy idò'òn ja jade'en yjatt kyubatt.

³⁸ Jòts ja wyandòò:

—Windsøn'ajtim, pò ıxyats majtsk tsujx.

Jòts ja y'adsòoy:

—Amòñidi.

Ku ja Jesús t'ajot'aty ja Dios Teety jam Getsemani

³⁹ Xjats ja Jesús chò'jñ, jòts ja ñijky jam kojpkòjxp midì yiktejp Olivos mą dò'òn ja jam xyumiyò'oy'ity; jòts pyabòjkpitòjk ja pyadso'onòò.

⁴⁰ Kuts ja jam yja'jty, jòts ja ñimaajyidòò:

—Ajot'atti Dios Teety, jòts kidi myikmajada'akti.

⁴¹ Jòts ja ojts yjiyò'oy nadyu'uk, ñajtsyò'oyiyi'i'ñ nijagam. Jamts ja ñagyuxendyaajkòò, jòts ja jam Dios Teety t'ajot'ajty

⁴² yide'en:

—Dios Teety, pòni mdsòjkpy, jòts o ka' jadine'en n'ayo'ombaađt; kidi òtsipts nja' kò'òm nyiktumpy, ja' o nbadumpy pòni sà me xamidsòky.

⁴³ Winets ankilis ja tu'uk ñimejnòò midì tsajpjòtpy tso'omp, jòts ja myòjaawmòòjyòò.

⁴⁴ Tyimchaachja'wipts ja mòk ku dò'òn ja jade'n yjatwa'añ, jòts ja ojts tjaaktyimyoaktuñ tjaaktyimy'ajot'ajty ja Dios Teety amumjoojt. Janch yikxon ja yja'anuu'kxiñi, jade'en y'anuu'kxi ja wyix'e'kxy sam ni'jpy kom kom wyix'e'kxyin.

⁴⁵ Kuts ja Dios'ajot'ajt'abajtyi'i'ñ, jòts ja ojts tnimiñ ja pyabòjkpitòjk mą ja jam wyinaty. Maadip ja jam ku ja tpaajty, ja jotmay ja jadi'iñi yikjotkòjxidip.

⁴⁶ Winets ja tnimaay:

—¿Tigòjxp ku mma'adi? Pidò'òkti, jòts ja Dios Teety x'ajot'attit jòts kidi mibaat miku' yja' mmimajada'agyidi.

Ku ja Jesús yikmajch

⁴⁷ Nay ixam ja Jesús wyinaty jade'en kyajpxy ku yja'jty may jaa'y. Ja Judás ja twinyò'opy pòn ja pabòjkpitòjk wyinaty nimakmajtsk mòòt tò y'uka'pxti, jòts ja twingume'eniyi'i'ñ ja Jesús jòts ja ojts ttsu'kxy.

⁴⁸ Winets nwindson'ajtim ja tnimaay:

—Judás, ¿jade'eñi òts idò'òn xkòyaky ku o xtsu'kxy?

⁴⁹ Jòts pòn ja Jesús jam wyinaty mòòtwidejtíp, ku ja jade'en t'ejxtòò, winets ja yiktòòjòò:

—Windsøn'ajtim, ¿nadyagubojkim yò tsujx?

⁵⁰ Jòts ja nidu'uk tyiktsaachiyi'i'ñ ja teetywindsøn tyumbi, ojts y'aga'ndyatsk ja tkajt-spo'jtyi.

⁵¹ Ka'ap Jesús ñiimy, yide'en ja wyaañ:

—Majtstu'utti; wan jade'eñigøjy.

Jøts ja tkønixajøø ja soldadi tyatsk jøts ja tyiktsøøjky.

⁵² Xjats ja tnimaay ja teetywindsøndøjkti, ja kajpxwejpitøjkti, ja møjaa'dyøjkti wine'enin ja jam winaty tø myendø jøts ja yiktsoonwā'añi:

—Ja tsujx, ja kipy meets yam xanimemp. ¿Ti øts yjawi tø nduni? ¿Tø øts yjawi nmaa'tsni?

⁵³ Ku meets jam y'ijty nxuminabyaadyi jabom jabom jam tsaptøjkjotp, niwine'enints meets y'ijty sa xkatuñ xkanøjmi; yamts meets winet tø mnaxwā'aky ku ja et tø chuu'ji kyoodsi jøts miku' yja' jade'en myajada'aky.

Ku ja Pedro tku'iñ jøts ku ja ka' t'ijxy'aty ja Jesús

⁵⁴ Winets ja tmajtstøø ja Jesús, jøts ja tyiknøjkxtøø jam teetywindsøn tyøjkwindum; jøts Pedro ja ojts tpanijky ix'oojk, jagam ja tpayø'øy.

⁵⁵ Jøts jøøn ja jam tajkyujk'am tyiknøjidøø, jamts ja tnidsinay'awidejttøø jøts ja Pedro nay jam y'ixakmøø.

⁵⁶ Winets tø'øxyøjk ja tu'uk y'ejxøø pøn jam wyinaty tump, jøts ku jøøn ja jam twindsøøni, winets ja tiyim wyin'ejxøø jøts ja wyaañ:

—Yø'øts ja Jesús y'ijty tmøøtwidejtp.

⁵⁷ Ka'ats Pedro ja tkupiky, yide'en ja wyaañ:

—Ka' ø migu'uk ja n'ijxy'aty.

⁵⁸ Jøts jawaandøki y'ijty, xjats jadu'uk y'ejxpajtøø, jøts ja wyaañ:

—Mets yø y'ijty møøtwidijtpy, ¿kidi?

Ka'ats ja Pedro ñiimy, yide'en ja wyaañ:

—Mixy, ka'ap ja y'øtsi, ka' øts ja nmøøtwidity.

⁵⁹ Tø wyinaty tukoori ñaxy ku ja jadu'uk møktā'aky wyaañ:

—Janch yø' tam yø y'ijty myøøtwidijtpy, pø nayi Galileit jaa'yts yø'.

⁶⁰ Xjats ja Pedro wyaañ:

—Migu'uk, nguidyimñija'wip øts pø ti mets jade'en mmadya'kpy.

Jøts nay jatyi nay ixamni ja jade'en kyakajpx'abaadi ku ja tsapni'aaw tu'uk y'ayajxy.

⁶¹ Jøts ja nwindson'ajtim t'ejxjimbijty ja Pedro, winets ja Pedro tja'mejch ku nwindson'ajtim ja wyinaty tø ñii'mxyi: “Ku tsapni'aaw inet y'aya'axt, tø mets wyinaty tigøøk ojk xku'øø'ni jøts ku me ka' x'ijxy'aty, jøts ku me ka' xnijawi.”

⁶² Xjats ja Pedro yø'øpyidsiimy janchniyaxni.

Ku ja Jesús yiktaxi'iky yiktagyaty

⁶³ Jøts ja jaa'dyi pøn ja Jesús wyinaty tkøjø'm'ajttip, ojts ja ttaxe'ekti ttaya'axti, jøts kawine'en twinwopti tjøpwopti.

⁶⁴ Ojts ja twindsumdi jøts ja twingoxti tjøpkoxti, yide'en ja tnøjmidi:

—iUknajtsjawi pøn yjawi tø mgøxyi!

⁶⁵ Kawine'enin ja tjemnimaadyøø ttenimaadyøø.

Ku ja Jesús yikwaanijky jam kutujktaajkjotp

⁶⁶ Xjats ku xyiindyajky jøts ja jami møjaa'dyøjk ñamyujkidøø møøt ja teetywindsøndøjkti, møøt ja kajpxwejpitøjkti, jøts ja tyiknøjkxtøø ja Jesús ma ja myøjkutujktaajk ja jamdi. Jøts ja jam tyiktøødøø yide'en:

⁶⁷ —Tukmadook øøts, ¿janch mets idø'on myiktejp Cristo midi yiknitsokp?

Jøts ja y'adsoojidøø:

—Ku net njanøjmidit jøts ku ja y'øtsi, ka'ats meets inet xmibøkt.

⁶⁸ Kuts meets inet nyiktø'øtt, ka'ats meets inet x'adsojimbett, nijade'en meets inet xkamajtstu'utt.

⁶⁹ Nay ixamyiøts øts inet ja Dios Teety nbu'ixaagit kyutujktaajk jøp'am, pøn ja myøk'ajtin kamaabyim.

⁷⁰ Winets ja niduki'iyi wyandøø, niduki'iyi ojts yiktiyi:

—¿Janch mets idø'on Dios U'nk?

Jøts Jesús y'adsøøy, yide'en ja tnimaay:

—Øts idø'on ja', nagyøøm meets ixa jade'en tø mwā'añ.

⁷¹ Jøts ja wyandøø:

—¿Ti ejxpi ti nija'wibi jaaktsojkiyip? Tøxi adøm yø yam kø'øm ndyimyadø'øyin sa yø kø'øm wyā'añ.

23

Ku ja Jesús twinguwā'jkijy'iñ ja Pilato

¹ Winets ja tyanagyukigyøjxtøø, jøts tyiknøjkxtøø ja Jesús jam Pilato wyingujkp.

² Jøts ja jam tni'øø'ninaxwā'aktø yide'en:

—Tø øøts yø jaa'y nugaadi, yø' tkajpxma'tp adøm ja nmigu'uk. Yide'en yø wya'añ jøts øøts ja yjadu'ukpi windsøn ngamigubatt midi ya'at naajx kajp tnitanaapy. Nayide'en øøts yø xnimaamyi jøts ku yø' Cristo, tyimy ja møj windsøn midi yiknitsokp.

³ Xjats Pilato ja tyiktiy:

—¿Janch mets idø'on israelit jaa'y mniwindsøn'ajtpy?

Winets ja Jesús y'adsøoy jøts ja wya'añ:

—Janch øts ja', ka' me nugo mwa'añ.

⁴ Jøts ja Pilato tnimaay ja teetywindsøndøjkti møøt ja mayjaa'y:

—Niti pøky yø jaa'y, niti tundigø'øyin yø tkatuñ.

⁵ Tiii møkta'aky ja tyimñømdi:

—Yø', Judeit jaa'y nugo tkajpxma'tp ku kyø'øm wyinma'añ yø ttuk'ixpiky. Jam yø ojts Galilea jade'en y'adø'tspinaxwa'aky, jøts yø icyabaat jade'en tpañin, icyabaat jade'en tkamajtstu'uty.

Ku ja Jesús twinguwa'jkyyi'ñ ja Herodes

⁶ Kuts Pilato ja jade'en tmadøoy, xjats ja tyiktiy pøni janch Galileit jaa'y idø'on ja'.

⁷ Kuts ja ñømdøø jøts ku jade'en, winets ja ojts ttaninijxxy ja Herodes pøn wyinaty møjkudunk'ajtp jam Galilea, tyimbyøn ja wyinatymi jam Jerusalén ja'abi xøøw.

⁸ Kuts ja Herodes twingu'ejxyi'ñ ja Jesús, jøts ja yjantyimxyondaajky; jekyip idø'on ja wyinaty tyimyjawin'ejxwa'añ jøts ja jadine'en ka' twin'ijxñim, tø ja wyinaty yik-tamimadya'aky jøts ja jade'en tnijawi, yjöp'ijxpyts ja t'ejxit øy juuni ja myilagri'ajtin.

⁹ Kawine'en ja ttiibyiky, jøts ja Jesús kyidyimy'adsoop ja'.

¹⁰ Exam idø'on ja teetywindsøndøjk wyinatyi møøt ja kajpxwejitøjkti, ja'ats jam møk'ampy jantyimy'øø'ndip.

¹¹ Xjats ja Herodes møøt ja tymbitøjk ta'ajkin'ampy tjemdundi ttedundi ja Jesús, jøts ja tnixe'ekti ttaxe'ekti, ojts wet ja ttuktatøkidi sam møj windsøn wyetin, jøts ja Herodes ja ttaniguejxy ja Pilato jadigojk.

¹² Winets ja ñamyigu'ukpøjkidøø jadigojk ja Pilato møøt ja Herodes, namyidsep'ajtidip idø'on ja wyinaty.

Ku ja Jesús ñidujkyi'ñ jøts ja y'oøkt

¹³ Jøts ja Pilato twaamujky ja teetywindsøndøjkti, ja kudunktøjkti, møøt ja mayjaa'y,

¹⁴ jøts ja tnimaay:

—Meets yø jaa'y ya tø xaniñi jøts mnømdi jøts ku yø' tkajpxma'aty ja jaa'y; tøts xmadowdi ku tø njatiibyiky, jøts niti tundigø'øyin øts yø ngadapøky'ijxy, øy meets yø jade'en xjani'øøni.

¹⁵ Nayide'en Herodes yø niti tundigø'øyin tkapaajtxi, icyats ja tø tkajxjimbejtñimi jadigojk. Ixats idø'on x'ejxti jøts ku ka' pyaat'aty jøts yø y'oøkt.

¹⁶ Nyik'ayo'opts øts inet yø' jøtsñim øts inet yø nyik'awa'atspidsø'ømt.

¹⁷ Xumijade'ents idø'on ja ttundi ku ja xøøw tpaaty, kuwani dø'on ja Pilato tu'uk ja pøkyjaa'y tjadyimyk'awa'atspidsimy.

¹⁸ Jøts ja ni'ijtyi møk'ampy wyambinaxwa'aktøø:

—¡Yikjiwa'ak yø', jøts yø Barrabás ne'egi xyik'awa'atspidsø'ømt!

¹⁹ Tsep'ejxp idø'on ja Barrabás jam wyinaty jam kajpjtøt jøts ja tø yikjaa'y'øøky, ja'ats ja kyubuxøktøjkyyi'ñ, ja' ja wyinaty tø yiktagudsumi.

²⁰ Yik'awa'atspidsømwapmy Pilato ja Jesús, jøts ja ojts tmigajpxy jadigojk ja mayjaa'y;

²¹ ¿maa'?, jawaani møk'ampy ja wyandøø:

—¡Yikruspat! ¡Yikruspat!

²² Xjats ja Pilato midigøøjk ojk wya'añ:

—¿Tims yø tyimgyubatp? ¿Ti tundigø'øyin adøm yø tø xtyimdyu'unxim? Ka øts yø nbøky'ixy ti yø tyimgyu'oogip. Ja'ayi øts yø nyik'ayo'ot jøts øts yø nyik'awa'atspidsø'ømt.

²³ Jøts ti dø'on ja tjantyimdyejti, møk ja tyimdyanidi jøts ja tnøjimidi wan tyikruspety; yjanchka'uk'amonidi ja', jøts idø'on ja teetywindsøndøjk ja jade'en tnanktyuujnidøø sam idø'on ja wyinaty tyimyjotkida'akti.

²⁴ Winets ja Pilato ja tkupijky sa ja wyinaty tø wya'andi,

²⁵ jøts ja jade'en tyik'awa'atspidsiimy ja jaa'y pøn ja wyinaty tø t'a'ejxidi. Jøts ja pyidsø'ømt ja' pøn jam wyinaty tsumy'ejtp puxøjkjotp, pøn jam wyinaty jade'en tø tkubety ja tyundigø'øyin ku ja wyinaty tø tnankchep'ijxyi ja kajpjaa'y jøts ku ja yikjaa'y'øøky. Xjats idø'on ja Jesús yikøyajky jøts ja yiktagøðjkyyi'ñ ja mayjaa'y, wan ja ttundi pøni sa ja ttundi chojkingøjxp.

Ku ja nwindsøn'ajtim Jesús kyiruspejty

²⁶ Kuts ja wyinaty jam tyikruspattit mā ja tyikruspattit, winets ja tu'uk tmajtstøø ja jaa'y pøn kugajp'ajtp Cirene, Simón'ajtp ja'. Kyamjotp ja wyinaty chøøñ jøts ja ttaguwa'anidøø jøts Jesús kyirus ja tpagøjyt jøts ja ix'oojk ttabayø'sty.

²⁷ Janch may jaa'y idø'øn ja jam wyinaty payø'øyi'yip, may ja tø'øxyøjk yjanchya'axti ku ja jotmay ja tyatøkiyidi, ku ja jade'en tyimyiktuñ.

²⁸ Jøts Jesús ja ojts y'lijxyidi jøts ja ñimaajyidøø:

—Meets Jerusaléngit tø'øxyøjkti, kidi ø xkuyaaaxidi, kø'ømyi mee mnabyaya'axit jøts ja' m'ejxtip ja m'u'nk m'unaj'jk, ja' mbaya'axtip.

²⁹ Ja'atp ja et ja xøøw ku pøn wya'ant: “Nekim yø t'ejxti pøn ka'u'nkpattip, pøn nijuuni kayikwids'e'tstip, pøn nijuuni y'u'nk tkatsimy'e'jttip.”

³⁰ Jøts ja jaa'y wyambinaxwa'aktit: “Ok øts yø tun yø kojpk ne'egi xnijaanit.”

³¹ Jade'en sam øts ixyam n'ayo'ombaaaty niti pøkyøjxp, isats ja tyimy'ayo'onbaattit ja Jerusaléngit jaa'y!

³² Namajtsk pøkyjaa'y ja pyaa'yø'øyi ja Jesús jøts ja t'atsmøøt'ookt.

³³ Kuts ja jam yja'jttoø mā ja et jam txøøw'aty Calavera, jamts ja tyikruspajttøø ja Jesús møøt ja yjanamajtskpi pøkyjaa'y, tu'uk jaty ja adsow aduuk kyiruspajttøø.

³⁴ Kuts ja ixam wyinaty jade'en yikruspatti, xjats ja Jesús wyaañ:

—Dios Teety, maa'kxuk, ka' yø tñijawidi pøni ti yø tyundip.

Jøts ja soldaditøjk ja wet tñiguyajttøø midi ja Jesús y'ijty wyet'ajtpy, jøts ja jamyi agø'ømyi twejtswa'kxtøø.

³⁵ Ixam idø'øn ja mayjaa'y y'a'ejxukti jøts kudunktøjk paat ja ñixi'igyi tyaxi'igyi, yide'en ja wya'andi:

—Tøxi wyenkpi tyiktsø'øky, wants inet yø kø'øm tñankchø'øgyi, pøni janch ja Cristo tam idø'øn yø' pøn ja Dios tø y'a'ejxyi yiknitsokpi.

³⁶ Nayide'en soldaditøjk ja ñixejkmüyøø tyaxejkmüyøø, jam ja wingon wyingunøjkxyi jøts ja ttuk'uukwa'andi ja vino ta'am,

³⁷ yide'en tñøjmidi:

—Pøni mets tam idø'øn mjanchwindsøn'ajtp ya israelit jaa'y ñaxjøøjty kyajpjøøjty, nankñitso'ogits mets jøts mga'ookt.

³⁸ Jøts letri ja jam y'agubajkp yikøxjaay kawinaak jøøjp ja ayuujk, jade'en griego, jade'en latin, jøts hebreo, yide'en ja wya'añ: “Ya'at idø'øn tñiwindsøn'ajtp israelit jaa'y.”

³⁹ Jøts ja pøkyjaa'dyi pøn jam wyinaty kudyidi, ja'ats ja nidu'uk migajpxigøøyøø, yide'en ja ñimaajyøø:

—Pøni mCristo tam mets, çti kuts mganankwinyakyi jøts øøts nayide'en xyikwinakt?

⁴⁰ Jøts ja yjadu'ukpi ojts twi'øjy ja myigu'uk, yide'en ja tñimaay:

—çKa' mets ja Dios x'uktsø'jkiñi? Jabi nayide'ents jam yjawi mja'ayo'ombaatmi.

⁴¹ Jøts xpaat'ajtim adøm jade'en jøts adøm jade'en ngu'ayo'owant ja nga'øy'ajtin ti jaty adøm tø ndu'uñin, mats ya'at niti yø tkatuñ ti dø'øn yø jade'en kyubejtpy.

⁴² Jøts ja yjaakwaañ:

—Jesús, xja'myatspim øts ku mja'att jam mgutujktaajk jøp'am.

⁴³ Jøts Jesús ja y'adsoøjøø:

—Janch øts idø'øn nwa'añ jøts ku øts inet nayamyi xmøøtnøjkxt jap tsajpjøtpy.

Ku ja nwindsøn'ajtim Jesús y'ø'jky

⁴⁴ Ja dø'øn ja xøøw wyinaty kyuki ku jotmøn kyoodsiyii'ñ, jøts ja et kugoots tyaañ, jaanin xiiñi jadigojk tigøøk yaxp.

⁴⁵ Kuts ja xøøw wyingoodsiyii'ñ, jats ja tsaptøjk awejststuk kujkwa'kxy, winet tyakø'jtsiyii'ñ.

⁴⁶ Jøts ja Jesús møk'ampy wyaañ:

—Dios Teety, pøjkjø'øgik øts n'anmija'win.

Ja'ayi ja jade'en yjaakwaañ jøts ja y'ø'jky.

⁴⁷ Xjats kuts ja romit soldadi mayut ja tuki'iyi jade'en ojts t'ixy sã jaty idø'øn yjajty kyubejty, jøts ja tmøja'wiyii'ñ tkunuu'kxyja'wiyii'ñ ja Dios, yide'en ja wyaañ:

—Janch øy jaa'y tam idø'øn yø', ka'ap yø pyøkyjaa'dyi.

⁴⁸ Pøn jaty jam wyinaty, pøn jaty ja jade'en t'ejxtøø tñija'widøø, niyaxni ja jam cho'onidøø.

⁴⁹ Jøts pøn jaty ja Jesús ixxy'ajtip, jøts ja tø'øxyøjkti pøn ja jam Galilea wyinaty tø pyad-søøñiyi, ja'ats idø'øn jam jagam ojts t'a'ejxukti ti jaty tuujnøø jajtøø, wa'ats ja t'ejkøjxtøø.

Ku ja Jesús ñine'kxy yikpiktaajky jap oo'kpi tsaa'jutjøtpy

⁵⁰ Jamts wyinaty tu'uk ja jaa'y midi janch øy jaa'y'ajtp, ka'ap ja pøn tmidundigøy, José ja xyøøw'ajtpy, jam ja Arimatea kyugajpi, nayjam idø'øn ja kajp tyañ Judeit etjotp. Nay jamts idø'øn ja tyuñ jam kutujktaajkjotp mā ja israelit jaa'y kyutujk'adsøøñidi.

⁵¹ Y'awijxpyts idø'øn ja José ja' ja Dios kyutujk midi ja tyanitanaapy yjää'y, jade'ents ja ka' tkupiky sa ja møøtkutujk'adsinaabyi wyinaty tø y'adø'øtsti.

⁵² Ja'ats ojts tninijxky ja Pilato jøts ja t'ats'ijxy jøts ja t'amidojoo ja Jesús ñine'kx.

⁵³ Kuts ja tyikruswinajky, winets ja tpoopwet'amøjch jøts ja t'piktaajky ma oo'kpi jut ja wyinaty yikxon tø tyik'øyi, tøjku'ngin ja wyinaty tø tpejxjuty ja tsaa, nipøn oo'kpits jap kyayikpikta'akñim, tyimñay'amaay ja y'ity.

⁵⁴ Ja'abi xøøwts ja øy ti tjaaktyimdyungøxti jøts t'amaay'atti kyimjabom ja poo'kxin xøøw.

⁵⁵ Jøts ja tø'øxyøjk ñjøkxtøø pøn wyinaty tø tpadsoondi ja Jesús jam Galilea, jøts ja t'ats'ejxtøø ja oo'kpi jut, ojts ja t'ejxti ku ja oo'kpi jap yikpiktaajky.

⁵⁶ Kuts ja wyimbejtnidøø, ñjøkxnidi jam tyøjkjotp jøts ja ojts t'a'ejxidi ja pa'akxuu'kpi møøt ja aceite, jødsyim ja t'amaay'atti ja poo'kxin xøøw sam wya'añ ja Dios kyutujk.

24

Ku ja nwindson'ajtim Jesús yjujkyjyky jadigojk

¹ Kuts ja yjadu'ukpi samaan tyøjkyyi'ñ, ku myidukxøøw'ajty, winets ja tø'øxyøjk wyimbejttøø jøts ja ñjøkxtøø jøpyi jøpyi ma ja oo'kpi jut jam, jøts ja ojts tyiknøjkxti ja pa'akxuu'kpi midi ja wyinaty tø tyik'øyidi; ojts ja yjadu'ukpi tø'øxyøjk ja tmøødidi.

² Kuts ja jam yjå'jttøø, jøts ja oo'kpi jut ja t'pattøø jøts kudam y'agø' ja kya'uknayjamini;

³ tøjkidøø dø'øn ja jam jøts ja ka'ap t'ukpaajtniyidøø ja nwindson'ajtim ñine'kx.

⁴ Jøts ja yjancho'j'kidøø, nisudso'ampy ja kya'ukwinmaa'nbyatnidi pø ti dø'øn tyu'undip jøts ku ja tjaaktyimy'ejxpattøø namajtsk ja jaa'y jap wingon wyindaniyidi, janch jajp tsamamp ja wyet tmigaxø'økti.

⁵ Kumi janch tsø'jkidip ja wyinaty jøts ja nugo ñaxkoodøø, yide'en ja ñimaajyidøø:

—¿Jadits ya x'ixa'adi oo'kpi agujky midi tø yjujkyøkni?

⁶ Ka'ap ja ya pøn, tø ja yjujkyjyky. Ja'myatsti sa ja mnimaajyidøø jam Galilea ku ja jaak nay jam wyinaty,

⁷ ku ja wyaañ jøts ku ka'øy jaa'y ja yiktagidøkit, ku ja kyiruspatt, jøts ku ja kidigøøk xøøw yjujkyøkt.

⁸ Jøts idø'øn ja tjanchja'myajtstøø ja Jesús y'ayuujk sa ja wyinaty tø wya'añ,

⁹ jøts ja jam cho'ondøø ma ja oo'kpi jut jam jøts ja wyimbejtnidøø, ka'pxy ttamimadyakøjxtøø ja yjanimaktu'ukpi kudanaabyidi jøts pøn jaty jam wyinaty.

¹⁰ Ja María Magdalena, jøts ja Juana, jøts ja yjadu'ukpi María midi ja Jacobo tyaak'ajtpy, jøts jadu'uk ja tø'øxyøjkti, ja' dø'øn jade'en ojts yjatti jøts ja ttamimadyakøjxtøø ja kudanaabyitøjkti.

¹¹ Jøts ja kudanaabyitøjkti ka'ap ja tmibøkti ku ja tø'øxyøjk ja jade'en tyamimadya'agyidi pø sa ja tijy yjatti.

¹² Xjats ja Pedro chøø'ñ jøts ja ojts pyujtnijxky ma ja oo'kpi jut jam. Kuts ja kyu'ejxyi'ñ jøts ja t'ejxpajty ja poop wet jøts ku ja jagam wyøjnaañi. Kuts ja wyimbijty tyøjkjotp jøts ja janch ñigyumaap tja'wiyi'ñ ku dø'øn ja wyinaty jade'en tø yjaty.

Ku ja nwindson'ajtim Jesús ñanky'ijxyi jam Emaús tuu'am

¹³ Winets ja pabøjkpitøjk namajtsk nay ja'abi xøøw ñjøkxti jam ma kajp txøøw'aty Emaús, tuk'ajopyø'øyu'ngin idø'øn ja tyø'ødyi ku choondi jam Jerusalén jøts ja jam ñjøkxti.

¹⁴ Ja' ja jam wyinaty ñigajpxtip ñimadyaktip sa dø'øn jade'en wyinaty tø yjaty;

¹⁵ ixam idø'øn ja kyajpxti myadya'akti wyinaty, ja' ja jam kyajpxy'ajttip ku Jesús ja ñimejnidøø wingon jøts ja myøøtyø'øyidøø.

¹⁶ Yja'ejxtip ja wa'ats, jadi'iñits ja yikmøñidi yiktukyidi pø pøn ja jade'en.

¹⁷ Xjats Jesús ja yiktøjtidøø:

—¿Ti dø'øn ja jaa mgajpxy'ajttip ku ixa jade'en mduu'yø'ødyi? ¿Ti mdajotmay'oo'ktip, sa mjatti?

¹⁸ Xjats ja nidu'ugin y'adsoodøø, ja Cleofas idø'øn waañ:

—Tyumnija'widip ja jaa'y ixyam ti tø tyuñi yjaty jam Jerusalén. ¿Kidi mets mjam'ajty, pø mets inet idø'øn ja nadyu'uk mganija'wip?

¹⁹ Jøts ja ñimaajyidøø:

—¿Tims jam ti yjaty?

Jøts ja tnimaadyøø:

—Ja Jesús øøts idø'øn ndijpy, ja Nazaretit jaa'y, midi Dios Teety yikmøjkugajpxy'ajtip ku ja tkajpxwa'kxy ja y'ixpøjkin u ku ja ti ttuñ. ¿Ti ja kya'ukjajtpy? Myinajxpts ja jam Dios wyingujkp, jøts nayide'en ma naxwii'ñit jaa'dyi.

²⁰ Ja teetywindsøndøjk ja tø tkøyakti møøt ja nwindsonødjkti jøts ja yiktaguwanit ja o'jkin jøts kyiruspatt.

²¹ Ja' øøts ja jaa ndyimy'ukjöp'ijxpy jøts ja jekyip tñigubøky yø Israelit ñaajx yø Israelit kajp. Ixyamts ja tyigøøkxøwip jade'en yjajtni.

²² Øy øøts ja tø'øxyøjk winaagin tø xjanøjmi adsø'jkibim, ku ja tø y'ats'totsti icyam jøpy ma ja oo'kpi jut jam,

²³ ka'abik ja tø tpaatti ja Jesús ñine'kx, jøts øøts ja tø xninijkxy, tuki'iyi tø xamimadyakixy jøts ku ja tø t'ejxti namajtsk ja ankilis jødsik ja tø ñii'mxyidi jøts ku ja Jesús yjujky'aty.

²⁴ Winets øøts ja nmigu'uk winaagin jatyi tø yjanøjxkti ma ja oo'kpi jut jam, jødsik ja jam jade'en tø tjançpaatti sa ja tø'øxyøjk tø tñigajpxti, ka'adsik ja ma tø t'ejxti ja Jesús.

²⁵ Xjanimts Jesús ja ñimaajyidøø:

—iNiwine'enin mjanchkaja'gyukidi, meets tsaachkujuunjaa'dyi, jeky meets ja xøøw ja jumøjt ja xukminaxy jøtsnim meets ja xjançjawit sa jaty ja Dios kyugajpxy wyandøø!

²⁶ Jabi kuwañimxi tyimbyaat'aty ja Cristo jøts ja jawyeen y'ayo'ombaatt jøtsnim ja tpaatt ja windsø'jkin winja'win o maðsoo.

²⁷ Xjats ja Jesús tyukmadoobinaxwaj'kidøø sa ja Dios kyajpxy wya'añ ma jaty ja jap yikniçajpxy tøøyp, ja' ja ñigajpxøjkijyii'ñ sa wya'añ midu ja Moisés ja Dios tukjajyøø jøts ja tñigajpxkijxy sa jaty ja yjadu'ukpi kugajpxy wyinaty ja Dios tø tyukjaadyañidi.

²⁸ Kuts ja jam kyajptøjkidøø ma dø'øn ja jam wyinaty yja'atwa'andi jøts ja Jesús yjaaktyimñøjkxwaj'añ, tyimñaxwamp ja jam.

²⁹ Jøts kuwani tyiktandøø, yide'en ja tñimaadyøø:

—Møøt tånk øøts ya, pø tøts chuu'jini, koodsiwyanipts.

Xjats ja Jesús ja jam jade'eñi myøøtaajnidøø.

³⁰ Kuts ja tmøøt'ixaktøø, tø wyinaty twinguwaadsidi ja kaabyajt, ixam ja chinaañidi ku ja tñixajiyi'ñ ja tsapkaaky, jøts ja ojts tkunuu'kxy, jøts ja t'adujkpajky, jøts ja tyagiko'oniyidøø.

³¹ Winets wyeen ja nay jatyi wyatstøø, jøts ja t'ejxkajptøø jøts kudam ja' Cristo; jøts ja nay jatyi ñanky'ejxigø'øñiyi.

³² Jøts ja ñawyaajnidøø:

—Kidi janchjotkujk adøm yø tø xyikajjyym ku tuu'ajy tø xamimadyaajkyim ja Dios kyajpxy.

³³ Xjats ja niwine'enin kyata'anidøø kya'amøjkidøø, jatyi ja jadigojk tyuu'døjkidøø jøts ja wyimbejtøø jam Jerusaleñ, jamts ja tpaattøø ja ñimaktu'ukpi kudanaabyidi, tø ja jam wyinaty ñamyukyidi møøt ja myigu'uktøjkti.

³⁴ Jøts ja ñimaajyidøø:

—Janch tøts ja nwindson'ajtim yjujkyiky, yø Simón tø tyimy'ixy.

³⁵ Jøts yja' ja tñimadyakmidøø sa ja wyinaty tø yjatti kyubatti jam tuu'am, jøts sudso ja wyinaty tø t'ejxkapti ja Jesús ku ja t'adujkpajky ja tsapkaaky.

Ku ja nwindson'ajtim Jesús ñanky'ijxyi ma ja pyabøjkpitøjk jam

³⁶ Ixamni dø'øn ja wyinaty jade'en ñawya'añidi ku ja Jesús jam ñanky'ejxøø jadigojk ja' y'agujk'amdi ma ja jam wyinaty, jøts ja ojts kyajpxpoo'kxidi, yide'en ja ñimaajyidøø:

—Dios mjagyepyidi.

³⁷ Jadi'iñi ja myondi tyukti, tsø'øgi ja jadi'iñi yikmajadaktip, jade'en ja wyinmaydi pø nugo ja tijy y'ejxjooxti.

³⁸ Yide'en ja Jesús ja ñimaajyidøø:

—¿Tigøjxp ku mdsø'øgidi, ti mdsø'jkidip? ¿Tiku xkajanchjawidi?

³⁹ Ejxidik øts ngø' ndeky. Pø øtsts idø'øn kø'øm. Tondik øts, ejxtik øts; pø ka'ats ejxma'jtin ñine'kx møødi, ni pyajk ñiti ja jade'en kya'ejtxi, sam meets icyam x'ijxy tuki'iyi nmøøt'aty.

⁴⁰ Kuts ja jade'en tyukmadojidoø jøts kyø' tyeky ja tñanky'ejxøø.

⁴¹ Kumi nika'animts ja wyinaty ylxxon ttajotkukidi jøts ja tjançjawidit, jade'en ja xyonda'akti, jade'en ñigyumaap tja'wi'adø'øtsti, xjats Jesús ja ñimaajyidøø:

—¿Ka'ap ja ti jii'lxy xmøødidi?

⁴² Jøts ja tmøødyøø tukpidasi ja ajkxtsa'ayu'nk møøt ja jømbya'aku'nk,

⁴³ jøts ja t'axajiyi'ñ jøts ja ojts jamyi tji'lkxy ja' wyindumdi.

⁴⁴ Winets ja ñimaajyidøø:

—Jade'en øts idø'øn tø njaty sa meets ojts ndukmadøyin ku meets ja y'ijty njaakmøøtwidity, jøts ku øts jade'en wyinaty njatwa'añ sa øts jap nyikniçajpxy ma ja kutujk Moisés Dios tyukjajyøø, jøts nayide'en jap nøkyjøtpy midu ja yjadu'ukpi kugajpxy yjaadyandøø, jøts nayide'en sa ja nøky tñigajpxy jap Salmosjøtpy.

⁴⁵ Xjats ja Dios kyajpxy ja tyukja'gyukiyidøø,

⁴⁶ yide'en ja ñimaajyidøø:

—Jade'en jap yja'ayi jøts ku ja Cristo y'oøkt, kyidigøøk xøøwts ja yjujkyøkt ku o'jkin ja tja'uk'ext;

⁴⁷ Jøts ja yiknigajpxwa'lkxt o manaajx o magajp, ku ja ya Jerusalén cho'onda'akt jawyeen, jøts ku ja'agøjxp yiknøjmidit o pøn, wan ja chinaa'yin tyiktigatsti jøts yikpojkrpimaa'kxtit.

⁴⁸ Meets, wa'ats mdyimy'ijxpy mdyimñija'wip sa jaty tuki'iyi tyuñi yjaty.

⁴⁹ Madowdits, ndanigaxp meets ja' midi øts ja Dios Teety tø xamiwandaagi; yaayits meets m'awext ya Jerusaléngit kajpjøjty kunim ja mbaadidit ja møk'ajtın midi jap tsajpjøtpty kidakp.

Ku nwindson'ajtim Jesús chajpejty

⁵⁰ Xjats idø'on Jesús ja jam kajpjotp wyaabidsøøjmidøø, jøts ja yiknøjksidøø jam Betania, ojts kyø' ja tyanixajyidi jøts ja kyunuu'kxidøø.

⁵¹ Kuts ja jade'en kyunuu'kxidøø, jøts ja myajtstujtidøø, jøts ja chajpejty.

⁵² Jøts ku ja wyinaty tø t'ukwindsø'øgidi t'ukwinjawidi, xjats ja ojts wyimbejtıdi ñøjksnıdi jotkujk'atyim jam Jerusalén,

⁵³ xumijam'ajttip idø'on ja' jam tsaptøjkjotp jøts ja jam tmøjawidi tkunuu'kxyjawidi ja Dios. Jade'en ja y'ejxi tyiyi.

JA ØGYAJPTY JA ØMYADYĀ'ĀKY MIDI JA JUAN YJAĀY

Ja' pøn xuk'ejximp xuknija'wimp ja Dios Teety

¹ Jaayim ja wyinatyni pøn xuknija'wimp ja Dios ku tuki'iyi cho'ondakijxñim; Dios ja møøt tyimy'ity jøts nayi Dios ja kø'øm.

² Tso'onda'agyip ja møøt y'ity.

³ Jøts ja' ja Dios Teety tukyik'ø'yiyi ja tsajp jøts ja naajx jøts tuki'iyi; pø ka'axi ja naaxwii'ñit jeexyip cho'ondaajky ku jeexyip kya'ity ja'.

⁴ Ja' tyiktso'ondaajk ja tsinaa'yin jøts ja jujky'ajtin, jøts nayide'en xuknija'windi ja tyiiby ja yjanchpi, midi tyik'øyip midi tyikwinaa'nbyatp ja naaxwii'ñit jaa'y.

⁵ Møk ja tyikmajada'aky ja myøk'ajtin ku xyikudøø'kxaajka'am ma pøn wimbeets kugoots, jøts ka'ap ja miku' yja' myajada'aky.

⁶ Jats idø'øn jaa'y tu'ukmi pøn Dios ojts kyexyi, Juan ja xyøøw,

⁷ midi testigi'ajtpi meen jøts ja tniqajpxt jøts ja tniadya'akt pøn xyikujajtaajkimp xyikudøø'kxaajkimp, jøts ja øy pøn ttiyjawit tjanchjawit pøni sa jaty ja wya'añ.

⁸ Kidi ja Juanixi ja' pøn xyikujajtaajkimp xyikudøø'kxaajkimp; nugo testigi'ajtpi ja ja'ayi yikexy jøts ja' tniqajpxt.

⁹ Tyimy ja' idø'øn wyinaty memp ja'tp ya naaxwii' pøn tyik'øyip tyikpaadip, pøn tyikwinmaa'nbyatp ja naaxwii'ñit jaa'y.

¹⁰ Ixa ja wyinaty tø yja'tni ya naaxwii' jøts ja ojts nipøn kyagupikyiyi pøn jaty jaadi, øy ja wyinaty kø'øm tø yjadukyik'ø'yiyi ja naaxwii'ñit.

¹¹ Kyø'øm ja' ja yjanimimpy jøts kyø'ømigul'uktøjk paat ja ka'ap kyupøjkijyøø.

¹² Jats winaagin pøn ja kupøjkijyøø jøts pøn ja janchja'wiyøø; ja'ats ja ty'ajtin ja ojts tniø'øyp jøts Dios Teety ja y'u'nk'atidit.

¹³ Ty'ajtingøxp ja jade'en Dios y'u'nk'atyidi, ka'ap ja jade'en sa jaa'y y'u'nk' y'una'jk tpaatti.

¹⁴ Jøts ja' pøn xuknija'wa'am ja Dios, ojts ja jaa'yin y'atsøøni y'atstani, jøts ja ojts ñiyjeki xmoøt'ijtyindi xmoøtsinaa'yindi. Tø adøm myøk'ajtin ja nja'ijxyindi midi ja kyø'ømøk'ajtin'ajtpy ja Dios U'nk. Tu'ugyi Dios Teety ja yjanchjaakjagyepyi, janch pa'ayoop, jøts tum ja ty'ajtin janch'ajtin yajkpy.

¹⁵ Ja'ats ja Juan ojts tniqajpxy jøts ja yide'en wyaañ:

—Yø'øxi øts idø'øn ndijpy ku ø nwa'añ: “Ja' pøn oojknim me'emp, ja' idø'øn møj jøts ka'ap øts. Jøts kumi jaayim yø' wyinatyni, kidinim øts.”

¹⁶ Kajaa adøm Dios kyunuu'kxin xmoøy'ijtyindi ni'ijtyi. Juuni ja tkayaky.

¹⁷ Tøts ja Moisés kyutujk xuknija'wa'am sa ja Dios kyutujk; ixysats ja nwindsin'ajtim Jesucristo pøn xuknija'wa'am ja Dios pya'ayo'owin jøts ja tyis'ajtin yjanch'ajtin.

¹⁸ Nijuuni pøn tka'ijxñim ja Dios; yø'øts midi jam møøt y'ity, yø Dios U'nk, yø xuknija'wa'am sa ja Dios Teety.

Ku ja Juan Bautista tniqajpxy ku ja nwindson'ajtim Jesucristo myeenwa'qñ

¹⁹ Winets ja israelit jaa'dyi midi jam kugajp'ajttip jam Jerusalén, ojts tkaxti ja teetyøjk møøt ja levijit jaa'dyi midi t'ejx'ejtipp ja tsaptøjk, jøts ja t'atstiibyøktit ja Juan pøn idø'øn ja';

²⁰ jøts ja ojts wa'ats tniqajpxy, yide'en ja wyaañ:

—Ka øtsip ja' midi yiktejp Cristo.

²¹ Xjats ja tjaaktyimdyiibyøjktøø:

—¿Pønts mets idø'øni? ¿Mets idø'øn Dios kyugajpxy midi yiktejp Elías?

Jøts ja Juan wyaañ:

—Ka'ap ja y'øtsi.

Jøts ja tjaaktyimdyiibyøjk'adø'øtsti:

—Jøts, ¿metsimts idø'øn ja' midi dø'øn menwamp midi ja Dios kyugajpxy'ajtpy?

Jøts ja y'adsøøy:

—Ka'.

²² Winets ja yikniimaay:

—¿Pønimts mets? Kuwanixi øøts ja nnijawit jøts øøts ja ndukmado'ot pøn øø tø xkexy. ¿Sa me m'ukwā'añ ku mga'uknañigajpxyi?

²³ Jøts ja Juan ja t'adsøøy:

—Øts ja' midi yikmadoop y'ayuujk jam abak etjotp, ma niti kya'ity: “Yiktøwdi yiktuda'akti ja mwinnmaa'ñ jøts xkupøktit ja nwindson'ajtim” —nayide'en sam ja Isaias wyaañ, ja Dios kyugajpxy.

²⁴ Ja fariseotøjk ja wyinaty tø kyexyidi midi idø'øn ja Juan jam jade'en møøt ñagyajpxyi.

25 Xjats idø'øn ja Juan yiktiibyijky jøts ja yiknimaay:

—Pøni ka'adam me mCristo, ni mga'Elías, jøts ni Dios me mgagugajpxy'aty, ¿tits ku myiknøbety?

26 Jøts ja Juan tnimaay:

—Nøø øts iiy nduktanøbejtpy; jats ya tu'uk midu ka' x'ejxkaptinim;

27 oojknim ja mye'ent, ja' tu'uk møj, nugo øts jawyeen nyiktuu'awa'ach. Nijuuni øts ja møøt nganamymbaat'atiyit.

28 Jam idø'øn ja jade'en yjajty ma ja et jam txøøwi Betábara, midu tãmp xøbidsimy jam nøø agø'øm midu txøøw'ajtp Jordán, ma ja Juan jam ojts yiknøbety.

Ja Jesucristo yiktamiyoxp ja Dios Teety adømgøjxp

29 Xjats ku kyimjabom'ajty winets ja Juan ojts t'ixy ja nwindsøn'ajtim Jesús ku ja jam wyinaty ñimiñiyi, jøts ja Juan wyaañ:

—Ejxti, yø' idø'øn jade'en jatwãmp kubatwãmp sam ja borreek u'nk yikyøxyin adøm nbojkipi køjxp, jøts yø' naxwii'ñit ja'ly tyikpøkwyat'p.

30 Yø' øts idø'øn ndijpy ku ø nwa'añ: “Ja tu'uk ja'ly myiñ, ja' idø'øn møj jøts kidi øts, jøts jaayim ja'ani.”

31 Nika'ap øts yø y'ity nnijawi pøni pøn yø'. Tøts ø nmiñ jøts øts Israelit ja'ly nøø nduktanøbatt jøts nduknijawidit pøn ja'.

32 Nayide'en ja Juan wyaañ:

—Tø øts ja Espíritu Santo n'ixy jøts ku kyida'aky jam tsajpwemp sam tsapakin, jøts ja tø kyøxke'eky yø' kyubajkp.

33 Ni nganijawi øts yø' pøni pøn yø'; jøts øts idø'øn ja Dios Teety ojts xnøjmi midu øts nøø xukyiktump ku nyiknøbety, yide'en øts ja xnimaay: “Ku x'ext ja Espíritu Santo kyida'akt jøts y'ixa'akt jam tu'uk ja'ly kyubajkp, ja'ats idø'øn ja wyinaty midu ja Espíritu Santo xmøøyimpy ku ja yiknøbatt.”

34 Tøts ø n'ixy, jøts øts testigi jøts ku yø' Dios U'ngi.

Ja ja'ly pøn ojts jawyeen tpaøkti ja Jesús yja'

35 Xjats ku kyimjabom'ajty, ixam ja Juan wyinaty køjmyi møøt namajtsk pyabøjkpi.

36 Jøts ku ja Juan ojts t'ixy jøts ku jam wyinaty ñaxy ja nwindsøn'ajtim Jesús, winets ja wyaañ:

—Ejxti, yø' idø'øn jade'en jatwãmp kubatwãmp sa borreek u'nk yikyøxyin adøm nbojkipi køjxp.

37 Ku ja' tmadoodøø midu ja Juan pyabøjkpi'ajtpy, midu jam wyinaty namajtski ku ja Juan jade'en wyaañ, xjats ja ojts tpanøjkxti ja nwindsøn'ajtim Jesús.

38 Winets ja nwindsøn'ajtim Jesús y'ejximbijty, jøts ojts t'ixy jøts ku jam yikpayø'ø, jøts ja ojts tnøjmi:

—¿Ti m'ixaadyip?

Jøts ja ojts t'adsowdi:

—Windsøn, ¿ma me ndsøøni?

39 Jøts ja nwindsøn'ajtim Jesús y'adsojimbijty:

—Men x'ejxti.

Xjats ja ojts ñøjkxti jøts ja ojts t'ejxti ma chøøni, jøts ja jam ojts tmøøtkudsuu'idi. Ja dø'øn ja xøøw wyinaty jawaani kyagidåkni.

40 Ja Andrés idø'øn ja', ja Simón Pedro y'uch, midu idø'øn ja jade'en tmadoodip namajtsk ku ja Juan jade'en wya'añ. Jøts nay ja' idø'øn jade'en tpanøjkxtip ja nwindsøn'ajtim Jesús.

41 Jøts ja Andrés tyimñayjatyi ja ojts t'ats'ixa'ay ja y'ajch Simón, jøts ja ojts t'atsnøjmi:

—Tø øøts ja Mesías nbaaty midu Dios kyejxpy, midu Cristo yiktejp.

42 Xjats ja Andrés ojts twaanijky ja Simón ma ja nwindsøn'ajtim Jesús jam wyinaty, jøts ku ja ojts y'ijxyi jøts ja ojts ñi'mxyi:

—Mets Simón, ja wa'axi me m'u'nk'ajtip ja Jonás. Cefas inet ixyam mxøøw'atp.

Jade'en ja ñi'mxyi ja nwindsøn'ajtim. Cefas jade'en tyijpy Pedro sam ja t'ayuujk'atti.

Ku ja Jesús twaadsøø ja Felipe jøts ja Natanael

43 Jøts ku kyimjabom'ajty, jam ja nwindsøn'ajtim Jesús wyinaty ñøjkxwa'añ Galilea etjotp, ku ja tminabyaajti ja Felipe jøts ja tnimaay:

—Møødik øts.

44 Jam Betsaida ja Felipe kyugajp'aty nay jam ma ja Andrés kyugajpi møøt ja Pedro.

45 Winets ja Felipe ojts ñijky jøts ja ojts t'ats'ixa'ay ja Natanael, jøts ja ojts t'atsnøjmi:

—Tø øøts ja ja'ly n'ixy midu ja Moisés ñigajpxy jap nøkyjøtpy ku ja kutujk ja ojts tja'ay, jøts nayide'en midu ñigajpxtip ja Dios kyugajpxtyøkti, ku ja ojts tjaadyandi. Ja Jesús ja' midu ja José y'u'nk'ajtpy, midu jam kugajp'ajtp Nazaret.

46 Xjats ja Natanael wyaañ:

—¿Wan ndejin y'oybi jam y'ukpidsømni Nazaret?

Jøts ja Felipe y'adsøøy:

—Men xtyimy'ixy.

47 Kuts ja nwindson'ajtim Jesús ojts t'ixy jøts ku ja Natanael jam ñimiñiyi, winets ja wyaañ:

—Ixya net myiñ tu'uk nmigu'uk israelit jaa'y midì øyjaa'y'ajtp, midì ka' tyaa'y.

48 Winets ja Natanael ja ojts yiktiiyiyi:

—¿Sudso'ampy me x'ijxy'aty?

Jøts nwindson'ajtim Jesús ja ojts ñii'mxyi:

—Tøyimxi me wyinaty n'ejxni ku mets yø Felipe ka'anim wyinaty m'atswayinim, ku mets ixajp iigi patki'py.

49 Winets ja Natanael wyaañ:

—Windsøn, mets idø'on Dios U'nk, jøts mets idø'on mniwindsøn'ajtpy israelit jaa'y.

50 Jøts nwindson'ajtim Jesús ja ojts yide'en y'adsøyi:

—¿Jaty me xtyimyjanchjawi ja'agøjxp ku me tø nnøjmi jøts ku me tø n'ixy jap iigi patki'py? M'ejxnim mets ja myøjpi y'oybi midì ø ndu'ump midì ka'ap yjade'eni sam ya'adin ku me tø n'ixy.

51 Jøts ja nwindson'ajtim Jesús yjaaktyimwyaañ:

—Meets yam ndyimñimaapy, jøts ku x'ejxtit ja tsajp y'awa'ats, jøts ku Dios y'ankilis pyattit wyinaktit jøts øts ja xnigida'aktit, ja' kuxi øts ja naxwii'ñit jaa'y ngudani Dios Teety wyingujkp.

2

Naxyøduujnidip ja jaa'y jam Galileit etjotp

1 Kyimdigøøk xøøw wyinaty tø y'ity ku jaa'y y'amajtskidi ma ja kajp txøøwi Caná, jam Galileit etjotp. Exam idø'on ja nwindson'ajtim Jesús wyinaty tyaaak.

2 Jøts nayide'en ja nwindson'ajtim Jesús wyinaty tø yikwaamidì migaabyi mi'ukpi møøt ja pyabøjkpitøjk jøts ja nay jam ñøjkxtit.

3 Xjats ja vino tyimgyijxy, winets ja nwindson'ajtim Jesús ja tyaaak ñimaajyøø:

—Tø tyimgyugøxidi, ka'ap vino ukteeni.

4 Jøts ja nwindson'ajtim Jesús y'adsøøy:

—¿Ti øtsimts taak yø xpøtp? ¿Tiku øts yø xukmadøøy? Pø ka'animxi øts nja' xpaaty midì ø ndu'ump.

5 Jøts ja tyaaak wyaañ, yide'en ja tñimaay ja jaa'y pøn jaty jam wyinaty windsø'jkidip:

—Mdu'undip idø'on jade'en tuki'iyi pøni sa wya'añ.

6 Jamts wyinaty tudujk ja tsaadu'jts midì ja israelit jaa'y yiktundip ku Dios ja twindsø'øgidi jøts ja pyøkwya'atsttit. Makta'pxy uk magø'pxy enteerin ja y'uch tu'uk tu'uk, jade'en nøø ja yikta'adami.

7 Xjats ja nwindson'ajtim Jesús tñimaay ja jaa'y pøn jaty jam wyinaty windsø'jkidip:

—Yik'utskøxti yø tu'jts. Adamidi nøø.

Jøts ja ojts yikxon tyimyk'utsti,

8 winets nwindson'ajtim Jesús tñimaay ja jaa'dyi:

—Aja'aptu'uttits inet waani, jøts xaninøjkxtit midì yø xøøw tø tñiwaamuki.

Jøts ja ojts jade'en ttundi.

9 Ojts ja tja'gyapy midì ja xøøw tñiwaamujkip jøts ja tsujk nøø tø ja vino yjajtni, nika'ap ja tñijawi pø ma ja chøøñ. ja'ayi ja nugo tñija'widip pøn windsø'jkidip, pø ja'axi ja nøø wyinaty tø tjaapti. Xjats ja twaadsøøy ja jemyaa'y

10 jøts ja tñimaay:

—Tum jawyeen øy pøn t'uuky yø vino y'oybi, jøts ku ja mi'ukpi ja kom tø t'uknidi winets ja yu'nkpi yikyakñim. Jøts mets, tø mets ja møk vino ne'egi xjaakyik'awixy, jøts mets yø yamnim ne'egi xyaky oojknim.

11 Yø'øbi milagri'ajtin idø'on ja nwindson'ajtim Jesús tyimyjawyeen nanxy'ejxøø jam Caná, jam Galileit etjotp, midì yiknigaxø'jk ja myøk'ajtin, winets ja pyabøjkpitøjk ja ojts yjaakjanchjawi.

12 Xjats ku ja jade'en y'ukjajty, winets ja ojts ñijkxy ma ja kajp jam txøøwi Capernaum, møøt ja tyaaak, møøt ja myigu'uktøjk, jøts møøt ja pyabøjkpitøjk. Jøts ja jam tyaa'niðøø ñigyawinaak xøøw.

Ku ja Jesús tpawojpkijxy ja too'kpitøjki jam tsaptojk agø'øm

13 Ja paški xøøwts wyinaty tyimbyatnip midì ja israelit jaa'y tyundip, winets ja nwindson'ajtim Jesús ojts ñijkxy jam Jerusalén.

¹⁴ Jøts ja jam tsaptøjk'agi'py tkubajtiyi'i'n ja jaa'dyi pøn too'ktip ja tsakaa, pøn too'ktip ja borreek, pøn too'ktip ja pak, jøts nayide'en pøn ja myigu'uk myeeñ tyikwa'kxidip, ja' jam wyinaty tsinaadyip mayim ja jam tunk'atti.

¹⁵ Ku ja nwindson'ajtim Jesús ja ojts jade'en t'ixy, xjats ja tyik'øiyi'i'n tu'uk pawojp, jøts ja jam tpawojpkijxy niduki'iyi ja jaa'y jam tsaptøjk agø'om, møøt ja byorreek møøt ja chakaa. Jøts ja meen yikwa'kxpidi ojts ja myeeñ ja yik'ixko'odi, jøts ja myesi ja ojts yiktejimbetti.

¹⁶ Jøts ja tnimaay ja jaa'y midi paktoo'ktip:

—Yikjiwa'akti yø ya! iKidi nDeety tyøjk maadyøjk xyikwa'andi!

¹⁷ Winets ja pyabøjkpitøjk nay jatyi tja'myajtsidøø ja nøky ma ja David yide'en wyaañ: “Møk øts nba'ayø y ja mdøjk.”

¹⁸ Xjats ja israelit jaa'y ttiibyøjktøø ja nwindson'ajtim, jøts ja tnimaadyøø:

—¿Ti tiy'ajtin øøts xuk'ejxp jøts ku xjagyepy ja kutujk ku jade'en m'adi'ich?

¹⁹ Jøts nwindson'ajtim Jesús ja ojts t'adsøy:

—Yikidawdi yø tsaptøjk, kidigøøk xøøw øts yø jadigojk nyikwa'kukit.

²⁰ Winets ja israelit jaa'y wyandøø, jøts ja ojts ñii'mxyiyi:

—Wixijkyudujk jumøjt yø tø yiktunk'aty yø tsaptøjk jøts yø tø y'øyi; ¿jøts me mwa'añ jøts ku mets yø kidigøøk xøøw xyikwa'k'øyt jadigojk?

²¹ Ku ja Jesús ja tsaptøjk tkajpxy, pø kyø'ømne'kx ja jade'en tijjpy.

²² Pø patyxi ku ja nwindson'ajtim Jesús ojts yjujkyjky jadigojk jap oo'kpi jutjøtpy, yø'øts ja pyabøjkpitøjk yja'myatstøø ku ja wyinaty jade'en tø wya'añ. Xjats ja tjantymy-janchja'widøø ja Dios kyajpxy, jøts nayide'en tmibøjkidøø ja nwindson'ajtim y'ayuujk sa jaty ja wyinaty jade'en tø wya'añ.

Wa'ats ja Jesús tnijawi sa jaty jadu'uk jadu'uk wyinmay

²³ Kuts ja nwindson'ajtim Jesús jam wyinaty tyiknaxy ja paski xøøw jam Jerusalén, jøts may ja jaa'y ja jam yjanchja'wiyøø tyiyja'wiyøø ku ja t'ejxti ja myilagri'ajtin midi ja tyumpy.

²⁴ Jøts ja nwindson'ajtim Jesús ka'ap ja nugo tyimñagyakyi, kumi wa'ats ja t'ejxkapy ja niduki'iyi sa pøjabøn.

²⁵ Ka'ap ja chøkyiyi jøts ja pøn tyukmadowit sa jaty jaa'y jadu'uk jadu'uk yjaa'y'aty. Wa'ats ja kø'øm tyimñijawi sa pøngapøn y'am yjotp wyinmay.

3

Ja Jesús jøts ja Nicodemo

¹ Jamts idø'on tu'uk fariseit jaa'y pøn txøow'ajtp Nicodemo, jøts ja' idø'on ja israelit jaa'y wyindsøn'ajtip.

² Ja'ats ojts koots y'atstøk'ayø'ø y ma ja nwindson'ajtim Jesús jam wyinaty, jøts ja ojts t'atsnøjmi:

—Windsøn, nnija'wip øøts jøts ku Dios tø mguexyi jøts øøts xyik'ixpøkt. Ka'ap me jeexyip jade'en xyiktuñ ja Dios myøk'ajtin mlagri'ajtingøjxp sam ixyam xyiktuñin, ku jeexyip møøt mga'ity ja Dios.

³ Xjats ja nwindson'ajtim Jesús ja tnimaay:

—Janch øts idø'on nwa'añ, jøts ku ka' pøn tpaatt ja Dios kyutujk midi yjaa'y ja tyanitanaapy pøni ka'ap pøn nayide'en kyaxi'iky jadigojk sam tø kye'exyin.

⁴ Winets ja Nicodemo tyiktiy jøts ja tnimaay ja nwindson'ajtim Jesús:

—¿Sudsots ja møj jaa'y nayide'en jadigojk kyaxø'økt sam ja tø kye'exyin? ¿Pø sudso'ampy jadigojk tyøkit tyaak yjotp jøts kya'axkojmit?

⁵ Jøts ja nwindson'ajtim Jesús ja yide'en t'adsøy:

—Janch øts idø'on nwa'añ, pøni ka'ap pøn jade'en kye'exy ejxim ja jaa'y kye'exyin, jøts nika'ats ja Dios myøk'ajtin myø'øyi, ka'ats pøn mibaat tyøkit ma Dios ja kyutujk ttanitani ja yjaa'y.

⁶ Ku ndeety ndaak xyikaxø'jkyim, nugo yø' xmø'øyim ja jaa'y'ajtin; jøts ku ja Dios x'u'nk'ajtyim, ja'ats ja myøk'ajtin ja y'Espiritu Santo xmø'øyim.

⁷ Kidi nigyumaap xjawi jøts ku jade'en nnøjmi: “Niduki'iyi jaa'y pyaat'atyidi ja chinaa'yin tyiktigatstit, ka'axigajstipts ja ñamyayi jade'en.”

⁸ Pojp øy madsoo pyøjy; wa'ats nmadøø'yim sa wyina'añ ja poj, ka'ats nnija'wa'an pøni ma chøøn jøts pøni ma ñijky. Nayide'ents idø'on ñamyayi ja'adi pøn ja Dios myøk'ajtin yikaxø'jkiyidip.

⁹ Winets ja Nicodemo tjaaktiibyiky:

—¿Sudso yø ndejin jade'en?

¹⁰ Xjats ja y'adsoji ja nwindson'ajtim Jesús:

—¿Pø møj maestrims mets ya israelit kajpkijxy, jøts mets yø yjade'embi xkanimadøy?

¹¹ Janch øts idø'on nwa'añ, jøts ku øøts ja' nnigajpxy mididi øø nniija'wip, jøts nay ja' øøts nidestigi'ajtpy mididi øø tø n'ixy; jøts meests ja xkajanchjawi sa øø njawa'añ.

¹² Nika' xjanchjawidi ku øts ja'abaat ndyimyjanigajpxy ti jaty ya naxwiin, çti ja'ats mee mjaakjanchjawip ja tsajpjøtpyit yja' ku meests njadukmado'ot?

¹³ 'Ka'axi jap pøn y'ats'øch jap tsajpjøtpy, øts idø'on jap tsoo'mp kumi øts jap'ajtp jap tsajpjøtpy; jøts øts ja naxwiin'ñit jaa'y ngudanaapy.

¹⁴ Jøts nayide'en ø nyiktu'unt sam ja Moisés ojts ttuñin ja tsaa'ñi jam abak etjotp ku ja ojts køjxp tiyjii'iky,

¹⁵ jøts ja kyawindigø'odyit pøni pøn ø xjanchja'widip, xemikøjxp ja tpaattit ja kunuu'kxy jujky'ajtin ja kunuu'kxy chinaa'yin.

Pyayøøpy ja Dios ja naxwiin'ñit jaa'y

¹⁶ Janch møk ja Dios tsojkin tjagyepy, jøts tpikta'aky ja pyayø'owin ya naxwiin ku ja y'U'nk tkexy mididi tu'lumchi, jøts ja kyawindigø'odyit pøni pøn ja tjanchja'widip, jøts ja xemikøjxp ja kunuu'kxy chinaa'yin ja kunuu'kxy jujky'ajtin tpaattit.

¹⁷ Kidi ja'ajip ja Dios y'U'nk tyaniguejpxy ya naxwiin jøts ayo'on ja ttukpaatt ja naxwiin'ñit jaa'y, jade'en'ampy ja tkexy jøts ja tyiknitso'ok'att ja naxwiin'ñit jaa'y.

¹⁸ Pøni pøn tjanchja'wip ja Dios U'nk, ka'ap ayo'on ja yiktaguwan; pønts tkajanchja'wip, ja y'ayo'on kutujkp xemikøjxp ja'agøjxp ku tkajanchja'wiyidi ja Dios y'U'nk mididi tu'ugyi.

¹⁹ Pøni pøn tyimyjade'en'ajttip, tø y'ayo'on ja kyutujknidi, ku ja myiin ya naxwiin mididi ja jaa'y øy tsuj tyikwinmaa'nbyatp, ka'ap ja yikupijky. Ne'egi ja kube'ets'ajtin kugoots'ajtin ja ne'egi chojktip, ja'agøjxp ku ja tyumjaka'øybi ttunwa'andi.

²⁰ Niduki'iyi pøn ja tyumjaka'øybi ttundip, kawin'tijyxim ja tjawidi ja yik'øwyinmaa'nbyatpi. Niwine'enin ja tkamijotwa'andi ja'agøjxp jøts kyanigaxø'øktit ja kya'ødyu'unindi.

²¹ Pønts ttsinaadyip ja tyiiby; yjanchpi, ja'ats tmijotwandip mididi øy tsuj tyikwinmaa'nbyatp ja jaa'y, jøts ja tyiknigaxø'øktit ja Dios yja' ti jaty ja tyundip.

Ku ja Juan Bautista jadigøjk tkajpxpaaty ja Jesús yja'

²² Kuts idø'on ja jade'en y'ukajaty, xjats ja nwindson'ajtim Jesús ojts tmøødi ja pyabøjkpitøjk jam Judeit naxjotp. Niyyeky ja jam tyaa'nidøø jøts ja jam møøt yiknøbajttøø.

²³ Jøts ja Juan nay ixam ja wyinaty yiknøbatmi ixam Enón mididi ja Salimit kajp myiwingon'ajtpy, ja'agøjxp ja jam yiknøbety ku ja nøø jam janch kom; jamts ja jaa'y myendi jøts ja jam y'atsnøbatti.

²⁴ Jawyeenip idø'on ja jade'en yjaty, ka'anim ja Juan wyinaty yikpikta'aky puxøjkjøtpy.

²⁵ Jøts nay winet ja Juan pyabøjkpi winaagin tnadyamigajpxyidi møøt ja myigu'uk israelit jaa'dyi, ja' ja tnadyamigajpxiyidip sa ja pøky wya'ach.

²⁶ Nay winets ja Juan y'atsyiknimaay:

—Windsøn, ixam ja ixyam yiknøbety pøn mets jam wyinaty møøt xøbidsimy ma ja Jordángit nøø, ja' pøn meests ojts xnigajpxy jøts niduki'iyi jaa'y ja yjanchpabikyiyi.

²⁷ Xjats ja Juan ja tnimaay:

—Ka' pøn ti tniyjaty pøni ka'ap Dios myø'øyi.

²⁸ Meestsxi ojts wa'ats kø'øm xtyimiyadøy ku ø nwa'añ jøts ku øts ka' nCristo, jøts ku ø nja'aji pøn jawyeen yikajxp nugo.

²⁹ Janch tsuj øts, janch xondakp øts, jade'en ejxim ja tø'øxmyiyø'øbyi tyik'amajtski myigu'uk; jade'en øts nnayjawiyi kuts nmadøy ja Jesús y'ayuujk.

³⁰ Yø' møjtokipnim jøts øts kuwani n'amutskit, kuwani n'ixnøjkxt.

Ja' pøn tsoo'mp jap tsajpjøtpy

³¹ Ja' pøn tsoo'mp jap tsajpjøtpy, tum ja' tuki'iyi tñitanaapy. Jøts pøn ya naxwiin'ajtp, ja naxwiin'ñits ja ja'ajtip, jøts tum ja'ayi ja ñigajpxy ti jaty ja ejtp. Pønts tsoo'mp jap tsajpjøtpy, ja' tuki'iyi tñitanaagyøjxp,

³² jøts tum ja' ja ñigajpxy mididi ja tø t'ixy, mididi ja tø tmadøy; jøts ka'ap ja pøn tjanchjawidi mididi ja ñigajpxy.

³³ Kuts øy pøn tjanchjawidi, ja'ats wa'ats tyikniga'axp jøts ku Dios tkajpxy ja tyiiby yjanchpi;

³⁴ Dios kyajpxy Dios y'ayuujk ja kyajpxip pøn ja Dios kajxp, kumi amuum y'Espiritu Santo ja myø'øyi.

³⁵ Chøjkpy ja Dios Teety ja y'U'nk, jøts tuki'iyi tø ttagidøjkigyixy ti jaty ejtp ka'ejtp.

³⁶ Pøni pøn ja Dios U'nk tjanchja'wip, xemikøjxp ja nøjx tpaaty ja kunuu'kxy jujky'ajtin ja kunuu'kxy tsinaa'yin; pønts tkajanchja'wip, kawindem xøøw ja nøjx tpaaty ja yjade'embi jujky'ajtin, ja Dios myø'ø'ayo'on ja nøjx kyupøjkp.

4

Ja Jesús jøts ja Samariit tø'oxy

¹ Xjats ja fariseotøjk tnija'widøø jøts ku ja nwindson'ajtim Jesús may pyabøjkpitøjkni, jøts may jawaani ja jaa'y tyiknøbety jøts nigidi ja Juan jade'en;

² øy idø'øn nwindson'ajtim Jesús ja kø'øm tkidyimyiknøbety, ja pyabøjkpitøjks ja tyiknøbjattip.

³ Xjats ku ja tniadøøy jøts ku ja fariseotøjk tø ñijawiyi, winets ja chøø'ñ jam Judeit najjotp, jøts ja ojts ñijkxy jam jadigojk Galileit etjotp.

⁴ Ja Samariit et ja tyanaxp ku dø'øn ja jam ñijkxy.

⁵ Xjats ja yja'jty ma ja kajp jam tu'uk Samariit etjotp midit tæøøw'ajtp Sicar, jam wingon ma ja Jacob ja y'u'nk José wyinaty tø tmø'øy ja ñaa'jx.

⁶ Jamts idø'øn tu'uk ja nømu'ut midit yiktejp Jacob nømu'ut. Jøts kumi jøtkøjxp ja nwindson'ajtim Jesús wyinaty ku ja yø'øy, xjats ja y'ixaajky jam nømu'ut agø'øm. Ja dø'øn wyinaty ja xøøw kuiky.

⁷⁻⁸ Winets yja'jty tu'uk ja tø'oxyøjk jam nømu'ut agø'øm pøn ku'etip kugajpip jam Samaria, jøts ja nøø ja tjuutwə'añ, xjats nwindson'ajtim Jesús ja ojts ñii'mxyi:

—Møøky øts nøø.

Jøts ja pyabøjkpitøjk, jam ja wyinaty tø ñjøkxti jam kajpjotp, jøts ja t'atsju'udyit ja kaaky ja jii'kxy.

⁹ Xjats idø'øn ja samariit tø'oxy tniiaay ja nwindson'ajtim Jesús:

—¿Sudso mets nøø x'amidøy jøts m'israelitjaa'yits mets jøts øts samariit jaa'y?

(Kumi ka'ap ja israelit jaa'y tminamyayidi ja samariit jaa'y.)

¹⁰ Winets ja yide'en y'adsojøø ja nwindson'ajtim:

—Kuk xjanchnijawit midit ja Dios yajkpy, uk xnijawit pøn nøø ixa m'amidojyiyip, ¿ja ti jajik me xka'amidøy jøts me nmo'ot ja øybi nøø ja wa'atspi?

¹¹ Jøts ja tø'oxyøjk ja ñiiaajyøø:

—Ni mdanøja'ap paat mets kya'ity, jøts køjnk yø nømu'ut. ¿Mats idø'øn xpøkwa'añ ja nøø midit mdijpy øy wa'ats?

¹² Ja ndeety'ap Jacob øøts yø nømu'ut xukmidaan ma jaa ja y'ijty kø'øm y'uuky, jøts y'u'nk y'una'jk, jøts yjiyujk chakaq nayide'en. ¿Ti mjaaktyimbyønts me ndejin?

¹³ Jøts ja nwindson'ajtim Jesús ja t'adsøøy:

—Pøn jaty ya'at nøø t'uktip, tøødsidip ja jadigojk;

¹⁴ pønts t'ukp ja øybi ja wa'ats nøø midit ø nyajkpy, ka'ap tøødsi nijuuni y'ukpaajtniyit. Kumi jade'en ja nøø pyidsø'ømt jam y'anmija'wingøjxp midit øts ja nmøøpy, sam kom nøø pyidsimiyin. Ja'ats ja xemikøjxp tukpaadiyip ja jujky'ajtin jøts ja øy'ajtin.

¹⁵ Winets ja tø'oxyøjk ja ñiiaajyøø:

—Yø'øbi nøø øts teety xmo'op, jøts ø nga'uktøøjtsiñit nijuuni, jøts ø nga'ukmenit nøgombi ya nømu'utjøøty.

¹⁶ Jøts ja nwindson'ajtim Jesús tniiaay:

—Nøjx mniyaa'y x'atsway jøts ya mme'ent.

¹⁷ Xjats ja tø'oxyøjk y'adsojøø:

—Ka' øts nniyaa'y.

Jøts ja nwindson'ajtim Jesús tniiaay:

—Janch tiigayjpxy idø'øn mwə'añ jøts ku ka'ap mniyaa'y pøn;

¹⁸ kumi nimagoxk tø xyiknaxy ja yaa'dyøjk, jøts pøn ixyam møøt, ka'ats ja xniyaa'yi. Jøts ku jade'en tø mwə'añ, janch tiigayjpxy idø'øn yø'.

¹⁹ Kuts ja tø'oxyøjk jade'en tmadøøy, jøts ja wyaañ:

—Mets teety, wa' mets idø'øn yjawi Dios mets idø'øn kyugajpxy.

²⁰ Wine'enin øø nsamariitjaa'y'aty, ya øøts ja n'aptøjk twindso'øgidi ja Dios ixya kojpkijxy, meetsts wine'enin mee m'israelitjaa'y'aty, jade'en mee mwə'añ jøts øøts ja jam nwindso'øgit Jerusalén.

²¹ Jøts t'adsøøy ja nwindson'ajtim Jesús, jøts ja tø'oxyøjk yiknøjmi:

—Øy xkamibøkt, wingomp idø'øn jøts meets xwindso'øgidit øy madsoo ja Dios. Ka' pyaat'aty jøts kuwani mdyimye'endit ya kojpkijxy uk mnøjxktit jam Jerusalén.

²² Meets samariit jaa'y, ka' mee xnijawi pøni ti mee mwindsø'jkp; øøts, nniija'wipts øøts midit øø nwindso'jkp; jabi israelit jaa'yts ñikøjxp myiñ ja nitso'ok'ajtin.

²³ Ixyants ja xøøw ja jumøjt tø yja'aty, jøts ku nayi Dios myø'ajtingøjxp nay ja' tyiy'ajtingøjxp yikwindso'øgit ja Dios Teety, pøni pøn tjantymwyindsø'jkidip ja Dios. Jade'en ja tsoøky jøts ja jade'en ttu'undit pøni pøn ja windsø'jkiiyip.

²⁴ Tu'ugyi tum jade'en Dios jøts myø'ajtin; jøts pøn ja windsø'jkiiyip, nay ja møk'ajtints ja yiktu'undip møøt ja tyiiby yjançpi.

- 25 Xjats ja tɔ'ɔxyɔjk wyaʔaɲ, jɔts yikniɱaay ja nwindson'ajtim:
 —Nniɱa'wip ɔts jɔts ku mye'ent ja Mesias —midi mēmp yiknitsokpi—;
 jɔts ku ja mye'ent, ja'ats tuki'iɱi xukmadoogɔjxim.
- 26 Jɔts nwindson'ajtim Jesús ja tniɱaay:
 —ɔts ja', ɔtsxi dɔ'ɔn, ejx idɔ'ɔn ixɱa nmigajpxy.
- 27 Winets ja nwindson'ajtim pyabɔjkpitɔjk yjə'ttɔɔ, jɔts ja ɱigyumaap tja'widi ku tɔ'ɔxyɔjk ja mɔɔt myadya'aky. Ka'ats pɔn ɱay'a'ejxiɱi jɔts ja tyiktɔ't tɔ chɔjkpy uk ti ja tɔ'ɔxyɔjk mɔɔt ɱadyamigajpxy.
- 28 Xjats ja tɔ'ɔxyɔjk jamyi tniɱejky ja chiɱi, jɔts ja ojts ɱijxɱy jam kajpjotp. Jamts ja jaa'y ja ojts t'atsnɔjmi:
 29 —Mendi jɔts jaa'y tu'uk x'ats'ejxtit pɔn ɔ tɔ xukmadɔy tuki'iɱi sɔ jaty ɔ tɔ n'adi'ich. ɔKidi ja Cristip idɔ'ɔn ja ndejin, midi ja Dios tkajxp?
- 30 Winets ja jaa'y choo'ndɔɔ jam kajpjotp, jɔts ja ojts tniɱɔjkxti ja nwindson'ajtim Jesús ma ja jam wyinaty.
- 31 Jɔts idɔ'ɔn pyabɔjkpitɔjk ja ixam ɱii'mxyiɱi mɔk'ampy:
 —Windsɔn, ɔy iɱy wine'enin mɱa'aty.
- 32 Yide'ents ja ojts ɱii'mxyidi:
 —Ja ɔts ngaaky ɱii'kxy midi ɔts inet nga'apy njɔɔ'kxp, ka' meets ja xniɱawi.
- 33 Xjats ja pabɔjkpitɔjk agɔ'omyi ɱayiktɔɔbinaxwə'jkidɔɔ, jɔts ja ɱawyaajnidɔɔ:
 —ɔWan ndejin pɔngapɔn ja kyaaky tɔ tyanimiɱi?
- 34 Yide'ents ja nwindson'ajtim Jesús ja tniɱaay:
 —Ja' ɔts idɔ'ɔn ngaaky'ajtpy ɱii'kxy'ajtpy ku ɔts ja nbaduujnit ja y'ana'amin pɔn tɔ xkexy jɔts ɔts tyunk ja nyik'abajtiyit.
- 35 Pɔ yide'enxi mee mwa'ʔaɲ: “Ja maktaxk po' kya'ity jɔts pikta'aky pyidɔ'ɔkt'”; ɔts wamp jɔts mee nnɔjmi: Ejxti yɔ kam midi ni'ipy, tɔ pikta'aky myɔjagɔjxni jɔts pyidɔ'ɔknit.
- 36 Yikmijuupy ja' pɔn ttunk'ajtp ja pikta'aky jɔts ja tyikpidi'iky; jɔts ja pikta'aky midi yikpidi'kpy, ja' ja wya'ʔaɲ jɔts ja xemikɔjxp tyu'unt. Jɔts ja jade'en ni'amuki ttajotkujk'attit pɔn neptip jɔts pɔn tyikpidɔ'ktip ja pikta'aky.
- 37 Pɔ janch tamxi dɔ'ɔn ja' ku ayuujk wya'ʔaɲ: “Wenkpi ja pikta'aky tnepp, jɔts wenkpi ja tyikpidɔ'ɔkp.”
- 38 Jamts meeds idɔ'ɔn nguexy jɔts ja pikta'aky xyikpidɔ'ɔktit mɱa ka'ap tɔ mne'epti; jabi wenkpi tɔ yjatundi yjapɔkti jɔts meeds tyunk ja xaxojniyi.
- 39 Mayts idɔ'ɔn ja jamit jaa'y tjanchjə'widɔɔ ja nwindson'ajtim Jesús pɔn idɔ'ɔn jam kugajp'ajttip ja'abi kajp midi jam Samaria, ku ja tɔ'ɔxyɔjk ja wyinaty tɔ tyimɱii'mxyidi tiy janch, ku ja wyinaty yide'en tɔ wya'ʔaɲ: “Tɔ ɔts ja tuki'iɱi xukmadooguixy sɔ jaty ɔ tɔ n'adi'ich, sɔ jaty njaa'y'aty.”
- 40 Xjats ku dɔ'ɔn ja samariit jaa'y jam myendɔɔ, jɔts ja mɔk tniɱaadyɔɔ ja nwindson'ajtim Jesús jɔts ja jam myɔtəa'niyidit. Winets ja nwindson'ajtim Jesús jam tyaa'niyi'ɱi ɱajtsk xɔɔw.
- 41 Jɔts ja jaa'y may tjaaktyimjanchjə'widɔɔ ku ja tyimyadowdi sɔ jaty ja kɔ'ɔm ɱii'mxyidi.
- 42 Jɔts ja tniɱaadyɔɔ ja tɔ'ɔxyɔjk:
 —Ndyimjanchjə'wipniɱ ɔts inet. Kidi ja'ajip ɔts nugo njanchjə'wip sɔ jaty mee tɔ mwa'ʔaɲ ku ɔɔ tɔ xukmadɔy. Pɔ tɔxi ɔts yɔ yam kɔ'ɔm njaaktyimydɔy sɔ yɔ wya'ʔaɲ. Tɔts ɔts nnijawi jɔts ku yɔ janch Cristo, pɔn naxwii'ɱit jaa'y tyiknitsokp.
- Ku ja Jesús tyiktsɔjky tu'uk ja windsɔn y'u'nk*
- 43 Xjats ku kyimajtskxɔɔw'ajty, jɔts ja nwindson'ajtim Jesús chɔɔ'ɱi jam Samariit etjotp, jɔts ja ojts yjaaktyimɱijxɱy jam Galileit etjotp.
- 44 Jɔts idɔ'ɔn ja jade'en yjajty sam ja nwindson'ajtim Jesús wyinaty kɔ'ɔm tɔ wya'ʔaɲin, jɔts ku ja Dios kyugajpxy ne'egi ka'ap yikupiky jam kyɔ'ɔmgajpkɔjxp.
- 45 Kuts ja nwindson'ajtim yjə'jty jam Galileit etjotp, jɔts ja jamit jaa'y, chojktip ja' ku ja jam yjə'jty, kumi tɔ ja wyinaty y'atsxɔbaatniɱi Jerusaleɱ ku ja paski xɔɔw jam wyinaty tɔ ɱaxy. Tɔts ja wyinaty tuki'iɱi t'ejxkɔxti ti jaty jam wyinaty tɔ ttuɱ ja nwindson'ajtim Jesús ku ja xɔɔw jam ɱajxɱy.
- 46 Xjats ja nwindson'ajtim Jesús ojts ɱijxɱy jadigɔjk jam Caná midi nay jam Galileit etjotp, ma ja wyinaty ja tsujxk nɔɔ tɔ t'ukyikvinojaty. Jɔts jamts idɔ'ɔn tu'uk mɔj windsɔn tyumbimi midi nayide'en windsɔn, ja'ats idɔ'ɔn y'u'nk jam wyinaty pɔjkip Capernaum.
- 47 Xjats ku ja tniɱadɔɔy jɔts ku ja nwindson'ajtim Jesús jam wyinaty tɔ yjə'aty Galilea, jɔts ku ja chɔɔɱi Judeit etjotp, winets ja ojts t'ats'ixy jɔts ja mɔk t'atsnɔjmi jɔts ja tmɔɔdit jam tyɔkwindum, jɔts y'u'nk ja yiktsɔ'ogiyit pɔn wyinaty tyim'yooki'imiɱi.
- 48 Jɔts nwindson'ajtim Jesús tniɱaay ja jaa'y:
 —Ka' meets janchjə'win xjagyepy. Yɔ'ɔyi meeds ja'ayi m'ijxpy yɔ milagri'ajtin.

⁴⁹ Yide'ents ja ñimaajyøø ja jaa'y pøn ja windsøn tyumbi'ajtpy:

—Men teety tsojk, namga'anim øts n'u'nk y'øøky.

⁵⁰ Winets ja nwindson'ajtim tñimaay ja jaa'y:

—Wimbejtñi, nøjxñi jam mdøjkwindum. Jujky'ajtp inet ja m'u'nk.

Xjats ja tjanchja'wiyi'ñ ku nwindson'ajtim Jesús ja jade'en ñimaajyøø, jøts idø'øn yjanch-nijxxy.

⁵¹ Jøts ku ja wyinaty yja'atwani jam tyøjkwindum, winets ja tyumbiøjk ja ojts pyatsøyi, jøts ja ojts ñii'mxyiyi:

—Jujky'ajtp m'u'nk.

⁵² Jøts ja tyiktiy ti hori dø'øn ja y'u'nk wyinaty kujk tø myøkpøjk'okwa'añ, jøts ja tñimaadyøø:

—Uxø'øyip ja'ani, ja dø'øn ja xøøw wyinaty waani yjøpta'aky ku ja jøøn wyinajkiyxy.

⁵³ Xjats ja u'nkteety ojts tjä'myech jøts ku nay ja'abi hori ja nwindson'ajtim Jesús wyinaty tø ñii'mxyi: “Jujky'ajtp ja m'u'nk”; jøts niduki'iyi wine'enin y'u'nk ñidø'øxy y'u'nk y'unä'jik ja jam møøt, jadine'en ja ojts tjanchjawidi ja nwindson'ajtim Jesús.

⁵⁴ Jøts idø'øn jade'en mimajtsk ja milagri'ajtin kujk ttuñ ja nwindson'ajtim Jesús jam Galilea. Tø ja wyinaty chøøñ Judea.

5

Ku ja Jesús tyiktsøøjky tu'uk køxuxpi pakxuxpi

¹ Xjats ku dø'øn jade'en y'ukjajty, jamts idø'øn israelit jaa'y wyinaty ttumidi xøøw, winets ja nwindson'ajtim Jesús wyimbijty, jøts ja ñijxxy jadigojk jam Jerusalén.

² Jam tøj'aa'w tu'uk ja'abi kajp midy yiktejp Borreek Tyøjk'aa'w, jøts nay jam wjngon tu'uk ja pili midy hebreit ayuujk yiktejp Betesda, magoxk ja tøj'aa'w ja tmøødi.

³ Jamts ja maabyamaa'y kyo'knidi; pøn winapti, pøn pakma'atti, pøn køxuxjtip pakxuxjtip. Jøts ja jam t'aweixti ja nøø kunim ja y'adø'øtst.

⁴ Atskidaktps idø'øn ja ankilis jam tu'uk pili agø'øm, jøts ja t'atsyik'adi'ich ja nøø. Kuts pøn pamaa'y jawyeen ñidøki, najxpts idø'øn pya'am ja', øy ja ti pa'am yjadyimyjapiky.

⁵ Jøts pamaa'y jam wyinaty tu'uk pøn wyinaty ee'pxmajktuktujk jumøjtjip ja pa'am pyaadyi.

⁶ Xjats ku nwindson'ajtim Jesús ja ojts t'ejxpaaty jøts ku ja jam kyo'kni, jøts ja t'ejxkajpy jøts ku pa'am ja wyinaty jadine'en jeky tmi'ejtñi, jøts ja ojts tñøjmi:

—¿Mdsøjkpy tsoojkin?

⁷ Jøts ja pamaa'y ja ojts yide'en y'adsøyi:

—Me teety, tyimñipøn øts pøn ø xnøyiktøkip jap nøøjtøpy ku yø nøø yja'ats'adi'ich. Yam ø njatøkiwyami jøts jatyi wenkpi ñidøki.

⁸ Jøts ja nwindson'ajtim Jesús tñimaay:

—Pidø'øk, wejtsjø'øk yø mmaabajt jøts mnøjkxñit.

⁹ Jøts nay jatyi chøøjky ja jaa'y, ojts tyikpidi'iky midy ja jam tyamaapy jøts ja ojts yø'øcho'oni. Jøts kumi poo'kxin xøøwts wyinaty,

¹⁰ winets ja israelit jaa'y tñimaadyøø ja jaa'y pøn wyinaty tø myøkpiky:

—Poo'kxin xøøwxi yam; jøts ka'ap pyaat'aty xtsømwidett yø mmaabajt.

¹¹ Xjats ja t'adsøøy:

—Ja' ø tø xnøjmi pøn ø tø xyiktsø'øky: “Yikpidø'øk yø mmaabajt jøts mnøjkxñit.”

¹² Jøts ja yiknimaay:

—¿Pøn idø'øn tø mni'mxyi: “Yikpidø'øk yø mmaabajt jøts mnøjkxñit”?

¹³ Jøts ja jaa'y pøn idø'øn wyinaty tø chø'øky, ka'ap ja tñijawi pøni pøn idø'øn ja wyinaty tø yiktsø'øgyi. Jøts janch may jaa'yts jam, jøts ja nwindson'ajtim Jesús tøyim ja jam wyinaty cho'oni.

¹⁴ Jøts ja nwindson'ajtim Jesús jadigojk tpaajty ja jaa'y jap tsaptøjkjøtpy midy ja wyinaty tø tyiktsø'øky, jøts ja tñimaay:

—Øyim yikxon xmado'ot, ejx idø'øn ixa tø mdsø'øky, kidi m'ukpøkyuni jøts kidi ti mjatyi ku jawaani ka'øy mdyimy'ukjajtnit.

¹⁵ Winets ja ñijxxy pøn tø chø'øky, jøts ja ojts ttukmadøy ja israelit jaa'y, jøts kudam idø'øn ja yja'aji ja Jesús, pøn ja wyinaty tø yiktsø'øgyi.

¹⁶ Ja'agøjxp idø'øn ja israelit jaa'y y'ijty tpaawidetti ja nwindson'ajtim Jesús, jøts ja ttuku'oogiywa'andi ku dø'øn ja jade'en y'adi'ich poo'kxin xøøw.

¹⁷ Yide'ents nwindson'ajtim Jesús ja ñimaajyidøø:

—Yam paat øts idø'øn ndeety tyuñ, paty øts idø'øn nayide'en nduñ.

¹⁸ Yø'øts idø'øn ja israelit jaa'y masi tyuku'oogiwyaandip ja nwindson'ajtim Jesús. Kidi nugo ja kutujkixpi ja kyamøj'ijxpy ku ja poo'kxin xøøw, pø nayide'enxi ja ñabyikta'agyi sam ja Dios, ku ja wya'añ jøts ku Dios ja tyimdyeedyi.

Jade'en ja Dios Teety ja kyutujk tmø'øy ja Dios U'nk

¹⁹ Winets ja nwindson'ajtim Jesús ja ñimaajyidøø:

—Janch øts idø'øn nwa'añ jøts ku Dios U'nk ka' ti ttu'unt kyø'øm kutujkøjxp. Ja tyety ja pyaduujnip yja' pøni sa ja kø'øm tnatjtuni. Tuki'iyi pøni ti tyumpy ja Dios Teety, nay ja'ats tyumpy ja Dios U'nk.

²⁰ Pø yjantymchøjkpyxi ja Dios Teety ja y'U'nk, jøts ja tuki'iyi ttuk'ixy pøni ti jaty ja kø'øm tyumpy. Jøts yjaaktyimdyuk'eix'adø'øtspnim ja' ja myøjpi ja y'øbyi, midì meets ñigyumaap mjawidip.

²¹ Kumi nayide'en sam ja Dios Teety tyikjujkpyiky ja oo'kpi jadigojk, nayide'ents ja Dios U'nk tyaky ja juky'ajtin pøni pøn ja tyamidsøjkpy.

²² Jøts ka'ap Dios Teety tpayø'øy pøn, ja Dios U'nk ja tø ttaguwani jøts ja' ja tø tmø'øy ja møk'ajtin jøts ja pyayø'øty.

²³ Ja'agøjxp nayide'en ja windsø'jkin yikmo'ot sam ja Dios Teedyin. Pøn tkamøjpiktakp ja Dios U'nk, nay ja Dios Teety ja kyamøjpiktakpy pøn tkajxp ja Dios U'nk.

²⁴ Tyiiby yjanchpi øts idø'øn nwa'añ: Pøni pøn øts ngajpxy n'ayuujk xyikmøjyiyip sa jaty ø nwa'añ, jøts ku ja tjanchjawi pøn ø xkajxp, pyaatp ja xemikøjxp ja kunuu'kxy'ajtin; jøts ka'ap ja yiktaguwani jøts ja y'ayo'ot, tø ja ttanaxy ja o'jkin jøts ja tpaaty ja kunuu'kxy juky'ajtin ja kunuu'kxy tsinaa'yin.

²⁵ Janch øts idø'øn nwa'añ, jøts ku ixyam y'horipaaty ku ja jaa'y tmdojidit ja Dios U'nk kyajpxy pøn jaty tkajanchja'widipnim; jøts kuts tnmado'odit, pyaattips ja kunuu'kxy juky'ajtin ja'adi.

²⁶ Ja ku Dios Teety tjagyepy ja møk'ajtin jøts ja kø'øm tyaky ja'abi juky'ajtin, jøts nayi tøts møk'ajtin ja tmø'øy ja y'U'nk jøts ja tyakt nay ja'abi juky'ajtin.

²⁷ Jøts tø ja tkutujkmø'øy jøts tiidyu'unin jøts payø'øyin ja ttu'unt, ja'agøjxp ku ja naξwii'ñit jaa'dyi tkudani.

²⁸ Kidits ya'at ñigyumaap xjawidi, pø ja'atpxi dø'øn ja xøøw ja jumøjt ku ja jaa'y tmdojidit Dios U'nk y'ayuujk pøn windigøy ejtnidip,

²⁹ jøts ja pyidsø'ømdit jap oo'kpi jutjøtpy. Pøn øy tø y'atsnaξwiiñ'aty, pidsø'ømdipts ja' jøts ja tpaattit ja kunuu'kxy juky'ajtin; pønts tø kyanaxwiiñ'aty øy, jukjpyøktipts ja nayide'en jøts ayo'on ja yiktaguwaniidit.

Y'ejxi tyiyi sa Jesús kyutujk tjagyepy

³⁰ Niti nguidyimdyuñ ngø'ømwinmaa'ngyøjxp. Jade'en ø nduñ pøni sa nyik'ane'emy, jøts nima kyadigøy øts ja ndiidyu'unin, øts ja nbayø'øyin. Jøts niti nguidyimdyuñ ngø'ømdsojkingøjxp, ja' øts idø'øn ndumpy pøni sa ttsøky ja Dios Teety midì ø xkajxp.

³¹ Kuts ø kø'øm nnañtestig'atit jøts ø kø'øm nnankmyøjwya'aniiyit pøni sa ø njawa'añ, ka'ap yø ti tyi'ajtin tjagyepy.

³² Jaaxi ja' pøn ø xnitestig'ajtp, jøts øts ja xpudøki; jøts pøni sa ja wya'añ, nniija'wipts øts ja' jøts ku tiy janch ja wya'añ.

³³ Meetsxi ojts xiibyiky ja Juan, jøts tiy janch ja' sa ja wya'añ ku ja y'adsøøy.

³⁴ Kidits ja'ajip ø nmøk'ajtpy øy pøn jaa'y ja tiy'ajtin tjayaky; jade'en'ampy øts idø'øn jade'en nwa'añ jøts mnitso'ok'ajtin xpaattit.

³⁵ Jade'en idø'øn ja Juan y'ijty sam jaj yjajyin, jøts meets yjaj ja waani tø x'uktaxondakøjyiyi.

³⁶ Njagyeypyts øts tiy'ajtin jawani ka'pxy sam øts ja Juan ojts xkanigajpxyyn. Tuki'iyi ti jaty ø ndumpy, nay ja' idø'øn yø' midì øts Dios Teety tø xa'ane'emy jøts øts ja ndu'unt, yø'øts tyanigaxø'kp jøts ku tyiyi yjanchi ku øts Dios Teety tø xkexy.

³⁷ Nayi yajkpy ja Dios Teety tiy'ajtin nayide'en jøts ku øts ja xkexy, øy meets ja nijuuni xka'ixxñim, øy meets ja nijuuni xkamadøynim.

³⁸ Jade'ents ja y'øgyajpxy ja y'ø'y'ayuujk ka' xja'gyukidinim, ja'agøjxp ku ja ka' xjanchjawidi pøn ja Dios Teety tø tkexy.

³⁹ Janch ni'ejxi nibaadi meets Dios kyajpxy x'ixpøkiyi, kumi jap meets ja xty-imyjapaatwa'añ ja kunuu'kxy juky'ajtin midì xemikøjxp; jøts øts Dios kyajpxy jap xnimadya'aky,

⁴⁰ jøts meets ka' xpabøkwa'añ ku njadukpaatwa'andi yø'øbi juky'ajtin.

⁴¹ Ka' øts naξwii'ñit jaa'y y'agujkwindso'jkin ngupøkiyi.

⁴² Jøts njaaktyimñija'winip meets jøts ku meets Dios ka' xtsøky.

⁴³ Ja Dios Teety ø ngudanaapy ku ø nmiñ, jøts meets xkagupiky; kuts mye'ent jadu'uk kyø'ømdsojkingøjxp, mgupøkpts meets ja ne'egi.

⁴⁴ ¿Ma meets ja janchja'win xmøøt'ajtnit, kumi mnagyupøjkxip meets ja windsø'jkin xem jam, jøts ka'ap ja tu'ukpi Dios yja' y'ixajyidi jøts ja xyiktu'undit?

⁴⁵ Jøts kidi mw'a'andi jøts ku mee nni'øønit jam Dios Teety wyingujpk; ja Moisés ja' mee kø'øm mni'øø'niyip, pøn mee møk mjøp'ijxpy.

⁴⁶ Kuk meets ja jeexyip xjanchjaw'i sã wya'añ ja Moisés, nayi tøts meets jeexyip nayide'en xjanchjaw'i, pø ja'axi ja Moisés ojts tja'ay jøts øts ja xnigajpxy.

⁴⁷ Pøni ka'ats ja xjanchjaw'idi mid'i ja yjaay, ¿mats meets ja xjanchja'win'it mid'i mee ndukmadøøpy?

6

Ku ja Jesús tyikaay ja nimagoxk milbi jaa'y

¹ Xjats ku dø'øn ja wyinaty jade'en tø yjaty, winets ja nwindson'ajtim Jesús ojts ñijky jam Galileit mejy pya'am, jam jaduktamajñ. Nay yø'øbi mejy idø'øn yiktejp Tiberias.

² Jøts may jaa'y ja jam ojts myøødiyi, kumi tø ja wyinaty yik'ixy ja myilagri'ajtin ku ja tyiktsø'øky ja pa'amjaa'y.

³ Jøts ja nwindson'ajtim Jesús pyatøjkjy'iñ mã kojpk jam, jøts ja jam tmøøt'ixaa'jky ja pyabøjkpitøjk.

⁴ Pyatwanipst wyinaty ja paski xøøw mid'i ja israelit jaa'y xyø'ajttip. (Ja' xøøw yja'myajtstip sam ojts y'awa'atspidsømdi jam Egipto y'etjotp.)

⁵ Jøts ku nwindson'ajtim Jesús ojts t'ixy jøts ku may jaa'y ja pyamiñiyi, winets ja tñimaay ja pyabøjkpi Felipe:

—¿Mamts inet jadine'en njuu'yindit ja kaaky ja jii'kxy jøts yø jaa'y niduki'iyi kya'adyit?

⁶ Jade'en'ampy ja jade'en wya'añ jøts ja t'uk'ijxy sã ja Felipe yjatyimy'ukwa'ant; jøts kumi Jesús, ñijã'wipst ja kø'øm pøni sã dø'øn ja ttu'unt.

⁷ Xjats ja Felipe ja y'adsoojøø:

—Ku tsapkaaky majtsk magø'pxy denario juyin, niwine'en ja kyidyimñibaadit øyik pøn wine'enin yiin waan tyaja'adiyt.

⁸ Winets ja pyabøjkpi jadu'uk wya'añ pøn Andrés'ajtp, ja Simón Pedro y'uch:

⁹ —¿xyadam tu'uk mutsk mixyu'nk, magoxk cebadi tsapkaaky tmøødi jøts ajkxu'nk majtsk. ¿Ti windem yø mayjaa'y yø ndapaajtnam?

¹⁰ Xjats ja nwindson'ajtim Jesús wya'añ:

—Nøjmid'i niduki'iyi yø jaa'y jøts wan t'ixã'akti.

Janch miyjoajt idø'øn jam ja et, jøts ja yaa'dyøjk nimagoxk milin y'ixaktøø. Nika'ap ja tø'øxyøjk yikmachøy møøt ja y'u'nk y'una'jk.

¹¹ Winets ja nwindson'ajtim Jesús tñixajiyi'iñ ja tsapkaaky, jøts ku ja ojts jawyeen ttukmøjawi ttukunuu'kxyjawi ja Dios Teety, jøts ja ojts tmø'ønim ja pyabøjkpitøjk. Ja'ats ja ojts tyikwa'kxti, jøts ja ojts tmø'odi niduki'iyi ja jaa'y pøn jam wyinaty tø y'ixã'akti. Nayide'en ja ojts tyikwa'kxti ja ajkx, jøts ja ojts tmøøgyøxti wine'enin ja kø'øm ttsokti.

¹² Jøts ku y'abajtidøø kyujxidøø, jøts ja nwindson'ajtim Jesús tñimaay ja pyabøjkpitøjk:

—Pøkmukti tuki'iyi yø abu'xk mid'i jaty tø wyindañ, jøts kidi nugo ti wyindigøø.

¹³ Winets ja tøkmuksøø, jøts ja makmajtsk kach ujts t'abøjkidyøø ja kaaky abu'xkuna'jk, mid'i wyinaty tø wyindañ ja magoxkpit cebadi tsapkaaky.

¹⁴ Xjats ja jaa'y wyandøø ku ja t'ejtøø jøts ku ja nwindson'ajtim Jesús jade'en wyinaty tø ttuñ ja milagri'ajtin:

—Janch yø' tam idø'øn Dios kyugajpxy'ajtpy pøn yiktejp me'emp ya naxwiiñ.

¹⁵ Jøts kumi yja'wiyi'iñts ja nwindson'ajtim Jesús, jøts ku ja jaa'y ja wyinaty aguwan'i yiknøjkxwa'añi, jøts ja yiktøk'i wya'añi møj windsøn, winets ja ojts nadyu'uk yjiwa'aky jøts ja ojts ñijky jam kojpkøjpx.

Ku ja Jesús ojts yø'øy jam mejwyingøjxp

¹⁶ Xjats ku ja et wyinaty tø kyoodsniñ, winets ja nwindson'ajtim Jesús pyabøjkpitøjk kyidaktøø jam mejy agø'øm.

¹⁷ Jants ja ojts tyøkidi barkijotp, jøts ja ojts ttanaxwa'andi ja mejy, jam idø'øn ja nyøjkxti Capernaum. Jøts janch xaachkootsni dø'øn, jøts ka'anims wyinaty ja nwindson'ajtim Jesús wymbejtni.

¹⁸ Winets janch møk pyojpinaxwa'knøø, janch jadi'iñi ja nøø pyidø'kni.

¹⁹ Jøts ku dø'øn ja jam wyinaty ñaxti, magoxk uk tudujk mil xajkn tø yø'øñidi, winets ja t'ejxpattøø ja nwindson'ajtim Jesús jøts ku jam wingon ja barki tñimiñ. Yø'øpy ja nøø wingøjxp, jøts ja yjantyimchø'jkidøø.

²⁰ Yide'ents ja ñimaajyidøø:

—¿Øts idø'øn, kidi mdsø'øgidi!

²¹ Xjats ja yjotkukidøø, jøts ja ejtni xoni tyiktøjkidøø jap barkijøtpy, jøts ja pojnin ojts yja'atti ma dø'øn ja wyinaty ñøjkxti.

Ku ja Jesús ja mayjaa'y ojts y'ixa'ayi

²² Jøts ku kymjabom'ajty, jøts ja jaa'y pøn jam wyinaty tø tyandi jam mejy'am, jøts ja ojts tnijawidi jøts kudam ja nwindson'ajtim pyabøjkpitøjk wyinaty tø cho'onidi, jøts ku ja barki ja wyinaty tø ttanøjkxti mididi jam wyinaty tu'ugyi, jøts ku nwindson'ajtim Jesús ja nika'ap tmøodidyøø.

²³ Jøtsnim ojts yja'atti wenkpi barki mididi jam tso'ondip ma ja kajp jam txøøwi Tiberias, jam wingon ma ja jaa'y jam wyinaty ja tsapkaaky tø yikmo'odi, ku ja nwindson'ajtim wyinaty jawyeen tø ttukmøjawi tø ttukunuu'kxyjawi ja Dios Teety.

²⁴ Xjats ku ja jaa'y t'ejxtøø jøts ku ja nwindson'ajtim Jesús jam ka'ap pøn, jøts ni ja pyabøjkpitøjk jam kya'etti, winets ja ttatøjkidøø ja barki mididi jam wyinaty tø yja'atti, jøts ja ojts ñøjkxti jøts ja t'ats'ixa'awa'andi jam Capernaum.

Ja Jesús amuum xyikjujky'ajtim

²⁵ Jøts ku ja ojts yja'atti jam mejy agø'øm, jøts ja ojts tpaatti ja nwindson'ajtim Jesús, jøts ttiibyøjktøø:

—Windsøn, ¿windii mja'aty ya?

²⁶ Jøts nwindson'ajtim Jesús ja ñimaajyidøø:

—Janch øts idø'øn nwa'añ, jøts ku meets ja'agøjxp x'ixa'ay ku mee ku'uxyi ojts mgay, jøts nigidi meets xja'gyukidi tigøjxp øts ojts ja mlagri'ajtin nduñ.

²⁷ Køjxp najxp kaaky jii'kxy y'ity, jøts kidi ja'abi xniiduni. Ja' ne'egi mnidu'undip mididi xemikøjxp jajkp mididi mmo'ojidip ja kunuu'kxy jujky'ajtin. Yø'øbi kaaky yø'øbi jii'kxy øts idø'øn nyajkpy, pø øtsxi ja naxwii'ñit jaa'dyi ngudanaapy.

²⁸ Winets ja jaa'y tyiktøødøø jøts ja tnimaadyøø ja nwindson'ajtim:

—¿Tits øøts idø'øn ndu'ump jøts ja yiktu'unt pøni mididi dø'øn ja Dios chøjkpy jøts øøts ja ndu'unt?

²⁹ Jøts nwindson'ajtim Jesús ja y'adsoojidøø:

—Midi mdu'undip, ja' Dios chøjkpy jøts ja xjanchjawidit pøn ja tø tkexy.

³⁰ Jøts ja tjaaktyimdyiibyøjktøø, yide'en tnimaadyøø ja nwindson'ajtim Jesús:

—¿Ti ejxa'ants mbikta'akp mididi øø n'ejxp jøts myikjanchjawit? ¿Ti dø'øn mdu'ump? ¿Ti dø'øn myik'øyip?

³¹ Ojtsxi adøm ja n'aptøjk tjøø'kxti ja jii'kxy jam abak etjotp sam ja Dios kyajpxy wya'añin ku ja ñimy: "Ojts Dios ja tsapkaaky ja tyukayidi mididi tso'omp tsajppjøtpy."

³² Winets ja nwindson'ajtim Jesús ja ojts yide'en y'adsøyidi:

—Janch øts idø'øn nwa'añ ku mee nnøjmi: Jøts kidi ja Moisésip ja', kidi ja'ajip ja ojts myø'øyidi ja tsapkaaky mididi tso'omp jap tsajppjøtpy, pø ja Dios Teetyxi ja' pøn tyajkp tyimya'abi tsapkaaky mididi tso'omp tsajppjøtpy.

³³ Ja tsapkaaky mididi Dios yajkpy, ja' idø'øn tø kyida'aky jap tsajppjøtpy. Ja'ats yajkpy ja kunuu'kxy jujky'ajtin pøn jaty ya naxwii'ñit ajttip, pøn ya yjanchja'widip.

³⁴ Winets ja tnimaadyøø ja nwindson'ajtim:

—Teety, møøy'ejtik øøts yø'øbi tsapkaaky.

³⁵ Jøts nwindson'ajtim Jesús ja ojts ñii'mxyidi:

—Øts idø'øn ja' sam ja tsapkaaky mididi tmøøpy ja jaa'y ja kunuu'kxy jujky'ajtin. Pøni pøn ø xnimemp, pøn ø xpabøkp, ni juuni yuuj xøøw ja tka'ext; pøni pøn ø xjanchja'wip, ni juuni tøødsi ja tkagupøkt.

³⁶ Jade'ents sam tø nnøjmidi, ka' mee xjanchjawi øy mee tø xja'ixy.

³⁷ Niduki'iyi øts ja xnimendi pøn øts ja Dios Teety xagødøjkp; jøts ja'adi pøn øts idø'øn jade'en xnimendip, ka' øts ja mibaat ngajxpidisimy.

³⁸ Kaja'ajip øts jap tsajppjøtpy tø nnidøøñ jøts øts ja ngø'ømwinmaa'ñ nyiktu'unt, pø ja' Dios Teetyxi øts ja yja' nduujnip pøn ø xkajxp.

³⁹ Jøts ja' idø'øn ja chøjkpy jøts ø ni tu'ugin nga'ejxigø'ty pøn jaty øts ja tø xagødøki, jøts øts ja nyikjujkyøktit ku wyinaty ja naxwii'ñit kyøjxnit.

⁴⁰ Jøts nay ja' ja chøjkpy jøts niduki'iyi tpaattit ja jujky'ajtin mididi xemikøjxp pøni pøn t'ejxtip tnija'widip, pønts tpabøktip ja Dios U'nk, jøts øts ja ñiyikjujkyøktip ku naxwii'ñit kyøxt.

⁴¹ Winets ja israelit jaa'y tyabagajpxinaxwa'akti ja nwindson'ajtim Jesús ku dø'øn ja wya'añ: "Øts idø'øn ja', ja tsapkaaky mididi kidakp jap tsajppjøtpy."

⁴² Jøts wyandøø:

—¿Kidi ja Jesúsip yø' pøn José myajnk'ajtpy? Pø nnija'wimts adøm tyeety tyagak yø'. ¿Sudso yø jade'en wya'añ jøts ku yø tsajppjøtpy kyida'aky?

⁴³ Xjats ja nwindson'ajtim Jesús ja tnimaay:

—Majststuttu yø pagajpxk.

⁴⁴ Ka'ap øts pøn nugo ajawī xtyimñimiñ pøni ka'ap øts Dios Teety ja kø'øm xagøðøki pøn ø xkajxp; jøts øts ja jaa'y nyikjujkyøkt ku wyinaty ja naẖwii'ñit kyixy.

⁴⁵ Yide'en ja Dios kyugajpxy ñøky wya'andi: "Dios ja niduki'yiyi yik'ixpøkidip." Jade'ents øts ja xnimendi pøn jaty ja Dios Teety y'ixpøjkin tmadøjidip, pøn jaty ja tñija'widip.

⁴⁶ 'Ka'axi pøn t'ixy ja Dios Teety; pø ja ayixi ja nadyu'ugyi t'ejxp pøn nay jam tso'omp ma Dios.

⁴⁷ Jøts tyiiby; øts idø'øn nwa'añ jøts mee nnøjmi, pøni pøn ø xjanchja'wip, ja'ats idø'øn tpatp ja tsinaa'yin midi xemikøjxp.

⁴⁸ Øts idø'øn ja' sam ja tsapkaaky. Øts nyajkpy ja kunuu'kxy tsinaa'yin ja kunuu'kxy jujky'ajtin.

⁴⁹ Ojtsxi ja m'aptøjk tkaydi ja tsapkaaky jam abak etjotp, jøts ja jade'enbaat y'o'jxøjxtøø niduki'yiyi;

⁵⁰ Ja tsapkaakys midi ø ndijpy ja tsajpjøtpy kidakp, jøts ku ja pøn tka'adyit, ka'ats ja y'anmija'win wyindigø'ødyit.

⁵¹ Øts idø'øn ja kø'øm yø'øbi tsapkaaky midi tø kyida'aky jap tsajpjøtpy; jøts ku pøn tka'aty yø'øbi tsapkaaky, xemikøjxp ja yujky'att. Ja'abi tsapkaaky øts idø'øn ñamyayi nyakp, ku øts ja nne'kx ku øts ja nni'jpy ndagømøøyt ja naẖwii'ñit jaa'y jøts tpaattit ja nitso'ok'ajtin.

⁵² Winets ja israelit jaa'y agø'ømyi tkajpxy'ajtpinibøjkidyøø, jøts ja ñawya'añidi:

—¿Sudso ñe'kx sudso ñi'jpy yø xmøøwya'añin jøts ja nga'ayin njøø'kxin tsapkaagyin?

⁵³ Winets ja nwindson'ajtim Jesús ja ojts ñii'mxyidi:

—Øts idø'øn wamp, pøni ka' øts nne'kx xjøø'kxidi nni'jpy x'uukti, ka'ats ja nitsoojkin xpaattit.

⁵⁴ Pøni pøn nne'kx xjøø'kxip nni'jpy x'uukip, ja'ats ja kunuu'kx jujky'ajtin tpaattip; øts nyikjujkyøktip ja' ku naẖwii'ñit kyøxt.

⁵⁵ Kumi jade'en'ampy ja møk'ajtin xjagyaptit øts nne'kxøjxp nni'jpykøjxp.

⁵⁶ Pøni pøn øts nne'kx xjøø'kxip nni'jpy x'uukip, xemikøjxp øts nmøøtt n'ett.

⁵⁷ Ja Dios Teety pøn ø xkajxp, ja' tmøøt'ajtp ja jujky'ajtin, ja'agøjxp øts njujky'aty; jøts nayide'en pøn øts nne'kx nni'jpy xjøø'kxip, nay øts køjpxxi y'etti.

⁵⁸ Ja'abi tsapkaaky øts idø'øn nnigajpxpy midi kidakp jap tsajpjøtpy. Ka'ap yø ñayide'eni sam ja tsapkaaky midi meets ja m'aptøjk ojts tkaydi, jødsyim ja ojts niduki'yiyi yjadyim'yookti; pønts tkaapy yø'øbi tsapkaaky midi ø ndijpy, pyaattps ja jujky'ajtin ja' xemikøjxp.

⁵⁹ Jam idø'øn ja nwindson'ajtim Jesús yø yjade'emb; ixpøjkin tyajky ma ja jaa'y ñamyukyidi tsapøjkjotp, jam Capernaumit kajpkøjxp.

Ya'at ayuuik xuknija'wimp ja øchinaa'yin midi xemikøjxp

⁶⁰ Kuts ja pyabøjkpitøjk jade'en tmadowdi ja ixpøjkin pøn jam wyinaty tpawidejttip ja nwindson'ajtim Jesús, jøts ja wyandøø:

—Ku yø jade'en wya'añ, janch tsep yø' jøts yø yikupøkt; ¿pøn yø jade'en tijj ukmøjpikta'akip?

⁶¹ Xjats ja nwindson'ajtim Jesús tjawiyi'ñ, jøts ku ja jade'en tjanch'ayoji ku ja wyinaty jade'en tø wya'añ, winets ja tyiktiy:

—¿Yø' m'ayoojidip?

⁶² ¿Sa mdejtit winets jøts ku ø nbatøjkinit nay jap ma øts jap ijty ndsøøni?

⁶³ Ja anmija'win ja' idø'øn jujky'ajtp; ¿ti yø ne'kx?, ka'ap yø ti wya'añ. Jøts ti jaty ø tø ngajpxy, yø' idø'øn ja Dios tyi'ajtin'ajtpy, jøts yø' idø'øn yikjujky'ajtp xemikøjxp.

⁶⁴ Jøts ja meets ixa winaagin pøn yø tkajanchja'wip.

Tø dø'øn ja nwindson'ajtim Jesús ja wyinaty tñija'wiñi pøn jaty ja'adi pøn tka-janchja'widip, jøts ja' pøn ja køyakiyip.

⁶⁵ Jøts ja yide'en yjaakwaañ:

—Ja'agøjxp meets jade'en nnøjmi jøts ku ø ka'ap pøn nugo ajawī xnimiñ, pøni ka'ap Dios Teety ja kø'øm xagidøki.

⁶⁶ Winets may jaa'y myajsttuujtiniyi ja nwindson'ajtim Jesús, ka'ap ja t'ukmøøtwidejtnidi.

⁶⁷ Xjats ja nwindson'ajtim Jesús ojts tyiktiy jøts ojts tnøjmi ja ñimakmajtskpi jaa'y pøn ja pyabøjkpi'ajtpy:

—¿Mnøjkxwamip meets nayide'en?

⁶⁸ Jøts ja Simón Pedro ja ojts yide'en y'adsøyi:

—¿Pønims tø teety njaaktyimñinøjkxp? Tum ja'ats me mgajpxpy midi xemikøjxp yikjujky'ajtp.

⁶⁹ Tøts øøts yø njanchja'wiñi jøts nnija'wip øøts jøts ku me Cristo, ja Dios U'nk, midi jujky midi kunuu'kxy.

⁷⁰ Winets ja nwindson'ajtim Jesús t'adsøøy:

—¿Ti kidi mee tø nwi'ixy nimakmajtsk? Íxats mee nidu'ugin miku'aty.

⁷¹ Ku dø'øn ja jade'en wyaañ ja nwindson'ajtim Jesús, ja Judas Iscariote dø'øn ja jade'en tyijpy pøn ja Simón myajnkjip, pø ja Judasxi ja wyinaty køyawkwjnip, øy idø'øn ja nimakmajtsk møøt yjaka'pxy ja pyabøjkpitøjk.

7

Ka'ap ja Jesús ja myigu'uk yjanchjawiyi

¹ Xjats ku dø'øn ja jade'en wyinaty tø y'ukjaty, jøts ja nwindson'ajtim Jesús jam ja wyinaty wyidity Galileit etjotp. Judeit etjotp idø'øn kyawidewa'añ ku ja ja'it jaa'y jam wyinaty yik'ookwa'añiyi.

² Jøts kumi ja xøøwts wyinaty tyimbyatpy midi ja israelit jaa'y tyundip ku ja tyik'øyiidi ja waxnaky, nayide'en sam ojts y'etti y'apteety jam abak etjotp,

³ winets idø'øn ja nwindson'ajtim Jesús ja myigu'uktøjk ñimaajjyiyøø:

—Ka'ap ya mda'ant; jam mnøjkxt Judea, jøts ja mbabøjkpitøjk nayide'en jam m'ejxmiyit sa jaty mduñ.

⁴ Ku pøn ttsøky jøts yiknijawit, ka'ap ja ti amaa'tsk ttuñ. Ejx mets yø jade'en xuñ. Tunts mets yø jade'en øy madsoo, jøts mets yø øy pøn xuk'ext.

⁵ Niwine'eninxí dø'øn ja myigu'ukti ja kyajanchjawiyi.

⁶ Xjats ja nwindson'ajtim Jesús ja tñimaay:

—Ka'aním øts ndiempi tpaaty jøts ø nnøjkxt; jøts meets, øy meets øy juuni mnøjkxt.

⁷ Ka' meets ya pøn mmi'ekiyi; øts, yikmi'ajkjip øts ja'agøjxp ku øts ja tuki'yiyi nniagjpxy sa jaty kya'øyjaa'y'atti.

⁸ Nøjkxts mee m'atsxøbaaty; ka'ap ø nnøjkxt, kumi ka'aním øts njuky'ajtim pyaat'atynim.

⁹ Kuts ja jade'en wyaañ, jøts ja jamyi Galilea tyaañ.

Ku ja Jesús ojts ñijky xø'ajtpi

¹⁰ Xjats ku ja myigu'uk wyinaty tø choondi, jøts ja nwindson'ajtim Jesús nayide'en ñijky ma wyinaty jam ja xøøw, øy idø'øn ja ka'ap yjadyimñanky'ijxyi jam mayjaa'yjotp. Yu'uch idø'øn ja wyidity.

¹¹ Jøts idø'øn ja israelit jaa'y ja yjadyimy'ixa'ayi ku ja xøøw tyuñi, yide'en idø'øn ja wya'andi:

—¿Ma net ja jaa'y midi Jesús nadyejip?

¹² Jøts jam mayjaa'yjotp jam ja may pøn ja nimadyajkiyip. Pømbi jam nømp: “Øy jaa'yxi ja!”; jøts jadu'uk wyamidi: “Ka'ap ja y'øyjaa'y'i, nugo jaa'y ja twin'ihñ.”

¹³ Jøts ka'ap pøn nugo ajawi møk tñimadya'akti ja'agøjxp ku ja israelit jaa'y wyindsøn jamdi, ja' ja chø'jkidip.

¹⁴ Kujkwa'kxnip ja xøøw wyinaty ku ja nwindson'ajtim Jesús tyøjkiyiyi'ñ jam tsaptøjkjotp, jøts ja jam yik'ixpøjk'okwaañ.

¹⁵ Jøts idø'øn ja israelit jaa'y ja ñigyumaap tyimyjawidi, yide'en ja wya'andi:

—¿Sudso yø jadine'en tjaty, jøts ka'ats y'ixpiky?

¹⁶ Xjats ja nwindson'ajtim Jesús t'adsøøy:

—Yø ixpøjkin ka' øts yø nja'aji, ja' yø' yja' pøn ø xkajxp.

¹⁷ Pøni jam pøngapøn, pøn jade'en ja tsojkin tjagyajp jøts tpadunwa'añ sa Dios ttsøkyin, ñijawipts ja' pøni kidi jamip øts n'ixpøjkin chøøñ ma Dios, uk kidi ngø'øm ja' øts jade'en ngajpxpy.

¹⁸ Pøn kyø'øm ja' nugo tkajpxp, jade'en'ampy ja jade'en ttuñ jøts ja jaa'y ja yikmøjtøkiyit; pøni pøn tsojqp jøts tyikmøjtøkit ja Dios Teety yja' midi ja tø ktxy, ty janch ja wya'añ, ka'ap ja tyaa'y.

¹⁹ ¿Ti kidi ja yjanchi jøts ku meets ja Moisés ojts mmø'øyi ja kutujk? Jøts ka'ats niwine'enin xpadundi ja kutujk. ¿Tigøjxp ku xyik'ookwa'andi øts?

²⁰ Jøts ja mayjaa'y ja y'adsøoyiyi:

—Pø tø mets miku' mdatøkiyi; ¿pøn idø'øn myik'ookwajnip?

²¹ Jøts ja nwindson'ajtim Jesús ja tñimaay:

—Tyimyja' idø'øn ku tuk'ojkyi ojts jade'en n'adi'ich yam yjapoo'kxinxøøwi, ja'ats mee mga'øyja'wip.

²² Ojts meets ja Moisés mdanigutujk'atyi jøts meets mutsk una'jk ja chuujku'nk xjøptsuktuujtit midi yiktejp circuncisión (øy ja tyeety'aptøjk ja tjayiktso'onda'aky, pø nigidi ja'ajipxi ja kø'øm tyiktso'ondakp), ¿tigøjxp meets ja mutsk mixyuna'jk xuujni ja circuncisión wan tjapoo'kxinxøøwi?

²³ Jabi mduujnipts meets ja mutsk mixyuna'jk ja circuncisión øy ja poo'kxinxøøwi, ¿ti kuts øts ja xami'ambiky ku øts ja jaa'y amuum tø nyiktsø'øky ku poo'kxin xøøw?

²⁴ Kidi meets øy sagasa mbayø'øy pøni sa øy tigati x'ejxti. Ku mbayø'øwya'andit, yikxon xu'undit tiy'ajtingøjxp.

Ku ja Jesús tniigajpxy pøn ja kajxip

²⁵ Xjats winaagin pøn wyinaty tø choondi jam Jerusalén, jøts ñay'amidoojiñaxwa'jkidøø:

—¿Kidi ja'ajip yø' midi yik'ixaapy, midi yik'ookwandip?

²⁶ Ìxats yø kyajpxy mayjaa'y agujky, mats yø pøn sa kyanima'añiyi. ¿Wan ndejin kudunktøjk tjantymyjanjchjawwidi yø'øbi jaa'y jøts ku yø Cristo?

²⁷ Jabi wa'atsxi adøm yø nnija'wam ma yø chøøñ; kuts ja Cristo mye'ent, ka'ats ja yiknijawit pøni ma ja choont.

²⁸ Ja'ayi ja nwindson'ajtim Jesús ja jade'en ojts tmadø, pø ixamxi ja wyinaty tsaptøjkjotp yik'ixpiky, xjats ja møk wyaañ:

—¡Aaa wa'ats tam meets x'ijxy'aty, jøts mnija'wip tam meets yø' pøni ma ø ndsøøñ! Kidits ngø'ømwinmaa'ngyøjxpixi ø nmiñ, ja' ø xkajxp jøts øts ja ngudanit midi dø'on tyimyjanch'ajtp, midi mee mga'ijxy'ajtpy.

²⁹ Wa'ats øts ja n'ijxy'aty kumi jam ø ndsøøñ, ja'ats ø xkajxp.

³⁰ Winets ja ojts tjadyimya'ukmatswa'andi jøts ja tsu'umdit; nika'apts ja ojts pøn ñixajiyi kumi ka'anim ja wyinaty xyøga'pxy.

³¹ Jamts ja maydi pøn ja janchja'wiyøø, pøn wandip:

—Ku ja mye'ent ja Cristo, ¿ti milagri'ajtin ja jawaani yjaaktyimdyu'unt, ti ti yø jaa'y yam kyatumpy?

Ku ja fariseotøjk t'ana'amdi ja chaptøjk jøts ja Jesús yikmatst

³² Xjats ja fariseotøjk tmadowdi sa jaty ja nwindson'ajtim Jesús ja jaa'y ñimadya'agyiyi; winets ja t'ana'amdøø ja tsaptajk pøn tump jap tsaptøjkjotpy, jøts tyimykmatst ja nwindson'ajtim. Ja teetywindsøn idø'on ja jade'en møøt y'adø'øtsti.

³³ Winets ja nwindson'ajtim Jesús wyaañ:

—Tyimyjawaani meets yam njaakwindsøøni, jøts øts ja n'awimbejtyinit pøn ø tøkexy.

³⁴ Xjadyimya'ixax'ap meets, ka'ats mee ma xpaatt. ¿Ja ti ja meets jap mnøjkxt mats jap n'ett?

³⁵ Xjats ja israelit jaa'y agø'ømyi ñayiktøøbinaxwa'jkidøø:

—¿Ma dø'on yø ñøjkxwa'añ, sudso dø'on yø wya'añ jøts ku adøm yø nga'ukpaajtna'ant nima? ¿Wan yø ndejin jam tniinøjkxwa'añ ja israelit jaa'y pøn jadi'iñi tø yø'øwya'kxnidi, møøt tø ñamyidøjkniyidi ja griegit jaa'y? ¿Ja' ndejin yik'ixpøkwampy?

³⁶ ¿Ti dø'on yø jade'en tyijpy ku yø jade'en tø xnima'ayin ku wya'añ: “Xjadyimya'ixax'ap meets, ka'ats mee ma xpaatt, ja ti ja meets jap mnøjkxt mats jap n'ett”?

Ja kunuu'kxy jujky'ajtin midi ja Jesús yajkpy

³⁷ Ja yjadu'ukpi xøøw midi ja xøøw tyamigugøjxinip, ja' idø'on ja tyimy'ukmøjnaxnñip, winets ja nwindson'ajtim Jesús wya'kukiyii'ñ, jøts ja møk'ampy wyaañ:

—Pøni pøn ja kunuu'kxy jujky'ajtin ttsojpk jade'en sam ndøøjtsant, wants ø xnimiñ jøts ø nmo'ot.

³⁸ Pøni pøn ø xjanchja'widip, jade'ents ja yjattit sam wya'añ ja nøky jøts ku ja jam y'anmija'winjotp jade'en myu'ut ja nøø midi yikjujky'ajtp xemikøjxp.

³⁹ Jade'en idø'on ja nwindson'ajtim Jesús tjatijy, pøni pøn ja janchja'wiyip, ja'ats ja Espiritu Santo pyaattip; ka'anim idø'on ja Espiritu Santo wyinaty myiñ, kumi ka'anim ja nwindson'ajtim Jesús wyinaty tmimadaxixy ja ayo'on jøts chajpatt.

Ku ja jaa'y ojts ñawyanwa'kxniyidi ja nwindson'ajtim Jesús køjxp

⁴⁰ Xjats jam mayjaa'y agujkp winaagin wyandøø, ku ja jade'en ojts tmadowdi:

—Tyimyjanchja'adam idø'on yø jaa'y ja Dios kyugajpxy midi idø'on yik'awejxp.

⁴¹ Jøts jadu'uk wyamidi:

—Ja Cristo yø'.

Jøts wyenkpi wyamidi:

—¿Sudso ndejin ja Cristo jam kyaxø'økt Galilea?

⁴² Yide'ents jap nøkyjxpy jaabyety wya'añ jøts ku ja rey David ja' y'apjaa'y Cristo'atp, jøts ku ja jam choont Belén, nay jam ma ja David y'ijty kyugajpi.

⁴³ Xjats idø'on ja jaa'y jade'en ñawyanwa'kxniyidi ja nwindson'ajtim Jesús køjxp.

⁴⁴ Jam winaagin pøn ja tjadyimya'ukmatswandøø, nika'apts jade'en pøn y'adiijch.

Ku ja windsøndøjk ojts tkajanchjawidi ja Jesús y'ayuujk

⁴⁵ Jøts ja tsaptajktøjk ojts wyimbejtnidi ñøjkxnidi ma ja fariseotøjk jam wyinaty møøt ja teetywindsøndøjkti, ja'ats ja ojts ñii'mxyidi:

—¿Tigøjxp ku tø xkayikmendi?

⁴⁶ Jøts ja tsaptajktøjk y'adsowdi:

—¡Ka'anim ma pøn jade'en kyajpxy sam yø jaa'y kyajpxyin!

⁴⁷ Winets ja fariseotøjk ja ñimaajyidøø:

—¿Meebaat nayide'en tɔ myikwin'θθ'nidi?
 48 ¿Ti tɔ adɔm winaagin ja nwindson t'ukjanchjawidi, uk tɔ ja yjaw i tu'ugin ja fariseit t'ukpabɔkti?
 49 Yɔ mayjaa'dyi pɔn tkamɔja'widip ja kutujkin, yɔ' kawindi'yajttip ku ja tpabɔkti.
 50 Ja Nicodemo pɔn ja nwindson'ajtim Jesús ojts koots ñinijxyi, nay ja fariseit ja', ja'ats ja myigu'uk ojts tnɔjmi:
 51 —Jade'en sam adɔm ja ngutujk tyikutujkyim, ka' pyaat'aty i jɔts adɔm jaa'y ja ayo'on ndyimdyanigajpxkojin ku ja ka'anim nmad'ɔyindi jawyeen pɔni ti dɔ'ɔn ja tyumpy.
 52 Jɔts ja ojts yide'en yik'adsɔy:
 —¿Nayi Galileit jaa'y mets? Ɔxpɔk waani ja Dios kyajpxy jɔts xnijawit jɔts ku ni tu'uknim ja Dios kyugajpxy jam kyayiknijawinim Galilea.

Ja ka'ɔdyɔ'ɔxy

53 Jɔts ojts ñɔjknidi ma jaty pɔn tyɔjk.

8

1 Jɔts ja nwindson'ajtim Jesús jam ja ojts ñijxy Olivos kojpkɔjxp,
 2 xjats ku yjajtaajky kyimjabom, winets ja ojts ñijxy jam tsaptɔjkjɔtp. Jɔts ja jam ɔy pɔn ñimejniyɔθ, winets ja y'ixaajky jɔts ja yik'ixpɔjktɔjkii'ñ.
 3 Jɔts ja kajpxwejpitɔjkti mɔt ja fariseotɔjkti, ja' ojts twaamendi tu'uk ja tɔ'ɔxyɔjk pɔn ja myigu'uk ñiyaa'y myɔt'ajtp. Jɔts idɔ'ɔn ja jam ojts yikpikta'aky mayjaa'y agujkp pɔn jaty jam wyinaty,
 4 jɔts ja tnimaadyi ja nwindson'ajtim Jesús:
 —Windsɔn, jap ya'at tɔ'ɔxyɔjk tɔ tyimykubaadi ku ja myigu'uk ñiyaa'y tmɔt'ajti.
 5 Yikutujkpy ja Moisés kyutujk jɔts adɔm yɔ'ɔbi tɔ'ɔxyɔjk nga'tspa'oo'kint. ¿Sɔ me m'ukwa'añ?
 6 Jade'en'ampy idɔ'ɔn ja ojts jade'en wya'andi jɔts ja tkajpxy'ejxwa'andi, jɔts ja jade'en tigati ttukpɔky'atwa'andi. Winets ja nwindson'ajtim Jesús wyindaajky, jɔts ja ojts ja kyɔtsa'jx ttajaabyinaxwa'jky ja naajx.
 7 Jɔts kumi yiktiibyɔjk'adɔtsp ja', winets ja kyookukiyii'ñ jɔts ja tnimaay:
 —Pɔni jam pɔn kapɔkmyɔt, wan ja jawyeen tkonji'iky ja tsaa jɔts ttaka'atst yɔ tɔ'ɔxyɔjk.
 8 Jɔts ja nayide'eñim ñaxkoogojmi, ja naajx ja yjay'adichpy.
 9 Jɔts ku ja ojts jade'en tmadowdi, jɔts ja yjanchnabyɔkyjajwiyidɔθ, jɔts ja ojts wya'kpidsɔmnidi nidu'uk jaty. Ja mɔjaa'dyɔjk jawyeen pidsɔmnidɔθ; xjats ku ja wyinaty tɔ pyidsɔmgɔxti, jɔts ja nwindson'ajtim Jesús nadyu'uk tyaañ mɔt ja tɔ'ɔxyɔjk.
 10 Winets ja nwindson'ajtim Jesús kyookukiyii'ñ jɔts ojts t'ixy ku ka' pɔn, ja tɔ'ɔxyɔjkyi jap wyinaty, jɔts ja tnimaay:
 —¿Ma net ja'adi pɔn mni'θθ'niyidip? ¿Ka' pɔn sɔ tɔ mduniyi?
 11 Jɔts ja ñimaajyɔθ:
 —Ka' windsɔn'ajtim pɔn.
 Jɔts nwindson'ajtim Jesús ja tnimaay:
 —Ni ɔts mets sɔ ngatu'unt. Nɔjknii, kidi m'ukpojkipituni.
Ja Jesús xyikujajimp xyikudɔθ'kximp
 12 Xjats ja nwindson'ajtim Jesús ojts jadigojk tmigajpxy ja mayjaa'y, jɔts ja tnimaay:
 —ɔts tu'uk tu'uk ja naxwii'ñit jaa'y nyikujajtaajkip nyikudɔθ'kxaajkip; pɔni pɔnts ɔ xjotmay'ajtp, pɔni pɔn ɔts ja nja' xpabɔjkip, ja'ats idɔ'ɔn yikmo'op ja wejin ja kajin jɔts ja tyukpaadit ja kunuu'lxy jujky'ajtin, niujuuni ja wimbeets kugoots kyajattit.
 13 Winets ja fariseotɔjk ja ñimaajyɔθ:
 —Kɔ'ɔm mets jam ɔy mnanktyiidyɔkiyi, ka'ap yɔ ma tyuñ.
 14 Jɔts ja nwindson'ajtim Jesús ja t'adsɔy:
 —Jade'en sɔ ɔ nwa'añ, tump yɔ' ɔy ɔ kɔ'ɔm nnanktyiidyɔkiyi. ɔts ja nnija'wip ma ɔ ndsɔθñ jɔts ma ɔ nnɔjkxt. Meets, ka' xnijawidi pɔni ma ɔ ndsɔθñ uk pɔni ma ɔ nnɔjkxt.
 15 Jade'en meets ɔy ti xpayɔ'ɔy sam ja naxwii'ñajtin ja kyutujkin. Ka'ap ɔts ɔy pɔn ti ndabayɔ'ɔy;
 16 jɔts kuts nbayɔ'ɔty ɔts, tiy ɔts ja ndiidyu'unin nbikta'akt, kumi ka' ɔ nadyu'uk ndiidyu'unt, nayide'en ɔts ja mɔt ndiidyu'unt ja nDeety pɔn ɔ xkajxp.
 17 Jade'en jap kyɔxja'ayi jap nɔkyɔtpty midi mee mgutujk'ajtpy, ku ja testig'ajtpi namajtsk tum jade'en wya'andi, ja'ats idɔ'ɔn yja' yikjanchjawidip.
 18 Jade'ents ɔts yam kɔ'ɔm nañidestig'ajtpi, jɔts jadu'uk ja nDeety pɔn ɔ xkajxp, ja' ɔ xnidestig'ajtp.
 19 Winets ja nwindson'ajtim yiktiibyijky:
 —¿Ma dɔ'ɔn ja mDeety?

Jøts ja nwindson'ajtim Jesús t'adsøøy:

—Meets, ka' mee xnijawi, jøts ni ja nDeety mee xkanija'wiyi; ku øts jeexyip xnijawidi, mnayinija'widipts meets jeexyip ja nDeety.

²⁰ Jade'en idø'on ja nwindson'ajtim Jesús wyaañ ku ja ixam wyinaty yik'ixpiky jam tsapøjkjotp, mā ja lmunsi meeñ wyinaty ja ñigajuun. Nika'apts ja ojts pøn myachi, kumi ka'anin ja wyinaty xyøga'pxy.

Nømp ja Jesús: "Ka'ap meets jap mibaat mnijkxy pøni mā ø nnijkxy"

²¹ Jøts idø'on ja nwindson'ajtim Jesús tnimaagyojmi ja mayjaa'y:

—Nøjknip øts, øy mee xja'ixa'at mi'lookpts meets yø mbøky; jap mā ø nnijkxy, ka'ap meets jap mibaat mnøjkxt.

²² Winets ja israelit jaa'y wyandøø:

—¿Wan yø ndejin ñankpya'ookwa'aniyi, patyts yø wya'añ ku adøm jap nganøjkxin mā yø ñijkxy?

²³ Jøts nwindson'ajtim Jesús ja ñimaagyidøø:

—Meets, ya mee mdsøñ, ya mee mgaxi'iky; øts, jam ø køjpx ndsøñ. Ya mee mnaxwiin'aty, øts ka'.

²⁴ Paty meets idø'on nnøjmi jøts ku mbøky xmi'ooktit; ku ka' xjanchjawidi pøni pøn øts, mmi'ooktipyimts idø'on ja mbøky jade'en.

²⁵ Winets ja nwindson'ajtim Jesús yiktiibiyiky:

—¿Pøn mets idø'on?

Jøts nwindson'ajtim Jesús t'adsøøy:

—Jaayim øts yø nnigajpxy ity ku nyik'ixpøjktøkiyi'ñ.

²⁶ May øts ja winmaa'ñ njagyepy midi ø ngajpxwampy, jøts mee nbayø'øwya'añ nayide'en. Tiy'ajtingøjpx ja kyajpxy pøn ø xkajxp, jøts pøni sa ø nnøjmi ja naxwiin'it jaa'y, jade'en øts idø'on ja tønmadøy jøts ku ja jade'en wya'añ.

²⁷ Ka'apts ja tja'gyukidi jøts kudam ja ja' yiknigajpxy ja Dios Teety.

²⁸ Ja'agøjpx ja ojts ñii'mxyidi:

—Ku meets jam kruskøjpx xpikta'akt, jaanimts meets x'ejxkapt jøts ku øts idø'on ja wyinaty sa tønwa'añ, jøts ku ka' ja ngø'ømwinmaa'ñ nyiktuñ; ja'ayi øts idø'on ngajpxy midi øts ja nDeety tøn xuknijawi.

²⁹ Pøn øts xkajxp, møøt øts ja n'ity; ka' øts ja nDeety nadyu'uk xmajtstu'uty, pø tum ja'axi ø ndumpy midi ja tyajotkujk'ajtpy.

³⁰ Ku ja nwindson'ajtim Jesús jade'en ojts wya'añ, winets may jaa'y ja ojts yjanchjawi.

Ka'nduknaxa'amp, jaa ja Dios yja' jøts ja mi'ku' yja'

³¹ Xjats ja nwindson'ajtim Jesús tnimaay ja israelit jaa'y pøn ja wyinaty tøn yjanchjawi:

—Pøni mnadyamiyojxidip tu'ugyi sa ixa nnøjmidi, meetspits idø'on tiy xjantyim-byabøjki'atp;

³² winets ja tyiiby yjanchpi xnijawidit, jøts ja myik'awa'atspidsømidip.

³³ Jøts ja ojts yide'en t'adsowdi:

—Ja Abrahamxi øøts ndeety'amøjip, jøts ka'anims øy pøn windi xyiktuñ nugo ajawi.

¿Sudsøts me mnimy jøts ku øø n'awa'atspidsøømt?

³⁴ Jøts ja nwindson'ajtim Jesús ja tnimaay:

—Janch øts idø'on nwa'añ ku mee nnøjmi, niduki'iyi pøni pøn pøkytiundip, ja pøky ja ñamyayi yja'bojknip. Pøkyatki'py ja ñamyayi y'ejtnidi.

³⁵ Tu'uk ja tumbi pøn yikøj'ømit'ajtnip, ka'ap ja nayide'en ja kutujk tjagyepy sam ja jaa'y ja y'u'nk y'unaj'k tjagyepyin.

³⁶ Jade'ents øts ja Dios Teety x'U'nk'aty jøts ku mee nyik'awa'atspidsøømt, xemikøjxpts ja jade'en.

³⁷ Øy meets ja Abraham xja'aadsi xkajøjki, xyik'ookwamppts meets nayide'en winaaagin, ja'agøjpx ku meets ø n'ayuujk xkagupøjki pøni sa njawa'añ.

³⁸ Pø ja'ats ø ngajpxy midi øts nDeety tøn xukjaty; jøts ku meets, pø ja'axi mee nayide'en mbadumpy midi meets mdeety mdani'ana'amip.

³⁹ Jøts ja ojts yik'adsøø:

—Ja Abraham øø ndeety'amøjip.

Yide'ents ja nwindson'ajtim Jesús ja ojts ñii'mxyidi:

—Ku meets jeexyip ja Abraham mjanch'u'nk'atyi'yi mjanch'unaj'k'atyi'yi, nayide'en meets jeexyip mjaa'y'aty sam ja ojts yjaa'y'atyi.

⁴⁰ Ni jade'ents, ø meets ja tyiiby yjanchpi tønjadukmadøy sam øts Dios Teety ja tøn xjaduknijawin, ne'egi xyik'ookwamp meets. ñni ja Abraham ojts jade'en kya'adi'ich sam meedin!

⁴¹ Nayide'en mee m'adi'ich sam ja mdeety y'adi'ichin.

Winets ja wyandøø, jøts ja nwindson'ajtim Jesús yiknimaay:

—Ka'ats øøts jadi'ini ngaxi'iky; ja Dios øø tu'ugyi nDios Teety'ajtpy.

⁴² Winets ja nwindson'ajtim Jesús ja tnimaay:

—Ku jeexyip ja Dios Teety xDios Teetyjawidi, xtsojkrp meets jeexyip, pø jamxi ø ndsoøn ma ja Dios jam ku øts ixyam nya'a'aty. Kidi ngø'ømwinma'a'ni'ipxi ø nmimimpy, pø ja Diosxi ø xkajxp.

⁴³ ¿Tiku wine'enin mguidyimyja'gyukidi sa ø njawa'a'än? Ka' xtyimyadoowajniidi ja nga-jpxy ja n'ayuujk.

⁴⁴ Ja miku' ja' mee mdeety'ajtpy; ja' mee mgøjø'ømit'ajtip jøts ja' mdunwandip ti jaty ja ñanktyunwajnip. Tso'onda'agyip ja miku' yikjaa'y'oo'knibøjkini. Nijuuni ja tkayiktuñ ja tyiiby i ja yjanchpi, jøts nijuuni tiy janch kyakajpxy. Ku ja tyaa'y'aty, jade'eñi ja kyajpxy sayim idø'øn ja myiku'atyin, ja'agøjxp ku yjantyimdyaa'yi, jøts ja' idø'øn tniwindsøn'ajtp ja taay'ajtk ja win'øø'nk.

⁴⁵ Kuts øts yam tiy janch njawa'a'än, ka'ats meets ø xmibiky.

⁴⁶ ¿Pøn jam winaagin ukwa'anwamp jøts ku øts pøky nmøødi? Kuts tiy janch nwa'a'än, ¿tigøjxp ku ø ka' xjanchjawidi?

⁴⁷ Pøn Dios ja'ajtip, myadoowajnip ja' ja Dios y'ayuujk; jøts kumi ka'ats meets Dios mja'aty, patyts meets ja ka' xpatmadoowajni ja y'ayuujk.

Jaayim ja Cristo ku ja Abraham yja'ajty

⁴⁸ Xjats ja israelit jaa'y ja ojts ñii'mxyiyi:

—Tyimdyiyimxi øøts idø'øn njadyimyjawa'a'än ku øø nnimy jøts ku me msamariitjaa'y'i, jøts ku ja miku' tø mdatøkiyi.

⁴⁹ Jøts ja nwindson'ajtim Jesús ja ojts yide'en t'adsøy:

—Niwine'enin øts miku' xkadatøki. Ja' øts ja'ayi ndumpy jøts øts Dios Teety nwindso'øgi, ja' mee xkadamo'e'jxp.

⁵⁰ Ka'øtsip ngø'ømja' n'ixaapy, øyi ja yjajaa'aji pøn øts nja' x'ixaajyip. Ja'ats tpayø'øpy pøn ødyump ka'ødyump.

⁵¹ Jøts janch øts idø'øn nwa'a'än, pøni pøn tmøjpiktakp sa ø nwa'a'än, nijuuni ja kya'ooktit kyawindigø'ødyit.

⁵² Winets ja israelit jaa'y ja y'adsoojyøø:

—Tønimts øøts inet yam ndyimyjanchjawinim jøts ku ja miku' tø mjanchtatøkiyi. Sa ja Abraham tø y'øøky møøt niduki'iyi ja Dios kyugajpxtyi, jøts me mwa'a'än: "Pøni pøn tmøjpiktakp sa ø nwa'a'än, nijuuni ja kya'ooktit kyawindigø'ødyit."

⁵³ ¿Ti me ndejin mjaaktyimdyajinajxpy jøts ku ka' myajada'aky øøts ja ndeety'amøj Abraham? Sa ja y'ø'jky jøts sa nayide'en y'oo'ktøø ja Dios kyugajpxy, ¿pønts mets idø'øn mdsaa'ñadyiyi?

⁵⁴ Jøts ja nwindson'ajtim Jesús ja t'adsøøy:

—Ku ø kø'øm nnankmyøjtøkiwya'anit, ka' ma tyuñ øts ja ngø'ømja'. Ja Dios Teetyts ja' ø xyikmøjtøjkp mididi mdejtip jøts ku ja' xDiosidi.

⁵⁵ Meets, ka' meets ja xnijawidi. Øts, wa'ats øts ja nnijawi, jøts ku ø nwa'ant jøts ku øts ja ka'ap nnijawi, janchtyimdyaa'y øts idø'øn wyinaty nwa'ant jøts ku øts sam meedsin. Njanchtyimñija'wipts øts ja' jøts nmimadøøpy øts ja' pøni sa ja wya'a'än.

⁵⁶ Jøts ja Abraham, pøn meets idø'øn m'aadsidip mgugojidip, xaxondaajk øts ja' ku tnijaw'aty kuts nmenwa'a'än ya naxwiñ; x'e'jx øts ja' jøts janch øy tsuj ja ñayjawi.

⁵⁷ Winets ja israelit jaa'y tnimaadyøø ja nwindson'ajtim Jesús:

—Ni kyaja'atynim ja mjumøjt wixijxmyajk, ¿jøts mjanch'uknimy jøts ku ja Abraham tø x'ixy?

⁵⁸ Xjats ja nwindson'ajtim Jesús t'adsøøy:

—Tiy janch idø'øn nwa'a'än, jøts ku øts jaayim wyinatyni ku ja Abraham kyaxi'jky.

⁵⁹ Winets ja tnixajidi ja tsaa' jøts ja ttaka'atswa'andi ja nwindson'ajtim Jesús; nayu'jtsi ja', jøts ja ojts pyidsø'mni jam tsaptøjktøp, jam ja mayjaa'y ja ttanajxy, jøts ja ojts jade'en cho'oni.

9

Ku ja Jesús ojts tyikwin'ejxwa'kxy ja winap jaa'y

¹ Xjats ku ja nwindson'ajtim Jesús jam wyinaty ñaxy, winets ja ojts t'ixy tu'uk ja yaa'dyøjk pøn wyinaty winap, jade'en ja tyimgye'exy.

² Jøts ja nwindson'ajtim Jesús ja pyabøjkrpitøjk ñimaajyiyøø:

—Windsøn, ¿sudsø yø jaa'y jade'en winap tø kye'exy? ¿Jade'en idø'øn n'ukwa'anint, ja tyeety idø'øn ndejin jantyimbyøkmøøtti, uk kyø'ømbøky idø'øn yø jade'en tuujnip?

³ Winets ja nwindson'ajtim Jesús ja ñimaajyiyøø:

—Kidi kyø'ømbøkyip yø jade'en kyuanwajtip, jøts nigidi ka'ap tyeety yø tpøkyi; jade'en'ampy idø'on yø jade'en yjaty, jøts yø' ñikøjxp yiktuk'ejxtit øy pøn midi ja Dios tyu'ump.

⁴ Wants øts ja tyunk tjæaktyimdyuujni jaæktsojknim; jotmøñ ø n'ukugoodsiñit kuts ja wyinaty ja tyunk ngatungøjxi pøn ø xkajxp.

⁵ Pøni wine'enin ø njaaktsøøni ya naxwiifñ, njaaktyimdyu'umbyimts øts jade'en sam ja jaj kyujajy kyudii'kxy. Jade'en øts ja naxwiifñit jaa'y ñamyayi nyikujajtaagidit nyikudøø'kxaagidit.

⁶ Kuts idø'on ja jade'en wyan'abajtiyi'ñ ja nwindson'ajtim Jesús, jøts ja ojts chujy tyiknaxkida'aky jam naxkøjxp, jøts ja naajx ja yii'nim ojts ttamimo'otsyø'øyi ja chujy. Mo'ontsu'nk tyik'øyi'ñ, ja'ats ja ojts yiktawinjaaxy ja winap jaa'y.

⁷ Jøts ja tnimaay:

—Nøjx m'atsnawyimbuji jam nømu'tjotp midi yiktejp Siloé —jade'en idø'on ja Siloé y'ayukpidsimy: ja' pøn ø yikexy.

Xjats ja winap jaa'y jam ojts ñijkxy jøts ja ojts ñawyimbuji, jøts ku dø'on ja ojts wyimbijty, win'ejxnip ja'.

⁸ Winets ja jaa'dyi pøn ja jam myigujøønip myigudøjkip, jøts ja'adi pøn jaty ja wyinaty tø y'ijxyi jøts ku ja wyinapi, ja'ats idø'on wandøø:

—¿Kidi ja'ajip yø' pøn ja y'ijty xumi'ixakp, pøn ja y'ijty xumilimuns'i'amidoop?

⁹ Jam winaagin wyandi:

—Janch ja' yø'.

Winaagin ja wyamidi:

—Ka'ap ja yø'øji, jantymñayide'en tam tyimy'ixy.

Kø'ømts ja jaa'y yide'en wyaañ pøn wyinaty tø wyin'ejxwa'kxy:

—Pø øtsimpts ja'.

¹⁰ Winets ja yiktiibyijky:

—¿Sudsomts yø mween tø yjaty, pø mwin'ejxnipst yjawi?

¹¹ Jøts ja t'adsøøy:

—Yø jaa'y midi Jesús txøw'ajtp, yø' mo'onts tø tyik'øyi jøts øts ja tø xawinjaaxy, yide'en ø xnimaay: “Nøjx m'atsnawyimbuji jam nøø'agø'øm midi yiktejp Siloé.” Xjats ø tø njanchnijky jøts kuts ø tø nnawyimbuji, jøts øts yø nween tø y'ejxwa'kxy.

¹² Jøts ja ojts tjæakytøwdi:

—¿Ma net ja jaa'y?

Jøts ja tnimaay:

—Ka' nnijawi.

Ku ja fariseotøjk tyiktøwdi ja winap jaa'y sudso wyin'ejxwa'kxy

¹³ Winets ja ojts twaanøjkxti ma ja fariseotøjk jamdi.

¹⁴ Tyimbyoo'kxin xøøwts idø'on wyinaty ku ja nwindson'ajtim Jesús tyik'øyi'ñ ja mo'onts midi wyinaty tø ttuktatsø'øky ja winap jaa'y,

¹⁵ paty ja fariseotøjk jam ttiibyøjkojmidi ja jaa'y sudso'ampy idø'on ja wyeen ja wa'ats y'ejxni. Jøts ja y'adsojimbijty ja':

—Mo'onts øts ja tø xawinjaaxy, xjats ø tø nwimbuji, paty øts ixyam wa'ats n'ejxni.

¹⁶ Winets winaagin ja fariseotøjk wyandøø:

—Ja jaa'y pøn jade'en tø y'adi'ich, ka' inet Dios ja tja'aji, kumi ka'ap ja twindsø'øgi ja poo'kxin xøøw.

Jøts winaagin wyaamidi:

—¿Sudso milagri'ajtin ja ndejin jade'en ttu'unt, pøni janch pojkpitumbi jaa'y tam ja wyinaty?

Jøts agø'ømyi jade'en ñawayanwa'kxnyidi ku kyanagyupikydi,

¹⁷ jøts ja jadigojk tyiktøgojmidi ja jaa'y pøn wyinaty winap uk'ejt:

—¿Jøts mets, sã mets idø'on mwa'añ, pøn idø'on yjawi ja jaa'y midi tø myikwin'ejxwa'kxyi?

Jøts ja wyaañ:

—Øts wamp, Dios ja' kyugajpxy.

¹⁸ Jøts ja israelit jaa'dyi ka'ap idø'on ja tjanchjawiwy'andi ku dø'on ja jaa'y y'ijty wyinapi, jøts ku ja tø wyin'ejxwa'kxni. Yiknajtswaa'wiyibaat ja tyeety ja tyaak,

¹⁹ jøts ja ojts tnøjmidi:

—¿Meets idø'on ya'at mmajnk? Janch winap idø'on yø tø kyaxi'iky, pø mnømdipxi. ¿Sudso'ampyts yø wa'ats wyin'ejxni?

²⁰ Winets ja u'nkteety y'adsoodøø:

—Sudsomts øøts yø n'u'nk nganijawit, pø winapxi dø'on yjanchke'exy.

²¹ Ni øø nganijawi sudso'ampy yø tø wyin'ejxwa'kxy, jøts nija' øø nganijawi pøni pøn yø tø yiktsojkkxyi yø wyeen. Yiktøwdi jade'en kø'øm; pø møjaa'ñixi yø', wan kø'øm mdukmadøydi.

²² Jade'en'ampy idø'øn ja tyeety tyaaq ojts jade'en wya'andi, tsø'jkidip ja', pø tøxi ja israelit jaa'y wyindsønidi wyinaty tkajpxy'ajtnidi, ku ja abiky yikpikta'aktit pøni pøn wamp jøts ku ja nwindsøn'ajtim Jesús Cristo'aty, midi ja Dios tkajxp.

²³ Paty ja møjaa'y wyandøø: "Yiktøwdi kø'øm, pø møjaa'ñixi yø', wan kø'øm tnigajpxy."

²⁴ Winets ja israelit jaa'y twaadsowdi jadigojk ja jaa'y pøn idø'øn y'ijty winap, jøts ja ojts tnøjmidi:

—Tukmadoo øøts tiy janch sam Dios t'ijxyin; jade'en øøts yø nnijawi jøts ku yø pyojkpitumbijaa'y pøn tø myiktsø'øgyi.

²⁵ Jøts ja t'adsøøy:

—Ka'ap øts yø nnijawi pøni pøn yø', pøni pojkipitumbi jaa'y uk kapojkipitumbi jaa'y yø'. Yø'øyi øts nnija'wip jøts ku øts y'ijty nwinapi, ixyam wa'ats ixyam nwin'ejxni.

²⁶ Jøts ja tyiktøgojmidi:

—¿Sa ja tø mduñi? ¿Sa ja tø ttuñ jøts ku ja tø myikwin'ejxwa'kxyiyi?

²⁷ Jøts ja yide'en t'adsøøy:

—Tø meets ja njadukmadø yøts meets ja ka' xnojpikta'aky; ¿winaaq ojk nnigajpxt? ¿Uk ja' mdsøjktip jøts ja yja' xpabøkwajni?

²⁸ Winets ja y'amyiknimaay chaachyiknimaay, yide'en ja wya'andi:

—Yø jaa'y me mbabijkpy, øøts ja Moisés øøts yja' nbabøjkip.

²⁹ Nnija'wipxi øøts ja' ku ja Moisés ojts myigajpxyi ja Dios; yø jaa'y, nguidyimñija'wip øøts yø' pøni ma yø chøøñ.

³⁰ Jøts ja t'adsøøy, yide'en ja tnimaay:

—iYø' idø'øn tiy janch nima'at yikja'wip, ku meets yø xkanijawi pøni ma yø chøøñ, jøts tøts øts yø xyikwin'ejxwa'kxy!

³¹ Wa'atsxi yiknija'wip jøts ku Dios ka' ja' tmadø yøn pojkipitumbijaa'y'ajttip; ja'ayi ja myadøoip yja' pøn ja windsø'jkxyip, pøn ja padu'unxxyip ja yja'.

³² Ka'axi yjawi ma pøn nmadøynim ku tu'uk ja winap jaa'y ja jaa'y tyikwin'ejxwa'kxy midi winap tyimgya'jx.

³³ Ku yø jeexyip Dios tkaja'aji, niti yø jeexyip tkatuñ.

³⁴ Xjats ja yiknimaay:

—Jøts mets, ku mets pøkyøtpy tø mgue'exy, ¿jøts mets idø'øn jade'en xyik'ixpøkwa'añ?

Jøts ja jap ojts yik'ixkajxpidsimy.

Pøn tkanija'widip ja Dios yja'

³⁵ Jøts ja nwindsøn'ajtim Jesús tnmadøø yøts ku ja winap jaa'y jap wyinaty jade'en tø yikajxpidsimy; jøts ja ojts tminabyaadyi, winets ja ojts tnøjmi:

—¿Mmøja'wip mjanchja'wip Dios U'nk?

³⁶ Jøts ja ojts ñi'mxyi:

—Windsøn'ajtim, tukmadoo øts pøn ja', wan ø tmøjawi tjanchjawi.

³⁷ Jøts ja nwindsøn'ajtim Jesús ja t'adsøøy:

—Tø mets ja x'ejxni; pø øtsxi dø'øn ja', ixya kø'øm møøt mmadya'aky.

³⁸ Winets ja jaa'y ñagyuxendyaajkøø, jøts ja twinguxanaay ja nwindsøn'ajtim Jesús, jøts ja tnimaay:

—Windsøn'ajtim, nmøja'wip njanchja'wip mets.

³⁹ Jøts ja nwindsøn'ajtim Jesús wyaañ:

—Ja' øts ya naxwiñ tø nnimiñ jøts ja payø'øyin tyunit tiy'ajtingøjpx; pøni pønnts wimbeets kugoots, win'ejxwa'kxtipts ja' jøts ja t'ejxtit tnijawidit; pønnts tja'ejxtip tjanija'widip jøts tkamibøkti, ja'ats tandip wimbeets kugoots ejxim winap jaa'yin.

⁴⁰ Winets winaagin ja fariseotøjkti pøn jaty jam wyinaty, ku ja jade'en tmadowdi, winets ja ojts tnøjmidi ja nwindsøn'ajtim Jesús:

—¿Uk wan øøts idø'øn nayide'en nwimbeedsy?

⁴¹ Jøts ja nwindsøn'ajtim Jesús t'adsøøy:

—Ku meets jeexyip mwimbeedsy kugoodsy, ka' meets jeexyip myiktapøky'ejxti ja mbøky. Kumi mnømdip jøts ku x'ejxti xnijawidi, mdaja'atidipts meets ja mbøky.

10

Jade'en ja Jesús n'ukpiktaajkint ejxim tu'uk ja øybi kurajt n'ejxint

¹ Janch øts idø'øn nwa'añ, pøn jap katøjkap ma ja borreek ja kyemy'aaw, pøn abiky'ampy tøjkip, ja maa'tspi dø'øn ja'.

² Jøts ja jiyujk'ejxpi, ja' jap najxp ma ja kemy'aaw jap.

³Ja yiktøjk'awatspi, ja' ja yik'awajtsxiyip ja tøjka'aw jøts ja tyøki, jøts wa'ats ja byorreek ja yukmadøyi. Xyømøøpy ja tu'uk jaty jøts ja tyikpidsimy jap kemyjøtpy.

⁴Kuts ja tø tyikpidsømguixy tuki'iyi ja yjyujk jøts ja jawyeen twinway, payø'øyip ja' kumi wa'ats ja yukmadøyi.

⁵Ka'apts ja nugo ajawi tpanøjkxti ja wyenkpi; ne'egi yjaaktyimkyajkidip ja', kumi ka'ap ja tyukmadowdi ja wenkjaa'y.

⁶Ja'agøjxp ja nwindson'ajtim Jesús ojts jade'en tmimadya'aky ja jaa'y, jøts ja ttuk-tamimadowiyya'añ sa ja yja' yjaa'y'atti, ka'apts ja ojts tmadoodowdi pøni ti dø'øn ja jade'en yjatijpy ku ja jade'en ñii'mxyidi.

Jade'en ja Jesús n'ukpiktaajkint ejxim tu'uk øybi borreek'ejpxi

⁷Winets ja nwindson'ajtim Jesús jadigojk tmimaagyojmi ja jaa'y:

—Janch øts idø'øn nwa'añ: Jøts ku øts idø'øn jade'en ñamyayi nnabyikta'agyi sam tøjka'awin, ma ñaxtit øts ja nja', sam ja borreek ja tyøjk'aw t'ayø'øydi.

⁸Jøts ja win'øø'mbi pøn tø y'atsmendi jøts wy'a'andi ku Dios tø kyexyi, jade'en idø'øn yjamendi ejxim ja maa'tspin; øts njaa'y, ka'ap ja ñagiyajkidi nugo ajawi.

⁹Øts idø'øn jade'en sam ja tøjka'aw; pøni pønts jap tøjkidip, ja'ats idø'øn nitso'ok'attip. Jøts øts ja ndanitanit ja nja', ejxim ja borreek u'nk yiknitani jap kyemyjøtpy.

¹⁰Ja'ayi ja maa'tspi ñimimpy jøts ja myeech, jøts ja yikjaa'y'øøky jøts ja yikudigøy; øts, ja' ø nñimimpy jøts meets øy yikxon xpaattit ja kunuu'kxin ja jukky'ajtin.

¹¹Jade'en øts idø'øn sam ja jaa'y pøn øy borreek'ejxp. Ku dø'øn ja øy t'ixy ja byorreek, øy sa tmiwanjaty ja kø'øm, nugo ku byorreek ja kya'øøky.

¹²Pøni pøn mijuy tump, ja'ayi ku ja t'ixy jøts ku ja myiñ ja awa'añ miy'uk, jøts ja japyi tnike'eky ja byorreek jøts kyakni, kumi ka'ap ja tyimya'aji mido ja jiyujk ñi'ejxpi'ajtpy, jøts nika'ats ja tkø'ømja'aji. Xjats ja miy'uk tmajtsni ja borreek, jøts ja jadi'iñi tyik'ayø'øbyaky.

¹³Jade'en'ampy ja'abi jaa'y kye'eky kumi mijuy ja tyuñ, patyts ja ka'ap tkwenti ja borreek.

¹⁴⁻¹⁵Øts idø'øn øy jiyujk'ejxpi'ajtp. Sam øts ja Dios Teety xnijawin jøts wa'ats øts ja nnijawi; nayide'ents øts idø'øn ja njaa'y wa'ats nnijawi, jøts øts ja nayide'en wa'ats xnija'wimiyidi. Øts yø nguwjanjatip.

¹⁶Jøts jap øts ja borreek abiky njaa'kmøødi mido kajakp'ajtp ya kemyjøøty; nyikme'empts øts jaa ja nayide'en. Jøts xmimado'odip øts ja', jøts tu'ugyi ja ñi'ejxpi yjagyajpniyit.

¹⁷Ja'agøjxp øts ja Dios Teety xtsøky kuts ngu'oogidit yø'ødi, jukkyøøkpts øts jadigojk.

¹⁸Nipøn ø mibaat xkayik'øøky, kø'øm øts ja nnaajtsawit jøts ø nnagyøyakit ngø'ømsojkingøjxp. Tiy'ajtingøjxpts øts nnagyøyakiyit, jøts nay tiy'ajtingøjxpts øts njukkyøøkt jadigojk. Tøxi øts ja Dios Teety jade'en x'ane'emy.

¹⁹Xjats ku ja israelit jaa'y jade'en ojts tmadowdi ja kajpxy ja ayuujk, jøts kø'ømyi ñawyanwa'kxkojmiyidi.

²⁰May ja jamdi pøn wandip:

—¿Tiku yø xtsaamyøjpiakta'akti, pø miku'ts yø tø tyatøkiyi, pø loki jajtpts yø'?

²¹Jøts wyenkpi wyamidi:

—Ka'ap jeexyip pøn jade'en kyajpxy, ku jeexyip pøn ja miku' tø tyatøkiyi. ¿Ti ma ja miku' tø t'ukykwin'ejxwa'kxy ja winap jaa'y?

Ku ja israelit jaa'y ojts twindsowdi ja Jesús

²²Yu'aats nep'aats idø'øn wyinaty pyatpy, jamts idø'øn Jerusalén ja xøøw wyinaty tyuñi, ku ja yikja'myech yikxøduñ ja tsaptøjk.

²³Jøts idø'øn ja nwindson'ajtim Jesús jap wyinaty wyidity tsaptøjkjøtpy, ma ja tøjka'aw jap mido yiktejp Salomón ja Tyøjkwimbo'kx.

²⁴Jøts ja israelit jaa'y ja ojts ñawya'k'awidityiyi, jøts ja yiknimaagy:

—¿Ejtp øøts idø'øn jade'en xyik'etwa'añ maapy tajp? Pøni mets tam idø'øn janch Cristo mido Dios tkajxp, ixymyits øøts xtyimdyukmado'ot.

²⁵Jøts ja nwindson'ajtim Jesús ja t'adsøøy:

—Tø mee njadukmadøy, jøts meets ja ka' xmibiky. Tuki'iyi ti jaty ø ndumpy, ti jaty ø xanigutujk'ajtp ja Dios Teety, yø'øts ja wa'ats tyimjyayiknigaxø'kp;

²⁶meets, ka' meets xjanchjawi, kumi ka' mee mnayja'aji mido ø nja'ajtpy, sam aamyi tø nnojimidi.

²⁷Jade'en øts ja nja' xyukmadøy sam ja borreek ja ñi'ejxpi tyukmadøyin, jøts wa'ats øts ja nnijawidi. Xpaduujnidipts øts nja' ja'adi.

²⁸Øts ja nmøødyip ja kunuu'kxy jukky'ajtin mido xemikøjxp, jøts nijuuni nøjkk kyawindigøydi, jøts nipøn øts ja xkapøjkit ku øts ja ngøjø'ømit'atti.

²⁹Ja Dios Teety øts ja xagøøjkjip, ja' tu'uk møj, ka' pøn jade'en, pønts ja mibaat uk kønaxip jøts ja yikpøjkit.

³⁰Øts møøt Dios Teety tu'ugyi øøts.

- ³¹ Winets ja israelit jaa'y jadigojk tkonjə'əktəə ja tsaa, jəts ja ttaka'atswa'andi.
³² Xjats ja nwindson'ajtim Jesús ja tnimaay:
 —Tə mee kawinaak ojk ja mwingujky nduujni ja ədyu'unin Dios Teety myək'ajtingəjxp.
 ʒJa'ats meets yam xagubatwamp ku meets yam xka'atswa'añ?
³³ Winets ja israelit jaa'y y'adsoodəə, jəts ja nwindson'ajtim yiknimaay:
 —Kidi ja'ajip mets yam myiktaguga'adsiwyamp, ku mets ja ədyu'unin tə xjadyimy-jabikta'aky, pə ja'axi yam myiktagubatwamp ku ja Dios kajaa xtyimiyəjəjxpəy. Pə nugo jaa'yxi mets, jəts jade'en mnabyikta'agyi sam Dios.
³⁴ Jəts ja nwindson'ajtim Jesús tnimaay:
 —Jade'en meets ja mgutujk jap yja'ayi jəts ku Dios yide'en wyaañ: “mDios meets.”
³⁵ Janch yiknija'wip jəts ku Dios kyajpxy jap yide'en wya'añ, ka'ap ja pən tkagupiky; ja' ja Dios ojts diostijy ja jaa'y pən ja ojts tyiknaxy ja kyajpxy ja myadya'aky.
³⁶ Jəts kuts əts Dios tə xwiwəich abiky, jəts əts ja ya tə xkexy naxwiin, ʒsudsots meets jade'en mwa'añ jəts ku əts ja tə nmigajpxigəy, ku tə nwa'añ jəts ku ə nDios U'ngi?
³⁷ Pəni ka' əts ja' nduñ midi ja Dios Teety tyumpy, kidits mee xjanchjawi.
³⁸ Kuts əts ja nduñ, əy mee xjagajanchjawi janchjə'widik əts ja ndunk, jəts jade'en xnijawidit jəts ku əts ja Dios Teety xməət'ity, jəts əts ja nayide'en nməət'ejtm.
³⁹ Winets ja jadigojk tjadyimyjatsumwandəə, kajkts ja nwindson'ajtim Jesús.
⁴⁰ Jəts ja ojts wyimbejtnimi nəjknimi jam xəəbidsimy'ampy, mə ja məj nəə midi yiktejp Jordán, jəts ja jam tyaañ mə ja Juan y'ijty yiknəbety.
⁴¹ Janch namay ja jaa'y ja ojts t'ats'ejxti jam, jəts ja wya'andi:
 —Tyimdyiy tyimyjanch tam idə'ən, əy idə'ən ja Juan Bautista ojts tkatuñ ja milagri'ajtin, ka'pəxts ja y'ayuyk pyidsimy sə tnimadyaajky ya'atpi jaa'y.
⁴² Jəts ja'abi etjotp janch namay ja jaa'y ojts tmibəkti ja nwindson'ajtim Jesús.

11

Ku ja Lázaro y'əjky

- ¹ Ja də'ən tu'uk ja jaa'y, yaa'dyək, midi pəjkip. Lázaro ja xyəw, jam ja Betania kyugajpi, nay jam mə ja María jəts ja y'uch Marta jam kyugajpidi.
² Yə María də'ən ja' pən yə Lázaro chə'əjip, ja pamaay, ja'ats idə'ən ojts ja aceite pa'əkkxu'kpi tpiktaajkxiyi ja nwindson'ajtim Jesús tyeky, jəts ja wyaay ja ojts ttuktati'ich jadigojk.
³ Ja'ats idə'ən məət ja y'uch tkajpxy nīgajxidəə ja nwindson'ajtim Jesús:
 —Windsən'ajtim, janch pəjkip ja mmigu'uk.
⁴ Xjats ku ja nwindson'ajtim Jesús ja jade'en tmadəy, winets ja wyaañ:
 —Ka'ap yə pa'am myajada'akt jəts ja tyimyk'ooft; jade'en'ampy idə'ən ja jade'en yjaty jəts ja Dios myək'ajtin wyingaxə'əkt, jəts yə'əbi pa'amgəjxp yiktuk'ejxtit ja jaa'y jəts ku ja Dios U'nk nayide'en tməət'aty ja mək'ajtin.
⁵ Əy ja nwindson'ajtim Jesús tjanchjaba'ayəy ja jaa'dyi, ja Marta, ja María, jəts ja Lázaro, 6 ku ja yiktukmadəy jəts ku ja Lázaro pəjkniiyi, jəts ja jam majtsk xəəw yjaaktyimdyə'aniiyi'n mə də'ən ja jam wyinaty.
⁷ Winetnims ja tnimaay ja pyabəjkpitəjk:
 —Wan jam tjaa'myindi jadigojk jam Judeit naxjotp.
⁸ Jəts ja pyabəjkpitəjk ja nimaajjiyəə:
 —Windsən, pə jamts ja israelit jaa'y jawaani mgaka'ats'o'jkəə; ʒjəts nay jam mnəjkwə'añ jadigojk?
⁹ Jəts ja nwindson'ajtim Jesús wyaañ:
 —Ka' pən sə xu'unt ku ka' kya'pxiim. Niti tsə'əgi ngaməət'aty sam nwidejtin xinaxy, awa'ats ja nəə' ja tuu' ja' ku tyuk'əjxpəaty ja ya'it naxwiin'it jaj;
¹⁰ kuts ja koots'ajtin yja'aty, janchjəptsə'əgi jəpjaw i nwidejtint, pə ja jajxi xka'ejtxa'am.
¹¹ Jəts ja nwindson'ajtim Jesús wyaañ:
 —Maanip ja nmigu'uk Lázaro; n'atsyuxpts əts inet ja'.
¹² Winets ja pyabəjkpitəjk ja nimaajjiyəə:
 —Windsən'ajtim, pəni tə tam idə'ən ja mya'oo'kni, pə məkəpəkwənip idə'ən ja'.
¹³ Jade'en'ampyts ja nwindson'ajtim Jesús ja tijy, jəts ku ja Lázaro wyinaty tə y'oo'kni, jəts ja pyabəjkpitəjk jade'en ja wya'andi, jade'en ja tijy wya'añ jəts ku ja nugo mya'ay.
¹⁴ Xjats ja ojts wa'ats tyukmadəyidi ja nwindson'ajtim Jesús:
 —Tə ja Lázaro y'oo'kni.
¹⁵ Ne'egi xondəkp əts jade'en jəts ku ə tə ngajam'aty, tyimiy'əy'ajtp ne'egi jade'en jəts mee xjanchjawit. Wants tjaa'myindi jəts n'ats'ejxint.
¹⁶ Winets ja Tomás, pən yiktejp xeeñ'u'nk, ja'ats tnimaay ja myibabəjkpitəjk:

—Wan adom nayide'en tjaa'myindi, jøts yø nmøøt'oo'kint.

Ja Jesús tyuk'awimbejtíp ja jaa'y ja jujky'ajtin jøts ja' jujky'ajtin'ajtp kə'om

¹⁷ Jøts ku ja nwindson'ajtim Jesús jam yja'jty, jøts ja tpaajty ja Lázaro, jøts ku ja wyinaty myaktaxk xøøwip tə ñajxøjkiñi.

¹⁸ Wíngon ja Betaniit kajp tyañ ma ja Jerusalén jam, majtsk kilometro jagujkpin ja yjagami.

¹⁹ Jøts namay ja israelit jaa'y jam wyinaty tə y'atstøjk'ayø'ødyi ma ja Marta jam møøt ja María, jøts ja tkajpxjot'amøjkidi ja'agøjxp ku ja myigu'uk ja wyinaty tə y'ookni.

²⁰ Xjats ku ja Marta tñimadøøy jøts ku ja nwindson'ajtim Jesús jam wyinaty yja'atwa'añ, winets ja chø'jñ jøts ja tjøpkubajtyii'ñ; jøts ja María jap ja tyøjkjotpy tyañ.

²¹ Jøts ja Marta tñimaay ja nwindson'ajtim Jesús:

—Windsøn'ajtim, kuk jeexyip tə mya'aty, ka'abik øts jeexyip ja nmigu'uk tə y'øøky.

²² Jade'ents ø nnijawi jøts ku mets ja Dios Teety mmo'ojit pøni ti mets ja m'amidøøpy.

²³ Winets ja nwindson'ajtim Jesús ja ojts ñii'mxyi:

—Jujky'atp ja mmigu'uk jadigojk.

²⁴ Xjats ja Marta wyaañ, jøts ja tñimaay:

—Janch jade'en, nnija'wip øts jøts ku ja jadigojk t'awimbetit ja jujky'ajtin, ku ja pyidsø'ømt jadigojk ma oo'kpi, jaanimts ja'abi xøøwnim ku Dios tyika'pxt.

²⁵ Winets ja nwindson'ajtim Jesús ja tñimaay:

—Øts idø'on ja' pøn ttuk'awimbejtíp ja jaa'y ja jujky'ajtin, jøts øts jujky'ajtin'ajtp kə'om. Pøni pøn ø xjanchja'wip, øy ja yja'øøky, jujky'ajt kunaxpts ja ejtp.

²⁶ Jøts pøni pøn ja jaakjujky'ajttip jøts pøni xjanchja'widip øts, ka'ats ja y'anmija'win nøjkk wyindigøy. ¿Mjanchja'widip?

²⁷ Jøts ja tñimaay:

—Windsøn'ajtim, njanchja'wip øts. Ndyimyjanchja'wip øts ku me mCristo, ja Dios U'nk, midi'iyip idø'on y'ity ya ñaxwiñ menwamp.

Ku ja Jesús ojts twinya'axy ja Lázaro ku tə y'øøky

²⁸ Xjats ku ja Marta jade'en y'ukwaañ, winets ja ojts t'atsyajxi ja chø' María, jøts ja ojts amaa'tsk tñøjmi:

—Ixa ja windsøn ya, jøts ixap mwaadsøyi.

²⁹ Ja'ayi ja jade'en tñadøøy, jøts ja María jatyi pyidi'jky jøts ja ojts t'ats'ixy ja nwindson'ajtim Jesús.

³⁰ Ka'anim ja nwindson'ajtim Jesús wyinaty kyajptøki; nay ixjammim ja wyinaty ma ja Marta ja møøt tə ñabyaadyi.

³¹ Jøts ku ja t'ejxtøø ku ja María pyidi'jky ku ja wyinaty putyi tə pyidsimy, jøts ja israelit jaa'dyi midi jam wyinaty tøjktotp tkajpxjot'amøjkidip ja ku'oogi, xjats ja tpadso'ondøø, jade'en ja wyinmaydi jam ja tijy yaxpi ñijky ma ja oo'kpi jam wyinaty tə ñaxøki.

³² Winets ja María, ku ja yja'jty ma ja nwindson'ajtim Jesús jam wyinaty, jøts ja ojts ñagyxendya'agywi nwindson'ajtim tyekyjø'm, jøts ja tñimaay:

—Windsøn'ajtim, kuk jeexyip tə mya'aty ka' øts jeexyip ja nmigu'uk tə y'øøky.

³³ Xjats ku ja nwindson'ajtim Jesús ojts t'ixy jøts ku ya'axy ja María jøts ja israelit jaa'y nayide'endi midi ja María jam wyinaty tə pyadsøøñiyi, winets ja nwindson'ajtim ja jotmay ojts pyaadyiyi jøts ja ojts tymchaachjawi.

³⁴ Winets ja tyiktty:

—¿Ma tə xyiknaxøkidi?

Jøts ja yiknimaay:

—Windsøn'ajtim, men x'ats'ixy.

³⁵ Xjats ja nwindson'ajtim Jesús yjanchyajxy.

³⁶ Jøts ja israelit jaa'y winet wyandøø:

—Ejxti yjantymchøjkpy tam yø tə y'ity.

³⁷ Jøts ja jade'en winaagin wyandøø:

—Pø yø'øxi ja winap jaa'y tə tyikwin'ejxwa'kxy, ¿sudso yø niwine'enin sa tə tkatuñ ja Lázaro jøts ja jeexyip tə kya'øøky?

Ku ja Lázaro yujkpyiky jadigojk

³⁸ Jøts ja nwindson'ajtim Jesús ojts ja jotmay jadigojk tyatøkiyi, jøts ja ñijky ma ja oo'kpi jam wyinaty tə ñaxøki. Tøjk'aawin ja tsaa jam, jøts nayi tsaa ja tə yjaaktyimykta'agi'iy.

³⁹ Jøts ja nwindson'ajtim Jesús wyaañ:

—Jigø'ødi yø tsaa.

Winets ja Marta, midi ja oo'kpi y'uchip, ja'ats ja ojts ñii'mxyi:

—Windsøn'ajtim, pø janchxuu'knip inet yø, pø myaktaxk xøøwipts yø y'oo'kni.

⁴⁰ Jòts ja nwindson'ajtim Jesús ñimaajyøø:
 —¿Ti kidi ø tø nniagjpxy jòts pøni ku xjanchjawwi, winets x'ejxit ja Dios myøk'ajtin?
⁴¹ Winets ja tjigiidi ja tsaa. Jòts ja nwindson'ajtim Jesús jam tsajpwemp ojts pyat'ixy, jòts ja wyaañ:
 —Dios Teety, dioskujuyip ku øts ja n'ayuujk tø xmadojyiyi.
⁴² Nniija'wip øts jòts ku mets ejtp ja nja' xmadojyiyi, jòts ja' øts jade'en xyikwamp jòts yø jaa'y ja øy'ajtin tpaattit pøn jaty ixaadi, jòts tjanchjawidit jòts ku mets xkexy.
⁴³ Xjats ku ja jade'en wyan'abajtiyii'ñ, jòts ja møk wyaañ:
 —¡Lázaro, pidsøm jap!
⁴⁴ Jòts ja oo'kpi pyidisiimy køpity pakpity, jòts ja wyeen y'aa w twinwets'aty ja wet. Winets ja nwindson'ajtim ñimaay ja jaa'dyi:
 —Køkajti pakajti jòts xmajtstu'uttit, wan tniijkxy.

Ku ja jaa'y tkajpxy'ajttøø jòts yikmatst ja Jesús

⁴⁵ Ja'agøjxpts ja israelit jaa'y namay tjanchja'widøø ja nwindson'ajtim Jesús midi ja María jam wyinaty myøøt, jòts ja' ojts t'ejxti ku ja nwindson'ajtim Jesús jade'en ttuun.

⁴⁶ Winaagin tniinøjktøø jòts ja ojts t'ats'ejxti ja fariseotøk, jòts ja ojts ttamimadya'akti sa ja nwindson'ajtim Jesús wyinaty tø y'adi'ich.

⁴⁷ Winets ja fariseotøk jòts ja teetywindsøndøjk møøt ñamyukidi ja kutujk adsinaabyidi, jòts ja ojts ñømdi:

—¿Sudso ndaabyajtindit? Janch kawine'en yø jaa'y milagri'ajtin tjantyuni jòts ja ejxa'an tpiкта'aky.

⁴⁸ Ku yø jade'eñi n'ixmajtsindit, janch niduki'iyi jaa'y yø yjanchja'winiyit, jòts ja romit kudunktøk myenidit, jòts ja tyikudigøøñidit adøm yø ndsaptøk jòts adøm yø ngajp.

⁴⁹ Nay ja'abi jaa'y txøøw'ajtp Caifás, pøn wyinaty teetywindsøn'ajtp ja'abi jumøjt, ja'ats ja ojts ñii'myxidi:

—Mguidyimñija'wip mee ti,

⁵⁰ ni xkanijawidi kudam adøm njayik'ødyunwa'añindi ku tu'ugyi ja jaa'y tku'oogit ja ñaaix ja kyajp, jòts kidi tuki'iyi kyudigøøgyøxt wine'en ja naajx ja kajp.

⁵¹ Kidi kyøømwinmaa'ñipts ja Caifás yiktumpy ku ja jade'en wya'añ: jade'en'ampy idø'øñ ja', kumi ja' wyinaty teetywindsøn'ajtp ja'abi jumøjt, xjats ja Dios ja ojts yikwa'añi jòts ku ja nwindson'ajtim Jesús y'ookt tkudanit ja israelit kajp ja israelit naajx;

⁵² jòts kidi tyimy ja kajp tyimy ja naajx, ja'ayip nayide'en jòts ja niduki'iyi ja Dios y'u'nk y'unaj'k tyikyø'omyukwängøjxi pøn wyinaty tø yø'øwya'kxnidi.

⁵³ Winet ets ja israelit kudunktøk tniwinmaa'yidøø jòts ja nwindson'ajtim Jesús ty-imy'ookt.

⁵⁴ Ja'agøjpx ja nwindson'ajtim y'lijty ka' nugo ajawi y'ukwewejtni jam may israelit jaa'yjotp, ojts ja jam cho'oni Judeit etjotp, jòts ja ojts ñijkxy ma jam wingon ja abak et midi nugo tsayjoojt. Jam ja ñijkxy ma ja kajp txøøwi Efraín, jamts ja ojts tmøøtsøøni ja pyabøjkpitøk.

⁵⁵ Tyimdyøts jòts tpatnit ja paski xøøw midi ja israelit jaa'y tyundip, jòts idø'øñ ja mayjaa'y yjantyimñøjktxi Jerusalén, jòts ja jam ttunwa'andi tpadunwa'andi ja kostrumbri, jòts pyøky ja wya'atstii ku ka'aninim ja paski xøøw tpaaty.

⁵⁶ Jòts ja nwindson'ajtim Jesús jam yjanchyik'ixa'ay ku ja jap tsaptøjkjotptyi, jòts ja xem yam ñawya'añidi:

—¿Sa mee m'ukwa'añ? ¿Me'emp ja yjawi xøbatpi uk ka'?

⁵⁷ Jòts ja fariseotøk, jòts ja teetywindsøndøjk, tø ja wyinaty tni'ana'amdi jòts ku pøn t'ext tnijawit ja nwindson'ajtim Jesús jòts ja jaty ñniagjpxt, winets ja nwindson'ajtim Jesús yikmatst jòts ja yiktsu'umt.

12

Ku ja Jesús ojts yiktagujaaxy ja pa'akxuu'kpi

¹ Xjats ku wyinaty ja paski xøøw tkapaatynim jaduduik xøøw, winets ja nwindson'ajtim Jesús ojts ñijkxy jam Betania ma kyugajpi ja Lázaro, pøn ja wyinaty tø tyikujkpyiky jadigojk.

² Jamts ja a'ux y'øiyii'ñ jòts ja nwindson'ajtim Jesús ja yiktawindsø'øgi; ja Marta ja jam ojts wyingi'iyi, jòts ja Lázaro ja tmøøtkay møøt pøn jaty jamdi.

³ Winets ja María tyikmiini kujkwa'kxy lyitrin ja aceite midi pa'akxuu'kp, jòts janch tsowi ja', ja'ats ja ojts ttaja'ixiyi ja nwindson'ajtim Jesús tyeky, jòts ja ñajyawaayi ttuktatijich. Amuum ja tøjkojot pya'akxuu'kpøjkijxy.

⁴ Jòts ja Judas Iscariote, midi ja Simón myajnkpi, midi ja nwindson'ajtim Jesús pyabøjkpi'ajtpy, jòts midi ja wyinaty køyakwajnip, ja'ats jade'en waan:

⁵ —¿Tiku yø pa'akxuu'kpi ne'egi tø kyayiktøøky? Tigøøk magø'pxy denariin jeexyip tsow'aty, jòts ayooobi jaa'y ja jeexyip yiktabudøki.

⁶ Kaja'agøjpxip ja Judas jade'en wya'añ ku ja tpa'ayøj ja ayoobi jaa'y, pø ja meeñxi ja ne'egi pya'ayøøpy. Ja winmaa'n ja yikyø'øpy ku ja myeech, jøts kumi jam ja wyinaty tkøjø'm'aty ja meeñ'abøjk'i'n mid'i'ibi ja myibabøjkpitøjk myøøt'ajttip, jøts ja amaa'tsk tyukpiky tyukøñ ja meeñ mid'i yik'ejtipp.

⁷ Jøts ja nwindson'ajtim Jesús tnimaay:

—Majtstu'tu, ja' yø ixa tø tpiakta'aky mid'i tump ku ø nnaøjkiñit.

⁸ Ja'atpyim ayoobi jaa'y, øy juuni jaty xmay'attit xpudøkidi; jøts øts, ka' meets ja xumiwin'ejxkunaxt.

Ku ja Lázaro yikajpxy'aty ku tyik'ookwa'andi

⁹ Jøts ja israelit jaa'y may tnimadowdi ku ja nwindson'ajtim Jesús jam wyinaty Betania, jøts ja ojts tninøjkxti, kidi ja nwindson'ajtim Jesús nadyu'uk yik'ejxwamp, nayide'en ja t'ejxwa'andi ja Lázaro pøn ja nwindson'ajtim Jesús wyinaty tø tyikjujkyiky.

¹⁰ Winets ja teetywindsøndøjk tkajpxy'ajti jøts ja nayide'en tyimyik'ookiti ja Lázaro,

¹¹ kumi ja' ñamyayi ja pøky tjagyajp ku ja israelit jaa'y ñawya'kxyidi, jøts ja may pyuwajtsniyidi jøts ja tjanchja'wifidi ja nwindson'ajtim Jesús.

Ku ja Jesús kyajptøjkiyi'n jam Jerusalén

¹² Xjats idø'on ja jaa'dyi may ja jam wyinaty tø yja'atti Jerusalén, jøts ja xyøbaatwa'andi ku ja paski xøøw; jøts ku kyimjabom'ajty, jøts ja ojts tnijawidi jøts ku ja nwindson'ajtim Jesús jam wyinaty yja'atwa'añ ja'abi kajpkøjxp.

¹³ Winets ja tüxy ja ojts tpootti, jøts ja ojts tpatatsowdi ja nwindson'ajtim Jesús, yide'en ja wyandøø:

—iMøj Dios kyunuu'kxin! iØy wa'ats yø' mid'i ixyam Dios Teety kyejxpy, mid'i israelit jaa'y wyindsønip!

¹⁴ Jøts ja nwindson'ajtim Jesús tpaajty tu'uk ja buur jøts ja ojts ttawa'atspety, tyimbyatpy idø'on jade'en sam jap jaabyety nøkyijxpy:

¹⁵ Meets Sión kajpøtpit, kidi mjotmay'ookti;

ejx, pø ixats myiñ ja mwindsøn,
yikxon buuru'nk ttaku'xni.

¹⁶ Ka'ap ja pyabøjkpitøjk ja jaty: tja'gyukidøø yø'øbi winmaa'n, østi jaanim ku ja nwindson'ajtim Jesús wyinaty tø çajpajtni. Jaanimts yø tja'myajtstøø jøts kudam yø tñigajpxy ja nwindson'ajtim ku ja jap jade'en yja'ayi, jøts tyimyjade'ents ja wyinaty tø yjaty kyubety.

¹⁷ Jøts ja jaa'dyi mid'i ja nwindson'ajtim Jesús jam wyinaty møøt, ku ja tyaxpidsiimy ja Lázaro jap oo'kpi jutjøtpy, ku ja wyinaty tø tyikjujkyiky jadigojk, ja'ats idø'on jam tnimadyaktip sa jaty ti jaty ja wyinaty tø t'ejxti.

¹⁸ Patyts idø'on ja jaa'y ojts tpatatsowdi ja nwindson'ajtim Jesús, kumi tø ja wyinaty tnijawidi ja milagr'ajtin mid'i ja nwindson'ajtim wyinaty tø tuñ.

¹⁹ Xjats ja fariseotøjk agø'ømyi ñawajnidøø:

—Tøxi ixa xja'ejxti sa yø yjawi ñityu'unint. Ejxti, ejx niduki'iyi jaa'y pyanijkxyiyi.

Ku ja griegit jaa'y t'ejxwa'andi ja Jesús

²⁰ Jøts ja jaa'dyi mid'i jam wyinaty tø ñøjkxti xøbatpi Jerusalén, jam ja winaaçindi pøn griegit jaa'dyi.

²¹ Ja'ats jam tnimendi ja Felipe pøn kugajpip Betsaida jam Galileit etjotp, jøts ja ojts tnøjmidi møkta'aky:

—Ja Jesús øø teety n'ejxwampy.

²² Xjats ja Felipe ojts tninijxxy ja Andrés jøts ja ttukmadøøy; winets ja namajtsk tninøjkxti ja nwindson'ajtim Jesús, jøts ja ojts ttukmadowdi.

²³ Jøts ja nwindson'ajtim Jesús ja ojts ñii'mxyidi:

—Tø tpaaty ku nxøga'pxy ma øts yikxon nyikwinjawit nyikwindsø'øgit, pø Dios Teety ø xkajx jøts ja naçwi'ñit jaa'dyi ngudanaapy.

²⁴ Tiy janch ø nwa'añ ku mee nnøjmi, jøts ku tu'uk ja ariinbajk kyaka'ay naçjøtpy jadi'iñi ja ñaxy; pøni mid'i'its ka'ap naçjøtpy, ne'egi may ja wyimbijty ku ja wyindigøy.

²⁵ Nayide'en idø'on meetsmi. Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtin tpaaty; pønts kanabya'ayojip, wan tjaty sa yjaty øts køjxp, ja'ats idø'on tpaatp ja nitso'ok'ajtin.

²⁶ Pøni pøn øts xpabøjkpi'atwamp, wan ya tmiñ jøts ø xmøøtwidettit xmøøtsøonidit. Yikajxa'akpts idø'on ja' jam Dios wyingujkp.

Ku ja Jesús tñigajpxy ja y'o'jkin

²⁷ Janch tō ɔts ɪxyam ndyimyjotmaadyøki; ʒjōts ti sɑ ɔ nwa'ant? ʒja ti ja ɔ nwa'ant: "Dios Teety, ka' ɔts jade'en xyikjatt xyikubatt sɑ ɔts ɪxyam njatwa'añ ngubatwa'añ"? Pø ka'axi ɔts ja' tō nniimiñ jōts ɔts jade'en ngajatt.

²⁸ Metsts Dios Teety tu'ugyi ja mja' majada'akp.

Winets yikmadøøy ja ayuujk jōts ku jap yjawi tsajpjōtpy wya'añ:

—Tō ɔts ja jade'en nduñ, jōts ndunwampy ɔts ja jade'en jadigojk.

²⁹ Jōts ja jaa'y midi jam wyinaty amidoodujktip, yide'en ja wya'andi jōts ku ja y'anaawi midi jade'en wyinaty tō wyina'añ, jōts pømbi wamidip:

—Ja ankilis yō tō myigajpxyi.

³⁰ Winets ja ñimaajyidi ja nwindson'ajtim Jesús:

—Ka' ɔts kōjxpij yō ayuujk jade'en tō yikmadøøy, meets kōjxp yō jade'en wya'añ.

³¹ ɪxyats idø'øn tō tyimya'aty ja xøøw ja jumøjt ku ya'atpi naxwii'ñit jaa'y yiktidyu'undit, jōts ku nayide'en yikpawopt ja miku' midi ya naxwii'ñit tñigubajk'ajtp ja kya'øypi.

³² Jōts ku ɔts jam nøjkx nyikpikta'aky jam kruskōjxp, ñijawidip ja øy pøn jōts ɔts xjanchjawidit.

³³ Ja'ats idø'øn ja jade'en yjatijpy sudso ja wyinaty y'ookwa'añ.

³⁴ Xjats ja mayjaa'y ja yide'en y'adsojøø:

—Tō øø nniamadøøy ku pøngapøn tkajjpy øøts ja ngutujk, jōts ku ja Cristo yujjy'att xemikōjxp. ʒSudsots me mwa'añ jōts ku mets myikpikta'akt jam kruskōjxp? ʒPøn idø'øn ja' midi tsoo'mp tsajpjōtpy, midi ja naxwii'ñit jaa'y tkudanaapy?

³⁵ Winets ja nwindson'ajtim Jesús ja tñimaay:

—Mjaakujajidip mjaakudøø'kkidip meets ja jaj, tyimdyøts jōts ja kya'uk'ejtnit. Jaa'kyiktundits ejx yjaakja'atynim, jōts kidi kube'ets kugoots mjatti; ja jaa'y pøn jade'en jajttip, ka'ap ja tñijawidi pø sɑ ja yjattit kyubattit.

³⁶ Janchja'widik ɔts nja', pø øtsxi dø'øn ñamyayi jade'en sam ja jaj, jōts jaa'kyimñayamnims ɔts x'ejxti xñijawidi jōts mee njaakja'bøkt.

Ja'ayi ku ja nwindson'ajtim Jesús ojts jade'en y'ukwani, jōts ja cho'onaa jōts ja jadi'iñi yøødyigøøñi.

Ya'at tñigajpxp tigōjxp ja israelit jaa'y ojts tkajanchjawidi ja Jesús

³⁷ Øy idø'øn ja nwindson'ajtim Jesús wyinaty kawine'en tō tjatuñ ja milagri'ajtim jam mayjaa'y wyingujk, jōts ni jade'en ja kyayikjanchjawi.

³⁸ Ja ti jys ja jade'en kyajatt sɑ wyinaty tō wya'añ ja Dios kyugajpxy Isaias, ku ja yide'en tjaadyaañ:

Dios Teety, ʒpøn adøm ja ngajpxy ja n'ayuujk tō x'ukupøjka'am?

Øy ja Dios Teety ja myø'ajtim tō tñanky'ijxyi, ka'ap ja pøn tñøjpikta'aky.

³⁹ Jōts idø'øn ja jade'en ka'ap tjančjawidi, nayide'ents ja Isaias wyinaty tjaadyaañ:

⁴⁰ Dios ja jade'en tuujnidip, jōts ja jade'en wimbeets kugoots yik'ityidi, jōts ja ka' tkupøkti,

jōts ja wyeen ja tkada'ejxtit øy ja wa'ats tyimya'ejxti,

jōts ja nika' ja ja'gyukin tjagyaptit,

jōts ja nika' ñabyøkjawiyidit øy ɔts ja wine'en njayikpøkwy'a'atswa'andi.

⁴¹ Jade'en'ampy ja Isaias jade'en wya'añ, kumi tō ja wyinaty jekyip Dios Teety tyuk'ijxyi jōts ku jade'en ja Jesús ja y'øy'ajtim xuk'ejxint, jōts ja ojts jade'en patki'jyi tñigajpxy.

⁴² Jōts øy idø'øn ja yjajade'eni, may ja israelit jaa'y tjančja'widøø ja nwindson'ajtim Jesús, østi windsøndøjk paat winaagin tjančja'widøø; ja'ayi ku ja pøn ka' tukmadowdi, ja'agōjxp ku ja ttsøøgidi ja fariseotøjk jōts ja ka'ap tyukmajstst'udit ja tyunk.

⁴³ Ja jaa'y yja' ja ne'egi yikmøjtøjkidip, jōts ka'ap Dios yja'.

Ja Jesús y'ayuujk payø'øyiyp ja jaa'y pyøky

⁴⁴ Jōts ja nwindson'ajtim Jesús møk wya'añ:

—Ja' pøn ø xjanchja'wip, kidi øtsip ja tu'ugyi: xjanchja'wip, nayide'en ja ñamyayi tjančjawidi ja Dios Teety midi ø xkajxp.

⁴⁵ Jōts pøn ɔts ɪxa x'ejxp xñija'wip, nayide'ents ja t'ixy tñijawi pøn ø xkajxp.

⁴⁶ Jōts ku ɔts ñamyayi jade'en sam ja jaj, ja' ø tō nniimiñ ya naxwii'ñit pøni pøn ø xjanchja'widip, jōts kidi ɔts ja wimbeets kugoots nyiktanim.

⁴⁷ Pøni pøn ø xmadojip ja n'ayuujk jōts ka' tñøjpikta'aky, kidi øtsip ja ndabayø'øpy ja pyøky; kaja'ajip ø tō nniimiñ jōts ɔts ja naxwii'ñit jaa'y ndabayø'øyt ja pyøky, pø ja'axi ø nniimipy jōts ɔts ja nyiknitso'ok'attit.

⁴⁸ Pøni pønts ɔts nja' xkatsojkip jōts ka' tñøjpikta'aky sɑ ø nwa'añ, jats ja' pøn ja ttabayø'øyip ja pyøky, nayø'øyi ja nøjkx kø'øm ni'øøniyp sɑ jaty ø tō nwa'añ, ku kyøxt ja naxwii'ñit.

⁴⁹ Kidi ja'ajip ø ngajpxy sɑ ø kø'øm nwinmay; ja' midi ø xkajxp, ja Dios Teety, ja' ɔts yō xanigutujk'ajtp jōts ɔts jade'en ngajpxt, jōts ɔts jade'en nyik'ixpøkt.

⁵⁰ Jøts wə'ats ø nnijawī, jøts ku ja' wya'añ ja Dios Teety y'ana'amin sudso yikpaatt ja jujky'ajtin xemikøjxp. Jade'ents idø'øn, pøni sa jaty ø tø nwa'añ, jade'en øts idø'øn ja tø ngajpxnaxy sam øts ja Dios Teety ja tø xanigutujk'aty.

13

Ku ja Jesús pakpujy ja pyabøjkpitøjk

¹ Tyimdyø jøts ja paski xøwøw tpatnit, jøts ja nwindson'ajtim Jesús wə'ats ja tnija'wiñi jøts ku tø kya'pxy ja hori jøts ku ja tmajstst'utt ja naxwiiñ'ajtin, jøts ja Dios Teety ja tninøjkxni. Ejtp ja tpa'ayøøy ja pyabøjkpitøjk, xjats ja jade'en tpiakta'aky møk ja ejxa'an, jøts ja tnanky'ijxy mabaat ja pa'ayo'owin ja tjagyepy.

²⁻⁴ Jøts ja Simón myajnk, ja Judas Iscariote, tø ja miku' ja wyinaty tyatøkiyi, jøts ja tyukwinmaa'n'aty sudso ja tka'ødyu'unt ja nwindson'ajtim Jesús. Wə'ats ja tnijawī ja nwindson'ajtim Jesús jøts ku ja nay jam ñijkxy mā ja Dios Teety ja tø yiktsøøñi, jøts ku ja amuum tø kyutujkmø'øyi. Xjats ku dø'øn ja jam wyinaty y'a'ux'atti, winets ja tyanaagyukiyi'n jam kyaadyaajk jøp'am, jøts ja twejtstaajky ja wyet, jøts poop wet ja ojts ñadyatenwøø'niyi.

⁵ Xjats ja nøø t'ada'amiyi'n jam købuj'i'ñjotp, jøts ja pyabøjkpitøjk ja ttpakpujpinaxwa'jky, jøts ja nay jatyi ttuktati'ich ja poop wet midi ja jam wyinaty tyenwøø'n'ajtpy.

⁶ Jøts ku ja wyinaty tpa'pujwə'añ ja Simón Pedro, winets ja ojts ñi'mxyi:

—Windsøn'ajtim, ¿mets ne'egi ndeky xpujip?

⁷ Jøts ja nwindson'ajtim Jesús ja t'adsøøy:

—Ka' mets yø icyam xja'gyuki, mja'gyukipnimts mets yø nøjkk.

⁸ Jøts yide'en ja ñi'mxyi ja Pedro:

—Ka' me mabaat ndeky xpujit.

Winets ja nwindson'ajtim Jesús ja tnimaay:

—Pøni ka' øts yø mdeky nbujy, ka'ats me n'ukmigu'ukwanit.

⁹ Winets ja Simón Pedro wya'añ, jøts ja nwindson'ajtim Jesús yiknøjmi:

—Winets ø windsøn'ajtim amuum xpujiyt ja ngø' ngubajki; jøts ka' nugo ja ndeky.

¹⁰ Jøts ja nwindson'ajtim Jesús ja tnimaay:

—Øy ku ja'ayi tyeky tpujt pøn tse'abajtippim, kumi wə'ats ja amuum. Nayide'ents meets m'anmija'win wya'adsi øy kidyimñiduki'iyi.

¹¹ Jade'en'ampy ja wya'añ ku ja ñimy: “Øy ka' niduki'iyi mdyimwya'adsidi”, ja agøjxp ku ja wa'ats tnijawī pøn ja wyinaty køyakwajñip.

¹² Xjats ku ja jade'en y'abajtiyi'n tpujkøjxyi ja pyabøjkpitøjk tyeky, winets ja ñadyanijajni ja wyet jadigøjk, jøts nay jam y'ixaaajky mā ja mesi jøts ja tnimaay ja pyabøjkpitøjk:

—¿Mnija'widip tigøjxp jade'en tø ndundi?

¹³ Meets, xmaestri'ajtp meets, xwindson'ajtin'ajtp meets, janch tiigajpxy kumi janch jade'en.

¹⁴ Pøni øts tamts maestri, jøts pøni øts tamts windsøn'ajtim, tøts ja mdeky nbujidi, nayide'ents meets idø'øn xuumit xem yam.

¹⁵ Tø nduk'ejxti jawyeen, jøts nayide'en xu'undit sam ø tø ndunjøpi.

¹⁶ Jøts janch øts idø'øn nwa'añ, jøts ku ka' pøn tumbi tjinaxy ja wyindsøn; uk ja jaq'y pøn kexy yø'øpy, ka'ap ja tjinaxy pøn ja kajxip.

¹⁷ Jøts pøni mja'gyukidip yø'øbi winmaa'n jøts jade'en xu'undit, jotkujkts x'ejxti.

¹⁸ Jøts kidi niduki'iyip meets jade'en ndijy; nnija'wip øts ja' pøn jaty ø tø nwi'ixy. Kuwanits jade'en yjatt sam jap jaabyety nøkyijxy: “Jats ja tu'uk tø x'ukmidsepøjkni pøn ø møøt ngay n'uuky.”

¹⁹ Patki'iyi øts ya'at yam nngajpxy jøts ku jade'en nøjkk yjaty, jøts xiyjawidit xjanchjawidit jøts pøni pøn øts.

²⁰ Janch øts idø'øn nwa'añ, jøts ku øts ja xkupiky pøni pøn ø xkupøjkp ja ngudanaabyi; jøts pøni pøn øts jade'en xkupøjkp, ñayi kyupijkypts ja nayide'en pøn ø xkajxp.

Ku ja Jesús tnigajpxy sa ja Judas kyøyakiyit

²¹ Xjats ku ja wyinaty jade'en tø wya'añ, jøts ja tyimchaachjotmaadyøjkii'n, jøts ja ojts yikxon wə'ats tnigajpxy:

—Tiy janch mee nnøjmi, jøts ku meets ja nidu'ugin pøn ø xka'ødyunwamp.

²² Winets ja pabøjkpitøjk xem yam ñawyin'ejxjø'jkidøø, jadi'iñi tkamidaqabyaatti pøni pøn idø'øn yiktejp.

²³ Winets ja tu'uk, midi ja nwindson'ajtim Jesús janchminamyaajyip, jam ja wyinaty pyukø'm tmøøt'a'ux'aty.

²⁴ Ja'ats ja Simón Pedro amaa'tsk ñimaay jøts tyiktø't pøn idø'øn yiktejp.

²⁵ Winets ja wingon tpuwa'adsiyih'ñ ja nwindson'ajtim Jesús, jøts ja tnimaay:

—Windsøn'ajtim, ¿pøn idø'øn mdijpy?

²⁶ Jøts ja nwindson'ajtim Jesús ja ojts yide'en y'adsøyi:

—Wan øts tsapkaaky tukpidasi t'uknumuji, jøts pøni pøn øts inet ja nmøøpy, ja'ats idø'øn ja wyinaty.

Xjats ja ojts jade'en tnimuji ja tsapkaaky, jøts ja ojts tmø'øy ja Judas Iscariote midi ja Simón myajnkkip.

²⁷ Jøts ku ja Judas ja'ayi t'axajiyih'ñ ja tsapkaaky, jøts ja miku' ja ojts tyatøkiyi. Winets ja nwindson'ajtim Jesús ja tnimaay:

—Jaty'i dø'øn xungojt midi mdunwampy.

²⁸ Jøts nipøn ja tkamadooguki tigøjxp idø'øn ja nwindson'ajtim Jesús jade'en tnimaay ja Judas.

²⁹ Ja Judasts idø'øn wyinaty tkøjø'ømit'ajtp ja meefñ abøk'ih'ñ, jøts winaagin jade'en wyinmaydi pø ja'ajik idø'øn tijy ja nwindson'ajtim Jesús tyijpy, jøts ja Judas t'atsju'uty ti jaty tsojkp ti jaty tunwamp ku ja xøøw, uk tmo'ot tigati ja ayooibi jaa'y.

³⁰ Xjats ku ja Judas wyinaty tø tkaagyixy ja chapkaaky, jøts ja ojts chøøñ. Koodsni wyinaty.

Ja jemy ana'amin

³¹ Xjats ku ja Judas wyinaty jade'en tø chøøñ, winets ja nwindson'ajtim Jesús wyaañ:

—Yamnims inet tiy yik'ext yiknijawit ja nmøk'ajtin, jøts nay ja Dios Teetyts myøk'ajtin nanky'ejxip.

³² Jøts kumi nanky'ejxip øts ja Dios Teety myøk'ajtin, nayide'ents ja tnanky'ejxmiyit øts ja nmøk'ajtin, jøts tsojk ja jade'en ttu'unt.

³³ Ka' meets u'nk jeky n'ukmøøtsinaañit. Nayide'en meets yam ndukmadoowa'añ sam adøm ja nmigu'uk israelit jaa'y nimaadyøø, jøts ku ja jap ka'ap ñøjkxtit ma ø nniikxy øy øts wine'en xja'ixa'ay.

³⁴ Ixyamts nmo'odi ja jemy ana'amin: jøts ku xem yam mnamyi'øy'atidit mnamyiyujy'atidit. Nayide'en sam mee njanchøkyin, nayide'ents idø'øn mnachokidit xem yam.

³⁵ Pøni mdundip jade'en, tyumnijawidipts jade'en øy pøn jøts ku mee ø xpabøjkpi'aty.

Ku ja Jesús ojts tnigajpxy jøts ku Pedro kyanigajpxiyit

³⁶ Xjats ja Simón Pedro tyiktiiy ja nwindson'ajtim Jesús:

—Windsøn'ajtim, ¿ma dø'øn mnøjkxwa'añ?

Jøts nwindson'ajtim Jesús ja y'adsojøø:

—Jap ma ø nniikxy, ka'ap ø mibaat ixyam jap xpanøjkxt; xpanøjkxp øts, ja' ku jaanim.

³⁷ Winets ja Pedro wyaañ, jøts ja nwindson'ajtim Jesús yiknøjmi:

—¿Tigøjxpimts windsøn'ajtim ku øts ka' ixyam ndsoont? Ixyats øts, øy me ngu'oogit.

³⁸ Jøts ja nwindson'ajtim Jesús t'adsøøy:

—¿Janch idø'øn mwa'añ jøts ku ø xku'oogiwya'añ? Øts wamp, ka'anin wyinaty tsapni'aaw y'aya'axy ku mets wyinaty tigøøk ojk tø xkagupiky ku me x'ijxy'aty.

14

Jesús køjxp ja Dios Teety yikpaatt yik'ext

¹ Kidi mmaydi mdajti, ajot'atti Dios Teety, jøts ajot'ajttik øts nayide'en.

² Ma chøøni ja Dios Teety may tsinaadyaajk ja jap tmøødi; ku jeexyip ka' yjade'eni, tø meets ja jeexyip ndukmadooni. Jøts wants ø tnijkxy jøts øts ja n'a'ejxit ma mdsøønidit.

³ Jøts kuts øts wyinaty tø nniikxy, jøts kuts øts ja wyinaty tø n'a'ejxi ja tsinaadyaajk, winets ø nme'ent jadigojk jøts mee nmøødiñit, jøts nay jap mjujky'attit ma øts idø'øn jap ndsinaawya'añ.

⁴ Mnija'widipxi pøni ma ø nniikxy, jøts mnija'widipxi ja tuu'.

⁵ Winets ja Tomas tnimaay ja nwindson'ajtim:

—Ka'ap øø windsøn'ajtim ja nnijawi pøni ma me mnøjkxwa'añ; ¿sudsø'ampy øøts ja tuu' nnijawit?

⁶ Jøts ja nwindson'ajtim Jesús ja t'adsøøy:

—Tum øts amuum ja tuu', ja tyiiby yjanchni øts nayide'en, jøts ja kunuu'kxy jujky'ajtin nyajkpy. Øts køjxp ja Dios Teety yikpaatt yik'ext.

⁷ Kuk øts jeexyip xnijawidi pøni pøn øts, nayi mnija'wipts meets jeexyip nayide'en ja Dios Teety; jøts tøts idø'øn ja ixa xjanija'wiñidi, mja'ejxtipts idø'øn ja'.

⁸ Winets ja nwindson'ajtim ñimaajyøø ja Felipe:

—Windsøn'ajtim, ja'ayi ku øø xtyimdyuk'ext ja Dios Teety, wan øø t'ijxy.

⁹ Jøts ja nwindson'ajtim Jesús ja yide'en t'adsøøy:

—Windi'ixyip mee Felipe nminabyaajtniyidi, ¿jòts ni jade'embaat me xka'ijxy'ajtni? Pøni pøn ø x'ejxp, ñayi y'ijxpy ja nayide'en ja Dios Teety; jòts, ¿sudsø'ampyts me x'amidøy jòts mee nduk'ext ja Dios Teety?

¹⁰ ¿Ka' xmbiky ku øts Dios Teety møøt n'ity, jòts ku øts ja nayide'en xmøøt'ejtmi? Tuki'iyi sa jaty nnøjmidi, kidi ngø'ømwinmaa'ñjòtpyip øts yø njuuty. Ja Dios Teety mididi ø xmøøt'ejtp, ja' kø'øm tyunk tump.

¹¹ Jòts janchja'wik øts jòts ku øts Dios Teety møøt n'ity, jòts ku øts ja nayide'en xmøøt'ejtmi; uk pøni ka'ats, øyts øts ja'ayi xajanchjāwit, pø m'ijxpyxi ti jaty ø ndumpy.

¹² Jòts tiy janch mee nnøjmi, pøni pøn ø xjanchja'wip, ñayi yjatp ñayi tyu'ump ja nayide'en ti jaty ø njajtpy, ti jaty ø ndumpy, jòts ja tyikne'egidit tyikaja'adit ja'agøjxpts kuts ja Dios Teety nmøøt n'ett.

¹³ Jòts tuki'iyi pøni ti jaty mee m'amidøøpy ku ø xkajpxpaattit, øtsts ja kø'øm jade'en ndu'ump, jòts øts jade'en nyikwingaxø'jkit ja Dios Teety myøk'ajtni y'ø'y'ajtni.

¹⁴ Ndu'ump øts jade'en pøni ti jaty mee m'amidøøpy jòts ku øts xakajpxtit.

Ku ja Jesús wya'añ jòts ku ja Espiritu Santo tkaxt

¹⁵ Pøni xtsojpk tam meets, paduujnidik meets ja n'ana'amin.

¹⁶⁻¹⁷ Jòts nnøjmip øts ja Dios Teety jòts ja mdanigaxidit tu'uk pøn mbudøk'iyidip, pøn myikjot'amøk'økiyidip, pøn ja tyiiby'ijxchpi myøøt'ajtpy. Jòts ja'ats meets møøt m'ett kunaxt. May jaa'y ja kyagupøkit ja'agøjxp ku ka' t'ejxti tnijawidi. Jòts meets, tø meets ja xnijawi, pø ixaxi ja xmøødidi, jòts ja'ats mee møøt m'ett.

¹⁸ Ka' mee nadyu'uk nyiktañ, nniwimbett meets jadigojk.

¹⁹ W'ingonip ja xøøw ku ø ka' mā n'ukyk'ejxnit; jòts meets, x'ejxp meets; kumi jujky øts, mjujky'atpts meets.

²⁰ Jaanims xja'gyukidit jòts ku øts ja Dios Teety møøt n'ity, jòts meets xmøøt'ejtmi, jòts mee nayide'en nmøøt'ejtmi.

²¹ Pøn tø tnijawi jòts pøni xpaduujniyip øts ja n'ana'amin, jade'en ja tyiknigüe'exy jòts ku øts ja xjanchøky. Jòts ja'ats ja Dios Teety chokp pøni pøn ø xtsojpk, jòts ndsokp øts ja nayide'en, jòts ja'ats ø x'ejxp, ja'ats ø xnijawip ku nnanky'ejxit øts nja'.

²² W'inetts ja yjadu'ukpi Judas ja ñimaajyøø (nigidi Iscariotibi wamp mididi ja Jesús køyapk): —Windsøn'ajtni, ¿tigøjxp ku øøts ja ja'ayi n'ext ku mnanky'ejxit, jòts nika'ap niduki'iyi ja naxwii'ñit jaa'y?

²³ Jòts nwindson'ajtni Jesús y'adsøøy:

—Pøn ø xtsojpk, pyadumpy ja' sa ø nwa'añ, jòts ja'ats idø'øn tsokip ja Dios Teety; jòts ja'ats ø nnime'emp møøt ja Dios Teety, jòts øøts ja xemikøjxp nmøøt'ett.

²⁴ Jòts pøn ø xkatsojpk, ka'ap ja tmøjpkta'aky sa ø nwa'añ. Yø kajpxy yø ayuujk ixa xmadowdi, ka'øtsip yø' nja'; ja' yø' yja' mididi ø xkajxp, ja Dios Teety.

²⁵ Ndukmadooogøjxtip yam tuki'iyi, njaaktyimyoøtsinaadyipnini yam;

²⁶ Ja Espiritu Santots mididi ja Dios Teety mdanigaxiyidip jòts øts ja xkudanit, ja' idø'øn mbudøk'iyidip, ja' idø'øn mgajpxjot'amøjkiyidip jòts ja mdukajtkøxidit tuki'iyi, jòts nay ja' mdukja'myajtskøxiyidip tuki'iyi sa jaty mee tø nnøjmi.

²⁷ Jotkujk nnawa'kxa'andit. Nyajkpy øts ja øy'ajtni tsuj'ajtni. Ka'ap øts jade'en nyaky sam øy pønin nugo wya'añ. Kidits mmaydi mdajti, ka' mee mdsø'ogit.

²⁸ Tøxi xmadowdi ku ø nnimy jòts ku ø nnijxxy, jòts ku ø nme'ent jadigojk jòts mee nmøøtsøønit. Kuk meets jeexyip xjanchøky, mjanchxondakp meets jeexyip ku tø xnijawidi jòts ku nninijxxy ja Dios Teety; kumi ja' idø'øn jawaani møj jòts nigidi øts.

²⁹ Patki'jyi ya'at jade'en ndukmadowdi jòts ku wynaty jade'en yjatp jòts xjanchjāwidit.

³⁰ Ka' mee møøt jeky n'ukmøøtnagyajpxniyit; ja'agøjxp ku ja wyingoñ ja Satanás pøn yikutujpk ya naxwiiñ. Øy øts nmøk'ajtni ja xjagamimajadaajkiyi,

³¹ jatpts jade'en jòts jade'en tnijawit ja naxwii'ñit jaa'y jòts ku ø ndsøky ja Dios Teety, jòts ku øts ja nbaduñ sa øts ja tø x'ane'emy. Tanidits jòts wan ya ttsøø'ñindi.

15

Ja uvi tsa'am kipy

¹ Jade'en øts idø'øn ñamyayi sam uvi tsa'am ñiguipy, jòts ja Dios Teety jade'en sam ja jaa'y mididi ja uvi kipy t'eix'ejtp.

² Jòts ja tyikwinajki ja y'awaj ja y'axeeñ mididi katøømip; jòts mididi tøømyip, yikxon ja tyikwa'ach twibøøty twibiky mā ja jam t'ijxy sa yjatwa'añ, jòts ja jawaani may yjaaktyimdyøømit.

³ Nayide'ents meets idø'ønmi; tø mee mwatsni, ja ixpøjkin mee tø myikwa'achi mididi mee tø nmø'øy.

⁴ Kidi mee xmajtstutni, kumi ka'ap mee nmajtstu'uty. Ka'axi kipy awaj tyøømi jadi'iñi ku ja kya'ity ja ñiguipy; nayide'ents meets idø'ønmi, ðiti mee nadyu'uk mnityu'ump ku mee wyinatya ja nja' tø x'ixmajtsniyi?

⁵ Øts idø'øn jade'en sam ja ujts ñiguipyin, jøts meets jade'en sam ja' y'awaj y'axeefin. Pøni pønts ø xkamajstutp, jøts ku øts ja nayide'en ka' nmajtstu'uty, ja'ats idø'øn ja yja' moj wingaxø'øk; jøts ka' mee ti nadyu'uk mayi ku ø nga'ett.

⁶ Pøni pønts ja nja' xkaminamyajjyiyip, ja'ats jade'en yik'ixjibep sam ja kipy awaj mido ka'ø, jøts kuts ja tyø'øst jøts ja jønjøtpy yikpikta'akt, japts ja tyø'øty.

⁷ Pøni ka' mee xmajtstu'uty, pøni ka' meets ja n'ixpøjkin xja'dyigøjyidi, amidowdits pøni ti mdsøjktip jøts meets ja myikmo'ot.

⁸ Ku yikxon xpadundi ja Dios Teety yja' sã ttsøkyin, jade'en'ampyts ja y'ø'yajtn myø'ajtn yikpa'ixy, jøts nayide'en idø'øn yiknijawit ku meets idø'øn xjanpabøjkpi'aty.

⁹ Jade'en mee ndsøky sam øts Dios Teety xtsøkyin; tun'ejtik meets yø nja' ku meets ja tsojkin ndami'ity.

¹⁰ Pøni xpaduujnidip øts ja n'ana'amin, jade'en'ampyts mee møøt m'ettit øts ja ndsøjkin, nayide'en ñamyayi sã øts ja nDeety y'ana'amin nbaduujniyi, jade'ents øts idø'øn ja chojkin nmøøt n'ity.

¹¹ Jade'en'ampy meets jade'en nnøjmi, jøts mjotkujk'attit nayide'en sam øts, jøts ejtni xoni x'ejxtit.

¹² Ya'at øts idø'øn n'ana'amin'ajtpy: øy yikxon xem yam mnamyayidit mnachokidit, nayide'en sam øts ja tsojkin nbikta'aky sã mee ndsøky.

¹³ Jade'en idø'øn ja tsojkin moj yikjagyepy pøn amuum nayøjxip, jøts ja myigu'uktøjk tkudani jøts jujky'ajtn ja tpaattit.

¹⁴ Meets idø'øn nmigu'uk'ajtpy pøni mdundip jade'en sã ixa n'ana'amdi.

¹⁵ Ka' mee ndijy jøts ku mee mdumbi, kumi ka'ap ja tumbi tnijawi pøni ti jaty tyumpy ja wyindsøn. Nmigu'uktijpyts meets yam, ja'agøjxp ku tuki'iyi tø nduknija'wigyøxti sã jaty øts ja Dios Teety tø xnøjmi.

¹⁶ Kameedsipxi tø xpikta'aky; pø øtsxi mee kø'øm tø nwi'ixy, jøts mee tø ndanipiky jøts nøjx; ja mdunk yikxon xyikwingaxø'økti, jøts wan tmøji wan tkaja'aji. Jade'ents ja Dios Teety mmo'ojidit pøni ti jaty m'amidoodip ku ø xkajpxpaattit amumjoojt.

¹⁷ Yø' idø'øn nda'ana'amdip, jøts xom yam mnabya'ayowidit jøts ja tsojkin xjagyaptit.

Ku ja ka'øyyaa'dy i taksokti ja Jesús møøt ja pyabøjkpitøjk

¹⁸ Pøni mmi'ajkiyidip ja' pøn ya naxwiiñ, mnija'widipxi jøts ku øts ja jawyeen nayide'en tø xuñ.

¹⁹ Ku meets jeexyip nayide'en m'adi'ich sam pøn ya naxwiiñ wyinmaydi, nayide'ents meets ja jeexyip mdsøkyiyi sam ja ttsøkyin pøn nayide'endi sam ja'ajindi. Øts meets ya tø nwi'ixy ya naxwiiñ ma nayide'en chøønidi pøn jade'en winmaadyip, jøts ja'agøjxp myikmi'ekyidi kumi ka'ap ja'abi winmaa'ñ x'ukyikyø'øñidi sam o pøn naxwiiñ.

²⁰ Ja'myatstis tø tø nnøjmidi, jøts ku ka'ap ja tumbi ñamyøjyit sam ja wyindsønin. Tøbaats ø nyikpawidity ku ngayikupiky, nayide'ents meets idø'øn myiktumit; jøts pøni xpaduujnidip øts ja n'ixpøjkin, nayide'ents meets ja m'ixpøjkin yikpadumit.

²¹ Øts køjxp idø'øn jade'en myiktu'undit ja'agøjxp ku ka' tnijawidi pøn ø xkajxp.

²² Ka'ap ja jeexyip ti pøkyti, kuk øts jeexyip ngamiñ, kuk øts ja jeexyip ngaduknijawidi. Ixyam ti ñikyajpxtip jøts ja pyøky kyayiktagubatit;

²³ Ja' pøn ø xmi'ajkip, ñayi myi'ajkip ja nayide'en øts ja nDeety.

²⁴ Ka'ap yø jeexyip ti pøkyti kuk øts yø jeexyip ka' ti nduk'ejxti mido ø tø nduñ yø' wyingujktyi, sam ka'ap pøn jade'en tø tyuk'ijxyidi; tø yø t'ejxnidi, ja ti ja'ats yø myija'widip, pø xmi'ajkidipxi øts yø', jøts ñayi myi'ajkidip yø nayide'en ja Dios Teety.

²⁵ Ja'agøjxpts ya'at jade'en yjaty kumi ka'pxy jade'en yjatt sã ya'at kajpxy ayuujk wya'añ, mido jap køxja'ay yø' kyutujkøtpy: "Nadøki øts yø xmi'ekyidi."

²⁶ Paty øts ja Dios Teety xukaxt ja Espiritu Santo jøts øts ja nja' xkajpxiyit, pøn pudøjkp kajpxjot'amøjkp, pøn nayide'en tmøøt'ajtp ja tyiiby yjanpchi.

²⁷ Jøts mee nayide'en ja nja' xkajpxmiyit, pø tøxi meets ja x'ixy sã jaty y'ejxi tyiyi, sã jaty tø ngajpxwã'kxts'o'ondaajkyim østi ixyambaat.

16

¹ Jade'en'ampy jade'en nnøjmidi jøts kidi nugo winmayjimbetti winmay'adøjti.

² Myikwojpidso'ømp myikajxpidsø'ømp meets jap tsaptojkøtpy, østi yja'at paat ja xøøw ku ja jaa'y wya'andit jøts ku Dios yja' ja tpaduujnidi ku meets ja myik'oogiyit.

³ Ja'agøjxp ja jade'en y'adø'østtit ku ja nijuuni tkanijawidinim pøni pøn ja Dios Teety, jøts pøni pøn øts.

⁴Jøts ja'agøjxp ya'at jade'en ndukmadowdi ku wyinaty jade'en yjatwa'añ, jøts xja'myatstít jøts ku yø tø ndukmadoonidi.

Ti dø'øn ja Espíritu Santo tyumpy ya naxwiiñ

'Ka' meets yø jade'en patki'jyi ndukmadøøy, kumi ja'ajt øts kø'øm.

⁵Kyams ø nnøjkxwani tsinaabyi ma ja jap midí ø xkajxp; jøts øts ja nmøøtsinaamyit jøts nipøn tamts mee nidu'ugin tkayiktyi pøni ma øts idø'øn nnijkxy.

⁶Jotmay mee ne'egi jinaxy tø mjaaktyimdyatøkiyi, ja'agøjxp ku yø jade'en tø ndukmadowdi.

⁷Janch idø'øn nnøjmídi jøts ku ne'egi jade'en m'øy'ajtxidit jøts ku nnøjkxt. Ku ø nganøjxt, nijuuníts ja kyamiñ midí mbudøkiyidip midí mgajpxjot'amøjkiyidip. Ku nnøjxt, kø'ømts øts ja ngaxt.

⁸Jøts ku dø'øn ja nøjx myiñ, ja' ja tyu'ump jøts ja naxwiiñit jaa'y ja ttukjawit ja pyøky jøts ku yjanchpojkipitumbijaa'yidi, jøts ku ja tu'ugyi ja winmaa'ñ sudso tyø'ødit sudso tyuda'aktit, jøts ku Dios ja pyayø'øydít.

⁹Ja'agøjxp pyojkipitumbijaa'y'atti ku ø ka' xjanchjawídi;

¹⁰ñija'widípts nøjx sa y'ejxi tyiyi midí'ibi øy midí'ibi paat'ajtidip, kumi jam ø nnijkxy ma Dios Teety, jøts ka' mee x'uk'ejxnít,

¹¹jaanímts tja'gyukidit ja Dios pyayø'øyin jøts ku tyiy'ajtingøjxp yikutuky, pø tøxi wyinaty ja tyi'ajtin tyaky, jøts ja miku' yikastigimot midí møy'yity ya naxwiiñ.

¹²'Jap øts may ja madya'aky njajagyepy midí ndukmadoowandip, ka' inet xja'gyukidit ixymyi.

¹³Kunim mye'ent ja Espíritu Santo, ja'ats ja tuki'iyi mduk'ixpøjkøxidip sudso tyiyi yjanchi; ka'axi kyø'øm ja' ja tyiktu'unt pøni sa jaty ja wya'añ, ja' ja kyajpxp pøni sa jaty pøni ti jaty ja myadøøpy, jøts ja mdukmadowidit ti jaty tunwajnipnim.

¹⁴Jade'en'ampyts øts ja winja'win windsø'jkin nbaatt, kuts ja ngajpxy ja n'ayuujk xpadu'undit sa mduknijawiyidi ja Espíritu Santo. Øts ja ngajpxmyo'op.

¹⁵Nayide'ents ja Dios Teety kyajpxy ja y'ayuujk sam øts nja'ajin, paty øts jade'en nwa'añ jøts ku nayide'ents nmo'ot ja ngajpxy ja n'ayuujk, nayide'ents yø mduknijawiyidit.

Xondaajkin ja nøjx wyimbidsimy ku njotmay'o'jkindit

¹⁶'Ka' y'ukjajknit ku mee ka' x'uk'ejxnít, ku wyinaty waani tø ñaxy ja tiempi jaanímts ø x'ejxtit jadigojk, pø jamxi ø nnijkxy ma jam Dios Teety.

¹⁷Winets ja pyabøjkpitøjk winaaagin nixem niyam ñawyajnidøø:

—¿Ti yø jade'en tyijpy ku yø xnimaa'yin jøts ku ka' y'ukjajknit, ku yø ka' n'uk'ejxna'ant, jøts ku waani ñaxt winetnimts ja n'ejxndit jadigojk ja'agøjxp ku ñijky jam ma ja Dios Teety?

¹⁸¿Ti dø'øn yø jade'en tyijpy jøts ku "ka' y'ukjajknit"? Ni kyayikja'gyuki niwine'en pøni ti dø'øn yø jade'en tyijpy.

¹⁹Jøts ja nwindson'ajtim Jesús ojts ja t'ixy jøts ku ja pyabøjkpitøjk yjawi tyiibøkwaa'ñiyi, jøts ja tnimaa'y:

—Tøxi nnøjmídi jøts ku ka' y'ukjajknit ku mee ka' x'uk'ejxnít, kuts wyinaty waani tø ñaxy ja tiempi jaanímts ø x'ejxtit jadigojk. ¿Kidi yø'øjip meets ixja mnyiktøjjiyidip?

²⁰Jøts tyi janch øts idø'øn nwa'añ ku mee nnøjmi, jøts ku nøjx ja yajxin x'ejxti, ku nøjx ja jotmay'o'jkin xpaatti yam ja naxwiiñit jaa'y xyonda'akti. Jøts ka'ats yjade'eni, øy mee mabaat mjantyimyjajotmay'øøky, xondaajkin ja nøjx wyimbidsimy ku jade'en njotmay'ookti.

²¹Jade'en idø'øn ñamyayi yjaty sam ja tø'øxyøjk ku ja kya'axwaa'ñ, janch winmay jotmay yjaty ku tø tpaaty ja tiempi ku ja y'u'nk pyøjkø'økni; ku tø tminawya'kxniyi ja maxu'nk nika'ap ja t'ukja'myajtsni jøts ku y'u'nk ja tø pyiky, ja'agøjxp ku ja xyonda'aky ku ja tø tyikaxi'iky tu'uk maxu'nk ya naxwiiñ.

²²Nayide'ents meets idø'øn mjaajtnimi, mjanchjotmay'oo'ktip ixyam; wimbetp øts jøts mee mminabyaadt jadigojk, winetnimts ja xondaajkin xpaattit yikxon, jøts nipøn ja mgapøjkxiyidit.

²³Jøts ja'abi xøøw ka' ø ti x'ukyiktøønidit. Janch meets idø'øn nnøjmídi, jøts ku ja Dios Teety tuki'iyi mmo'ojidit pøni ti jaty ja m'amidoodip øts køjxp.

²⁴Østi ixymbaatt ka'aním ti x'amidowdi øts køjxp; amidowdi pøktsowdi, mbaattip ja' jøts jade'en mxonjattit.

Tøts ja Jesucristo tmimajada'aky midí ja naxwiiñit jaa'y yikwindigøøpy

²⁵'Madya'akyøjxp ya'at yam nugo tø ndukmadowdi jøts xamimadoodowidit; ja'atp ja xøøw ku ka'ap jade'en nøjx n'ukmigajpxnidi abiky madya'akyøjxp, wa'ats meets ja ndy-imdyukmadoonit nøjx pøni sa ja Dios Teety y'ejxi tyiyi.

²⁶ Jøts ja'abi xøøwts øts køjxp ja Dios Teety x'amido'odit xpøkts'o'odit ja øy'ajtin; jøts nika'ap øts yam ndyimwya'añ jøts ku øts n'amido'ot ja Dios Teety jøts mee nni'amidowit. Ka'ap chøkyi jøts kø'øm n'amido'ot,

²⁷ pø mdsøjkip meets ja Dios Teety. Jade'engøjxpts ja mdsøkyidi kumi xtsojkip meets nayide'en, jøts tøts xjanchjawidi jøts ku øts Dios Teety xkexy.

²⁸ Jam ø tø ndsøøn mā Dios Teety jøts øts yā tø nmiñ yā naxwiiñ, ixyamts øts inet nmajtstu'utwangojmi ja naxwii'ñit, jøts ø n'awimbetiwyā'añ jadigojk ja Dios Teety.

²⁹ Xjats ja pyabøjkpitøjk wyandøø:

—Ixyamnim inet tiy janchwā'ats xnigajpxñim, ka' x'ukyiktuni ja abiky myadyā'aky midī kayiktamimadodøø'wip.

³⁰ Ixyamnimts øøts inet njanch'ixy njanchnijawī jøts ku tuki'iyi xnija'wigyixy, jøts ku ka' chøkyi jøts ku øy pøn kuwāni mdyimdyiibyøkiyit. Ja'agøjxp øø njanchjawī jøts ku jam mdsøøn mā Dios Teety.

³¹ Jøts nwindson'ajtim Jesús yide'en t'adsøøy:

—¿Jøts xjanchja'wiñidip øts ixyam?

³² Ja wyingøñ jøts tø yjā'aty ja xøøw ja jumøjt, jøts tyimñay'ixyamyi, ku meets inet m'agakpaktit pø mā pønjabøn ñiøjkt, jøts øts inet nadyu'uk xnika'aktit. Ka'ap ø nadyu'ugi, jats ja Dios Teety xmøø'tity.

³³ Ndukmadooøjxtpi yā'at yam tuki'iyi, jøts ja øy'ajtin jotkujk'ajtin xpaattit ku ø x'ajot'attit. M'ayo'ombaattip yā naxwiiñ; jotmøkts mnabyikta'agidit, tøts øts inet nmimajadā'aky midī yā naxwiiñ yikwindigøøpy.

17

Ku ja Jesús tni'amidowi tñibøktsowi ja pyabøjkpitøjk, jøts ja ttukmadøy ja Dios Teety

¹ Xjats ku ja nwindson'ajtim Jesús jade'en wyān'abajtiyī'ñ, jøts ja ojts jam tsajpwemp pyat'ixy, winets ja wyaāñ:

—Dios Teety, tø ja hori kya'pxy. Yikmøjtøjkikts øts, kunuu'kxyja'wikts øts, jøts me nayide'en nyikmøjtøkit, jøts me nayide'en myikunuu'kxyjawit.

² Metsxi tø xmø'øy ja kutujk jøts øts naxwii'ñit jaa'y ja ni'ijtyi nda'ana'amdit, jøts ja tpaattit ja jujky'ajtin xemikøjxp pøn jaty me tø xkømø'øy.

³ Jøts jade'en'ampy yikpaaty ja jujky'ajtin xemikøjxp ku tu'ugyi mets Dios Teety myik-janchjawī, sam nayide'en ja Jesucristo, pøn mets yā tø xkexy naxwiiñ.

⁴ Tø øts ja ndunguixy jade'en midī me tø xa'ane'emy, jade'engøjxpts myikmøjāwī myikunuu'kxyjāwī yā naxwiiñ.

⁵ Møøkyts øts jam mwinguiky nay ja'abi møk'ajtin midī øts y'ijty nmøø'tajtpy møøt mets ku ka'anīm wyinaty naxwii'ñit y'øyinim.

⁶ Jøts ja jaa'dyi midī me kø'øm tø xwiwich yā naxwiiñ midī me tø xagødøki, tøts øts ja nduknija'wigyøxti pøni pøn mets. Jøts mets ja y'ijty mjaā'y'ajtpy, jøts mets ja tø xagødøki. Tøts ja tpadundi mets ja m'øgyajpxy mets ja m'øy'ayuujk.

⁷ Ñija'winidip ja ixyam wā'ats ti jaty me tø xmø'øy jøts ku mets ja xja'aji.

⁸ Tøts øts ja ndukmadowdi ja øgyajpxy ja ømyadyā'aky midī me tø xukmadøy, jøts tøts ja tkupøkti, tøts ja tñijawidi jøts ku ja yjanchi jøts ku øts jam ndsøøn mā mets jam. Tø ja tjanchjawidi jøts ku me tø xkexy.

⁹ Yø'øts ø nni'amidoo'widip pøn jaty me tø xmø'øy ja'agøjxp ku ja xja'aji; jøts nigidi ja'abi nni'amidoo'wip pøn øts tø xkabadundi.

¹⁰ Midī jaty ø nja'ajtpy, nayi mets mja' ja', jøts nay ja'ats ø nja'ajtmip; jøts nayi øts nmøk'ajtin nay øts ngunuu'kxin ja xyiktuujnidip.

¹¹ Øts, ka'ap øts n'ukyaa'ajtnit yā naxwiiñ; yø'øts ja tandip, jøts me nninøjkxnit møøtsinaabyi. Kunuu'kxy Dios Teety, agø'øduk axajtuk nmøk'ajtingøjxp pøn jaty ø tø xagødøki jøts ni'amuki ni'aga'pxi y'ettit, kyanamyajtstu'udidit nayide'en sam adømin.

¹² Ku øts yø yā y'ity nmøø'tetti yā naxwiiñ, n'ejx'ejtipp øts yø', ja møk'ajtin ø nyik-tumpy midī me tø xmø'øy, ja'ats øts yø nda'agø'ødujktip nda'axajtuujktip. Ni tu'ugin yø tø kyawindigøydi, ja'ayim idø'øn jade'en tø yjaty midī'iyim y'ijty windigøy'ejnip, jøts jade'en ka'pxy tpaaty sā ja mgajpxy sā ja m'ayuujk xyiktaāñ.

¹³ Ixyamts me nninøjkxnit mā mets jam; jøts ku njaaknayaā'aty yā naxwiiñ, ja'agøjxp øts jade'en nwa'añ jøts ja mja' yjotkujk'attit sam ø njotkujk'atyin.

¹⁴ Tø øts ja ndukmadooøxti ja m'øgyajpxy ja m'øy'ayuujk, ja'ats mmi'ajkiyidip pøn ja ka'øwynmaa'ñ tjagyajp. Ja' yiktami'ajkidip ku ja yjade'embī winmaa'ñ tka'ukyiktunidi, nayide'ents øts ka' nyiktuñ ja yja'adi.

¹⁵ Kaja'ajpts ø n'amidøøpy jøts xwāābidsø'ømt yā naxwiiñ, ja' n'amidøøpy jøts xkuwā'ant xkubokt, jøts miiku' yja' kidi myajadā'aky.

¹⁶ Nayide'en ja'adi sam øts, ka' nyiktuñ ja kya'øwiyinmaa'ñ.

¹⁷ Pøkjøøkts ejxjøøkts mdiy'ajtingøjxp mjanch'ajtingøjxp; pø tiy janchxi ja mgajpxy ja m'ayuujk.

¹⁸ Nayide'ents sam me tø xaniguexy ja naẁwii'ñit jaa'y, nayide'ents øts ja ẁam ndanipøkti ndani'ejxti pøn ẁa naẁwii'ñ ja ka'owiyinmaa'ñ tjagyajptipnim.

¹⁹ Amunjojt øts njaaktyimñadyamiyoxiyit yø'øgøjxpti, nayide'ents ja ñadyamiyoxiyidit ku ja mgajpxy ja m'ayuujk ttu'undit midit tiy midit janch.

²⁰ 'Kidi ja'ayip ø nugo ndyimñi'amido'owidip, nayide'en ja'amidip pøn ø xjanchjawiwyandipnim ku ja myigu'uk ja tmadoojidit ja øgyajpxy ja ømyadya'aky.

²¹ Jøts ja' øts ẁam n'amidøøpy jøts tu'ugyi ja wyinmaa'ñ tyik'ettit; jøts tu'ugyi y'ettit møøt adøm, nayide'en Dios Teety sam mets xmøøt'ity jøts sam me nmøøt'ity. Jøts ẁan tu'ugyi ja wyinmaa'ñ tpikta'akti jøts jade'en ttukjanchjawidit ku me tø xkexy, pøn ja ka'owiyinmaa'ñ tjagyajptip.

²² Tø øts ja nmo'odi nay ja'abi møk'ajtin midit me tø xmøøy, jøts tu'ugyi wyinma'adyit nayide'en sam adøm nja'. Tu'ugyi nayide'en mets mja', jøts nayide'ents øts nja'ami.

²³ Øts ja møøt nnamyayidit, jøts mets xmøøtnamyaay'miyit jøts ja tu'ugyi y'ettit, jøts jade'en ja naẁwii'ñit jaa'y t'ejxtit tñijawidit jøts ku me tø xkexy, jøts ku mets ja xjanchøky sam me xtsøkyin.

²⁴ 'Dios Teety, metsxi ja tø xagødøki, jøts ja'ats ø ndsøjkpy jøts ja yjap'attit ma øts jap ndsinaawya'añ, jøts t'ejxtit ja møk'ajtin ja øy'ajtin midit me tø xmøøy; jaayim me xtsøky ku ka'anim wyinaty naẁwii'ñit y'øyinim.

²⁵ Mets Dios Teety tiy'ajtin janch'ajtin mmøøt, jøts ka'ats ja naẁwii'ñit jaa'y mñijawiyi; jøts øts, mñija'wip mets; jøts yø pabøjkpitøjk, ñija'winidip yø' jøts ku me tø xjanchkexy.

²⁶ Tø øts ja ndukmadowdi mbøn mets jøts njaaktukmadoowandipnim øts. Jade'ents sa mets xpa'ayøyin, nayide'ents ttaba'ayoomidit ja myigu'uktøjk. Nmøøt'etpyim øts yø' y'agujkpti jade'en.

18

Ku ja Jesús ojts yikmach

¹ Xjats ku ja nwindson'ajtim Jesús jade'en wyinaty tø wya'añ, winets ja tmøøtsøø'ñ ja pyabøjkpitøjk, jøts ja ñøjkxw'a'andi jam jaduktamajñ ku ja ttanaxtit ja nøø midit yik-tejp Cedron. Jam tu'uk ja kam ma y'ity øy ti tsa'am, jams ja nwindson'ajtim Jesús tmøøtkuyø'øyiyii'ñ ja pyabøjkpitøjk.

² Jøts ja Judas, pøn ja wyinaty ixam ka'ødyunwajnip, wa'ats ja t'ixxy'aty ja'abi et, pø jamxi ja nwindson'ajtim Jesús wyinaty kawinaak ojk tø ñamyukyidi møøt ja pyabøjkpitøjk.

³ Jade'en'ampyts ja Judas jam ojts tmøøtja'aty tukpiky ja soldaditøjk møøt ja jaa'dyi midit t'ejx'eittip ja tsaptøjk, ja teetywindsøndøjk ja fariseotøjk ja kajxidip, tumda'o'jk møøt ja jam yja'ttøø kunø'øky.

⁴ Ñija'wiñip ja nwindson'ajtim Jesús ja wyinaty sa jaty ja yjatwa'añ kyubatwa'añ, winets ja twinguwa'jkiiyi'ñ, jøts ja tyiktiiy:

—¿Pøn døøñ m'ixaadyip?

⁵ Jøts ja ojts yide'en y'adsowdi:

—Ja Jesús øø n'ixaapy, ja Nazaretit jaa'y.

Jøts ja nwindson'ajtim Jesús ja t'adsøøy:

—Øtsimts ja'.

Jøts ja Judas midit ka'øy'adøtsp, ixam ja tmøødi ja mayjaa'y.

⁶ Jøts ku ja nwindson'ajtim Jesús wya'añ: "Øtsimts ja'", winets ja jadi'iñi y'ixnøjkxtøø jøts ja kya'tsjimbejtøø.

⁷ Winets ja nwindson'ajtim Jesús ja jadijojk tyiibyøjkidøø, jøts ja ñimaa'jyidøø:

—¿Pøn døøñ m'ixaadyip?

Jøts ja wyandøø:

—Ja Jesús, ja Nazaretit jaa'y.

⁸ Jøts ja nwindson'ajtim Jesús ja tñimaay:

—Tøxi nnigajpxy jøts ku ja y'øtsi. Pøni øts tam x'ixaadyip, majtstu'uttits øts yø nbabøjkpitøjk.

⁹ Jade'en'ampy ja jade'en yjaty, jøts ja jade'en ka'pxy tyimyjaty ku ja nwindson'ajtim Jesús wyinaty yide'en køøm tø wya'añ: "Pøn jaty øts ja Dios Teety tø xagødøki, ni tu'ugin ja tø kyawindigøydi."

¹⁰ Jøts ja Simón Pedro jam wyinaty tø tñixaji tu'uk ja tsujx, ja'ats ja ojts tjuuty, jøts ja ttaxikpo'otuuyt ja jaa'y midit txøøw'ajtp Malco, ojts y'aga'ndyatsk ja tymgyajtpo'jtiiy, ja teetywindsøndøjk idøøñ ja tyumbi jade'en jajtp.

11 Yide'en ja nwindson'ajtim Jesús tniimaay ja Pedro:

—Pikta'ak yø mdsujx nay jap ma tø xjuuty. ¿Sa me mwınmay, uk ja øts idø'on xijy ngagupøkt ja ayo'on midi øts ja Dios Teety tø xanibiktaagi?

Ku Jesús yiknajtswaa'wiyi'ñ jam ma teetywindsøn

12 Xjats ja soldaditøjk, møøt ja' pøn tniigubajk'ajtp jøts møøt ja tsaptajk, ojts tmatsti ja nwindson'ajtim Jesús, jøts ja ojts tkøwøøndi tkøxojtsti.

13 Jøts ja tyiknøjkxtøø ma ja Anás jam tyøjk midi ja Caifás tyety myø'jtíp, midi jam wyinaty ja'abi jumøjt teetywindsøn'ajtp.

14 Nayi Caifás idø'on wyinaty yide'en tø tñøjmi ja israelit jaa'y, jøts ku ne'egi jade'en tyimy'ø'y'att jøts tu'ugyi ja jaa'y tku'oogit ja kajp.

Ku ja Pedro tku'iñ jøts ku ja ka' t'ijxy'aty ja Jesús

15 Jøts ja Simón Pedro møøt jadu'uk ja myibabøjkpi tpanøjkxti ja nwindson'ajtim Jesús. Jøts yik'ijxy'ajtp ja' ja yjadu'ukpi, ijxy'ajtp ja teetywindsøn ja', ja'ats jap tyimyøøtøjkimyaā ja nwindson'ajtim Jesús jap windsøn tyøjk'agui'py;

16 jøts ja Pedro jap tyaāñ ma yiknidøki ja tøj. Ja'ats ja yjadu'ukpi jap ñibidsøøm midi ijxy'ajtp ja teetywindsøn, jøts ja ojts tminagyajpxyi ja tø'øxyøjk midi jap tøjk'adinaapy, jøts ja tyiktøjkii'ñ ja Pedro.

17 Winets ja tø'øxyøjk midi tøjk'adinaapy, y'amidoøjøø ja Pedro:

—¿Kidi metsip yø jaa'y mbabøjkpi'ajtpy?

Jøts ja Pedro t'adsøoy yide'en:

—Ka', ka'axi ja y'øtsi.

18 Jøts kumi xujxpts wyinaty, jøts ja tumbitøjk jøts ja tsaptøjktajk jap ja wyinaty tø tyikmøjidi ja jøøñ, ja'ats ja jap wyindanaadyip jøts ja jap xyamdi. Jøts ja Pedro ixam idø'on ja tmøøtxami.

Ku ja teetywindsøn tyiktøøbinaxwa'aky ja Jesús

19 Xjats ja teetywindsøn tyiktøøbinaxwaajky ja nwindson'ajtim Jesús pøn jaty idø'on pyabøjkpitøjk'ajtpy, jøts ti dø'on ja ñanky'ixpøjkp.

20 Jøts ja nwindson'ajtim Jesús ja t'adsøoy:

—Tø ø ngajpxy mayjaa'y'aguijky øy madsoo; ejtp ø nyik'ixpiky ma jaty tsaptøjk, jøts nayide'en ma ja møj tsaptøjkmí ma israelit jaa'y ñamyukyidi, jøts ka'ap øts øy ti n'amaa'tsk'aty ku ø ti nnigajpxy.

21 ¿Tigøjxp ku øts ja xyiktiy? Ja' mets ja myiktø'øp pøn jaty ø tø xmadooji, jøts wan ja tniigajpxti pøni sa jaty øts idø'on ja tø nnøjmidi. Ja' ja tnija'widip pøni sa jaty øts ja tø nnøjmidi.

22 Xjats ku ja nwindson'ajtim Jesús jade'en wyaāñ, jøts nidu'ugin ja tsaptajk ja ojts wyingugoxiyi, jøts ja ñi'mxyiyi:

—¿Jade'en yø m'aaw xa'adsøy jøts jade'en xnøjmit yø teetywindsøn?

23 Jøts ja nwindson'ajtim Jesús ja yide'en t'adsøoy:

—Pøni tødäm ø ngajpxigøy, nigajpxts midi'ibi dø'on mga'ømyadøøpy; jøts pøni øydam jade'en sa ø tø nwa'añ, ¿tits ku øts xkøxy?

24 Winets ja Anás ja ojts kyexyi wiñ ke'kxy, jøts ja jam ñøjkxt ma ja Caifás, midi teetywindsøn'ajtp.

Ku Pedro jadigojk wya'añ ku ja ka'ap t'ejxi ja Jesús

25 Ixajp idø'on ja Pedro tyani, yjoo'kxpiky jap jøn'ajpy, ku ja yikniimaay:

—¿Kidi metsip yø jaa'y mbabøjkpi'ajtpy?

Jøts ja Pedro ja ka' tkupiky, yide'en ja wyangojmi:

—Ka', ka'axi ja y'øtsi.

26 Winets ja yiktøøji tu'uk ja teetywindsøn tyumbi midi ja jaa'y myigu'uk'ajtpy, midi ja Pedro wyinaty tø txiktsajtstu'uty jøts ja tyatsk tyimykwinajkiyøø, ja'ats wāan:

—¿Kidi metsip jap tø n'ixy jøts ku mets ja jap y'ity xmøødi jap tsa'amgamjøtpy?

27 Jøts ja Pedro ja jadigojk ka' tkupøjkjomi, winets nay jaty y'ayaajxy tu'uk tsapni'aaw.

Ku Jesús twinguwa'jkii'ñ ja Pilato

28 Jøts ja nwindson'ajtim Jesús øjts yikwaadsøøñ jam Caifás tyøjkjotp, jøts ja yikwaanijkxy ma ja møj windsøn kyutujktaajk jam. Xiijñiwyani, jøts ja israelit jaa'y nika'ap tyøjkidøø jap kutujktaajkjøtpy, jøts ja ka'ap tyiktigøøwya'andi ja kyostumbri, pøky idø'on ja' ku ja jade'en y'adø'øtstit, ka'ap ja t'ukaañidit ja paski xøgaaky ja paski xø'uuky ku ja a'ux ja tyiknaxtit.

29 Ja'agøjxp ja møj windsøn Pilato jam ojts pyidsimy jøts ja myigajpxwa'añidi, yide'en ja ojts ñi'mxyidi:

—¿Ti yø jaa'y mdani'øø'nidip?

30 Jøts ja y'adsøodøø:

—Ku yø jeexyip kyapøkyjaa'yi ka' mets yø jeexyip ya tø myiktagødøki.

³¹ Winets ja Pilato ja ñimaajyidøø:

—Møødidi, jøts xiidyu'undit jade'en pøni sa ja mgutujk wya'andi.

Jøts ja israelit jaa'y y'adsoodøø:

—Øøts, ka'ap øøts xpaat'aty jøts øøts øy pøn nyik'oookt.

³² Jade'en ja ojts ka'pxy jyaty sa ja nwindson'ajtim Jesús ja wyinaty tø tniagjpxy jøts ku ja jade'en y'oookt.

³³ Xjats ja Pilato jap jadigojk tyøjkiyi'ñ jap kyutujktaajkjøtpy, jøts ja ojts tyajxi ja nwindson'ajtim Jesús, jøts ja t'amidøøy:

—¿Mets idø'on israelit jaa'y mjanchwindsøn'ajtip?

³⁴ Jøts nwindson'ajtim Jesús ja tñimaay:

—¿Kø'øm mets jade'en mwinmay jøts mets jade'en xyiktiy, uk pøn jade'en tø mdamimadya'agy: jøts ku ø nja'aji?

³⁵ Jøts ja Pilato ja y'adsojøø:

—¿Ti israelit jaa'yimts øts? Kø'ømxi yø mmigugajp jøts yø teetywindsønøjk ya myikmiñiyi jøts mets ya nyiktagøðøki. ¿Ti dø'on tø xun?

³⁶ Jøts nwindson'ajtim Jesús ja yide'en t'adsøøy:

—Windsøn'ajtp øts, ka' øts nja' yjade'eni sam pøn yja' ya naxwiin. Ku jeexyip jade'en, tø øts nbabøjkpitøjk jeexyip xnitseptunidi, jøts øts jeexyip ngayiktagøðøki ja israelit jaa'y. Kayaa'ip øts ngutujk.

³⁷ Winets ja Pilato ja ojts ñi'mxyiyi:

—¿Jøts mjanchwindsøn mets idø'on?

Jøts nwindson'ajtim Jesús ja t'adsøøy:

—Ja' øts sa ixa mwa'añ, windsøn øts. Tø ø ngaxi'iky ku øts ya naxwiin tø nmiñ jøts ø nniagjpxt ti tiy'ajtin'ajtp, ti janch'ajtin'ajtp. Pøn jaty ja xmimadoodip, xmadodidipts øts nja' ja' sa jaty ø nwa'añ.

³⁸ Jøts ja Pilato ja ojts ñi'mxyi:

—¿Jøts ti dø'on tiy'ajtin'ajtp janch'ajtin'ajtp?

Ku Jesús ñidujkiyi'ñ jøts ja y'oookt

Jøts ku ja Pilato jade'en t'ukyiktiy, jøts ja ojts pyidsimy jøts ja tminagyajpxwa'añ ja israelit jaa'dyi, jøts ja tñimaay:

—Ka' øts yø jaa'y nbøky'ixy.

³⁹ Jade'ents mee xkostumbri'aty jøts øts nidu'ugin nyik'awa'atpidsøømt ja pøkyjaa'y, ku meets ja x'amidøy ku paski xøøw: ¿Jøts mdsojktip jøts wan øts yø mwindsøn tñajtsmætsi jadi'iñi?

⁴⁰ Winets ja niduki'iyi møk wyandøø:

—¿Ka' yø' xyik'awa'atpidsøømt! ¡Yø Barrabás myik'awa'atpidsøømp!

Jøts møj maa'tspi dø'on ja Barrabás.

19

¹ Xjats ja Pilato ojts tñankmyachi ja nwindson'ajtim Jesús, jøts ja ojts tñankwyøpyi.

² Jøts ja soldadi ja ojts ttagujandi tu'uk ja windsøn kujan, jøts tum kujp awiity, jøts tsuu'nk wet ja ojts ttaxoxti.

³ Jøts ja ojts wingon twingunøjkxidi, jøts ja ojts tñøjmidi:

—¡Møj mets, pøn ja israelit jaa'y wyindsøn ukmayip!

Jøts ja ojts twingoxti tjøpkoxti wyemp y'am.

⁴ Winets ja Pilato ojts jadigojk pyidsimy, jøts ja ojts ñi'mxyidi:

—Ejxti nijawidi, nyikpidsimpy øts yø ya jøts xnijawidit jøts ku øts yø niti ngadapøky'ixy.

⁵ Jøts ja nwindson'ajtim Jesús pyidsimy, ixam tkujan'aty ja kujp awiity jøts ja tsuu'nk wet ja ttwet'aty. Jøts ja Pilato ja ojts ñimaagyojmyidi:

—¡txya dø'on ja jaa'y!

⁶ Xjats ku ja teetywindsønøjk ja t'ejxtøø jøts ja tsaptajk, winets ja tjanchtayajxidøø møk'ampy:

—¡Yikruspat! ¡Yikruspat!

Jøts ja Pilato ja tñimaay:

—Wawdi jøts mee xyikruspat, kumi ka'ap øts yø ti pøky ndapøky'ixy.

⁷ Yide'en ja israelit jaa'y ja y'adsoojyøø:

—Jap øøts tu'uk ja kutujk nmøødi, jøts jade'en ja tyikutuky jøts wan t'øøky, ja'agøjpx ku yø tø ñabyikta'agy: Dios U'ngin.

⁸ Xjats ku ja Pilato ja ojts jade'en tmadøy, jøts ja jade'en yjaaktyimyik'adsø'jkiyi'ñ.

⁹ Jøts ja jap kyutujktaajkjøtpy tyøjkiyi'ñ jadigojk, jøts ja ttiibyijky ja nwindson'ajtim Jesús:

—¿Mets, ma mdsøøñ?

Jøts ja nwindson'ajtim Jesús niwine'enin ja tkidyimy'adsøøy.

¹⁰ Winets ja Pilato ja ojts ñi'i'mxyiyi:

—¿Jøts ø ka'ap x'adsøøy? ¿Ti ka' xnijaw i jøts ku øts kutujk njagyepy, jøts me nyikruspatt uk jøts me nyik'awa'atspidsø'ømt?

¹¹ Jøts nwindson'ajtim Jesús ja t'adsøøy:

—Ti kutujk mets jeexyip mdsaaehjagyepy ku Dios Teety ja jeexyip jade'en tkayikjaty; paty ja' møj pøky tymdyaja'adyi pøn øts ya tø xkøyaky jøts me tø nyiktagødøki, waani mets mja' mdaja'adyi.

¹² Winets ja Pilato nay jaty tja'ixaay ja taay, jøts ja t'ixmatst jadi'iñi ja nwindson'ajtim Jesús; xjats ja israelit jaa'y ja møkta'aky ñimaajyiyi:

—iPøni myik'awa'atspidsimpy inet, ka' xniigu'ugi wyinaty ja møj windsøn César jam Roma! iPøn jade'en namyøjpiktaajkip, myidsep'atpyts ja César!

¹³ Xjats ku ja Pilato jade'en tmadøøy, winets ja ojts tñankyikpidsimyi ja nwindson'ajtim Jesús jøts ja y'ixaajky jam kyutujktaajkjøp'am mid i yiktejp Gabata ku hebreit ayuujk, jade'en ja tijy ma tsaba'kxy.

¹⁴ Jaa dø'øn ja xøøw wyinaty kujky ku wyinaty tymbyatni ja paski. Winets ja Pilato tñimaay ja yjaa'y mid i jamdi:

—iXyaadi ja mwindsøn!

¹⁵ Yide'en ja møk wyandøø:

—iWan tpa'øøky! iWan tpa'øøky! iYikruspat!

Jøts ja Pilato ja tñimaay:

—¿Øts ndejin ja mwindsøn nyikruspatp?

Ja teetywindsøndøjk ja yide'en y'adsoojyøø:

—Ka'ap øts pøn jadu'uk nwindson'ajtpy, ja'ayi tu'ugyi ja møj windsøn César.

¹⁶ Ku ja Pilato jade'eñi yiknimaay, jøts ja ojts tkøyaky ja nwindson'ajtim Jesús jøts ja tyikruspattit, winets ja tyiktsø'ondøø.

Ku ja Jesús kyiruspejty

¹⁷ Xjats ja nwindson'ajtim Jesús tyiktso'ondøø, jøts ja ttukapti ja kyirus, jøts ja jam ñijkxy ma ja et yiktijy Oo'kpi Kyubajk Pajk, mid i yiktejp hebreit ayuujk Gólgota.

¹⁸ Jamts ja ojts tyikruspatti møøt namajtsk pøkyjaa'y, tu'uk jaty ja yikpiktaktøø adsow aduuk, jøts ja nwindson'ajtim Jesús agujk'ajpy.

¹⁹ Jøts ja Pilato jam ojts tñankpyikta'agyi ja letri kruskøjpx mid i nømp: “Jesús, Nazaretit jaa'y, israelit jaa'y wyindsøn.”

²⁰ Jøts may jaa'y ojts t'ejxti ja letri, pø kajppwingtonxi ja jam ma ja nwindson'ajtim Jesús ojts kyiruspejty, jøts ja letri jade'en ja kyøxja'ayi hebreit ayuujk, jøts griegit ayuujk, jøts latin.

²¹ Paty ja israelit teetywindsøndøjk tñimaydi ja Pilato:

—Kidi jade'en xja'ay “Israelit jaa'y wyindsøn”; ne'egi jade'en xpikta'akt “Kø'øm ñadyijyiyi jøts ku israelit jaa'y twindsøni.”

²² Yide'en ja Pilato ja ojts y'adsøoydi:

—iMidi tø nja'ay, jade'en yø tyä'ant!

²³ Xjats ku ja soldaditøjk wyinaty tø tyikruspatti ja nwindson'ajtim Jesús, winets ja ojts twejtsø'jkidi ja wyet, jøts ja ojts ñadyaniipaadyidi jøts ja ñawa'kxit maktaxkpiky, kitu'uk ja soldadi ja tpoøktit. Jøts nayide'en tñixajidyøø ja nijan, jøts kumi ka'ats ja y'axuuumyuky, ja'ayi ja amuum tymdyukojkubetyi,

²⁴ xjats ja soldadi nixem niyam ñawaajnidøø:

—Ka' y nødakø'øtsa'ant; ne'egi yø nniguyajtint, jøts n'ejxint pøn jadyimy'uktaja'adip yø wet.

Jøts jade'en ojts ka'pxy yjaty sam jap jaabyety nøkyijxpy: “Tø øts nwet ja xwejtswa'kxidi, tø ja tñiguyatti.” Jade'ents id'ø'n ja soldaditøjk y'adøstøø.

²⁵ Jøts ma ja nwindson'ajtim kyirus jam, ixam ja tyaak ja', jøts nay i xamts ja'am i mid i ja tyaak y'uchip, jøts ja Cleofas ñidø'øxy mid i Maria'ajtp, jøts nay jam ja Maria Magdalenimi.

²⁶ Xjats ku ja nwindson'ajtim Jesús ojts t'ixy ja tyaak, jøts ku ja pyabøjkpi nay jam tyanaamy mid i ja jantyimyinamyajyip, winets ja tñimaay ja tyaak:

—Taaq, ixa ja m'u'nk.

²⁷ Jøts ja pyabøjkpi ja tñimaamyi:

—Èxa ja mdaaq.

Jøts nay jaty ja'abi pabøjkpi ttaakpijky mid i ja nwindson'ajtim Jesús tyaagip, jøts ja jade'en yikjagyepy sam kyø'ømdaagin.

Ku ja Jesús y'ø'jky

²⁸ Xjats ku ja jade'en wyinaty tɔ y'ukjaty, jɔts kumi ñija'wipts ja nwindson'ajtim Jesús ja wa'ats jɔts ku wyinaty jade'en tuki'iyi tɔ kya'pxy, jɔts idɔ'on ja jade'en tyimyjatt sam jap jaabyety nɔkyijxpy, winets ja wyaañ:

—Jantyimdyɔjtsip ɔts.

²⁹ Jamts wyinaty tukmɔjnajts'ɔɔy ja vino midi jeky tɔ pyu'uch; ja'ats ojts yiktabadsich ja tanimuu'kpi, jɔts ja yikpiktaajky jam hisopo kipy awaj jɔp'am, jɔts ja yikta'ayɔjkxyi ja nwindson'ajtim Jesús.

³⁰ Xjats ja twixi'l'ch ja tanimuu'kpi jɔts ja vino ka'ɔybi jade'en t'uuky, winets ja wyaañ:

—Tɔ tuki'iyi yikpaduñ ka'pxy.

Jɔts ja kyubajk ja jadi'iñi kyuwɔjtsnajxy, jɔts ja jade'en y'ɔjky.

Ku ja Jesús yikuumy kyachpuki'jy

³¹ Jɔts tymbyaatwanipts ku ja paski xɔɔw kyujajy, jɔts ja' ja israelit jaa'y kyatsojktip jɔts ja oo'kpi jam y'awejxtit kruskɔjxp ku poo'kxin xɔɔw, jɔts yats idɔ'on ja'abi xɔɔw jaa'kytimyɔjxɔɔwni. Ja'agɔjxpts ja tnimaydi ja Pilato, jɔts wan ja tnankpyakwojptɔjkxyi pɔn jaty jam wyinaty tɔ kyiruspatti, jɔts wan ja tnankyikwinajkxyi jam ja oo'kpi ñine'kx.

³² Winets ja soldadi ñɔjktɔɔ, jɔts ja ojts tjanchpakwojptɔjkɔxti midi ja nwindson'ajtim Jesús jam wyinaty mɔɔt tɔ kyiruspety. Ojts ja yjawyeembi tyimykpakwojptɔjkɔjy, jɔts ja yjadu'ukpi nayide'en midi jam jaduktamajñ.

³³ Xjats ku ja twingunɔjxkidi idɔ'ɔɔ ja nwindson'ajtim Jesús, jɔts ja t'ejxpattɔɔ jɔts kudam ja tɔ y'oo'kni, patyts ja ka' nayide'en t'uktunidɔɔ.

³⁴ Ja ti winets ja ñajxy? Ojts ja soldadi ja nidu'ugin tyakumy ja takuu'm jɔts ja tyimy'awajch ja kyachpuki'jy, jɔts nay jatyi ja ni'jpy pyidsimy mɔɔt nɔɔ.

³⁵ Ja'ats midi ixym njaadyampy, tɔ ɔts idɔ'on jade'en n'ixy nnijawi midi'tibi tiy janch, jɔts mee nayide'en xiyjawit xjanchnjawit.

³⁶ Jade'enxi dɔ'on ja yjajty jɔts jade'en ka'pxy tyimyjaty sam jap jaabyety nɔkyijxpy: “Ni tu'ugin pyajk ja kyatɔjt kyamoott.”

³⁷ Jɔts jap abiky wyami: “Y'ejxtip ja kɔ'ɔm ku tyiktsaachidit.”

Ku ja Jesús ñine'kx yikpiktaajky jap mɔj tsaajutjɔtpy

³⁸ Xjats ku dɔ'on ja jade'en wyinaty tɔ jyaty, jɔts ja José midi kugajp'ajtp jam Arimatea, pyabijpky ja' nwindson'ajtim Jesús ɔy idɔ'on ja ka'ap ɔy pɔn tjadyimdyuknijawi, ja'agɔjxp ku ja ttsɔ'ɔgi ja myi'israelit jaa'y. Ja'ats idɔ'on t'amidoow ja Pilato ja may'ajt, jɔts ja myo'ɔjyit ja nwindson'ajtim Jesús ñine'kx. Xjats ja Pilato yikjajt ja jade'en, winets ja José ojts ñijky jɔts ja ojts tyiktso'oniyi.

³⁹ Jɔts ja Nicodemoni midi wyinaty jekyip tɔ tmɔɔtmadya'aky ja nwindson'ajtim Jesús koots, ja'ats jam tmija'jt ee'px majk kilin jaabya'ak midi pa'akxuu'kp, majtsk jɔɔp ja', ja mirra tɔ t'abɔjkmuky mɔɔt ja álóes.

⁴⁰ Jɔts idɔ'on ja José jade'en mɔɔt ja Nicodemo tnixajyidɔ'ɔɔ ja nwindson'ajtim Jesús ñine'kx, jɔts ja tta'abejtɔɔ ja wet midi ja wyinaty tɔ tpiktaajkidi ja'abi pa'akxuu'kpi midi jade'en abɔjkmuky. Jade'en ja ttundɔɔ sam idɔ'on ja israelit jaa'y kyostumbridi ku ja y'oo'kpi ja tyiknaxɔkidi.

⁴¹ Jɔts ma ja nwindson'ajtim Jesús wyinaty tɔ kyiruspety, jam wingon tu'uk ja kam ma y'ity ɔy ti tsá'am. Jamts tu'uk oo'kpi jut ja'abi kamjotp midi tyimyjemy'ɔyipnim, ka'anin jap pɔn tyimykpi'aky.

⁴² Japts ja tpiktaktɔɔ ja nwindson'ajtim Jesús ñine'kx, pɔ wingonxi ja jam tyañ ja oo'kpi jut, jɔts tymdyɔts jɔts ja israelit jaa'y pyoo'kxin xɔɔw tymcho'ondaknit.

20

Ku ja Jesús yjukpyijky jadigojk jap mɔj tsaajutjɔtpy

¹ Xjats ku midukxɔɔw cho'onda'akñim ja yjadu'ukpi samaan, winets ja María Magdalena ojts jɔpyi ñijky jam ma ja oo'kpi jut jam wyinaty, ka'anin yikxon yjajta'aky; jɔts ja ojts t'ixy jɔts ku ja oo'kpi jut jam tka'uk'agɔ'ajtni ja tsaaj midi ja wyinaty tɔ yikta'agi'iy.

² Winets ja ojts putyi ñijky ma ja Simón Pedro jam wyinaty mɔɔt ɔts midi yɔ nɔky tjaapy, midi ja nwindson'ajtim Jesús jantyimynamyaajyip, jɔts ɔɔts xnimaay:

—Tɔts ja nwindson'ajtim jap yikjidɔjtpidsɔmni jap jutjɔtpy, jɔts ka'ap ɔɔ nnijawi pɔ ma net tɔ yikpikta'aky.

³ Xjats ɔts mɔɔt ja Pedro nnijky ma ja oo'kpi jut jam.

⁴ Jɔts ɔɔts namajtsk janch putyi nnijky; jɔts ɔts jawaani mɔk njantymbyujt jɔts ja Pedro nnikejky, jawyeen ɔts jam nja'jty ma ja oo'kpi jut.

⁵ Jɔts ɔts jap ngu'ejxyi'ñ, ja wetyi jap n'ejxpaajt midi ja nwindson'ajtim wyinaty tɔ yikta'abity jɔts ku ja jap wyɔjni, jɔts nika'ap ndɔjkiyi'ñ.

⁶ Jøtsnīm ja Simón Pedro ix'oojknīm yja'jty, jøts ja tyøjkiyii'ñ jap oo'kpi jutjøtpy. Jøts ja nayide'en jap ojts t'ixy jøts ku ja abet jap wyøjni;

⁷ jøts ja tjaaktyimye'jxpaajty ja wet midī ja nwindson'ajtim Jesús wyinaty tø yiktagupity, jøts nigidi ja jam møøt ja wet midī ja amuum yikta'abejt, axaāch ja jam abiky tø yikpikta'aky.

⁸ Winets øts ndøjkiymyaa mā dø'øn ja oo'kpi jut jam, jøts n'ijxy jøts kudam ja wyinaty jade'en tø yjaty, xjats ja njanchja'wiyii'ñ.

⁹ Jøts ka'anims idø'øn øøts wyinaty nja'gyuki midī jap nøkyijxy jaabyety wyā'añ, jøts ku ja nwindson'ajtim Jesús yjujkyøkt jadigojk jap oo'kpi y'aguujk.

¹⁰ Jøts øøts jade'en namajtsk nwimbejtnaa jøts nnøjkxnaa jam ndøjkwindump.

Ku ja Jesús ñanky'ejxøø jadigojk mā ja María Magdalena jam wyinaty

¹¹ Jøts ja María jamyi jut'agø'øm tyaañ, ñiyaxni ja jam kyu'ejxiyii'ñ mā ja jut,

¹² winets ja ojts t'ixy namajtsk ja ankilis, tum amuum poop ja xyøxyidi, jøts ja jam chøøniidi mā ja nwindson'ajtim Jesús wyinaty tø y'ukyikpikta'aky ja ñine'kx; tu'uk jam chøøni agubajkp, jøts jadu'uk teky'ok'am.

¹³ Jøts ja ankilis ja ñimaaajyøø, ja tø'øxyøjk yiknimaapy:

—¿Ti mjajtīp, tiku myā'axy?

Jøts ja tñimaay:

—Ja'agøjxp ø nya'axy ku øts ja nwindson'ajtim yā tø yikwejtspidsømni, jøts øts ja ka' nnijawī pø mā ja tø yikpikta'aky.

¹⁴ Ja'ayi ja jade'en wyaañ, jøts ku ja y'ejxjimbijty winets ja t'ejxpaajty jøts kudam ja nwindson'ajtim Jesús jam tyani; jøts ka'ap ja tyimwya'añ jøts ku ja yja'aji.

¹⁵ Winets ja ojts kø'øm ñii'mxyi, jøts ja tø'øxyøjk yiktiibyiky:

—¿Tiku myā'axy? ¿Pøn m'ixaapy?

Jøts ja tø'øxyøjk jade'en ja wyinmay, ja tsā'am kam ejx'ejtpik idø'øn ja tijy, jøts ja tñimaay:
—Teety, pøni mets ja tø xyikpidsimy, tukmadookts øts mā tø xpikta'aky jøts øts ja n'atsyiktsoont.

¹⁶ Winets ja ñimaaajyøø ja nwindson'ajtim Jesús:

—¡María!

Xjats ja y'ejxjimbijty jøts ja tñimaay hebreit ayuujk:

—¡Raboni! —midi tyijpy yik'ixpøjkpi.

¹⁷ Jøts ja nwindson'ajtim Jesús ja ñimaaajyøø:

—Kidi ø xøñ, majstutk øts, pø ka'anīmxi ø nnijky jam mā ja nDeety jam. Nøjkxts x'atstukmadøy pøn jaty øts nja' xpabøjkidip, jøts ku øts jap nnijky mā øts ja nDeety jap, midī mee mDios Teety'ajtpy.

¹⁸ Winets ja María Magdalena ojts ñijky, jøts ja ojts t'atstukmadoji ja nwindson'ajtim Jesús pyabøjkpitøjk jøts ku ja wyinaty tø t'ixy ja nwindson'ajtim, jøts ku ja wyinaty jade'en tø ñii'mxyiyi.

Ku ja Jesús ñanky'ejxøø jadigojk mā ja pyabøjkpitøjk jam wyinaty

¹⁹ Jøts nay ja'abi xøøw ku midukxøøw cho'onða'akñīm ja yjadu'ukpi samaan, nay ja'abi ux ku ja pabøjkpitøjk jam wyinaty tø ñamyukyidi jøts ja wyinaty tø ñañ'agiibyetyidi, ja israelit jaa'y ja chø'jkidip. Winets ja nwindson'ajtim Jesús tyøjkiyii'ñ jøts ja jam y'aguujk'am wyā'k'øiyiyii'ñ, jøts ja ojts yide'en kyajpxpøø'kxyidi:

—Øy'atti jotkujk'atti.

²⁰ Xjats ku ja jade'en y'ukwaañ, jøts ja ojts tyuk'ijxyidi ja kyø' jøts nayide'en ja kyach-puki'jyit tsaachi. Jøts ja pabøjkpitøjk yjantyimxyondaktøø ku ja t'ejxtøø ja nwindson'ajtim.

²¹ Jøts ja nwindson'ajtim Jesús ja jadigojk ñimaaajyidøø:

—Øy'atti jotkujk'atti. Nayide'en sam øts ja Dios Teety tø xkexy'in, jøts nayide'en meets yam nguexy.

²² Xjats ja tñibixujiyii'ñ ja pyabøjkpitøjk jøts ja tñimaay:

—Wan ja Dios y'Espíritu Santo mdatøkiyidi.

²³ Jøts pøni mgajpxwā'kxtip jøts ku ja yikpojkpimee'kxy pøn nabyøkyja'wiyidip, jøts øts nja' ja xpabøjkiyidit; uk pøni ka'ats, mdukmado'opts meets ja nayide'en jøts ku ja pyøky ja ka'ap mibaat yikmee'kxy, pøni ka'ap ja ñabyøkyjawiyyidi niwine'en.

Ku Tomás ojts t'ixy ja Jesús ku tø yjujkyiky

²⁴ Jøts tu'uk ja nwindson'ajtim pyabøjkpi midī Tomás'ajtp, midī yiktejp xeeñu'nk, ja' wyinaty ka'eitp mā ja jamdi ku ja nwindson'ajtim Jesús wyinaty tø ñanky'ijxyi.

²⁵ Xjats ja oojknīm ttukmadowdi ja nwindson'ajtim Jesús pyabøjkpitøjk, jøts ja tñimaadyi:

—Tø øøts ja nwindson'ajtim n'ixy.

Ja Tomás yide'en ja ojts ñii'mxyidi:

—Ka' ɔts ja njanchjawit pɔni ka' ɔts kyɔ' ja n'ejxi jɔts ku ja klɔbis ja tɔ yiktsaachiyi; ku ɔts ngɔtsa'jx jap kɔ'ɔm ka' ndyimgyudejit ma ja klɔbis ja tɔ yiktsaachiyi, pɔni ka' ɔts jap nguxaji ma ja kyachpuki'jy tɔ chaachi, ka'ats ɔts ja njanchjawit.

²⁶ Xjats ku kyiduktujkxɔw'ajty, winets ja pabɔjkpitɔjk ñamyujidɔɔ jadigojk jam tɔjkjotp, jɔts ja Tomás ixjam ja wyinaty tmɔɔdidi. Winets jadyimja'aduky ja tɔjk wyinaty yikxon ku ja nwindson'ajtim Jesús tyɔjkii'ñ, jɔts ja jam agujk'am tyanay'oyi'ñ. Jamts ja ojts kyajpxɔɔ'kxyidi, yide'en ja ñii'mxyidi:

—Oy'atti jotkujk'atti.

²⁷ Jɔts ja Tomás nay jatyi yiknimaay:

—Kudeji yɔ mgɔtsa'jx yap, jɔts ɔts yɔ ngɔ' x'ejxit; jɔts yak yɔ mgɔ' jɔts yap mguxajit ɔts ngachpuki'jy. Jɔts kidi nugo xkuwinmayi, janchjawi dɔ'ɔn.

²⁸ Xjats ja Tomás y'adsɔɔy jɔts ja wyaañ:

—iMets nwindson'ajtpy ndios'ajtpy!

²⁹ Jɔts nwindson'ajtim Jesús ñimaajyɔɔ:

—Tomás, ja agɔjxp yam xjanchjawinim ku ɔ tɔ xtyimwyemp'ijxñim. Jotkujk'atyim ja'adi pɔn tmibɔjktip pɔn tjanchja'widip jadi'iñi, oy ɔts ja xjaga'ejxti.

Ya'at nigajpxp ja tiy'ajtin midiyɔ nɔky myɔɔt'ajtpy

³⁰ Jɔts may ja nwindson'ajtim Jesús ojts tɔpikta'aky ja ejxpajit, ku ja ojts ttuñ ja milagri jam pyabɔjkpitɔjk wyingujkp midiyɔ ka' kyɔxja'ayi ya'at nɔkyjɔtpy.

³¹ Ja'agɔjxp ya'at jap jade'en tɔ yikujayi, jɔts xiyjawidit xjanchjawidit jɔts ku ja' yiknitsɔ'ɔky, jɔts ku ja' Cristo ja nwindson'ajtim Jesús, ja Dios U'nk. Jɔts ku ja xjanchjawidit, mbaatpts meets ja julyk'ajtin xemikɔjxp sam pyaat'atyidi pɔn tjanchja'wyidip.

21

Ku Jesús ñanky'ejxiyi niwixujk pyabɔjkpi windump

¹ Xjats ku dɔ'ɔn ja wyinaty jade'en tɔ y'ukjaty, winets ja nwindson'ajtim Jesús ñanky'ejxi jadigojk jam ma ja pyabɔjkpitɔjk, jam mejy'am midiyɔ yiktejp Tiberias. Yide'en idɔ'ɔn ja y'ejxi tyiyi:

² Ja Simón Pedro jam wyinatyi mɔɔt ja Tomás midiyɔ yiktejp xeeñu'nk, jɔts ja Natanael midiyɔ jam kugajp'ajtp Caná midiyɔ Galileit etjotp, jɔts ja Zebedeo y'una'jk, jɔts mɔɔt abiky janamajtsk nay ja nwindson'ajtim Jesús pyabɔjkpi.

³ Ja'ats ja Simón Pedro ñimaay:

—Niikxy ɔts t'ats'ajkxma'aky.

Jɔts ja wyandɔɔ:

—Pɔ tsoomp ɔɔ nayide'en.

Xjats idɔ'ɔn ja ñɔjktɔɔ, jɔts ja ojts ttatɔkidi tu'uk ja barki, ni tu'ugin ja ajkx ja tkamaktɔɔ ja'abi koots.

⁴ Jɔts ku wyinaty xyijñiwyani, winets ja nwindson'ajtim Jesús jam mejy'am wya'kaxi'jky, ja pyabɔjkpitɔjk ka'ap ja twinmaydi jɔts ku ja yja'aji.

⁵ Jɔts ja ñimaajyidɔɔ:

—Mixy, ɔtɔ dɔ'ɔn ja ajkx iiy xmatsti uk tyimgya'anim?

Jɔts ja yide'en t'adsodɔɔ:

—Ni tu'uk.

⁶ Xjats ja nwindson'ajtim Jesús ja ojts ñii'mxyidi:

—Niwɔjpatti yɔ mda'ajkxmajk ixa barki puki'jy aga'ñ'ampy, jɔts ja ajkx inet jap xpaattit.

Jɔts ja ojts jade'en ttundi, jaanims idɔ'ɔn ja tiy ka'ap ja tya'ajkxmajk y'ukmaa'yniyidi jɔts ja jap nɔɔjɔtpy tjuuttit, ja'agɔjxp ku ja ajkx jap janch'ujs'abɔki.

⁷ Winets ɔts midiyɔ ja nwindson'ajtim Jesús yjanchminamaajyip tñimaay ja Pedro:

—ja nwindson'ajtimts yɔ'!

Ja'ayi ja Simón Pedro ja jade'en tñimadɔɔy jɔts ku ja yja'aji ja nwindson'ajtim, winets ja ñikijxyit njan ja ttatɔkii'ñ (pɔ tɔxi ja wyinaty tjeñ) jɔts ja ñidɔjkii'ñ.

⁸ Jɔts ɔɔts jam mejy'am ja barki nyikja'jty, jɔts ja nda'ajkxmajk ja nbajidity janch ujs'abɔki ja ajkx, pɔ jadukmagɔ'pxy xajkxi dɔ'ɔn ja jam wyinaty yjaaka'ity jɔts ɔɔts nbaatnit ja naajx.

⁹ Xjats ku ɔɔts jam nwinajky, jɔts ɔɔts nbaajty ja jɔndsabajk yikxon tɔ kya'kxy, jɔts ja ajkx tu'uk tɔ yikjingtoni, jɔts tsapkaaky abiky.

¹⁰ Winets ɔɔts xnimaay ja nwindson'ajtim Jesús:

—Yikmendi tu'uk majtsk ajkx midiyɔ ixjanim tɔ xjuutti.

¹¹ Jɔts ja Simón Pedro pyejty jam barkijotp jɔts ja tjidɔjtpidsimy ja ta'ajkxmajk, janch ujs'abɔki tum ja mɔjaty ajkx, tukmagɔ'pxy ja wixijkmyaktigɔɔk; jɔts nika'ap ja xuuny yjapɔɔty oy idɔ'ɔn ja tyimyjadine'eni.

¹² Jɔts ja nwindson'ajtim Jesús wyaañ:

—Men m'ajop'atti.

Jøts ja pabøjkpitøjk ni tu'ugin ja sa kyawa'andi pøni pøn idø'on ja', pø tøxi ja wyinaty tnijawidi jøts ku ja yja'aji ja nwindson'ajtim.

¹³ Winets ja nwindson'ajtim Jesús ja wingon ñimejnidøø, jøts ja tniyajiyi'ñ ja tsapkaaky, jøts ja ojts myø'øyidi møøt ja ajkk.

¹⁴ Ya'at idø'on møøt myidigøøk ojk jyaty ku ja nwindson'ajtim Jesús ñanky'ijxyi ma ja pyabøjkpitøjk jam, ku ja wyinaty tø yujukpyiky jadigojk.

Ku Jesús møøt ñagyajpxyi ja Simón Pedro

¹⁵ Xjats ku ja y'ajop'ajt'abajtidøø, winets ja nwindson'ajtim Jesús tniimaay ja Simón Pedro midi ja Jonás myajnkjip:

—Simón, ¿xtsojpk øts jawaani sam øts ya'at xtsoktin?

Jøts ja Pedro ja t'adsøøy:

—Ndsøjkpy me nwindson'ajtim, wa'ats mets ja xnijawi jøts ku me ndsøky.

Winets ja nwindson'ajtim Jesús ja ñimaajyøø:

—Winets ø xnøø'møøjyit xuu'møøjyit ja nbabøjkpitøjk.

¹⁶ Jøts ja mimajtsk ojk kujk yiktiibyiky ja Jonás myajnk, yide'en ja yikniimaay:

—Simón, ¿xtsojpk øts?

Jøts ja Pedro ja t'adsøøy:

—Ndsøjkpy nwindson'ajtim, wa'ats mets ja xnijawi.

Jøts ja ojts ñi'mxyi ja nwindson'ajtim Jesús:

—Winets ø xnøø'møøjyit xuu'møøjyit ja nja'.

¹⁷ Jøts ja midigøøk ojk yikniimaay ja Jonás myajnk:

—Simón, ¿xtsojpk øts?

Winetnimts ja Pedro yjotmay'oo'kpijky, ku ja midigøøk ojk yide'en yiktøøji ja nwindson'ajtim pøni chøjkpy ja', jøts ja tniimaay:

—Windsøn'ajtim, mets tuki'iyi mnija'wip. Mnija'wipxi wa'ats jøts ku ndsøky.

Jøts ja nwindson'ajtim Jesús wyaañ, jøts ja ñimaajyøø:

—Mets ndanipijky amuum, jøts xnøø'møøjyit xuu'møøjyit ja nbabøjkpitøjk.

¹⁸ Janch idø'on nnøjmi, jøts ku y'ijty mjaak'una'jk'atynim, yikxon y'ijty mjaaknaxyøxyi jøts mniikxy pøni ma kə'øom xtsøky; kuts ja mōjaa'y'ajtin xpatnit, jøts mxajtøønit, wyenkpiš mets ja nwet mmo'ojyiyip jøts ja myiknøjkxkit ma me ka'ap mjanøjkxwa'añ.

¹⁹ Ku ja nwindson'ajtim Jesús jade'en wyaañ, ja' idø'on ja yjatijpy sa ja Pedro ja o'jkin tpaatt ku yikøyakt, jøts ja Dios jade'en yikmøjawit yikunuu'kxyjyawit. Jøts ja ojts ñi'mxyi:

—iPaduujnik øts yø nja', kidi øts xmajtstu'uty!

Ja Jesús pyabøjkpi midi janchminamyaajyip

²⁰ Xjats ku ja Pedro y'ejxjimbijty, jøts ja ojts t'ixy jøts ku øts nbamiñ midi ja nwindson'ajtim Jesús janchminamyaajyip. Øts ja nwindson'ajtim Jesús jam wyinaty nbutsinaapy ku øøts wyinaty xøjøjty n'a'ux'aty, jøts øts wyinaty nwindson'ajtim n'amidøøy: “Windsøn'ajtim, ¿pøn idø'on mga'ødyunwajniš?”

²¹ Jøts ku dø'on ja Pedro ja ojts y'ijxyi, winets ja Pedro tniimaay ja nwindson'ajtim Jesús:

—Windsøn'ajtim, jøts yø', ¿sats yø yjatt?

²² Jøts ja nwindson'ajtim Jesús ja ojts yide'en y'adsøyi:

—¿Ti mets yø xunk'aty, njadyimyjayikjuky'aty øts yø' nay jaa ku ø nme'ent jadigojk? Tujnik øts yø nja' tu'ugyi.

²³ Xjats ja ayuujk yø'øgyøjy, jøts ja jade'en tniamadow'atti pøn jaty ja nwindson'ajtim Jesús yja' pabøjkjip, jøts ku ja'abi pabøjkpi ka' y'ookt. Kajade'enipšts ja nwindson'ajtim Jesús wyinaty tø tñøjmi ja Pedro jøts ku ja'abi pabøjkpi ka' y'ookt, pø yide'enxi ja wyaañ jøts ku ka' ttunk'attit pøni sa ja yjatt.

²⁴ Øts idø'on Juan, midi'tits idø'on ya'at ayuujk njaadyampy, pø tiy janchxi dø'on yø'. N'ejx mnija'wiyi'ñ øøts ku jade'en yjajty.

²⁵ Jaanim yø may ti jaty ja nwindson'ajtim Jesús tyuun, ku ja jeexyip jade'en tø ty-imykja'ay piy kəñ, mayts nøky jeexyip chøkyi jøts yikjaagyøxt sam yjajty kyubejty. Jade'en idø'on ja yjajty.

SA CHINAADYI JA JESÚS KYUDANAABYI

Ku ja Dios Teety ttamíwandaagi ja naxwii'ñit jaa'y ja Espíritu Santo

¹ Migu'uk Teófilo, ja noky midí øts ojts nja'ay mijawyeen, ja' øts jap nguja'ayigyøjx ti jaty Jesús tyuun ku ja tpadøjkijyi'ñ ja tyunk, sa jaty ja tyik'ixpijky

² kunim ja chajpajtni. Ku ja wyinaty ka'aním ñijky jap tsajpjøtpy, winets ja jawyeen twiwejtskijxy twigongijxy ja jaa'y pøn idø'on ja wyinaty nadyagugaxwajniyip, ojts ja tkajpxwijy sa jaty idø'on ja y'adø'øtstit ku ja tyu'undit, Espíritu Santo ja ja'gyujkin ja møøjyidi.

³ Xjats ku ja Jesús wyinaty tø yja'oo'kni, ojts ja tpaaty ja kyudanaabyi jadigojk jade'eñim sayim idø'on ja yjaa'y'atyin, wixijkxyøøw ja jam ñanky'ejxiyøø, jøts ja jade'en wa'ats ttuk'ixy ja ty'ajtin ja kyudanaabyi ku ja ejtp yjujky'aty; jade'en idø'on ja jam ttukmadoogijxy ja kyudanaabyi sa jaty ja y'ejxi tyiyi, ja Dios kyutujk midí ja tyanitanaapy ja yjaa'y.

⁴ Ku dø'on ja jade'en tjaakmøøtsinaay ja kyudanaabyi jøts ja t'ane'jmy jøts ja ka'ap ñjøkxtit ma ja kajp txøøwi Jerusalén. Yide'en ja tñimaay:

—M'awejxtip idø'on ja' midí øts nDeety tø mdamíwanda'agyidi, midí kawinaak ojk meets tø ndamimadya'aky.

⁵ Janch idø'on ja' ku ja Juan ttuktanøbejty ja nøø, jøts tsojk meets nøjcx nduktatøkidi ja Espíritu Santo.

Ku ja Jesús chajpejty

⁶ Xjats ku ja pyabøjkpitøjk jam wyinaty tø tminabyaadyidi ja wyindsøn, winets ja tyik-tøødøø jøts ja tñimaadyøø:

—Windsøn, Łyamním inet ja Israelit kajp xmo'ot jøts ja kø'øm jadigojk ñay'ana'amíyidit, jøts ja kø'øm ñankyutujkxyidit pøni ti ja kø'øm tyunwändip?

⁷ Xjats ja Jesús y'adsøø jøts ja wyaañ:

—Ka' meets ja mbaat'aty jøts meets ja xnijawit pøni juuni ja Dios Teety jade'en y'adø'øtst, pøni ti xøøw pøni ti po' ja jade'en ttunwa'ant. Ja' ja tu'ugyi tñija'wip, jøts ja' tu'ugyi tmøø'tajtp ja møk'ajtin jøts ja jade'en ttu'unt.

⁸ Ku meets ja Espíritu Santo wyinaty tø mnimiñi, winets meets ja nøjcx jatyí mmø'øyi ja møk'ajtin jøts øts xniga'ama'adyit jawyeen jam Jerusalén, nayide'enmi tuki'iyi wine'enin jam chøønidi Judeit etjotp, sam nayide'en jam Samariit etjotp, winetnims øts xniga'ama'adyit ømyadsowi mabaat naxwii'ñit y'øjx y'oojck.

⁹ Tø ja Jesús wyinaty jade'en wya'añ, wa'ats idø'on ja pyabøjkpitøjk ja wyinaty ixjam y'ijxyi ku ja chajpejty; jøts ja jadi'ñi yoots yik'adigø'øñiyøø, jøts ja pyabøjkpitøjk ja jade'en nima kya'uk'ejxpajtniyøø.

¹⁰ Ixjam idø'on ja wyinaty øy pyat'ejxti ku ja Jesús jade'en chajpejty, winets yaa'dyøjk namajtsk adsu'jky kyaxø'ktøø ma ja jam wyinatyí, ankilís ja'adi, jøts tumboop wet ja wyet'ajttip,

¹¹ xjats ja yide'en ñimaajyidøø:

—Meets Galile'it jaa'dyi, Łtiku yø tsajp jade'en xpat'ejxti? Tøxi x'ejxti ku ja Jesús tø pyatøki jap tsajpjøtpy, Łkidi? Nayide'en ja nøjcx jadigojk myiñ sa ja tø pyatøki tsajpjøtpy.

Ku ja Matías yikpiktajjky jøts ja tkudanit ja Judas oo'kpi

¹² Xjats ja jam kojpkøjxp choo'ndøø midí txøøw'ajtp Olivos, jøts ja ojts ñjøkxti Jerusalén, jade'enin ja ojts tñiyø'øyidi waani sa ja yø'ødyi ku ja poo'lxkin xøøw tpaaty.

¹³ Xjats ku dø'on ja jam yja'ttøø kajpjotp, winets ja kyøxpajttøø jap nipatøkijxy ma ja Pedro jam wyinaty tø yja'ta'akti møøt ja Jacobo, møøt ja Juan, møøt ja Andrés, møøt ja Felipe, møøt ja Tomás, møøt ja Bartolomé, møøt ja Mateo, jøts møøt ja yjadu'ukpi Jacobo pøn ja Alfeo y'u'nk'ajtpy, jøts møøt ja Simón zelote, jøts nayide'en møøt ja Jacobo y'uch Judas.

¹⁴ Niduki'iyi dø'on ja jam jade'en xyiminamyukyidi jøts ja Dios'ajot'ajtmukti jøts ja wyinmaa'ñ ja tu'ugyi tyik'etti møøt ja Jesús myigu'ukti, møøt ja María midí ja tyaak'ajtpy, jøts møøt nayide'en winaagin ja tø'øxyøjkti, jade'en idø'on ja jam wyinaty xyimidios'ajot'ajtmukti.

¹⁵ Xjats idø'on ja Pedro winet'et tyanaagyukyiyi'ñ jam jaa'y aguikp pøn tjanchja'widip ja Jesús, jam idø'on ja jaa'y wyinatyí nimagø'pxy ja ee'pxindi, jøts ja Pedro jade'en kyajpxwa'kxy:

¹⁶ —Meets migu'uktøjkti, tø dø'on ja jade'en yjanchjaty sa ja Dios kyajpxy wya'añ, ku ja Espíritu Santo jap jade'en kø'øm wyaañ, midí ja David kyajpxnajx ku ja ojts tñimadya'aky ja Judas, ja' pøn tuu'waa'w ja jaa'y jøts yikmatst ja Jesús.

¹⁷ Øøts idø'øn nmigu'uk ja' ja Judas pøn idø'øn jade'en adøøjts, nayi ya'atpi tunk ja y'ijty tyumpy midi øø ndumpy.

¹⁸ Xjats ja ñøjknæa jøts ja ojts tjuy naajx, ja meeñ ja tyagujuuy midi ja ojts yiktamijuy ku ja Jesús ja jade'en tkøyajky; jøts ja nay jam kyidaay, winets ja kø'øm ñañajtskuwojpiyøø, jøts yjoort ja kyi'jch jøts ja tyinch pyidsømgijxy.

¹⁹ Xjats ja jaa'y ja jade'en tñija'widøø pøn jam wyinaty tsinaadyip Jerusalén, winets ja tyixkøbjattøø ja naajx Acéldama, midi tyijpy Ni'jpkjam, jade'en ja ttejtti ku kyø'øm ayuujk ja tkajpxti.

²⁰ Jøts ja David yide'en jap ja nøky tyikwa'añ ma ja Salmos jap yikuja'ayi:

Wan ja tyøjk abak ttañ,

wan jap pøn tkidyimchøøni.

Wan tmajtstu'uty tyunk jøts jadu'uk ja jaa'y tyøkit tumbi.

²¹ 'Paty øøts ya'at jaa'y nidu'ugin nyiktunwa'añ pøn øøts jeky tø xpawidity, wine'en øøts ja nwindson'ajtim ya tø x'atmsøøtsøøni,

²² jaayip øøts yø jade'en xmøøtjidity ku nwindson'ajtim ja Juan ojts yiknøbetyi, kunim ja tø pyatøki jap tsajpjøtpy. Paty øøts ya'at jaa'y nidu'ugin ndsøky, jøts øøts yø møøt ngajpwa'kxt ku ja nwindson'ajtim tø pyidsimy jadigojk jap oo'kpi jutjøtpy.

²³ Ku ja Pedro jade'en wyaañ, xjats ja twi'ejxtøø namajtsk ja jaa'y pøn ja nidu'ugin pyikta'akwandip: ja José ojts yikwiwich pøn tigøøk ja xyøøw, Barsabás ja yiktijy jøts nayi yiktejp Justo, ja Matías ja ojts møøt yikwiwich.

²⁴ Xjats ja jaa'y yide'en t'ajot'attøø ja Dios U'nk:

—Nwindson'ajtim Jesucristo, mets mnija'wip sa jaty pøn jadu'uk jadu'uk wyinmay, yø jaa'y ixa øøts tø nwiwich namajtsk, tuknija'wik øøts pøni pøn me mdsøjkpy,

²⁵ wan ja tunk ttuñ midi ja Judas tø tmajtstu'uty, ja'agøjxp ku tø pyøkyuñ jøts ja tø ñijxy jap ma ja pyaat'aty.

²⁶ Winets ojts nidu'uk yikpikta'aky ja ñamajtskpi jaa'y, ja Matías ojts tyaja'adyiyi ja tunk, winets ja ojts yiktabuwetsi ja ñimaktu'ukpi jaa'dyi pøn ja nwindson'ajtim Jesucristo tkudanaadyip.

2

Ku ja Espiritu Santo myiñ

¹ Ku ja Pentecostés xøøw tpaajty, tyimwyinet'et idø'øn ja Jesús kyudanaabyi wyinaty niduki'iyi tø ñamyukyidi jap tøjkjøtpy

² ku adsu'jky tmadoodøø jøts ku y'amuy jade'en sam ku møk pyøjyin, japts tsajpjøtpy chøøñ, jøts ja tøjkm amuum ñojktaajky ma ja jam wyinaty tø ñamyukyidi.

³ Winets ja jade'en t'ejxpatti ejxim ja jøøn yowin, tu'uk tu'uk idø'øn ja jade'en tmøøt'atti kyubajkj. Ja tu'ukpi jøøn idø'øn wyinaty tø ñawya'kxyi.

⁴ Xjats ja niduki'iyi tyatøkiyidøø ja Espiritu Santo, jøts wenk ayuujk ja jaty tkajpxtøø sa jaty ja pøngapøn yik'awijyi ja Espiritu Santo.

⁵ Jamts idø'øn wyinet'et ja jaa'y wyinatyøø jam Jerusalén pøn nayi israelit jaa'dyi, ja ku abikyajp chinaañidi, ka'ap ja jam wyinaty y'ukugajp'ajtnidi.

⁶ Ku ja jade'en tmadoodøø y'amuy kyida'aky, winets ja t'anøjkxidøø ma ja tmadoodøø y'amuy, kuts jam yja'ttøø, ka'ap ja jam y'ukwinmaa'nbyatnidi, ja'agøjxp ku ja tmadoodøø ja y'ayuujk yikajpxti, pøni sa jaty ja nidu'uk nidu'uk t'ayuujk'atti. (Jade'en ja kyajpxwa'kxtøø ja jaa'y pøn tjanchja'widip ja nwindson'ajtim Jesucristo.)

⁷ Xjats ja jadi'iñi myondi y'oockti, jøts ja xem yam nawyajnidøø:

—¿Ti kidi ja Galile'itjaa'yip ya'atti ixa jade'en kyajpxti?

⁸ ¿Sudso yø jade'en tkajpxti yø ayuujk midi adøm nidu'uk jaty ngajpxyindip, sa jaty pøngapøn ja y'ayuujk tø t'aniweji?

⁹ Ixa ja jaa'y icyamdi pøn kugajp'ajttip jam Partia, jam Media, jam Elam, ma Mesopotamia, jam Judea, jam Capadocia, jam Ponto, jam Asia,

¹⁰ jam Frigia, jam Panfilia, jam Egipto, ma jaty kajp jam Africa, jambaat yø kyugajpidi jam Cirenit kajp ixkø'øm. Nay jats ja romanosti pøn ya tø kya'axti, pønts ya tø yjagaka'axti tø ja israelit jaa'y ja chinaa'yin tpadøjkiñidi.

¹¹ Nay jaa ja jaa'y ya tø yja'atti midi tsoo'ndip jam Creta, jam Arabia; niduki'iyi yø jade'en tø nmadøø'yindi sa yø tñigajpxti tñimadya'akti ja Dios myø'ajtin, jøts jade'en xmigajpxyindi sa adøm n'ayuujk nidu'uk nidu'uk.

¹² Jade'en ja nawyajnidøø, nigyumaap idø'øn tyimya'widøø, jadi'iñi ja kya'ukwinmaa'nbyatnidi xjats ja xem yam ñañimaa'yidøø ti dø'øn tuujnip.

¹³ Jamts ja jaa'y jadu'ukti pøn ttaxektip, yide'en ja ñawyaa'miyidi:

—Mujkidip yø jaa'y, paty yø jade'en y'amuygyikajpxti.

Ku ja Pedro ojts kyajpxy jam mayjaa'y agujkp

¹⁴ Ku dō'ōn ja jaa'y jade'en űawyajnidōō, winets ja Pedro wya'kukidōō mōōt ja űimaktu'ukpi myigu'uk, jōts mōk'ampy tñigajpxy ja mayjaa'y, jōts tñōjmi:

—Meets Judeit jaa'dyi, jōts nayide'en niduki'iyi pōn jaty yā tsinaadyip Jerusaleń, ukja'gyukidi yikxon midī ōts ixyam nñigajpxwampy.

¹⁵ Ka'ap ōōts nmu'ugyi sā meets nugo mjawinmay, nipōn jōpyi kyamu'ugyi, apeni xōōw ixa pyetynim.

¹⁶ Jajtp idō'ōn ixyam jade'en sām ja Dios Teety tñimaay ja kyugajpxy, pōn txōōw'ajt Joel, ku ja jade'en wyaāñ:

¹⁷ Ku wyinaty ja naẁwii'ñit tyigatswani,

winets ōts ja'abi xōōw mōk'ampy ja naẁwii'ñit jaa'y ndukatōkit ja n'Espiritu Santo ōmyagajpi;

nyikugajpxy'atp ōts ja mutskuna'jktōjkti,

jōts ndukwinguma'ap ōts ja wajtyōjkti kiixyi'idi sā wyinaty yjatwa'añ yā naẁwiiñ,

jōts nayi xwinguma'adip ōts ja mōjaa'dyōjkti.

¹⁸ Xjats ōts nay ja'abi xōōw mōk'ampy nōjx ndukatōkidi ja n'Espiritu Santo ja'abi dō'ōndi, pōn ōts nja' wyinaty amumjoojt xpādunwajniyidip,

ja'ats ōts n'ayuujk nōjx mōk'ampy xkajpxwa'kxiyidip, ōy ja yjaya'a'dyōjki ōy ja yjatō'oxyōjki.

¹⁹ Nanky'ejxip ōts jam tsajpwemp ja nmlagri'ajtin,

jōts nayide'en yā naẁwiiñ nñanky'ejxit ku ja ni'jpy yō'ōty, jōts ja jōōn mye'ent, winets yjōjka'tatst.

²⁰ Jōts ja xōōw y'ookt, jōts ja po' ni'jpyin kyaxō'ōkt,

ku dō'ōn jade'en yjatt winets ō nme'ent, pō ōtsxi mee xwindōn'ajtp,

jōts nyikjatt ja xōōw sām nijuuni xka'ejxtinim.

²¹ Jōts niduki'iyi pōni pōn jaty ō xminuu'kxakp, ja'ats ō nyiknitso'ok'attip.

Jade'en ja Joel ja Dios kyajpxy y'ayuujk tyiknaxjōō.

Xjats ja Pedro yide'en tjaaknimaay ja myigu'uk:

²² —Jaa'ukmadowdi meets Israelit jaa'y midī ōts njaaknigajpxwampy: Ja Jesús Nazaretit jaa'y, tō ja Dios Teety ja myōk'ajtin myō'ōyi, jōts janch tsuj janch mōj ja mlagri'ttuñ, jōts may ja eja'añ jade'en mmō'ōyidi Dios Teety myōk'ajtingōjxp, paty xnijawidit ku ja Dios Teety mōōt y'ity.

²³ Xjats ku meets ojts myikōmō'oy, ti nduu'nimp, tō jyaty kyubety tuki'iyi pōni sā ja Dios Teety kō'ōm tpiktaajky jekyip, jōts nay ja' meets ojts xmach jōts xtsumdōō xiidyōō, jōts ja ka'ōybi jaa'y xukyik'ookti jam kruskōjxp.

²⁴ Xjats ja Dios Teety ojts jadigōjk tyikjujkyi, jōts tyik'awa'atpidsiimy jap ōo'kpi jutjōtpy: ja'agōjxp ku ka' pyaāt'atyi jōts ja o'jkin xemikōjxp tkupōkt.

²⁵ Yide'en ja rey David ojts ja Dios Teety yikugajpxy'atyi sā ja Jesús kyajpxy y'ayuujk:

Mets Teety, ejtp me mōōt njujuky'aty m'aga'ngyō'ampy;

jōts ka'ap ōts pōn x'adsō'ōgit.

²⁶ Paty ōts n'anmija'win janch jotkujk nñayjāwiyi, jōts ōts ja nxondaajkin jade'en nñigajpxy. ōy n'ookt, ka' ti jotmay njagyapt;

²⁷ Ja'agōjxp ku mets ka'ap ja n'anmija'win xyikta'ant mā ōo'kpi yja' tyandi,

jōts nika'ap ōts nñine'kx xyikwindigōjyiyit, pō ōtsxi me xtsōky'ajtp.

²⁸ Tō ōts xuknijawi ku njujukpōkt jadigōjk ku wyinaty tō n'ōōky,

jōts nayide'en xyikxonjatt ku mets xemikōjxp nmōōt'ett.

Jade'en ja David tyiknaajx ja Jesús kyajpxy.

Xjats ja Pedro tjaaknimaay yide'en ja myigu'uk:

²⁹ —Migu'uktōjkti, wa'ats yiknijawi ku adōm n'apteety'amōj David ojts y'ōōky jōts űaxōkiy'ññ, nay ja n'ijxyindi mā ja yjut mā ojts űaxōki.

³⁰ Ja David, ja' Dios kugajpxy'ajtiyōō jōts űija'wip sā wyinaty ja Dios mōk wyanda'aky, ku wyinaty tu'uk y'ap yikpikta'aky yiknitsokpi yā naẁwiiñ, jōts nayide'en yikutukt sāmī David kyutujkin.

³¹ Jade'en idō'ōn ja David jekyip tñijawi, jōts jade'en tñigajpxy ku ja Cristo yjukpyōkōjmit jōts ni ja űine'kx kyawindigō'ōty.

³² Pōn ja David űigajpx űimadyaajk, ja Jesús idō'ōn ja', ja' idō'ōn ja Dios Teety tō yikjujkyi, pō tōxi ōōts ja wa'ats n'ixy, pō tōxi ōōts ja wa'ats nñijawi.

³³ Jōts ja Dios Teety ja nayide'en yiktsajpajtōō jōts pyiktaajkōō y'aga'ngyō'ampy, jōts jade'en ja mōj kutujk myō'ōyiyi; jōts ja' tkajxp ja Espiritu Santo yā naẁwiiñ midī ja Dios Teety wyinaty kō'ōm tō twanda'aky, jōts ja' idō'ōn ja myōk'ajtin yō' midī ixa m'ejxtip mmadoodip.

³⁴ Pō kidi ja Davidixi kō'ōm tsajpajt, ja'ayi ku David ojts yide'en wya'añ ku ja nwindōn'ajtim Jesús ja Dios Teety yide'en űimaajiyi:

“Ixa'ak, jōts ō xputsōōnit n'aga'ñ'ampy,

³⁵ jøts øts yø nmidsep nmimajadaḱøxt."

³⁶ Meets Israelit jaa'y kuwani niduki'iyi ka'pxy xnijawidit, jøts ku ja Jesús pøn meets kø'øm mdukyikruspajt ja abiky jaa'y, ja' yø' pøn ja Dios icyam tø kø'øm tpikta'aky møj windsøn jøts yikniitsokpi.

³⁷ Ku dø'on jade'en tmadowdi ja Pedro kyajpxy, winets ja jotmay tyatøjkiyidøø, xjats ja Pedro yiknimaay møøt ja ñimaktu'ukpi myigu'uk:

—Migu'uktøjkti, ¿suso'ampy øø ndu'unt?

³⁸ Xjats ja Pedro t'adsojimbijty jøts tnimaay:

—Yø mbøkyu'unin mmajtstu'uttip, jøts mnøbattit nidu'uk jaty Jesús xyøøgøjxp, jøts jade'en myikpojkpimaa'kxtit; jøts nayide'en ja Dios Teety mduktatøkiyidit ja y'Espiritu Santo.

³⁹ Meets m'øy'ajtin yø', møøt m'u'nk møøt m'unaj'kti, jøts nayide'en pøn jaty jagam tsinaadyip; uk niduki'iyits ja'adi pøni pøn jaty ja Dios Teety kø'øm wyiwetswampy.

⁴⁰ Yide'en idø'on ja Pedro ojts tkajpxwijy ja jaa'y, jøts tnimaay:

—Majststu'utti yø'øbi jaa'y pøn ja nwindson'ajtim Dios yja' tkajanchja'widip.

⁴¹ Xjats ku ja Pedro jade'en tnimaay, winets ja jaa'y ñøjktøø nøbajtpi pøn jaty tmibøjktøø ja Pedro y'ayuujk; ja'abi xøøwts ja Jesús yja' ojts ñamayi nidigøøk mil.

⁴² Niduknaḱ idø'on ja t'ixpøkti sa ja Jesús kyudanaabyi y'awa'andi, jotkujk idø'on ja jam tu'ugyi chøønidi, jøts ku ñamyukyidi dios'ajot'ajtpi, jøts ja tsapkaaky tkaydi Jesús y'oo'kingøjxp.

Sa chinaadyi ja myijawyembi ja Jesús janchja'wibidi

⁴³ Xjats ja jaa'y ñigyumaap idø'on ja tja'widøø ku ja Jesús kyudanaabyi ja mamylagri tnanky'ijxyidi.

⁴⁴ Tu'ugyi ja wyinmaa'ñ ja tyik'etti pøn jaty ja Jesús yja' t'apbøjkiyip jøts ñadyagumayidi ja pyikta'aky;

⁴⁵ jøts ttookti pøni ti jaty pøn myøøt'ajtpy, xjats jade'en ja nimeen tyikwa'kxidøø pøni sa jadu'uk jadu'uk yja' kya'ity.

⁴⁶ Jabom jabom idø'on ja jap ñamyukyidi møj tsaptøjkjotp, jøts nayide'en awingujk tøjkjøtpy, jøts ja chapkaaky jap tyikwa'kxti, jøts jade'en ejtni xoni kyaydi, jøts jade'en nipøn kyanamyøjpikta'agyiyi.

⁴⁷ Jøts ja Dios Teety jade'en tjanchkajxa'akti jøts ja kajp jaa'y jade'en yjanchøkyidi; jabom jabom idø'on ja nwindson'ajtim Jesús tyikmayi ja yja' pøn jaty yikpojkpimaa'kxtip.

3

Ku ja pakma'at jaa'y choknaq

¹ Tuk'ojk idø'on ja Pedro ojts tmøøtnijky ja Juan jam tsaptøjkjotp, wyinaky xøøw ja ñøjktøø wine'enin ja jaa'y jam wyinaty xuyimamyukyidøø dios'ajot'ajtpi.

² Jamts idø'on wyinaty tu'uk ja jaa'y pøn ja tyeky ma'at. Ejtp idø'on ja jam xuyimiyikwaanijky jam tsaptøjk agø'øm ma ja tsaptøjk'aaw jam miditxøøw'ajtp Hermosa. Jamts ja myigu'uk yiktaajniyi, jøts ja jam yiklimunsimuky ku jam pøn tyøki tsaptøjkjotp.

³ Xjats ku ja pakma'at jaa'y ojts t'ejxpaaty ja Pedro møøt ja Juan, ku ja jam wyinaty tyøkiwya'andi tsaptøjkjotp, winets ja t'amidøøy ja limunsi.

⁴ Xjats ja Pedro møøt ja Juan twin'ejxjø'øktøø ja pakma'at jaa'y, jøts ja Pedro wyaañ:

—Win'ejxk øøts.

⁵ Xjats ja jaa'y yjanch'ejxji'jky, yide'en ja wyinmaay, yikmo'op idø'on ja tijy øy ti yiin waan.

⁶ Winets Pedro ja ñimaajyøø:

—Kidi meeñip øø nmiwidijtpy, ja'abi øø ndumpy midit øø xukmi'widejtp ja nwindson'ajtim Jesús pøn ojts chøøni jam Nazaret, pidø'kni jøts myø'øñit.

⁷ Xjats ja Pedro ja jaa'y t'majch y'aga'ngyø'køjxp jøts ja twejtsji'jky, ja'ayi ja jade'en ttuun winets ja tyeky ja jaty wya'kmøkiyi'ñ, jaty tyekyo'kt ja myøkpjiky.

⁸ Xjats ja pakma'at jaa'y jade'en kanimøjaaw yjanchwo'onji'jky, jøts ja tyanaagyukyiyi'ñ, jaty ja ojts yø'øyi'iky. Xjats ja tmøøtøjkiidøø jap tsaptøjkjotpy, ñiyukwo'oni ñichajpwo'oni ja jap t'ajot'aty ja Dios.

⁹ Niduki'iyi jaa'y ja ojts t'ejxti ku ja pakma'at jaa'y jade'en yø'øy, jøts ku ja jade'en tjanchtukmøjawi tjanchtukunuu'kxyjawi ja Dios.

¹⁰ Xjats ja ñigyumaap tyimya'widøø pø ma ja tyimñayja'widøø ku dø'on jade'en wyinaty tøjyaty. Ja'widip tsø'jkidip idø'on ja jamdi, kumi ñija'widip ja wyinaty ku ja yja'aji pøn jam wyinaty xumiyikmujkp jam tsaptøjk agø'øm, ma ja tsaptøjk'aaw jam miditxøøw'ajtp Hermosa.

Ku ja Pedro kyajpxwa'kxy jam møj tsaptøjk agø'øm midit yikejtp Salomón Tyøjkweenk

11 Ja pakma'at jaa'y pøn idø'øn wyinaty tø myøpkiky, ka'ap ja t'ukmajstutni ja Pedro jøts ja Juan, winets ja jaa'y pyujtmendøø ma dø'øn ja jam wyinaty, jadi'iñi ja myondi tyukti paty ja jam myendi tsaptøjk agø'øm midì txøøw'ajtp Salomón Tyøjkweenk.

12 Xjats ku ja Pedro jade'en ojts t'ixy ja jaa'y, winets ja tnimaay:

—Israelit jaa'dyi, ¿tiku ñigyumaap xjawidi? ¿Tiku øø xwin'ixy, yide'en meets idø'øn yjawi mwani, øøts idø'øn yø xijy kø'øm møk'ajtin tø nduktatsø'øky yø jaa'y ku yø tø yø'øbyiky, uk ja' øøts idø'øn yø xijy tø nduktatsø'øky ku øøts ja Dios janchtsuj n'ajot'aty?

13 Ka'ap yjade'eni, ja Dios Teety jade'en tø tmø'øy møk'ajtin ja y'U'nk Jesús, ja Dios Teety pøn adøm n'apteety'amøj Abraham Dios'ajttip, møøt n'apteety'amøj Isaac, jøts nayide'en møøt ja Jacobo. Ja' y'U'nk ja myøk'ajtin jade'en tmøøt'ajtp, ja Jesús pøn ja Dios Teety y'U'nk'ajtpy, ja' pøn meets mgøyajk jam yikutujkpi wyindum. Jøts ku ja Pilato ja wyinaty tjamajstutu'utwa'añ, ka'ats meets ja xnankykpidsøjmi.

14 Ja' mee ne'egi myik'awa'atspidsøøm pøn wyinaty tø tyundigøy, jøts meets ja ka'ap xnankmyajstuujtøø pøn wa'ats, pøn katundigøøpy niwine'enin.

15 Jade'ents meets ja xyik'ø'jky ja yikjujky'ajtpi. Jøts tø Dios ja jadigojk yikpidi'igyì jap oo'kpi jutjøtpy, tø øøts idø'øn ja jade'en ndyimybyaaty ndyimy'ixy, øøts idø'øn ñamyayi nøjxpx testigi.

16 Ja' idø'øn yø jaa'y jade'en tø yikmøpkiky ku yø tø t'ajot'aty, ku yø tø tmøjpikta'aky ja Jesús. M'ijxy'ajttip mnija'widip yø pakma'at jaa'y jøts ku tø yikmøpkiky, jøts ixa dø'øn jade'en x'ejxti møk møjaaw.

17 Migu'uktøjkti, wa'ats øts ja nnijawi ku meets ja mwindsøn møøt mnabyudøjkiyidøø, jøts meets ja Jesús xyik'oo'ltkøø, nugo ja jade'en xundøø, ni xkanijawi meets ja' pø tigøjpx jade'en m'adøstøø. Ka'ap meets ja xyik'ø'jky tø tidam meets idø'øn mjatumpy.

18 Xjats ja Dios tø tjanchyik'aduky ja wyanda'aky ku myagyajpxnaxpi ja tyikwaañ: jøts ku ja yiknitsokpi wyinaty jade'en y'ayo'ombaatwa'añ.

19 Paty mbøkyu'unin xmajstuttit xyiktigatstìt ja mdsinaa'yin, ja'myatsti ja Dios Teety jøts ja tyakt ja øxyøøw ja øyjumøjt,

20 jøts ja tkaxt ja Jesús pøn ja wyinaty jekyip tø ttanibiktaagi jøts adøm ja xyiknitso'ok'ajttindit.

21 Øy idø'øn ja Jesús ixyam ndejint tø yjatañ jap tsajjøtpy, jaanim ku ja Dios Teety ja kø'øm tyik'øyigyøxt pøni ti dø'øn ja tyunwampy, jade'en sa ja myagyugajpxy ja kø'øm t'agajpxiyi'ñ ku ja jade'en wyandøø pøn jaty tsinaadyøø jekyip.

22 Jade'en adøm n'apteety'amøj ojts yiknimaay'indi ku Moisés ja ojts ñii'mxyidi: "Mdanigaxidip ja Dios Teety tu'uk ja kugajpxy, meets mgø'øm migu'uk nøjx kø'øm yikpikta'aky jade'en sa ø kø'øm nyikpiktaajky. Mimado'odip idø'øn ja' pøni sa jaty ja wyinaty mñii'mxyidi,

23 pøni pøn ja wyinaty tkamimadoop, ka'ap ja t'ukmøøtsinaañidit ja myigu'uk, kuwani ja jatyi wyindigø'ødyit."

24 Jade'en idø'øn ja Dios kyugajpxy wyandøø, ja' idø'øn ja ñigajpxtøø sa jaty yjatt kyubatt, ti jaty tunip ya'atpi jumøjt, jaayip ja jade'en wyangaktøø ku ja Samuel jade'en jawyeen wyaañ.

25 Tum meets ja Dios kyugajpxy m'u'nk'ajttip, jøts paty ja Dios ojts tpikta'aky tu'uk ja kutujk midì ja aptøjk ojts yikmo'odi, jøts meets kidi xyikwindigøy ja m'anmija'win jam Dios wyindum, yide'en idø'øn ja Abraham Dios ojts ñii'mxyi: "Tuki'iyi ja teety ja taak, ja u'nk ja una'jk nøjx yikunuu'kxkøxti mets m'ap mets m'una'jkøjpx."

26 Ku ja Dios tyikpidsiimy jadigojk ja y'U'nk Jesús jap oo'kpi jutjøtpy, jawyeen ja ojts mdaniguexyidi jøts ja mgunuu'kkxidit, jøts niduki'iyi xmajstuttit ja mga'ødyu'unindi.

4

Ku ja Pedro møøt ja Juan ojts twingunøjxidi ja kudunktøjkti

1 Nay ixam idø'øn ja Pedro ja jaa'y wyinaty tmigajpxti møøt ja Juan, ku ja teetyøjk jam myendøø møøt ja tsaptøjk ejx'ejtpi windsøn, jøts møøt ja saduceotøjkti.

2 Tø dø'øn ja wyinaty yikxon yjanch'ambøkti, ja'agøjpx ku ja Pedro møøt ja Juan tyik'ixpøkti ja jaa'y, ku ja wya'andi jøts ku oo'kpi pyidsø'ømdit jadigojk jap oo'kpi jutjøtpy, kumi tø ja Jesús wyinaty kø'øm pyidsimy jadigojk jap oo'kpi jutjøtpy.

3 Xjats idø'øn ja ojts yikmajtsnidi jøts ja yiktsumnidøø, kyimjabonmim ja yiktiidyundøø kumi tsuu'nip wyinaty ku ja yiktsumdøø.

4 May jaa'y idø'øn wyinaty tø tjanchjawidi ja øgyajpxy ja ømyadya'aky, pøn jaty ja wyinaty tø tpatmadowdi; jawaani kamagoxk mil ja yikmachoopidsiimy ja yaa'dyi pøn tjanchja'widi ja nwindsøn'ajtim, ku ja wyinaty tø tmadowdi ja øgyajpxy ja ømyadya'aky.

⁵ Xjats ja'abi xøøw winets ja windsøndøjk ñamyujkidøø jam Jerusalén midi t'ana'amdip ja kajp, nay ojts idø'øn ja mayjaa'y jam myendøø, møøt ja kajpxwejpjotjkti midi tundip jam tsaptøjkjotp;

⁶ nay jam idø'øn ja Anás wyinatymi pøn ja teetywindsøn'ajtip møøt ja Caifás, møøt ja Juan, jøts møøt ja Alejandro, niduki'iyi ja jam wyinatyi niwinø'øn ja pyaat'atyidi ja teetywindsøn'ajtk.

⁷ Xjats ja Pedro yiknajtswä'widøø møøt ja Juan, jøts ja ojts yikpikta'akti jam agujk'am, winets ja yiktübyøjktøø, yide'en ja ojts yiknøjmidi:

—¿Pøn yø jade'en tø mdanigutujk'atyidi jøts jade'en m'adø'øtstit, pøn jade'en tø m'ane'emyidi?

⁸ Xjats ja Pedro y'adsøø, kumi tø ja Espíritu Santo ja wyinaty amuum tyatøkiyi, jøts ja tñimaay:

—Meets windsøndøjkti, meets møjaa'dyøjkti pøn jaty tsinaadyip yä Israel:

—ku øøts idø'øn jade'en tø xyiktüy sa tø chø'øky yø pamaa'y, sa yø tø yik'ødyuñ,

¹⁰ n'adsojimbetp øøts ja m'ayujk, nnigajpxp øøts yä mayjaa'y agujky, jøts tñijawidit niduki'iyi pøn jaty tsinaadyip yä Israel, jøts yø jaa'y ixa tyani mee mwinduuy møk møjaa'w. Ja nwindson'ajtim Jesucristo ja' yø tø yiktsø'øgyi pøn kugajp'ajtp jam Nazaret, ja' midi meets ojts xyikruspety, jøts ja' Dios Teety tø yikpidsimy jadigojk jap oo'kpi jutjotpy.

¹¹ Jade'en idø'øn ja Jesús ñamyayi tø ñøjknxi ejxim ja tsaa midi meets jagam m'ixjibejp, midi mee mgayiktuun jam pøchkyøjxp, jøts ja' ixyam ne'egi tø pyidsimy jadigojk jawaani øy, midi tmach'etkøjxp tuki'iyi ja pøch'aaw.

¹² Nipøn jadu'uk xkayiknitso'ok'ajtim sa adøm Jesús xyiknitso'ok'ajtyindi, pøn ja Dios tu'ugyi tø ttanibiktaagi yä naxwiñ.

¹³ Xjats ku ja kudunktøjk t'ejxti ja Pedro møøt ja Juan, ku ja jade'en møk'ampy wyingugajpxiyidi, winets ja t'ejxkajptøø kudam ja kya'ixpikyidi, ku ja ñugojaa'yidi, jøts ja jade'en nugo myaydi tyajti, winets ja t'ejxkajptinim jøts kudam ja yja'adi pøn ja Jesús wyinaty tø tmøøtwidetti.

¹⁴ Jøts ja jaa'y midi wyinaty tø chø'øky, jam idø'øn ja wyinaty tmøøtanidi, paty ja kudunktøjk ka' t'ukmidsepwanidøø.

¹⁵ Xjats ja yikajpxidsømdøø mä ja mayjaa'y jam wyinaty tø ñamyukyidi, jøts ja kudunktøjk ja agø'ømyidi tkajpx'øyidøø.

¹⁶ Yide'en ja ñawyajnidøø:

—¿Sa yø jaa'y njanchtuu'nindit? Pø tyumnija'winidipxi yø' pøn jaty yä tsinaadyip Jerusalén jøts ku yø jade'en tø tyiktutujnidi ja Dios myøk'ajtin, çti jats adøm ja ngagupijkyim ku dø'øn ja jade'en tø yjanchjaty?

¹⁷ Wan yø tkajpx'adsø'jka'andi, jøts ja Jesús ka'ap ja yja' y'ukyikajpxyø'øñit jam mayjaa'y agujkp.

¹⁸ Xjats ja twaadsoodøø ja Pedro møøt ja Juan, ja møk'ampy t'ana'amdøø jøts ja kidi jade'en ja jaa'y t'ukyik'ixpøjknidi, ka'ap ja jade'en t'ukajpxwä'kxinidit ja Jesús yja'.

¹⁹ Winets ja Pedro y'adsoodøø møøt ja Juan, jøts ja wyandøø:

—Ukwinmaagyukidim kø'øm pøni tiy tam jade'en, pøni øy tam ja Dios jade'en tjawi ku mee ne'egi myikmimado'ot, jøts ja kyayikmimado'ot.

²⁰ Nijuuni øøts ja ngamajtsstu'utt midi øøts jaa'y nduk'ixpijky, kumi tø øøts ja jade'en kø'øm ndyimyadøy, jøts kumi tø øøts ja jade'en kø'øm ndyimy'ixy.

²¹ Winets ja kudunktøjk ja ojts kyajpx'adsø'øgyidi jøts nigidi'iyam ja ojts tyimyikmatsti, yikmajtstuttøø ja jadi'iñi. Nigidi ja yikmiwinmaa'nbyajtidøø sudso ja tyik'ayo'ombaattit, kumi tso'jkidip ja', niduki'iyi ja kajp jaa'y wyinaty tkajxknidi ja Dios.

²² Jade'en idø'øn ja pakma'at jaa'y chøøjky, jam idø'øn ja jaa'y yjumøjt ja wyinaty wixijky myajtskin pøn ja Dios yiktsøøjkiyøø.

Ku ja Jesús yjanchja'wibi t'amidoodøø ja møk'ajtin

²³ Xjats ku ja Pedro møøt ja Juan y'awa'atspidsømdøø, winets ja myigu'uk ja tñinøjkxtøø mä ja jap wyinaty, jøts ja ojts ttamimadya'akti sa jaty teetywindsøn sa jaty møjaa'dyøjkti ja wyinaty tø ñi'mxyidi.

²⁴ Xjats ku ja myigu'uk ja jade'en tmadoodøø, winets ja niduki'iyi ja Dios t'ajot'ajttøø:

—Kuuyi me Dios Teety jadu'uk møk'ajtin møk xmøødi. Tø xyiknajtskojgyixy tuki'iyi winø'øn ja pikta'aky y'ity naxwiñ, wan tsajpi, wan tnaajxi, wan tñøøji tnejyi. Tum mets yø mja'ajtpy amuum.

²⁵ Nayi mets ja David ja Espíritu Santo mdukyik'agajpxiyi'ñ ku ja xyikwaañ yide'en:

¿Tigøjxp ku jaa'y kajp kajp nugo jotkøjxpm t'ejxti pøn yä jagagugajp'ajtip, pønts ya kugajp'ajtip, jøts yø tmidundigøøwyamidi ja nwindson'ajtim?

²⁶ Ja windsøndøjkti midi yikutujktip ya naxwiiñ, ja' tō tmidsepøkti ja nwindson'ajtim, jøts ja jaa'y midi t'ana'amdip ja kajp, tō ja ñamyukyidi may'ampy, jøts ja tñidø'kti ja Dios Teety, nayide'en ja tmidsepøkti ja yiknitsokpi midi ja Dios Teety kyejxpy.

²⁷ Jøts janch tō dō'ōn yjaty, kumi jade'en ja Herodes mōøt ja Poncio Pilato tō tminamyukyidi ja wenk jaa'y jøts nayide'en yō israelit jaa'dyi ya mōj kajpøøjty, ja' idø'ōn jade'en tō yikmidsepiky ja m'U'nk Jesús pōn janch tsuj janch wa'ats, pōn me kō'ōm tō xanibiktaagi yiknitsokpi.

²⁸ Tō dō'ōn ja jaa'y ja jade'en yjanchtuñi sã mets ja wyinaty kō'ōm tō xanibiktaagi jøts ku ja jade'en yjatt, tōts idø'ōn ja jade'en yjaty.

²⁹ Dios Teety, ejx icyam sã tkajpx'adsø'ogidi ja jaa'y, yikjotmøkpøk yō mdumbi jøts kyatsø'ogidit ku tkajpxtit ja mgajpxy ja m'ayuujk.

³⁰ Mo' mōk'ajtin, mo' pudøjkin jøts tyiktsø'oktit ja pamaa'y jøts tyikwingaxø'oktit ja Jesús myøk'ajtin.

³¹ Xjats ku ja chapkajpx'abajtidøø, winets ja Dios tyikmiiñ ja ujx ma ja jam wyinaty tō ñamyukyidi; xjats ja jade'en ja Espiritu Santo yikjotmøkpøjkidøø, jøts tkajpxwa'kxidøø amumjoojt ja Dios kyajpxy ma jaty ja wyidejttøø.

Ku ja Jesús pyadumbitøjk amuki ja pyikta'aky tja'ajtti

³² Ja mayjaa'y midi wyinaty tō tjanchjawidi ja øgyajpxy ja ømyadya'aky, tu'ugyi ja wyinmaañidi, ka' pōn wenk wyinmay, nitu'ugin nipōn ja pyikta'aky tkaja'adijy, tyumja'ajttip idø'ōn ja niduknaç, ka'ap ja pōn tja'aty nadyu'uk.

³³ Jøts ja kudanaabyi jotmøk'ampy ja tñigajpxti tñimadya'akti ja nwindson'ajtim Jesu-cristo, sã ja pyidsiimy jadigojk jap oo'kpi jutjøtpy. Dios idø'ōn ja yikxon pudøjkin mōøjyidip.

³⁴ Jøts nipōn niti kya'ijtxyi, kumi tyoo'ktip ja ñaaix ja', kumi tyoo'ktip ja tyøjk ja' pōni pōn jaty jam ja pyikta'aky tñmøøt'ajtp, jøts ja ñimeeñ ja tyikmenidi,

³⁵ jøts ja ttagøðøkiidi ja kudanaabyitøjkti. Ja'ats ja tyikwa'kxtip, jøts ja ttagumaydi pōni pōn jam tigati ka'ejtxiyip.

³⁶ Jamts idø'ōn wyinaty tu'uk ja israelit jaa'y pōn ja Levi y'apteety'amøjip, José dō'ōn ja xyøøw, jam ja wyinaty tō kye'exy ma ja naajx jam mōj mejjyotp midi txøøw'ajtp Chipre. Ja'abi jaa'y ja kudanaabyitøjk yikxødigatstøø, jøts ttejtøø Bernabé midi tyijpy kajpxjot'amøjkibi;

³⁷ ja'ats idø'ōn tto'jk ja ñaaix jøts ja tyikmiiñ ja naixsow, jøts ja ttagøðøjkiiy'iñ ja nwindson'ajtim kyudanaabyi.

5

Ku ja Ananías jøts ja Safira tmidundigøødyøø ja Espiritu Santo

¹ Jamts idø'ōn wyinaty jadu'uk ja jaa'y pōn txøøw'ajtp Ananías, jøts ja ñidø'øxy Safira txøøwi, ja'ats idø'ōn tto'ktøø ja ñaaix tukam.

² Xjats ja kujkwa'kxy tmidanidøø naixsow, jøts ja ojts kujkwa'kxy ttaninijxxy ja kudanaabyitøjkti, jade'en ja ttanikajpxy jøts ku ja jam ka'pxy, ka'ap ja jade'en ttukmadøy, wa'ats ñidø'øxy ja mōøt tñijawi ku ja jade'en y'adø'østti.

³ Xjats ja Pedro tñimaay ja yaa'y:

—Ananías, çtiku miku' tō mdatøkiyi jøts jade'en xjawin'øønwa'añ ja Espiritu Santo, kidi kujkwa'kxyip tō xyikmiiñ?

⁴ ÇTi kidi ja kam xkø'ømnaajxi? Jøts ku tō xøøky, çti kidi ja meeñ xkø'ømja'aji jøts xkøyakt pōni winø'ōn kō'ōm xkøyakwa'añ? Dios tō xawin'iñ, kidi øødsip.

⁵ Ja'ayi Ananías jade'en tmadøøy, winets ja jatyi øøky ñaxkidaajky. Ku ja jaa'y ja jade'en niduki'iyi tñimadoodøø jøts ja yjanchø'jkidøø.

⁶ Xjats ja una'jk jaa'y myendøø, jøts ja t'abejtøø ja oo'kpi jøts ja t'atsyiknaçøjkidøø.

⁷ Tigøøk oorinin idø'ōn ja wyinaty jade'en tō yjaty, ku tyøjkiiy'iñ ja Ananías ñidø'øxy nay jam, ka'ap ja tñijawi pōni tidam idø'ōn wyinaty tō tyuñi.

⁸ Xjats ja Pedro ja tyiibøjkøø, jøts ja ojts ñii'mxy:

—Nigajpx, çjade'en idø'ōn ja naajx tō xjanchtookti winø'ōn tō xanitejt?

Winets ja y'adsøøy jøts ja wyañ:

—Jade'en øøts ja tō ndøøky.

⁹ Xjats Pedro ja tñimaay:

—ÇTiku jade'en tō xkajpxy'atti ku ja Dios Teety y'Espiritu Santo jade'en xwin'øøndi? Ixa ja jaa'y tøk'agi'y myendi midi ja mniyaa'y tō y'atsyiknaçøkiyi, jøts mets inet m'atsnajxøjkimyip.

¹⁰ Winets ja tøøxy jaty øøky ñaxkidaajky jam Pedro tyekyjøøm. Xjats ku ja unañ'jk jaa'y tyøjkidøø, øøky ja jap tpatøø ja tøøxyøjk, winets ja ojts jaty tyikpidsømdi, jøts ja ojts t'atsnidajidi nay jam ñiyaa'y pyukøøm ma ja jam wyinaty tø yiknidaji.

¹¹ Winets ja Jesús yja' niduki'yiyi yjanchø'jkidøø, jøts nayide'en pøn jaty ja ojts jade'en tñimadowdi.

Ja mamyilagri midi ja Jesús kyudanaabyi ñanky'ejxidøø

¹² Møk idøø'n ja Jesús kyudanaabyi ja milagri ttundi jam mayjaa'y aguikp; jøts niduki'yiyi døø'n ja Jesús yja' jam yøømyukti møj tsaptøjk agøøm midi yiktejp Salomøn Tyøjkweenk.

¹³ Janch chøky'ajttip idøø'n ja kajp jaa'y ja', ka'apts ja niduki'yiyi ja jotmøkwinnmaa'ñ tjagyapti, jøts jap ñøjkxtit ma ja Jesús yja' jap ñamyukyidi.

¹⁴ Namay idøø'n ja Jesús y'ayuujk yikmibijky, jade'en ja yaa'dyøjk jøts nayide'en ja tøøxyøjk.

¹⁵ Ja'agøjxpts ja pamaa'y jap yikiidyaktøø jap ma tuu' ñaxy, nay jap ja yikpikta'akti myaabajtkijxpy jøts tøøkyøjxp, jøts ja cho'oktit ku ja Pedro jap wyinaty ñaxy, øy ja y'aga'ax ja'ayi tyapaadiyidit.

¹⁶ Jøts nayide'en ja wenk kajp midi ja Jerusalén myiwingon'ajtpy, ja'ats tyikmendøø ja pyamaa'y jøts nayide'en pøn jaty wyinaty tø møk'ampy myachiyi ja miku'; xjats jade'en niduki'yiyi choktøø.

Ku ja Pedro møøt ja Juan yikjendundøø yiktedundøø

¹⁷ Winets ja teetywindsøn møøt ja saduceit jaa'y ojts nawyinaxi tjawidi,

¹⁸ winets tmatstøø ja Jesús kyudanaabyidi, jøts jap tsumdøø ma ja kajp jaa'y pyuxøjk jap.

¹⁹ Xjats nwindson'ajtm ja puxøjk agaj ojts tyik'awa'ach jøts tyikpidsimy, jøts ojts tñøjmi:

²⁰ —Nøjkxti jam møj tsaptøjkjøtpy, tukmadowdi jam ja jaa'y ja øy'ayuujk midi ndaju-jky'ajttindip.

²¹ Xjats ku døø'n jade'en yiknimaydi, winets jøpyi ñøjkxtøø jam møj tsaptøjkjøtpy, jøts ja jaa'y ja jam tyik'ixpøjkøjkidøø.

Yam idøø'n ja teetywindsøn jap wyinaty udyaa'ky twaadsodnim niduki'yiyi ja møjaa'dyøjkti midi ja Israelit jaa'y yikutujk'adsinaadyip, jøts ja Jesús kyudanaabyi nayide'en yikwaadsowa'andi pøn wyinaty tø yiktsumdi.

²² Xjats tkejxy ja teetywindsøn ja tyumbi, jøts ku jam yjaja'ttøø jam puxøjk agøøm, nitu'uk ja ojts tkapaatti pøn idøø'n jayiktanigaxtip; winets ja jadi'iñi wyimbejtnidøø

²³ jøts tukmadoodøø ja teetywindsøn, jøts yide'en tñimaadyøø:

—Ku øøts jam tø nja'aty, aduky øøts ja puxøjk jam tø nbaaty, jam idøø'n ja soldadi y'ejx'etti puxøjk agøøm; xjats ku øø tø nyik'awa'ach, nipøn øøts jap nitu'uk tø ngapaaty.

²⁴ Xjats ku døø'n jade'en tmadoodøø ja ayuujk ja møj teetywindsøndi, jøts møøt ja tsaptøjk adsinaabyi, winets ñawya'añidi: “¿Sudso'ampy nmidabyaajttindit, sudso'ampy yjøpkøxt yø jade'embi winmaa'ñ?”

²⁵ Jøts winet jaty tu'uk yja'jty ja jaa'y, jøts ja wyaañ:

—¿Kidi xnijawidi? Pø ja'axi yik'ixpøjkti jam møj tsaptøjkjotp midi meets tø x'uktsummy.

²⁶ Winets ja tsaptøjk adsinaabyi tñøødiyii'ñ ja tajkti, jøts ojts twaawidi ja Jesús kyudanaabyi, nisa døø'n ja tkatundi, tsø'jkidip ku ja kajp jaa'y myi'ambøkiyidit jøts ku jotmøn chaaga'adsiyidit.

²⁷ Ku døø'n tyikja'ttøø, winets ttawingugajxidøø ma ja israelit jaa'y kyutujk adsinaabyidi, winets ja teetywindsøn tñimaa'y ja Jesús kyudanaabyidi:

²⁸ —Tø øøts nniagjpxy jøts ku øøts ojts nyikutuky, jøts ku meets ja Jesús yja' ya niwine'enin xkananky'ixpøkiyidit. ¿Ti døø'n ixyam jade'en tø xundi? Meets ixyam jinaxy tø xuknija'wiguixy ja ni'ixpøjkin ya Jerusalén, jøts øøts xukpøky'atwa'añ nayide'en ja Jesús y'o'jkin.

²⁹ Winets ja Pedro t'adsojimbettøø møøt ja myigu'uk:

—Kuwanø øøts ja Dios yja' nbaduujniyi jøts ka'ap ja jaa'y yja'.

³⁰ Ja Dios Teety pøn adøem n'apteety'amøj Dios'ajttøø, nay ja' køøm tø tyikjujkyiky ja Jesús, pøn meets kruskøjxp mmiwopajt kyøjøøm tyekyjøøm, jøts jade'en xyik'ooktøø.

³¹ Tø ja Dios ja køøm tpiakta'aky møj windsøn y'aga'ngyø'ampy jøts yikutukt, jøts nayide'en ya tyiknitso'ok'att ja naxwii'ñit jaa'y, paty Dios jade'en t'ayo'ixy ja Israelit jaa'dyi, jøts jade'en yikpøjkpimaa'kxtit ku tmatjstu'uttit ja pyøktyu'unin.

³² Wa'ats øøts idøø'n ja nnijawi ku ja Dios Teety idøø'n jade'en ttuuñ, jøts y'ijxpy nayide'en ja Espiritu Santo midi ja Dios Teety tyuktatøjkp ja yjaa'y, pøn jaty ja kyajpxy paduujniyip.

³³ Xjats ku døø'n ja Israelit jaa'y jade'en ja kyutujk adsinaabyi tmadoodøø, jøts ja Jesús kyudanaabyi yikmi'ambøktøø jøts yik'ookwajnidøø.

³⁴ Jamts wyinaty nidu'ukti ja kutujk adsinaabyidi pøn yiktejtíp fariseit jaa'y, ja' xyøøw Gamaliel midi tñanky'ixpøkiyip ja Moisés kyutujk, jøts janch tsøjkijyip idøø'n ja kajp jaa'y

ja'. Ja'ats ttanaagyukyiyii'ñ, winets tkajxpidsimgijxy ja Jesús kyudanaabyi, jøts ja jap mimøj t'atsyik'awixy abiky tsoo.

³⁵ Xjats yiknimaadyi ja kutujk adsinaabyidi:

— Meets Israelit jaa'y, kidi yø jaa'y nugo ajawi sã xundi.

³⁶ Ja'myatsti ku ojts tu'uk ja jaa'y ñamyøjpikta'agyi windsøn pøn txøw'ajtp Teudas, jøts ja kyutujk ojts ttawin'iiñ ja jaa'y nimaktaxk magøpxy. Winets ja soldadi ojts yik'øgyi ja kya'øwynmaa'ngyøjxp, xjats ja jadi'iñi wyindigøgyøjxti pøn jaty wyinaty tø t'pabøkti.

³⁷ Xjats jadigojk yjajtkojmi nayide'en ku ja gobierni tmachomujky ja yjaa'y, winets nay ja'abi tiempi tu'uk ja Galileit jaa'y ojts kø'øm ñamyøjwindsøn bikta'agyi jøts namay ja jaa'y nayide'en ttukmibijky; winets ja soldadi nayide'en yik'o'jkijyøø, xjats ja jade'en kyutigøø ja kyutujk.

³⁸ Paty ø nwa'añ jøts xmajststuttit yø'øbi jaa'dyi, ka'ap nugo xatøjkijyidit ja wyinmaa'ñ. Pøni kyø'ømwinmaa'ñ yø'ødi, kudigø'øpyts yø tsojk;

³⁹ pøni Dios yja' yø', nijuunits meets yø xkayikudigø'øty. Øyim mnay'ejx'etiyidit; kidim Dios møøt nugo mdseptundi.

⁴⁰ Xjats ku dø'øn ja Gamaliel jade'en kyajpxy'abajtyii'ñ, jøts ja kutujk adsinaabyitøjk udy'a'aky tmibøjkøjxtøø. Winets twaadsoodøø ja Jesús kyudanaabyitøjk jøts tyik'ayo'ombaa'ttøø, xjats tñimaadyi jøts ka' nugo tjaakajpxwa'kx'adø'østtit ja Jesús y'ixpøjkin; winets jadi'iñi tmajststuttøø.

⁴¹ Xjats ja Jesús kyudanaabyi jap pyidsømdøø mǝ ja israelit jaa'y kyutujk adsinaabyi japti, jotkujk idø'øn ja ñajawiyidi kumi tø ja Dios ja wyinaty tyanibiktaagiyidi, jøts ja jade'en y'ayo'odit Jesús køjxp.

⁴² Ejtp idø'øn ja jabom jabom tñigajpxti tkajpxwa'kxidi ja Jesús yja', jøts ja jaa'y jade'en ttuk'ixpøkti jap møj tsaptøjkjøtpy jøts nayide'en awingujky tøjkjøjty, nijuuni dø'øn ja tkamajststuttøø.

6

Ku ja niwixujkpi yaa'dyøjk yikpiktaktøø ejx'ejtpi

¹ Nay ja'abi et, nay ja'abi jumøjt idø'øn ja jaa'y ñamay'adøtstøø pøn jaty ja Jesús yja' pyaduujnidip. Jøts ja' midit tkajpxtip ja griego ayuujk, ja' idø'øn ojts y'øø'mbinaxwa'akti jøts tñi'øonidi ja myig'u'uk pøn tkajpxtip ja israelit ayuujk, ja'agøjxp idø'øn ja y'øøndi ku ja kyu'økytø'øxy ja kyayik'ejxti yikxon, ku ja jii'kxy jabom jabom yjawa'kxy.

² Ja' idø'øn ja ñi'øøndip, winets ja nimakmajtskpi jaa'y pøn tkudanaadyip ja nwindson'ajtim Jesucristo, ja' ojts niduki'iyi tñankñamyukyidi ja Dios yjaa'y, jøts ja tñimaadyøø:

—Ka'ap jade'en y'øyi ku øøts ja jii'kxy nyikwa'kxt, jøts øøts ja Dios y'øgyajpxy y'ømyadya'aky nga'atskajpxwa'kxiti, tti juuni øøts ja n'atstuf?

³ Migu'uktøjkti, paty øøts yikxon ndyimñigajpxy, ix'a'adi niwixujk jaa'y, nay jaayi dø'øn kø'øm mnawyi'ejxidit, ja' idø'øn m'ixa'adip pøn windsø'øgi'ejttip, pøn ja'gyukidip, jøts pøn ja Espiritu Santo tmøøt'ajttip, ja'ats yø tunk mdaguwaniidip jøts ja jii'kxy ja jade'en tyikwa'kxtit.

⁴ Øøts dios'ajot'ajtwamp øøts, njaaktyimdyuk'ixpøjkwamp øøts jaa'y ja Dios y'øgyajpxy y'ømyadya'aky.

⁵ Xjats niduki'iyi ñagyajpxkyupøjkidøø, winets ja Esteban yikpiktaajky yikjii'kxwya'kxpi, ja jaa'y pøn idø'øn ja Dios møk tjançh'ajot'ajtp, pøn tmøøt'ajtp ja Espiritu Santo. Ja'ats idø'øn jade'en yikwiwejtstøø møøt ja Felipe, møøt ja Prócoro, møøt ja Nicanor, møøt ja Timón, møøt ja Parmenas, jøts møøt ja Nicolás pøn tsoo'mp jam Antioquía, ja' midit wyinaty jekyip tø t'ukpabiky ja israelit jaa'y chinaa'yindi.

⁶ Xjats ja jam wyinaty tø tyikmendi mǝ ja nwindson'ajtim kyudanaabyi jamdi, jøts ja tkunuu'kxtøø jøts ja jade'en tkønixajtøø.

⁷ Xjats ja Dios kyajpxy jade'en myøjtak'adijch, mayi'adøtsp idø'øn jade'en ja Dios yjaa'y jam Jerusalén, kø'ømbaat ja teetyøjkti tjançhja'wiñidi, kø'ømbaat ja t'ajot'ajtnidi ja nwindson'ajtim Jesucristo.

Ku ja Esteban yiktsumnaq

⁸ Jamts idø'øn ja jaa'y wyinaty tu'uk midit txøw'ajtp Esteban, ja' idø'øn ja Dios myøk'ajtin amuum myøøt'ajtpy, Dios idø'øn ja kyunuu'kxin nayide'en amuum myøøt'ajtpy, jøts ja jade'en ttuuh ja myilagri Dios myøk'ajtingøjxp jam mayjaa'y agujkp.

⁹ Nay jamts idø'øn ja jaa'y wyinatymidi winaagin, pøn xuminøjkxtip mǝ tsaptøjk jam yikxødijy Esclavos Libertados. Jam wyinaty ja'adi midit tsoo'ndip Cirenit etjøpt, jøts Alejandriit etjøpt, jøts Ciliciit etjøpt, møøt Asiat etjøpt. Ja'ats idø'øn tñibidø'øktøø ja Esteban, jøts ja jade'en xe yǝ ñadyamigajpxnibøjkidøø;

¹⁰ Jøts nigidi dø'øn ja tmidanaadyøø sa ja Esteban ojts wya'añ, kumi wijy'ajtin ja yiktumpy, jøts nayi Espiritu Santo ja pudøjkiyip.

¹¹ Xjats ja mayjaa'y winaagin tmijuudyøø ja myigu'uk, jøts idø'øn ja wya'andit jøts ku ja Esteban wyinaty tø tka'odyiy ja Moisés jøts ja Dios.

¹² Xjats idø'øn ja jade'en jotkøjxpim tuk'ejpxinaxwa'akti ja myigu'uk, niduki'iyi ja møjaa'dyøjkti møøt ja kajpxwejpitøjkti; jøts ja t'adinaadyujktøø ja Esteban, xjats idø'øn ja jade'en tmajtstøø jøts ja tyknøjktøø jam møj kutujktaajkjotp.

¹³ Nay ojts idø'øn ja tpiktakmidi ja testigi pøn tnidaay'ajtp ja Esteban, yide'en ja wyandøø: —Ya'at jaa'y nijuuni yø tkamajstutu'y ja kya'ø'y'ajtin, xumi jade'en yø tpaagajpxy tpxaxi'iky yø tsaptøjk, nayide'en yø ttuñ ja Moisés kyutujk.

¹⁴ Ti yø jade'en ñadyiyi, pø tøts øøts yø jade'en kø'øm ndyimyadøø ku yø jade'en wya'añ, jøts ku Jesús (ja Nazaretit jaa'y) tyikudigø'øty yø tsaptøjk møøt yø tsinaa'yin midi ja Moisés yiktaan.

¹⁵ Exam ja jade'en wya'andi, winets ja mayjaa'y pøn jaty jam wyinaty tsinaadyip, ja'ats ojts t'ejxti ja Esteban jøts ku wyeen y'aaw ja jade'en kyaxi'iky sam ankilisin.

7

Ku ja Esteban kø'øm yjanagyugajpxøø

¹ Winets ja teetywindsøn ttiibyijky ja Esteban, yide'en ja tnimaay:

—¿Janch jade'en mets tø m'adi'ich?

² Xjats ja yøñ'ampy t'adsøø, jøts ja wyaañ:

—Mee migu'uktøjkti winø'øn myikteedyidi myiktaagidi, madowdi waani. Ku adøm n'apteety'amøj Abraham jap chinaay ma et txøøwi Mesopotamia, jøts ka'anin ja wyinaty ñijkxy tsinaabyi jam ma et txøøw'ajtmi Harán. Xjats ja Dios Teety pøn janch wa'ats janch møj ojts ñanky'ijxyiyi,

³ jøts ja Abraham yiknimaay: “Majstutu'yø mdsinaadyaajk jøts nayide'en ja mmig'u'uktøjkti, jøts mnøjkt jam ma ja tsinaadyaajk n'atstuk'ext.”

⁴ Xjats ja Abraham choo'ndøø jam chinaadyaajkjotpti ma txøøw'aty Caldea, jøts ñøjktøø tsinaabyi jam Harán. Xjats ja tyeety jam y'oo'knaa, winets ja Dios Teety twaadsøø ja Abraham ma ixyam ndsinaa'yindi.

⁵ Jøts ku ja jade'en yja'aty niwinø'ønin ja ñaajx ja kyayikmøø, nugo ja chinaay; jøts nay ja Dios Teety kø'øm tyikutujk jøts yikmo'otnim ja ñaajx ma chøønidit ja y'u'nk ja y'una'jky øy ja Abraham wyinaty yja'øøky; ka'anin ja y'u'nk te ku ja Dios jade'en wyandaajky.

⁶ Jøts nayide'en ja Dios Teety tjaaknimaay ja Abraham, jøts ku ja y'u'nk y'una'jkti, y'apti y'okti ñøjktøø tsinaabyi abikyajp, jøts jap jaa'y ja yjanhyiktunidit ejxim jiyujkin. Ku ja jap yja'attit, winets ja jaa'y kyayik'ødyunidit maktaxk magø'pxy jumøjt.

⁷ Xjats ja Dios nayide'en wyaañ: “Øts ndüdu'ump ja jaa'y pøn mga'ødyunidip, pøn myiktunidip jiyujkin, jøts ngajxpidsø'ømdit kyø'ømnaxjotpti, jøts ø xwindsø'øgidit nay ya.”

⁸ Jøts nay yø Dios Teety møøt ja Abraham tkajpxy'ajty sa jaty ja ejxpajt ja ejxa'an ku ja yikmo'odit ja naajx. Jøts tpiktaajkøø sa mutsk mixyu'nk yiktu'undit ku kya'axtit. Paty idø'øn ku ja Abraham y'u'nk kyaxi'jky midi txøøw'ajt Isaac, winets jade'en ttundi sa tkajpxy'ajttøø jøts ja ejxa'an tpiktaajki ñe'kxøjxp, kyiduktujk xøøw ja jade'en ttuñ. Nayide'en ja Isaac ttuñ ja y'u'nk midi txøøw'ajt Jacob, jøts nayide'en ttuñ ja Jacob ja y'u'nk y'una'jkti nimakmajtsk pøn y'apteety'ajttøø ja Israelit jaa'y.

⁹ Ya'at Jacob y'u'nk y'una'jkti midi adøm n'apteety'ajttøø, myi'ajkidip ja y'uch José ja'adi, paty ja ojts ttoo'knidi jøts tyiknøjktøø jam Egiptit jaa'y y'etjotp. Jøts ja José, ka'ap ja Dios myajstutu'udyi nijuuni.

¹⁰ Nay yø Dios pudøjkiyip ku y'ayo'ombaaty. Jøts nay ja' ja møøjyip ja wijy'ajtin, ja'agøjpx chojkiyøø ja Faraón midi møj windsøn'ajtp jam Egipto. Nay ja' tpiktaajk ja José gobernador jøts ja yikutukt jap kutujktaajkjøtpy, jøts nayide'en jap Faraón tyøjkjøtpy.

¹¹ Winets ja yuu myiñ jøts janch may ayo'on pyajtidøø jam Egipto etjotp jøts nayide'en jam Cnaan, paty adøm n'apteety'amøjti ka'ap tpaattøø ti yøø'kxtip.

¹² Xjats ku ja Jacob tnija'wøø jøts ku jap Egipto y'ity ariin, winets jap tkejxy ja y'u'nk y'una'jkti pømbi adøm n'apteety'ajttøø. Jade'en ojts y'otsti mijawyeen.

¹³ Ku myimajtsk ojk ñøjktøø, winets ja José kø'øm ñanky'ejxiyøø, jøts jade'en ja Faraón tnija'wøø kudam ñamyigu'uk'atyidi.

¹⁴ Xjats ja José twaadsøø ja tyeety jøts niduki'iyi ja myigu'uktøjkti, nidugui'pxy myakmokx niduki'iyi y'ejttøø.

¹⁵ Jade'en ja Jacob yja'jty ku yikwaadsøø tsinaabyi jap Egipto. Jap y'oo'knaa møøt adøm n'apteety'amøjti.

¹⁶ Xjats ku jam y'oo'ktøø, winets jam tyiknøjkxtøø Siquem y'etjotp ma ja Abraham jam wyinaty ja jut tø tjuy, midì ja Hamor y'u'nk tyoøktøø.

¹⁷ Xjats ku ja Israelit jaa'y myayinidi jam Egipto ñaxjotp, winets ja Dios ja wyanda'aky y'adukwani midì wyandaajk Abraham køjxp.

¹⁸ Winets ja Egiptit jaa'y tpiaktøø tu'uk ja møj windsøn, pøn tkanija'wip pøni sa ja José wyinaty tø y'atswindsøn'aty.

¹⁹ Ja'ats idø'øn twindaay'ajt adøm nmigugajpti jøts tjemduuñ tteduuñ adøm n'apteety'amøjti, yide'en idø'øn ttuuñ jøts ku aguwaniøkøxp ttukmajtstu'uty ja teety ja taakti ja myaxu'nkti jøts y'oøktit.

²⁰ Ja'abi xøøw ja'abi jumøjt idø'øn ja maxu'nk kye'jxy midì txøøw'ajt Moisés, jøts janch tsøjki ja Dios ja'. Xjats ja Moisés ja teety tyaak yikya'jkiyøø tigøøk po'.

²¹ Winets yikmajtstutnaa kuwani, xjats nay yø Faraón ñøøx ojts tpaaty, jøts tyikye'jky ejxim ja kyø'øm'u'ngin.

²² Xjats ja Moisés jap wyiyy kyejy y'ixpijky, jøts midì ja Egiptit jaa'y yjajtip, nay jap ja Moisés yikta'awaan. Ku ja jade'en y'ixpijky, kajpxwa'kk ja janch øy janch tsuj, jøts yjanchtumpy idø'øn ja kø'øm jade'en.

²³ Xjats ku ja Moisés wyinaty ja jyumøjt wixijky, winets ja t'atspaatwa'añ ja myigugajp ja israelit jaa'y.

²⁴ Winets jap ojts t'ejxpaaty ja myigu'uk ku ja jap wyinaty ja egiptit jaa'y yjemduñi tyeduñi. Winets ja Moisés ja myigu'uk t'ayo'ijxy jøts tngubøjky, paty ja tyik'ø'jky ja' egiptit jaa'y.

²⁵ Kumi jade'en ja yjawnmay jøts ku ja myigu'uktøjk tñijawidit, jøts ku ja Dios myo'owa'añidi ja awa'ats'ajtin, jøts nagyø'øm ja twindsøn'attit; jøts ja myigu'uk ka'ap ja tñija'widøø.

²⁶ Xjats kyimjabom'ajty, winets ja Moisés tpaaty ja myigu'uk namajtsk, nache'jkidip tam ja wyinaty, xjats ja Moisés wyinmaay jøts ñamyiyuy'atidit, jøts tñimaay: “¿Tiku jade'en mnayjemduñidi mnadyeduñidi, kidi mdukjaa'yip meetsp?”

²⁷ Xjats ja' midì ja myigu'uk wyinaty tjemdum ttedump jøts ja Moisés yiknajtstejimya, jøts ñimaajyøø: “¿Pøn mets tø mbikta'agyì yikutujkpi jøts øø x'ana'amt?”

²⁸ ¿Xyik'ookwamp øts nayide'en sam ja xyik'ø'jky ja' egiptit jaa'y uxøø?”

²⁹ Xjats ku ja Moisés jade'en tmadøø ja ayuujk, winets jaty'kyeeyku ja yiknimaay jøts ku uxøø wyinaty ja jaa'y tø tyik'øøky, winets ñijky jap tsinaabyi ma et jap txøøwi Madián. Japts chinaay sami ja'atjaa'y, winets jap ja y'u'nk tpaaty namajtsk tum mixy.

³⁰ Tø ja wyinaty chinaañi wixijky jumøjt, winets ñijky widejtpi jam tø'øts etjotp, wingon et ma kojpk jam midì txøøw'ajtp Sinaí, xjats jam t'ejxpaaty tu'uk ja ankilis jam jønjøtp midì ujtsximungøjxp tøøpy.

³¹ Xjats ja Moisés ñigyumaap tja'wiyi'ñ ku ja jøøn t'ejxpaaty, jøts ku tjaakwingunøjkxøø wingon, winets tmadøø ja Dios Teety y'ayuujk ku ja wya'añ:

³² “Øts mets m'apteety'amøj xdios'ajtp nayide'en ja Abraham, ja Isaac, jøts nayide'en ja Jacob.” Xjats ja Moisés chø'øjyidøøkiña, jøts ka' y'uknadya'ajexiniyøø jøts twin'ext.

³³ Winets ja Dios Teety ñimaajyiyøø: “¿Tiku yø mgø'øk xkajeñ, kumi tø øts yø nwi'ixy ya'at et?”

³⁴ Kø'øm øts tø n'ixy ja njaa'y ku jam y'ayo'ombaatti Egipto, tø øts nayide'en nmadøø sa yjø'ødi sa ya'axti, sa yjatti sa kyubatti, ja' tø nnimiñ jøts nyik'awa'atspidsøømdit. Mada'ak, jøts jam mnøjkxt Egipto.”

³⁵ Øy ja Moisés wyinaty tø yjayiknøjmi jøts ku ja ka' wyindsøn'att, jøts ku ja ka' tyiidyu'unt, Diost ja kø'øm kajxyi jøts ja tyik'awa'atspidsøømt, jøts nayide'en tñiwindsøn'att ja myigu'uktøjk, ja'agøjxp ku ja ankilis jam tyukmadoji ujts ximumgyøjxp jøøn agujkp.

³⁶ Nay yø Moisés idø'øn tyikpidsøøm adøm n'apteety'amøjti jam Egipto, jøts nayide'en yjanchtuun ja milagri jøts ja Dios myøk'ajtin tyiktuujnøø, jade'en ttuuñ jam Egipto, jøts nayide'en ma ja Tsajpts Mejy, jøts jam tø'øts etjotp, winet ku jam jade'en chinaay wixijky jumøjt.

³⁷ Nay yø Moisés idø'øn tñimaay ja israelit jaa'y: “Myiktanigaxtip ja Dios Teety ja kyugajpxy tu'uk, nayide'en idø'øn ja mye'ent sam øts ja jawyeen tø xkejxyin, jøts nay adøm idø'øn ja nmigu'uk ja'. Ja'ats idø'øn mbadu'unindip.”

³⁸ Nay yø Moisés idø'øn kyudanaay ja yjaa'y jam tø'øts etjotp ma ja kojpk txøøwi Sinaí, ku ja ankilis myøøjyøø ja øyayjpxy ja øy'ayuujk midì ndajuky'ajtindip; jøts adøm ja nayide'en nnija'wint.

³⁹ Xjats adøm n'apteety'amøjti ka' tpadundøø pøni midì ja Moisés yjananktyunwajnip, jam ja ne'egi jadigojk ñøjkxwa'andi nay jam Egipto, jøts ja Moisés jade'en yikmajt-stu'utwa'añ.

⁴⁰ Winets tnimaadyoø ja Aaron: “Yikojik øøts nwenkdiosti jøts øøts ja' xuu'wa'at, kumi ka'ap øøts nnijawí pøni sa ja Moisés yjaty ku øøts nichøky'ampy xyikpidsiimy Egipto.”

⁴¹ Xjats tyik'a'øyiñaxti ja løjch, jøts tyik'oo'kti namay ja jiyujk, ja' idø'øn tyamiyoxtip tyawindsø'jkidip ja løjch awanax, winets ja' ttaxondaktøø midí kø'øm yik'øyidøø.

⁴² Xjats ja Dios Teety myajtstuujtidøø jøts ja wyaañ, wan yø wenk dios yja' tpaduujnidi, wan tmaadsa'ji wan ttií'ji. Yide'en idø'øn ja Dios Teety kyugajpxy jap ñøkyjøtpy tjaadyandi: Ku meets jam mduu'yø'øy tø'øts etjotp wixijkxy jumøjt,

¿myik'o'jkik meets ja jiyujk may'ampy øts nwindso'jkingøjxp?

⁴³ Pøka'axi yjade'eni, pøjinaxyi meets ja wenk dios yja' ixyam xpaduujniyi, ku ja dios Moloc møøt ja tyøjk xkiwiyidejtiyidi ja tø'øts naxjotp.

Nayide'en jadu'uk ja wenk dios Renfan myaadsa' xpaduujnidi ja yja',

yide'en idø'øn ja kø'øm xyik'øyidøø jøts xwindso'jkidøø.

Ja'agøjxp meets ngajxpidso'mwaañidi jøts jam mnøjxktit Babilonia jixkø'øm, jamts nayide'en m'ayo'ombaatit.

Ya'at idø'øn ja Dios ja kyugajpxy tyukjaay, xjats ja Esteban yjaakwaañ:

⁴⁴ 'Nayide'en jam tø'øts etjotp ja n'apteety'amøjti tmøøt'ajttøø ja wetøjk tu'uk ma tpo'kjø'økti ja kyutujkti, tsagøjxp idø'øn ja yja'ayi, Dios idø'øn ojts tyuk'ijxyi ja Moisés sudso wetøjk y'øyt.

⁴⁵ Xjats ku ja tiempi ñajxy jeky jumøjt, winets ja møjaa'dyøjkti tkøyajknidøø ja wetøjk møøt ja wyindsøn Josué. Winets ja myidsep tmimajadaktøø pøn jaty ja wyinaty tsinaadyip, kumi kø'øm ja Dios ja kyexyidi jøts ja chinaadyajk ja yikmo'odit. Nay ja wetøjk wyinaty yiktundip ku ja David yikutujky.

⁴⁶ Jøts ja Dios ja ojts y'a'ejxyi, paty ja tu'uk tkøjwa'añ ja tsaptøjk ma ja chøønit ja Dios Teety pøn ja Jacob ojts Dios'ajtmi;

⁴⁷ Jøts ni ka'abyim ja tkøjy ja tsaptøjk; winets ku ja Salomón tyøki windsøn, ja'animts tkøj ja tsaptøjk.

⁴⁸ Jøts øyim ja Dios jap kyidyimchøøni kuwani jap tsaptøjkjøtpy midí ja jaa'y yik'øyidip, kumi yide'en ja Dios ja y'ayuujk ttukmiyø'øy ja kyugajpxy ku ja yide'en wya'añ:

⁴⁹ Tsajpjøtpy ø ndsoøni, jøts nayide'en naxwiíñ.

¿Ti ndøjk meets idø'øn myik'øyiyip, jøts ti tsinaadyaajk meets idø'øn xmo'owamp?

⁵⁰ ¿Kidi øtsip jade'en tuki'iyi tø nyik'øyi?

⁵¹ Xjats ja Esteban tjaaknimaay yide'en ja myigu'ukti:

—Meetsxi mgamadoop mgaja'gyujkidip, jøts nijuuni meets ja Espiritu Santo xkagupøjkti. Jade'en mee nugo mjanch'ity sami n'apteety'amøjti.

⁵² Ja'axi tjemdundip ttedundip ja Dios Teety kyugajpxy, jøts tyik'oo'ktøø pømbi yjøjpa'widip ku ja myenwa'añ ja yiknitsokpi, pøn janch øy janch wa'ats. Ixyamts ja yiknitsokpi yjanchmiíñ, pø meetsxi ja mgøyajk jøts ja jaa'y yik'oogyiyit.

⁵³ Pø tøxi meets ja ankilis ja Dios kyutujk mjamø'øyi jøts nika'ap ja xpadundi.

Ku ja Esteban y'øjky

⁵⁴ Xjats ku jade'en yiknimaadyoø ja windsøndøjkti, winets yikxon tjanchty-imyi'ambøjktøø ja Esteban.

⁵⁵ Kumi ja Espiritu Santo ja Esteban yjanchmøøt'ajtpy, winets ja chajp'ijxy jøts t'ejxpaajty ja tsuj'ajtin ja øy'ajtin ma ja Dios Teety, jøts nayide'en t'ijxy ku ja Jesús jam tyani Dios Teety aga'ngyøjø'øm.

⁵⁶ Xjats tnimaay pøn yik'ookwajniydip:

—¡Uk'ejxti! Awa'ats øts yø tsajp ø n'ixy, jøts nayide'en n'ejxpaaty ja Cristo tyani Dios Teety aga'ngyø'ampy.

⁵⁷ Xjats ja jaa'dyi ka'ap ja tmadowdi, y'amattstip ja tyatsk ja', niyaxni niyjokni dø'øn tñibidøktøø jøts tmatstøø.

⁵⁸ Jøts tyikpidsømdøø aguwanikøjxp jap kajpjøtpy; winets ja n'øø'nibidi jawyeen ja chabixy tjandøø jøts ja ttuk'ejx'etti ja mixy Saulo, xjats idø'øn jatyí twiká'tsnibøjkidøø ja Esteban.

⁵⁹ Yiká'tsp wyinaty ja Esteban, jøts ja chapkajpxy jøts ja wyaañ:

—Nwindsøn'ajtim Jesús, mets ndagøðøjkp ø n'anmija'win.

⁶⁰ Xjats ku jade'en wyaañ winets ñagyuxendyaajkiyøø jøts møk wyaañ:

—Kidi xukpøky'aty nmigu'uktøjkti yø n'o'jkin.

Kuts wyaanguijxy jade'en, winets y'oo'knaa.

8

Ku ja Saulo tjemduuñ tteduuñ ja Jesús yjanchja'wibidi

¹ Jøts ja mixy Saulo yjotkujk'ajty ku ja tyik'oo'ktøø ja Esteban. Xjats nay ja'abi xøøw, winets ja tsep cho'ondaajky møøt ja' pøn ja Jesús yjanchja'widip jam Jerusalén. Paty yide'en niduki'i'yi cho'onjòknidøø pøn ja tsep tkawandip, jøts jam ñòjkxti nay Judeit kajp wingon, jøts nayide'en Samaria y'etjotpti. May idø'øn choo'nidøø, ja'ayi dø'øn tåndøø ja Jesús kyudanaabyi pøn nimakmajtskjaa'y'ajttip.

² Xjats winaagin jaa'y pøn ja Dios kyajpxy tpadundip, ja' tyiknajxøjkidøø ja Esteban jøts nayide'en tjanchpaya'axti.

³ Xjats ja Saulo txumika'ødyuñ ja myigu'uk pøn ja Jesús yjanchja'widip, jøts t'ixaañibøjkøø tøj tøj. Kuts ja tpaajty, jøts ja t'ixjidøjtpidsimy tyøjkøtpty wan tjayaa'y wan tjatø'øxyi, jøts ja tyikpuxøjktøki.

Ku ja øgyajpxy ja ømyadya'aky ojts yikajpxwa'kxy jam Samariit etjotp

⁴ Xjats niduki'i'yi midit tsoo'nidøø Jerusalén jøts ja ñòjkxtøø omagajp, ja'ats ja Dios kyajpxy tkajpxwa'kxidøø midit anmija'win tyiknitso'ok'ajtp.

⁵ Xjats ja nidu'ukti, pøn txøøw'ajt Felipe, ja'ats ñøjkx abikyajp jam Samariit y'etjotp, winets ja jam tkajpxwa'kxy sa yjajty sa kyubejty ja Jesús.

⁶ Winets ja jaa'y yjanchñamyujkidøø namay, jøts ja tjanchpatmadowdi sa wya'añ sa kyajpxy ja Felipe, jøts ku nayide'en milagri ttuuñ.

⁷ Winets tyikpidsimy ja mamyiku' midit ja jaa'y wyinaty tø tyatøkiyidi, jøts møk idø'øn ja tjanchmiyaaxti ku pyidsømdøø ja miku'; nay ja' tyiktsoojk may ja køxujxpi pakxujxpidi, jøts nayide'en tyiktsøøjky ja pakma'at jaa'dyi.

⁸ Paty idø'øn yjanchjotkujk'ajttøø ja jamit jaa'y.

⁹ Jøts nay jamts idø'øn ja yaa'dyøjk tu'uk y'ijty pøn txøøw'ajtp Simón, ja'ats jam yik'adujkp jøts nayide'en xyimay, ja'agøjxp idø'øn ja tjanchmøjawiidi ku ja jade'en ñamyøjpikta'agy ja Simón.

¹⁰ Xjats ja niduki'i'yi ja møj ja mutskti tpatmadowdi pøni sa jaty ja Simón wya'añ. Winets wyandøø jøts ku tjanchmyøødi ja Dios myøk'ajtin.

¹¹ Jøts tpaduujnidøø ja yja' ku ja xyimay jøts ku ja yik'aduky, may jumøjt idø'øn ja wyin'øø'nidøø.

¹² Xjats ku ja Felipe tñigajpxkijxy ja øgyajpxy ja ømyadya'aky pøni sa yjajty kyubejty ja Jesús, jøts ku ja tñigajpxy ja Dios kyutujk midit ja yjaa'y ja tyanitanaapy, winets ja yikpabøjknaa, xjats ja yaa'y ja tø'øxy ñøbajttøø.

¹³ Nayide'en ja Simón ttabøjknimaa, jøts ja ñøbajtmaa, jøts ja tjamyøøt'ajty ja Felipe, winets ja ñigyumaap tjanchja'wøø ku ja Felipe tjanchpikta'aky ja milagri, jøts ja Dios myøk'ajtin tyikwingaxi'iky.

¹⁴ Xjats ku ja Jesús kyudanaabyi pøn jam jaaktaandøø Jerusalén tñija'widøø, ku ja Samariit jaa'y winaagin tø wyinaty tkupøjkti ja Dios kyajpxy y'ayuujk jøts ku ja tpadu'undit, winets ja yjaakyikajxtøø ja Pedro møøt ja Juan.

¹⁵ Jøts ku jam yja'ttøø, winets tku'amidowdi ja Samariit jaa'y midit tpadundip ja Jesús yja' jøts tyatøkiyidit ja Espiritu Santo.

¹⁶ Ka'aním wyinaty ja Espiritu Santo tyatøkiyidi ja Samariit jaa'dyi; ja'ayi wyinaty tø ñøbattøø Jesús xyøøgøjxp.

¹⁷ Xjats ku ja tkønixajttøø ja jamit jaa'dyi, winets ja tyatøkiyidøø ja Espiritu Santo.

¹⁸ Ku ja Simón tjanch'ijxy ku ja Jesús kyudanaabyi ja Espiritu Santo ttuktatøki ja jaa'dyi, winets ja juy t'amidøøjy.

¹⁹ Jøts tñimaay:

—Tiku meets xkadamidøøky yø Dios myøk'ajtin midit mee mmiwidijtpy, jøts ø nayide'en øy pøn ngønixajt, jøts nayide'en nduktatøkit ja Espiritu Santo.

²⁰ Xjats ja Pedro tñimaay:

—Pøni jap ja meeñ xmøødi, wan ja møøt mgudigøy, jade'enxi mets yjawi mwinmay jøts yø yiktøøky midit ja Dios yajkpy.

²¹ Ka'ats mets yø mbaat'atyi'yi ya'at midit øø nmiwidijtpy, ka' mets mwinmaa'ñ y'øyi pyaadi Dios wyingujky.

²² Majtstu'ut yø mga'øwvinmaa'ñ, minuu'kxa'ak ja Dios pøni maa'kxujkiyip midit tø xwinmay m'am mjotp.

²³ N'ijxpy øts yjawi ku ka'øwvinmaa'ñ xmøødi, yø'øts myikjem'adøøjtsip myikte'adøøjtsip.

²⁴ Xjats ja Simón y'adsøøy:

—Ku'ajot'ajtik meets, jøts øts ja nbøky ngagu'ayo'ombaa'dit.

²⁵ Xjats ku ja Juan møøt ja Pedro tñigajpxkøxtøø ja Dios kyajpxy y'ayuujk, jøts nay ja' tkajpxwa'kxtip jam magyajpøtp nay ja Samariit y'etjotp, yide'en ja wyandøø sudso'ampy yø anmija'win ñitso'ok'aty, winets wyimbejtnidøø nay jam Jerusalén.

Ku ja Felipe møøt nabaajtyøø ja Etiopiit jaa'y

²⁶ Xjats ku ja jade'en wyimbejtndidøø, jøts ja nwindson'ajtim y'ankilis ojts ja Felipe myigajpxyiyi, jøts ñimaajyiyøø:

—Pidø'ok mets jøts mnøjkxt abatkø'm'ampy, ja tuu' midi naxp Jerusalén jøts nayide'en Gaza.

Jade'en idø'øn ja ankilis ñimaajyøø ja Felipe. Ja'abi tuu' idø'øn naxp tø'øts etjotp ma ka'apøn chøøni.

²⁷ Xjats ja pyidi'yky jøts ja chøø'ñ; winets tpaajty jam tuu'am tu'uk ja Etiopiit jaa'y, pøn ja Dios Teety jap t'atswindso'jkp Jerusalén. Ja jaa'y isaabiky ja', jøts møj yikutujkpi ja', jøts nayide'en t'ejx'ejtmüyøø ja myeeñ ja tø'øxy pøn jam møj windson'ajtp Etiopía, Candace ja xyøøw ja tø'øxy.

²⁸ Kyajpkøjxp idø'øn ja wyinaty wyimbejtni kyaretijøtpty, jøts jade'en tuktuu' tkajpx'adi'ich ja Isaías ñøky pøn ja Dios kyugajpxy'ajt.

²⁹ Winets ja Espiritu Santo myigajpxyiyøø ja Felipe, jøts ja ñimaajyøø:

—Wingonjawi puwa'agi yø karreti.

³⁰ Xjats ku ja wingon tpuwa'jki, jøts tmadøø ku ja ñøkyajpxy, jøts ja tyiktiy ja Felipe:

—¿Mnimadøøpy idø'øn midi ixja mgajpxpy?

³¹ Xjats ja wyaañ ja nøkyajpxpi:

—¿Sudso øts yø' nwinmado'ot, pø ka'ats ø pøn, pøn øts xukwinmado'op?

Winets ja Felipe yikway jøts tyøkit jap karretijøtpty jøts tmøøtsøønit.

³² Midi ja Etiopiit jaa'y wyinaty kyajpxpy, ya'at idø'øn ja':

Ku jaa'y yik'o'jkøø kyupiky'ajt ja', jade'en ja y'ijty kidim ja borreegi maxu'nk y'øøky; ka'ap ja sa wya'añ, uum ja' jade'en ejxim borreegi ku yikeepy.

³³ Jade'en idø'øn ja jaa'y yik'ayoojyøø, jøts nika' kø'øm ñanky'ayowiyit; ku ja jade'en yiktuñ, ¿pøn ja kugajpxyiyip?

Tø dø'øn jabaat kyixy ja chinaa'yin ya naxwiiñ.

Yide'en idø'øn jap yja'ayi midi ja Etiopiit jaa'y kyajpxpy.

³⁴ Xjats ja jaa'y yiktøøjøø ja Felipe:

—Tun ja may'ajt, nigajpx waani, ¿pøn idø'øn yø jade'en ñimadyakpy, kø'ømyi yø jade'en ñañimadya'agi, uk wenkpi dø'øn yø ñimadyakpy?

³⁵ Xjats ja Felipe ttuk'ixpøjknibøjkøø sa yajty sa kyubejty ja Jesús.

³⁶ Xjats ku ja jade'en yø'ødyi, winets ja møj nøø tpaattøø, jøts ja Etiopiit jaa'y wyaañ:

—Ixats ja nøø yjawi, ¿ti kidi ndejint y'øytit ku nnøbatt?

³⁷ Xjats ja Felipe t'adsøøy:

—Pøni mjanchja'wip ja Jesús tu'uk amumjoojt, o me nyiknøbatt.

Winets ja t'adsojimbijty:

—Njanchja'wip øts ku ja Jesucristo yjanch'u'nk'aty ja Dios Teety.

³⁸ Xjats ku ja jade'en wyaañ jøts ja karreti tyikwa'k'øyidøø; winets ñøjkxtøø jam møj nøøjotp, jamts ñøbejty ja Etiopiit jaa'y.

³⁹ Kuts jam pyidsømdøø møj nøøjotp, jøts ja Espiritu Santo yiknøjkxøø abiky et ja Felipe, jøts ja Etiopiit jaa'y nika'ap ja t'uk'ejxnaa; jøts ja tyuu' tnøjkxnaa jotkujk.

⁴⁰ Jøts ja Felipe jap yja'aty ma kajp jap txøøwi Azoto. Kajp kajp idø'øn ja tkajpxwa'kxwidity sa dø'øn ja anmija'win ñitsok'att. Xjats ojts jap yja'tni ma kajp jap txøøwi Cesarea.

9

Ku ja Saulo tyiktigajch ja chinaa'yin

¹ Xjats ku ja jade'en, jødsyim ja Saulo tkidyimyja'dyigøø ja o'jkin, kuwani tyimdyanekwa'añ ja' pøn yjanchja'widip ja Jesús yja'. Paty ojts tniñijky ja teetywindson,

² jøts t'ats'amido'ot ja nøky ja tiy'ajtin. Ja'ats ja myinøjkxp jøts ja ttuk'ext ja teetyi pøn jam ttundip tsaptøjkjotp ma txøøwi Damasco, winets ja t'ixa'at pøni pøn ja Jesús yja' pyaduujnidip, jøts jam ja tyiknøjkxt kø'tsumy Jerusalén, wan tjaya'a'yi wan tjatø'øxyi.

³ Kuts jam yja'atwaañi Damasco, winets ojts jotmøn ja jaj ñawidityi midi kidakp tsajjipøtpty, janch tsamamp ja jaj.

⁴ Winets ja Saulo kyidaaay, jøts tmadøøy ja ayuujk ku ja yide'en wya'añ:

—Saulo, Saulo, ¿tiku ø xjemduñ xeduñ?

⁵ Xjats ja Saulo tyiktiy:

—¿Mbønims me teety idø'øn?

Jøts ja y'adsoojøø:

—Øts idø'øn Jesús, nay yø' midi mjemdumpy mdedumpy. Kø'øm me mnay'ayo'ondunñiyi jade'en kidi tsakaq ku ja ti tnepy, jøts ja kø'øm kujp ñadyukyø'ødyiyi.

⁶ Xjats ja Saulo yjanchmibejpxjknnaa ku jade'en yiknøjmi, jøts wyaañ:

—¿Tims me teety xamidsokp, ti ø ndu'ump?

Winets ja nwindson'ajtim ñimaajyøø:

—Pidø'øk jøts jam mnøjkxt kajpjotp, jamts myiktukmado'ot pøni ti mdu'ump.

⁷ Xjats ja Saulo yjamyøøt nayide'en yjanchø'jkidøø ku ja Saulo y'ayuujk ja jade'en tmdajidi, jøts ka'ap ja t'ejxtøø pøni pøn ja myigajpxy.

⁸ Winets jatyi ja Saulo pyidi'jky, jøts ku ja yjawin'ejxwa'kxy, ka'ap ja ti t'ejxpaaty. Winets ja myigu'uk y'ukwejtsniydøø, jøts ja yiknøjkxi Damasco.

⁹ Jamts chinaagy tigøøk xøøw jøts niti tka'ijxy, ni kyakay ni kya'uuky, niti tkatuñ.

¹⁰ Jamts idø'on tu'uk chinaamyi yaa'dyøjk pøn tjanchja'wip ja Jesús, Ananías, idø'on ja xyøøw, winets ja nwindson'ajtim ojts tñinijkxy ja Ananías, jøts ja tnimaay:

—iMets Ananías!

Xjats ja Ananías t'adsøøy:

—¿Ti, teety?

¹¹ Xjats nay jatyi ñimaajyøø:

—Pidø'øk jøts mnøjkxt ma ja tuu' yiktijy Tiidyuu', jøts ku jam mja'att Judas tyøjkwindum, jamts xyiknidøøwit ja Tarsit jaa'y midi txøøw'ajt Saulo. Dios'ajot'ajtp inet ja jam,

¹² jøts tø ja nayide'en tñijawi agumaa'gyøjxp, ku me mnøjkxt jøts ja wyin'ejxwa'kxkojmit wa'ats ku xkønixajt.

¹³ Kuts ja jade'en tmdøøy ja Ananías, jøts ja wyaañ:

—Janch namay, teety, idø'on ja jaa'y tø xukmadowdi ku yø Saulo tjanchjemduñ tjancht-eduñ ja pøn mets mjanchja'wiyip jam Jerusalén.

¹⁴ Ixyamts ja tø tñija'aty nay ya ja tiy'ajtin, midi ja teetywindsøn ja ojts t'amidøy jøts ja tyiktsoont midi me mbaduujniyip.

¹⁵ Winets ja nwindson'ajtim wyaañ:

—Nøjkx x'ats'ixy ja Saulo, tø øts ja nwi'ixy, nyiktunwampy øts ja', abikyajp øts ja ngaxwa'añ. Japts øts x'atsnigajpxt x'atsnimadya'akt, jøts ja ttukmado'ot ja jamit jaa'dyi møøt ja' wyindsøndøjkti jøts nayide'en ja ya'at israelit jaa'dyi.

¹⁶ Nduk'exp øts ndukmado'op øts sudso jawyeen tyu'unt, jøts kuwani nayide'en tmi'ayo'ot øts ngajpxy øts n'ayuujk ku ja jaa'y yjemdunit tyedunit.

¹⁷ Xjats ja Ananías ojts tñinijkxy ja Saulo. Kuts ja yja'jty, jøts ja ja'ayi ojts tkønixajy jøts yide'en tnimaay:

—Migu'uk Saulo, øts tø xkexy ja nwindson'ajtim Jesús, nay ja' midi ojts x'ixy jam tuu'am, ja'ats øts tø xkexy jøts me nyikwin'ejxwa'kxt jadigojk, jøts ja Espiritu Santo nayide'en mdatøjkiniyit.

¹⁸ Xjats jotmøn kya'ay wyeengøjxp jade'en ajtp ja t'ixy ejximi ajkx jimeeñin, winets wyin'ejxpjky jadigojk. Xjats ja Saulo pyidøknaa, jøts ojts ñøbety.

¹⁹ Jøts ja jadigojk kyaabyjky, winetnims ja myøjaaw tpjiky, jøts jap yja'aktsinaay ja majtsk xøøw ja tigøøk xøøw møøt ja' pøn tjanchja'widip ja Jesús jam Damasco.

Ku kyajpxwa'kxy ja Saulo jam Damasco

²⁰ Xjats ja Saulo tkajpxwa'kxnibøjkøø jam tsaptøjkjotp, yide'en ja wyaañ ku ja Jesús y'U'nk'aty ja Dios Teety.

²¹ Xjats ja ñigyumaap tjanchja'widøø pøn jatyi ja jam patmadojiyøø, jøts ja xem yam ñagyajpxidøø, jøts yide'en ñawya'añidøø:

—¿Kidi nay ja jaa'yip yø' midi jam Jerusalén y'ijty tkamaa'kxp ja myigu'uk ku ja tpabøkti ja Jesús? ¿Kidi ja'ajip yø tø t'uknimiñ jøts tmajtsmukøxt ja Jesús yjanchja'wibidi, jøts ttawinguwaawit ja møj tiidyumbidi?

²² Xjats ja Saulo jinaxy yjaaktyimkyajpxwa'kxy, jøts ja yikxon tyimñigajpxy jøts ku ja Jesús ya tø yjanchyikexy yiknitsokpi, jøts ja israelit jaa'y jadi'iñi myondi y'ookti pøn jatyi jam wyinaty tsinaadyip Damasco, niti kajpxy niti ayuujk ja'adi.

Ku ja Saulo ayu'uch kyeejky

²³ Xjats kyimjekñim ja israelit jaa'y tkajpxy'ajtnidøø jøts ja tyik'ooktit ja Saulo;

²⁴ jatyi Saulo ja tñija'wiyi'iñ. Winxøøw windsuu ja myidsep y'awe'j'ityi ma pidsømdaajk jam, jamts ja tyimyk'oogiyit.

²⁵ Winets ja Saulo ja myigu'uktøjkti pyktaajkiyøø kachjotpy jøts ttanikiñaxti ja pøch midi nawidity tukajpaa', jøts nika'ap jam ja pyidsimy ma ja myidsep y'awijxyi, paty idø'on ja kya'ø'jky.

Ku ja Saulo jam yja'jty Jerusalén

²⁶ Xjats ku ja Saulo jam yja'jty Jerusalén, jøts ja tñinamyukwa'añi pøn ja Jesús tjanchja'widip. Janchtsø'jkidipts ja', kumi ka'ap ja tjanchjawidi jøts kudam ja Saulo nayide'en tjanchjawiji ja Jesús.

²⁷ Paty idø'øn ja Bernabé wyajiyøø, jøts ttukwinguwa'jkøø ja Jesús kyudanaabyidi. Jøts nay ja' ttukmadoow sudso wyinaty tø t'ixy ja Jesús jam tuu'am, jøts nayide'en sa ja myigajpxiyøø, jøts nayide'en ja ttukmadøø sa ja ojts jam jotmøk tkajpxwa'kxy ja y'ayuujk Jesús køjxp.

²⁸ Xjats ja Saulo jam jade'en tyaañ Jerusalén, jøts ja møøt wyidejtni pøn jaty ja Jesús yja' pyadundip.

²⁹ Jøts ja ka' ti tkumajjawi, jotkujk ja tkajpxwa'kxi ja nwindson'ajtim yja', jøts ja ttamimadya'aky ja israelit jaa'dyi pøn ja griegit ayuujk tkajpxtip; yikxon ja ñadyawingugajpxiyidi ku ja ja xe ja ya tum jade'en kyanagyupijkyiyidi ja wyinnaa'ñ, ja'ats ja israelit jaa'y ñiwinmaa'ayidip jøts ja tyik'ooktit.

³⁰ Xjats ku ja myigu'uk jade'en tñija'widøø, winets ja yikwaanaa jøts yiknøjkxyiyøø jam Cesareit kajjotp, jøts yikejxñim jøts ja ñjøkxt kyajpkijxpy midi txøøwip Tarso.

³¹ Xjats ja janchja'wibidi pøn jaty tsinaadyip jam etjotp midi yiktejp Judea, Galilea, jøts Samaria, nekim ja jam chinaañidi, jøts ñija'wi'adøjtsidip ja Jesús yja' ja'adi. Jøts juuni ja tka'ukwindsø'øgidi, ejtp ja twindsø'øgidi jøts namay'adøtstip ja nayide'en, ja Espíritu Santo ja amuum pudøjkiyidip.

Ku ja Eneas chøøjky

³² Xjats ku ja Pedro wyinaty t'ayø'øy ma jaty ja janchja'wibi chøønidi, nayide'en ojts t'ixy ja janchja'wibi pøn jam tsinaadyip ma ja kajp txøøwi Lida.

³³ Jamts tu'uk tpaajty ja yaa'dyøjk midi txøøw'ajt Eneas, tyuktujk jumøjtjp ja pa'am ja wyinaty tø pyajtniyyi, kyidyimpyidi'iky jøts køxuxyi pakxuxyi pa'am idø'øn ja myøøt.

³⁴ Xjats ja Pedro ja tñimaay:

—Eneas, Jesús myiktsojkip. Pidø'øk, wejtsjø'øk yø mmaabajt.

Xjats ja Eneas pyidi'iky jaty,

³⁵ xjats niduki'iyi ja jaa'dyi pøn jaty kugajp'ajttip jam Lida jøts jam Sarón kuuyi ja tñija'widøø, winets ja tyikutigøødyi ja møjaa'chinaa'yin midi ja wyinaty chinaadyip, jøts ja nwindson'ajtim yja' tpaøjkniiyidøø.

Ku ja Dorcas yjuykpyiky jadigojk

³⁶ Nay ja'abi xøøw nay ja'abi jumøjt idø'øn chinaay tu'uk ja tø'oxyøjk jam Jopit kajjotp, Tabita dø'øn ja xyøøw, yide'en yiktij griegit ayuujk, Dorcas. Jøts nayi Jesús idø'øn ja yjanchja'wimyip paty ja tjanchpudøki pøn ayoop pøn winmaapy.

³⁷ Winetsik idø'øn ja pa'am pyaajtniyyaa jøts ja tyimyk'o'jkiiyøø; jøts ku yikpujnaa, jøts ojts yikpikta'aky myiduknipatøjkixpy.

³⁸ Xjats kumi wingonts ja kajp midi txøøw'ajtp Lida, ma jap wyinaty ja Pedro t'ayø'øy ja myigu'uktøjkti, jøts kumi tø ja wyinaty ja Dorcas myigu'uk tñijawidi ku ja jam wyidity, winets ja ñagyaxidøø namajtsk jøts ja t'atstukmado'odit ja Pedro jøts mye'ent putyi.

³⁹ Xjats ja Pedro jaty t møødi ja kugajpxtyi. Ku jam yja'ttøø, jøts jap tyimwyaanøjkxyiyøø ma ja oo'kpi jap, winets ja Pedro ja ku'øktø'øxtyi ñawa'kwidejtiyøø, jøts ja tyuk'ijxyi ja wet midi wyinaty ja Dorcas tø tyik'øyi.

⁴⁰ Winets ja Pedro tkajxpidsømguixy ja jaa'dyi, jøts ja ñagyuxendyaajkøø, jøts kuts ja twindsapkaajpxkixy ja oo'kpi, xjats ja tñimaay:

—Tabita, pidø'øk.

Winets ja oo'kpi wyin'eixwa'kxy jøts ja Pedro yikwin'ixy, winets chinaagyukøø.

⁴¹ Jøts ja kyø' ja tmajtstøø jøts ja jade'en pyidi'jky; winetnømts ja twaadsøø ja Pedro ja myigu'ukti midi ja kyaxpidsøøm jøts nayide'en ja ku'øktø'øxtyi, xjats ja twin'ejxtøø, tødäm yjuykpyiky ja oo'kpi wyinaty.

⁴² Nija'wigyøxtøø niduki'iyi ja Jopit kajp jaa'y, xjats namay tjanchja'widøø ja Jesús.

⁴³ Nay jam idø'øn ja Pedro tyaa'ni kawinaak xøøw jam po'ogoo'tspi tyøjkwindump, ja' idø'øn ja xyøøw Simón.

10

Ku ja Pedro tmigajpxy ja soldadi windson pøn yiktejp Cornelio

¹ Jam idø'øn tu'uk y'ijty ja yaa'dyøjk ma kajp jam txøøwi Cesarea, Cornelio dø'øn ja xyøøw, ja'ats idø'øn ja soldadi tukupky tñiwindsøn'ajtp pøn yikxøømøødyøø Italiáni.

² Xjats ja Cornelio møøt ja y'u'nk møøt ja ñidø'øxy, yjanchja'myatstip idø'øn ja Dios Teety ja', jøts nayide'en twindsø'øgidi. Ajot'ajttip idø'øn ja Dios jabom jabom, jøts nayide'en tjanchtabudøjkidøø ja myeeñ ja ayooobi jaa'y.

³ Tu'uk idø'øn ja xøøw sa yjajty sa kyubejty ja Cornelio, ku ojts wa'ats t'ixy awinmaa'ngyøjxp ja Dios Teety y'ankilis, tigøøk yaxpin idø'øn wyinaty ku ojts ñidøkiyi ma ja jap wyinaty, winets ja xøøw ja tyamigajpxiyøø:

—iMets Cornelio!

⁴ Winets ja Cornelio tsø'øgijawi twin'ixy, jøts t'adsøøy:

—¿Ti, teety?

Xjats ja ankilis ojts ñii'mxyiyi:

—Tø ja Dios Teety ja m'ajot'ajtm mgupøjkxiyi, jøts ku tø xpudøki nayide'en ja ayooobi jaa'dyi.

⁵ Kax mgugajpxy jøts jam ñøjxktit Jope, wan ja Simón t'atswawdi pøn nayide'en yiktejp Pedro.

⁶ Jam ja myidsøøni po'ogoo'tspi wyindump pøn yiktejmip nayi Simón, pøn jam tsinaapy mejy wingon. Ja'ats mdukmadoowiyip pøni ti mdu'ump.

⁷ Xjats ku ja ankilis ñøjxnaa, winets ja Cornelio twaadsøøy ja tyumbi namajtsk. Wyaadssoow nayide'en ja soldadi tu'uk pøn ja møøt ñamyayi, jøts pøn nayide'en twindsø'jkip ja Dios Teety.

⁸ Xjats ja ttukmadoogixy ja kyugajpxtyi sã jaty ja ankilis ja wyinaty tø ñii'mxyiyi, winetnimts tkejxy.

⁹ Xjats ku kyimjabom'ajty, jawaani jam kyaja'tnidi kajpjoetp ma ja yikaxtøø kuga-jpxy'ajtpi, winets ja Pedro pyeety jam tøjkøjxp dios'ajot'ajtpi, kujk xøøw et idø'on wyinaty.

¹⁰ Janch yu'oo'knip idø'on ja wyinaty jøts ja kyaawya'añ; japnimts ja kaaky wyinaty y'øyi, ku jotmøn t'ejxpaajty jade'en kidi jaa'y kyumaa'y,

¹¹ ku ja tsajp y'awa'ach jøts t'ixy ñaxkida'aky, jade'en ja t'ixy kidim ja møj manti, jøts tum wendi maktaxk iskiin.

¹² Jøts jam mantikøjxp mayjøøjp ja jiyujk t'ixy, jam ja tsaa'ñ, jam ja joon, jøts jam nayide'en ja maktaxkpi tekpyi jiyujk.

¹³ Winets tmadøøy ja ayuujk midi tsoo'mp tsajpjøtpy, jøts ja yide'en ñii'mxyi:

—Pidø'øk Pedro, yik'ook inet yø jiyujk tu'uk jøts xtsu'utst.

¹⁴ Xjats ja Pedro t'adsøøy:

—Ka' teety jade'en; niwindii øts jade'en ngatsu'uch ja kya'øybi kyawa'atspi, midi kapaat'ajtiyip yiktsu'utst sam ja Moisés kyutujuk.

¹⁵ Xjats jadigojk tmadøøy ja kajpxy ja ayuujk, jøts wya'añ:

—Kidi jade'en xka'ødyiyi, tum mbaat'ajtip yø jiyujk tsu'uch midi Dios Teety tø ttanibiktaagi.

¹⁶ Tigøøk ojk idø'on ja manti wyimbijty y'adijy, jøts pyatøjkiñaa nay jap tsajpjøtpy.

¹⁷ Ixjam ja Pedro jade'en wyinaty myay tyajy, ti dø'on ja tyijpy jade'en midi wyinaty tø t'ixy ku ja Cornelio kyugajpxy yja'ttøø, tø ja wyinaty tyiknidøøwidi ja Simón tyøjk.

¹⁸ Kuts ja jam yja'ttøø tø'agi'py, winets møk tkugajpxidøø pøni jap ja Simón midi nayide'en yiktejp Pedro.

¹⁹ Kumi ja' wyinaty ja Pedro myimaapy myidajpñim midi wyinaty tø t'ixy, winets ja Espiritu Santo ñimaajyøø:

—Nidigøøk ixyam ja jaa'y m'ixa'ayiyi.

²⁰ Pidø'øk, winak jøts xmøødit yø jaa'y, kidi ti xpawinmay, nay øts yø' ngugajpxy.

²¹ Xjats ja Pedro tniwinajky ma wyinaty ja Cornelio kyugajpxy y'awejxti, jøts ja tñimaay:

—Øts meets idø'on x'ixaapy. ¿Ti dø'on mnimendip?

²² Xjats ja kugajpxy t'adsoodøø:

—Ja Cornelio øø xyikugajpxy'ajtp, janch øy jaa'y ja' jøts nayi wyindsø'jkip ja Dios ja', xjats nayide'en janch tsojkip ja' ja israelit jaa'dyi. Nay ja Dios Teety idø'on y'ankilis ja tñimaajyøø jøts me myikwa'at, jøts jam njaa'mint ma ja chøøni ja Cornelio, jamts mets x'atstukmado'ot pøni ti jaty me mnija'wip, jøts ti jaty mmadya'akwampy.

²³ Xjats ja Pedro tkuwaa'wiñaa tyøjkjøtpy, jøts jamyi myaadøø. Xjats ja kyimjabomnim choo'ndøø, winets ja Pedro twaay ja myijanchja'wibi wiñaagin midi jam Jope tsinaadyip.

²⁴ Jøtsnim kyimjabom yja'ttøø jam Cesarea, ma ja Cornelio y'awijxyiyi niduki'iyi møøt ja myigu'uktøjkti, midi wyinaty tø twaadsowdi jøts ja tpatmado'odit ja Pedro kyajpxy y'ayuujk.

²⁵ Kuts ja jam tyimyja'ttøø ja Pedro, xjats ja Cornelio y'adsoojyøø jøts ja pyidsimy tyøjkjøtpy, xjats ja jaty ñagyuxendyaajki ja Pedro wyingujky, jøts ja jade'en yikwindsø'øgi ejxim ja diosin.

²⁶ Winets ja Pedro jaty twejtji'iky, yide'en ja wyaañ:

—¿Tiku ø xwinguxaani? Pidø'øk, pø nay jaa'yts øts nayide'en sã mets.

²⁷ Jøts nay madyaktipnim idø'on ja wyinaty, ku jap tyøjkidøø tøjkjøtpy ma wyinaty ja jaa'y jap yjanch'awejxti namay.

²⁸ Xjats ja Pedro tñimaay yide'en:

—Meets migu'uktøjkti, mnija'wip meets jøts ku øøts wenk n'israelitjaa'yaty, ka'ap øøts n'øyjawi jøts øøts nmigu'uk tmøøtnabyaattit ja wenk jaa'dyi uk tyøkidit ja' tyøjkjøtpi, ka'ap

øøts ja n'ødyijy, ka'ap øøts ja nwa'atstijy. Tøts øts Dios xuknijawi, jøts ku ka'ap jade'en y'øyi jøts øts jade'en nwinma'aty.

²⁹ Ja'agøjxp ø nmiñ jatyi ku mee xwaadsøø. Jøts nnijawiwypamy øts ixyam ti meets idø'øn xamigajpxwamp ku meets xwaadsøø.

³⁰ Xjats ja Cornelio t'adsøø, yide'en ja tnimaay:

—Ixym myimaktaxk xøøwiñ ku øts yide'en njajty, ya øts wyinaty ndøjkjøjty n'ayuu'aty, jøts ja Dios wyinaty n'ajot'aty winakxyøøw, ku øts jotmøn n'ejxpaajty tu'uk ja yaa'dyøjk, jøts janch tsamamp ja wyet amuum kyaxi'i'ky.

³¹ Winets øts yide'en xnimaay: “Mets Cornelio, tø ja Dios Teety ja mdios'ajot'ajtin mgupijkyiyi, jøts ku tø xpudøki nayide'en ja ayooobi jaa'dyi.

³² Kax mgugajpxy jøts jam ñøjkxt Jope, wan ja Simón t'atsway pøn nayide'en yiktejp Pedro. Jam ja myidsøøni ja po'ogoo'tspi wyindump midi jam tsinaapy mejy wingon. Ja'ats mdukmadowiyip pøni ti mdu'ump.” Jade'en øts idø'øn ja ankilis xnimaay.

³³ Paty øts ngugajpxy jatyi nguejxy jøts me m'atsyikwa'at, pø janch øy ku tø xpaduñ ku tø nmiñ ya. Wa'ats ja Dios Teety x'ijxyim xnija'wa'am ku adøm ixyaadi, ku øø nbatmadoowa'añ ja nwindson'ajtim kyajpxy y'ayuujk midi ja tø mdamigaxiyi, jøts mets ja ya jade'en xnigajpxt.

Ku ja Pedro kyajpxwa'kxy jam Cornelio tyøjkwindump

³⁴ Winets ja Pedro kyajpxnibøjkøø, jøts ja yide'en wyaañ:

—Ixym njanch'ixy njanchnijawi ku ja Dios Teety chøjkpy ja' øpyønjaa'yi, ka'ap ja' tka'øyjawi,

³⁵ kyupijky ja' pøni pøn windsø'jkiiy, jøts y'øyjaa'y'attit nayide'en.

³⁶ Dios Teety idø'øn jade'en ojts ttukmadøy ja Israelit jaa'y, ku xmi'øy'atwa'añindi jadigojk ja Jesucristo køjxp pøn nwindson'ajtyindip niduki'iyi.

³⁷ Pø nnija'wipxi meets niduki'iyi sã yajty sã kyubejty jam israelit jaa'y y'etjotpti, jam idø'øn cho'ondajky maøt t'xøøwi Galilea, tø wyinaty ja Juan Bautista jawyeen kyajpxwa'kxy, xjats ja jaa'y ja nayide'en namay tyiknøbejty.

³⁸ Ja pø nnija'wipxi meets nayide'en ku ja Dios Teety ja Jesús ttuktatøjkøø ja Espiritu Santo møøt ja myøk'ajtin, jøts nayide'en sã jaty ja wyidity ku ja t'ødyuñ ja jaa'y, jøts ku ja tyiktsø'øky pøni pøn ja miku' møøt y'itynim. Ja'agøjxp ja jade'en ttuun ku ja Dios Teety ja ejtp tmøø'tiy.

³⁹ Øøts idø'øn tø n'ixy, øøts idø'øn tø nnijawi, sã jaty ja Jesús ttuun jam Israelit kyamwemp kyamjotpti, jøts nayide'en jam Jerusalengit jaa'y myøjkajjotpti. Jøts nay tø øøts ja n'ixy sã jaty ja yajty ku yik'o'jküyøø ja jaa'y, jøts sã yikmätsumbejty jam kruskøjxp.

⁴⁰ Winets ja Dios Teety ojts kyidigøøk xøøw tyikpidsiimy jap oo'kpi jutjøjty mañjaxøjkøø ja Jesús, xjats øøts ja xukyikwingaxi'jky.

⁴¹ Ka'ap ja yiktuk'ejxtøø ja mayjaa'dyi, øøts yide'en yø xukyikwingaxi'jky, kumi tø øøts ja wyinaty jawyeen xwi'ixy, jøts øøts ja n'ext, jøts øøts ja nnijawit. Xjats ku ja jade'en jadigojk yjujkpyijky, jøts øøts ja ngaay jøts øøts ja n'uuky møøt.

⁴² Xjats øøts ja xani'ane'emy ja kajpxwa'kxk, jøts øøts ja jaa'y ndukmado'ot nduknijawit ku ja Dios Teety ja køøm tpiktaajky ja Jesús, jøts ja jujkpyi ja øøkpyi ttiidyu'unt.

⁴³ Nayide'en idø'øn wyinaty jekyip ja Dios Teety kyugajpxy tø tkajpxti tø tmadya'akti ja Jesús, jøts pøni pøn tjanchja'wip ja Jesús, winets yikmaa'kxuktit ja pyøky. Jade'en ja Pedro ja tnimaay ja jaa'y.

Ku ja Espiritu Santo ttatøjkøø pøn ka'israelit jaa'yidi

⁴⁴ Ñagyajpx'adøtsp wyinaty ja Pedro, ku ja Espiritu Santo tyatøjküyidøø niduki'iyi ja jaa'y pøn jaty jam wyinaty patmadojyiyip ja Pedro.

⁴⁵ Xjats ja israelit jaa'y pøn ja Pedro tpadsoo'niyidøø ku ojts ja kugajpxy jam wyayidi, winets ja ñigyumaap tjanchja'widøø ku ja Dios tyuktatøjküyidøø ja Espiritu Santo øpyønjaa'yi, pøn ka'ap israelitjaa'yidi.

⁴⁶ Ja'agøjxp idø'øn ja ojts yiknijawi ku ja adsu'jky ojts tjanchkajpxti tum ja wenk ayuujk, jøts ku ja nayide'en tjanch'øyja'widøø ja Dios.

⁴⁷ Xjats ja Pedro tnimaay ja myigu'uk midi myøøtwidijtpy:

—¿Ti pøn mibaat xkadukyiknøbajtim yø jaa'y, pø tøxi Espiritu Santo tyatøkiyidi jade'en sam adøm?

⁴⁸ Xjats ja Pedro tni'ane'jmy jøts ja ñøbattit ja nwindson'ajtim Jesucristo myøk'ajtingøjxp. Jøts ja Pedro møkt'a'aky yiknimaay, jøts ja jam yjaakta'anit ja winaak xøøwin.

11

Ku ja Pedro ttamimadyaajky ya'atpi ayuujk pøn tjanchja'widip ja Jesús jam Jerusalén

¹ Xjats ja tniĵa'widoo ja Jesús kyudanaabyidi pøn jam tandi Judeit y'etjotp, jøts ku ja wenk jaa'y wyinaty tø tkupiky ja Dios kyajpxy y'ayuujk pøn ka'ap y'israelitjaa'yidi.

² Xjats ku ja Pedro jadigojk wyimbijty jam Jerusalén, winets ja twindsø'odyoo ja Pedro:

³ —ĵTiku ja tø x'ats'ixy ja wenk jaa'y pøn ka' y'israelitjaa'yidi, tiku møøt tø m'atskay m'atsjääkxy?

⁴ Xjats ja Pedro tnmadyajktøjkøø sa ja yjajty sa ja kyubejty ku ja ojts yikway yikwich, jøts ja wyaañ:

⁵ —Jam ø wyinaty Jopit jaa'y kyajpjotp, jøts Dios'ajot'ajtpi wyinaty, jøts jade'en nĵa'wøø kidi ja jaa'y kyuma'ay, jade'en n'ejxpaajty ejxim ja møj manti, ku n'ixxy kyida'aky tsajpwemp tum wendi maktaxk iskiini, jøts wyingøøñ ma øts jap wyinaty.

⁶ Xjats nwin'ijxy yikxon ti dø'on jap mantijøtpy, winets jap n'ejxpaajty janch mayjøøjp ja jiyujk, jap wyinaty tsaa'ñ, jap wyinaty joon, jøts nayide'en ja jiyujk midi maktaxk ja tyeky, jøts nayide'en midi janch'awa'andi.

⁷ Winets nmadøøy ja ayuujk ku ø xnimaay: “Pido'øk, Pedro; yik'ook inet yø jiyujk tu'uk jøts xtsu'utst.”

⁸ Jøts ø n'adsøøy: “Ka' teety jade'en. Niwindii øts jade'en ngatsu'uch ja kya'øybi kyawa'atspi, midi kapaat'ajtyip yiktsu'utst sam ja Moisés kyutujkin.”

⁹ Winets øts jadigojk xmigajpxy jøts øts xnimaay: “Midi ja Dios tø tyikwa'ach kidi xka'ødyijy.”

¹⁰ Tigøøk ojk idø'on ja manti wyimbijty y'adijy, jøts pyatøjkiñaa nay jap tsajpjøtpy.

¹¹ Xjats ku øts jade'en nĵajty, winets nay jaty yja'ttøø nidigøøk ja yaa'dyøjktøø ma øts ja wyinaty, Cesarea dø'on ja choondi jøts jam ñøjkxti ma øts ja xpaattøø.

¹² Winets øts ja Espiritu Santo xnimaay jødsik øts ja kugajpxy nmøødidit, jøts ku nayide'en ka'ap ti nbawinma'aty. Winets ø xpado'ondi niduduujk ja Jopit jaa'dyi pøn tjanchĵa'widip ja Jesús. Xjats ku øøts jam nĵa'jty Cesarea, winets øø niduki'iyi ndøjkøø Cornelio tyøjkjotp pøn ø xnigajxøø.

¹³ Winets øøts ja xukmadøøy sa ja yjajty sa ja kyubejty jam tyøjkjotp, ku ja ankilis tu'uk t'ejxpaajty, jøts ku ja ñimaajyøø: “Kax mgugajpxy jøts jam ñøjkxt Jope, wan ja Simón t'atsway midi nayide'en yiktejp Pedro.

¹⁴ Ja'ats mdukmadowiyidip sudso m'anmija'win y'awa'atspidsø'ømdit møøt mmigu'uktøjkti.” Jade'en ojts ñii'mxyi.

¹⁵ Xjats ku ojts nmigajpxnibøki niduki'iyi, winets ja Espiritu Santo tyatøjkiyidøø, nayide'en sam adøm xatøjka'andøø ku ojts myiduk'ojk tyimyiñ.

¹⁶ Xjats ku øts jade'en n'ixxy, winets øts jaty nĵa'myejch ja nwindson'ajtim y'ayuujk sa ja wyaañ ku ja Juan Bautista mayjaa'y nøø ttuktanøbejty, jøts ku ja wyaañ: “Wenk mee mjatt, jade'en ku Espiritu Santo mdatøkiyidit.”

¹⁷ Pøni tyuktatøkiwampy ja Dios Teety ja y'Espiritu Santo ja wenk jaa'dyi jade'en sam adøm xuktatøjka'andøø, kumi adøm njanchĵa'windip ja Jesús, ĵti øts ja jade'en ngaduktunip? Tsaachtyi øts idø'on, pø kø'ømx i ja jade'en ttunwa'añ.

¹⁸ Ku ja jade'en tmadoodøø ja Pedro y'ayuujk, winets y'amongøjxtøø jøts yjotkujk'ajttøø, jøts ja Dios Teety tmøjpktaajktøø, jøts yide'en wyaandøø:

—ĵTø ja Dios Teety ttanibiktäägi jøts nayide'en yikunuu'kxtit øpyønĵaa'yi ku ja tmajt-stu'uttit ja kya'ødyunk, winets ja tsinaa'yin xemikøjxp tpaattit!

Ku ja jaa'y ja Jesús tjanchĵa'wi'okwa'añ jam Antioquia

¹⁹ Ku ja Esteban t'ukyik'oo'ktøø, winets t'ixaañibøjkidøø pøn ja Jesús tjanchĵa'widip, xjats ja winaagin kyaknøjktøø Fenicia, Chipre, jøts nayide'en Antioquia. Japts ja tkajpxwa'kxtøø ja øgyajpxy ja ømyadya'aky. Ka'ap ja nugo aja'wi tndyukmadowdi o pøn, agø'ømyi ja tnadyamimadya'agyidi tuk'israelit jaa'dyi.

²⁰ Xjats winaagin ja'adi midi jam tsoo'ndip Chipre jøts nayide'en Cirene, ku ja nay jam yja'ttøø Antioquia winets ja nayide'en tkajpxwa'kxtøø ja øgyajpxy ja ømyadya'aky, midi anmija'win tyiknitso'ok'ajtp, ja'ayi tyukmadoodip pøn ka'israelit jaa'dyi.

²¹ Janchkunuu'kxidi ja Dios ja' ku ja kyajpxwa'kxti, winets ja japiť jaa'y tjanchyiktatstøø chinaa'yindi, jøts ja nwindson'ajtim yja' tpabøjkiñidøø.

²² Xjats ku ja jade'en tniĵa'widøø ja Jesús yjanchĵa'wibidi pøn jam tsinaadyip Jerusalén, winets ja tkaxti nay ja' myigu'ukti pøn txøøw'ajt Bernabé, jøts jam ja ñijxy Antioquia.

²³ Xjats ku jam yja'jty, jøts ja t'ijxy jøts ja tniĵa'wøø sa ja Dios Teety wyinaty tø tkunuu'kxy ja Antioquiiť jaa'y ku ja chinaa'yin wyinaty tø tyiktatstøø, winets ja janch yjotkujk'ajty yjanchxondaajky. Xjats ja tkajpxjot'amøkøø jøts amumjoojt ja nwindson'ajtim yja' tpadu-ujnidit, jøts niĵuuni tkamajtstu'uttit.

²⁴ Janch yujy idø'on ja Bernabé, yjanchmøøt'ajtpy ja Espiritu Santo, jøts nayide'en ja Dios t'ajot'ajty. Xjats jade'en ja namay jaa'y tpabøjkidøø ja nwindson'ajtim yja'.

²⁵ Xjats ku ja jade'en yjajty kyubejty ja Bernabé, winets ja ñöjkkxojmaa mā txøøwi Tarso jøts ja t'ats'ixa'at ja Saulo. Kuts ja jam tpaajty, winets ja twaañijxxy mā ja wyinaty tø tñidsøøñ jam Antioquia.

²⁶ Japts chinaadyøø tu'uk jumøjt ka'pxy møøt ja janchja'wibidi jøts ja tyik'ixpøktøø. Nay jam idø'øñ Antioquia mā ojts ja Jesús yjanchja'wibi yiktejti mijawyeen cristianos.

²⁷ Nay ja'abi xøøw nay ja'abi jumøjt ku ja Dios Teety kyugajpxy ojts ñijxxy nay jam Antioquia, pøn jam tsoo'ndip Jerusalén.

²⁸ Xjats ku yja'ttøø, jøts tu'uk txøøwi Agabo, ja' idø'øñ jam ojts tyanaay'øyi mayjaa'y aguujp, jamts ja kyajpxwa'kxy Espiritu Santo myøk'ajtingøjxp, jøts wyaañ jøts ku ja yuu møk'ampy myeenwa'añ ya naxwiiñ. Janch tñy yide'en, janch jajt idø'øñ ja jade'en winet ku Claudio wyinaty myøjwindsøn'aty.

²⁹ Xjats ku ja jade'en ja janchja'wibi tmadoodøø ku ja yuu myenwa'añ, winets ja tkajpxy'ajttøø jøts pudøjkin ttanigaxtit ja myigu'uk pøn jam tsinaadyip Judea, jade'en pøni sa kø'øm tmo'owa'andi nidu'uk nidu'uk.

³⁰ Jade'en ja tundøø, jøts ja ttamigajxidøø ja Bernabé møøt ja Saulo, jøts jam tkømo'odit ja jamit møjaa'dyøjkti.

12

Ku ja Herodes tñankyik'o'jkøø ja Jacobo jøts ja Pedro ja'ayi yiktsumy

¹ Xjats nay ja'abi xøøw nay ja'abi jumøjt ja møj windsøn Herodes tjemdunibøjki tte-dunibøjki winaagin ja Jesús yjanchja'wibidi.

² Jøts ja ttukta'ø'jky ja yøñchujx ja Jacobo, ja Juan y'ajch,

³ jøts ja t'ijxy ku ja israelit jaa'y ja yjawi jade'en ttaxonda'akti ku ja jade'en y'adi'ich. Xjats ja Pedro yjaaktyimykmaajch paski xøøjøøjty, winet ku ja tsapkaaky jadi'iñi yikay mididi kalevadurimøøt.

⁴ Xjats ku jade'en ja Pedro yikmajch, winets ja windsøn Herodes ja pyiktaajkiyøø puxøjkjøtpy, japts soldadi ja y'ejx'ityiyi maktaxk piky jøts maktaxk soldadi tukpiky jaty. Jade'en ja Herodes yjawanmaay jøts ja tyikpidsø'ømt ja Pedro paski xøøguixy, jøts ja mayjaa'y ttuk'ejxwa'añ ttuknijawiwya'añ.

⁵ Jap wyinaty ja Pedro tsumy, jøts nayide'en ejtp idø'øñ ja y'ejx'ityiyi ja soldadi, winets ja Jesús yjanchja'wibi tñ'amidowidi tñibøktsowidi ja Pedro amumjoojt, jøts ja ttukmadoodøø ja Dios.

Ku ja Dios Teety y'ankilis ojts tyik'awa'atspidsimy ja Pedro jap puxøjkjøtpy

⁶ Nay ja'abi tsuu ku wyinaty tyimbyaatwaañi ja kajpx'aats ku ja yikpidsømiyit jøts ja kajp jaa'y y'ejxit ñijawiyit, jøts jaakmaap jap wyinaty ja Pedro. Jap wyinaty adsow aduuk ja soldadi ñama'ayiyi, puxkadeen køxøch wyinaty ja Pedro, jøts nayide'en ja soldadi t'ejx'etti ja tøjk'aaw.

⁷ Winets jatyi ñimejnyøø ja nwindson'ajtim y'ankilis, jøts jap puxøjkjøtpy yjajpøjkijxy. Xjats ja Pedro yikjijxy jøts ku tyikniwijy, winets tñimaay yide'en:

—Pidø'øk putyi.

Kuts ja pyidi'iky jøts ja kadeen jade'eñi kø'øm kyajnaa,

⁸ xjats ja ankilis ñimaajyiyøø yide'en:

—Nachumjønii yikxon, jøts tawa'agi yø mgø'øk.

Xjats ku ja Pedro jade'en tpaduun, jøts ja ankilis yjaaknimaajyøø:

—Tatøki yø mxox jøts øts ix'oojk xpayø'øty.

⁹ Xjats ja Pedro ix'oojk tpadsoø'ñ ja ankilis, ni tkanijawi pø janch kajanch ku ja yik'awa'atspidsømwaañiyi. Jade'en jajtj ja tjawi ja Pedro kidi jaa'y kyuma'ay.

¹⁰ Xjats ku ja jade'en yiktsoo'niyøø ja ankilis, jøts jam ñaxti mā myidukpiky ja ejx'ejtpidi, jøts nayide'en twinaxti mā ja myimajtsk pikpyi ejx'ejtpidi, jøts jam yja'ttøø mā pux'agaj jam tuu' pa'am, winets ja pux'agaj kø'øm y'awaajch jøts pyidsømdøø. Xjats ku jade'en y'awa'atspidsømdøø, jøts yjaagyø'dyidi jadu'ukpi tuu', japniints ja Pedro ojts yikmajtsu'uty nadyu'uk.

¹¹ Xjats ja tjanchja'wøø ku ja y'awa'atspidsiimy, jøts yide'en wyaañ:

—Pø janch jade'endamxi dø'øñ ku ja nwindson'ajtim tø tjanchkexy ja y'ankilis jøts øts ja xyik'awa'atspidsø'ømt jap puxøjkjøtpy, jøts ja israelit jaa'y møøt ja wyindsøn Herodes jade'en tø xkamimajada'akti pøni sa øts ja' xtyimyya'uktunwa'andi.

¹² Jade'en ja Pedro wyinmay, xjats ja ñijxxy jam Maria tyøkwindum mididi ja Juan tyaaqip, ja Juan mididi nayi yikxøømmøøpy Marcos. Ja' idø'øñ ja tyaak tyøkwindum ñijxxy ja Pedro mā ja mayjaa'y jam wyinaty tø ñamyukyidi, jøts idø'øñ ja jam Dios'ajot'atti.

¹³ Kuts ja Pedro twingøjxy ja tøk'agi'pyit agaj, winets ja kiixy Rode pyidsiimy tyøjkjøtpy, jøts ja ojts tpatmadøp pøni pøn ja'.

¹⁴ Xjats ku ja ojts tyukmadøy kudam ja Pedro kyajpxy, nika'ap ja tøjtk tyik'awaajch, janch jotkujk ja wyimbijty yukwөөñ chapwөөñ, jøts ja myigu'uk ja t'atstukmado'ot ku ja Pedro jap kyajpxy.

¹⁵ Xjats ja myigu'uk ñimaajiyiyøø:

—iPø mguma'aymadyakp mets!

Jøts ja kiixy ja tyimyanimaay ku ja tyimdyiy tyimyanchi. Xjats ja ka'ap tyimyibøkti tyimwyandip ja':

—iKa'ap inet yø yja'aji; pø ja y'ankilis yø' midi nitanaajiyiyip!

¹⁶ Ixap ja Pedro jøp'ijxy tyøkwingøxy. Jøts ku ja tyik'awatstøø ja tøjka'aw, jøts pø ma ja tyimyjaj'ttøø ku ja twingu'ejxidøø jøts kudam ja yjanchja'aji.

¹⁷ Ja'ayi ja Pedro ja kyø' tñanky'ejxøø jøts ja tukween y'ettit amøñi, winets ja tñimadyajknibøjkøø sa ja yjajty sa ja kyubejty ku ja nwindson'ajtim ojts yjuudyi jap puxøjkjøtpy; xjats ja nayide'en t'uknimaanaa jøts ja ttukmado'odit ja Jacobo, nayide'en ja Jesús yjanchja'wibidi, jøts ja tñijawidit.

Xjats ku jade'en t'uknigajpxkøxnnaa, winets ja choo'naa jøts ja ñijky abikyajp.

¹⁸ Xjats ku kyimjabom'ajty ku xyijñøø, winets ja soldadi ñigyumaap ñayja'wiyidøø ku ka'ap ja Pedro jap ukpøni.

¹⁹ Xjats ja Herodes møk pyagajxiyidøø jøts ja t'ats'ixa'adit, ka'ats ja ma t'ukpaatnidøø. Xjats ja Herodes wyaadsojijyidøø niduki'iyi jøts ja tyuknigajpxwa'añidi sudso'ampy ja Pedro pyidsimy, winets ja Herodes ja yik'oo'kiñidøø. Xjats ku ja jade'en y'adijch, winets jam choo'naa Judeit y'etjotp, jøts ñøjknnaa tsinaabyi jam Cesarea.

Ku ja Herodes yø'jky

²⁰ Xjats ja møj windsøn Herodes janch mi'ajkip ja jaa'y ja' pøñ jam tsinaadyip Tiro jøts nayide'en Sidon. Xjats ja Tiro t'aa'y møøt ja Sidongit jaa'y tkajpxy'ajtnidøø sudso ttu'undit sudso tyaa'byaattit. Winets ja kyugajpxy tkajxtøø jøts ojts tpaatti ja Herodes kyudsinaabyi pøn txøow'ajt Blasto, ja'ats ojts tñøjmidi jøts tñøjmit ja wyindsøn Herodes, jøts ka'ap cheptu'undit jøts jotkujk chøønidit, ja'agøjxp ja jade'en tñimaadyøø ku ja yji'kxy jam tjuydi tkajpxti ma Herodes yikutuky.

²¹ Xjats ja Herodes twaaadsøøy ja namayjaa'y, jøts jap mye'endit ma kya'amaadyaajk, xjats ku ja jade'en myengøjxtøø ja jaa'y, winets ja ttatøjki ja xyox midi amuum tsamamp, winets kyajpxwa'kxnibøjkøø jam mayjaa'y wyingujkp.

²² Xjats ja mayjaa'y jade'en ñigyumaap tjanchja'widi ku ja jade'en kyajpxwa'kxy, jøts ja xem yam møk yjanchnøømdi:

—Yø' ixja kyajpxwa'kxy ka'ap yø yjaa'yi, dios yø'.

²³ Xjats ku jap wyinaty kyajpxwa'kxy, winets ojts jaty ja nwindson'ajtim y'ankilis yikpa'ambaadyiyi, ja'agøjxp jade'en jyaty ku kø'øm ñamyjøpikta'agyiyi, jøts ku ja Dios ne'egi tkamjøpikta'aky. Ku ja jade'en pyiky, tñø'øk idø'øn jam y'am yjotp tøjkiñaa, ja'ats jadi'iñi tsu'tskøjxniyøø.

²⁴ Winets ja nwindson'ajtim y'ayuujk myøjtak'adøtsnaa, yikajpxwa'kx ja omagajp.

²⁵ Xjats ku ja jade'en tyungøjxtøø ja Bernabé møøt ja Saulo, ku ja tminaxti tmidøkidi ja pudøjkin, winets ja jap choo'nidøø jøts ñøjknidøø Jerusalén møøt ja Juan midi nayide'en yiktejp Marcos.

13

Ku ja Bernabé møøt ja Saulo myiduk'ojk choo'ndøø kajpxwa'kxpi

¹ Jam Antioquia wyinaty namay ja Jesús yjanchja'wibidi, jam ja kyugajpxy'ajtpi jøts nay jam ja yik'ixpøjkpidi. Yaa'at idø'øn jade'en yiktejtjip Bernabé, jøts ja Simón (midi nayide'en yiktejp Negro), nayide'en ja Lucio ja Cirenit jaa'y, jam ja Manaén (midi yaakti tuknax møøt ja Herodes midi windsøn'ajt jam Galilea) jøts jam nayide'en ja Saulo.

² Tu'ukpi xøøw idø'øn ya'at jaa'y jade'en ñamyjukidøø jøts ja nwindson'ajtim twindsø'jkidøø, ayuu'ajttip idø'øn wyinaty ku ja Espiritu Santo wyaañ:

—jigaxti yø Bernabé møøt yø Saulo, jøts ttu'undit midi øts yø tø ndaniwaa'dsowidi.

³ Xjats ku jade'en Dios'ajot'ajt'abajtidøø ayuu, xjats ja myigu'uk t'ukønixajkøjxnidøø, winets ja yikajxtsoo'nidøø.

Ku ja Jesús kyudanaabyi kyajpxwa'kxtøø jam Chipre

⁴ Xjats ku jade'en ja Saulo møøt ja Bernabé yiktsoo'niñidøø ja Espiritu Santo, winets ñøjxtøø ma jam txøøwi Seleucia. Jamts ja barki ttatøjkidøø jøts ñøjxtøø jam Chipre.

⁵ Xjats ku jam yja'ttøø ma ja barki wya'k'øyyøø ma jam txøøwi Salamina, winets ja tkajpxwa'kxnibøjkidøø ja Dios kyajpxy jam tsaptøjkjøtp. Jøts nay jap ja Juan tmøødidi, ja'ats ja pudøjkiyidøø.

⁶ Xjats ja jade'en ja Chiprit naajx ttayø'øñaxtøø, jøts jam yja'ttøø mejy wingon ma txøøwi Pafos. Jamts pqaattøø tu'uk ja israelit jaa'y pøn txøøw'ajt Barjesús, yik'adujkp ja' jøts nayide'en xyimay. Dios idø'øn kyugajpxy ja ñadyijyi jøts ja jaa'y tjanchwin'iifi.

⁷ Jam idø'øn ja tyuñ møj windsøn wyindump pøn txøøw'ajt Sergio Paulo, janch wijy janch keje idø'øn ja windsøn. Winets ja tñigaxxøø ja Bernabé møøt ja Saulo, yjanchmadoowampy idø'øn ja' ja Dios kyajpxy y'ayuujk jøts ja tyukmadowiyit.

⁸ Xjats ja yik'adujkpi midy nayide'en yiktejp Elimas t'agajpxøø ja møj windsøn, ku ka'ap tkupøkt pøni sa wya'andi ja Bernabé møøt ja Saulo.

⁹ Xjats ja Saulo pøn nayide'en yiktejp Pablo, yjanchmøøt'ajtpy ja Espiritu Santo ja', paty ja tjanchwin'ijxy tiyim ja yik'adujkpi,

¹⁰ jøts ja yide'en tñimaay:

—iMets windaayibi jaa'y, kawindi yaa'y mets, miku' mdeedyip, mi'ajkip mets ja' pøn øy tsinaadyip! ¿Tiku xyikutigøøwya'añ ja nwindson'ajtim kyajpxy y'ayuujk?

¹¹ Ixyam idø'øn ja nwindson'ajtim myik'ayo'ombaadiyit; kunim me mda'ant winjoox jøts may xøøw idø'øn jade'en xkawin'ext ja xøøw.

Xjats tyimyjaty tyaañ jade'en kugoots, winets t'ixaay pøni pøn tuu'wetsiyip.

¹² Xjats ku ja jade'en t'ijxy ja møj windsøn sa ja yjajty sa ja kyubejty ja yik'adujkpi, winets ja jaty tjanchja'wøø pøni sa jaty ja tyukmadoojyøø ja Saulo møøt ja Bernabé. Janch tyimñigumaap idø'øn ja tja'wiyii'n ku ja yik'adujkpi jade'en yjajtnaa ja nwindson'ajtim Jesús myøk'ajtingøjxp.

Sa yjajttøø sa kyubajttøø ja Pablo møøt ja Bernabé jam Antioquia midy tãmp Pisidiit y'etjotp

¹³ Xjats ja Pablo møøt ja yjamyøøt jam tyøjkidøø Pafos barkijotp, jøts jam ja ñøjkxti ma txøøwi Perge, nay jam Panfilia y'etjotpti; jøts ja Juan jamyi ja tminawya'kxidøø Pafos jøts ja ñøjkxnaa Jerusalén.

¹⁴ Xjats ku jam ja jade'en yja'ttøø Perge, winet jam choo'ngoymidøø jøts yja'ttøø Antioquia, nay Pisidia y'etjotpti. Xjats poo'kxin xøøw winets tyøjkidøø jam tsaptøjkjotp, japts y'ixaktøø.

¹⁵ Xjats ku ja jade'en yikajpxkijxy ja nøky midy ja Dios kyutuujk myøøt, jøts nayide'en sa wyandøø ja Dios kyugajpxtyi, winets ja tsaptøjk windsøn ojts ñimaajyidi ja Pablo møøt ja yjamyøøt:

—Meets migu'uktøjkti, kidi wan meets jap xmimiñ xmija'aty ja kajpxwejin, kidi wan meets kukmadowandit yø jaa'y, tukmadowdits.

¹⁶ Winets ja Pablo tyanaagyukøø jøts ja kyø' ja'ayi tñanky'ijxyi, ja' tyijpy jøts ja jaa'y y'amo'ondit jøts tpatmado'odit, xjats ja yide'en wyaañ:

—Ukpatmadowdits meets Israelit jaa'y pøni pøn jaty ja Dios twindsø'jkidip:

¹⁷ Meets Israelit jaa'y niduki'iyyi pøn adøm ndios'ajtyindip, ja' ojts twi'ixy adøm n'apteety'amøjti jøts ja tpiaktakti adøm ndsinaadyaajkti janch møj, winet ja yjajty ku wyinaty nay jam chøøniidi Egiptit jaa'y y'etjotpti jade'en ejxim ja ja'at jaa'y; xjats ja møk'ampy jadigojk køøm ja Dios tyimiykpidisøøjmiyidøø nay jam,

¹⁸ jøts ja tyiknaxti jam tøøts etjotp wixijxy jumøjt, kuwañim ja Dios ja yikjujky'ajtidi øy ja tpadundi tkabadundi ja Dios y'ayuujk.

¹⁹ Jøts ja nayide'en tyikudigøøy wixujk ja møj kajp midy jam wyinaty ejttip ma txøøwi Canaán, jøts ja n'apteety'amøj yikmo'odit ja ñaajx.

²⁰ Xjats jade'en maktaxk magø'pxy jagujkp jumøjts ñitanaajyidøø kunim ja kugajpxy kyaxi'iky midy txøøw'ajt Samuel.

²¹ Xjats ja køøm t'amidoonidøø tu'uk ja windsøn pøn ja nitaniyidip, winets ja Dios tu'uk myøøjyidøø pøn txøøw'ajt Saúl, ja Cis y'u'nk, nay ja Benjamín y'ap, ja'ats wixijxy jumøjt ttuñ.

²² Winets ja Dios jadigojk pyøkiyøø ja windsøn'ajtk, jøts ja nagyøøm tpiaktaajk ja David, xjats ja Dios wyaañ: “Tø øts nbaaty ja David, midy ja Isai y'u'nk'ajtpy, yø' janch yuyj janch tuda'aky, xpaduujnip øts yø' nja' pøni sa ø ndsøky.”

²³ Xjats ja Dios nayide'en tñajtskajxøø ja Jesús midy adøm n'Israelit jaa'y tyiknitso'ok'atp, yø' idø'øn ja David myigu'uk'ajtpy, kuts ja Jesús myiñ pø køømxi wyinaty ja Dios tø wyanda'aky.

²⁴ Xjats ja Jesús namga'anim wyinaty tyundøki, winets ja Juan Bautista jawyeen tkajpxwa'kxy jøts ja Israelit jaa'y ttukmadøøy, jøts pyøkyu'unin tñajtstu'uttit jøts ñøbatkøxtit.

²⁵ Xjats ku ja Juan Bautista y'oo'knaa, tø ja wyinaty tñøjmi ja Israelit jaa'y, jøts ku ja ka'ap yja'aji pøni sa ja wyinaty tñijawidi ku ja yiknitsokpi myiñ, jøts ja tñimaay: “Ix'oojknim ja mye'ent pøn øts nijuuni møøt nganamyi'baat'atyiit.”

²⁶ Xjats ja Pablo yjaakajpxwa'kxy, yide'en ja wyaañ:

—Meets migu'uktøkkti, pøni pøn jaty ja Abraham myigu'uk'ajtpy, jøts nayide'en pøni pøn ja Dios twindsø'jkidip, yø kajpxy yø ayuujk yø' adøm ndanitsø'ok'ajtindip mididi øts ixyam nnigajpxwampy.

²⁷ Ukmadooda'am, ja' pøn jaty jam tsinaadyøø Jerusalén nayide'en pøn ja wyindsøn'ajttøø, ka'ap ja tnija'widøø ku ja Jesús wyinaty tø kyexyi ja Dios Teety, jøts kyidyimwyindadoodøø dø'øn ja kajpxy ja ayuujk mididi ja Dios kyugajpxy wyinaty tø tjaadya, ja' idø'øn xyumikajpxtip etjp ku ja poo'kxin xøøw jam kyø'øm tsaptøkjtøpti; winets idø'øn ja kø'øm ttami'ambøjktøø ja Jesús, jøts ja jade'en ttuundøø sa ja Dios kyugajpxy tyiktaañ ja ayuujk.

²⁸ Xjats ku ja kø'øm tkamiwinmaa'nbyaattøø ti ja tyukpøky'ajttip jøts tyik'ooktit, winets ja tniimaadyøø ja Pilato jøts ja Jesús tnankyik'oogyit.

²⁹ Xjats ku ja jade'en tundi tuki'iyi sa ja Dios kyugajpxy tjaadya, jøts jøts tyiknaxøjkiðøø.

³⁰ Ja Dios Teetyts øjts kø'øm tyikjujkyiky jadigojk jap oo'kpi jutjøtpy.

³¹ Xjats ku pyidsiimy, winets øjts jeky ñanky'ijxyiyi jam jaa'y wyindump mididi myøøtwidejt ku choo'ndøø Galilea jøts ñøjktøø Jerusalén. Ja' idø'øn ixyamdi pøn tkajpxtip tmadyaktip ja Jesús jøts ttukmado'odit ja jaa'y.

³² Jøts øøts nayide'en ixyam nnigajpxy nmimadya'aky, jøts meets ndukmado'ot ja øy ayuujk sa ja Dios Teety tpiktaajky ja wyandaajkin adøm n'apteety'amøjkajpxti.

³³ Ja'agøjxp ku adøm ja n'apteety'amøj'ajtyindi, paty ja tø tpaduñ ja Dios Teety ja wyanda'aky jøts ku ja tø tyikpidsimy jadigojk ja Jesús jap oo'kpi jutjøtpy, jade'en sam jap wya'añ myimajtsk salmojøtpy ku yide'en wyaañ: “Øts me n'u'nk'ajtpy, jøts tø mets mjujky'ajtin ixyam nmø'øy.”

³⁴ Xjats ja Dios jade'en wyinaty tø ttanibiktaagi jøts ku ja tyikpidsø'ømt ja Jesús jap oo'kpi jutjøtpy, jøts nayide'en ku ka'ap ja ñine'kx wyindigø'øty, jade'en idø'øn jap wya'añ ja Dios kyajpxy jap nøkyjøtpy: “Nayide'en meets ngunuu'kxt sa øts ja David tø nnøjmi.”

³⁵ Paty nayide'en jadu'ukpi salmo wya'añ: “Ka'ats me Dios Teety ja xyikjatt jade'en jøts øts nnine'kx wyindigø'øty, pø xtsøky'ajtpxi mets.”

³⁶ Janch tiy idø'øn ja' ku ja David ja yjaa'y øjts tpuðøki sa ja Dios ja wyinmaa'ñ myøøjyøø, xjats y'oo'knaa jøts nay jam ñajxøjkiyi'ñ ma ja y'apteety'amøj wyinaty tø ñajxøkiði, jøts ja ñine'kx nayide'en wyindigøø.

³⁷ Pønts ja Dios Teety kø'øm tø tyikjujkyiky jadigojk, ka'ap ja ñajxnine'kx ja jade'en tø wyindigøy.

³⁸ Meets migu'uktøkkti, kuwani xnijawidit ku ja Jesús ja' tu'ugyi xpojkipimaa'kxindip pøn meets ixyam myiktukmadoop.

³⁹ Ja'ayi dø'øn tu'umchi niduki'iyi tpojkpimaa'kxp pøni pøn ja janchja'wiyip ja y'ayuujk, jøts ni ja Moisés kyutujuk jade'en kyapojkpimee'kxy pøni pøn ja tpadump.

⁴⁰ Øyim mnay'eix'etidit jøts ka'ap jade'en mjattit sa ja Dios kyugajpxy tjaadyandøø, ku ja yide'en wyandøø:

⁴¹ Meets nixekpi taxekpidi, pø nigyumaap mee xjawit sa n'adø'øst;

pø ka' xjanchjawidit øy ja pøn kugajpxy mjadukmadøøyidi,

pø jade'en ne'egi jøts mdyimgyudigø'ødyit.

⁴² Xjats ja Pablo jade'en ttukmadoogijxy ja israelit jaa'y sa ja Dios kyajpxy wya'añ, winets ja myigu'uk jap tmøøtpidsømnaa jam tsaptøkjtøpt. Xjats ku jap pyidsømdøø, winets ja Pablo ñimaa'jyøø pøn ka'israelit jaa'dyi, jøts nayide'en tniagajpxt nay ja'abi ayuujk jadu'ukpi poo'kxin xøøw.

⁴³ Xjats idø'øn jade'en ñawya'kxiðøø jam tsaptøkjtøpt, jamts wyinaty namay ja israelit jaa'y, jøts namay ja abikpyi jaa'y mididi nayide'en tpadundip ja israelit chinaa'yin, ja'ats niduki'iyi tpanøjktøø ja Pablo ja Bernabé, winets ja øjts yikajpxwejt jøts yiknimaadyøø: “Ejtp idø'øn ja Dios kø'øm xtsøky'ajtyim paty ja Dios amumjøjt ja y'øgyajpxy xpaduujniyidit, jøts ni juuni xkamajtstu'uttit.”

⁴⁴ Xjats ku ja tpaatkojmaa jadu'ukpi poo'kxin xøøw, ku ja tjanchpatmadowa'andi ja Dios kyajpxy, winets jawaani kyameengijxy niduki'iyi ja kajp.

⁴⁵ Xjats ku dø'øn ja israelit jaa'y jade'en t'ejxtøø, winets ja Pablo yiktami'amø'at'ajttøø ja namay jaa'y jøts yikmi'ambøktøø, xjats yiknimaadyøø ku ja jaa'y nugo twindaay'atti.

⁴⁶ Xjats ja Pablo ja Bernabé møk'ampy øjts tniagajpxti, jøts tniimaadyøø:

—Meets israelit jaa'y, jade'en mjapaat'atyidi jøts meets jawyeen myiktukmado'ot ja Dios kyajpxy; ka'ats meets ja xkupøkwa'andi, jade'en nugo mwa'andi jøts ka' pyaat'atyidi jøts ja Dios y'øy'ajtin xkupøkiyidit, jam øøts ne'egi nøjx ngajpxwa'kxy ma jaty ja jaa'y kya'israelitjaa'yidi.

⁴⁷ Kumi jade'en øøts ja nwindsøn'ajtim tø x'ane'emy ku yide'en wyaañ:

Tø me nbikta'aky jøts øts n'øgyajpxy n'ø'yayuujk xukmado'ojit tuki'iyi ja naxwii'ñit jaa'y,

jøts xnijawidit sudso'ampy ñitso'ok'attit.

⁴⁸ Xjats ku dø'on jade'en tmadoodøø pøn ka'israelit jaa'dyi, winets ja yjanchxondaktøø jøts ñawya'añidi kudam ja Dios kyajpxy janch'øy; jøts niduki'iyi ja' tmbøjksøxtøø pøn wyinaty ja Dios kø'øm tø tpikta'aky, jøts nijuuni xøøw ja y'anmija'win kyawindigø'ødyit.

⁴⁹ Jade'en idø'on jam ojts yikajpxwa'kxy ja Dios kyajpxy ma jaty ja kajp jam.

⁵⁰ Xjats ja israelit jaa'dyi ojts møøt tkajpx'øyidi winaagin ja yaa'dyøjk midi ja kajp tnitanaadyip, jøts møøt nayide'en ja tøyøjki midi ja kajp jaa'y windsø'jkiyidip jøts midi ja israelit jaa'y tpaduujnidip ja yja', ja'ats ja kajp jaa'y yik'ambøjktøø, xjats ja Pablo ja Bernabé ojts yikjemdundi yiktedundi kunim ja tyikpidsømdøø ja'abi etjotp.

⁵¹ Winets ja Pablo møøt ja Bernabé twinaptøø ja pu'ux jam tyekyøjxp, jøts jade'en ttuk'ejxtit ku jade'embj jaa'y ja tka'øyjawidi, winets jam ñøjknidi ma ja kajp txøøwi Iconio.

⁵² Xjats ja Jesús yjanchja'wibi pøn jap Antioquia tyandøø, janch ejtni xoni ja ñayjawiyidi ku wyinaty tø tyatøkiyidi ja Espiritu Santo.

14

Sa yjajttøø sa kyubajttøø ja Pablo ja Bernabé jam Iconio

¹ Ku ja Pablo ja Bernabé jap yja'ttøø Iconio jøts jam tyøjkidøø tsaptøjktotp, winets ojts kyajpxwa'kxti møk'ampy jøts may tpabøjktøø, nayide'en ja israelit jaa'y jøts may pøn jaty jam wyinaty midi' ka' y'israelitjaa'yidi.

² Xjats ja israelit jaa'y pøn tkababøjktip ja Dios kyajpxy, ja'ats t'agajpxidøø pøn ka'israelit jaa'dyi jøts ja tyikwinmaamya'tni ja jaa'y pøn ja Jesús tjanchja'widip.

³ Paty ja ojts tyaa'nidi jeky'ampy ja Pablo møøt ja Bernabé, jøts ku ojts møk tkajpxwa'kxti sa ja Dios Teety ttamidøjky ja naxwii'ñit jaa'y, winets nay ja' myø'ajtin møyjyidip jøts milagri'ajtin ttu'undit jøts nayide'en ja ejxpajt tpikta'aktit, paty ja'agøjxp ojts yiknijawi kudam ja yjanchi midi ja kyajpxwa'kxtip, jøts kudam ja Dios Teety xjanchøjkyindi.

⁴ Jøts ja kajp jaa'y ka'ap ja wyinaty tu'ugyi ja wyinmaa'ndyi, jam wyinaty ja israelit jaa'y yja' jøts ja Jesús yja'ami. Majts jøøjp jap wyinaty ja wyinmaa'ndyi.

⁵ Jøts ja israelit jaa'y kajpxy tundøø møøt pøn ka'ap y'israelitjaa'yidi jøts ñøjksøxtøø ma ja kudunktøjk, jamts tkajpx'øyidøø møøt ja kudunk jøts tmi'ambøjktøø tpaga'atswidetwa'andøø ja Pablo møøt ja Bernabé.

⁶ Kuts ja Pablo ja jade'en tnija'widøø møøt ja Bernabé, xjats ja kyaknøjksøxtøø jam Listra jam Derbe, jade'en ja kajp xyøøw midi jam Licaonia etjotp tøndip, jøts wine'enin ja abikyajp jam ni'awidity midi jam abiky etjopti,

⁷ jamts ja tkajpxwa'kxti ja Dios y'øgyajpxy y'øy'ayuujk midi xyiknitso'ok'ajtindip.

Ku ja Pablo jam Listra yika'jch

⁸ Nay jam ma ja kajp txøøwi Listra, jamts wyinaty chøøni tu'uk ja yaa'dyøjk pakma'at midi wyinaty niwine'enin kyidyimyo'øpy, tyimyjade'en idø'on ja kye'jxy.

⁹ Jøts ja pakma'at jaa'y myadøøpy ja' tuki'iyi pøni sa ja Pablo tyikwa'añ, winets ja Pablo twin'ijxy ku yjawi t'ajot'aty ja pakma'at jaa'y ja Dios ku cho'okwa'añ.

¹⁰ Winets ojts møk tjanchmigajpxy jøts tnimaay:

—Tatani yø mdeky tiy.

Jøts ja yaa'dyøjk wya'kukøø tukwo'onji'igyj xjats jade'eñi yø'øbyijky.

¹¹ Jøts ja mayjaa'y t'ejxtøø ku ja Pablo jade'en tyiktsøøjky, winets ja jaa'y yjanchwangaktøø jøts wyandøø:

—iTø namajtsk ja Dios xjanchnigidaajkyindi nayide'en ejxim adøm njaa'y'ajtyim!

Tum ja Licaonit ayuujk kyajpxtíp.

¹² Xjats wyandaktøø ku Bernabé ja' Dios Júpter, jøts ja Pablo Dios Mercurio, ja'agøjxp ku ja kya'amay.

¹³ Xjats ja teety midi jam tump Júpter chaptøjktotp kajp'am, ja'ats ojts tyiknijky ja tsakaq namajtsk janch xøxy janch pijyi ma ja Pablo møøt ja Bernabé jam wyinatyi; yjanchtawindsø'øgiwyandip ja tsakaq, tyamiyoxwandip ja tsakaq kitu'uk.

¹⁴ Ku tnija'widøø ja Jesús kyudanaabyi ja Bernabé ja Pablo jøts yjotmay'oo'kpøknidøø, jøts ja wyet tkøø'tstøø waani ja'agøjxp ku jade'en yikwindsø'øgidi ejxim ja Diosin, winets tyøjkidøø mayjaa'y agujkp jøts møk yide'en wyandøø:

¹⁵ —iMigu'uktøjki! ¿Tiku jade'en m'adø'øtsti? Pø nay jaa'lyts øøts ejxim meedsin, yø' øø nnimimpy jøts mee ndukmado't jøts xmajtstu'uttit yø'øbi tunk, ka' yø tyuñ. Pabøjkidi Dios yja' pøn jujky'ajtp, pøn tuki'iyi tyik'øyi'yi'ñ ja tsajp jits ja naajx jøts ja mejy, tuki'iyi midi ja naxwiiñ ejtp.

¹⁶ Kuwani Dios Teety yujy'aty ku ja naxwii'ñit jaa'y ojts y'øy'adø'øtsti kya'øy'adø'øtsti.

¹⁷ Ejtp idø'øn ja Dios Teety ja ejxpajt tjayaky, jøts jade'en yiknijawit pøni pøn idø'øn ja' ku ja janch'øy. Ja'agøjxp idø'øn ja tuu tkejxy, jøts pyidsimy ja moojk ja xøjk mididi adøm ndajujky'ajtyim, jøts ejtni xoni nnayja'wandit.

¹⁸ Øy idø'øn ja mayjaa'y møk jyayiknimaadyi, ka' pøn tmadøøy, kuwani tyimyk'ookwa'andi ja tsakaa jøts ja Pablo møøt ja Bernabé jade'en yiktawindsø'øgiwya'andi ejxim ja Diosin.

¹⁹ Winets ja israelit jaa'y winaagin jam choo'ndøø Antioquia jøts Iconio, jøts jap yja'ttøø Lистра ma ja Pablo møøt ja Bernabé wyinaty. Ja'ats idø'øn ja kajp jaa'y t'agajpxidøø, winets ja kajp jaa'y y'ambøjktøø, jøts ja Pablo yikxon tsaagatstøø. Tyimwyandip idø'øn ja jaa'y jøts ku dø'øn ja wyinaty tø tyimyk'ookti, winets ja t'ukpawejtsnidøø, jøts ja kajp pa'am tyiknøjktøø.

²⁰ Winets ja jam ñamyujkidøø Pablo wyindump pøn tjanchja'widip ja Jesús, xjats ja Pablo pyidi'jky jøts wyimbijty jadigojk nay jam kajpjotp; winets kyimjabom choo'ndøø møøt ja Bernabé, jøts ñøjktøø ma kajp txøøwi Derbe.

²¹ Winets jam ojts tkajpxwä'kxti sudso'ampy ja Jesús xyiknitso'ok'ajntindit, ma ojts ñamayidi pøn ja Jesús yja' tmbøjktip, jøts ja Pablo ja Bernabé wyimbejtøø ma kajp txøøwi Lистра, Iconio jøts nayide'en Antioquia.

²² Ku ja Pablo møøt ja Bernabé jam yja'jty tu'uk tu'uk ja'abi kajp, winets tkajpxjot'amøjkidøø pøn jaty ja Jesús yjanchja'widip, jøts ku Jesús yja' tu'ugyi tpaduujnidit, nayide'en yiknimaadyøø kuwani ja ayo'on yikpaaty ku jap ndøkwiwya'änint ma Dios kyutujk, mididi ja naxwii'ñit jaa'y ja tyanitanaapy.

²³ Jøts ja Pablo møøt ja Bernabé nayide'en tpiktaktøø ja møjaa'dyøjk ma jaty ja tsaptøjk wyinaty, jøts ku ja wyinaty tø Dios'ajot'atti tø y'ayuu'atti, winets ja Dios ja ttagødøjkidøø jøts kyunuu'kxidit, pø tøxi ja wyinaty tjanchjawidi.

Ku ja Pablo møøt ja Bernabé yja'jty jadigojk Antioquia jam Siria etjotp

²⁴ Xjats ku ja ñajxtøø jam Pisidia etjotp, jøts ja yja'jttøø jam Panfilia etjotp.

²⁵ Ojts ja tkajpxwä'kxti ja Dios kyajpxy jam Perge kajpkøjxp, jødsnim ja ñøjktøø jam Atalia.

²⁶ Jamts ja ttatøjkidøø barki jøts ja ñøjktøø Antioquia, jam kajpkøjxp ma ja wyinaty tø yikugajpxaagidi tø yikunuu'kxaagidi, jøts Dios ja kyunuu'kxidit ku ja wyinaty jade'en ja tyunk tyikts'o'onda'akti mididi xyam wyinaty tø tyik'abajtiñidi.

²⁷ Jøts kuts ja jam Antioquia kajpkøjxp yja'jttøø, winets ja jam tñankñamyujkidøø pøn jaty ja Jesús tjanchja'widip jøts ja ttamimadyakøjxtøø sa jaty Dios ja wyinaty tø yikjatyidi yikubetyidi ku ja kyunuu'kxyidi, jøts ja nayide'en ttamimadyaktøø sa Dios wyinaty tø yik'awajtsixiyidi nøø' tuu' pøn ka'israelit jaa'dyi, jøts ja nayide'en ñitso'ok'attit ku ja tjanchjawidit ja nwindson'ajtim.

²⁸ Xjats ja Pablo jøts ja Bernabé jam jeky tyaa'nidøø, jeky tmøøtaa'nidøø ja jamit jaa'dyi pøn tjanchja'widip ja Jesús.

15

Ku Jerusalén ñamyujkidøø ja møjaa'dyøjk

¹ Nay ja'abi tiempi winaagin ja jaa'y choo'ndøø jam Judeit naxjotp jøts ñøjktøø ma ja kajp txøøwi Antioquia, jam tta'awanibøjkidøø ja jaa'y pøn wyinaty ja Jesús tjanchja'widip, jøts tñimaadyi ku ja yaa'dyøjk kuwani yikmo'odit ja ejxpajt ñe'kxkøjxp sami Moisés jekyip tyikyø'øy ja y'ana'amin, winets ja jade'en yiknitso'ok'atidit ja Dios.

² Winets ja Pablo møøt ja Bernabé møk'ampy ojts møøt ñagajpxyidi ja jaa'y, jøts ku ka' jade'en y'øyi yø'øbi winmaa'ñ. Winets ja Pablo ja Bernabé yikpiktaktøø møøt winaagin ja jaa'y jøts jam ñøjktøø Jerusalén, jamts tjaak'atskajpx'øyidit ja'abi winmaa'ñ møøt ja'adi pøn jaty ja Jesús kyudanaabyi'ajtpy, jøts møøt ja møjaa'dyøjkti pøn jaty jam møjaa'y'ajttip tsaptøjkjotp.

³ Xjats kyajxtsoo'niyidøø ja janchja'wibidi jam Antioquia, xjats choo'ndøø jøts jam ñaxti ma ja et txøøwi Fenicia jøts Samaria. Jamts tñigajpxtøø tñimadyaktøø, jøts ku namay ja jaa'y wyinaty tø tñajstutnidi ja møjaa'chinaa'yin pøn jaty ka'israelit jaa'dyi, jøts tñabøjktøø tu'ugyi ja Dios yja'. Xjats ja yjanchxondaktøø ja myigu'uktøjk ku ja jade'en tñaja'widøø ja'abi ayuujk.

⁴ Kuts yja'ttøø ja Pablo møøt ja Bernabé jam Jerusalén, winets ojts kyajpxpøø'kxyidi ja mayjaa'y jøts ja Jesús kyudanaabyi møøt ja møjaa'dyøjkti. Xjats ja tñigajpxti tñimadyakti sa ojts ja Dios møk tyukpudøkiyidi pøn ka'israelit jaa'dyi.

⁵ Xjats winaagin ja fariseit jaa'y pøn wyinaty ja Jesús yja' tpaduujnidip, wya'kukidøø jøts wyandøø:

—Kuwan̄i yø tpaduujnidit Moisés kyutujk pøn ka'israelit jaa'dyi øy yø Jesús yja' yjayik-paduñ, jøts kuwan̄i ejxpajt yikmo'odit ñe'kxkøjxp.

⁶ Winets jadigojk ñamyujkidøø ja Jesús kyudanaabyi jøts ja møjaa'dyøjkti sudso'ampy yikajpxwimbett yik'adsojimbett.

⁷ Tø wyinaty jeky tkajpx'øiyidi, jøts ja Pedro tyanaagyukyiyi'ñ jøts tñimaagy:

—Meets migu'uktøjkti, mee mnijaj'wip jøts ku øts ja Dios jekyxp xwíwich, jøts øts nduk-mado'ot ja jaa'y pøn ka'israelit jaa'dyi, sudso'ampy ja nwindson'ajtim xpojkmama'kxindit jøts ja tmbøkkit.

⁸ Waj'ats ja Dios t'ixy sa jadu'uk jadu'uk nwinmaa'yindi, jøts yide'en'ampy yiknijawi ku Dios ja tø kyupikyidi ja'abi jaa'y, ku tø tyuktatøkiyidi ja y'Espiritu Santo nayide'en ejxim adøm ojts xmø'øyim ja kunuu'kxin.

⁹ Ka'ap ja Dios pøn tšøky tksøky, tyumkupijky ja' wan tøn̄i, ka'ap ja t'ixy wan pøn t'israelitjaa'y'i uk wan pøn tka'israelitjaa'y'i, patyts ja nayide'en tø yikpojkmama'kxiti pøn ka'israelit jaa'dyi ku ja tø tjanchnjawi.

¹⁰ Migu'uktøjkti, ¿tiku xmimajidi xmidajti pøn̄i sa ja Dios tø tpihta'aky, jøts ja' xapaatti pøn ja Jesús tjanchnj'widip? ¿Tiku kawinaak winmaa'ñ xaguwaanidi? Nika'ats adøm ja ka'pxy n'ukpaduu'na'andi, ni ja n'apteety'amøj adøm ja ka'pxy tø tka'ukpaduunidi.

¹¹ Pø ka'axi jade'en y'øyi, njanchja'wa'amp adøm ja' ku ja Jesús xyiknitso'ok'ajtyindi kyø'ømdsøky, nayide'en sam ja' pøn ka' y'israelitjaa'y'i.

¹² Xjats niduki'y'i y'amongøxtøø, jøts tpatmadoodøø ku ja Pablo jøts ja Bernabé tñimadya'akti sa ja Dios møk pyudøjkiyidøø, ku ja myilagritundi jøts ja Dios y'ejxpajt tpaduujnidøø ja' y'etjotpti pøn ka'israelit jaa'dyi.

¹³ Ku ja Pablo jøts ja Bernabé kyajpx'abaajttøø, jøts ja myigu'uk mid̄i Jacobo txøøw'ajtmip, ja'ats waan̄:

—Meets migu'ukti, ukmadowdi waani:

¹⁴ Tø ja Simón Pedro tjanigajpxy sudso'ampy ja Dios tø tmø'øy ja may'ajt myiduk'oik pøn ka' y'israelitjaa'yidi, jøts ku ja Dios ja nayide'en t'u'nk'aty t'una'jk'aty ja'abi jaa'dyi.

¹⁵ Kuwan̄i ixyam jade'en yjaty kumi jade'en ja Dios kyugajpxy ojts tjaadyañ, ku ja Dios yide'en wyaañ:

¹⁶ Wimbejtkojmip øts jadigojk, jøts nbikta'akt nayide'en sam y'ijty ja David tjagyepy ja kutujk;

jøts øts nja' niduki'y'i xpaduujnidit pøn ka'israelit jaa'dyi,

¹⁷ jøts niduki'y'i ja naxwii'ñit jaa'dyi pøn jaty ø nja'ajtpy.

¹⁸ Jade'en idø'øn wyaañ ja nwindson'ajtim Dios, pøn tyuknijaj'wiyi'ñ yø'øbi winmaa'ñ jekyip.

¹⁹ Xjats ja Jacobo tjaaknøjmi ja jaa'y jøts wyaañ:

—Ka' nugo xmigajpxtit pøn ka'ap y'israelitjaa'yidi, pøn ja Jesús yja' tu'ugyi tpadunwajnidip, pøn tø tmajtstunidi ja myøjaa'chinaa'yin.

²⁰ Øy'ajtp ja nøky ngajxindit, jøts ja'ayi ndukmadoo'indit jøts kidi ja ttsu'utsti mid̄i ja tsamaxan yiktawindsø'jkip, jøts nayide'en ka'ap ja ñiyaa'y ñidø'øxy ñabyøjksidit, jøts nayide'en ka'ap ja jiyujk tsu'uch ttsu'utstit mid̄i ka' tyaxy, jøts mid̄i yuktsumy'oo'kp, jøts nayide'en ka'ap ja ni'jpy tjøø'kxiti.

²¹ Wan yø'øyi, pø jaayimts ja Moisés kyutujk xyumiyikajpxwa'kxy, ti magajp ja kya'ukyiknigajpxy ma jaty ja tsaptøjk jam, ejtpts ja yiknigajpx'ity wimboo'kxin xøøw.

²² Winets ja Jesús kyudanaabyi møøt ja møjaa'dyøjkti jøts niduki'y'i pøn jaty tjanchnj'widip ja Jesús, jats ñawywejtsidi namajtsk ja jaa'y pøn tmøødidøø ja Pablo jøts ja Bernabé jam Antioquia. Ja'abi jaa'y mid̄i yikwindsø'jkij'ejtipp, tu'uk txøøwi Judas Barsabas jøts jadu'uk txøøwi Silas,

²³ ja'ats tminøjkxtøø ja nøky jøts yide'en ja nøky wya'añ:

“Øøts idø'øn ja' pøn jaty ja Jesús kyudanaabyi'ajtpy, møøt ja møjaa'dyøjkti jøts niduki'y'i ja nmøøtjanchnj'wibidi, øøts idø'øn ja kajpxpoo'kxin nguejxpy, ngajpxpøø'kxpy øøts niduki'y'i ja nmøøtjanchnj'wibidi pøn ka' y'israelitjaa'yidi, pøn jam tsinaadyip Antioquia, jøts jam Siria, jøts nayide'en Cilicia.

²⁴ Tø øøts nnijawi ku winaggin ya'it jaa'y ojts ñjøkxti ma meets jam, jøts ojts nugo myikwinmaamy'a'dyidi, ku jade'en mni'mxyidi jøts ku kuwan̄i ja mixyuna'jk yikmo'odit ja ejxa'an ñe'kxkøjxp, jøts ku kuwan̄i ja Moisés kyutujk xpaduujnidit. Migu'uktøjk, kidi øødsipts ja jade'en ngajpxmyøøpy.

²⁵ Paty øøts yikxon ngajpx'øyi, jøts øø nbikta'aky namajtsk ja kugajpxy mid̄i mee m'ats'ejxyip, ja'ats myøødidip ja Pablo jøts ja Bernabé pøn øøts ndsøky'ajtpy,

²⁶ jøts pøn tø tyimñadyamiyoxiyi amumjoojt ja nwindson'ajtim Jesús.

²⁷ Yaj'at øø nguejxpy mid̄i txøøw'ajttip Judas jøts Silas, jøts møøt m'ukmadya'aktit jøts mdukmadowiyidit yaj'at tuki'y'i.

²⁸ Tø ja Espiritu Santo t'øyjawi, nayide'ents øøts, jøts ka'ap meets mayjøøjp ja winmaa'ñ nmø'øy, øy ku ya'at xpadu'undit:

²⁹ ka' xtsu'utstit midu ja tsamaxan tø yiktawindsø'øgi; jøts nayide'en ka'ap ja ni'jpy xjøø'kxiti, ka' xtsu'utstit nayide'en o ti jiyujk midu yiktsumy'oo'kp, nayide'en ka'ap ja mniyaa'y mniðø'øxy mnabyøjkxidit. Pøni mbadundip yø'øbi winmaa'ñ, tsuj mduu'baattit meets jade'en. Yø'øbi ana'amin øø nguejxpy, Dios mgunuu'kxidip.”

³⁰ Xjats choo'ndøø ja kunøky jøts ñjøjktøø jam Antioquia. Winets ñamyujkidøø ja jaa'y pøn ja nøky yiktanigaxtip jøts yikmøødyøø.

³¹ Ku ja tpa'ejxtøø, jøts yjanchxondaktøø ku jade'en ja winmaa'ñ yikmo'odi.

³² Kumi yjajttip wyinaty nayide'en ja Judas ja Silas sudso tkajpxwa'kxidit ja Dios kyajpxy. Xjats ttukja'gyukidøø, jøts ja janchja'wibidi yjanchxondaktøø ku ja jade'en kyajpxjot'amøjkidi.

³³ Ku jap waani y'uktqa'niðøø, winets ojts tja'ukminawya'kxyidi ja myigu'uk, ojts ja y'ukmø'øñiyidi ja kajpxpoo'kxin jøts ja Dios kyunuu'kxidit, jøts nay jam wyimbejti ma jam choo'ndøø.

³⁴ Xjats ja Silas wyinmaa'y, winets ja jam tyaañ.

³⁵ Nayide'en ja Pablo jøts ja Bernabé jap tyaandøø Antioquia, namay ja myigu'uktø møøt, yik'ixpøjktøø tkajpxwa'kxtøø ja Dios kyajpxy.

Ku ja Pablo myimajtsk ojk chøø'ñ kajpxwa'kxpi

³⁶ Tø wyinaty ja tiempi waani ñaxkojmi ku ja Pablo tnimaa'y ja Bernabé, jøts wyaañ:
—Wan tjaa'myim jadigojk jam magyap ma jaty ja Dios kyajpxy tø nniwidijtyim, jamts nmigu'uktøjk n'ats'ejxint sa jam yjatti kyubatti.

³⁷ Xjats ja Bernabé twaawa'añ tu'uk ja jaa'y pøn txøow'ajt Juan Marcos;
³⁸ ka'ats ja Pablo ja twinjawi jøts ja' tmøødit, kumi tø ja jam wyinaty t'ukyiktañ ma et txøøwi Panfilia, ka'ap ja wyinaty tykyø'øy ja Jesús kyajpxy.

³⁹ Xjats ñagyajpxidi jeky ja Pablo møøt ja Bernabé, ka' ja wyinmaa'ñ y'uknabyajtniyidi jøts jade'eñi ñawya'kxiniiyidøø; winets ja Bernabé tmøødiy'i'ñ ja Marcos, jøts tyøjkidøø barkijøtpy jøts ñjøjkti ma et txøøwi Chipre,

⁴⁰ xjats ja Pablo ojts twaaji'iky ja Silas. Jøts ja janchja'wibidi ñimaa'jyiyøø: “Nøjkk møøt ja Dios, Dios mgunuu'kxidip.”

⁴¹ Xjats ja choo'ndøø, jøts ñajxtøø ma et txøøwi Siria jøts Cilicia. Jamts tkajpxjot'amøjkidøø ma jaty ja tsapøjk jam wyinaty.

16

Ku ja Timoteo tjamyøøt'ajty ja Pablo møøt ja Silas

¹ Xjats jam yja'ttøø ma kajp txøøwi Derbe jøts Listra. Jamts tpaattøø tu'uk ja janchja'wibi, Timoteo ja xyøøw. Ja tyaak, israelit jaa'y ja' jøts yjanchja'wip ja Jesús ja'; jøts ja tyeety, griegit jaa'y ja'.

² Ja mixy Timoteo janchtsøjkp ja janchja'wibidi pøn jap wyinaty tsinaadyip Listra jøts Iconio.

³ Xjats ja Pablo tmøødiwya'añ ja Timoteo jøts pyudøkiyt, jøts ja Pablo wyinmaa'y jøts ku kuwani jawyeen yikmo'ot ja ejxpajt ñe'kxkøjpx, jøts kidi y'ejxma'adyidi ja israelit jaa'y ku jam yja'attit ja' y'etjotpti, wa'ats ja wyinaty tnijawidi ku ja Timoteo tyeety ka' y'israelitjaa'yi.

⁴ Xjats choo'ndøø ñajxtøø ma jaty wyinaty ja kajp jam. Jamts tnigajpxti tniadya'akti ja janchja'wibidi, jøts t'uktukmadoodøø ti jaty wyinaty tø tkajpx'øyiidi ja Jesús kyudanaabyi møøt ja møjaa'dyøjkti jam Jerusaleñ, jøts sudso'ampy ja jaa'y øy tsuj yjaa'y'attit pøn ka' y'israelitjaa'yi.

⁵ Xjats tu'ugyi ja wyinmaa'ñ tpiktakniðøø amumjoojt ja janchja'wibidi, mayi'adøtstip ja jabom jabom.

Ku ja Pablo ojts t'ixy agumaa'yjøtpy tu'uk ja Macedoniit jaa'y

⁶ Xjats ja Pablo møøt ja Silas jøts ja Timoteo choo'ngojmidøø, jøts kumi ka'ap ja Espiritu Santo ojts tyikutuky jøts jam ñjøjktit kajpxwa'kxpi ma et jam txøøwi Asia, winets jam ñajxtøø ma et txøøwi Frigia jøts Galacia,

⁷ jøts jam yja'ttøø tsawa'an'am ma et jadu'uk txøøwi Misia, jam wyinaty yjatøkiwya'andi ma et jadu'uk txøøwi Bitinia, nika' ja Espiritu wyaañ jøts jam tyøkidit.

⁸ Winets tyaø'øñaxti yøñ'ampy ja Misia y'et ñaajx, jøts jam kyidaktøø jam mejy'am ma tu'uk ja kajp txøøwi Troas.

⁹ Jamts ja Pablo koots twingumaa'y tu'uk ja Macedoniit jaa'y, windanaajyip tam ja jaa'y jøts yjanchminuu'kxa'agiyi, jøts ñi'mxiyi: “Tun ja may'ajt, nax jam ma ja Macedonia et, pudøjkik øøts.”

¹⁰ Xjats ku ja Pablo jade'en kyumaay, winets *oo* nnay'a'ejxy^{oo} jots *oo* nds^{oo}'n. Ots id^o'on Lucas pøn ya'at nøky tjaapy, ots id^o'on ja nayide'en nm^{oo}ots^{oo}'n, jots *oo*ts ojs nnijky jam Macedoniit etjotp. Nja'gyujkip *oo*ts wyinaty ku *oo*ts ja Dios xwaadsøy, jots *oo*ts jam nøjxk ngajpxwa'kxy ja øgyajpxy ja ømyadya'aky midy xyiknitso'ok'ajtindip.

Sa yjajttø sa kyubajttø ja Pablo møøt ja Silas jam Filipos

¹¹ Winets *oo* ndøjkyyi'n barkjøtpy, jots *oo* tiy nnijky jam mejy agujkp ma ja naajx lii'nim tx^{oo}wi Samotracia, jots kyimjabomnim *oo*ts ja mejy ndanajxy jots *oo*ts jam nja'jty Neápolis.

¹² Jam *oo* nds^{oo}'n tekyj^o'om, jots *oo* nnijky ma kajp tx^{oo}wi jadu'uk Filipos, ja' midy ja romanit jaa'y k^o'om pyiktaktø. Møj kajp id^o'on ja', nima ja kajp jam jade'en wingon kyamøji. Jam *oo*ts kawinaak x^{oo}w n'ukt^{aa}'niyi'n.

¹³ Jamts *oo* ngajpidsømnaa poo'kxin x^{oo}w et, jots *oo*ts jam nnijky møj n^{oo} windump ma ja jaa'y kuwani ejtp ñøjkxti Dios'ajot'ajtpi. Jamts *oo* n'ixaajky, xjats *oo* ndukmadøøy ja Jesús kyajpxy ja t^o'oxyjkti pøn jam wyinaty t^o ñamyukyidi.

¹⁴ Jamts ja t^o'oxyjkt pøn tx^{oo}w'ajtp Lidia, pøn tsoo'mp jam Tiatira kajpjotp; wetoo'kk ja tyunk'ajtpy, tum ja øybi tsoo'nk wet id^o'on ja tyøø'kpy. Ja'ats id^o'on ja Dios tjanch'ajot'ajtp, jots nwindson'ajtim ja yikwinmaa'nbyajjityøø jots tjanchjawit sa jaty ja Pablo wyaan.

¹⁵ Xjats ojs ñøbety m^{oo}t ja myigu'uk, winets *oo* xminuu'kxaajky jots wyaan:

—Tundi may'ajt jaa'mindip ots ndøjkjøtpy, jap m'atsja'ada'aktit pøni mjanchwamp meets jøts ku ots nwindson'ajtim kyajpxy t^o njanchpaduujnyi.

Xjats *oo* kuwani xyiktaan.

¹⁶ Winets yide'en yjajty ku *oo* wyinaty nnijky ma jaa'y jam Dios'ajot'atti, xjats *oo* nminabyajjityi tu'uk ja kiixy midy wyinaty ximaapy, ja miku' midy wyinaty myøø'tijtpy, ane'emy id^o'on ja y'ity. Ku ja jade'en myiximay janchnimeenbyøjkijy ja wyindsøn ja' pøn ja y'ijty ana'amiyip.

¹⁷ Ja'abi kiixy *oo* xpawidejtøjkinaa, xjats ojs møk yjanchwa'aan jam mayjaa'y agujkp:

—Ya'atpi jaa'y møk tjanchmidundip ja Dios midy jap tsajpjøtpy, y^o' tkajpxwa'kxtip ja Dios kyajpxy sa ja xyiknitso'ok'ajtindip.

¹⁸ Ku jade'en pyawidejtyidøø kawinaak x^{oo}w, xjats ja Pablo møk y'adsipyi jots t'ejximbijty, jots tnimaay ja miku' midy ja kiixy wyinaty myøø'tajtpy:

—Jesús myø'ajtingøjxp mets miku' majtstu'ut yø kiixy. j'pidsøm!

Xjats ja miku' tmajtstuujty nay jaty.

¹⁹ Ku ja kiixy ja wyindsøn tja'ejxnidi ku t^o ja wyinmaa'n tyigatsni, ku ka'ap ja kiixy y'ukmeenbyøjkni, winets ja Pablo jøts ja Silas yikmatstøø, jots yiknøjkxidøø kunduk wyindump jam møj maayjotp.

²⁰ Ku jam yikja'tjidøø tiidyumbi wyindump jøts ja tnimaadyøø:

—Ya'at jaa'dyi, israelit jaa'y yø'odi, møk *oo*ts xjanch'adsipy ya kajpjøjty,

²¹ ku ja kyø'omdsinaa'yin *oo*ts kuwani xulpadunwa'ajt midy *oo* ka' njanchjagupøkwa'aan, jøts ja'abi tsinaa'yin ka'ap *oo*ts ja nnijawi. Abiky *oo*ts, romanit jaa'y *oo*ts.

²² Xjats ja mayjaa'y yjanchpidø'kojxtøø, jøts ja tiidyumbidøjk t'ana'amdi ja jaa'y jøts wan tyiknijandi tyik'ixjandi, jøts wan ja nawyopi t'ukupøkti namajtsk ja Pablo m^{oo}t ja Silas.

²³ Xjats ku yikwojpp'abaajtidøø, winets ja tyiknøjkxtøø puxøjkjotp, jøts ja t'ana'amdi ja puxøjk adsinaabyi jøts tnimaadyi jøts waani ttiymjaty'ejx'etiti.

²⁴ Ku ja puxøjk adsinaabyi jade'en ojs yik'ane'emy, winets tyiktøjkyyi'n jøts kawinaak puxøjk'aaw ojs tyiknaxy, jødsnim ojs yikni'agiibyatti jam okp. Ku jade'en jam yikpiktaktøø, winets ojs ja kipy yiktanaxkø'odi ja tyeky kadeni m^{oo}t.

²⁵ Xjats ja Dios'ajot'ajttøø jøts t'øødøø ja Dios kyajpxy jap puxøjkjøtpy, møk ja Dios ja tja'myajstøø. Tsuu'miwyamp wyinaty ku ja Dios jade'en t'ajot'ajttøø, jøts ku ja myibuxøjk jaa'y ja nugo pyatmadøyi.

²⁶ Xjats ku chuu'miyi'n, winets ja uyx møk yjanchmiin, winets ja puxøjk møk yjantyimy'adijch. Jøts ja puxøjk'aaw tuki'iyi y'axetutkøjxnaa, jøts ja puxøjk jaa'y pyaktsum nayide'en wyinakøjxtøø.

²⁷ Xjats ja puxøjk adsinaabyi ojs ñiwijy, jøts ja t'ejxpaajty ja pyuxøjk'aaw jøts kudam ja wyinaty t^o y'awatskøxni, xjats ja jade'en wyinmay t^o ja puxøjk jaa'y tjiy pyidsømgoxnidi, winets ja yønchujx ja tju'jty jøts ja k^o'om ñanky'ookwa'aaniyi.

²⁸ Xjats ja Pablo ojs t'ejxpaaty ja puxøjk ejx'ejtpi ku ja wyinaty jade'en ñadyunwa'aaniyi, xjats tnimaay:

—Kidi jade'en mnadyuñyi, ka'ap *oo* ngue'eky, tum ixyp *oo*ts niduki'iyi.

²⁹ Xjats ja puxøjk ejx'ejtpi t'amidøøy ja jaj jøts ja ojs puftp tyøki jap puxøjkjøtpy. Xjats ja yjanchmibejpi jøts ja ojs ñagyuxendya'agy jam Pablo tyekyj^o'om jøts ja Silas.

³⁰ Xjats ja tyikpidsimy jøts tyiktiy, yide'en ja tnimaay:

—Migu'ukti, çiti ø ndu'ump, sudso'ampy ø nnitso'ok'att?

³¹ Xjats ja Pablo mōōt ja Silas ojts t'adsojimbetti, xjats tnimaadyōō:

—Mōjawi amumjoojt ja nwindson'ajtim Jesucristo, jōts myiknitsō'ok'atijidit niduki'iyi mōōt ja m'u'nk mōōt ja mndiō'oxy.

³² Xjats ja Pablo jōts ja Silas ttukmadoodōō ja Dios kyajpxy ja puxōjk adsinaabyi mōōt niduki'iyi pōn jaty ja jam wyinaty tōjōkōtpy myōōtsinaapy.

³³ Nay jatvits ja puxōjk adsinaabyi tyikwajtsōō ja Pablo jōts ja Silas chaachi, winets ñōjkxtōō nōbjajtpi niduki'iyi mōōt ja y'u'nk jōts ja ñidō'oxy.

³⁴ Winets ja puxōjk adsinaabyi twāy kaabyi jap tōjōkōtpy, janch ōy janch tsuj wyinaty ñayja'wiñidi niduki'iyi mōōt ja y'u'nk ja ñidō'oxy, kumi tō ja wyinaty ja Dios tjanchjawidi.

³⁵ Xjats kyimjabom'ajty, winets ja tiidyumbidi ttaniguejxy ja kyugajpxy ja puxōjk adsinaabyi, jōts ku ja' tyikutuky jōts tyik'awa'atpidsōmniit ja Pablo jōts ja Silas.

³⁶ Xjats ja puxōjk ejx'ejtpti tnimaay ja Pablo:

—Tō n'atsyik'ane'emy, ja tiidyumbitōjk kō'ōm ja kyajpxy tkajxtip jōdsik meets jadi'iñi nyikpidsōmniit; nōjknidits jotkujk, tō mee m'awa'atpidsōmni.

³⁷ Xjats ja Pablo ka' tkupiky, winets tnimaay ja kugajpxy:

—Nayi romanit jaa'y ōōts, tiku ōōts jade'en nyiktuñ jōts ku ōōts jade'en mayjaa'y agujkp nyikwōpy, nika'ap ōō nyiktiidyuñ jōts jaty: ōō nugo nyikpikta'aky puxōjkōtpy; ¿sudsō'ampy ōōts ndejint ayu'uch jadi'iñi nyikmajtstu'tutwani? ¡Ka' y'ōyi! Wan ja kō'ōm tmendi ja tiidyumbidi jōts ōōts xyikpidsō'ōmt.

³⁸ Jōts ja kugajpxy wyimbejtñidōō, jōts ttukmadoodōō ja tiidyumbi sa ja Pablo ja kajpxy t'adsojimbijty, winets ja tiidyumbi yjanch'ōkiñidi ku tñija'widōō jōts kudam ja Pablo jōts ja Silas nayide'en romanit jaa'yidi.

³⁹ Winets ja kudunkōjk tñinōjkxtōō t'atminuukxaktōō ja Pablo mōōt ja Silas. Xjats tyikpidsōmdōō jap puxōjkōjōty, jōts mōk tnimaadyōō:

—Tun may'ajt pidsōmndi ya waani kajpōōty.

⁴⁰ Xjats ja pyidsōmdōō puxōjkōtpy, jōts ñōjkxti mā ja Lidia tōjk, jamts ja tminabyajtidōō ja myōōtjanchja'wibidi, kuts ja tkajpxjot'amōjkidōō, winets ja choo'nidōō.

17

Ku ja Tesalonikit jaa'y yjanch'ambōjktōō

¹ Xjats ku jam choo'ndōō, jōts ñaxtōō mā kajp txōōwi Anfipolis jōts nayide'en Apolonia, majtsk ja kajp ttanaxtōō jōts jam yja'ttōō mōj kajpōtp midī txōōw'ajtp Tesalōnica, jam wyinaty ja tsaptōjk.

² Winets ja Pablo tōjōkidōō kajpxwa'kxpi jam tsaptōjkōtpy, sayim ja tuñ ōy mādsōō mā jaty ja wyidity, tigōōk samani jam tyik'ixpiky ja jaa'y wimboō'kxin xōōw.

³ Yide'en ja ojts ttuk'ixpiky pōni sa ja Dios Teety kyajpxy ojts yikjaadyañ, jōts kuwani mye'ent ja yiknitsōkpi, jōts kuwani y'ayo'ombaatt jōts y'oo'kimbaatt, jōts kuwani yujukpyōkt jadigojk. Yide'en idō'ōn ja wya'añ:

—Jade'en ja Jesús yjaty midī mee ndukmadōōpy, nay ja' ja Dios Teety kyejpxy yiknitsōkpi.

⁴ Ku ja Pablo ja ixpōjkin jam jade'en t'ukyiktandōō, winets ja israelit jaa'y wināāgin tmibōjktōō, jōts ja mōōt ñabyōjknidyidōō ja Pablo jōts ja Silas, jōts nayide'en namay ja griegit jaa'y pōn ja Dios Teety twindsō'jkidip. Nayide'en namay ja griegit tō'ōxyōjk tmibōjkti pōn jam windsō'ōgi'ejtpt.

⁵ Winets ja israelit jaa'y niduki'iyi y'ambōjktōō pōn jaty ja Pablo kyajpxy y'ayuujk tkagupōjkxidip, ja'ats twaamuktōō ja ka'ōybi jaa'y pōn jap nugo widejtpt kajpōtpy. Xjats nugo wyidejtnibōjkidōō jōts ja jaa'y tu'uk tu'uk tyik'ambōjktōō. Winets yja'ttōō tu'uk ja jaa'y tōjōkōtpy pōn txōōw'ajtp Jasōn, xjats awa'an'ampy tōjōkidōō tōjōkōtpy tajpi kaa'pi. Ja Pablo jōts ja Silas ja' idō'ōn jade'en yik'ixaadyip jōts tyikpidsōmwā'andi jōts ja tyiknōjktit mayjaa'y agujkp.

⁶ Kumi ka'ap ja tpaatti jap tōjkōtpy, winets ja tmatstōō ja kudōjk mōōt ja myōōtjanchja'wibidi, xjats tpawetstōō tpakoo'tstōō, kudunk wyindump tyiknōjktōō, xjats ja Pablo jōts ja Silas yikxiguyaxtōō, jōts jade'en wyandōō:

—Ja'abi jaa'y pōn widejtpt jōts tuki'iyi ja naxwii'ñit jaa'y tyikwinmaa'nmyatktōxti, tōnim ja ya nayide'en yja'tmidī,

⁷ jōts ya'at Jasōn ja tō tyikja'ada'aky tōjōkōtpy. Yō'ōbi jaa'y tuki'iyi y'ixwetswangōjxtip ja mōj windsōn César kyutujk midī adōm ngajp xnitanāajyamp. Jade'enxi wya'andi ku ja ja mōj windsōn jadu'uk pōn txōōw'ajtp Jesús.

⁸ Ku ja tmadoodōō ja jaa'y mōōt ja kudunkōjk, winets niduki'iyi yjanch'ambōjktōō.

⁹ Xjats ja Jasōn kuwani tmōōy ja meeñ ja kudunk jōts ja yikmajtstu'tuttit; jōts yiknimaadyōō ku kuwani tyimbyidsō'ōmdit ja Pablo mōōt ja Silas jam kajpōtp jawyeen, jaanims ja myeeñ ja jadigojk wyimbett. Winets jade'en yikmajtstuttōō mōōt ja myigu'uk.

Sa yajattøø sa kyubajttøø ja Pablo møøt ja Silas jam Berea

¹⁰ Xjats nay jatyi koots ja Pablo møøt ja Silas ja myøøtjanchja'wibi kyajxtsoo'nidøø jøts jam ñøjkxti ma kajp txøøwi Berea. Ku jam yja'ttøø winets nay jatyi: ñøjkxti jam tsaptøjkjotp.

¹¹ Yujjts ja ne'egi yjaa'y'atti ja'abi israelit jaa'dyi, ka'ap ja tyimyjade'enidi sam ja'adi pøn jam tsinaadyip Tesalónica. Chojktp ja øy wine'en tmado'odit ja Jesús y'øgyajpxy y'ømyadya'aky, jøts ja ejtp winjabom txumi'ejxti ja nøky ma ja Dios kyajpxy jap yja'ayi, pøni tij yanch idø'øn ja' sa ja Pablo ja ñii'mxyidi.

¹² Xjats ja namay tjaa'gyukidøø jøts tmibøjktøø, jøts nayide'en namay ja griegit jaa'y tpaøjktøø pøn ana'amdip, ja yaa'y ja tø'øxy.

¹³ Xjats ku ja israelit jaa'y pøn jam tsinaadyip Tesalónica tnija'widøø ku wyinaty ja Pablo tkajpxwa'kxy nayide'en ja Dios kyajpxy jam Berea, winets ñøjkxti ja israelit jaa'y jam Berea, jøts jamts jaa'y nugo tyikjot'ambøjktøø.

¹⁴ Jøts ja Pablo ja janchja'wibidi jatyi kyajxtsoo'niyøø jøts ja ñijky jam mejy'am, xjats ja myigu'uk japyi t'ukyiktaanaa midit txøøw'ajttip Silas jøts Timoteo.

¹⁵ Xjats ja Pablo yikjamyøøt'ajty jøts tmøødidøø jagambaat ma kajp txøøwi Atenas. Xjats ja Pablo tkajxjimbity ja ayuujk jøts ñøjkxtit ja Silas møøt ja Timoteo pojyi'iky, jøts ja jam tminabyaadidit ma ja wyinaty.

Sa yajaty sa kyubejty ja Pablo jam Atenas

¹⁶ Ixam idø'øn ja Pablo wyinaty t'awixy ja Timoteo jøts ja Silas, jøts ja ka'ap yjanchjotkuki ku jap kajpøtpty t'ixy janchmay ja awanax ja tsamaxan midit'ibi ja dios'ajttip.

¹⁷ Kumi ka' yjotkuki, winets jam ñijky tsaptøjkjotp, jamts møøt kyajpxy myadyaajky ja israelit jaa'y, jøts ja' møøt pøn jaty Dios Teety t'ajot'ajttip, jøts nayide'en jabom jabanom ja ñijky maayjotpy, japs nayide'en møøt kyajpxy myadyaajky pøni pøn jaty jap pyajtpy.

¹⁸ Jamts wyinaty ja ixpiky jaa'dyi winaaagin midit y'ixpøjktip ja epicureo y'ixpøjkin, jøts jam nayide'en jadu'uk midit y'ixpøjkmidip ja estoico y'ixpøjkin, ja'ats ojts tpatmadowdi ja Pablo ku ja tkajpxwa'kxy pøni pøn idø'øn ja Jesús'ajtp, jøts ku kuwani ja naxwii'ñit jaa'y wyimbettit jadigojk pøn jaty tø y'øøky. Winets ja ixpiky jaa'y winaaagin yide'en nawyajnidøø jøts wyandøø:

—¿Ti dø'øn yø chaachnigajpxpy yø yaa'dyøjk, yikmibøjpk idø'øn yø tijy ku jadinø'øn yjanchkajpxy?

Jøts jadu'uk t'adsojimbity:

—Wa' yø yjawi kyajpxyø'øpy ja wenkpi dios y'ayuujk.

¹⁹ Xjats ja Pablo yikwetsøø'ñ, jøts jam yiknøjkxøø ma ja tjagyapti junti tundaajk. Ja' ja et xyøøw Areópago, jamts tyiktøødøø jøts tnimaadyøø:

—Ja' øøts nnijawiwiyampy yø wenk ixpøjkin midit mmimimpy.

²⁰ Wenkts yjawi xkajpxy, nnijawiwiyampy øøts ti jade'en tyijpy ku jade'en mwa'añ.

²¹ Paty ja Pablo yik'amidøøy jade'en, kumi jade'en tuki'iyi ja Atenas jaa'y yjujky'atti, jøts nayide'en pøn jaty jam ja'atjaa'y'ajttip, ja' nugo ejtp chøky'ajttip jøts ñanktyuknigajpxxidit sa ja kø'øm wyinmaydi, winets ja jemy ixpøjkin tpaatti jade'en.

²² Winets ja Pablo wya'kukiyi'ñ jam mayjaa'y agujkp ma jam yjuntitundi, jøts ja wya'añ:

—Meets Atenas jaa'y ukmadowdi, wa'ats øts n'ixy ku meets xjanchwindsø'øgi ja mdiosti midit mdiost'ajttip.

²³ Kuts øts jam wyinaty n'et'ixy ma meets mdiost'windsø'øgi, jamts ø ndayø'øbejty tu'uk ja altajr midit jap wyinaty ja letri tmøøt'ajtp midit yide'en wamp: "Ja Dios ya'at y'altajr midit kayiknija'wip." Øy'ajtp, ja'abi dios midit mee mwindsø'jkip jøts ka' xnijawidi: pøni pøn ja', ja'ats meets idø'øn yam ndukmadøøpy pøni pøn ja'.

²⁴ Ja'abi Dios tø tyik'øyi tuki'iyi tuktsajp'agida'aky, jøts nay ja' tuki'iyi tnawindsøn'ajtkøjxp wa'n ttsajpi wa'n tnaajxi. Jøts ka'ap ja Dios kuwani tu'ugyi chøøni tsaptøjkjotpy midit jaa'y yik'ø'yip.

²⁵ Jøts ka' Dios ti tyigøy'ajtxi midit'ibi ja naxwii'ñit jaa'y ja mo'owajniyip, pø ja'axi tuki'iyi xmøø'yindip ja nmøk'ajtin, jøts pøni ti jaty ndajujky'ajtyindip.

²⁶ Tu'uk ja Dios Teety tpiktaajky adøm n'apteety'amøj midit niduki'iyi ja naxwii'ñit jaa'y y'apteety'amøj'ajttip. Tø ja tnanibiktaagi nayide'en juuni ja kya'axtit, nayide'en ja chinaadyaajk tmo'ot ma jaty ja chøønidit.

²⁷ Ja'agøjxp ja Dios ttuñ jøts ja adøm nwinmaa'nmyee'nindit pøni pøn ja'. Øy udyaa'aky nbaajttindit, ka' yjagami Dios, wingon ja møøt n'ijtyindi.

²⁸ Pø Diosxi xyikjujky'ajttindip ku nnajxindi ndøjkindi; pø nayide'enxi meets mmigu'uk wya'añ winaaagin pøn wijtyi, ku yide'en wya'andi ku ja Dios x'u'nk'ajtyindi.

²⁹ Pøni janch jade'ents jaa ku ja Dios x'u'nk'ajtyindi, ka'apts ja Dios jade'en nnajt-sja'wandit jøts ku ja y'oori ne'egi, uk pyuxplatit ne'egi, uk chaadsechi sa jaty ja jaa'y ja kø'øm wyinmaa'ñjotpy tyikpidsømdi.

³⁰ Dios ka' ja y'ijty ttunk'aty ja jaa'y kya'owynmaa'n pøn tø ñaxti, jøts ixyam tuki'i'yi t'ane'emy ja ñaxwii'ñit jaa'y øy yjamadsowi jøts wan tmajtstu'utti ja kya'ødyunk.

³¹ Kumi tø ja Dios Teety ttanibiktaagi ti xøøw ti et ja nøjxk ttidyuñ ja naxwii'ñit jaa'y; jøts tø ja tpi'ka'aky ja ejxa'an ku ja ojts tyikjujkyiky jadigojk ja nwindson'ajtim Jesús, jøts ja naxwii'ñit jaa'y jade'en ttuknijawi jøts ku dø'on ja yja'aji pøn idø'on me'emp.

³² Xjats ku ja Pablo jade'en ja ayuujk tyiknajxy ku jaa'y yjujkyiky jadigojk oo'kpi jutjotpy, winets ja Atenas jaa'y winaagin yjanchtaxeknijokidøø, jøts jadu'uk winaagin ñømdøø:

—Wan jade'eñi, ja wyinaty jadu'ukpi xøøw xjaaknigajpxy.

³³ Xjats ja Pablo jade'eñi tmajtstuujty.

³⁴ Jamts ja jaa'y wyinaty winaagin pøn tja'gyukidøø ja ayuujk, jøts ojts tpaduujni ja Jesús yja'. Ja'abi jaa'y nidu'ugin txøøw'ajt Dionisio pøn jam windsøn'ajtp ma ja juni tundaajk txøøw'aty Areópago. Jøts jam nayide'en tu'uk txøøw'aty ja tø'oxyøjk Dámaris, jøts jam ja niwinaagin ja mygu'uk.

18

Sa yjajty sa kyubejty ja Pablo jam Corinto

¹ Xjats ja Pablo chøø'n jam Atenas jøts ñijky ma kajp txøøwi Corinto.

² Jamts tu'uk tminabyajttøø ja israelit jaa'y pøn txøøw'ajtp Aquila mididi jam kugajp'ajtp ma et txøøwi Ponto. Ja'ats wyinaty namdso'ondipnim jam Italia møøt ja ñidø'øxy pøn txøøw'ajtp Priscila, jøts ñamja'atinim Corinto. Claudio dø'on ja wyinaty jade'en tø tyuñidi pøn ja italiit jaa'y wyindsøn'ajttip, ja'ats tyikutuky jøts yikajxpidsømgøjxnidøø niduki'i'yi ja israelit jaa'y pøn jaty jam wyinaty tsinaadyip Roma. Xjats ja Pablo ojts t'atmigajpxy ja Aquila jøts ja Priscila,

³ jøts ja jam tmøøtaañ tmøøtsinaay, ojts tmøøtuñ kumi nay ja'abi tunk ja tyunk'ajtpy ja wetøjkxuuky.

⁴ Jøts ja Pablo wimboo'kxin xøøw ñijky tsaptøjkjotp ma ja jam tniagajpxy tniadya'aky ja Jesús yja', jøts jade'en ttukmibiky øy pøn jaa'y, wan ja t'israelitjaa'yidi tka'israelitjaa'yidi.

⁵ Xjats ku ja Silas jøts ja Timoteo ñamdsøndøø jap Macedonia, jøts ñamja'tti Corinto ma Pablo jam wyinaty, winets ja Pablo tu'ugyi tpadøjkijyi'n ja kajpxwa'kxin, jøts ka'pxy ttukmadøy ja israelit jaa'y jøts ku ja Jesús yiknitsokpi'aty pøn ja yjajøp'ejx'ejttip.

⁶ Ku ja Pablo jade'en wya'añ, winets yikmi'ambiky jøts ja ojts yikmidsepiky, ojts yiktsep-kajpxy. Winets ja Pablo ja w'ey twixijty, ja ejxa'an jade'en tmøø'øxy jøts ku jade'en jaayibaat tmajtstu'utt, winets wya'añ:

—Mgø'ømbøky meets wyinaty ku m'anmija'win wyindigø'ødyit; øts ka' mee n'uktunk'ajtni. Ejxti sa x'ejxti, ixyam øts jam ne'egi nnøjxk kajpxwa'kxpi ma pøn kya'israelitjaa'yidi. Tø net jaabaat nmajtstu'utti.

⁷ Winets jam chøø'n tsaptøjkjotp, jøts ñijky kajpxwa'kxpi ma tu'uk ja jaa'y chøøni pøn txøøw'ajtp Justo, pøn jam tsinaapy tsaptøjk pa'am. Yjanch'ajot'ajtpy ja Dios ja nayide'en.

⁸ Jøts ja Pablo jade'en kyajpxwa'kxy Justo tyøjkjotp, winets ja jaa'y tu'uk tmibøjktøø ja Dios kyajpxy møøt ja y'u'nk ja ñidø'øxy, pøn ja tsaptøjk niwindsøn'ajtp, ja' xyøøw Crispo. Xjats nayide'en namay ja Corintit jaa'y tmibøjktøø ja Dios kyajpxy, winets ñøbjaktøxti.

⁹ Xjats ja Pablo tu'ukpi koots ja nwindson'ajtim ñimaajyøø, jøts ja jade'en tja'wiyii'n kidi jaa'y kyuma'ay ku ja ñii'mxyi:

—Kidi mdsø'øgi; jaakajpxwa'kx, kidi m'amøñ.

¹⁰ Ka'ap pøn sa mduñi, ixya me møø n'ity. Ja øts ja jaa'y ya may kajpøøjty njagyepy pøn øts n'ayuujk xmibøjkwajniyip.

¹¹ Winets ja Pablo jam tyaañ Corinto tukjumøjt jagujk, jøts ja jaa'y ttuk'ixpiky ja Dios kyajpxy.

¹² Xjats tu'ukpi xøøw yjajty ku ja Galión wyinaty myøjwindsøn'aty jam Acaya, winets ja israelit jaa'y tmi'ambøjkti ja Pablo, jøts tyiknøjxkti ma ja kutujktaajk jam,

¹³ jøts ttukmadoodøø ja møj windsøn yide'en:

—Ya'at jaa'y ttukmibøjkp ja jaa'y jøts ku ja jade'en t'ajot'attit ja Dios sam ka' tyim'yukpaat'ajtniyi. Ka'ats adøm ngutujk jade'en t'ukupøjki.

¹⁴ Xjats ku ja Pablo wyinaty tyimgyajpxwa'añ, winets ja Galión tniamaay ja israelit jaa'y:

—Ku jeexyip ja kajaa winmaa'n, uk ja møk ayo'on jee tø tyuñi, øts ja jeexyip nyikwingukip meets israelit jaa'y;

¹⁵ kumi ka'ats yjade'eni, jabi nugo ayuujkxi yø' jøts mgø'ømgutujk meets yø', ka'ap øts yø x'ukpaat'ajtni, yikwingukidi yø pøni sa xyikwingukidi. Ka'ap øts yø'øbi ndiidyunwa'añ.

¹⁶ Xjats ja israelit jaa'y yikajxpidsømgøjxtøø ja' kutujktaajk'ajtpy.

¹⁷ Winets ja griegit jaa'y tmajtstøø ja Sóstenes, pøn windsøn'ajtp jam tsaptøjkjotp, jøts jamy tnaẏmiwojpidøø jam yikutujkpi: tøjka'agøø'm, jøts ja mõj windsøn Galiön ka' tyimdyunk'aty niwinø'ønin.

Ku ja Pablo jadigojk yja'jty jam Antioquía, winets ja myidigøøk ojk chøø'n kaja'paxwa'kxpi

¹⁸ Xjats ja Pablo yjaaktaa'niiyi'n jeky. Winets ja myigu'uk tjaak'ukajpxpoo'kxkøjxnaa niduki'iyi ku ñøjxwa'andi barkijotp jam Siria, møøt ja myigu'uk Aquila jøts ja Priscila. Xjats yja'ttøø tekyjøø'm jam meji'am ma txøøwi Cencrea, winets ja Pablo køø'm ñabyiktaja'kxiyi ja eja'x'an, jøts ja wyaay tke'jpy ku wyinaty tø tuki'iyi tpaduñ midi wyanda'aky'ajtpy. Winets barkijøtpy tyøkinidøø.

¹⁹ Jøts yja'ttøø ma kajp jam txøøwi Efeso, jamts ja Pablo ja myigu'uk t'uckyiktaañ jøts jam ñijky tsaptøjkjotp ma ja ojts tminagya'jpxyi ja israelit jaa'y pøn jam namyujkidip.

²⁰ Winets ja Pablo øy yjayikminuu'kxaajky jøts jap waani tyaa'nit, ka'ats ja tkupijky.

²¹ Xjats ja møøt y'uknagya'jpxpoo'kxiniyøø, xjats tniimaay:

—Ja'agøø'p øts yam nnijky ku øts jam Jerusalén nyikna'xwa'añ ja xøøw midi wingomp; kuwani øts jadigojk nme'ent jøts mee n'ats'ext ku Dios wya'ant.

Xjats jadigojk tyøjkiiyi'n barkijøtpy, jøts chøø'n jam Efeso.

²² Xjats ku ja yja'jty ma kajp txøøwi Cesarea, winets jam choo'ngo'jmaay tekyjøø'm jøts ja ñijky Jerusalén, jam ja t'atskajpxpoo'kxy ja myøøtjanchja'wibi, winets yjøøtaajky ma kajp txøøwi Antioquía.

²³ Jamts ojts kawinaak xøøwin tyaa'ni Antioquía, winets chøø'n jadigojk jøts t'ayoøgyixy jadigojk ma wyinaty tø wyidity ma et txøøwi Galacia jøts Frigia, jøts ja myøøtjanchja'wibi tkajpxjot'amøki.

Ku ja Apolos ojts kyajpxwa'kxy jam Efeso

²⁴ Winet'ets ojts nay ja'abi tiempi yja'aty jam Efeso tu'uk ja israelit jaa'y pøn txøøw'ajtp Apolos, jøts pøn kugajp'ajtp Alejandria. Ja'abi jaa'y janch tsuj janch øy ja kyajpxwa'kxy, janch ñija'wip idøø'n wa'ats ja Dios kyajpxy.

²⁵ Tø ja wyinaty t'ixpiky ja Dios kyajpxy ma wya'añ jøts ku ja nwindson'ajtim tsojk myeenwa'añ ya naẏwiñ. Ja'ayi i'xpo'jkin ja ñigajpxy sa Juan Bautista ojts yik'ixpiky, jøts tigøø'p ku jaa'y ja tyiknøbejty.

²⁶ Xjats ja Apolos møk kyajpxøjkiiyi'n jam tsaptøjkjotp; kuts ja Priscila jøts ja Aquila ja jade'en tmadowdi, winets ja abiky tjiwaa'wdøø, jøts ojts ka'pxy ttukmadowdi ku ja Jesús tø wyinaty y'atsmeni, jøts ti jaty ja ojts ttuñ.

²⁷ Xjats ja ja Apolos jam wyinaty ñaxwa'añ ma et txøøwi Acaya, winets ja janchja'wibi pøn jam Efeso ja nøky tyik'øyidøø, jøts ja janchja'wibi tkajpxñigajxidøø pøn jam Acaya, jøts øy tsuj jam tyikja'attit ja Apolos. Kuts ja jam yja'jty Acaya, winets møk tjaakpudøjkiiyi'n pøn jaty ja Dios tø wyinaty y'ayo'e'jxingøø'p tyukjanchjawi ja nwindson'ajtim Jesús,

²⁸ jøts ja jam kyajpxwa'kxy mayjaa'y agujkp, jøts wa'ats ttukmadoogijxy midi ka' mibaat pøn tkajpxyo'ont. Tyukmadoow tuki'iyi ku ja israelit jaa'y kyatiwiyinmaydi, jøts pøni sa ja Dios kyajpxy jap yjaadyañi ku ja Jesús yiknitsokpi'aty, pøn ja israelit jaa'y yjajøp'e'x'ejttip.

19

Sa yja'jty sa kyubejty ja Pablo jam Efeso

¹ Ku ja Apolos jap wyinaty Corinto jøts ja Pablo jam ñajxy kojpkjotp, jøts yja'jty jam Efeso ma tpaajty namay ja myigu'uk pøn jaty ja Dios tja'myajtstip.

² Winets ja Pablo jam tyiktiyi jøts tniimaay:

—¿Tø meets ja Espíritu Santo mdatøkiyi ku ojts xjanchjawiidi ja Jesús?

Jøts ja t'adsojimbettøø:

—Omik øøts idøø'n ja nnijawit jøts kudam ja Espíritu Santo jaa.

³ Winets ja Pablo jadigojk tyiktiyi:

—¿Sudso'ampyts ojts mnøbatti?

Xjats ja t'adsojimbettøø:

—Jade'en øø nnøbejty sami Juan Bautista ja jaa'y tyiknøbejty.

⁴ Xjats ja Pablo wyaañ:

—Nugo eja'x'an idøø'n ja Juan Bautista myøø'y ja jaa'y ku ja yiknøbety, jade'en'ampy ja jade'en ttuñ jøts ja jaa'y jade'en yiknijawidit jøts ku ja tjanhyiktigatsti ja chinaa'yin. Nayide'en ja tniimaay jøts ja amumjoojt t'ajot'attit pøn wyinaty menwampnim, ja Jesús idøø'n yiktejp wyinaty menwamp yiknitsokpi.

⁵ Xjats ja jade'en tmadoodøø ku ja Pablo jade'en tniagajpxy, winets ojts ñøbatti ja nwindson'ajtim Jesús køjpx;

⁶ ku ja Pablo jade'en kyønixajidøø, jøts ja Espíritu Santo ñimejnidi, winets ja abikpyi ayuujk ojts tkajpxti, jøts tkajpxwa'kxti ja Dios y'ayuujk pøni sa ja Dios wyinmaa'nmyøøyidi.

⁷ Niimakmajtsk ja wyinaty yjaa'y'atti.

⁸ Tig'øøk po' ja Pablo jap yø'øy'ijty jam tsaptøjkjotp ma jam møk'ampy kyajpxwa'kxy, jøts ttukmibiky jade'en ja jaa'y sudso'ampy ja Dios ja nitanaa'yin tpiakta'aky.

⁹ Jamts winaaagin pøn tkamibøjktp, ja'ats møk ja wyinmaa'ñ tpiaktøø jøts jam mayjaa'y agujkp tjanchtaxe'ekti ja Dios kyajpxy. Xjats ja Pablo ja møøt ñamaytsuujtniyøø pøn ja ka'øy ayuujk tjagyaptip, winets ja tmøødiña ja myøøtjanchja'wibi jøts tmøødiyii'ñ ma jaa'y tu'uk txøøwi Tiranno pøn ja ixpøjktaajk wyinaty tjagyepy, jamts ja Pablo jabom jabom ja myigu'uk ttuk'ixpiky ja Dios kyajpxy.

¹⁰ Jade'en idø'øn ja jam tyuun majtsk jumøjt, ja'agøjxp idø'øn ja jaa'y ojts tnija'wigyøxti jagambaat ja Jesús kyajpxy, jade'en ja israelit jaa'y jøts nayide'en pøn ka'israelit jaa'dyi, pøn tsinaadyip Asia etjotp.

¹¹ Jøts ja Dios møk tmø'øy ja myøk'ajtin ja Pablo jøts ja milagri ja ttuun,

¹² Jøts ja Pablo yjanchyiktapaaty ja paay jøts ja wet, jøts ja tminøjkxti ma pamaa'y jaa'y jap, winets ja pamaa'y jaa'y ja'ayi ttatsøktøø, jøts ja miku' jade'eñi myajtsuujtidøø.

¹³ Jam wyinaty niwinaagin ja israelit jaa'y pøn nugo widejttip kajp kajp. Ja' ja tyunk'ajttip ja miximaaky ja mimuu'kk, jøts jade'en ja miku' ttukmajtsu'utti ja jaa'y, nay ja Jesús myøk'ajtin yiktunwajnip, jøts tnøjmi ja miku':

—Øts wamp, majtsu'ut yø jaa'y Jesús myøk'ajtingøjxp midi kyajpxyø'øpy ja Pablo.

¹⁴ Tu'uk ja israelit jaa'y pøn txøøw'ajtp Esceva, pøn ja teety tniwindsøn'ajtp, ja'ats idø'øn ja y'una'jk jade'en adøtstip, niwixujk wyinaty yjaa'y'atti.

¹⁵ Xjats ku ja jade'en ttundi, winets ja miku' y'adsojimbejtijidøø, jøts yiknimaadyøø:

—Ja' ø n'ejxkapy pøn txøøw'ajtp Jesús, jøts nayide'en ja' pøn txøøw'ajtp Pablo; jøts meets ka' mee n'ejxkapy pøn ja mbøn meets.

¹⁶ Winets ja jaa'y pøn wyinaty ja miku' tmøøt'ajtp, jøts møøt ñamaytsiyøø ja niwixujkpi jaa'y, jøts ja jade'en myimajada' agyidi ja miku', jøts niduki'iyi yikakøjxidøø janchwindsaachi jøptsaachi, niwa'ats ixwa'ats idø'øn ja yjanchpidsømnidøø jap tøjkjotpy.

¹⁷ Tu dø'øn ja jade'en yjajty jam Efeso, winets niduki'iyi tnija'widøø ja kajp jaa'y pøn jaty israelit jaa'y, jøts nayide'en pøn ka' y'israelitjaa'yidi. Ku tnija'widøø jade'en ja ayuujk, winets niduki'iyi ja jotmay yjanchpaajtidøø, jøts tu'ugyi ja nwindson'ajtim yja' tmøjiktajktøø.

¹⁸ Xjats nayide'en namay pøn jaty tmibøjktøø ja Jesús yja' winets ja pyøky tuki'iyi tkajpxnaxkøjxtøø, sa y'ijty kya'øy'adø'øtsti.

¹⁹ Jøts nayide'en may pøn jaty y'ijty tyundip ja miku' tunk winets ja kya'øñky tuki'iyi tniøøgyøxnidøø jam mayjaa'y' agujkp. Xjats ku tpayø'ødyøø ja nøky ja chow, wixijxkmyajk mil idø'øn tpayø'ødyi tum ja plati meen.

²⁰ Jade'en idø'øn ja nwindson'ajtim Jesús ja myøk'ajtin møj tnanky'ijxyiyi.

²¹ Xjats ku dø'øn jade'en yjajty, winets ja Pablo jade'en wyinmay jøts jam t'ats'ejxwa'añ ja myøøtjanchja'wibi jam Macedonia y'etjotp, jøts nayide'en Acaya y'etjotp, winets jam yja'atwa'añ jadigojk Jerusalén. Jøts nayide'en wya'añ, ku jam y'uknaxt Jerusalén jøts nayide'en ñøjxkt Roma.

²² Xjats ku jade'en wyinmaay ja Pablo, winets ja pyudøjkibi tkejxy namajtsk jam Macedonia. Timoteo ja xyøøw ja pyudøjkibi jøts jadu'uk Erasto, jøts ja Pablo jam jawaani yjaaktaa'nyii'ñ Asia.

Ku ja Efesit jaa'y yjanch'ambøjktøø

²³ Winet'et ja Efesit jaa'y tyiktsept'a'akwa'andi ja Jesús yja'.

²⁴ Tu'ugyi dø'øn ja' pøn jade'en tyiktso'ondaajk ja ayuujk, Demetrio ja xyøøw. Ja'abi tunk idø'øn ja yjagyepy, tum ja plati dø'øn yiksandi'øyip, jøts nayide'en ja mutsk tsaptøjkuna'jk tyik'a'øyiñaxy nayide'en sami dios Diana chaptøjk t'ixy. Janch niemeenbyøjktip idø'øn ja tyunk ja' pøn jaty jap møøt tyuun.

²⁵ Xjats ja Demetrio twaadsøøy niduki'iyi pøn jaty nay yø'øbi tunk tmøøt'ajttip, xjats ja tnimaay:

—Migu'uktøjkti, mnija'widipxi ku yø'øbi tunk nduktanajxindi janch øy janch tsuj ku ya njanchmeembyijkyindi;

²⁶ kumi m'ijxpy meets, mmadøøpy meets ku ja Pablo jade'en tkajpxyø'øy jøts wya'añ ku ka' yø' Diosi midi jaa'y yik'ø'yip sa adømin; jade'en ja Pablo ja jaa'y namay tø ttukmibiky, kidi yayip nugo jyaty, niduki'iyi dø'øn ja Asit jaa'y ja tnija'winidi.

²⁷ Ka' yjanch'øyi, janch tsø'øgi møøt yø', tsojk adøm ndunk jade'en wyindigø'øyindit, jøts nayide'en yø dios Diana chaptøjk tsojk yø nayide'en kya'ukyikmøjpiaktaknit pøn yø twindsø'øgidi pøn jaty ya Asia tsinaadyip, jøts pøn jaty tsoo'ndip o manaajx o magajp.

²⁸ Ku ja mayjaa'y jade'en tmadoodøø ja Demetrio y'ayuujk, winets ja yjanch'ambøjktøø jøts niduki'iyi wyandøø:

—j Janch møj adøm ndios Diana jøts ka' kyudigø'øty!

²⁹ Xjats ja kajp jaa'y xem yam yjanch'adøtsnibøkidøø, jøts ja Macedoniit jaa'y namajtsk yikmajtstøø pøn txøøw'ajttip Gayo jøts Aristarco midu ja Pablo myøøtwidijtpy. Xjats yik-pawejtstøø yikpakoo'tstøø, xjats yiknøjkxidøø jap møj tøjkjøtpy ma ja kajp ja yjunti tundaajk jap tjagyapti.

³⁰ Jamts ja Pablo nayide'en tyøkiwya'añ jøts ja myigu'uk t'atskugajpxwa'añ pøn wyinaty tø yikmatsti, xjats ja nay ja myøøtjanchja'wibi pøn møøt wyidity ka'ap ja myajtstuujtidoø.

³¹ Winets ja Pablo myiwin'ijxy nayide'en tkajxtøø ja y'ayuujk pøn jam windsøn'ajttip Asia, jøts ku ka' jam tpadøkit ja myigu'uk.

³² Xjats ja jaa'y jam junti tundaajkjøtpy nugo yjanchkajpxjø'økti, øy sa tu'uk jadu'uk yjanchwa'andi kumi tø ja jaa'y wyinaty namay yjanchyø'ømyukti, jøts ni tkanijawidi namay pøni tigøjxp idø'øn yø'ømyukti.

³³ Xjats tu'uk ja israelit jaa'y ja myigu'uk tyukmadoojoø pøni ti ayuujk idø'øn jap ñiyø'ømyuktup, ja' xyøøw Alejandro, ja'ats ja myigu'uk ojts kuwani ñajtswetsiyi jøts jam kyajpjt mayjaa'y agø'øm. Winets ja Alejandro xyaji'jky, ja' tyijpy ku chajpxajy jøts ja niduki'iyi y'amo'ondit, ja' kyugajpxwampy ja myigu'uk midu tø yikmatsti namajtsk.

³⁴ Ku ja Alejandro yik'ejxkajpy kudam ja y'israelitjaa'y, winets ojts jinaxy yjanchjaakajpxjø'økti. Kajpxti ja majtsk hora'an, xjats wya'andi:

—janch møj adøm ndios Diana jøts ka' kyudigø'øty!

³⁵ Xjats ja eskribaan ojts kø'øm tyik'amøñ ja mayjaa'y, jøts tnimaay:

—Meets Efesit jaa'y, ukmadowdi. Ñija'widip niduki'iyi ja naxwii'ñit jaa'y ku yø Efesit jaa'y t'ejx'etti adøm nmøjdios Diana chaptøjk, jøts nayide'en yiknijawi ku n'ejx'ijtyim ja y'awanax midu kidaajk tsajpjøtpy.

³⁶ Kumi janch idø'øn ja yjajty, kidits nugo mdsø'øgidi, ka' pøn ni ttuñ, tukween meets et, tsuj mjaa'y'attit

³⁷ kumi ya'at jaa'y midu meets ya tø xyikmiñ ka' yø ti ttundi, jøts nika'ap yø tjemdejti ttedeji adøm ndios Diana.

³⁸ Jøts Demetrio møøt ja tyumbi, pøni jaa' ja'adi pøn møøt ñañi'øøniwya'andi, mibaat yik-payø'ødyit jam kudunk wyindump, jøts tñigajpxtit kija' ja pyøky sudso'ampy ñañi'øøniyidi.

³⁹ Pøni wenk winmaa'ñ yø' midu meets ixyam m'amidøøpy, mibaat myø'ømyuktit jøts yikxon ngajpx'øyi'indit møøt ja kudunktøjk;

⁴⁰ tø ja wyinaty kya'øyi ku jotmøñ jam nyikni'øø'na'andit jam møj windsøn wyindump, jøts ku ja jotmøñ wya'ant ku adøm ja møøt ñachep'ijxya'am. Niti winmaa'ñits adøm sudso'ampy n'adsojimbejtindit, ku jotmøñ t'amido'ot tigøjxp ya jade'en n'adijchindi ngajotkujkindi.

⁴¹ Xjats ku ja eskribaan jade'en kyajpx'abajtyii'ñ jøts yø'øwya'kxnidoø niduki'iyi ja jaa'y.

20

Ku ja Pablo wyidijty Macedoniit etjotp jøts nayide'en Greciit etjotp

¹ Xjats ku ja mayjaa'y jade'en ñiyjotkukidøø, winets ja Pablo ja myigu'uk twaadsoogijxy jøts ja ojts tjaak'ukajpxwejni, ojts tukmadøy midu ja wyinmaa'ñ'ajtpy; winet møøt y'uknagajpxpoo'kxiniiyi jøts jam ñijky ma et txøøwi Macedonia.

² Winets jam ojts tkajpxpoo'kxkixy tjot'amøkajpxkixy niduki'iyi ja myigu'uk ma jaty jawyeen wyinaty tø ñaxy, winets jam choo'ngojmaa jøts jam yja'jty ma ja Grecia et.

³ Jamts y'uktaa'niyii'ñ tigøøk po', xjats ku jam choonwani barkijøtpy jøts ñøjkxwa'añ Siria, winets nay jamy tñija'wiyii'ñ kudam ja israelit jaa'y ñiwinmayiyi jøts yikmatst jap barkijøtpy. Winets wyinmaa'y jøts ne'egi ñøjkxt tekyjø'øm, paty jadigojk nay jam wyimbijty Macedoniit etjotp.

⁴ Ja' ja wyinaty yjamyøø'tajtpy niwixujk ja myigu'uk pøn txøøw'ajttip Sópater pøn kugajp'ajtp Berea, jøts ja Aristarco, jøts jadu'uk Segundo pøn kugajpidip Tesalónica, jøts ja Gayo pøn kugajpip Derbe, jøts jadu'uk txøøwidi Timoteo, jøts ja Tiquico, jøts jadu'uk Tróximo pøn jam kugajp'ajttip Asia.

⁵ Ku jam yja'tti Filipos, jamts øts wyinaty n'awixy, øts Lucas nxøøw midu ya'at nøky tjaapy. Xjats ja niwixujkpi jaa'y cho'onjawyeenidøø, jøts øøts jam ndaañ møøt ja Pablo, jøts øøts jamnim x'awixy jadigojk ma kajp txøøwi Troas.

⁶ Nay jamy øøts ja xøøw njaaktyimy'ukyiknajxy jam Filipos, ja'abi xøøw ku tsapkaaky yikay midu kalevaduri møøt. Xjats øøts jam ndsøø'ñ xøguixy jøts øøts ja barki jam ndatøjkiñaa, jødsnim øøts kymagoxk xøøw nja'jty jam Troas ma øøts ja nmigu'uk nna-tpajtyii'ñ, jamts øøts ojts ndaa'ni wixujk xøøw.

Ku ja Pablo ja myigu'uk ojts tñigajpxy jam Troas

⁷ Ku dyomingixøw'ajty jøts ja Jesús yja' yø'ømyukti, jøts ja tsapkaaky tyikwa'kxwa'andi sa ja nwindson'ajtim ojts tnatstuni jøts tnankyayi, xjats ja Pablo jap nayide'en kyajpxwa'añ. Kumi kyimjabom ja wyinaty choonwani paty idø'on ojts jeky'ampy kyajpxy kunim myøtsuu'miyi'iñ.

⁸ Jap ojts ñamyukyidi tigøok nipatøjkixpy ma jap wyinaty lampiri may yjajy;

⁹ jøts tu'uk ja mixy jam wyinaty chøoni wentani'am pøn txøw'ajtp Eutico. Kumi jeky ja Pablo kya'amaay, winets ja mixy jamyi mya'uu'yjøknaa jøts tu'ugyi ojts tyimyaanijky, winets jam ojts kyunaxy jam nipatøjkøjxp jøts ñaxkidaajky najxkøjxp, jam øøky yikwejtsji'jky.

¹⁰ Jøts ja Pablo tniwinajky jøts jam ñagyøxmuujtsøø oo'kpi ñikøjxp jøts tkøbatxajiyi'iñ, jøts tniamaay ja myigu'uk:

—Kidi mdsø'øgidi; juky yø'.

¹¹ Winets ja Pablo jadigojk pyatøjkigyomi jap nipatøjkixpy; japts ja tsapkaaky ttukwa'kxy, jøts kyaadyøø; winets yjaaka'amaay kunim xiiñiyi'iñ, jøts ñjøknaa.

¹² Xjats ja jaa'y tjanchtaxondaktøø ku ja mixy ja øy tsø'øky tyiknøjxni.

Ku ja Pablo chøø'ñ jam Troas jøts ñijky Mileto

¹³ Winets øø ndsoonjawyeenyi'iñ barkijøtpy, jøts øøts jap n'awejxwa'añ ja Pablo ma kajp txøøwi Asón, tekyjøløm ja yø'øwya'añ ku ja jam ñjøkxwa'añ.

¹⁴ Ku øøts ja nminabyajtiyøø jam Asón, winets øøts ja møøt barkijøtpy ndøjkiiyi'iñ, jøts øø nmøøtnijky mejñinaxy ma kajp txøøwi Mitilene.

¹⁵ Jøts øøts jam ndsøø'ñ jadigojk, jøts øøts kyimjabom jam nnajxy ja' y'awemp ma et jam txøøwi Quoio, winets øøts nja'jty jadu'ukpi xøøw ma kajp txøøwi Samos. Jøts øøts nnijky poo'kxpi ma kajp txøøwi Trogilio, jøts nay kyimjabomgøjmyi øø njatkojmi ma kajp jam txøøwi Mileto.

¹⁶ Jade'en idø'on yjajty kumi ka'ap ja Pablo jeky tyiknaxwa'añ ja xøøw jam Asia etjotp, paty kyanijky Efeso; kumi ja' ku tsojk yja'atwa'añ Jerusalén jøts jam tyiknaxwa'añ ja Pentecostés xøøw.

Ku ja Pablo ttukmadøøy ja Efesit møjaa'dyøjk ya'atpi ayuujk

¹⁷ Ku øø njam'ajty Mileto, winets ja Pablo twaadsøøy pøn jaty jam møjaa'dyøjk'ajttip ma tsaptøjk jam Efeso,

¹⁸ xjats ku ja yja'ttøø jøts tniamaay:

—Meets mnija'wip sa øts ya Asiit etjøøjty n'øyjaa'y'ajty ku øts ya miduk'ojk ojts nmiñ, jøts ixymbaat jade'eñim njaa'y'aty.

¹⁹ Mnija'widip sa øts ejtp nbaduuñ ja nwindson'ajtim Jesús y'ayuujk jøts ka'ap øts nnamyikexyiyi, njanchkuyaajxip øts ku ja jaa'y tkatsokti ja Jesús yja'. Jøts nayi mnija'wip meets sa øts ya ojts n'ayo'ombaaty ku øts ja nmigu'uk israelit jaa'y xjemdundi xedundi.

²⁰ Ka'ats meets ndamajtsu'uty ja øgyajpxy midu meets køløm myiktu'ump, ku ø nnigajpxy nayide'en mayjaa'y agujkp jøts adøjkjøjty nayide'en.

²¹ Niduki'iyi øts ndukmadoogixy jade'en ja israelit jaa'y jøts nayide'en pøn ka'israelit jaa'dyi, jøts ku tmatjstu'tuttit ja kya'ødyunk amumjoojt møøt ja Dios, jøts tmøjawidit tjanchjawidit ja nwindson'ajtim Jesucristo.

²² Ixyam øts kuwani nnijky Jerusalén ja'agøjxp ku ja Espiritu Santo møk xwaadsøy, ka'ap nnijawi pøni sa øts jam nøjx njaty.

²³ Jade'eñi nnijawi pøni magajp nnijky nja'aty, jade'en øts ja Espiritu Santo xuknijawi jøts ku kuwani nyiktsu'umt jøts jam møk n'ayo'ombaatt.

²⁴ Ka'ats øts yø nmøjpiakta'aky; wan ø t'øøky, ka'ap ø nnabya'ayøyi ja'agøjxp jøts øts øy jotkujk kuwani nyikyø'øwya'añ yø ndunk, kunim yjøkøxt midu øts nwindson'ajtim Jesús tø xmø'øy, jøts øts ja jaa'y øy tsuj ndukmado'ot ku ja Dios køløm tpa'ayøy ja ñaxwii'ñit jaa'y.

²⁵ Tø øts ya ngajpxwa'kxy ja Dios myøk'ajtin sa ttanitani ja yjaa'y, ixyam inet najtsja'wip øts jøts ku meets ka' n'ukniwimbejtmit.

²⁶ Paty meets ixyam ndukmadowa'añ jøts ku nipøn nganadyapøkyjawiit pøni jaa winaagin tyuu'tigøødyi.

²⁷ Kumi tø øts nnigajpxy tuki'iyi pøni sa ja Dios ja wyinmaa'ñ tpiaktaajky, ka'ap øts midu n'ayu'uch'aty.

²⁸ Jøts nayide'en meets køløm mnay'ejx'etidit, jøts niduki'iyi nayide'en ja migu'uktøjk x'ejx'ettit, kumi tø meets ja Espiritu Santo mbikta'agiyi jøts mdaandi ejx'ejtpi pøni pøn jaty ja Jesús yja' tpaduujnidip, pøn ja nwindson'ajtim Jesús køløm kyu'o'jkimbaajtip.

²⁹ Nija'wipts øts ku øts ya ndsoont jøts mye'endit wenkpi jaa'y, jøts myikwinmaa'nmya'atwa'anidit, jøts tyikutigøøwya'añt ja Jesús yja'. Jade'en idø'on y'adø'øtswa'andit kakeey miy'uk tyikutigøy ja borreegi'u'nk.

³⁰ Jøts nayide'en meets winaagin nøjx xwin'øøndi ja mmøøtjanchja'wibi, jøts ja xukmbøktit mididi ka' tyiyi yjanchi.

³¹ Paty øyim mnay'ejx'etidit; ja'myatsta'am ku meets tigøøk jumøjt xinaxy tsunaxy ngadamajstutu'jaty ja kajpxwejin ayø'ejx'ingøjpx.

³² 'Meets migu'uktøjkti, Dios møk mbudøkiyidip, jøts nayide'en myiktiwinyimayiyidit y'øy'ayuujkøjpx mididi xamidsojkindip sa ja x'ayo'ijxyindi, jøts nayide'en myikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios wyinaty tø tyikpøkwy'a'ach.

³³ Ka' meets ya ti n'amidøøy, ni meeñ, ni wet, niti.

³⁴ Wa'ats xnijawidi ku øts kø'øm ojts nnay'amiduniyi, jøts øts kø'øm nbaajty pøni ti jaty øts xka'ejtxøø, ndukpaajt øts nayide'en ja nmigu'ukti ja yja' pøn jaty ø møøt nwidijty.

³⁵ Ejtp øts ja nnigajpxy jøts ku jade'en mnamyidunidit, jøts xpudøkidit ja mmigu'uk pøn ja yja' ka'ejtxip, ja'myatsti ja nwindson'ajtim Jesús y'ayuujk sa ja wya'añ yide'en: "Ne'egi møj ja xondaajkin ja wyimbidsø'mxiyi pøn windsø'jkip, jøts ka'ap ja' pøn yikwindsø'jkip."

³⁶ Xjats ku ja Pablo jade'en kyajpx'abajtiyi'ñ, winets møøt ñagyuxendyaajkøø ja myigu'uktøjk jøts ja Dios t'ajot'ajttøø.

³⁷ Winets niduki'iyi ja myigu'uk wyinmaa'ñ yjanchmendøø jøts yjanchyaxtøø, xjats ja Pablo yikyukxajnajx jøts yiktsu'kxy.

³⁸ Janchjotmay'oo'knidip idø'øn ja wyinaty ku ja Pablo jade'en wya'añ jøts ku ka' nijuuni xøøw y'ukyikniwbejtnidit. Winets tmøøtnøjkxtøø ma wyinaty ja barki jam.

21

Ku ja Pablo ñijky jam Jerusalén

¹ Xjats ku øø nmatjstuufty ja nmigu'uk jam, winets øøts barkijøtpty ndøjki'ña, jøts øø tiy ndyimñijky ma ja et txøøwi Cos jam mejkyujk'am, jøts øø kyimjabom nja'aty ma txøøwi Rodas, jamts øøts jadigojk ndsøø'ñ jøts øø nja'aty mejy'am ma txøøwi Pátara.

² Jamts øø nbaajty jadu'ukpi barki mididi wyinaty nøjxpx ma et txøøwi Fenicia, winets øøts jap ndøjkiyi'ñ.

³ Jøts øøts jam nyø'øy mejyotp, winets øøts n'ixy anajy'ampy tu'uk ja et mididi jam mejkyujk'am, ja' xyøøw Chipre, jøts øø nja'jty Siria ñaxjotp. Ja ku ja barki wyinaty tyiktanwa'añ ja tsimy ma kajp txøøwi Tiro, xjats øøts jam n'uk'awidijty.

⁴ Nay jam øø nminabyaajtyøø ja nmøøtjanchja'wibidi, xjats øøts jam nmøøtaañ wixujk xøøw; winets ja nmigu'uktøjkti tñimaadyi ja Pablo jøts ku ka' ñøjkxt jam Jerusalén, kumi tø ja wyinaty ja Espiritu Santo tyuknijawiyidi ku jam sa yjatt.

⁵ Ku øøts wixujk xøøw n'uktsinaay winets øø ndsoonwani. Xjats øø niduki'iyi ja nmigu'uktøjk møøt ja ñidø'øxyti jøts møøt ja y'una'jkti øø xpadsøø'ñ, xjats øøts ojts xnajt-skaaxi jam mejy'am, winets øøts ja møøt n'ukuxanaaña, jøts øøts møøt ndios'ajot'ajty.

⁶ Winets øøts jam ja møøt n'uknagayajpxpoo'kxiniiyøø, xjats øø ndøjkiyi'ñ barkijøtpty, jøts ja wyimbejtnidøø tyøjkwindump.

⁷ Xjats øø ndsøø'ñ jam Tiro, jøts øø nja'jty ma kajp txøøwi Tolemada, jamnim øøts nminawya'kxiyøø ja barki jøts øøts ja nmigu'uk n'ukmigajpxy, xjats øøts ja møøt n'uktaa'niyi'ñ tukxøøw.

⁸ Winets øø kyimjabom ndso'ongojmaa møøt ja Pablo pøn jaty øø møø nwidity, jøts øø nja'jty jam ma kajp txøøwi Cesarea. Winets øøts nniijky jam tu'uk jaa'y tyøjkjotp pøn txøøw'ajtp Felipe, jøts pøn ja øy'ayuujk tmiwidejtp, jøts nayide'en y'ijty tunk'aty tyikwa'kxy ja jii'kxy, ja'ats øøts jam møøt ndaañ.

⁹ Ja Felipe jam ja wyinaty ja nimaktaxk ja ñøøx pøn ka'anim y'amatskidi, ja'ats tkajpxnaxtip ja Dios y'øgyajpxy pøn ti jaty ja ttukajpxnaxwajniyidip.

¹⁰ Tø øøts jam wyinaty ndaa'ni jeky ku tu'uk ja Dios kyugajpxy yja'jty pøn txøøw'ajtp Agabo, jøts pøn tsoo'p jam ma et txøøwi Judea.

¹¹ Ja'ats øøts ojts xmigajpxy, jøts ojts ja Pablo chum yikni'axji winets ñadyabaktsujmiyøø jøts nayide'en ñadyakøtsujmiyøø, jøts jade'en ja ejxa'an ja Pablo yikmøøy, jøts yiknøjmi:

—Ja Espiritu Santo dø'øn wamp jøts ku ja israelit jaa'y jam jade'en nøjx mduñiyi Jerusalén, jøts myikøyakt ma ja yikmøjktujkpi pøn ka'israelit jaa'dyi.

¹² Xjats ku øøts jade'en nnimadøøy møøt nmigu'uk pøn kugajp'ajttip Cesarea, winets øøts ja Pablo møk njanchjanimaay jøts ka' ñøjkxt jam Jerusalén.

¹³ Xjats ja Pablo y'adsojimbijty:

—¿Tiku mya'axti jøts øts nugo xyikjotmay'ookti? Wan twanjaty, ngupøkp øts wan øts tyikøtsumy tyikpaktsummy. Jøts pøni xyik'ookwandip øts jam Jerusalén, ngupøkp øts ja nayide'en nwindson'ajtim Jesús wyinmaa'ngyøjpx.

¹⁴ Xjats kumi ka'ap øøts ja Pablo xkajpxkyupiky, winets øøts jade'eñi n'amøøñ, xjats øø nwaañ:

—Wan tjaty pøni sa Dios kò'òm tyamidsøkyi.

¹⁵ Ku dø'øn jade'en y'uknajxy ja kajpxy, winets øøts ndsimy nyik'øyiyii'ñ, jøts øøts jam nnøjxwaa'ñ Jerusalén.

¹⁶ Winets øøts ja nmigu'uk winaagin xjamyøøt'ajty midì tsinaadyip Cesarea, jøts tu'uk midì kugajp'ajtp Chipre, ja' xyøøw Mnasòn midì wyinaty jekyip ja Dios kyajpxy tø tpabøjkniiy, ja'ats øøts xyikja'ada'akwamp jam Jerusalén ma wyinaty ja tyøjk tjagyepy.

Ku ja Pablo ojts tmigajpxy ja Jacobo

¹⁷ Xjats ku øøts jam nja'jty Jerusalén, jøts ja nmøøtjanchja'wibidi janch ejtni xoni øø xyikja'jty.

¹⁸ Winets øøts kymjabom nmøøtnijxy ja Pablo jam Jacobo tyøjkwindump ma wyinaty ja møjaa'dyøjkti niduki'iyi.

¹⁹ Xjats ja Pablo tkajpxpøø'kxy niduki'iyi pøn jaty jam wyinaty, jøts jaty; ttamimadyaknibøjkøø tuki'iyi sa jaty yjajty ku ja Dios ja myøk'ajtin jade'en tnanky'ijxyiyi jam ma jaty ja jamdi pøn ka'israelit jaa'dyi.

²⁰ Xjats ku dø'øn jade'en tmadoojidøø ja Pablo kyajpxy, winets yjanchxonjajtøø ja myigu'uk jøts tmøjpiaktøø ja nwindson'ajtim Dios, xjats tnimaadyøø:

—Øy'ajtp migu'uk, tø xnijawi ku ja israelit jaa'y mil'ampy tø tmibøkti ja Jesús yja', jøts nay ja' niduki'iyi wandip jøts ku kuwani ja Moisés kyutujk yikpadu'unt.

²¹ Jøts wandip ja' ku mets ja israelit jaa'y jade'en xukmadøy midì jagamgajp tsinaadyip, jøts ku ka' ttunk'attit midì Moisés kyutujk'ajt jøts ku ka' ja mutsk mixy'una'jk ja ejxa'aa' yikmo'ot ñe'kxkøxp, ni ngatu'unindit ja ngø'ømdsinaa'yin.

²² Sudso'ampy yø ndu'unindit? Janchnamyukidip inet ja nmigu'uktøjkti ku tnijawidit ku ya tø mja'aty.

²³ Øy'ajtp ne'legi jade'en xpadu'unt: Ja ya nimaktaxk nmigu'ukti pøn ja wyanda'aky jap tjagyaptip tsaptøjkjøtpy.

²⁴ Møødi jøts ja wa'ats'ajtin xpaattit, jøts xkujuuyit ja wyanda'aktyi jøts nayide'en jap xnankyaabiyit, jøts yiknijawit ku ja wyanda'aky tø tyik'adukti, jøts tnijawidit pøni ka'adam meets ja Moisés kyutujk xjanchpaduunjiyi.

²⁵ Jap øøts ayuujk jadu'uk njaakjagyepy, kumi tø øøts ja nøky jade'en nguexy ma jaty ja Jesús yja' pøn ka' y'israelitjaa'y, jøts øø ndukmadøy jøts ka'ap nugo tmijotmay'ooktit ja israelit jaa'y chinaa'yin. Ja'ayi øø ndukmadøy jøts ku ka'ap ja tsu'uch ttsu'utstit midì ja tsamaxan yiktawindsø'jkip. Nayide'en ka'ap ja ni'jpy tjøø'kxtit, jøts nayide'en ka'ap ja jiyujk tsu'uch ttsu'utstit midì ka'øy'oo'kp, jøts nayide'en kidi ja ñiyaa'y ja ñidø'øxy ñabyøjkyiyidit.

Ku ja Pablo yikmajch møj tsaptøjkjøtpy

²⁶ Xjats ja Pablo tmøødiyii'ñ ja nimaktaxkpi jaa'y, jøts kymjabom ojts tyiktso'onda'akti sudso tpaattit ja wa'ats'ajtin. Xjats nmøøt tyøjkiyii'ñ jap møj tsaptøjkjøtpy jøts ttukmadoowa'andi ja teety juuni yjøkøxt ja'abi jotmay. Yø' tyijpy ku dø'øn ja yjøkøxtit winets nidu'uk nidu'uk tyikme'endit ja yojxin.

²⁷ Xjats ku wyinaty wixujk xøøw tyika'pxwanidi ja yjotmay sudso tpaattit ja wa'ats'ajtin, winets ja Pablo ja israelit jaa'y jap y'ejxpaajtyøø jap tsaptøjkjøtpy pøn tso'ondip Asia. Ku ja Pablo jade'en yiknija'wiyii'ñ, winets ja jaa'y ñanky'ambøjkøxidøø ja xem ja yam, winets tmajtswa'andi ja Pablo,

²⁸ jøts tjanchtaya'axti tjanchtajokti jøts wya'andi:

—iMeets Israelit jaa'y, pudøjik øøts! Wan tmajchindi ya'atpi yaa'dyøjk pøn kajp kajp widejtp, jøts ja jaa'y jade'en tuk'ixpiky jøts ku ka'ap adøm ndsinaa'yin y'øyindi, jøts ja Moisés kyutujk nayide'en t'abaaxji jøts nayide'en adøm ndsaptøjk; jøts jinaxy ixyam tyimyaak'adi'ich ku ja griegit jaa'y ya tjaaktyimgyuwaaw'i, jøts jade'en tyikma'aty adøm ngunu'u'kxchaptøjk.

²⁹ Jade'en ja israelit jaa'y wya'andi ku ja Pablo jade'en tø yik'a'ejxnaxy jap kajpjøtpy, ku jap tmøøtwidity tu'uk ja griegit jaa'y pøn kugajp'ajtp Efeso, ja' xyøøw Tróximo. Jøts jawandipyim idø'øn ja jade'en tø net ja Pablo tmøøtnijxy ja griegit jaa'y jap tsaptøjkjøtpy.

³⁰ Xjats ja kajp jaa'y yjanch'ambøjknibøjkidøø, winets ja Pablo yikjidøjtpidsiimy jap tsaptøjkjøtpy, jøts ja tsaptøjk jaty tyik'adujktøø.

³¹ Tyimyk'ookwandip ja wyinaty, ku ja soldadi ñiwindsøn tnija'wiyii'ñ ku ja kajp wyinaty nugo yjanch'adøtsnidi.

³² Winets ja myiwindsøn ja ttuknija'wigyixy jøts ja pujtp yjanchja'ttøø jap ma ja mayjaa'y jap wyinaty. Kuts ja yik'ejxpaattøø møøt ja masyoldadi, winets ja Pablo jade'eñi yikmajt-stuujty jøts ka' y'ukyikwojpnaa.

³³ Xjats ja windsøn twinguyø'øyiyii'ñ ja Pablo, winets ja Pablo yikmajch, xjats ja windsøn tyikutujky winets ja Pablo adsow aduuk yiktagøtsuemy ja puxkadeen, xjats ja windsøn tyiktiy pøn jaa'y ja', ti tundigø'øyin ja wyinaty tø tuuñ.

³⁴ Xjats ja jaa'y ja xem ja yam nugo yjanchkajpxjØ'ktøø, ni sudso'ampy ja windsøn tjanchkamadooguki, winets tyikutujky jøts jap tnankyiknijkxyi ma ja soldadi kyutujktaajk japti.

³⁵ Ku jap wingon tyikja'tti ma eskalari jap, winets ja jaa'y tjanchjaakwojpw'a'andi ja Pablo ambøjkingøjxp, paty ja soldadi ojts køjxp tsapkø'ødi ja Pablo;

³⁶ janch mayjaa'y idø'øni ja wyinaty pameejnip, jøts tjanchtaya'a'xti tjanchtajokti:
—iWan tpa'øøky!

Ku ja Pablo yjanagyugajpxøø mayjaa'y wyingujkpy

³⁷ Ku wyinaty ja Pablo jap tyøkiwyaani soldadi kyutujktaajkjøtpty, winets ja Pablo tjanøjmi ja windsøn:

—¿Kidi y'øy'att ku nmigajpxt?

Xjats ja windsøn t'adsojimbijty yide'en:

—Øy'ajtp pøni mja'jtpy griegit ayuujk.

³⁸ ¿Kidi ja egyptitjaa'yip mets, pøn ja tsep namnim jawaani tkayiktso'ondakp, pøn ja yikjaa'y'oo'kpi jam ojts tmøøtsøøni nimakta'xk mil jam tø'øts'etjotp?

³⁹ Xjats ja Pablo t'adsøø y jøts tnimaay:

—Israelit jaa'y øts. Jam ø ngue'jxy Tarso mididi jam møj kajp'ajtp Ciliciit etjotp; tun ja may'ajtp jøts øts yø jaa'y nmigajpxt.

⁴⁰ Xjats ja windsøn tyikutujky jøts jaa'y tmigajpxt, winets ja Pablo jap eskalari'kijxpy wya'k'øviyi'n, jøts ja'ayi xaji'iky jøts ja jaa'y y'amo'ondit. Xjats ku ja jaa'y y'amongøxtøø, winets ja hebreit ayuujk ja tkajpxøjkiyi'n.

22

¹—Meets migu'uktøjkti jøts møjaa'dyøjkti, ukmadoo'jidik øts n'ayuujk mididi ngajpxwampy.

² Xjats ku ja jaa'y tmadowdi jøts ku ja Pablo tkajpxy ja hebreit ayuujk, winets niduki'iyi y'amondøø, jøts ja Pablo tnimaay:

³—Israelit jaa'y øts, jam ø ngue'jxy Ciliciit etjotp ma kajp txøøwi Tarso, jøts øts yø tø nyeeky Jerusalén, jøts øts ja' xyik'ixpijky mididi txøøw'ajtp Gamaliel, wa'ats øts ja xuknijawi adøm ndsinaa'yin pøni sa ja møjaa'chinaa'yin. Ojts øts idø'øni ja Dios yja' ka'pxy nbaduñ amumjoojt jade'en sa meets ixyam xuñin.

⁴ Øts y'ijty nmøjmidsep'ajtpy pøn jaty ja Jesús yja' tpaduujnidip, nyik'ooktibaat øts ja y'ijty, jøts nyiknijkxy ja yaa'y ja tø'øxy jap puxøjkjøtpty.

⁵ Wa'ats ja teetywindsøn tnijawidi møøt ja møjaa'dyøjk, kumi kø'øm øts ja xmo'odi ja kutujk jøts øts ja jam nmijnijky Damasco ma wyinaty adøm nmi'Israelit jaa'dyi. Jøts øts ja jam n'ixa'ay pøn jaty wyinaty tpaduujnidip ja Jesús yja', jøts øts yø nyikmeenwa'añ aguwanikøjxp jøts nyik'ayo'ombaatawa'añ.

Ku ja Pablo tnimadyaajky ja chinaa'yin ku ja tyiktigajch

⁶ Xjats ku øts ojts nmijnijky ja'abi winmaa'n, jam wyinaty wingon nja'atwani Damasco kujkxøøw et, winets øts ojts jotmøn ja jaj xnawidity mididi janch møk tsamamp, jøts n'ijxy ku kyidaajk tsajpjøtpty.

⁷ Winets øts jamyi nna'xkidaajky, jøts øts nmadoøø ja ayuujk ku øts yide'en xnimaay: "Saulo, Saulo, ¿tiku ø xjemdunwa'añ xedunwa'añ?"

⁸ Xjats øts nyiktiiy jøts nnimaay: "¿Windsøn, pøn mets?" Jøts ø x'adsøø: "Øts Jesús Nazaretit jaa'y, ja' pøn mjemdumpy mdedumpy."

⁹ Xjats øts njamyøøt yjancho'jkidøø ku ja jaj t'ejxpaattøø, ja' ka'ap ja tmadoodøø ku øts nyikmigajpxy.

¹⁰ Xjats ku øts idø'øni jade'en nyikmigajpxy, winets ø nnimaay: "¿Ti windsøn ndu'ump, sudso'ampy ndaa'byaatt?" Winets n'windsøn'ajtim xnimaay: "Pidø'øk jøts mnøjkxt jam Damasco, jamts tuki'iyi myiktukmado'ot pøni ti jaty mdu'ump."

¹¹ Kumi tø øts wyinaty ja jaj xyikwinjøøxy xyikwinapy, winets ja nmigu'uk jam x'ukwejtsnidøø, jøts øts xyikja'ttøø jam Damasco.

¹² Jam wyinaty tu'uk ja jaa'y pøn txøøw'ajtp Ananías, ja' idø'øni tiij tjanchpadump ka'pxy ja Moisés kyutujk. Xjats niduki'iyi ja israelit jaa'y pøn jaty jam tsinaadyip Damasco, yjanchojktip idø'øni ja' ja Ananías.

¹³ Xjats øts ja Ananías ojts x'ixy, jøts øts xnimaay: "Migu'uk Saulo, tawin'ejx yikxon yø mween jadigojk." Jøts øts jaty'i ojts nwin'ejxpiky, xjats nmigu'uk n'ejxpaajty.

¹⁴ Jøts ø xnimaay ja Ananías: "Ja Dios Teety pøn adøm n'apteety'amøj pyadundip jekyip, ja' kø'øm tø mdsøkyi jøts me mduknijawiyit ja y'øwiyinmaa'n, jøts ñanky'ijxyiyi ja n'windsøn'ajtim Jesús pøn tum tsuj ja winmaa'n tmøøt'ajtp, ja'ats kø'øm ja y'ayuujk mdukmadoo'jiyip.

¹⁵ Ja'agøjxp ja Dios jade'en ttuuf, jøts mets nøjxk xkajpxwa'kxy ja kyajpxy y'ayuujk, jøts xuknijawit tuki'iyi ja naxwii'niit jaa'y sa tø x'ixy jøts sa tø xmadø.

¹⁶ Jøts icyam, ζtiku nugo mgo'kni? Pidø'øk jøts mnøbatt, janchjaw; amumjoojt ja nwindson'ajtim Dios yja' jøts myikpøkwyā'adsiyit."

Ku ja Pablo tnmadyaajky sudso'ampy ojts yikexy jam ma jaa'y ka'y'israelitjaa'yidi

¹⁷⁻¹⁸ Ku øts idø'on jade'en njajty, winets øts jadigojk nwimbijty ya Jerusalén, jøts øts jap nniikxy tsaptøjkjøtpy Dios'ajot'ajtpi. Japts øts ja nwindson'ajtim xmigajpxy, jade'en øts ja n'ixy kidim ja jaa'y kyuma'ay, jøts ø xniimaay: "Putyi ya tsoon Jerusalén, ka'ap inet ja tmøjpikta'aktit sa øts inet n'ayuujk xjakajpxiyit."

¹⁹ Xjats ø nniimaay: "Mets teety, ñija'widip ja' ku øts jam y'ijty nniikxy ma jaty ja tsaptøjk, jøts øts jam nmach pøn jaty tpadundip mets mja', jøts øts ja ndagubety, yixkon njanchwiwøpy jøts nyikniikxy puxøjkjøtpy.

²⁰ Ñija'widip ja nayide'en ku øts jam wyinaty ku ja Esteban jam y'ø'jky mido mets m'ayuujk ojts tkajpxwa'kxy, jam øts wyinaty nayide'en ndani, jøts øts nwaqñ nayide'en jøts tyik'ooktit. N'eix'ejtidoø øts ja yik'oo'kpi ja wyet."

²¹ Xjats øts ja nwindson'ajtim xniimaay: "Putyi, jagam me ngajxwa'añ kajpxwa'kxpi ma jaty pøn ka' y'israelitjaa'yidi."

Ku ja Pablo ja soldadi windsøn yikpuxøjkjøtkiyøø

²² Xjats ku ja Pablo jade'en yjakajpxy, winets ja mayjaa'y møk'ampy yjanchkajpxjø'tkøø, xjats wyandøø:

—iWan tpa'øøky yø'øbi jaa'y! iKa'ap y'ukpaat'ajtiñi jøts yjaaktsøønit!

²³ Xjats ja mayjaa'y tjanchtayax'adø'øtsti jøts ja wyet tjanchajpwøjt, jøts ja pu'ux nayide'en tjanchwijø'økti,

²⁴ paty ja windsøn nayide'en tyikutujky jøts ja Pablo jap yikpøkjø'økt jap windsøn kyutujktaajkjøtpy. Xjats ja windsøn tyikutujky jadigojk jøts yikwopt, jøts kuwani ttuknigajpxwa'añ tigøjxp ku ja mayjaa'y jade'en myidsep'atyiyi.

²⁵ Xjats ku ja Pablo tø wyinaty yikøtsumni yikpaktsumni jøts yikwopwa'añ, winets ja Pablo tniimaay ja soldadi pøn jap wyinaty:

—ζMbaat'ajttip meets jøts meets ja romanit jaa'y xwopt mido ka'anim yiktiidyuñ?

²⁶ Ku jade'en tmadøøpy pøn ja soldadi t'ana'amp, winets ja jaty tniinikxy ja wyindsøn, jøts tniimaay:

—Ejxim ku jade'en m'adø'øtst, ζkidi xnijawi ku yø' romanitjaa'y'i?

²⁷ Winets ja windsøn twingunøjkxyi'ñ ja Pablo jøts tyiktiy:

—ζMjanchromanit jaa'y mets?

Xjats ja Pablo t'adsojimbijty jøts tniimaay:

—Paty ja' øts.

²⁸ Xjats ja windsøn tniimaay ja Pablo:

—Janch kajaa øts nmeen tø nyiktuñ ku øts ya nromanitjaa'y'atwa'añ.

Xjats ja Pablo tniimaay:

—Ka'ap øts ya ti jade'en tø ngujuy, ja' ku øts ya tø ndyimgye'exy.

²⁹ Xjats ku dø'on jade'en yjajty, winets ja soldadi jadi'iñi yjiyø'øgyøxnidoø pøn ja Pablo t'ukwopwandip. Xjats ja windsøn ojts nayide'en chø'øgi kudam ja' ryomanitjaa'y'i pøn wyinaty tø tkøwøøndi tpaqwøøndi.

Ku ja Pablo yiktanay'øyyiøø ja israelit jaa'y myøjkutujk adsinaabyi wyingujky

³⁰ Xjats ja windsøn kuwani tnijawiwya'añ tigøjxp ku ja Pablo ja israelit jaa'y ñi'øønyyi. Xjats kyimjabom tñankwyinajkiyøø ja puxkadeen, jøts tñankwyaamukiyøø ja teetywindsøn jøts nayide'en ja israelit jaa'y kyutujk adsinaabyidi, winets ja Pablo jap yikwaanijky jøts tyikajpxwa'añ jap windsøn y'agui'ptyi.

23

¹ Xjats ja Pablo twinguwā'jkiyi'ñ pøn jaty jap wyinaty møj windsøn'ajttip, jøts tniimaay: —Migu'uktøjkti, wa'ats Dios t'ixy ku øts ka'ap ja Dios nmidundigø, ejtp øts jotkujk nnayjawi.

² Winets ja møjteetywindsøn tyikutujky mido txøw'ajtp Ananias, jøts tniimaay pøn ja Pablo jap wyinaty wingon møøt tyani, jøts ja Pablo yik'akøjxø'økt.

³ Xjats ja Pablo t'adsøøpy ja møjteetywindsøn:

—iTi windsøn mets idø'on jade'en, nayide'en ja Dios mduniyit! Pøni mgutujk'adsinaapy tam mets, ζsudsøts øts jade'en xnankyoxwa'añyi pøni jap tam ja kutujk xmøødi?

⁴ Xjats ja y'adsøødoø pøn jaty ja Pablo jap wyinaty møøt wingon y'ity, jøts ja Pablo yikniimaay:

—¿Jade'endam idø'øn xmiǵajpxiǵøý ja møjteetywindsøn?

⁵ Xjats ja Pablo y'adsøøý:

—Migu'ukti, ka' øts yø nnijawi kudam yø myøjteetywindsøni; janch jade'en ja Dios kyajpxy wya'añ ku wya'añ: “Kidi xmiǵajpxiǵøý pøn jam yikutujktip mgajpkøjxp.”

⁶ Winets ja Pablo jam t'ejxkajpy ku majtsk piky ja windsøndøjk jamdi. Jam wyinaty pøn ja' tpadundip ja saduceit ixpøjkin, jøts nay jam ja'amidi pøn tpadundip ja fariseit ixpøjkin, paty ja Pablo møk ojts kyajpxwa'kxy, jøts wya'añ:

—Meets migu'uktøjkti, fariseit jaa'y øts jøts fariseit jaa'y øts ndeety. Ja' meets ixyam xatidyump ku øts n'awixxy'aty jøts ku ja oo'kpi jadigojk yjujppyiky jap oo'kpi jutjøtpty.

⁷ Xjats ku ja Pablo jade'øyn wya'añ, winets ja' pøn ja fariseit ixpøjkin tjagyaptip jøts nayide'en pøn ja saduceit ixpøjkin tmøøt'ajttip, ja'ats ojts møk ñadyamigajpxyidi kunim majtsk piky ja wyinmaa'ñ yjajttøø.

⁸ Ja saduceit jaa'y wamp jøts ku ka'ap ja oo'kpi yjujppyiky jadigojk jap oo'kpi jutjøtpty, jøts ku nayide'en ka'ap ja ankilis ma, jøts ni anmija'win jøts ni miku' niti kya'ity. Jade'en idø'øn ja saduceit y'ixpøjkin; xjats ja fariseit y'ixpøjkin tuki'iyi ja tjanchjawidi.

⁹ Xjats niduki'iyi kyajpxø'ktøø; winets winaagin ja kajpxweipi wya'kukiyi'ñ pøn tnija'widip ja Moisés kyutujk, jøts pøn ttsojktip ja fariseit y'ixpøjkin, ja'ats ojts wya'andi:

—Ya'at jaa'y ka' ti tundigø'øyn tjagyepy, jøtmøn ku yø tø myigajpxy; tu'uk ja ankilis uk øy ti, ka' y'øyi ku ja Dios yja' nugo ndatøjka'andit.

¹⁰ Xjats kumi janch møk idø'øn ja jeky ñagyajpxidøø, winets ja soldadi windsøn tjøpjawi ku ja Pablo jøtmøn ja mayjaa'y y'uknujkwak'xniyit. Winets ja soldadi ja twaadsøøý, jøts ja Pablo jam yikwejtspidsiimy mayjaa'y agujk, jøts jap jadigojk tyiknijkxy soldadi kyutujktaajk agui'py.

¹¹ Xjats ku kyoots'ajty, winets ja Pablo t'ixy kuma'ayjøtpty ja nwindson'ajtim Jesús, jøts ñi'mxyiyi:

—Pablo, jøtmøk nabyikta'agi, nayide'en jam nøjkk mgajpxwa'kxy ma ja møj kutujktaajk jam Roma, nayide'en sam øts n'ayuujk tø xkajpxwa'kxyi ya Jerusaleñ.

Ku ja Pablo yiktanibiktaajkøø jøts ja y'amaa'tsk'ookt

¹² Xjats ku jade'en ja Pablo kyumaay, winets ja israelit jaa'y winaagin tkajpxy'ajttøø ja Pablo jøts tyik'ooktit, møk'ampy idø'øn tyimñawajnidøø, ka'ap ja tkugayidit tku'uugidit kunim ja Pablo tyimyk'ejxnaxt, kunim ja tyimyk'ooktit.

¹³ Wixijkxy ñaxy idø'øn ja jaa'dyi pøn idø'øn ja Pablo jade'en tkajpxy'ajttøø.

¹⁴ Winets ja ñiwixijkxpyi jaa'y jap ñøjktøø ma ja teetywindsøn jap wyin'aty møøt ja møjaa'dyøjkti, jøts tniimaadyøø:

—Tø øøts idø'øn ndyimñagyajpxy, ka'ap øøts nguagaayiwya'añ ngu'uugiwyaa'añ, kunim øøts ja Pablo ndyimy'ejxtnim øøky.

¹⁵ Meets niduki'iyi pøn jaty ya kutujk adsinaadyip, amidowdi ja soldadi windsøn jøts jabom ya ja Pablo tyikme'ent mee mwindujy, jade'en xwindaayidit ja windsøn jøts ku ka'pxy yikpayø'øwya'añ ja pøky, jamts øøts wyinaty tuu'am n'awejx'ity, jøts jam yø y'ookt.

¹⁶ Xjats ja Pablo pyøøpy tnija'wiyi'ñ ja ayuujk ku ja yjamy ja jaa'y yik'ookwaa'añi, winets ja yjamy ja ojts ttukmadøý ma ja soldadi kyutujktaajk jap.

¹⁷ Xjats ja Pablo twaadsøøý tu'uk ja soldadi, jøts tniimaay:

—Møøt nøjkk ya'at mixy jap windsøn wyindujpy, jap ayuujk yø tu'uk tkajpxwa'añ.

¹⁸ Winets ja soldadi tmøødiyi'ñ ja mixy jøts ttukmadøøý ja wyindsøn, jøts tniimaay:

—Tø øts ja Pablo xyaajxi mididi jap tsumy, jøts øts tø xnøjmi jøts øts ya'at mixy nyikme'ent, jap ayuujk tu'uk tkajpxwa'añ.

¹⁹ Winets ja mixy kyøjø'øm ja windsøn y'ukwejtøø, yiknijkxyi abiky jøts yiktøøji:

—¿Ti øts idø'øn xamigajpxwamp?

²⁰ Xjats ja mixy t'adsøøý:

—Jade'en ja israelit jaa'y ayuujk tø tpiakta'akti jøts tø tkajpxy'atti, jøts mets myik'amido'ot ja Pablo jøts jabom yiknøjkt jap yikutujkpidi y'agui'py, ja'agøjxp tijy ku ka'pxy tpayø'øwya'andi ja pyøky.

²¹ Taayidip ja', kidi xmibiky, jap ja jaa'y yu'uch y'awejxwa'andi niwixijkxy ñaxy jap tuu'agui'py. Tø dø'øn ja møk tyimñawya'añidi jøts ka' tkugaayiwya'andi tku'uugiwyaa'andi kunim ja Pablo tyimyk'ooktit; jam inet idø'øn ja y'awejxti, ja'ayi mets ja nugo x'uk'adsojimbett.

²² Winets ja mixy ja windsøn y'ana'amiyøø jøts ku ka'ap pøn ttukmado'ot, xjats jade'eñi møøt ñawya'kxøø.

Ku ja Pablo yiktanikejxy ja møj windsøn Félix

²³ Xjats ja møj soldadi windsøn tyaajxiyi'ñ nimajtsk ja syoldadi jøts t'ane'emy, jøts ja syoldadi nimajtsk magø'pxy ñayjøp'ejxidit pøn tekyjø'øm yø'ødyip, jøts ja nidugui'pxy myajk

ja kawaagyöxpidi, jøts nayide'en nimajtsk magø'pxy ja takuu'møøtpidi. Ja'ats jam nøjktip Cesarea jøts choondit koots taxujk yaxp.

²⁴ Xjats ja windsøn nayide'en t'ane'emy jøts ja Pablo kyawaay nayide'en yikmo'ot, jøts nayide'en t'ane'emy jøts ja Pablo yik'ejx'ett, jøts møk møjaaaw yikøyakt ma ja møj yikutujkpi Félix jam.

²⁵ Xjats ja windsøn ja nøky tyik'øyi'ii'ñ jøts ja soldadi ja yiktamigajxiyi'ñ, yide'en ja nøky wya'añ:

²⁶ "Øts nxøøw Claudio Lisias midi møj soldadi windsøn, øts mets ja kajpxpoo'kxin ndaniguejpxy mets møj yikutujkpi Félix. Tu'uk øts ja ayuujk nguexy.

²⁷ Jade'en ja israelit jaa'y tø y'adø'øtsti, tu'uk ya'at jaa'y tsumdøø midi mets ixyam ndagødøjkp. Yø' wyinaty yik'ookwandip, xjats ku øts ojts nnijawi kudam yø' ry-omanit'jaa'y, winets ø nninijky møøt ja soldadi, ja'agøjpx ja jaa'y kyayik'o'jkøø.

²⁸ Xjats kumi nnijawiywampy øts tiku yikni'øøni, jøts nyiknijky jam ma ja israelit jaa'y myøjkutujk'adsinaabyidi,

²⁹ ja'agøjpx yjawi ojts yikni'øøni ku ja ojts tkamimadøya ja israelit jaa'y kyø'ømgutujkti, ka'ats pya'at'aty jøts ku tyik'looktit, jøts ni kyapaat'aty jøts puxøjkjotp y'ett.

³⁰ Tø nyiktuknijawi ku ja israelit jaa'y ñiwinmayiyi jøts yik'oogiyit, paty øts ixya nnajt-skajxi, paty øts ndukmadøya pøn tni'øø'ndip yø Pablo, wan jam tyikwingukidi jam mets mwindump. Yø'øyi kajpxy me ndaniguejpxy. Dioskujuyip."

³¹ Ku dø'øn jade'en ja soldadi ja kutujk yikmøødyøø, winets koots tmøøts'ondøø ja Pablo jøts jam tmøøt'at'øø ma kajp txøøwi Antipatris.

³² Jam t'adsoodøø ku ja Cyiliciit'jaa'y, winets tyiknidøøjøø pøn it jaa'y ja Pablo, xjats kawaachinaabyidi tjaakmøøtnøjkxtøø ja Pablo

³³ jam Cesarea, jøts jam tkøyaktøø ja nøky ma ja møj yikutujkpi jam jøts nayide'en ja Pablo yikøyajky.

³⁴ Xjats ja møj yikutujkpi tpa'ijxy ja nøky, winets tyiknidøøjøø pøn it jaa'y ja Pablo, xjats t'adsoodøø ku ja Cyiliciit'jaa'y,

³⁵ xjats ja Pablo yiknimaay:

—Jaanim øts nmado'ot ja mgajpxy ja m'ayuujk kunim ja mye'endit pøn mni'øø'niyip.

Winets tyikutujkpi jøts ja Pablo yikpøk'økt ma Herodes ja møj kyutujktaajk jam, jøts jam tnan'ky'ejx'ityiyi.

24

Ku ja Pablo yjanagyugajpxiyøø møj windsøn Félix wyingujkp

¹ Xjats kyimagoxkxøøw'ajty, winets ja møj teetywindsøn Ananias yja'ttøø jam Cesarea møøt ja møjaa'dyøjk, jøts tu'uk ja kajpx'øyi'bi pøn txøøw'ajtp Tértulo. Jade'en ja møj yikutujkpi jam twinguwa'jkidøø, jøts ja Pablo tni'øøniwya'andi.

² Xjats ja Pablo jap nayide'en tyikmendøø, winets ja Tértulo ttami'iiñ ja møj yikutujkpi Félix sa Pablo kya'ø'y'adi'ich, jøts wya'añ:

—Mets møj yikutujkpi, dioskujuyip. Tsuj jotkujk xjagyepy ja mgajp, ka' ma ti tsep tyuñi mets mwijy'ajtingøjpx.

³ Ejtp øøts jotkujk xmø'øy jøts øøts jotkujk nnaxy ndøki ømyadsowi, janchkunuu'kxy øø njawi mets møj yikutujkpi.

⁴ Mets m'ukmaa'kxp, jøts ka'ap øts mdiempi nugo nyikwindigø'øty. Jøts njanchminuu'kxakpy jøts ja tsojkin xjagyapt, jøts øøts n'ayuujk waani xmadoojit.

⁵ Tø øøts wa'ats nnijawi ku ya'atpi jaa'y tu'uk nugo y'ayo'onduß, jøts tnan'kñawya'kxy ja israelit jaa'y wyinmaa'ñ ma jaty yø wyidity, jøts yø' tngubajk'ajtp pøn tpadundip tu'uk ja nazaretit jaa'y y'ixpøjkin.

⁶ Nayide'en ya'at jaa'y tkuwaawi ja griegit jaa'y jøts øøts ndsaptøjk jade'en nugo xyikma'jtayi; paty øøts idø'øn yø tø nmach jøts øø njatiidyunwa'añ sa øøts ngutujk wya'añ;

⁷ ja soldadi windsøn Lisias øøts jade'en nugo xump jøts ttatøki øøts nwinmaa'ñ, jøts agawanikøjpx yikpiky yø Pablo,

⁸ jøts øøts xnøjmi pøni pøn nañi'øø'niyip wan ya tmendi me mwindujy, jøts me xpayø'øty jøts xnijawit tuki'iyi sa øøts ja øø'nin nbikta'aky.

⁹ Xjats ku ja Tértulo jade'en kyajpxkijxy, xjats ja myigu'uk israelit jaa'dyi pøn jaty jap wyinaty nayide'en tø wya'andi jøts ku ja janch wya'añ ja Tértulo, ka'ap ja tyaay.

¹⁰ Winets ja guvernador Félix ja Pablo tyikajpxy, xjats ja Pablo yide'en wya'añ:

—Mets møj yikutujkpi, nay ø ndsøjkpy øts jøts nwindanit ja nbøky mets mwindujy, kumi nnijaw'wip øts ku mets ya jeky yjumøjtyip tø myikutujktsøø'ni.

¹¹ Mets kø'øm m'ukyiktiiduyøkip øts n'ayuujk pøni ka' xjanchjawi, ku øts jam wyinaty myakmajtsk xøøwipnim tø nja'aty jam Jerusalén Dios'ajot'ajtpi.

¹² Ka'ap øts jam wyinaty pøn møøt nnachepkajpxyi, nisa øts ja jaa'y ngayik'adi'ich jam møj tsaptøjkjotp, ni jam ma jaty ja chaptøjk ja'adi, ni jam møj kajjotp.

¹³ Ya'atpi jaa'dyi niti tkananky'ejxidit midit øts yø xani'øø'ndip.

¹⁴ Yø'øyi øts wa'ats nnigajpxy jøts ku nbaduñ ja Dios midit øøts ejtp nbadumpy. Ka'ats øts yø nmigu'uk israelit jaa'dyi t'øyjawiði sà nbaduñ.

¹⁵ Njanchja'wip øts ja Dios nayide'en sam yø tjanchjawiði ku øø njøp'ixy ku ja Dios ja oo'kpi jadigojk tyikjujkyiky, øy ja oo'kpi y'øyi kya'øyi pøni sà ja y'atsøøniði.

¹⁶ Ja' ndsøjkpy jøts øts ja Dios ejtp nmi'øy'ajtnit jøts nayide'en ja naðwii'ñit jaa'dyi.

¹⁷ Tø øts mawyeen n'atswidity kawinaak jumøjt, jøts øts jadigojk tø nwimbity Jerusaleñ, jøts øts nmigu'uk nmay'atwa'añ n'ayo'ejxwa'añ, jøts ja Dios nayide'en nwindso'øgiwya'añ.

¹⁸ Ja'ats øts jap wyinaty ndumpy tsaptøjkjotpy sudso ø nbaatt nwa'ats'ajtn, ku øts ja israelit jaa'y jap xpaajtøø midit tsoo'ndip Asia, ka'ap øts ja mayjaa'y wyinaty nmøøði, ka'ap pøn ti ttuñ.

¹⁹ Ja'abi døø'n ya mibaat me'endip pøn øts jap ojts xpaatti jøts øts ya xni'øøniði, pøni ñija'widip ja' ku øts jap ndundigøy tsaptøjkjotpy.

²⁰ Uk ku ka' mye'endit sà øts idø'ø'n nwa'añ, wan ya'at tnigajpxti pøn jaty ixyaadi, pøni ojts øts ja nbøky nyiktapaaty ku øts ojts nyiktiidyuñ jap kutujk adsinaaby wyindujpy.

²¹ Uk jotmøñts øts jade'en xukpøky'atti ku øts ojts møk nmigajpxjø'økti, jøts øts yide'en nnimaay: "Meets ixyam xiidyump ja'agøjxp ku øts njøp'ixy jøts ku ja oo'kpi jadigojk yujukpyiky jap oo'kpi jutjøtpy." Jade'en øts nnimaay.

²² Xjats ku ja møj yikutujkpi Félix ja Pablo y'ayuujk tmadooji, winets jaayi tkajpxuky ja payø'øyin ja'agøjxp ku nayide'en tñijawi sà ja Jesús yjanchja'wibi yjaa'y'atti, paty jade'en tñimaay:

—Wan t'uk'awijxñim jade'en kunim ja mye'ent ja møj soldadi windsøn Lisias, ja'ats øts xjaaktukmado'opnim ka'pxy yø'øbi winmaa'ñ.

²³ Winets ja møj yikutujkpi t'ane'emy ja soldadi jøts ja Pablo chumy'ettnim, jøts tñøjmi nayide'en jøts ja Pablo ja myigu'uk kuwani y'atmigajpxit, pøni pøn jaty mendip kidi ja tkayiknajxnidi.

²⁴ Xjats ja Pablo jap tyaañ winaak xøøwin, winets ja møj yikutujkpi tmøøtja'aty jadigojk ja ñidø'øxy Drusila, pøn nayide'en israelit jaa'y, winets ja Pablo yikyaxtsøøy jøts tnigajpxt sudso'ampy ja Jesús yja' yikjanchjawi.

²⁵ Xjats ja Pablo yikxon jade'en tnigajpxy sudso n'øyjaa'y'ajtnidit sam ja Dios tsoøkyin, jøts kø'ø'm nayide'en nnay'ejx'ejti'indit, jøts ku Dios ja naðwii'ñit jaa'y nøjx ttiidyuñ. Winets ja møj yikutujkpi ojts ja' tkudsø'øgi jøts ja Pablo yiknimaay:

—Nøjxni ixyam, kunim ø n'awatsit jøts jadigojk nwaadsø'ot.

²⁶ Xjats ja møj yikutujkpi may ojk ja Pablo twaadsøøy, jade'en ja yjawnmay jøts ja myeenmyo'ojit ayu'uch, winetnims ja tmatjstu'tt.

²⁷ Majtsk jumøjt idø'ø'n jade'en ñajxy, nugo tjaximiwaadsow'ity ja Pablo. Winets ja møj yikutujkpi tyigajtsnaa, jøts jadu'uk tyøjkjy'ñ pøn txøøw'ajtp Porcio Festo. Jøts kumi ka'ap ja møj yikutujkpi Félix tmidsep'atwa'añ ja israelit jaa'y, ja'agøjxp idø'ø'n ja Pablo jap tyaañ tsumy.

25

Ku ja Pablo twingunøjkxøø ja møj yikutujkpi Festo

¹ Xjats ja Festo tyøjkjy'ñ møj yikutujkpi jam Cesarea, jøts kyidigøøk xøøw chøø'ñ jøts jam pyatøjkjy'ñ Jerusaleñ.

² Jamts ja teetywindsøndi møøt ja israelit møjjaa'dyøjkti twinguwa'jkidøø ja møj yikutujkpi Festo jøts ja Pablo yikni'øøni.

³ Xjats ja møj yikutujkpi yik'amidøøy ja may'ajt, jøts ja Pablo tnigaxit jøts jam tyikme'ent Jerusaleñ. Jade'en ja israelit jaa'y wyinaty tø tjaniwinmayidi jøts ja Pablo y'ookt tuu'ajy.

⁴ Xjats ja møj yikutujkpi Festo t'adsojimbijty jøts ku ja kø'ø'm tsojk wyimbetwa'añ jadigojk jam Cesarea, kumi ixjam ja Pablo tsumy y'ity.

⁵ Winets tñøjmi ja israelit jaa'y møøt ja teetywindsøndi:

—Wa'n tjaa'myindi ne'egi niduknað pøn jaty ku'aaw'attip, jamts xni'øøniði pøni tødäm ja'abi jaa'y tyundigøy.

⁶ Xjats ja Festo waani tyaa'niy'ñ Jerusaleñ tuktujk xøøwin uk majk xøøwin, winets wyimbijty jadigojk. Xjats kyimjabom ttawa'jtsiy'ñ ja kyutujktaajk, winets tñankñajtswaa'wiyøø ja Pablo.

⁷ Xjats ku ja Pablo twinguwa'jkjy'ñ ja møj yikutujkpi, winets ja israelit jaa'y nayide'en twinguwa'jkidøø pøn jam wyinaty tø choondi Jerusaleñ. Xjats ja Pablo mayjøøjp møk yjanchyiktani'øøni ja tyundigø'øyin, niti t'y'ajtn tkananky'ijxyidi.

⁸ Xjats ja Pablo kò'òm ñagyugajpxyiyi jòts tñimaay ja møj yikutujkpi:

—Nipòn niti ngadamidundigòy, ni ja israelit jaa'y kyutujk jòts ni ja chaptòjk, jòts ni ja romanit jaa'y myòjyikutujkpi ngamidundigòy.

⁹ Xjats ja Festo, kumi tyunwajnip ja may'ajt ja israelit jaa'y jòts y'òyjawiyidit, xjats ja Pablo tyiktiy jòts yiknimaay:

—¿Mnòjkxwamp jam Jerusalén? Jamnim òts nbayò'ty ja mbòky.

¹⁰ Winets ja Pablo t'adsojimbijty jòts tñimaay:

—Paat'ajtp òts yaayi nyiktiidyu'unt, kumi ja møj windsòn César ya kò'òm tò tpikta'aky yò kutujktaajk. Wa'atsxi me xnijawit ku òts ka'yò israelit jaa'y ti ndamidundigòy pòn jap wamp jòts òts ja nbòky ngu'oogit,

¹¹ ka'ap ø nwa'añ jòts òts ngagupòkt ja o'jkin; jòts pòni ka'adam yjanchi midi òts yò xani'òò'ndidip, nipòn kyapaat'atyiyi jòts òts xkòyaktit ma israelit jaa'y. Wamp òts jòts ja møj windsòn César òts kò'òm xiidyu'unt.

¹² Xjats ku ja Pablo jade'en kyajpxkijxy, winets ja møj yikutujkpi mòòt tkajpx'òyiyii'ñ ja pyutanaabyi, winets yiknimaay ja Pablo:

—Tò kò'òm mwa'añ ku ja møj windsòn César mdiidyuniyit. Ja'ats idò'òn mninòjkxp.

Ku ja Pablo twingunòjkxòø ja rey Agripa

¹³ Xjats ku ja Pablo jade'en yiknimaay kuts tu'uk majtskin ja xòow ñajxy, winets ja rey Agripa ojts ñinijxxyiyi mòòt ja Berenice, ja'ats t'atskajpxpoo'kxtip ja Festo.

¹⁴ Winets jam ojts kawinaak xòow tyaa'nidi, xjats ja Festo ttamimadyaajky ja rey sa ja Pablo pyòky jap, jòts tñimaay:

—Ja ya tu'uk ja jaa'y midi ja møj yikutujkpi pasadi puxòjkjòtpy yiktaañ.

¹⁵ Ja'ats mòk pyayò'dyip ja teetywindsòndi mòòt ja israelit mòjaa'dyòjkti. Xjats ku òts ojts n'òch Jerusalén, winets òts jam ojts xwinguwa'agadi, jòts òts mòk'ampy xnimaadyi jòts òts nnankyik'oogit yò Pablo.

¹⁶ Xjats òts nnòjmi jòts ku ka'ap jade'en ja romanit kyutujk wya'añ, ka'ap pòn ayu'uch nugo ñanky'oogidit, kuwani ja payò'òyin tyunit jòts kò'òm ñawindaniyidit pòni ti pønjabòn ñi'ii'mpy.

¹⁷ Ku ya yja'ttòø ja israelit jaa'y, ka'ap òts tiempì nugo nyikwindigòøy, jatyi kyimjabom ja ngutujktaajk ndawa'jtsiyii'ñ jòts ja Pablo nnankyikmejni.

¹⁸ Ku ja myendòø pòn jatyi òò'ndip, ni tu'uk ja tka'uktapaatnidi ja pyòky midi'ibi òts idò'òn n'ukjòp'ijxpy.

¹⁹ Ja'ayi nugo yiktani'òò'nip ja chinaa'yin, jòts nayide'en pòn txòow'ajtp Jesús, pòn ojts y'òòky jòts ja Pablo wya'añ ku ja yjujky'aty.

²⁰ Jòts òts ka' nmidaa'byaaty sudso'ampy òts kò'òm nyikjòpkòxt yò'òbi winmaa'ñ, paty òts yò Pablo n'amidòøy pòni nòjkxwamp Jerusalén jòts jam yiktiidyu'unt.

²¹ Kumi yò' kò'òm waan jòts jam yiktiidyu'unt ma ja møj windsòn César Augusto, paty òts jap nyiktsumy'ity kunim òts jam ngaxt møj windsòn windump.

²² Xjats ja rey tñimaay ja Festo jòts ku ja nayide'en tpatmadoowa'añ ja Pablo kyajpxy. Xjats ja møj yikutujkpi t'adsojimbijty, jòts tñimaay:

—Jabom ja x'ukmado'ot.

²³ Xjats kyimjabom'ajty, winets ja rey Agripa yja'ttòø mòòt ja ñidò'òxy Berenice, xjats ojts yjanchyikmòjpiakta'akti jòts jap tyòjkidòø møj tøjktòtpy mòòt ja soldadi windsòndi, jòts nayide'en ja mòjaa'dyòjkti pòn jatyi jam kugajp'ajtpy. Winets ja Festo twaadsòøy ja Pablo,

²⁴ jòts ttukmadòøy niduki'iyi ja windsòndòjkti, jòts tñimaay:

—Mets rey Agripa, jòts tuki'iyi pòn jatyi ya tò myendi, ixya dò'òn ja jaa'y midi ixyam mbatmadoowajnidip y'ayuujk. Tò òts idò'òn ja israelit jaa'y namay øy xmi'òòndi ya'at kòjxp jade'en ja jòts nayide'en jam Jerusalén, ejtp ø xnòjmidi jòts mibaat ku yò tyim'y'oòkt.

²⁵ Ka'ats yjawit ti møj tundigòø'yin tjagyepy jòts ja' tku'oogit; kò'òm yò t'amidòøy jòts jam nòjkx yiktiidyu'unt ma ja møj windsòn Augusto jam, paty òts nayide'en jam ndyimgyajxwa'añ.

²⁶ Meets migu'ukti, ka'ap òts nmidaa'byaaty ti pòky òts ndapaatp ya'atpi jaa'y, sudso'ampy òts nòky nyik'òyit jòts tnijawit ja nmòjwindsòn, jòts paty òts ixyam nyikmii' mee mwinduy, jòts me rey Agripa x'ukpatmado'ot jòts òts xuknijawit midi'ibi ayuujk òts idò'òn ngaxp.

²⁷ Janchnigyumaap ø njaty ku òts ja pòkyjaa'y nugo njanch'ukaxt, jòts ni ngatukmado'ot òts nmòjwindsòn pòni ti pòky yiktani'òò'nip.

26

Ku ja Pablo tñigajpxy ja chinaa'yin jam rey Agripa wyindump

¹ Winets ja rey Agripa tñimaay ja Pablo:

—Mbaat'ajtip jòts me kò'òm mgajpxt.

Xjats ja Pablo ja kyò' tyikpidi'jky, jòts yide'en kyajpxòjkijyii'ñ:

² —Njanchtaxondakpy øts ku øts xyikajpxwa'añ ya mets mwindujy, jøts øts kø'øm nwindanit tuki'iyi pøni sã jaty øts ja israelit jaa'y xka'odyeiti.

³ Øy'ajtp nayide'en kumi mets mnija'wip tuki'iyi øøts ndsinaa'yin sã øø n'israelitjaa'y'aty, jøts ti jaty øøts ejtp nnadyamigajpxiyip. Paty mets n'amidø y jøts waani x'ukmado'ot øts ngajpxy.

Sã ja Pablo chinaay myjawayeen ku ka'anim tyiktigach ja chinaa'yin

⁴ Ñija'widip nmigu'uk israelit jaa'y niduki'iyi sã øts njaa'y'ajty jam ndigam ku nmutsk'ajty, jøts nayide'en sã øts njaa'y'aty jam Jerusalén ixymbaadym.

⁵ Pøni ñigajpxwandip wan tñigajpxti, kumi ñija'widip yø' ñayide'en ku øts mutskyi ja fariseit ixpøjkin nbadøjkiyi'ñ midu ka'pxy tpadundip ja Moisés kyutujk.

⁶ Ja'agøjpx øts nyikni'øøni ku øts njøp'ixy ku ja Dios Teety ja oo'kpi jadigojk tyikjujkyipyi jap oo'kpi jutjøtpy, kumi jade'en ja Dios Teety kø'øm ja wyandaajkin tmø'y øøts n'apteety'amøj jøts jade'en ttu'unt.

⁷ Jøts niduki'iyi makmajtsk kajp ja israelit jaa'y tjøp'ejxtit jøts ku ja Dios ja wyandaajkin tyikjøpkøxt, paty ejtp t'ajot'attit ja Dios jøts tjä'myatsti jøpy ux. Mets rey Agripa, nay yø'øbi winmaa'ñ øts idø'øn yø nmigu'uk israelit jaa'y xkada'øjja'widip, jøts øts xani'øøni.

⁸ Ka' mee nayide'en xjanchjawi jøts ku ja Dios ja oo'kpi tyikjujkyipyi jadigojk?

Sã ja Pablo jawyeen tjemduuñ ja Jesús yjanchja'wibidi

⁹ Øts kø'øm øjts nwinmaa'mbyaaty jøts øts ja Jesús Nazaretit yjanchja'wibidi øts o sã nduujniyi, jøts ø møk nyik'ayo'ombaattø.

¹⁰ Jade'ents øts idø'øn jam n'adijch Jerusalén ku øts ja teetywindsøn xmo'odi ja tiy'ajtin jøts øts ja Jesús yjaa'y namay ndsujmyit; jøts nayi waan øts idø'øn jøts y'ookit.

¹¹ Kawinaak øjk øts idø'øn kø'øm ja møk nyik'ayo'ombaattø, jøts kuwani ndukmajt-stu'utti ja yjanchja'win. Jade'en øts idø'øn n'adijch mã jaty ja chaptøjk, janch awa'an'ampy øts idø'øn nbawidijty jagamgajp paat.

Ku ja Pablo jadigojk tñimadyaajky sã ja chinaa'yin tyiktigajch

¹² Nay yø'øbi winmaa'ñ øts wyinaty nminijxpy jam Damasco sã øts ja teetywindsøn wyinaty ja kutujk tø xmo'øy.

¹³ Winets ø kujkxøw et jam tuu'am øjts n'ejxpaaty tu'uk ja jaj midu tsajpjøtpy kyidaajky, janch møk idø'øn ja yjajy nika'ap ja xøøw jade'en yjajy, jøts øøts ja jaj øjts tuki'iyi xnowidity pøn jaty øts jam wyinaty nmøøt.

¹⁴ Winets øøts niduki'iyi nnaaxkidaajky, jøts øts nmadøøy tu'uk ja hebreit ayuujk ku ø xnimaay: "Saulo, Saulo, ztiku ø xjemdunwa'añ xedunwa'añ? Kø'øm mnay'ayo'onduniyi jade'en kidi tsakaa ku ja ti tnepy jøts ja kø'øm kujp ñadyukyø'odyiyi."

¹⁵ Winets nñimaay: "¿Windsøn, pøn mets?" Winets øts jatyi nwindøn'ajtim xnimaay: "Øts Jesús Nazaretit jaa'y, nay ja' pøn mjemdumpy mdedumpy."

¹⁶ Pidø'øk wa'kuki, ja'agøjpx øts ixyam kø'øm nnanky'ijxyi jøts øts xmidu'unt, jøts mguga-jpxy'att pøni ti jaty ixyam nduk'ijxpy, jøts pøni ti jaty me njaaktuk'exp.

¹⁷ Øts mets nnøø'mo'op nduu'mo'op jam israelit jaa'y etjotp, jøts nayide'en mã ja jaa'y kya'israelitjaa'yidi mã mets ixyam ngajxwa'añ.

¹⁸ Yide'en idø'øn jam nøjx mduñ, jøts ja jaa'y xkajpxwejt jøts ja ka'øy winmaa'ñ tmajt-stu'uttit, jøts ja tsuj winmaa'ñ tpabøktit. Kidi ja miku' y'ana'amin t'ukupøjkiniyidi, ja Dios yja' tu'ugyi pyaduujnidip; jade'en xukmado'ot jøts ku øts nja' xjanchja'widit, jade'en'ampy yikpojkipmaa'kxtit, jøts nayide'en yikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios tø wyinaty tyikpøkywa'ach."

Ku ja Pablo tpaduuj ja ayuujk midu tsoo'mp tsajpjøtpy

¹⁹ Mets rey Agripa, nbaduujni øts idø'øn tuki'iyi sã jaty øts ja Jesús xnimaay ku øts ja y'ayuujk nmadoojoø midu jap tsoo'mp tsajpjøtpy.

²⁰ Winets øts jam n'uktukmadowdi jawyeen pøn jaty jam wyinaty Damasco jøts nayide'en Jerusalén, jøts jam nayide'en tuki'iyi pøn jaty Judea etjotp, winets øts n'uktukmadowdi pøn ka'israelit jaa'dyi, jade'en øts jam n'uktukmadøøy jøts ja pyøkyu'unin tmajtstu'uttit jøts ja Dios yja' tu'ugyi tpaduujniyidit, nayide'en tsuj yjaa'y'attit jøts jade'en tnanky'ejxidit ku ja chinaa'yin tø tyiktigatsti.

²¹ Ku øts ja jaa'y jade'en ngajpxwejt ja'agøjpx øts ja israelit jaa'y jap xmajtstøø tsapjøkjøtpy jøts øts ja' xuku'oogiwya'andi.

²² Møj øts ja Dios ja pudøjkin xmo'øy ku øts ixymbaat ja kyajpxy y'ayuujk ngajpxwa'kxiyi, jøts ø ndukmadøøy niduki'iyi pøn jaty ixpiky pøn jaty ka'ixpiky. Nijuuni øts ja jaa'y ja wenkpi ayuujk ngadukmadøøy, yø'øyi ngajpxy nayide'en sã ja Dios kyugajpxy jøts sã ja Moisés øjts wya'andi,

²³ ku ja yiknitsokpi kuwani y'ayo'ombaatt jøts ku ja wyinaty tø y'øøky, ja'ats myijawyeen tunjøpip ku ja yjujkpyøkt jadigojkt jap oo'kpi jutjøtpy, jøts jade'en øøts njaa'y tũknijawit ja wa'ats'ajtin møøt tuki'iyi ja naxwii'ñit jaa'y.

Ku ja Pablo tjadukmibøkwañ ja rey Agripa jøts tpadu'unt ja Jesús yja'

²⁴ Xjats ku dø'on ja Pablo jade'en ñagyugajpxiyi, winets ja møy yikutujkpi Festo møk'ampy yjanchkajpxy, jøts ja Pablo yiknimaay:

—iMjanchmo'tp me Pablo! Yø m'ixpiky'ajtin me nugo myikmo'jtíp.

²⁵ Xjats ja Pablo t'adsojimbijty jøts tnimaay:

—Mets øy møy yikutujkpi, ka'ap øts nmø'øty; tiy øts idø'on nwa'añ midì øts ngajpxpy.

²⁶ Ixya dø'on ja rey Agripa pøn yø'øbi winmaa'ñ wa'ats tnija'wip, paty øts ya jøtmøk ngajpxy yø' wyindujy; wamp øts idø'on ku yø' tnijawì tuki'iyi, kumi ka'ap ja jam ayu'uch yjajty midì øts idø'on nnigajpxpy.

²⁷ iMjanchja'wip mets rey idø'on sà ja Dios kyugajpxy wya'andi? N'ijxpy øts ku yjawi xjanchjawi.

²⁸ Xjats ja rey wya'añ:

—Kuk øts jeexyip jawaani xjaaktukmadøy, tøk øts yø jeexyip ngupiky.

²⁹ Xjats ja Pablo y'adsøøy:

—Øyi ja waani uk øyts ja yjamayi ya'atpi ayuujk, ka'ayi mets ja'ayi nadyu'uk xjanchjawit, wa'ambim ja Dios niduki'iyi tjanchjawidit pøn jaty øts n'ayuujk ya tø xmadooji.

³⁰ Ku dø'on ja Pablo jade'en kyajpxkijxy, winets ja rey niduki'iyi wya'kukidøø møøt ja møy yikutujkpi, jøts møøt ja ñidø'øxy jøts pøn jaty jap wyinaty,

³¹ winets abiky ñøjkxti jøts jap tkajpx'øyidi ja Pablo pyøky, jøts yide'en ñawayajnidøø:

—Ka'ap yø'øbi jaa'y yjawi ti tuu' jøts yø' tku'oogit, jøts ni nayide'en kyapaat'aty jøts jap puxøjkjøtpy y'ett.

³² Winets ja rey Agripa tnimaay ja møy yikutujkpi Festo:

—Tø yø jeexy yikmajststu'uty ku yø jeexy kø'øm tka'amidøy jøts ku ja møy windsøn César ty'idyuniyit.

27

Ku ja Pablo yikejxy Roma ma ja møy kutujktaajk

¹ Xjats ja møy yikutujkpi twinmaadyøø, winets ja Pablo yikajxwa'andi jam Italia møøt ja myibuxøjk jaa'y pøn jaty jap wyinaty tsumdyi, jøts nayide'en øts nmøødi pøn ya'at nøky tjaapy. Winets ja soldadi pyøkjø'jkidøø midì txøøw'ajtp Julio jøts midì tñigubajk'ajtp tukpiky ja soldadi, ja' xyøøw ja soldadi tukpiky Augusto.

² Jam wyinaty nayide'en tu'uk ja Macedoniit jaa'y midì kugajp'ajtp Tesalónica, ja' xyøøw Aristarco. Winets øø tuknaax ndøjkiiy'ñ møøt ja Pablo jap barkijøtpy, jam ja barki wyinaty tø chøøñ Adramitio, jøts ñøjkxwa'añ ma jaty ja kajp jam Asiit etjotp.

³ Xjats øøts jam ndsøø'ñ Cesarea, jøts øø kyimjabom nja'aty ma kajp txøøwi Sidón, jamts ja soldadi Julio t'ayo'ixy ja Pablo, jøts ja myigu'uktøjk t'atstukmigajpxy jøts ja myigu'uktøjk yikpoo'kxiyi.

⁴ Xjats øøts jadigojkt ndsøø'ñ Sidón, winets øøts ja poj møk'ampy xjøpkuyø'øyiyi'ñ, paty øø kuwani nnayø'øy aga'ñ'ampy ja et midì txøøw'ajtp Chipre, ma ja poj tuda'aky yø'øy.

⁵ Xjats øøts ja mejy ndanajxy jam Cilicia y'et'amidiy jøts nayide'en Panfilia y'et'amidiy, winets øøts nja'jty ma kajp txøøwi Mira jam Licia y'etjotp.

⁶ Jamts ja soldadi tu'uk t'ixaay ja barki, jøts ojts t'ejxpaaty tu'uk midì tø wyinaty chøøñ Alejandria jøts jam ñijxy Italia, jøts øøts jadigojkt xyiktøjkiiy'ñ xjats øø ndsøø'ñ.

⁷ Kawinaak xøøw øøts idø'on jade'en udy'a'agy: n'awidijty, jøts øøts awisà jam njanchja'jty jam Gnido kajp y'amidiy, kumi ka'anim wyinaty ja møk poj y'amøki winets øøts jade'en'ampy jadigojkt n'awidity Salmón kajp y'amidiy. Xjats øø nnayø'øy ma ja mutsk naajx jam mejy kujk'am midì txøøw'ajtp Creta.

⁸ Xjats øøts jade'en awisà njanchjanayø'øy ja naajx mejyotp, xjats øøts awisà nja'jty ma kajp txøøwi Buenos Puertos jam Laseit kajp wingon.

⁹ Tø øøts wyinaty jeky ndaa'niñi mejyotp, janch tsø'øgi møøt wyinatyni, jade'en'ampy ku wyinaty ja xuxpyoj myenwani paty ja Pablo tjanimaay ja yikbarkiyø'øbyi,

¹⁰ jøts wya'añ:

—Meets migu'uktøjkti, ka' yjawi y'øyit ku ndso'ongojmi'indit, nnaajtsja'wip øts ku yjawi mayjøøjp n'ayo'ombaajtindit, windigø'øpy yø barki møøt ja pyiktà'aky, nayi kø'ømbaat yjawi adøm nwindigø'øyindit.

¹¹ Ka'ats ja soldadi ja Pablo y'ayuujk tmibøjkøø, ja' ne'egi pyabøjk ja barki wyindsøn jøts ja yikyø'øbyi.

¹² Janch mək idə'əon xyuxy jəts yjanchpəjy jam Buenos Puertos, paty namay yjanchwandəə jəts əy'ajtp əəts jam ne'egi ndsoont, jəts pəni majadakp əəts jəts nja'att Fenice midi nay jam təmp Creta y'etjotp, jamts əə nyiknəxt ja xuxyuu ja'agəjxp ku ja poj ka'ap jam jadine'en tyəki.

Ku ja poj yik'adətsnibəjkiñaa ja mejy

¹³ Xjats ku ojts waani y'aməki ja poj, winets pyojkeeky jaduktamajñ jəts ja jaa'y wyandəə əy'ajtp jəts yjaakyə'ədyit. Xjats əə ndsəə'ñ, jəts əə nyə'əy mejpya'am et, jəts əə nnajxy Creta wingon.

¹⁴ Kuts waani y'ijty, winets ja poj mək'ampy yjanchmiñ midi yiktejp Nordeste.

¹⁵ Ja'ats ja barki mək tjəpkuwojəə jəts nugo wyejtsma'jtijəə, jəts ni sudso'ampy ja kya'ukyikmajadaajknijy ja poj, xjats əəts ja ndyimy'ukmajtstutni, wan tyiknijxy pəni ma tyiknijxy.

¹⁶ Xjats əəts jam nnajxy ja' yjəxkə'əm mə ja naajx lii'nim mejkyuk'am midi txəwə'ajtp Clauda, mə jam ka'ap jadine'en mək pyəjy. Jamts ja mutsk barki midi yikpajidəjtp, ja'ats əəts awisə njanchyiktəjkiy'iñ jap məj barkijətpy.

¹⁷ Kuts əəts jade'en nyikpatkijxy ja mutsk barki, winets ja məj barki ja məj tejpxy yikta'awəə'nmujky. Xjats kumi tsə'əgidip ja jaa'y ku ja barki jam tyəkəit pu'jotp midi txəwə'ajtp Sirte, winets ja majpxy məj wet twejtstəədəə midi ja poj məəə tminamyajtsip,

¹⁸ jəts əəts ja tsimy jamyi tuki'iyi nguwojnəxkijxy mejyotp;

¹⁹ jəts kyimidigəə xəwə ixanimts əəts ndyimy'ukuwojnəxkəjxni tuki'iyi ti jaty ja barki jap wyinaty myəə'tajtpy.

²⁰ Kawinaək xəwə əəts jade'en nugo agubajkpy njanchyə'əy, niti əə nga'ijxy ni xəəwi ni maədsə', ja'agəjxp ku mək yjanchtuuyəəch. Ka'ap əə n'ukjəp'ejxni jəts əəts jam jujky nbidsə'əmt mejyotp.

²¹ Xjats əəts jade'en kawinaək xəwə n'ayuu'ijty, winets ja Pablo ojts wya'kuki jam jaa'y agujkp jəts wyaəñ:

—Migu'uktəkti, əy'ajtpik jeexy kuk əts n'ayuujk xmadəjəə, winetsik ngatso'əñindəə jam Creta jəts ya'atpi ayə'on jeexy jane'en ngapaajtyindi.

²² Kidi mjotmay'ookti, əy yə barki wyinaty yjawindigəy, nipənts kya'ookt.

²³ Mnija'wip meets ku əts ja Dios Teety nməə n'ity, jəts ku əts ja y'ayuujk nbaduujniyi, ixyamgoots əts nwində'nəjtim tu'uk tə xaniguxy ənkilis

²⁴ midi əts tə x'atsnəjmi: "Ni mgatsə'əgit Pablo, kuwani jam Roma xwinguwa'agit ja məj windsə'n César, ja'agəjxp ja Dios myiknitso'ok'atidit niduki'iyi, jəts nipən tu'ugin kya'ookt ya barkijəəjty."

²⁵ Paty migu'uk ixyam nnigajpxy, məkpikta'akti mwinmaa'ñ, njanchja'wip əts ja Dios jəts nnijəwi ku kuwani jade'en tyikjatt sa əts ja ənkilis tə xnəjmi.

²⁶ Ja' ku kuwani ja mək poj jam nəjxk xnajtsjibejpi'indi mə ja naajx jam mejyotp.

Jade'en idə'əon ja Pablo tnimaəy ja myigu'uk.

²⁷ Majtsk saməni əəts idə'əon wyinaty tə nwidity barkijətpy, winets əəts jam ojts koots nja'aty mə məj mejy txəwə'i Adria, mək idə'əon ja poj ja barki jam tjanchyik'adi'ich. Xjats ku chuu'm'ajty, winets ja yikbarkiyə'əbyi tnajtsja'widəə ku ja barki ja naajx yjawi tpaatwani.

²⁸ Winets tkejpxti ja nəə kyəjnk'ajtin, xjats t'ejxti ku ja ee'pxmaktujt metri kyəjnk; xjats jawaani yjaakyə'ədyəə jəts jadigojk tkejpxkojmidi, xjats t'ejxti ku ja ee'pxtaxujk metri kyəjnk.

²⁹ Winets chə'jkidəə ja yikbarkiyə'əbyi ku jotməñ ja barki jam wyinguwəpəit məj tsaəgəjxp, winets ja yikbarkiyə'əbyi ja məj pux'ajo'jk twendidəə maktəxk, xjats ja tniwəjidəə kunin ja jap nəəbatki'py muum y'ajə'əky, xjats ja barki jade'en wya'k'aməkiy'iñ. Janch tsə'əgijəwi də'əon ja jam tyiknəxti ku pojn yjanchkəxiñi.

³⁰ Jəts wyinnaydi ja yikbarkiyə'əbyi jəts kya'akwə'andi jam məj barkijotp, winets jam nəjxktə barkijəp'am, jade'en nədyijyi ttunwa'andi jəts ja pux'ajo'jk tjaəkpikta'akwə'andi jap mejy'ok'ajpy, ja'agəjxp ojts tyikpidsəmwə'andi ja mutsk barki jəts jade'en kya'akwə'andi.

³¹ Xjats ja Pablo t'ejxpaajty, jəts jade'en ttukmadəəy ja soldadi jəts nayide'en ja myisoldadi, jəts tnimaəy:

—Ku yə yikbarkiyə'əbyi ya kyata'andit, ni sudso'ampy adəəm ya ngapidsəə'mindit.

³² Winets ja soldadi tmidsujkidəə ja mutsk barki jəts nəəjotp tyiknəxkidəktəə, ja'agəjxp jəts nipən kyaka'akt.

³³ Xjats ku xiinjəyajky, winets ja Pablo tnimaəy ja myigu'uk jəts o winə'ənin kya'adyit, jəts tnimaəy:

—Tə yjəwi myajtsk syamanifi ku jade'en mgama'adi jəts ni mgakaydi.

³⁴ Əts wəmp jəts winə'ənin mga'adyit jəts ja məjəaw xpəktit, pə ixyam inet nipən inet tu'ugin kyawindigə'əty.

³⁵ Xjats ku ja Pablo jade'en tkajpxwiyj ja myigu'uk, winets tnixajiyi'i'n tu'uk tsapkaaky jøts ja Dios ttamøja'wiyii'n jam myigu'uk wyingujkp, jøts ja kø'øm kyaa'y.

³⁶ Xjats ku ja myigu'uk t'ejxtøø, winets ja yjotkujkidøø jøts kyaadyøø nayide'en.

³⁷ Majtsk magø'pxy ja tugui'pxmyaktujt øøts jap wyinaty njaa'y'aty barkijøtpy.

³⁸ Xjats ku kyaagyøxtøø, jøts ja ariimbajk kunchi'am tuki'iyi jamyi t'ukniwibejpatkøxniðøø mejyjotp, jøts jade'en ja barki tyiktøø'tskyidøø.

Ku ja barki mya'jty jam mejy'am

³⁹ Xjats ku dø'øn xiiyndyaajky, winets ja yikbarkiyø'øbyi ni tka'ejxkapti ja naxwii'niit pø ma dø'øn jam wyinaty tø tyaandi, ja'ayi ku t'ejxpaatti ja mejpyaa' ma ja nøø ja poj jam møk kayik'adi'ichiyi, winets wyinmaydi jøts ja barki nugo tyikyø'øpyidsømw'a'andi ma ja nøø jam t'ejxti ja pyaa'.

⁴⁰ Xjats tmidsujkidøø ja pux'ajo'jk midu ja barki tmach'ejtp, jøts ja japyi tyiktaandøø mejy'ok'ajpy. Winets ja jøpmiweenguipy tkajo'ongøxtøø midu ja barki twejtsyø'øpy, jøts ja majpxwyet nayide'en jam tkudidyøø barki jøp'am. Xjats ku ja poj ja tmajch, winets ja barki jam udy'a'aky y'ukyø'øpyidsømw'a'ãn jam mejpya'am.

⁴¹ Xjats jam ojts adsu'jky tyøki ma ja nøø jam ñawyinaxyiyi, winets ja barki yjøøjp jam ojts møk'ampy kyutopi pu'jotp, ma ja nøø jam wyinaty yø'ø'y'awidity. Jamts niwinø'ønin kya'ukyu'u'kxni, xjats ja mejy møk'ampy ojts pyetyiyi jam y'ix'am'ampy, jøts ja barki'øjx jade'eñi ja nøø tyakø'jtsigyø'jxyøø.

⁴² Xjats ja soldadi wyinmaydi jøts tyik'ookwa'andi ja pøkyjaa'y, ja'agøjxp ku jøtmøn kya'aktit jam mejyjotp.

⁴³ Ka'ats ja soldadi wyindsøn ja Pablo tñankyik'ookwa'ãn paty ka' tyikjajty, ja'ayi t'ane'emy pøni pøn tjaajtp ja nøøyumk wan ja jawyeen tñøðøkiði jøts myejpyidsø'mødit.

⁴⁴ Jøts nayide'en t'ane'emy pøn jaty tkajajtp ja nøøyumk, wan ja pu'gyøjxp tyø'ødyi, uk ø'y'ajtp nayide'en barki pidasikø'jxp. Xjats idø'øn jade'en niduki'iyi jujky myejpyidsømdøø.

28

Sa yjajty sa kyubejty ja Pablo jam ma naajx txøøwi Malta jam mejyjotp

¹ Ku øøts idø'øn jade'en tum jujky jam nbidsiimy mejyjotp, xjats øø nnija'wiyii'n kudam ja et jam txøøwi Malta midu jam mejkyuk'am.

² Winets øøts ja Malta jaa'y jam janch tsuj xwindsø'jkiyi'i'n, jøts ja jøøen tyikmøjidøø janch møj, ja'agøjxp ku yjanchxuxy ja et jøts ja tuu nayide'en. Winets øøts nyikyaajxiyi'i'n niduki'iyi, jøts øø nnay'ajo'kxiyit.

³ Winets ja Pablo nayide'en t'atskajpmuky ja tø'øts ja'axy, ja'ats wyinaty yjøn'o'jxip winets ja awa'andsaa'ñ jam tu'uk pyidsiimy ja'ax agujkp ku ja jøøen y'ikyiyi. Xjats ja Pablo yiktsu'jch kyøjø'øm.

⁴ Xjats ku ja kugajp t'ejxpaatti ku ja jiyujk jam tyi'iñi Pablo kyøjø'øm, winets ñawyajnidøø: —Yikjaa'y'oo'kpi ya'at yjawi, øy jap mejyjøtpy yjabidsimy jujky, ixymts kø'øm ja Dios ja tiidyu'unin tø myø'øyi jøts y'oøkt.

⁵ Xjats ja Pablo tjønwejtsiyii'n ja tsaa'ñ jøts jade'en myatstuujtyøø, nisa dø'øn ja Pablo kyø' kyajajty.

⁶ Tum jade'en idø'øn ja jaa'y ja tjøp'ejxti juuni ja kyø' kyexpøkt, uk juunits yik'oogiyit. Ku dø'øn ja jade'en tjajøp'ejxtøø, xjats t'ejxti ku ja Pablo niiti kyajatyiyi, winets ja wyinmaa'ñ jaty tyiktigatstøø jøts ñawyajnidøø ku ja Pablo Dios ja'.

⁷ Xjats ku dø'øn jam jade'en yjajty, jamts wyinaty tu'uk wingon chøøni ja jaa'y pøn ja kajp jaa'y tñiwindsøn'ajtp, ja' xyøøw Publio, ja'ats øøts jam xwaaw tyøjkjotp, jøts øøts jam tigøøk xøøw janch tsuj xyikja'adaajky.

⁸ Jamdam wyinaty Publio tyeety pyiky: jøømba'am, jøts nayide'en ja ni'jpya'am tmøødi, winets ja Pablo ojts tñinijky jøts t'atmigajpxy. Ja'ats ojts tkudsapkaajpxy jøts ja pamaa'y jaa'y myøkpiky ku ja ojts tkønixajy.

⁹ Winets ja Pablo niduki'iyi ja pamaa'y jaa'y ñimejniyøø pøn jaty jap wyinaty kugajp'ajttip jøts jade'en chøktøø.

¹⁰ Winets øøts may ja may'ajt jadi'iñi nyikmøø'y, xjats ku øøts jap barkijøtpy ndsoonwaañi, xjats øøts tuki'iyi xmøøy pøni ti jaty øøts xka'ejtxip.

Ku ja Pablo yja'jty jam Roma

¹¹ Tø øøts jam wyinaty tigøøk po' ndsinaa'ni jam Malta, jøts øøts ja tu'uk ndatøjkiyi'i'n ja barki midu jam nayide'en tyiknaxj ja xuxpyoj. Jamts ja'abi barki majtsk ja dios awanax txox'aty midu tyejtip dios Castor jøts ja dios Pølux; ja'abi barki dø'øn ja wyindsøn kugajp'ajtp Alejandria.

¹² Xjats øøts jade'en ndsøø'ñ, winets øø njajty ma kajp Siracusa, ma øøts ndaañ tigøøk xøøw.

¹³ Jamts øøts ndsøø'ñ jadigojk jøts øø nniikxy Regio. Jøts øø kyimjabom ndsøø'ñ, winets ja wimbaptoj myiñi, ja'ats øø møk xpadej jøts øøts jam nja'jty kyimajtsk xøøw ma kajp txøøwi Puteoli.

¹⁴ Jamts øø nbaajty winaagin nmigu'uktøjk pøn ja Jesús yja' tpaduujnidip, ja'ats wandøø jøts øøts ja jam nmøøtaa'nit tu'uk samani, winets øøts jam tekyjø'øm ndsoo'naa jøts øøts nniikxy Roma.

¹⁵ Tø øøts ja wyinaty xnijawi ja nmøøtjanchja'wibidi, ja'ats jam tsoo'ndøø Roma jøts øøts x'atspatsøy tuu'am ma kajp txøøwi Foro de Apio, jøts nayide'en øøts jam ojts ja winaagin xpatsøy ma ja'taajk txøøwi Tres Tabernas. Xjats ku ja Pablo ja myigu'uk twin'ijxy, winets ja ttamøja'wiyii'ñ ja Dios jøts jotkujk ja ñayja'wiyøø.

¹⁶ Xjats ku øøts jam nja'jty Roma, jøts ja soldadi windsøn tkøyajky ja pøkyjaa'y jam ma ja puxøjk adsinaabyi windsøn. Winets ja Pablo yikniimaay jøts ja tyøjk abiky t'ixa'at, ja'ayi ku nugo tu'uk ja soldadi y'eix'tiyi.

Ku ja Pablo kyajpxwa'kxy jam Roma

¹⁷ Xjats ku dø'on jam jade'en ja Pablo chinaay tigøøk xøøw jam tyøjkjotp, winets twaaødsøø ja israelit jaa'y ja myøjaa'dyøjkti, xjats ja ñamyujkidøø, jøts ja Pablo tniimaay:

—Migu'uktøjkti, niti øts ngadamidundigøø ja nmigu'uk israelit jaa'dyi, jøts nika'ap øts nayide'en nmidundigøø ja møjaa'chinaa'yin, kuwanits adøm nmigu'uk israelit jaa'y xmajch jam Jerusalén, jøts øts ojts xkøyaky puxøjkjotp ma romanit jaa'y kyutujk jam.

¹⁸ Ku øts nyiktidyuuñ, winets øts jadi'iñi xmajtstu'utwandi ja'agøjxp ku øts nbøky ni tu'uk xkapaajtidi mid'i'ibi øts zuku'oogiwyandip.

¹⁹ Ka'ats ja israelit jaa'y tyikjatwa'andi jøts jadi'iñi nyikmajtstu'utt, ja'agøjxp øts kuwani n'amidøø jøts øts ya xiidyu'unt ja romanit møj windsøn. Ka'ap øts ja' ya nnimiñ jøts øts nmigu'uk israelit jaa'y ja' ndani'øønit.

²⁰ Yø' meets ixyam ndaniwaaødsøøpy, jøts meets ka'pxy ndukmado'ot tigøjxp ku øts jade'en puxkadeen køwiñ n'ity; ja'agøjxp ku adøm niduki'iyi israelit jaa'y njøp'ijxyindi ku ja Dios ja oo'kpi jadigojk tyikjujkyiky jap oo'kpi jutjøtpy.

²¹ Xjats ja møjaa'dyøjk t'adsojimbettøø, jøts wyandøø:

—Ni tu'uk øøts ja israelit jaa'y ñøky ya xkapaaty mets køjxp, jøts ni tu'uk adøm nmigu'uk israelit jaa'y nisa kyawa'añ. Ka'ap pøn mga'ødyijyiyi pøn jam tsoo'mp jøts ya tø yja'aty.

²² Nija'wip øøts ku yø' o madsoo yikpagajpxy pøn yø jemy ixpøjkin tjanchja'widip, paty øøts ndsøky'aty jøts øø xukmado'ot.

²³ Winets tkajpxy'ajttøø ti xøøw jadigojk ñamyukidit, xjats ku tpaajty ja tiempi winets ja jaa'y may ñamyujkidøø ma Pablo jap wyinaty tø yja'ada'aky. Winets ja Pablo jøpyi kyajpxøjkyyi'ñ kunim chuu'iyii'ñ ja xøøw. Jøts jade'en ttukmadøøpy sa nwindson'ajtim Dios ja ñaxwi'ñit jaa'y ttanitani ja kyutujk. Ja'ats tyukmadøøpy sa ja Moisés kyutujk, jøts nayide'en sa ja Dios kyugajpxy ojts ttukjaadya, jade'en idø'on ja udaya'aky tjadukja'gyukiwyaan ku ja Jesús ja yiknitsokpi pøn ja israelit jaa'y yjøp'eixtip.

²⁴ Xjats winaagin tja'gyukidøø, jøts niwinaagin ka' tmibøjktøø sa ja Pablo tjanigajpxy;

²⁵ xjats kumi ka'ap ja nidukna x tmibøjktøø, winets ja choonwanidøø, jøts ja Pablo jadigojk tniimaagyojmi:

—Janch tiydam idø'on ja Espiritu Santo wyaan midi ja Dios kyugajpxy Isaías tyukmadoow ja n'apteety'amøjti, ku ja yide'en wyaan:

²⁶ Nøjcx x'atsnøjmi yø'øbi jaa'y:

Wa'ats meets xjamado'ot, jøts ka' xmøjpikta'aktit,

nayide'ents wa'ats xa'ejxtit, jøts ka' x'ejxkaptit;

²⁷ jabi yø'øbi jaa'y kawine'enzi kyujuunidi,

janch wenk myadowdi,

jøts wimbeets ñabyikta'agyidi;

paty ka'ti tmøjpikta'akti,

jøts ni tkadamadowdi ja tyatsk,

niwinø'onin ja kyubajk kyaja'gyukidit,

jøts ni tkadyimyikwimbetti yø wyinmaa'ñ ok nbojkrimaa'kxt.

²⁸ Nijawi meets ku ja Dios ja yiknitsok'ajtin øøts ixyam ngajpxwa'kxtsoo'ni ma jaa'y kya'israelitjaa'yidi, ja'ats ne'egi tja'gyukidip.

²⁹ Xjats ku ja Pablo jade'en wyaan, winets ja israelit jaa'y choonidøø, ja'ats mø'ampy ja xem ja yam nugo nadyakajpxidøø ja'abi ayuujk.

³⁰ Majtsk jumøjt ja Pablo jam ka'pxy tyaa'niyyii'ñ ma ja tyøjk jam t'ajuudyuky, tya-jotkujk'ajtpy ja Pablo pøn jaty jam atsmigajpxiyip.

³¹ Jotkujk idø'øn ja tkajpxwa'kxy ka' ti jotmay, tyuk'ixpijkpy ja jaa'y sa ja Dios Teety ja kyutujk ttanitaní ja yjaa'y, jøts nayide'en ttukmadøy sa yjajty kyubejty ja nwindson'ajtim Jesús, xjats jade'en nipøn kya'adsejpiyøø.

JA NØKY MIDI JA PABLO TYANĪGAJX JA ROMĪT JAA'Y

Ku ja Pablo tnijayi pøn tjanchja'widip ja Jesucristo jam Roma

¹ Pablo'ajtp øts, jøts øts ja nwindson'ajtim Jesucristo nmidumpy. Øts ja Dios tø xwi'ixy jøts øts yide'en ngudanaabyi'att. Yide'en idø'øñ wa'ats kajpxy nbiktaajkin, ja' øts idø'øn tø xanibiktaagi jøts øts ja ngajpxwa'kxit ja kyajpxy ja y'ayuujk midi nitso'ok'ajtin xukpaajtimp.

² Pø ma windi'ixyip Dios Teety yø tngajpxni, jøts ja kyugajpxy ttukyknaxy yø'øbi winmaa'ñ yø'øbi ixpøjkin jap ma y'ity ja kyajpxy ja y'ayuujk,

³ jøts tngajpxy ja Dios U'nk pøn nwindson'ajtim Jesucristo'ajtp. Ku ja tngajpxi ja yjaa'y'ajtin ja ñaxwiiñ'ajtin, ja rey David idø'øñ ja y'apteety'ajtpy;

⁴ kuts ja dios'ajtin, jats ja tyiknigaxi'jky ku xemikøjxp jadigojk yjujkpyijky jøts kyutuujky møk'ampy, jøts ku dø'øñ ja Dios U'ngi.

⁵ Ja nwindson'ajtim Jesucristo køjxp øøts ja Dios Teety tø xmø'øy ja kunuu'kxin jøts øøts ja ngudanit, jøts ya ñaxwiiñ yja'attit pøn tjanchjawidip pøn tpaduujnidip ja Dios yja' o ma'et o magajp.

⁶ Jøts meets idø'øñ nayide'en mjaa'y'ajtmi, nayi tøxi ja Dios mwi'ijxyidi jøts meets ja Jesucristo mja'atidit.

⁷ Meets idø'øñ nnija'ayidip niwine'enin jam mdsøøñidi mdanidi Romit kajpkøjxp, niwine'enin ja Dios mdaba'ayøyidi ja chojkin, jøts ja mdamidsøkyidi jøts ja amuum mnadyamiyoxidit. Mbattipts ja kunuu'kxin jøts ja øy'ajtin midi ja Dios Teety yajkpy møøt ja nwindson'ajtim Jesucristo.

Ku ja Pablo Roma y'ats'otswa'añ

⁸ Jawyeen øts ja Dios Teety ndukmøjawi ndukunuu'kxyjawi ja nwindson'ajtim Jesucristo køjxp, ku mee ni'ijtyi myiknigajpxti myiknimadya'akti øy madsoo sa ja janchja'win xjagyapti.

⁹ Dios testigi'ajtp pøn øts ja y'U'nk ja kyajpxy ja y'ayuujk ngajpxwa'kxiip amumjoojt, ku meets ejtp nja'myech ku øts ja Dios nmidsapkajpxy.

¹⁰ Ejtp øts ja Dios n'amidøy nbøktsoy jøts tyik'amøjatt jøts mee n'ats'ext, ja' kø'øm kyunuu'kxingøjxp.

¹¹ Ja ku nbaatwa'andi n'ejxwa'andi jøts nmo'owa'andi yiin waan ja pudøjkin sa Dios tsoky, jøts yjaakmøjit yjaakmayit ja m'ajot'ajtindi.

¹² Jade'en'ampy øts idø'øñ ndijy jøts nixem niyam nnagyajpxjot'amøjka'andit nyiknigaxø'jkindit, jade'engøjxp sa jadu'uk jadu'uk njagejpyindi ja janchja'win.

¹³ Uknimadowdi migu'uktøjkti, kawinaak øjk øts jam tø njanchjanøjkxwa'añ jøts mee n'ats'ext, ni ixymbaatnīm ø nganijky. Jade'en'ampy øts jam njanøjkxwa'añ jøts meets ndukmadowa'añ ja Dios yja', jøts ø n'ext sa wyingaxi'iky øts ja ndunkjøjpp, sam ø tø n'ixy abikyajp ma jaty ø tø nwidity.

¹⁴ Xpaat'ajtpxi øts niduki'iyi pøn ka'israelit jaa'dyi, wan ja t'ixpikyidi tka'ixpikyidi;

¹⁵ jøp'ijxy ø nnanky'ityi jøts mee nayide'en ndukmado't ja Dios y'øgyajpxy ja Dios y'ømyadya'aky, pøn jaty jam Roma tsinaadyip.

Sa ja møk'ajtin tjagyepy ja Dios y'øgyajpxy ja Dios y'ømyadya'aky

¹⁶ Ka' øts ja Dios y'øgyajpxy y'ømyadya'aky ndatsø'dyuujiyi, pø ja'axi ja' myøk'ajtin ja'axi ja yiktumpy, jøts ja ñitso'ok'atti pøn tjanchja'widip ja nwindson'ajtim, ja israelit jaa'y tyimyjapaajtidip, nayide'ents pøn ka'israelitjaa'yymi.

¹⁷ Yø'øbi øgyajpxy ømyadya'aky tngajpxp jøts ku janchja'wingøjxp ja Dios xkupijkyindi, janchja'wingøjxp ja'ayi sam ja Dios kyajpxy y'ayuujk tyiktaañ ku wyaañ yide'en: "Pøn kupøjkip ja Dios, ja yjanchja'win ja ttukpaatip ja xemikøjxpit tsinaa'yin."

Ja ñaxwii'ñit jaa'y pyøky

¹⁸ Jap tsajpjøtpy ja Dios tyiktsøøñ ja møj ayo'on, jøts ja ttuktagida'aky ja kawindiyjaa'dyi ja ka'øyjaa'dyi, pøn kya'øy'ajtingøjxp kyanankñijawiwajnidip ja Dios yja'.

¹⁹ Yjanija'widip wa'ats jøts tigøjxp pyaat'atyidi ku ja Dios yiknijawit, pø tøxi ja kø'øm tyuk'ijxyidi

²⁰ sa ja myøk'ajtin y'eixi tyiyi øy ja yjagaxi'iky. Jade'en'ampyts ja yik'ixy yiknijawi ku yik'ixy sa ja tø tyik'øyi ja ñaxwii'ñit, jøts ku ja' tu'ugyi Dios'aty ku ja myøk'ajtin xemikøjxp myajada'aky; paty ja ka'ap pyaat'atyidi ja'abi jaa'y jøts ja yiktamaa'kxtit jøts ku dø'øñ ja Dios ja tkanijawidi.

²¹ Øy ja tjanijawidi ja Dios jade'en, ka'a'pts ja twindsø'ogidi, ka'ap ja tmøjawidi tkunuu'kxyjawi sam ja Dios pyaat'atyin. Ne'egi wimbet'ampy ja ne'egi wyinmaydi, ja' tyajotkøjxtip mididi niti kawamp jøts ja wyinmaa'n kya'øyi, wimbeets kugoots y'ejtnidi.

²² Øy ja yjawa'andi jøts ku ja wyijyaa'yidi, jade'ents ja yjatti pøn niti tkajajtip;

²³ tøts ja t'ixwejtsidi ja Dios kyunuu'kxin, mididi nijuuni kawindingøopy, jøts ja tyikmøjtøkidi ja jaa'y yja' ja awanax mididi windingøopy ejtp, joon paat y'awanax, tsaa'n paat y'awanax, uk nayide'en øy mididi jiyujk mididi maktaxk ja tyeky.

²⁴ Yø'øgjxpts idø'on Dios ja tø myajtstu'udyidi, jøts ja tø tpanøjkxti ja kyø'øm tsojkin ja kya'øwyinmaa'n (mididi'iyim ja y'ijty y'ukjagyajptip), jøts jade'en tsø'ødyumbim y'adø'tstti nixem niyam;

²⁵ Ja ku ka'ap tjanchja'widi ja Dios tyiy'ajtin. Ja ne'egi myibøjktip ja tum ja taay, jøts ja ja' tø twindsø'ogidi ja pikta'aky mididi ja Dios tø t'ødyuñ, jøts ni ja Dios ne'egi kø'øm kyayikwindsø'ogi, pøn paat'ajtip amuum ja windsø'jkin. Jade'en idø'on ja y'ejxi tyiyi.

²⁶ Patyts idø'on Dios ja tø y'ixmachidi jøts ja jade'en y'am'adø'tstti chaach'adø'tstti; ja tø'øxyøk paat ja tyiktigajtsnidi ja tyø'øxyøjk'ajtin, tum wimbet ttundi sam ka'ap pyaat'atyti jøts ja jade'en y'adø'tstti.

²⁷ Jøts yaa'dyøk nayide'enmididi; ka' t'uknitanaañidi ja yaa'dyøk'ajtin ku ja tø'øxyøk møøt, kø'ømyi ja tukyaa'dyøk ñay'ejxkiyidi nixem niyam. Tukyaa'dyøk ja axøøk y'adø'tstti, ja ayo'onts idø'on ttagi'dajkidip jøts jade'en tyuktuñidi ku tkamøjpikta'akti ja Dios.

²⁸ Kumi ka'ap ja Dios tnijawiwya'andi, patyts ja tø myajtstu'udyidi jøts ja y'axøøkwinmaa'n tyikmajada'akti, jøts jade'en y'adø'tstti sam ka'ap pyaat'atyti.

²⁹ Tum ja ka'øbyi winmaa'n yjagyajptip, ja kawindi'yajtin ja axøøk'ajtin, y'amaa'at'ajtkøjxtip o ti, ja ka'ø'yajtin y'amidip yjotpidip, windii'ñjaa'yajtip, yikjaa'y'ø'ktip, kudsep yjaa'y'ajtip, win'øø'ndip jøts tum wenk øy pøn tnamadyaagidi.

³⁰ Ja pagajpxk ja' tyunk'ajtip, ka'ap ja Dios ttsokti, yjemjaa'yidi tyejaa'yidi, namyikaxi yjaa'y'atti. Tum ja ka'øbyi wyinmaa'n'ajtip, ka'ap tyety tyaa'k tmimadowdi,

³¹ ka'ap yja'gyukidi, ka'ap y'ayuujk tpadundi, ka'ap yuyj'ajtin tjagyapti, ka'ap tjatti jøts myaa'kxuktit jøts ka'ap pøn t'ayo'ejxti.

³² Yjanija'widip wə'ats sa Dios tyikutuky; wə'ats tjanijawidi pøn jade'en adø'tstip jøts ku ja kyudig'ødyit xemikøjxp. Jøts nijade'en tkadamajtsu'utti, tyun'adø'tstip jade'en jinaxy. Tyaxondaktip ku t'ejxti nayide'en y'adø'tsmidi jadu'uk jadu'uk.

2

Tiy'ajtingøjxp ja Dios tyiidyuñ

¹ Ja'agøjxp ka' mbaat'atyti jøts ja myiktamaa'kxt øy sa mjawa'añ, metsxi mbayø'øpy jadu'uk øy pøn, mdyimyjapøni mets. Ku jade'en m'adi'ich kø'øm mnadyanipiky ja ayo'on, mbayø'øpy jadu'uk jøts m'adø'tspts jade'en kø'øm.

² Nnija'windipts adøm jøts ku Dios tiy'ajtingøjxp tyiidyuñ ku ja ttukniduki ja ayo'on pøn jade'en adø'tstip.

³ Jade'en mets yjawi mwani mdukniwa'adsip mets ja Dios xijy ja ayo'on, metsxi mdanipijky ja mmigu'uk ja ayo'on pøn jade'en adø'tstip, mja'adø'tstip meets jade'en kø'øm.

⁴ Uk ka' idø'on xtsojki ja Dios y'ø'yajtin ja Dios tyuda'aky'ajtin, ni xkamøjpikta'aky jøts ku ja'abi ø'yajtin tyuñ jøts xmiotjimbett ja Dios jøts tyigatst ja mdsinaa'yin.

⁵ Møk ja mwinnmaa'n xjagyepy jøts ka'anim xmiotjimbity ja Dios jøts xyiktigatst ja mdsinaa'yin. Kø'ømyi ja m'ayo'on xyikniweni xyikajaji, mididi nøjx yikpatp yik'ejxp ku ja Dios ja tyiidyu'unin tiy'ajtingøjxp tyikme'ent,

⁶ ku ja ttagubatt tu'uk tu'uk sa jaty pønjabøn tø y'adi'ich.

⁷ Pøn tpaajt wandip ja kunuu'kxin ja ø'yajtin xondaajkin mididi xemikøjxp, jade'en'ampy ku ejtp øy yikxon yjaa'y'atti, ja'ats idø'on Dios mo'ojidip ja jujky'ajtin mididi xemikøjxp;

⁸ pønts nay'ama'at'ajtiyip jøts ka' tpadundi ja tyiidy' yjanchpi, tum ja ka'øbyi tyundip, ja'ats ambøjkin'ampy Dios tiidyunidip.

⁹ Møk y'ayo'odit niduki'iyi, y'amjattit chaachjattit pøn ka'ø'y'adø'tstip, ja israelit jaa'dy' jøts nayide'en pøn ka'israelit jaa'dy'.

¹⁰ Pønts øyjaa'y'ajtip wan t'israelitjaa'yidi uk tka'israelitjaa'yidi, ja'ats ja Dios mo'ojidip ja kunuu'kxin ja ø'yajtin jøts ja windsø'j'ajtin.

¹¹ Kumi ka' Dios pøn t'ø'y'ixy tka'ø'y'ixy wan ja tønø;

¹² pøni pøn tkanija'widip ja kutujk mididi ja Moisés ja Dios Teety møøjyi piri pøkyundip, nayide'en ja nøjx wyindingøydi, ni ja kutujk kyatsokit; pønts tjanija'widip ja Moisés kyutujk jøts pyøkyun'adø'tstti, nay ja'abi kutujk ja jaayi nøjx yiktatiidyundip.

¹³ Ka'ap ja Dios tkupiky pøn nugo tmadoodip ja kutujk jøts ka' tpadundi.

¹⁴ Ku abiky jaa'dyi, pøn ja Moisés kyutujk tkanija'widip, tyundipts ja øybi mididi ja Moisés kyutujk y'ane'emy øy ja ja'abi kutujk tjagajagyapti, kyø'omgutujk ñamyayi yiktundip,

¹⁵ jabi yikwingaxø'ktipxi ja' sa jaty ja yjaa'y'atti jøts ku ja kutujk tjagyapti. Ja kyø'omwinmaa'ñ ni'øøniyidip sa y'øy'adø'øtsi kya'øy'adø'øtsi.

¹⁶ Ja'abi xøøw yiknijawit ku ja Dios Teety tpikta'akt ja Jesucristo jøts ttiidyu'unt niduki'iyi ja jaa'y ti jaty pønnapøn tø ttuñ ayu'uch, sam ø tø nnigajpxi ja yiknitsokpi ayuujk.

Sa ja israelit jaa'y ja Moisés kyutujk ñadyamøjyidi

¹⁷ Mets wamp jøts ku me israelitjaa'yi, jøts ku xpadauujni ja Moisés kyutujk jøts mnadyamikajxip ja mDios.

¹⁸ Wa'ats xnijawi sa Dios ttsøky, jøts wa'ats mduknijawiyi ja kutujk mididi'ibi øy mididi'ibi tsuj.

¹⁹ Mnay'aja'wiyip jøts ku xjaty xnøø'mo'ot xuu'mo'ot ja jaa'y pøn wimbeets kugoots ejttip.

²⁰ Mnay'aja'wiyip jøts ku xjaty sa xyik'ixpøkt pøn tkanija'widip pøn tkaja'gyukidip, pø japxi kutujk'øtpy xkajts'ixy ja wejin kajin, ja tyiiby yjanchpi.

²¹ Myik'ixpijkpy ja mmigu'uk, çti kuts kø'øm xkatunjøpi sa ja m'ixpøjkin xyikyø'øy? Ku mgajpxwa'kxy, jade'en mwa'añ ku ka'ap y'øyi ja maa'tsk, maa'tspts mets kø'øm, çtigøjxp ku kø'øm mmeech?

²² Mets mwamp jøts ku ka'ap pyaat'aty jaa'y ñiyaa'y ñidø'øxy ñabyøjkxiyidit, jøts çti'ajtp ku jawyeen jade'en kø'øm m'adi'ich? Ni mets kø'ømbaat xkatsøky ja awanax, mwimaa'tsidipts ja çaptøjk ti jaty ja yjagyepjy.

²³ Mnadyamikajxip mets ja kutujk, mmidundigøøpyts ja Dios ku ka'ap jade'en xuu sa ja kutujk wya'añ.

²⁴ Paty idø'øn ja Dios kyajpxy wya'añ: "Pøn ka'israelit jaa'dyi, ja' tka'ødeytip ja Dios ku meets tum jiwimbet xunguixy."

²⁵ Pø wan wine'enin xjanchyiktuñ ja Dios y'ejxpajt mne'kxkøjxp ku xpadauñ ja Moisés ja kyutujk, kuts ja ka'ap xpadauñ, jade'en ja tpaaty ejxim ja ejxpajt jeexyip xkamøø'taty.

²⁶ Pønts ja ejxpajt kyamøøt jøts pyadumpy sa ja kutujk wya'añ, jade'en ja tpaaty jøts ku ja ejxpajt ja jeexyip tmøødi, øy ja windii ja ejxpajt yjagyiktu'unninim.

²⁷ Pønts ja ejxpajt ka'ejtixip jøts pyadumpy ja kutujk øy ja kø'øm tka'ixpiky, mdabayø'øyip mets ja' ku xkabaduñ ja kutujk, øy mets ja jap xja'ixy jøts ku ja jap kyøxja'ayi jøts øy mets ja ejxpajt xjamøø'taty.

²⁸ Ka'apts ja jade'en tijy jøts ku ja y'israelitjaa'yi pøn jade'en nugo nikijxy nanky'ejxip, jøts ni ja' ka' yik'ejxpajtijy mididi nikijxy ja'ayi yiktump.

²⁹ Ja' idø'øn israelit jaa'y pøn amuum tpadump, jøts ja' ejxpajtin'ajtp mididi yikwinmaapy am jotp, jam anmija'wingøjxp, mididi ka'ap ma kyøxja'ayi, mididi ka'ap ma kyaxi'iky. Pøn jade'en tpadump, kupiky ja y'ity jam Dios wyingujk, kidi jaa'y wyingujkyp.

3

¹ ÇTiku yikajpxy ja israelit jaa'y? ÇTi wya'añ ja ne'kxkøjxpit ejxpajt?

² Janch møk yjapaat'atyidi ja'agøjxp ku ja' ja Dios kyajpxy y'ayuujk tyami'ajot'ajtidi jøts ja tpadu'undit.

³ ÇTits idø'øn ja'adi? Øy ja tkabadundi jade'en, çwinets ja Dios tmajtstu'utt ja y'øy'ajtin?

⁴ Niwindem! Jinaxy ja Dios tyiktuñ ja tyiiby yjanchpi, øy ja jaa'y niduki'iyi yjataayidi; jabi yide'enxi ja Dios Teety kyugajpxy tñimadyaajky ja Dios Teety:

Ja mgø'øm'ayuujk me Dios Teety myika'pxytiiidyumbipidsøøjmip, ku wyinaty nugo mwimaa'ñ'ijxyidi ja'adi pøn mgamøjpiktaajkiyipi.

⁵ Sam winaagin wya'andi yide'en: ku adømbøkyøjxp tijy ja Dios ja y'øy'ajtin tyiknigaxi'iky, çsats adøm idø'øn ja'abi ayuujk nja'gyukandit? ÇKa' idø'øn ja Dios y'øyi ku ja nyikjotmajtyindi, jøts ja ayo'on xjaniguejxyindi?

⁶ Niijuuni ka' yjade'eni! Ku Dios jeexyip kya'øyi, çsudsots ja jeexyip ttiidyuñ ja naaxwii'ñit jaa'y?

⁷ Jøts kuts øts nbøky jeexyip yjanchtuñ jøts ja Dios tyiy'ajtin tyikwingaxø'økt, çsudsots ø nyikpøky'ixy jøts ku øts nbojkipitumbijaa'yi?

⁸ ÇWinets ja tum øy wyimbejtixit ku pøn ttuñ tum ja ka'øybi? Jade'en ja jaa'y winaagin kya'øwynmaydi jøts wya'andi, jøts ku ja'abi øøts jade'en ndukni'ixpøki. Yø'øbi jaa'y paat'ajtidip ja ayo'on.

Niduki'iyi ja pøky xaja'tyindi

⁹ ÇTits adøm idø'øn? ÇKu adøm n'israelitjaa'yindi, paty adøm jawaani njaaktyimy'øyindi, jøts nika' pøn jade'endi? jKa'ap yjade'eni! Pø tøxi nnigajpxy jøts ku tum ja pøky yik'adsøøni, wan t'israelitjaa'yidi uk wan tka'israelitjaa'yidi.

¹⁰ Ja'agøjpxi jap nøkyjxpy yide'en wya'añ.

Ka' pøn y'øyi, nitu'ugin kya'ity pøn øy;

¹¹ nipøn kyaja'gyuki,

nipøn tkanijawiwya'añ ja Dios.

¹² Tum ja wenk tuu' t'ø tpøjkni, windigø y ni'ijtyi yjatti.

Ka' pøn tjomay'aty ja øwiyinmaa'ñ, ok idø'øn tu'ugin ja'abi twinmaa'ñ'att.

¹³ Tum ja axøøk kajpxy pidsømp y'aawjotpy yukjotpy;

ja win'øø'nk ja'ayi majyip.

Wingajpxnajxpim kyajpxy;

¹⁴ tum ja ka'øyi kyajpxpidsømdip, kixy kyubety wya'andi.

¹⁵ Jøts ja'ayi majyidip ku tnibutti tniga'akti ja yikjaa'y'oo'k;

¹⁶ ja' tyunk'ajttip ku yikudigø'ødyit ku y'ayo'ondum'undit,

¹⁷ jøts ka' tñijawidi ja øy'ajtin ja tuda'aky'ajtin.

¹⁸ Niwine'enin tkawinmaydi jøts twindsø'øgidit ja Dios.

¹⁹ Jøts yiknija'wip sa jaty ja Moisés kyutujk wya'añ, ja'ats ja yikta'ana'amdip ja israelit jaa'dyi pøn ja tøyktanibikaagidi, ja'agøjxpts ne'egi amøñi tyim'yettit, jøts jade'en niduki'iyi ja naxwii'ñit jaa'y tpaattit ja Dios tyiidyu'unin;

²⁰ nipøn ja Dios tka'øy'ext øy ja tøy tjabaduñ midi ja kutujk ñi'ane'empy, jøts ja'ayi ja ñigajpxy ku adøm nbojpkpitumbijaa'yindi.

Janchja'wingøjxp ja nitso'ok'ajtin yikpaaty

²¹ Jats jadu'uk ja winmaa'ñ sa Dios xkupøjkin. Yjadyimyjanigajpxy ja Moisés ja kyutujk ja kø'øm, jøts nayi tøy ja Dios kyugajpxy ja nayide'en tnigajpxti.

²² Ja' idø'øn ja Dios Teety kyupijky pøn tjanchja'widip, pøn t'ajot'ajttip ja nwindson'ajtim Jesucristo; kyupijky ja øy pøn, ka'ap ja pøn jadu'uk jadu'uk twenk'ixy,

²³ niduki'iyixi jaa'y pyøkyundi, jøts ka'ap pøn tminaxy ja pyøky jam Dios wyingujkp. Jagam jixkø'øm ndsinaa'yindi, ni sudso'ampy ja ñitso'ok'ajtin ja ngapaajta'am.

²⁴ Ejxim ja Dios Teety y'øyi ku ja jaa'y tyiknitso'ok'aty nwindson'ajtim Jesucristo køjxp, jøts jade'en tmay'aty ku tkupiky.

²⁵ Ja Cristo ja Dios Teety pyiktaajk jøts ja tkudanaajyit ja naxwii'ñit jaa'y pyøky ku ja tku'oogit. Winets wyingaxi'ikñim adøm ja nitso'ok'ajtin ku ja njanchja'win, jøts ja Dios Teety jade'en xuknija'win ja y'øy'ajtin ja tyuda'aky'ajtin, jøts ku ja tkadagubety ja pøky midit tøy yiktuñ jawyeen ku ja nwindson'ajtim tkagu'ooginim ja pøky.

²⁶ Ja'agøjxp jade'en yjaty jøts nnija'win jøts ku Dios Teety y'øy'ajtin tyi'y'ajtin tyik'awa'añ, jøts ejtp jade'en øy juuni tkupiky pøn tjanchja'widip ja nwindson'ajtim Jesús.

²⁷ ¿Mats ja namyikaxi tyuñ? Pø ka'axi ja tyuñ ku ja janchja'win njagyajpin, ku njanchja'wyin ja nwindson'ajtim. Ja' ja tyiktundip pøn tta'ødyøkiwyandip ja tunk mā Dios, ku ja kutujk nadyijyi tpadundi pøn ja janchja'win tkajagyajtpip.

²⁸ Jade'ents yik'ixy yiknija'win jøts ku janchja'wingøjxp ja jaa'y yikupiky jam Dios wyingujkp. Ka'ap ja yikpayø'ø y pøni sa ja tøy tpaduñ tkabaduñ ja kutujk sa ja y'ane'emy.

²⁹ ¿Ti ja israelit jaa'y nugo ja Dios Teety y'ejx'ijtpy, jøts ja ka'ap t'ejx'ity pøn ka'israelit jaa'dyi? Ka'ap yjade'eni, pø tum ja'axi amuum tja'ajtp.

³⁰ Tu'ugyi Dios, ka'ap ja Dios kyawinaagi; jøts pøni pøn tmøøt'ajtp ja janchja'win, ja'ats ja Dios kyupijky, wan tmøøt'aty uk tkamøøt'aty ja ejxpajt ñe'kxkøjxp sam ja israelit jaa'dyi.

³¹ ¿Ja'agøjxp adøm ja kutujk nga'ukpadu'unindit ku ja janchja'win nmøøt'ajtyindi? Ka'ap yjade'eni, jabi jade'eni ne'egi ka'pxy ja kutujk yikpaduñ ku ja Cristo njanchja'wint.

4

Sa ttunjøpi ja Abraham

¹ ¿Ti adøm n'apteety'amøj Abraham tyuun jøts Dios ja ojts kyupiky?

² Ku jeexyip ja Abraham ja'agøjxp ja Dios kyupiky ku ja wyinaty tøy ttuñ tigati, nadyamøjyipts ja jeexyip.

³ Yide'ents jap nøkyijxy wya'añ: "Ojts ja Abraham tjanchjawi ja Dios, ja'ats ja Dios y'øyja'wiyii'ñ jøts ja ojts tkupiky."

⁴ Ku pøn øy ti tunk ttuñ jøts ku ja yikmijuy, ja tyunkts ja yiknimijuy'uyip, ka'ap ja niñamyay'ati tpaaty, ja' ja kyudøkip ku ja tøy tyuñ.

⁵ Pønts ja tunk tkada'ødyøjkip mā Dios, øy ja ti tjugatuñ, jøts ku ja ja'ayi tjanchjawi ja Dios ku ja pojpkpitumbi jaa'y ja tpojkpimee'kxy, ja'ayi ja Dios tyajotkujk'ajtpy ku ja tjugyepy ja janchja'win, jøts ja tmay'aty jade'en ku ja tkupiky.

⁶ Nayide'en ja David ojts wya'añ ku ja ojts tnigajpxy sa ja jaa'y xyonda'aky pøn ja Dios kyupijky, jøts ja ka' tmøjpkta'aky pøni sa ja jaa'y tøy y'adi'ich.

⁷ Yide'en ja wya'añ:

Nekim ja jaa'dyi pøn ja Dios ttamaa'kxidip ja tyundigø'yin, jøts ja ka'ap myøjpiktaajkxiyidi ja pyøky.

⁸ Nekim ja' pøn ja nwindson'ajtim pyojkpiimee'kxpy.

⁹ ¿Ja'ayi dø'øn nugo jade'en nekim t'ejxtip pøn ttundip ja ejxpajt ñe'kxkøjxp, uk nayide'en idø'øn ja'amidi pøn tkatundip ja ejxpajt? Nnija'windipts jøts ku ja Abraham ja'agøjxp ja Dios ojts kyupiky ku ja ja'ayi tjanchja'wi.

¹⁰ ¿Juunits idø'øn ja jade'en yikupijky? ¿Tø wyinaty ja Abraham jawyeen ja ejxpajt yikpiktaajki, uk ka'anim? Ka'animts ja wyinaty ttuñ ja ejxpajt.

¹¹ Oojknim ja Abraham ojts yikpiktaajki ja ejxpajt ku ja ojts yiktsuky ja ñe'kx, ejxa'an ja wya'añ jøts ja yiknijawi ku Dios ja tø kyupiky yjanchja'wingøjxp. Jade'ents ja Abraham ttunjøpiyi'ñ, jøts ja nayide'en niduki'iyi janchja'wingøjxp yikupøkti øy ja tmøø'tatti tkamøø'tatti ja ejxpajt ñe'kxkøjxp.

¹² Janch jade'en ku ja Abraham idø'øn kyudanaabyi'ajtp pøn ja ejxpajt tmøø'tajttip, kidi ja'agøjxpip ja ja'ayi ku ja tø yiktu'unxidi ja ejxpajt. Jade'en'ampy ja tijy jøts ku ja tpa'ejxti, jøts ja nayide'en tjagyapti ja janchja'win sa ja Abraham, ku ja wyinaty ka'anim ja ejxpajt yiktu'unxi.

Jaa ja Dios y'aduky ja kyajpxy ku ja yikjanchjawi

¹³ Jade'en ja Dios wyanda'aky, jøts ja Abraham møøt niduki'iyi wine'enin ñajtska'axidi yikmo'odit amuum ja naajx kajp wine'en y'ity naxwiñ; kaja'agøjxpipis ja wanda'aky ojts yikpikta'aky jade'en ku ja kutujk ja wyinaty ka'pxy tø tpaduñ ja Abraham, pø jade'en'ampyxi ja jade'en ku Dios ja tjanchja'wi, jøts ja' ja wyinaty tø tyagupiky.

¹⁴ Jøts ku jeexyip ja'ayi yikupøkti pøn tpadundip ja Moisés kyutujk, jøts ja'ayi jeexyip yikmo'odi ja Dios y'ø'yajtin, ka'ats jeexyip tyuñ ja janchja'win, jøts ni ja Dios jeexyip ja wyanda'aky niti kyawa'añ.

¹⁵ Pø tiidyumpxi ja kutujk; ma'ts ja kutujk kya'ity, ka'ap jam ti yikmidundigøy, jabi niti ana'amixi jam.

¹⁶ Jade'en'ampyts idø'øn Dios ja twandaajky ja'agøjxp ku ja janchja'win ojts t'ixy, jøts ja tmay'att niduki'iyi pøn nayide'en ja janchja'win tjagyajp sa ja Abraham. Kidi ja'ap ja Dios tyamiwandaajki ja y'ø'yajtin pøn tpadundip tkabadundip ja kutujk, pø ja'axi tyamiwandaajki pøn tjanchja'widip ja Dios sam ja Abraham ttunjøpiyi'ñ. Jade'ents idø'øn ja tpaaty, ja' ñamyayi tñigubajk'ajtp ku ja jade'en ojts tjanchja'wi ja Dios, jøts ja' adøm ñamyayi ndeety'ajtyindip

¹⁷ Jam Dios wyingujkp, pø nayi Diosxi ja yjanchja'wiyi'ñ ku wya'añ ja Dios kyajpxy: "Tø me nbiktä'aky mōjaa'y'ajtpi o mā'et o magajp." Janch mōj ja Dios, øy ja tyikjujkyøkt pøn tø y'oo'kni tyigøøñi, jøts nayide'en tñanky'ijxyi o ti pikta'aky mididi ka'eiptnim.

¹⁸ Øy ka'ap ti jøp'ejxin, ka'ap ti winmaa'ñ, ojtsts ja Abraham ja tjanchjawi jøts yjøl'ijxy ja', xjats idø'øn ja jade'en may jaa'y ñamyayi tñigubajk'aty sa u'nkteety y'u'nk y'una'jk tñideety'aty, jade'en sa dø'øn Dios ja wyinaty tø ñi'mxyi ku ja wya'añ: "Janch may ja m'u'nk m'una'jk xpaatt."

¹⁹ Magø'pxy ja Abraham wyinaty ja yjumøjt jøts ka'ap ja sa tijy, amuum ja t'ajot'aty øy ja ñidø'øxy Sara ja møøt tø yjamøjaa'yinidi, ka'ap ja y'u'nk y'una'jk t'ukpatnidi.

²⁰ Ka'ap ja sa tijy, ka'ap ja tka'øyja'wiyi ja Dios wyanda'aky, ne'egi ja amumjoojt tpiktaajky ja yjanchja'win jøts ja tmøjawi tkunuu'kxyjawi ja Dios,

²¹ jøts ja tu'ugyi tjøl'ijxy jade'en jøts ku Dios tjagyepy møk'ajtin, jøts ja ttu'unt jade'en sa ja wya'añ.

²² Jade'en'ampy ja Dios ja ojts kyupiky ku y'ijxyi jøts ku myajada'aky ja yjanchja'win.

²³ Jøts ku dø'øn Dios ja jade'en tkupijky ja yjanchja'win, kidi ja Abrahamip ja ja'ayi kyupøjkip jøts ja jade'en yikjaadyañ;

²⁴ pø nayide'enxi adøm ja xkupijkyim ku adøm ja Dios Teety njanchja'want. Pø ja'axi tø tyikjujkyiky jadigojk xemikøjxp ja nwindson'ajtim Jesucristo,

²⁵ pøn ojts yikøyaky jøts y'ookt adøm nbøkyøjxp, jøts jade'engøjxp ojts xemikøjxp yjujkyiky jadigojk jøts adøm nyikupøjkint jam Dios wyingujkp.

5

Øwymibidsimy ku xkupøjkint ja Dios

¹ Kuts ja Dios Teety xkupøjka'an ja njanchja'win, jøts jade'en ja nmiduda'aky'ajttint ja nwindson'ajtim Jesucristo køjxp.

² Ja'agøjxp adøm ja Dios Teety møøt n'ijtyindi ku ja nwindson'ajtim njanchja'windi, paty adøm ja xkunuu'kxyindi. Ja' adøm xyik'ejtindip tu'ugyi ja nwinmaa'ñ jøts ja xondaajkin xmø'øyiindi, jøp'ijxy nyik'ijtyindi jøts ku ja nbaajta'andit amuum ja y'ø'yajtin.

³ Jøts nayide'en adøm ja ka'ap nwandijyindi ja ayo'on, øy adøm ja ngu'ayo'owa'andi jotkujk; pø nnija'wandipxi adøm ku n'ayo'owan winets ja tuda'aky'ajtin nbaajtindit,

⁴ jøts ja tuda'aky'ajtin ja' øy xyikwingaxø'jkindip, ja' xukjøp'ijxy'ajtindip midi ja Dios tø xanibiktaajkandi.

⁵ Jøts ka'ap majtsk'aaw majtskjoojt n'ejtindit, pø tøxi ja Dios amuum xmø'øyim ja y'øy'ajtin ja pya'ayo'owin ku ja tø xuktatøjka'am ja y'Espiritu Santo.

⁶ Ku adøm winbeets kugoots nmijajtyim ja nbøky, niti nitso'ok'ajtin kø'øm ngapaajtyim, xjats ja Cristo tø myiñ winet, jøts ja tø tkudani ja ka'øyjaa'y pyøky ku ja tø y'øøky.

⁷ Ka'ap pøn nugo tnigyu'oogi jadu'uk, ni jade'enbaat øy pøn mabaat yjadyimya'øyjaa'y; pø wants winaagin pøn ñay'a'ejxyit jøts ja tku'oogit.

⁸ Xjanchojkimpts adøm ja Dios ku adømgøjxp y'øøky ja nwindson'ajtim Jesucristo, øy adøm njapojkpitumbijaa'yandi.

⁹ Jøts tøts ja Dios xkupijkyim ja nwindson'ajtim Jesucristo pya'ayo'owingøjxp ku ja tø xku'o'jka'andi, jøts ne'egi jinaxy ja nøjxx xuknitso'ok'ajtyindi ja møk ayo'on, jøts ja ka'ap xuku'o'jka'andit ja nbøky, ja'ayi nwindson'ajtim Jesucristo køjxp.

¹⁰ Njagami'øy'ajtyindip adøm ja Dios, jøts adøm ja jade'en xjaaktuu'mø'øyindi sudso ja jadigojk nmijotjimbejtindit, ja'agøjxp y'ø'jky ja y'U'nk adøm nbøjkpikøjxp. Mats ku ja icyam yjujky'aty xemikøjxp, jøts ku adøm ja tø nmijotjimbiytyindi ja Dios, çti jats adøm ndejint ja winet xka'ukyiknitso'ok'ajtna'ant?

¹¹ Xon'ejtnamdip adøm icyam ja'agøjxp ku ja nwindson'ajtim Jesucristo tø xukmigu'ukwa'añim jadigojk ja Dios Teety.

Ja Adán jøts ja Cristo

¹² Jøts tu'ugyi ja jaa'y pøn pøkyun'okwaan ya naxwiiñ, jøts ja o'jkin tigøø'yin jade'en'ampy ñaxkidaajky, niduki'iyyi øy pøn pyaadyi ja'agøjxp ku ni'ijtyi nayide'en tø pyojkpitunidi.

¹³ Ku ja kutujk wyinaty kya'itynim, jaayim ja pøky wyinatyni ya naxwiiñ; jaa ku ja Dios ka' tpayø'øñim, pø ka'anixmi ja kutujk wyinaty te.

¹⁴ Ku ja et ja xøw ñajxy midi tso'ondaajk Adán ñikøjxp jøts yjøkixy Moisés ñikøjxp, jøts wine'en pøn pyøkyundøø, ja' idø'on ja o'jkin tigøø'yin mimajadaajkidøø, øy ja tja-gajagyapti ja'abi pøky midi ja Adán tyuun ku ja tkamimadøø ja Dios; sa ja Adán tyik-tso'ondaajky ja pøky, nayide'ents ja tu'ugyi myenwami wyinaty pøn ja øy'ajtin nitso'ok'ajtin xukpaajtmandip, xjats tø myiñ ja nwindson'ajtim Jesucristo.

¹⁵ Windemts ja møøt n'uk'ejxkijpxyin ja Adán tyundigøø'yin møøt ja Dios y'øy'ajtin midi ja xmø'øyindip. Tu'ugyits ja jaa'y pøn ja pyøky tø xukno'jka'andi niduki'iyyi jøts windigøø n'ejtna'andi; jøts tu'ugyi ja nayide'en ja nwindson'ajtim Jesucristo pøn ja Dios xuknitso'ok'ajtindip ja nbøky, jøts ka'ap ja pøn tmi'abaaty, namay adøm nyiktamay'ajtyindi ja nitso'ok'ajtin jøts adøm ja xmø'øyindi.

¹⁶ Ti'in ja ndami'a'ejxin ja tu'ukpi jaa'y pyøky møøt ja Dios ñitso'ok'ajtin. Tu'ugyi ja tundigøø'yin ja'ats yikpayø'øpy jøts tø nbøkpyajtkijxyindi; kuts ja Dios xmø'øyindi ja nitso'ok'ajtin, tyamay'ajtpy ja jaa'y ja ñamyayi jøts ja xkupijkyim, øy wine'en tø njapokpitu'unindi.

¹⁷ Ku ja tu'ukpi jaa'y tø pyojkpitun, ja'agøjxpts ja o'jkin myajada'aky jøts ja yikudigøø, møjts ja Dios jøts ja ttuñ ja may'ajtin, jøts ja tyaky ja myøk'ajtin midi yikjujky'ajtp xemikøjxp ku tu'ugyi njanchja'want ja nwindson'ajtim Jesucristo.

¹⁸ Jade'en sam ja Adán pyøkyøjxp ja jaa'y ttukpaatkijxy ja kudigøø'yin, nayide'en ja nwindson'ajtim Jesucristo y'ødyu'unigøøjxp ttukpaajty niduki'iyyi ja naxwii'ñit jaa'y ja nitso'ok'ajtin, jøts ka'ap ja møk ti'dyu'unin tpaattit pøn jaty tjanchja'widip.

¹⁹ Tu'ukts ja jaa'y pøn kamadoow, jøts ja'agøjxp ja pøky xaja'atkiixyindi; nayide'ents ja tu'ukmi pøn tuki'iyyi tmimadoow ja Dios Teety, jøts ja'agøjxp adøm nyikupijkyindi jam Dios wyingujkp.

²⁰ Jøts ku ja kutujk yikpiktaajky, ja' ja yiktanibiktaajkyi'ñi jøts ja pøky wa'ats yik'ejxkapt; jøts ja pøky møjtak'adøts ja', jinaxys ja Dios y'øy'ajtin myøk'ajtin tyikmøji'adi'ich nayide'en.

²¹ Sam ja pøky myajada'aky ku ja tyiknaaxkida'aky ja o'jkin tigøø'yin, xjats ja Dios ja y'øy'ajtin nayide'en tyikmajada'aky sudso ja xkupøjkin, jøts ja nwindson'ajtim Jesucristo køjxp xmø'øyindi ja jujky'ajtin xemikøjxp.

6

Ka'ap ja pøky myajada'aky ku ja Cristo yjujky'ajtin nmøøt'ajtyindi

¹ ¿Tits njaaktu'unindip? ¿Jaaktyimbyøkyun'adøjtsindip adøm idø'on ja'agøjxp ku tø nnija'windi jøts ku ja Dios xu'unxim ja may'ajt ku ja xpojkpimee'kxyindi?

² ¡Ka'ap jade'en pyaadyi! Pø tøxi adøm nmajstuuityindi ja pøkyu'unin; ¿jøts sudso adøm jade'en nbøkyun'adøjtsin?

³ ¿Ti ka'ap xnijawidi ja nnøbajtin, ti ja tyijpy? Pø ja'agøjpxi adøm tøn nnoøbejtyindi jøts nmøøt'ejtindit ja nwindson'ajtim Jesucristo, jøts yiknijawit jøts ku adøm ja nbøky ja tøm xmi'o'jka'andi.

⁴ Møøt adøm ja Cristo ñamyayi nnaøxjka'andi jøts ja møøt n'øøky'ijtyindi, jøts ku ja yjujkyjyky xemikøjpx jøts adøm nayide'en nbajtma'an ja jemchinaa'yin midi ixyam jøts midi xemikøjpx, sam ja Dios Teety ja tyukmimadaajkøø ja o'jkin, jøts ja myøk'ajtin myø'øyi, jøts ja yjujkyjyky xemikøjpx. Nay ja'ats idø'on yiktump ku ja nøbajtin yikpaaty.

⁵ Pøni tødams adøm ja Cristo nmøøt'ø'jkyim nayide'en sam ja o'jkin ja tøm tpaaty, nmøøt'ijtyindipts adøm ja', jøts ku ja yjujkyjyky xemikøjpx jøts nayide'ents adøm ja nmøøt'ijtyindipts adøm ja'.

⁶ Nnija'windipts adøm sa jaty tøm njaa'y'ajtyindi, jøts ja' ja Cristo myi'o'jk jam kruskøjpx, jøts adøm ja nbøky xniwaajchim jade'engøjpx ku ja y'ø'jky, jøts ja ka'ap x'ukmimadaajkna'am, jøts ja ka'ap jade'en n'ukmidu'una'ant sa jaa'y ja wyindsøn tmiduñ, jade'en ja pøky ñamyayi yikmiduñ.

⁷ Pønts tøm y'øøky, tøts ja pøky ja ñiwaajtsniyi.

⁸ Pøni nmøøt'ijtyindip ja Cristo øy ja møøt nja'ø'jkyim, njøp'ijxy'ajtyindipts ja' jøts ku ja møøt njuky'ajtinidit xemikøjpx,

⁹ pø nnija'windipts jøts ku ja Cristo tøm yjujkyjyky xemikøjpx, nijuuni kya'uk'oo'knit, nijuuni kya'ukmimadaajkniiyt ja o'jkin.

¹⁰ Tuk'ojkyi ja ja'ayi ttuku'o'jkyi'ñ amuum ja pøky; jøts ja ixyam xemikøjpx yjujky'aty amuum ja Dios Teety tmøøt'ity.

¹¹ Jøts nayide'ents meets idø'onmidi, øøky tigøy ndejint mnabyikta'agiyidit jøts ja pøky jade'en xkayikmø'ajtit, wijy kejy meets ne'egi mnabyikta'agiyidit ku ja Dios yja' xpaduujnidit, ja'agøjpx ku ja nwindson'ajtim Jesucristo xmøøt'atti.

¹² Paty ka'ap mbaat'atyidi jøts nugo xyikmajada'aktit ja mbøky ja mga'øwyinmaa'ñ, øy sa mduktunwa'añidi pøni sa ja ttsøky.

¹³ Kidi mnagyøyakyidi ma pøky, jøts ja kidi mduktuñidi ja ka'øy'ajtin. Ne'egi amuum mnayoxidit ma Dios, jøts ja mduktunidit tum ja øy'ajtin. Ka'ap meets ja pøky xukmijuky'ajtnit, jabi tøm meets ndejint tøm m'ats'øøky, jøts tøm mjuky'ajtnit jadigojk, jøts ja juky'ajtin tøm xpaatti midi xemikøjpx.

¹⁴ Jøts ja pøky ka'ap meets ja m'ukmimajadaajkniiyt, pø kidi ja Moisés kyutujkpxi meets mnitanaajjyip, ja Diosxi meets ja kyunuu'kxin mdanitanaajjyiyip.

Ja ejxpajt madya'aky ku ja jaa'y ja wyindsøn aguwan tmiduñ

¹⁵ ¿Sudsots adøm? ¿Jaa'kyimbyøkyun'adøjtsindip adøm ja'agøjpx ku ja Dios xanitanaa'yindi ja y'ø'ajtin, ku adøm ja kutujk ka'ap xiidyu'uñidi?

¹⁶ Jøts mnija'widipts wa'ats ku tu'uk ja windsøn x'ukmidundøkidit, tu'ugyits ja xwindsøn'attit jøts ja' kuwani mmimado'odip, pø ja'axi wyinaty mdumbi'ajtidip. Nayide'ents idø'on tpaaty ndejint ku ja pøky xnimado'odit, ja' meets idø'on ndejint windsøn'ajtnit øy ja yjayik'øøky yjatyiktigøy, uk nayide'ents ku tu'ugyi ja Dios xnimado'odit jøts jade'en xu'undit sa ja ttsøky.

¹⁷ Janch møj ja Dios ku ja y'ixpøjkin xpaduujnidit midi tøm myiktagidøkidi, jøts ja pøkyunk tøm xmajtstu'utti midi y'ijty niwa'añ myik'ejtniyidip.

¹⁸ Tøts ja pøky mniwa'a'chidi ku ja ka'ap m'uknimajadaajkniiyt, jøts tøm xpatwa'jkidi ja øy'ajtin midi ja Dios yja'ajtpy.

¹⁹ Jade'en ndukmadowdi sa ø najtsjawi xmadodø'ødit, jøts nayide'en xnadyamiyoxidit ja Dios. Sam y'ijty mnagyøyakyidi amuum jøts xundi ja ka'øy'ajtin ja axøøk'ajtin, nayide'ents idø'on amuum ja Dios xnadyamiyoxidit, jøts xuujnidit ja y'ø'ajtin jøts amuum xmøøt'ettit ja Dios, tu'ugyi xagøðøkidit ja mdsinaa'yin.

²⁰ Ku meets ja pøky y'ijty mganiwa'a'chinim, ka' meets y'ijty xuujni ja Dios yja', ja tiy'ajtin øy'ajtin;

²¹ Jøts ¿ti jade'en tøm xpøkti? Mdatsø'ødyundip ja ixyam jadigojk, pø ja'ayixi ja yajkpy ja o'jkin tigø'øyin.

²² Kuts tøm mniwa'a'chidi ja pøky jøts ja Dios y'ø'ajtin tiy'ajtin tøm xpadøjkiyidi, yø' tiy myiktu'undip, yø' mmo'ojidip sudso xmøøt'ettit sudso xmidu'undit amuum ja Dios, jøts xpaattit x'ejxtit ja juky'ajtin xemikøjpx.

²³ Ja o'jkin tigø'øyin, ja' ja pøky ja'ayi yajkpy. Kuts ja Dios møøt, ja juky'ajtin ja Dios xamay'ajtimp midi xemikøjpx yikpatp, ku møøt n'ejtin ja nwindson'ajtim Jesucristo.

7

Amajtsk'ajtingøjpx tu'uk ja ejxpajt madya'aky pyidsimy

¹ Mee migu'uktøjkti, meets mnija'wip sa ja kutujk wya'añ, jøts mnija'wip jøts ku ja ya ja kutujk tmøøt'aty ja møk'ajtin ku jaa'y jaagya yjujky'attinim.

² Ku n'ukpiktaajkint, ku tu'uk ja tømøxyøjk y'amajtsk'aty, kutujkøjxpts ja tmøøt'amajtsk'aty ja ñiyaa'y pøni jaakjujky'ajtpnim ja'; kuts ja y'øøky ja ñiyaa'y jøts ja nayide'en ja kutujk ñiwa'achi, ku y'øøky pøn ja y'ity møøt y'amajtsk'aty.

³ Kuts ja tømøxy jadu'uk yaa'dyøjk t'adsøy jam ja ñiyaa'y yjajujky'atynim, pøkyts ja tyumpy; kuts ja kyu'øøgyi, niwaaajtsip ja kutujk ja', øy ja møøt jadu'uk ja yaa'dyøjk y'amajtskit, jøts ka'ap ja pyøkyi.

⁴ Jade'ents mee migu'uktøjk idøønmidi pøni niwine'en ja Cristo mja'atyidi, myikniwa'ats'ajtniyip meets ja Moisés kyutujk, tømee ñamyayi ku'øøky mdañ ku ja pøky tøm wyindigøy jøts ja wenkpi xpadøkidi. Ja Cristo meets ixyam mja'ajtniyidip pøn jujkpyøjk xemikøjxp, ja'agøjxp ja yjajty jøts jade'en'ampy nmidu'unindit ja Dios.

⁵ Ku adøm y'ijty pøky y'agujkp ndsinaa'yimnindi, jøts ja kutujk ja' ja wya'añ jøts ja tyikjinaxy adøm ja nga'øwvinmaa'ñ, ku ja ngabadu'uñindi jøts ja niti nitso'ok'ajtin xkadukjøp'ijxyindi.

⁶ Æyamts tøm xniwaaajchim ja'abi kutujk, tøm ja ñamyayi ngu'øjkyim jøts ja tøm xuk'ixmajchim ja myøø'ajtin; jøts adøm tøm n'awa'atspidsø'myindi, tu'ugyits nmidu'unint ja Dios jøts ja y'Espiritu Santo ja jemy jujky'ajtin xukmi'ejtint midix xemikøjxp, jøts ka'ap ja'abi møjaa'gyutujkin x'uk'ana'amnandit midiy'ijty nbadu'uñindip.

Ja pøky midixmi'ejtp

⁷ ¿Wa'anim jøts ku ja kutujk pyøkyi? ¡Ka'ap! Ku jeexyip ja kutujk kya'ity, ka' øts jeexyip nnijawi ti pøky'ajtp, ku ja jeexyip tkanigajpxy kudam ja pyøkyi ku ja nmigu'uk pyikta'aky njanchpøkwa'axnant.

⁸ Ja'agøjxpts ja pøky tøm myøjtøki jøts ja myøj'aty. Pøni sa ja kutujk yja'ane'emy jade'ents øts ja nnijawi midix'ibi ka'øy, jøts øts ja jinaxy nduñ sam øts y'ijty nga'adi'ich ku øts ja kutujk nganijawinim. Ku ja kutujk kya'ity, ka'ats ø nnijawi midix pøky.

⁹ Tøm øts jade'en njaty ku ja kutujk ka' nnijawinim, tømøø ø njawi n'adi'ich, ka' njawi ja pøky. Kuts ø tøm nnijawi sa kutujk y'ane'emy, jøts øts ja nbøky njawi yjaaktyimyajadak'adi'ich, jøts øts ja kawindem paadyim xuk'ijxy ja øy'ajtin ja kunuu'lxin.

¹⁰ Wimbet øts ja nduñ sa ja yja'ane'emy, midix'ibik øts idøønm xukpaatp ja øy'ajtin, tøm øts ja ne'egi xyikpøkyety.

¹¹ Ja pøky ne'egi nanmøyøjtøjkiyip pøni sa ja kutujk y'ane'emy jøts øts ja win'øø'nin tøm xmøøy. Nay ja kutujk øts jadigojk xanikajpxp ja o'jkin tigøøyin.

¹² Ja kutujk, øy ja', jøts øy wa'ats yikutuky nayide'en, øy'ajtingøjxp tiy'ajtingøjxp yikutuky.

¹³ Jøts pøni øy tam ja kutujk, ¿sudsøts øts ja xpayøøy, jøts øts ja ñamyayi xuk'ejxni ja o'jkin tigøøyin? Jøts øy ja kutujk, ja pøky øts jade'en xyik'ejtnip øøky tigøy, ka' ti jøp'ejxin, jøts øts ja jade'en xuknijawi jøts ku ja' pyøky; tamibøki midix øy, jøts øts ja kutujk jade'en xuknijawi jøts ku ja pøky ni sudso'ampy kya'øyi.

¹⁴ Jøts nnija'windip adøm jøts ku ja kutujk Dios tja'aji. Jøts pojkkpitumbijaa'y'ajtp øts, jade'en'ampy øts ja pøky xmimajada'aky.

¹⁵ Ka' øts nja'gyuki pø ti ø xjajtp, tum jiwimbejts ø nduñ, kuts ja njatunwa'añ midix øy, ja kya'øybi øts ne'egi xmimajada'aky midix njagatunwampy.

¹⁶ Kuts øts ja nduñ ja ka'øybi midix njagawampy, jade'engøjxp nnijawi ku ja kutujk y'øyi, ja'abi kutujk ka'axi tyikutuky jøts ja'abi ndu'unint.

¹⁷ Kidi øtsip ja køøm ñamyayi jade'en ndyimyjatumpy, ja pøky jade'en adøtsp midix ø nnikøjxp'ajtpy.

¹⁸ Nnija'wip øts sa jaa'y'ajtin yikjagyepy, niwine'en ja ka'øy'ajtin kyayikmøødi; njatsøky'ajtpy øts jøts ja øybi ndu'unt, ni ka'a'pts øts ja nduñ.

¹⁹ Ka' øts ja øybi tsujpi nduñ midix njatsøjkpy, tum ja ka'øybi ø ndun'adichpy midix njagatunwampy.

²⁰ Kuts øts idøønm ja nduñ jade'en midix ø ngatsøjkpy, ka'ap øts ja køøm ndsøkyøjxp nduñ, pø ja pøkyi øts ja jade'en xuktump midix ø nnikøjxp'ajtpy.

²¹ Jade'en njaty ngubety, ku øts ja njatunwa'añ midix øy midix tsuj jøts tum ja ka'øybi ø ndumpy.

²² Wamp øts n'am njotp jøts ku øts ndsojki ja Dios kyutujk;

²³ kuts ø køøm nnay'ijxyi, jøts ø njawi jøts ku ja jaa'y'ajtin ka'ap jade'en ttsøky sam ø njawinmay, ja pøkyts idøønm xuktump midix ø nnikøjxp'ajtpy, jøts ja' ø xkamajstutp jøts ja øybi ndu'unt.

²⁴⁻²⁵ Ja Dios øts ndagøøjkyp ja nwinmaa'yin jøts øts nbaduujnit ja kyutujk, jøts øts ja njaa'y'ajtin ja' ja y'adsinaapy ja pøkytu'unin, ja' ja mimajadaajkip. ¡Ti ø njanch'ayøøy! ¿Pønm øts ja pøky xuknitso'ok'atp midix øts jam nikøjxp'ajtpy, midix øts xyik'ookwamp

xyiktigøøwyaamp? Kuuyi Dios amuum, nwindson'ajtim Jesucristo køjxp yikpaaty ja nitso'ok'ajtin ja'ayi. janch møj ja Dios!

8

Ja juky'ajtin midi Dios xmøø'yimp

¹ Pøn tmøøt'ejtipp ja Jesucristo ka'ap Dios Teety ja mibaat tyaguwaniyidit jøts ja y'ayo'odit, kumi ka'ap ja t'ukyikmøj t'ukyikmøjtøjkniidi ja pøky.

² Ja Espiritu Santo midi tyajkp ja juky'ajtin xemikøjxp ku nmøøt'ejtint ja nwindson'ajtim Jesucristo, ja' øts ja pøky tø xukniwa'ach midi øts øøky tigøy tø y'ity xyik'ejtnip.

³ Jade'en'ampy ja kutujk y'ijty kyamajada'aky ku adøm n'ambojpkpitu'uñim nad-saachpøjkpitu'uñim. Tøts ja Dios Teety tkexy ja y'U'nk, jøts ja nayide'en tnanky'ijxyi sam ja jaa'yin, jøts ja tku'o'ljki ja pøky. Xjats ja tømimajada'aky jade'en'ampy ja pøky, jøts adøm ja ka'ap x'ukmimajadaajkna'am.

⁴ Ja'agøjxp ja jade'en tø ttuñ øts adøm ja kyutujk ja wa'ats nbaduujna'am, pø ja'ayixi adøm ja Espiritu Santo yja' nbowinmaa'jyam, jøts kidi køø'm winmaa'ñip adøm nyikma-jadaajkyim.

⁵ Pøn kaniwaa'jtsipnim ja pøky, ja' yjotmay'ajttip sa køø'm wyinmaydi; pønts tpaduujnidip ja Espiritu Santo yja', nay Diosts chøky'ajtin ja ja'ayi pyaduujnidip.

⁶ Jøts ku jade'en njotmay'ajtin sa køø'm nwinmaa'yin, yø yjade'embid øø'n yikwindigøøpy; kuts njotmay'ajtin ja Dios yja', ja'ats xukpaajtimp ja juky'ajtin xemikøjxp, jøts ja øy'ajtin midi Dios yajkpy.

⁷ Pøn ja køø'm winmaa'ñ tyiktundip sa køø'm wyinmaydi, ja Dios ja jade'en myidsepøjktip kumi ka'ap Dios kyutujk ja ttsojkidi, jøts nika'ats tjajtmidi sa tpadu'undit.

⁸ Paty idøø'n pøn ja'ayi ttundip ja kyøø'mwinmaa'ñ midi pøkmjøøt, ka'ap Dios ja mibaat jade'en twindsøøgidit.

⁹ Jøts meets, kumi ka'ap meets x'ukyiktuni ja mgøø'mwinmaa'ñ, ja Diosts meets ja y'Espiritu Santo mjagyajppip, ja' mee myikjuky'ajtniyidi, pø ixamxi ja xnikøjxp'ajtnidi. Pønts tkayiktuujnip ja Espiritu Santo, ka'ap Cristo ja yja'aty nayide'en.

¹⁰ Pøni mmøøt'ejtidipts meets ja Cristo, øøky windigøyts ja pøky ñamyayi ñøjkxni møøt ja mnine'kxti, jøts ja anmija'win ne'egi yjuky'aty ja'agøjxp ku ja Dios tø mgupikyidi.

¹¹ Pøni mjanchmøøt'ajtidipts ja Dios Espiritu Santo, midi ja nwindson'ajtim Jesucristo ojts jadigojk xemikøjxp yikjuykpyiky, nay ja Diosts meets ja mnine'kx køø'm yikjuykpyøkip, jøts jadigojk xemikøjxp mjuky'attit.

¹² Jøts xpaat'ajtindip adøm, migu'uktøjk, jøts ka'ap njuky'ajtindit pøky agujkpy midi ttuktump ja køø'm winmaa'ñ.

¹³ Pøni mdunwandipts jade'en sa ja pøkytu'unin, øøky mee m'ejtni, kudigøy mee m'ejtni; pøni m'ajot'ajttipts ja Dios Espiritu Santo jøts ja xukmimajada'akti ja mbøky, mjuky'atpts meets jade'en xemikøjxp.

¹⁴ Ja' ja Dios Teety y'u'nk'ajtpy pøn ja Espiritu Santo ja tyukpudøjkip jøts ja wyinmaa'ñ ja tyiktøøji tyiktudaajki.

¹⁵ Ku myikmo'odi ja Espiritu Santo, kidi ja'ajip ja myiktanimøø'yidip jøts meets tsøøgi jawi myik'etidit, pø ja Espiritu Santoxi meets ja Dios mmøøjyidip jøts m'u'nk'atidit ja Dios, jøts ja' idøø'n xyikwa'anindip amgujk jotkujk ku adøm ja ndeety'ajtyim.

¹⁶ Ja'abi Espiritu Santo majadap, jøts adøm ja tu'uk amumjoojt xukjanchja'want jøts ku adøm ja Dios x'u'nk'ajtyindi.

¹⁷ Ja' adøm xja'ajtindip, paty adøm nayide'en ja Dios xmøø'yindit ja juky'ajtin midi ja tø twanda'aky, midi ja xmøøpwa'anindip. Midi ja Cristo yikmøøpy, nay ja'ats adøm yikmøø'yindip. Pøni ngupøkyindip adøm ja ayo'on sa ja tø y'ayøy, winets adøm ja nay ja'abi øy'ajtin xukpaajtint midi ja yikmøøy.

¹⁸ Kidi nayide'enip ja' sa adøm ixyam ja ayo'on nbaajtyindi, ka'ap ja jade'en tm'abaaty midi døø'n Dios kyunuu'kxin'ajtpy, midi døø'n jaanim nbaajtindip n'ejxindip.

¹⁹ Tuki'ysi midi ja Dios tø tyikøjy, yjanchja'awejxnip ja nayide'en juuninin yja'att ja et ja xøøw ku ja Dios tyiknigaxøøkt pøn jaty ja y'u'ngip, pøn jaty ja yja'ajtpy.

²⁰ Nayide'en amuum ja naxwiil'ñit tø y'ayo'ombaaty Adán pyøkyøjxp, kidi kyøømdsojkingøjxpip ja naxwiil'ñit ja jade'en yjaty, ja Dios ja jade'en tø tyanibiktaagiyi; yikmøøpyts ja jøp'ijxy'ajtin jøts ja øy juuni ja øy'ajtin jadigojk tpaatt,

²¹ Jøts ja Dios ja yiktigajtsmyit amuum, nay ja'abi øy'ajtin tpaatt midi ja jaa'y yikmo'odip pøn jaty ja Dios u'nk'ajtidip, jøts ja ñiwa'adsit nayide'en ku ja tø pyøkpety, ku ja tø wyindigøy.

²² Jade'en ixyam yjaty ja naxwiil'ñit midi ja Dios tø tyik'øyi, sam tu'uk ja tø øxyøjk y'annipiky chaachnipiky ja y'u'nk ku kye'exy, amuum tmigil'pxy tniðøøty.

²³ Jøts kidi ja naxwii'ñip jade'en ja'ayi tyimyajjtp, nayide'en adøm njajtma'an ku adøm tøy ayon nbaajtyim, øy adøm ja Dios ja y'Espiritu Santo tøy xmoø'øyim ejxpaj'ajtin, ja'agøjxp ku xjaaktukpaatwa'añimnimdi mididi paat'ajtyidip pøn jaty ja Dios u'nk'ajtidip. Njan-tyimyjøp'ijxy'ajtyindip adøm, jøts ku øy juuni yja'att ja xøøw ku adøm ja Dios amuum xja'ajtindit ejxim tu'uk ja u'nkteedyin, jøts ja xyiktigajtsa'ant ja nne'kx.

²⁴ Janchja'wingøjxp ja'abi nitsoojkin yikpaaty; kuts ja janchja'win yikmøø'taty, ja' idø'on tyjy ku adøm n'awijxyindinim mididi ngapaajtyindipnim. Jaa ku ja jeexyyp yikmøø'tajtni, çtits idø'on jaakyik'awexp?

²⁵ Kuts adøm idø'on jade'en njøp'ijxyindi mididi kayikmøø'yindipnim, yiktudakpy ja tsinaa'yin jøts ja winmaa'ñ ja'.

²⁶ Jøts nay ja Dios Espiritu Santo adøm xpudøjkamp mā nayja'wiyam nduu'dujkyim, ku niti winmaa'ñ, niti aaw, niti ayuujk ngajagejpyindi, jøts ka' ja winmaa'ñ nbaajtyindi sudso nmøøtmadyaajkint ja Diosu'nk. Nay Espiritu Santots køø'm ja Dios Teety t'amidoop ja pudøjkin sa nduu'baajtint nduu'ejxint, ja'agøjxp ku tjaty sudso øy ja Dios Teety tminuu'kxa'akt.

²⁷ Jøts wa'ats ja Dios Teety xnija'wa'am sa jaty pønjabøn wyinmay, jøts ja ñimadøyi Espiritu Santo sa jaty ja wya'añ ku ja xku'amido'owam sam ja Dios Teety køø'm ttamidsøky pøn jaty ja yja'ajtpy.

Cristo køjxp nmajadaajkyindi

²⁸ Nnija'windipts ku ndsojkindit ja Dios, yajkpts ja pudøjkin ja' pøni mā jaty sagasa njajtyindi, jøts jade'en tyik'øpyidsimy pøn jaty ja tøy twi'ixy, sa ja jawyeen tøy ttanibiktaagi køø'm.

²⁹ Tøy ja Dios Teety twi'ixy patki'jyi ja yjaa'y jøts ja tøy twiwich. Tøøyip ttanibiktaagi jøts yjaa'y'attit nayide'en sa ja Dios U'nk yjaa'y'aty, pøn tngubajk'ajtp ja jaa'y pøn jaty ja Dios Teety ja'ajtidip, tum uch tum migu'uk ja tjawi niduki'yiyi.

³⁰ Pøn ja Dios tøy ttanibiktaagi jade'en patki'jyi, jøts ja tøy twaadsøy; kuts ja tøy ñimiñiyi, jøts ja tøy tkupiky, winets ja nayide'en tøy ttamini'adsøwi ja øy'ajtin amuum.

³¹ Çsats adøm ja nwa'anin ndejint? Pø amuumxi adøm ja Dios møøt n'ijtyindi, çpønts adøm xnimymajadaajkimp jade'en?

³² Ka'ap ja Dios t'ama'at'ajty ja y'U'nk, kyøyajk ja' jøts ja y'oøkt adøm nbøkyøjxp; çsudso døø'n ja ndejint adøm xkamøøgyøjxint tuki'yiyi mididi myøø'tajtpy, pøni tødam ja kyøø'm U'nk jawyeen tøy xaniguejxyim? ÇTiku døø'n ja ndejint tkayakt?

³³ Øy pøn tjani'øøniwya'añ ja jaa'y pøn ja Dios tøy wyi'ijxyidi, pø Diosxi ja køø'm tøy kyupikyidi,

³⁴ Çpønts ja mibaat nidyangitujk'atidip jøts ja tpaattit ja ayo'on? Pø ja Cristoxi ja tøy kyu'oogiyidi, jøts nay ja'ats tøy yjujkyiky xemikøjxp, Dios Teetyts ja amuum møøt y'ity, jøts ja' adøm jam xni'amido'owamp pøni sa ndyimyajtyindi ndyimgyubejtyindi.

³⁵ Ku xpa'ayoø'øyim ja Cristo, çpøn adøm ja xnidyukmajtstuujtimp ja pya'ayo'owin? Nipøn adøm ja xkadukmajtstuujtint, wan tjati'ayo'oni, øy njajotmay'ø'jkyim, øy njayik-jemdu'uñindi njayiktedu'uñindi, wan yuu tja'ity, uk ku wet naamy xka'ejtxindi, uk ku tsep, uk o'jkin tigøø'øyin yjayikpaaty.

³⁶ Pø yide'enxi jap nøkyijxpy wya'añ:

Ejtp øøts ja jaa'y xyik'ookwa'añ ja'agøjxp ku øø nbaduujni ja mja';

jade'en øøts nyiktuñ sa jiyujk sa borreek y'ookwa'añ.

³⁷ Øy adøm jade'en njajajtyindi, ne'egits adøm ja jinxay ndyimyajtyindi ndyimgyubejtyindi ja' myøø'ajtingøjxp pøn ja pya'ayo'owin tøy xmoø'øyindi.

³⁸ Jade'ents ø nwa'añ jøts ku niti nipøn xkadukmajtstuujtint mibaat ja Dios pya'ayo'owin, nja'ø'jkyindi njadigøø'øyindi, uk njadyimyajjuky'ajtyindi. Ni ja ankilis ja xkadukmajtstuujtindit uk yjayikutujkpitøjkidi, jyadyimyjaja'ajidi pøn jap tsajpøtpy uk yjamajidi. Ni ja xøøw ni ja jumøjt mididi ixyam yøø'py, uk mididi memp kidakpnim, nija' adøm ja xkadukmajtstuujtindit.

³⁹ Wan ti tkøjxpi, uk wan ti tkøjki, wine'en Dios tøy tyikøjy niti kyamay yjade'embi jøts adøm nmajtstuujtindit ja Dios pya'ayo'owin, mididi ja tøy tyiknigaxi'iky nwindson'ajtim Jesucristo køjxp.

9

Dios ja Israelit jaay tøy wyi'ijxyidi

¹ Tiy janch ø ngajpxy, pø ja Cristoxi øts njanchja'wip, ka'ap ø ndaabyaaty; ja Dios øts y'Espiritu Santo wa'ats xuknija'wip jøts ku øts tiy'ajtingøjxp ngajpxy.

² Janch jotmay'oo'kp øts, ndyimchaachkyuwinnma'ayip øts kajaa,

³ Jøts wamp øts, øy meets ayo'on patki'py ndyimgyu'ettit jøts ja Cristo ngamøø'tetnit pøni tsojkip jade'en, nugo ku øts nmigu'uktøjk n'ødyuñ jøts xpaattit ja Dios, wine'en ndukojpk'ajtyindi.

⁴ Ja Israelxi ja tyeety'apidip, jøts ja' Dios tø y'a'ejxiyidi jøts yjagyepyidi. Jøts ojts ja kø'øm ja Dios kyunuu'kxin t'ejxiyidi tñija'wyidi, jøts ja' ja møø'jyidøø ja tiy'ajtin sudso ja jadigojk ñitaniyidit ja Dios. Jøts nay ja' ja ttagøðøjkjyidøø ja Moisés kyutujk, jøts ja windsø'jkin mididi ja tyu'undip jam ma ja chaptøjkti. Jøts nay ja' ja Dios ttukmidaa'jnidøø ja wyanda'aky jøts ku ja y'ødyunidit.

⁵ Tu'ugyi aats kugoj ja'adi pøn jaty israelit jaa'dyi; jøts nay ja' ja tyeety'apidip pøn adøm ndeety'ap'ajtyindip, nayide'ents ja Cristo, pø adømxi ja' ñamyayi njaa'y, jøts køy ja'ani ku ja amuum titanit ti jaty ejtp naxwiñ, pø Diosxi ja', windsø'øgi winjawi ja y'ity xemikøjxp. Jade'en idø'øn ja y'ejxi.

⁶⁻⁷ Kidits nwa'añim jøts ku ja Dios tkayik'adukñim ja wyanda'aky mididi ja møjaa'y Israel yiktaniwandaajkøø wine'en y'ap y'ok ja tø ñajtska'axidi. Ka'ap ja Dios ja'ayi tø twi'ixy ja'ayi pøn ja Abraham y'apteety'ajtip; pø yide'enxi Dios ja wyinaty tø ñi'mxyi: "Nay! mets mnigojpk'ajtpy ja Isaac y'u'nk y'una'jkti pøni wine'en ja ñajtska'axidi."

⁸ Jade'ents adøm nnija'wa'am jøts ku Dios ka'ap t'u'nk'aty pøni ma pøn jadu'uk jadu'uk kyugajpi, wan t'israelit jaa'yidi wan tka'israelit jaa'yidi. Ja' dø'øn Dios y'u'nk'ajtpy pøn tjø'ejxtip ja wyandaajkin.

⁹ Pø yide'enxi ja Abraham ja Dios ñimaajyøø ku ja Dios wyandaajky: "Tiemp! køjxp ø nme'ent, u'nkpaatp yø mnidø'øxy Sara."

¹⁰ Jøts kidi ja'ayipts nadyu'ugyi yiktaniwandaajki ku ja y'u'nk ja tpaatt. Jabi nayide'enxi ja Rebeca ja y'una'jk tpaatmaa pøn ja Isaac tyeety'ajti, adøm ja ndeety'amøj.

¹¹⁻¹³ Jøts ka'anin ja wyinaty yjaja'atinim, kidyimkya'axtipnim ja wyinaty, ka'anin ja wyinaty yikni'aw ja y'adø'øststøt y'ka'ø, jøts ja Rebeca ja Dios ojts ñi'mxyiyi: "Ja myø'jpi tmidu'ump ja myutskpi." Nayide'ents ja møø' tuknax tijy ku wya'añ ja Dios kyajpxy: "Nwinja'wip øts ja Jacob, jøts Esaú ka'." Xjats ja Dios jade'en xukni'wa'am jøts ku ja kø'øm twi'ixy kyø'ømdsojkingøjxp pøni pøn ja y'a'ejxip. Ka' tmø'jiktajkiyi ja y'ødyu'unin kya'ødyu'unin.

¹⁴ ¿Tits adøm ñikyajpximp? ¿Ti ja adøm nwa'anint jøts ku Dios ka' tyiy'ad'i'ich? ¿Pø ka'axi!

¹⁵ Pø yide'enxi ja Moisés yikni'maa: "N'ayo'ejxp øts ja' pøni pøn ø kø'øm n'ayo'ejxwampy, pøni pøn ø kø'øm nba'ayoowampy."

¹⁶ Jade'en'ampyts ka' chøkyi jøts adøm ngø'ømwinmaa'ñ ndamajadaajkin, pø ja Diosxi kø'øm x'ayo'ejxindipnim.

¹⁷ Pø patyxi ja Dios kyajpxy wya'añ ku Dios tnøjmi ja jaa'y pøn windsøn'ajtp jam Egipto: "Ja'agøjxp møj windsøn tø nyikjaty jøts øts ja nmø'ajtin nyikwingaxi'iky ku mets nmimajada'aky, jøts øts nxøøw o madsoo yikni'awit."

¹⁸ Xjats idø'øn jade'en ja Dios t'ayo'ixy pøni pøn ja y'ayo'ejxwampy, jøts ja twinmaa'mbyiky pøni pøn ja kyayikmadogukiwampy.

¹⁹ Winets meets idø'øn x'adsojimbett: "Pøni janch ku yjade'eni, ¿tigøjxp Dios t'øky'ixy ja jaa'y? Jøts ¿pønts mibaat t'ukwindso'op ja Dios?"

²⁰ Jøts jaa'yts adøm, jøts ¿jaaktymbyøn meets ku meets Dios yja' xkagupøjkit? ¿Ti ja ja tul'jts tnimaañit ja ñijaa'y pøn ja tø yik'øiyiyi: "¿Tiku øts jade'en tø xyik'øiyi?"

²¹ Pø ja tul'jtsna'abixi kø'øm pajtip pøni sa ja kø'øm tyik'øiyi'wya'añ ja na'aknaajx; øy ja tyik'øiyit ja tul'jts tu'uk mididi øy mididi tsuj jøts ja tu'ugyi ttanibiktaagi ti ja wya'ant, uk øyts ja nay ja'abi naajx tna'at jøts ja tyik'øiyit jadu'uk ja tul'jts mididi øy ti ñi'wya'ant.

²² Ku ja Dios tmidani jøts tmiduda'aky'aty ja jaa'y pøn ja tø yikjotma'adyi, pøn tyimy-japaajtniyidip jøts y'ayo'odit uk jøts ja tyimgyudigø'ødyit, ti ja kamaa'niyip, ixe ja ayo'on ja ttuktagida'aky jøts ja myø'ajtin ja jade'en tnanky'ejxit.

²³ Ots ja Dios jade'en ttuuñ, ka'ats adøm ja jade'en tø xuu'ñim, ja'agøjxp ku adøm ja xpa'ayo'øyindi jøts tnanky'ijxy jade'en mabaat ja tjagyepy ja myø'ajtin, jøts ja t'ayo'ijxy pøn ja patki'jyip tø twi'ixy jøts ja ttukpaatwa'añ ja y'øy'ajtin.

²⁴ Tø ja Dios kø'øm xwi'ijxyindi, ku ja winaa'gin twi'ijxy ja israelit jaa'y, jøts nayide'en winaa'gin pøn ka'israelit jaa'dyi.

²⁵ Sam ja Dios ja kyajpxy ttamigaxiyi'ñ ja kyugajpxy Oseas, ku ja wya'añ yide'en:

Pøn øts y'ity ngaja'ajtpy, ja' øts nja'bøkp,

pøn øts y'ity ngatsojktip, ja'ats ø ndsoktip.

²⁶ Nay jam et ja xemijujkpy: Dios ja kø'øm yja'bøkidit ma ja yikni'maadyøø: "Meets, ka' mee nja'aty."

²⁷ Kuts ja israelit jaa'dyi, pø yide'enxi ja kugajpxy Isaías wya'añ: "Øy ja Israel mabaat ja y'u'nk y'una'jk yjamøjidi yjamayidi sam nøø'abu' myayin, niwinaagints ja'adi pøn nitso'ok'attip,

28 jabi ka'pxy ja Dios ja y'ayuujk tpadu'unt sa ja tō wya'añ, ku ja tyiknaḡkida'akt adsu'jky ja tiidyu'unin ya naxwiin."

29 Sam ja Isaias wyinaty jekyip tō wya'añ:

Ku ja Dios jeexyip tō tkayiknitso'ok'aty winaagin ja aats ja kugoju midy yikojp'ajtp, tō adōm jeexyip jade'en najatna'am sa Sodomit kajp sa Gomorrit kajp ku ja tō kyudigōgyōjxti.

Sa israelit jaa'y tka'ōyjawidi ja ōgyajpxy ja ōmyadya'aky

³⁰ ¿Tits adōm ngajpxindip? Yjanchja'wingōjpxi Dios ja tō kyupikyidi pōn ka'israelit jaa'dyi, yam ja y'ity tkajotmay'atti sa Dios ja kyupōkidit jōts ja ne'egi tō kyupikyidi.

³¹ Jōts ja israelit jaa'y, pōn ja kutujk tpadundip jōts ja jeexyip ja' ja Dios tyagupikyidi, ka'ap ja ne'egi yikupōkti ja'agōjpx ku ja kutujk ka'pxy tkabadundi.

³² Ka'ap ja twinmaydi jōts ku Dios ja tyagupōkidit ja janchja'win, ja' Dios ja tijy tagupōkidip ti jaty ja tyundip. Ja'ayi ja tyamōjti, ja'agōjpxts winguwopi jōpkuwopi tmijatti ku ja nwindson'ajtim tō myiñ.

³³ Jade'en yjatti sam yiknigajpxy mā jap nōkyijpxy wya'añ yide'en:

Nyikaxō'ōkp ōts jam Jerusalēn tu'uk midy ja jaa'y nay'adsepi yjawip jōts ka'ap ja pōn myayit; pōni pōn ja tjanchja'wip, ka'ap ja windigōy yjatt.

10

¹ Mōk ōts, migu'uktōjk, ja tsojkin njagyepy jōts ōts ja Dios n'ajot'aty, jōts ō n'amidōy nbōktsōy jōts ja israelit jaa'y tnitso'ok'attit.

² Jade'en ō nwa'añ jōts ku ja tjatsojkti ja Dios, jade'en'ampy ku ka'ap tjatti.

³ Ka' tñijawidi sudso Dios tkupiky jaa'y; kyō'ōmgutujk ja' yiktundip, ja' ja tijy tagupōkidip ja Dios, ni tkamōjipkta'akti ja' midy Dios ja tagupōkidip.

⁴ Pō ja'agōjpxi ja Moisés kyutujk kya'uktuni, pō ixaanixi ja Cristo jōts tum ja'ats ja Dios kyupijky pōn ja tjanchja'wip.

⁵ Jōts ku Dios ja kutujk xagupōjkint, pō yide'enxi ja Moisés ja tjaay: "Pōni pōn tpadunwamp ja kutujk, ka'pxy tpadu'unt winets yikjujky'attit mā Dios."

⁶ Jōts ku Dios xkupōjkin janchja'wingōjpx, yide'enxi ja wya'añ: "Kidi mwa'andi: ¿Pōndam nōjkxp tsajpjōtpy? —jōts ja Cristo mye'ent—;

⁷ jōts ni mgawa'andit: ¿Pōn jap nōjkxp mā ja o'jkin?" —jōts yjujkyōkt ja Cristo xemikōjpx.

⁸ Pō ka'axi yjade'eni, pō yide'enxi ja wya'añ: "Ka'ap yjagami ja nitso'ok'ajtin, ixa ja xmōōdidi wingon", ku xjanchjawidit sa ja ōgyajpxy ōmyadya'aky mduknijawiyidi midy ōō ngajpxwa'kxpy.

⁹ Ku mwa'andit jōts ku ja Jesús ja' nwindson'ajtin'ajtyindip, jōts xjanchjawidit amumjoot jōts ku Dios Teety ja tō yikjujkyiky xemikōjpx jadigojk jap oo'kpi y'agujky, winets xpaattit ja nitso'ok'ajtin.

¹⁰ Ja' ja Dios xagupōjkimp ku ja amuum njanchja'want, jōts ku n'am njotp pyidsō'ōmint ja ayuujk, jōts nwa'anint jōts ku ja Jesucristo ja' nwindson'ajtim'ajtyindip, ja' xyiknitso'ok'ajtindip.

¹¹ Pō yide'enxi jap nōkyijpxy wya'añ: "Pōni pōn ja tjanchja'wip, ka'ap ja windigōy yjatt."

¹² Tu'ugyi nwindson'ajtim ja tñitani, wan t'israelitjaa'yidi uk wan ja tka'israelitjaa'yidi; ka'ap ja pōn t'eixma'aty, myōōpy kyejpxy ja kyunuu'kxin pōni pōn ja t'ajot'ajtp, may'ampy ja tmō'ōy.

¹³ Jabi yide'enxi wya'añ ja kyajpxy y'ayuujk: "Pōni pōn amumjoot ja nitso'ok'ajtin t'amidoop nwindson'ajtimgōjpx, ja'ats nitso'ok'attip."

¹⁴ Kuts ja pōn tkajanchjawidinim, ¿sudots ja t'amidojoidit ja kyunuu'kxin? ¿Sudso ja tñijanchjawidit ku ja jeexyip kyayiktumadowdinim pōni pōn ja', ku jeexyip kya'ity pōn ja nidyukmadowidip ja ōgyajpxy ja ōmyadya'aky?

¹⁵ Pōnts tkajpxwa'kxp ja ōgyajpxy ja ōmyadya'aky, ¿sudso ja jeexyip tñikyajpxwa'kxti ja ōgyajpxy ja ōmyadya'aky ku Dios ja jeexyip kyakexyidi? Pō patyxi jap nōkyijpxy wya'añ: "iNdaxondaajkimp ja jaa'y pōn tkajpxwa'kxp ja Dios y'ōgyajpxy y'ōmyadya'aky midy xukmado'owimp ja ōy'ajtin ja tuda'aky'ajtin!"

¹⁶ Ka'apts jaa'y niduki'iyi tmōjipkta'akti ja ōgyajpxy ja ōmyadya'aky. Jade'en ja ttundi sa ja kugajpxy Isaias tñigajpxy ku ja wya'añ: "Dios Teety, ¿pōn ja m'ōgyajpxy ja m'ōmyadya'aky yjawi tō t'ukjanchjawi?"

¹⁷ Winet ja janchja'win yikjagyepy ku ja tō nmado'ōyim jawyeen ja ōgyajpxy ja ōmyadya'aky midy ja Cristo nigajpxip.

¹⁸ Ti kuts ō nyiktō'ōt, jōts ō nwa'ant: ¿Wan ndejint tō xkamadowdi ja ōgyajpxy ja ōmyadya'aky? iPō tōxi xjamadowdi! Jabi ja'agōjpxi jap nōkyijpxy yide'en wya'añ: Tō ja ōy mādsōo yikmadowdi pōn ja tō tkajpxwa'kxti,

tø ja øgyajpxy ja ømyadya'aky øy maðsoo yja'aty ya naðxwiin.

¹⁹ Uk nwa'ants øts inet: ¿Wan Israelit kajp ndejint ti tkanijawidi? Jøts tøts ja Moisés ja Dios tyuknigajpxyi ku ja wya'añ:

Mdami'ama'at'atp meets ja wenk jaa'y ja nitso'ok'ajtin pøn kanayide'endi sa meets, pøn tkanija'widip, ja'agøjxp meets ja xami'ambøkt.

²⁰ Jøts ja Isaías ja Dios yjaakyimykwa'animy yide'en:

Pøn øts y'ijty xka'ixaadyip, tøts øts ja ne'egi icyam xpaatti;

tø øts ne'egi nnanky'ijxyi pøn øts y'ijty xkanija'widip.

²¹ Jøts ja Isaías ja Dios yjaakyikwa'añi ku ja tnigajpxy ja israelit jaa'y: "Tø øts kawine'en njawaadsøy ja jaa'dyi pøn kawindiy'oo'ktip, pøn niwine'enin kamadoodip."

11

Ja Israelit jaa'y pøn winaagin tpaattip ja nitso'ok'ajtin

¹ Jøts ø nyiktiidyøki: ¿Tø ja Dios tyimyajststu'uty ja Israelit kajp, ka'ap ja t'ukupøjkni? ¡Pø ka'axi! Israelit jaa'lyxi øts kø'øm, tu'ugyi ja Abraham yik'aads yikøjpi, ja Benjamin ø ndeety'apip.

² Jekyip ja Dios yø tja'biky yø israelit jaa'y; jøts icyambaat tkamajststu'uty. ¿Ti ka'ap meets ja Dios kyajpxy y'ayuujk xnija'wiyi, ku yiknimadya'aky ja Elias, pøn ja Dios kyugajpxyip, ku ja ojts Dios t'ajot'aty jøts Dios ja ojts ttukmadøy sa Israelit jaa'y y'adø'øtsti? Ku ja wyaañ yide'en:

³ "Dios Teety, tø mgugajpxy yik'oo'kixyidi, tø yikjejtkixy ma jaty myikwindsø'øgi, nadyu'uk øts njaa'ktañ, jøts xyik'ookwandip øts nayide'en."

⁴ Jøts Dios ja ojts yide'en y'adsøyi: "Tø øts abiky niwixujk mil ja jaa'y nwi'ejxti, pøn tkawinguxanaadyipnim ja awanax midi Baal yiktejp."

⁵ Nayide'ents idø'øn icyam yajtkøjmi, ja winaagin pøn ja Dios tø wyi'ijxyidi, pøn ja kø'øm tø ttanibiktaagi y'øy'ajtingøjxp.

⁶ Ti tundaajk ja jaa'y øy ti pøn tja'atni jøts tpaattit ja nitso'ok'ajtin, pø ja Diosxi tanibiktaajkip kø'øm jøts ja tyik'awa'añ ja myøk'ajtin y'øy'ajtin. Ku jeexyip jade'en kø'øm ja y'iktamajada'aky, jade'ents ja jeexyip tpaaty jøts ka'ap ja Dios y'øy'ajtin ti ñiwy'añ.

⁷ Xjats ja israelit jaa'y jade'en winaagin tkapaatti sa y'ity yjawinmaydi, tømts ja tpaatti ja øy'ajtin pøn ja Dios kø'øm tø wyi'ijxyidi, jøts jaayi jadu'uk wimbeets kugoots tmijatti, ni tkaja'gyukiyidi ja Dios yja'.

⁸ Jøts idø'øn ja jade'en yjaty sa jap nøkyijpxy wya'añ: "Dios ja kø'øm tuujnidip jøts ja kyadukjawayidi sa y'adø'øtsti; ja win'ejxtip jøts ka' t'ejxpaatti, jamadoodip jøts ka' yja'gyukidi jøts jade'en icyambaat yjatti."

⁹ Jøts nayide'en ja David ja Dios yikwa'anmiyi:

Wan ja'ayi ttajotkøxti ja xødu'unin ja miga'ayin mi'uujkin,

jøts nay ja'ayi tyapøkyattip jadigojk jøts ja yiktagubattit.

¹⁰ Wan t'etti wimbeets kugoots jøts kyaja'gyukidit,

jøts ja xemikøjxp yiktagubattip.

Sa nitso'ok'ajtin tpaatti pøn ka'israelit jaa'dyi

¹¹ ¿Ku dø'øn ja israelit jaa'y jade'en ja Dios tø tyuñidi, tø ja tyimwyindigøgyøxti? ¡Pø ka'axi! Øy idø'øn ja tø kyamadowdi, tøts ja yjadu'ukpi tpaatti ja nitso'ok'ajtin pøn ka'israelit jaa'dyi, jøts ja tpa'ejxtit, jøts ja nayide'en ja janchja'win tjagyaptit sa pøn ka'israelit jaa'dyi.

¹² Ku ja israelit jaa'y jawyeen kø'øm tø tkagupøkti ja Dios y'øy'ajtin ja'agøjxpts ja tø yikmo'odi pøn ka'israelit jaa'dyi, jøts ja jade'en'ampy pyaat'atyidi ja Dios yja'. Kuts ja israelit jaa'y jadigojk tmjøtjmbejtkøxtit ja Dios, ¿ja ti ka'ats ja naðxwiin'ñit jaa'y ja kunuu'kxin nayide'en jawaani mõj tpaattit?

¹³ Nyiknaðxwampy øts nayide'en aaw ayuujk, jøts ø ndukmadoowa'andi meetsti pøn ka'israelit jaa'dyi. Pø meetsti tø nyiktaniguexy ku øts ja Dios tø xkexy, jøts xnijawidit jøts ku øts ja ngajpxwa'kxin ka' ñiñugøji.

¹⁴ Kidi wanik jade'en winaagin ñitso'ok'atti ja nmi'israelit jaa'dyi ku mba'ejxidit nayide'en sa mee xpaaty ja nitso'ok'ajtin.

¹⁵ Jabi jade'enxi ja naðxwiin'ñit jaa'y tø tpaatti ja nøø' ja tuu' sudso ja Dios myaa'kxujkin tpaajtidit, ku ja Dios tø t'ats'ejxma'aty ja israelit jaa'y. ¿Tits idø'øn tyimykpatp ku ja israelit jaa'y ja Dios jadigojk t'awimbetidit? Ja nitsoojkin idø'øn ja jadigojk pyatp pøn windiy'ejtnidip.

¹⁶ Ku ti t'ukja'biky ja Dios, amuumts ja tja'ajtkixy. Pøni myi'ijtpy ja ujts'aats ja ujtskojpk ja', nayide'ents inet ja tmi'ett amuum tuki'iyi møøt y'awaj y'axeeñ.

¹⁷ Jade'ents idø'øn ngajpxin ja israelit jaa'dyi sa ja kipy awaj midi ja olivo kipy y'awaj'ajtpy, jøts meets jade'en pøn ka'israelit jaa'dyi sa jadu'uk pa'olivo kipy y'awaj midi

ñiñugo øy ma ujtsjøøjty ejtp. Kuts ja yikajtspøøty mididi ja israelit jaa'y kipy'ajttip ndejint, jøts meets ja mja' ne'egi jam yikøx'øøch ma dø'øn jam ja jadu'ukpi awaj tø wyinaky. Jøts meets ja jade'en xpaat'aty ja jujky'ajtin mididi xemikøjxp, tu'ugyi ja m'aa'ts mgojpk ñamyayi y'etti.

¹⁸ Ka'ats mnadyamikaxidit, kidi xuktamøjidi xuktamutskidi ja israelit jaa'y pøn ñamyayi ixwejtsidip ja Dios. Pøni m'adø'øtswandip jade'en, jawidi jøts ku nanyi israelit jaa'y ñikøjxp idø'øn ja nitso'ok'ajtin tø mnimiñidi, kidi mgø'ømnikøjxpiti.

¹⁹ Mjawa'añ meets: "Janch jade'enimts, tøts ja yjiwa'akti jøts øøts ja icyam ngudanaañip."

²⁰ Jade'en'ampyts ja yik'ixwetsti ku tkajanchjawidi ja Dios, jøts meets myikupiky jade'engøjxp ku ja xjanchjawidi. Kidits mnamyikexyidi, øyim yikxonim tuda'aky mnabyikta'agit.

²¹ Pø m'ejxtipxi mnija'widipxi ku Dios ja israelit jaa'y ja tkadamee'kxy, jøts nayide'ents meets ja mgadamaa'kxmiyt ku jade'en m'adø'øtstit.

²² Jøts m'ejxtip mnija'widip jøts ku Dios janch øy, jøts tum ja tiy'ajtin yiktumpy. Møk ja ttiidyuñ pøn ja midundigøjyip. Mmi'ø'y'ajtipts meets ja', jøts tu'ugyi xpayø'øyidit ja y'ø'y'ajtin; pøni ka'ap jade'en xpadundi, nayide'ents nøjxx mjatti sa ja israelit jaa'dyi.

²³ Kuts ja israelit jaa'y jadigojk tmijotjimbettit ja Dios jøts tjanchjawidit amumjoojt, kupøkidip ja jadigojk jøts ja jujky'ajtin myo'ojidit mididi xemikøjxp; tyu'ump ja Dios jade'en, ti ja ka'ukmajyip.

²⁴ Sa meets ja tø mgupiky, jøts ka'ats meets mja'israelitjaa'yi, jøts tøts meets ja mmø'øyi ja nitso'ok'ajtin, iti kuts ja israelit jaa'y kyayikupøktit, pø ja'axi ja y'ity tyimjapaat'ajtidip!

Ku Israelit jaa'y ñitso'ok'attit xemikøjxp

²⁵ Meets migu'uktøjkti, ndukmadoowandip icyam jøts xnijawidit sa Dios ja wyinmaa'ñi tmøøt'aty, jøts ka' nugo mnay'agajpxidit jøts ku meets wijy'ajtin amuum xmøøt'ajtkixy: tø Israelit jaa'y ñamyayi y'amutski. Ejtpnim ja jade'en kunim ja yikupøktit namay pøn ka'Israelit jaa'dyi.

²⁶ Ka'axi jade'en tø y'ukjaty, winetnimts ja Israelit jaa'y ni'ijtyi ñitso'ok'attit, pø patyxi jap nøkyjxpy yide'en wya'añ:

Kaxø'økp tu'uk ja Israelit jaa'y, ja yiknitsokpi,

jøts ja' ttukniwa'ats'atp ja jaa'y ja ka'øyi pøn jaty ja Jacob t'aadsidip tkojpkidip.

²⁷ Jøts ngajpxy n'ayuujk øts wyinaty jade'en nyik'adujkpy,

ku øts ja nyikpøkwy'a'atstit.

²⁸ Pøn israelit jaa'dyi, pøn tkagupøjktip ja øgyajpxy ja ømyadya'aky sudso ja nitso'ok'ajtin yikpaaty, ejxma'jtniyidip ja Dios ja ñamyayi jøts meets ja mgunuu'kxy; ka'a'p ja Dios ja tyim'yixmachidi, tsojkidip ja' ja'agøjxp ku ja Dios kø'øm tø twi'ixy ja møjaa'dyøjk.

²⁹ Pø ka'axi Dios ja jadigojk tpiky pøni ti ja yajkpy; pøni tø ja twi'ixy ja jaa'y, z'sudsots ja nugoyi t'ixmatst jadigojk?

³⁰ Meetsxi ja Dios y'ijty mga'ukmimadøøpy, kuts ja israelit jaa'y ja tø tkamimadowdi, xjats meets ja Dios tø m'ayo'ijxyi.

³¹ Jøts ja nayide'en yjatti sa meets y'ijty xkamimadøyin ja Dios, ja'agøjxp ja jade'en ttuñ jøts ja jadigojk t'ayo'ext nayide'en sa mee tø myik'ayo'ijxyin.

³² Ja Dios jade'en kø'øm tø ttanibiktaagi jøts ja niduknax kyayikmimado'ot, ja'agøjxp ja jade'en ttuñ jøts o pøngapøn tuknax ja ttuk'ext ja pya'ayo'ajtin.

³³ Ka'ap jade'en ti tmi'abaaty sa ja Dios ja ø'y'ajtin tjagyepy, sa ja wijy'ajtin, sa ja ja'gyukin tmøødi! Ka'ap pøn tmiwinmaa'nbyaaty pøni sa wyinmay, pøni mididi tyunwampy, ma ñøjkxwa'añ yja'atwa'añ.

³⁴ "Z'Pøn tñiñija'wip sa ja Dios wyinmaa'ñ? Z'Uk pøn ja tyukjaty jøts ja jade'en ttu'unt?"

³⁵ Z'Uk pøn ja Dios jawyeen ti tø tmø'øy, jøts ja ja' ttaguyaki mididi ja xmø'øyimp?"

³⁶ Tum ja Dios amuum tja'ajtkøjxp jøts ja' tyik'øyigøjxp, jøts ja tyiktunwa'añ pøni ti jaty ja tø tyik'øyi. iKunuu'kxy etpyim ja Dios xemikøjxp! Jade'en idø'øn y'ejxi tyiyi.

12

Midi chøjkpy ja Dios ku ja mnadyagøðøjkant

¹ Kø'øm mee migu'uktøjk ja Dios amuum mnadyamiyoxit. Øy'ajtp jøts jade'en xu'undit mididi ja y'øyja'wip kyunuu'kxyja'wip, ja' ñamyayi mdawindsø'øgidip ja Dios. Ku ja x'ayo'ijxyindi, jade'en mee nminuu'kxa'aky jøts jade'en xu'undit.

² Kidi jade'en mdsinay'adø'øtsti sa xuktu'uñin ja kø'ømgutjuk, ja kø'ømwinmaa'ñ. Mijotjimbetti ja Dios jøts ja mwinmaa'ñ nayide'en tyigatst, winets ja jujky'ajtin xpaattit mididi amuum myiktigatsidip jøts jade'en xnijawidit mididi ja Dios chøjkpy, ja øybi ja tsujpi mididi ja Dios mda'øyja'wiyidip, mididi øy wa'ats pidsømp.

³ Yide'en øts ja Dios xanigutujk'aty y'øy'ajtingøjxp, jøts ja' mee ndukmadøøpy, kidi nugo mnadyamøjpikta'agyidi pøni ti jam jadu'uk jadu'uk yjajtpy. Pøni mabaat ja Dios køøm tø mdukjatyidi, ja' mja'gyukidip.

⁴ Ka' ndukna'ajtyindi, nayide'en sam ja nine'kx yikjagyepy may jøøjp yikmøødi, jøts ka' tum ja' wya'añ pøni ti tu'uk wya'añ,

⁵ nayide'ents adøm idø'ønmi, øy adøm mabaat njamaya'am, tu'ugyits adøm ja Cristo xja'ajtyindi, jøts nixem niyam ni'amuki n'ijtyindi sa kø' teky tkamajtstu'uty ja nine'kx.

⁶ Kija' ja Dios xyikwinmaa'nbyaajtyindi pøni sa ja køøm ttamidsøky nidu'uk jaty. Wants tyiktunkpaajtyindi øy yikxon. Pøni tø Dios xmø'øyim ja wejin kajin jøts ngajpxnajxa'ant ja y'ayuujk midi ja tø xmø'øyim, ndu'unindipts ja jade'en pøni mabaat ja janchja'win xukjagyepyindi;

⁷ jøts pøni tøts ja xmø'øyim ja wejin kajin jøts ja nmigu'uk nduujna'ant ja y'øybi, mbadu'unindipts idø'øn ja jade'en. Jøts pøni pøn ja Dios tø myø'øyi jøts yik'ixpøkt, ja'ats idø'øn ja tyu'ump;

⁸ jøts pøni jamts pøn tø yikmø'øy jøts tkajpxjot'amøjkit ja myigu'uk, ja'ats idø'øn ja tyu'ump. Pøni jamts pøn øy ti tyajkwa'añ, ka'ap kyøømwinmaa'n tyikyø'øty jøts ja ja' ttaguyakit øy ti. Pøni jamts pøn yikmøøpy jøts ja tnoø'mo'ot ttuu'mo'ot ja myigu'uk, yikxoninnts t'ext tuda'aky'ampy; jøts pøni pøn tpuðøjkidip ja ayooobi jaa'y pøn ti ka'ejtixidip, ejtni xoni dø'øn tpuðøkidit.

Sa pyaat'aty ttu'undit pøn ja Cristo yjanchja'widip

⁹ Nabya'ayowidi nixem niyam. Yikjiwa'akti ja ka'øybi, jøts tundi ja' midi øy midi tsuj, midi ja Dios kyupiky'ajtpy.

¹⁰ Yik'awa'andi ja amigu'uk'ajtin jøts nixem niyam mnamyayidit wine'en Dios mja'atyidi, nawyindsø'øgyidi nixem niyam, kidi pøn xkamø'ejxti.

¹¹ Jotmay'atti ja Dios, kidi mnuuxidi, amumjøjt xmidu'undit ja Dios.

¹² Taxonda'akti jøts ku ja myikmo'odit midi mjøp'ejxtip; jøts kidi nugo x'ayojidi wine'en mjemjatti mdejatti, jøts kidi x'ixmatsti ja Dios'ajot'ajtin nijuuni.

¹³ Pøni jam ti kya'ijtyxidi pøn ja Dios yjanchja'widip, pudøkidits; øyim yikxon xyikja'attit xyiktsoondit pøni pøn mbaajtidip m'ejxidip mjønjoth mdøjktotp.

¹⁴ Pøni pøn mga'ødyuujnidip, tagøðøkidi ja Dios. Jøts amidowdi wan tyikunuu'kxti jøts kidi meets ja jawyeen xka'ødyijy.

¹⁵ Xonda'akti nayide'en pøni xondaktip ja mmigu'uk, tsaachjawidits nayide'en pøni jiidyp yaxtip.

¹⁶ Namyayidi nixem niyam, yikxon mdsøønidit mdanidit. Kidi mnamyikexyidi, møø'tetti pøn ayooobi jaa'y'ajttip. Kidi mwa'andi jøts ku meets nadyu'uk tuki'iyi xjaty.

¹⁷ Pøni tø pøn mga'ødyuñidi, kidits meets ja nayide'en xunwimbejtmidi. Ejtp xu'undit ja y'øybi øy madsoo.

¹⁸ Yik'amijatti mabaat mmajada'akti, jøts yikxon xmøøtsøønidit xmøøtanidit ja mmigu'uktøjk, amuum ja tuda'aky'ajtin xyiktu'undit.

¹⁹ Kidi mee migu'uk køøm xagubety ja mmidsep pøni sa ja mduñidi, ja Diosxi køøm yik'ayo'ombaaðiditnim; jabi yide'enxi jap nøkyijxpy wya'añ: "Øts xpaat'ajtp jøts øts ja ndiidyu'undit; øts ja ndagubattip, nømpxi Dios."

²⁰ Jøts nayide'en ja wya'añ, jøts ku tijy x'ødyu'undit pøn mmijotma'jtidip, wan ja tka'uknagyumayidi.

²¹ Kidi ja ka'øybi mmimajada'agy, jaa ja xmimajada'akt ku tum ja øybi xu'unt.

13

¹ Mimadowdi ja windsøndøjk. Pø Diosxi køøm tø tyikutuky jøts ja kudunktøjk yja'attit.

² Pøni pønts ja tkamimadoowampy, ja' idø'øn ja wyinaty kyamimadøøpy pøn ja tø tyikutuky jøts ku ja yja'attit. Pønts jade'en adø'øtswamp, pøky ja taja'adidip jøts ja nøjxk yiktiidyundi.

³ Jøts kidi ja'ajip ja kudunktøjk ñija'ajttip jøts ja t'adsø'øgidit pøn øyjaa'y'ajttip, pø ja'axi ja ñija'ajttip jøts ja tiidyu'undit pøn tundigøødyip. Pøni ka'ats tsø'øgi jawi mnachøkyi jøts jade'en xwingunøjksit ja kudunktøjk, jaa'y'ats yikxon jøts ja kudunktøjk niti mgadamatsit,

⁴ pø ja'axi Dios ja tø tyanibiktaagiyidi jøts ja øybi xu'unt. Kuts køøm mga'øyjaa'y'att, pøkyjaws mets ja mbøky; pø kidi nugojøpxi ja kudunktøjk ja møk'ajtin tjagyapti ku ja tyiidyundi, pø ja'axi Dios ja tø tyanibiktaagiyidi ku ja tø tyikutuky, jøts ja tiidyu'undit tiy'ajtingøjxp pøn tundigøødyip.

⁵ Ja'agøjxp pyaat'aty xmimado'odit ja kudunktøjk pø mwinmaadyipxi, kidi ja'agøjxpip ja nugo xundi jøts ja mgatiidyunidi.

⁶ Nay ja'axi ja Dios tyikutujkp jøts ja kuguju'uyin xmo'odit ja kudunktøjk; pø nay ja Diosxi ja tø tyanibiktaagiyidi jøts ja jade'en ja tyaajuky'ajtin tpaattit, jøts jade'en mjaaknigudunk'atyyidit.

⁷ Migubajtkøxtits pøni pøn jaty jam mmijoj'ajttip. Pøni jam pøn kyayakñim kyagubetynim, wants ja tyakti; uk jamts pøn ti tkagujuynim tkagubetynim, wants ja tkugujuy tkugubety; pøni pøn jam ja windsø'jkin tyiktigøøpy, wan ja windsø'jkin tjagyepy; jøts pøni pøn jam ja amigu'uk'ajtin tyiktigøøpy, wan t'amigu'uk'aty ja myigu'uk.

⁸ Ka' ti pøn xamiyoj'attit, ja tsojkin ja pa'ayo'owin ja' idø'øn tiy xem yam mjagyaptip; ku jade'en xu'undit, ja kutujkts meets idø'øn wyinaty jade'en tø xmidadø.

⁹ Pø nømpxi ja Dios y'ana'amin: "Kidi mnidø'øxy kidi mniaay' y mnabyøjkxiyidi, kidi myikjaa'y'øøky, kidi nmeech, kidi mdaay'aty, kidi xami'ama'at'aty ja mmigu'uk pyikta'aky"; jøts tuki'iyi ja Dios y'ana'amin tu'ugyi ja yide'en y'ayuujkpidsimy: "Mba'ayo'op ja mmigu'uk nayide'en ejximdam kø'øm mnabya'ayøyin."

¹⁰ Pøn ja tsojkin, pøn ja pa'ayo'owin tjagyajp, ka'ap ja tmidundigøy ja myigu'uk; jade'en'ampy ja Dios tkupik'atkiy ku ja tsojkin nyiktu'unint, jøts jade'en niwine'en ja kutujk kyayikmidundigøy.

¹¹ Jøts tø tyimbyaaty ja et ja xøøw, tajotigøjyidi ja Dios yja'. Tyimwyingomp ja ayo'on winets xpaattit amuum ja nitso'ok'ajtin. Nax'adøtsp ja et ja xøøw, ka'ap y'ityi jaakjade'en ku njanchja'wiy'okwa'añindi miduk'ojk ja Dios y'øgyajpxy ja y'ømyadya'aky.

¹² Ka'pxnip ja et ja xøøw, tyimdyukmibaat'ajtpy ja Dios; wants tmatjstuuptyindi ja ka'ødyu'unin ja pøkyu'unin, jøts jøp'iixy nnanky'ejtna'andit, tum ja øybi wa'atspi nyiktu'unindip midu kapøkmyøøt.

¹³ Wan tuda'aky tjaa'y'ajtna'andi sam pyaat'aty: pøn tnija'widip ja Dios. Jøts kidi ja' ndunk'ajtyindi ja nøø ja mu'uk, uk ja pøjp ja tsø'pxp, nmiga'ayin nmi'uujkin, uk nnamyøøt'atwa'añindi øy pøn møøt, uk ja tsep ja' njotmay'ajtyimp, uk ndami'ama'at'ajtyindip ja nmigu'uk øy ti.

¹⁴ Kidi jade'en m'adø'øtsti, tu'ugyi nwindson'ajtim Jesucristo xpadu'undit sa ja ya chinaay, jøts kyamøjtøkidit ja mbøkyu'unindi.

14

Kidi mmigu'uk xpagajpxy

¹ Pøni jam pøn myajada'aky kyamajada'aky yjanchja'wingøjxp, kupøktits, kidi sa xejti, øy ja wyinmaa'ñ yjaganayide'endi sam meets ja mja'ajin.

² Ja may pøn tjøø'kxtip øy ñityi, jøts nayide'en pøn amaay'ejtipp, pøn nugo u'nkjii'kxy tsujxkjii'kxy ttojxktip, jøts wya'andi jøts ku ja' chøkyi Dios wyingujkp.

³ Pønts tjøø'kxp øy ti, ka'ap ja tka'øvjawit pøn amaay pøn wi'iixy øy ti tjøø'kxp; jøts nayide'en ja'ami, ka'ap ja pyagajpxmit, ka'ap ja sa ttejmīt pøn øy ti tjøø'kxp, pø tøxi Dios ja kø'øm kyupikyiyi,

⁴ jøts ja'ats midundip. ζMjaaktyimbyønts meets ku meets ja xpagajpxt, yamts ja Dios ja tmiduñ? Wan ja t'øyi uk tka'øyi, ja wyindsønts ja paajtip pøni sa ja kø'øm tyuñi. Jøts yik'øyip ja', ζti Dios ka'ukmajyip ku ja tka'ukyik'øyt myøk'ajtingøjxp?

⁵ Jøts jaa jadu'ukmidi pøn wandip tu'ugin ja xøøw yik'amaay'att, jøts jadu'uk wyamidi ku ka' pyaag'aty ni midu xøøw kyayik'amaay'att, tum jade'en ja xøøw tu'ugyi. Kija'ats tñitanidit ja wyinmaa'ñ tigøjxp ku jade'en wyinmaydi.

⁶ Pøn t'amaay'ajtp tu'uk ja xøøw, ja Diosts ja tyawindsø'jkjip; jøts pøn tka'amaay'ajtp, nay ja Diosts ja jade'en wyindsø'jkinmo'op. Jøts pøn tjøø'kxp øy ti, nay ja Diosts ja tyukmøja'wip tyukunuu'kxyja'wip; jøts pøn amaay'ajtmidip, ka' ti tñiyjii'kxy, nay ja Diosts ja tyawindsø'jkjip ku ja jade'en ttuñ, jøts ja ttukmøjawi ttukunuu'kxyjawi amuum.

⁷ Ka'ap pøn nugo ñiyjuky'aty, ka'ap pøn nugo ñiy'øøky.

⁸ Ku njujuky'ajtyindi, Dios xyikjuky'ajtmidip, jøts pøni o'jkindipts, nay ja'ats xk-went'ajtmidip. Jøts jade'en yiknijawi jøts ku ja amuum xja'ajtyindi øy adøm njajjuky'ajtyim, uk nja'ø'jkyim njadigø'øyim adøm.

⁹ Pø ja'agøjpxxi ja Cristo yujukpyijky xemikøjxp ku ja tmimajadaajky ja o'jkin, jøts ja tu'ugyi ixyam tñitanaagyixy øy midu'ibi.

¹⁰ ζTigøjxpts ku mee kø'øm ja mmigu'uk xabayø'øy sa y'adø'øtsti? Jøts ni xkatsokti paat meets ja'. ζPønts xijy ta'amp, pøn kanaaxp jam Cristo wyingujkp? Pø ja'axi xabayø'øyindip ja nbøky, ja' xidyu'unindip.

¹¹ Pø yide'enxi jap nøkyixpy wya'añ:

Øyi maðsoo n'ity, jøts øts nwinguky niduki'iyi jaa'y kuwani ñagyuxendyakøxidit.

Jøts wya'andit ku øts ja'ayi tu'ugyi ndios'aty.

¹² Jade'ents idø'øn, kija' idø'øn ngøyajkint jam Dios wyingujkp pøni sã nidu'uk jadu'uk tø njaa'y'ajtyindi ya ñaxwiñ.

Ka'ap ja nmigu'uk nyikwinmaamya'jtindit

¹³ Paty ka'ap nnabyagajpxandit nixem niyam. Ne'egi ja' njotmay'ajtindip sudso ja nmigu'uk ngayikpøkpyajtindit.

¹⁴ Tumwa'ats nwindson'ajtim Jesús tø ttanibiktaagi, ka' ti nugo kø'øm tyimykpøkpyety; kyø'ømwinmaa'ñ ja' pøn nõmdip jøts ku øy ti kya'øyi kyawa'adsi.

¹⁵ Jøts ku ja jii'kxy midì kayik'ødyejp kayikwa'atstejp nnadyabagajpxandit nugo, ¿ti pya'ayo'owints jade'en njagyeyjpyindip? Paty ka'ap pyaat'atyì jøts ja nyikmøjindit pøni ti ja nmigu'uk yjii'kxyindip, jøts jade'en ngaduk'ayoojindit ja nmigu'uk, jøts ka'ap ja yjanchja'win kyudigø'oty.

¹⁶ Kidi ja' xui' midì yjawi ja mdsinaa'yin ja mjanchja'win yiktabagajpxp.

¹⁷ Kidi ja kaagyip jii'kxyip xagupøjkindip ja Dios ma ja kyutujk amuum ttanitani ja yja', pø ja øchinaa'yinxi ja chøjkpy ja tuda'aky'ajtin ja xondaajkin midì ja Espiritu Santo xmø'øyindip.

¹⁸ Pøn jade'en tmidump ja Cristo, ja' Dios chøjkpy jøts øyja'wiyip ja jaa'y ja'.

¹⁹ Wants tjaaknija'wa'andi sudso nbajjtindit ja tuda'aky'ajtin midì nyiktu'unindip jøts ja nnadyabudøjkandit nixem niyam, jøts jade'en myøktaajkindit ja njanchja'win.

²⁰ Kidi ja ngø'øm ja' adøm nugo nyikmajadaajkindip, jøts adøm ja Dios yja' ngayikmøjtøjka'andit. Øy ni midì jii'kxy yjagyikpøkpyety, jade'en ne'egi pyaat'atyì jøts ja' xkajøø'kxtit midì ja nmigu'uk kya'øyja'wip jøts ja jade'en xkayikpøkyat.

²¹ Ne'egi øy'atpts ku ja tsu'uch ka' xtsu'utstit, uk xka'uuktit ja vino, uk xkatu'undit o ti, nugo ku ja nmigu'uk xkayikwinmaa'nmya'atti, nugo ku kyapøkpyatti jade'en'ampy jøts kyatuu'tigø'ødyit.

²² Dios ja ja'ayi mduknija'wip pøni sã mets ja mwinmaa'ñ xyikyø'øy. ¡Jotkujk ja jaa'y pøn kyabadumpy midì ja pyøkyja'wip!

²³ Pønts tjøø'kxp øy ti majtsk aaw majtsk joojt, kø'ømts ja ñankpyøkpyetyi ku ja tjii'kxy, kumi ka'ap jotkujk tjii'kxy; jøts ti jaty kayiktump jotkujk'atyim, pøky ja'.

15

Ja' mdu'ump midì ja nmigu'uk tya'ødyøkip

¹ Pøn jaty møk tjagyajptip ja janchja'win, xpaat'ajtindip adøm jøts nbudøjka'andit pøn ja yjanchja'win tu'ugyi tkamøøt'ajtipnim, jøts kidi adømyi kø'øm nnabya'ayø'øyindi.

² Nidu'uk jaty adøm xpaat'ajtyindi jøts ja ndabudøjka'am midì ja ødyunidip jøts ja yjanchja'win myøjta'aktit.

³ Pø ni ja Cristoxi ojts kø'øm kyanabya'ayøyi, ne'egi ja yjaaktyimyjajty jade'en sã jap nøkyijxpy yide'en wya'añ: "Tum øts ja tø xaja'atkiy sã jaty ti jaty mgayikta'ødyundip mgayikta'øñimaadyip."

⁴ Pø ja'agøjpxpi ja Dios ja kyajpxy tnankyjajyøø jøts adøm ja nnija'wa'an ti jaty ja ñigajpxpy ja y'ixpøjkin, ja'ats adøm ja xmø'øyimp ja kajpxjot'amøki jøts tuda'aky ngupøjkindit o ti ayo'on, jøts tu'ugyi ja awejx'ajtin yikmøø'tatt ku yikpaatt ja xemikøjxpit jujky'ajtin.

⁵ Ja Dios Teetyts adøm xyikmajadaajkimp o ti ayo'on jøts ja xkajpxjot'amøjka'an. Wants ja mbudøkiyidi jøts mdsøønidit mdanidit yikxon nixem niyam, sãm nwindson'ajtim Jesucristo tnatstu'uni,

⁶ jøts tu'ugyi ni'amuki xja'byaattit xkajpxpaattit ja Dios Teety pøn ja nwindson'ajtim Jesucristo tyety'ajtpy.

Ku ja Dios y'øgyajpxy y'ømyadya'aky yikajpxwa'kxy ma jaa'y kya'israelit jaa'yidi

⁷ Nagyupøkidits nixem niyam, kidi sã mnadyiyidi mnawya'añidi, nagyupøkidi nayide'en sãm adøm nwindson'ajtim Jesucristo tø xkupijkyindi Dios Teety wyindsø'jkin wyinjja'wingøjxp.

⁸ Pø israelit jaa'yxi ja Cristo ñimimpy jøts ja tpuðokit, jøts jade'en ja Dios Teety ja wyandaajkin tyik'adujkit midì ja møjaa'dyøjk wyinaty tø yiktamiwandag'agidi.

⁹ Jøts nayi ñimeen ja' pøn ka'israelit jaa'dyi, jøts ja tja'byaattit tkajpxpaattit ja Dios ku ja pya'ayøyidi jadine'en, pø yide'enxi jap Salmos nøkyjøtpy wya'añ:

Nja'byaatt mets ngajpxpaatt mets øy ma ñaajx øy magajp, ma jaty ja jaa'y chøøni pøn ka'israelit jaa'dyi,

jøts n'øø't jøts nxu'uxt mets windsø'jkingøjxp.

¹⁰ Jøts nayide'en wyami ja Dios kyugajpxy:

Mxonda'aktit tuknaø pøn ka'israelit jaa'dyi møøt ja israelit jaa'y pøn ja Dios ja'ajtyidip.

¹¹ Jøts jap abiky ma jap wyami:

Møja'wimiyidi kunuu'kxyja'wimiyidi ja Dios ni'ijtyi pøn ka'israelit jaa'dyi,

kajpxwa'kximyidi ja myøk'ajtin o magajp.

¹² Jøts yide'en Isaiás tyukjadya'anmiyøø ja Dios:

Ja Isai ñikøjxp pyidsø'omt pøn ñiwindsøn'ajtmip pøn ka'israelit jaa'dyi;

ja' ja tu'ugyi tyamiguy'ejxtip ja ñitso'ok'ajtin.

¹³ Wan ja Dios mmø'øyi ja xondaajkin ja tudā'aky'ajtin, midi xukjøp'ijxy'ajtidip ja kyunuukxin ku ja njanchja'wint, jøts jade'en ja ajot'ajtin tu'ugyi mdukmi'etidit Espiritu Santo myøk'ajtingøjxp.

¹⁴ Migu'uktøjkti, jade'en ø nwa'añ jøts ku meets amuum xjagyepy ja nadyamiyoxi'ajtin jøts ja nijawi'ajtin. Wa'ats ja xnijawidi, jøts n'a'ejxip øts jøts ku xjatti jøts nixem niyam mnagyajpxwejidit.

¹⁵ Ja'agøjxp mee ndanijayi ya'at nøky, jøts ndukja'myatstit tu'uk majtsk ja møj winmaa'ñi midi paat'ajtiyidip ja yikxon ja'gyukin. Tø øts ja Dios xanipiky'y'øy'ajtingøjxp jøts øts jade'en ngajpxwejt.

¹⁶ Ja' øts ndamidumpy ja nwindson'ajtim Jesucristo ku øts ngajpxwa'kxi ja y'øgyajpxy ja y'ømyadya'aky ma ja jaa'y kya'israelitjaa'yidi jøts ja tpaattit ja nitso'ok'ajtin. Ja'ats øts ndagødøjkjip ja Dios, wan ttajotkujk'atyidi jøts kyupøkidit ku yikpøkwyā'adsidit ja Espiritu Santo.

¹⁷ Ku øts jade'en nmiduñ ja Dios Teety, xondaqk øts jøts øts ja møk ndukmøjawi ndukunuukxyjawi, ku øts njanchjawi ja nwindson'ajtim Jesucristo.

¹⁸ Ka'ap øts ti nugo ñikyajpxy midi øts ja Cristo kø'øm xkaduktump xkadukpatp jam jaa'y agujkp pøn ka'israelit jaa'dyi, jøts tmimado'odit ja Dios. Tø dø'øn jade'en tyimyjaty, tø dø'øn jade'en tyimykmadøy sa ø nnigajpxy,

¹⁹ ku tñank'ijxyi ja myøk'ajtin, tyikaxi'iky ja ejxa'an, tyikaxi'iky ja milagri'ajtin, jøts jade'en yik'ixy yikni'jawi ja Espiritu Santo myøk'ajtin. Jade'ents øts nnigajpxkixy øy maðsoo ku ø ngajpxwa'kxi ja Cristo y'øgyajpxy y'ømyadya'aky midi nitso'ok'ajtin xukpaajtin, nwidity ø Jerusalén uk nja'aty øts jambaat Ilirico etjotp.

²⁰ Ja' øts ndajotigøøpy jøts øts jade'en ja øgyajpxy ja ømyadya'aky tø ngajpxwa'kxy, midi tñigajpxp ja nitso'ok'ajtin, ma niwindii kyayiknimadøynim ja Cristo xyøøw, jøts ka'ap øts nay ja'abi kajp tø n'anøjkxi ma jadu'uk ja jaa'y jawyeen tø tyiktso'onda'aky ja Cristo y'ixpøjkin.

²¹ Jade'en øts tø nduñ sa ja Dios kyajpxy y'ayuujk wya'añ:

Ja' ja ne'egi ejxiyip nijawiyip pøn ja niwindii kamadobaajtipnim,

jøts yja'gyukidip ja ne'egi pøn ja niwindii kanimadoodiipnim.

Ku ja Pablo ttanibiktaagi jøts ñøjkxt Roma

²² Ku øts ja ngajpxwa'kxk ngayiktsoj'k'abaadi, ja'agøjxp meets tø nga'ajts'ixy, tø øts kawinaak ojk nja'ukniwinmayi jøts ø nnøjkxt ma meets jam.

²³ Tøts øts ja ndunk y'abaadi yam ya'at etjotp ma øts yam, jøts jekyip øts njaniwinma'ayifiñ jøts mee nninøjkxt.

²⁴ Yamnimts øts inet jam n'uknaxt ku ø nnøjkxt jam España jøts mee n'uk'ext, jadya'ts øts jam wyinaty xpudøkidi, jøts øts jam nja'att ma øts idø'øn nnøjkxwa'añ.

²⁵ Jerusalén øts ixyam nnijxxy, pudøjkin øts nyikni'kxpy jøts øts ja ngømo'owa'andi pøn jaty jam Dios ja'ajtidip, adøm ja nmøøtjanchja'wibidi.

²⁶ Ja' tø tyiknukti meen pøn tsinaadyip jam Macedonia jam Acaya, jøts ja ttanigaxti ja ayoobi jaa'y pøn tsinaadyip jam Jerusalén, adøm ja nmigu'uktøjkti pøn ja Dios ja'ajtidip.

²⁷ Tø twinmaydi jøts ku jade'en y'øyi jøts ja jade'en ttu'undit, pø tøxi ja israelit jaa'y ja ñamayyi y'ayo'ijxyidi ku ja tyukpaat'atyidi ja Dios; xjats ja nayide'en pyaat'ajtmiyidi, jøts ja ttabadøjkjip ja israelit jaa'y ti jaty ja iiy yjagyajtip.

²⁸ Kuts øts yø n'uktun'abaadit ku øts ja wyinaty tø ndagødøkidi ja pudøjkin, winets ø ndsoont jøts ø nnøjkxt jam España, uk naxpts øts jam ma meets jam.

²⁹ Jøts wa'ats ø nnijawi jøts ku øts ja Dios amuum ja kyunuukxin xabudøki, jøts øts ja Cristo ngajpxwa'kxiti ja y'øgyajpxy ja y'ømyadya'aky ku øts jam nøjkk nja'aty.

³⁰ Tundits migu'uktøjk ja may'ajt nwindson'ajtim Jesucristo køjxp jøts Espiritu Santo pøn xukja'wimp ja tsojkin ja pa'ayo'owin, jøts meets nayide'en mnadyamiyoxidit øts ndunkjøjpp, ku meets ja Dios x'amido'ot ja may'ajt jøts ø xpudøkit.

³¹ Amidowdi ja Dios wan øts x'agø'duky x'axajtuky, jøts kidi myajada'akti ja jaa'y pøn tkagupøjkti ja nwindson'ajtim yja' jam Judea, jøts nayide'en x'amido'odit jøts ejtni xoni tkupøktit ja pudøjkin pøn tsinaadyip jam Jerusalén, pøn ja Dios ja'ajtidip, midi øts yam ndaninøjkwandip,

³² jøts pøni yikjajtpy Dios jøts øts øy jotkujk nja'att ma meets jam, jøts øts jam n'ukpoo'kxt.

³³ Diosts mjagyapidip pøn amuum ja øy'ajtin xondaajkin tyajkp. Jade'en idø'øn ja yjatt.

16

Ku ja Pablo tkajpxpoo'kxy ja myigu'uk pøn jam Roma

¹ Mjaty'ejxtip ja Febe, adøm ja nmøøtjanchja'wibi pøn tump jam tsaptøjkjotp jam Cencreat kajpjotp.

² Kupøkti ja' yikxon, tundi may'ajt Dios køjxpit sam pyaät'aty, pø tu'ugyixi ja Dios yik-janchjawí. Pudøkidits jøts xmo'odit ti jaty jam ka'ejtxip, tø ja may'ampy xjanchpudøjkandi, øts paät ja kø'øm tø xpudøki.

³ Kajpxpoo'kxti nayide'en ja Priscila møøt ja Aquila, pøn tø nmøøtundi jøts øøts ja Jesucristo yja' nyikyø'øyiyi.

⁴ Ja'agøjxpti øts icyam njujky'aty ku ja kyø'ømjujky'ajtin ja o'jkin jøp'am tpiktaktøø, nugo ku øts ja'ayi jade'en xyiknitso'okti; xemikøjxp øts ja Dios ja ndamøjawit, jøts nayide'en ja ttamøja'wimyidi niduki'iyi ja nmigu'uktøjk, pøn tjanchja'widip ja Jesús ma jaa'y kya'israelit jaa'yidi.

⁵ Kajpxpoo'kxti nayide'en ja migu'uktøjkti pøn namyujkidip jam Priscila jam Aquila tyøjkjotpti. Kajpxpoo'kxidik øts ja nmigu'uk Epeneto, pøn midu'uk tjanchja'wiy'okwaan ja nwindson'ajtim Jesucristo jam Acaya etjotp.

⁶ Kajpxpoo'kxti ja María midi jadine'en tmidump ja Dios ma meets jam.

⁷ Kajpxpoo'kxidik øts ja nmigugajp ja Andrónico jøts ja Junias, pøn øts møøt tø nbuxøjksøonidi; janch'øyjawi ja y'etti sam nayide'en ja Cristo kyudanaabytøjkti, jøts jaweyen ja ne'egi tjanchja'widi ja Cristo, oojknim øts.

⁸ Nayi mgajpxpoo'kxtip ja Amplias, pøn øts øy møøt namyayi Cristo køjxp.

⁹ Jøts nayi kajpxpoo'kxti ja Urbano, pøn øøts ojts nmøøtuñ ku øøts ja nwindson'ajtim yja' nduujni, jøts kajpxpoo'kxti nayide'en øts ja nmigu'uk Estaquis,

¹⁰ Jøts nayide'en ja Apeles pøn kawinaak ojk tø ttamajada'aky ja yjanchja'win Cristo køjxp, øy ja wine'en ja ayo'on vyajyiktanipiky. Jøts kajpxpoo'kxti nayide'en ja Aristobulo møøt ja y'u'nk ñidø'øxy.

¹¹ Kajpxpoo'kxidik øts ja nmigugajp pøn txøw'ajtp Herodiön, jøts nayide'en ja Narciso, jøts jaty jam tsinaadyip ja' tyøjkjotp, pøn ja nwindson'ajtim tø tjanchjawidi.

¹² Jøts nayide'en xkajpxpoo'kxtit ja Trifena møøt ja Trifosa, pøn amuum tmidundip ja nwindson'ajtim, jøts nayide'en ja Pérsida, adøm ja nmigu'uk pøn kawine'en kujk tmiduñ ja Dios.

¹³ Jøts nayide'en xkajpxpoo'kxtit ja Rufo, pøn amumjoojt tjantyimyjanchja'wip ja nwindson'ajtim, jøts kajpxpoo'kxidi ja tyaak nayide'en, jade'en øts ja njawi sam øts ngø'ømðaaagin.

¹⁴ Kajpxpoo'kxti ja Asíncrito, ja Flegonte, ja Hermas, ja Patrobas, ja Hermes, jøts møøt niduki'iyi ja migu'uktøjkti pøn ja Dios yjanchja'widip, pøn jaty ja jam møøtti.

¹⁵ Nayi kajpxpoo'kxti ja Filólogo møøt ja Julia, jøts ja Nereo møøt ja myiga'axkiixy, jøts ja Olimpas nayide'en xkajpxpoo'kxtit møøt niduki'iyi pøn jaty ja jam møøt, pøn ja Dios yjanchja'widip.

¹⁶ Nadyuknijawiyidi ja kajpxpoo'kxin nixem niyam sa Dios tsøky. Mdanigajxidip ja kajpxpoo'kxin pøn jaty ja nwindson'ajtim Jesucristo yjanchja'widip øy maðsoo.

¹⁷ Migu'uktøjkti, mjatyimy'ejxtibim pøn yiktseptøjkidip pøn yiktundigøødyip. Ja tsep ja nugo yiknaxkida'akwandip jøts mee mnawya'kxit, pø ja'axi ja yikma'atwandip midi meets tø myiktukmadøy, pø ka'axi ja yjade'eni midi mee tø xjaty midi mee tø xnijawi, jade'en ne'egi tymbyaat'aty ku xpupa'atstít.

¹⁸ Ka' yø'øbi jaa'y tmidundip ja nwindson'ajtim Jesucristo, kø'øm yø ñajyotmay'atyidi ti yø ejtxidip ka'ejtxidip, jøts twin'øøndi ja jaa'y pøn tkanija'widipnim, øy ja Dios yja' nadyijyi amyujy tsaachuyy tmigajpxti.

¹⁹ Jøts ñija'wip øy pøn sa meets xpaduujni ja Dios yja'; ja'agøjxp mee ndajotkujk'aty. Ja' øts ja'ayi ndsøjkpy jøts xwinmaa'ñ'attit sa xu'undit ja tum ja øybi, jøts kidi ja ne'egi mjaakmayidi ja ka'øybi.

²⁰ Jøts ja Dios pøn ja øy'ajtin xondaajkin amuum tjagyajp, tsojk ja nøjx ja mik'u' myøk'ajtin tyikwindigøjyi, jøts ja niti majadaajkin tka'ukpatnit meets mwingujky. Paatti ja nwindson'ajtim Jesucristo ja kyunuu'kxin.

²¹ Nayi mdanigajxidipts ja Timoteo ja kajpxpoo'kxin pøn øts møøt nduñ, jøts nayide'en Lucio, møøt ja Jasnón, møøt ja Sosípater, øts nmigugajp nmigunaajxti.

²² Nayi mgajpxpoo'kxmidiip ja Tercio nwindson'ajtimgøjxp, pøn øts ya'at nøky ndukjaapy.

²³ Jøts nayide'en mgajpxpoo'kxyidi ja Gayo. Ja' tyøjkjotp øts yam ndsøøni, jøts nay ja' t'annu'kxyajkp ja tyøjk ma ñamyukyidi pøn jaty ja Dios yjanchja'widip. Jøts nayide'en mdanigajxidip ja kajpxpoo'kxin ja Cuarto jøts ja Erasto, pøn ja ya'at kajpmeen myachomujky.

²⁴ Mo'ojidip ja nwindson'ajtim Jesucristo ja kyunuu'kxin mee niduki'iyi. Jade'ents øts idø'on ndsøky'aty.

Ku ja Dios y'ukyik'ajot'ajtni

²⁵ Tmøja'windits tkunuu'kxyja'windits ja Dios, wan mbudøkiyidi jøts ja mjanchja'win tu'ugyi amumjoojt xyik'ettit sam mduknijawiyidi ja øgyajpxy ja ømyadya'aky, sa ja nitso'ok'ajtin yikpaaty midi øts ngajpxwa'kxpy, ja Jesucristo y'ixpøjkin. Jøts ja' yø' midi ja Dios jekniim tø tngajpxy, midi ja jeky tø xkaduknija'wa'am jøts ku ja jayimni jødsnim ja naaxwii'ñit cho'onda'aky.

²⁶ Ixyamts ja tø yiknijawinim ku ja kyajpxy y'ayuujk tø ttukjaadyañ ja kyugajpxtyøjk, sa kø'øm tyikutuky ja Dios Teety xemikøjxpit. Jøts ja tuki'iyi yiktuknijawidi ja kajp ja naajx jøts tjanchjawidit jøts tpaduujnidit ja yja'.

²⁷ iTu'ugyi Dios Teety møj jøts ja' tu'ugyi tnija'widyaapy, wants xemikøjxp ja tkupiky'aty tmadøy'aty adøm ja nwindso'jkin ku ja nja'byaajtindi ngajpxpaajtindi amuum nwindson'ajtim Jesucristo køjxp! Jade'ents idø'on ja y'ejxi tyiyi.

JA MYĪDU'UKPĪ NŌKY MIDI JA PABLO TYANĠGAJX JA CORINTI JAA'Y

Ku ja Pablo tnijayi ja janchja'wibi jaa'dyi pŋn jam Corinti tsinaadyip

¹ Ōts idŋ'ŋon Pablo'ajtp. Tŋ ŋts ja Dios Teety xamidsŋky jŋts ŋts tŋ xwaadsŋy jŋts ŋts ja Jesucristo ngudanaabyi'att. Mŋŋt ja Sŋstenes, pŋn nayide'en tjanchja'wip ja Jesucristo,

² ixyam ŋ nnijayi ja Corinti jaa'y pŋn jaty ja Dios Teety tŋ tnijawidi jŋts tŋ tkupŋkti ja chojkin ja pya'ayo'owin mŋŋt ja y'ana'amin Cristo Jesŋs kŋjxp. Pŋ ja Dios Teetyxi meets tŋ mw'i'ijxyidi jŋts ja amuum xamiyŋxtit ja mdsinaa'yindi mŋŋt nayide'en pŋn jaty ja tjanchja'wyimidip, pŋn jaty tkajpxpatmidip ja nwindson'ajtim Jesucristo, pŋ tum ja'axi amuki nwindson'ajtyindip nixem niyam.

³ Pajtidi kupŋjkidi ja Dios Teety y'ŋy'ajtin kyunuu'kxin mŋŋt nayide'en ja nwindson'ajtim Jesucristo yja'.

Sa ja kunuu'kxin yikpaaty Cristo kŋjxp

⁴ Ejtp ŋts ja Dios Teety ndamŋjawi ndakunuu'kxyjawi ku meets ja kunuu'kx'ajtin tŋ xpaaty Cristo Jesŋs kŋjxp.

⁵ Paty meets ja Dios Teety ja mŋj ŋy'ajtin janch kajaa tŋ mmŋ'ŋyi jŋts ŋy tsuj xjajtidi uk xnimadyajkidi ja y'ŋy'ajtin ja kyunuu'kxin ja'agŋjxp ku ja Cristo yja' tŋ xpaŋŋjkidi.

⁶ Tŋ meets idŋ'ŋon ja xjanchyikwindiy sa jaty ja Cristo tŋ yiknimadya'aky.

⁷ Ku meets jade'en mdsŋŋnit mmo'ojidipts ja Dios pŋni ti dŋ'ŋon ja ttamidsojpk, ixa mee x'awijxy ja xŋŋw ja jumŋjt ku ja nwindson'ajtim Jesucristo nŋnky'ejxpaadiyt jadigojk.

⁸ Ja Diosts ja mŋk'ajtin mmo'ojidip jŋts tu'ugyi mdsinaa'yin xyik'ettit, jŋts wyinaty niti mgayiktaniwanbatti ku ja nwindson'ajtim Jesucristo jya'att.

⁹ Pyadumpy ja Dios ejtp ja y'ayuujk. Ja'ats tŋ mwaadsŋyidi jŋts ja y'U'nk xmŋŋtsinaajyidit, ja nwindson'ajtim Jesucristo.

Ja' nŋ'ane'empy jŋts tu'ugyi chŋŋnidit

¹⁰ Migu'uktŋjkti, nwindson'ajtim Jesucristo kŋjxp meets idŋ'ŋon n'amidŋy jŋts ka'pxy xu'undit jŋts tu'ugyi mdsinaa'yin xpikta'aktit xyik'ettit. Kidi k'i'abiky mdsŋŋnidi, tu'ugyi winmaa'n xmŋŋt'attit jŋts tu'ugyi xmŋŋt'attit midi mdajotigŋ'ŋdyip.

¹¹ ŋTi ŋ migu'uktŋjk idŋ'ŋon jade'en xyikwamp? Ja'agŋjxp ŋts idŋ'ŋon jade'en nwa'añ kuts ja Cloe myigu'uk yŋ xukmadowdi ku meets jam mnamyijotma'adyidi.

¹² Yide'en ŋts idŋ'ŋon tŋ nyiktukmadŋy ku mee tumdigach ja m'ayuujk; nŋmbik mum wya'andi: "Ōts ja Pablo mŋŋt", jŋdsik nŋmidi: "Ōts ja Apolos mŋŋt"; uk nŋmidiptsik: "Ōts ja Pedro mŋŋt"; jŋdsik jam nŋmidi: "Ōts ja Cristo mŋŋt."

¹³ ŋSudsots idŋ'ŋon, uk tŋ dŋ'ŋon ja Cristo may nŋwya'kxyi? ŋTi tŋ meets ja Pablo mgu'oogiyi kruskŋjxp? ŋUk Pablo kŋjxp meets idŋ'ŋon tŋ mnŋbety?

¹⁴ Ngajxajkpy ŋts ja Dios kuts ja'ayi tŋ nyiknŋbety ja Crispo jŋts ja Gayo, meets ja mjaa'y;

¹⁵ jŋts jade'en mgawa'andit ku mee tŋ mnŋbety ŋts kŋjxp.

¹⁶ ŋxa njaakja'myech jadu'uk jŋŋn jadu'uk tŋjk kuts ja Estefanas nayide'en tŋ nyiknŋbety, jŋts jade'eñi nipŋnxi ŋts jyawi tŋ njaga'ukyiknŋbajtni.

¹⁷ Ja'agŋjxp ŋts idŋ'ŋon jade'en tŋ n'adi'ich ku ŋts ja Cristo tŋ xkakexy yiknŋbatpi, ja'axi ŋts ja xaniguexy jŋts ŋts ja jaa'y ndukmado'ot ja nitsoojkin ayuujk, ka'ats ŋts ja janchkajajtni nngajpxy sam ja ipiky jaa'y myadya'akti, jŋts ja Cristo ja y'o'jkin jam kruskŋjxp ejtp yikmŋjpiakta'akt.

Cristo, Dios Teety myŋk'ajtin wyijy'ajtin ja'

¹⁸ Ku jyayiknimadya'aky ja Cristo y'o'jkin jam kruskŋjxp, lŋki o'jkin ja jaa'y ja ttejtŋ pŋn tŋ yiktanibiktaagidi jŋts ja ŋy'ajtin tkapaattit; pŋnts ja Dios tŋ tkupŋjkidi ja nitsoojkin ja pya'ayo'owin ka'ap ja jade'en wya'andi, nŋmp ja wya'andi jŋts ku Dios myŋk'ajtin jade'en tyiknigaxi'iky.

¹⁹ Pŋ yide'enxi ja nŋky wya'añ midi jap jaabyety ejtp:

Ka' ŋts ja y'ixpiky'ajtin ja wijy jaa'y nmŋjpiaktaajkit,

jits ka'ap ŋ ngupŋjkit ja nŋmado'owin ku ŋts ja nŋmadoobi jaa'y xjamigajpxmit.

²⁰ ŋMats idŋ'ŋon ja ixpiky jaa'y tyundi, jŋts ja yik'ixpŋjkidi, jŋts ja jaa'y pŋn tnigajpxtŋp tnimadya'aktip ti jaty ya tuujnŋp naxwiin? Kawejin kakajinxi ja Dios ja tŋ tyikwimbijty midi ya naxkijxy yiktejp wejin kajin.

²¹ Wa'ats Dios tnijawi jŋts ku ka'ap pŋn myi'abaadyiyi ja wyijy'ajtin sam ja wijy jaa'y jawinmaadya'an pŋn tkagupŋjktip ja'abi winmaa'n. Ja' ja ne'egi tyukpaatp tyuk'ejxp ja

nitsoojkin pøn ja kupøjkxyip ja kyajpxy ja y'ayuujk tu'ugyi amumjoojt, øy ja yjadu'ukpi wine'en tja'abaxti ja'abi kajpxy ja'abi madya'aky.

²² Tum ja ijxyimbi ka'ijxyimbi ja israelit jaa'y chojktip, jøts ja griegit jaa'y t'amidomidi ja wejin ja kajin;

²³ Ja Cristots øø nnigajpxpy ku ja kruskøjxp tø y'øøky. Nachø'ødyu'uni ja israelit jaa'y ja ttejt, jøts ja griegit jaa'y ñøomidi ku ja kyaweja'ajtin kyakaj'ajtin.

²⁴ Ots ja jade'en yjawa'andi, tøts ja Dios twi'ixy ja israelit jaa'y jøts ja griegit jaa'y pøn ja amuum tyamay'ajtpy ja møk'ajtin ja wijy'ajtin Cristo køjxp.

²⁵ Midi ja jaa'y yjanch'uktejtíp Dios ja kyawejin kyakajin, ja' idø'øn ne'egi kamaabyim pidsømp; midits tyejtíp kajotmøk'ajtin ja'ats kidi mibaat pøn myayiyi, yjaaktyimjinajpxy ja jawaani øy wine'en ixpikyjaa'y yjanamyukyidi.

²⁶ Migu'uktøjkti, ejxti nijawidi ku Dios tø mw'i'ixyidi, o meets jam waani pøn janch'ixpiktyi sam idø'øn ya naxwiiñ yiktsøky, jøts nayide'en niwaani pøn yikmøjpikta'ktip, uk jam tigati yikta'ejxkapti yjønjothp tyøjktotp.

²⁷ Tigach ja Dios wyinmaa'ñ, tum ja' ja tø twi'ixy pøn kajotmøjkti jits ja tsø'ødyumbim jyattit pøn jotmøk nayja'widip ya.

²⁸ Ja' ja Dios tø twi'ixy pøn ya naxwiiñ niti kayiktamøjpikta'ktip jøts jade'en tyikugøxit pøn jaty møjpikta'ajkidip ja jaa'y ya naxwiiñ,

²⁹ jøts niti nipøn kyanadyamikaxiyit Dios Teety wyingujkp.

³⁰ Ja Dios Teety idø'øn kø'øm tø ja Jesucristo mdukupadyidi jøts muki møøt m'ettit; jits nay ja' tø ttuñ jøts adøm ja Cristo ndaweja'nt ndakajint, jøts nay Cristo køjxpts ja Dios Teety xkupijkyindi jøts ja amumjoojt xukmøøt'ijtyindi, jøts ja nitsoojkin xmø'øyint.

³¹ Jabi yide'enxi ja Dios køjpxy wya'a'ñ: "Pøni pøn nay'agajpxwajnip wan ja nwindson'ajtim tnadya'agajpxyiyi."

2

Ja Cristo kyajpxy y'ayuujk pøn tø y'øøky kruskøjxp

¹ Migu'uktøjkti, ku mee nninijky jøts ja Dios kyajpxy ndukmadoojidi, ka'ap øts ja'abi ayuujk nyiktuuñ midi kanimadooni.

² Tu'ugyi øts ojt ja ixpøjkin nbikta'aky ku øts ja Jesucristo ja'ayi nnijawi, jøts jade'en øts ja nnigajpxy ku ja kruskøjxp tø y'øøky.

³ Janch yik'ayo'owim ngaxi'iky jøts tsø'øgi øts yjawi xjanchyik'oo'knip ku meets jam nninijky;

⁴ kuts mee tø ndamimadya'aky jøts tø nduknijawidi ja Dios kyajpxy y'ayuujk, ka'ap øts wi'ijpxy ayuujk uk kanimadooni ayuujk nyiktuñ sa ja møj nija'wibidi.

⁵ Ja Dios Espiritu Santo meets ja tø mduknimadøyidi jøts ja Dios tø mbudøkiyidi, jøts meets idø'øn xmibøkt kidi ja wijy jaa'y y'ayuujkøjxpip, pø ja Diosxi myøk'ajtingøjxp.

Dios Espiritu Santo køjxp idø'øn ja Dios Teety ñankñijawiyi

⁶ Tiy idø'øn, janch møj nija'wibim øø ngajpxy ku øøts ja jaa'y nmigajpxy pøn jaty jawaani tø tnija'wifii ja nwindson'ajtim y'ana'amin. Kidi meets jade'en xja'gyuki ku øøts ja ya'at kajin nyiktuñ sam møj yikutujkpi ya naxwiiñ ttundi, midi tsojk kudigøñidip. Jabi Diosxi øøts idø'øn kø'øm jade'en xyikajpxp.

⁷ Ja Dios wyejin ja kyajin øøts n'ayuujk'ajtpy midi yu'uch yik'ijtpñim, jøts ja' øøts idø'øn nnigajpxy ja nitsoojkin midi xemikøjxp ejtp, midi ja Dios yu'uch tø tyik'ity ku wyinaty niti tkayikñim.

⁸ Ni tu'ugin ja møj yikutujkpi yø tø tkanimadøy; ka'ap ja nwindson'ajtim Jesucristo ja jeexyip tø tyikruspatti kuk ja tja'gyukidyøø.

⁹ Jade'ents idø'øn ja tø yjatti sa jap nøkyixpy jaabyetyi:

Nipønim ja tka'ixy, nipønim ja tkamadøy, jøts nipønim ja tkawinmay

pøni ti ja Dios tø ttanibikta'agi

jøts ja tmo'ot pøn jaty ja chøjkpy.

¹⁰ Adømts idø'øn ja tø xuknija'wa'am pøni ti dø'øn ja tyijpy ku ja Dios Espiritu Santo tø xuknija'wa'am, jaa kuxi ja tnija'wiguixy tuki'iyi, jøts nija'wiyip ja Dios Teety ja wyinmaa'ñ nayide'en pøni sa jaty ja wyinmay.

¹¹ Pøn idø'øn ja t'uknija'wip pøni ti jam y'am yjotp tu'uk jadu'uk ja jaa'y myøøt'ajtpy? Jabi wyinmaa'ñxi ja kø'øm ejxixyip midi ja ñikøjxp'ajtpy. Ja Dios Espiritu Santo nayide'en nadyu'uk tnija'wimiyip pøni ti jaty ja Dios Teety wyinmaa'ñ'ajtpy.

¹² Kidi ja naxwii'ñit winmaa'yints adøm tø nyikmø'øyim pø ja Diosxi adøm ja y'Espiritu Santo tø nyikmø'øyim jøts ja xukja'gyuka'am ja Dios myøjmay'ajtin ja Dios myøjkunuu'kxin.

¹³ Ja Dios Espiritu Santots øø tø xukyikyuyj pøni ti jatj øø nnimadyajkpy, ka'ap øøts ja ngø'øm ixpiky'ajtin nyiktuñ, paty øøts ja Dios tyiy'ajtin ndukmadøj ja jaa'y pøn ja'abi ayuujk ja'abi winmaa'ñ tñimadoojip.

¹⁴ Pøni pøn ja Dios tyiy'ajtin tkanimadoojip, ka'ap ja tkupøkti pøni ti ja Dios Espiritu Santo yjanigajpxy, nugo ja tijj kawej'ajtin. Ka'ap tñimadøj, kumi ka'ap ja tñijawì sudso ja tjä'gyukit, ja' kuxi ja Dios y'Espiritu Santo tkamøøt'ajtp.

¹⁵ Pønts ja Dios Espiritu Santo myøøt'ajtpy øy ja tigati tjä'gyukit jøts nipøn ja sa kyanø'ømxit.

¹⁶ Pø nømpxi ja kajpxy jap nøykijpxy: "¿Pøn idø'øn tø t'uknimadøj ja Dios wyinmaa'ñ? Nipøn kyamayì jøts ja Dios tkajpxwejt." Øy ja yjade'en'aty, ja Cristo adøm ja wyinmaa'ñ nmøøt'ajtyimp.

3

Tu'ugy: øøts ja ndunk ku øøts ja Dios nmiduñ

¹ Kuts mee migu'uk ja Cristo y'ayuujk tø ndukmadowdi, ka' meets jade'en nmigajpxy sam idi'in yikmigajpxti pøn ja Dios Espiritu Santo yja' tø ñadyamiyoxkøjxniyidi, jade'en mee tø nmigajpxy sam ja jaa'y pøn tkajanchja'widipnim, jøts sam yiktukmadowdi ja mutsk una'jk, ja Cristo yja'.

² Tum ja' mee tø ndukyikyuyj midì jajtñi, jade'en mee tø nduñ sami maxu'nk ja'ayi tsejtsk nøø yikmø'øj jøts ka'ap kaaky tojkk; ja'agøjpx mee mgamayinim midì tsep sam ja maxu'nk tkagupøkti ja tø'øts kaaky ja tø'øts jii'kxy; nayide'ents meeets ixyam ook tigøj m'ity, ka'anìm mee mmayì ja tseppi.

³ Ja'agøjpx ku nayide'en x'ejxtinim sam ja jaa'y pøn ja Dios y'ayuujk tkanija'widipnim, ku mee mnadyami'ekyì tigati; ku mnamyijotma'adyidi jøts mga'uknamyigajpxwa'anìyidi jøts nayide'en mga'uknawyin'ejxwa'anìyidi, nayide'en mee xuni sami nugo jaa'y pøn ja nwindson'ajtim Jesucristo tkanija'widipnim.

⁴ Pø kuxi mee mnimy: "Øtsi Pablo møøt", jøts jadu'uk ñømi: "Øtsi Apolos møøt", nayide'en mee m'adi'ich sam idø'øn ja jaa'y pøn ni tu'uk ja Dios kyajpxy tkanija'wip.

⁵ ¿Tyimbyøn ja Pablo? jits ¿Tyimbyøn ja Apolos? Pø ja Diosxi øøts ja'ayi xumbi'ajtp, nay ja'ats øø tø xyiktunkpaaty jøts meeets yja' ja tø xmibøjki. Ja ndunk øø tø nduñ midì øøts ja Dios tø xaguwani.

⁶ Jade'en ja tpaaty, øts idø'øn ndejint tø nni'ipy ja tøm, jøts ja Apolos ja tø tñøguway jøts tø t'ejx'ity. Jøts ja Dios, ja'ayits tø tyikmuxe tø tyikyøñ ja tøm.

⁷ Ja Dios idø'øn tu'ugyì møj, jøts ja' idø'øn tuki'iyi tungøjpx, pø ja'axi ja tøm tø tyiktsø'øky jøts niti ja'adi pøn ja tø tjani'ipy uk pøn ja tø tjanøguway.

⁸ Nipønts kyamøji kyamutski øy ja tø yjani'ipy uk øyts ja tø yjanøway, pø ja Diosxi kø'øm ttanipatp ja mijuu'ñ pøni sa ja tyunk ja ya tyikyø'øj naxwiñ.

⁹ Tum tumbi jaa'y øøts idø'øn namajtsk. Ja Dios øøts idø'øn xumbi'ajtp, jøts meeets idø'øn mgam'ajtp midì ja Dios yja'ajtpy.

Uk nayide'ents n'ukpiktaajkint, meeets idø'øn mdøjk'ajtp midì ja Dios kyøjpy.

¹⁰ Øts idø'øn ja Dios tø xpikta'aky pojtspi ana'ambi, jøts øts idø'øn ja tøj tø nbøts'okwä'añ, jøts ja wenkpi pojtspi tjäkyikyø'øj ja tunk. Tum a'ejxits ja tsøky sa pønjabøn pyøch.

¹¹ Nipønxi kyapaat'atyiyi jøts ja pøch ja abiky tyiktso'onda'akt, pø tøxi ja tu'ugyì tyañ midì ja Jesucristo pyøchkojpk'ajtpy.

¹² Kuts ja tøj jyaakjayikpøch, øts ja oori yjaakpat, uk ja plätits, uk tum tsuj tsaa, uk øyts nayide'en ja pu'uy, uk ja miiyts, uk øyts ja waxkipy,

¹³ ku wyinaty ja tiädu'unin tyaaty jamnimts ñigaxø'økt pøni sa pøngapøn tø tyuñ; pø tum jøønxi jam wyinaty tump, ja'ats tyiknigaxø'økp pøni ti ja tøj tø yiktakøjy.

¹⁴ Pøni pøn wyinaty tø tyiktuñ midì ja jøøn kamayip, yikmø'øps ja' mijuu'ñ;

¹⁵ kuts ja wyinaty tyøj, windigø'øpyts ja tuki'iyi midì ja wyinaty tø tjapøch øy wyinaty awisä yjanç'awa'atspidsimy pøn idø'øn jade'en tø pyøch.

¹⁶ ¿Ka' mee xñijawì ku meeets ja Dios Teety mdsaptøjk'atyidi jøts ku ja Dios Espiritu Santo jam chøøni?

¹⁷ Pøni pønts tjejtjip ja Dios ja chaptøjk, yikudigøyip ja Dios ja', ja'agøjpx ku kyunuu'kxyi Dios chaptøjk, meeets ja Dios mdsaptøjk'ajttip.

¹⁸ Kidi kø'øm mnadyuñidi. Pøni jam tu'ugin ixpiky jaa'y ñayjawiwi, wan nayide'en nabyikta'agiyì ejxim ja jaa'y midì niti tkajajtp, jøts jade'en tpaat ja wejin ja kajin midì kanaxp.

¹⁹ Pø janch jawaani kajaaxi ja Dios wyejin jøts nika' jade'en ja jaa'y y'ixpiky'ajtin. Yide'enxi ja Dios kyajpxy wyä'añ: "Ja kyø'øm ixpiky'ajtin ja jaa'y tabakjø'opidip ja Dios, jøts ja kø'øm tyuktagiäwiyidit."

²⁰ Nayide'ents wyami: "Ñija'wip ja Dios ja' ku nima kyatuñ ja ixpiky jaa'y wyinmaa'ñ."

²¹ Paty meets mganadya'agajpxiyidit nipøn; pø meetsxi mja'ajtpy jøts øy xyiktunkpaattit tuki'iyi:

²² ixa Pablo, Apolos, Pedro, et naxwii'ñit, jujky'ajtin, o'jkin, ixyam'ajtin, jøts midi memp midi ja'tp;

²³ ja Cristots mee mja'ajtidip, jøts ja Dios Teety ja Cristo tja'atmi.

4

Ja nwindson'ajtim kyudanaabyi tyunkjøjp

¹ Paty meets jade'en xja'gyukit jøts ku øøts ja'ayi ja Cristo nbudøki, ja'ats øø ndunk'ajtpy jøts øø nnigajpxt ja Dios y'ayu'uch winmaa'ñ.

² Pøni pøn ti tø yiktaguwani, yiknigaxø'økp idø'on ja' ku ja tpadu'unt.

³ Ka' øts ja nmøjpikta'aky pøni sa meets xnigajpxy xnimadya'aky, uk pøni sats øts ja xejti xwa'andi pøn jaty ya naxwii'ñ ja jaa'y tiidyundip. Ni øts paat nganadyunk'aty; kø'øm pøni sa ø njaa'y'aty.

⁴ Nitits nganadyapøkyjawi, nnija'wip øts wa'ats ku øts ka' axøøk njaa'y'aty, ka'ats ja njøp'ejxin ku øts ja nbøky kya'ity, ja nwindson'ajtimts ø kø'øm xiidyu'ump.

⁵ Paty kidi x'øyjawidi xka'øyjawidi ixyam tigati; awejxtinim wan ja nwindson'ajtim tyiknigaxø'kixy pøni ti jaty kayik'ejxpatp, jøts nay ja Dios tyiknigaxø'økp pøni sa t'ixy tu'uk tu'uk ja anmija'win, jats ja Dios ja t'øyjawit uk tka'øyjawit.

⁶ Migu'uktøjkti, meets m'øy'ajtingøjxp øts jade'en nwa'añ jøts xni'ejxu'ttitt ja Apolos uk xni'ejxu'ttitt øts. Paty øts idø'on jade'en nwa'añ jøts nayide'en mjaa'y'attit sam øøts. Ka' nugo xu'undit agubajkpy yam ja Dios kyajpxy jade'en kyawa'añ jøts kidi nugo pøn xnadyamikexyidi uk xmi'ambøjkmidi pøen.

⁷ ¿Uk jaa dø'on tu'uk jaa'y pøn jawaani myikwejidip? ¿Ti kø'øm tø xpaatti midi ja Dios tø mga'ukmø'øyidi? Pøni tum ja Diosts tø mmø'øyi, jadits ku mnadyamikexyi pøni ti jaty mmøøt'ajtpy, jade'enxi me mwani ku mets ja kø'øm tø xpaaty pøni ti jam mmøøt'ajtpy.

⁸ Kumeen jaa'yin meets yjawi mnayjawi pøn niti tka'ukta'ayoonidip. Windsonin yjawi mnayjawi yidi, jøts øø xka'ukja'myatsni. iOgidø'on tyimyjanch mjanchwindson'atti jeexyip, jøts øø nayide'en ja ngutujk xmo'ot!

⁹ Jade'enxi øts yjawi nja'gyuki, pø tø øøts idø'on ja Dios tyimy'ixoojk xyiktañ; jøts øøts idø'on yjawi tø nyiktanibiktaagt jøts øø n'ookt; jøts øøts jade'en ja tsajp ja naajx x'ext xjawit, nayide'en ja Dios y'ankilis møøt ja naxwii'ñit jaa'y.

¹⁰ Maap mo'tp øø nyiktijy ku øøts ja Cristo yja' nbaduujni yam mee mnadyijiyi møj nija'wibi pøn tnimadoogøjxidip ja Cristo yja'. Ka'ap øø njotmøjki yam meets yikxon myikwindso'øgi.

¹¹ Ixyambaat øøts yuu ndani'ixy møøt tøødsi, jøts ka'ap øøts nwet nnaamy te; øy øøts jaa'y sagasa xuñ, ka'ap øøts ndøjk te ma øø nbøø'kxt,

¹² jøts nmijotkijpxy øøts ndunk nbøjk. Xjamigajpxigøøpy øøts jaa'y, ja øy tsuj ayuujk øøts ja nda'adsojimbijtpy. Ngupijky øøts pøni xpawojp øøts jaa'y.

¹³ Xjanchjabagajpxp øøts jaa'y, tuda'akts øøts ja n'ane'emy. Pista'agin øø nyiktuñ uk jade'ents øø nyikjawi ejxim jaa'dyi'ñi jaa'dya'ach.

¹⁴ Ka' mee nnijayi jøts xatsø'ødyu'undit ku jade'en mdsøøni, n'ana'amwampy meets idø'on ja'agøjxp ku mee n'u'nk n'una'jkin njawi pøn ø ndsojktip.

¹⁵ O meets jeexyip xjamøøt'aty namay ja yik'ixpøjkpi, ka' meets jadine'en ñamayi mdeety jabi øtsyixi meets ja'ayi tu'umpchi xeety'atp ja'agøjxp ku ja Cristo ñitsoojkin tø ndukmad-owdi jøts ja janchja'win tø xpaatti.

¹⁶ Ixyamts mee n'amidøy jøts ø xpa'ejxtit.

¹⁷ Paty meets ixyam ndaniguexy ja Timoteo pøn ø n'u'nkja'wip nwindson'ajtimgøjxp, jøts pøn ø nayide'en xkamajstutp. Yø' mdukja'myatsidip sudso ø ndsøøni kuts ja Cristo nmibøjki ja yja' sa o magama ndukyikyujti pøn jaty ja Cristo tjanchja'widip.

¹⁸ Jam meets ja mmigu'uk pøn janchnamyikajxniiyidip, nømp ja wya'andi kuk mee nga'ats'ext ja'agøjxp ku øts ja' ndsø'øgidi.

¹⁹ Pøni yikutujkpyts ja Dios, nninøjktipts pojn. Jamnimts ø n'uk'ext pøni janchtundip idø'on pøn namyikajxidip uk nugo dø'on kyajpxti.

²⁰ Ka'axi dø'on nugo nmadyajkint ku ja Dios yja' nbaduujñindi, pø jatyi dø'on ja yikpadungojt.

²¹ ¿Sudsots uk mdsojktip jøts øts awa'an nnøjkt jøts n'atskastigimo'odit, uk ja yuyj'ajtin jøts ja tsojkin ø nminøjxk ku wynaty n'ats'ejxti?

5

Ja' yiknigajpxp ku ja kya'oyi ku pøngapøn ñamyøøt'atyidi nugo

¹ Jade'en ja kajpxy yø'øy, jamik ja mmigu'uk tu'uk ja kyudaak tmøøt'aty. Janch møj ka'øy jaa'y'ajtin idø'øn jade'embu tsinaa'yin, ni jambaat yø kyayikupiky ma ja jaa'y ja Dios tkanijawidi.

² ¿Jøts niti meets idø'øn xkidyimbyøkyjawi ku ja mmigu'uk jade'en y'adi'ich? ¡Meetspik idø'øn jeexyip mjetmay'oo'ktøjkup ku mmigu'uk jade'en y'adi'ich! Pøn yaa'dyøjk idø'øn jade'en tøy y'adi'ich ka'ap ja y'ukpaat'ajtniyi jøts ja jam xmøøtsøønidit, pawøpy ja pyaat'aty.

³ O meets idø'øn njagamøøtsøøni jamts øts ja nwinmaa'ñ nyik'ity; tøts ja ndiidyuni winmaa'ñjotp pøn jade'en tøy y'adi'ich ejximdam øts jam jeexyip ndyimchøøni.

⁴ Namyukidi nwindson'ajtmgøjxp, jam ø wyinaty ja nwinmaa'ñ meets møøt, jøts ja nwindson'ajtim Jesucristo myøk'ajtim mbudøkiyidit.

⁵ Jøts xyikjiwa'aktit ja jaa'y, wan ya ja miku'yik'ayo'ombaadyiyi kunim ja nwindson'ajtim Jesucristo wyinaty myiñ tiidyumbi, janimts ja nøjxk yiknitso'ok'ajtxiyi ja y'anmija'win.

⁶ Paty kidi mnadyamikexyidi pøni ti jaty jam mdundip. ¿Ja ka' mee xnijawi ku ja ka'odyumbi ja yja' nugo tyikmiweni?

⁷ Paty kidi xmaa'kxti ja ka'odyumbi midit tøy wyindigøøni, midit jam nugo myikma'tjidip. Jøts øy wa'ats m'ettit. Pø tøyi kø'øm ja Cristo xku'o'ka'am kruskøjxp, jøts ja tøy wyindsø'jkin'aty adømgøjxp Dios Teety wyingujkp.

⁸ Ja tiy'ajtin ja øy'ajtin adøm idø'øn ja Dios ndawindsø'jkiy'ejtimp, jøts ka'ap nijuuni nyikmø'ajtimt ja y'axøøkpi midit ja anmija'win nugo tyikwindigøøpy.

⁹ Nnimaay meets ku ja nøky ojts tu'uk ndanigaxti, jøts xkamøøtsøønidit pøn jaty ja y'axøøkpi yigaappi pyawinmaadyip jøts tum ja' tyunk'ajttip.

¹⁰ Ka'ap meets idø'øn ja yide'en xja'gyukit jøts ku meets abiky mdyimñabyiktaajkmidyidit, jøts ja ka'øy jaa'y, jøts ja meengyax jaa'y, jøts ja maa'tsipy jaa'y, uk jøts ja tsamaxan windsø'jkip jaa'y xkadyim'yukwin'ejxnidit; jabi kuwañimxi ja ya x'ejxtit ja'abi jaa'y o madsoo.

¹¹ Yide'en øts idø'øn ja ndijy jøts ku meets mganamyukit møøt ja' pøn nañikajpxiyip Cristo padumbi, yam ja kya'øyjaa'y, uk myeengyaxi, uk tsamaxan windsø'jkibi, uk yja'aji pøn tuki'yiyi tkajpxyø'ogyoyp, uk pøn ja nøø ja mu'uk ttunk'ajtp, uk myeech. Ja jade'embu jaa'dyi ni xkamøøtka'aty meets idø'øn ja'.

¹²⁻¹³ Ka'ap ø ppaat'aty jøts ø ndiidyu'unt ja wenk jaa'y midit abiktyi, ja Dios ja paat'ajtiyip. Meets idø'øn mbaat'ajtidip jøts xiidyu'undit ja mmigu'uk. Paty xyikjiwa'aktit ja pøkyumbi midit jam møøt tsinaadyip.

6

Ku ja kajanchja'wibi juez ja janchja'wibi jaa'y tmi'øøndi

¹ Ku meets mmigu'uk xni'øøniwya'añ, ¿tigøjxp meets idø'øn ja xaninijxxy ja juez pøn tkajanchja'wip ja nwindson'ajtim Jesucristo, jøts nika' ja xaninøjkxti pøn ja janchja'win nayide'en tmøøt'ajttip?

² ¿Uk ka' meets idø'øn xnijawi ku ja' ttiidyu'undit ja naaxwiifit jaa'y pøn ja Dios yja' tpaduujnidip? Pøni meetsts mdiidyumpy wyinaty ja naaxwiifit jaa'y, ¿ka'ats meets idø'øn xjaty sudso xu'undit jøts xiidyu'undit pøni ti jam tuujnip jajtjip?

³ ¿Ka' xnijawidi ku ja ankilis paat ndiidyu'unindit? ¡Pøni jade'ents ja wyinaty, nija'wa'ampts adøm idø'øn sudso ya ndiidyu'unindit naaxwiifit!

⁴ ¿Sudso dø'øn ja xaninøjkxti ja wenk jaa'y pøni ti dø'øn ya naaxwiifit mdsep'ajttip m'ayo'on'ajttip? Ja' meets ja mdaninijxxy pøn kajanchja'widip.

⁵ Ya'atpi dø'øn ti mjanchtatsø'odyu'undip. ¿Ni tu'ugin meets ja jam xkamøøt'aty pøn tjajtp ja tiidyu'unin?

⁶ ¿Tsaach'øy idø'øn ja' jøts namajtsk ja janchja'wibi ña'ni'øøniyidi ma ja jaa'y jam kya-janchjawidi?

⁷ Tsø'odyumbimxi mee mjagaxø'kni ku meets jam tukjanchja'wibi jaa'y mnamyidsep'atyidi. Ku ne'egi amøñi xkamidanidi pøni sa myiktundi. Nisa ne'egi mgawa'andit øy mjayikwimaa'tsti.

⁸ Janch tum wimbet'ampy mee ne'egi xuñ, øy meets ja mgø'øm mmigu'uk sa xuñ midit jagati pøky, uk wime'chpts meets ja' ne'egi.

⁹⁻¹⁰ ¿Uk ka' idø'øn xnijawidi ku ja Dios ja kyutujk wyinaty tkadanitani pøn jaty ja tiy'ajtin tkatundip? Nay'ejx'etidi, ejxim myikwin'øøndi, ka'axi wyinaty ja Dios ttanitani ja kyutujk pøn jaty namyøøt'ajtidip øy ja jyaga'amajtskidinim, ni ja' pøn jaty ja maxandsaa windsø'jkidip, ni ja' pøn jaty ja wenk tøyxyøjk uk wenk yaa'dyøjk tmøøt'ajttip, ni ja

yaa'dyøjkti pøn ja myiyaa'dyøjk tmøøt'ajttip, ni ja' pøn jaty maa'tstip, ni ja meengyaxti, ni ja' pøn tuki'iyi tjanchkajpxyø'ogyøxtip jatyi, uk pøn jaty ja win'øø'nk ttunk'ajttip.

¹¹ Jam mee muuma pøn jade'en y'ijty tsinaadyip; ka'ats ja icyam jade'en y'uksinaa'niidi pø tæxi ja nwindson'ajtim Jesucristo køjxp pyøkwyatsniidi, jøts ja Dios Teety tø yiktagidøkidi, jøts y'Espiritu Santo køjxp ja tø xkupijkyindi.

Sudso ja nne'kx ndawindsø'jka'ant ja Dios

¹² Jade'en ja ayuujk yø'øy ku o tigati nduu'nint, nipøn ja xkadabayø'øyint. Øy idø'øn ja jade'en yjawa'añ ka'ats tuki'iyi y'ødyuñ pøni ti yiktump; jabi ka'axi pyaāt'atyiyi jøts ja tu'ugyi nugo ndyimyikmajadaajkin.

¹³ Janch idø'øn ku ja kaaky ja tojxk ya tø yikpikta'aky jøts ja maatsjotp ñøjxkt, ka'ats ja ne'kx ja' wya'añ jøts ja nugo yiktapøkyu'unt sam ja winaagin ja'ayi ttunk'atti. Kudigøøpy y'ity ja kaaky ja tojxk jøts ja maats nayide'en, ne'egi tampts xemikøjxp ka' adøm nne'kx ja Dios Teety ndawinj'a'wa'ant ndawindsø'jka'ant jøts ja nayide'en amuum xmøøt'ejnt.

¹⁴ Nayi myøk'ajtin ja yik'awa'amp jøts ja xyikjujkyøjkin jadigojk sam ja nwindson'ajtim Jesucristo ja ojts tyikjujkyiky.

¹⁵ ¿Ka' mee xnijawi ku meets yø mne'kx Cristo tne'kx'aty nayide'en? ¿Øy idø'øn jøts ja Cristo ñe'kx nnixajiyit jøts øts ja nmo'ot ja ka'ødyø'øxyøjk midi ttunk'ajttip ja yaa'dyøjk? ¿Nima yø jade'en kyatiy!

¹⁶ ¿Uk ka'anim idø'øn xnijawidi ku ja ka'ødyø'øxyøjk yikmøøt'aty jøts tu'ugyi ja ne'kx namayøi wyimbajtmi? Pø nømpxi ja nøky wya'añ: "Tu'ugyi ja nøjx wyimbetti."

¹⁷ Kuts tu'uk ja jaa'y ja nwindson'ajtim Jesucristo tminamyayi, tu'ugyits ja nayide'en wyimbajtmi.

¹⁸ Paty kidi nugo mnamyøøt'atyidi, wingaktu'utti yø'øbi pøky. Øy idø'øn pøky yjaji, yiktump øy midi'ibi jadu'uk pøky, ka'ats ja jade'en tymbyaaty sam ja jade'embø pøky, pø ja kø'øm ne'kxi pøkyumbajt tymwyamp kø'ømts ñamyayi ja namyidundigøyi.

¹⁹ ¿Ka' xnijawidi ku meets ja Dios Espiritu Santo mdsaptøjk'atyidi? ¿Jøts ku ja Dios Espiritu Santo jam chøøni mne'kxkøjxp? Pø ni yø mne'kxi mee xkaja'aty,

²⁰ pø janch tsowixi ja Dios tø mjuyidi ku ja y'u'nk tø xku'ayo'ombaajta'am. Paty meets idø'øn ja Dios ja mne'kx jøts ja m'anmija'win amuum xawindsø'øgit, jabi tum Diosxi yø' yja'.

7

Sudso ja amajtsk jaa'y'ajtin ñaxt

¹ Icyam øts ja nøky n'adsojmbijty midi mee tø xaniguexy. Ja øy ja' ku jaa'y kya'amajtskidi;

² jade'ents ne'egi pyaāt'aty jøts ja yaa'dyøjk kija' tmøøt'attit ja ñidø'øxy, jøts ja tø'øxyøjk kija' nayide'en tmøøt'attit ja ñiyaa'y, ja'agøjxp ku ja pyøkyi ku jaa'y nugo ñamyøøt'atyidi.

³ Myimado'op idø'øn ja yaa'dyøjk ja ñidø'øxy nayide'en sam ja tø'øxyøjk tmimadoomit ja ñiyaa'y, jøts jade'en nixem niyam ñadyajotkujk'atyiidi.

⁴ Ka'ap ja tø'øxyøjk nadyu'uk tja'aty ja ñe'kx, ja ñiyaa'y ja paa't'ajtiyip; jøts nayide'enmi ja yaa'dyøjk, ka'ap ja nadyu'uk tja'aty ja ñe'kx, ja ñidø'øxy ja paa't'ajtmiiyip.

⁵ Nagyupøkidip idø'øn ja namajtsk jøts ñamyøøt'atidit; pøni tyundipts ja kajpxy jøts ñay'amagay'atidit ku ja Dios wyinaty t'ajot'atwa'andi, ots ja jade'en ttu'undit. Kuts ja jotmay tyikugøxidit, nayide'ents ja chinaa'y'in tyikyø'ogyojmidit, ja' ka'uk'øyni ku kya'uknagypøjkniyidi jøts ja miku' winøø'mbi tyuktunidit ja pøky abiky.

⁶ Ka' mee ndaguwani jøts mga'amajtskidi, amajtski meets pøni jade'en xtsojkti.

⁷ Jade'en ø njatsøjky jøts mee mga'amajtskit sam øts; ka'ats adøm ja Dios ja winmaa'ñ jøts ja kunuu'lxin tum jade'en tø xmø'øyim, tigach ja tø tyikwa'kxy.

⁸ Pøn jaty ka'amajtskidipnim, uk pøn tø kyu'o'kiñidi, ja' øts idø'øn n'ana'amdip ku yjawi yja'øyi jøts kya'amajtskidi sam øts.

⁹ Pøni ka'ats tmimajada'akti jade'embø tsinaa'y'in, wan ne'egi t'amajtskidi pø ka'axi y'uk'øyiñi ku ja wyinaty o pøngapøn t'ukmøøt'ajtni.

¹⁰ Pøn jaty amajtsk jaa'y, ja'ats ø n'ana'amdip jøts ja tø'øxyøjk nijuuni xøøw tkamajtsstu'utt ja ñiyaa'y. Kidi øtsip idø'øn jade'en wamp, ja nwindson'ajtim idø'øn jade'en kø'øm ana'amp.

¹¹ Pøni mayjstutpjets ja tø'øxyøjk ja ñiyaa'y, ka'ap ja y'amajtskit, uk myøøtnagyajpxipts ja ñiyaa'y jøts jadigojk y'amajtsk jaa'y'attit. Nayide'ents idø'øn ja yaa'dyøjk pyaāt'atyiyi ttu'unt.

¹² Yide'ents ø nwami, øy ja nwindson'ajtim jade'en yjagawa'añ, pøni pøn yaa'dyøjk tø tmøøt'amatski tu'uk ja tø'øxyøjk pøn ja janchja'win tkamøøt'ajtp yam ja yaa'y ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja yaa'dyøjk ja tmajtstu'utt.

¹³ Pøni jamts ja tø'øxyøjk tniyaa'y'aty tu'uk ja yaa'dyøjk pøn ja janchja'win tkamøøt'ajtp yam ja tø'øxy ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja tø'øxyøjk ja tmajtstu'utt.

¹⁴ Pø tøxi ja yaa'dyøjk kunuu'kxy tyañ øy ja janchja'win ja tjagamøøt'aty ku ja tø tpiky tu'uk ja tø'oxyøjk pøn ja janchja'win tmøøt'ajtp. Jøts nayide'en kunuu'kxy tø tyañ ja tø'oxyøjk øy ja janchja'win ja tjagamøøt'aty, ku ja tø tpiky tu'uk ja yaa'dyøjk pøn ja janchja'win tmøøt'ajtp. Ku ja kyajade'enit, tum kajanchja'wip u'nkts meets ja m'u'nk m'una'jk wyimbidsømni; ka'ats, pø tøxi Dios ja y'øyjaa'y'ijxyidi Jesucristo køjxp.

¹⁵ Pøni y'amidøøjks nidu'ugin ja yaa'dyøjk uk ja tø'oxyøjk pøn dø'on ja janchja'win tkamøøt'ajttip jøts ñawyakxidit, ja yaa'tnawya'kxyidi. Niti ayuujkts tka'ukmidanidit ja yaa'dyøjk uk ja tø'oxyøjk pøn dø'on ja Dios tjanchja'widip, pø ja'axi ja Dios xamidsojkimp jøts ka' ja tsep uk ja ayo'on nmidsinaa'yindit.

¹⁶ ¿Ja ti me tø'oxyøjk mdanija'wip pøni myiknitso'okp mets ja mniyaa'y ku ja janchja'win ja tkamøøt'aty? uk ¿ti me yaa'dyøjk mdanija'wip pøni myiknitso'okp mets ja mniidø'øxy ku ja janchja'win ja tkamøøt'aty?

¹⁷ Ots jyasa'ji, tum jade'en idø'on ndsinaa'yint sa ja nwindson'ajtim ttsøky, jøts pøni sa adøm ja jujky'ajtin ja tø xmø'øyim nay jade'en sam wyinaty njujky'ajtyim ku ja Dios ojts xwaqdsø'yindi. Jade'en øts idø'on n'ane'empy ma jaty ja janchja'wibitøjkti.

¹⁸ Pøni wyaqdsøopy ja Dios ja jaa'y pøn ja ejxpajt ñe'kxkijxpy myøøt'ajttip sam ja israelit kostumbri, ka'ap ja tattsø'dyuu'unt, wan ja jade'en ttañ; pøni wyaqdsøopyts pøn ja ejxpajt ñe'kxkijxpy tkamøøt'ajtp, ka'ap ja kuwanikøjxp yikpiktaajkit ja ejxpajt ñe'kxkijxpy.

¹⁹ Wan ja tmøøt'aty uk tkamøøt'aty ja ejxpajt jap ñe'kxkijxpy nugo ku ja Dios ja tpaduujni ja kyutujk.

²⁰ Jade'en idø'on jaa'y tya'ant sam ja y'ijty t'ixy ku ja Dios y'ejxkajpiyi.

²¹ Pøni nugots øy pøn windson mdyimyiktuñyi; sam jaa'y jiyujk tsakaa tjagyepy winet ku ja Dios ojts mwaqdsøyi, ka'ats mets ja xkumayjawit ku wine'enin xpaatt ja awa'ats'ajtin. Jatyits idø'on ja xkupøkt, ka'ap ja jeky xpawinma'aty.

²² Pøn idø'on wyinaty juy ja jaa'y yik'ejttip ku ja yiktamidsøky jøts ja nwindson'ajtim ja tjanchja'wawit, ja nwindson'ajtimts ja ixyam myidunip kø'ømdsøky, ka' juy, jøts ja jaa'y pøn jaty jade'en tkayiknajxtip nayide'en ja ixyam ja nwindson'ajtim kø'ømdsøky tmidunidi, ja Cristo ja' tyumbidi.

²³ Janch tsowi meets ja Dios Teety ja y'U'nk mdagujuyi, paty kidi nugo mnay'ixmachidi jøts ja ka'øchinaa'yin xpadøjkiñidit.

²⁴ Jade'ents migu'uktøjkti, jøts jade'eña'am xyikyø'dyit ja mjujky'ajtin sam ja Dios tø mbaadyidi ku tø mwaqdsøyidi.

²⁵ Tits ø nda'ana'ampip pøn ka'amajtsk jaa'dyi, ka' ja nwindson'ajtim ja sa tñigajpxy; øts idø'on ixyam ngajpxnaxwampy tu'uk ja nwinmaa'ñ sudso dø'on yjawi tyuu'baatt tyuu'wetst ja tsinaa'yin.

²⁶ Jade'en ø njawa'añ jøts ja yaa'dyøjk jadi'iñi tya'ant ja'agøjxp ku ixyam ja tsinaa'yin janch tsep janch aduky.

²⁷ Pøni m'amajtskjaa'yits, kidits x'ixa'ay sudso ja mniidø'øxy møøt mnamyajtstu'udit; pøni ka'ats m'amajtskjaa'yi, kidits ja amajtsk'ajtin xpawinmay.

²⁸ Pøni m'amajtskipts ka' me mbøkyuñ; pøni amajtskipts tu'uk kiixe' ka'ats ja nayide'en pyøkyumi. Pøni amajtskidip tsep ja chinaa'yin ja tpaattit; ja'ats øts idø'on njatsøjkpy ku øts idø'on jade'en njawa'añ, jøts ja ayo'on xkapaattit.

²⁹ Meets migu'uktøjkti, ja'agøjxp øts idø'on jade'en nwa'añ ku ja nwindson'ajtim wyingoni. Paty ixyam mdsinaa'ñidit yide'en: Pøn jaty ja ñidø'øxy jam, ja Dios idø'on ja yja' ja ne'egi tyajotmay'o'jkip jøts ja yjujky'ajtin tyiknaxt ejximdam ja jeexyip nadyu'uk'aty.

³⁰ Pønts yaxtip jaidyip, jade'en ja chøønidit sam ja' pøn kayaxtip kajidyip; pøn jotkujk'ajttip xondaktip, jade'en ja chøønidit sam ja' pøn kajotkujk'ajttip kaxondaktip; pønts juudyip kajpxtip, jade'en ja jyuy kyajpxy ja tjawidit ejximdam ja jeexyip tkamøøt'atti.

³¹ Pøn jaty ttaxondip yø naxwii'ñit tsinaa'yin, jade'en ja ñayjawiwidit sam ja' pøn jaty ja tkadaxondip; jabi kugøxi jøp'amxi yø naxwii'ñit tsinaa'yin y'ity.

³² Ja' meets idø'on njadamidsøjkpy jøts ka' øy ti nugo xtyimdyajotigø'dyit ya naxwii'ñ. Ku dø'on ja yaa'dyøjk kya'amajtskjaa'yi, ja nwindson'ajtim ja ja'ayi pyawinmaapy sudso ja tyikjotkujk'att;

³³ kuts ja y'amajtskjaa'yi, ja'ats ja pyawinmaapy sudso ja yjujky'ajtin tpaatt jøts ja ñidø'øxy tyikjotkujk'att.

³⁴ Tigach ja tø'oxyøjk tsinaa'yin tyiknaxy midi ka'amajtsk jøts nayide'en ja' midi amajtsk. Midi ka' y'amajtski ja nwindson'ajtim yja' ja tyajotigø'jyip jøts ja amuum ttamiyøxy ja ñe'kx møøt y'anmija'win; pønts jam ja ñiyaa'y, ja' myijotigø'opy jøts sudso ja ñiyaa'y tyikjotkujk'att.

³⁵ Ka'ap øts ya'at nñigajpxy jøts mee niti xkadyimy'uktunk'atnit, paty øts idø'on yø nñigajpxy jøts yikxon mdsøønidit sam idø'on yjapaat'atyiyi jøts ja nwindson'ajtim yja' xmiijotigø'dyit.

³⁶ Põni jamts ja u'nkteety põn t'õyja'wip jøts ku yjawi y'õyi jøts ja ñøøx ne'egi y'amajtskit ja'agõjxp ku ja yjawi ja yjumõtj ñaxni jøts ja wyinmaa'ñ tyigatsni, wants jade'en ttuñ põni õy tjawi, pø ka'axi ja pyõkyi.

³⁷ Põni jamts jadu'uk ja u'nkteety põn idø'õn yikxon tpawinmaapy õy tsuj jøts ja ñøøx ne'egi kya'amajtskit, øyts idø'õn ja y'adi'ich jade'en.

³⁸ Paty idø'õn jade'en põn ja ñøøx tyik'amajtskip, õy adøtsp idø'õn ja wyinaty; põnts ja ñøøx tkayik'amajtskip, jaa'kytimwyindøøpts idø'õn ja wyinaty jawaani ku ja jade'en wyinmay.

³⁹ Kutujkõjxp ja tø'õxyõjk tmøøtsõõni ja ñiyaa'y põni jujky'ajtp ja'; põni o'kp kudigøøpyts ja', øyts ja põn tmøøt'amatskiñit, nugo ku nayide'en ja yaa'dyõjk ja janchja'win tmøøt'aty.

⁴⁰ Ne'egi jotkujk ja chøõnit põni ka' y'uk'amajtskiñi. Jade'en øts idø'õn ja ngø'õmgajpxwejin nyaky, jøts nmøøt'ajtpy øts idø'õn ndijy ja Dios Espiritu Santo.

8

Sudso ttu'undit ku ja windsø'jk'ii'ñ yiktaniwa'adit midi yiktawindsø'jkip ja maxandsaa uk øy ti jadu'uk awanax

¹ Ixyamts ø nnigajpxwa'añ sudso xu'undit ja kaaky tojxk midi tø yiktawindsø'õgi ja maxandsaa. Wa'ats ja njanija'wa'andi sa ja ndu'unindit; ja'ayi ja nugo nnadyamiguejxyindi ku adøm møj nija'wibim, ka'ap ja nmøjpiktaajkyin ku ja tsojkin ja pa'ayo'owin tyikmøji tyikmayi ja winmaa'ñ.

² Põni jam ja jaa'y põn nadya'agajpxip ku ja ti yiin wan tnijaw i ja'agõjxp ja jade'en wya'añ ku ja kyawijyi kyakejyi.

³ Jabi y'ejxkajpyts ja Dios ja' põn ja tsojkip.

⁴ Sudsots idø'õn xu'undit, ¿mga'adyip mjøø'kxtip idø'õn ja' midi ja maxandsaa tø yiktawindsø'õgi? Nnijja'wa'amp ndøm ku ja maxandsaa kyaDiosi, pø tu'ugyixi ja Dios.

⁵ Jaa dø'õn ja jaa'y põn wandip ku dios ja janch namaydi ya naxwiin jøts jam tsajpjotp, ja'agõjxp idø'õn may ja dios ja jaa'y twindsø'õgidi ku jade'en tja'gyukidi,

⁶ tu'ugyits adøm ja nDios, ja Dios Teety. Ja Dios Teety idø'õn tuki'iyi tø tyik'õyi, jøts ja' adøm idø'õn nnijuk'yajtyindip jøts ja ndamiyojxin ja ndsinaa'yin. Jats tu'ugyi nayide'en ja windsøn, ja nwindson'ajtim Jesucristo, ja'agõjxp idø'õn tuki'iyi tø y'õyi, jøts ja'agõjxp adøm idø'õn nayide'en tø xyikøjyim ja Dios.

⁷ Jats may ja janchja'wibi jaa'y põn tkaja'gyukidip ja yjade'emb i tsinaa'yin. Pøn jaty y'ijty ttawindsø'jkidip ja kyaaky ja tyojkx ja maxandsaa ku ja ixyam ja'abi tkaydi ttoj'kxti jade'eñim ja wyinmaydi ku ja nay ja'abi dios yja' jadigojk ttawindsø'õgidi; kuts ja tpawinmaadyøkidi jøts ja tpøkyjawi ja'agõjxp ku ja tkaja'gyukidinim.

⁸ Kidi ja' adøm inet jawaani õy nwibejtint põni kaa'yimp jøø'kximp, nayi ka'ats adøm inet jawaani ka'õy nwibejtint põni ka' adøm ngaa'yim.

⁹ A'ejxits mee m'adøøtst, o meets ja xka'aty xojkxt jøts ka'ap ja mmigu'uk ja xukpøkyjawidit, põni pyøkyjawidipnim ja tuki'iyi ja'agõjxp ku ja yjanchja'win ja ka' yikxon tyuu'døkidinim.

¹⁰ Ku n'ukpiktaajkint, yam mets ja mjanchja'win tø myøji myayi jøts m'a'ejxnaxit tu'uk ja mmigu'uk põn okwa'añ ja yjanchja'win tyiktso'ondakpnim, ku mets jam mdsõõni agujk jotkujk jøts xji'kxy ja kaaky ja tojxk midi tø yiktawindsø'õgi ja maxandsaa uk øy ti jadu'uk awanax, ¿ka'ats idø'õn ndejin mbaduu'miyit nayide'en ja mmigu'uk põn m'a'ejxnaxiyip?

¹¹ Jøts jade'en xyiktuu'tigøøty ja mmigu'uk ja'agõjxp ku kyatinyim kyaduda'akñim ja yjanchja'win, yam ja Cristo ja tø yjagu'oogiyi.

¹² Jade'ents idø'õn, ku ja pøky jade'en xu'undit jøts ja mmigu'uk yjanchja'win xyik'amutskiyidit, ja Cristo meets idø'õn kø'øm jade'en mmidundigøøpy.

¹³ Põni ndukpaajtyimpts tam adøm jade'en ja mmigu'uk ja tyuu'tigøø'yin ku yikji'kxy ja maxan wyindsø'jk'ii'ñ, paat'ajtyiptyts ne'egi jøts ja ka'ap jade'en n'uktu'una'ant jøts ja mmigu'uk jade'en ja pøky ngadani'ejxa'ant.

9

Ti dø'õn paat'ajtyip ja nwindson'ajtim kyudanaabyi

¹ Tø øts idø'õn ja Dios xaguwani jøts øts ja ngudanit jøts ja kyajpxy y'ayuujk ja nnigajpxiyit, nipøn jaa'yts ø xkapaat'aty jøts øts ja ndukmado'ot põni ti jaty ø ndumpy; pø tøxi øts ja nwindson'atim Jesucristo n'ixy, meetsts idø'õn ndunkjøj'ajtpy ku øts ja nwindson'ajtim tyunk nbadøjkjyi.

² Jaa abiky ja jaa'y põn ø xka'ejxkaptip jøts ku øts ja Dios xkudanaabyi'aty; meetspits mbaat'ajtip jøts øts jade'en x'ejxkaptit, pø øtsxi meets ja nwindson'ajtim tø ndukmibiky, kuts meets jade'en tø ndukmadøy ja janchja'win jade'ents idø'õn wyingaxi'iky jøts ku øts ja Dios njanchkudani.

³ Yide'en øts idø'øn n'adsøy pøn jaty ø xpagaajpxtip:

⁴ Xpaat'ajtp ø nyikmo'ot ja kaaky ja uujkin,

⁵ jøts xpaat'ajtp ø nayide'en jøts ja nnidø'øxy midu tjanchja'wip ja Dios nbawaamit sam ja jadu'ukpi kudanaabyitøjk ttundi, møøt ja nwindson'ajtim y'ajch y'uch jøts nayide'en sam kø'øm ttuñ ja Pedro.

⁶ ¿Ja ti øts yø møøt ja Bernabé xpaat'aty jøts øøts ja ngaaky ndojkx nnidu'unt?

⁷ ¿Ma dø'øn ja soldadäi kø'øm y'uknay'ijxyiyi? ¿Ma dø'øn ja jaa'y tka'ukjii'kxy pøni ti tø tni'ipy jøts pøni ti tø tyikpidi'iky? ¿Pøn idø'øn nugo ukuborreegi'ajtp jøts niti kyagida'anxyiyi?

⁸ Kidits mwinmaydi ku øts jade'en kø'øm n'awijy, nayide'enxi ja Moisés kyutujk wya'añ.

⁹ Pø yide'enxi jap jaabyety y'ity nøky kyutujkijxpy: "Kidi ja mdsakaa ajeñ xyik'okti ku ja xyiktunwa'andit." Kidi ja'agøjxp ja Dios jade'en wya'añ ku ja tsakaa ja ja'ayi tjomay'aty,

¹⁰ pø adømgøjpxxi dø'øn ja ejxpajtin ja jade'en tpikta'aky. Paty ja kutujk jade'en yikjaay ku adøm ja y'øy'ajtin ja pya'ayo'owin ja xuktanitsoojkim; pø nayide'enxi ja jii'kxy ja pyaat'atxyiyi pøn yuup tump sam ja' pøn yikpidi'jkpy ja pikta'aky.

¹¹ Tøts øøts ja Dios kyajpxy y'ayuujk namyayi nni'ipy ma meets jam, ¿ka'ats idø'øn y'øyi jøts mee n'amido'ot ja pudøjkin? ¿Ti øø ndajujky'atp ya?

¹² Pøni n'amidoojip mee tigati ja wenk jaa'y jøts meets ja xmø'øy, jawaani kajats øø xpaat'aty.

Øyts øøts ja jade'en xjapaat'aty, ka'ats øøts ja nbayø'øy kuwani; nmidanaapy øøts ja' pøni ti øøts xjajtp pøni ti øøts xka'ejtzip jøts øøts jade'en ngayiktuu'duky ja Cristo y'ixpøjkin ja Cristo y'ana'amin.

¹³ Mnija'wip meets ku ja jaa'y pøn tsaptøjkjotp ttundip, tum ja' ja tyajujky'ajttip pøni ti jam tøjkip. Pøn ja altajr jam t'ejx'ejttip ma ja jiyujk jam y'øøky midu windsø'jkin'ajtp, ja'abi tsu'uchts ja yikmøødyip.

¹⁴ Nayide'en ja nwindson'ajtim Jesucristo tø yjanimy jøts ja tyunk ja ttajujky'attit pøn ja nitsoojkin ayuujk tnigajpxtip.

¹⁵ Nijuuni ja'abi winmaa'ñ nugo ngadamajada'aky, ni ja'agøjxp mee nganijayi jøts mee xmo'ot o tigati. ¡Wan øts jade'en ne'egi t'øøky, pø ndajotkujk'ajtpyxi øts ku øts jade'en ndsøøni!

¹⁶ Kuts idø'øn ja Dios y'øy'ayuujk y'øwynmaa'ñ njanigajpxy, ka'ats øts ja nnadyamøjpkta'agyiyi, pø kø'ømxi øts ja tø ngupiky ku øts ja tø nyiktaguwani. ¡N'ayøøy øts ku øts nganigajpxt!

¹⁷ Pøni kø'øm tsojkingøjpxts øts nduñ, n'awijxpyts øts ja n'øy'ajtin. Ka'ap øts jade'en ja ndunk, jabi kø'ømxi ja Dios xwi'ixy ku øts ja øybi tunkjøøjp xmø'øy jøts jaty ngupøjkøjy.

¹⁸ Ja' øts idø'øn ndajotkujk'ajtpy ku øts ja nitsoojkin ayuujk nnigajpxy jøts ø niti mijjuu'ñ nga'amidøy, øy ja jade'en xjapaat'aty jøts øts ja' ndajujky'att.

¹⁹ Ots ø nipøn njagamiduñ, tøts ø kø'øm nadyamidsøkyi jøts mee nmidu'unt, jøts ja Cristo jade'en ndukpaattit.

²⁰ Kuts ja israelit jaa'y nmøøtsøøniidi nayide'ents ø ndsøøni sam ja chøøniidi jøts øts ja Cristo jade'en ndukpaattit; ja Moisésxi øts idø'øn ja kyutujk n'atskupøjkjip øy øts ja'abi kutujk xjagapaat'aty.

²¹ Kuts øts abiky nnøjkxmi ma ja Moisés kyutujk tkayiktuujni, nayide'ents ø ndsøøni sam ja chøøniidi, øy øts idø'øn ja Dios kyutujk ja'ayi nyikmøjtøjkjii, pø ja Cristoxi øts ja y'ana'amin nbaduujnip.

²² Kuts ø nmøøtsinaamyidi pøn ja yjanchja'win tyiktuu'døjkyidipnim, ka'ap øts ja nugo nyik'amutskidi, ni ja namyikaxi'ajtin ngayiktuñ, nayide'en ø tø nnabyikta'agyi sam ja'adi jøts øts ja jade'en nyikjotkujk'atti. Tøts idø'øn tu'uk tu'uk nja'gyuki pøni sa ja chøøniidi, jøts øts ja jade'en ndukpaattit ja Cristo.

²³ Ja'agøjxp øts jade'en nduñ ku øts ja nitsoojkin ayuujk nnigajpxwa'añ, jøts ø wyinaty nayide'en nbaaty ja kunuu'lxin ja øy'ajtin møøt ja'adi pøn jaty tjanchja'widip ya'atpi ayuujk.

²⁴ Mnija'wip meets ku jaa'y pyujtkejpxti, namay ja yjaputti tu'ugyits ja pujtkejpxpi myajada'aky jøts ja tpiky ja ñibuty. Paty idø'øn nayide'en mbuttit jøts ja øy'ajtin xpaattit.

²⁵ Pøn jaty tuki'iyi t'a'ejxigyojxp ku kyuyatwa'añ jøts kyuyatwa'añ jøts kyuyatwa'añ yixxon, ka'ats ja sa yjaty ku tyimgyuyajtni. Ja'agøjxpts ja jade'en kyuyata'akti jøts ja tøkøit ñiguyaty midu idø'øn ja kuyajtpi pyøjktip ku ja myajada'akti, jøts ka'ap ja xemikøjxp y'ity; ja xemikøjxp pikta'aky adøm ya naxwiiñ nbatnajxym midu wyinaty yikmøø'yimp xemikøjxp.

²⁶ Nnija'wip øts wa'ats midu'ampy ø nnijxpxy ka' øts nugo nbuty wimbeets kugoøts; nbaatp øts idø'øn ja' midu ø nbaatwampy, ka' øts nugo n'adi'ich. Ka' øts jade'en nugo ngojxwidity jøts øts nika' ti ndukpety.

²⁷ Jawyeen øts yikxon nnay'a'ejxyi jøts øts nne'lx ndukmiðiky pøni sa øts idø'øn ja ndsøky pøni ti øts idø'øn ndunwampy, jøts øts kidi nøjkx jawyeen tsø'ødyumbim njaty Dios wyingujkp

yam øts ja jaa'y tø ndukmadowdi sudsø'ampy ja nitsoojkin ja pa'ayo'owin ja tpaattit, jaa ku øts ne'egi nga'ukpøjknit ja niduñ.

10

Ja' yikni'ana'amp jøts ja maxandsaa uk øy ti jadu'uk awanax kyayikdiosjawit

¹ Mnijawidip migu'uktøjk idø'on ku ja møjaa'dyøjk niduki'yiyi ja Dios ja yoots tyaduu'wajidøø, jøts nayide'en niduki'yiyi ja Dios øy tyuktanajxidøø ja Tsajpts Mejy.

² Jade'en idø'on ja ndejint niduki'yiyi tpatøø ja nøbajtin jøts ja tmøø'tetti Moisés.

³ Niduki'yiyits nayide'en tjøø'kxtøø ja tsajpjotpit jii'kxy,

⁴ Jøts nayide'en niduki'yiyi t'uktøø ja tsajpjotpit nøø. Pø ja'abi nøøjxi ja y'uktip mididi jam mu'tp tsagøjxp mididi payø'oyidip. Ja Cristots idø'on ja myøk'ajtin ñanky'ejxip jam tsagøjxp.

⁵ Namayts ja'adi pøn ja Dios Teety tkamamadoodøø jøts ja jamyi abak etjotp y'oo'knidøø.

⁶ Ejxpajtin adøm idø'on ya xmøø'oyindip paty idø'on ja jade'en yjatti jøts adøm ja ka'øybi tsinaa'yin ngatsojknit sam ja ttundi.

⁷ Paty kidi meets ja maxandsaa xwindsø'jkyinididi sam ja ttundøø niwinaaggin, jøts sam idø'on ja yiknigajpxy nøkyjøtpy: "Winets ja jaa'y kaabyi ukpi y'ixakti jøts twinxødundi ja maxandsaa."

⁸ Ka'ap adøm idø'on xem yam nugo nnamyøø'tajta'ant kija' uk tu'ugyi ja amajtsk jaa'y tyik'ettit ja ñiyaa'y uk ja ñidøøxy, sam ja jaa'y tkamøjpkiktøø winaaggin ja y'amajtsk'ajtinidi, jøts ja'ayi tukxøøwyi tku'oo'kyidi ja pyøky ni'ee'pxigøøk mil.

⁹ Ka' mibaat ja Dios tyuda'aky'ajtin ndana'ejxin uk nugo nwinmaa'ñ'ejxwa'anin sam ja jaa'y winaaggin y'adøtstøø mididi ja tsaa'ñ ojts yikxon chu'tstigøyidi.

¹⁰ Jøts nisa xkatejtitt ja Dios pøni sa ja mduñidi. Ka'ap jade'en m'adøøtstit sam winaaggin y'adøtstøø ku ja tka'ødejeti ja Dios, ja' mididi ojts tyagida'agyidi ja ayo'on ku Dios ja tyumbi tkejxy mididi ja o'jkin ojts tyukpaadyidi.

¹¹ Adømgøjxp idø'on jade'en ja møjaa'dyøjk yjajttøø kyubattøø, jøts nay adømgøjxp ojts jaabyety jade'en tyañ yø n'ejxpajt'ajttint jøts jade'en ngadsinaa'yint sam ja chinaadyøø ixa ja nwindson'ajtim Jesucristo wyingoni ja tyiidyu'unin xøøw.

¹² Pøn jaty yjawi nisa kajattip, pøn dø'on yjawi øy tsinaadyip, wants ja tnay'ejx'ityidi jøts ja kyawinmaa'nmya'attit.

¹³ Nay ja ayo'on mididi ixyam mdanajxtip ku yik'ejxmatsti ja mjanchja'windi pøni mjanchpadundip idø'on uk ka', nayja'abi ayo'on idø'on øy pøn tø tpaaty tø t'ixy. Øyts meets ja Dios x'ajot'att jøts ja m'agø'dukidit m'axajtukidit jøts niyjøjxk xanaxtit ja ayo'on mididi kamidanaa'ni. Kuts wyinaty ja ayo'on tyimyjawani møk mbaadyidi, ja Diosts mmo'o'ojidip ja wyinmaa'ñ sudso ja xnimada'aktit.

¹⁴ Paty migu'uktøjk idø'on ja maxandsaa uk jadu'uk øy ti awanax xka'ukwindsø'jkiñidit, ixmatsti yø yjade'embi tsinaa'yindi.

¹⁵ Wa'atsxi xnimadowdi sa mee nnøjmi wijy kejy ti sa m'ejxidi. Køømts yikxon x'ukpayø'ødyit pøni janch kidi yjade'eni sa ø nwa'a'ñ.

¹⁶ Ku adøm ja tsapnøø kunuu'kxy n'uujkyindi ja Dios adøm idø'on jade'en nwindson'øjka'am, ja Cristo dø'on ja ñi'jpy namyayi n'uujkyindip; kuts adøm ja tsapkaaky nyikwa'kxyindi ja Cristots adøm ja ñe'kx namyayi nji'kxyindip mididi ja y'ø'y'ajtin xukpaajtimp ku ja ojts xku'o'jka'am jam kruskøjxp.

¹⁷ Øy adøm njanamaya'am tu'ugyits adøm ja tsapkaaky ndamujkyindi, patyts adøm jade'en amuum tu'ugyi n'lijtyindi Dios wyingujkp pøn jaty tjanchja'widip ja Cristo.

¹⁸ Ejxtits ja Israelit kajp ma ja jaa'y tkaydi tjøø'kxti ja windsø'jk'ii'ñi; ja'ats idø'on ja ñamyayi tu'ugyi yik'ejtidi, tu'ugyi ja tumjade'en wyinmaydi nixem niyam.

¹⁹ Ka'ap øts idø'on nmimy ku ja maxandsaa uk jadu'uk øy ti awanax yjujkyidi, jøts ka'ap ø nnømi ku ja tsu'uch jawaani øy mididi ja yiktawindsø'jkidip.

²⁰ Yide'enixi øts idø'on ja njatijy, pøn jaty ja Dios tkanija'widip jøts ja windsø'jkin ja tpiakta'akti tsamaxan uk øy ti jadu'uk awanax wyindum y'agø'øm, ja miku' dø'on ja wyindsø'jkidip jøts ka'ap ja Dios; ja'ats meets idø'on ngadamidsøjky jøts ja miku' yja' xkupøjkidit.

²¹ Ka'ap ja mbaat'atyidi jøts mee majtsk jøøjp mdsøønit yam meets ja nwindson'ajtim ñi'jpy xja'uujkiyi, jøts nayide'en x'uujkmiyidi ja miku' ñøø; yamts meets ja nwindson'ajtim ñe'kx xjøø'kxiyi jøts ja miku' yjii'kxy xjøø'kxiyidi.

²² ¿Ja ti adøm tø ndøjkiñam? ¿Nugo taguyajtpi jøts jade'en ja nwindson'ajtim nugo nyik'ambøjknit? ¿Ja tyimyabaat adøm nmø'ajtin jøts adøm ja ne'egi nyik'amutska'ant?

Ka'ap ja ngø'øm ja n'ixa'ayint, ja tsojkin ja pa'ayo'owin ne'egi ndamiyojxin ja nmigu'uk

²³ Janch ja jade'en idø'øn sam ja ayuujk wya'añ ku o tigati nduu'nint, nipøn ja xkad-abayø'øyint; øy dø'øn ja jade'en yjawa'añ, ka'ats tuki'iyi y'ødyuñ pøni ti yiktump; jabi ka'axi ja Dios yjanchja'win jade'en tuki'iyi xatøjka'ant.

²⁴ Ja nmigu'uk adøm idø'øn ja y'øy'ajtin n'ixaajya'amp jøts ka'ap ja ngø'øm ja' nugo ndunk'ajntint ja'ayi.

²⁵ O mee tigati xjøø'kxt pøni ti jaty mjuudyip maayjotp, ka' xyiknidøwidit ma ja tyikt-soondi, ku nugo mnadyagumayidit;

²⁶ jabi nwindson'ajtimxi ñaxwii'ñit yø' jøts tuki'iyi pøni ti jaty ya ejtp naxkijxy.

²⁷ Pøni mwaaajidipts ja jaa'y kaabyi pøn ja janchja'win tkamøøt'ajtp, kupøkti panøjkxti jøts kaydi jøø'kxti pøni ti myikmøødyip jøts ka'ap ja xyiktøødit pøni ti pøni pøn yiktawindsø'øgi, jøts niti xkagumayjawidit.

²⁸ Kuts jam tu'ugin ja jaa'y jotmøñ wya'ant ku ja'abi tsu'uch ja maxandsaa tø yik-tawindsø'øgi, ka'ats meets ja xjøø'kxt, jøts ja mmigu'uk xkanankñagumayiyidit ku ja nugo ñabyøkyjawiyyidit ja'agøjxp ku ja janchja'win ja okwa'añ tyiktøwdinim tyiktuda'aktinim.

²⁹ Ja mmigu'uk øts idø'øn ja wyinmaa'ñ nniagjpxip, ka' mets mja'.

Jamts pøngapøn tyiktøødit jøts wya'andit: "¿Sudsots ja wenk jaa'y nyikmøjtøjkyyit ne'egi ja wyinmaa'ñ jøts øts nja' nika'?"

³⁰ Jabi n'ajot'ajtpyxi øts ja Dios ku ngay nji'lkxy, ¿tits øts idø'øn xabagajpxtip kuts ja'abi kaaky ngupøkt'?"

³¹ Ots ja yjade'eni, pøni mgaadyip m'uktup uk pøni ti jatys mdundip, tum ja Dios køjxp ja xu'undit jøts ja jade'en xyikmøjtøkidit.

³² Kidi mee xuñ midit ja mmigu'uk tyadigø'ødyip: ni ja israelit jaa'y jade'en xkatu'undit, ni ja' pøn ka'israelit jaa'y'ajttip, ni ja' pøn ja Dios Teety tø myø'øyidi ja janchja'win jøts ja nwindson'ajtim tmibøjktit.

³³ Kuts øts, ja' ø n'ixaapy sudso øts ja nmigu'uk nyikjotkujk'att; ka' øts ngø'øm øy'ajtin n'ixa'ay, jøts øts nmigu'uk yikxon chøønidit jøts wyinaty ja nitsoojkin yikmo'odi.

11

¹ Tundi nayide'en pøni sa ø nnajtstuni, pø nay ja Cristoxi ø nni'ejuuujtip ja chinaa'y'in.

Sa yjaa'y'attit ja tø'øxyøjk ma ñamyukyidi ja janchja'wibidi

² Migu'uktøjkti njanchtakajxakpy meets ku ø xja'myatsti, jøts ku nayide'en xpadundi ti jaty tø ndukmadowdi.

³ Ja'ats ndsøjkpy jøts xja'gyukidit ku tu'uk tu'uk ja yaa'dyøjk ja Cristo ñigubajk'aty, jøts ku ja yaa'dyøjk ja ñidø'øxy tñigubajk'ajtmi jade'en sam ja Dios Teety tñigubajk'aty ja Cristo.

⁴ Pøni ka' ja yaa'dyøjk ñagyujuptu'udyi ku Dios t'ajot'aty uk kuts ja Dios yja' tjanigajpxi, kyamøjpiktakpy idø'øn ja Cristo ja' pøn nigubajk'ajtiyip.

⁵ Pøni ka'ats ja tø'øxyøjk ñagyujuuxyi ku ja Dios t'ajot'ajtpi tøkø, uk kuts ja Dios yja' tjanigajpxi, kyamøjpiktakpyts idø'øn ja ñiyaa'y ja', nayide'enxi ja tpatni kidi ja jeexyip tø ñagyukaa'ptu'udyi.

⁶ Pøni ka'ap ja tø'øxyøjk ñagyujuuxyi, wants ne'egi tñagyuka'aptutkixyi. Pøni ty-atsø'ødyumpts jade'en ja kyubajk keepy, wants ne'egi tpiktä'aky ja kyujuux.

⁷ Nagyujuptu'udip idø'øn ja yaa'dyøjk pø ja Diosxi ja myø'ajtin ja chuj'ajtin ja yiknigaxø'jkip ku ja nayide'en tø yik'øyiyi sam ja Dios t'ixy. Jøts ja tø'øxyøjk ja ñiyaa'y myø'ajtin ja yiknigaxø'jkidip.

⁸ Kuxi ja Dios tyik'øyiyii'ñ pø ja yaa'dyøjkxi ñikøjxp ja Dios tju'jty ja tø'øxyøjk.

⁹ Yaa'dyøjkøjpxi ja tø'øxyøjk y'øyiyii'ñ, jøts ka' tø'øxyøjkøjxp ja yaa'dyøjk y'øyiyii'ñ.

¹⁰ Patyts idø'øn ja tø'øxyøjk ñagyujuuxit jøts ja jade'en tyiknigaxø'økt ku ja yaa'dyøjk ja y'ane'emyi, jøts ja Dios y'ankilis nayide'en yjotkujk'attit.

¹¹ Nnija'wa'ampts adøm, ku ja janchja'win nmøøt'ajtyindi, ku ja yaa'dyøjk jøts ja tø'øxyøjk kuwani tu'ugyi y'etti.

¹² Janch tixxi dø'øn ja' ku dø'øn ja tø'øxyøjk y'øyiyii'ñ, ja yaa'dyøjkts ja Dios yiktuun, nayide'en yjanchi ku tø'øxyøjk ñikøjxp kye'exy yaa'dyøjk ya naxwiif; ja Diosts jade'en wamp.

¹³ Kø'øm mee x'uknigajpxt pøni øyide'en ku ja tø'øxyøjk ja Dios t'ajot'att kuwa'ats, jabi ka'axi ja y'øyi.

¹⁴ Tsø'ødyumbim ja yaa'dyøjk pyidsimy ku ja wyaay ja tyikyon'anaxy, ka'ap adøm jade'en ngostumbri yø'øyindi.

¹⁵ Yiktakajxakpts ja tø'øxyøjk ku ja wyaay ja yøñ, pø tøxi ja yiktanibiktaagi jøts ja wyaay ja kyubajk ttanipett.

¹⁶ Pøni pønts tkaja'gyukiwiyamp sa øts idø'øn tø njawa'añ, ñijawip idø'øn ja' ku øøts ka'ap ja wenkpi winmaa'ñ nyiktuñ jøts ni ja' jade'en kyawinmaamyidi pøn jaty ja Dios tø wyaamukyidi wyejtsmukyidi øy maðsoo, ja'agøjxp ku ja tø tjanchjawidi ja Dios.

Ku kya'ukyikmøjpiaktakni ja nwindson'ajtim kyaajyk y'uujkik mididi ja ñajstunip ku ja ya'ux'ajty

¹⁷ Ku meets yam nnijayi kidi ngajxa'akwampyip meets, ku yjawi mjanamyukyidi niwine'en ja mga'øpyidsø'ømxyiyidi jøts ni mga'ødyuñidi ja yjawi.

¹⁸ Jade'en øts ja jaa'y xundamimadya'akti kuk mee mjanamyukyidi mnawya'kxibik meets jam jøts mganamyee'kxyidi; nmibijkpy øts idø'øn, pø jade'en idø'øn jam yjanchjaty.

¹⁹ Kuwanidsik idø'øn mnawya'kxidit jøts idø'øn ñigaxø'øktit pøn idø'øn Cristo yja' yjanchpaduujnidip, jøts pøn idø'øn nugo nadyejidip jøts ku Cristo ja tpadundi.

²⁰ Kuts meets idø'øn jade'en mganamyee'kxyi, nika'ats meets ja nwindson'ajtim Jesucristo ya'ux x'ukja'gyukiniyi, ni xkanijawidi pøni sudso yiktuñ.

²¹ Anaxukpimxi meets jam kø'øm a'ux xninijky ku ja ka'ayin tpaaty, jamts muum kyaku'uxyidi jøts muum nugo tyimy'ukmuktigø'øñidi.

²² ¿Ti ka' meets mdøjk te ma' mga'adyit? Mgamo'e'ejtxipxi dø'øn ja janchja'wip jaa'dyi ku jade'en m'adø'østi, jøts namyikaxi mwinbidsø'mdi ku ja mmigu'uk pøn ayoodip jam xwingayidi, jøts ja nugo xuk'ayoojidi. ¿Sats meets idø'øn nnøjmit? ¿Ndsaaçkajxa'akp meets idø'øn ku jade'en m'adø'øtsti? ¡Ni juuni xøøw meets ya'atpi ngadakajxa'akt!

Ku ja nwindson'ajtim yjaak'uk'a'ux'ajtni møøt ja pyabøjkpitøjk

²³ Pø ja nwindson'ajtimxi ø kø'øpy mididi mee tø ndukyikyujy. Ku dø'øn ja nwindson'ajtim Jesús wyinaty yikøyakwani ux, nay ja'abi uxts idø'øn ja tñixajiyi'ñ tu'uk ja tsapkaaky,

²⁴ kuts ja Dios Teety t'ajot'ajty jøts tkajxajky, winets ja t'adujkpaiky ja tsapkaaky jøts wyaañ yide'en: "Kaydi, øts idø'øn ya'at nne'kx mididi meets mñitsoojkingøjxp inet yikøyakp. Mdu'undip idø'øn ya'at jade'en jøts øts xja'myajtspaj'tattit."

²⁵ Kuts idø'øn ja wyinaty tø ya'ux'atti ixjats ja uujk'i'ñ tu'uk tñixajiyi'ñ jøts yide'en wyaañ: "Ya'at tsapnø'uujkin idø'øn ixyam tamp ejxpajt ku ja Dios Teety ja wyanda'aky tyik'aduky sam ja tñami'awa'aniyi'ñ ja naxwii'ñit jaa'y ja nitso'ok'ajtim. Ixyamts idø'øn ja cho'onda'aky ku øts nni'jpy inet wyidsu'unt wyidaxt. Kuts ya'at tsapnø'uujkin xumitu'undit, øts nja'myajtsingøjxp yø x'adunidit."

²⁶ Jade'ents migu'uktøjk idø'øn, ja nwindson'ajtim mee mja'myejchp ku meets ja tø mgu'oogiyi ku jade'en ja tsapkaaky xka'adyit mididi namyayi ñe'kx'ajtpy, jøts ku ja tsapnøø jade'en x'ukunaxit mididi ja namyayi ñi'jpy'ajtpy kunim ja mye'ent jadigojk.

Sudso ja nwindson'ajtim kyaajyk y'uujkik yikupøkt mididi ja ñajstunip ku ja ya'ux'ajty

²⁷ Ja nwindson'ajtim Jesucristo yjamidundigø'øpy pøn idø'øn yikxon tkajøø'kxp tka'uukp ja nwindson'ajtim ñe'kx jøts ja ñi'jpy.

²⁸ Patyts idø'øn yikxon jawyeen xpawinma'adyit sa ja mdsinaa'yin xyikyø'ødyi, namga'anin wyinajty xni'awidi ja nwindson'ajtim ñe'kx jøts ja ñi'jpy.

²⁹ Ja kyø'øm ayo'onxi ja y'ixaapy pøn nugo tni'a'wip ja nwindson'ajtim chapnøø'uujkin.

³⁰ Ja'agøjpxi dø'øn may ja mmigu'uk pa'amøøtti jøts kajotmøjkti, jøts muum tø y'ookti.

³¹ Kuts adøm kø'øm a'ejxi ndu'unint, ka'ats ja nwindson'ajtim jade'en xiidyu'unint.

³² Kuts adøm ja nwindson'ajtim xiidyu'uñim ja'agøjxp ja tñuñ jøts ja xukja'gyukant jøts ngamøøtkudigø'øyindit ja pojkpitumbi jaa'dyi mididi tkajanchja'widip ja Dios.

³³ Paty migu'uktøjk idø'øn, ku mnamyukidit jøts ja nwindson'ajtim ja chapnøø'uujkin x'atsja'myatsidit, nay'awexidit jøts tu'ugyi mdsapnøø'uuktit.

³⁴ Pøni jam pøn yu'øoky, wan jamyi ne'egi kyø'øm tøjkot t'ukay, jøts ja Dios wyinaty kyadukuwanjatiyi ku ja tsapnøø'uujkin ja nugo tyikwa'ant nanktyamu'ugi nanktyaku'uxi. Mididi'ibi jaty myiktødip jaanin øts ja wyinaty nnigajpxy ku mee n'ats'ext.

12

Ja wijy'ajtin mididi ja Dios Espiritu Santo yajkpy

¹ Migu'uktøjkti, jaa ja ayuujk mididi ø ndsøjkpy jøts meets ja xnijawit ku Dios Espiritu Santo tyaky ja winmaa'ñ ja wijy'atin jøts ja tmø'øy ja jaa'y kija'.

² Mñija'wip mee ne'egi wa'ats ku mee wyinaty xkamibikñim ja nwindson'ajtim Jesucristo, ja maxandsaajimts meets tu'uk tu'uk y'ijty ja'ayi mwindsø'øjkidip.

³ Paty meets yam ndukmadøy jøts xnijawidit ku pøn wya'ant: "¡Miku! yø Jesús!" kidi ja Diosip y'Espiritu Santo ja wyinaty jade'en yikwaajniyip. Uk jadu'uk pøn nugo wyamit: "¡Ja Jesús idø'øn møj windsøn!" tiyts ja wyinaty yjanchwa'añ pøni Dios y'Espiritu Santo ja wyinaty jade'en yikwaajniyip pøni ka'ats myigajpxigø'øpy Dios ja wyinaty.

⁴ Mayjөөpp idø'øn ja jaa sã pøn øy tigati tjaty, jøts kija' ja yikmøøt'aty pøni sã pønjabøn ja wijj'ajtin tø yikmø'øy, tum Espiritu Santo wyingujkpts ja chøøñ.

⁵ May tunkjøøpp yikmøøt'aty, tu'ugyits ja nwindson'ajtim Jesucristo yiktamiduñ.

⁶ Kawinaak jøøpp ja ødyunk nmøøt'ajtyindi, tu'ugyits ja Dios ja xmø'øyindi.

⁷ Ja Dios idø'øn ja ejxpajtin tu'uk tu'uk tmøøpy ja jaa'y, jøts idø'øn ja tyknigaxø'økt ku ja Dios Espiritu Santo ja tmøøt'aty, jøts ja niduki'iyi yikta'øy'att.

⁸ Dios Espiritu Santo køjxp idø'øn ja Dios Teety ja jaa'y tmø'øy ja wyijj'ajtin jøts ja ty kyajpxwejtít, jøts nayide'en ja jaa'y tmøømyi ja ixpiky'ajtin jøts ja øy yik'ixpøjktit.

⁹ Jamts ja jaa'y pøn ja Dios Espiritu Santo janch møj jøts janch møk ja janchja'win myø'øyidi, jamts pøn yikmøødyip ja øybi møk'ajtin jøts ja pamaa'y tyiktsø'øktit.

¹⁰ Jam pøngapøn tmø'øy jøts ijxyimbi ka'ijxyimbi ja ttu'unt, jøts jam pøn myøøpy jøts ja Dios kyajpxy Dios y'ayuujk ja tñigajpxidit; jamts ja' pøn ja Dios tø tyamidsøjkyidi jøts ja t'ejxkaptit pøn jaty ja ka'øybi winmaa'ñ tyiktundip jøts pøn ja øybi winmaa'ñ tmøøt'ajttip; jamts nayide'en pøn tø yiktamidsøkti jøts kawinaak ja ayuujk tkajpxtit midt ja myigu'uk kyakajpxtit; jamts ja'adi pøn tñimadoodip wa'ats ja ja'abi ayuujk jøts ja tñigajpxti ti dø'øn ja tyijpy.

¹¹ Tu'ugyits idø'øn jade'en y'adi'ich ja Dios Espiritu Santo, jøts idø'øn ja tyikwa'kxy ja wijj'ajtin pøni ti dø'øn ja pønjabøn tyukjatwampy kø'øm ja tø ttanibiktaagi.

Ja nwindson'ajtim tñigubajk'ajtp niduki'iyi ja jaa'y pøn tjanchja'widip ja Dios

¹² Jade'en idø'øn ja Cristo n'ukpiktaajkint sam tu'uk jaa'y ñe'kx midt janch may tanibiktaagi tum tøgach; øts idø'øn ja kø' ja teky kija' ja tunk tø yiktanibiktaagi, tu'ugy ja ñe'kx ja y'ity.

¹³ Nayide'ents adøm idø'øn øy yjapøni, yja'israelit jaa'yi uk yjaga'israelit jaa'yi, yjagreciit jaa'yi, yjamidumbi jaa'yi uk yjanitøøky jaa'yi, ku adøm idø'øn tø nnøbejtyim tu'ugy adøm idø'øn ja ne'kx namyayi nyik'øya'am Dios Espiritu Santo køjxp; jøts adøm jade'en ja tu'uk tu'uk tø xatøjka'am.

¹⁴ Ka'ap ja ne'kx tukjøøppyi tmøøt'aty midt jaty ja yiktumpy, pø may jøøpxi ja tmøøt'aty. Jade'ents ja y'amuum'aty ku ja ka'pxy tmøøt'aty ijxyim ka'ijxyim.

¹⁵ Øy yø teky yjawa'añ: "Ka'ap ø nduñ nayide'en sam ja kø' paty ø nipøn xkatunk'att", kidi ja'agøjxpts ja kya'ukpaat'ajtniyit ja ne'kx.

¹⁶ Uk y'ukwamit inet ja tatsk: "Ka'ap øts ja ween tyunk ndujni paty ø nipøn xkatunk'att", nigidi ja'agøjxpipts ja ne'kx ja myajtstuuujtniyit.

¹⁷ Ku jeexyip tum ween nne'kx'ajtyim, ¿sudsøts jeexyip nmadø'øym? Uk kuts jeexyip tum tatsk nne'kx'ajtyim, ¿sudsøts jeexyip nxuu'ka'am?

¹⁸ Tø dø'øn ja Dios ttanibiktaajkigyijxy ti jaty jadu'uk jadu'uk ja ne'kx tyu'undip sam ja kø'øm tø tstsøky.

¹⁹ Ku jeexyip tukjøøppyi y'amuum'aty, ¿mats jeexyip ja maybi tyøkidi midt tyika'pxtip tuk'amuum ja ne'kx?

²⁰ Jabi nnija'wimpts adøm ku mayjøøpp chøkyi winets njaa'gyaxø'jkindit, pø tu'ugyixi ja ne'kx.

²¹ Ka'axi dø'øn ja ween tñøjmit ja kø': "Ka' me nyiktunwa'añ"; ni ja kubajk tkanimaamyit ja teky: "Ka' me n'ajot'aty."

²² Jøts midt idø'øn yjawi ka'a'ejxin kaxø'kp ja' idø'øn ne'egi yikxon yik'ajot'ajtp, ja idø'øn xyikjujky'ajtindip.

²³ Jøts midits yjawi kayiktsojpk ja'ats ne'egi n'ejx'ijtyindip jøts ja nnixøjxyim nnipijkyim; midits adøm ngananky'ejxwa'añimp ja'ats adøm janch'amaay ndø'øñim nyu'uchimp.

²⁴ Jade'en idø'øn ja Dios tø xanibiktaajka'am jøts adøm ja ne'egi nmijotigø'øymint midt yik'ejxp ka' tyuñ,

²⁵ jøts kidi ki'abikyip nugo øy pøn tyuñ øy sã, pø nabyudøjkiyidipxi dø'øn ja'adi nixem niyam wan ja sã t'ijxyidi, jøts ja amuum tyikjujky'ettit tuki'iyi ja ne'kx.

²⁶ Pøni tsaachip o magama tukween ja ne'kx, amuums ja pøjkpi ambi yikja'wigyixy øy madsø; kuts øy madsø tukween yikxon yik'ejxy'ejtni kunim ja yikxon chø'øky, tyimñejkpts nayide'en tuki'iyi øy madsø ja ne'kx.

²⁷ Meetsts idø'øn ñamyayi ja Cristo mne'kx'ajttip jøts jade'en meets ja mbikta'agyi sam ja kø' teky, ween aaw tyuñ, uk jadu'uk øy ti midt møøt kya'pxy ja ne'kx.

²⁸ Tøts idø'øn ja Dios Teety ttanibiktaagi ti tyu'undip nidu'uk jaty ja jaa'y pøn ja Dios tmibøjktip: midu'uk, ja nwindson'ajtim kyudanaabyitøjkti; mimajtsk, pøn tñigajpxidip ja Dios kyajpxy ja Dios y'ayuujk; midigøøk, pøn yik'ixpøjktip pøn kajpxwejtít; jøts nayide'en pøn ijxyimbi ka'ijxyimbi ttundip, møøt nayide'en pøn ja pamaa'y tyiktsøktip tyikmøpxøjktip, møøt ja pudøjikibitøjkti, jøts nayide'en ja ana'ambitøjkti, møøt ja'adi pøn tkajpxtip ja wenk aaw ja wenk ayuujk pøni sã Dios ja kø'øm yikajpxwa'añidi.

²⁹ ¿Pønts idø'øn janchja'wibi'ajttip? ¿Niduki'iyyi ja nwindson'ajtim tkudanidi? ¿Tum ja' tniagjpxidip ja Dios kyajpxy y'ayuujk? ¿Tum ja' yik'ixpøjktip? ¿Uk tyumdundip idø'øn ja ijxyimbi ka'ijxyimbi? Ka' yjade'eni.

³⁰ ¿Tyumøøt'ajttip idø'øn ja møk'ajtin jøts ja pamaa'y tyiktso'oktit? ¿Uk kyajpxtip idø'øn niduki'iyyi kawinaak ja kanimadooni ayuujk? ¿Uk ñimadoogøxtip idø'øn pøni sa dø'øn ja wenk ayuujk wya'añ? Pø ka'axi.

³¹ Tajotigøyts sudso xpaattit yø'øbi øy'ajtin sudso ja Dios mgunuu'kxidit jøts myikwejidit myikajidit. Ixyamts mee nduknijawiwya'añ ja jawaani øybi tuu' sa øy tsuj njaa'y'ajtindit.

13

Ja tsojkin ja pa'ayo'owin

¹ Ku njakajpxt kawinaak ja wenk aaw kawinaak ja wenk ayuujk øy yjatsajpjotpit ayuujki uk øyts yjanaxwii'ñit ayuujki, pøni ka'ats øts ja tsojkin pøni ka'ats øts ja pa'ayo'owin nmøøt'aty, nayide'ents ja tpatni sam tu'uk ja tambur tawa'ats mido nugo jagojpk, uk sam ja platiy mido nugo na'amp.

² Øy øts jeexyip ja Dios kyajpxy ja Dios y'ayuujk tuki'iyyi njanigajpxi, uk njanija'wigyixyts øts tuki'iyyi ti jaty memp ti jaty kidakp mido ka' pøn t'ijxñim mido ka' pøn tnijawinim, uk njamøøt'atys øts tuki'iyyi ja ixpiky'ajtin ja wijy'ajtin, uk nja'ajot'atys øts ja Dios kawine'en ku øts ja ijxyimbi ka'ijxyimbi njatuñ jøts øts ja kojpk ngiidyigach, pøni ka'ats øts ja tsojkin pøni ka'ats øts ja pa'ayo'owin nmøøt'aty nitits øts mibaat ngawa'añ, tyimñugo øts iiy.

³ Uk njadagumaagyijxpyts øts ja ayooobi jaa'y tuki'iyyi ja nbikta'aky, uk njanagyøyakyts øts jøts øts ja jaa'y xyiknitø'øty Dios køjxp, niwine'enin øts ja ngadamajada'akt, pøni ka'ap øts ja tsojkin, pøni ka'ap øts ja pa'ayo'owin nmøøt'aty.

⁴ Pøn tsojpk pøn pa'ayo'ow, tuda'aky ja yjaa'y'aty; jøts øy jaa'y ja', ka'ap myigu'uk ja øy ti tami'ekyi uk niti tkamo'owa'añ; jøts ka'ap ja ñamyikexyi, ni kyanadya'agajpxiyi ja' pøni ti ja tyumpy.

⁵ Ka'ap ja ka'ø'y'ayuujk ja ka'øwycinmaa'ñ uk ja ka'øchinaa'yin ja ttunk'aty; jøts nika' ñadyamidsojkiixyi tuki'iyyi yam ja myigu'uk y'ayøw wyinmay; ka'ap ja tuki'iyyi tta'ambiky jøts nika'ap ja ejtp y'ekyi.

⁶ Ja y'øchinaa'yin ja myigu'uk ja tyadaxondakpy, kidi kya'øchinaa'yin ja ojts ttadaxonda'aky.

⁷ Pøn tmidanaapy tuki'iyyi pøni sa yiktuñ jøts pøni sa yiknøjmi, jøts jyøp'ijxpy ja' ku kuwani ja tsojkin ja pa'ayo'owin myøjtøki, jøts ka'ap ja tigati tta'amutski, ejtp ja tyuda'aky'ajtin ja ttamajada'aky.

⁸ Nijuuni ja tsojkin ja pa'ayo'owin kyagudigøw. Ja'tp ja et ja xøøw ku wyinaty ja kajpxy ja ayuujk kya'ukyiknigajpxnit mido ja Dios yajkpy, jøts wyinaty nayide'en kawinaak ja wenk aaw ja wenk ayuujk kya'ukyikajpxni, jøts wyinaty ja ixpiky'ajtin kya'uktuni.

⁹ Ka'ap adøm tuki'iyyi ka'pxy nnija'wa'am, jøts nika' ka'pxy yiknigajpxy ja Dios chojkin ja Dios pya'ayo'owin mido adøm ja xjadukmado'owimp.

¹⁰ Kudig'øpyts ya'atpi nija'win ku wyinaty tuki'iyyi n'ijxyim nnija'wa'am pøni sa dø'øn tyiyyi kya'pxyi tuki'iyyi.

¹¹ Kuts y'ijty nmutsk'aty, mutsku'ngin øts y'ijty ngajpxy nmadya'aky, mutsku'ngin øts y'ijty nwinmay, jøts mutsku'ngin øts y'ijty nayide'en nja'gyuki. Kuts ø nyaa'knaa n'ixmatskøjxni øts ja mutsk'ajtin.

¹² Nayide'ents adøm ka' ka'pxy ja Dios yja' nnija'wa'am, winjo'ximp adøm yjawi ku ja nja'ejxpaatwa'añim; jaanin idø'øn ja wyinaty øy wa'ats n'ijxyim. Ka'ap øts ixyam tuki'iyyi nnijawi, jaanin øts ja nøjkw wa'ats yikxon nnijawinim tuki'iyyi sam øts ja Dios ixyam wa'ats x'ixy wa'ats xnijawa'an.

¹³ Jade'ents idø'øn ku n'ajot'ajtin ja Dios, ku njøp'ejxin ja nitso'ok'ajtin, uk ku nmøøt'ajtin ja tsojkin ja pa'ayo'owin, nimidi mibaat kyagudigøw, ettip yø xemikøjxp; tigajstipts idø'øn nidu'ukjaty, yø tsojkin yø pa'ayo'owin yø ne'egi tyimyjawaani møj, nigidi yø yjadu'ukpi jade'en myajada'akti.

14

Ja kawinaak ayuujk kanimadooni

¹ Kajaats idø'øn xmøøt'attit ja tsojkin ja pa'ayo'owin, amidowdi pøktsowdi jøts ja Dios myikwejidit myikajidit, ja'ats jawaani m'amido'odip sudso ja Dios kyajpxy y'ayuujk xniagjpxidit.

² Pø ja Diosxi ja ja'ayi myigajpxpy pøn ja wenk aaw wenk ayuujk tkajpxp, ka'axi ja myigu'uk ja ñimadøyi. Ja Dios Espiritu Santo ja jayik'awejmijip, ka'apts ja yiknimadøw ti ja kyajpxpy, jøts ti ja jade'en tyijpy.

³ Abikyts ja'amidi pøn ja Dios kyajpxy pøn ja Dios y'ayuujk tu'ugyi tyimdyunk'ajtmiyidip jøts ja ttukmadowdi ja ja'a'y pøn tpabøjktip ja Dios jøts ja yjanchja'win ja myøktā'aktit ku ja yikajpxjot'amøjkidi.

⁴ Nadyu'uk ja yjanchja'win ja tyikmøji tyikaja'aji pøn ja myigu'uk kanimadoojip ku ja tjakajpxy ja wenk aaw wenk ayuujk; pønts tnigajpxidip ja Dios kyajpxy ja Dios y'ayuujk jøts ja ttukmadowdi ja ja'a'y pøn tpabøjktip ja Dios jøts ja jade'en tyikmøjiyidi tyikajaajiyidi ja yjanchja'windi.

⁵ Njadamidsøjkpy meets jøts kawinaak ja wenk aaw wenk ayuujk xkajpxtit; jawaani kajaats mee ndamidsøky jøts ja Dios kyajpxy y'ayuujk xnigajpxtit, ja'axi ne'egi jawaani møj tump; ja tump jeexyip nayide'en pøni yiknimadoop jeexyip pøni ti dø'øn yikajpxp yiknimadyakp wenk aaw wenk ayuujk, jøts ku jeexyip yikxon yiknigajpxy tu'uk tu'uk ti jade'en tyijpy, winetimts ja tiy myøjiyidit mya'ayxyidit ja yjanchja'win pøn jaty tpabøjktip ja Dios.

⁶ Pøni n'ats'ijxpy meets jøts meets ja wenk aaw wenk ayuujk ndamigajpxt, ka' meets ti pudøjkin jade'en nmo'ot. Kuts øts ja nnigajpxt midit ja Dios xuknija'wa'amp, uk ja' midit tiy midit øy, uk ja Dios kyajpxy y'ayuujk mee ndukmadøpy jøts nda'awa'andit, ja'ats idø'øn ti mjanchpudøkiyidip.

⁷ Wan ja ejxpajt t'ukpiktaajkyim. M'ijxy'ajttipxi xuujx sam ja kapxyuujx uk ja kow; pøni ka'ap nyiksuunipaajtyim, sudsots ja'a'y ja tja'gyukit pøni ti yikoop, pøni ti yikxuxp.

⁸ Kuts ja ja'a'y cheptumidi ku ja puxuujx wa'ats kyawinaa'ñ, ka'ats ja tsep pøn t'a'ejxi.

⁹ Nayide'ents meets idø'øn mjaty; pøni ka' meets ja ayuujk xkajpxy midit yiknimadoop, ¿suds dø'øn yiknijaawit pøni ti dø'øn mgajpxtip? ja poj mee nugo mmigajpxpy!

¹⁰ Janch jaa dø'øn may ya naxwiiñ ja ayuujk tigach, jøts tyunnimadoodip ja' pøn ja'abi ayuujk tkajpxtip.

¹¹ Pøni ka'ats ø nnimadøpy ja ja'a'y pøn ja wenk ayuujk tkajpxp, wenk kugajp ja'a'yts øts ja xejt, jøts nayide'en øts ja ndejmit.

¹² Pøni mjanchtajotigøødyip idø'øn jøts ja kunuu'kxweyjin jøts ja kunuu'kxkyajin xpaattit x'ejxtit, ja' dø'øn mmijotigøødyip midit mdabudøkidip ja mmigu'uk jøts ja yjanchja'win ja myøjidit kyajaajidit.

¹³ Paty idø'øn ja ja'a'y t'amido'ot ja Dios jøts yikwejit yikajit sudso ttuknimado'ot ja ja'a'y pøni ti dø'øn ja kanimadooni ayuujk tyijpy.

¹⁴ Kuts ja wenk ayuujk njadakajpxa'akt, ka'ap øts ja nnimadøpy pøni ti ngajpxpy øy øts ja ngajpxaajkin yjatiyi.

¹⁵ ¿Tiits øts idø'øn njaaktu'ump? Njayiktuñ øts ja wenk aaw ja wenk ayuujk ku ø n'ajot'att uk ku øts nwin'øø't ja Dios, ja' ja'ayi tsojkip jøts ku øts nmøø'tatt ja ja'gyukin ja madogukin.

¹⁶ Sudso meets ja mmigu'uk mnimadowiyit pøn ja wenk ayuujk tkajajttip pøni wenk ayuujk tam meets ja Dios mda'ajot'ajtpy. Kuts ja ka'ap tnimadowdi sa jaty mee mwā'añ øy meets ja amuki møøt xja'ajot'aty ja Dios, ka'ats ja tja'gyukidi sa meets ja Dios xnøjmi.

¹⁷ Øy meets ja mdsapajpxy mabaat yja'øyi, kuts ja ka' yiknimadøpy jade'ents ja tpaaty ku meets ka' ti pudøjkin xmø'øyi ja mmigu'uk pøn tkanimadoodip ja'abi ayuujk, jøts ja jade'eñi y'etti, ka'ap ja yjanchja'win myøwenidi kyajaajidi.

¹⁸ Ngajxajkpy øts ja Dios ku øts ja kawinaak xukajpxy ja wenk aaw wenk ayuujk midit mee ka' xkajpxy.

¹⁹ Kuts ø ngajpxy jøts ø n'awa'añ ja ja'a'y pøn jaty Dios tja'myajtstip, magoxk aaw øts ja'ayi ne'egi ngajpxy ja ayuujk midit yiknimadoop jøts ka' kawinaak mil ja ayuujk midit kyayiknimadoop.

²⁰ Migu'uktøjkti, ku ja ka'øybi ku ja pøky xpaattit, jade'en mnabyikta'agidit kidi mutskuna'jk ti kyamayidinim. Kuts mwīnma'adyit, jade'en mwīnma'adyit sam mōjaa'dyøjk yikxon wyinmaadya'an.

²¹ Yide'en jap wya'añ nøky ja kutujk: "Wenk aaw wenk ayuujk øts nyiktunkpaatp ku øts ja naxwii'ñit ja'a'y øy madsøo nmigajpxt, uk ndanigaxtit øts ja' ja wenk ja'a'y midit wenk puuj wenk kajp tso'ondip jøts øts ngajpxy jøts øts n'ayuujk ja xyiknaxidit, nijade'ents øts ja naxwii'ñit ja'a'y nøjkk xkamibøkti, jade'en wya'añ ja nwindson'ajtim."

²² Ejxpajtxi dø'øn jayikmøødyip pøn jaty tkamibøjktip ja Dios ku dø'øn ja wenk aaw wenk ayuujk xkajpxti jøts ja Dios ja tmibøjktit, kidi ja'ajip ja jade'en kyujajttip pøn tø tmibøjknidi ja Dios. Abiky yja' ja'amidi ku Dios nayide'en myø'øyidi ja ejxpajt ku ja yikxon tyukjatyidi sudso ja tnigajpxidit ja kyajpxy ja y'ayuujk, kidi ja'ajipts ja jade'en tyanibiktaajkip pøn tkamibøjktip ja Dios.

²³ Kuts mee niduki'iyi mnamyukit jøts mjamadya'aktit jøts tum tigach ja m'aaw m'ayuujkti, jøts nipøn kyanañimadowidit, kuts ja ja'a'y pøn ja Dios tkanija'widipnim jam tyøkidit mā mee mnamyukyidi jøts ja niti nayide'en tkanimadoodimidit, ¿ka' meets idø'øn ja mo'tpi ja'a'y mdejit?

²⁴ Pøni mgubajtiyipts meets ja jaa'y jøts ja tmadøy ku meets ja Dios kyajpxy y'ayuuik xnimadyaajki, pyawinmagyøjxpts ja chinaa'yin ja' jøts pyøky ja tjawit ku ja tmodo'ot jøts kudam ja yikpøky'ixy.

²⁵ Jade'ents ja Dios ja tjanchjawit jøts ja tyiknigaxø'køxt pøni sa jaty ja tø chøøni, jøts ja Dios tmøjpiqtä'akt kuxani, jøts meets ja mnø'ømxit jøts ku meets ja Dios jam xmøøtsøøni.

Tundi tuki'iyi tsuj, jøts tum tanibiktaagi sam pyaat'aty

²⁶ Yide'en me migu'uktøjk idø'øn yjawi xuñ ku mnamyukyidi. Jam niwinaagin pøn ttunk'ajttip ja øøk, jøts niwinaagin y'awa'andi, uk ja'ats ja ñigajpxtip pøni sa ja Dios kyajpxy y'ayuuik wya'añ; jamts niwinaagin kya'amaamyidi, wenk aaw wenk ayuuik ja yiktundip, jamts pøn tkajpxnaxtip ja wenk aaw ja wenk ayuuik. Øy'ajtp ku jade'en xundi, nugo ku xja'myatsti jøts ku nayide'en ja mjanchja'win xyikmøjidit.

²⁷ Ku ja wenk aaw wenk ayuuik xkajpxtit midu kanimadooni, namajtsk nidigøøk ja'ayi mgajpxtit jøts nidu'ukjaty; jøts kuwani tu'uk tkajpxnaxt ja ayuuik.

²⁸ Pøni ka'ats jam pøn, pøn ja ayuuik tkajpxnaxp, ka'ats ne'egi ja wenk aaw wenk ayuuik xkajpxtit, kinadyu'uk ne'egi ja Dios xmøøtmadya'aktit.

²⁹ Nayide'ents xu'undit pøni mnigajpxwandip ja Dios kyajpxy ja Dios y'ayuuik, nayide'ents namajtsk nidigøøk ja'ayi mgajpxkojtit, jøts nayide'en nidu'ukjaty, pønsts kakajpxtip wants ja ja'ayi tpatmadowdi jøts t'ejxti pøni tøøp uk ka' tyiy.

³⁰ Pøni wyinmaa'nmyøøpyts ja Dios tu'uk ja jaa'y midu jam patmadoop, wants ja tkajpxmi jøts ja y'amo'ont pøn ukajpxp.

³¹ Jade'ents mee mgajpxt niduki'iyi pøni winmaa'nmyøøjyidip ja Dios, jøts jade'en xem yam mnanky'ixpøkidit jøts mnagyajpxjot'amøkiyidit.

³² Tuda'aky idø'øn, tsuj idø'øn ja kyajpxtip pøn ja Dios kyajpxy y'ayuuik tñigajpxidip,

³³ jabi ja øy'ajtinxi ja jøtkuj'ajtinxi ja Dios chøøjkpy, ka'ap ja tsep, ka'ap ja nugo o pøngapøn ttatøkit ja madyaajkin.

Nayide'en meets idø'øn xu'unt sam niduki'iyi ma jaty ñamyukyidi ja janchja'wibi jaa'dyi midu adøm nmigu'uk'ajtyindip.

³⁴ Ka'ap idø'øn ja tøøxyøjk xyikajpxtit ku mnamyukidit, pø ka'axi jade'en kyutukyi. Mbadu'undip idø'øn ja kuwani sa ja Dios kyutujk wya'añ.

³⁵ Pøni yiktøowandip tigati, jam tyøjkjotp tyiktø'ødit ja ñiyaa'y; ka'axi y'øgyaxi'iky ku tøøxyøjk kyajpxy ma mnamyukyidi ku Dios x'ajot'atti.

³⁶ Ja'myatsti migu'uktøjk ku meets jawyeen ka' y'ijty xnijawi ja Dios kyajpxy, jøts ku mee ka' nadyu'ugyi xnijawi ya'atpi ayuuik.

³⁷ Pøni jam tu'ugin tjawi ku tñijawi sudso ja Dios kyajpxy y'ayuuik tñigajpxit, uk tø tjawi ku ja Dios Espiritu Santo tø wyinmaa'nmyøøyi, paa't'ajtp jøts t'aja gyukit ja'atpi ayuuik midu meets ixyam ndanigyejxpy jøts ku nwindson'ajtim yø tkutujki.

³⁸ Pøni ka'ats ja tkutujk'aw, ka'ats ja nayide'en ja ejxkajpin pyaat'aty.

³⁹ Jade'en migu'uktøjk, jotmay'atti sudso ja Dios kyajpxy y'ayuuik xnigajpxidit, jøts kidi xpayø'ødyi pøni kyajpxtip ja jaa'y ja kanimadooni ayuuik;

⁴⁰ tum øy tsujts idø'øn ja xu'undit, ka'ap anaxukpim.

15

Ku ja Cristo yjujkyijky jadigojk

¹ Ja' migu'uktøjk ixyam ndukja'myatswandip midu tø njanigajpxmi, ja Dios ñitsoojkin ayuuik. Ya'at kajpxy ya'at ayuuik meets idø'øn tø xkupiky, jøts nay yø' meets idø'øn ixyam mdsinaa'yin'ajtpy.

² Ja'agøjxpx meets idø'øn nayide'en ja Dios myiknits'øgyidi, pøni mbadundip idø'øn midu tø ndukmadowdi, jøts pøni tu'ugyi dø'øn ja mjanchja'win xyikyø'ødyi.

³ Ja' meets idø'øn tø ndukmadøy midu ø nayide'en tø nyiktukmadøy. Tø mee nda'awa'añ ku adøm ja Cristo tø xku'o'jka'am, ku adøm nbojkipitumbijaa'y'ajtyindi sam jap nøkyijxpy yjaabyetyi jøts jade'en ja wya'añ;

⁴ jøts nayide'en tø ndukmadowdi ja tyikjutøjkidi, jøts ku ja kyimidigøøk xøøw yjujkyijky sam nayide'en ja nøky tñigajpxmi;

⁵ jøts ku ja ojts jadigojk ñanky'ixxyiyi yam ja tø yja'oo'kni jam Pedro wyindum, ja' ja ojts t'ixy jøts jadigojkøjmyi ma ja kyudanaabytøjk jam wyinatyi.

⁶ Jøts nimagoxk magø'pñixaxy ojts y'ejxmiyi ja janchja'wibi jaa'y tuktoñi, may nay jaa yjujky'attinim winaa'in tø y'ooknidi.

⁷ Jøts ojts y'ejxmiyi ja Jacobo midu Santiago yiktejp, jøtsnim niduki'iyi ja kyudanaabyi ojts y'ejxkøjxmiyi.

⁸ Jøtsnim ø tyimy'ix'oojk nayide'en tø n'ejxmi, øy øts idø'øn øy tsuj tø njagatso'onda'aky n'uktejint sam ja'adi.

⁹ Ja'agøjxpx øts idø'øn øy ngamøji ngakøjxpi, pø øtsxi dø'øn ñamyayi jawaani mutsk wimbidsømp, ka'ap øts nayide'en sam ja nwindson'ajtim kyudanaabyi, jøts ni xja-gapaat'aty øts jøts ø nwindson'ajtim kyudanaabyi nyiktejt, jabi ka'axi øts y'ijty nmaa'kxti pøn jaty tjanchja'widip ja nwindson'ajtim.

¹⁰ Tøts øts ja Dios xjanchmi'øy'aty, ja'agøjxpts øts ixyam jade'en njaa'y'aty pøni sa øts ja tø xamidsøky, tøts ja chojkin ja ngupøjki, ka'ap øts ja nugo tø xanaxy. Tø ne'egi jawaani kajaa nduñ sam ja tø tkatundi ja nmigudanaabyitøjkti; kidi øtsipts kø'øm tø ndyimyajada'aky, ja Dios øts idø'øn ja myøk'ajtin jade'en tø xuktuñ y'øy'ajtingøjxpx.

¹¹ Ka'ats ja ndunk'ajtin pøni øts jawaani tø nduñ, uk tøts ja yjadu'ukpi nwindson'ajtim kyudanaabyi jawaani tyundi; nugo ku øøts tum ja' tø nnigajpxy ja Dios y'øgyajpxy ja Dios y'øy'ayuujk midi mee tø xjanchjawi.

Ku ja oo'kpi jadigojk yjujkpyøktit

¹² Pø njanigajpxpyts øøts ku ja Cristo tø yjujkpyiky jadigojk, ¿sudsø dø'øn jam muum wya'andi ku ja oo'kpi kyajujkpyiky?

¹³ Pøni ka'ats ja oo'kpi jadigojk yjujkpyøkti, ka'ats ja Cristo nayide'en tø yjujkpyiky jadigojk;

¹⁴ Pøni ka'ats ja Cristo jadigojk tø yjujkpyiky, ka'ats øøts ja ngajpxy tyuñ midi øø ndijpy Dios kyajpxy Dios y'ayuujk, jøts ni kyatumi meets ja mjanchja'win midi mjadsinaadyip.

¹⁵ Kuts idø'øn ja wyinaty janch jade'en, Dios tvestigi ataayts øø nwimbidsømni, pø tøxi øø nnimy ku ja Dios Teety jadigojk tyikjujkpyiky ja Cristo; pøni tyits ku ja oo'kpi jadigojk kyajujkpyøkti, ka'ats ja yjanchi ku ja Dios Teety ja Cristo tø jadigojk tyikjujkpyiky.

¹⁶ Pøni ka'ap ja oo'kpi jadigojk yjujkpyøkti, ni ja Cristots kø'ømabaat jadigojk tø kyaju-jkpyiky.

¹⁷ Pøni ka'ats ja Cristo jadigojk tø yjujkpyiky, nitits meets ja mjanchja'win kyawa'añ; nayi mbøkyjotp m'ayo'onjotp mee mdsøøni.

¹⁸ Pøni jade'ents ja', tøts inet idø'øn tyimy'oo'kti pøn jaty ja Cristo tø tjanchjawiidi ku tø yjujky'atti.

¹⁹ Pøni yayi adøm njøp'ijxy'ajtyim ja Cristo ñitsoojkin jøts ja nayi yayi ndajujky'ajtin naxwiñ, ti adøm n'ayøøy, adøm ne'egi yikxon ayo'ijxyim jajtım, nigidi pøn jade'en ku adøm jade'en n'adøjtsin.

²⁰ Ka'ats ja yjade'eni, tø dø'øn ja Cristo tyimyjanch jadigojk yjujkpyiky; ja' idø'øn kø'øm midu'uk tø ttunjøpi, jøts idø'øn wyinaty nayide'en yjujkpyøkti ja abiky oo'kpidi.

²¹ Pø tu'ukxi ojts ja jaa'y ja o'jkin tyiktso'onda'aky ya naxwiñ, nayi tu'uks ja' pøn ojts tyiktso'onda'kmi jøts ja oo'kpi jadigojk yjujkpyøkt.

²² Jade'en sam niduki'i'yi ja o'jkin yikpaaty Adán pyøkyøjpx, nayide'ents wyinaty niduki'i'yi ja jujky'ajtin xemikøjpx yikmo'odi pøn ja Cristo tjanchja'widip.

²³ Tanibiktaagits idø'øn ja wyinaty ja xemikøjxpit tsinaa'yin nyikmø'øyindi. Ja Cristo jawyeen pø ja'axi jawyeen tø yjujkpyiky; kuts ja Cristo mye'entnim jaanımts wyinaty yikmo'odi ja tsinaa'yin xemikøjpx pøn jaty ja tø yjanchjawi.

²⁴ Jats idø'øn wyinaty tuki'i'yi kyixy, ku ja Cristo wyinaty tyikudigøøgyixy niduki'i'yi pøn jaty jaa windsøn'ajttip naxwiñ, jøts pøn wyinaty yikutujktip, ana'amdip, pøn tmidsep'ajttip ja Dios; jøts idø'øn ja Cristo wyinaty ja Dios Teety ttigidøjkigyixy tuki'i'yi wine'enin ja tja'aty.

²⁵ Pø jaanımts idø'øn ja Cristo wyinaty kuwani yikutuky kunim ja myidsep tteky'yan'ajtkøxt, ku ja Dios Teety ja jade'en wyinaty tø tyamidsøkyi jøts ja myidsep ja tmimajada'akt,

²⁶ jøts ix'oojknim ja o'jkin ja Cristo t'ukmimajada'knit ku ja jujkpyøjkin tyiknaxkida'akt.

²⁷ Pø tøxi ja Dios Teety ttsøky jøts ja Cristo tuki'i'yi tyikutukt. Kuts idø'øn ja nøky jade'en yjawa'añ, ka'ap idø'øn ja Dios Teety tyagida'agiyi jøts ja Cristo ja yikutukiyit, pø ja'axi tø ttsøky jøts ja Cristo tuki'i'yi tyikutukt.

²⁸ Kuts idø'øn ja Cristo wyinaty tuki'i'yi tø tmimajada'kixy, winets ja wyinaty ja Dios Teety kyutujk tkupøjkti, pø ja kuxi ja Dios U'ngi. Jøts idø'øn jade'en ja Dios Teety myøjukutujk o madsoo wyingaxø'økt pøn ja Dios U'nk tø ttamidsøky jøts ja myidsep ja niduki'i'yi tmimajada'akt.

²⁹ Jam yjawi pøngapøn ja oo'kpi tkunøbatti. ¿Tigøjxpts ku jade'en m'adø'øtsti? Pø nømdipxi ku ja oo'kpi kyajujkpyøktit jadigojk, ¿sudsøts ja xkunøbati?

³⁰ ¿Ti øøts jeexyip ndamidanaapy ja ayo'on ku øøts njemjaty ndejaty, pøni ka'adam ja yjanchi ku jadigojk njukpyøjkint?

³¹ Janch ø migu'uktøjk idø'øn nwa'añ, wingon øts ja o'jkin jabom jabom n'ixy; ka'ats øts ja nwandijy, ja'ayi øts nugo ndyimdyajotkuj'ajtpy ku meets ja nwindson'ajtim Jesucristo tø xjanchjawi.

³² Pøni kajpxwamp øts, nø'ømp øts inet ku øts ja jaa'y jawaani xkayikpa'ookti jam Efeso. Tøts øts ja nmimajada'akti, ztiits øts idø'øn jade'en nbijky? Pøni janch tiy idø'øn ku ja oo'kpi jadigojk kyajujkpyøkti, jade'ents ne'egi ndu'unindit sam wya'andi: "Wants yixxon tjaaktyimkyaa'yindi tjaaktyimy'uujkyindi ixyam jabi o'jkindipts jabom."

³³ Nay'ejx'etidim jøts mgayikwin'øøndit. Sam ja kajpxy wya'afi: "Ja kø'øm ka'ømyigu'uk idø'øn kayu'lxtip pøn tyikma'ttip ja myigu'uk chinaa'yindi."

³⁴ Yiktso'onda'akti jadigojk tiy tsuj ja mdsinaa'yindi, kidi pøky x'uktunk'ajtnidi, pø ka'axi xumnijawidi ja Dios. Paty øts yide'en nwa'añ jøts xtsø'ødyunjawidit ja mga'øwynmaa'ñ.

Så dø'øn ja oo'kpi jadigojk yjujkpyøktit

³⁵ Jamts inet muum ma tyiktø'ødit: "zSudso dø'øn jadigojk ja oo'kpi yjujkpyøktit? zSå dø'øn ja ne'kx wyinaty t'ixy?"

³⁶ Xøjknat! zKu me tigati x'ukni'tipy, nay ja tømt idø'øn pidsømp ku ja myuxy? Kuwanixi ja kyudigøy jøts ja ujts myuxy.

³⁷ Ka'axi ja tømt pajk tyimñayide'en t'ixy sam ja ujts midi muxp, øy yja'ariindømt pajki, uk yjamidi tømdi.

³⁸ Ja Diosts ttanibiktaajkip jøts ja tømt pajk myuxt pøni så ja ttsøky, jøts pøni så dø'øn pyaat'aty ja tømt midi yiknejp.

³⁹ Tumdigachxi tuki'iyi t'ixy tigati; wenk ja jaa'y ñe'kx t'ixy jøts wenkts ja jiyujk ñe'kx t'ixy, wenk nayide'enmi midi ja kyajnk jamdi, jøts wenk ja ajkx ñe'kx.

⁴⁰ Jats ja ne'kx midi tsajpjøtpyt'ajttip jøts nayjaa ja'amidi midi naaxwiin'ajtmidip; midits idø'øn tsajpjøtpyt'ajttip, wenk idø'øn ja chujidi, ka'ap ja nayide'en kyaxø'økti sam ja'adi midi ya tsuj naaxwiin'ajttip.

⁴¹ Wenk yø xøøw tyii'kxy, wenkts yø po' chamami; jøts nayi wenk yø maadsa' tyøø'kxmidi, jøts tigajstip yø maadsa', wenk yø tyøø'kxti tu'uk tu'uk.

⁴² Nayide'ents idø'øn yjaty ku oo'kpi jadigojk yjujkpyøkti. Putsnip ja' midi ñe'kx yiknitajp, jøts midi ñe'kx jadigojk jujkpyøkp nijuunits idø'øn ja kya'uk'oo'knit.

⁴³ Ja' yiknitajp midi yiktatsø'ødyump, jøts yjujkpyiky midi janchtaxonda'akyim xemikøjxp. Ja' yiknitajp midi' kamøk, midi kamajadakp, jøts yjujkpyøkt jadigojk midi janch møk møjaaaw.

⁴⁴ Ja ñe'kx yiknitajp midi yikwin'ejxp jøts midi yiktomp yikmajtsp; jøts ja ne'kx yjujkpyøkt jadigojk midi kayik'ejxp, kayiktomp, kayikmajtsp. Pøni jats ja ne'kx midi yik'ejxp jøts y'øøky tyigøy, nay jats ja ne'kx midi kayik'ejxp midi ka'oo'kp kadigøøpy.

⁴⁵ Jabi yide'enxi ja Dios kyajpxy wya'afi: "Ja'ukyikmøøxyi ja mijawyeen jaa'y ja jujky'ajtin, pøn idø'øn Adán'ajt"; ka'ats ja nwindson'ajtim Jesucristo yjade'eni sam ja Adán y'ijty, tyimiyikjujky'ajtpi ja ja'ayi myiñ.

⁴⁶ Jawyeents adøm ja ne'kx tø nyikmø'øyim midi ya nmøøt'ajtyindip naaxwiin; jøtsnim wyinaty ja ne'kx nyikmø'yindi sam ja nwindson'ajtim ñe'kx t'ijxy ku ja yjujkpyiky jadigojk.

⁴⁷ Naxne'eyxi ja Adán ñe'kx'ajt naaxwiin'it jaa'yin; tsajpjøtpst ja myiñ ja nwindson'ajtim Jesucristo ñe'kx paty ja jawaani øy.

⁴⁸ Tum jade'ents adøm nne'kx ya naaxwiin t'ijxyim sam ja jawyeen jaa'y ñe'kx t'ijxy, midits idø'øn wyinaty yikmø'øyim jade'ents ja t'ext sam ja nwindson'ajtim ñe'kx.

⁴⁹ Nayide'en sam adøm ya naaxwiin tø n'agojnaxxyim ja midu'ukpi jaa'y, kuts jam tsajpjøtp nayide'ents adøm nøjx nwimbijtyim sam ja nwindson'ajtim t'ixy.

⁵⁰ Yide'en ø migu'uk idø'øn njatijy ku yø ne'kx midi nmøøt'ajtyindip midi xixmyøøt midi ni'jpmøøt, kidi yø'øjip wyinaty twinguwa'jkp ja Dios ma ja amuum ja kyutujk ttanitanit ja jaa'y; midi kataa'nip, midi oo'kp tigøøpy, ka'ap ja pyaat'aty jøts ja xemikøjxpit jujky'ajtin yikmo'ot.

⁵¹ Ja'ats meets ndukmadoowampy jøts yixxon xnijawidit midi yu'uch, midi amaa'tsk ejtp, midi ka' pøn nugo ajawi tnijawi: Ka'ap adøm niduki'iyi ja o'jkin nbaajtindit; ja'ayi ku tyumdigatst ja ne'kx ku nøjx ja nwindson'ajtim xniim'iñim,

⁵² widsukin idø'øn ja tyunit, ku ja puxuujx jadigojkyi yjaak'ukyikmadoonit. Winets idø'øn ja oo'kpi yjujkpyøktit jadigojk møøt ja ñe'kx midi xemikøjxp myijujky'attip; pønts wyinaty jujky'ajttipnim ja'ats ja ñe'kx tigatstip.

⁵³ Kuwanixi dø'øn tyigatst yø ne'kx midi adøm ya naaxwiin nmøøt'ajtyindip, midi amøjip, midi køjxp, midi anuu'kxip; jøts ja nyikmø'øyimt midi xemikøjxp etp ja'agøjxp ku ja kyakixy ni kya'amøji. Jøts adøm wyinaty nmajstuujtyim ja ne'kx midi oo'kp midi tigøøpy, jøts ja nyikmø'øyimt midi nijuuni ka'oo'kp midi xemikøjxp ejtp.

⁵⁴ Kuts adøm idø'øn wyinaty tø nmajstuujtyim ja ne'kx midi kajajkp, jøts wyinaty ja ne'kx tø nyikmø'øña'am midi jajkp, jøts ku dø'øn wyinaty ja ne'kx tø nmajstuujtyim midi oo'kp

jøts wyinaty tø nyikmø'øyim midi xemikøjxp jujky'atp, jaanimts idø'øn ja Dios kyajpxy tyø'øt midi jap jaabyety nøkyijpxy ejtp: "Tø ja o'jkin yikmimajada'aky.

⁵⁵ O'jkin, ¿mā dø'øn ja mduktā'o'jk? ¿Mā dø'øn ja møk'ajtin tø xyikwingaxi'iky?"

⁵⁶ Ja pøky idø'øn ja o'jkin xukta'oo'kimp, jøts ja møjaa'gyutuujk idø'øn ja tyamøj'ajtpy midi ka'uktunip.

⁵⁷ Ndamøjā'wampts ja Dios Teety ku ja tø xyikmajadaajkyindi nwindson'ajtim Jesucristo pyudøjkingøjxp.

⁵⁸ Jade'ents migu'uktøjk idø'øn, møk jøts tu'ugyi ja mwinnmaa'ñ xjaakpiktakøjt it jøts ja nwindson'ajtim tyunk xjaakyikyø'øgyøjt it; pø mnija'widipxi ku ka' nugo wyindigøydi ja mdunk midi ja nwindson'ajtim mduktuujnidip.

16

Sa ja pudøjkin myukt

¹ Ku xyikmukt it ja pikta'aky midi mdabudøkidip ja abiky kugajp ja migu'uk midi tjanchja'widip ja Dios, yide'en xu'undit sam ø nayide'en tø ndukmadowdi pøn jaty jam Galacia etjotp namyujkidip.

² Kija' idø'øn windomingi xpukondu'uttit ja mijuu'ñ pøni wine'en tø mmajada'akti, jøts ja xpøkjø'øktit a'ejxi, jøts wyinaty abaadi xyik'awejnidi ku ø nnøjkxt.

³ Kuts øts jam wyinaty nniikxy winets ø wyinaty nguexy ja jaa'y jam Jerusalén pøni pøn mee mwi'ijpxy, jøts øts ja nøky ja nmo'odit jøts ja møøt tyiknøjkxt it ja pudøjkin.

⁴ Pøni paat'ajtiyip jøts ø nnøjkxt, øyts øts ja wyinaty xmøøtnøjkxti.

Ku Pablo tnujajpxy mā jaty ja wyidetwa'añ

⁵ Kuts jam wyinaty nniikxy mā meets jam, jawyeen ø nnaxwa'añ jam Macedonia etjotp, jøtsnim øts jam Corinto wyinaty nja'aty.

⁶ Ni kyajaa øts jam yjawi ndaa'nit mā meets jam, jotmøñ øts jam nyiknaxy ja xuxpyoj jøts mee nayide'en wyinaty x'atskexy mā ø wyinaty nniikxy.

⁷ Ka' meets idø'øn nugo poj in'ukninaxwa'añ, nmøøtaa'niwyampy meets idø'øn niyjeky pøni yikutujkpy ja Dios.

⁸ Yam øts Efeso kajpkøjxp njaaktaa'niwya'añ kunim Espiritu Santo xøøw tpaatt.

⁹ Øy øts idø'øn may ja jaa'y xjami'ekyidi ya Efeso kajpkijxy, jats ja jaa'y nayide'en pøn ø xmadowandip jøts øts ja ndukmado'odit ndukyikyujtit ja nwindson'ajtim Jesucristo yja'.

¹⁰ Pøni ja'tp ja Timoteo jam, m'ejxtibim jøts jotkujk jam ñayjawiyit jøts niti tkadajot-may'oøkt, pø nayi nwindson'ajtimxi yja' ja tyunk'ajtp sam øts.

¹¹ Paty idø'øn ja tum jade'en xkupøktit, jøts jade'en xpudøkidit jøts øts øy tsuj yam xpaatt, pø n'awijpxyxi øts ja yam møøt ja myigu'uk pøn møøt wyidity.

¹² Tøts øts Apolos njanchjaminuu'kxa'aky adøm ja nmigu'uk jøts ja jeexyip tmøøtniikxy ja migu'ukti pøn jaty meets m'ats'ejxwajnip, ka'ats ja ixyam inet myajada'akt; jaanim ja ñøjkxt ku y'awatsit.

Ku ja Pablo t'ukyajkni ja kajpxpoo'kxin

¹³ Wijyim mnabyikta'agidit jøts ejtp møk ja mjanchja'win xyik'ettit. Yaa'dyøjkin tuki'iyi xmidanidit jøts jotmøk mnabyikta'agidit.

¹⁴ Pøni ti jaty mdundip, tsojkingøjxp pa'ayo'owingøjxp ja xu'undit.

¹⁵ Mnija'widip migu'uktøjk ku dø'øn ja Estéfanas møøt ja myigudøjk jawyeen tjanchja'widy ja Dios kyajpxy y'ayuujk jam Acaya etjotp. Tøts ja ñadyamiyøxyidi jøts ja tpuðøkidit ja jaa'y pøn ja janchja'win tmøøt'ajttip nayide'en.

¹⁶ Pøni jade'ents ja tyundi, nayide'ents mee mbaat'aty mdu'unt, jade'ents ø ndsøky jøts meets ja xmimado'ot jøts ja nayide'en xpudøkidit, nayide'en xu'undit ja jaa'y pøn jaty tundip pøn jaty pudøjkidip.

¹⁷ Tøts idø'øn njanchtajotkujk'atti ja Estéfanas, ja Fortunato jøts ja Acaico ku ja ya tø y'atsmendit jøts ø tø x'atspaatti, ja'ats øts ojt ja pudøjkin xmo'odi jøts meets jade'en myikudanaay.

¹⁸ Tøts idø'øn ja xjanchyikjot'amøkpøkti sam ja jam nayide'en myikjot'amøkpøjkidøø. Ngajxajkimp idø'øn ja yjade'emb i jaa'dyi.

¹⁹ Mdanigajxidip ja kajpxpoo'kxin ja janchja'wibi jaa'dyi: pøn kugajp'ajttip Asia etjotp. Mjanchkajpxpoo'kxidip ja Aquila jøts ja Priscila, jøts nayide'en niduki'iyi ja jaa'dyi midi xuminamyujkidip ja' tyøjkjotpti, pøn nayide'en tø tjanchjawidi ja Dios sam meets.

²⁰ Nayide'ents mgajpxpøø'kxyidi pøn jaty yam tø tjanchjawidi ja Dios. Nagyajpxpoo'kxidi niduki'iyi xem yam sam ja Dios ttsøky'aty.

²¹ Pøn idø'øn Pablo'ajtp, øts idø'øn køøm njaapy ya'at nøky jøts ndanigaxidi ya'atpi kajpxpoo'kxin.

²² Pøni ka' pøn tkupiky jøts tkatsøky ja nwindson'ajtim Jesucristo, wan wyinaty kø'øm ttani'ixy. ¡Wingonip ja nwindson'ajtim!

²³ Mmo'ojidip ja nwindson'ajtim ja kyunuu'kxin.

²⁴ Meets niduk'i'iyi ndanigajxtip ja tsojkin ja pa'ayo'owin Cristo Jesús køjxp. Jade'en idø'on ja yjatt.

JA MYĪMAJTSKPI NØKY MIDI JA PABLO TYANĪGAJX JA CORINTI JAA'Y

Ku ja Pablo tnijayi ja janchja'wibi pøn jam Corinto

¹ Øts idø'øn Pablo'ajtp. Tø øts ja Dios Teety xamidsøky jøts ø ngudanit ja Jesucristo. Jøts nayide'en ja Timoteo midī øts møøt ya'at nøky nja'ay jøts øøts ndanigaxi pøn jaty ja Dios Teety ja'ajtidip jam Corinti, jøts nayide'en pøn jaty jam Acaya etjotp tsinaadyip.

² Paatti kupøjkti ja Dios Teety jøts ja nwindson'ajtim Jesucristo kyunuu'kxin jøts ja jyotkujk'ajtin.

Sa Pablo y'ayo'ombaaqjy

³ Tkaxajkyindi ja Dios midī tyeety'ajtpy ja nwindson'ajtim Jesucristo, jabi jade'enxi dø'øn ja tyeety'ajtin tyiknigaxi'iky ku adøm x'ayo'ijxyindi, nijuuni xka'xmajchindi, ejtp xkajpxjot'amøjkandi Dios'ajtingøjxp.

⁴ Ja'agøjxp ja Dios xkajpxjot'amøjkandi pøni sa jaty nidu'uk nidu'uk n'ayo'ombaaqjtyindi jøts jade'en nnija'wandit sudso dø'øn ja nmigu'uk nayide'en ngajpxjot'amøjkimyandit sam ja Dios tø xpudøjkandi.

⁵ Nayide'en sam adøm kajaa ngu'ayo'ombaaqjta'andi ja Cristo yja', kajats ja nayide'en ja jot'amøkpøjkin xmø'øyim.

⁶ Ixyamts øøts nyikjemduñ ja'agøjxp ku meets ndukmadøky ja nitsoojkin ayuujk jøts ku meets nayide'en ngajpxjot'amøjkidi. Ku øøts yø'øbi ayo'on ndanaxy, ja Dios øts tø xkajpxjot'amøjki. Nayi meets m'øy'ajtingøjxp øøts idø'øn jade'en tø njaty jøts meets nduknijawit sam nayide'en ja Dios mbudøkiyidit ku nay yø'øbi ayo'on wyinaty xpaatti.

⁷ Njantyimyjøp'ijxy'ajtpy øøts idø'øn jøts meets nayide'en ja Dios myikjotkujk'atyyidit sam øøts, øy idø'øn nayide'en mja'ayo'ombaaqti.

⁸ Meets migu'uktøjkti, jade'en øøts ndsøky jøts meets waani x'ext xnijawit sa øøts idø'øn jam ja ayo'on nyiknaxjy Asia. Yikxon øøts møk ja ayo'on jam n'ijxy, niti awejxin niti jøp'ejxin øø wyinaty nga'ukmøøt'ajtni, niti majadaajkints øøts, ja o'jkin yjøp'am øøts wyinatyni.

⁹ Jade'ents øøts idø'øn øjts jam nnayjawiwi sam ja jaa'dyi pøn ja xyøøw tø yik-tanimacho'owiñi jøts ja o'jkin tpaattit. Øyts idø'øn ja ne'egi ku jade'en yjajty, jabi jaanimxi øts ja Dios idø'øn tuki'iyi nmibøkøjxi jøts ku oo'kpibaat ja tyikjujkyiky. Jøts øøts jade'en nja'gyujkiyi'ñ ku adøm niti kø'øm xkama'ayim.

¹⁰ Ja' øøts idø'øn x'axajtujk x'agø'ødujk jøts øøts jade'en ja o'jkin xkadukpaajty, jøts nayide'en xyiknitso'ok'ejtint ku ja o'jkin wyinaty xmimajada'akwa'añim.

¹¹ Nayide'en meets idø'øn ja mdsapkaaky tyumi ja'agøjxpts adøm idø'øn ni'amuki nga-jxajkindit ja Dios jøts øøts ja pudøjkin xmøy'ett.

Tigøjxp idø'øn ja Pablo øjts kyanijky Corinto

¹² Ja'agøjxp øøts n'aaw njooit jyotkujk'aty ku øøts nnijawi ku øøts o madsoo øy tsuj tø nyiknaxy ja ndsinaa'yin, niti taay. Tu'ugyi øøts ja Dios ja y'øy'ajtin tø xabudøki, ka'ap øøts ja ngø'øm wijy'ajtin tø myajada'aky. Meets windumxi dø'øn øøts ja ndsinaa'yin øy tø nyiknaxy.

¹³ Jøts nayide'en ja nøky midī meets tø ndanigaxi, niti taay ja tkamøøt'aty, mibøkøxti ja'.

¹⁴ N'awijxy'ajtpy øøts ku meets ja njaa'y'ajtin xkupøjkit tuki'iyi sam ixja waani tø xkupø'okwa'andi, jøts jade'en nnadyajotkujk'ajtantid nixem niyam ku wyinaty myeni jadigojk ja nwindson'ajtim Jesucristo.

¹⁵ Ja'ayi ndamøj'ajtpy ku meets idø'øn tø xkupøjkni, jøts ø nwa'añ ku meets majtsk øjk n'ats'ejxwa'añ jøts jade'en n'atsyikjotkujk'attit.

¹⁶ Ja'agøjxpts ndanibiktaajkiyi'ñ jøts ku øts ya nmiñ Macedonia, myijawyeen meets n'uk'ext jøts jadigojk ku nwimbejtnit. Wanik meets xpudøkit jøts øøts nja'tt jam Judea.

¹⁷ ¿Ka'ap øts idø'øn ja ndejint yikxon ndyimdyanibiktaajkiyi'ñ ku øts øjts jam nga'uknøjkxni? ¿Sa tø mwa'andi, jade'en øts idø'øn xijy sam muum ja jaa'y ja yja' nugo tyikmajada'aky ku ja nugo t'ukupiky jøts ja ka' t'ukpaduni?

¹⁸ Pø ka'axi. Wa'ats ja Dios tnijawi ku ka'ap øts jade'en nugo ndaa'yaty.

¹⁹ Jabi ka'axi ja Dios U'nk Jesucristo tyaay'aty midī øøts ja yja' ngajpxwa'kxøø møøt Silvano jøts Timoteo, ma meets jam. Pyadunguijxpy ja y'ayuujk ja'.

²⁰ Jøts ja' tuki'iyi tmidanaagyøjxp pøni ti jaty ja Dios Teety ñi'adso'owip. Ja'agøjxpxi ja xyøøw ja yikajpxpaaty ku adøm Dios Teety nmøja'wa'am ngunuu'kxyja'wa'am ja myø'ajtin jøts nwa'añim janch tiigyajpxy idø'øn yø', nwindson'ajtim Jesucristo køjxp.

²¹ Nayi Dios Teetyxi adøm idø'øn xukmøøt'ejtindip ja Cristo jøts øøts ja tø xjibiky jøts øøts ja jade'en ngajpxwa'kxiti ja yja'.

²² Tø nayide'en ja Espiritu Santo xmø'øyim mididi ejxpajt'ajtp ku adøm ja xja'ajtyim, jøts jade'en nnija'windit ku xmø'y'ukwā'añindi ja jujky'ajtin mididi xemikøjxp'etp.

²³ Ñija'widyaapy ja Dios ku meets nga'ukninojxkni jade'engøjxp ku meets ka' nyikjotmay'ooktøkiwya'añ ku møk nwindso'ødyit. Pøni ka'ats yjanchjade'eni, pø jats øts idø'øn ja Dios kø'øm xiidyu'unt.

²⁴ Ku meets wyinaty nninijxxy, ja xondaajkin ja øy'ajtin meets ndaninøjxkwampy. Ka'ap meets nda'aguwaniwya'añ ja janchja'win pø møkxi meets ja xmøøt'ajtni.

2

¹ Jabi ja'agøjpxi meets idø'øn tøn nga'ukninojxkni ku meets nugo n'atsyikjotmay'ooktøkit.

² Ja ku meets n'atsyikjotmadyøkit, ¿pønts øts idø'øn ndajotkujk'atp? ¿Kidi meedsip? Yamts meets wyinaty kø'øm tøn nyikjotmadyøki.

³ Patyxi meets tøn nnijayi jawyeen jøts jam tuki'iyi xyik'ødyit xyikpaadidit ku øts jam wyinaty nja'aty jøts meets saxonda'akt. Jabi jade'enxi nwa'añ ku mee mxondaqkmit ku meets x'ext jøts ku øts jotkujk.

⁴ Ku meets ja'abi nøky ndanija'yiyii'ñ, janchjotmay'oo'kp øts wyinaty, ja ya'axyi ja ji'iyi øts idø'øn wyinaty xmimajadaqk ku meets yjawi ja jaa'y myikwinmaa'nmya'atwā'añidi jøts ø xkagupøktit. Ka' meets nayide'en nyikjotmay'ookwā'añ, ja'axi øts idø'øn nanky'ejxwajnip mabaat meets idø'øn ndso'ky nba'ayø, patyxi meets idø'øn ngajpxwijy.

Jade'en pyaat'aty jøts yikmaa'kxukt pøn tøn tyundigø

⁵ Ja jaa'yu'nk pøn øts idø'øn tøn x'ukyikjotmadyøki ka'ap øts ja nadyu'uk tøn xyik'ayø jabi nixem niyaxxi meets idø'øn ndejint winaaqin tøn mbaajtmidyidi nayja'abi jotmay. Ka'ap ø nwa'añ ku nijum.

⁶ Ka'ap øts ja møk n'ukwindsø'øwyani pøn idø'øn tøn tyundigø. Jabi tøxi meets ja nijum ne'egi kø'øm xkastigimøøni.

⁷ Jade'en idø'øn ne'egi pyaat'aty jøts meets ja xmaa'kxujknit, kajpxjot'amøkidi, ja kuts ja jotmay myimajadaqkniyt jøts jade'en ja chinaa'yin tyikwindigøøniit.

⁸ Paty meets ixyam ja may'ajt n'amidøy jøts jadigojk ja tsojkin ja pa'ayo'owin xmo'odit.

⁹ Tøn meets ya'atpi kajpxy ya'atpi ayuujk jawyeen ndanijayi ja'agøjxp jøts ø n'ext nnijawit pøni xjanch'ukpaduujnidip øts idø'øn ja ngutujk.

¹⁰ Paty xnijawidit, pøni pøn meets mmee'kxpy, nayide'ents øts ja maa'kxin ja nmøømyi. Pøni tøn øts idø'øn tigati nme'e'kxy, ja'agøjxpts øts jade'en tøn nduñ ku mee n'ayo'ixy, y'ijxpy ñija'wip ja Cristo.

¹¹ Jøts jade'en o tigati tkadamøj'att ja miku'windsøn Satanás, jabi nnija'wampxi adøm wā'ats ku ja o tigati tamibøki tami'ejxi.

Ku ja Pablo ttajotmay'øky ja Tito jam Troas

¹² Ku nja'ty jam Troas jam kajpjotp, nugo øts ndunk jam tyimy'ity øy maðsoo jøts øts ja Cristo yja' ngajpxwā'kxit.

¹³ Yamts øts wyinaty tøn nja'uktundsoo'mi, kumi ka'ats øts øy njotkujk'aty ja'agøjxp ku øts ja Tito jam ngapaajty, adøm ja nmigu'uk, patyts øts jam øjts ndso'ongojmi jøts øts ojts nnøjxni jam Macedonia.

Ku ja Cristo møøt nmajadaq'ijtyindi

¹⁴ Nmøja'wimp ngunuu'kxyja'wimp ja Dios Teety ku ja ejtp xyikmajadaajkyi tu'ugyi møøt ja Cristo, jøts ja kyajpxy jøts ja y'ayuujk ja xukajpxwā'kxyim øy magama.

¹⁵ Y'øyja'wip chuja'wip ja Dios Teety pøn ja Cristo møøt y'ity jøts ja yja' tkajpxwā'kxi.

¹⁶ Øy ja magama ja y'ixpøjkin wyidity jam muum tkamibøkti, o'jkin tigø'øyin ja yik-tatiidyu'undip. Jøts muum tjanchjawidi, ja'ats ja tyajuujk'attip xemikøjxp. ¿Pønts idø'øn yø'øbi tunk nugo niyjøjxk tyimy'ukniyajtp?

¹⁷ Jabi ka'axi øøts ja nugo ndameembyiky ku øøts ja Dios kyajpxy ngajpxwā'kxi sam muum y'adø'tsti, uk ka'baat ka'pxy tnigajpxti tum wimbet ja tnmadya'akti. Ka'ats øøts jade'en n'adi'ich, tiy janch øøts ja nnigajpxy pø tøxi øøts Dios kø'øm xkexy jøts øøts kyajpxy ja ngajpxwā'kxit Cristo pyudøjkingøjxp øy maðsoo jam Dios wyingujk.

3

Ku ja Dios ja chojkin ja pya'ayo'owin jadigojk tyiktso'ondaajky Jesucristo køjxp

¹ ¿Sa meets idø'øn yø xja'gyuki ku øøts jade'en nwa'añ? ¿Kø'øm øøts idø'øn xijy nnagya-xja'akwā'añi sam ja muum mā ttundi pøn ja ixpøjkin wenk tyajktip? ¿Ja ejxpajtin øts idø'øn kuwani ndyimyøøt'atp jøts meets yø n'ixpøjkin xmibøkit?

² Ka' yjade'eni, jabi meetsxi myiknigaxi'kpy pøni sa øts idø'øn ja ndunkjøøjp y'øyi. Jade'en ja nigaxi'iky ku meets ja Dios yja' tø xmibøjki jøts øy ja pøn t'ext tñijawit sa dø'øn ja mdsinaa'yin tø tyigatsti.

³ Kø'ømxi ja Cristo jade'en tø mdanibiktaagiyidi jøts m'ejxpaj'tattit jøts øts ja ndunk jade'en wyingaxi'iky. Jabi Dioxsi dø'øn kø'øm ja y'Espiritu Santo tø tyaky jøts ja y'ejxpaj'tatt ja 'agøjxpts ja' kyakudigøy. Jawaani møj ja', midi anmija'winjotp ja Dios pyiktakpy jøts ka'ap ne'egi ja jawyeembi kutujk midi Moisés kyøxjaay tsaaagøjxp.

⁴ Sa jaty øø nwa'añ tiy yø' janch yø', wa'ats øøts nñijawi jøts ku øøts ja Dios Teety pyudøjkin amuum xmø'øyi Cristo køjxp.

⁵ Ka'ap øøts kø'øm nñankmyajada'agiyi, ja Dios wyingujkpxi dø'øn chøøñ ja møk'ajtin jøts øøts ja øybi ndu'unt.

⁶ Jaa ku øøts ja jeexyip tø xkamø'øyi ja møk'ajtin sudsots øøts idø'øn jeexyip nñigajpxy sa ja Dios chojkin ja pya'ayo'owin jadigojk tñanky'ijxyi sa ja naxwii'ñit jaa'y ñitso'ok'ttitt. Ka'ap ja tsinaa'yin yikpaaty ku nbadungøjxint tuki'iyi ja Moisés kyutujk, ja Espiritu Santoxi dø'øn tñanky'ejxip ja øgyajpxy ja ømyadya'aky sudso yikpaaty ja jujky'ajtin xemikøjxp. Ja o'jkin tigø'øyin pyatpy ja anmija'win ku ja Moisés kyutujk ngabadungøjxint yam ja Espiritu Santo yja' tyumyikjuyky'aty.

⁷ Jade'en idø'øn ja Moisés kyutujk ja myøj'ajtin kyaxi'iky midi tsaaagøjxp yikjaay ku jaaju'uk agujk yikmøøy, janch tøø'kxp tsamamp idø'øn ja wyeen y'aaw. Jøts janch win'oo'ktip idø'øn ja myigugajp israelit jaa'y ku ja yjayik'ejxwa'añ. Waani dø'øn ja y'aju'uk møj y'atskaxi'iky, pojin ja ñaxkojmi. Sats idø'øn ja janchtyimøy y'atsmiiñ ja'abi kutujk midi anmija'win ja o'jkin tyukupiky'ajtpy.

⁸ Kuts ja øgyajpxy ja ømyadya'aky ka'ap ja tmi'abaaty, pø ka'axi ja winmaa'ñ myajada'aky mabaat ja yja'aty ja myøj'ajtin ja y'ø'y'ajtin midi ja Espiritu Santo xuk'ejximp xuknija'wimp.

⁹ Sats idø'øn ja kutujk janch møj, yam ja tjayikudigøy ja anmija'win, sudsots idø'øn ja Dios y'øgyajpxy y'ømyadya'aky jawaani kyidyimy'ukmøjit midi adøm ja xagupøjkip!

¹⁰ Jabi ka'axi ja Moisés kyutujk møøt ñabyaadyi ja Dios y'øgyajpxy.

¹¹ Øyi dø'øn ja kutujk møj tø yjamiñ ka'ap ja Dios y'øgyajpxy ja twinajxi midi ejtp xemikøjxp.

¹² Ja'agøjxp øøts ja njøp'ijxy'aty, paty øøts agujk jotkujk ja Dios yja' nñigajpxiyi,

¹³ jøts ka'ap y'ukpaat'ajtniyi jøts øøts ndu'unt nayide'en sam ja Moisés ttuun ku ja y'ijty ñawinjuuxyiyi jøts jade'en ja myigugajp tka'ejxtit ku ja y'aju'uk tuda'aky tyigøøñi.

¹⁴ Ja israelit jaa'y ka'ap ja tja'gyukidi tigøjxp idø'øn ja Dios ttanibiktaagi ja kutujk midi ja Moisés yikmøøy. Ni ixymbaata ja tkaja'gyukidinim ku ja Dios ñøky tkajpxidi. Jaanim ja ja'gyukin ja tpaattit ku ja Cristo yja' tkupøjkidit.

¹⁵ Yjaakjakajpxidibimts ja Moisés kyutujk ja'adi, jade'en ja tjøp'ejxti jøts ja ñitso'ok'attit ku ja tpadungøxtit.

¹⁶ Kuuyidsik øy pøngapøn tkupøktit ja nwindson'ajtim Jesucristo jatyits ja pyøky ja ñiwa'adsidit jøts ja wa'ats tuki'iyi tja'gyukigyøxtit.

¹⁷ Ja nwindson'ajtimxi tmøøt'ajtp ja jujky'ajtin jøts ja ja'gyukin, pønts ja nwindson'ajtim tjanchja'widip ka'ap ja Moisés kyutujk ja y'ukmimajada'kniyidit, ni kya'ukjuyky'ajtnidit ja pøky agujkpy.

¹⁸ Paty adøm ja ja'gyukin nmøøt'ajtna'andi ku ja nwindson'ajtim yikmibiky. Kuts ja ejtp njotmay'ajtnidit ja y'ø'y'ajtin ja myøj'ajtin, nay ja'ats nanky'ejxamp xjats adøm jade'en nñajtnant sam ja nwindson'ajtim. Yjujky'ajtingøjxp idø'øn ja jade'en xpudøjka'am.

4

¹ Paty øøts idø'øn nijuuni ngadawindsuun ja ndunkjøøjp midi øøts ja Dios y'ø'y'ajtingøjxp tø xanibiktaagi.

² Jagam jixkø'øm øøts idø'øn nbikta'aky midi amaa'tsk midi tsø'ødyuñim yiktump. Ka'ap øøts n'ijxy ngøy jøts o pøngapøn nwindaa'y'att. Ni ja Dios øøts ja y'ayuujk ngakajpxma'jti. Ja tyiiby ja yjançpi øøts idø'øn ja'ayi nñigajpxy, jøts jade'en nipøn jaa'y kyawa'ant jam Dios wyingujk ku øøts n'ayuujk kyatiyi.

³ Ku jaa winaa'gindi pøn tkaja'gyukidip ja nitsoojkin ayuujk midi øø ngajpxwa'kxpy, ja kyudigø'øyin idø'øn ja kø'øm y'ixaawyandip.

⁴ Ku ja wyinaty kø'øm tkajanchjawidi, ja miku'windsønts idø'øn ja tø yikwinajpniyidi pøn ja'ayi ja naxwiiñ ne'egi diosja'widip, jøts jade'en tkapaattit ja kudøø'kxaagi ja kujajtaagi midi yajkpy ja øgyajpxy ja ømyadya'aky ku ja Cristo y'ø'y'ajtin myøj'ajtin yiknimadya'aky. Ja Cristots tñanky'ejxip ja Dios Teety pøn y'agojnax'ajtpy.

⁵ Ku øøts ngajpxwa'kxy ka'ap øøts ngø'øm ja' nñigajpxy, ja Jesucristoxi øøts ja wyindsøn'ajtin ngajpxwa'kxp, jøts øøts jade'en nyikwimbejtnit ja y'ø'y'ajtin midi tø tyaky, ku meets nbudøki ja' chojkingøjxp.

⁶ Jabi nay ja'abi Dios Teetyxi dō'ōn midi ja jaj ja tōō'kx tyiktso'ondaajk, nay ja' adōm tō xmo'ōyindi ja kujajtaagi ja kudōō'kxaagi jōts n'ejxindit nnija'windit sã dō'ōn ja y'ōy'ajtin myōji midi ja Jesucristo ñanky'ejxip.

Janchja'wingōjxp ja tsinaa'yin nyiknaxjyim

⁷ Dios wyingujkp ja chōōñ ja'abi kujaj'ajtin kudōō'kx'ajtin midi niwindem xōōw tkamōōt'ajtp ja kudigō'ōyin, ja' oōts nmōōt'ajtpy njujky'ajtingōjxp. Ka'ap oōts ngō'ōm mōō'ajtin nyiktuñ, ja Diosxi myōk'ajtin idō'ōn jade'en tyiknigaxō'jkp.

⁸ Ōy oōts tsep agujkp aki agujkp ja njujky'ajtin yjanaxy, niwindem xōōw oōts ja nnōō' ja nduu' kya'aduky; ōy oō njamay njatay sudso oō nyiknaxt, nbatpy oōts ja winmaa'ñ sudso tyuu'baat tyuu'wetst.

⁹ Ōy oō njayikjēmduñ njayikteduñ, ka'ap oōts ja Dios x'ixmach; ōy oōts ja nmidsep xjatekpya'an'atwa'añ, ka'ap oōts ja tu'ugyi xmimajada'aky.

¹⁰ Winjaa windsojk oōts ja jaa'y ja o'jkin xjadukpaatwa'añ sam ja Jesús yjajty. Nay ja'ayi oō kō'ōm xpudōjkip jōts jade'en tyiknigaxi'iky ku ja ya xemikōjxp yjujky'aty.

¹¹ Pōn jaty oōts mōōt nbaduñ ja Jesús yja', nay ja'agōjxp oōts ja o'jkin jabom jabom x'ijxy xkōy, ja'agōjxp oōts ja xka'ixmach jōts jade'en tyiknigaxō'ōkt ja yjujky'ajtin oōts nnikōjxp.

¹² Ōy oōts ja o'jkin xumijapaatwan'ity xumijamimajada'akwan'ity, ja xemikōjxpit jujky'ajtin meets ne'egi mbaajtip m'ejxip.

¹³ Njanchja'wip oōts nayide'en ku yide'en wya'añ ja Salmos nōky: "Paty oō nnigajpxy ku njanchjawi."

¹⁴ Nnija'wip oōts ku ja Dios Teety tyikjujky'ijxy ja Jesús, nayide'ents adōm ja mōōt xyikjujky'pōjkit, jōts jam nnōjxant niduki'iyi ja' wyingujkp.

¹⁵ Midi oō tō ngu'ayowi ja'agōjxp oōts idō'ōn ja ngupiky jōts meets ja ōy'ajtin xpaatt, mayts ja jaa'y Cristo kōjxp tpaattit ja Dios kyunuu'lxin ja Dios y'ōy'ajtin jōts may nayide'en pōn ttukmōjwidip pōn ttukunuu'kxyjwidip ja Dios ja'agōjxp ku ja tkajxa'akti.

¹⁶ Ja'agōjxp oōts idō'ōn ngadawindsuñ. Ōy oōts ja nne'kx yjaga'ukmajada'kni, mōwenip kajaajip oōts ja njanchja'win jabom jabom.

¹⁷ Yō ya'it ayo'on waani yō ñaxkōjy, ka'ap yō jeky tyaa'ni; jōts yō' ōy'ajtin xemikōjxp ne'egi xukpaajtimp mā ja Dios.

¹⁸ Jabi ka'axi yik'ixa'ay midi ya naxwiñ yik'ejxp, ja Dios y'ōy'ajtin ne'egi yik'ixaapy midi kagaxō'kp. Ja pikta'aky midi kaxō'kp myōōt'ajtpy ja' ja kudigō'ōyin. Ja ōy'ajtin midi kayik'ejxp ka'ap ja y'aats ja kyojkp ja kyudigōy.

5

¹ Nnija'windip adōm ku ja nne'kx kyudigō'ōyim midi kajajkp sam tu'uk ja tōjk kyudigōy naxwiñ, jap adōm ja Dios tō xadanibiktaajkindi tu'uk ja tsinaadyaajk tsajpjōtpy. Etp ja xemikōjxp, jabi kidi naxwiñ'ñit jaa'yipxi ja tō tyik'ōyi.

² Janch jade'en idō'ōn yjaty ku adōm nne'kx ja yjujky'ajtin tyiknaxy ya, ka'ap adōm n'ōyja'wam, winjaa windsojk adōm nnōjkwā'añim mā ja tsinaadyaajk ja Dios tō xadanibiktaajka'am,

³ mā adōm n'anmija'win yiknitanāa'yim.

⁴ Yō ne'kx midi nmijuky'ajtyindip ya naxwiñ ka'ap yō ōy ti xuk'ōyja'wam, jōts yiktsojkp ja tsinaadyaajk midi ja Dios tō xanibiktaajkindi, yjagayikwa'añ ja o'jkin. Yō naxwiñ'ñit tsinaa'yin adōm idō'ōn njadayiktigatswa'añimp ja jemchinaa'yin.

⁵ Ja Dios idō'ōn kō'ōm tō xanibiktaajkindi jōts tō xuktatōjkindi ja Espiritu Santo midi ejxpaj'ajtp ku adōm ja nyikmō'ōyindit midi ja yik'awijxpy.

⁶ Jade'ents adōm idō'ōn ndajotkuky'ajtint, jōts nnija'windip ku ya yō nne'kx nmijuky'ajtyindinim ka'ap adōm ja tsinaadyaajk nbaajtyindinim. Ka'anim adōm idō'ōn ndyimyja'atyim mā dō'ōn ja nwindson'ajtim jam.

⁷ Janchja'wingōjxp adōm idō'ōn nmōōt'ajtindit ja jōp'ejxin ōy ja njaga'ijxyindi.

⁸ Ka'ap ja o'jkin tigō'ōyin ndsō'jkandit. Jotkuj idō'ōn adōm njōp'ejxindit ja o'jkin ku wyinaty xpaat'ajtyindi jōts nnōjxindit jap mā ja nwindson'ajtim mōōt n'ejtint.

⁹ Paty adōm idō'ōn ōy mādsoo nwindson'jka'ant ja nwindson'ajtim wan ne'kxkōjxp wan anmija'wingōjxp.

¹⁰ Jabi kuwanixi ja Cristo tyi'dyu'unt jōts jade'en nyikmō'ōyindit midi xpaat'ajtindip nidu'uk nidu'uk pōni sã wyinaty ja njujky'ajtin ya tō nyiknaxjyindi.

Ja kajpxy ja madya'aky midi ñigajpxy sã jadigōjk mōōt nnamyajyint ja Dios

¹¹ Ja'agōjxp ku oō nnijawi sã ja nwindson'ajtim yikmōjawit yikunuu'kxyjawit y'ōy'ajtingōjxp paty oōts ja jaa'y ndukja'gyukiwyanguixy ku oōts tiy janch ja kyajpxy ja y'ayujuk nnigajpxiyi. Nija'wip ja Dios sã oōts ja njaa'y'aty, njōp'ijxpy oōts jōts meets nayide'en xja'gyukit.

¹² Ka'ap 00 k0'0m nnay'agajpxyiyi, ja ja'gyukinxi meets id0'on ndukm00t'atwampy j0ts jotkuk mnayjawiyyidit ku meets ngawindaayyi. J0ts jade'en agujk jotkujk x'adsojimbettit ja jaa'y p0n y'anmija'win yjam00t'ajtpy.

¹³ P0ni nugo 00ts ndyimgyajpxy p0ni nugo 00ts ndyimy'adi'ich, Dios ja tu'ugyi tnija'wip; p0ni 0yts, p0ni tiyts, p0ni ka'px 00 nnigajpxy ja yja', meets ja mda'0y'atp.

¹⁴ Ja Cristo chojking0jxp pya'ayo'owing0jxp 00ts id0'on ja ndunk ngamajtstu'uty jaa ku 00ts ndyimyanchjawi ku niduki'iyi t0 xku'o'jkindi j0ts ka' n'uknijujky'ajtna'ant ja p0ky.

¹⁵ Paty ja Cristo t0 xku'o'jkindi j0ts p0n jujky'ajttip ka'ap ja k0'0m t'uk0j0'0mit'ajtni ja chinaa'yin, ja Cristo ja nujujky'ajtnidip p0n ja ojts kyujujkpy0kiyidi jadigojk.

¹⁶ Paty 00ts jade'en nga'uk'abaxni p0ni sa nidu'uk nidu'uk ja chinaa'yin tyiknaxy; Cristo paat 00ts y'ijty n'abexy mido 00 nga'0yja'wip ja yja', ixyam ka'ap 00ts ja'abi winmaa'ñ n'ukyiktuni.

¹⁷ Jade'ents id0'on, p0n ja Cristo m00t y'ity, jemyjaa'y ja'; ja tig0y winmaa'ñ mido y'ijty nm00t'ajtyindip ka'ap ja y'uktuni, tum ja yjembyi d0'on t0 nbab0jknandi.

¹⁸ Ky0'0mdunkj00jp ja Dios Teety jade'en tyumpy Cristo k0jxp j0ts ja m00t nnamyajya'ant. J0ts 00ts ja ndunk t0 xm0'0y ku niduki'iyi ja jaa'y ja Dios m00t ñamyaa'ñiyit.

¹⁹ Yide'en id0'on nbiktaajkint, ja Cristo k0jxp id0'on ja Dios Teety niduki'iyi ja naqxwii'ñit jaa'y m00t ñamyaa'wya'aniiyi. Ka'ap ja p0ky tm0jpkita'aky. J0ts 00ts xanipijky ya'atpi 0y'ajtni.

²⁰ Paty meets xnijawit ku 00ts ja Cristo xyikugajpxy'aty, sam id0'on ja Dios Teety k0'0m jeexyip meets mminuu'kxa'agyyi. Paty 00ts id0'on yide'en n'ane'emy ku meets id0'on ja Dios ja mds0jkin xm00gy0xt.

²¹ Niti p0ky id0'on ja Cristo tkam00t'ajty xjats ja Dios Teety tyimñayide'en ja ttuun sam ja m0j p0kyjaa'y yiktuñim, j0ts nyikup0jkindit sam ja Dios Teety tts0ky ku ja Cristo m00t n'ejtint.

6

¹ Jade'ents migu'ukt0jk id0'0ndi, niduki'iyi niwine'en ad0m ndunk'ajtyindi ja Dios yja', n'amid00py meets j0ts kidi nugo ja Dios y'0y'ajtni xyikwindig0jyidi mido ja t0 mduk'ijxyidi mido ja t0 mduknijawiyidi.

² Jabi jade'enxi ja k00m wya'añ ñ0kyijxpy:

Ku ja x00w ja jum0jt tpaajty nmadoow 0ts ja mji'iyin ja myajxin;

j0ts ku ja yiknitso'ok'ajtni tpaajty winets me nbud0jkiyi'ñ.

Ixyam id0'on ja mx00w ja mjum0jt t0 yja'tni j0ts ja myiknitso'ok'ajtni t0 tpatni.

³ 0y 00ts id0'on ja ndsinaa'yin nyiknaxy j0ts 00ts jade'en ja ndunkj00jp nip0n xkada'abaxt.

⁴ Jade'enxi 00ts id0'on ne'egi nyiknigax0'0kwa'añ ku 00ts ja Dios nmiduñ, tudaa'aky 00ts ngupiky'aty tuki'iyi ja ayo'on;

⁵ t0 00 nyiktsumy nyikw0py; t0 00ts ja jaa'y namay xamuky, m0k 00ts ja ndunk nyiknaxy kunim 00ts ng0' ndeky kya'ukmajadakni; kawinaak tsuu 00ts t0 ngamaa'y t0 nga'ity, ayuu 00ts kawinaak x00w t0 nyiknaxy.

⁶ Nujujky'ajting0jxp 00ts nyiknigaxi'iky ku 00ts ja Dios nmiduñ. J0ts jade'en kyaxi'iky ku 00ts ja Dios y'ixp0jkin ka'pxy nnija'wiyi j0ts 00ts nduda'akyjaa'y'aty. T0 00ts n'0yjaa'y'aty j0ts t0 00ts ja Espiritu Santo yja' nyiknigax0'kmi j0ts nayide'en 00ts ja tsojkin ja pa'ayo'owin 0y p0ngap0n t0 nm0'0y.

⁷ Ja tiy'ajtni ja janch'ajtni 00ts t0 nm00t'aty, j0ts ejtp 00ts ja Dios ja my0k'ajtni xa'ag0'duky xa'axajtuky. Ja 0dyu'unin ja tiydu'unin 00ts t0 nyiktuñ ku 00ts ja Dios yja' t0 nyiky0'0yi j0ts ku 00ts ja y'ayuujk nnitanaa'miyi.

⁸ Juunjaty 00 nyikajxa'aky j0ts nay jaayi 00ts nyikpagajpxy. 0y 00ts jaayi n'ukyiknimadya'aky j0ts nay jaayi 00ts wenk n'ukyiknimadyaknimi. Ja 00ts juunjaty nyikn0jmi ku 00ts nugo ndaayi j0ts nay jaayi wyangojmidi kuk 00ts ja y'0ybi tyiibi nngajpxy.

⁹ Juunjaty 00ts ngayik'ejxkapy j0ts nay jaayi 00ts nyik'ejxkapi; ja 00ts ja jaa'y juunjaty ja o'jkin xukpaatwa'añ, jajujky'ajtp 00ts id0'on jade'en. Yikastigim00py 00ts, ka'ap 00 n'00ky.

¹⁰ 0y 00ts njamay njatay, xondakp 00 nnayjawi; ayooobi jaa'y 00ts, ja 0y'ajtints 00ts nyajkpy; 0y 00ts niti njagam00di, jade'en 00 nnayjawi; ejximdam 00ts jeexyip tuki'iyi ndyimy00t'ajtk0jxni.

¹¹ Meets migu'ukt0jkti, tiy'ajting0jxp meets t0 ndamigajpxy, tuki'iyi meets ja ndsojkin ja nba'ayo'owin t0 ndamay'aty.

¹² 0yimik id0'on wine'enin ngondukt nb0ktukt 0ts ja ndsojkin 0ts ja nba'ayo'owin. Meets id0'on jade'en yjawi ne'egi mdumpy.

¹³ Sam ja u'nkteety ja myajnk tmigajpxy nayide'en meets nmigajpxwami ku ja mds0jkin ku ja mba'ayo'owin niwine'en xka'ama'at'attit. Tundi nayide'en waani sam 0ts t0 nnaajt-stuni.

Adom nikøjxp ja Dios yjujky'ajtyim

¹⁴ Kidi mjujky'ajtin xyiknaxti møøt pøn tkajanchja'widip ja Dios, jabi nijuunixi kyanamyayidit ja tiidyu'unin møøt ja tundigø'oyin, sam ja kudøø'kx'ajtin møøt ja kugoots'ajtin.

¹⁵ ¿Sudso dø'øn ja Cristo yja' møøt ñamyayidit ja miku' yja'? ¿Uk sudso ja janchja'wibi jaa'y møøt ñamyigu'ukwa'aniyt pøn midsepwajniyip?

¹⁶ Ka'ap ja yjujky'ajtin tyiknaxti tu'ugyi ja Dios Teety møøt ja dios midi kø'øm yiktsajstip. Ka'ap adøm njade'enindi jabi kø'ømxi Dios wyinaa'ñ yide'en:

Pøni ma ja chøønidi jam øts ja nmøøtjujky'attit,
jøts pøni midi ja ñjøkxtip ejtp øts ja njamyøøt'attit;
øts ja xdios'attip,
jøts øts njaa'y ja'adi.

¹⁷ Paty ja yide'en yjaakwaa'ñ:

Nanky'abikyidi,
kidi ja kya'øybi xyiktundi;
jøts jade'en ngupøktit,

¹⁸ øts meets xteety'atp, jøts øts meets n'u'nk'atp,
jade'en idø'øn wya'a'ñ ja Dios Teety.

7

¹ Jade'ents meets migu'uktøjk idø'øn xnijawidit ku ya'at øy'ajtin ja Dios tø tyikta'ñ. Ja'agøjxp adøm idø'øn øy tsuj njujky'ajtin, ka'ap ja nne'kx ka'ap ja n'anmija'win nyik'ejtint pøky agujkp. Dios chø'jkingøjxp adøm idø'øn ja Dios ndamiyojxint ja njujky'ajtin.

Sa ja Corinti jaa'y tyiktigatsti ja wyinmaa'ñ

² ja'gyukidik øts ndsojkin nba'ayo'owin! Jabi ka'axi meets niti windigø'oyin tø xkapaatti øøts køjxp. Nipøn øø ngawindaay'aty, nipøn øø ngana'ixy.

³ Kidi meets ya'at xja'gyuki ku meets nugo nbøkñipiky, jabi jade'enxi tø nwa'a'ñ jawyeen ku meets ja ndsojkin ja nba'ayo'owin tø ndamiyøxy, jade'en ja tpatni møøt mee ñamyayi njujky'aty jøts møøt mee ñamyayi n'ookt.

⁴ Njøp'ijxy'ajtpy meets jøts amuum mee ndajotkukj'aty. Øy øøts idø'øn n'ayo'ombaaty janch jotkukj ø nnayjawi.

⁵ Ja'ayip øø nja'jty ya Macedonia, ka'ap øøts ja poo'kxin nmøøt'aty, øy øøts magama jaa'y xmidsepwa'a'ñ jøts øøts ja tsø'øgi nyikmajada'akwa'a'ñ.

⁶ Yikjotjimbijtpy ja Dios ja yjaa'y, tøts øøts ja xyikjotjimbity ku ja Tiro tø yja'aty.

⁷ Kidi ja'ayip øø nugo ndyimdyajotkukj'ajtpy ku ja yam tø yja'aty, jabi ja'axi øø nayide'en ndajotkukj'ajtpy ku meets ja nekim mnimadya'akyiyi mjantyaxondajkp meets ja'. Jade'en øøts ja xamimadya'aky ku meets xjapaatwa'a'ñ xja'ejxwa'a'ñ jøts nayide'en tñigajpxmi ku meets xajotmay'øøky. Jotkukj øts idø'øn nnayjawi ku meets xja'myech.

⁸ Øy ja nøky tø mja'atsyikjotmaadyøkiyidi midi meets øjts ndaniguexy, ka' øts ja ixyam sa n'ukja'wiñi. Njanch'ayojyih'ñimts øts idø'øn ja jawyeen, ku øts n'ijxy ku øts nnijawi ku meets ja nøky yikxon ja jotmay tø mduktatøkiyidi tøts idø'øn ja jade'en y'ukjajtkøjy sa n'ukjatka'am.

⁹ Jotkukj øts ixyam nnayjawi jøts kidi ja'ajip øts ndajotkukj'ajtpy ku meets ja jotmay møk'ampy tø m'atspaadyiyi, jabi ja'axi ø ndajotkukj'ajtpy ku meets ja mdsinaa'yin tø xyiktigach sam idø'øn pyaa'taty. Tøxi dø'øn xmidanidi ja jotmay'øøgyi sa ja Dios ttsøky sa Dios tkupiky. Jøts ku øøts ja nøky jade'en tø nguexy kidi ka'øy adøtspip øøts, kidi ayo'onip meets ja mdukpaatwajniyip.

¹⁰ Ja ayo'on midi tuda'aky yikupøjxp sam ja Dios ttsøky'aty, yiktigachp ja tsinaa'yin ja' jøts jade'en yikpaaty ja yiknitsø'ok'ajtin. Pøn tkajanchja'widip ja Dios wenk ja tjawidi ja ayo'on jøts ja y'anmija'win tyikudigøydi.

¹¹ Øy meets ja ngajpxy tø m'atsyikjotmaadyøkiyidi, tuda'aky meets ja tø xkupiky sam ja Dios ttsøky'aty. ¡Ejxtits inet ku ja mdsinaa'yin ne'egi tø tyigatsti! Tø meets ja ngajpxy ne'egi myikwinmaa'mbyaadyiyi jøts jaty tø xnigajpxti ti dø'øn tø xundi; tø m'atsyikjotma'adyidi, tøts nayide'en xtsaachjawidi. Winets meets jaty xjadyimyigajpxwa'a'ñ jøts nayide'en xiidyunwamidi pøni pøn idø'øn tø mmidundigøydi. Ja' meets idø'øn myiknigaxi'kpy ku meets tø mgatundigøy.

¹² Ja'agøjxp meets jade'en tø nnijayi ku meets ejtp nja'myech jøts kidi ja'agøjxip øts ja nøky tø nguexy ku øts ja'ayi ngajpxwejwa'a'ñ pøn tø tyundigøy uk pøn tø yikmidundigøy. Pø ja'agøjpxi mee nnijayi jøts ja Dios xuknijawidit mabaat ja mba'ayo'owin myajada'akti ku øø xpa'ayøy.

¹³ Paty øøts jotkukj nnayjawi.

Jawaani jotkujk øø nnayja'wiyi ku ja Tito ya tø yja'aty jøts ku meets ja tø xpudøki jøts ja jotkujk tyiknaxt.

¹⁴ Ka'ap ø nugo tø nwindaa'yi ja Tito ku meets øy tø mjaa'y'aty samdam øts ja jawyeen ndamimadyaajky. Ka'ap øts ja n'ayuujk nugo tø xyiktsø'odyuñ, tiy ja tø pyidsimy.

¹⁵ Jabi mdsøjkipxi meets ja ne'egi ixyam jawaani møj ku meets ja tuki'iyi tø xpadunguixy põni ti jam mda'ana'amiyidip, jøts ku meets ja øy tuda'aky tø xwindsø'øgi.

¹⁶ Ka' xnijawidi mabaat øts nxondaajkin yja'aty ku mee nnijawi ku adøm øy tsuj nnayja'gyukiyindi.

8

Ku ja Pablo pudøjkin t'amidøy jøts yiktabudøkidit ja ayoobi jaa'dyi

¹ Ixym meets migu'uktøjk nduknijawiwya'andi mabaat idø'on ja Dios y'øy'ajtin tø pyudøkiyidi ja Macedoniit janchja'wibidi.

² Øy ja sagasa tjamøjatti øyi myeeñ øyi pyikta'aky yjaga'etti may, jotkujk ja tø tyakoji ja pudøjkin jade'en samdam ja møj kumeeñ jaa'dyi.

³ Tø ndyimy'ixy tø ndymñijawi mabaat idø'on tø tyakti ja pudøjkin øy ja niti yjaga'uktaa'nxiniyidi.

⁴ Møk øøts ja tø x'amidøy, tyimdyanuu'kxaktip idø'on jøts pyudøjkin ja yikupøktit midy yiktabudøkiwyandip ja jaa'y midy nayide'en tjanchja'widip ja Dios.

⁵ Jinaxy idø'on ja ne'egi tø ttundi yam øts ja jade'en ngajøp'ijxy'aty, jabi jawyeenxi ja Dios ñadyamiyojxiyidi jøtsnim øøts ja xpaduñ samdam idø'on ja Dios ttanibiktaagi.

⁶ Ja'agøjxp øøts idø'on ja Tito ndaguwani jøts pudøjkin ja jam tjaa'kyikmukoijt midy mee kø'øm mdsøjkingøjxp myakwampy midy ja jam tø t'ukyikmuktsøøñ.

⁷ Agajpxy mee mbidsimy øy yjadyimysudso'ambyi: møk meets ja ajot'ajtin xmøødi møøt ja winmaa'ñ sudso yikxon xyaktit ja Dios y'ixpøjkin, jøts mwijy meets, wa'ats xjatti wa'ats xnijawidi, jøts møk mee xtsøky møk mee xpa'ayøw niwine'en øø nyam'aty. Patyxi øø nwa'añ ku meets agajpxy mbidsømit nayide'en ku ja pudøjkin xyaktit.

⁸ Ka' meets ya'at ndyimdyaguwani, ja' øøts idø'on nanky'ejxwajnip sa dø'on ja Macedoniit jaa'y ja chojkindi pya'ayo'owindi jøts yiknijawit nayide'en jøts ku meets ja mdsøjkin ja mba'ayo'owin tyiyi yjanchi.

⁹ Mnija'widipxi jøts ku ja nwindson'ajtim Jesucristo ja y'øy'ajtin jadine'en tyikmajada'aky, jøts møk ja tsøjkin møk ja pa'ayo'owin tmøøt'aty ku ja nguwanjatiyidi ja'agøjxp ku ja mdsøkyidi mba'ayøyidi, jabi jotkujkxi ja y'ijty tyiknaxy møøt ja Dios Teety. Adømøjxp ñanky'ayodøkiyi jøts ja øy'ajtin jade'en nbaajtint Cristo køjxp.

¹⁰ Meets m'øy'ajtingøjxp øts idø'on yide'en nwa'añ ku meets junkti'jyip ja pudøjkin xyikmuk'okwa'añ janch pe'tpy janch yijy.

¹¹ Nayide'ents idø'on ixyam xu'undit sam tø xyiktso'onda'akti. Tuki'iyi ja m'aaw ja mjoojt xpikta'aktit kunim ja xyik'abaadidit, põni mabaat nidu'uk nidu'uk myajada'akti.

¹² Jabi ka'axi ja Dios tuki'iyi t'amidooguixy, ja'axi ja y'ijxpy mabaat idø'on nidu'uk nidu'uk chojkingøjxp tyaky.

¹³ Ka'ap jade'en xja'gyukidit ku meets ja mmigu'uk nduku'ayowidyøkiwya'andi;

¹⁴ jabi nixem niyamxi dø'on tuknax nmøøt'ajttindit ja pikta'aky. Ixam meets xmøøt'aty midy yø ka'ejtxidip, ja'atp ja xøøw ja jumøjt jøts ku meets yø wyinaty mga'ejtximiyidi winets yø mmø'mmyiyidit. Jøts jade'en ñi'awich'att,

¹⁵ sam ja Dios kyajpxy wya'añ: "Pøn tyumøøt'ajtkijxpy ka'ap ja tø wyinda'anxyi; jøts põnts waani tmøøt'ajtp, tuki'iyi ja tø ttapatkixy."

Tito jøts ja myigu'uktøjkti

¹⁶ Ja' øts Dios ndamøja'wip ku meets ja Tito nayide'en mba'ayøyi sam øts.

¹⁷ Tø ja tjanch'øyjawi ku meets ja ndanigaxwa'añ, tøyim ja jeexyip ttuñ kø'øm mdsøjkingøjxp jabi mjanch'ejxwajnipxi meets ja'.

¹⁸ Ixyamts ja Tito møøt nguexy tu'uk adøm nmigu'ukti midy øy yiknimadyakp ma jaty ja janchja'wibi jaa'y ñamyukyidi, jade'en ja yiknijawi ku ja øy tiy tñigajpxy ja nitsoojkin ayuujk põni ma jaty ja tø wyidity.

¹⁹ Kø'ømyi ja Macedoniit jaa'y tø twi'ejxti jøts øøts yø møøt ndu'unt jøts øøts yø møøt nja'kyikmukoijt ja pudøjkin. Ja'agøjxp øøts yø'øbi tunk nduñ jøts ja nwindson'ajtim jade'en yiktawindsø'øgit jøts jade'en meets xyiknigaxø'økt ja mdsøjkin ja mba'ayo'owin.

²⁰ Ja nabyagajpxi dø'on kayiktsojpk ku øøts ya'at pudøjkin nyikmuky.

²¹ Paty øøts niti taay ngayiktuñ øy øøts yø nminaxt Dios wyingujk jøts jaa'y wyindump.

²² Nayide'en øøts ixyam ndamigaxi jadu'uk adøm nmigu'uk midy ja Dios yja' øy tsuj pyaduujnip jøts ku meets ja nayide'en mdajotkujk'ajtmäyi.

²³ Ku pøn jam tyknidøøwit ti dø'øn ja Tito tyumpy, jade'en x'adsojimbettit jøts ku øts yø nmigu'ugi, øts nmøøtumbi yø', øøts idø'øn ndumpy ja pudøjkin pøni pøn tsojpk ja Dios. Jøts pøni yiknidøø'jimyidip ti yø tyundip yø jadu'ukpi migu'ukti, jade'en x'adsojimbettit ku janchja'wibitøjk yø tø kyxyidi jøts ku ja Cristo yø jade'en twindsø'øgidi.

²⁴ Paty ø nwa'añ ku jam mbaadiyidit yikxon xuk'ejxtit xuknijawidit sa meets ja tsojkin sa meets ja pa'ayo'owin xmøø'taty jøts ñigaxø'økt jade'en jadits meets ndajotkujk'aty.

9

Ku ja Pablo tñigajpxy sudso ja pudøjkin yjaakmukt

¹ Ka' pyaat'atyiyi ku meets ya'atpi winmaa'ñ jeexyip ndanijayi,

² jabi nnija'wifñixi øts ku meets ja pudøjkin jatyi xyakøjy. Jotkujk øts idø'øn ja Macedoniit jaa'y nnimay'etti ku meets junkti'jyip ja pudøjkin xyakwani jøts jade'en namay ttunwamididi sa me tø xunjøpi.

³ Ja'agøjxp øts ya'at migu'uktøjk ngaxti jøts mdukja'myatsidit ku ja pudøjkin xyik'awejxtit. Jøts øts jade'en ja n'ayuujk tyø'øt sam øts yø tø ndamimadya'akti jawyeen.

⁴ Ja kuts jotmøn ja Macedoniit jaa'y nmøøtnøjkxt jøts ja jam m'atspaadidit yam meets jam wyinaty niti xka'awixy. Tsø'ødyuñimts ja tya'ant ku wyinaty jade'en yjaty yam meets øy tø n'uknimadya'aky. Jaa kidi meets ja tsø'ødyu'unin jawaani møj mbaadiyit?

⁵ Yide'ents øts yjawi ne'egi ndanibiktaagi jawyeen ya'at jaa'y m'ats'ejxidit jøts jade'en mjaakpudøjkigyoyjyidit jøts kya'pxt ja pudøjkin mididi meets tø xni'adsowi. Jøts jade'en wyinaty jam mgø'ømdsojkin xyiknigaxø'økti jøts ka' mwa'andit ku øøts nugo ndyimyajada'aky.

⁶ Ejtp ya'at xja'myats'ettit: Pøn waani nepp, nayi waani ja tpiky ja pyikta'aky; jøts pøn may nepp, nayi may ja pyikta'aky ja wyimbijty.

⁷ Kø'ømdsøky'ampy idø'øn ja pudøjkin xyaktit. Kidi adsep'amip ja xu'undit jabi tsojkipxi Dios ja' pøn xondaajkingøjxp tyajkp ja pyudøjkin.

⁸ Maajyip ja Dios jøts tkaxt køx kida'ak ja kunuu'kxin jøts jade'en xmøø'tat'ettit pøni ti tsojkip, jøts nayide'en ja mmigu'uk xjaaktanipaattit tuki'iyi ja pudøjkin.

⁹ Pø yide'enxi ja Dios kyajpxy wya'añ:

Pøn ttabajaa'ñaxp ja ayo'on,

pyudøjkip ja ayoobi jaa'y ja', jøts ja y'øyjaa'y'ajtk niwindem ja kyagugøxi.

¹⁰ Abaadi ja Dios tyaky ja jujky'ajtin jøts adøm jade'en tuki'iyi nmøø'tajtkøjxint jøts ja nmigu'uk nayide'en ja pudøjkin ndanipaajtint.

¹¹ Jøts meets nayide'en køx kida'ak xmøø'tattit ja øy'ajtin jøts øy pøngapøn xmo'odit. Ja pudøjkin mididi meets xanigaxip, ja Dios ja tyamøjawiðip tyagunuu'kxjawidip ku ja wyinaty yiktanipaatti.

¹² Kidi ja'ayip adøm ja nugo ndabudøkiwya'añindip mididi ja ka'ejtxidip, jabi ja'axi nayide'en yiktump jøts ja Dios ja tkajxak'ettit.

¹³ Ja'agøjxp ja Dios ja ttamøjawidit ku meets tiy ka'pxy xmimadowdi ja Cristo y'øgyajpxy y'ømyadya'aky sam nayide'en ttamøjawidit ttagunuu'kxjawidit pøn jatyi wyinaty paajtmiiyidip ja pudøjkin.

¹⁴ Jøts meets ja nay jaayi mgugajpxajkmiiyidit jabi tøxi meets ja Dios ja myøj'øy'ajtin wyinaty xyiknigaxø'økti.

¹⁵ Janch møj ja Dios ku ja møj kunuu'kxin tø xmø'øyim! ;Ka'ap aaw ayuujk yikpaaty sudso ja nnimadyajkin!

10

Sa ja Pablo yikutuky ku ja nwindson'ajtim tkudani

¹ Tyimgyø'øm øts idø'øn nnuu'lksa'aky nayide'en sam ja Cristo jeexyip kø'øm ttuñ. Jade'en ja kajpxy yø'øy kuk meets nnijayi, tyimy'ap meets ja nøky ndanigaxi, jøts ka'ap øts nayide'en njaa'y'aty ku øts ja jaa'y møøt nnabyaadyi, ja tsø'øgik øts nyikmajadakpy.

² Paty nwa'añ, ku mee wyinaty n'ats'ixy jøts ø xkayik'ambøktit ku øts ja jamyi n'uknibidø'knit pøn ja y'aaw ttakajpxtip ku øts ngø'ømwinmaa'ñ nyiktuñ sam øy pøn jaa'yin. Ka'ap ø pøn ndsø'øgi pøni jade'en ja ttsokti.

³ Janch tiy idø'øn ku øts nbojkipitumbijaa'yi, ka'a'pts øts mibaat ja pøky x'ana'amt. Ja Diosxi øts ja yja' xuu'møy'ejtp.

⁴ Ja nmø'ajtin øøts, ka'ap ja pøky agujkpy pyidsimy, Dios wyingujkp ja chøøñ mididi tyikudigøøpy pøn ja Jesucristo møøt kyanamyayi.

⁵ Jade'ents idø'øn, nyikudigøøpy øøts ja katiiby kajpxy mididi nugo nankmyøtøjkiiyip ku ja Dios ja yja' tkaan'ky'ejxwajniyi. Jawyeen øøts ja Cristo nduknijawi sa pønjabøn wyinamy jøts ja tu'ugyi ja yja' tpaduujnidit pøni yikutujkpy ja jade'en.

⁶ Ndiidyu'ump øøts pøn ka'pxy tkabadu'undip ya'atpi ana'amin ku meets wyinaty tø xpadunguixy jawyeen.

⁷ Ku mee x'ijxy ku ndsø'øgi ka' xnijawidi sam ndyimyjaa'y'aty. Pønjabøn wya'andi ku ja Cristo yja'atyidi, nayide'en idø'øn tnijawidit ku øøts ja Cristo xja'ajtmi.

⁸ Wan meets jam winaagin mwa'añ ku øts ja nwindson'ajtim kyutujk nugo ndyimdyamajada'aky, niti ngapøkyjawi jabi kø'ømxj ja nwindson'ajtim tyajky ja kyutujk jøts meets jade'en ja mjanchja'win myøjit, jøts ka'ap meets ja mgudigø'øvin n'ixajyi jade'engøjxp.

⁹ Kidi xja'gyukidi ku meets yø nøky nugo nda'adsø'øgiwya'añ.

¹⁰ Jade'en ja kajpxy yø'ø y tyimy'ap ja n'ayuujk nguexy jøts ja jaayi kø'ø m nga'tuknitanaa'ni, ka'abik øts øy tsuj ja madyajkin nmøødi.

¹¹ Pøn idø'øn yide'en ja ayuujk tyikyø'øpy nayide'en idø'øn ja tnijawidit ku øøts nayide'en ndyimyjaa'y'att meets windump sam øøts n'ayuujk nguexy jagam.

¹² Ka'ap øø nnay'a'ejxyi jøts øø kø'ø m nnay'agajpxiyit sam jam muum winaagin ttundi. Ja kaja'gyukin ja yikmajadajktit ja ja nixem niyam kø'ø m yjanch'uknay'agajpxyidi.

¹³ Nijuuni øøts ja kutujk ngayiktuñ midit øø ngamøøt'ajtpy. Ja Dios øøts idø'øn xuknija'wip mabaat idø'øn ja tunkjøøp yja'aty, jøts nay ja' øøts tø xuu'mø'ø y kø'ø m ku meets jam tø n'atsnija'aty Corinto.

¹⁴ Ku øø nwa'añ ku øøts ja kutujk nmøøt'aty jøts meets n'ana'amt, ka'ap øøts ngø'ø m ja' nyikutuñ, øø jade'en ja jeexyip yjaty kuk øøts jam jawyeen jeexyip tø nga'ats'øch. Jabi meetsxi jawyeen ndanija'jt ja øgyajpxy ja ømyadya'aky sa ja Cristo y'ø y'ajtin xukpaajtint.

¹⁵ Ka'ap øø ndsøky jøts øøts nugo nnadya'agajpxit ja wenk jaa'y tyunk ja kajpxwejin midit tø myikmo'odi. N'awixy'ajtpy øøts ku meets ja mjanchja'win winjaa windsojk myøjit myayit mabaat idø'øn pyaat'aty jøts mabaat øøts nayide'en nmajada'aky ku øøts jam ndu'unt ma meets jam.

¹⁶ Xjats øøts jade'en ngajpxwa'kxt ja nitsoojkin ayuujk abiky'et abikyajp meets mjixkø'ø m, jøts nijuuni øøts nganadya'agajpxit ja wenk jaa'y y'ixpøjkin.

¹⁷ Pøni jaa pøn ñay'agajpxwa'añi kø'ø m, ka'ap jade'en pyaat'atyiyi, ja Dios idø'øn ja y'ø y'ajtin ja ne'egi ja'ayi y'agajpxip.

¹⁸ Ka'ap y'ø byidsimy ja jaa'y pøn kø'ø m nay'agajpxiyip, ja'ats ne'egi øbyidsømp pøn ja nwindson'ajtim t'ø yja'wip jøts ja t'agajpxy.

11

Pablo jøts pøn ñadyijyi nañikajpxidip Jesús kyudanaabyi

¹ Meets migu'uktøjkti, wan meets mwa'ant ku nugo mo'tpin nmadya'aky, ja'gyuki meets waani wan øøts ngajpxy t'ukyiknaxy midit n'am njotp nmøøt'ajtpy.

² Øy mee n'ama'at'aty ja Dios øts idø'øn jade'en kø'ø m xyik'adøtsp; jabi tøxi ja Cristo yja' tu'ugyi ndukpabøjkidi jøts ku meets ja ndawinguwawiywa'añ. Wa'ats meets jam nyiknøjkw'a'añ, sam pøn ja øky tkidyimy'ijxy'ajtipnim.

³ Jade'en sam ja Eva ja tsa'a'ñ wyindaayiyøø, wan meets yjawi nayide'en myikwindaa'y'atwa'añ jøts mwinmaa'ñ tyigatstid jøts jade'en mga'uknadyamiyojxnayidit ja Cristo.

⁴ Jam pøn ja Cristo y'ixpøjkin wenk tnigajpxip, ka'ap nayide'en sam øøts nnigajpxy; jøts meets ja Espiritu Santo yja' nayide'en wenk xnija'wiyi, tigach meets ja yiknitsokpi ayuujk xnijawidi, ka'ap nayide'en sam øø nnigajpxy.

⁵ Pøn jade'en myikwinmaa'nmya'jtidip ka'ap øts ja mabaat xyik'amutskidi øy ja nugo ñadyijyi yjanañikajpxyidi ja Jesús myøjkudanaabyi.

⁶ Øy øts n'aaw n'ayuujk øy tsuj ngamøøt'aty, ka'ap øts nwinmaa'ñ ñayide'eni. Tø øøts yø nyiknigaxø'kni ku meets o tigati tø ndabudøki.

⁷ Tø øts idø'øn ndundigø y ndejint ku meets jadi'iñi tø ndukmadø y ja nitsoojkin ayuujk ku ni tu'uk centabi tø nganibiky, jøts øts jade'en ayo'ijxyim njaty nugo ku mee xpiky ja øy'ajtin?

⁸ Wenkpi janchja'wibitøjk øts ja myeeñ tø ngupøjkidi ku meets janch nduknija'wiywa'añ ja øy'ajtin.

⁹ Jøts ku øts jam n'uknaxjy ma meets jam, ka'ap øts jam ojts pøn nyik'ayø y pøni ti jaty ø xka'ejtxip; jabi ja nmigu'ukxi øts ojts xujnidi ja may'ajt pøn tso'ondip jam Macedonia. Jade'ents mee ka' nyikjotkixy, jøts ka'ayim meets nugo nyikjotkøxwa'añ, jade'eñim ø nyiknaxt sayim ø nyiknaxy.

¹⁰ Nayide'en sam øts ja Cristo tyiy'ajtin njanchja'wiyi nayide'en ø njawi ku meets nnøjmi, ku jam Acayi y'etjotp ni tu'uk ja jaa'y jam, pøn ø xuk'ixmatsp ja'abi xondaajkin ku øts Dios yja' nnigajpxiyi.

¹¹ Jjadits øts n'ayuujk jade'en nyikwa'añ? Jja'agøjxp idø'øn ndejint ku meets nga'uktsojkin? Wa'ats ja Dios tnijawi mabaat øts ndsojkin yja'aty meets køjxp.

¹² Jade'eñim øts yø ndunk nyikyø'ø'yett jøts ja kyamøj'attit pøn ñadyijyi nañikajpxidip ku ja nayide'en tyumidi sam øøts.

¹³ Yø'øbi jaa'dyi nugo yø tyaay'atti ku ja Cristo tkudanidi.

¹⁴ Ka'ap yø kumaap nja'wa'ant, jabi kø'ømbaaxi ja miku'windsøn Satanás ñanky'ijxyiyi ejximdam ja Dios y'ankilis kunuu'kxy.

¹⁵ Paty nayide'en yø tyumbi ñanky'ejxmiyi samdam ja øybi tumbi jaa'y. Ja chinaa'yin ja yiktatidyu'undip jade'en sam ja pyaat'atyidi.

Sa ja Pablo y'ayo'ombaaty ku ja Jesús tkudani

¹⁶ Ixyam mee nnimaagyojmi jøts kidi nugo mwinmaydi jøts ku nmø'øty. Pøni jade'ents xja'gyukidi, wants øts jade'en tmadya'aky jøts øts nadyijyi namyikajxibim nnayjawiit.

¹⁷ Kidi mee mwa'añ ku øts ja nwindson'ajtim jade'en xyikmadya'aky, jabi nugo mo'tpixi øts idø'on, ku njanch'uknay'agajpxiyi.

¹⁸ Jaaxi jaa'y pøn nadyamikajxidip ja ñaxwii'ñit tsinaa'yin, wants ø nayide'en nduk-namyikajxmiyi.

¹⁹ Jabi møj ja'gyukipxi meets mjaa'y'aty, patyts meets sa xkatijy pøn mo'tpa'an madyakp.

²⁰ Ja' mee ne'egi m'øyja'wip pøn jiyujkin myiktuujnidip, pøn mwindaay'ajtidip, pøn mnijuu'yniyidip, pøn mdekpya'an'ajtidip. Mgupiky'ajtip ja' øy sagasa myiktunidit.

²¹ jØy øts ixyam nnabyøkyjawi ku øts jade'en tø ngajaa'y'aty kudam meets yø' ne'egi jade'en x'øyjawi!

Pøni jaa pøn ap tymñayjawi, xmaapy øts ja', øy øts nayide'en njaa'y'att.

²² Ja hebreo ayuuj nadya'agajpxidip? Nnija'wip øts ja nayide'en. ¿Israelit jaa'y ja'adi? Nayide'en øts. ¿Y'apteety'amøj'ajtip ja Abraham ja'? Nayide'en øts ja n'apteety'amøj'ajtimi.

²³ Jade'en ja wya'andi ku Cristo tmidundi? Jawaani øy øts ja ne'egi nmiduñ, øy øts jade'en ja tsojkin njagamøøt'aty jøts ø nnay'agajpxit kø'øm. Jawaani møk øts ndunk ne'egi tø nyiknigaxi'iky yam yja' ja ka' ne'egi ñigaxø'økti. Tø øts ngu'ayo'ombaaði ja ndunkjøøjp, ne'egi ka'ap ja'adi. Ne'egi jawaani may ojk øts idø'on ja tø nyiktagudsumi, jøts kawinaak ojk øts ja o'jkin tø n'ixy jaay wingon xwindani.

²⁴ Magoxk ojk øts ja ayo'on tø ngupiky midi øts nmigugajp israelit jaa'y tø xmø'øy sam ja kyutujk wya'andi ku ee'pxmajk taxujk ojk nyikwøpy.

²⁵ Tigøøk ojk ø tø nyikipwøpy, jøts tu'uk ojk tø nyiktsaaga'ach. Tigøøk ojk øts ja nbarki tø myejy'okida'aky. Tu'uk ja xøøw tu'uk ja koots nyiknaxy jam mejkyujk'am, ja kipy pyidasi, ja puu' pyidasi øts iiy xjaakyiknøøwinganamp.

²⁶ Jagambaat øts kawinaak ojk tø nwidity jøts jam muum ja møj nøgom xyikjø'øtwalañ, jøts ja jaa'y muum xwimaatswami. Ngø'øm migugajp paat øts xni'adani xuu'adani sam nayide'en y'adøtsmidi ja wenkajp jaa'dyi. Nbatpy ø nayide'en ja ayo'on møj kajpjotp samdam abak etjotp uk jam mejjotp. Nayide'en øts ja xka'ødyumidi pøn ñadyijyi Jesucristo janchja'wibidi nañikajpxidip.

²⁷ Tø nduñ mabaat øts ja ngø' ja ndeky myajada'aky, øy øts ayo'on ja xadukpaaty; kawinaak ojk ø ngamaa'y nga'ity; ayuu adøøtsi tø nyiknaxy kawinaak ojk; tø ndanaxy ja tep ja xux, ni ja nwet ni ja nnaamy tka'ukpatni.

²⁸ Øy øts idø'on jade'en ya'atpi ayo'on njapaaty uk mididi jatyts njayiknaxpy, møjip mayip øts ja njotmay ku øts ja njotmay'ati jabom jabom pøn jaty tjanchja'widip ja nwindson'ajtim.

²⁹ Pøni jaa pøn ja yjanchja'win kamøj, janch pamaa'yin ø nnayjawi. Pøni jaa pøn wenkpi winmaa'ñ tpanøjkxidip, møk øts ja n'ayooji, møk øts ja ngudsø'ødyuni jøts øts ja nugo njantya'ambiky.

³⁰ Pøni janchpaat'ajtipts idø'on ja nay'agajpxi ja ngamøk'ajtipts ø ne'egi nadya'agajpxip.

³¹ Ja Dios Teety mididi ja nwindson'ajtim Jesucristo tyeety'ajtpy mididi paat'ajtiyip xemikøjpx yikmøjawit yikunuu'kxyjawit, wa'ats ja tñjawi ku øts ejtp ja tyiibi ja yjanchpi nnigajpxy.

³² Jøts ku øts nnajxy jam Damasco kajpjotp, jam dø'on tu'uk ja windsøn mididi tmidump ja yjadu'ukpi møj windsøn Aretas, ja Damaskit windsønts idø'on ojts t'ane'emy ja tyumbitøjk jøts ja tyimiyik'adujkøxtit ja tuu' ma jaty ja kajp yiknidøki jøts øts ja xmatstit jøts ø ndymiyik-tsu'umt.

³³ Ti mats ja Dios xuk'ixmajtsint, jabi jamxi nguejky, ma ja møj pøch jam, mididi ja kajp nawidejtip. Øts nmigu'uk xkatstidyøø mutsk ventani agø'øm kachjøtpy. Jade'en øts idø'on ja xkapøktø.

12

Sa ja nwindson'ajtim tñanky'ijxyiyi ja yja' Pablo kyumaa'yjøtpy

¹ Nnija'wip øts ku niwine'en kyajami ku nnay'agajpxa'ant kø'øm. Meets ukja'gyuki, kuwani øts idø'on nnigajpxt sudso nwindson'ajtim ja yja' tø tñanky'ijxyiyi ku ø kø'øm nnay'ijxyiyi kumaa'yjøtpy.

²⁻³ Ndyimy'ijxy'ajtpy tam øts tu'uk ja jaa'y midu tjanchnja'wip ja nwindson'ajtim Jesucristo midik myakmajkts jumøtjip ojts yikwaanijky jap tsajpjøtpty. Pø sudso idø'on ja yikwaanijky, pø møøt ñe'kx uk nugo y'anmija'wints idø'on ja nøjxpx Dios tu'ugyi tyimy'uknija'wip. Ja'ayi ø nmija'wip

⁴ ku ojts yikwaanijky jap tsajpjøtpty ma ojts tmadøy ja kajpxy ja madya'aky midu ka' pøn nugo ñiyuktukmadøy.

⁵ Ti kanadyamiguexyim idø'on ja yjawu ku øts jade'en sam ja jaa'y, ka'ats øts nnamyikexyiyi pø wanimts øts ja ngamøk'ajtin nnadyamikexyiyi.

⁶ Øyimts øts kø'øm njanchjanañigajpxwa'añiyi, pø ka'axi ja ñugo kajpxyi, pø tiy'ajtinxi øts wyinaty nnigajpxy; ka'ats øts jade'en nduñ jøts kidi pøn nugo wyinmay jøts ku øts ngamaabyi jøts ku øts ka' njade'eni sam pøn yamts øts idø'on ja jade'en ngatuñ sam ja wyinmaydi.

⁷ Kawinmaañixi dø'on ja chuju midu øts ja nwindson'ajtim xuk'ejx ngumaa'yjøtpty; jøts øts ja nganadyamikaxiyi, wimets nja'wigyejky adsuljky nikøjpx yjajkejky samdam ja kujp xku'umint. Ja mi'kwindsøn Satanäs ja tyunkjøøjp jade'en ñan'ky'ejxip.

⁸ Tigøøk ojk øts ja nwindson'ajtim ojts njanch'amidøy jøts tyiknaxt ja jajin ja tøø'yin;

⁹ jøts øts ja nwindson'ajtim yide'en ja'ayi x'adsøy: "Ja ndsojkin ja nba'ayo'owin mets ja'ayi mbudøkiyip; jabi jade'enxi øts nmøk'ajtin ne'egi ñigaxi'iky ku nbudøki pøn ja kyø'øm møk'ajtin ka'ejtxip." Jade'en ja wya'añ. Patyxi øts ja ngamøk'ajtin ndajotkujk'aty, jøts jade'en ja Cristo yja' kyaxø'økt.

¹⁰ N'øyja'wip øts ja kamajadajkin, n'øyja'wip øts ku nyikjemnøjmi nyiktenøjmi uk ku tigati xka'ejtxi, uk ku øts Cristo køjpx nyikmi'ambiky ngu'ayo'ombaaadi. Ku nnayjawiyi nmøk'ajtin kya'ity jats idø'on nwindson'ajtim ja myøk'ajtin tyik'awa'añ jøts øts ja xuk'ajot'aty.

Ku ja Pablo tpamay tpadajy ja Corintit janchja'wibidi

¹¹ Janch mo'tpin ø tømadya'aky ku kø'øm tøm nnay'agajpxyiyi, kø'øm meets tøm xyik-jaty jabi meetsxik idø'on jeexyip øy tøm nmadya'aky jøts øts jade'en jeexyip kø'øm tøm nganay'agajpxyiyi. ¿Tyimybåat ja ndejint yja'atti ja wyejin ja kyajin pøn ñadyiyi myøjkudanaabyi'ajtpy ja nwindson'ajtim? Øy øts idø'on mabaat nguidymiyaty ka'ap øts ja mibaat xwinaxti.

¹² Ku øts ja ndunk tøm nykyø'øy ma meets jam ejtp øts nnan'ky'ijxyiyi ku øts idø'on ndyimgyudanaabyi'aty ja nwindson'ajtim. Ejxpajtingøjpx milagrikøjpx øts idø'on ja n'ødyunk tøm x'ejxidi tøm xnija'wyidi.

¹³ Pøni mwandipts ku meets ka' tuknax myik'ødyuñ sa øts ja jadu'ukpi n'ødyundi ma jaty øt nwidaty ma jaty ø nbaatti n'ejxti ja jadu'ukpi janchja'wibidi, janch idø'on mw'a'andi. Xmøøyimdsik meets jam ja kaaky ja maadaajk kuk øts jam n'ats'øjch. iMaa'kxti, kidi xka'øyjawidi ku øts yide'en nw'a'añ!

¹⁴ Exyam nnay'a'ejxyi nnay'abaadiyi ja' ku meets myidigøøk ojk n'ats'ejxwa'añ. Ka'ap meets jam nugo n'atsyik'adujkti'wya'añ. Jabi ka'axi meets ja mbikta'aky n'ixaajyi, meetsxi dø'on ja m'øy'ajtin ja'ayi n'ixaajyip. Yiknija'wipxi ku ja u'nkteety t'ixa'adi ja meen ja jingaap midu ja y'u'nk ñidsina'adyip jøts ka'ap ja y'u'nk ne'egi ja tyeety ja yjujky'ajtin tjotmay'attit.

¹⁵ Xondaajkin ø nbaatp ku mee ndamiyøxkøxt ja n'aaw ja njoojt mjanchja'wingøjpx; øy meets yjawu xjagatsøky samdam meets ndsøky.

¹⁶ Øy winaañin tjaja'gyukidi ku meets jam nugo ngayik'adujkti, jade'en ja wya'a'andi ku mee nugo tøm nwin'iñ.

¹⁷ ¿Tøm meets ndejint ndawindaay'aty ja nmigu'uk pøn jaty meets jam tøm ndaniguexy?

¹⁸ Kø'øm øts ja Tito n'ane'emy jøts m'ats'ejxidit jøts øts ndamigaxiyi'ñ jadu'uk adøm nmigu'uk. ¿Tits, mwindaay'ajtidu ja Tito? ¿Ti ka' x'ejxti ku øts tu'ugyi nwinmaa'ñ nyikyø'øy jøts tum jade'en øts n'øyja'y'aty?

¹⁹ Wan meets jade'en mwinmay ku øt nugo nnagyubøkiyi. Ka'ap yjade'eni. Wa'ats ja Dios tnijawu ku øts Cristo køjpx ja ndunk tøm nykyø'øy, jøts meets jade'en ja mjanchja'win myøjit.

²⁰ Ku øts jam wyinaty n'ats'øch jade'en ø nøjpxawu ku meets yjawu øy ngapaatt samdam øts ja ndsojkin njadyimyamøøt'aty. Jøts mee nayide'en xka'øyja'wyimit ja njaa'y'ajtin samdam meets xjadyimiyatsøky'aty, ku meets xka'øyjawit ja kajpxwejin midu wyinaty nyaikpy. Jabi jade'enxi nnajtsjawu ku meets wyinaty mga'uknamyaa'nyiyidi nixem nyam, jøts xyikmøjtjkiñidi ja windii'ñ'ajtk, ja aki, ja tami'ama'at'ajtk, ja nabyagajpxi, sam nayide'en ja namyikajxan jøts nixem nyam mga'uknamyimado'oniyidi.

²¹ Wan øts ja Dios yjawu nmidsø'ødyu'unt ku meets jade'en mjaa'y'ajtni. Wan meets nguyiyit nguyaaaxit ku meets wyinaty ne'egi tøm xpadojkiñi ja mga'øchinaa'yin midu ixymbaat mgamaystutwandip. Tum ja axøø'kpi tum ja yigaappi m'amp mjotp mmimajadajkidip.

13

Xjats ja nõky y'abaadi jøts ja kajpxwejin ja kajpxpoo'kxin y'ukyikyajkni

¹ Xyam mee myidigøøok ojk n'ats'ejxwa'añ, jøts ku øts ja tundigø'øyin jam nyiktiidyøkit põni põn jam nugo tyimdyunk'ajtnidip ja pøktyunk, tsokip ja a'ejxnajpxi namajtsk uk nidigøøok põn ja wa'ats tnmadyakøxtip sa y'ejxi tyiyi.

² Ku myimajtsk ojk n'ats'øjch n'ana'amdi øts ja' põn jam yjawi wyinaty pøky agujkpy tyimchinaañidip. Xyamts nwa'añ ku nnøjkxt jadigojk ku nayide'en nbatkojmidit nay ja' põn ø tø n'ana'amdi, niwine'en øts ja ayo'ejxin ngamøøt'att. Pøni jamidits põn ja chinaa'yin tyik'ejtnidip pøky agujkpy nayide'en ja pyaat'atyidi jøts tiidyu'unin tyagida'agidit.

³ Jade'ents meets idø'øn xajotkujk'att ku øts ja Cristo xyikmadya'aky jøts meets jade'en mgawa'ant ku ja' kyajotmøjki; jabi ñanky'ejxipts ja myøk'ajtin ma meets jam.

⁴ Ja kyamøk'ajtin kyu'o'jki kruskøjxp, xemikøjxpts ixyam yjujky'aty Dios Teety myøk'ajtingøjxp. Nayide'en adøm idø'øn ja kajotmøk'ajtin njagyejpyim sam ja yjajty. Ku ja xemikøjxp nmøøtjujky'ajtin ja nwindson'ajtim jade'ents ja Dios Teety tyaky ja møk'ajtin midi meets ndabudøjkip.

⁵ Yikxon meets kø'øm nabyawinmayi, ¿mjanchpadundip idø'øn ja mjanchja'windi? ¿Ja ka' xja'myatsti ku ja Cristo xmøøt'atti? Uk nugo meets idø'øn mnañkajpxyiyi Cristo janchja'wibi.

⁶ Jade'ents øø nwa'añ jøts meets xnijawit ku mee ka' nugo nwindaa'yi ku øøts ja Cristo yja' nbaduujni.

⁷ N'amidøøpy øøts ja Dios jøts meets øy mjaa'y'att. Kidi ja'agøjxpip jøts øøts jade'en ja n'ana'amin myøjtøkit. Ja møy'ajtinxi øøts ja'ayi n'ixaapy. Padun meets ja', øy øøts agajpxy njagabidsimy.

⁸ Ka'ap øøts ja møk'ajtin nmøøt'aty jøts øøts nwindson'ajtim ja tyiy'ajtin ngajpxwe'jtiti, ja' øøts ndunkjøøjp'ajtpy jøts ja yiknigajpxt tiy ka'pxy.

⁹ Ndaxonda'akp øøts ku meets ja møk'ajtin xmøøt'att øy øts ja ngutujk njagayiktuñ. Ejtp øøts ja Dios n'amidoo'ett jøts meets ja mjanchja'win jøts meets ja mjujky'ajtin yikxon y'øyt yikxon tyuda'akt.

¹⁰ Nanga'anin ø ndsøøn ku meets ya'at nõky ndanigaxi jøts ku meets wyinaty n'ats'ixy ka'ap xjawidit møk ja tiidyu'unin midit ø tø xaguwani ja nwindson'ajtim. Ja'agøjxp øts ja kutujk tø xmø'øy jøts meets ja mjanchja'win myøjit jøts kidi ja'agøjxpip øts ja nmøødi jøts meets ja kudigø'øyin xpaatti.

¹¹ Meets migu'uktøjkti, øy meets. Yikxon meets ndamidsøky xyiknaxtit ja mdsinaa'yin, ixa'adi ja øy'ajtin ja tuda'aky'ajtin, ñankyjotkujk'atidi nixem niyam, yikxon mnamyigu'ukwa'anidit yikxon mnamyayidit, jøts jotkujk x'ejxtit. Winets meets ja Dios xemikøjxp mmøøt'etidit midit tyajkp ja jotkujk'ajtin midit tyajkp ja tsojkin ja pa'ayo'owin.

¹² Nagyajpxpoo'kxidi nixem niyam sadam ja Dios ttsøk'aty.

¹³ Niduki'iyi ja janchja'wibidi midit øøts ixyam møøt, nayide'en ja tkaxmidi ja kyajpxpoo'kxin.

¹⁴ Paatti kupøkti ja nwindson'ajtim Jesucristo kyunuu'kxin, nayide'en ja Dios Teety chojkin ja pya'ayo'owin jøts nayide'en ja Espiritu Santo nima mgamajtsu'udidit. Tiigyajpxy idø'øn, jade'en idø'øn yjatt.

JA NØKY MIDI JA PABLO TYANĠAJX JA GALACHT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Galacia

¹ Øts idø'øn Pablo'ajtp, nwindson'ajtim ngudanaapy, nipøn jaa'y ø tø xkakexy, ja Jesucristoxi ø kø'øm tø xpikta'aky møøt ja Dios Teety pøn ja nwindson'ajtim kø'øm tø yikjujkykyiyi jap oo'kpi y'agujkpy.

² Ixyamts øts møøt niduki'iyi ja nmigu'uk janchja'wibitøjkti, meets ndanijayi ya'at nøky ma jaty xpadumidi ja nwindson'ajtim yja' jam Galacia etjotp.

³ Paat meets ja øy'ajtin ja kunuu'kxin midi ja Dios Teety yajkpy møøt ja nwindson'ajtim Jesucristo,

⁴ pøn nagyiyajkiyøø jøts adøm nbøky ja xku'o'jkandi jøts kidi ja axøøkpi tsinaa'yin mibaat xmimadaajkiyindi midi yikpatp ya naxwiiñ, tøxi ja Dios Teety jade'en kø'øm ttanibiktaagi.

⁵ iTu'ugyi ja Dios myø'ajtin ndamiguy'ejaxint xemikøjxp! Jade'ents idø'øn ja yjatt.

Ka'ap ja jadu'uk abiky midi tnigajpxp ja yiknitsoojkin

⁶ Tyimñigyumaap ø nnayjawiyyi ku meets pojin xmajststutkojmi ja Dios, pøn meets kø'øm tø mwaamiñidi tø mwaadsøyidi ku ja Cristo xpa'ayonajxyindi, jøts meets ja janchpi nitsoojkin xijy xpabiky, ja wenkpidam ja'.

⁷ Ka'ap idø'øn ja wenkpi nitsoojkin ya jadu'uk y'ity. Yide'en idø'øn yjaty, jaa dø'øn jaa'y pøn meets nugo mjanchjaa'midip, ja Cristoxi dø'øn ja ñitsoojkin yjayiktigatswandip.

⁸ Tøxi meets tu'ugyi ndukmadøy ja janchja'win, kuts wyinaty pøn nidu'ugin tyiktigatswa'añ midi øøts jawyeen tø n'uknigajpxy, møkts idø'øn ja Dios tya'ambøkit, jøts møj ayo'on tyukpaadit wan tjarøni ku ttu'undit jade'en, o njadyimya'øtsi uk yjadyimdioskugajpxy'ajtpi, ku wyinaty ja wenkpi janchja'win tpikta'akwamidi sam muum ixyam yjawi ttunwa'andi.

⁹ Ixyam meets ndukja'myatskojmidi: Pøni jaa pøn ja wenkpi ixpøjkin mdawindaayiwyajnidip, paat'ajtiyip ja' ñigida'agiyit ja Dios myø'ayo'on.

¹⁰ Ti øts idø'øn jade'en xijy xyikwamp ku øts idø'øn jade'en nwa'añ. Ja' øts idø'øn xijy ndsøjkpy jøts øts ja jaa'y kuwani xtyimgyupøkt jøts øts ja kuwani xtyimdyakajxa'aktit uk kuwani øy nayide'en xtyimgyupøkt ja Dios? Pø ka'axi, ku øts ja jeexyip ja'ayi nugo nda'ødyøki ya naxwiiñit jaa'y wyingujky, ka'ats øts ja Cristo jeexyip x'uktumbi'ajtni pø ja'axi ø tu'ugyi tø nnadyamiyøxyiyi.

Sudso ja Pablo tyøjkiy'iñ kudanaabyi jøts ja tkudanit ja nwindson'ajtim

¹¹ Nijawi meets ya'at, migu'uktøjkti, ku yø nitso'ok'ajtin midi ø nnigajpxy, ka'ap jaa'y yø twinmaa'ñi.

¹² Kø'øm øts idø'øn ja Jesucristo yø tø xuknijawi. Kidi mee mwa'añ ku øts yø øy pøngapøn jaa'y tø xuk'ixpiky.

¹³ Tø meets idø'øn ja kajpxy ja madya'aky xnijawidi sa øts y'ijty njaa'y'aty ku øts ja chinaa'yin nbaduujnidi ja israelitøjkti. Mnija'wip meetsmi sa øts idø'øn y'ijty awa'an'ampy njemduñ ndeduñ pøn ja Dios tjanchja'widip jøts ø nyikudigøøwya'andi.

¹⁴ Øts idø'øn y'ijty ja israelit jaa'y chinaa'yin jawaani ka'pxy nbadumpy nika'ap øts ja nmiaaaktøjk ni tu'uk pøn jade'en kyamajada'aky sam øts. Jabi ja'ats øts idø'øn y'ijty n'amip njootp ja møjaa'dyøjk chinaa'yin.

¹⁵ Tigajts øts ndsinaa'yin. Ka'anin øts wyinaty ya naxwiiñ ngaxi'iky ku øts ja Dios wyinajty tø xwi'ejxni xwigoni, pya'ayo'owingøjxp øts idø'øn tø xwaadsøy. Ku ja xøøw ja jumøjt tpaajty sam ttanibiktaajkiy'iñ.

¹⁶ Xjats øts idø'øn xuk'ijxy xuknijawiyi'ñ ja y'U'nk, jøts ngajpxyø'oyit ja nitsoojkin madya'aky ma pøn kya'israelitjaa'yidi, pøn tkanija'widipnim ja nwindson'ajtim Jesucristo. Kuts idø'øn ya'at jade'en yjajty, nipøn øts idø'øn nga'ats'ixy nga'ats'amidøy,

¹⁷ ni nganijkxy øts jam Jerusalén ma jam pøn ja kudanaa'yin jawyeen tpadøjkidyøø. Tiy øts idø'øn ne'egi ndyimñøjkkøj jam Arabia etjotp, jamts ø nwindbijty jøts ø nja'jty jam Damasco.

¹⁸ Kyidigøøk jumøjtnim ø nnijkxy jam Jerusalén; winets øts ja Pedro ojts nminabyaadyiyi jade'en'ampyts øts ja n'ijxy'aty, makmojkk xøøw øts ja jam nmøøtsinaay.

¹⁹ Ni tu'uk øts ja nga'ejxtøø jadu'ukpi kudanaabyidi, ja Jacobo øts ja'ayi nbaajit, ja nwindson'ajtim y'uch myigu'uk.

²⁰ Y'ijxpy ñija'wip ja Dios ku ya'at tyiyi yjanchi midi meets ndanija'ayip. Ka'ap ø nugo ndaabyaaty.

²¹ Kuts idø'øm jade'en y'uknajxy, jamts ø ndsøø'ñ jøts ø nnijkxy jam Siria etjotp jøts jam Cilicia nayide'en.

²² Ka'ap øts y'ijty x'ijxyidi adøm nmigu'uktøjkti mididi tjanchja'wimyidip ja Cristo jam Judeit etjotp.

²³ Ja'ayi dø'øñ ja y'ijty tmadowdi ja kajpxy, ku ñømididi: "Ja' pøn y'ijty tkamaa'kxp ja janchja'wibitøjkti ja Cristo yjaa'y, ja' ixyam kø'øm tñigajpxnrip øy tsuj ja Dios kyajpxy ja Dios myadya'aky yam ja y'ijty t'ukyikudigøøwya'añ."

²⁴ Tyamigunuu'kxyja'widip idø'øñ ja Dios ja' ku øts ja ndsinaa'yin tø nyiktigach.

2

Ku ja Jesús kyudanaabyi tkupøkti ja Pablo jøts ja nayide'en tyu'unt

¹ Kyimakmajkts jumøjt øts jadigojk nniikxy jam Jerusalén møøt ja Bernabé, jøts ø nayide'en nbawaay ja Tito.

² Paty øts jam nniikxy ku øts ja Dios xuk'ijxy jøts øts jam nnøjkxy. Jøts øts jam møøt amaa'tsk ngajpxy nmadya'aky pøn idø'øñ jam tñigubajk'ajttip ja kudanaabyitøjkti Jerusalén. Jøts nduk'ejxtøø nduknija'widyøø sã øts idø'øñ ja nwindson'ajtim y'ixpøjkin nnanky'ijxyi pøn tkanija'widip pøn ka'israelit jaa'dyi. Njøpja'wip øts ja' ku øts ja jøtmøñ xkagupøktit paty øts ja jade'en nnigajpxy jøts øts ja ndunk nugo kyanaxt mididi øts jam wyinaty ndumpy.

³ Xpudøjkidits øts ja' Niti nisa ja Tito kyayiktuuñ, ka'ap ja ejxpajt ñe'kxkøjxp yikpiktaajky sam ja israelit jaa'y ttsøøñidi.

⁴ Ka'ap øts ya'at jeexyip ngajpxpaaty sã ja Tito yjajty kuk idø'øñ kyanøjkxti ja ejxpi ja kowbi jøts tmadya'akwidettit mabaat adøm idø'øñ nga'ukpadu'unindi ja møjaa'byi kutujk mididi ja Jesucristo tø xukniwaajchim ku møøt n'ijtyim. Ja' idø'øñ ja chojktip jøts adøm nbaduujna'andit ja myajaa'byi kyutujk sam ja israelit jaa'dyi.

⁵ Nijuuni øøts ja ngayikmøjtøki jøts ka' meets xwinma'aty ku ja'ayi ejxpajtingøjxp yikpiky ja yiknitsoojkin. Jaa ku øø ndsøky jøts meets ty xmoøt'aj'tettitnim ja winmaa'ñ sã ja yiknitsoojkin nbaajtyim.

⁶ Niti nisa øts ja xkanimaadyi pøn jam tñigubajk'ajttip ja kudanaabyitøjkti pøni sã øts ndunkjøjpx nyikyø'ø; øy ja yjamøjwindsønidi tuknax øts ja møøt nnayja'wiyidi, jabi tum jade'enxi adømdi Dios wyingujkp.

⁷ Ka'ap øts ja wenk ana'amin ja x'ukmøøñidi, jabi yja'gyukidixi ja' ku øts ja Dios kø'øm tø xanipiky jøts øts ja nitsoojkin ayuujk ngajpxyø'ty ma pøn kya'israelitjaa'yidi, sam ja Pedro yiktanipøjkmidi nayide'en jøts nay ja'abi ayuujk tkajpxyø'ty jam israelit jaa'yjotp.

⁸ Nayide'en øts ja Dios myø'ajtin kudanaabyi tø xpiktajkmi jøts øts ngajpxwa'kxiti ja y'ayuujk pøn ka'israelit jaa'dyi sam ja Pedro tø yikpiktajkmi kudanaabyi jam israelit jaa'yjotp.

⁹ Patyxi dø'øñ ja Jacobo, ja Pedro jøts ja Juan pøn tñigubajk'ajttip ja kudanaabyitøjkti tja'gyukidixi ku øts ja Dios tø xmo'ø; ja øy'ajtin jøts ja yja' tñanky'ejxit. Ojts øøts n'ukyikøpatni møøt ja Bernabé, jade'en'ampy ja jade'en ttundi jøts ku øøts ja xmigu'ukwa'añ jøts ku ja t'øvjawidi jøts øøts ndunk øy nyiknaxt jam ka'israelit jaa'yjotp, yam ja nayide'en ja tyunk tyikyø'ømyidi jam israelit jaa'yjotp.

¹⁰ Ja'ayi øøts idø'øñ x'amidowdi ku øøts nximija'myajts'ett ja israelit ayoobitøjkti. Ya'ats øts idø'øñ ne'egi nbadun'ijtpy, ka'ap øts yø'øbi winmaa'ñ n'ixmach.

Ku ja Pablo twindso'ø; ja Pedro jam Antioquia

¹¹ Ku øts jam møøt nnabyaajti ja Pedro jam Antioquiit kajpjotp, jam øts ojts ndawindsø'ø; mididi jam wyinaty tyumpy, ku ja ka'ap y'øgyaxi'iky.

¹² Ku ja møøt øy tyim'yukaagøjy pøn ka'israelit jaa'y jøts ja jaayi tmajtstutkojmi, ja'ayi ku winaa'gin ja israelitøjk yja'atti pøn wyinaty tø tkexy ja ja'abi jaa'y mididi tpadundipnim ja møjaa'byi kutujk ja møjaa'byi tsinaa'yin sam ja y'ijty nayide'en tpadumi.

¹³ Nayide'en ttumidi sam ja Pedro pøn jaty jam wyinaty ka'israelit jaa'dyi, nayide'en idø'øñ ja Bernabé paat ttumi.

¹⁴ Kuts øts idø'øñ ja n'ijxy jade'en ku tkabadundi sam ja øgyajpxy ømyadya'aky ttanibiktaagi, yide'en øts idø'øñ ja Pedro nnimaay jøts niduki'iyi tmadoomidøø ja janchja'wibitøjkti: "¿Tigøjxp mets ya'at jaa'y xukpadunwa'añ ja israelit jaa'y chinaa'yin? Pø tøts mets ja kø'øm x'ixmatsni jekyip o mets jam mjadyimyjagugajpi."

Janchja'wingøjpx ñitso'okti ja israelit jaa'y sam o pøn jaa'dyi

¹⁵ Israelit jaa'y adømdi ja' ku jade'en tø ngue'xyindi, ka'ap adøm ja øky nayide'en ndyimyikmajadaajkyindi sam ja' pøn ka'israelit jaa'dyi.

¹⁶ Tøts nniija'windi ku ka'ap adøm ja Dios xkupøjkidit ja' wyingujkp ku ja'ayi nbadu'undit ja Moisés kyutujk. Ja Jesucristoxi dø'øñ ja yja' njanchja'wimp patyxi dø'øñ adøm ja Dios Teety tø xkupijkyindi, kidi ja'agøjxp ku ja Moisés kyutujk nbaduujñidi. Jabi nipønxi kyayikupøkt Dios wyingujkp ku ja Moisés kyutujk ja'ayi tpaduujnit.

¹⁷ Ku dø'øn ja Dios tø x'ukupijkyindi Cristo køjxp, jøts adøm ja Moisés kyutujk tø n'awimbejtigyojmandi, ¿ja Cristo adøm idø'øn kø'øm xyiktuu'tigø'ø'yimp? ¡Ka' yjade'eni!

¹⁸ Ku øts ndungojmiti miditø n'uk'ixmach, ngø'ømbøky øts ja'.

¹⁹ Ka'ap øts ja Moisés kyutujk n'ukykittuni ja'agøjxp ku øts ja Dios y'ø'yajtin jade'en'ampy ngapaaty; tø nja'gyuki jøts ku ja Dios yja' yikpaaty ku njanchja'want ja Cristo.

²⁰ Ka'ap øts nugo n'uktsinaañ, tø øts ja Cristo xku'oogi kruskøjxp; ja' øts idø'øn ndu'lump miditø ja Dios y'ø'yja'wip jaa ku øts ja chinaa'yin ndajujky'ajti. Janchja'wingøjxp øts ya'at jujky'ajtin nyiknaxy ya naxwiiñ ku ja Dios U'nk tø xjanchøky xjanchpa'ayø jøts nayide'en tø xku'oogi.

²¹ Ka'ap øts ja Cristo y'o'jkin nugo nyiknaxwa'añ; kuts Dios ja jeexyip xagupijkyindi ku ja Moisés kyutujk nbadu'unint, niti jeexyip kyawa'añ ja Cristo y'o'jkin, ka'ap ja jeexyip ma tyuñ.

3

Midi nyikmajadaqjimp: ja Moisés kyutujk uk ja nwindson'ajtim yjanchja'win

¹ ¡Meets gálatas jaa'dyi! ¿Tiku tø mwinmaa'nmya'atti? ¿Jadits ku xka'ukpadunidi ja y'øybi ja tyiibi, pøn tø myikwinmaa'ndyigøyidi? Jabi tøxi meets ka'pxy ndukmadooguixy jøts tø xja'gyukidi ku ja Jesucristo tø xku'o'jkindi kruskøjxp.

² Uk'adsojimbetti meets idø'øn ya'at: ¿Sudso'ampy meets idø'øn ja Dios Teety ja y'Espiritu Santo tø mmø'øyidi, ku ja Moisés kyutujk xpaduujnidi, uk ku ja tø xmibøjkti ja yiknitsokpi ayuujk miditø tø nniqajpxy?

³ ¿Tiku xkaja'gyukidi? ¿Sø tø mwø'andi, jade'en idø'øn xijy jawaani mjanchja'win myøjidi ku xpadunwa'andi ja Moisés kyutujk?

⁴ ¿Ti nugo meets jadi'iñi xyiknaxwa'añ ja m'ayo'ondi ku myikjemandi myiktedundi ku ja mjanchja'win x'ukykittø'ondajktøø? ¡Ka'ap jade'en pya'at'aty, myiktunkpatpy meets ja ndijy ku kawine'en tø m'ayowdi!

⁵ Kuts ja Dios Teety ja y'Espiritu Santo tø mmø'øyidi jøts ja x'ejxiyidi ja myøk'ajtin ku ja tnanky'ijxyiyi ja ijxyimbi ka'ijxyimbi, ¿tigøjxpts ja jade'en ttuñ? ¿Ja'agøjxp ja ttuñ ku meets ja Moisés kyutujk xujni? Pø ka'axi, pø ja'agøjxpxi ja ttuñ ku tø xjanchjawidi sø øøts tø nniqajpxy.

⁶ Ejxpajtingøjxp idø'øn ja n'apteety'amø Abraham ku ja tjanchja'wiyii'ñ ja Dios, ja'ayits Dios ja tagupøjkiyøø. Ka'ap ja ja'agøjxp yikupijky pøni tø ødyunk ja tyuun.

⁷ Paty meets idø'øn xja'gyukidit jøts ku ja Abraham ñamyayi ja' t'apø t'oki pøn ja janchja'win nayid'en tmøøt'ajttip sam ja ojts tmibiky ja Dios.

⁸ Windi'ixyip idø'øn ja Dios ttukmadowni ja Abraham sa yikjaadyañ jap nøkyijxy jøts ku yide'en wyaañ: "Tuki'iyi ja naajx ja kajp ja kunuu'kxy'ajtin tpaattit ku øts xjanchjawidit sø mets tø xunjøpi." Paty ja Dios jade'en wya'añ ku ja janchja'wingøjxp tkupøkt pøn ka'israelit jaa'dyi.

⁹ Jade'ents idø'øn pøn ja Cristo tjanchja'widip, nayide'en ja kunuu'kxin ja tpaatti sam ja Abraham ja kunuu'kxin yikmøøy ku ja Dios ja tjanchja'wiyii'ñ.

¹⁰ Pøn tyimjabadunwandip ja Moisés kyutujk jøts ja jade'en ñitso'okti, tø Dios ja ttanibiktaajkiñi jøts ja yik'ayo'onmo'odit. Jabi yide'enxi dø'øn ja Dios kyutujk wya'añ jap nøkyjøtpy: "Pøni pøn tuki'iyi tkabadungøjxp ya'at kutujk miditø yap tø yikjaadyañ, paajtidip ja møj ayo'on ja' miditø tø ndanibiktaagi."

¹¹ Ja'gyukits idø'øn tyañ ku ja Dios ka'ap tkupiky pøn wyinaty ja'ayi tø tpaduñ ja Moisés kyutujk, jabi yide'enxi ja Dios ñøky wya'añ: "Pønts ja Dios wyinaty kyupijky janchja'wingøjxp, jujky'ajttipts ja' xemikøjxp."

¹² Ka'ap ja Moisés kyutujk yiknitsø'øky janchja'wingøjxp, yide'enxi ja wya'añ: "Pøni pøn tuki'iyi tpadungøjxp ya'at kutujk, ja'ayi nitso'ok'ajtp."

¹³ Tøts ja Cristo xukniwajchim ja ayo'on sam ja Moisés kyutujk ttanibiktaagi pøn ka'pxy tkabadundip. Yide'en'ampy tsoo ku ja Cristo møj pøkyumbi yiktijy jøts jade'en kø'ømdsøky tpatwa'jkii'ñ ja møj ayo'on miditø adøm xjapaat'ajttindip, jabi yide'enxi ja Dios ñøky wya'añ: "Pøn jam yikudipy kipkyøjxp, møj pøkyumbi ja'."

¹⁴ Paty idø'øn ja Jesucristo y'o'jky kruskøjxp jøts ja kunuu'kxin tpaattit pøn ka'israelit jaa'dyi nayide'en sam ja Abraham ja Dios ojts ñi'mxyiyi; jøts jade'en adøm niduknax nbaajttindit janchja'wingøjxp ja Espiritu Santo miditø ja Dios Teety tø tni'adsowi.

Ka'ap ja Moisés kyutujk tyik'amutski ja may'ajtin miditø ja Dios ñi'adso'owi

¹⁵ Meets migu'uktøjk, ku dø'øn n'ukpiktaajkint ku tigati n'ukajpx'ø'yint n'ukajpxpaajtint, kuts ja yikjaadyañ, kuwani dø'øn ja yikpadu'unt, sø tø wyinguiki ka'ap ja pøn tyiktigtatst.

¹⁶ Kuts ja Dios Teety ja may'ajtin tmøøwya'añ ja Abraham, nayide'en ja tmøøwyaami jadu'uk ja jaa'y midi ja y'apip y'okip põni wine'en ja tø ñajtska'axyini. Sam ja Dios ñøky wya'añ: "Tu'ukpi jaa'y ja', ka'ap ja ñamayidi." Ja'ats idø'øn Cristo'ajtp.

¹⁷ Yide'en øts idø'øn ja ja'gyukin nyakwa'añ: Ja may'ajtin midi ja Dios ja Abraham ojts tyami'awanayi, ka'ap ja mibaat niwne'enin tyiktigajch ja Moisés kyutujk midi meen ix'oojk maktaxk magø'pxy ja ee'pxmajk jumøjtnim.

¹⁸ Kuts ja Dios ja myay'ajtin jeexyip kuwani xukpadunwa'añin ja Moisés kyutujk, ¿ti may'ajtin idø'øn ja jade'en? Yide'en'ampyts idø'øn ja y'øyi ku ja Dios ja jadi'iñi tta-may'atwa'añ ja Abraham.

¹⁹ ¿Tigøjxpts idø'øn ja Moisés kyutujk nyikmø'øyim? Paty idø'øn ja ix'oojknim yikpiktaajky tø wyinaty tni'adso'owifiñi ja may'ajt jøts ja jaa'y niduki'iyi tñijawidit midi idø'øn pøky'ajtp. Jaayi tyuñ kunim yja'aty ja Abraham y'apu'nk põn nayide'en ja may'ajtin yiktami'awa'anisi'iñ. Ku ja Dios ja kyutujk tyajky, ja ankilistøjk ja tyamigaxiyi'iñ jøts ja Moisés ja ttagidøkidit, jøts ja ttuk'ext ttuknijawit ja jaa'y.

²⁰ Ku ja Dios ja may'ajtin tmøøwya'añ ja Abraham, ka'ap ja ankilistøjk ni ja kugajpxtyøjk ja tkayiktuñ, kø'ømyi ja nadyu'ugyi ttami'awa'anisi'iñ.

Tigøjxp ja Moisés kyutujk yikpiktaajky

²¹ ¿Sats idø'øn ya'at nja'gyukant? ¿Ka'ap idø'øn ja Moisés kyutujk møøt ñamyayi ja Dios myay'ajtin? Ka'ap idø'øn yjade'eni, jaa ku ja Dios ja kutujk jeexyip tø tyaky nitsoojkin møøt, ja'ayits ja jaa'y jeexyip yiktagupøjktip, ja'ayi jeexyip yikpadump põni sa ja tyikutuky.

²² Jabi jade'enxi ja Dios ñøky wya'añ ku adøm nijum pøkniwa'añ n'ejtnandi. Kuts ja Jesucristo njanchja'wint, jade'en idø'øn ja'ayi ja nitso'ok'ajtin nbaajtint midi ja Dios tø tni'adsowi.

²³ Tum ja Moisés adøm ja kyutujk wyinaty tø xniwa'anandi ku kyamiñim ja Cristo, pø ka'anixi ja Dios Teety wyinaty xukja'gyukam ja Cristo yjanchja'win.

²⁴ Ja'abi kutujk adøm y'ijty xuu'wa'anidip xuu'wejtsnindip kunim ja Cristo myiñ, kuts ja njanchja'wa'ant jade'ents ja Dios Teety xkupøjkindit.

²⁵ Kuts ja Cristo myiñ, ka'ap adøm ja kutujk x'uk'ana'amnindi.

²⁶ Jabi ixyamxi adøm ja Dios x'u'nk'ajtnindi ku ja Jesucristo njanchja'windi.

²⁷ Ku Cristo køjxp nnøbejtyindi nayide'en adøm ja ndsinaa'yin nyiknajxyindi sam ja tø tjøptuni.

²⁸ Ka'ap y'ukpaat'ajtniyi adøm nnayjiwejtsandit nnayjigajxandit o põn y'israelitjaa'yidi kya'israelitjaa'yidi, tumbidi yikmidumbidi, sam ja tø'øxyøjkmidi yaa'dyøjkmidi, tu'ukpi jaa'y adømni ku ja Jesucristo nmøøt'ajtnandi.

²⁹ Kuts adøm ja jade'en nmøøt'ajtnant, xjats idø'øn tyimbyaat'atyiyi ndeety'ap'ajtnant ja Abraham jøts xpaat'ajtnidip adøm ja Dios myay'ajtin midi ja ñi'adso'wiyi'iñ.

4

¹ Ukja'gyuki meets ya'at: Ku tu'uk ja u'nkteety y'øøky jøts ttanipaaty tuki'iyi ja pyikta'aky ja myutsku'nk, kuts ja tyimy'ukmutskinim ka'anim ja pyaat'aty tpoøkt ja maay øy ja tuki'iyi tjaja'ajtkixy.

² Jabi kuwanixi dø'øn tjamimado'ot ja y'ejx'etpidi kunim ja yjumøjt tpaatt jøts t'axajit ja tyeety ja myaay.

³ Nayide'en adøm idø'øn y'ijty njajtyindi ku ja Cristo kyamiñim. Tum ja møjaa'ychinaa'yin y'ijty nyikmajadaajkyindip øy ja nitso'ok'ajtin tjagamøødi.

⁴ Kuts ja xøøw ja jumøjt yja'jty, kyajx ja Dios Teety ja y'U'nk tø'øxyøjk ñikøjxp jøts jade'en kye'jxy israelit jaa'yin, pyadungøjk nayide'en tuki'iyi ja'abi jaa'dyi ja chinaa'yin møøt ja kyutujk.

⁵ Paty ja jade'en myiñ jøts ja wa'ats'ajtin xmø'øyindit põn y'ijty tpadundip ja Moisés kyutujk, jøts jade'en Dios Teety x'u'nk'ajtnidit.

⁶ Yide'en idø'øn ja tnan'kyijxy ku adøm ja x'u'nk'ajtna'am ku ja tkexy ja Espiritu Santo adøm n'anmija'wingøjxp; jøts møk ja winmaa'ñ nmøøt'ajtnidit ku janch ja Dios Teety ndeety'ajtyindi.

⁷ Ja Dios Teety adøm idø'øn xtyimy'u'nk'ajtnidip, ka'ap adøm nugo midumbidi. Paty adøm idø'øn xtyimbyaat'ajtyindi ja maay midi ja Dios Teety tø tni'adsowi, jøts midi ja Cristo xmø'øyindip.

Ku ja Pablo tpamay tpadajy ja janchja'wibitøjki

⁸ Ka'ap meets y'ijtyip ja Dios Teety x'ijxyi, tum ja awanax agojnax meets y'ijty windsø'jkidip winja'widip, midi ka'ap ja Dios'ajtin tmøøt'atti.

⁹ Tø meets ja Dios Teety xpatni, uk yide'en'ampyts idø'øn ne'egi ngajpxint, tø meets idø'øn ja Dios Teety mbaajtniyi, ¿sudso meets idø'øn xkupøjkjomi ja wenk tsinaa'yin midi niti møk'ajtin niti nitsoojkin kyayajkpy, nayide'en sam ja mgø'øm ja'adi midi tø xuk'ixmatsti?

¹⁰ Jøts ixyam xjanch'ukjøp'ejxti ku ja Dios m'øjja'wiyidit ku x'amaay'attinim ja xøøw ja po', ja xøøw ja jumøjt.

¹¹ A'ø'y'ampy øts yjawi njøptsø'øgi ku øts ndunkjøjp meets køjxp tø wyindigøy.

¹² Migu'uktøjkti, tun ja may'ajt jøts xu'undit sam øts idø'øn tø njøptuni ku øts ja israelit jaa'y chinaa'yin tø n'ixmajtsni. Kupøjkik øts n'ayuujk, ka'axi meets nijuuni xmidsepwə'añ.

¹³ Øy meets xkupijky mijawyeen ku øts ja yiknitsokpi madya'aky nnigajpxy øy øts wyinaty njabama'ayø.

¹⁴ Wan øts nba'am meets mja'axiigyidi, ka'ap meets xpawøjpy. Jade'en meets ne'egi xkupijky sam tu'uk ja Dios y'ankilis tnajtškaxi, uk sam ja Cristo yjawi kø'øm tyimyja'aty ma meets jam.

¹⁵ ¿Tiku mga'ukjotkujk'ajtnidi? Tyimyøj meets ja mba'ayo'owin xnanky'ejxøø ku nbamaa'ychinaaay. Patyts ø nwa'añ, wanik meets yjawi mgø'ømween xtyimyju'ty jødsik øts ja xamay'ajttøø, jøts øts jade'en ndso'okt.

¹⁶ ¿Xmidsepwəandip meets ixyam ku øts ja'ayi tø nnigajpxy ja tyiiby' yjanchpi?

¹⁷ Ja winaa'gin ja israelit jaa'y pøn taagyøjxp yik'ixpøjktip. Ja'ayi dø'øn ja yjanch'awejxtip jøts meets ja xmibøkt jøts x'ixmatstid ja m'øwycinmaa'ñ midi meets tø ndukmadøy, jøts jade'en ja abiktyuu' xpadøjkiñidit.

¹⁸ Ka'ap ja sa y'ejxi ku meets ja møøt mnamyayiyidit, ja'ayi dø'øn tsojkip jøts yikxon ja y'øwycinmaa'ñ y'ø'y'ixpøjkin tnigajpxtit, ejtp jade'en ttu'undit, ka'ap ja'ayi nugu ku meets jam møøt.

¹⁹ Meets u'nk meets una'jk, møk meets jadigojk xjanchyikmay xjanchyiktajy. Jaayim øts yø jade'en njawit kunim ka'pxy ja Cristo xpadungøxtit samdam ja ttsøky'aty.

²⁰ Jøk meets jam møøt jeexyip ixyam, jøts øts øy tsuj ne'egi ndukmado'ot ya'at winmaa'ñ; jabi ka'axi øts ja ayuujk n'ukpatni pø sudso meets njanchñijayit!

Ja Agar jøts ja Sara ñikøjxp ja ejxpajtin yikajpxidsimy

²¹ Meetsti, pøn ja Moisés kyutujk tpadunwajnidip, nigajpx meets sa dø'øn wya'añ ja'abi kutujk.

²² Pø nømpxi ja wya'añ ku ja Abraham namajtsk ja y'u'nk tpaajty: tu'uk ja tumbi tyik'u'nkpaajty midit nitøøky'ejtnip, jøts jadu'uk ja kyø'øm nidø'øxy ya'.

²³ Ku ja nitøøky tø'øxy y'u'nkpaajty nayide'eñim ja tpaajty sam o pøn tø'øxyøjk, jøts ku ja ñidø'øxy ja y'u'nk tpaajty kidi nugojip ja jade'en jyaty pø ja Diosxi y'ayuujk jade'en ka'pxp sam ja wyinajty tø tni'adsowi ku ja tø'øxy y'u'nkpaatt møjaa'gyijxñim.

²⁴ Ejxpajtin øts idø'øn ya'at nbiktə'aky. Ja namajtskpi tø'øxy wa' idø'øn ja kyudanaadyip majtskpiky ja pudøjkin sa ja Dios tø ttanibiktaagi. Midukpiky, ja Agar idø'øn jade'en sa ja Moisés kyutujk, ja' midit yikmøøy jam Sinaí kojpkøjxp. Pøn ya'atpi kutujk ja'ayi tpadundip ka'ap ja ñitso'oktit.

²⁵ Kyudanaapy ja Agar nayide'en ja Jerusalén kajp midit ixyam ñajx'ajttip ja israelit jaa'dyi ma dø'øn wya'andi ku ja nitso'ok'ajtin yikpaaty ku nbadu'unin ka'pxy ja Moisés kyutujk. Pøn jade'en tpadundip jade'en ñamyayi pyidsimy sam ja tø'øxy midit nitøøky'ejtnidip. Yik-majadaktip idø'øn ja' ja'abi kutujk.

²⁶ Ma ja tsajpiotpit Jerusalén jam ka'ap ja Moisés kyutujk jam tyuñ, jamts adøm idø'øn xpaat'ajtyindi.

²⁷ Jabi ja'axi dø'øn ja Dios kyajpxy tyijpy ku yide'en jap nøkyijxpy wya'añ:

Mets tø'øxyøjk nøy,

mbaat'ajtyip mxonda'akt ja'agøjxp ku xpaatwə'añ ja m'u'nk.

Jotkujk mnayjawiyyit o mets nijuuni xjagapaaty xjaga'ijxñim m'u'nk.

Øy ja mniyaa'y tø waani mja'atmajtstu'udyi, wimbetp ja jadigojk jøts ja m'u'nk may xpaatt, yam ja jadu'ukpi tø'øxyøjk nika'ap jade'endi.

²⁸ Migu'uktøjkti, ni'adsowigøjxp adøm ja Dios x'u'nk'ajtyindi nayide'en sam ja Dios ja Isaac tni'adso'wiyi'ñ midit ja Sara y'u'nk'ajtpy.

²⁹ Jade'en sam Ismael, ja nitøøky tø'øxy y'u'nk, tmidsepwan'ijty ja Isaac, midit ja Sara myajnk'ajtpy, nayide'eñim ixyam ku adøm xmidsep'atwan'ijtyindi ja jaa'y pøn ja Dios yja' tkajanchja'widip, yam adøm ja Espiritu Santo ja myøk'ajtin xyikujky'ajtyim.

³⁰ Yide'en idø'øn ja Dios ñøky wya'añ: "Jigax ja nitøøky tø'øxy møøt ja y'u'nk, jabi ka'axi pyaat'aty nay ja'abi maay midit ja Sara myajnk paat'ajtyip."

³¹ Jade'ents migu'uktøjk idø'øndi, ka'ap adøm idø'øn ñamyayi x'u'nk'ajtyindi ja nitøøky tø'øxy, ja Abraham idø'øn ndejint ja ñidø'øxy ndaak'ajtyindip, ja'agøjxp ku ja Dios tu'ugyi yikjanchjawi.

5

Mimok'atti pøn mniitso'ok'ajtin mduk'ixmatswajniyidip

¹ Tø adøm ja Cristo xukmajstuujujtyindi ja Moisés kyutujk, ka'ap adøm ja xukja'ajtnandi. Ejx'ettits ja niitsoojkin midì ja Cristo tøm xamidsøjkyin.

² Madowdi yikxon. Pøni mdamok'atwandip ja m'ejxpajt midì ne'kxkøjxp, ja Cristo meets idø'øn ja niitso'ok'ajtin mgayikmøjtøjkiyidip.

³ Ixym meets ndukja'myech jadigojk ku ja'abi jaa'y pøn ja ejxpajt tkupøjkp ñe'kxkøjxp, kuwani dø'øn ja Moisés kyutujk tyimbyadungøjxit. Kuts jade'en tkatu'unt, ja kudigø'øyin idø'øn ja pya'atp.

⁴ Jam meets winaagin winmay ku ja Dios ja xagupøjkindt ku yikpadu'unt ja Moisés kyutujk, ja Cristo meets idø'øn ñamyayi abiky mbiktaknip jøts ja Dios Teety chojkin ja pya'ayo'owin x'ixmajtsidi.

⁵ Jabi adømxi nmøøt'ajtyindip ja jøp'ejxin ku ja Dios Teety xkupøjkindit jade'engøjxp ku ja Espiritu Santo xpudøjkindit jøts ku njanchja'windit ja nwindson'ajtim Jesucristo.

⁶ Kuts ja nwindson'ajtim tu'ugyi nmøøt'ejtindit, wan ja ejxpajt tyikmøøt'aty tkayik-møøt'aty ne'kxkøjxp, niti ja kya'ukwanit. Kuxi ja Cristo njanchja'want ja'axi tump, jøts ja'agøjxpxi adøm nmigu'uk tum ja øybi ndamidsojkyim.

⁷ Øy meets tøm m'uktso'onda'aky jawyeen. I Pønts idø'øn tøm myikwinmaa'ndyidi ku xka'ukpadunidi ja tyiibi ja yjanchni midì ja Cristo yja'ajtpy?

⁸ Jabi ka'axi ja Dios Teety jade'en mduñidi midì tøm mmo'øyidi ja nitso'ok'ajtin Cristo køjxp.

⁹ Pø yikni ja wipxi ku tu'ukpi jaa'y ne'egi namay tyikwinmaa'ndyigøy ja myigu'uk.

¹⁰ Dios køjxp øts ja jøp'ejxin nmøøt'aty ku meets jadigojk x'awimbettit midì jawyeen tøm nduk'ixpøkti; pøn meets idø'øn myikwinmaa'ndyigøøwyajnidip, ja' idø'øn ne'egi møk ayon'onaatp øyi yjadyimjapøni.

¹¹ Kuts meets jeexyip ndaguwani ku ja ejxpajt ne'kxkøjxp ja'ayi tu'ugyi tyuñ ka'ap øts ja israelit jaa'y jeexyip xmidsepwa'andi xmi'ekyidi. Niti nisa jeexyip kyawa'andi ku øts ja jeexyip n'agajpxmukixy ku ja Cristo tøm xku'o'jkandi kruskøjxp, jøts ku nayide'en tyumidi ja israelit jaa'y y'ixpøjkindi. Tu'ugyi øts ja'ayi nnigajpxy ja Cristo yja'.

¹² Pønts meets ya'at tsinaa'yin kuwani mdukupøkwa'jnidip, paat'ajtyiyip jøts ja ne'egi kø'øm ñankyudigø'øyiñidit.

¹³ Migu'uktøjkti, tøm Dios mwi'ijxyiyidi jøts ka' kuwani x'ukpadunidit ja Moisés kyutujk jøts jade'en ja awa'ats'ajtin xpaattit. Ka'ap yø'øbi awa'ats'ajtin xyikwa'andit ku adøm o tigati ndyimdyu'unandit; ja' ne'egi xyikwa'andit jøts nixem niyam mnachokiyidit sam nayide'en mnabyudøkyyidit.

¹⁴ Ku ya'atpi tu'uk kutujk nbadu'unint, tuki'iyi dø'øn ja ndejint ja Dios kyutujk yikpadunguixy, midì yide'en wamp: "Tsoj ja mmigu'uk samdam meets kø'øm mnachøkyi."

¹⁵ Kuts meets mnachepwa'añidi mnachep'ijxyidi, jnay'ejx'etidim, kidi meets kø'øm mnankwyyinmaa'ndyigøyidi jøts mjanchja'win jade'en xkayikwindigø'ødyit!

Ja ka'ødyu'unin midì ja naxwiin'yiktanaxp jøts ja øchinaa'yin midì ja Espiritu Santo yajkpy

¹⁶ Ya'at meets idø'øn ndukmadøøpy; jøts ja mdsinaa'yin xyiknaxtit sam ja Espiritu Santo mdamidsokyidi, jøts jade'en ka' yikmøj'attit ja ka'øybi midì ya'it tsinaa'yin y'amidøøpy.

¹⁷ Ya'atpi ka'øybi midì ngø'ømsojkingøjxp nbadunwa'añidip, ka'ap ja Espiritu Santo møøt ñamyayiyi. Tum majada'akwandip ja' jøts ka' xuktunwa'añim pøni midì adøm kø'øm njatsøky'ajtyimp.

¹⁸ Pøni janch ja Espiritu Santo meets mduu'møøjyidip, ka'ap meets ja Moisés kyutujk m'ukpaat'ajtniyidi.

¹⁹ Nigaxi'iky ja chinaa'yin ja'adi pøn ja ka'ødyu'unin pyadundip midì ja ne'kx ja kojpk y'amidøøpy. Ya'atpi pøky y'agujkpy yide'en ja yjujky'ajtin tyiknaxti: øy ja pøn yaa'dyøjk tøm øyøjk møøt ñamyøøt'atyidi wan tja'amajtskidi tka'amajtskidi, tum ja axøø'kpi yigaappi y'amidip yjotpidip,

²⁰ ja awanax ja agojnax wyindsø'jkidip wyinja'widip, ja miku' tyunk ja kyamimaadip kyami'ejttip. O pøngapøn myi'ekyidi, ja'ayi tyajotkuj'ajttip ku ja myigu'uk tyikjø'odi tyikya'axti, øy ja myigu'uk ttami'ekyidi ja ñidsinaa'yin. Øy ja tigati ttatsep'ixa'adi, kyø'øm jotkuj'ajtin ja ja'ayi y'ixaadyip, ja'ayi ja chøky'ajttip jøts ja wenk winmaa'yinygøjxp abiky ñabyikta'agiyidit.

²¹ Tyami'ama'at'ajttip o tigati ja myigu'uk, yikjaa'y'oo'k yikjaa'gyudigøøky tyunk'ajttip, ja amu'uky'ajtin kawindiy'ajtin yikmajadaktip. Tum yø'øbi axøø'kpijøtpy yigaappijøtpy idø'øn ja chinaa'yin tyiknaxti. Ixym meets ndukja'myech jadigojk, pøni pøn ya'atpi tsinaa'yin ne'egi tpadump niwindem xøøw ja tkapaattit ja Dios kyutujk ma ja yjaa'y ttanitanit.

²² Ku ja Espiritu Santo ndsinaa'yin xuu'mø'øyint, winets idø'øn wyingaxi'iky ja tsojkin ja pa'ayo'owin nixem niyam, ndaxondaajkindip ja Dios, jøts ja øy'ajtin nmøøt'ajtant,

nja'gyujkandit nduda'aky'ajtint, n'amigu'ukjaa'y'ajtint, n'øyjaa'y'ajtindit, jøts ja windaay'ajtk ngayiktu'unindit,

²³ nmiyuju'ajjtindip ja nmigu'uktøjkti jøts ka'ap ja ngø'øm ja' nyikmajadaajkindit. Nima niwindem, niti kutujk adøm xkadatiidyyu'unint yø'øbi øyjaa'y'ajtk.

²⁴ Pøn ja Cristo ja'ajtiyidip, tø dø'øn ja ñamyayi tkrustsumgøjxnidi tuki'iyi ja ka'øyjaa'y'ajtin midiyikmøøt'ajtp.

²⁵ Pø tødam adøm ja Espiritu Santo ja jemchinaa'yin xjanchmø'øyidi, çtits ku adøm idø'øn ja ngamibøjkindit pøni ma ja xuu'waa'waa'ñiidi?

²⁶ Ka'ap adøm idø'øn niti nnadyamikajxint, niti nganadyami'ajkiyindit. Jagam jixkø'øm n'ixwejtsint ja tami'ama'at'ajtk.

6

Nixem niyam nabyudøkiyidi

¹ Meets migu'uktøjkti, pøn ja Espiritu Santo yja' tmøøt'ajtkøxyidip, ku xnijawidit ku nidu'uk ja nmiyu'uk ja pøky tø myimajada'agyyi, pa'ayo'owingøjxp meets idø'øn ja xpuðøkidit jatyi, jøts jade'en t'awimbetidit ja øybi tsinaa'yin jadigojk. Mdabajaa'ñaxtip ku meets nayide'en jotmøñ wyinaty ja pøky mmimajadakniyidi.

² Nabyudøkiyidi nixem niyam jøts ni'amuki jade'en xmimajada'aktit ja ka'øybi, jabi jade'enxi dø'øn wyinaty xpadundi sam ja Cristo ja kyutujk tnigajpxy.

³ Pøni jaaxi pøn jaa'y midiyimñamyøja'wiyip, nugo ja kø'øm ñawyindaay'aty.

⁴ Nidu'uk nidu'uk adøm idø'øn kø'øm nnija'wandit ku ja ndsinaa'yin nyiknajxyindi øy; kuts øy ñayjawiyit kø'øm idø'øn ja chinaa'yin ja ñadya'ajawiyit, ka'ap ja myigu'uk yja' ttatøjkiyit.

⁵ Kija' adøm idø'øn ndsinaa'yin ngajpx niwaaajtsin Dios wyingujk.

⁶ Tabudøkidi ja mbikta'aky pøn ja øygajpxy ømyadya'aky ñanky'ejxiyip.

⁷ Kidi kø'øm mnawyindaay'atyidi, jabi ka'axi ja Dios jadi'ñi yiktañ pøn ja nugo taguyatwajnip. Ku tigati n'ukneejpint, nay ja'ayi dø'øn n'ejxmukojmamp nbøkmukojmamp ku ja xøøw ja jumøjt wyinaty tpatni.

⁸ Nayide'ents idø'øn ja tsinaa'yin: ku pøngapøn ja'abi tsinaa'yin nugo tpaduñ midiyi ja ñe'kx ja kyojpk ja'ayi y'amidøøpy, ja o'jkin tigø'øyin idø'øn ja wyinaty pyøkmujknip kyonmujknip ku ja tiidyyu'unin mye'ent kyida'akt. Pønts jade'en tpadump sam ja Espiritu Santo ñadyamidsøkyiyi, nay ja'ayi dø'øn kø'øm mo'ojyidip ja jujky'ajtin xemikøjxp.

⁹ Ka'ap adøm idø'øn ja xwindsejpindit ku ja øybi tsinaa'yin nnanky'ejxindit, ku jade'en ndu'unindit xjats idø'øn nyikmø'øyindit ja kawinmaabyi kunuu'kxin.

¹⁰ Paty meets idø'øn xun'ett, jøts pøngapøn xpuðøkidit winjaa windsojk pøni juuni pyaat'aty. Ja'abi jaa'y idø'øn ne'egi mguidyimyja'dyigø'ødyip midiy adøm nmigu'uk'ajtyindip tu'ukpi janchja'wingøjxp.

Ku ja Pablo kyajpx'abajtiñi xjats y'ukajpxwejni y'ukajpxpoo'kxni

¹¹ Kø'øm meets ixyam yikxon ndyimiñjayi sam idø'øn pyaat'aty jøts yikxon xja'gyukidit. Ejxti mabaat øts yø nja'ay myøji.

¹² Yø'øbi jaa'y pøn meets mdaguwa'aniyidip ja ejxpajtin ne'kxkøjxp, ja'agøjxp ja ttundi jøts ja øy yik'ejxtit yiknimadya'aktit jøts ka'ap jade'en pøn chep'ejxiyidit chepjawiyidit ku jeexyip ja Cristo yja' ja'ayi tnanky'ixpøjkiyidi ku tø xku'o'jkandi kruskøjxp.

¹³ Øy ja ejxpajtin ne'kxkøjxp tjamøødidi, ka'ats idø'øn ka'pxy kø'øm tpadundi midiy ja Moisés kyutujk ñigajpxy. Kuwani meets ja mdukupøkwaa'ñiyi ja ejxpajtin ne'kxkøjxp, jøts ja jade'en ja'ayi ñadya'agajpxiyidit ñadya'øyjawiyidit ku meets ja yja' tø xpadøjkiniyidi.

¹⁴ Jøts øts ka'ap ø niti nnadyamikexyiyi, ja'ayi øts tu'ugyi nmøø'ajtin'ajtpy ku ja nwindson'ajtim Jesucristo tø xku'oogi kruskøjxp. Paty øts ja yigaappi naxwii'ñit tsinaa'yin nga'ukmøkpiktakni, nika'ap øts ja nayide'en xukmimajadakni.

¹⁵ Jaa kuxi adøm ja Cristo Jesus møøt nnamyajaayindi, niti kyawa'añ pøni jam ja nmøøt'ajtyindi ngamøøt'ajtyindi ja ejxpajtin ne'kxkøjxp; ja' idø'øn ne'egi tump pøni tø ja axøøkpi n'ixmajchindi jøts ja ndsinaa'yin tø nyiktigajchindi.

¹⁶ Wan ja tpaatti tkupøkti ja øy'ajtin kunuu'kx'ajtin pøn ya'at winmaa'ñ tpadundip, jøts møøt ja israelit jaa'dyi pøn idø'øn ja Dios tyimyja'ajtyidip.

¹⁷ Ixyam ø nnigajpxy jøts ka'ap øts pøn xyiktuu'dukt ku nnigajpxt ja Cristo y'ixpøjkin; jabi yamxi øts nmøøt'aty ja ejxpajt ku tø nyikwøpy nyiktsiiky ku øts ja Cristo ngudani.

¹⁸ Meets migu'uktøjkti, jade'en ø nwa'añ jøts xpaattit xemikøjxp ja Dios kyunuu'kxin. Tiigajpxy idø'øn, jade'en idø'øn ja yjatt.

JA NØKY MIDI JA PABLO TYANĠAJX JA EFESIIT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Efeso

¹ Øts Pablo'ajtpi, Dios ø kø'øm chojkingøjxp tø xpikta'aky Jesucristo kyudanaabyi jøts ø jade'en xyikugajpxy'aty. Ya'at nøky ja' øts yø ndanija'ayidip ja Efesiit jaa'y pøn jaty ja Dios yja'ajtpy jøts tjanchjawidi nayide'en ja nwindson'ajtim Jesucristo.

² Paat meets ja kunuu'kxin ja øy'ajtin midi ja Dios Teety møøt ja nwindson'ajtim Jesucristo yajkpy.

Ja møj øy'ajtin midi nbaajtimp ku Cristo nmøøt'ejin

³ Ngajxajkindip ja Dios midi tyeety'ajtpy ja nwindson'ajtim Jesucristo, jabi tøts ja kunuu'kxin xmø'øyim ku ja Cristo nmøøt'ijtyim. Ja' y'øy'ajtin tø xanigajxa'andi ma ja chøøni.

⁴ Namga'anin naxwii'ñit cho'onða'aky jøts ja Dios Teety kø'øm xwi'ijxyindi xwigø'øñindi Cristo køjxp ku ja xku'ayo'ombaaajta'andi, jøts jade'en adøm wa'qts nwingunøjkxa'ant ja' wyingujkp niti pøky niti kadyeey.

⁵ Windi'ixyip idø'øn kø'øm ja Dios Teety ttanibiktaajkiñi jøts ja x'u'nkupøjkint Jesucristo køjxp.

⁶ Paty ejtp ngajxajkindit ja Dios sa tø tnanky'ijxyi ja myøj kunuu'kxin, ku ja y'U'nk tø tnaajtskaxi midi kawinmaa'ni chøjky.

⁷ Ku xtsojknajxyim adøm ja Dios, paty adøm tø xyiknitsøøjkyim ku ja y'U'nk Jesús wyidsuun wyidajxy, jøts y'o'jkingøjxp xpojkipmee'kxyim.

⁸ Kajaa Dios tø tnanky'ijxyi ja chojkin ku tø xmø'øyim ja wejin ja ja'gyukin,

⁹ jøts jade'en tø tnanky'ijxyi ja yu'uchwinmaa'ñ midi adøm ja kø'øm tø xanibiktaajkim sa dø'øn ja ttunwa'añ.

¹⁰ Jatp idø'øn jade'en sa dø'øn ja wyinmaa'ñ tø ttanibiktaagi, kuts ja xøøw kuts ja jumøjt tpaatt, winets ja Dios Teety tuki'iyi ttagidøjkigyøxt ja nwindson'ajtim Jesucristo ti jaty ejtp øy madsoo, yjanaxwii'ni uk yjatsajpjøtpyi, jøts ja amuum kø'øm tñigubajk'att.

¹¹ Kuts adøm idø'øn ja Cristo nmøøt'ajtyim, windi'ixyip adøm ja xwi'ejxna'andi xwigo'onandi ja Dios Teety jøts jade'en xmø'øyindit midi xamidsojkimp. Tuki'iyi dø'øn ja ttuñ sa ja chojkin tø ttanibiktaagi.

¹² Tø dø'øn ja ttuñ jade'en jøts øøts idø'øn ja Dios ndakajxa'akt ja y'øy'ajtin ja myøj'ajtin, jabi øøts idø'øn jawyeen tø njanchjawi ja Cristo.

¹³ Meets nayide'en, ku xmadowdi ja Dios tyiy'ajtin midi tñigajpxp ja yiknitsoojkin, jøts ku xjanchja'widøø ja Cristo, jade'en idø'øn ja Dios Teety mdamiguy'ejxidøø ja y'Espiritu Santo, jøts ja myiktam'ejxkapidit jøts ku meets ja Dios mja'atyidi. Jade'ents idø'øn ja y'ayuujk tyikniwaajch sam ja jawyeen tø tñigajpxy.

¹⁴ Nay ja Espiritu Santo midi meets m'ejxpajtin'ajtpy, ja' myikta'ejxkaptip ku ja Dios ja myaay tyikwa'kxt. Jade'en ja Dios ttu'unt ku wyinaty tø tyiknitsoojkøxni midi tø tñiwanguixy. Jade'ents ja Dios yikwindsøøgit yikwinjawit myøj'ajtingøjxp y'øy'ajtingøjxp.

Ku ja Pablo t'amidøøy tpoøtsøøy ja Dios jøts ja wejin ja ja'gyukin yikmo'odit pøn ja Dios tpadundip

¹⁵ Tø nnijawi ku meets møk ja nwindson'ajtim Jesús x'ajot'aty, ku mee nayide'en øy tsuj ja tsojkin xmø'øy pøn jaty ja Dios ja'ajtyidip.

¹⁶ Ejtp øts ja Dios ndamøjawi ndagunuu'kxyjawi ku ja mgunuu'kxyidi, ka' mee nja'dyigøy, ejtp meets nni'amidow'i nnibøøktowski ku ø ndsapkajpxy.

¹⁷ N'amidøøpy øts ja kunuu'kxyi Dios Teety midi tyeety'ajtpy ja nwindson'ajtim Jesucristo jøts ja mmø'øjyidit ja wejin ja kajin midi yikxon mdukja'gyukiyidip sa ja y'ejxi tyiyi.

¹⁸ N'amidøøpy øts nayide'en ja Dios jøts mgujajiyidit mgudøø'kxyidit, jøts jade'en xnijawidit ti dø'øn m'aweixtip midi tø myiktaniwaædsowidi, ku janch kawinmaa'ni ja maay midi ja Dios tyagumaawyampy pøn ja yja'ajtpy,

¹⁹ jøts nayide'en ø n'amidøy ja Dios jøts xnijawidit ku niti kya'adaniyi kya'adsøøgiyi ku kawinmaa'ni ja Dios myøk'ajtin midi adøm ja xabudøjka'amp ku adøm ja njanchja'wa'andit,

²⁰ nay ja'abi møk'ajtin idø'øn midi ñanky'ejxi ku Cristo jap oo'kpi agujkpy wyimbijty jujky jadigojk, jøts ku ja nayide'en chajpajtnaa jøts ja Dios Teety y'aga'ngyøø'øm ja kutujktaajk myøøji.

²¹ Jawani møj idø'øn ja Cristo yikpiktaajky, nipøn windsøn nipøn yikutujkpi tkam'aguujpxy'aty ya naxwii'ni jøts tsajpjøtp, ixyam jøts xemikøjxp nipøn ja tkamibaat'att.

²² Tuki'iyi dø'øn midi ja Dios tø tyikøjy, ja Cristo dø'øn tñitanaagyøjxp, ja' idø'øn tñigubajk'ajtp niduki'iyi pøn jaty ja Dios tjanchja'widip.

²³ Jade'en sa tu'uk ja jaa'y ñine'kx kyaka'pxyi pøni ka'ap ja kyubajk ja te, nayide'en idø'on ja janchja'wibitøjk ndejint kyaka'pxyidi pøni ka'ap ja Cristo ja ñigubajk'atyidi, jøts ja ka'ap ja myø'ajtin myø'øyiidi pø ja'axi tuki'iyi tyik'ejtp tyiknajxp ja naajx ja tsajp.

2

Tø ja Dios xyiknitsøøjkyim chojkingøjxp

¹ Tø meets m'anmija'win y'ats'oockti ku mdsøøniidi pøky'agujkpy, jøts tø yjujkyøjkti ja m'anmija'win jadigojk Cristo køjxp.

² Ku meets y'ijty xpadundi ja ka'øwynmaa'ñ midit tpadundip pøn ja Dios tka'ijxyidip, ku ja miku'windsøn yja' xpabøjkidi midit tkajxp ja tyumbitøjk jøts ja t'atskajpxot'amøjkidit pøn ja Dios tkabadundip.

³ Nayide'en øø tø njaa'y'aty samdam meets. Tum ja' øøts y'ijty ndumpy ja axøøk ja kya'øybi midit ja ne'kx y'amidøøpy, jøts tum ja' midit yigaap pidsømp winmaa'ñjøtpy. Paty øøts idø'on xjapaat'aty jøts øøts ja møj ayo'on nyikmo'ot nayide'en sam o pøn pojkipitumbi.

⁴ Janch møj ja Dios pya'ayo'owin

⁵ ku tø tyikjujkyiky adøm ja n'anmija'win Cristo køjxp, øy adøm ja axøøkpi ja yigaappi tø yjayik'o'jkniiyi ja n'anmija'win. Jade'ents idø'on niduki'iyi adøm tø nnitsoojknandi ku ja Dios y'ø'ajtin myøji.

⁶ Ku ja Dios tø tyikjujkyiky ja Jesucristo, nayide'en adøm idø'on ja ñamyayi møøt njukpyijkyim. Nayide'en idø'on ja tpaaty ndejint ku ja tsajpjøtpy pyatøjkiñi møøt adøm ja nnikxyim jøts ja jap møøt n'ejtint.

⁷ Paty yø Dios Teety jade'en ttuuñ jøts t'ejxtit tñajawidit pøni ti pøni pøn wyinaty memp kidakp, jøts jade'en tñanky'ejxit mabaat ja chojkin mabaat ja y'ø'ajtin tø xmø'øyim Cristo køjxp.

⁸ Jabi ja Dios chojkingøjpxi meets tø mnitsø'øky ku xyiktundi ja mjanchja'win. Ka' meets kø'øm xmøøt'aty ja ñankñitso'ok'ajti, ja Dios ja tyajkp.

⁹ Ka'ap ja n'øchinaa'yin xyiknitsø'ok'ajtint midit adøm kø'øm njatu'uñindip, paty ja nganadyamikajxandit.

¹⁰ Tø ja Dios Teety xanibiktajkim Jesucristo køjxp jøts ja øchinaa'yin ndu'unint sayim ja wyinmaa'ñ ja tmøøt'aty.

Ja øy'ajtin midit ja Dios Teety tø xmø'øyim Cristo køjxp

¹¹ Ja'myatsti sa meets y'ijty mjatti mgubatti ku meets ja israelit jaa'y xkamigu'uk'attinim, kø'ømyixi ja y'ijty ñadyamøjawayidi ja Dios y'ejxpajtin midit pyiktaktip ñe'kxkøjxp. Paty meets wenk myiknimadya'aky wenk myikniwinmayi ja'agøjxp ku xkamøøt'atti ja'abi ejxpajtin.

¹² Agoostujpy aduktyujpy meets ojts mdsøøni, ni xkanijawidi pøni pøn pøni ti ja tø tnimiñ midit tyejtip Cristo. Aduky meets ja mduu', tsi'kxy meets ja mduu' ma y'ukyiknijawit ja øgyajpxy ja ømyadya'aky pøni sadam ja Dios t'ødyunwa'añ ja naaxwii'ñit jaa'y. Ja Israelit jaa'y ja ja'ayi y'ijty tmøøt'ajttip, ka'ap y'ijty tu'ugyi ja Dios Teety x'ajot'atti, niti awejxin niti jøp'ejxin xkajagyapti ya naaxwiiñ.

¹³ Ixyamts meets ja Jesucristo mja'ajtniiyidi y'o'jkingøjxp, o meets jagam jixkø'øm ja mdsinaa'yin tø xyiknaxy.

¹⁴ Tøts adøm ja xmø'øyim ja øy'ajtin ja jotkujk'ajtin. Jabi ja'ats idø'on tø t'awaamuky t'agonmuky ja israelit jaa'dyi møøt pøn ka'israelit jaa'dyi. Jade'en ja tsep tø tyikudigøy.

¹⁵⁻¹⁶ Kuts ja y'o'jky jam kruskøjxp, jade'ents idø'on tyikudigøyji ja Moisés kyutujk midit kuwani yikpadump y'ijty, midit tyamøk'ajttip ja israelit jaa'yiyi. Jøts jade'en ja jadu'uk tsinaa'yin tyiktso'ondaajky, jøts jade'en tyiknamuyjki ja israelit jaa'y møøt pøn ka'israelitjaa'y'ajttip. Tu'ugyits jade'en yjaa'y'attit jotkujk Cristo køjxp jøts jade'en ja Dios Teety tkamidsep'attit.

¹⁷ Jade'en'ampy ja Cristo myiñ jøts ja øgyajpxy ømyadya'aky tñagajpxy sa dø'on ja øy'ajtin nbaajttint midit meets y'ijty mganija'wipnim, jøts midit øøts tø ngaja'gyuki, øy øøts ja tø nja'ixy, øy øøts ja tø njamøøt'aty.

¹⁸ Jabi Cristits adøm xuu'mø'øyindip sudso ja Dios Teety nbaajttindit ni'amuki wan t'israelitjaa'yidi wan tka'israelitjaa'yidi, jøts tu'ugyi adøm idø'on ja Espiritu Santo myø'ajtin nyiktu'uñimp.

¹⁹ Migugajp ja'winiiyidip meets ixyam niduki'iyi ja Dios janchja'wibidi, ka'ap ukjade'eni sam y'ijty. Ja Dios meets idø'on mja'ajtniiyidip møøt ja'adi pøn jaty ja y'u'nkja'wip.

²⁰ Jade'en idø'on tpaaty ja Dios kyajp sam tu'uk ja møj tøjki midit møj tsaa tø yiktapojtsoøñ; jøts jade'en ja Cristo sam ja møj tsaa midit yiktapojtso'omp, jøts ja kyudanaabyitøjk møøt ja kyu'aaaw jade'endi sam ja mutsk tsaa unaj'kkindi.

²¹ Adom idø'øn tsaptøjk'ajntidip ndejint pøn tjanchja'widip ja Dios. Kuts ja jaa'y pøn tka'ijxyidip ja Dios jøts ja tjanchja'wiñidi, jade'ents adom ja ndsaptøjk myøjandi mididi ndejint tø yikpojtsøñ Cristo køjxp.

²² Nayide'en meets idø'øn ja Dios mja'ajtmiyidi jøts tø mduktatøjkmiyidi ja y'Espiritu Santo.

3

Ku ja Pablo tnigugajpxy'aty ja øgyajpxy ja øy'ayuujk jøts ttukmadøy pøn ka'israelit jaa'dyi

¹ Ixyam ø puxøjkjøtpy ndsøøni ja'agøjxp ku meets tø ndukmadøy ja Jesucristo ja yja' ku meets nayide'en mbaat'aty xpaatt ja' y'ø'y'ajtin.

² Pø mnija'wiñip meets ku øts ja Dios y'ø'y'ajtingøjxp tø xpikta'aky jøts øts ja yja' nnigajpxit jøts meets ja øchinaa'yin xyiknajxnit.

³ Sam meets jap nøkyjøtpy jawyeen tø nduk'ixy tø nduknijawi ku øts ja Dios tø xukmadøy ja yu'uch winmaa'ñ, ku meets nayide'en xpaatt ja' y'ø'y'ajtin sam israelit jaa'y ja tø tpaatti.

⁴ Ku ja nøky xkajpxtit, jap meets idø'øn x'ext xnijawit ku øts ja Dios yu'uch winmaa'ñ nnija'wiyi mididi ja Cristo yja' tnigajpxip.

⁵ Nijuuni ja'abi winmaa'ñ tø yiknigajpxy tø yiknijawi, ixyamnim idø'øn ja Dios jade'en tø ttuk'ixy ja kyudanaabyitøjkti ja kyugajpxtyøjkti ku ja Espiritu Santo tø y'agajpxiniyidi. Ja'abi jaa'y ja'adi, pøn ja Dios tø ñadyamiyojxniyidi.

⁶ Ya'at idø'øn yu'uch wyinmaa'ñ ajtp mididi ja Dios myøøt'ajtpy: ku dø'øn jade'en tjanchjawidit ja øgyajpxy ja ømyadya'aky mididi xyiknitso'ok'ajntidip, winets jade'en ni'amuki tpaattit ja Dios myaa'y ja israelit jaa'dyi sam nayide'en pøn ka'israelit jaa'dyi. Jøts jade'en ñamayidit jøts tpoctit ja' mididi Dios tø tni'adsowi Jesucristo køjxp.

⁷ Ka'ap øts xjapaat'aty ku øts ja øy'ajtin tø nyikmø'øy jøts øts ja øgyajpxy ja ømyadya'aky tu'ugyi ndu'unt, jabi jade'ents idø'øn ja Dios ja myø'ajtin tø xamidsøky.

⁸ Meets niduki'iyi pøn ja Dios ja'ajtidip, øts idø'øn nayja'wiyip tyimyutsk, jøts øts jade'en ja Dios tø xanipiky jøts ndukmadø'odit pøn ka'israelit jaa'dyi sa ja myøji ja Cristo y'ø'y'ajtin.

⁹ Tø øts ja Dios jade'en xanipiky jøts øts ja naxwii'ñit jaa'y nduk'ext nduknijawit sa dø'øn ja yu'uch winmaa'ñ windi'ixyip tø ttanibiktaajkiñi, jaayip ku ja naxwii'ñit tyiktso'ondaajky.

¹⁰ Paty idø'øn ja jade'en yjajty, jøts ja yiktuk'ext yiktuknijawidit ja ankiistøjkti jøts nayide'en pøn jaty møj'ajttip jap tsajpjøtpy mabaat idø'øn ja Dios ñijawi'ajtin yja'aty. Jade'en ja tnanky'ijxyi ku ja tpokmuky tkonmuky ja øybi ka'øybi jaa'y, tu'ugyi tnankñamyuky janchja'wingøjxp.

¹¹ Jade'en ja tø ttuñ sa ja windi'ixyip tø ttanibiktaajkiñi ku ja nwindson'ajtim Jesucristo jade'en ja chinaa'yin tnanky'ijxyi tnankñijawiyi.

¹² Ku adom ja nwindson'ajtim Jesucristo njanchja'wim, agujk jotkujk adom nwingunøjkxñant ja Dios Teety, niti tsø'øgi niti jøppjawi ja', ja'ayi nmø'ajtim ja njanchja'win.

¹³ Paty meets nnøjmi jøts ka'ap mjotmay'ookit ku øts yap puxøjkjøtpy n'ayøy meets køjxp. Jotkujk meets idø'øn ne'egi mnayjawayidit, jabi jade'ents idø'øn ja Dios yja' yikmijaty.

Ja Cristo chojkin

¹⁴ Ku nja'myatskixy mididi ja Dios tø ttuñ, jats øts jade'en ja Dios Teety y'ø'y'ajtin ngunu'u'kxyja'wiyi pøn tyeety'ajtpy ja nwindson'ajtim Jesucristo,

¹⁵ jøts pøn tyajkp ja wyinmaa'ñ ja yjujky'ajtin jap tsajpjøtpy sam naxwiiñ.

¹⁶ N'amidøøpy øts ja Dios Teety ja myø'ajtin mididi myøøt'ajtpy kawinmaa'ñi jøts ttamigaxit ja Espiritu Santo, jøts jade'en myikjotmø'at'iyidit.

¹⁷ N'amidøøpy øts jøts jam m'anmija'wingøjxp y'ettit xemikøjxp ja Cristo jade'en ku janchja'win xmøøt'atti, jøts jade'en ja tsojkin møk xmøøt'attit mididi ja Dios mdamiyoxitp,

¹⁸ jøts jade'en xja'gyukidit møøt pøn tpaabjøktip ja nwindson'ajtim Jesucristo mabaat idø'øn myøji ja chojkin mididi kawinmaa'ñi.

¹⁹ Ni'amidø'ojip meets jits x'ejxtit xnijawidit ja'abi tsojkin jøts jade'en tuki'iyi mdatøjkigyøjxiyidit ja Dios, øy ja ka' tyimyiknijawigyixy mabaat idø'øn ja myøji.

²⁰ Ixyamts idø'øn pyaat'aty jøts adom ja Dios ndagunu'u'kxyja'wa'ant ndamøja'wa'ant ja'agøjxp ku møj ja myø'ajtin mididi tø xjamø'oyim. Ka'ap adom ja nwinmaa'ñ mya-jadaajkyim, ni ka'baat ja yikja'gyuki mabaat idø'øn ja myø'ajtin mayjada'aky mididi adom xyiktu'unimp.

²¹ jwan twindsø'l'ka'andi twinja'wa'andi ja Dios Teety xemikøjxp ni'amuki pøn jaty ja janchja'wiyip Cristo køjxp! Jade'en idø'øn ja yjatt.

4

Tu'ugyi adom nnayja'wiyindi Espiritu Santo køjxp

¹ Ja nwindson'ajtingøjxp øts tø nyiktsumy, paty meets n'amidøy nbøktø y jøts øy yikxon mjaa'y'attit sam idø'øn pyaat'aty ttu'undit pøn ja Dios tø wyi'ijxyidi wyigøñidi, ma meets idø'øn nayide'en tø myikpiktakmidi.

² Tudə'aky'atti, møøt'atti ja maa'kxujkin; nachokidi nixem niyam, kidi xa'ambøkti ku ti ku sa mjatti.

³ Tu'ugyi m'ettit, ja Espiritu Santo mbudøkiyidip jøts jade'en xemikøjxp y'ett ja jotkujk'ajtin.

⁴ Tu'ukpi jaa'y adøm pøn tpadundip ja Dios, tu'ugyi ja Espiritu Santo jøts tu'ugyi nayide'en ja awejxin nmøøt'ajtyim midi ja Dios tø tni'adsowi.

⁵ Tu'ugyi adøm ja nwindson'ajtim, jøts tu'ugyi ja njanchja'win, jøts ja nnøbajtin,

⁶ tu'uk ja Dios midi tniideety'ajtp niduki'iyi tuknax. Ja' tningubajk'ajtp niduki'iyi, adømgøjxp ja tnan'ky'ijxyi midi ja tyunwampy, jøts møøt ja y'ity pøn jaty ja yja'ajtpy.

⁷ Kija' adøm idø'øn tø nyiktanibiktaajkindi ja ndunkjøjxp, sam ja Cristo kø'øm tta'ejxi, jade'en ja tø tyaky.

⁸ Paty ja Dios jade'en ja kyajpxy wyaan ku ja nwindson'ajtim wyimbijty jadigojk tsajpjøtpy ku tyik'awa'atpidsømgijxy pøn ja miku' wynajty tø myimajadaajkniiyidi jøts tmo'ot ja myøk'ajtin ja naxwii'ñit jaa'y.

⁹ Cits idø'øn jade'en tyijpy ku dø'øn ñiiimy ku wyimbijty jadigojk jap tsajpjøtpy? Ja' idø'øn ku ja myiñ naxwiiñ jøts jade'en ja amutsk'ajtin tpaajty.

¹⁰ Nay ja' idø'øn patøjkñi tsajpjøtpy midi ya atsmeen naxwiiñ, jøts jade'en yikpiktajkni møjwindsøn jøts o ma jade'en tyuknigaxø'økt ja myøk'ajtin.

¹¹ Jøts jade'en nidu'uk nidu'uk tmøøy kija' ja jaa'y tyunkjøjxp, jam pøn kudanaabyitøjkti, jam pøn kugajpxtyøjkmedi, pøn ja øgyajpy ømyadya'aky tyikyø'ømyidip tyiknaxmidip, jøts jam pøn kajpxwejmidi yik'ixpøjkmedi.

¹² Jade'en ja yjaa'y ja ojts tuu'mø'øy sudso ja tyunkjøjxp ja tpadu'undit, jøts jade'en myiwenit ja yjanchja'win pøn jaty Cristo yja'ajtpy,

¹³ jøts kunim adøm ja yikxon ni'amuki ni'aga'pxi nnija'wa'andit ja Dios U'nk janchja'wingøjxp. Winetnims ja nwinmaa'ñ myøktaajkindit jøtsnim idø'øn iiy nayide'en ndu'unint sam ja Cristo.

¹⁴ Ka'ap adøm ja mutsk winmaa'ñ n'ukmøøt'ajtna'ant sam o pøn tigati tpadungøjy ja'ayi ku tsuj tmadøy, øy ja yjanchi kyajanchi myøjpiaktakpy ja'.

¹⁵ Ku adøm idø'øn ja Cristo n'aduunaxkøjxint, jaanimts idø'øn nmøøt'ajtnit ja tsojkin jøts jade'en nduk'ejxna'ant ndukni'wa'ant ja nmigu'uk ja tiy'ajtin, jabi Cristits adøm xnigubajtimp.

¹⁶ Ku ja tningubajk'aty, sa dø'øn øy ñijxy ñaxy. Pøni sats adøm nidu'uk nidu'uk tø nyikmø'øyim ja ndunkjøjxp, jade'en adøm ja xpudøjka'amp jøts øy møk y'ettit ja yjanchja'win, jøts myøjidit myayidit ja wyinmaa'ndyi, tyatøjkiniiyidit ja tsojkin.

Ja jemchinaa'yin midi ja Cristo tø xmo'øyim

¹⁷ Ya'ats øts idø'øn nnigajpxy nwindson'ajtingøjxp: jøts ka'ap jade'en m'uktsinaa'ñidit sam ja chøonidi pøn tka'ejx'ajtit ja Dios, midi tmøjpiaktajktip ja katumbi winmaa'ñ,

¹⁸ jøts agoostujpy abe'etstujpy ja yja'gyuki tmøøt'atti. Ka'ap ja tmøøt'atti ja jujky'ajtin midi ja Dios yajkpy, ku ja kø'øm ka' ttsokti ku ja kø'øm ka' tni'ajwiywa'andi.

¹⁹ Tø ja chø'ødyu'un'ajtin ja tyiktigøøñidi jøts jam tø ñagyiyajkniiyidi ma jam ja y'axøøkpi yigaappi yiktuñ.

²⁰ Ka' meets jade'en ja Cristo yja' tø mduk'ijxyiyidi tø mdukni'awiyidi,

²¹ pøni tødäm meets idø'øn ja xjanchpatmadoji ja yja' ku dø'øn ja jade'en ka' wya'añ, ku dø'øn tø myiktukmadowdi ja tyiy'ajtin.

²² Majtstutnidi tuki'iyi pøni sa y'ijty ja mdsinaa'yin xyiknaxti, ku xpadundi ja y'øybi kya'øybi midi pidsømp winmaa'ñjøtpy, midi mnadyawindaay'ajtidip kø'øm.

²³ Myikjemyiñidip meets idø'øn ja m'aaw ja mjojt sam ja mwinmaa'yindi nayide'en,

²⁴ jøts jade'en xpøjknidi ja jemchinaa'yin sam ja Dios kø'øm tø mdamidsokyidi. Jade'ents ja øchinaa'yin ñigaxi'iky ku øy ku tsuj ja mdsinaa'yin xyiknaxtit, niti pøky niti kadyeey.

²⁵ Paty meets ka' m'uktaay'ajtnit; ku mmigu'uk xmigajpxt tiy janch idø'øn ja møøt mmadya'akt, jabi tu'ugyits adøm idø'øn ja janchja'win nbaduu'ñim.

²⁶ Pøni m'ambøjktip, kidi mnankpyøkyetyidi; ka'ap ja m'aki xyikta'anidit.

²⁷ Kidi ja miku' xyikmøj'atti.

²⁸ Pøn y'ijty maa'tsp, wan ja tmajtstutni jøts ne'egi tyundøjkiñit, jøts jade'en ja ødyunk ttu'unt jøts jade'en tpuðøkit pøn ayoop.

²⁹ Ka'ap axøøkpi kajpxy axøøkpi madya'aky xyiktu'undit, ja øybi madya'aky ne'egi xyiktu'undit jøts jade'en ja mmigu'uk xmo'odit ja tigajtsin jøts ja kunuu'kxy'ajtin.

³⁰ Kidi meets xyikjotmay'øøky ja Dios ja y'Espíritu Santo, ja'ats meets idø'øn m'ejxpaajtín'ajtpy jøts jade'en ja Dios m'ejxkapidit ku meets ja mja'atyí, ixyam sam wyinaty ku mmøøgyøjxniyidit tuki'iyi ja nitsø'ok'ajtin.

³¹ Majstutnidi tuki'iyi ja m'aki, kidi mjotma'atti, ja pøpi tsä'pxpi madya'aky jagam ja yiktanidi sam tuki'iyi ja' midí ka'øý nayide'en.

³² Yikxon meets idø'øn ne'egi m'øý'att, mnabya'ayowidip meets, jøts nayide'en mnamyaa'kxukiyidit jade'en sam meets ja Dios Teety tø mmeek'xyiyidi Cristo køjxp.

5

Sä dø'øn ja chinaa'yin ja tyiknaxtit pøn ja Dios u'nk'ajtiyidip

¹ Kawinmaaŋi meets idø'øn ja Dios Teety mdsøkyidi paty meets idø'øn ja xpadu'unt sam ja mutsk unä'jk tpadundi ja tyeety.

² Nanky'ejxidi ja mdsøjkin nayide'en sam ja Cristo xtsøjkyindi jøts ku ja xku'ayo'owim adøm nbøkyøjxp. Jade'ents ja Dios t'øýja'wiyii'n kø'øm ku ja jade'en ttuuñ.

³ Ixmatskøjxti tuki'iyi ja kya'øýbi. Kidi ø pøngapøn møøt mnamyøøt'atyidi, kidi xniwängøjxwä'andi tuki'iyi ja jujky'ajtin midí yä naxwiiñ najxp, jabi ja Diosxi meets ja'ayi mja'ajtniyidip.

⁴ Kidi ja axøøkpi ja yiktsø'ødyumbi madya'aky xmøøt'atti, jabi ka'axi jade'embi pyaät'atyiyi. Ja Dios meets idø'øn ne'egi ja y'øý'ajtin mmimadyajkidip.

⁵ Tøts meets xnijawi ku o pøn yaa'dyøjk o pøn tø'øxyøjk ñamyøøt'ajtkøjyidi, ok pønts ja axøøkpi yigaappi tyumpy, ok pønts ne'egi ttsojpk midí ja naxwii'ñit yajkpy, ka'afts ja mibaat pyaät'atyí tpaatt ja Dios kyutujk mä ja Cristo ttanitanit ja yjaa'y. Jabi wenkpi diosxi dø'øn ndejint y'ajot'ajtnip pøn ja naxwii'ñit øý'ajtin ttajotmay'oo'kp.

⁶ Kidi xyikmajada'akti ja win'øø'mbidi pøn wändip ku yø'øbi winmaa'ñ y'øýi jøts xpadu'undit, pø møks ja Dios ja tyikastigipaatt pøn ja kabaduujnip.

⁷ Ixmatskøjxti tuki'iyi yø'øbi jaa'y.

⁸⁻⁹ Jabi jaj agujkpyts meets mdsinaaŋi kuts ja nwindson'ajtim møøt m'etti. Ka'ap jade'en ja mdsinaa'yin x'ukyiknaxnidi sam y'ijtyin. Ku ja nwindson'ajtim jade'en ja kuno'jkin xmø'øyim, jade'ents idø'øn nnanky'ejxint nnankñija'wa'ant ja øýi tsinaa'yin, sam idø'øn ndejint ja øý'ajtin ja ty'ajtin jøts midí paat'ajtip ndu'unim. Yikyø'ødyi dø'øn jade'en ja mdunk.

¹⁰ Tun meets ja may'ajt jøts x'ejxtit xnijawidit midí'ibi dø'øn ja Dios chøjky.

¹¹ Kidi xundi ja' midí katump, ja' yø ttundip pøn agoostujpy tsinaadyip; ne'egi pudøki meets idø'øn ja' jøts xukpaattit ja kuxii'ndya'aky'ajtin.

¹² Janch tsø'ødyu'unin idø'øn ja ñaxy ku adøm mmimadyajkindit sä dø'øn ja chinaa'yin amaa'tsk tyiknaxti.

¹³ Øy idø'øn ja nayide'en tpaaty ku adøm ndukja'gyukandit mabaat idø'øn ja chinaa'yin ja kya'øýidi, wan wyinaty jade'en ja Dios o pøn tpaabøjki.

¹⁴ Paty idø'øn ja wijkyajpxy wyä'añ:

Wejnidi kajnidi meets;

kidi agoostujpy abe'etstujpy m'uktsinaaŋidi,

ja Cristits ja kuno'jkin kudøø'kxin tyäkp.

¹⁵ Patyts meets idø'øn øy x'ejxtit sä dø'øn ja mdsinaa'yin xyiknaxtit. Kidi jade'en mdsøñidi sam pøn kube'ets kumon, wijy keýy xyiknaxtit.

¹⁶ Wijy keýy mnabyikta'agiyidit jøts tum ja øýbi ttundi, jabi ja ka'øýbixi yjawi ixyam nankmyøjtøkiwyajniyip.

¹⁷ Kidi mgawinmaa'mbyaatti, ixa'adi nijawidi pøni ti dø'øn ja nwindson'ajtim tø mdamidsøkyidi.

¹⁸ Kidi mnadyamiøxyidi ja nøø ja pa'ak ja amu'ukyjaa'y'ajtin midí ja windigø'øyin tyajkp, yikmø'atti yikmajada'akti, nadyamiøjxidi ne'egi ja Espíritu Santo.

¹⁹ Ja nwindson'ajtim idø'øn ne'egi mmimadya'aktip, ku ja Salmos xkajpaxtit jøts ja y'øøjik xawin'ø'ødit. Tu'ugyi ja m'aaw ja mjooit xpikta'aktit.

²⁰ Nwindson'ajtim Jesucristo køjxp xamøja'wikyunaxtit ja Dios Teety ku ja kunuu'kxin tyaky køx kidä'ak.

Sä dø'øn chøøñidit ja teety ja taak ja u'nk ja unä'jk pøn ja Cristo tpadundip

²¹ Jade'ents ja Dios xawindsø'øgidit ku nixem niyam mnagyupøkidit.

²² Ja tø'øxyøjkti pøn amaajskti ja ñiyaa'y pyadu'undip, nayide'en idø'øn sam ja nwindson'ajtim tpadu'undit.

²³ Ja yaa'dyøjk tñigubajk'ajtp ja ñidø'øxy, nayide'en sam ja Cristo tñigubajk'aty ja yjaa'y, pøn nayide'en yilknitsøjky.

²⁴ Jade'en sam ja Cristo kyupiky'atyiyi ja yjaa'y, nayide'ents idø'øn ja amajtsk tø'øxyøjkti ja ñiyaa'y tkupiky'ajtmidit tuki'iyi.

²⁵ Ja amajtsk yaa'dyøjkti, choktip ja ñidø'øxy ja nayide'en sam ja Cristo tø ttsøky ja yjaa'y ku ttamiyøxy ja yjujky'ajtin.

²⁶ Paty ja jade'en ttuuñ jøts tjibijky tjigøøñ ja yjaa'y niti pøky niti kadyeey, tyikwatsni jade'en nõbajtingøjxp ku ja øgyajpxy ømyadya'aky yikpaduñ yikjanchjawi,

²⁷ jøts jade'en møøt y'ett jøts jade'en tñanky'eixit tsuj wa'ats, ni tu'uk kya'øybi tyikwingaxø'økt.

²⁸ Jade'ents idø'øn ja yaa'dyøjk ttsoktit ja ñidø'øxy sam t'ejx'etti ja kyø'ømne'kx ja kyø'ømgojpk. Pøn idø'øn ja ñidø'øxy ttsojpk kø'øm idø'øn ja ñadyamidsøkyi.

²⁹ Pø ka'axi pøn ja ñe'kx tmidsep'aty, y'ejx'ijtpy ja' jøts yjujky'ett chuxk'ett; tymñayide'en idø'øn ja Cristo ttunmi møøt ja yjaa'y,

³⁰ jabi ñe'kx'ajtpyxi dø'øn ja ndejint ja yjaa'y ma adøm nayide'en tø nyikpiktaajkyindi ma dø'øn ndejint adøm nbajk'ajtyindi nxixy'ajtyindi.

³¹ Sam jap nõkyijpxy wya'añ: "Myajsttu'utp ja yaa'dyøjk ja tyeety ja tyaak jøts jade'en ja ñidø'øxy møøt y'ett ejximdam tu'ukpi jaa'y."

³² Nnija'wip øts ku ya'atpi madya'aky janchtyimchep, ja' idø'øn yø wya'añ jøts yikja'gyukit waani sa dø'øn adøm ja Cristo møøt tu'ugy' njaa'y'ajtyim.

³³ Nayide'ents idø'øn tñigajpxmi ku nidu'uk nidu'uk ja yaa'dyøjk ttsoktit ja ñidø'øxy sam kø'øm ñabya'ayøyi, jøts nayide'en ja tø'øxyøjk tkajpxkyupøktit ja ñiyaa'y.

6

¹ U'nk una'jkti, ja' meets idø'øn mdunkjøjpa'ajtpy ku ja mdeety xpadu'undit. Jade'en xyiknigaxø'øktit ku meets ja Dios xjanchjawi, jade'en idø'øn pyaat'aty.

² Ja myidu'ukpi ka'ama'ayin midit myøøt'ajtpy ja awejxin, ya'at idø'øn ja: "Windsø'øgi ja mdeety jøts ja mdaak,

³ jøts jade'en øy jøtkujk xyiknaxt jøts yo'ont ja mdsinaa'yin ya naxwiiñ."

⁴ Meets u'nkteetyi, kidi o tigati m'u'nk xa'o'jti, ots ja jade'en mmidsepwa'anidit jøts ka'ap m'ukyikajpxkyupøjknidit. Ja'gyuki køjxp meets idø'øn ja ne'egi møøt mgajpxt mmadya'akt jøts jade'en xuk'ejxtit xuknijawidit ja nwindson'ajtim ja tyiy'ajtin.

⁵ Tumbitøjkti, mimadowdi ja mwindsøndi ya naxwiiñ. Windsø'øgidi, padundi tuki'iyi midit ñi'ane'empy sam idø'øn pyaat'aty nmidu'unint ja Cristo.

⁶ Tungøjxti ejtp midit y'ane'empy, ka'ap jaayi yiyi mnabyikta'agidit ku ja m'ijxyidi jøts jade'en ñadyijyi myikajxa'aktit. Jade'ents idø'øn ne'egi xu'undit sam ndejint ja Cristo yikmiduñ, jøts tuki'iyi ja m'aaw ja mjoojt xpikta'aktit, jøts jade'en ja Dios yja' xpaduujnidit midit kø'øm tø ttanibiktaagi.

⁷ Kidi mdunk xuuñ a'aka jøt'aka, ja nwindson'ajtim idø'øn ne'egi mdawindsø'øgip jøts ka' x'ixa'at ja jaa'y kyajxajkin.

⁸ Pø tøts xnijawidi ku adøm nidu'uk nidu'uk xkumaa'yin ja nwindson'ajtim pøni sa adøm ya øy tø ndu'uñim, wan pøn awa'atstum ka'awa'atstum tø tyiknaxy.

⁹ Meets yiktumbitøjkti, yikxon meets ja mdumbi ana'am, kidi xwinwopti xjøjwopti. Ja'myats meets ku meets ja nwindson'ajtim nayide'en xmudunmi midit tsajpøtpy tsinaapy, jøts ka'ap ja' twi'ixy twigøñ, tuknax adømdi ja' wyingujkp, wan tumbi tkatumbi.

Ja nigubojkin midit myøøt'ajttip pøn ja Cristo tjanchja'widip

¹⁰ Ixyam migu'uktøjkti, yikmøkidi ja møk'ajtin midit tø mdatøkyiyi ku ja nwindson'ajtim xmøøt'atti.

¹¹ A'ejxidi abaadidi ja mnigubojkin midit ja Dios yajkpy, jøts jade'en møk xwindanidit ja miku' jøts ka' xyikmajada'aktit ja tyaay'ajtin.

¹² Ka'axi adøm nmøøtseptuñim ja jaa'y, ja'ats adøm møøt ja tsep nyiknajxyim pøn kayik'ejxp kayiktomp, midit yiktseptump, ku ja tñigubajk'aty tuki'iyi ja kya'øybi ya naxwiiñ pøn ja Dios yja' tkatsojkip.

¹³ Paty meets x'ejxmukt xkonmukt tuki'iyi ja nigubojkin midit ja Dios yajkpy, jøts jade'en xmimajada'aktit wyinaty ku ja miku' ja kya'øy'ajtin møk tyikmiñ. Kuts ja jade'en xu'undit, møk mda'andit.

¹⁴ Møk mnabyikta'agidit, ja' møk'atti ja tiy'ajtin nayide'en ndejint sam ku nnachujma'ant, møk ndu'unint. Ja øchinaa'yin ja tiichinaa'yin midit mee mdumpy, ja' mnadyagubokiyidip sam ja tseptumbi yiknitsø'øgyi ja pujx midit kyachwiiñ.

¹⁵ Nay'a'ejxyiyidi nay'abaadiyidi jøts xkajpxyø'ødyit ja øgyajpxy ja ømyadya'aky midit ja øy'ajtin yajkpy, tymñayide'en ndejint xu'undit sam ja soldadi ja kyø'øk ttawa'agi jøts jade'en t'a'ejxi ja tsep.

¹⁶ Yø janchja'wints idø'øn ne'egi mmøøt'attip jøts ka' sã mjattit o ti o sã mjatufiidi ja miku'. Jade'en idø'øn ndejint mnigubokiyidit sam tu'uk ja møj pujx tkayiknaxy ja tsujxøøjp ja tsujxpaa' ku ja soldadi ja pujx ñadyagubøkyi.

¹⁷ Janchjawidi ja yiknitso'ok'ajtin jøts jade'en ja m'anmija'win niti nisa kyajattit, jade'en n'ukpiktaajkint sam tu'uk ja soldadi pyujxkujup y'adaniyi. Tamøø'atti ja øgyajpxy ja ømyadya'aky midi ja Espiritu Santo mmøøjyidip jøts jade'en xniguboktit ja tiy'ajtin ja øy'ajtin sam ndejint ja soldadi ja y'espadi ja chinaa'yin yiknitsøøgyi.

¹⁸ Dios'ajot'ajtingøjxp meets ya'at xungøxt, jøts ja Dios x'amido'odit xpøktso'odit tum ja y'øbyi midi ja Espiritu Santo kyupijky. Ku ya'at xu'undit jøp'ejxti jøpjawidi, kidi meets jatyi xaka'akwa'añ, ni'amidowidi nibøktsowidi pøn jatyi ja Dios yja'ajtpy.

¹⁹ Ni'amido'owidik øts nibøktso'owidik øts nayide'en jøts ja Dios xmo'ot ja winmaa'ñ jøts øts agujk jotkujk nnigajpxt ja ñitso'ok'ajtin midi y'ijty ja Dios kyananky'ejxipnim.

²⁰ Tø øts ja Dios xnajtskaxi kugajpxy'ajtpi, ja'agøjxp ø tø nyiktsumy. Amidowdi ja Dios jøts øts tuki'iyi nyiktungøxt ja møk'ajtin sã dø'øn pyaat'aty ku øts yø'øbi winmaa'ñ nnanky'ejxiyit nnankñijawiyit.

Ja kajpxpoo'kxin midi tyagugøjxiñip

²¹ Yø Tiquico, yø' idø'øn mduknija'wigyøxiyidip pøni ti pøni sã øts idø'øn yam nduñ. Adøm nmigu'uk yø' pøn øts yam møk ja pudøjkin xmøøpy jøts jade'en ja nwindson'ajtim Jesucristo yja' nyikmøjit nyikaja'it.

²² Paty meets ndanigaxi, jøts mdukmadowiyidit sã øøts idø'øn yam jøts øøts jade'en xajotkujk'att.

²³ Paat meets migu'uktøjkti ja tuda'aky'ajtin, ja tsojkin møøt ja janchja'win midi ja Dios Teety ñajtskajxip ñajts'ejxip møøt ja nwindson'ajtim Jesucristo.

²⁴ Jøts Dios Teety ja kunuu'kxidip pøn ja chojkin tø ttamiyoxti ja nwindson'ajtim Jesucristo xemikøjxp. Tiigyajpxy idø'øn, jade'en idø'øn yjatt.

JA NØKY MIDI JA PABLO TYANĠGAJX JA FILIPENSIT JAA'Y

Ku ja Pablo jap puxøjkjōtpy tnijayi pøn tjanchja'widip ja nwindson'ajtim Jesucristo yja' jam Filipos kajpxkøjxp

¹ Pablo jøts ja Timoteo, øøts nwindson'ajtim Jesucristo nwindson'ajtpy. Ixyamts meets ja nøky tu'uk ndanijayi niwine'en ja Dios Teety mja'atyidi jam Filipos kajpjotp, møøt ja windsøndøjkti jøts ja mōjaa'dyøjkti, niduki'iyi wine'en møøt m'etti ja Jesucristo.

² Paatti kupøkti ja Dios Teety jøts ja nwindson'ajtim Jesucristo kyunuu'kxin jøts ja jøtkujk'ajtin.

Ku ja Pablo tni'amidowi tniøbøksowi ja janchja'wibitøjkti

³ Ejtp øts ja Dios Teety ndukmøjawi øy mee winaak øjk nja'myech.

⁴ Ku øts Dios n'ajot'aty amumjoojt øts ja Dios n'amidøy nbøksøy jøts ja mbudøkiyidi;

⁵ pø tu'ugyixi adøm ja winmaa'ñ ixyambaat nyikyø'øyindi midi ja Dios yja'ajip, nayide'en sa ja xpadojkyi'okwandøø.

⁶ Øts wamp jøts ku ja Dios Teety tyikmiweni tyikaja'i y'adø'tst ja myøk'ajtin midi ja tømdukpadsø'onda'agyidi, kunim mye'ent jadigojk ja nwindson'ajtim Jesucristo.

⁷ Øwynmaapy øts idø'øn ja'agøjxp ku njanchokti jøts ku nay ja Dios kyunuu'kxin x'adsinaajyidi. Nitanibyim øts ja yja' jøts wa'ambyim øts jøts ku ja tyiyi yjanchi, øy øts ja tømnyadyimyjagupuxøjktøki uk øy øts wynaty ja kudunktøjk ja windsøndøjk njadyimyjawinguwa'agidi.

⁸ Pø Diosxi tnija'wip wine'en mee njanchøky nayide'en sa nwindson'ajtim Jesús xtsøjkyim.

⁹ Jade'en øts idø'øn n'amidøy nbøksøy ja Dios jøts ku øy tsuj mnamayayidit ku ja tyiibyixwinma'adyit, jøts ku ja ja'gyukin xjagyaptit øy juuni.

¹⁰ Ku jade'en xnijawidit jøts xpadu'undit midi øy midi tsuj, jade'ents xjagyaptit m'anmija'win øy wa'ats jøts niti pøky mgapaadyidit ku mye'ent ja Cristo.

¹¹ Øy wa'ats wyimbidsø'ømdit ja mdunk midi ja nwindson'ajtim mdamidundip, jøts ja jade'embidi idø'øn ja Dios wyindsø'jkinja'wip ja yjade'embidi idø'øn ja myøja'wip.

Ja Cristo øts xjagyajp amuum jøts ja' øts amuum xyikjujky'ajtp øy yjuuni'att

¹² Migu'uktøjk, nimadowdi meets, øy øts idø'øn yjawi njemjaty ndejaty, ne'egi nabyudøki ja yjawi tøm'ukpatni, jinaxy ø ne'egi ngajpxwa'kxi ja Dios kyajpxy ja y'ayuujk.

¹³ Tyumnija'widip ja tøjka'dinaabyi ja'adi, jøts nayide'en øy pøn, ku øts ja' nyiktatagudsumi ku øts ja nwindson'ajtim yja' nyikø'øyi.

¹⁴ Jøts ku jade'en tøm'ejxti tnijawidi adøm ja nmigu'uk pøn ya'ajttip jøts ku øts yajp tsumy n'ity, ne'egi jinaxy ja tøm'yjotmøktø'akti jøts ja jade'en tkajpxwa'kxidi ja Dios kyajpxy ja y'ayuujk.

¹⁵ Jats ya pøn øy'ajtin tsuj'ajtingøjxp tkajpxwa'kxtip ja Cristo yja', jats nayide'en pøn winaagin nugo tsepkøjxp ta'ajkingøjxp ttundip,

¹⁶ jøts ja kyø'øm ja' tyikmøjtøki, jøts ja ja'ayi nugo xjaaktsepnipøkwa'andi ku øts yap puxøjkjōtpy;

¹⁷ pønts ttundip y'øwynmaa'ngyøjxp, ja'agøjxp ja jade'en ttundi ku øts ja xpa'ayowdi, pø ñija'widixi jøts ku ø nyam'aty, ku øts møk ja Dios yja' nyikyø'øyi.

¹⁸ Jøts tiku øts nugo ndyimya'aty ndyimdyaajt? Wan pøn tyikyø'øy y'øwynmaa'ngyøjxp uk kya'øwynmaa'ngyøjxp, pø nugo tum ja Cristo yja' tkajpxwa'jkxidi; yø' ø ndajotkujk'ajtpy.

Jøts jaaktyimxyonda'akp øts yikxon,

¹⁹ pø nnija'wipxi øts ku øts ya'at ayon' tuki'iyi nmimadaøkxt, ja'agøjxp ku meets ja Dios x'ajot'aty jøts meets xni'amidowi xniøbøksowi jøts ku øts nayide'en xpudøki ja Espiritu Santo.

²⁰ Ja'ats ø njøp'ijxpy jøts øts ja ka' ndatsø'ødyu'unt, tu'uk amumjoojt øts ja ngajpxit ja yja'. Ixyam idø'øn pya'at'aty yjaaktyimñigaxø'økt yikxon ja Cristo myøk'ajtin midi ø nyiktumpy, njajuiky'aty øts uk nja'øøky njadigøy øts, ka' øts ja nwandijy.

²¹ Pø ja Cristoxi øts amuum xjagyajp, ja'ats ø nmøk'ajtpy. Nja'øøky øts, jinaxy øts ja øy xwimbidsø'ømxit.

²² Pøni jaakjujky'ajtpøts øts ya, nay'øy'ajtpøts ja nayide'en, jøts øts ja Dios yja' njaakyikyø'øyt, jade'ents ø ka'ap nnijawi pø midi'ibi.

²³ Tum jade'en tum øy, midi'ibi øts ngupøkp ngagupøkp: ne'egi jadyimya'ats'ookwamp øts, jøts øts ja Cristo xemikøjxp nmøøt'ejtmit, ne'egi jadyimya'øy'ajtp ja jade'en;

²⁴ jadu'ukts ja winmaa'nmyi, ne'egi jinaxy yjawi chøkyi jøts meets ka'ap jade'eñi nmajst-
stu'utt, jaakjujky'ajtp øts.

²⁵ Patyts ø nwa'añ jøts ku mee njaakmøøtja'ajt jøts njaakpudøkidit jøts xajotkujk'attit ku tu'ugyi janchja'wingøjxp xyikmiwenedit xyikajajidit ja Dios yja'.

²⁶ Jade'ents meets njaakminabyaadit ja nwindson'ajtim Jesucristo kyunuu'kxingøjxp amuum.

²⁷ Yø mjadyimy'ejxtip yø mdsinaa'yin, jade'en xu'undit sa ja nwindson'ajtim yja' wya'añ. Øy meets jam nja'ats'ixy kø'øm, uk øy øts jadyimyjama jagam, ja' ø ndsøjkpy jøts øts ejtp nnijawit jøts ku meets ni'amuki mnabyudøkiyidi, tu'ugyi ja mwinnmaa'ñ xyik'etti, xem yam ni'ijtyi xniwinmayidi janchja'wingøjxp sa y'øyt sa tyuda'akt ja Dios y'øyajpxy ja y'øy'ayuujk.

²⁸ Ni xkatsø'øgidit pøn ja mdamidsep'ajtidip. Wa'ats yiknijawidi jøts ku ja windigøy yjattit; jøts meets, ja nitso'ok'ajtin mee mbaatp midt ja Dios yajkpy.

²⁹ N'øyja'windip ku nwindson'ajtim njanchja'windi, jøts nayide'en ku ngu'ayo'ombaaajtindi.

³⁰ Nay ja' ayo'on mbaattip midt ø tø nbaaty. Tu'ugyi yø tum jade'en n'adsinaa'yindi jøts mnija'widipts sa øts ixyam n'ayo'ombat'adi'ich.

2

Ku Cristo yik'ayowim jyaty jøts ku tyik'awa'añ ja myø'ajtin sam ka'ap pøn

¹ Jøts pøni myikjotmøktajkidip ja Cristo, pøni mdajotkujk'ajtidip ja y'ayo'ejxin, pøni jap ja Espiritu Santo xmøødiyidi, pøni mnija'widip sa ja chojkin sa ja pya'ayo'owin,

² yikxondaktik øts ku yikxon mdsøniidi mdanidi, tu'ugyi tum jade'en mnamyayidi ni'amuki jøts tu'ugyi mwinnmaydi.

³ Kidi ti xundi mgø'ømwinmaa'ngyøjxp uk xyiktundi ja namyikaxi; yø' øy, ku tudā'aky jøts møj'ejxti ja mmigu'uk.

⁴ Kidi ja ngø'ømja'ajip nugo ndyimyikmøjtøjka'am, pø ja'axi tsojkip sudso ja nmigu'uk nbudøjka'am.

⁵ Yikyø'ødyi ja winmaa'ñ nayide'en sa ja nwindson'ajtim Jesucristo.

⁶ Øy ja wyinaty amuum ja Dios'ajtin tjajagyepy, ka'ap ja wya'añ jøts ja kuwani tyimñayide'en tmi'abaaty ja Dios Teety.

⁷ Ojts ja kø'øm tjbiky midt ja wyinaty amuum yja'ajtpy jøts ja jade'en ñabyikta'agyi sa øy pøn tumbi ku ja ya ñaxwiin'ajty.

⁸ Jøts ku ja jade'en jaa'yin myiif, ojts ja tkupiky'aty ku ja yjemjaty tyejaty. Ejtp øy tpaduñ jabaat ku ja y'ø'jky, øy tsaach'ijxyim ja o'jkin yjayikmøøy jam kruskøjxp.

⁹ Ja'agøjxp ja Dios Teety ja ojts myøjawiyi jøts ja yikmøjtøjkiyøø, ka'ap pøn myi'abaadyi øy yjapøni,

¹⁰ ku pøn myadobaadit ja nwindson'ajtim øy madsoo, nagyuxendyakøxidip ja ni'ijtyi,

¹¹ jøts ja niduki'iyi t'ejxkaptit jøts ja wya'andit jøts ku ja' wyindsøni ja Jesucristo, tum Dios y'øy'ajtingøjxp.

Sam ja jaj sam ja tøø'kxpi jade'en ja jaa'dyi pøn ja Dios ja'ajtidip

¹² Migu'uktøjkti, nayide'en ndsøky jinaxy xmimado'odit øy øts yam jagam, sam ø xmimadowdi ejtp ku meets jam y'ijty møøt ndsøøni. Windsø'øgi ja Dios, tudā'aky mnabyikta'agidit, jotmay'atti sudso ja nitsoojkin xpaattit.

¹³ Ku ja tsojkin xjagyapti jøts mdunwa'andi, ja Dios jade'en myikwinmaaajyidip, jøts nay ja' mbudøkiyidip ku ja xundi jade'en sa ja Dios mdamidsoyidi øy tsuj.

¹⁴ Ejtmi xoni tuki'iyi xu'undit, kidi amikajpxy xpøkti,

¹⁵ jøts ka'ap pøn mbøky'ejxidit, ja' myik'awa'andip jøts ku Dios m'u'nk'atyidi, øy wa'ats mjaa'y'attit ma ja ka'øy jaa'dyi ma ja kawindiy jaa'dyi. Jade'en meets jam mgaxø'økt sam ja xøøw tkujajy tkudii'kxy mā koots,

¹⁶ jade'en'ampy ku ja Dios ja kyajpxy ja y'ayuujk xyikyø'øyidit. Jøts ku ja Cristo mye'ent jadigojk, møk mee ndaxonda'akt ku ø nnijawit ku ø ka' nugo tø ñiyikyø'øyi ja Dios yja', ka' ø nugo ja ndunk ñiwindigøy.

¹⁷ Øy øts yø pøn xjaduku'oogi, ja' ñamyayi ka'pxp ja windsø'jkin midt ja Dios y'ity mmøodyip ku ja xjanchjawidi. Xondaqk øts jade'en, niduki'iyi nxondaajkindit.

¹⁸ Jotkujk'at mee nayide'en, ja'agøjxp ku øts nayide'en njotkujk'aty.

Yikajxtip ja Timoteo møøt ja Epafrodito

¹⁹ Pøni wamp ja nwindson'ajtim Jesús, ngaxp øts tsojk ja Timoteo jøts ja m'ats'ejxidit jøts ø njotkujk'att ku ja tmime'ent ja kajpxy ja ayuujk sa meets jam.

²⁰ Pø ka'axi jadu'uk pøn nayide'en wyinnmay sam ø nwinmayin, sam mee njotmay'atyin jøts ja øy'ajtin xpaattit;

²¹ tum kø'øm winmaa'ñxi pøngapøn yiktundip jøts ka'ap ja nwindson'ajtim Jesucristo yja' t'uktunk'ajtniyidi.

²² Tøts xnijawidi sã Timoteo øy tyuñ, sã øts ja møøt ja Dios kyajpxy ja y'ayuuik ngajpxwa'kxiyi, jade'en øts ja xpudøki sam ja jaa'y ja y'u'nk pyudøkiyi.

²³ Jade'ents ø nwinmay pøni sã øts yø nja' y'ukwin'øyi ngaxpts øts ja' jøts m'ats'ejxidit;

²⁴ n'ajot'ajtpy øts Dios jøts meets kø'øm tsojk n'ats'ext.

²⁵ Paat'ajtipts yjawi nayide'en ndanigaxit ja Epafrodito, ja nmigu'uk, pøn øts amuum møøt nduñ, pøn meets øjts xaniguexy jøts øts ja xpudøkit ku ti jaty y'ity kya'ity.

²⁶ Mjanch'ejxwajnidip ja' niwine'en mjam'atti, jøts mjanchjotmay'atyidi ja'agøjxp ku tø xnijawidi jøts ku y'ity pyikyiyi.

²⁷ Tøts ja yjanch'atspikyiyi, jawaani ja tø kya'øøky; tøts ja Dios y'ayo'ijxyi jøts øøts ja tø xpudøki jøts ø nayide'en kyajinaxt ja njotmay, ti øts yam ndaxømpy.

²⁸ Ja'agøjxp meets ja ndyimdyanigaxwa'añ jøts xaxonda'aktit ku jadigojk xpaattit x'ejxtit jøts øts jade'en ka' nugo ndyimyjotmay'ookt.

²⁹ Taxonda'akti ku ja jam yja'att. Jade'en pyaat'aty'i tu'ugyi ja Dios xjagyepjxindi pøn jaty nayide'en tpadundip sam ja Epafrodito, minamyayidi yikxon;

³⁰ jawaani tø kya'øøky ku tmiduñ ja Cristo. Tø tmiwanjaty yik'ayowim ku øts ja pudøjkin xmo'øy, jøts meets ja ñamyayi mgudaniyi øy mee mgaya'aty.

3

Ja tsinaa'yin midi tÿ janch

¹ Migu'uktøjk, tajotkujk'ajtidi ja Dios kyunuu'kxin. Ka' øts n'adsepjawi øy øts yam jadigojk nja'at nay yø', tø ø nnijawi jøts ku meets yø xyiktu'unt.

² Øyim mnay'ejx'etidit, jam ja jaa'y pøn ja wenk winmaa'ñ tyikyø'ødyip, pøn ttundip ja ka'øybi, ja' pøn tta'ødyøkiwyandip ja Dios ku ja ttsuki ñe'kx jøts ja ejxpajt jade'en ñabyiktaajkxiyidi.

³ Jade'en ne'egi tpaaty, adøm idø'øñ nmøøt'ajtyindip ja ejxpajt ja'agøjxp ku adøm ja yja' tu'ugyi nyikmøjtøka'andi, jøts ku ja Cristo Jesús ndaxondaajkyindi, jøts ka'ap nmi'agijxyindi nmijotkijxyindi ja'ayi midi kaxø'kp iiy ja'ayi nikijxy.

⁴ Wã'ambimts øts inet jøts ku ja nayide'en y'øyi ku jade'en ja nachuki ñaxy kostumbri køjxp. Jawaani ka'pxy øts ja ne'egi ndyimñijawi ja'abi tsinaa'yin;

⁵ ku ngue'jxy kyiduktujk xøøw øts øjts ja ejxpajt nyiktu'unxi, israelit jaa'yxi øts; ja Benjamin øts ndeety'amøjip, jøts hebreit etjotp ø ngue'exy, jøts nay jam øjts ndeety ndaak choondi. Fariseotøjk øts y'ijty møøt nnamyayi, nay ja Moisés øts y'ijty nbaduujnip ja kyutujk;

⁶ møk øts ja nnitani, jantyimdyøøp øts ja njawi, jøts øts ja jaa'y nbawidetti ndagumatsiwyaa'andi pøn jaty ja Cristo tjanchja'widip. Ka' øts y'ijty pøn ja kutujk xawindø'øy sa ja tyikutuky, nadyijyi tñigajpxy midi'ibi øy midi'ibi tøøp.

⁷ Midi'its øts y'ijty jade'en nmøja'wip, jade'en øts yø ixyam nja'wiñi jøts ku ka' ma tyuñ, ja'agøjxp ku øts ja nwindson'ajtim Jesucristo tø nnija'wiyi ja pya'ayo'owin.

⁸ Jøts pøni ti øts ja njaak'øyja'wip, tum kudigøøpy øts njawi, ma' t'ukmi'abaat ku ja nwindson'ajtim Jesucristo nnija'want. Ja'agøjxp øts tuki'iyi tø n'ixmajtskixy, aayin pista'agin ja tuki'iyi ñjøjkkøjxni, ja'ayi øts tu'ugyi njøp'ijxpy ja Cristo

⁹ jøts øts ja møøt n'ett, kaja'agøjxpip ku øts ja kutujk ka'pxy nbaduñ, jade'en'ampy ku øts ja nwindson'ajtim Jesucristo tyiy'ajtin njanchja'wiyi jøts øts ja Dios Teety jade'en tø xkupiky. Ja'ats ja Dios kyupiikpy pøn ja janchja'wiyip.

¹⁰ Ja' ø ndsøjkpy jøts øts yikxon ndyimñijawit sã ja nwindson'ajtim tyiy'ajtin jøts øts ja myøk'ajtin ja xmo'ot midi ja yjagyeypy ku ja øjts tmimajada'aky ja o'jkin ku yjujkpyiky xemikøjxp, nja'ayøøt nayide'en, uk njadyimyja'øøky ø nayide'en sa ja y'ø'jky,

¹¹ jøts øts jade'en njøp'ext ja jujkpyøjkin nayide'en sam ja yjujkpyiky.

Ja' njotmay'ajtmp sudso nbaajtint ja øy'ajtin

¹² Ka' nwa'añ jøts ku øts jade'en tuki'iyi ngøjø'ømit'ajtni, uk ka' nwa'añ jøts ku øts tyimwya'atsni tyim'yøyni; tu'ugyits øts ja nbanøjkk'adi'ich, jøts njøp'ijxpy øts ja nbaatt midi øts ja nwindson'ajtim Jesucristo tø xaniwaadsowi patki'jyi.

¹³ Ka' øts migu'uk nwa'añ, jøts ku øts ja jade'en tø ndyimbyatkixy tuki'iyi; nja'dyigøøgyijxpy øts ixyam sã jaty ø tø njaty ngubety ti jaty tø tyuñi, ja' ø ndumpy jøts øts ja njotmay'aty midi mempnim kidakpnim,

¹⁴ jøts nja'jtint ma pyaat'aty'i ma yjøpkixy jøts ja Dios ja y'øy'ajtin xukpaajtint jap tsajpjøtpy midi ja xaniwaadsow'wa'amp, jøts adøm ja nyikmø'øytin ja'agøjxp ku ja Cristo møøt n'ijtyindi.

¹⁵ Wine'en ja Dios møk njanchja'wa'andi, paat'ajtip jøts jade'en tu'ugyi nwinmaa'yindi. Pøni sats pøn wyinmay, jam pøn ja wenk winmaa'ñ tpaaty, nay ja Diosts ja tuknijawiyip midi tøøp.

¹⁶ Tu'ugyits yø winmaa'ñ nbojkindit, jøts yø' idø'øn nyiktu'unindip amuum sam adøm yø tø nnija'wa'ant.

¹⁷ Pa'ejxtik øts, migu'uktøjk, jøts ejxti nayide'en pøn nay yø'øbi tyiktundip mididi mee tø nda'ane'emy.

¹⁸ Jaa may pøn ja nwindson'ajtim Jesucristo yja' tkamøjawidip jøts ja wyinmaa'ñ ja' yiktundip jøts jade'en chøonidi. Tø meets yø kawinaak ojk ndukmadø, icyats øts jadigojk yik'ayowim nniagjpxkøjmi.

¹⁹ Ka'ap ja wyindø'ødit, windigø y ja nøjkx yjatti. Ja kyø'ømwinmaa'ñ sa kø'øm ttsokti, ja' yikmøjtøjkidip, ja' ñamyayi dios'ajttip. Ne'egi jinaxy ja ñadyamikexyidi mididi'ibik idø'øn ja yjawi tyatsø'ødyu'undip, ja' nugo yjotmay'ajttip sa jaty ti jaty ya naxwiñ.

²⁰ Ja' adøm amuum xkøjø'ømit'ajttindip jap tsajppøtpy, jøts ja' adøm njøp'iixyindip jøts ku ja jap choont ja nwindson'ajtim Jesucristo pøn ja pøky ttuknitso'ok'ajtp.

²¹ Ja' adøm xyikwimbejtindip xyiktigajtsindip jøts nayide'en njajtint sam ja kø'øm amuum ja kunuu'kxy'ajttin tmøødi, jøts nay ja myøk'ajttin ja jade'en yik'awampy ku jade'en xu'unin, pø ja'axi tuki'iyi tnitanaagyøjpx øy ti.

4

Xondaqunaxti ku Dios xjagyeyjyindi

¹ Njantyimya'ats'ejxwändip mee migu'uktøjk, mee ndajotkujk'ajtpy, meets jam Dios wyingujk ndamajada'akp, jøts tu'ugyi jaaktyimya'ajot'atti ja Dios.

² Ngajpxñigajxidip øts ja Evodia jøts ja Sintique jøts ø møk nnøjmi, wan tñayja'gyukiyidi tkajpx'øyidi ti ka'ø'xyidip jøts tu'ugyi ja Dios yja' tyikyø'øyidit, pø tum ja'axi køjø'ømit'ajttidip.

³ Mets migu'uk, pudøki yø Evodia møøt ja Sintique, ja' øts øjts ngajpxwax'kxi ja Dios kyajpxy ja y'ayuujk møøt ja Clemente jøts møøt jadu'ukti pøn jaty øts øjts xmøøtundi. Wa'ats ja Dios ja ñijawiyidi pøn jaty ti jaty ja xyøøwdi.

⁴ Ejtp ja Dios yja' xaxondaajkidit. ñNjaaktyimñigajpxpy øts yikxon jøts mxonda'aktit!

⁵ Wan øy pøn mnijawiyidi jøts ku mee tuda'aky mjaa'y'aty. Ja'myats'etti ku tsojk ja nwindson'ajtim myenit.

⁶ Kidi ti x'ayo'onjawidi, tukmadowdi ne'egi ja Dios ku ja x'ajot'attit; ja' m'amido'odip mbøktso'odip ti mga'ejtxidip, jøts tukmøjawidi tukunuu'kxyjawidi ku wyinaty myikmo'odi mididi m'amidoodip.

⁷ Jøts ja mmo'ojidit ja y'ø'y'ajttin ja tuda'aky'ajttin mididi ka'ap ti tmi'abaaty sa adøm njaniwinmaa'yam; ja'ats tyikjotkujk'atp ja mwinmaa'ndyi jøts ja m'anmija'windi jøts ku ja nwindson'ajtim Jesucristo møøt m'etti.

Ja' mwinma'adyip mididi øy

⁸ Yø', migu'uktøjk, mjotmay'attip mididi tiy mididi janch, mididi xpaat'ajttindip, mididi øy pidsømp, mididi wa'ats, mididi tsøkyim, mididi øy agajpxy pidsømp o madsoo. Tum ja y'ø'bi mwinma'adyip mididi øñigajpxni øñimadyakni.

⁹ Yiktundi mididi tø nduk'xpøkti, sa jaty tø n'ana'amdi, jade'en xu'undit sa øts øjts nwa'añ jøts sa øts øjts kø'øm x'ejxti ku øts ja øts nduñ: tundits jade'en, winets ja Dios nijuuni mga'xmatsidit, ejtp ja yjotkujk'ajttin ja mmøøgyunaxiyidit.

Ku ja filipensit jaa'y tmay'atti ja Pablo

¹⁰ Xyikxondaq øts ja Dios jøts ku meets jadigojk xja'myech. Kidi jade'enip ø ndiij jøts ku meets tø xtyimya'dyigøøñi, ja ku ka' ñibidsømi juuni mee xpudøkit.

¹¹ Ni ka'ap ø nwa'añ jøts ku øts yam sa ndyimyjaty. Tø øts yø n'ejxandigøøñi. Yø'øyi ø ndajotkujk'ajtpy mididi nmøøt'ajtpy.

¹² Wa'ats ø nnijawi sa yik'ayowim nyiknaxjint, jøts nayide'en sa ngumeen'ajttint. Tø øts yø nyikyuy jøts øts øy mididi ngawingudsø'øgit, øy ø ngay øy ø ngakay, uk øy ti y'ity kya'ity.

¹³ Øy ø mididi nwinguwa'agi, ja nwindson'ajtim Jesucristo nmøk'ajtpy, ja' ø xkuwamp.

¹⁴ Øy'ajttpts ku meets ja n'ayo'on nayide'en mnadyapaadyidi jøts øts jade'en xpudøkidi.

¹⁵ Mnayinija'widipts wine'en jam Filipo kajpxkøjx mgugajp'atti, ku øts ja Dios kyajpxy ja y'ayuujk øjts ngajpxwax'kx'okwajni, ku øts øjts nniikxy jam Macedonia kajpxkøjpx, pø meeçixi øjts xaniguexy ja pudøjkin mididi ja Dios mdamiyøjxtip ja'agøjpx ku ja wyinaty ja myøk'ajttin tø xpaajttiyidi.

¹⁶ Jøts ku øts jam wyinaty Tesalónica kajpxkøjpx, nayi meetsxi øjts xaniguexy ja meeñ majtsk ojk, jøts øts ja nyiktu'unt ti jaty ø ka'ejtxip.

¹⁷ Kayø'øjip ø nugo njotmay'ajtpy jøts øts ja nugo n'axajit øy ti; ja' ø ndsøjkpy jøts meets yjaakniatt ja mja' jam Dios wyingujk.

¹⁸ Tits ø kayikmøøpy, ne'egi o ti tø nyikmø'øy. Tyimchaachjam yø kajaa mididi yø Epafrodito tø xamigaxidi. Jøts jade'en ja Dios yø tjawi kunuu'kxy, sa ja poom pya'akxuuky, ja windsø'jkin yø ñamyayi yikmøøpy.

¹⁹ Ja Dios pøn xjagyajpidip, ja' mmo'ojidip, ja' tyikwimbetp tyiktigatsp pøni ti mga'ejtxidip. Ja nwindson'ajtim Jesucristo møøt ja Dios Teety, ja' tjagyajptip ja kunuu'kxin ja jotkujk'ajtim midu ni juuni niwindem kagudigøøpy.

²⁰ iXemikøjx Dios Teety mõj janch ja kunuu'kxin tjagyepy! Jade'en idø'on ja yjatt.

Ku kyajpx'abaadiwya'añ jøts ja kajpxpoo'kxin t'ukyajkni

²¹ Nguejxpy øts ja kajpxpoo'kxin nwindson'ajtim Jesucristo køjxp jøts xukmado'odit niduki'iyi pøn jaty ja Dios jagyajpidip. Ñayi kyajxmidip ja kajpxpoo'kxin ja'adi pøn jaty øts yam nmøøtti.

²² Niduki'iyi pøn ja Dios ja'ajtidip ya, jøts ja'adi pøn namyajyidip ma ja romanit windson ja tyøjk, nayi mdanigajxidip ja kajpxpoo'kxin ja'adi.

²³ Ja nwindson'ajtim Jesucristo mgunuu'kxidip niduki'iyi. Tiigyajpxy idø'on, jade'en idø'on ja yjatt.

JA NØKY MIDI JA PABLO TYANĠGAJX JA COLOSIT JAA'Y

Ku ja Pablo tñijayi pøn tjanchja'widip ja nwindson'ajtim Jesucristo yja' jam Colosas kajpkøjxp

¹ Pablo øts, øts ja Dios tø xamidsøky jøts øts ja tø xpikta'aky nwindson'ajtim Jesucristo kyudanaabyi. Jade'en'ampyts øts møøt ja Timoteo

² ya'at nøky nja'ay jøts øø ndanijayi pøn jam Colosas kajppjotp ja'ajtidip ja Dios, pøn jaty jam tjanchja'widip ja Cristo, ja yiknitsokpi. Wants ja Dios Teety ttuñ ja may'ajt jøts ja myo'ojidit ja kunuu'kxin jøts ja myo'ojidit ja tuda'aky'ajtin.

Sa ja Pablo tni'amidowi tñibøktowski pøn jaty ja Dios tjanchja'widip jøts ja ttukmadøy ja Dios
³ Ejtp øøts ja Dios ndukmøjawi ndukunuu'kxyjawi midi nwindson'ajtim Jesucristo teedyip ku øøts ja' n'ajot'aty meets køjxp.

⁴ Tøts øø nñimadøy jøts ku meets ja nwindson'ajtim Jesús møk xjanchjawī pøn yiktejp Cristo, jøts ku nayide'en xtsokti xpa'ayowdi ja mmigu'uk pøn jaty ja Dios ja'ajtidip,

⁵ ja'agøjxp ku tu'ugyi xjøp'ejxti midi myikmo'owandip midi jap pøkji'iky ejtp jap tsajppjøtpy. Tøts xnijawidi tīgøjxp xjagyapti ja jøp'ejxin, ja'agøjxp ku tø xmadowdi ja Dios kyajpxy ja Dios y'ayuujk, ja Dios tyiy'ajtin midi yiknitsokp.

⁶ Nay yø'øbi kajpxy nay yø'øbi madya'aky midi ojts myiktukmadowdi, janch møjta'adøtsp yø ixyam, jøts tum øy wyimbidsimy øy madsoo wine'en ja naxwiil'ñit, nayide'en yjaty sam tø mjatti kuyip xmadoo'okwandøø ja Dios chojkin ja pya'ayo'owin, jøts tø xnijawidi jøts ku yø tyiyi jøts ku yø yjanchi.

⁷ Yø'øxi øøts ja nmigu'uk Epafras ojts mduk'ixpikyidi pøn øøts amuum nmøøtumpy jøts yjanchpaduujnip ja nwindson'ajtim yja' ja', jøts ja' meets idø'øn jam tø mbudøkiyi.

⁸ Nay ja' øø tø xukmadøy sa meets ja tsojkin xjagyepy midi ja Espiritu Santo mmøøjyidip.

⁹ Patyts ku øøts ja jade'en ja'ayi nñimadøø, winetyipts øøts ja Dios nijuuni ngamimøñ meets køjxp, ejtp øøts ja n'amidøy jøts ja Dios yikxon mdukñijawiyidit ja winmaa'ñ sa ja tsoøky, jøts ja mmo'ojidit wine'en ja wijy'ajtin kejy'ajtin, jøts nayide'en sa xnimadojyidit ja Dios yja'.

¹⁰ Jade'ents øøts ja n'amidøy nbøktøky jøts yikxon mjaa'y'attit sam idø'øn pyaat'atyī ttu'undit pøn ja Dios ja'ajtidip, jøts tum ja' mdu'undip midi ja Dios tyajotkujk'ajtpy, midi øy midi tsuj wimbidsømp m'ødyu'uningøjxpti, jøts yikxon xnijawidit ja Dios.

¹¹ N'amidøøpy øøts ja' jøts ja mmo'ojidit ja kyunuu'kxin ja myøk'ajtin, jøts xmidanidit øy midi ayo'on, jøts xyiktudā'aktit ja mwīnmaa'ndyi midi ne'egi mdajotkukidip,

¹² jøts ja Dios Teety xukmøjawidit xukunuu'kxyjawidit jøts ku ja tø xanibktaajka'am ku adøm xpaat'ajtyim jøts adøm ja xmo'øyim mā ja kyunuu'kxin, midi ja yikmøødyip pøn jaty ja Dios ja'ajtidip.

¹³ Pø ja'axi tø xukniwaajchim mā amuum myajada'aky ja wimbeets'ajtin ja kugoots'ajtin yja', jøts ja tø xyiktøjka'am mā ja Dios U'nk ja kutujk ttanitani ja yjaa'y,

¹⁴ pøn ojts tyaky ja nitso'ok'ajtin jade'en'ampy ku tø xku'o'jkandi jøts adøm ja xpo-jkpimee'kxyindi.

Ku ja Cristo ojts xku'o'jkandi adøm nbøky, jade'en'ampyts ja Dios Teety jadigojk xmijøtjimbijtyindi

¹⁵ Ka'ap ja Dios Teety yik'ixy yikñijawi, jade'en'ampyts ojts ñanky'ijxyi ku ja y'U'nk tyikmiñ, pøn tu'uk møj, ka' pøn jade'en.

¹⁶ Ja' Dios Teety tyukyik'øyyi'ñ tuki'iyi ti jaty ejtp tsajppjøtpy, ti jaty ejtp naxwiil'ñ, midi kaxø'jkp midi kagaxø'jkp. Jøts ja tyik'øyi sa ja anklitstøjk ñagyutujkmø'øyi, ja'ats ja tyik'øyyi'ñ jøts ja' ja tja'ajtp.

¹⁷ Jaayim ja yiknitsokpi wyinatyni, ja Cristo, jøtsnīm øy ti kyaxi'ikñim, jøts ja' tuki'iyi tkjø'ømit'ajtp ti jaty ja'ajtp.

¹⁸ Ja' tñigubajk'ajtp ja jaa'y pøn ja Dios yja'ajtpy, jøts ja' tjagyajp amuum yø'øbi jaa'dyi. Ja' tyikjujky'ajtp jøts ja' midu'uk tmimajadaajk ja o'jkin ku ja yjujkyjky, jødsyim ja jøp'am ejtp tyimy'ity.

¹⁹ Ja Dios Teetyts ja kø'øm tyikjajt jøts ja tyikdiosajty ja nwindson'ajtim Jesucristo amuum,

²⁰ jøts nay ja' nayide'en tyikjajt nwindson'ajtim Jesucristo køjxp jøts ñamyi'øy'atidit tuki'iyi midi ejtp tuktsajp'agida'aky, jøts yjotkujk'attit wan tjaønidi midi ja'ajtip naxwiil'ñ, jøts midi jap nayide'en tsajppjøtpyi. Jade'en'ampyts ja yjotkujk'ajtin ja ñamyayi tpaatti ku ja nwindson'ajtim Jesucristo y'ø'jky kruskøjxp.

²¹ Ja mga'øwɪnmaa'n̄ ja mga'ødyunk ja' meets y'ijty myik'ejtɪdɪp jagam ɪxkø'øm, jøts m'am mjoṭp xmiṭotma'atti ja Dios; ja Diosts tø myikjotkukiyidi jøts ja tø xmiṭotjimbetti,

²² ja'agøjxp ku ja nwindson'ajtim y'ø'jky jøts ja wemp ɪjxy tyimy'ats'ayo'ombaaṭty n̄ikøjxp kyubajkp. Jade'en'ampyts ja jade'en ttuun̄ jøts meets ja Dios Teety xwingunøjkkat ku tø mbøkwyatsnidi, niwine'en mga'ukyikpøky'ejxnidit.

²³ Jade'engøjxpts chøkyi jøts tu'ugyi amumjoojt xyikyø'ødyit ja mjanchja'win tiy'ajtingøjxp. Kidi meets ja xkajøp'ejxni s̄a tø xniṭawidi midɪ yiknitsokp. Yø'øbi kajpxy yø'øbi ayuuṭk yikajpxwa'kxp øy sudso ya n̄axwiiñ. Pablo øts jøts øts yam tø nyiktanipiky jøts øts ja jade'en ngajpxwa'kxi ja yja'.

Ku ja Pablo yiktanipiky jøts tpuðøkit pøn jaty ja Dios tjanchja'widip

²⁴ Jotkujk øts nnayjawiyi øy mee njagu'ayowi. Nay jade'en ø n̄amyayi ja ayo'on nbaaty sa ja nwindson'ajtim Jesucristo ku ja tku'ayo'owiyii'n̄ pøn jaty ja janchja'wiyip.

²⁵ Øts tø xaja'aty jøts øts ja nbudøkidit pøn ja Dios tjanchja'widip. Ja' øts ja Dios tø xanipiky jøts meets nmo'ot ka'pxy ja Dios kyajpxy ja Dios y'ayuuṭk,

²⁶ jøts mee ndukmado'ot midɪ pøn tkanija'wipnim midɪ y'ity yu'uch'ejtp, ma windi'ixyip ja jade'en pøn tkanijawi. Ixyamts ja Dios ttuknijawiwya'añ ja jaa'y pøn jaty ja paduuṭniyip ja yja'.

²⁷ Ja'ats ja Dios ja tuknijawiwyaṭnidip ti øy'ajtin idø'øn ja yjade'embi yjagyepy jøts ja yikmo'odit pøn ka'israelit jaa'dyi. Jøts ja' idø'øn y'ity kayiknija'wip jøts ku ja Cristo ja' mee njagyajp, jøts ja' tyajkp ja jøp'ijxy'ajtin jøts ku nøjkk xpaajitidi ja Dios y'øy'ajtin ja Dios chuj'ajtin.

²⁸ Ja Cristo øøts ja yja' nnigajpxip, jøts øøts niduki'iyi øy pøn ngajpxwiy jøts øø nyik'ixpiky øy pøn, jøts yikxon tniṭado'odit, jøts jade'en nidu'uk nidu'uk tniṭawidit yikxon ku tmøøt'etti ja Cristo.

²⁹ Yø'øts ø nduñ'ajtpy jøts øts jade'en amumjoojt nnadyamiyøxyi, øy ø nwanjaty, ja'ats nyiktumpy ja Cristo myøk'ajtin midɪ øts ja xmøøpy.

2

¹ Ja' ø ndsøjkpy jøts meets xniṭawit s̄a mee ngamijotkuki ku øts ja Dios n'amidøy ja pudøjkin meets køjxp jøts nayide'en pøn jaty tsinaadyip jam Laodicea, nmijotgøøpy øts nayide'en ja nmigu'uk pøn ø xka'ijxy'ajtipnim.

² Ja'ats ø ndsøjkpy jøts xjagyaptit ja tsojkin amumjoojt nixem niyam midɪ ja Dios yja'ajip midɪ øy midɪ tsuj pidsømp, ku ja awejx'ajtin xjagyaptit jøts xja'gyukidit s̄a xniṭawidit ja Cristo pøn ja Dios nugo ajawi ka' pøn ttuknijaw;

³ ja'ats idø'øn tmøøt'ajtp ja øy'ajtin ja tsuj'ajtin, ja wejin ja kajin.

⁴ Jade'engøjxp meets ya'at ndukmadøy jøts kidi pøn mwindaay'atyidi pøn tum jaayi tkajpxtip.

⁵ Øy ø kø'øm nguidyimyjam'aty, jamts øts ja nwinmaa'n̄ nyik'ity, jøts ndaxondakpy øts ku ø nniṭawit ku øy yikxon xundi jøts nayide'en ku tu'ugyi xjanchjawidi ja Cristo.

⁶ Paty ja'ayi xu'undit midɪ tsojkip, s̄a myiktani'ejxidi myiktaguwanidi ku xjanchja'wiy'okwandøø ja nwindson'ajtim Jesucristo, ja'ats idø'øn tu'ugyi mdu'undip jøts ja jade'en møøt'ettit.

⁷ Ja' amuum mnadyagidøkiyidip jøts ja' idø'øn mmøk'ajtin'attip. Ja'axi mjanchjawidip s̄a oṭts myiktani'ejxidi myiktaguwanidi jøts jade'en ejtp ja Dios xukmøjawidit xukunuu'kxyjawidit sam ja tø xniṭawidit ku ja ixpøjkin myikmøødyi.

Ja øchinaa'yin midɪ yikpatp Cristo køjxp

⁸ Øyim mnay'ejx'etidit; kidim ja xmiðøkti ja jaa'y pøn mdawin'øønwanjnidip ja ixpøjkin, midɪ wenk winmaa'n̄ tyikyø'ødyip uk midɪ tyiktundip ja tum ja taay; ja' ja' yiktundip s̄a ja jaa'y chinaa'yindi s̄a jaa'y wyinmaa'ndyi, ka'axi ja tyikmøjtøjkiyidi ja Cristo yja'.

⁹ Pø ja Cristoxi kø'øm amuum tmøøt'ajtkøjxp ja Dios'ajtin,

¹⁰ jøts kumi mmøøt'ijtpy meets ja', tits mee mjaaka'ejtxip. Ja' tuki'iyi tjagyajp jøts ka'ap ja pøn myi'abaadyiyi, wan ja ma tyimyjatsoondi, wan tjamikuku'pyi uk wan tjanayjapi tsajpøtpy.

¹¹ Ku meets ja jade'en xmøøt'ity ja Cristo, tø meets ja n̄amyayi mbiktaajkkxyi ja ejxa'anin kyunuu'kxingøjxp, ka'aṭts ja nayide'en tø mbiktaajkkxyidi sam ja israelit jaa'y n̄adyuñidi. Ja' mee m'ejxa'anin'ajtpy ku xpaatti ja nitso'ok'ajtin jøts ja mbøky mniwa'açhidi midɪ yiktump ku ya n̄axwiiñ njaa'y'ajtyindi.

¹² Ku ja nøbajtin xpaatti, jade'en meets idø'øn n̄amyayi ja Cristo møøt m'ø'jky, jøts nayide'en n̄amyayi mjukpyøjkti, ja'agøjxp ku tø xjanchjawidi ja Dios, pø ja'axi ja myøk'ajtin majadaajk ku ja Cristo yjukpyijky.

¹³ Jade'en ja ngajpxin, øøky meets y'ijty myik'ejtniyidi ja mbøky ku ka'anin ja ejxa'an xpaatti, midi yikpatp nwindson'ajtim Jesucristo køjxp; xjats icyam ja Dios tømømø'oyidi ja jujky'ajtin jøts mee ñamyayi møøt mjujky'aty ja nwindson'ajtim Jesucristo, ja' mee mmaa'kxip tuki'iyi ja mbøky.

¹⁴ Tøts ja Dios tjibiky ja kutujk jøts ka' y'uktunit midi y'ijty myiktanigutujk'ajtip, midi y'ijty xjanch'adsepandip jøts ja xuktaja'jtyindi ja nbøky jøts adøm ja yiktagubejtyindi. Jade'en'ampy ja Dios ja tyikudigøøy ku ja nwindson'ajtim kyiruspejty.

¹⁵ Ja'ats ja tyamimajadaajk ja miku' jøts ja tøm tyik'amutskiyi ja myøk'ajtin jøts ja jade'en ttuk'ixy ttuknijawi ja naxwii'ñit jaa'y.

Jotmay'atti ja Dios yja'

¹⁶ Jade'en'ampyts ka' pøn xmøjpkita'aktit ku pøn mdabayø'øwya'andit ja mgaajyik ja m'uujkikti, uk ku ja xøøw xkabadundi midi winsamaan jøts midi wimbo' yiktump.

¹⁷ Ja' yø y'ity wya'añ jøts yøm tñigajpxy midi menwamp, ya'at tsinaa'yin y'ijty tunkpatp ku ja Cristo kyamiñim ku ja jaa'y ja tjøp'ejxti. Kuts ja tøm myiñ, ja' idø'on tu'ugyi yik-janchja'wiiñip.

¹⁸ Kidits ja jaa'y mdukmajtstu'udyidi ja nwindson'ajtim pøn ñadyijyi janch tuda'aky nabyiktaajkidip, jøts wya'andi ku ja ankilis ne'egi yikwindsø'ogit. Ja' ñigajpxtip ñimadyaktip midi nijuuni kya'ejxtipnim kyamadoodipnim, jøts jade'en øy ñadyamøjpkita'agyidi ja kyø'ømwinmaa'ñ.

¹⁹ Ka'ap ja tmøøt'etti ja Cristo, pøn møj pøn jøp'am, pøn yikmøja'wip, jøts pøn amuum yikjanchja'wip ku ja yja' ja yiknijawi jøts jade'en tyika'pxy'ity ja jaa'y pøn nayide'en myøøpy ja møk'ajtin, sam ja Dios kø'øm tøm ttanibiktaagi.

²⁰ Pøni janch idø'on ku ja Cristo namyayi møøt tøm mjantyimy'ookit, ztigøjxpts ku jade'en mdsinay'adø'øtsti sam ja'ajindi, pøn ja Dios yja' tkabaduujnidip? Ja' yikmajadaaktip jøts ñadyanigutujk'atyidi ja kyø'øm'ana'amin,

²¹ ku yide'en ñay'ane'emyidi: "Kidi yøm xjii'kxy, uk kidi yøm yjade'emb i xjii'kxy, kidi yøm xøñ."

²² Yøm yjade'emb i ana'amin, tum ja' yøm ñi'ane'empy midi waani ejtp jøts ja ñajxni jade'en sam o ti piktal'aky midi tøm tyuñ jøts ja ka' ti y'ukwani, jade'ents ja jaa'y ja kyutujk jade'en ja y'ixpøjkin.

²³ Øy idø'on ja yjawi njantyiyja'wa'ant, jabi øyxi ja yik'ayowim yikpadu'unt tsø'øgi køjxp. Nitits ja kyawa'añ, kaja'ajipxi xpudøjka'am jøts nbøky xniwaa'jtsint.

3

¹ Jøts kumi tøm mee ñamyayi mjujkyiky nayide'en ku ja nwindson'ajtim Jesucristo yjukpyiky, ja'agøjxp xjotmay'ajtidit ja nwindson'ajtim yja', pø ja'axi ja Dios Teety amuum tøm myø'øyi ja møk'ajtin.

² Ja' ejtp mwinnmaa'ñ'attip midi ja Dios yja'ajip jøts ka'ap ja xyikmøjtøkidit midi ya naxwiiñ.

³ Jade'ents ngajpxin ku ja Cristo y'ø'jky jøts mee ñamyayi nayide'en tøm m'øøky, ka' x'uktatøjkiñidit ja ka'øbyi midi ya naxwiiñ. Ja nwindson'ajtim mee mgøjø'ømit'ajtniyidip jøts mee mjujky'aty xemikøjxp ma ja Dios,

⁴ jøts ku ja Cristo kyaxø'økt nayide'ents meets ja wyinaty møøt mgaxi'iky jøts meets nayide'en ja y'øy'ajtin ja xyondaajkin xpaajtyidit.

Ja øchinaa'yin jøts ja ka'øchinaa'yin

⁵ Paty x'ixmatstet tuki'iyi ja ka'øbyi: ka' pøn amajtskjaa'y tmøøt'att ja wenk yaa'dyøjk uk ja wenk tømøxyøjk, ka'ap ja axøøk winmaa'ñ xyiktu'undit, jøts nayide'en ka' ti x'ama'at'attit. Jade'en yøm tuki'iyi tpaaty ku yøm xu'undit ejximdam jeexyip xwindsø'ogidi ja awanax ja agojnax.

⁶ Yømøgøjxp ja Dios tkexy ja ayo'on jøts ja ttuktagida'aky ja yjade'emb i jaa'y pøn ja kamimadojyip;

⁷ jøts ku y'ity ka'anin xjanchja'wiyidi ja Dios yja', tuki'iyi meets yøm y'ity nayide'en xuñ.

⁸ Ixyamts, ixmajtskøjxnidi yøm ka'øbyi, yøm ambøjkin, yøm axøøk winmaa'ñ, yøm ka'ødyu'unin, yøm nawyngajpxnaxi jøts yøm ka'øy'ayuujk.

⁹ Kidi mnawyindaay'atyidi, pøm tøm x'ixmatsti sa y'ijty mjaa'y'atti, ti jaty y'ijty mdundip.

¹⁰ Tøts ja Dios myiktigachidi jøts ja yjembyi tøm xpado'kidi, pøni sa meets ja yja' xjanchja'wiyi, nayide'ents meets ja myiktigachi kunim yikxon xtyimñijawidit sa ja Dios.

¹¹ Jøts ka' chøkyi wan pøn tgrigittjaa'y i uk t'israelittjaa'y i, wan ja t'ejxa'aninmøødidi uk tka'ejxa'anmøødidi, wan ja abiky ma tsoondi uk wan ja tja'ajidi pøn ja Dios tkanija'widipnim. Yja'ajidi ja' pøn tmidundip ja windsøn, uk pøn najtspøki ejttip, tum ja nwindson'ajtim Jesucristo ja' yja', jøts myøøt'ijtpy ja øy pøn.

¹² Mdsojkip meets ja Dios, ja'agøjxp meets ja tø mwi'ijxyi jøts ja tø mja'bikyidi. Tsøønidits yikxon. Yiktundi ja øy'ajtin amuum, ja ayo'ejxin, ja jotwə'añ'ajtin, ja windsø'jkin, ja wijy'ajtin jøts ja tuda'aky'ajtin.

¹³ Namyiduda'aky'atidi xem yam jøts namyaa'kxukidi ku pøn ti ttuñ jøts ja myigu'uk tpo'ky'ixy. Nayide'en xu'undit sam ja nwindson'ajtim Jesucristo mbojkipimee'kxyidi.

¹⁴ Ka'apts ti jade'en sam ja tsøjkin sam ja pa'ayo'owin, ja'ats idø'øn myiktu'undip, pø ja'axi amuum tsøjkip, ja'axi øy ti tyik'øgyaxø'kp jøts niti jadu'uk jade'en abiky kyatsøkyi.

¹⁵ Ja Diosts ja yjotkujk'ajtin, ja Diosts ja xyondaajkin mwinnmaa'nmyo'ojidip, pø ja'agøjpxi ja Dios tø mdukupikyidi ja yja' jøts ja'abi jotkujk'ajtin xyiktu'undit ni'amuki niwine'en ja Dios xja'ajtyindi. Tukmøjawidits tukunuu'kxyjawidits ja Dios.

¹⁶ Jøts ja'gyukiyidi yikxon ja nwindson'ajtim Jesucristo kyajpxy ja y'ayuujk jøts ja xwinmaa'ñ'attit. Nadyuk'ixpøkidi jøts nagyajpxjot'amøjkiyidi nixem niyam, ja wejin ja kajin myiktu'undip. Øøjidi ja Salmos, jøts øøjidi ja kunuu'kxkyajpxy jøts jade'en xukmøjawidit xukunuu'kxyjawidit ja Dios.

¹⁷ Ku ti xunwə'andi uk xkajpxwə'andi, ja nwindson'ajtim Jesús myøk'ajtin myik'awajnidip, jøts jade'en'ampy ja xukmøjawidit xukunuu'kxyjawidit ja Dios Teety, ja' myøk'ajtingøjxp.

Sə yjaə'y'attit pøn tjanchja'widip ja Cristo o madsoo

¹⁸ Jøts ja tø'øxyøjk pøn amajtskti, mimadowdi ja mniiyaa'y, jade'en pyaat'atyidi pøn tjanchja'widip ja nwindson'ajtim.

¹⁹ Jøts nayide'en ja yaa'dyøjkmidi pøn amajtskti, yikxon xjagyaptit ja mnidø'øxy. Kidi møøt atsep a'aki mdsøøni.

²⁰ Jøts u'nk una'jkmidi, mimadowdi ejtp ja mdeety ja mdaak, jade'en ja Dios ttsøky.

²¹ Jøts u'nkteety u'nktaak nayide'enmidi, ka' nugo xyik'ambøktit ja m'una'jk jøts kidi t'ayojidi.

²² Jøts pøn midundip, mimadowdi ja jaa'y pøn mwindsøn'ajtip, jøts kidi jaayi nugo nadyijyi myujy'atti ku ja m'ijxyidi jøts ja jade'en nugo m'øyjawiyidit. Mdu'undipxi dø'øn sam pyaat'aty Diosts wyindsø'jkingøjxp.

²³ Yikxon xu'undit ku ti xunwə'andi, ja Dios meets ja mdamidumpy jøts kidi ja jaa'yip øy ja' mjayiktuñidi.

²⁴ Tøts xnijawidi jøts ku ja nwindson'ajtim mmo'ojidit ja øy'ajtin jøts meets ja mdukupadit ja kyunuu'kxin. Kumi Cristo meets ja yja' mdu'unxip, nay ja' meets ja kø'øm mmo'ojip.

²⁵ Pønts ja kya'øybi trump, nayide'ents ja ka'ø'y'ajtin ja tikmo'odit. Ka'ap ja Dios ja t'ixy wan ja tjapøni, tuknax ja tum jade'en ttu'unt pøni sə tø yjaə'y'attit.

4

¹ Jøts meets windsøn pøn ja tunk tmøøt'ajtip, øy yikxon mjaə'y'attit jøts jade'en xyiktu'undit ja mdumbi sam pyaat'aty. Ja'myatsti jøts ku ja nwindson'ajtim jap tsajpjøtpy midi mee mwindsøn'ajtmip.

² Kidi mjotmondi, ejtp ja Dios x'ajot'attit, ejtp ja øy ti xukmøjawidit xukunuu'kxyjawidit.

³ Amidowdi pøktowdi jøts øøts ja nwindson'ajtim ja nnøø' ja nduu' xyik'awajtsit, jøts øøts ja ngajpxwə'kxiti ja y'øgyajpxy ja y'ømyadya'aky, jøts nayide'en yiknigajpxt wə'ats ja Dios Teety wyinnmaa'ñ, sudso ja nitsø'ok'ajtin yikpaaty Jesucristo køjxp, ja'axi øts yam mgudsumchinaa'yip, pø ja'axi ngajpxwə'kxpy.

⁴ Ajot'attits Dios jøts øøts ja kyajpxy ja y'ayuujk øy pøn nduknija'wiyit sam idø'øn pyaat'aty ndu'unt.

⁵ Øy yikxon mjaə'y'attit, migu'ukwə'andi pøn ja Dios yja' tkanija'wip jøts ttukmadowdi, kidi ja xøow ja jumøjt nugo xyikwindigøydi.

⁶ Øy tsuj ja mmadya'aky xyikpidsø'ømdit, jøts mjattip nayide'en ja adsojimbejtk sə nidu'uk nidu'uk øy pøn x'adso'odit.

Ku kyajpx'abaadiwya'añ jøts ja kajpxpoo'kxin t'ukyajkni

⁷ Ja nmigu'uk Tiquico meets jam mdukmadowip sə øts yam. Janch øy yø pyudøki, janch tsuj tmiduñ ja Dios. Tø øts yø nmøøtwidity.

⁸ Paty meets ja yam ndaniguexy jøts ja mgajpxjot'amøjkiyidit, jøts ja nayide'en mdukmadowidit sə øøts yam.

⁹ Ja Onésimo ja jam møøt ñijky, adøm ja nmigu'uk pøn amumjoojt tpaduujnip ja Dios yja'. Meets yø' mjaə'y. Yø'øts meets ja mdamimadya'agip ti yam tuujnip jajtjip.

¹⁰ Jøts øts ja nmigu'uk Aristarco pøn øts yam nmøøtsumchinaapy, ja' yam nayide'en mdanigajxidip ja kajpxpoo'kxin, jøts ja Marcos nayide'en ja yja' tkajxmi, ja Bernabé ja myigu'uk. Tøts ja myiktukmadowdi ja Marcos; pøni mbaajtidip jam, øy yikxon xkupøktit.

¹¹ Nayi mgajpxpoo'kxidip ja Jesús pøn nayide'en yiktejp Justo. Yø'øyi dø'øn israelit jaa'y'ajttip pøn tmidundip ja Dios, pøn ø tø nmøøtundi, jøts yø' øts yam njanchta-jotkujk'ajttip.

¹² Nayi mdanigajxidip ja kajpxpoo'kxin ja Epafra pøn ja nwindson'ajtim tmidump, nay meets ja mjaa'y. Ejtp ja mni'amidowiyidi mnibøktsoviyidi ku Dios ja t'ajot'aty jøts tu'ugyi øy yikxon xpanøjkxtit ja Dios, uk amuum mnadyamiyoxidit jøts ja xu'undit sa ja ttsøky.

¹³ Kumi wa'ats ø n'ixy nnijawi sa ja Epafra mdajotigøyi, jøts nayi tyajotigøøpy ja nayide'en pøn tsinaadyip jam Laodicea kajpkøjxp jøts jam Hierápolis kajpkøjxp.

¹⁴ Nayi mgajpxpoo'kxidip ja Lucas, pøn tsøyip jøts nayide'en ja Demas.

¹⁵ Kajpxpoo'kxtits adøm ja nmigu'uktøjkti pøn ja Dios ja'ajtidip midi tsinaadyip jam Laodicea, jøts nayide'en xkajpxpoo'kxtit ja Ninfas møøt ja'adi pøn ja Dios tjanchja'widip, pøn jam namyujkidip ja' tyøjkjotp.

¹⁶ Ku yø nøky x'uk'ejxkøxtit winets ja xanigaxtit jøts wan t'ejxti pøn ja Dios tjanchja'widip jam Laodicea, jøts meets ja nøky nayide'en x'ejxmit midi jam tso'omip.

¹⁷ Jøts nøjmididi ja Arquipo jøts ku ka'pxy tpadu'unt sa ja nwindson'ajtim tø tyunkmø'øyi.

¹⁸ Øts njaapy ya'at kajpxpoo'kxin jøts meets ja ndaniguexy. Jøts xja'myatstibim øts ku Dios x'ajot'attit jøts ku øts yam ndsumy'ity. Dios mgunuu'kxidip. Jade'en idø'øn ja yjatt.

JA MYĪDU'UKPĪ NŌKY MIDI JA PABLO TYANĪGAJX JA TESALŌNIKĪT JAA'Y

Ku ja Pablo tnijayi pŋn ja nwindson'ajtim tjanchja'widip

¹ Pablo ō nxŋŋw, jŋts ōŋ yam nguejxpy ja nŋky mŋŋŋt ja Silvano jŋts mŋŋŋt ja Timoteo, jŋts ōŋts ja ndaniguexy pŋn jaty tjanchja'widip ja Jesucristo yja' jam Tesalŋnica kajpkŋjxp, pŋn mŋŋŋt amumjoojt t'etti ja Dios Teety jŋts mŋŋŋt ja nwindson'ajtim Jesucristo. Nay ja'ats amuum mgunuu'kxidip jŋts ja jotkujk'ajtim mmo'ojidit mŋŋŋt ja nwindson'ajtim Jesucristo.

Ku ja Tesalŋnikit jaa'y tyiktaaŋ ja ejxpajit sa ja Dios yikjanchjawī

² Ejtp ōŋts ja Dios ndukmŋjawi ndukunuu'kxyjawi ku meets ja xjanchjawī, jŋts ku ōŋts ja Dios n'ajot'aty ejtp mee njā'myech.

³ Ku mee ngajpxpaaty ku ōŋts ja Dios n'ajot'aty ka'ap ōŋts ja njā'dyigŋy ja m'ŋy'ajtindi, sa ja tsojkin ja pa'ayo'owin xmŋŋŋt'atti, jŋts sa ja ajot'ajtim mŋk'ampy xjagyapiti jŋts xjŋp'ejxti ku mye'ent jadigojk ja nwindson'ajtim Jesucristo.

⁴ Meets migu'uktŋjkti, pŋn jaty ja Dios janchja'widip, Dios mee mdsojkip jŋts nay ja' tŋ mwi'ijxyidi jŋts mee mnitso'ok'att.

⁵ Jade'en'ampy ōŋts nnijawi ku ōŋts jam ojts ja Dios y'ŋgyajpxy ja y'ŋmyadya'aky ngajpxwa'kxiyi mā meets jam, kidi ōŋdsip ja ojts jade'en nugo ngajpxy, pŋ jamxi ja Espiritu Santo ja myŋk'ajtim ja tmŋŋŋdiyi jŋts ja jade'en wa'ats yiknijawit jŋts ku ja'abi kajpxy jŋts ku ja'abi ayuujk tyiyi yjanchi. Wa'atsxi xnijawidi jŋts ku ōŋts ja nduun, kidi ōŋdsip ja kŋŋm nadyamiduujnip pŋ ja'agŋjpxxi ōŋts ja nduun jŋts meets ja xyiktu'unt.

⁶ Ja Espiritu Santots mee mnŋŋjyip ja xyondaajkin jŋts meets ejtni xŋni xkupŋkti ja Dios y'ŋgyajpxy ja Dios y'ŋmyadya'aky ŋy meets ja kawine'en tŋ xkuwanjati. Xjats meets nayide'en xuŋ sa tŋ xpa'ejxti ku ōŋts ja ayo'on nmidani midi ja nwindson'ajtim tŋ ttunjŋpi.

⁷ Xjats jade'en tŋ mbidsŋm di jŋts ejxpajit mwa'andi jŋts ja mni'ejxu'udyidi niduki'iyi pŋn jaty ja Dios tjanchja'widip, pŋn jam tsinaadyip Macedoniait jŋts jam Acayit etjŋp.

⁸ Jade'ents idŋŋŋn ja Dios y'ŋgyajpxy ja y'ŋmyadya'aky tŋ xyikwa'kxiyi, jŋts kidi jamyip meets ja jade'en nugo tŋ xuŋ Macedonia uk jam Acaya, yiknijā'wip yŋ ō madsŋo jŋts ku meets ja Dios amuum xjanchjawī. Ti sa ŋŋ njāakwa'ant, ti ŋŋ njāaknikyajpxp.

⁹ Ja'axi ja kŋŋm tmadyaktip jŋts ku ōŋts jam ojts n'ŋch mā meets jam jŋts y'ŋyja'widip ja' sa meets jam ojts xkupiky, jŋts ŋy ja yikxon tmadya'akti sa mee xmajtstuuity ja'abi winmaa'ŋn midi ja Dios kyaja'ajip, jŋts ku ja Dios tu'ugyi tŋ xpabŋjkinaxwa'akti pŋn xemikŋjxp ejtp, pŋn tu'ugyi Dios'ajtp.

¹⁰ Jŋts ŋayiŋmadyaktip ja nayide'en sa meets nwindson'ajtim Jesŋs xjŋp'ixy jŋts ku ja jadigojk wyimbett jap tsajjŋpŋpy ja Dios U'nk, pŋn ja Dios Teety tyikniwaajts ja o'jkin jŋts ja tyikjujkyjky. Ja'ats adŋm idŋŋŋn xuknitso'ok'ajtimidi ja' ayo'on midi memp midi wingomp.

2

Sa ja Pablo kyajpxwa'kxy jam Tesalŋnica

¹ Mnija'widipts migu'uk ja'adi, jŋts ku ōŋts jam n'ats'ŋjch mā meets jam, ka'ap ōŋts ja nxŋŋw nugo wyindigŋŋy.

² ŋy ōŋts jam wyinaty Filipit kajpkŋjxp tŋ nyikjemduŋ, mnija'widipts ja wa'ats jŋts ku ōŋts ja Dios tŋ xjanchpudŋki jŋts ōŋts ja kyajpxy jŋts ōŋts ja y'ayuujk ja tŋ nyiknajxiyi amumjoojt midi xyiknitso'ok'ajtimidi, jŋts meets ja tŋ myiktukmadŋy yam idŋŋŋn ja tsep yjanchjatuŋi.

³ Jŋts ka'ap ōŋts ngajpxigŋy ti jaty ōŋts ojts ngajpxwa'kxy, jŋts kidi wenk winmaa'ŋip ŋŋ njagyepjy ku ōŋts jam jade'en ojts ngajpxy jŋts nika' myikwin'ŋŋndi.

⁴ Pŋ tiy'ajtinxi yŋ', tŋxi ja Dios kŋŋm tyikutuky jŋts ōŋts ja tŋ xanipiky ja kyajpxy ja y'ayuujk midi yiknitsokp, jŋts jade'ents ōŋts ja tŋ ngajpxnaxy. Jŋts ni ka'ap ōŋts ja n'ixa'ay jŋts ōŋts ja kuwani ndyimyikta'ŋy'ext uk ndyimyiktakajxa'akt, pŋ ja Diosxi yikmidump jŋts ja'ats tu'uk tu'uk t'ejxp sa jaty pŋngapŋn yjaa'y'aty.

⁵ Jŋts mnija'widipts ku ŋŋ ka' nugo ngajpxy sa jaty ojts myiknŋmidi jŋts nigidi taayip ŋŋ n'ixaapy sudso ōŋts ja meen nbŋkt. Ja Dios yŋ tnija'wip jŋts ja' yŋ t'ejxp.

⁶ Niwindii ŋŋ ngawa'ŋn jŋts ōŋts ja jaa'y xwindsŋŋit, wan meedi uk ŋy tyimyjapŋni. Xpaat'ajtpimts ōŋts, ŋy ōŋts ja jeexyip jade'en tŋ nduun jŋts meets jeexyip ja nwindson'ajtim Jesŋs kyutujk mŋk'ampy tŋ ndanipiky, pŋ ja'axi ŋŋ nbadumpy.

⁷ Ka'ap ōŋts jade'en tŋ n'adi'ich; ŋy yikxon mee tŋ nmiyujy'aty sam ja u'nktaak tyikyeeey tyiktsŋŋky uk t'ejx'ity ja y'u'nk ja y'una'jk.

⁸ Njanchøjkpy meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'o'jkippaat meets jeexyip ja'agøjxp ku ndsokti ja'agøjxp ku nba'ayowdi.

⁹ Mee migu'uktøjk, wa'ats inet xja'myatsti sà øøts y'lijty nduñ nbiky, sà øøts nnamyiwinmaa'mbyaadyi jøts øø nbaaty ja nidsinaajyik. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'ø'yayuujk.

¹⁰ Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'ejxwa'añ.

¹¹ Jøts mnayi mnija'widip nayide'en sà nidu'uk jaty tø myik'ayo'ejxti ku myikajpxjot'amøjkidi, jade'en sam ja jaa'y ja tyeety yjagyepyyi.

¹² Tøxi myiktukmadowdi jøts ku øy yikxon mjaa'y'attit sam pyaat'aty pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk ma ja amuum xyiktuujnidit ja myøk'ajtin, ja y'ø'y'ajtin jøts ja xyondaajkin.

¹³ Ja'agøjxpts øøts idø'øn ja Dios ja ndukmøjawi ndukunuu'kxyjawi ku meets ja kyajpxy ku meets ja y'ayuuujk ja ojts xmadøjyidi midi mee ndukmadoow. Ojts ja xjanchkupøkti jade'en jøts ku ja Dios ja tja'aji, kidi nugo jaa'yipxi ja' yja'. Jøts janch tiy janchts idø'øn ja', jøts ku ja Dios ja tkajpxy jøts ku ja Dios ja t'ayuuji, jøts ja mbudøkyyidi pøn jaty ja tjanchja'widip.

¹⁴ Mee migu'ukti, ku tø xku'ayo'ombaadidi ja Dios, kawine'en ja mmigugajp tø mdagubetyidi, nayide'en tø mjatti sam ja jaa'dyi pøn ja Dios tjanchja'widip pøn ja nwindson'ajtim Jesucristo tjanchja'widip pøn tsinaadyip jam Judea, pø nayide'enxi ja tø yjatti, nayide'en ja myi'israelit jaa'y ja kyamee'kxyidi.

¹⁵ Yø'øbi israelit jaa'yts idø'øn tyik'oo'ktøø ja nwindson'ajtim Jesús. Nayide'en ttungojmidi sam ja tø tyik'ookti ja kyø'øm migu'uk pøn jaty ja Dios kyugajpx'ajtpy, jøts øøts ja tø xpawøpy. Niwine'en ja Dios ja tkayikjotkujk'atti jade'en, jøts yjanchtumwenk'ejxtip ja jaa'y øy pøn.

¹⁶ Jøts ku øøts ja Dios yja' njadukmadoowa'anmiyi pøn ka'israelit jaa'dyi jøts ja ñitso'oktit, ka'ats øøts ja jade'en xuktunwami. Xjats jade'en ja pyøky nugo tyikmiweni'adø'øtsti. Ixamnimts inet ja Dios ja møk ayo'on tø tyuktagida'agidi.

Ku ja Pablo øy tjapaatwa'añ jadigojk ja Tesalónikit jaa'y

¹⁷ Mee migu'uktøjk, ku ojts nnawya'kxyindi jøts waani ñajxy ja et ja xøøw, nja'myajts'ijtpyim meets øy mee njaga'ijxy jøts øøts njanchja'atsnøjkxwa'añ kawinaak ojk jøts mee n'ats'ext.

¹⁸ Ojts øøts njadyimya'uktsøøñ; øts meets jam kø'øm kawinaak ojk tø njadyimya'ats'ejxwa'añ, jaty jatyits øøts ja miku' xyiktuu'duky jøts øøts jam nganijkxy.

¹⁹ Jøts tigøjxp øø nxonda'aky, ti øøts idø'øn ndaxondakpy, ti øøts idø'øn njø'ijxpy, ti øøts idø'øn ndajotkujk'ajtpy, pø meetsxi dø'øn ndajotkujk'ajtpy ku mye'ent ja nwindson'ajtim Jesucristo.

²⁰ Meetsxi dø'øn ndajotkujk'ajtpy ku øø nxonda'aky.

3

¹ Jade'en'ampy øø tø nwinmay jøts øø nda'ant yam Atenas kajpkøjxp ku øø ka' n'ukmajadaḱni, kumi ka' øø n'ukmidanaañi jadine'en ja jotmay,

² paty øø tø nguexy tu'uk ja nnigu'uk pøn jam tø m'ats'ijxyidi. Timoteo øøts nguexy, ja'axi ja Dios tmidump jøts ejtp øøts ja tø nmøøtuñ ku øøts ja nwindson'ajtim Jesucristo y'øgyajpxy ja y'ø'y'ayuujk tø ngajpxwa'kxyi; midi ja nitso'ok'ajtin tyajkp, ja'ats mdukmadowidip jøts ja mgajpxjot'amøjkiyidit jøts ja m'ajot'ajtin tu'ugyi xyik'ettit,

³ jøts jade'en ka' pøn t'ixmatst øy idø'øn ja tsep jade'en y'ity. Wa'atsxi kø'øm xnijawidi jøts ku jade'en ja ayo'on nbaajtindit.

⁴ Jøts ku øø nay jam wyinaty møøt meets, ojtsxi øø nnigajpxy jøts mee ndukmadøy jøts ku n'amjajtindit ndsaachajjandit; tøts xnijawidi jøts ku jade'en tø yjanchjaty.

⁵ Paty øts, kumi ka' øts jadine'en n'ukjotkujk'ajtni, ja'agøjxp mee tø ndaniguexy ja jaa'y jøts ja tyiktø'ot sà ja mjanchja'win xyik'etti, ja'ats ø ndso'jkip uk wan meets ja miku' tø mduktuñidi ja yja' jøts jeexyip ja Dios kyajpxy jade'en nugo ñiwyindigøy sà meets ja ojts njadukmadøy.

⁶ Tøts ja Timoteo wyimbity jam Tesalónica jøts ja yam tø tmija'aty ja kajpxy ja ayuuujk midi yikjotkujk'atym jøts ku meets ja janchja'win møj xjagyepy jøts xyiktuujnidi xem yam ja Dios chojkin. Yide'ents ja yam wya'añ jøts ku meets ejtp xja'myech, jøts ku nayide'en ja tsojkin xjagyajpti jøts øø xjapaatwa'añ nayide'en sam mee nja'ejxwami.

⁷ Ñiyjot'amøkpøjk øø migu'uk yjawi, ku øø nnimadøy jøts ku tu'ugyi ja Dios xjanchjawidi, yam øøts idø'øn yjawi yide'en tsep'agujkpy njaty.

⁸ Ku øøts jade'en nnimadø y jøts ku ja Dios tu'ugyi amumjoojt møøt m'etti, jade'en øø nnayjawi yiyi tyimxyajimbejt øøts yjawi.

⁹ Ku meets jade'en xui, ø y øøts ja Dios møj njanchtamøjawi ku meets jade'en xpadundi ku jade'en xwindsø'øgidi ja Dios.

¹⁰ Xjats øøts yide'en xinaxy tsunaxy ja Dios n'amidø y jøts mee ndyimy'ats'ext, køø m ndyimy'atspaattit, jøts ka'pxy myiktukmado'odit ti jaty mjaaka'ejtxidip jøts ja mjanchja'win tu'ugyi t'ettit.

¹¹ Ja' øø ndsøjkpy jøts øøts ja Dios Teety, jøts øøts ja nwindson'ajtim Jesucristo xpodøkit jøts øøts jam nnøjkxt jøts jam m'atsyik'ejxtit.

¹² Nay ja Diosts myikmøjt'agiyidip ja mwinmaa'ñ jøts ja tsojkin møj xjagyaptit nixem niyam, jøts xminamyayidit ø y pøn møøt nayide'en sam mee myiktsoktin sam meets ja tsojkin ndamijagyapi.

¹³ Nay ja Dios Teety mmo'ojidip ja myøk'ajtin jøts xmidanidit ku sã mjattit, jade'ents ja mja'bikyidi jøts mgapøky'ijxyidi ku ja nwindson'ajtim Jesús jadigojk mye'ent møøt niduki'yiyi pøn jaty ja Dios ja'ajtidip.

4

Sã ja Dios xajotkujk'ajtint

¹ Ixyamts øø migu'uk nnigajpxy jøts mee myiktukmadowdi ja nwindson'ajtim Jesús y'ana'amingøjpx: jøts ku jade'en xun'ettit sã øøts ojts nyik'ixpiky jøts ku mdsøonidit mdanidit jade'en sã ja Dios ttajotkujk'aty. Tun'ettits meets ja jade'en.

² Mnija'widipxi ja ana'amin midi myikmøødyi, midi øø tø nnigajpxy ku jade'en tyikutuky ja nwindson'ajtim Jesús.

³ Ja' Dios chøjkpy jøts ja tu'ugyi xnadyamiyoxidit; jøts kidi nugo mnamyøøt'atyidi pøni ka'adam ja xniyaa'yidi pøni ka'adam ja xnidø'øxyidi,

⁴ ku pøn y'amajtskiwya'añ, ka'ap ja patki'yiyi nipøn tø'øxyøjk tkamøøt'att. Ja' ø y wa'ats pidsømp jøts ja jade'en køø m ñawyindsø'øgiyi.

⁵ Jøts kidi nugo mbøkti ku mnachuj'ijxyidi ja'ayi sam ja jaa'y y'adi'ichin pøn ja Dios tkanija'wip.

⁶ Kidi pøn ja myigu'uk ñidø'øxy twin'øø'nidi, møk nwindson'ajtim mdagubatidit, pø tøxi øø nnigajpxy.

⁷ Ja'ats adøm ja Dios tø xanibiktaajka'am jøts adøm ø y tsuj njaa'y'ajtindit. Ka'ap ja jade'en wya'añ ja Dios jøts ja kya'øbyi ndu'unint.

⁸ Jade'ents idø'on, pøni pøn yø'øbi ixpøjkin tkamøjpktaqk kidi myigu'ugip ja jade'en wyinaty tyumpy, ja Dios idø'on ja wyinaty jade'en kyamimadøøpy, pøn adøm ja y'Espiritu Santo tø xmø'øyim.

⁹ Wine'en ja tsojkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios køø m mdukjatyidi jøts xem yam mnamyayidit mnachokidit.

¹⁰ Ejtp meets ja mmigu'uk jade'en xminamyayiyi pøn ja Dios tjanchja'widip jam Macedonia. Ja'ayi ø nugo nnigajpxy jøts ja n'øvjaa'y'ajtin møk xjaakyik'awa'andit, jøts myøjit ja m'amigu'uk'ajtindi.

¹¹ Ø y jotkujk idø'on mdsøonidit mdanidit, ja mdunk ja mbøjk ja' idø'on mjotmay'attip pø jade'enxi øø nxumiwa'añ,

¹² jøts ja abikpyi jaa'y mwindso'øgiyidit jøts kidi ti mga'ijtxyidi.

Sã ja nwindson'ajtim jadigojk mye'ent

¹³ Mee migu'utøjk, ka'ap øø ndsøky jøts jadi'ifi mda'andit, ni xkanijawidinim sa yjatt añmi'oo'kpi, jøts kidi jade'en mjotmay'oockti sam jadu'uk yjotmay'oocktin pøn ka' ti awejx'ajtin tjagyapti, pøn tkanija'widip ja Dios.

¹⁴ Pøni nnibijkyimts adøm ja Jesús ku ja tø y'øøky jøts ku ja tø yjujkyiky jadigojk, sudsots adøm ja ngamibøjkim jøts ku ja Jesús jadigojk wyimbett ku ja Dios Teety ja møøt tyikjkyøkt ja añmi'oo'kpi pøn jaty ja wyinaty tø y'atsjanchjawiidi.

¹⁵ Paty idø'on myiktukmadowdi nwindson'ajtim y'ixpøjkingøjpx, jøts ku adøm, pøn jaty wyinaty jujky'ajtipnim ku ja nwindson'ajtim mye'ent, kidi adømip tyimjawyenyogyoindip jøts nika'anin ja' pøn tø y'oockti.

¹⁶ Pø køø mnmixi ja nwindson'ajtim kyida'akt jam tsajpjotp jøts ja kyajpxt kyutuikingøjpx, jøts ja kyajpxt sam ja møj ankilis, jøts ja pujxuujx ja tyiktu'unt midi ja Dios yja'ajtpy. Winetnimts ja yjujkyøktit jawyeen pøn tø t'atsjanchjawiidi ja Cristo, pøn tø y'oockti tyigøydi;

¹⁷ jøtsnim adøm pøn jujky tandipnim jaanims adøm ja møøt nnøjxindit yootsjøtpy mã ja nwindson'ajtim nninabyaajtindit jam tsajpwemp. Jøts ja nwindson'ajtim jade'en xemikøjpx nmøøtjujky'ajtindit.

¹⁸ Paty mjadyimñagyajpxjot'amøjkiyidit xem yam, yø'øbi kajpxy yø'øbi ayuujk myiktu'undip.

5

¹ Migu'uktøjk, ka' chøkyi jøts ø nja'at ti xøøw ti jumøjt mye'ent ja nwindsøn'ajtim.

² Wa'atsxi meets ja xnijawi jøts ku ja nwindsøn'ajtim yja'att jotmøñ tu'ukpi xøøw, yam ja wyinaty ka'ap pøn tjøp'ixy. Jotmøñ ja mye'ent sam ja maa'tspi koots y'atsmiñ.

³ Ku jaa'y wya'andit: "Jotkujk ixyam, ka' ti tyuñi, ka' ti kumay", winets ja jotmøñ tyaja'atpatidi jøts ja ayo'on myo'ojidit møk, jade'en tyaja'adidit sam ja tø'øxyøjk y'u'nkpiykiin pøn ja y'u'nk tnikøxp'ajtp jøts niwine'en ja chookin ja tkapaattit.

⁴ Jøts meets migu'uktøjk, ka' meets mwimbeeds mgugoodsi. Me'emp ja juuni xøøw ja nwindsøn'ajtim jøts ka' nugo jotkumoni mbaadiyidit ejxim ja jaa'y adsu'jky yikwimeech.

⁵ Pø Diosxi mjagyajpidip jøts adøm wimbeets kugoots nga'ijtyindi.

⁶ Paty ka'ap jade'en nugo njotmo'onindit sam jadu'ukpi y'adø'øtsta'an, njøp'ejxindip idø'øn ja' wijy kejy.

⁷ Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mujkip kujxip, nay ja' ja yikmajadakpy.

⁸ Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njanchja'windit amumjoojt ja Dios yja' jøts nnachojka'andit nnamyajya'andit. Jade'en idø'øn nnadyagubojka'andit ja Dios yja' ejxim ja soldadi ñadyagubøkya'an ja pyujx jøts ja nisa kyajaty. Jøts njøp'ejxindip adøm ja nitso'ok'ajtin, jade'en idø'øn ja ñamayyi tpaaty sam ja soldadi pyujxkujp midi ja kyubajk ja adanaajyiyip.

⁹ Pø kidi ja'ajpxi adøm ja Dios tø xanibiktaajka'am jøts adøm n'ayo'ombaajtindit, pø ja'axi ja chøjkpy jøts adøm ja øy'ajtin nitso'ok'ajtin nbaajtindit nwindsøn'ajtim Jesucristo køjxp.

¹⁰ Adømxi ja nwindsøn'ajtim Jesucristo tø xku'o'jkindi jøts adøm ja møøt njujky'ajtindit. Nbaajtimpxi ja' xemikøjxp øy njadyimyjajujky'ajtyindinim uk øy wyinaty tø njadyimya'o'jknandi.

¹¹ Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaa'y tkajpxwiyj pøn tø tjanchjawidi ja Dios

¹² Migu'uktøjkti, ndukmadoodip ixyam jøts waani xwindsø'øgidit pøn ttundip ma meets jam, pøn jam nduu'møøjyidip, pøn jam mda'ana'amidip ja nwindsøn'ajtim yja'.

¹³ Øy tsuj xaxonda'aktit ku jade'en tyundi, yiktundi ja tuda'aky'ajtin, yikxon namyiyujy'atidi nixem niyam.

¹⁴ Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemdundi yiktetundi, pudøkidi pøn waani jot'amutsk'ajtpnim jøts tuda'aky mjaa'y'attit øy pøn møøt.

¹⁵ Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'ødyuñin. Tum ja y'øbyi ne'egi ejtp mdu'undip. Øy xwindsø'øgidit ja mmigu'uk nixem niyam jøts nayide'en øy pøn møøt.

¹⁶ Øy jotkujk m'ettit.

¹⁷ Ajot'at'etti ja Dios Teety.

¹⁸ Pøni ti jaty tuujnip, tukmøja'widi tukunuu'kxyjawi ja Dios, yø' ja Dios chøjkpy jøts meets jade'en xu'unt pøn jaty tjanchja'widip ja nwindsøn'ajtim Jesucristo.

¹⁹ Kidi ja Espiritu Santo xyiktuu'dujkidi ja myøk'ajtin midi meets ja mdunwa'anxiyip mjujky'ajtingøjxp.

²⁰ Jøts kidi xkagupøkti ja mmigu'uk pøn amuum kunuu'kxip ja Dios jøts ja tkajpxi ja Dios y'øgyajpxy ja Dios y'ømyadya'aky.

²¹ Yikxon tuki'iyi x'uk'ejxtit, jøts midi øy, ja'ats mbaajtidip.

²² Xmajtskøxti ja kya'øbyi.

²³ Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaa'y'ajtindi kunim ja nwindsøn'ajtim Jesucristo wyinaty myiñ.

²⁴ Pø tøxi ja Dios mwi'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajpxpoo'kxni ja myigu'uk

²⁵ Migu'uktøjkti, ni'amido'owik øøts, nibøktso'owik øøts.

²⁶ Yiknajxidik øøts ngajpxpoo'kxin jøts ja mmigu'uktøjk xkajpxpoo'kxiti sam ja Dios tsøkyin.

²⁷ Jøts nayide'en ndanipøkti Dios y'ana'amingøjxp, jøts ya'at nøky xukmado'odit niduki'iyi ja mmigu'uk pøn ja Dios tjanchja'widip.

²⁸ Mgunuu'kxidip ja nwindsøn'ajtim Jesucristo. Jade'en idø'øn ja yjatt.

JA MYĪMAJTSKPI NØKY MIDI JA PABLO TYANĪGAJX JA TESALÓNIKĪT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøow, jadu'uk txøow'aty Silvano jøts jadu'uk Timoteo. Ja' øts ya'at nøky ndanija'ayidip pøn jaty ja Jesucristo tjanchja'widip jam Tesalónica kajpkøjpx, pøn ja Dios Teety møøt y'etti jøts møøt ja nwindson'ajtim Jesucristo.

² Paatti kupøkti ja Dios Teety y'ø'y'ajtin ja Dios Teety kyunuu'kxin midi ja yajkpy møøt ja nwindson'ajtim Jesucristo.

Tyidiyump ja Dios Teety pøn tø kya'øyyaa'y'aty ku ja nwindson'ajtim mye'ent

³ Migu'uktøjkti, pøn jaty ja Dios tjanchja'widip, ejtp øøts ja Dios ndukmøjawi ndukunuu'kxyjawi meets køjpx sam idø'øn pyaat'aty jøts øøts jade'en ndu'unt. Møjyi y'adøjtsidipxi ja mjanchja'windi jøts nayide'en ja tsojkin midi ja Dios mmøøjyidip jøts ja mmigu'uk xtsoktiit xpa'ayo'odit.

⁴ Xondaqø øøts, xjats øøts jade'en nnimadya'aky ma jaty ja Dios tjagyepy ja yjaa'y, jøts meets jade'en myiknimadya'akti ku tuda'aky mjaa'y'atti jøts ku ja mjanchja'win xyikma-jada'akti øy m'amjatti mdsaaachjatti uk ja ayo'on xpaatti.

⁵ Jade'ents yø yikja'gyuki jøts ku ja Dios ka' nugo tya'oo'kpety ku tyidiyuñ, m'ejxip meets ja' jøts ku mee mbaat'aty jøts meets ja myiktøkiyidit ma ja kyutujk ja ttanitani ja yjaa'y, pø ja'axi dø'øn ixja mgu'ayo'owidip.

⁶ Paat'ajtidipts ja' ku ja Dios yik'ayoyidi pøn mga'ødyuujnidip,

⁷ jøts ja myikpoo'kxidit tuknax møøt øøts, ja'abi xøow ku ja nwindson'ajtim Jesús wyinaty myiñ, ku tsajpjøtpy tmigida'akti ja myøk'ajtin møøt y'ankilistøjk.

⁸ Ja' ja ñime'emp jøts ja ttiidyu'unt pøn ja Dios tkamøja'widip ni tkabaduujnidi ja y'øgyajpxy ja y'ømyadya'aky.

⁹ Xemikøjpx ja nøjx tyimgyudigøydi, jade'en ja yiktidiyu'undit jøts ja jagam yikpikta'aktit ma nwindson'ajtim ja kya'ejxidit, ma ja tkapaajtidit ja y'ø'y'ajtin ja myøk'ajtin ku ja mye'ent.

¹⁰ Ku dø'øn ja nwindson'ajtim mye'ent ja'abi xøow jøts ja wyindsø'øgyit pøn jaty ja yja'ajtpy jøts ja kyajxa'agiyit niduki'iyi pøn jaty ja janchja'wiyip, tøts meets ja xjanchjawi midi øø tø nnigajpxy ku ja tø myiktukmadowdi.

¹¹ Ja'agøjxpts meets idø'øn ejtp nni'amidowi nnibøktsowi, jøts øø n'amidøy jøts øø nbøktsøy ja Dios jøts ja m'ø'y'ejxidit, pø tøxi ja kø'øm m'a'ejxiyidi; jøts nanyi n'amidøpy øøts jøts nanyi nbøktsøpy øøts jøts ja Dios ja myøk'ajtin tyiktu'unt jøts ja jade'en tyik'amøjatt sa meets ja tsojkin xjagyepy ku xunwa'andi midi tum øy jøts midi ja Dios mdamidundip.

¹² Ku jade'en xyiknaxti ku jade'en mjuky'atti, jade'en idø'øn ñamyayi ja nwindson'ajtim Jesucristo xwindsø'øgidi, amuumts ja Dios Teety, amuumts ja nwindson'ajtim Jesucristo ja y'ø'y'ajtin mdakajxa'agidit.

2

Ja' pøn møj pøkyump

¹ Mee migu'uktøjk, ku dø'øn ja nwindson'ajtim Jesucristo myenwa'ant ku ja nminabyajta'andit, ja'ats øts yam nnigajpxwampy.

² jøts kidi nugo mwinmaamyaa'atti, ni xkatsø'øgidit paat ja' ku ja wenk kajpxy wenk ayuujk myiktukmadowdi jøts ku ja Dios ja tyaky, uk xmadowdi ja ka'ama'ayin, uk myik-tanigaxti ja nøky, ñadyijyi jade'en tpiakta'akti jøts ku øøts ja nguety, ñadyijyi wya'andi jøts ku tø yja'aty ja et ja xøow ku ja nwindson'ajtim myiñ.

³ Niwine'ents ja yjade'embi taay xkamibøktit. Kuts idø'øn ja et ja xøow wyinaty kya'pxwani, jawyeen ja yide'en yjatt, tum midsep ja Dios yik'ejxnit, ka'ap ja y'ukyiktsojknit. Ja dø'øn kyaxø'økt ja yikpøkyumbi pøn ja xemikøxpit kudigø'øyin tø yiktanibiktaajikiñi.

⁴ Ja' idø'øn ja Dios tmidsep'ajtp, ja' ja tka'øyya'wip tuki'iyi midi jaty ja Dios yja'ajtpy, uk midi jaty paat'ajtip jøts ja yikwindsø'øgit. Ja' atp paat ja jap tsaptøjkjøtpy midi ja Dios yja'ajip jøts ja jap y'ixa'akt sami Diosin. Ja' kø'øm nadyejip jøts ku ja Diosi.

⁵ Ku njam'ajty ma meets jam, zkidi ja xja'myatsti ku øts yø ojts nnigajpxy?

⁶ Jøts wa'ats meets ja xnijawi tigøjpx ja yjaakta'ani, jøts ja ka' tsojk kyaxi'iky ku ja et ja xøow ka'anim tpaat'aty.

⁷ Jaanits ja' midi ja ka'ødyumbi yja'ajtpy kuuyi ja ja'ayi yjiwa'akti midi ja tyik'amøjkip.

⁸ Jøts ja jaty kyaxø'økt, ja nwindson'ajtim Jesús ja tyik'ookp, ja'ayi ja tpixujt. Jøts ku ja mye'ent amuum kudøø'kx møøt, ja'ayits ja tyuktægudigø'øpy.

⁹Ja' midi idø'øn ja'atp, ja miku' ja' yja' jøts ja' tmija'atp ja møk'ajtin, jøts ja yikxon tmija'att ja taay jøts ja nadyijyi tnankyja'ejxit ja y'ijxyimbi kya'ijxyimbi.

¹⁰Jøts ja tum ja ka'øbyi ja tyiktu'unt jøts ja jade'en twindaay'att pøn nøjxk windigøodyip, tøxi tkawa'andi ja tyiiby ja yjanchpi midi yiknitsokp.

¹¹Xjats ja Dios ja nayide'en tyikjaty, wan jade'en tyikwindaay'atti ja'agøjxp ku tø tyundigøydi jøts ja tjanchjawidi jade'en ku yikwindaayidi,

¹²jøts jade'en niduki'iyi yiktabayø'dyit ja pyøky, tøxi tkatijawidi tkajanchjawidi midi tiy midi janch. Ja' ne'egi chojktip tyumjaka'øbyi.

Tø ja Dios ttanibiktaagi jøts ñitso'ok'attit ja Tesalónikit jaa'y

¹³Meets køjxp øøts ja Dios ejtp ndukmøjawi ndukunuukxyjawi, mee migu'uktøjkti wine'en ja nwindson'ajtim mdsøky'atyidi. Patki'iyipxi ja Dios tø mdanibiktaagiyidi jøts mnitso'ok'attit, ja'agøjxp ja Espiritu Santo wa'ats myik'ijtyidi jøts ku nayide'en tø xjanchjawidi ja tyiiby ja yjanchpi.

¹⁴Jade'en'ampy ja Dios tø mjotøkiyidi ku øø tø nnigajpxy ja øgyajpxy ja ømyadya'aky midi yiknitsokp, jøts jade'en xpaattit ja kunuu'kxin midi yja'ajtpy ja nwindson'ajtim Jesucristo.

¹⁵Jade'ents migu'uktøjk idø'øn, ndukmadowdi jøts tu'ugyi xyik'ettit ja mjanchja'win, jøts kidi xja'dyigøydi ja ana'amin midi øø tø nyaky ku øøts jam kø'øm n'ats'øjch, jøts nayide'en midi nøkyøjxp tø myiktanigaxti.

¹⁶Ja nwindson'ajtim møøt ja Dios Teety, ja' y'øy'ajtingøjxp tø xtsøjkyindi. Tø ja nayide'en xmø'øyindi ja kajpxjot'amøki midi xemikøjxp, jøts ja yikxon njøp'ejxin.

¹⁷Wants ja nayide'en tyikmøjki ja m'aaw ja mjoojtti jøts tu'ugyi xwindanidit jøts jade'en xnigajpxtit uk xu'undit tum ja y'øbyi.

3

Amidowdi pøktsowdi ja Dios jøts øøts ja kyajpxy nyikyø'øyiyit

¹Migu'uktøjkti, ja' øts yam njaaknigajpxwampy jøts øø xni'amidowit xnibøktsowit wan ja jaa'y tsojk tñimadowdi ja nwindson'ajtim y'øgyajpxy ja y'ømyadya'aky pøn jaty tsinaadyip øy madsoo, jøts tsojkingøjxp tkupøktit nayide'en sam meets ja tø xkupøkti.

²Jøts nayide'en x'amidø'odit ku Dios x'ajot'attit jøts øø x'ixmatst ja ka'øyjaa'dyi ja kawindiy'ajtpidi, jabi ka'axi niduki'iyi ja jaa'y ja janchja'win tmøødidi sam adøm.

³Øyts ja nwindson'ajtim, ja' mee tu'ugyi mdukmi'ettip ja winmaa'n jøts ja m'ejx'etidit jøts ja miku' mgamimajada'agidit.

⁴N'ajot'ajtpy øøts ja nwindson'ajtim jøts ku xundi jade'en jøts xun'adø'østtit sa jaty mee n'ane'emy.

⁵Wan ja nwindson'ajtim nagyø'øm mbudøkiyidi jøts xjaaknijawidit sa ja Dios xtsøjkyindi jøts nayide'en xjagyaptit ja jotmøk'ajtin ja tuda'aky'ajtin sam ja Cristo.

Paat'ajtiyip tu'ugyi nadyamijoxa'ant ja ndunkjøjpp

⁶Mee migu'uktøjkti, ja nwindson'ajtim Jesucristo køjxp øøts yam n'ane'emy jøts xmajt-stu'uttit ja mmigu'uk pøn katunwandip uk pøn tkabadunwandip chinaa'y'ingøjxp ja ixpøjkin midi tø myiktukmadowdi, midi øø tø nnigajpxy.

⁷Mnija'widipxi sa mjujky'attit sa mdsøønidit mdanidit jøts xpadu'undit nayide'en sa øø nduñ; ka'axi øø juuni ngatuñ ku øøts jam ndsøøni ma meets jam.

⁸Uk ngagujuy øøts ja ndsapkaaky, jadi'iñi øøts ja nugo ngay, ka'ats yjade'eni, tump øøts, jotigøøpy øøts xinaxy tsunaxy jøts jade'en nidu'ugin mgayik'adsepti.

⁹Øy øøts idø'øn ja xpaat'aty jøts meets xyakt ja pudøjkin, jøts øøts ja n'amido'ot, ka'apts øøts jade'en nduñ, tump øøts, pøjkp øøts, jøts jade'en myiktuk'ejxti sa xu'undit.

¹⁰Ku øøts jam ndsinaay ja myikmøøtsinaadyi, yide'enxi øø nyajky ja tiy'ajtin: Pøni pøn katunwamp ka'ats kya'aty.

¹¹Jade'en øø tø nyiktamimadya'aky jøts ku meets jam winaagin pøn jadi'iñi nugo tyiknajxtip, niti tkatundi. Ja'ayi tyuñ'ajttip sudso niti tkatu'undit, ne'egi ja myigu'uk tyikwinmaamya'atti.

¹²Yø'øbi jaa'yts øøts idø'øn nni'ane'emy ja nwindson'ajtim Jesucristo kyutujkøjxpit jøts wan ttajotkujk'atti ja tyunk jøts jade'en tpaattit midi tyajujky'attip.

¹³Migu'ukti, kidi juuni x'ixmatsti ja ødyu'unin.

¹⁴Ku jam pøn tkamøjpkta'akwa'ant midi øø nnigajpxy ya'at nøkyjøtpy, øyim x'ejxtit pøn jade'en adøtsp jøts kidi xunk'atti, wan iiy wine'enin tsø'ødyunjawidi.

¹⁵Kidi xmidsøpøkti, jade'en x'ana'amdit sam pyaat'aty jaa'y ja myigu'uk t'ane'emy.

Ku ja Pablo y'ukajpxpoo'kxni

¹⁶Jøts ja nwindson'ajtim tyakp ja øy'ajtin, ja' ejtp mgunuu'kxidip øy madsoo, øy tigati jyatufi, ja nwindson'ajtim ni'ijtyi mjagyapidip.

¹⁷ Øts ngøjø'øm meets ya'at kajpxpoo'kxin ixyam ndanijayi. Jøts øts nxøøw nayide'en nbikta'aky sa øts ejtp nduñ ku øts ja nøky nguexy. Pablo.

¹⁸ Ja nwindsøn'ajtım Jesucristo niduki'iyi mmo'ojidip ja kunuu'kxin. Jade'en idø'øn ja yjatt.

JA MYIDU'UKPI NØKY MIDI JA PABLO TYANIGAJX JA TIMOTEO

Ku ja Pablo ojts tnijayi ja Timoteo

¹ Øts idø'øn Pablo'ajtp. Øts ja Jesucristo ngudanaapy sam øts tø xpikta'aky ja Dios Teety midi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nitso'ok'ajtin xmø'øyindit.

² Mets Timoteo ya'at nøky ndanija'ayip. Mjagyajnpixi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'o'ojip ja pya'ayo'owin, ja' mmo'o'ojip ja yjotkujk'ajtin.

Ku yikni'ane'emy jøts kyayikupøkt ja ka'øy'ixpøjkin midi ka' tyiyi yjanchi

³ Tan meets jam Efeso kajpjotp sam tø nda'ane'emy ku øts jam wyinaty nnøjkxwa'añ jam Macedonia. Ana'am ja jaa'y midi jam winaagindi jøts kidi ja tnanky'ixpikyidi ja winmaa'ñ midi ka' tyiyi yjanchi

⁴ Jøts nayide'en kidi nugo tyikmøjtøkidi ja kwenti ja madya'aky midi nisudso'ampy katiidyøjkp. Nugo amyøñ tsaachyøñ tnimadya'aky ja aptøjkti. Nugo adøm njaka-jpxy'ajtyindi sudso tpaaty, nisudso'ampyts kyatiidyøki. Niwine'en adøm ja xkabudøjka'andi jøts adøm nbaduujnin ja Dios yja' midi adøm ja tø xanipijkyim midi tø nyikmø'øyindi janchja'wingøjxp.

⁵ Jøts ja'agøjxp ya'at myikta'ane'emy jøts nixem niyam ja tsojkin xjagyaptit midi ja Dios yja'ajip, midi yiktump øy'ajtingøjxp øwvinmaa'ngyøjxp ku ja nadyamiyoxi ñaxy amuum janchja'wingøjxp.

⁶ Tøts yø winaagin tmajtstutnidi jøts nugo ñanktyuu'tigøyidi ku tpaabøkti ja winmaa'ñ midi nisudso katiidyøjkp, nugo nadøki tnkyajpxy'atti.

⁷ Ja' chojktip jøts kyajpxwejpi'attit sa ja Moisés kyutujk wya'añ, ni tkaja'gyukidits ja wyinmaa'ñ kø'øm sa jaty wya'andi, ni ja y'ixpøjkinbaat tkanijawidi midi nadyijyi ñigajpxtip amimøjnija'wibim tiy janch.

⁸ Nnija'windip adøm jøts ku ja'abi kutujk y'øyi ku jade'en tyunkpaaty sam tø yik-tanibiktaagi.

⁹ Jøts yiknijawit nayide'en jøts ku nima ja kutujk kyayiktanibiktaagi ja øyjaa'y midi katundigødyip; pø ja'axi ja kutujk wya'añ ku ja tø kyøjy jøts ja tyu'unt ma ja jaa'y pøn tum nay'adsep tja'widip, pøn kamadoodip. Jaa ja tyuñ ma ja ka'øyjaa'dyi, ma ja møjpxkyjaa'dyi; pøn tkawindsø'jkidip ja Dios, pøn tkawindsø'jkidip ja tsinaa'yin; pøn ja yikjaa'y'oo'k tyunk'ajtpy, øy ja tyeety ja tyaak ja tyik'ooktit tyiktigø'odyit. Jats idø'øn ja kutujk tyunkpaaty jøts ja tpayø'øy

¹⁰ pøn namyøøt'ajtidip nugo, yam ja ka'ap y'amajtsk'atti; uk tmøøt'atti myiyaa'dyøjk myidø'øxyøjk; pøn jaa'myaa'tstip, pøn myigu'uk twin'øøndip, pøn ja Dios nugo tniwambajttip jøts ja myigu'uk twin'øøndi. Nayide'ents ja kutujk tpayø'øy pøn ja øy'ixpøjkin tkatsojqp,

¹¹ ja øy'ixpøjkin midi tnigajpxp ja øyajpxy ja ømyadya'aky, ja Dios yja' midi yiknitsokp, midi øts yam tø nyiktanipiky.

Tyamøja'wip ja Pablo ja Dios ku ja pya'ayoyiyi

¹² Ndukumøja'wipts ndukunuu'kxyja'wipts øts ja nwindson'ajtim Jesucristo pøn ø tø xyikjotmøkt'a'aky jøts øts ya'at ndunkjøøjp ndu'unt. Tøxi øts ja x'ixy jøts ku øts ja nmi'øy'aty, xjats øts ja tø xpikta'aky jøts øts ja jade'en nmidu'unt.

¹³ Ja' øts idø'øn jade'en kø'øm xump, øy øts idø'øn ja y'ijty nja'axøøkmigajpxy, øy øts idø'øn ja y'ijty njabawidity jøts øts ja nmatswa'añ ngawindiy'ajtingøjxp jøts øts ja y'ijty nyik'amjaty nyiktsaachjaty. Møj ja Dios ku øts ja xpa'ayøøy, ka'ap øts ja wyinajty njanchjawinim, ni nganijawi øts pøni ti øts jade'en ndumpy.

¹⁴ Paty øts ja nwindson'ajtim møj ndukmøjawi ku øts ja xukjanchja'wiyi ja yja', jøts jade'en ja nmigu'uk ndsojkindit nminamyajyindit ku møøt n'ejtindit ja Cristo Jesús.

¹⁵ Tiy'ajtin yø' jøts niduki'i'yi njanchja'wa'ant: ku ja nwindson'ajtim myiñ ya naxwiñ jøts ja tyiknitso'ok'ajty ja øjpkpitumbi jaa'y. Møj tundigøøbyi øts y'ijty, nika' pøn jade'en.

¹⁶ Jade'engøjxp øts ja Dios xpa'ayøøy jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkpimee'kxy. Jade'en ø ndunjøpi sudso yikpaatt ja jukky'ajtin midi xemikøjxp ku ja yikpabiky yikjanchjawi.

¹⁷ Paty nayide'en nwindso'jka'ant, nmøja'wa'ant n'øjja'wa'ant ja Dios Teety midì nwindso'n'ajtyindip xemikøjxp, ni kya'øøky ni kyadigøy ja', ka'ap ja yik'ixy. Ja'ayi dø'øn tu'ugyi ejtp. pøn tnija'widyaapy. Jade'en idø'øn ja y'ejxi tyiyi.

¹⁸ Mets u'nk Timoteo, mets ya'at ndanipijky jøts yikxon xpadu'undit ja Dios yja' samdam mmimadyajkidi ja Dios kyugajpxty. Mjanchjawip ja nwindso'n'ajtim amumjoojt jøts øy ja mwinaqa'ñ xyik'ett.

¹⁹ Jaa winaagim jade'en yjajttøø ku ka' tmøjpiktaktøø sam tjanijawidi, jade'ents ja yjanchja'win tø tyuu'tigøydi

²⁰ sam yjajttøø ja Himeneo jøts ja Alejandro. Tøxi øts ja kutujk nmø'øky ja Satanás jøts o sagasa ja y'ayo'on ja tpaajtidit jøts jade'en tja'gyukidit jøts ku ja Dios kyayikwindsøy.

2

Ku Pablo ttukmadøoy ja Timoteo sudso tkugajpxa'akt o pøngapøn jaa'y

¹ Ixya meets jawyeen ndukmadøy jøts ndanipøkti jøts møk xukunuu'kxyjyawidit ja Dios jøts x'amido'odit xpøktso'odit jøts tpuðøkit ja naqxwii'ñit jaa'y.

² Kuwandaagidi ja windsøndøjk ja kudunktøjk jøts øy tsuj nyiknaxindit agujk jotkujk, jøts ja Dios jade'en ni'amuki xkunu'lxindit ku amumjoojt nwindso'jka'ant nwinja'wa'ant.

³ Ku jade'en nbadu'unint jade'ents t'øjyawi ttsujawi ja Dios midì xyiknitso'ok'ajtimp,

⁴ Jabi jade'enxi ja tsoøky jøts niduki'iyi nnitso'ok'ajtidit jøts nnija'wa'andit ja tyiiby ja yjanchpi.

⁵ Tu'ugyi jaa ja Dios Teety, jøts nayi tu'ugyi ja' midì xyiknitso'ok'ajtim jam Dios wyindum: ja nwindso'n'ajtim Jesucristo, ja' pøn jaa'y'ajtim nayide'en myøø'tajtpy.

⁶ Ojts ja nwindso'n'ajtim Jesucristo ñagyøkyki jøts ja ojts xku'oo'ka'am adøm nbøkyøjxp jøts adøm nitso'ok'ajtim jade'en nbaajtyindi, xjats ja jade'en enkyi tø yiknijawinim ku ja xøøw ja jumøjt tø tpaatynim sa ja yjajty kyubejty.

⁷ Ja'agøjxp øts tø nyikpikta'aky kugajpxy'ajtpi ku'aa'w'ajtpi jøts øts ja janchja'win jøts øts ja tiy'ajtim nduk'ixpøktit pøn ka'israelit jaa'dyi. Tiy janch øts idø'øn nwa'añ, ka' nugo ndabyaaty, pø ja Cristoxi øts amuum njanchja'wip.

⁸ Paty ø nwa'añ, jøts o ma pøn tja'myatstt ja Dios, ka'ap ja tsep, ka'ap ja aka y'øyi. Tu'ugyi amuum nbiktaajkin ja njanchja'win.

⁹ Jøts ja tø'øxyøjk, tuda'aky'ajtim øyjaa'y'ajtim yiktundip. Ka'ap ja ja'abi wet tpikta'aktit midì namyikaxi kaxø'kp midì ja myigu'uk nugo tyukta'amutskidip. Kidi namyikaxingøjxp ja wyaay tyik'øydi tyikpaadidi.

¹⁰ Jade'en ne'egi tpuðøkidit ja myigu'uktøjk ku ja øy'ajtim tyiktu'undit sam ja'adi pøn ja Dios tø ñadyamiyøxyidi.

¹¹ Ku ja Dios yja' yikajpxwa'kxy, amøñi ja tø'øxyøjk tpatmado'odit, tuki'iyi ja yujy'ajtim tpikta'aktit.

¹² Ka'ap mibaat ja tø'øxyøjk tkajpxwa'kxit ja Dios yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit.

¹³ Jabi jawyeenxi ja Dios tyikaxi'jky ja Adán jøtsnim ja Eva.

¹⁴ Jøts ja Adán ka'ap ja yikwin'ii'ñ. Ja tø'øxyøjk ja' ne'egi yikwin'øø'n, jøts ku yikwin'ii'ñ jade'ents ja pøky tpaajty.

¹⁵ Jade'en'ampy ja tø'øxyøjk ja nitso'ok'ajtim tpaatti ku ja u'nktaak'ajtim tyik'awa'andi, ku ja janchja'win tpadu'undit, ku tjagyaptit ja tsojkin jøts ja wa'ats'ajtim, jøts møøt ñadyabudøkiyidit ja ja'gyukin.

3

Sa yjaa'y'attit pøn ana'amp tsaptøjkjotp

¹ Janch tiy'ajtim yø': janch øy yø'øbi tunk pøn tnwindso'n'ajtwamp ja Dios yja'.

² Paty nayide'en øy tsuj yjaa'y'attit jøts ka' nugo o sa yiknøjmikit. Pøni jam ñidø'øxy, tu'ugyi ja tmøø'tatt, ka'ap ja kawinaaq. Tuda'aky yjaa'y'att, sam ja tyunk tmøø'taty ja'ats pyadu'ump. Jøts twindsø'øgit twinjawit pøn nimejnip nija'jtíp jam tyøjkjotp; jøts øy tsuj nayide'en yik'ixpøkt;

³ ka'ap y'øyi jøts y'amu'u'kyjaa'y'att jøts ka'ap tsep t'ixa'at. Ka'ap ja myigu'uk nugo twin'øønt jøts ja meeñ jade'en tpaatt. Ja' tsojkip jøts ja pa'ayo'owin ttu'unt jøts ka'ap ja meeñ nugo pøkpaat tjawit.

⁴ Øy tsuj y'u'nkteety'att sam pyaat'aty jøts tuki'iyi t'ext yjønjojp, jøts ja y'u'nk øy tsuj wyindsø'øgiyt;

⁵ ku jade'en pøn tkatu'unt yjønjojp tyøjkjotp sam u'nkteety'ajtim, ¿sudsots ja t'ana'amt pøn ja Dios tjanchja'widip?

⁶ Ka' pya'at'aty ana'ambi tyøkit pøn tjembyabøjkip ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tø tyaja'adyi ja ayo'on.

⁷ Nayide'en chøkyi jøts ttunjøpit ja øy'ajtin ja tud'a'aky'ajtin jøts jade'en wyindsø'øgiyt pøn ja Dios yja' tkabaduujnøpim, jøts ka'ap ja jade'en pøky tyaja'adiyt jøts nayide'en ka'ap ja miku' nugo wyin'øniyt.

Sa yjaa'y'attit ja møjaa'dyøjk pøn tundip tsaptøjkjotp pøn tpuðøjkip ja ayooobi jaa'y

⁸ Nayide'en ja møjaa'dyøjk pøn tkumaadyip ja ayooobi jaa'y jøts tyuda'aky'att y'øyjaa'y'att jøts kø'øm ñawyindsø'øgiyt. Ka' ti ttu'undit, ka' ti tkajpxtit. Ka' myuktigø'ødyit jawyeen ja'adi, jøts ka'ap ja meeñ nugo pøkpaat tjawidit.

⁹ Øy tsøky wə'ats tñijawidit sa ja Dios yikjanchjawi midit y'ijty kayiknija'wip, jøts ja wyinmaa'ñ øy tsuj wə'ats tmøø'tattit.

¹⁰ Ja' tsojkip jøts yik'ext yiknijawit pøni ka' ti tundigø'øyin tmøø'tatti, møjaa'y'attipts ja' jøts tkuma'adyit ja ayoobitøjk.

¹¹ Nayide'en ja ñidø'øxy tyuda'aky'ajtmidit y'øyjaa'y'ajtmidit. Ka' nugo yjemgajpxtit pyagajpxtit. Ja' tyu'undip midit tiy'ajtin.

¹² Ja møjaa'dyøjk tu'ugyi ja ñidø'øxy ja tmøø'tatt, jøts øy t'ext ja y'u'nk y'unə'jk jam yjønjøtp tyøjkjøtp.

¹³ Ja møjaa'dyøjk pøn øy tsuj tundip sa ja tø yiktanipøkti, jinaxy ja myøjtøkidi jinaxy ja yikwindsø'øgidi jøts ja nayide'en ka' tsep t'ukja'wiñidi tñigajpxtit sudso yikjanchjawi ja nwindsøn'ajtim Jesucristo.

Sa Dios ja wyinmaa'ñ tñanky'ijxyyi midit y'ijty kayiknija'wipnim

¹⁴ Tsojk ø nnøjkxt jøts me n'ats'ext; ixyamts mets ya'at nøky ndanijayi.

¹⁵ Ku øts jøtmøñ nda'anigyøjt, jøts xnijawit sa njaa'y'ajtmidit møøt ja nmigu'uk pøn tø tjanchja'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn tñigubøjktip ja tyiiby ja yjanchpi.

¹⁶ Janch tiy'ajtin yø', ku janch møj ja Dios wyinmaa'ñ midit y'ijty kayiknija'wip. Ixyamts yik'ixy yiknijawi jabi jade'enxi jap jaabyety y'ity ku:

Jaa'yin ja nwindsøn'ajtim Jesús ñanky'ejxyi ya naxwiiñ;

jøts ja Espíritu Santo tñigajpxy ku ja' tiy'ajtin tmøø'taty

jøts nayide'en ja ankilistøjk y'ejxøø ñija'wiyøø.

Tø yikajpxwa'kxy ja Jesús y'ixpøjkin o magajp,

jøts jade'en tpadundi ja naxwii'ñit jaa'y

jøts ja chajpajtnaa ma ja Dios Teety jap.

Jade'en ja nøky wya'añ.

4

Sa winaaqin tñajststuttit ja Dios'ajot'ajtk

¹ Tiy'ajtin ja Espíritu Santo wya'añ ku winaaqin tñajststuttit ja Dios'ajot'ajtk ku wyinaty wyingøñ jøts kyøxt ja naxwii'ñit. Jøts ja tpadu'undit ja ixpøjkin midit ka' tyiyi yjanchi, midit ja miku' yja'ajtpy.

² Ja'abi jaa'y ja tmado'odip pøn taay'ajttip pøn ja pyøky tkaja'widip øy ja tjanijawidi ku møj tø tyundigøydi.

³ Jade'en wya'andit jøts ku ka' n'amajtska'ant jøts ka'ap o ti njøø'kxint øy ja Dios ja kø'øm tø tjabikta'aky; pø tøxi ja Dios ja ttanibiktaagi jøts ja nyiktunkpaajtmidit tuki'iyi ja pikta'aky, pøn jaty ja Dios tjanchja'widip pøn jaty tñija'widip ja tyiiby yjanchpi yjøø'kxtipts ja', wan Dios ja ttamøjawi ttagunuu'kxyjawi.

⁴ Midit ja Dios tø tyik'øyi, tum øy ja', ka'ap aðøm ja ngagupøjkint. Ndamøja'wimp ja Dios ja' ku nyiktunkpaajtmint,

⁵ ku ja jade'en ndu'unint kunuu'kxyts ja wyimbejni ja pikta'aky sam ja kyajpxy wya'añ.

Sa ja Jesucristo øy tsuj yikmiduñ

⁶ Ku ya'at øy xuk'ixpøkt ja migu'uktøjk, øy idø'on ja Jesucristo wyinaty xmiduñ, jøts m'ajot'atp ja', myiktunkpaatp ja' ja ixpøjkin sudso n'ajot'ajtmint ja Dios midit ixyambaat mgamajstutpy.

⁷ Ka' xmøjpikta'akt ja kajpxy ja ayuujk midit ka' tyuñ. Amumjøjt ja Dios yja' xpaduujnit;

⁸ øy nugo njanay'ejx'ejtmint jøts møk møjaa'w nyiknaxjint, ja Dios yja' ne'egi møj ku nbaduujna'ant. Ja'ats xpuðøjka'amp jøts øy tsuj ndsinə'yint jøts nayide'en ja øy'ajtin xukpaajtmint xemikøjpx.

⁹ Janch yø' tiy yø', paat'ajtip jøts yø niduki'iyi nbadu'unint.

¹⁰ Ja'agøjpx møk ndu'unint øy njagu'ayo'ombaaajtindi øy njayikjemdu'uñindi nyikt-edu'uñindi. Ka' ti ngumaa'yindit, jabi tøxi ja Dios xmø'øyindi ja jøp'ejxin jøts niduki'yiyi tyiknitso'okt pøn jaty pabøjk'yip.

¹¹ Yø'øbi winmaa'ñ idø'øn mni'ana'amp jøts nayide'en xnanky'ixpøkit.

¹² Øy tsuj jawyeen xunjøpit sam pyaat'atyin tpadu'undit pøn ja Dios tjanchja'widip jøts jade'en myikupøkt øy mja'una'jkinim; jøts ja m'ayuujk øy tsuj xyikpidsø'ømt møøt ja m'øyjaa'y'ajtin, møøt ja mba'ayo'owin, møøt ja mjanchja'win.

¹³ Ku øts jam udyaa'gyi nja'att, kajpx ja nøky jam mā mnamyukyidi sã ja Dios kya-jpxy wya'añ. Yixxon xukwinjãwit ja migu'uktøjk jøts ja yjotmøkta'ãktit, yixxon waani xyik'ixpøkt.

¹⁴ Yiktuñ ja møk'ajtin ja wiyj'ajtin midi ja Dios tø mmø'øyi, Dios waan ku ja møjaa'dyøjk ojts mgønixajyi.

¹⁵ Tu'ugyi xu'unt yø'øbi winmaa'ñ jøts jade'en t'ejxtit tnijãwidit sã tø xyikm'iweni xyikaja'aji ja mja'gyukin jøts ja mjanchja'win.

¹⁶ Øyim mnay'ejx'ettit kø'øm midi mwinmaa'ñ'ajtpy, midi mduk'ixpijky, midi mduknija'wip ja migu'uktøjk, tu'ugyi xyik'ett midi mdumpy. Ku jade'en xu'unt mbaatpsts ja øy'ajtin jade'en, nayide'en ja'adi pøn tmadoodip ja ixpøjkin.

5

Saja Timoteo møøt y'ett pøn ja Dios tjanchja'widip

¹ Ka' xwindsø'ot, ka'ap o sã xnøjmit ja møjaa'dyøjk; ne'egi tudã'aky xkajpxwejt sam ja mdeedyin; nayide'en ja una'jktøjk øy tsuj xjãwit sam ja mgø'ømigug'in.

² Nayide'en ja møjaa'dyø'øxy xwinjãwit xwindsø'øgit sam ja mdaagin, jøts nayide'en ja kiixyuna'jkti sam ja mgø'øm'uchin, jade'en ja mduda'ãky'ajtin xyiktu'unt.

³ Pudøki ja ku'økytø'øxy pøn ti kadyimy'ejtxip.

⁴ Pøni jamts ja ku'økytø'øxy møøt y'u'nk y'una'jk møøt y'ap y'ok, jade'en ja una'jk pyaat'atyidi jøts ja tpuðøkidit ja tyeety tyaak jøts ja tyikwimbejtiniyidit ku ja tø y'ijxyidi, yø' Dios y'øyja'wip, jade'en Dios ttsøky.

⁵ Ja ku'økytø'øxy pøn nadyu'uk tø tyañ, pøn nipøn ka'ejtp, ejtpts ja Dios ja t'ajot'aty jøts ja pyudøkiyt, ka'ap ja Dios ja tja'dyigøy jøpy ux.

⁶ Jamts nayide'en ja ku'økytø'øxy pøn ja Dios tka'ajot'ajtp. Tyumpy ja' pøni ti ja tyun-wampy, øøky ja ñabyiktaajkniiyi.

⁷ Tukmadow yixxon, wan tnijãwi jøts ka' pøn øy sã ñøø'mxiyit.

⁸ Jamts winaaagin tkajotmay'aty ja myigu'uktøjk, abiky tpiakta'aky ja yjøøn ja tyøjk jøts ja t'ixmajtsni ja Dios'ajot'ajtk. Tyimwyenkts ja ne'egi pyidsimy, ka'ap jade'en pøn ja janchja'win tkajagyajptinim.

⁹ Yø ku'økytø'øxy yiklisti'atp midi tugi'pxy jumøjt pøni tøts ja tu'ugyi ñiyaa'y tø t'atsmøøt'aty, paat'ajtiyiyip ja mibaat yikpuðøkit.

¹⁰ Mibaat ja yikpuðøkit ja'agøjpx ku tø y'øyjaa'y'aty, pøni tø y'u'nk y'una'jk yixxon tyikyeeky tyiktsø'øky, pøni tø øy tsuj t'adsøy ja jaa'y pøn tøj'ayø'ødyip, pøni tø yixxon twinjãwi twindsø'øgi ja myigu'uk pøn tø tkupøjknidi ja Dios, pøni tø tpuðøki pøn amajajtip tsaachjajtip, uk pøni tø ttuñ jadu'uk øy ti may'ajt øy ti pudøjkin.

¹¹ Ka' mibaat yikjaabyatt ja ku'økytø'øxy pøn una'jknim; ja'agøjpx ku jotmøñ y'amajtskit, jade'en'ampyts ja Cristo yja' ka'pxy tka'ukpadu'uniiyt,

¹² jøts yikpøky'ixy ku tø tmajtstutni ja' midi tø t'ukpuðøki.

¹³ Jats ja' pøn nugo ttunk'ajtp ja tøk'ayø'øky, ja nuux'ajtin ja pagajpxk nugo jade'en myiwidijtpy, jøts nugo ttatøki midi jagapaa't'ajtiyiyip.

¹⁴ Paty y'øyi jøts y'amajtskit pøn ku'økytø'øxy una'jknim, jøts ja y'u'nk t'ext tjagyapt sam pyaat'aty'i jønjøtpy tøjkjøtpy n'ejxint njagyajpint, jøts ka' nugo ja jaa'y pyagajpxiyit.

¹⁵ Jamts winaaagin pøn ja Dios yja' tø tmajtstuujti, ja miku' yja' tø tpanøjkxiyi.

¹⁶ Pøni pøn ja Dios yja' tø tkupøjkidi jøts pøni jam ja myigu'uk ku'økytø'øxy, mibaat ja kø'øm tpuðøkidit pøni ti ja ka'ejtxip, jøts ja ka' pyudøkiyidit ja møjaa'dyøjk midi tundip jap tsaptøjkjøtpy. Jade'en'ampyts nayide'en yikpuðøkit ja ku'økytø'øxy pøn ja myigu'uktøjk kadyimy'ejtpt.

¹⁷ Ja møjaa'dyøjk midi tniगतुक'ajtip ja janchja'wibidi jøts nwindso'jka'ant nwinja'wa'ant. Jamts ja' midi xuk'ejximp xuk'ixpøjkimp ja Dios kyajpxy, ne'egits ja møj nwindso'jka'ant jøts ja nbudøjka'ant.

¹⁸ Jabi jade'enxi jap jaabyety y'ity: "Kidi ja mdsakaa ajeñ xyik'okti ku ja xyiktunwa'andit." Jøts nayide'en: "Ku jaa'y nyiktu'unint kuwani myijuu'ñ ja ttsøky." Jade'en ja nøky wya'añ midi ixa tø xnijãwidi.

¹⁹ Ka' xmøjpikta'akt ku yikni'ðønit ja møjaa'dyøjk pøni ka'ap ja a'ejxnaxpi te majtskin uk tigøøgin.

²⁰ Pøni tundigøy'adøtstip ja møjaa'dyøjk, mibaats ja jam yiktamigajpxt ma ñamyukyidi ja janchja'wibidi jøts jade'en tjøptsø'øgidit tjøpjawidit ku tyundigøydi.

²¹ Ku ya'at jade'en ndanipiky wa'ats Dios Teety tmadøy, wa'ats ja nwindson'ajtim Jesucristo tmadøy møøt ja ankilistøjkti, jøts øy yikxon idø'øn xpadu'unt yø ana'amin, ka' pøn nugo sukta'oo'kpatt. Pøni pøn tundigøødyip tuknax ja xpayø'øty.

²² Ka' nugo ajawi xpikta'aktit ja møjaa'dyøjk midi tngutujk'atp ja janchja'wibidi, jawy- een yik'ext yiknijawit pøni sa yjaa'y'aty, kuts kya'øyjaa'y'aty jøts ja pyøky ttpaatt ja janchja'wibidi, øyim mnay'ejx'etit jøts ja pøky mgapaadit.

²³ Kidi nugo tsuxknøø xumi'uuky, pø pøjk'ejtpxi xijy mjoojt, vino m'uukp waani.

²⁴ Pøn tundigøødyip midi yiknija'wip wa'ats, ja'ats yikpayø'øpy, midi'its kayiknija'wip jaanimts ja yiknijawit ku ja payø'øyin xøøw y'ett.

²⁵ Nayide'en ku ja øybi ndu'unint; øy ja jatyi yjagayiknijawi, kuwani yiknijawi udy'a'agy. Ka'ap ja jadi'ifi tyafi.

6

¹ Yø tumbitøjk øy tuda'aky yjaa'y'attit jøts twindsø'øgidit yikxon ja wyindsøndi, jøts ka' nugo ja Dios yikpagajpxt, jøts nayide'en ka' nugo nyiktabagajpxint ja n'ixpøjkin.

² Nayide'ents ja tumbitøjk pøni jam ja wyindsøn midi nayide'en tpadump ja Dios yja', ne'egi møjts ja twindsø'øgidit, pø pyadumpxi nayide'en. Jade'ents ja ne'egi tpuðokidit sam ja tsojkin tjagyapti. Me Timoteo, tukmadow kajpxwa'kx yø'øbi ana'amin midi nnigajpxpy.

Sa ja Dios yja' nbaduujna'ant jøts agujk jotkujk n'ejtin

³ Pøni jam pøn tkajpxwa'kxy ja wenk ixpøjkin midi ka' tminabyaadyi ja nwindson'ajtim Jesucristo yja', midi tkawindsø'jkip ja Dios,

⁴ nugo ja ñamyikexyi, ka'ap ja tñijawi pøni ti kyajpxpy. Nugo tyikjø'øpy ja winmaa'ñ ja ixpøjkin; jøts jade'en nugo ja tsep tyiknaxkida'aky ku nixem niyam ja ñanky'amutskiwya'añidi.

⁵ Nugo ja y'awa'an'ajtk tyiktunidi ku tka'uknija'wiñidi ja tyiiby. Nugo win'øø'ningøjxp nadyijyi ja Dios yja' ttuujni. Jade'en ja wyinmaydi jøts jade'en tity ja kumeeñ'ajtin yikpaatt. Mets Timoteo, majtsu'tut yø' pøni pøn jade'en jaa'y'ajttip, kidi xminamyayi.

⁶ Jade'en'ampy aðom ja jotkujk'ajtin nmøøt'ajtyim ku ja Dios yja' nbaduujna'am øy meeñ o ti ngamøøt'ajtyim.

⁷ Ka' ti pøn tmimiñ ku ngaxi'jkyimp ya naxwiif, nayide'ents ku nwindigøø'ña'ant, ka'ats ti n'uk'ejxna'ant;

⁸ pøni nbaajtyimp ja ngaajyk ja n'uujkik jøts ja nwet ja nnaamy, ndajotkujk'ajtimpts idø'øn ja'.

⁹ Jamts pøn ja kumeeñ'ajtin ttsojkp. Tyumpy, o ti ttu'unt, jøts ja jade'en o sa nugo tpaatt ja meeñ, kø'ømts ja jade'en ñanktyuut'igøyidi, ka' tja'gyukidi pøni ti tyundip. Kø'øm ayo'on ja jade'en ñanktyukpaadyidi, jade'ents ja nugo ñankwyindigøyidi.

¹⁰ Ne'egi nugo xyiktundigøø'yint xyikajpxigøø'yint ku ja kumeeñ'ajtin ndsojkin; jamts pøn winaagin nugo tsojkanaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadiyt.

Sa ja Timoteo yikxon tngubajk'att ja janchja'win

¹¹ Mets Timoteo, kidi me nayide'en m'adøtsmi, pø Diosxi mets ja yja' mbaduujnip. Yikyø'øy mets ja mdsinaa'yin øy tsuj, ja m'ajot'ajtin jøts ja mjanchja'win. Jøts xminamyayit øy pøn ja mmigu'uktøjk, jøts ja tuda'aky'ajtin yujy'ajtin xyiktu'unt.

¹² Nitani møk yø janchja'win; kidi xmajtsu'tuty midi ja Dios tø mdamidsokyiyi midi xemikøjxp ejtp, jabi øy tsujxi tø xukmadøy ja mayjaa'y sa ja janchja'win xjagyepy.

¹³ Ja Dios Teety midi xyikujky'ajtindip, ñija'wipts ja', sam ixyam n'ane'ery, nayide'ents ja nwindson'ajtim Jesucristo tukmadøøy ja tiy'ajtin ja Poncio Pilato.

¹⁴ Paty yikxon xpadu'unt jade'en, midi tø myiktanipiky, ka' xyiktigatst, jøts ka' pøn mbøky'ejxyit. Jade'en xu'unt kunim ja nwindson'ajtim Jesucristo mye'ent.

¹⁵ Ku tpaatt ja xøøw ja jumøjt, jøts ja Dios Teety ja tkaxt ja nwindson'ajtim ya naxwiif. Tu'ugyi Dios Teety myøji midi ja øy'ajtin ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en.

¹⁶ Yø' tu'uk møj, ka' y'øøky, xemikøjxp ja y'ity. Jaj agujkpy chøøni ma ka' pøn mibaat pyaadyi y'ijxyi. Yikwindsø'jkip yikwinja'wip ku ja myøk'ajtin tmøøt'aty xemikøjxp! Jade'en idø'øn ja y'ejxi.

¹⁷ Ana'am pøn kumeeñ'ajtp ya naxwiiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'attit amumjoojt, pø ja'axi ejtp xemikøjxp jøts tuki'iyi xmø'øyim ja øy'ajtin ja jotkujk'ajtin.

¹⁸ Nøjmi ja kumeeñ jaaj'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip.

¹⁹ Ku jade'en tpadu'undit jøts ja øy'ajtin jade'en tpaattit, jøts tmøø'ettit ja Dios xemikøjxp.

Midi ja Timoteo jaakyiktanipøjkp

²⁰ Mets Timoteo, møjpihta'ak midi tø myiktanipiky. Kidi xmøjpihta'aky ja ka'ø y ayuujk midi ja Dios yja' tkaminabyaajtip, midi ñadyijyi yiktejp ku ja tyiy'ajtin.

²¹ Tø winaagin tyuu'tigøydi pøn yø jade'emb i winmaa'ñ tpadump. Jade'en ja yjanchja'win tka'ukpadunidi.

Dios mgunuu'kxip, mets Timoteo. Jatp idø'on jade'en.

JA MYĪMAJTSKPI NØKY MIDI JA PABLO TYANĪGAJX JA TIMOTEO

Ku ja Pablo ojts tnijayi ja Timoteo

¹ Pablo øts, jøts øts ja nwindson'ajtim Jesucristo ngudanaapy, øts xkajxp ja Dios Teety sam øts ja tøm xamidsøky jøts øts ja yja' ndukmado'ot ja naxwii'nit jaa'y sa nbaajtant ja øy'ajtin xemikøjxp ku ja Jesucristo møøt n'ejtint.

² Mets Timoteo ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxiip møøt ja nwindson'ajtim Jesucristo. Ja' mmo'o'ojip ja pya'ayo'owin, ja' mmo'o'ojip ja yjotkujk'ajtin.

Sa ja Timoteo tyiknigaxøkt ja Cristo ja yja'

³ Ndamøja'wip øts ja Dios ku me nni'amidoo'wi y'ity jøpy ux. Ja' øts idø'on ja yja' nbadumpy samdam ja t'øyja'wi sam nayide'en ja møjaa'dyøjk y'ijty tundi.

⁴ Nja'myejchp øts sa myaajxy ku nnawya'kxyim. Wamp øts o me ma njanch'ejxpaatt jøts njotkujk'att.

⁵ Nja'myejchp øts nayide'en sam ja Dios Teety xjanchjawi. Jabi jawyeenxi ja mdigamø jøts ja mdaak nayide'en tyiktundøø ja yjanchja'win.

⁶ Paty mets ixyam ndukja'myech jøts øy tsuj xyikniwenit ja mdunkjøøjp midi ja Dios tøm danipiky ku mets ojts ngønixajy.

⁷ Ka'ap ja Dios Espiritu Santo tøm tpikta'aky jøts øy ti ngudsø'jka'ant. Nayi Espiritu Santo ja myøk'ajtin xmø'øyimp jøts amumjoojt ndu'unint jøts ja tsøjkin jøts ja øyja'gyukin nmøøt'ajtant.

⁸ Ka' ti xtsø'ødyunjawit sam ja Dios yja' xkajpxwa'kxi, jøts ni øts xkatsø'ødyunjawit ku øts nay ja' nyiktagudsumi. Kupøk o myikjemuñ myikteduñ myikjemnøjmi myiktenøjmi ku tka'øyjawidi ja Dios kyajpxy midi xyiknitso'ok'ajtimp. Jade'en xmidanit sam ja Dios ja myøk'ajtin tyaky.

⁹ Jade'en ja Dios ttsøky jøts ja xyiknitso'ok'ajtant jøts nayide'en amumjoojt nnadyamiyøjxint. Kidi ja'agøjpxip adøm ja xtsøkyim ku adøm n'øyjaa'y'ajtyim nga'øyjaa'y'ajtyim. Ma windiixyip adøm ja Dios jade'en xamidsøjkyim, ka'anim wyinaty ja naxwii'nit cho'onda'aky. Ja nwindson'ajtim Jesús køjxp adøm ja nitso'ok'ajtin nbaajtant ku møøt n'ejtint.

¹⁰ Tøm ja Dios Teety tnankyja'ijxyi sa ja pa'ayo'owin tjagyepy adømgøjxp ku ja nwindson'ajtim Jesucristo xaniguejxyim. Sa ja y'ø'jky jøts yjujkyijky, nayide'ents adøm nbaajtant sam ja tøm tnajstuni. Jade'ents Cristo køjxp ja o'jkin xka'ukmimajadaajkna'ant jøts xemikøjxp ja jujky'ajtin nbaajtant ku ja y'ayuujk tnitanaay sam ja wyinaty tøm tnanibikaagi.

¹¹ Dios ø tøm xpikta'aky jøts øts ya'at ja kyajpxy ja y'ayuujk ngajpxwa'kxiit jøts øts yøm ngudanit, jøts ø nduk'ixpøkt pøn ka'israelit jaa'dyi.

¹² Paty øts ixyam øy ti ngu'ayo'ombaadi. Ka'ap ø ti ndsø'ødyunjawi, pøm Diosxi øts ja yja' nbaduujnip. Wampøts øts øts ja Dios xpøkjø'knit kunim ja tiidyu'unin xøøw mye'ent.

¹³ Mets Timoteo, sam ø tøm nnajstuni, tu'ugyi ja øy ixpøjkin jade'en xyikyø'øty, ja Dios yja'. Jade'ents ja Dios xjanchjawit jøts ja mmigu'uktøjk xpa'ayo'ot xminamyayit nayide'en sam ja nwindson'ajtim Jesucristo xamidsøjkyim ku møøt n'ijtyim.

¹⁴ Ja Espiritu Santo midi adøm nmøøt'ajtyindip, ja' pyudøjkingøjxp xpadun'ett ja Dios yja' midi tøm mdanipikyiyi.

¹⁵ Tøxi me xnijawi sam øts ja Asit jaa'y xmajstuttøø, ja Figelo møøt ja Hermógenes paat.

¹⁶ Diosts ja kunuu'kxiyip ja Onesiforo møøt ja myigu'uktøjki ku øts ja kawinaaq ojk xniimiñ jøts ø xpudøki. Ka'ap ja tsø'ødyu'unin tjagyepy øy ø njatsumy'ity.

¹⁷ Ne'egi øts ja x'ixaay ja Roma ku øts ja ma xka'ijxy kunim øts ja xpaajty.

¹⁸ Wan ja Dios ja pya'ayo'ajtin tmø'øy ku ja tiidyu'unin xøøw tpaatt. Wa'atsxi me xnijawi sa ojts xpudøjka'am jam Efeso kajpjotp.

2

Sa Timoteo møk tmidanit ja ayo'on Jesucristo køjxp

¹ Mets u'nk Timoteo, jøtmøkpøk, yiktun ja møk'ajtin midi ja nwindson'ajtim Jesús yajkpy.

² Ja ixpøjkin midi m'ijxpy midi mnija'wip sam øts ja mayjaa'y nyik'ixpiky, ja'ats nayide'en mdanipøk pøn øy tsuj jaa'y'ajtp, midi øy tsuj yik'ixpøjky nayide'en.

³ Møk xmidanit ja ayo'on midi mbatpy ku ja nwindson'ajtim Jesucristo yja' xpaduujni. Møk nabyikta'agi jade'en sam pøn yikexy tseptumbi.

⁴ Ka'axi mibaat ja tseptumbi pyaat'aty; jøts nugo ajawi o ti ttatøkit. Tu'ugyi ja yja' tyikyø'ødyit sa ja wyindsøn ja y'ane'emyidi.

⁵ Nayide'en ja kuyajtpi, tu'ugyi ja yja' ja ttu'undit sa ja tø yik'ana'amdi, winets ja tpøktit ja ñiguyaty.

⁶ Nayide'ents ja kamdumbi nayja' paat'ajtiyip kø'øm tpøkjø'økt ja pyikta'aky.

⁷ Pawinmaaajyk øts yø n'ayuujk, nayi nwindson'ajtimts mbudøkiyip jøts xja'gyukit.

⁸ Ja'myats ja nwindson'ajtim Jesucristo sa ojts yjujkyikyip jap oo'kpi jutjøtpy midi ja rey David y'ap'ajtpy. Yø' øts ja yja' ngajpxwa'kxiyip sa ja øy'ajtin xukpaajtant.

⁹ Yø' kajpxwa'kxingøjxp øts øy nyikmi'ekyi, møkts øts yø nwindani, jade'ents ø nyik'ixy ejxim tu'uk ja møj tundigøøbya'an; øy øts njayiktsumy ka'ap ja Dios kyajpxy jaayi tyañ.

¹⁰ Ja'agøjxp øts yø ayo'on møk nwindani jøts ñitso'ok'attit pøn ja Dios tø wyi'ixxyi jøts tpaattit ja øy'ajtin midi xemikøjxp xmø'øyimp ja nwindson'ajtim Jesús.

¹¹ Janch tiy'ajtin yø':

Ku ja Cristo møøt nayide'en n'ø'jkyim, nayide'ents ja møøt njujky'ajtant;

¹² pøni ngu'ayo'ombaajta'am ja yja', xmø'øyimpts ja' ja y'ø'ajtin ma ttanitani ja yjaa'y.

Pøni ka' ja ngupijkyim, nayide'ents ja xkagupøjkin.

¹³ Pøni ngamøk'ajtingøjxp adøm ja njanchja'win kyamajadaajkyim, jade'eñim ja Dios tyikyø'øy ja yuy'ajtin jøts ja pudøjkin ja xmø'øyim,

ka'ap ja Dios mibaat ñay'ixmajtsiyit kø'øm, paty ja xkaja'dyigø'øyim.

Yikyø'øpy jade'en ja Timoteo sa tø yiktanipiky

¹⁴ Mets Timoteo, tukja'myats pøn jaty ja Dios yja' tjanchja'widip jøts kidi nugo kyajpxymbetti kyajpx'adøjti, kidi nugo tkajpxyøndi midi ka' tyuñ; ñanktyuu'tigøjyidip yø jade'en.

¹⁵ Amumjoojt nabyikta'agi sa ja Dios yja' xpaduujnit jøts øy tsuj yø mdunk pyidsø'ømt Dios wyingujkp. Ka' ti nugo xtsø'ødyunjawit ku ja tiy janch xkajpxwa'kxi ja Dios tyi'ajtin.

¹⁶ Kidi xpabiky yø'øbi ayuujk pøn jam nugo o sa kajpxtip. Pøn jade'en ttundip, ja kya'øjjaa'y'ajtin idø'øn ja yikmi'wenidip.

¹⁷ Pøn jade'en nugo kajpxtip, jade'ents ja kya'øy'ixpøjkin ja myøjidi myayidi jøts ja windigø'øyin nugo tyiknaxkida'akti. Jade'en y'adø'øtsti ja Himeneo jøts ja Fileto,

¹⁸ ku kø'øm tø ñanktyuu'tigøyidi jøts ja wyā'andi ku ka' y'uk'ejtnt ja jujkpyøjkin ku ja o'jkin nbaajtant yā naxwiñ. Jade'ents ja myigu'uk winaa'gin tø ttukmajtstu'utti ja yjanchja'win.

¹⁹ Ka'ap mibaat pøn tyiktigatst ja Dios wyinmaa'ñ, jabi yide'enxi jaabyety y'ity: "Wā'ats ja Dios Teety ja t'ixy tñijawi pøn padu'unxip ja yja'"; jøts nayide'en wyā'añ: "Wan tmajtstutnidi ja ka'øybi, pøn ja Cristo yja'ajtpy."

²⁰ Jade'en n'ukpiktaajkint ku jaa'y xnime'enint xnija'jtint njønjøtp ndøjkjøtp, jøts nduk-tajøø'kxa'ant ja' midi øy midi tsuj midi tsobatp; jøts ja' midi ka' chobaaty, ja'ats o pøn tyiktu'ump.

²¹ Nayide'ents idø'øn adømdi, ku øy tsuj nnay'eix'ejtntidit jøts nja' nayide'en chobaajtant Dios wyingujkp; jade'en'ampyts idø'øn ja xyiktu'unint jøts nmigu'uktøjk nbudøjka'ant.

²² Majtstu'tut yø unā'jk winmaa'ñ midi ka' tyuñ. Tu'ugyi xyikyø'øty ja tiy'ajtin jøts ja mjanchja'win, jøts xminamayait ja mmigu'uktøjk øy tsuj pøn tu'ugyi t'ajot'ajtp ja Dios.

²³ Nnimaapyts mets jøts ka' xpadøkit yø'øbi ayuujk midi katump. Mnija'wip ku jade'en ja tsep nugo yikpaaty.

²⁴ Pøn tpaduujnip ja Dios yja' ka'ap ja nugo ajawi o ti ttatøkit ma ja tsep, ma jaa'y o ti ttundi. Ja' ja tyu'ump øy'ajtin tuda'aky'ajtin øy pøn møøt. Ja y'ixpøjkin ja tyuk'exp tyuknija'wip sam ja tuda'aky'ajtin nayide'en tmøøt'att.

²⁵ Jade'ents ja øy tsuj tkajpxuda'akt pøn ja wenk winmaa'ñ tmøøt'ajttip midi ka' tyiyi, wan ja Dios pyudøkiyi jøts tyigatstt ja wyinmaa'ñ jøts tpadu'undit ja tyiiby yjanchnpi.

²⁶ Wan tmajtstu'utti ja miku' yja' ku ja nugo tø wyin'iiñidi jøts ja nugo tø tyuktuñi pøni sa ja ttsøky.

3

Sajaa'y wyinatyi ku ja tiidyu'unin xøøw tpaatwani

¹ Me Timoteo, nayide'en xnijawit ku wyingoni ja xøøw ja jumøjt jøts nwindson'ajtim mye'ent, janch tsep ja xøøw ja jumøjt ñaxt.

² Øy sa pøn y'adø'øtstt. Kyø'øm winmaa'ñ ja nugo yikmøjtøkiwya'andip, meeñ ja nugo may choktip, namyikaxi winmaa'ñ ja nugo yiktu'undip. Tpaattit tñaxtit ja Dios, ka'ap ja tyeety ja tyaak twindsø'øgidit, niti ja tkamø'ejxtit tkamøjawiðit jøts ni tkawindsø'øgidit ja Dios yja'.

³ Ka'ap ja ti tsojkin, ka'ap ja ti øy'ajtin tmøøt'attit. Pagajpxk ja' yø tyunk'attip, ka'ap ja maa'kxujkin tjagyaptit, tyunwandip o ti tunwa'andit, nugo øy pøn tmidsep'atwa'andi øy wyinaty pøn tuda'akyjaa'y'aty.

⁴ Kyøakp ja kyøøm migu'uk, adø'øtsp o sa y'adø'øtst. Kyøøm ja' y'ixā'ap, ka'ap ja Dios yja' ne'legi t'ixaa'yit.

⁵ Ejxingøjxp nadyijyi ja Dios yja' tpaduujnidit pø sa ja y'am yjotp, ka'ap ja tmøjpiktaa'jkit ja ñitso'ok'ajtin.

Me Timoteo, ka'ap yø jade'embi jaa'y xunk'att.

⁶ Adøstip o sa y'adø'øtsti, tøjk tøjkidip jøts ja tø'øxyøjk twin'øøndit pøn ñadyu'uk'ejxtip pøn y'amutsk'ejxtip. Nayide'ents ja tø'øxyøjk, jaa'y'ajtp ja' o sa yjaa'y'aty. Kyupiikpy ja nugo,

⁷ ixpøjkin ja jade'en tijy yikmøøpy, nisudso'ampyts ja jade'en tkaja'gyuki ja Dios tyiy'ajtin.

⁸ Nayide'en sam ja Moisés y'ijty kyayikpaduñ ja yja' sa ja yjawa'añ ku ja kyamibøjkøø ja ximaabyi Janes møøt ja Jambres, nayide'ents yø jade'embi jaa'y tkamibøjkmidi ja Dios yja'. Tum wenk ja wyinmaa'ñ yikyø'ødyi, ka'ap ja Dios jade'en kyupikyidi.

⁹ Ka' nugo ajawi myajada'aktit ja yja', kuwani yiknijawi ku ja myo'tpi winmaa'ñ nugo tyikmøjtøkiwya'andi. Nayide'ents yjajtmidøø ja namajtskpi midi twindsoow ja møjaa'y Moisés.

Midi ja Pablo yjaak'uktanipøkniip ja Timoteo

¹⁰ Mets Timoteo, øy tsuj mets ja n'ixpøjkin xyikyø'øyi. Nayide'en mjaa'y'aty sam ø njaa'y'atyin, tu'ugyi ja mwinmaa'ñ xyikyø'øy, ja øy'ajtin tuda'aky'ajtin jøts ja janchja'win. Nayide'en mjaty

¹¹ sam njajty sam ngubejtyin. Mnija'wip pøni sa njajty jam kajpjotp midi yiktejp Antioquia jøts nayide'en jam Iconio møøt ja Listra ku øts ja Dios yja' ngajpxwa'kxi. Jamts øts ja jaa'y jxemduñ xeduñ, jøts øts nwindson'ajtim nja'myejch xjats ø møj xpudøjkii'ñ.

¹² Janch ty'ajtin yø', yikjemdu'undip yiktedu'undip pøn ja Cristo yja' nadyamiyoxwajniyip;

¹³ jøts ja' pøn ja myigu'uk nugo twin'øø'ndip kø'øm ja ñanktyuu'tigøyidi, nisudso'ampy ja kya'øyidi ja yja'adi ku nugo jade'en ñawin'iñidi ja xem ja yam.

¹⁴ Mets Timoteo, tu'ugyi mets yø mja' jade'en xyikyø'øty sam tø x'ixpiky sa tø xnijawi. Mnija'wipxi pøn mduk'ejxi pøn mduk'ixpøjki,

¹⁵ ku yø mutskyi xnija'wiyii'ñ yø Dios kyajpxy, midi xyikujajtaajkimp, midi xyiknitso'ok'ajtim ku njanchja'wa'ant ja nwindson'ajtim Jesucristo.

¹⁶ Tu'ugyi ja Dios kyajpxy ja y'ayuujk jade'en y'ity, sa ja tø yikwinmaa'nmyø'øy pøn tø tjaadya. Nay yø' xuknija'wamp ja tyiiby ja yjanchpi. Ku ndundigø'øyint ngajpxigø'øyint nay yø'øts xuknija'wimp ku yø pyøkyi. Xmø'øyimpts yø' ja ixpøjkin sa ja øy'ajtin ja tuda'aky'ajtin njagyajpint,

¹⁷ jade'en'ampyts ja Dios yja' ka'pxy nnija'wa'ant jøts jade'en ndu'unint tum ja øybi tum ja tsujpi.

4

¹ Mets ixyam ndanipijkpy Dios Teety wyingujkp jøts nayide'en nwindson'ajtim Jesucristo wyingujkp midi nanky'ejxiyip ja møj windsøn'ajtin pøn tiidyu'ump ja jujkpyi jøts ja øøkpyi,

² jøts xkajpxwa'kxiyit ja yja'; tu'ugyi jade'en pojyi'iky xpadu'unt wan pøn mgupiky mgagupiky. Ana'am pøn tundigøøpy pøn kajpxigøøpy jøts xukja'gyukit. Jade'ents tuda'aky xuk'ext xuknijawit ja ixpøjkin.

³ Pyaatp ja xøøw ja jumøjt ku ja jaa'y tkawa'andit yø'øbi ixpøjkin; pyikta'aktip ja' kyø'øm yik'ixpøjkpidi pøni sa ja ttsoktit pøni sa ja tmadowa'andit.

⁴ Yø tyiiby yjanchpi ka'ap yø ttsoktit, ja' yø ne'legi choktip ja kwenti ja madya'aky midi kayikja'gyukip.

⁵ Me Timoteo, tu'ugyi møk xyik'ett yø mwinmaa'ñ, møk nabyikta'agi øy ja ayo'on yja'ity, nadyamiyoxi amumjoojt ja kajpxwa'kxin sa ja nitso'ok'ajtin nbaajtint, tu'ugyi jade'en xyikyø'øty yø mdunk.

⁶ Jøts øts, tøts øts jade'en nadyamiyøxyi ja Dios yja', jøts øts yjawi tsojk ja o'jkin nbaatt.

⁷ Møk ø tø nwindani ja Dios yja' jøts øts jade'en nyikjøpkøjxni ja ndunk ja nwinmaa'ñ. Tø øts ja njanchja'win jade'en nmi'ity.

⁸ Ja øy'ajtin øts xjøp'ejxp jøts øts ja nbaatt, ja'agøjxp ku øts ja Dios tø xkupiky. Jaanims øts ja nyikmo'ot ku ja tiidyu'unin ka'pxy xukpaajtint. Ni kidi øtsip ja nadyu'uk yikmo'op, niduki'iyi ja tpaattit pøn tjøp'ejx'ajttip jøts ja nwindson'ajtim mye'ent.

Ku ja Pablo ttukmadøy ja Timoteo sa tyu'unt

⁹ Tun wan ja may'ajt jøts tsojk mme'ent jøts ø x'ext;

¹⁰ pø tøxi øts ja Demas xmajtstu'uty, kyø'øm winmaa'ñ ja yiktunwampy, jøts tø ñijky jam Tesalónikit kajpjotp. Jam øts ja Cresente tø nguexy Galacit y'etjotp, jøts ja Tito tø ñijky jam Dalmacia y'etjotp.

¹¹ Ja Lucas øts ixym møøt njaak'ity. Ixa' jam ja Marcos jøts møøt mme'ent, jøts øts ja xpudøkit.

¹² Nayide'ents ja Tíquico tø nguexy jam Efeso kajpjotp.

¹³ Ku mme'ent, xyikmejnip øts ja nnixox midi jam nyiktaan Carpo tyøjkjotp jam Troas; xja'myajtsip øts ja nlibri jøts øts ja nnøky xjadyimykmejnit midi nyiktumpy.

¹⁴ Tø øts xmidundigøy møj ja Alejandro midi ka'tsp; Dios wyingujkpts ja tkubatt pøni ti tø ttuñ.

¹⁵ Øyim mnay'eix'etit møøt ja', jot'ambøjkp ja' ku ja Dios ja yja' yikajpxwa'kxi.

¹⁶ Ku øts myijawyeen nwinguwa'jkii'ñ ja windsøndøjk ja kudunktøjk, nipøn ø xk-abudøjkii'ñ; xmajtstutkøxnidi øts ja' niduki'iyi. Øts wamp jøts ja Dios ja kyadabayø'øydít.

¹⁷ Ja nwindson'ajtim øts xpudøjkii'ñ jøts øts ja møk'ajtin xmøøy, jøts øts nyikyø'øy ja kajpxwa'kxin sã ja nitso'ok'ajtin nbaajtint, jøts øts ndukmadøøy niduki'iyi pøn ka'israelit jaa'dyi. Jade'ents øts ojts ja nwindson'ajtim xuu'mø'øy ma jaty øts n'ayo'ombaaty.

¹⁸ Xyiknitso'ok'ajtip øts ja nayide'en ja n'anmija'win jøts øts ngapaatt ja ka'øybi jøts ø xpøkjø'økt jap tsajpjøtpy ma ja y'ity. iKunuu'kxy'ejtpim ja Dios xemikøjxp! Jade'en idø'øn ja y'eixi tyiyi.

Ku ja Pablo kyajpxpøø'kxy jøts ja kunuu'kxin t'ukyajkni

¹⁹ Kajpxpoo'kx jam ja Prisca møøt ja Aquila, jøts nayide'en ja Onesiforo ja myigu'uktøjk.

²⁰ Tø øts ja Erasto nyiktañ jam Corinto, tø ja Tróximo pya'ambety jam Mileto kajpjotp, paty øts jam tø nyiktañ.

²¹ Tsojk mme'ent ka'aním ja xuxpyoj tpaaty. Møj ja kajpxpoo'kxin mdaniguexyi ja Eubulo møøt ja Pudente. Nayide'ents ja kajpxpoo'kxin mdaniguexyi ja Lino, jøts ja Claudia, møøt niduki'iyi adøm nmigu'uk janchja'wibidi.

²² Møøt ja nwindson'ajtim Jesucristo m'ett, jøts niduki'iyi ja Dios mgunuu'kxidit. Jade'en idø'øn ja yjatt.

JA NØKY MIDI JA PABLO TYANĠAJX JA TITO

Yide'en yiknijayi ja Tito

¹ Pablo'ajtp øts, Dios Teety ø nmidumpy, jøts øts nwindson'ajtim Jesucristo ngudanaapy, ku øts ja xamigaxi jøts øts ja yja' ja ndukjanchja'wiyit pøn ja Dios Teety tø twi'ixy, jøts nayide'en tnijawidit ja tyiy'ajtin sa ja Dios øy tsuj yikpaduñ,

² jøts jade'en t'awejxtit ja jujky'ajtin midi xemikøjxp etp. Ya'atpi tsinaa'yin ja Dios kø'øm tø tni'adsowi namga'anim wyinaty ja naxwii'ñit cho'onda'aky. Niwindem xøøw ja Dios Teety kyawindaay'aty, midi tø ttanibiktaagi, pyadumpy ja'.

³ Ku ja xøøw ja jumøjt tø tpatni sam ja kø'øm tø ttanibiktaagi xjats ja kyajpxy tnanky'ejxit jøts øts idø'øn ngajpxwa'kxt midi øts ja Dios Teety yiknitsokpi tø xanipiky.

⁴ Ixyamts me Tito nnijayi. Ndyimy'u'nkja'wip mets, ja'agøjxp ku tu'ugyi janchja'win ndamujkyim, jade'en øts ja tsojkin nmøø'taty jøts xpaatt ja kunuu'kxy'ajtin ja pudøjkin jøts ja øy'ajtin midi ja Dios Teety yajkpy møøt ja nwindson'ajtim Jesucristo pøn adøm nyiknitsokpi'ajtyindip.

Ja tunkjøøjp midi ja Tito pyatwa'jkijii'ñ jam Creta

⁵ Ku mets jam nyiktaañ Creta, ja'agøjxp øts ja jade'en nduuñ jøts mets xyika'pxt xyik'abaadit ja tunkjøøjp midi øts jam wyinaty tø nyiktso'onda'aky. Jade'en ø nwa'añ ku mets tu'uk tu'uk xpikta'akt pøn tnmjøaa'y'atp ma jaty ñamyukyidi kajp kajp ja jaa'y pøn ja nwindson'ajtim tjanchja'widip.

⁶ Ja'abi møjaa'y'ajtpi mbikta'akp pøn øy tsuj tsinaapy, pøn niti windsø'yin, pøn tu'ugyi tmøøt'ajtp ja ñidø'øxy, jøts ja y'una'jk nay ja'abi janchja'win pyadundip, jøts øy tsuj ja chinaa'yin tyiknaxmidi. Myimadoodip ja tyeety, niti windsø'yin ja jade'en tkapaattit.

⁷ Pøn idø'øn jade'en tñigubajk'ajttip, pø ja Diosxi yja' ja y'ejx'ejtidip, paty idø'øn pyaat'aty kuwani øy ja chinaa'yin tyiknaxtit. Ka'ap idø'øn ja kyujuun'ajtin ja tyikmajada'aktit. Ka'ap winjaa windsøjk y'akidit; ni ja amu'uky'ajtin ni ja tsep'ixaaky ja tkatunk'attit, jøts ka'ap ja meeñ nugo tjaa'xmukwa'andit.

⁸ Jabi yide'enxi dø'øn ne'egi ja chinaa'yin tyiknaxtit, yikja'ada'aktip o pøn jaa'y jam tyøjkjotp øy tsuj, tum ja øy'ajtin ja myigu'uk ja tyamidsoktip, ja'gyukin idø'øn ja myøø'tattip jøts tum ja' tyu'undip midi øy paa't'ajtyip. Pyadungøxtip idø'øn ja', midi ja Dios y'øyja'wip jøts ka'ap ja kyø'øm ja' tyikmajada'aktit.

⁹ Ja'ayi dø'øn ja tu'ugyi tyimyjanchjawidip ja tyi'ajtin midi tønduk'ixpøkti, jøts jade'en ja myigu'uk ttakajpxjot'amøkidit ja'abi tiiby i xpøjkin, nayide'en ttukja'gyukidit pøn wyinaty t'agajpxukp ja'abi i xpøjkin.

¹⁰ Jabi mayxi ja jaa'y jaadi pøn tkamimadoodip ja Dios yja', sam winaagin ja israelit jaa'dyi pøn nugo jemgajpxtip tegajpxtip jøts ja myigu'uk twin'øøndi.

¹¹ Ja'abi jaa'dyi, amøñi pyaat'aty nyikta'anint, jøts ka'ap ja ka'øybi i xpøjkin ttuk-tawinmaa'ndyigø'dyit tu'ukpi jøøn tu'ukpi tøj, ja meeñts ja nugo y'ixaadyip ku ja y'ixpøjkin tyakti.

¹² Nay yø kø'øm yide'en ojts ja myigugajp ñimadya'agyidi pøn wa'ats najtsja'wigyøjxp ti jaty tunip jatip, ja' yide'en waan: "Yide'en ja Creta jaa'y yjujky'atti: o tyimdyaa'yidi, janch awa'andi, nuux'ajtin ja yikmajada'aktip jøts ja yji'kxy nugo ja tta'aawiwy'a'andi."

¹³ Janch idø'øn ja wyaañ; paty meets idø'øn møk xamigajpxtip ja chinaa'yin jøts jade'en tyikmøkidit ja yjanchja'win pøn ja nwindson'ajtim yja' tø tpadøjkiñdi.

¹⁴ Jøts ka'ap jade'en nugo tmibøktit ja madya'aky midi yik'ø'yidip yikpaajtidip ja israelit jaa'dyi, ni tkamøjpiktaajkidit ja y'ana'amindi pøn jagam jixkø'øm tyiktandip ja Dios tyiy'ajtin.

¹⁵ Pønts ja Dios yja' ja'ayi tpaduujnip, tyum'øy'ejxtip ja' midi ja Dios kø'øm tø tyik'øyi, jamts ja'amidi pøn wamidip ku ja yikpøkyety; paty ja jade'en ttejt ku ja pøky ja ja'ayi twinmaa'ñ'atti jøts tum yikpøkyajtpi t'ejxti; jabi agoostujpxyi ja wyinmaa'ñ ja y'etti jøts jade'en tka'ejxkapti midi øy uk midi'its ka'øy.

¹⁶ Jade'en idø'øn ja chaachwa'andi kuk idø'øn ja Dios ja t'ijxyidi, pø sudso dø'øn ja Dios ja t'ijxyidi; jabi wenkts ja chinaa'yin ja tyiknaxti, ja kyawindiy'ajtin ja yikmajadaktip, ka'ap ja madoogukin ja wine'enin tmøødidi, nisudso'ampy ja ødyu'unin ja tkayikwingaxø'økti.

2

Ja tiiby i xpøjkin

¹ Pøni midi mets Tito mnigajpxpy, ja tiiby i xpøjkin idø'øn ja møøt ñabyaadit.

² Tuknijawı ja møjaa'dyøjkti jøts ejxkujk yjaa'y'attit, tuda'aky yikxon ñabyikta'agidit, jøts ja'gyukidip idø'øn yiktu'undip idø'øn ja wyijy'ajtin; møk tyik'tettit ja Dios'ajot'ajtin møøt ja tsojkin, møøt ja pa'ayo'owin jøts møøt ja tuda'aky'ajtin.

³ Jøts ja møjaa'dyø'øxy nayide'eni yjaa'y'ajtmidit sam pyaat'aty; pøn ja Dios tpadundip. Ka'ap ja jigajpxk pagajpxk ja ttunk'attit, ni ja mu'ugyi ja ku'uxy; tkayikmajada'aktit. Øybi tsinaa'yin idø'øn ja ne'egi ñnanky'eixidip,

⁴ jøts jade'en ttuk'eixtit ttuknijawidit ja tø'øxyøjk pøn nam amajtskidipnim sa ja ñiyaa'y sa ja y'u'nk y'unaj'k ja møøt øy yikxon chøonidit tyanidit.

⁵ Myøøt'attip idø'øn ja ja'gyukin ja'adi. Tum ja wa'atspi tum ja øybi tsinaa'yin idø'øn ja pyadu'undip. Ja yjøøn ja tyøjk idø'øn ja' kyamijotkukidip, pøn jam tso'ondip ja'ttip myiduda'aky'attip idø'øn ja'. Pøni ti y'ane'empy ja ñiyaa'dyi, pyadu'undip idø'øn ja'. Jade'en idø'øn ya'at tpadungøxtit jøts ja Dios y'øgyajpxy ja y'ømyadya'aky kyayikjigajpxt kyayikpagajpxt.

⁶ Taguwanı mets Tito ku ja wajtyøjkti ja ja'gyukin tmøøt'attit,

⁷ jøts idø'øn ja kø'øm jawyeen mjøptunip pøni sa dø'øn ja øchinaa'yin tpadu'undit. Ku dø'øn ja wyinaty xkajpxwejwa'gñ, yikxon idø'øn ja xnigajpxt, niti nixi'iky niti taxi'iky xkajawit.

⁸ Tiy ka'pxy idø'øn ja ixpøjkin xnanky'eixit jøts ka' nipøn jade'en m'agajpxkuyiyit. Jøts kø'øm ttatsø'dyunt ja jaa'y pøn wyinaty nugo mjigajpxiyip mbagajpxiyip jabi ja'gyukidipxi ja kø'øm ku meets ja tiy'ajtin xnigajpxy.

⁹ Kajpxwej ja tumbitøjkti jøts tpadungøxtit ja wyindsøndi; yikxon idø'øn ja yjaa'y'attit jøts ka' twindsø'odit ja wyindsøn.

¹⁰ Ka'ap idø'øn ja tma'tsıt ja pyikta'aky pøn ja yiktuujnip. Yiknigaxø'økp idø'øn ja y'øyjaa'y'ajtin jøts o pøn jaa'y jade'en ttsujawit ja tsinaa'yin midı ja Dios yiknitsokpi yajkpy.

¹¹ Jabi tøxi ja Dios ja øy'ajtin tñanky'ijxy; midı tyiknitso'okwamp tuki'iyi ja ñaxwii'ñit jaa'y;

¹² ja'agøjxpts ja Dios ja y'øy'ajtin tñanky'ijxy jøts xuknija'wint jøts n'ixmajtsint midı ja Dios tkaminamyaajyip sam nayide'en midı n'am njotp xmimajada'akwa'andip, jøts ja tsinaa'yin ya nyiknajixit ja'gyuki køjxp, samdam nayide'en øy tiy ja Dios ttsøky'aty jøts ja tu'ugyi nwindsø'jkant nwinja'want.

¹³ Nayide'en idø'øn ja xuknija'wim sa dø'øn n'aweixint jotkujk ja øy'ajtin, midı ja Dios kø'øm tø tni'adsowi, ku ja mye'ent kyida'aktaju'ukjotp, ja Jesucristo yiknitsokpi pøn ndios'ajtyindip.

¹⁴ Nagyøyajkiyi ja', jøts adømgøjxp ja xku'o'jkindi jøts jade'en axøø'kpi yigaappi agujkpy nga'ejtindit, jøts jade'en nbaajtin tu'ugyi ja wa'ats'ajtin jøts ja'ayi nnadyamiyojxandit, jøts tum ja øybi n'amindip njotpindip.

¹⁵ Ya'at mets Tito idø'øn mnanky'ixpøkiyip, mgajpxjot'amøkip idø'øn, jøts nayide'en møk ja mgutujk xamigajpxt pøn tkamimadowandip ja'abi ixpøjkin. Kidi mets ja jaa'y kø'øm myik'amutskiniyi.

3

Sa dø'øn ja chinaa'yin tyiknaxtit pøn ja nwindsøn'ajtim tjanchja'widip

¹ Tukja'myatsti ku tkajpxkyupøktit ja windsøndøjkti samdam nayide'en ja kudunktøjk tmimado'odit, jøts tpadu'undit tuki'iyi ja ødyunk midı wyinaty tø yiktaguwanıdi.

² Nipøn idø'øn ja wenk tkanimadya'aktit, nika'idø'øn ja tsep ja t'ixa'adit. Ja øy'ajtin idø'øn ja ja'ayi yikmajada'aktip, ja tuda'aky'ajtin idø'øn nixem niyam ja myigu'uk tyamay'attip.

³ Jabi nayide'enxi adøm y'ijty ngakajpxkyupijkyim jøts ja Dios yja' ngamimadooja'am jøts jade'en nwidijtyim kube'ets kugoots. Tum ja axøø'kpi yigaappi y'ijty nyikmajadaajkyindip midı n'amindip njotpa'andip; jap adøm y'ijty ja nxøøw ja njumøjt nyiknajxyindi ma wyindsøn'aty ja ka'øy'ajtk møøt ja windi'iñ'ajtk, øy y'ijty pøngapøn møøt ndyimñami'ambijkyindi, sam adøm idø'øn kø'øm y'ijty ndyimyjotkidaajkyim.

⁴ Kuts adøm ja Dios ja yiknitsokpi tñanky'eixøø ja y'øy'ajtin, sa ttsøky'aty ja ñaxwii'ñit jaa'y;

⁵ jade'en adøm idø'øn ja xyiknitsøjkyim, kaja'agøjxpip ja ttuun ku adøm ja øchinaa'yin wyinaty tø nmøøt'ajtyim, jabi pa'ayo'oningøjpxxi dø'øn ja ojts xyiknitsøjkyim, xukyikniwaajchim ja nbøky jade'en jøts ja jemchinaa'yin ja Espiritu Santo xukpaajtyim.

⁶ Ja yiknitsokpi køjxp ja nwindsøn'ajtim Jesucristo køjxp ja Dios Teety tø xmø'øyim kawine'en ja Espiritu Santo jøts ja xpudøjka'am,

⁷ jøts ja Dios Teety y'øy'ajtingøjxp xkupøjkindit jøts nyikmø'øyindit ja jujky'ajtin midı xemikøjxp etp midı adøm n'aweix'ajtyindip.

⁸ Tyimdyiy idø'øn ya'at, paty øts idø'øn ndsøk'aty jøts mets winjaa windsojk xkajpxt ya'atpi ixpøjkin jøts jade'en pøn ja Dios tjanchja'widip tunkjøjp'attit tum ja y'øbyi tyiiby. Tyum'ødyunguixpy ya'atpi ixpøjkin, øy yø pøngapøn t'ødyuñ.

⁹ Kidi xyikmøjtøki nugo ja kugoots madya'aky midì niti kyawa'añ, jøts ka'ap ja apmadya'aky ja møjaa'y ayuujk nugo xunk'att, ni xkadatøkit pøn ja Moisés kyutujk nugo ttamadya'akpyattip. Nima ja tiy'ajtin ja' tkamøøt'atti.

¹⁰ Pøni jam pøn tnankñawya'kxwa'añidi ja Jesucristo yjanchja'wibitøjkti, tawindsø'øy tuk'ojkin uk majtsk'ojkin, kuts wyinaty mgamimadøyi, jagam ja x'ixwejtsnit;

¹¹ Jabi jade'enxi mets xnijawit ku ja'abi jaa'y tø ja chinaa'yin ja ka'øbyi myimajadajkniyi jøts kø'øm ja pyøky ja ñi'øøniyi.

Ku ja Pablo ttanipiky ja kyø'øm jotmay ja Tito

¹² Ku me wyinaty ndanigaxi ja Artemas uk ja Tíquico, tun ja may'ajtin jøts øts waani wyinaty x'ats'ixy jam Nicópolis, jabi jamxi øts tø ndanibiktæagi nyiknæxwa'añ ja et ja xøøw kunim ja møk xux ñæxt.

¹³ Tabudøki øy tigati ja nitanaabyi midì yiktejp Zenas jøts nayide'en ja Apolos, mo' ja pudøjkin jøts yjæakwidettit kunim ja tyunk tyik'abaadidit nugo ku ti kya'ijtxyidi.

¹⁴ Nøjmi ja nmigu'uktøjkti pøn jamdi mets møøt jøts mbudøkiyidit, jøts jade'en tnijawidit sa ja øchinaa'yin wyingaxø'økt ku tpuðøkidit ja myigu'uk pøn ti ka'ejtxip.

Ku ja Pablo kyajpxpøø'kxy jøts ja kunuu'kxin t'ukyajkni

¹⁵ Pøn jaty øts ixyam møøt, mdanigajxidip ja kajpxpoo'kxin ja'. Tukja'myats niduki'iyi ja nmigu'uktøjkti pøn jaty tu'ugyi ja janchja'win tmøøt'ajtmidip ku øøts ixyam ja kajpxpoo'kxin nguexy. Paat meets ja Dios kyunuu'kxin niduki'iyi. Jade'en idø'øn ja yjatt.

JA NØKY MIDI JA PABLO TYANĪGAJX JA FILEMÓN

Yide'en ja Pablo tñijayi ja Filemón

¹⁻² Øts idø'øn Pablo'ajtp. Øts yam tsumy ku nwindson'ajtim yja' nbaduujni. Ixyam mee nñijayi møøt yø Timoteo pøn jaty namyukidip jam mdøjkjotp, jøts nayide'en øø nja'myech ja ndsø' Apia jøts Arquipo midi nayide'en tump sam øts nduñ.

³ Paatti meets niduki'iyi ja Dios Teety jøts ja nwindson'ajtim Jesucristo kyunuu'kxin møøt ja y'øy'ajtin.

Sa ja Filemón tjagyepy ja tsojkin ja pa'ayo'owin møøt ja Dios'ajot'ajtin

⁴ Ku øts ja Dios n'ajot'aty nxumikajxajkpy øts ja Dios ku me nja'myech,

⁵ ja'agøjxp ku tø nñijawi ku mets nayide'en xtsojki ja nwindson'ajtim Jesús yja', jøts pøn jaty ja janchja'wiyip.

⁶ N'amidøøpy øts ja Dios jøts tjä'gyukyiyidit yikxon ja y'øy'ajtin midi nbaajtyindip ku njanchja'wa'andi ja nwindson'ajtim. Wa'nts tum jade'en ttundi, pøni sa tø xukmadøp pøn jaty tø tpabøkti.

⁷ Janch jotkujk øts ixyam ku nmadøy ku xpa'ayøy ja mmigu'uk jøts xkajpxjot'amøki, jøts jade'en xyikjotkujk'aty.

Ku Pablo t'amidøy ja may'ajtin jøts yikupøkt jadigojk ja Onésimo

⁸ Øy øts ja Cristo kyutujk nayide'en njamøøt'aty jøts me n'ana'amt pøni ti jaty mdu'ump, ka'ats mets ixyam n'ana'amwa'añ

⁹ ja'agøjxp øts ixyam migu'uk'ajtingøjxp tu'uk ja may'ajt n'amidoowa'añ. Møjaq'ñip øts ixyam jøts tsumyim n'ity nwindson'ajtimøjxp,

¹⁰ paty mets n'amidøy ja may'ajtin jøts xkupøkt jadigojk ja Onésimo midi øts yam tø ndukja'gyuki ja Dios yja'.

¹¹ Ku ojts jawyeen nmøøtsinaay yø Onésimo, ka'ap øy y'ijty ti t'øduyñ. N'ajot'ajtna'amp ixyam

¹² paty ndaniguexy jadigojk jøts xkupøkt, çkidits øts jeexyip xkupiky?

¹³ Jade'en ø njatsøky'aty jøts ja yam jeexyip tyañ, jøts øts ja jeexyip xpudøki sam mets jeexyip kø'øm xpudøki.

¹⁴ Ixyamts mets ja ndaniguexy ja'agøjxp ku ka'ap mibaat ja mgutujk nñinajxit, jabi yide'enxi njawa'añ pøni xunwajnip meets ja may'ajtin, ka'ap ja xu'unt ana'amingøjxp, mgø'ømsojkingøjxp idø'øn ja xu'unt.

¹⁵ Pø ja'agøjxp idø'øn ja ojts chøøñ jøts ja mniwimbetiyyit jadigojk xemikøjxp,

¹⁶ jits ka'ap jade'en x'ukyiktunit ejxim jiyujkin, jade'en xjawit ejxim n'uchin ejxim nmigu'ukin. Njanchpa'ayøøpy øts yø', jawaani møk mets yø xpa'ayo'ot, ka' nugo jaq'ay x'ext, jade'en x'ext sam adømin, tøxi tpabiky ja nwindson'ajtim yja'.

¹⁷ Paty ø nwa'añ, pøni xmigu'ukja'wip øts, kupøk ejxim øts jeexyip xkupiky.

¹⁸ Pøni tø mmidundigøyi, uk japts mmijoyiyi, øts ja ngubajtkøjxp.

¹⁹ Kø'øm øts ixyam nwa'añ jøts ngubajtkøxt ja yoj, paty ø kø'øm ndyimyja'ay; ka' yjawi njadukja'myajtswa'añ ku me tø mñañito'jkniyi. Kidim xjanchja'wiñi, taxi'iky yø'.

²⁰ Sam ø nwa'añ, tun waani ja may'ajt jøts ø xyikjotkujk'att ja'agøjxp ku tu'ugyi njanchja'windi ja nwindson'ajtim.

²¹ Nnaajtsja'wip øts ku xpadungøxt sa jaty øts ixyam nwa'añ.

²² Jøts nayide'en x'awejxtip øts; jotmøñ mee nñinijky sa jam ja Dios x'amidowdi.

Ku ja Pablo t'ukyajkni ja kajpxpoo'kxin jøts ja kunuu'kxin

²³ Nayide'en mdaniguexyidi ja kajpxpoo'kxin ja Epafra, pøn øts ixyam møøt ndsumchøøni nwindson'ajtimøjxp.

²⁴ Nayi kyajxtip ja kajpxpoo'kxin ja Marcos, møøt ja Aristarco, møøt ja Demas jøts ja Lucas, midi øts xpudøjkidip.

²⁵ Mbaajtidip ja nwindson'ajtim Jesucristo kyunuu'kxin ja y'øy'ajtin. Jade'en idø'øn ja yjatt.

JA NØKY MIDI YIKTANIJA'AYIDØØ JA HEBREOS JAA'DYI

Dios U'nk køjx adøm ja Dios Teety xmiğajpxyim

¹ Janch tigach idø'øn ja Dios Teety y'ijty ñanky'ijxyiyi, ku dø'øn ja kyugajpxy tuknijawiwya'añ pøni ti jaty idø'øn ja tyukmadowampy ja møjaa'dyøjkti.

² Ixyamnim idø'øn ja kyø'øm U'nk kugajpxy tøkexy. Y'U'nk køjx idø'øn ja Dios Teety ojts tuki'iyi tyik'øyi ja naajx jøts ja tsajp, jøts nay ja y'U'nk tø ttagiðøjkiguixy køx kidä'ak midi ja wyinaty tø tyik'øyi.

³ Ja Dios U'nk idø'øn tnanky'ejxip ja Dios Teety ja myøj'ajtin, jøts nayi ja' ja tnanky'ejxip sa dø'øn ja Dios Teety t'ixy; nay ja'ats ja myøkwinmaa'ñ ja myøk'ayuujk tpatanaagyøjxpu tuktsajp'agida'aky ja pikta'aky midi ja Dios Teety tø tyikøjy. Ja Dios Teety ja møøt yikutuky y'aga'ngyøj'øm jam tsajpjotp, ku adøm ja ya jawyeen tø x'ukyikpojkrpwaajchim.

Jawaani møj ja Dios U'nk, ka'ap ja ankilis jade'endi

⁴ Tø ja Dios U'nk jawaani møj wyimbidsimy jøts ja Dios Teety y'ankilis ne'egi ka', ja'agøjxpu ku ja Dios U'nk tø tmidañ jawaani møj ja kutujk.

⁵ Jabi nijuunixi ja Dios Teety tkanimaay tu'uk ja y'ankilis yide'en:

Mets idø'øn n'U'nk'ajtpy;

øts mets ja jujky'ajtin ti nmø'øy,

ni ja Dios Teety tkanimaamyi tu'uk ja y'ankilis:

Øts me n'u'nk'atp,

jøts øts me xeety'atp.

⁶ Yide'ents tø wyami ku ja myøjtu'umts U'nk tø xaniguejxyim ya naaxwiiñ:

Wan niduki'iyi øts ja n'ankilis mwindsø'øgiyi.

⁷ Ku ja y'ankilis tñimadyajkmi, yide'en ja Dios Teety wy'a'añ:

Øy øts ja n'ankilis o sa nñanky'ejxyit,

nayide'en sam ja pojnin, uk sam ja jøøn yowin.

⁸ Kuts ja y'U'nk tñimadya'aky yide'ents ja tñimaamyi:

Xemikøjxpu me Dios U'nk mgutujk y'ity;

tiy mets mgutujk ja mðiidyu'unin y'ity.

⁹ Mdsøky'ajtpy mets ja tyiiby: jøts ka' x'ejxwa'añ ja ka'øbyi;

paty ja mDios Teety jawaani øy ja jotkujk'ajtin tø mmø'øyi,

jøts ni ka'ap jade'en o pøn tø yiktuñ.

¹⁰ jøts nayide'en wyami:

Mets Dios U'nk, tø xanibiktaajkguixy tuki'iyi ku yø naaxwii'ñit tø xyikøjy,

jøts mgø'jotp ja tsajp tø pyidsimy.

¹¹ Køxtip naxtip yø', jøts mets xemikøjxpu me mdañ.

Nayide'en yø yjattit sam wet pyachi;

¹² jøts mets ja xpøk'økt ane'eky ade'kxy, jøts jadigojk xyikjemyit xyik'øyt.

Mets idø'øn xemikøjxpu jade'eñim m'ejtp, nijuuni xøøw mets mdsinaa'yin kyakixy.

¹³ Jøts nijuuni ja Dios Teety tu'uk ja y'ankilis tkanimaay:

Ya yikutuk n'aga'ngyøji'jy,

kunimts mets mmidsep nduktekpya'an'att.

¹⁴ Dios Teety idø'øn myidundip niduki'iyi ja ankilis, nayi Dios Teetyts kajxidip jøts tpuðøkidit pøn jaty ja nitso'ok'ajtin tkupøkwandip.

2

Ka'ap ja nitso'ok'ajtin ngamøjpiktaajkin

¹ Ja'agøjxpu idø'øn nyikmøja'am nyikøjxpa'am pøni sa tø nmadø'øyim jøts kidi ja nwinmaa'ñ nyiktigajchim, tu'ugyi ja nyikyø'øyim.

² Tø dø'øn ja ayuujk yjanchwindi midi ja ankilis ja israelit jaa'y tyukmadowdi, pøn jatyts ja tkabadundøø, yiktiidyundi ja', jøts ja ayo'on yikmøødyøø sam idø'øn pyaat'atyiyi.

³ Pøni jade'endam ja yjattøø, ¿sudsots adøm idø'øn ndejnt nga'ayo'ombaajtindit pøni ka'ap adøm ja møj nitso'ok'ajtin nmøjpiktaajkyim? Jabi jawyeenxi ja nwindson'ajtim kø'øm tø tñigajpxy, pønts ja tpatmadoojidoø, tøts ja ayuujk ja jawyeen tiibyøkti jøts ja tø tsoønidi, jitsnim øøts ja tø xukmadøy.

⁴ Tøts ja Dios Teety nayide'en kø'øm tyaky ja ejxpajt ku dø'øn ja y'ayuujk ja wyindiy, ku ijxyimbi ka'ijxyimbi tyiknaaxkida'aky, nayide'en ja Dios Espiritu Santo tø xmø'øyim ja møk'ajtin sam ja kija' tø xamidøjkyim.

Nayide'en ja Jesucristo yjaa'yjajty sam ja myigu'uk naxwii'ñit jaa'y

⁵ Ja tsinaa'yin ja jukky'ajtin midimemp ja'tp Cristo kòjxp, midimòtsixyam nmigajpxy, ka'ap ja ankilistòjk ja mibaat tniwindsòn'attit.

⁶ Jabi yide'enxi ja David ja Dios Teety t'ajot'aty jòts ja tòtjaadya'n:

ζTyimbyòn idò'òn yò jaa'y'ajtp ku yò niwine'en xkaja'dyigoy?

ζTi tyimbyòn idò'òn yò naxwii'ñit jaa'y midimoo'kp tigoo'py ku yò xmi jotigoy?

⁷ Tò yò waani x'atsyik'amutski jòts tò x'atmòjpiqtà'aky ja m'ankilis,

ixyamts ne'egi jawaani mòj tò xmò'oy ja mòj'ajtin jòts ja øy'ajtin,

⁸ jòts tuktsajp'agida'aky tyikutujkòxt.

Ku dò'òn ja Dios tuki'iyi tò ttagidòjkiguixy ja jaa'y, niti dò'òn ja tòtkayiktañ midim ja jaa'y kya'ana'amp. Ots ja yjade'eni, ka'anims adòm n'ijxyim ku tuki'iyi myimadooguixyi.

⁹ N'ijxyindipts adòm ja Jesús pòn ja Dios Teety waani tò t'atsyik'amutski, ni ja ankilis tò tka'atmibaat'aty. Tòtsixyam tmòogyojmi ja mòj'ajtin jòts ja windsò'jkin jawaani mòj, ja'agòjxp ku ja o'jkin ja tòtkupiky, ku ja Dios Teety ja jade'en tòtyamidsòkyiyi jòts adòm ja xku'o'jka'ant.

¹⁰ Dios Teety kòjxp tuki'iyi y'ijty, jòts tum ja idò'òn paat'ajtiyip; ja'ats ja Dios Teety chòjkpy jòts nayide'en ja y'u'nk ja myaaytpaattit ja øy'ajtin. Paty idò'òn ja Dios Teety tòttamidsòky ja nwindson'ajtim Jesucristo jòts ja y'ayo'owin jòts ja y'o'jkin jade'en ttuktabajà'ñaxy, sà dò'òn ja naxwii'ñit jaa'y y'eixidi tyiyidi, jits jade'en jawaani øy xukja'gyukant sudso ja nitsojkin nbaajtint.

¹¹ Jabi nay ja'axi ja tyeety'ajttip pòn jaty tòpyojkpiwa'atsti, jòts nay ja'ats ja tyeety'ajtmip pòn yikpojkpiwatsp. Paty ja Dios U'nk tkadatsò'odyuñ ku adòm ja xmiga'axa'am,

¹² sam jap wya'añ nòkyjòtpy:

Mets Dios Teety idò'òn nmimadya'akp ku øts ja nmiga'ax nmigajpxt,

jòts tu'ugyi øø wyinaty n'iy mets kòjxp.

¹³ Jòts nayide'en jap jaabyety wyami:

N'aweix'etp øts ja Dios Teety.

Jòts abiky ñmgojmi:

ixyam ø mòøt n'u'nk n'una'jk, midimòts ja Dios Teety tòxmò'oy.

¹⁴ Jade'en sam ja naxwii'ñit jaa'y ja jukky'ajtin tmòøt'ajttò, ja'agòjxp idò'òn ja nwindson'ajtim Jesucristo yjaa'yjajty jòts jade'en ja o'jkin tkupòkt, jòts jade'en tmimajada'aky ja miku' midim ja o'jkin tniwindsòn'ajtp.

¹⁵ Jade'en ja nitso'ok'ajtin xuktajotkujk'ajttint jòts jade'eñi dò'òn ja o'jkin nga'uktso'jkiñant.

¹⁶ Wa'ats yikja'gyuki ku ja nwindson'ajtim ja' tkanimiñ jòts ja ankilis tpudòkit, jabi tum naxwii'ñit jaa'lyxi ja ja'ayi ñimimpy, pòn teety'amòjkojk'ajttip ja Abraham.

¹⁷ Ja'agòjxpts ja nayide'en yjaa'yjajty sam ja myigu'uk naxwii'ñit jaa'y, jòts jade'en t'ayo'ext sam nayide'en ja Dios Teety tpadun'ett, ku ja kyò'òm o'jkin ja ttayikpojkpiwa'ach ja naxwii'ñit jaa'y. Ja'agòjxp idò'òn ja amuum ndeety'ajtyindi.

¹⁸ Tò dò'òn ja jawyeen ttanaxy ja ayo'on, ja winmaa'ñ, jòts nayide'en yikxon tòyikwinmaa'ñ'ixy, paty idò'òn myayi ja pudòjkin pòn jaty nayide'en ya jajtip kubajtip.

3

Jawaani mòj ja Jesús, ka'ap ja Moisés

¹ Kunuu'kxy mee migu'uktòjkti, meetspi dò'òn mbaat'ajtiyip jòts yikxon x'ejxtit ja Cristo Jesús, pòn tònyiktaniguexyindi jòts pòn ndeety'ajtyindip, ja'agòjxp ku meets idò'òn ja Dios Teety tòmwi'ijxyidi jòts ja mja'atyiidit.

² Ejtp ja Jesús tyi ja Dios Teety tmimadòy pòni ti ja tòtyaguwaniyi, sam ja Moisés nayide'en tu'ugyi tmiduun ja Dios Teety mja ja janchja'wibi jamdi.

³ Jawaani mòjts ja Jesús ja wyindsò'jkin pyaadyi jòts nika' jade'en ja Moisés, nayide'en idò'òn ja tpaaty, sà jawaani mòj yikwindsò'ogi ja tòjkojpi jòts nika'ap ja tòjk jade'en.

⁴ Ots idò'òn ja jaa'y may yjadòjkojti, tum ja Dios Teety tuki'iyi tòttanibiktaagi wine'en ijty tuktsajp'agida'aky.

⁵ Janch øy idò'òn ja Moisés yjatuuñ, ku ja janchja'wibitòjk ttukmadòoy ja Dios kyajpxy y'ayuujk, pòni ti dò'òn ja wyinaty tyunwampy ja Dios.

⁶ Tu'ugyits adim ja Cristo xpawinmaa'yim wine'en adòm njanchja'wa'am, ja'agòjxp ku ja tkòjò'omit'ajtkixy, pò Diosxi ja' ja y'u'nk. Ja' tsojkip jòts mòk ja winmaa'ñ nbiktaajkint, jits jotkujk n'aweixint ja øy'ajtin midimemp midim ja'tp.

Ja janchja'wibi pyoo'kxinxòwidi Dios wyingujk

⁷ Paty yide'en ja Dios Espiritu Santo wya'añ, sam jap jaabyety y'ity nòkyijpxy: Pòni mmadòopy meets ja Dios Teety kyajpxyixyam,

⁸ kidi jade'en mgujuun'atti sam ja jaa'y ttundi jam abak etjotp, ku tkagupøjkti ja Dios, jøts ja yujy'ajtin nugo ttaguyajtidi.

⁹ Jam øts idø'on ja m'apteety m'aptaak xwinmaa'nmyøk'ejxti, øyi ja tjaj'ejxti tjanija'widi ja ijxyimbi ka'ijxyimbi wixijxxy jumøjt midi jaty øts jam njatun-gunajxpy.

¹⁰ Paty øts idø'on n'atsmi'ambøjkti, winets ø nwaafñ: "Ejtp mee mjadigøym m'anmija'wingøjxp, jøts ka' xtsojkti jøts øts ja nduu' xpaduujnidit."

¹¹ Ja' øts idø'on ja ndami'ambøjkti, jøts ø nwaadaajky ku kyatøkidit ma øts ja n'uktamidsojkti. ¹² Migu'uktøjkti, nay'ejx'etidim tu'uk jadu'uk, jøts xkamajstuttit ja Dios ja yikjujky'ajtpi, jøts ja' ejtp xjanchjawidit.

¹³ Nay jaakjamnim ja xøøw ja jumøjt, nagyajpxjot'amøjkyyidi xem yam jabom jabom, jøts ja pøky mgawin'øønidit, jøts ja Dios ejtp xmimado'odit.

¹⁴ Pøni tu'ugyi nyikyø'øyim ja janchja'win pøni sa ja tø nyiktso'ondaajkyim, kuwani ja Cristo møøt nbaajtin ja øy'ajtin.

¹⁵ Paty xja'myatstit ku ja ayuujk wya'afñ: Pøni mmadøøpy meets ja Dios Teety kyajpxy icyam, ka'ap nayide'en mgujuun'attit sam ja ttundøø pøn ja Dios Teety tkamimadoodøø.

¹⁶ ¿Pønts idø'on ja Dios kyajpxy tjamadoodøø jøts ja tka'ukpadunidøø? Ja' dø'on jade'en adøstti pøn ja Moisés yik'awa'atspidsøøm jam Egipto etjotp.

¹⁷ ¿Pønts idø'on ja Dios myijotma'jt wixijxxy jumøjt? Ja'ats idø'on jade'en jajttøø pøn jaty pøkyundi, jøts ja jamyi abak etjotp y'oo'ktøø.

¹⁸ ¿Pønts idø'on ja Dios tyamiwandaajki ku ja kyatøkidit ma dø'on ja Dios wyinaty tø y'uktamidsøkyidi? Ja' dø'on ja'adi pøn tkamimadowdi ja Dios.

¹⁹ Ixyats adøm n'ijxyim, ja'agøjxp ja øy'ajtin ja tkapaattøø ku ja Dios ja tkamibøjktøø.

4

¹ Ka'anim ja tpaaty jøts adøm ja Dios Teety nmøøtnøjkxna'ant poo'kxpi, paty idø'on tsø'øgi jawa' ndsinaa'yinditnim ja ku wyinaty pøn nidu'ugin kyanaxy.

² Nayide'en adøm tø nyiktukmadø'øyim ja nitsoojkin ayuujk, sam ja møjaa'dyøjk yjayik-tukmadowdi; ka'apts ja ti øy'ajtin tpaatti ja kuxi ja tkamibøjktøø øy ja tjamadoodøø.

³ Adømts idø'on ja Dios Teety møøt nbaajtint ja poo'kxin ku adøm ja tø nmibijkyim, jabi yide'enxi ja Dios kø'øm tø wya'afñ:

Ja'agøjxp øts idø'on ja nmi'ambøjkti ku øts ja xkamibøjktøø, jøts øts ndyimñimy ku nijuuni xøøw xkamøøtpoo'kxtit.

Jade'en idø'on ja Dios wya'afñ, øy ja wyinaty ja tyunk tøjayik'abajtyini ku ja wyinaty tuki'iyi tøj tyikojixy, jøts t'agajpxujky jøts ja tpaattit ja poo'kxin pøn mimadoojp;

⁴ pø japxi nayide'en jaabyety y'ityi ti dø'on ja Dios Teety tyuun kyiwixujk xøøw: Poo'kx ja Dios kyiwixujk xøøw ku ja tyunk tyik'abajtyi'iñ.

⁵ Jøts nayide'en jap jaabyetyim:

Ka'ap øts ja xmøøtpoo'kxtit pøn xkamibøjktip.

⁶ Ka'anim ja jaa'y ñiga'pxidi jøts tpaattit ja poo'kxaajk, øy ja tø tjamadowdi ja nitsoojkin ayuujk, ka'ap ja poo'kxaajk ja tø tpaatti ku ja tø kyamadowdi;

⁷ paty ja Dios Teety jadu'uk ja xøøw ja et tøjnagjpxy midi adøm icyam n'ijxyindip ndsinaa'yindip, jabi Davidxi dø'on ja Dios kyajpxy yiktumpy ku ja wya'afñ sa jap jaabyety y'ityi nøkyijxpy;

Pøni mmadøøpy meets ja Dios kyajpxy ja y'ayuujk, kidi xkamibøjkti.

⁸ Ku ja Josué jeexyip ja israelit jaa'y ja poo'kxin ti tmøøñi, ka'ap ja Dios Teety jeexyip jadu'uk ja xøøw ja et tøjnagjpxy ma ja poo'kxin yikyakt.

⁹ Patyts idø'on y'aweix'ityiyi ja kunuu'kxy poo'kxin, niduki'iyi pøn ja Dios tjanchja'widip.

¹⁰ Pøn ja Dios Teety møøt pyøø'kxy, nayi tøj ja wyinaty ya naxwiin tyikixy ja y'ødyu'unin. Jotkujk idø'on ja pyøø'kxnit sam ja Dios pyøø'kxy ku tyik'abajtyi'iñ ja tyunk tuktsajp'agida'aky.

¹¹ Kuwanits nmijotigø'oyindit jøts ja'abi poo'kxin nijum nbaajtindit, jøts nipøn tkabadu'unt ja jaa'y pøn tkamibøjkti ja Dios.

¹² Jabi xemikøjpxi ja Dios Teety y'ayuujk y'ityi, jøts jawaani wenk yiktsaachi myøk'ajtingøjxp, niti tsujx adsow jøpi jade'en kyayiktsaachi, ja kuxi tyimya'aty anmija'winjotp jøts jade'en tñanky'ijxyiyi pøni ti yiktunwamp uk yikwinmaa'ñ'ajtp.

¹³ Niti dø'on ja Dios tkayu'uchjaw, tyumnija'wigyijxpy ja' tuki'iyi jøts ja' idø'on wyinaty nwinguwa'jka'amp jøts ndsinaa'yin ndagidøjkant.

Ja Jesucristo idø'øn tu'uk møjteetywindsøn

¹⁴ Ja Jesús midí dø'øn Dios U'nk'ajtip, ja' adøm idø'øn njawanimøjteety'ajtyindip, ja'ats idø'øn ja Dios Teety tø twinguwä'agi, paty adøm idø'øn ja nDiosja'myajtsin møk nyik'ejtint.

¹⁵ Xja'gyuka'amp adøm ja Jesús midí dø'øn møjteety'ajtp, ja'agøjxp ku ja tnijawi sa adøm ndsinää'yim ya. Pø tøxi ja nayide'en ja ka'øwynmaa'n jyayikmø'øy jøts ja tøkagupiky, jøts jade'en ja pøky tøkatañ.

¹⁶ Tja'myejchims ja Dios, jøts wan tninijkxyim jotkujk jøts n'amido'owint pya'ayo'owingøjxp ja pudøjkin ma ngamajadaajkyim.

5

¹ Wi'ijxy idø'øn jam israël kajpkøjxp, tu'uk jadu'uk ja teety, jøts tø yikpikta'aky jaa'gyudanaabyi, jøts ja jiyujk'øøky ja Dios ttawindsø'øgidit ttawinjawidit jøts idø'øn ja jaa'y pyøky ñiwa'adsiyit jøts ja Dios tmaa'kxt.

² Kumi nayide'en yø teetyti pyojkpitumbijaa'yidi, paty yø tja'gyukidi pøn jaty tsuj kadsinaadyip jøts pøn jaty tundigøødyip;

³ ja'agøjxpts idø'øn ja wyindsø'jkin tpikta'akti ku ja nayide'en pyojkpitumbijaa'y'ajtti, jøts ku ja jaa'y tkudanidi.

⁴ Nipøn ja kø'øm kyanankteetyepidsimyi; ja Dios Teety idø'øn ja møøjyip, jøts nay ja idø'øn tkunuu'kxp tkuwamp sam yiktuñ ja Aarón pøn myidu'ukpi møjteety'ajti ja israëlit jaa'y.

⁵ Nayide'en yjajty ja Cristo; ka'ap ja kø'øm ñankmyøjteetyepidsøjmi, ja Dios Teety ja møøjyi ku dø'øn ja ñimaajyi:

Mets idø'øn n'U'nk'ajtpy;

øts mets ja juky'ajtin ya tø nmø'øy.

⁶ Jøts ku nayide'en ja Dios Teety wyaamaa:

Mets idø'øn xemikøjxp møjteety'atp,

jøts jade'en mdu'unt sam ja Melquisedec tuñ.

⁷ Møk ja Cristo ja Dios Teety twingajpxajky tminuu'kxajky ku ja chinaay naxwiiñ, jøts twinjiiy twinyaajxy ja Dios Teety, midí tmøø'tajtp ja kutujk jøts ja o'jkin tkapaatt tka'ext, jøts ja Dios Teety myadooji ku ja tu'ugyi yikxon t'ajot'aty.

⁸ Kuwani dø'øn ja Cristo ja ayo'on tkupøki sam adøm, øy ja yjaDios U'ngi, kuwani ja tø tnanky'ijxyi ja mado'owin;

⁹ kuts ja jade'en tja'gyukiyiñ ja naxwii'ñit ayo'on, jade'ents tmibaat'ajty sudso ja yiknitsoojkin ka'pxy tmo'ot pøn jaty ja mimadojiiyip,

¹⁰ ja'agøjxp ku møjteetywindsøn ja Dios Teety wyinaty tø pyiktaajkniyi sam ja Melquisedec y'ijty teety'aty.

Yik'ejxtip ja janchja'win ku ja jotmøñ yikmajstutnit

¹¹ Kajaanim ja kyayiknigajpxy ya'atpi ayuujk ja'agøjxp ku meets yjawi xkaja'gyukiwya'añ, jade'en'ampyts inet idø'øn ja yjawi ngajatt sudso ndukmado'odit.

¹² Meetspik idø'øn jeexyip mdukyikyuujnidi ja mmigu'uktøjkti, kawinaak xøøw ja m'ixpøjkin xjayikyø'øñidi jøts ni jade'enbaat xkaja'gyukidinim ja ixpøjkin midí ka' mabaat chepi. Ne'egi jade'en meets yjawi mwimbejtni sam ja mutsku'nk ja'ayi ja che'tsknøø tkupiky, jøts ka'ap ja kaaky ja tojx ja ttsøky.

¹³ Maxu'ngin idø'øn ndejint wyinmay pøn tkaja'gyukipnim sudso n'øchinaa'yint, kuts ja nduk'ixpøkwa'anin midí niwyaani tsep ka'ap ja tkupiky, nayide'en idø'øn ja sam ja maxu'nk ja'ayi tkupiky ja che'tsknøø jøts ka'ap ja wenkpi jii'kxy.

¹⁴ Pønts tjaajtnip t'ixa'at ja øybi uk ja kya'øybi, ja'ats ja Dios y'ixpøjkin tnijawiwyangøjxp øy ja wine'en yjatsepi jøts yikja'gyukit.

6

¹ Jade'en nyiktaa'nint pøni ti jaty jawyeen tø nyiktukmadø'øyim, ku ja Cristo tø njanchja'wa'am, jøts ja Dios yja' njaaknija'wigyøjnt jøts ja ja'gyukin nmøø'tajtint. Ka'ap ja nugo ngajpxjimbejnt ngajpx'adøjnt sudso nmajstuujtint ja ka'øy chinaa'yin, midí ja o'jkin tukpatp, jøts sudso ja Dios njanchja'windit,

² jøts pøni ti dø'øn nøbajtin'ajtp, pøni sudso jaa'y tkunuu'kxy ja myigu'uk, jøts sudso ja jaa'y yjuykpyøktit jadigøjk, jøts sudso ja tiidyu'unin y'ett.

³ Paty adøm nja'uknijawigyojnt pøni ti jaty yiktukmado'owimp, pøni jade'en ja Dios xamidsøjkyim.

⁴ Ku pøn jaa'y tuk'ojkyi tø ttajotkujktøki ja Dios y'ixpøjkin, ku ja Espiritu Santo tø yikwijyidi yikejyidi

⁵ jøts ja Dios kyajpxy nekim tø t'ukupøkti, jøts nayide'en tø tyatøkiyidi ja Dios chojkin ja myø'k'ajtin midí ixyam jøts midí xemikøjxp ejtp.

⁶ Pøni tø ja tja'dyigøydi ja Dios jøts ja kyø'øm ka'øchinaa'yin ja tø t'awimbetidi jadigojk, nisudso ja kya'ukjotimbjetmidit ku ja Dios U'nk ja kyiruspajtin jade'en nugo ttaguayajitidi, jits ja nugo o magama ttaxe'ekti.

⁷ Jade'ents ja yjatti sam ja naajx ku tyu'uy, y'uktichp nøø, kuts ja pikta'aky jam yikxon y'ity jøts ja tyikjotkujk'aty pøn jaty tø ñe'epti. Dios idø'øn ja kunuu'kxip ja naajx.

⁸ Kuts ja pikta'aky ja tkayik'ity, ku nugo ujts jøts kujp tyik'ity, tits ja wya'ant, ka'ap ja y'øyi. Mi'ambøkipts ja Dios ja' jøtsnim ja yiknitsa'att.

Jade'en idø'øn ndejint ja naqxwii'ñit jaq'dyi.

Ja awejx'ajtin midi jotkujk xyik'ejtimp

⁹ Ots ø migu'uktøjk jade'en njakajpxy, njanchja'wipts øts, ku meets ja Dios tø mgunuu'kxyiyi, ku tø myikmo'odi ja nitso'ok'ajtin.

¹⁰ Pø janch tyixi ja Dios jits ka'ap ja mdajaa'dyigøyidit pøni ti jaty meets ja tø xuujni, jøts ku ja tø xuk'ejxti wine'enin ja tsojokti, ku ja mmigu'uk midi nayide'en tjanchja'widip ja Jesús tø xpudøkidi, midi meets ixyam mjaaktun'adichpñim.

¹¹ Ja'ats øø ndsøjkpy, jøts meets jade'en mdsinaa'yin xyikyø'ødyit jotkujk jøts tsuj, kunim ja øy'ajtin xpaattit midi m'awejxtip.

¹² Ka'ap øø ndsøky jøts mee mnuux'oock, ja' øø ndsøjkpy jøts ja jaq'y xpa'eixtit pøn jaty ja øy'ajtin tpaattip y'awejx'ajtingøjxp ku ja Dios tjanchjawidi.

¹³ Jade'en ja mōjaa'y Abraham yjajty ku ja Dios tyamini'adso'owiyi ja øy'ajtin. Kyø'øm jujky'ajtin ja Dios tyakajpx, ja'agøjxp ku wyinaty nipøn jawaani mōj kya'ity;

¹⁴ xjats yide'en ja Abraham yiknimaay: "Ngunuu'kxp mets, jøts ja m'u'nk m'ap nyikna-mayit."

¹⁵ Tudā'aky ja Abraham ja t'awejx'ijty midi idø'øn ja Dios ñigajpx, jøts ja Dios ja myøøjyi midi wyinaty tø tyamidsøkyi.

¹⁶ Ku jaq'y tigati ttamøjtøkiwya'andi ttajanchtøkiwya'andi, ja' ja y'agajpxtip pøn jawaani mōj, jøts ja nisā kya'ukyiknimaafñidit.

¹⁷ Paty idø'øn ja Dios øjts ja kyajpxy tyimyktañ, jøts ja yikjanchjawit ja y'ayuujk, jøts ku ja tuki'iyi tpadu'unt pøni ti jaty ja wyinaty tø ttamidsøky ja jaq'y.

¹⁸ Majtsk idø'øn ja winmaa'ñ midi ja Dios myøøt'ajtpy jøts ka'ap ja taay'ajtingøjxp ttuñ; tu'uk ja wyandaajkin midi adøm idø'øn xamidsojkimp, jøts tu'uk ja kyajpxy y'ayuujk midi ja awejx'ajtin xmø'øyimp ku ja wyandaajkin ja tpadu'unt. Jade'ents adøm ja Dios xyikjotkujk'ajtyim, jøts n'awijxyimpts adøm pøni ti dø'øn xmø'øyimp.

¹⁹ Ya'at awejxin adøm idø'øn ja n'amija'win tu'ugyi xyik'ejtindip, sam ja kudiibyajt tu'ugyi tyik'ity ja pikta'aky, midi'its adøm idø'øn nadyagumajtsa'amp jøts adøm ja Dios nbaajtint.

²⁰ Jam idø'øn ja møk y'ity tsajpjotp ma ja Cristo jawyeen tø tyøki jøts ja tuul' tyik'awa'atst, jøts idø'øn ja jade'en xemikøjxp tø tyañ mōjteetywindsøn sam ja Melquisedec.

7

Nayide'en ja Jesús tyeety'aty sam ja Melquisedec

¹ Salemit windsøn idø'øn y'ijty ja Melquisedec jøts ja tsajpjotp Dios tnideety'ajtmi. Kuts idø'øn ja Abraham wyinaty ja myidsep tø tmimajada'aky ixats idø'øn ja Melquisedec øjts y'atSPAATSøyi jøts kyunuu'kxi.

² Jøts ja Abraham tmøøy tukpiky ja majkpkipyi pikta'aky pøni ti jaty idø'øn ja wyinaty tø t'atspiky. "Ka'pxy tiidyumbi windsøn" idø'øn ja Melquisedec y'ayuujkpdimsim; kuts ja tñiwindsøn'aty ja Salem kajp midi tyijpy "jotkujk'ajtin", ixyats ja Melquisedec wyimbidsømi "ja windsøn pøn kyajp ttamidsojpk ja øy'ajtin jøts ja jotkujk'ajtin."

³ Ka'ats idø'øn ja tyeety tyaak ja pøn, ni myigu'uk; ku dø'øn ja ñanky'ejxpaajti, ni kyayiknigajpxmi ja kya'axin jøts ja y'o'jkin; paty idø'øn ja Dios U'ngin t'ixy, ja teety midi xemikøjxp teety'ajtp.

⁴ Janch mōjts idø'øn ja Melquisedec wyimbidsimy, ku dø'øn ja Abraham, midi adøm ndeety'amøjkøjpk'ajtyindip, ja tmøøy tukpiky ja myajkpkipyi pikta'aky midi ja wyinaty tø t'atSPAJKXI ja myidsep.

⁵ Jade'en ja Moisés kyutujk yjawa'añ jøts ja teety pøn yiktso'ondaajkidi ja Levi jøts t'amido'odit ja jaq'y tukpiky ja myajkpkipyi pikta'aky, øy ja tjamigu'ugidi, uk tu'ugyi tjakojk'atti ja Abraham.

⁶ Øts ja Melquisedec jade'en yjagateety'aty sam ja'adi pøn yiktso'ondaajkidi ja Levi, y'amidoow ja nayide'en tukpiky ja myajkpkipyi pikta'aky ja Abraham pøn wyinaty ja Dios tø tyamiwanda'agiyi ja øy'ajtin. Jøts ja Melquisedec tkunuu'kxy ja Abraham;

⁷ nipønts sa kyawa'añ, ku ja yjawanimøji pøn kunuu'kxp, jøts ka'ap ja' pøn yikunuu'kxp.

⁸ Tum oo'k'ipts ja jaa'y pøn ya naxwiiñ tukpiky ja myajkpikpyi pikta'aky yikmøødyip, ka'apts ja Dios kyajpxy jade'en tñigajpxy ku ja Melquisedec tø y'oo'kni, nømp ja wya'añ ku ja yjujky'atynim.

⁹ Nayide'en idø'øn n'ukwa'anint, øy idø'øn ja teetytøjk pøn ja Levi ñigubajk'ajtpy icyam tjayikmukti tukpiky ja myajkpikpyi pikta'aky, kuwani dø'øn ndejint kø'øm tjagubajtmidi ja yjade'embt nay winet ku ja Abraham tømøøy ja yja' ja Melquisedec.

¹⁰ Ja'agøjxp idø'øn ja ndejint ja ttuufi ku ja tmøjnigojpk'aty ja Levi pøn wyinaty kaka'xpnim naxwiiñ, ku ja Abraham ja Melquisedec pya'atsoji.

¹¹ Ja Leviit teety idø'øn midi ja Aarøn yiktso'ondaajkidi, ja' idø'øn tmøødyi ja kutujk ja Israel kajp. Kudsik idø'øn jeexyip ya'atpi teety ttukpaattøø ja Dios pøn jaty ja kyutujk paduujnidip, ka'ats jeexyip chøjkyi jøts ja teety jadu'uk kyaxø'økt midi tkawindsøn'ajtip ja Aarøn, jøts nayide'en tyeety'attit sam ja Melquisedec.

¹² Kuwani dø'øn tyigach ja kutujk ku ja teety tyigatsti;

¹³ ni tu'uknimts ja teety kyabidsimy abikyajpkøjxp, sam ja nwindsøn'ajtim Jesucristo midi dø'øn jade'en yiknigajpxp jap nøkyijxpy.

¹⁴ Yikni'ajwipxi ja' ku ja nwindsøn'ajtim Jesucristo tatskojpk'aty ja Judá, jøts ka'ap ja Moisés tyikutujky ku teety jam Judá etjotp pyidsø'ømdit.

¹⁵ Jawaani øyts ja ne'egi wyingaxi'iky, ku yikni'ajwi jøts ku ja Jesús ja jemdyeety'ajtin ñanky'eixiyi, nayide'en sam ja Melquisedec.

¹⁶ Kyø'øm møk'ajtingøjxp ja Jesucristo tpaajty ja teety'ajtin, ja ku tmøøt'aty ja jujky'ajtin xemikøjxp; jøts ka'ap ja pyidsimy jam jaa'y agujkp, pøn jaty idø'øn paat'ajtiyip ja teety'ajtin, sam ja kutujk ja'ayi ttanibiktaagi.

¹⁷ Pø yide'enxi ja Dios Teety ja ñigajpxy:

Mets idø'øn xemikøjxp mdeety'atp, jøts jade'en mdu'unt sam ja Melquisedec ttuufi.

¹⁸ Paty ja Moisés yjawween'ana'amin tø kyudigø, ku ja møk'ajtin tkayaky sudso yikpadu'unt;

¹⁹ jøts niwine'enin ja ka'øchinaa'yin tø tyiktigach. Ixyamts nmøøt'ajtyindi tu'uk ja jøp'iixy'ajtin midi øy midi møj jøts midi ja Dios xukpaajtimp.

²⁰ Diosts idø'øn kø'øm ja y'aaw y'ayuujk tø tyaky jøts idø'øn ja nwindsøn'ajtim Jesucristo xemikøjxp tyeety'att.

²¹ Ja abikpyi teety, ka'ap ja jade'en tø yiktamidsokti sam idø'øn ja nwindsøn'ajtim Jesucristo tø yiktamidsøky, sam jap jaabyety nøkyijxpy wya'añ:

Pøni tø ja Dios wya'añ ka'ap ja y'aaw y'ayuujk ja tyiktigatst, ku ñiimy:

“Mets idø'øn xemikøjxp mdeety'ajtp, jøts jade'en mdu'unt sam ja Melquisedec ttuufi.”

²² Paty idø'øn ja Jesús jawaani tø myøjtøki, ku ja jawaani øy ja tyeety'ajtin midi tyajkp ja nitsoojkin.

²³ Yam janch namay ja jadu'ukpi teety, jøts tum jøpwetsti y'etti ku y'ookti, wenkpits ja tyunk tmidandip;

²⁴ ka'ats ja Jesús jade'en, nijuuni xøøw ja kya'øøky, paty ja tyeety'ajtin ja nipøn tkadukmidañ.

²⁵ Ja'agøjxpts idø'øn ja jade'en xemikøjxp tyik'awa'atpidsimy pøn jaty ja Dios t'ixaadyip, ku ja xemikøjxp yjujky'aty jøts ku adøm ejtp xni'amido'owa'am.

²⁶ Ya'atpi teety'ajtpi adøm idø'øn jeky tø n'awixyim; ja nwindsøn'ajtim Jesucristo ja' idø'øn øyjaa'y pøn tkamøøt'ajtp ja ka'øwynmää'ñ, ni ja pøky, pøn ja pojkpitumbi jaa'y tø kyadapaadyi ja ka'øchinaa'yin øy ja tø tjamøøtsøøni, jøts pøn ja Dios Teety møøt yikutuky.

²⁷ Tø dø'øn ja tu'ugyi ja Dios wyindsø'øk'ajtin tyika'pxi, ku ja ayo'on kø'øm tø tkupiky. Ka'ap ja jade'en tø ttuufi sam ja jaduk'upki teetyti, pøn jabom ja Dios twindsø'øjkidip jøts ja kyø'ømbøky yikmaa'kxtit, jøtsnim ix'oojk ja jaa'y nayide'en tkugajpxti jøts ja pyøky ja wya'atsttit.

²⁸ Tum naxwiiñit jaa'y ja Moisés y'ana'amin yikteety'ajtpy, pøn nayide'en ja pøky øy myimajada'agiyidit; tøts yø'øbi ana'amin kyugøxi jøts ja Dios Teety ja y'aaw y'ayuujk tø tyaky jøts ja y'U'nk, ja nwindsøn'ajtim Jesucristo, tø tpikta'aky øy tyeety'ajtpi pøn xemikøjxp ja wya'ats'ajtin møøt y'ity.

8

Ja Jesús xkugajpxindip Dios Teety wyingujkp

¹ ¿Midi'ibits idø'øn tsojkip yikxon ja'gyuki? Ja' idø'øn ku adøm ja møjteetywindsøn nmøøt'ajtyim jøts ja jam tø y'ixa'aky Dios Teety y'aga'ngyøjø'øm yikutujkpi,

² jøts ja jam tyeety'aty tsaptøjkjotp midu ja Dios Teety kø'øm tø tkøj, ka'ap ja jaa'y ja tø ttukyikøjy.

³ Windsø'øk'ajtin, tamay'ajtin, ja' idø'øn ja teety tyundip, paty idø'øn nayide'en ja nwindson'ajtin Jesucristo kuwani pyaat'aty: jøts ja windsø'øk'ajtin tmo'ot ja Dios Teety.

⁴ Ku ja nay yā jeexyip chøøni naxwiin, ka'ap ja yjeexyip tyeety'aty, pø jaaxi teety yā pøn jade'en ttundip sami ja Moisés wya'añ.

⁵ Nugo agojnaxts ja abikpyi teetyti myidundip, tum ja' y'agojnax midu jam tsajpjotp. Ja'agøjxp ja jade'en yiknijawi ku Moisés ja Dios ñimaajyi, ku dø'øn ja wyinaty tu'uk ja tsaptøjk tyik'øyiwya'añ, ku yide'en yiknimaay: "Yikxonim x'ext, jøts nayide'en pyidsø'ømt sam tø nduk'ixy kojpkøjxp."

⁶ Ja øy'ajtin, ja tiy'ajtints adøm ja nmøjteetywindsøn myidumpy, ja'agøjxp ku ja tkugajpxy tkudani ja øy'ajtin, midu adøm ja Dios Teety kø'øm tø xamidsøjkyim.

⁷ Kuk idø'øn jeexyip nisa kya'ejxi ja jawyeen kutujk midu ja Moisés ja Dios tukajpxnaxjxøø, ka'ats jeexyip jadu'uk chøkyi sam ja Cristo yja' tø tnanky'ijxyi.

⁸ Ja kuxi ja Dios tkaka'pxyjawi ja jawyeen kutujk sam ja kø'øm wya'añ jap nøkyijpxy: Yide'en ja Dios Teety wya'añ: Me'emp ja xøøw ja jumøjt

ku øts ja Israelit jaa'y jøts ja Judajit jaa'y nmo'odit jadu'uk ja kutujk pøni kyupøjktip.

⁹ Ka'ap ja jade'en t'ext sam ja' midu tø njatumi møøt ja myigugajp, midu jekyip tsinaadyøø, ku øts ja nwaapidsømdi Egipto y'etjotp;

kumi ka'ap ja tpadundi, paty øts ja nmajstuttøø.

¹⁰ Yide'en yjaakwa'añ ja Dios Teety, yide'ents idø'øn ja y'ett, midu øts idø'øn ndunwajnip ja Israelit kajp:

Ndukja'gyukip øts ja øgyutujk ja'adi,

jøts øts ja y'anmija'wingøjxp nbiktaajkidit.

Ja'ats øts idø'øn niDios'attip,

jøts øts ja ngajp'attit.

¹¹ Ka' dø'øn pøn wyinaty ja myigu'uk niti tkadukyikyujti pøni ti dø'øn ja tyu'ump; ja'agøjxp ku øts ja wyinaty ja møj ja mutsk tø nduknijawidi jøts øts ja niduki'iyi x'ejxkaptit.

¹² Nmaa'kxidip øts ja' ja kya'øchinaa'yin, jøts nijuuni øts ja pyøky ja nga'ukja'myajtsniyidit.

¹³ Ku dø'øn ja Dios Teety ja jemy ayuujk ja jemy winmaa'n tnigajpxy, mijaa'yinip idø'øn ja myijawyeembi kutujk; kuts ja tø myijaa'yini, pojin ja kyudigøøñit.

9

Ja naxwiin'it tsaptøjk jøts ja tsajpjotpit tsaptøjk

¹ Jamts idø'øn y'ijty tmøøt'aty ja jawyeen kutujk sudso yikwindsø'øgit ja Dios jam tsaptøjkjotp midu yā naxwiin.

² Yide'en idø'øn y'øyyi'ñ ja tsaptøjk yā naxwiin, midu dø'øn jawyeen yikpatp ku ndøjka'ant, ja' idø'øn xyøøw'ajtp Kunuu'kxy Et, japts idø'øn y'etti ja seri adøø'yin, jøts ja pøjkpajt mā ja kunuu'kxy chapkaaky y'etti.

³ Japts myimajtsk adiidyuky jixki'py tyañ, ja amaagyunuu'kxy et;

⁴ mā jap tu'uk ja altajr midu tum amuum oori mā kyøxøøy ja poom, jøts tu'uk ja mutskaaxi midu oori nimøch mā ja kutujk jap y'ity. Japts mutskaaxijøtpy tu'uk ja tu'jtsu'ñk midu tmøøt'ajtp ja manā midu dø'øn yjøø'kxtøø ja israelit jaa'y jam abak etjotp. Nayi jap idø'øn kaaxijøtpy y'ijty ja Aarón ja tyajk midu ojts jadigojk xyimumy, jøts ja tsaa mā jap kyøxja'ayø ja kutujk ja ñi'ayuujk.

⁵ Jamts kaaxi ñikøjxp y'etti ja ankilistøjk ja y'agojnax, midu tyiknigaxø'ktip jøts ku ja Dios jam, jøts ja kyajnk ja ttanimu'uxti mā ja pøky y'ijty yikmee'kxy. Wants ya'at ja'ayi t'uknijawam.

⁶ Kuts idø'øn ja jade'en tø ttanibiktaagidi, winets idø'øn y'ijty ja teety tyøkidi jap mijawyeen tøjkjøtpy midu Kunuu'kxy Et yiktejp, jøts idø'øn ja windsø'jkin ja yikjujky'ajtpi t'atsmo'odi: pøni juuni ja kø'øm tsojkin'ajttøø.

⁷ Jøts idø'øn jap myimajtsk tøjkjøtpy midu yiktejp Amaagyunuu'kxy Et, tuk'ojkyits ja winjumøjt ja møjteetywindsøn jap tyøki; ja jiyujk ni'jpy idø'øn ja myidøjkp midu y'atswa'xpy mā ja pyøky jawyeen yikmaa'kxt jøtsnim ja jaa'y yja' nayide'en.

⁸ Yide'ents idø'øn ja Dios Espiritu Santo xukja'gyukam ku dø'øn jap nipøn nugo kyatøki myimajtsk tøjkjøtpy mā txøøw'aty Amaagyunuu'kxy Et. Japyi ja midu'uk tøjkjøtpy ja'ayi xyumitøkidi.

⁹ Yø' adøm idø'øn n'ejxpajtin'ajtamp wine'enin naxwiin'it jaa'y'ajtyindi, jøts nnija'wa'ant ku ja winmaa'n kyawa'ach øy ja wine'en ja wyindsø'jkin tjayika'pxtøø.

¹⁰ Ja' idø'øn ja wyindsø'jkin'ajttip sudso kya'adyit sudso y'uuktit, jøts sudso ñanky'øyiyidit ñankchuyiyidit, sam ja møjaa'y chinaa'yin tyikutuky. Niwine'enin ja anmija'win ja tkayikwa'ats'aty. Ja'ats ja jade'en tyungunajxtip kunim ja Dios kø'øm tø tyiktigach.

¹¹ Tøts idø'øn ja nwindson'ajtim Jesucristo myiñ, ja'ats idø'øn ixyam tnmøteetywindsøn'ajtp ja jemchinaa'yin midi ya tø tyañ. Jawaani øy idø'øn jøts jawaani tsuj idø'øn ja tsaptøjk ma dø'øn ja tyuñ, ka'ap ja jaa'y ja tkøij, paty idø'øn ja kyanaxwii'ñit tsaptøjki.

¹² Tø dø'øn ja nwindson'ajtim Jesucristo ñaxy jap myimajtsk tøjktøtpy midi xyøøw Amaagyunuu'kxy Et, ka'ats ja t'ukmidøjkiñi ja mutsk chiibi ni'jpy jøts ja løjch ñi'jpy; kyø'øm ni'jpy ja myidøjkip tuk'oijkøxp ja'ayi, midi adøm idø'øn xemikøjxp tø xuktanitsøjkyim.

¹³ Yikwachptsik idø'øn y'lijty ja pøky ja tsigiduuri ni'jpy, jøts ja tsapaxuna'jk ni'jpy, jøts nayide'en ja tsigivaki jaam midi yiknitøødyip jam altajrkøjxp, ku dø'øn ja y'lijty ñadyaninuugyidi nikijxy jøts ja pøky jade'en tyikwa'atswa'andi xjats ja kunuu'kxin ja jade'en tpatøø.

¹⁴ Pøni jade'ents ja', jawaani kajaats idø'øn ja nwindson'ajtim Jesucristo ja ñi'jpy yikpøkwyaa'ach jøts kyunuu'kxy, pø patyxi ja Dios Espiritu Santo køjxp ñagyøyajkiyi pakwya'ach, midi ja Dios Teety kyupijky, jøts idø'øn ja ñi'jpy ja tyikwa'atst ja ka'øchinaa'yin midi ja kudigø'yin xukpaajtimp, jøts ja Dios jøts ja yikjujky'ajtpi jade'en nmimado'owin.

¹⁵ Paty idø'øn ja Jesucristo møj yik'ajot'aty ku yjemgyutujk tø tyiktso'onda'aky, pø ja'axi ja kyu'o'jkip jøts yikpøkmyaa'kxtit pøn jaty tø pyøkyundi ku ja møjaa'gyutujk y'lijty tyuñim, jøts ja jaa'y tpaattit ja xemikøjxpit øy'ajtin, midi ja Dios Teety ttamidsøjkiyidip windi'ixip.

¹⁶ Jabi jade'enxi yiktuñ ku ja maagy wya'kxy, jaanim ja wya'kxy ku ja jaa'y y'øøkiñim.

¹⁷ Jøts ka'ap ja ayuujk mibaat nugo myøjtøkit pøni nay jujky'ajtpnim ja kumaay.

¹⁸ Kuwanixi ja ni'jpy ojts chuñ xye'kxy ku ja møjaa'gyutujk cho'ondaajky.

¹⁹ Ku dø'øn ja Moisés wynaty ja kajp tø ttukmadøy ja Dios kyutujk y'ana'amin, winets tnixajiyi'ñi tukmutsø øøxy ja ujts aay møøt ja tsajpts wet, jøts ttuktaxø'øky ja tsigini'jpy ja chiibi ni'jpy, midi nøø wynaty møøt tø yik'adaamuky, xjats ttanixejtwidity ja kutujk nøky jøts niduki'iyi ja jaa'y nayide'en.

²⁰ Winets wyañ: "Ya'at ni'jpy idø'øn tyikmøjtøjkip ja Dios kyutujk midi mee tø myik-tamidsøky."

²¹ Tyaniwaa'jx idø'øn ja Moisés ja ni'jpy nayide'en ja tsaptøjk, jøts tuki'iyi pøni ti jaty yiktundip, ku dø'øn ja Dios ja t'atswindsø'øgidi.

²² Jade'en idø'øn kyutuky jøts ku ja ni'jpy tuki'iyi tyikwa'atst, kuts ja ni'jpy kya'ett ka'ats ja pøky yikmee'kxy.

Cristo y'ayo'ongøjxp ja pøky wya'ach

²³ Paty idø'øn chojki ja ni'jpy jøts wya'atstit ja pikta'aky jap tsaptøjkøtpy, midi y'agojnax'ajttip ja tsajpøtøpyit tsinaa'yin. Jawaani øy pyaat'atyiyi ja tsajpøtøpit'ajtin ja windsø'øgi, midi ja Cristo kø'øm tø ttuñ.

²⁴ Jøts ka'ap ja Cristo jam tyeety'ajty tsaptøjkjotp midi ya naxwiiñ ja jaa'y tø tkøiti, jøts tsajpøtøpit tsaptøjk ja' nugo y'awanax. Jamxi dø'øn ja tymchajpøtp tø tyøki, ma adøm ja ixyam x'agø'dujkyim x'axajtukyim Dios Teety wyingujkp.

²⁵ Tuk'o'jkyi dø'øn ja Jesucristo ja o'jkin tø tkupiky, ka'ap ja jade'en tø ttuñ sam ja jadu'ukpi teetywindsøndi midi dø'øn y'lijty winjumøjt ja'ayi tmidøjkip ja ni'jpy jam tsaptøjkjotp jøts ni tkakø'ømni'jpyi ja'adi.

²⁶ Ka'ats idø'øn ja Jesucristo jeexyip nayide'en ttumi, tøts idø'øn ja jeexyip may'o'jk y'oo'kni kuyip cho'ondaajky ja naxwii'ñit, ka'ats ja jade'en tø ttuñ. Ixja tø kya'pxy, ixja tø tyiy ja et ja naxwii'ñit, tuk'o'jk ja o'jkin ja ja'ayi tø tkupiky jøts ja pøky tuki'iyi xemikøjxp tyikwa'atst.

²⁷ Nayide'en sami jaa'y niduki'iyi tuk'o'jk y'oo'kti, jøts yiktiidyu'unditnim,

²⁸ Nayide'ents ja Cristo tuk'o'jkyi tø y'øøky, jøts may ja jaa'y tyikwaajstis ja pyøky. Kuts idø'øn wynaty jadigojk ñanky'eixpaadyiyi, ka'ap ja yikpøkwyatspi wynaty y'ukmeni, ja' ja wynaty ñimimpy pøn jaty ja awejx'ajtyip.

10

¹ Ja jemgyutujk idø'øn ja' y'aga'ax ja nugo kutujk midi ja Moisés yiktaan, paty idø'øn ja kyamajada'aky nijuuni. Øy ja jiyujk ja namay tjayik'ookti winjumøjt, ka'ats ja pøky ja tyikwa'ach.

² Ku dø'øn ja jeexyip ja pøky tyikwa'ach, jøts ja øchinaa'yin jeexyip tyaky, tuk'o'jkyits idø'øn ja jeexyip jade'en yjaty. Ka'axi ja jeexyip y'uknabyøkyja'winiyidi.

³ Kumi ka'ats ja yjade'eni pø ximija'myatstipxi ja pyøky ja'adi ku ja winjumøjt tjatundi ja windsø'jkin,

⁴ ja'agøjxpts ja jade'en yjatti ku ja pøky ni ja tsigini'jpy ni ja chiibi ni'jpy tkayikwa'ach niujuuni.

⁵ Paty idø'øn ja Jesucristo ja Dios Teety tnimaay ku ya myiifn naxwiiifn:

Ka'ats xtsøky'aty jøts myiktawindsø'øgit ja jiyujk, patyxi øts tø xyikjaa'yjaty jøt øts ja ne'kx jøts øts ja ni'jpy tø xmø'øy.

⁶ Ka' myikjotkujk'aty ku ja jiyujk yjanitøøy, ni ja windsø'jkin midu jayiktump jøts ja pøky xmaa'kxt.

⁷ Winets ø nwaafn: "Ixyam ø Dios Teety, jøts ø nbadu'unt pøni ti me nmi'ana'amwampy sa jap jaabyety nøkyjxpy y'ity."

⁸ Ku dø'øn ja jawyeen tønigajpxy ku ja Dios Teety tkadajotkujk'aty ja windsø'jkin ku dø'øn ja jaa'y ja jiyujk tjayik'ookti, jøts ku tigati tjayiktømyidi jøts ja pyøky wya'atstut sam idø'øn ja yjagutujkyi.

⁹ Winets ja nwindson'ajtim Jesucristo wyaafn: "Ixyam ø Dios Teety, jøts ø nbadu'unt pøni ti mdsøjkpy." Yikudigøøpyts idø'øn ja nwindson'ajtim Jesucristo ja jawyeengutujk jøts ka kyø'øm windsø'jkin ttawinguwijch.

¹⁰ Tøts adøm idø'øn ja Dios xkunuukxyim, pø tøxi ja nwindson'ajtim Jesucristo xemikøjxp tuk'ojkyi ja fiine'kx tkøyaky midu idø'øn ja Dios Teety tø tmø'øy adømjøjxp.

¹¹ Tum jade'ents ja israelit teety tundinim, nay ja jiyujk ja tyawindsø'jkidip ja Dios, øy ja pøky ja niujuuni tjagayikwa'ach.

¹² Tuk'ojkyits ja Jesucristo ja'ayi tø y'øøky jøts adøm ja nbøkwyajtsindit, jøts ja jam tø y'ixa'aky yikutujkpi, Dios Teety y'aga'ngyøjø'øm.

¹³ Jamts ja y'awixy kunim ja myidsep yikpikta'akt tyekyji'py jøts ja tteky'ana'ant,

¹⁴ pø tøxi ja tu'ugyi ja wyindsø'øk'ajtin ttamajada'aky ku ja kø'øm tønadyagidøkiyi ja Dios Teety, jøts jade'en xemikøjxp tø tyik'awa'atspidsimy pøn jaty ja kunuu'kxin tø tmø'øy.

¹⁵ Jøts ja Dios Espiritu Santots ja kajpxy nayide'en tyiktuu'yø'øpy tyiktuu'wejtsp ku wya'afn yide'en:

¹⁶ Midu øts idø'øn yø jaa'y ndamidsojkip, ku dø'øn ja xøøw ja jumøjt tpaatt, yide'en øts idø'øn ja wyinaty nduifn.

Ndukja'gyukip øts ja ngutujk jøts øts ja nbiktaajkit y'anmija'wingøjxp.

¹⁷ Jøts yjaakwa'afn:

Ka'ap øts ja pyøky ja wyinaty n'ukja'myajtsniyi, ni ja kya'øy'ajtin.

¹⁸ Paty idø'øn nja'gyuka'ant yikxon pøni tø ja pøky xemikøjxp yikmee'kxy, ka'ats y'uktsojkniiyi jøts ja Dios Teety njaaktawindsø'jka'ant o ti jøts ja xpojkipmaa'kxint.

Møk ja Dios janchja'win nbiktaajkint

¹⁹ Paty migu'uktøjk idø'øn ka' tsø'øgjawa nwingunøjkxindit ja Dios Teety jap tsajpjøtpy, pø tøxi ja nwindson'ajtim Jesucristo xkudsu'una'am xkudajxa'am.

²⁰ Ja'ayi tsojkip jøts adøm ja nwindson'ajtim Jesucristo ja yjemdyuu' nguyø'øyint midu ttukpatp ja xemikøjxpit jujky'ajtin, jøts midu ja nwindson'ajtim Jesucristo tø awa'ats tyiktafn kyø'øm y'o'jkingøjxp.

²¹ Ja nwindson'ajtim Jesucristots adøm idø'øn nmøjteetywindsøn'ajtyimp jam tsajpjøtp;

²² paty idø'øn tu'ugyi ja n'anmija'win nbiktaajkint ku ja Dios Teety n'ajot'ajtin, jøts tu'ugyi dø'øn ja janchja'win amumjoojt nmøt'ajtin; pø tøxi ja xyikpøkwyajchim jøts adøm nga'uknabyøkyja'wiifa'ant, tøts nayide'en ja nøbajtin nøø xyikwaajchindi.

²³ Yikxonimts idø'øn ja n'aweixint midu ja Dios tø t'agajpxuky ku adøm ja kyutujk ja tønupijkyim. Pyadu'ump ja' ja y'ayuujk.

²⁴ Ja' adøm idø'øn ni'ixa'ayimp sudso xem yam nnabyudøjka'ant jøts nnachojka'ant.

²⁵ Ka'ap adøm ja jaa'y chinga'yin nyikmøjtøjka'ant pøn jaty kamendip ku nnamyujkyandi Dios ajot'ajtpi, nagyajpxjot'amøjkamp adøm idø'øn ne'egi, ixa ja nwindson'ajtim Jesucristo wyingoni.

²⁶ Ku adøm kø'øm dsojkingøjxp ja Dios yja' n'ixmajtsint, ka'ats ja maa'kxujkin yikpaatt, jabi ka'axi ja abiky yiknitsokpi y'ukmenit.

²⁷ Ja'ayits adøm njøp'ejxindip pøni jade'en adøm ndsinag'yin, jøts ja Dios Teety ja myøktiidyu'unin nbaajtin, jøts xemikøjxp ja tø'øyin xmø'øyindit midu dø'øn pyaattip pøn ja Dios tmidsep'ajttip.

²⁸ Pø nayide'enxi y'ijty yiktundi pøn tkamimadoodip ja Moisés y'ana'amin, ku namajtsk uk nidigøøk ja a'ejnaxpi kyajpxti, kuwanits ja y'ijty y'øøky, niwine'en ja kyayik'ayo'ejxti.

²⁹ Jawaani kajaats ja pya'at'atyidi ja ayo'on pøn jaty ja Dios U'nk nugo t'uktaa'nwidejtnidip, jøts ja y'o'jkin tka'ukmøjpiaktaajkniiyi midu tø yikpojkiwa'achidi, jøts nayide'en ja Dios Espiritu Santo tø t'ukmigajpxigøøfidi yam ja yjaba'ayøyidi. Pø ja

y'o'jkinxi ja Cristo y'ejxa'anin'ajtpy ku ja Dios Teety chojkin tɔ tɔnagjpxy, midit tɔ yjajykpɔkwy'a'achidi pɔn ja ka'ukmɔjpktaajknidyidip.

³⁰ Pɔ nnija'wampxi ku ja Dios Teety tɔ wya'añ: "Øts xpaat'ajtp jɔts øts ndagubattit ja pyøky; øts yø nmo'odip kija' ja y'ayo'on pɔni wine'en yø pyaat'atyidi." Jɔts nayide'en wyami: "Ndidiyu'ump øts ja ngajp."

³¹ Janch kawinnaañi dɔ'ɔn ja y'ayo'on'ixy pɔn ja Dios, pɔn ja yikjujky'ajtpi tyukpatpy myøk'ajtingøjxp ja y'aki!

³² Kidi mee xja'dyigoy ku ja nwindson'ajtim yja' x'ejxidi jɔts ja chinaa'yin xpadøjkidyøø, winets o sagasa xkujajtidøø ja mjanchja'win.

³³ Jam mee niwinaagin pɔn ja mayjaa'y m'ejxidi ku myikta'oiti jɔts myiktatsee'kti ja mdsinaa'yin, jɔts nayide'en xajotmay'ookti ja mmigu'ukti pɔn o sagasa yiktundip.

³⁴ M'ayo'ejx meets ja tsumyjaa'y, jɔts mimadaajk meets ja jotkujk ku ja mbikta'aky tuki'iyi myikpøjkigyøxtøø, pɔ nnija'wipxi meets ku jam tsajpjotp jawaani y'øybi xpaattit midit xemikøjxp etp.

³⁵ Wan ttuñi pɔni ti tuujnip, awejx'et meets ja ejtp pɔni ti ja nwindson'ajtim tɔ t'agajpxuky, myikmo'op meets ja kajaa.

³⁶ Tuda'aky ja Dios Teety y'ana'amin paduñ ttsøky, jɔts ja tyakt pɔni ti ja tɔ t'agajpxuky.

³⁷ Pɔ yide'enxi ja nøky wya'añ:

Jawaani jaak'awejx'etti,

tsojk ja mye'ent ja nwindson'ajtim pɔn ja øy'ajtin xmø'øyimp.

³⁸ Midit'its øts idø'ɔn ngupijky, janchja'wingøjxp idø'ɔn t'awixy'aty ja øy'ajtin,

pɔni windsi'jkyts ja', ka'ats øts ja ndajotkujk'att.

³⁹ Ka'ats adom nwindson'ajtyaa'yandi midit pojin yikmimajadaktip, tum ja abixi adom pɔn ja janchja'win ttajujky'ajttip, jɔts jade'en ja n'anmija'win xemikøjxp nyiknitsoojkindit.

11

Ti dɔ'ɔn janchja'win'ajtp

¹ Ja' dɔ'ɔn janchja'win'ajtp ku amumjoojt tu'ugyi n'awejxint pɔni ti dɔ'ɔn yikmø'øyimp jɔts ku amumjoojt nmibøjkint midit nga'ijxyindip.

² Ja yjanchja'win idø'ɔn ja ndeety'amøjtøjk yiktakajxajkti.

³ Ja janchja'win adom xukmibøjkimp ku ja Dios ja tsajp ja naajx jɔts tuki'iyi tɔ tyik'øyi y'ayuujkøjxp ja'ayi, jɔts ja' midit ixyam n'ijxyindip ka'ap ja y'ity te.

⁴ Janchja'wingøjxp ja Abel øy ja Dios twindsø'jkøø, jam ja Cain kajade'en, paty ja Dios ja Abel tkupijky jɔts ja'agøjxp ja wyindsø'jkin tkupøjki. Ots ja Abel tɔ yja'oo'kni, tɔ ja ejxpajtin ja xemikøjxp tyiktañ ku ja janchja'win ja tmøøt'ajty.

⁵ Janchja'wingøjxp ja Enoc yiktaniwawi ja xemikøjxpit tsinaa'yin øy ja o'jkin ja tjagapaajty, jɔts ja tka'ukpatnidi ku tja'ixaadyøø pɔ tɔxi ja Dios ja wyinaty pyawa'aniiyi. Yide'ents jap nøkyijxy wya'añ ku ja Dios ya naxwiiñ tyikjotkujk'ajty.

⁶ Janch tsepts jɔts ja Dios nyikjotkujk'ajttint, pɔni ka'ap ja janchja'win yikmøøt'aty, ja kuxi ja Dios yikpaatwa'añ, jawyeen idø'ɔn ja njanchja'want ku dɔ'ɔn ja jaa, jɔts ku ja nayide'en tkunuu'kxy pɔn jaty ja ixaajyiyip.

⁷ Janchja'wingøjxp idø'ɔn ja Noé ja Dios tmibijky, jɔts tmimadøøy ku ja tyukmadooji pɔni ti jaty idø'ɔn tunwajnip wyinaty, o dɔ'ɔn niti kyagaxi'ikñim, jɔts ja barki tyik'ø'yiyi'ñ midit yiknitso'ogip wine'enin jam tyøjkjotp yjaa'y'atti. Ja yjanchja'win ja tyamøj'ajtp jɔts ja ttuk'ijxy pɔn jaty ja pøky ttunk'ajttip, jɔts nay ja'agøjxp ja Dios tyaxonda'agyi.

⁸ Yjanchja'win ja Abraham yikmadooji, ku ja Dios ojts myigajpxyi jɔts ja kyajp tmatjstu-ujty, jɔts tnidsø'øñ ja naajx ja et midit ja Dios ttamidsojki, øy ja tjaganijawi pɔni ma dɔ'ɔn ñijky.

⁹ Ja'agøjxp idø'ɔn ja Abraham chinaay jam etjotp midit dɔ'ɔn ja Dios ttaniwaadsojyi ku janchja'win ja tmøøt'aty, jɔts jabyøø'kxyin ja jam chinaay. O magama ja tyøjk tkøjwidettøø sam ja tuu'yø'øbyidi. Jɔts nayide'en ja y'u'nk Isaac møøt ja Jacob ttundøø, jabi nayide'enxi ja Dios ja tyamiguy'ejxidøø ja naajx ja et.

¹⁰ Ja'agøjxp ja jade'en ttuñi ja Abraham, ku tjøp'ijxy'aty ku tyukpaattit ja kajp midit ja Dios kø'øm yik'øyip yikpaadip, ja tsajpjotpit kajp midit tu'ugyi etp.

¹¹ Nay ja janchja'win ojts ja Sara tyukmibikiyi ku ja tu'uk ja y'u'nk tpaatt øy ja wyinaty tɔ yja'amøji kyidakni. Pyaajt idø'ɔn ja y'u'nk ja ja'agøjxp ku tjanchjaa'wiyi'ñ jade'en sa ja Dios ñimaajyøø.

¹² Ots idø'ɔn ja ñiyaay Abraham yjadyimøjja'yini, ojts idø'ɔn tnigøjpkteety'aty janch namay ja naxwii'ñit jaa'y, ejxim maadsa', uk ejxim pu' mejy'agø'øm kyamachooni.

¹³ Tum oo'køjxtits yø jaa'y, ixa jade'en tɔ yikja'myatsti, jɔts nika' ja ya naxwiiñ yik-møøgyijxy pɔni ti jaty ja Dios wyinaty tɔ tni'adsowi; ttuk'ejxidits ja jagamyi ja yjanchja'win

midi ja Dios yakwanguixpy jøts jade'en ttaxondaktøø, jøts ja jade'en tnankñija'widøø ku ja ya naxwiiñ nugo ñaxti.

¹⁴ Pønts jade'en ttundip, y'ixaadyipnim idø'øn ja' tu'uk ja kajp ma' tu'ugyi chinaañidit.

¹⁵ Kuk ja ttajotmay'oo'knidi ja kyajp midi yiktandi, wimbejtitsik ja jadigojk nay jam.

¹⁶ Kumí øgyajpts ja jawaani ja chojktip midi dø'øn jam tsajjotp, paty ja Dios jam a'ejxi abaadi tyik'ity tu'uk ja kajp jøts ka'ap ja tyatsø'dyufñidi, kajpia'wiyidip ja'.

¹⁷ Nay ja janchja'win ja Abraham ja Dios ttukmimadooli ku myøkwinnmaa'ñ'ejxiyi jøts ja tyu'umts majnk y'amidooliyi jøts ja Dios ja ttuktawin'oogit. Tø ja Abraham wyinaty tkupiky jøts ja tyu'umts majnk twindsø'jkin'att, o dø'øn ja Dios kø'øm wyinaty tø ñi'mxyi:

¹⁸ "Yø Isaac mets idø'øn myikmayiyip."

¹⁹ Ja'agøjxp idø'øn ja Abraham jade'en ttuuñ ku ja twinnmay ku ja Dios myø'ajtin myøji jøts tyikjujkyøkt ja oo'kpi jaa'y. Oo'kpi agujkpy idø'øn ja Abraham ndejint ja y'u'nk wyimbijty jadigojk øy idø'øn ja yjaga'øøky.

²⁰ Janchja'wingøjxp ja Isaac t'agajpxuujky ja kunuu'kxin midi ja y'u'nk Jacob jøts ja Esaú paadidip.

²¹ Jøts ku ja Jacob wyinaty y'ookwani, janchja'wingøjxp idø'øn ja ttami'awa'aniyi'ñ jøts ja José y'u'nk y'una'jk tpaattit ja kunuu'kxin. Xjats ojts winda'aky t'ajot'aty ja Dios jøts ja tyajk ojts ñadyagudijiyi.

²² Janchja'win ja José yikwajni, kuk ja israelit jaa'y pyidsø'ømdit Egipto y'etjotp, jøts tni'ana'ami sudso ja pyajk yiktu'unt.

²³ Janchja'wingøjxpts ja Moisés ja tyeety tyaak yu'uch yik'ejttøø tigøøk po'; ja'agøjxp ku t'ejxti ku ja janch tsuj jøts ka'ap tsø'jkidyøø ja windsøn kyutujk pøn wyinaty tø ñimy jøts ku tuki'iyi ja mutskuna'jk y'ooktit.

²⁴ Jøts nay ja janchja'win ja Moisés kaduktsojki jøts ja Egipto windsøn ñøøx ja taak tejt ku wyinaty tø yaa'dyø'jkjatni.

²⁵ Nugo ku ja nayide'en tkupijky pøni sa jaty ja myigu'uk israelit jaa'y yiktundi, jøts ka'ap ne'egi nugo ttaxøøñ ja naxwiiñ'ajtin midi naxp midi tigøøpy.

²⁶ Jade'en ja wyinnmaay ku ne'egi jawaani øy jøts ja Cristo o sagasa tmijatt, midi dø'øn yiknigajpx me'emp, ka'ap ja tmøjpktaajky pøni wine'enin jam ja meen jøts ja pikta'aky Egipto; ja' y'awijxpy midi ja Dios mo'ojip.

²⁷ Ja janchja'win ja Moisés yiktsoo'nøø jam Egipto etjotp, ka'ap tso'jkiiyi'ñ ja windsøn y'aki, nugo ku ja tpadunguixy ja y'øwynmaa'ñ ejximdam ja Dios ja jeexyip tyimy'ixy.

²⁸ Janchja'wingøjxp ja Moisés tyiktso'onda'aky ja paski xøøw ku tyikutujky jøts ja israelit jaa'y ja ni'jpy ttawinja'adit ja tyøjk'agaj, jøts ja yjagyooi majnk ka'ap ja Dios Teety y'ankilis yik'oogidit sam ja Egipto jaa'y yjajttøø.

²⁹ Janchja'wingøjxpts ja israelit jaa'y ttanaxti ja Tsajpts Mejy ejxim jaa'y yø'ø y tø'øts naxkøjxp; kuts ja egipiti jaa'y nayide'en t'atunwandøø winets ja ñøø'kxti niduki'iyi.

³⁰ Janchja'wingøjxpts ja Jericø kajp ja ñawaap kyidaagijxy, ku ja israelit jaa'y wixujk xøøw ja kajp tni'awidejttøø.

³¹ Jøts nayi janchja'wingøjxp ja Rahab, ja ka'ødyø'øxyøjk, ojts møøt kya'øøky pøn tkamimadoodip ja myigugajp, ku ja wyinaty øy tsuj tø twindsø'øgi ja israelit jaa'y pøn kajtpøjkidi ejxp: koobi.

³² ¿Ti jaty ø njaakmadya'akp? Ka'ap ja et ja xøøw ñibaadi ku ø nnimadyaktøkit ja Gedeón, ja Barac, ja Sansón, ja Jefe'te, ja David, ja Samuel jøts ja jaa'dyi midi y'ijty ja Dios y'aaw y'ayuujk'ajtpy ku ti t'nigajpxwa'añ.

³³ Janchja'wingøjxp idø'øn yø tø tmimajada'akti ja wenk kajp, jøts tiy øy tø kyudunk'atti jøts ja Dios ja pyudøjkin tø tpaatti sa ja wyinaty tø tni'adsowi. Ja møj kaa' jadi'iñi tø t'apanmujkidi ja y'apajk.

³⁴ Jøts ja møj jøøn nayide'en tø tmimajada'akti, jøts tsujx kumy tø kya'ookti. Jøts tø yjotmøpkøkti pøn kajotmøkti, jøts ja y'awa'ambi midsep tø tmimajada'akti.

³⁵ Jam idø'øn ja tø'øxyøjk pøn janchja'wingøjxp ja ñiyaa'y tø t'ejxpaatti jadigojk jujky.

Mayts y'oo'kmidi ayo'on agujkpy, jade'en idø'øn ja ne'egi tso'ktøø jøts ka'ap ja Dios yja' t'ixmajtsidøø ja'agøjxp ku ja t'aweix'atti ja jujky'ajtin xemikøjxp.

³⁶ Jøts may nayide'en yikxon tø yiktaxe'ekti jøts tø yikwopti, jøts ja pujxkuwøøñ tø yikpitaajkidi jøts tø yiktsumdi.

³⁷ Jøts nayide'en tø tsaaga'ach y'oo'kmidi, uk tapoodits, jøts tø yikmøjwinmaa'ñ'ejxti, jøts tsujxkøjxp tø y'oo'kmidi; jøts ja borreegi'ak jøts ja chiibi'ak yik'ayowim tmawidejttøø, o sagasa ja ayo'on tpaattøø.

³⁸ Ja'abi jaa'y idø'øn tø wyidetti abak etjotp, kojpkøjxp, jøts tsaq ankjøtpy, tsaq jutjøtpy. Niwine'en ja naxwii'ñit jaa'y ja'abi jaa'y kyapaat'atyiyi.

³⁹ Ots idø'øn øy øy tsuj tø yik'ejxti yikpaatti ku janch møj ja yjanchja'win, ka'ap yø ti tø yikmo'odi pøni ti dø'øn ja Dios tø t'uknigajpxy;

⁴⁰ pø tøxi ja ttanibiktaagi kò'òm jawaani øy jøts ja y'øbyidsø'ømdit adøm møøt.

12

Ja Jesús adøm n'ejxpajt'ajtimp

¹ Janch mayts adøm ja jaa'y nnija'wa'andi pøn jaty ja janchja'win tø tmøøt'atti jøts ja tønankñigaxi'iyidi. Wants adøm tmajtstuujtina'am tuki'iyi pøni ti jaty xyikjotkøjximp, jøts ja pøky nayide'en namjtstuujtint midi yjawi xyikpak'amujkna'amp, jøts yikxon njaakpadungojindit tuda'aky ja øchinaa'yin.

² Ja Jesús adøm n'ejxpajt'ajtimp pøn ja janchja'win tyajkp jøts pøn nayide'en tjaakyik'øyip jøts tjaakyiktsujip. Tø ja Jesús jam kruskøjxp y'øøky, ots ja yjatsø'ødyuñ, ja'abi o'jkin ka'ap ja tømjøpikta'aky, pø ñija'wipxi ja' ku ja ayo'on ja ttanaxt jøts ja tpaatt ja jotkuik'ajtin ja xondaajkin; jøts ja tøm y'ixa'aky yikutujkpi møøt ja Dios Teety jam y'aga'ngyø'ø'øm.

³ Paty mee kidi mjotkixy ni mga'amutskidit, ja Jesús meets ja'myats jøts ja xni'ejxu'tuttit ku pojkpitumbi kyø'ø'øm kawinø'øn tøm y'ayo'ombaaty.

⁴ Ka'anim meets ja pøky xmøøtseptuñ jøts xkudaxit.

⁵ ¿Uk tøm meets idø'øn ja xja'dyigøøñi sã adøm Dios Teety y'u'ngin xja'ane'emyindi? Pø yide'enxi jap jaabyety nøkyijxpy:

U'nk, kupøk ja ayo'on midi ndaniguejxpy jøts mdsinaa'yin xyiktigatst,

jøts kidi x'ayooji ku me n'øjt.

⁶ Pø tum ja'axi øts ja chinaa'yin tigach ndamidsojky pøn jaty ø ndsojky,

jøts ja ayo'on nmø'øyp pøn jaty n'u'nk'ajtpy.

⁷ Midani meets idø'øn ja ayo'on, pø ja agøjxpxi meets ja Dios ja mmø'øyi ku y'u'nk y'una'jkin mdsøkyidi. ¿Uk jaa dø'øn ja jaa'y pøn niyuuni ja tyeety tøm kyakajpxwiji?

⁸ Pøni ka'ats meets ja Dios mgajpxwiji sami dø'øn ja y'un'k y'una'jk ja ttamidsojky, mga'u'nktejpts meets idø'øn ja', wenk u'nk meets ja mdijiyi.

⁹ Nayide'enxi mutskyi ja ndeety ndaak tøm xkajpxwijiindi, jøts adøm ja y'lijty øy tsuj nmigajpxyindi, yayits ja y'ana'amin ja yjatundi naxwiñ. ¿Sudsots adøm idø'øn ja Dios Teety midi jam tsajjotp ngagupøjkint ja kyajpxwejin? Pø ja jujky'ajtinxi adøm ja xukpaatwa'animp.

¹⁰ Ja'ayi adøm ja ndeety ndaak xakajpxwejinidip pøni sudso dø'øn ja tja'gyukidi ku ja tsinaa'yin tyiyi ya naxwiñ; kuts ja Dios x'ane'emyindi, tiyts ja y'ane'emy, jøts ja' ja xani'ana'amindip sudso ja wa'ats'ajtin nbaajttint nayide'en sam ja'.

¹¹ Nipøn ja ayo'on tjanchjagatsøky ku ja yikpaaty, janch møk ja yikjawi; pønts ja ayo'on pønts ja kastigi tpaattip, ku wyejti kyajti, ja'ats idø'øn ja chinaa'yin tiy tsuj tyikyø'ødyip, ka' ti, ka' sã, ka'ap ja tsep.

Ja ayo'on ku ja Dios kyajpxy kyayikmimadøy

¹² Yikmøkpøkti mgø' mdeky pøni tøm ja y'anuu'kxyinidi.

¹³ Ixa'adi ja tiy'ajtindi jøts ja mmigu'uk pøn ja yjanchja'win kamøktinim mba'ejxiyidit jøts ja kyatuu'tigø'ødyit, jøts ja jade'en ne'egi yjotmøkpøktit.

¹⁴ Øy tsujim ja mdsinaa'yin xyikyø'ødyit, tuda'aky ja jaa'y niduki'iyi møøt mdsøønidit; ku wyinaty jade'en mgajaa'y'atti sudso ja Dios x'ejtit, pø ka'axi jadi'iñi nugo ñiyik'ixy ñiyikpaaty.

¹⁵ Yikxonim wanidi, ejxim xka'ukpatnidi ja kyunuu'kxin midi ja Dios pya'ayo'ajtingøjxp mmo'owajnidip, øy ja jade'en tøm yja'ukwa'añ ku ja mbudøkiyidit; kidim ta'am ujtšin mnabyikta'agyiidi midi pa'amdump jøts ni xkayiktsokmi ja mmigu'uk.

¹⁶ Kidi nugo mnamyøøt'atyidi pøni ka'adam ja xniyaa'yidi xniðø'øxyidi, tum ja Dios yja' ne'egi mjotmay'attip; kidi Esaújin xundi pøn nugo y'u'nk taguyajt ja yjagyooði, tuktesy ja tokx ja'ayi ttagugøøy.

¹⁷ Mnijawidipxi ja nayide'en ku ja Esaú ja tyeety kya'ukmøø'ñiyi ja kunuu'kxin ku ja tja'uk'amidoonaa; øy ja wyinmaa'ñ ja tja'uktayaaxnaa ni sudso ja kya'ukyikmøøñaa ja kunuu'kxin.

¹⁸ Ka'anim meets idø'øn ja Dios myøk'ajtin nayide'en xpaajti sam adøm ndeety'amøj t'ejxti ku ja kojpk Sinai ñitøøwyidity. Ni ja xaachkoots meets xka'ijxñim ma ja anaaw ja widsuk adsø'jkibim wyidity,

¹⁹ jøts nayide'en ka' xmadowdinim ja pujxujx midi yjawi xyiknajtimp ku ja nmado'owint, jøts nika' ja ayuujk tøm xmadowdinim janch møk midi dø'øn kyamidanaadyi ja jaa'y jøts yjanuu'kxaknidi, jøts jade'en jya'ukyikmigajpxnidit.

²⁰ Ja'agøjxp idø'øn ja jade'en ku ja adsø'jkibim ja kutujk yikmøødyi midi wamp: "Pøni pøn yø kojpk tyømpy pyatpy yika'tspa'ookp inet ja', uk yikumba'ookp øyi yjajiyujki."

²¹ Janch adsø'jkibim idø'øn ja t'ejxti tuki'iyi, ja sã Moisés paat kò'øm wyaañ: "Xjanchyikmiðejpnip øts ya'at et."

²² Ka'ats meets, ja Dios kyunuu'kxy'et jade'en tɔ xpaatti, jabi jotkujkxi meets ja Dios ja yikujk'yajtpi y'oy'ajtin tɔ x'ejxi mɔɔt ja y'ankilis kamachooni

²³ pɔn ja Dios twin'ɔɔgunajxtip. Tɔts nayide'en xpaatti pɔn ja Cristo tɔ tjanchja'wimyidi pɔn ja ñitso'ok'ajtin abaadi awejxnidip. Ja Dios meets idɔ'ɔn tɔ xwingunɔjksidi mididi dɔ'ɔn niduki'iyi ttiidyungɔxp, jɔts ja ɔyjaa'y'oo'kpi y'anmija'win mididi ja Dios jam mɔɔt chinaañidi, nayide'en meets ja mɔɔt ja winmaa'ñ xyikyɔ'ɔñidi.

²⁴ Jɔts ja Jesús tɔ xpɔtmidi pɔn jam Dios Teety wyingujkp xkugajpxindip pɔn ja ñi'jpy xnitanaa'yindip. Ka' xukpɔky'ajtyim ja y'o'jkin, ja maa'kxujkin ja ne'egi yajkpy jɔts ka'ap ja Abel y'o'jkin jade'en.

²⁵ Paty idɔ'ɔn yikxon x'ejxtit jɔts ja kyajpxy y'ayuujk xku'oojkidit, pɔ kuwanixi ja y'ayo'ombaaatti pɔn jaty ja Dios kyugajpxy tkamimadoodɔɔ. Jawaani kajaats adɔm xpaat'ajnt ja ayo'on, pɔni ka'ap adɔm ja Dios kyajpxy nmadooja'am ku adɔm ja tsajpjotp kɔ'ɔm xjamigajpxyim.

²⁶ Ojts idɔ'ɔn ja mɔk ujk ñajxy ku ja Dios kyajpxy jam Sinaí kojpkɔjpx. Yide'en ixyam ja y'ayuujk wya'añ jadigojk: "Ku ɔts wyinaty jadigojk ja ujk nyikmñ ka'ap ja naajx ja'ayi y'adɔ'ɔst, nayide'enxi ja tsajp y'adɔ'ɔstmit."

²⁷ Ku dɔ'ɔn ja Dios wya'añ ku tyik'adɔ'ɔst ja'ayi jadigojk tuki'iyi, ja' idɔ'ɔn ja tyijpy ku ja tuki'iyi tyikudigɔ'ɔty mididi jaty jawyeen tɔ tyik'ɔyi. Ka'ats ja sɔ yjattit mididi xemikɔjpx ja chinaa'yin tɔ yiktanibiktaagi.

²⁸ Ja'abi ɔy'ajntint adɔm idɔ'ɔn ja Dios tɔ xamidsɔjkyim, ka'ats idɔ'ɔn ja nijuuni sɔ yjatt, xemikɔjpx idɔ'ɔn ja y'ett. Paty adɔm ja Dios ngajxajkint, jɔts ɔy tsuj nwindɔ'ɔjka'ant pɔni sɔ dɔ'ɔn ja pyaat'aty jɔts pɔni sɔ dɔ'ɔn ja tso'ky;

²⁹ pɔ ja' kuxi adɔm ja nDios jade'en yikwindigɔy sɔmi jɔɔn.

13

Sudso tsinaa'yingɔjpx ja Dios nwindɔ'ɔjka'ant

¹ Kidim xja'dyigɔydi, ejtpim mnachokidit xem yam Cristo kɔjpx.

² Kidim xja'dyigɔydi, jɔts ejtp xtɔjkmɔ'odit pɔn jaty mdɔjktɔp ja'ttip, pɔ mayxi jade'en tɔ yjatti ku ja jabyɔɔ'kxy ja tyikpoo'kxti, ja Diostam idɔ'ɔn ja y'ankilis ja yikpoo'kxtip ɔy ja tjaganijawidi.

³ Nayide'en ja tsumyjaa'y xja'myatstij ejximdam meets jeexyip mdsunyi. Ja'myatsti pɔn jaty ja chinaa'yin tɔ tkuwanjatidi jabi mnija'widipxi pɔni sɔ dɔ'ɔn ja'abi ayo'on.

⁴ Yikxonim x'ejx'ettit m'amajstk'ajtin jɔts ɔy tsuj mnamyɔɔt'atidit, tyiidyumpy ja Dios ja wyinaty pɔn jaty namyɔɔt'atidip jadi'ñi yam ja tkaniyaa'yi uk tkanidɔ'ɔxyi.

⁵ Kidi ja meeñ ni ja pikta'aky nugo mganadyapikmyo'ojidit; tajotkujk'atti pɔni ti jam mmɔɔt'ajtip pɔ tɔxi ja Dios wya'añ: "Nijuuni me ngaja'dyigɔ'ɔty, ni nga'ixmatst."

⁶ Paty adɔm nwa'anint jotkujk:

"Ja ndeety'ajtim ɔts idɔ'ɔn xpudɔjkip, ka'ap ɔts ja ndsɔ'ɔgit pɔni sɔ xunwaa'ñ tu'uk ja jaa'y."

⁷ Kidi xja'dyigɔydi pɔn jaty tɔ mgajpxwijyidi jɔts ja Dios y'ayuujk tɔ mdukmadɔyidi; pawinmaydi sɔ ja chinaa'yin tɔ tyikɔxti tyikubatti, jɔts tundi jade'en sɔ ja yjanchja'win ja'adi.

⁸ Tu'ugyi dɔ'ɔn ja Jesucristo y'ity, nay ja' jekyip, nay ja'ats ixyam, nay ja'ats wyinaty xemikɔjpx ejtp.

⁹ Paty idɔ'ɔn xkamibɔktit pɔni ti jaty abiky jɔts tigach mjayiktukmadoodip. Dios y'oy'ajtingɔjpxxi ja anmija'win y'oy'aty jɔts ka'ap ja ja'agɔjpx ku yikpaduñ sudso kya'pxy ja ka'ayin ja uujkin, jabi nijuunixi ya'atpi tsinaa'yin ja ɔy'ajtin tɔ tyukpaadyidi pɔn jaty ja ɔy tjanchjabadundip.

¹⁰ Jawaani ɔy adɔm nwindɔ'ɔjkin jɔts ka' mibaat twindsɔ'jkin'attit ja mɔjteetywindsɔndi pɔn ja mɔjaa'gyutujk tyiktundipnim.

¹¹ Ku ja mɔjteetywindsɔn tyoxti ja jiyujk ni'jpy Amaagyunuu'kxy Tɔjktɔp jɔts ja pɔky wya'atst, kajp pa'am ja jiyujk nine'kx ja tyiknɔjktɔp jɔts ja jam tyiknitɔɔdyi.

¹² Nayide'ents idɔ'ɔn ja Cristo kɔ'ɔm y'ɔ'jky kajp pa'am jɔts ja naxwii'ñit jaa'y ttagunuu'kxy ja kyɔ'ɔm ni'jpy.

¹³ Wants t'ixmajtsnandi ja mɔjaa'gyutujk jɔts ja Cristo n'anɔjxkandit, ɔy ja sɔ njaguwanjajtandi sam ja yjaty.

¹⁴ Pɔ ka'axi adɔm ya naxwiiñ ja tsinaa'yin xemikɔjpx nmɔɔt'ajtyindi, ni'ixa'ayindipnimxi adɔm ja' mididi dɔ'ɔn me'emppnim ja'atpnmim.

¹⁵ Ja Jesucristo adɔm ja y'o'jkin xpudɔjka'amp jɔts ja Dios Teety ejtp nyikjotkujk'ajntint ku ja kyɔ'ɔm U'nk ja ndawindsɔ'jka'ant; jɔts nayide'en ja Dios ja n'aaw ja n'ayuujk ndadaxondaajkint.

¹⁶ Jøts kidi xja'dyigøydi ku ja Dios nayide'en twindsø'jkinjaw i ku ja mbiktə'aky xem yam mnadyabudøk iyidi.

¹⁷ Mimadowdi pøn jaty mgajpxwejidip; pø ja'axi dø'øn m'anmija'win t'ejx'ejttip jøts ñija'widip ja' ku ja Dios ja wyinaty nay ja' tyamachidi. Pudøkidi jøts jotkujk mmøøtunidit, kidi ayowim xundi, pø ni meetsxi wyinaty jotkujk mgatsøøni.

¹⁸ Ni'amido'ojik øøts, nibøktso'owik øøts, nitiixi ngapøkyjawi jøts jade'en øøts ja ndsojkin wya'añ ku ja n'anmija'win wa'ats jade'eñim y'ett.

¹⁹ Tundi may'ajt jøts øts jawaani møk xni'amidoowidit jøts wyinaty nnabyaətkojma'andi tsojk.

Yikyajkp ja kunuu'kxin jøts ja kajpxpoo'kxin

²⁰⁻²¹ Ja Dios Teety, pøn ja øy'ajtin tyajkp, ja' mgunuu'kxidip mguwa'anidip, jøts nwindson'ajtim ja y'oljkin mdabudøk iyidit jøts øy tsuj mdsøønidit mdanidit jøts ndungøjxindit pøni ti tø xamidsøjkyim. Mutsk borreegi u'ngin adøm idø'øn ja nwindson'ajtim Jesucristo x'ejx'ijtyindi pøn ja ñi'jpy tø tyaky jøts ja Dios Teety kyajpxy tø tyik'adujki, pøn adøm idø'øn xkøjø'ømit'ajtimp, øy ja ti xmø'øyint pøni ti jaty ja xamidsojkimp. Øy'ajtin agujkp ja Cristo xemikøjxp y'ett. Jade'en idø'øn ja y'ejxi.

²² Migu'uktøjkti, tuda'aky waani ya'at nøky xpa'ejxtit jøts xja'gyukidit ti dø'øn nda'ana'amdip. Winmadowdi waani ya'at ayuujk, øy idø'øn yø wine'en kyidyimgyajaaji.

²³ Nija'widi ku adøm nmigu'uk Timoteo tø pyuxøjktøjkpidsimy; pøni nabyaəjtíp øø pojin, nmøøtnøjkxp øts ja wyinaty.

²⁴ Kajpxpoo'kxti pøn jaty m'ana'amidip jøts niduki'iyi ja janchja'wibitøjkti. Nayide'en mguejxyidi ja kajpxpoo'kxin ja Italiit jaa'y.

²⁵ Mbaəttip ja Dios kyunuu'kxin niwine'enin jam mdsøønidi. Jade'en idø'øn ja yjatt.

JA NØKY MIDI JA SANTIAGO YJAAY

Ku ja Santiago tnijayi ja israelit jaa'y pøn tø ñawya'kxniyidi

¹ Santiago'ajtp øts. Øts ja Dios Teety, øts ja nwindson'ajtim Jesucristo nmidumpy. Ixyam mee nnijayi jøts øts ngajpxpøø'kxy niduki'iyi ja israelit jaa'y pøn jaty tø choondi ya jøts tø ñøjkxti tsinaabyi abiky tsoo.

Ja wijy'ajtin ja nija'win midi ja Dios yajkpy

² Meets migu'uktøjk, mbaat'ajtip meets ka' ti xkumayjawidit øy yjadyimyifn o midi ayo'on.

³ Nnija'windipts ku ja ayo'on ja myifn, jade'ents ja Dios x'ejxint xnija'wint ku tu'ugyi ja nwinmaa'ñ nyik'ijtyindi, kuts ja Dios amumjoojt njanchja'windit jøts jade'en'ampy ja øy'ajtin ja tuda'aky'ajtin njagyajpindit.

⁴ Øy ka'pxy yikxon mwinma'adyit, winets nayide'en yikxon mwimbidsø'ømxiyidit ja m'øwyinmaa'ñ jøts xjagyaptit ja ja'gyukin, kidi mwa'andi jøts ku ti mga'ijtyxidi.

⁵ Jøts pøni jams meets winaagin pøn ka'ejtxidip ja wijy'ajtin, ja ja'gyukin, amidowdits ja Dios jøts ja mmo'ojidit, pø ja'axi tuki'iyi tyajkøjxp, ka'ap ja ti t'ama'at'aty jøts ka'ap ja ti tyamigajpxy.

⁶ Ja'ats idø'on tsojkip jøts tu'uk amumjoojt n'amido'owint, ka' nwinmaa'yint majtsk aaw majtsk joojt.

⁷ Pøni pøn jade'en winmaapy, ka'ap ja Dios ja ti y'ukmø'øñiyit,

⁸ Ja'agøjxp ku ixyam ti t'uktøky jøts jabom ja wyinmaa'ñ tyiktigatskojmi, ka' tu'ugyi ja wyinmaa'ñ tyik'ity.

⁹ Jøts pøni pønts ayoop winmaapy, pøn tpaduujnidip ja Dios yja', jotkujk idø'on t'ejxnidit, tyaxonda'aktip idø'on ku Dios nøjxx wyaadso'oniyidi jøts ja yiknitsø'ok'atidit.

¹⁰ Jøts nayide'en pøni jam pøn kumeeñ'ajtp jøts pøni pyaduujnidip ja Dios yja', jotkujk idø'on ja ñayjawiyyidit øy myeeñ ja yjagyiktamøj'ejxti. Jabi yiknitsø'ogidipts ja Dios ja' ku wyinaty twingunøjkiñidi.

¹¹ Tigøøpy ja kumeeñ jaa'y ja myeeñ ku ayo'on myifn. Nayide'en ñamyayi yjaty sam ja ujts pijy u'ngin yjaty ku ja xøøw cha'ayiyi jøts ja tyøtskøjxni ja pyijy.

Ku ja ka'øybi x'amutsk'ejxw'a'ññidi

¹² Janch jotkujk meets ku tuda'aky mjaa'y'atti øy ja ayo'on xjapaatti; ku jade'en mmajada'akti, winets ja mmø'øyidi ja Dios ja jujky'ajtin midi xemikøjxp, midi ja Dios mdamidsojkiyidip, jade'en'ampy ku ja Dios xtsojkti.

¹³ Ku pøn ñayjawiyyi ka'øybi ttunwa'añ, kyø'øm winmaa'ñ ja yiktump, ka'ap ja Dios yø'øbi winmaa'ñ tyaky; ka'axi ja Dios twinmaa'ñ'aty jøts ja axøøkpi yiktu'unt, jøts nipøn ja jade'en tkawinmaa'ñnyø'øy jøts ja jade'en ttu'unt.

¹⁴ Ku pøn jade'en ttunwa'añ ja ka'øybi, kyø'øm winmaa'ñ, kyø'øm tsojkin ja jade'en pyadundip.

¹⁵ Yø'øbi ka'øwyinmaa'ñ, pøky yø'; jøts ku ja pøky yikmøø'aty, ja o'jkin tigø'øyin ja yajkpy.

¹⁶ Migu'uktøjk, kidi mnawyin'ifñidi;

¹⁷ tuki'iyi ja øybi tsujpi midi nmøø'ajtyindip, Dios yø tyajkp, tøxi ja tpikta'aky ja jaj ja tøø'kx jam tsajpwemp. Tu'ugyi ja', ka'ap ja tyigach.

¹⁸ Tø ja Dios xmø'øyim ja øy'ajtin midi xemikøjxp ku njanchja'wa'am ja kyajpxy ja y'ayuujk, ja tiiby ja janchpi, ja'agøjxp ja jade'en ttuñ jøts adøm nyiktsø'ondak'okwa'änint pøn ja pyabøjkpi'ajttip, sam ja ttamidsøkyin.

Sa yikpaduñ ja Dios yjanchja'win

¹⁹ Paty, migu'uktøjk, njaaknigajpxy jøts tuda'aky mjaa'y'attit. Yikxon xmadow'ettit ja mmigu'uk sa wya'añ, kidi mnay'øøjyidi, jøts kidi mmigu'uk xmi'ambøkti.

²⁰ Nisudso'ampy idø'on ja Dios xkadajotkujk'ajtyindi ku ja nmigu'uk nmijot'ambijkyindi.

²¹ Paty mastu'utti tuki'iyi midi ka'øy, ja ka'øwyinmaa'ñ jøts ja ka'ødyunk. Møj pikta'akti yikxon ja Dios kyajpxy midi tø myiktukmadøwi; pø yø'øxi tyanitso'ok'attip ja n'anmija'windi.

²² Padundi dø'on pøni sa jaty ja Dios kyajpxy wya'añ, kidi ja'ayi nugo xmadøwi. Nawyin'øø'nindip nugo ku ka'nbadu'unint.

²³ Pøni pøn jade'en adøtsp, jade'en ja ñamyayi n'ukpiktaajkint ejxim ja jaa'y pøn tku'ejxip ja wyeen ja y'aaw jap ejxjøtpy

²⁴ jøts ku ka' wya'adsi. Ku ñijky, ka' tja'myech jøts wyimbujt.

²⁵ Jotkujk idø'on ja ñayjawiyyidit pøn ja Dios kyutujk tpaduujnidip midi xyik'awa'atšpidsø'ømimip, ka'ap ja ja'ayi nugo tpatmadøy.

²⁶ Pøni mwandip jøts ja Dios yja' xpaduujnidit, jøts nay jatyi ja mdoojts nugo xyik'awidetti yam nadyijyi ja Dios yja' xpaduujnidi, jade'ents nugo mnawyin'hiñidi jøts ka' x'ukpadunidi jade'en.

²⁷ Ja' ja Dios Teety kyupijky ku nbudøjka'ant ja ku'økyu'un'k jøts ja ku'økytø'øxy pøn ayoodip, jøts nayide'en ka' nugo nbøkyu'unint yā naxwiñ.

2

Ka'ap pøn ñay'øy'ejxidit kyanay'øy'ejxidit wan tjaþøni

¹ Meets migu'uktøjkti, pøn jaty tjančja'widip ja nwindson'ajtim Jesucristo ku ja wa'adsi ku ja myøji, kidi meets pøn x'øy'ejxti xka'øy'ejxti wan tjaþøni.

² N'ukpiktaajkimp tu'uk ja madya'aky, pøni tøjkidip ja jaa'y jap mā meets mnamyukyidi, tu'uk kumeen' jaa'y janch xyøxy janch wyeti janch ñaamyi, jøts jadu'uk ayooi jaa'y nipach ixpach,

³ jøts ku ja'ayi øy tsuj xkajpxpoo'lxxti, ja' pøn janch kumeen' pøn janch xyøxy, jøts ja øyi tsinaabyajt xmo'odi, jøts ja ayooi xkamøjpikta'akti jade'en xnøjmidi jøts wan ttani uk najxkiy chøønit,

⁴ pø yide'en'ampxyi yik'ixy yiknijawi ku tu'uk x'øyjawi jøts jadu'uk xka'øyjawi. Ka'ap jade'en y'øyi, mbøkyundip jade'en.

⁵ Ukmadøwdi, migu'uktøjk, jøts ja'gyukidi ya'at: Ja ayooi jaa'y pøn ejttip yā naxwiñ, ja' idø'øn ja Dios Teety tø wyi'ijxyidi jøts ja tjančjawidit ja Dios yja' jøts yikmo'odit ja y'øy'ajtin midit ja Dios ja yjaa'y tyanitanaapy, pø tøxi ja ttamidsøky jøts ja tmo'ot pøn tsojkiyip.

⁶ Jøts meets, jade'en meets ja ayooi jaa'y nugo xtsø'ødyundi ku xkamøj'ejxti. Nayide'en meets ja kumeen' jaa'y mjatu'umiyidi ku myikni'øø'nidi jam kudunk wyindump.

⁷ Yø' nayide'en tka'ødeyjetip tka'øñimadyaktip ja nwindson'ajtim Jesus pøn adøm xyiknitso'ok'ajtindip.

⁸ M'øy'adøtsp meets wyinaty pøni mbadundip ja Dios Teety y'ana'amin midit yide'en wamp: "Tsok ja mmigu'uktøjk, windsø'øgi ja mmigu'uktøjk, jade'en xtsokt jøts jade'en xwindsø'øgit sã kø'øm mnachøkyi jøts sã kø'øm mnawyindsø'øgyi."

⁹ Pøni jamts meets ja mmigu'uktøjk x'øy'ejxti xka'øy'ejxti wan tjaþøni, mbøkyundipts idø'øn jade'en, ka'ap ja Dios y'ana'amin jade'en xpaduujnidi.

¹⁰ Øy ja Dios kyutujk ka'pxy njabadunwa'añindi jøts jam tu'uk y'ana'amin kyayikpaduñ, pøkyu'unindipts adøm idø'øn ku ka' ka'pxy yikpaduñ.

¹¹ Nay ja' midit tyikutujk, jøts yide'en ñimy: "Kidi mmigu'uk ñiyaa'y ñidø'øxy xpøjkxi", nay ya'at tyikutujkmaa jøts: "Kidi myikjaa'y'øøky." Øy pøn ja myigu'uk ñidø'øxy ja tjaþapøjkxi jøts ja ne'egi yikjaa'y'øøky, pøkyumpts ja jade'en ku ja Dios yja' ka'pxy tø tkabaduujni.

¹² Øy yixkon ngajpxint ndu'unint sam ja Dios tšøky, jabi nay ja'abi kutujkxi xäidyu'unimp midit ja nitso'ok'ajtin nayide'en tyajkp.

¹³ Pøni pønts ja myigu'uk tø tka'ayo'ixy, nayide'ents ja Dios ja nøjkk ka'ayo'ijxyim tyäidyuñyi; pønts ja myigu'uk t'ayo'ejxp, pyaåtpts ja' ja øy'ajtin ku ja tiidyu'unin ñaxt.

Ja janchja'win jøts ja ødyu'unin

¹⁴ Migu'uktøjkti, çti ja ñiwy'a'ant ku ja'ayi nwa'añim ku ja Dios njanchja'wa'am jøts nika'ap ja øyi n'ukpadu'una'am? Ka'ap jade'en ja nitso'ok'ajtin nbaajtint.

¹⁵ Ku n'ukpiktaajkint ku tu'uk nmigu'uk ti kya'ijtxyi ejxim ja kyaaky ja wyet,

¹⁶ jøts nnimaa'yint: "Mbaatp ja mwet ja mnaamy ja mji'ikxy", jøts ka' ti nmø'øyint pøni ti yjatsøjkpy. çTi ja ñiwy'a'ant jade'en?

¹⁷ Ku ja Dios njanchja'wa'am jøts nika'ap ja nmigu'uk n'ukpudøjkiña'am, ka'ap ja janchja'win jade'en tyuñ.

¹⁸ Jamts pøn jawamp: "Mets ja Dios mjanchja'wip, jøts ka'ap ja mmigu'uk xpudøki; jøts øts, øy øts ja Dios ngajanchjawi, nbudøjkp øts ja nmigu'uk." Jade'en'ampyts idø'øn ja janchja'win yik'ixy yiknijawi ku nbudøjka'am ja nmigu'uk, kuts ja nmigu'uk ngabudøjka'ant nisudso'ampyts ja Dios jade'en ngajanchja'wa'andi.

¹⁹ Mjanchja'widip meets ku jaa tu'uk ja Dios, øyi jade'en; nayide'enxi ja miku' tjančjawi ku jaa ja Dios, kyudsø'jkpts ja'.

²⁰ Kidi nugo mgujuun'aty, çka' xnijawi ku ja njanchja'win jade'en wyingaxi'iky ku ja nmigu'uk nbudøjka'ant?

²¹ Jade'en'ampy ja n'apteety'amøj Abraham ja Dios kyupøjki ku ja tpaduun' sam ja Dios tšøkyin jøts ja y'u'nk Isaac ttamiyox.

²² Ja'gyukidi meets jade'en jøts ku ja Abraham jade'en tñanky'ijxyi ja yjanchja'win ku jade'en tpaduun', jøts jade'en ttuk'abaaty ka'pxy ja yjanchja'win.

²³ Y'abaajt idø'øn jade'en ja Dios kyajpxy ku wy'a'añ: "Ojts ja Abraham tjančjawi ja Dios, ja'ats ja Dios y'øyja'wiyi'ñi jøts ja ojts tkupiky." Paty ja Dios myigu'ukjawi ja Abraham.

²⁴ M'ejxtip mnija'widip ixja sa ja Dios tkupiky ja jaa'y ku ja tpaduñ, jøts ni kidi ja'ayip tu'ugyi sam ja yjanchjawi.

²⁵ Nayide'en ja ka'odyø'øxy Rahab ja Dios kyupøjkøø jade'engøjxp ku ja t'ødyuñ ja Dios kyugajpxy; ku tjonmøøy ttøjkmøøy jøts abiky tyuu' ttajøpkajxiy'iñ ku ja myidsep wyinaty pyayø'øyi.

²⁶ Ka'ap jade'en tyuñ ku ja Dios njanchja'wint ku ngabadu'unint sam ja ttsøkyin. Jade'en ja tpaaty sam ja jaa'y'øøgyin, ka'ap ja ñine'kx tyuñ ku y'anmija'win kya'uk'ejtni.

3

Sam nugo yø toojts yiktakajpxy

¹ Meets migu'uktøjk, ka' pyaat'aty jøts mee niduki'yiyi myik'ixpøkt. Pøn t'ejxtip pøn tnija'widip, ja' ka'pxy tpadundip. Nay jade'ents ja møk yiktabayø'ødyit ku ja ka'pxy tkabadu'undit.

² Tum jade'en ja tundigø'øyin yikjagyepy; winaaagin ja' pøn katundigøødyip kakajpxigøødyip, ja' idø'øn janch'øy jaa'y ku ja tpaduñ ku ja ñay'ejx'ityiyi.

³ Jade'en'ampyts ja kawaay kyajpxy kyupiky ku ja axots tmøøt'aty y'aaawjøtpy mididi yikwa'k'øyip, øy mididi'ampy nduknøjkxint.

⁴ Ku n'ukwinma'ayint nayide'en sam tu'uk ja barki yø'øy; øy janch jamøj ja' jøts ja poj ja wyetsmiñi wyetsxøpyi, mutskts ja pujxu'nk mididi ja jaa'y'yikyø'øpy, jøts ja tyikyø'øpy pøni ma ja ttsøky.

⁵ Nayide'en yø toojts; win'ii'nxyip ja' mididi xyikajpxigø'øyim. Jade'en yø' kidim ja jøøn tyøøbyikyin jøts ja tyøømyøji, jøts ja et tyøøyi.

⁶ Jade'en yø toojts ejxim ja jøøn tyøøyin. Yø' amuum xyikma'jtimp ku xyikajpxigø'øyint xyiktundigø'øyint. Miku' yø jade'en xuktu'unimp.

⁷ Yikyujpy ja jaa'y o mididi jiyujk, wan tjooni wan tsaa'ñi jøts ja' mididi tsinaadyip mejjyotp.

⁸ Ka' pøn mibaat jade'en ja toojts tmimada'aky, tundigøøpy yø nugo.

⁹ Nayi toojts xyikajpximp ku ja Dios nja'myejchim n'ajot'ajtyim, nayø'øts ja nmigu'uktøjk xukmigajpxigø'øyim, Diosts jade'en ñamyayi nmigajpxigø'øyim ja y'agojnajxy mididi kø'øm tø tpikta'aky.

¹⁰ Nayi aawjøtpy pyidsimy ja øgyajpxy tsujkajpxy, jøts nay jaayi pyidsimy ja axøøkajpxy. Migu'uktøjk, ka'ats idø'øn jade'en yjapaat'aty.

¹¹ Ku n'uk'ejxint ma ja wa'ats nøø pyidsimy, tu'ugyixi ja wya'atsnøø'aty, ka'ap jam ja tya'mtspi, ka'ap jam ja pya'akpi.

¹² Migu'uktøjk, ¿m'uk'a'ejxip meets tyøømit jam iigi kipkyøjxp ja wenk tsaa'm? Ka'axi mibaat nayide'en ja nøø pyidsimy jam nøømu'utjotp ja tya'mtspi ja pya'akpi.

Ja ja'gyukin mididi ja Dios yajkpy

¹³ Pøni jap pøn tñimadøy tñijawi, wan tñanky'ijxyi sa ja y'øy'ajtin ja y'øyjaa'y'ajtin, wan jade'en ja ja'gyukin tyiktuñ jøts ka' ñamyikaxit.

¹⁴ Pøni ja meets ti mnadyami'ama'at'atyidi ku nugo kø'øm jade'en xwinmaa'ñ'atti, ka' ja ja'gyukin jade'en xnanky'ijxyidi, taay yø jade'en pyidsimy.

¹⁵ Ka'ap ja Dios jade'en xuknija'wim jøts jade'en n'adøøtsint, ja' jade'en adøøstip pøn ka'øyjaa'dyi ku ja miku' jade'en tyuktuñidi.

¹⁶ Ma y'ity ja windi'ñ'ajtin jøts ja nadyami'ama'at'ati, nay jam y'ity ja tsep jøts o ti axøøk'ajtin.

¹⁷ Pøn ja ja'gyukin ja Dios møøjyip, ja'ats øyjaa'y'ajttip, wa'ats chinaa'y'in ja tyiknaxti; ka'ap cheptundi chepkajpxti, myøøt'ajttip ja tuda'aky'ajtin jøts ja ja'gyukin. Tsaach'ejxtip jøts ja øy'ajtin ttundi; ja myøkwinnmaa'ñ pyadundip, ka' twindaay'atti ja wyinnmaa'ñ.

¹⁸ Pøn tja'gyukip tkajpxkukip, ja'ats ja øy'ajtin ttukpatp ja myigu'uk.

4

Ka' nminamyaa'yint ja ka'øy'ajtin mididi yq naxwiñ

¹ ¿Ma chøøñ ja tsep ja aka mididi mdundip? Kø'ømyi xyiktso'onda'akti ku ti mnadyami'ama'at'atyidi.

² M'animp m'adsøjkpy pøni ti mmigu'uk myøøt'ajtpy, kuts ja xkapaatti winets ja tsep xyiktøkidi, jøts jade'ents ja mmigu'uk xyik'ookti. Ka'ap agujk jotkujk m'etti ja'agøjxp ku ja Dios xka'amidowdi xkabøktsoowdi mididi mdsojktip.

³ Pøni m'amidoodip mbøktsoodip jøts ka' myikmo'odi, jade'engøjxp ku øy ka'øy x'amidowdi jøts xyiktunwa'andi nugo ma ka' pyaat'aty.

⁴ ¡Meets mga'øwyinmaadyip! ¿Ti kidi meets xnijawi ku øy møøt nnayja'win ja' mididi ja Dios kyatsøjkpy, jade'en'ampyts idø'øn adøm ja Dios nmidsepøjkna'am jøts nga'ukja'myajtsna'am?

⁵ Yide'en jap nõkyjxpy wya'añ: "Øy xtsojk'anajxym ja Espiritu Santo midì ja Dios xukni'ejtimp jøts ka' t'øyjawi ku wenkpi nbadu'unint."

⁶ Dios ne'egi xmay'ajtimp xpudøjkimp sam ja kyajpxy ja y'ayuujk yide'en wya'an: "Myi'ambijky ja Dios pøn namyøjpiktaajkiyip; pønts tuda'aky'ajtp øy'ajtp, pudøjkijypts ja Dios ja'."

⁷ Amumjoojt mnadyamioxidit ja Dios. Møk windanidi ja miku' jøts mniw'aqdsiyidit.

⁸ Wingunøjkxidi ja Dios jøts ja ne'egi mnimeniyidit. Yikw'aqtsti ja mbøky, meets, ku nugo ja Dios majtsk'aaw majtskjoojt xtsokti, ku xpadundi nayide'en ja ka'øybi.

⁹ Jotmay'ookti, taya'axti ja mbøky. Kidi jotkujk mnayjawiyidi ku tøm mbøkyundi. Yikmendi ja mwinmaa'ñ jøts xjagyaptit ja jotmay.

¹⁰ Nabyikta'agidi yik'ayowim nwindson'ajtim wyingujkp, jade'ents ja ñitso'ok'ajtin ja møj mmo'ojidit.

Ka' nugo nbayø'øyint ja nmøøtjanchja'wibi

¹¹ Meets migu'uktøjk, kidim mnabyagajpxyidi nidu'uk ja nidu'uk. Pønts jade'en pagajpxp, pønts ja myigu'uk jade'en tpøky'ejxp, ja Dios ja kyutujk ja jade'en wyindsojip ma wya'añ jøts ku ja nmigu'uk ndsojkint, tiidyumbits ja ne'egi nugo ñabyikta'agyi jøts ni tkabaduñ kø'øm ja kutujk.

¹² Tu'ugyi ja' pøn ja kutujk tmøøt'ajtp, nay ja'ats xpayø'øyimp, ja'ats nayide'en xyiknitso'ok'ajtim, nay ja' xyikwindigø'øyimp. ¿Mbøen mets ku xpøkyayø'øwya'añ ja mmigu'uk?

Ka' yiknijawi pøni ti memp jabom wixøjkp

¹³ Uknadowdi meets sa x'ukwinmaydi: "Jabom wixøjkp njaa'mint abikyajp jøts jam tukjumøjt n'ejtint. Najxint ndøjka'ant, jamts ja meef jade'en nbaajtint",

¹⁴ nipøn tkanijawì pøni ti memp kidakp jabom wixøjkp. Jade'en adøm n'ijtyindi ejxim ja yoots n'ejxint, jøts nay jaayi n'ejxint, tøm tyigøøgyomi.

¹⁵ Yide'en ne'egi mwa'andit: "Pøni xpudøjkimp ja Dios, winets jade'en ndu'unint pøni ti jaty ndunwa'añimp."

¹⁶ Meets ja mgø'øm winmaa'ñ mee myiktunwampy jøts ja namyikaxi; ka'øyts idø'øn yø jade'en pyidsimy.

¹⁷ Pøn wa'ats tjanija'wip jøts ja ka'pxy tkabaduñ, pøkyundipts ja jade'en ne'egi.

5

Sa ja kumeeñ jaa'y yikajpxwejtì

¹ Madowdi meets kumeeñ jaa'y! Mdaya'axtip ja mwinmaa'ñ ku ja ayo'on xpaattit x'ejxtit.

² Tuki'iyi ja mjujky'ajtin jadi'iñi pyutskøjxnit jøts ja m'øybi wet ja m'øybi naamy ja kipkyaa'tspi jadi'iñi tyikwindigø'øty.

³ Towigyøjxp ja oori ja plati midì mmøøt'ajttip, jade'ents idø'øn m'ukyik'ejxtit m'ukyiknijawidit ku møøt mwindigø'ødyit ja mbikta'aky. Tøxi ja mgumeeñ'ajtin øy xpaatti, wingompxi ku ja tiidyu'unin mye'ent.

⁴ Ja kamdumbi pøn tøm xkamijuudyi, ja' myiktabayø'ødyip. Wa'ats ja nwindson'ajtim ja t'ixy tñijawi ku ja mdumbi jade'en xkamijuudyi.

⁵ O meets ya naxwiiñ jotkujk xyiknaxti, o ti kø'øm tøm mnadyamay'atyidi, wingompts ja xøow ku ja tiidyu'unin mye'ent.

⁶ Tøm ja xmidundigøydi pøn ti tkatump pøn ti tkanija'wip, jade'en idø'øn ku nugo tøm xpayø'ødyi jøts xyik'ookti ku ka'ap ja møk'ajtin tjagyapti.

Ja tuda'aky'ajtin jøts ja dios'ajot'ajtin

⁷ Meets migu'uktøjk awejxti tuda'aky, kunim ø nwindson'ajtim mye'ent, nayide'en sam ja kamdumbi tuda'aky t'awixy ja tuu jøts ja pyikta'aky tpøkmukt.

⁸ Nayide'ents meets x'awejxti tuda'aky, kidi nugo mjotigøydi, wingomp jøts mye'ent ja nwindson'ajtim Jesucristo.

⁹ Meets migu'uktøjkti, kidi nugo mnagyajpxyidi mnay'øjyidi jøts ka' myikpayø'ødyit; wingompxi ja Dios pøn ja naxwii'ñit jaa'y tiidyunidip.

¹⁰ Migu'uktøjkti, windanidi ja m'ayo'on nayide'en sam ja Dios Teety kyugajpxy twindanaay ja yja'.

¹¹ Jotkujk ja'adi pøn tøm tyiknaxti amumjoojt ja y'ayo'on. Pøm tøm xñijawidi sam ja Dios kyugajpxy Job ja ayo'on t'ijxy, jade'ents ja øy'ajtin ja Dios myøøjyi; x'ayo'ejximpts xpudøjkimpts ja Dios jade'en.

¹² Meets migu'uktøjk, yø' mdu'undip ku ti xkajpxtit ku ti xu'undit, t'y'ajtin mgajpxtit. Kidi nugo xuk'ejxti ja Dios ku nwa'anint "Tiy ja'", t'y'ajtints ja'; kuts nwa'anint "Ka'ap ja tyiy'ajtin", tyimwya'animpts jade'en ku ka'ap tyiy'ajtin, ka'ats ja Dios jade'en xpayø'øyint.

¹³ Pøni jam pøn y'ayøy wyinmay, wan ja Dios t'ajot'aty. Pøni pønts agujk jotkujk tyiknajxp, wants ja t'øwdi ja kunuu'kxy ayuujk.

¹⁴ Pøni pøn pøjkip, wants ja twaadsøy ja møjaa'dyøjk pøn tundip tsaptøjkjotp, jøts ja kyugajpxidit jøts aceite tpikta'aktit nwindson'ajtim køjxp.

¹⁵ Ku amumdu'uk t'ajot'attit ja nwindson'ajtim, tso'okpts ja pamaa'y. Pøni tø tyundigø, yikpojkpimaa'kxpts ja'.

¹⁶ Paty nayide'en mnadyamimayatsidit ja mbojkpi nidu'uk ja nidu'uk, jøts ajot'atti ja Dios pøni pøn pøjkip jøts cho'okt. Pøn øyjaa'y'ajtp jøts amumjoojt ja Dios t'amido'ot tpøktso'ot, jade'ents ja Dios myøk'ajtin myajada'akt.

¹⁷ Ja Dios kyugajpxy pøn txøøw'ajt Elias nayide'en ja y'ijty sam adømin; ku ja Dios ja t'amidøøy jøts kyatu'ut, winets ja tuu kya'ukmenaa tigøøk jumøjt jagujkp.

¹⁸ Jøts ku jadigojk t'ajot'ajty ja Dios jøts tyu'ut, xjats myiini ja tuu jadigojk xjats ja pikta'aky y'øyiyi'iñ.

¹⁹ Migu'uktøjkti, pøni jaa pøn tka'ukpaduni sam jawyeen tø t'ukpaduñ, jats ja' pøn ja nayide'en tukpaduniyip,

²⁰ mnijawidipts nayide'en ku tø tyiknitso'ok'aty ja mmigu'uk y'anmija'win jøts yik-maa'kxtit ja pyøky.

JA MYĪDU'UKPI NØKY MIDI JA PEDRO YJAAY

Ku ja Pedro tnijayi ja janchja'wibitøjk pøn tø ñawya'kxniyidi

¹ Øts idø'øn Pedro nxøøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam njā'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwa'kxnidi mgajpkøjxp jøts jam tø mnøjkxti jam Ponto, jam Galacia, jam Capadocia, jam Asia jøts Bitinia.

² Tøyip meets ja Dios Teety mwi'ejxniyi jøts ku meets ja m'u'nk'atiyit sayim ja tniwinma'ayiyi'ñ. Yø Espiritu Santo meets ja mdabudøjkiyip, jade'en'ampyt meets ja Jesucristo yja' xpaduujniyi ja'agøjxp ku ja tø myikwaajtsiyidi ja mbøky, pø adømx nbokey ja xkubajta'am ku ja chuuñ tyajxy. Dios mjanchkunu'kxidip jøts øy tsuj xyiknaxtit.

Ja tsinaq'yin midi awejxngøjxp nyiknaxxyimp

³ Tkaxjakyim ja Dios Teety pøn ja nwindson'ajtim Jesucristo tyeety'ajtpy, ku ja xjanchpa'ayø'øyindi jøts ja jadigojk xukpaajtyin ja jujky'ajtin xemikøjxp. Xjats ja jade'en tø xja'bikyindi jøts ja xukjøp'iixyindi amumjoojt ja'abi jujky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy jujky'ajtpi xemikøjxp.

⁴ Paty tu'ugyi njøp'ejxin jøts ku ja Dios ja myaay xmo'øyim, pø tøxi ja t'a'ejxi jap tsajpjøtpy pøni ti ja xmoøwya'animp midi tum øy, midi nisā kajajtp.

⁵ Jøts kumi m'ajot'ajtpy meets Dios amumjoojt, jade'ents meets ja myøk'ajtin ja mdabudøkiyi kunim meets ja jujky'ajtin xtyimbyaatt midi xemikøjxp, jøts jaanim ja tñanky'ejxit wiingyubety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanchjagu'ayo'ombaadidi yø'øbi winmaa'ñ.

⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jawyeen y'atswidø'øty winets ja yik'iixñim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajadakixy ja ayo'on pøni sa ndyimy jagujajta'am ja øwynamaa'ñ, ja'ats idø'øn jawaani tyimy'øy pø ka'axi ja jade'en wyindigøøy sam oori. Jade'en meets ja mjanchja'win yikmøk'ixy ku xmidanaagøøxtit ja ayo'on, ja'ats mee myiktagupøkp, nay ja'ats mee myikta windsø'øgip myiktamøja'wip jam nwindson'ajtim wyingujkp ku ja jadigojk ñankñigaxø'øgyit.

⁸ Mwampy mdsøjkpy meets ja nwindson'ajtim Jesucristo, m'ajot'ajtpxi meets ja' øy meets ja xjaga'iixñim, patyts meets xmoøt'aty ja kunuu'kxin,

⁹ jøts ku xnijawidi ku ñitso'ok'atti ja m'anmija'windi xemikøjxp; jats idø'øn m'ajot'ajtin tyundi, jade'en idø'øn ja wyingaxi'iki.

¹⁰ Tøyip Dios Teety kyugajpxy tpamaydi tpadajti yø'øbi nitsoojkin ayuujk, jøts tñigajpxti jøts ku meets Dios y'øy'ajtingøjxp mmo'owa'añiyim yø yjade'embi.

¹¹ Ja Espiritu Santo midi ja Cristo tkajxp, ja' ja kugajpxy ttukmadoojidøø sa jaty ja Cristo yiknitsokpi wyinaty yjatwa'añ ku ja y'ayo'ombaatt, jøts sa nayide'en yikwindsø'øgit yikwinjawit. Ja'ats ja nugo pyamaadyip pyadajtip ja tyimy'ukpøn idø'øn ja' jøts juunim idø'øn ja jyatyimy'ukme'ent ku ja Espiritu Santo ja jade'en tyukmadøyi.

¹² Ku ja Espiritu Santo ja jade'en tyukmadøyi jøts ku ja ka' tpaattit t'ejxtit midi wyinaty ttunwajnip, adømnimts inet ja ixyam nbaajtyim n'iixyim jøts ja myiktukmadowdi ja nitsoojkin ayuujk nayide'en sa jaty ja Espiritu Santo ja tø tyuknijawiyidi pøn jaty kajpxwa'kxtip jøts ku dø'øn ja jade'en tø yjaty. Ankilis paat ja tjantyimy'ejxwa'andi tjantyimñijawiywa'andi sudso'ampy adøm nnitso'ok'ajtyindi.

Xwaaqdsø'ojimp ja Dios jøts ja ndsinaq'yin wa'ats tsuj nyiknaxjint

¹³ Paty øy jawyeen xwinma'adyit ku ti xunwa'andit, kidi møj kamøj o ti xjawidi, jade'ents mdsinaq'yin øy xyikyø'ødyit. Amumjoojt meets ja Dios y'øy'ajtin ja kyunu'u'kxin xjøp'ejxidit midi ja yakwampy ku nwindson'ajtim Jesucristo mye'ent jadigojk.

¹⁴ Madowdi, jade'en mmado'odit sam jaa'y y'u'nk myimadøyin. Kidi jade'en m'uktsinaañidi sa y'iijty mga'øchøonidi ku Dios wyinaty ka'anin xpabøjkidi ja yja'.

¹⁵ Øy tsuj mjaa'y'attit jøts jade'en x'aduunaxtit ja Dios Teety wya'ats'ajtin y'øy'ajtin, pøn idø'øn tø mwi'iixyidi;

¹⁶ pø yide'enxi jap nøkyijxy wya'añ: "Øy tsuj mjaa'y'attit sam øtsin, kumi ka' ø nbøkmøødi."

¹⁷ Pøni mdeetyja'wip meets ja Dios Teety, windsø'øgip meets idø'øn ja ejtp, pø ja'axi ka'pxy tiidyu'ump sa pønjabøn ja chinaq'yin tyikyø'øy, ka' pøn ja tiidyu'unin tkapaatt.

¹⁸ Jabi ja Dios Teetxyi meets tō mduknitso'ok'atyidi ja ka'øchinaa'yin mididi adøm ja n'apteety'amøj tō tpamendi t'pabatti; mniija'widipts wa'ats jøts kidi oorip platip ja yiktaguyajkip, windigø'y'ejtpxi yø'.

¹⁹ Ja' ja yiktaguyakiyi'ñ ku ja nwindson'ajtim jade'en wyidsuufi wyidajxy, øy ja niti pøky tjagamødi sam ja borreeg'u'nk y'ijty yiktamiyøxy ja Dios Teety.

²⁰ Windi'ixyip ja tanibiktaagi y'ejtni, namga'anin ja naxwii'ñit cho'onða'aky, xjats ja yamnim tō myiñ ku kyøjxwa'añ ja naxwii'ñit jøts ja xa'ødyøkidit ma ja Dios Teety.

²¹ Ja nwindson'ajtimgøjxp meets ja Dios Teety xpabiky mididi tō tyikjujkyky jadigojk xemikøjxp; jade'en'ampy ja tō tmø'øy ja myøk'ajtin, ja kyutujk, jøts ja njanchja'win amunjoojt, jøts tu'ugyi njøp'ejx'ejtin ja Dios.

²² Jade'ents ja m'anmija'win wa'ats y'etti ku ja Dios tyiy'ajtin xmimadojidi mididi ja Espiritu Santo xuknija'windip. Jade'en'ampyts mnabya'ayowidit, tsokti, wa'andi ja mmigu'uk sa Dios tsokyin.

²³ Jade'en idø'on tpaaty, tō meets jadigojk mga'axigach, ka' meets ja ñamyayi x'ukteety'ajtni ja jaa'y mididi oo'ktip tigøødyip, ja Dios meets ja kyajpxy tō myikjujky'atigachidi mididi nijuuni sa kajajtp.

²⁴ Kumi nømp ja':

Jade'en idø'on naxwii'ñit jaa'dyi sam o ti ujtšin,

jøts ja tyunk jade'en sam ujtspijy mididi ja tyiknigaxø'kp.

Paty tuki'iyi wyindingøy, ti ti uktamp ku ujtš tyi'ich, pø nayide'enxi ja pyijy wyindingøy;

²⁵ jøts kuts ja Dios ja kyajpxy, ejtp ja xemikøjxp, ka'ap ja kyudigøy.

Yø øgyajpxy yø ømyadya'aky mee myiktukmadoop.

2

¹ Paty x'ixmatstien tuki'iyi ja mga'ødyu'unindi, ja mga'øwynma'andyi, wine'en mwini'øø'ndi, wine'en o ti mnadyawindaay'atyidi, wine'en x'ama'at'atti, xka'ødyejti, xka'øbyikta'akti pøngapøn.

² Nayide'en sam tu'uk ja maxu'nk ñamgaxi'iky jøts ja chetsk tsojk mabaadyim tpaatwa'añ, jade'ents meets idø'on xtsoktit ja Dios kyajpxy y'ayuujk, mididi øy mididi wa'ats, jøts jade'en ja njanchja'win myiweni'adø'øtstid, jøts ja nitso'ok'ajtin xpaattit,

³ pøni tødäm idø'on xjanchnijawidi ku ja nwindson'ajtim yja' y'øyi.

Ja Cristo dø'on ja xemikøjxpit jujky'ajtin tyajkp

⁴ Mbaattip m'ejxtip ja nwindson'ajtim Jesús, yø' xyikjujky'ajtim xemikøjxp, jade'en ja myøk'ajtin tjagyepy ejxim tu'uk ja jønts tsaajin. Jats may pøn tkatsojkip pøn tkaja'gyukip, tøts ja Dios Teety yø twi'ixy jade'en ejxim ja pojtspi ja øybi tsaaj twi'ixy mididi yiktunwampy.

⁵ Nayide'en meets sam ja pojtspi ja øybi tsaaj twi'ixy mididi yiktunwampy ku tsapøk tyik'øyi. Jade'ents meets ja Dios Teety myiktunwa'añiyi jøts xpaduujnidit ja yja' ku ja amuum mnadyamiyoxidit jøts ku nayide'en ja mbikta'aky xamiyoxit, ja' idø'on ja jade'en mdawindsø'øgidip, jøts ja Dios Teety xkupøjkindit ku jade'en ndu'unindit Jesucristo køjxp.

⁶ Paty ja Dios kyajpxy wya'añ:

Nbiktakpy øts jam Sion jade'en tu'uk ja ejxpajt ejxim ja tsaaj ma pøch cho'onða'aky, tu'ugyits ja yikpa'ext jade'en;

pøn ja tpadump jade'en, ka'ap ja wyinguwopi yjøpkuwopi, pyaattp ja øy'ajtin ja'.

⁷ Pøn yø tmøja'wip tjanchja'wip, møj yø', yø' xyiknitso'ok'ajtim; pønts tkamøjpiktakp, pøn tkajanchja'wip jatyi, jatpts idø'on ja yide'en sam ja Dios kyajpxy wya'añ:

Ja tsaaj mididi pojtspi kya'a'ejxip tyiktunwa'añ,

ja'ats ne'egi ja Dios tō t'a'ejxi jøts ja ne'egi yikxon tyiktuñ.

⁸ Xjats nayide'en ja Dios kyajpxy wya'añ:

Jade'en yø', ejxim tu'uk ja tsaaj mididi jaa'y tyagidaapy.

Jade'en yø yjatti wyinguwopidi yjøpkuwopidi ku tkabadundi ja øy ayuujk mididi ñigajpxy ja nwindson'ajtim yja'; jade'en ja Dios tō ttanibiktaagi jøts jade'en yjattit.

Pøn ja Dios ja'ajtyidip

⁹ Tum ja' meets pøn ja Dios tō wyi'ijxyidi, meets mmidumpy ja nwindson'ajtim Jesucristo yja', jade'ents meets wa'ats mjaa'y'atti jøts tu'ugyi ja Dios mja'atyidi pøn ñwindson'ajtpy ja tsajpjotpit jøts naxwii'ñit, ja'agøjxp jade'en tō myikwi'ejxti jøts xkajpxwa'kxtit xkajpxyø'ødyit sa ja Dios janch øy janch møj. Nay ja'ats ojtš øy tsuj myikujajtaajkididi myikudø'kxaajkididi ku y'ijty m'etti agoostujpy.

¹⁰ Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pøn mba'ayøyi, mba'ayojdipts ja Dios ixyam.

Yikxon xpadu'undit ja Dios

¹¹ Meets migu'uktøjk, tøg'ayø'øbyi adøm n'ijtyindi ya, tsajpøtøpy adøm ngugajp'ajtyindi xemikøjxp paty mee møk nminuu'kxa'aky, kidi xyikmajada'akti ja ka'øyjaa'y'ajtin midit mímada'akwamp winjaa windsojk ja anmija'win.

¹² Jagyapti ja tuda'aky'ajtin ja øyjaa'y'ajtin ma pøn ja Dios tkanijawinim. O meets ja wine'en mjabagajpxyidi jøts mee myiktüjy ka'øyjaa'dyi, kuts t'ejxti ku tnijawidi ku tsuj mjaa'y'atti winets ja Dios ja twindsø'øgidi twinjawidi jøts jade'en ja nitso'ok'ajtin tpaattit ku wyinaty ja tiidyu'unin xøøw yja'aty.

¹³ Ja nwindson'ajtim Jesús køjxp xkupøktit xmimado'odit ja kudunktøjk jøts ja møj windsøn,

¹⁴ jøts ja tyumbi nayide'en midit tpayø'øpy ja tundigøøbyidi ja kajpxigøøbyidi, midit'its øyjaa'y'ajttip tuda'akyjaa'y'ajttip, ja'ats y'øyja'wip.

¹⁵ Jade'ents ttsøky ja Dios jøts øy tsuj mjaa'y'attit jøts jade'en xyik'amo'ondit pøn nugo agubojidip, pøn tkanija'widip.

¹⁶ Tø meets ja øy'ajtin myikmøøñidi, jøts ka' ti nugo ajawi mmimajada'agidit. Ka' mwa'andit jøts øy sagasa m'adøøtsnidit ku ja øy'ajtin tø xpaatti. Ja' tu'ugyi mbadu'undip midit ja Dios ñi'ane'empy.

¹⁷ Windsø'øgidi winjawidi niduki'iyi sam pyaat'atyin. Tsokti ja mmigu'uktøjkti pøn nay ja'abi janchja'win pyadundip midit meets, windsø'øgidi winjawidi ja Dios, jøts nayide'en ja windsønøjk kudunktøjk.

Ja ejxpajt midit ja Cristo tø xmø'øyim ku y'ayo'ombaaty

¹⁸ Tumbitøjkti, kajpxkyupøjkkøjxti niti jot'aka ja mwindsøndi, wan tja'awa'anidi tka'awa'anidi, wan ja tja'gyukidi tkaja'gyukidi.

¹⁹ Jabi øyxi ja' ku ja Dios tuki'iyi xamijawidit ja m'ayo'on ku myikjedundit myiktedundit niti pøkyøjxp, paty ja amgujyk jotkujk xmidanidit.

²⁰ Ku meets xku'ayo'ombaattit o ti o ma øy tsuj tø xkayik'øyi, çti øy'ajtin meets idø'on mdsaaçpaatp? Kuts meets øy tø mjatuñ jøts kuwañim myik'ayo'ombaadyidi pøn m'ana'amidip, ya'at idø'on ja Dios y'øyja'wip ku meets tuda'agyi xkupiky'aty ja ayo'on.

²¹ Paty meets ja Dios tø mwaadsøyi, jabi tøxi Cristo y'ejxpajt tyiktañ ku y'ayo'ombaaty niti akikøjxp jøts meets ja xpadu'undit jade'en.

²² Niti pøky ja tkatuñ, niwindem xøøw ja jaa'y ja tkawindaay'ajty;

²³ ku ja y'ijty yikmi'akikajpxy, ka'ap ja nayide'en y'adsøy; ku ja y'ijty tyik'ayo'ombaatti, ka'ap ja tmidsepiky pøn jade'en tuujnidip. Dios Teety ja ne'egi tyaniþijky ja ka'pxy tiidyunk.

²⁴ Kø'øm idø'on ja Cristo adøm ja nbøky tuki'iyi tku'o'jkigyixy jam kruskøjxp, jøts ka'ap adøm nyikmø'ajtin ja nbøky jøts jade'en øy ty ja ndsinaa'yin nyiknajxint. Pyaajt ja tsaachi'ajtin ja', jøts adøm jade'en nitsoojkindit.

²⁵ Jabi jade'enxi y'ijty sam ja borreegi tyigøyin, tøts meets jadigojk xniwimbity ja nwindson'ajtim Jesucristo pøn m'ejx'ejt看idip jøts pøn ttunk'ajtp ja m'anmija'windi.

3

Sa dø'on pyaat'aty chøønidit ja amajtsk jaa'y

¹⁻² Jade'en meets tø'øxyøjkti, kajpxkyupøkti ja mgø'ømniyaa'dyi jøts xuk'ejxtit xuknijawidit ja tiy'ajtin ku meets ja mjaa'y'ajtin tuda'aky xyiknaxy. Jats idø'on winaagin ja yaa'dyøjkti pøn tkagupøjktipnim ja øgyajpxy ja ømyadya'aky, ja'ayi meets ja jade'en xukupøktit mjaa'y'ajtingøjxp, niti kajpxy niti madya'aky.

³ Jøts ka'ap meets ja mdsuj'ajtin xmiçjatt xmi'ookt midit ja'ayi nikixy kaxø'kp ku tum ja oori, tum ja wimbatjaa'xy wimbatwøøky, jøts tum ja tsoiwibi wet xjotmay'attit.

⁴ Jabi wa' tsu'ajtinxi meets idø'on ne'egi myiktu'lump midit m'am mjoøjtp yik'øyjaa'y'ajtp, ja'abi midit kawindigøøpy. Janch øy ñaxy idø'on ja jam Dios wyingujky.

⁵ Jade'ents idø'on y'ijtyip ñajxmi ja tø'øxyøjkti pøn ja Dios yja' tpadundip ku ja nayide'en tmøøt'ajtti ja tuda'aky chinaa'yin. Yjanchja'widip idø'on ja Dios ja y'ijty jøts ja ñiyaa'y tuki'iyi tkajpxkyupøjkidi nayide'en.

⁶ Jade'ents idø'on ja Sara yjaa'y'ajty, tuki'iyi tkajpxkyupøjkixy ja ñiyaa'y Abraham, jade'en ja pikta'aky sam tu'uk møj øy windsøn. Pøni øy meets mjaa'y'aty, nayide'ents meets idø'on xu'unt sam ja Sara tø tjøptuni jøts jade'en ja mniyaa'y xkatsø'øgidi.

⁷ Nayide'en meets yaa'dyøjkmi, ja'gyukidi ja mnidø'øxyti, windsø'øgidi sam ja pyaat'atyidi. Kidi meets ja xamøj'aty ku ja nayide'en kyamøkidi sa meets, jabi nay ja'abi øchinaa'yinxi dø'on ja Dios tø myø'øyidi midit meets tø xpaaty y'øy'ajtingøjxp. Tundi jade'en, jøts ka'ap ja Dios mgamo'ojidit midit jaty m'amidoodip mbøktsoodip.

Ku ja øy'ajtin yiku'ayo'ombaaty

⁸ Jade'en ids idø'øn xyiknaxtit ja mdsinaa'yin: øy tsuj mnachokidit sam tu'uk jaa'yin, nabya'ayowidi nixem niyam jøts xyiknigaxø'øktit jade'en ja mduda'aky'ajtin.

⁹ Kidi meets ja kya'øysi nayide'en xyikwimbity jøts ja mmigu'uk xuk'ayojwiywa'andi ja ka'øgyajpxy ja ka'øy'ayuuik. Ni'amidowip meets idø'øn ja ne'egi ja kyunuu'kxin, pø ja'axi adøm tø nyiktaniwaadsøø'yim jøts ja Dios kyunuu'kxin nbaajtindit.

¹⁰ Jabi yide'enxi idø'øn ja Salmos wya'afi:

Pøni pøn idø'øn øy tsuj ja xøøw ja tsinaa'yin yiknaxwampy, y'eix'etp idø'øn ja tyoojts ja', jøts ja yigaappi y'axøøkpi ja tkakajpjt jøts ja y'aaw tkadataay'att.

¹¹ Paat'ajtp idø'øn ja t'ixmatst ja yigaappi jøts ja y'øysi chuiji tpadu'unt ne'egi, y'ixa'ap idø'øn ja øy'ajtin jøts tuki'iyi tpanøjkxt.

¹² Jabi Dios Teetxyi idø'øn t'eix'eitp pøn øy jaa'y'ajttip jøts nay ja' t'mado'op ja tsapkajpxy,

ka'ats idø'øn ja møøt ñamyayi pøn ja y'axøøkpi yigaappi yikmajadaktip.

¹³ Pønts meets idø'øn ndejint mdamidsepwa'aniyidip ku ja y'øysi chuiji xunwan'ettit?

¹⁴ Pøni jats pøn wyinaty mjanchtuku'ayo'ombaa'diyidi ku ja y'øysi xjatu'undit, øyjawidi kunuu'kxyjawidi meets idø'øn ja ne'egi, jabi møjxi ja Dios y'øy'ajtin tyikwimbejtnit. Patxyi meets idø'øn niti nipøn xkatsø'øgidit,

¹⁵ nadyamiyoxiyidi ja Cristo pøn adøm nwindson'ajtyimp. Aweix'et meets idø'øn ja', ku pøn tyiknidøøwit tiku xpaduñ ja mjanchja'win jade'en, ku x'adsojimbettit, tsuj tuda'aky meets idø'øn ja xu'unt.

¹⁶ Yikxon meets idø'øn m'øy'att jøts xmøøt'attit jade'en ja m'aaw ja mjoojt jotkuik, jøts ku wyinaty pøn mdamigajpxyidi ja Cristo yjanchja'win, kø'øm ja kyajpxy ja myadya'aky ja ttatsø'ødyu'undit ku meets ja jade'en nugo mnitaa'yibyetyiyidi.

¹⁷ Øyts ja ne'egi ku ja øy'ajtin ngu'ayo'ombaa'ajta'ant pøni jade'endam ja Dios kø'øm ttsøky jøts idø'øn jade'en ne'egi ngatu'unint ja axøøkpi ja yigaappi.

¹⁸ Jabi nayide'enxi Cristo kø'øm tø y'ayo'ombaa'tmi adøm nbøkyøjxp, tuk'ojkyi ja tø ttanaxy ja ayo'on. Øy ja y'ijty yja'øyjaa'yi, ayo'ombaa'ajt ja' adømgøjxp wine'en nga'øyjaa'y'ajtyindi, jøts jade'en ja Dios Teety xukwingunøjkxa'andi. O dø'øn ja ñine'kx wyindigøøy, jujky'ajtpst ja ixyam jadigojk.

¹⁹ Ja Espiritu Santo myøk'ajtin ja yiknøjkxøø mā dø'øn jap namay anmija'win t'aweixti ja y'ayo'ondi, jøts ttukmadøøy ja nitso'ok'ajtin.

²⁰ Ya'atpi jaa'dyi ku yjujky'ajttøø ka' idø'øn ja tmøjpiktajktøø ja Dios sa ja Noé tjanigajpxy yam ja Dios ja yjanchja'awijxyidi. Ixym idø'øn wyinaty ja Noé tyik'øyi tyik'abaadi ja møj barki mā dø'øn niwaani ñitsokti, niduktujk idø'øn ja'adi ka'pxy pøn jap barkijøtpyti yikanaanwidejrtidi ja møj nøø, jøts jade'en sa kyajajttøø.

²¹ Yø'øbi nøøjts ndamiguy'ejxa'amp ja nøø midit tump ku nnøbajntint midit tø xukpaajtyim ja nitso'ok'ajtin. Ka'ap ja nøbajntin ja' wya'afi jøts ja ne'kx ja'ayi wya'ats'ejtindit. Ku dø'øn nnøbajntin, ja Dios idø'øn n'amido'owimp jøts ja nbøky xyikwaajtsa'ant. Jade'en ampyts idø'øn ja nøbajntin tyuñ jøts ja nwindson'ajtim xukniwaajtsim ja ka'øysi pø ja'axi ja yujujkyjøkyi'i'ñ jadigojk xemikøjxp.

²² Jøts ja ojts chajpety, ojts tpu'ixaagi ja Dios Teety y'aga'ngyøjø'øm, ja' tniwindson'ajtp ja anklitøjk jøts wine'en y'etti niduki'iyi ja yikutujkpitøjkti, tum ja' amuum paajtip.

4

Jade'en nbadu'undit sam ja Dios ja ndunkjøøjp tø xmø'øyiindi

¹ Tøxi ja Cristo y'ayøø, nayide'en meets idø'øn xkupiky'att ja ayo'on. Ku jade'en xu'undit tø wyinaty ja pøky xkayikmø'atti,

² jøts jade'en mjaaktsøønidit yā naxwiñ sam ja Dios kø'øm ttsøky'aty, jøts ka'ap ja mgø'øm ja' xu'undit, ja kya'øysi.

³ Tø meets xyikjotkidakøjy jekyip ku xpadundi y'ijtyip pøn ja Dios tka'eixidip. Ja' y'agujkpy meets y'ijty mdsøøni mā ja axøøkpi yigaappi, mā ja awanax agojnax nayide'en xwindso'øgidi xwinjawidi, midit idø'øn kapaat'ajtyip nbadu'unint.

⁴ Ja'abi jaa'dyi, kumaap ja tjawidi ku meets ja xka'ukpadu'unxiniyidi ja y'axøøkpi yigaappi tsinaa'yin, paty meets myikjigajpxy myikpagajpxy.

⁵ Ka'ap meets ja xmøjpkta'akt, kyøyaktip ja kø'øm ja tiy'ajtin jøts ja yiktiidyu'undit, ja' ja nøjkx tiidyuuñnidip pøn tiidyump ja oo'kpi jøts ja jujkpyi.

⁶ Ja' pøn tø y'oo'kni, tø yiktuk'ixy yiktuknijawi sudso dø'øn ja y'anmija'win xemikøjxp ndejint y'uktsøønit møøt ja Dios. Jaayip idø'øn ja ñamyayi tpadso'ondakni ja xemikøjxpit jujky'ajtin ku ja Dios yja' tkupøjkyidi, øy ja kawine'en yjayiktiidyundi yā naxwiñ, tjapaatti tja'eixti ja kajkin ja o'jkin ja'adi.

⁷ Wingonipxi jits kyudigøgyjxint tuki'iyi ja pikta'aky, paty meets ja y'øyi winmaa'ñ xyiktu'undit jøts xamija'myatsidit ja Dios.

⁸ Ja tsojkin meets idø'øn ne'egi mmøøt'ajtp, jabi yajkpxyi ja maa'kxujkin ja', jøts ka'ap ja tsep ni ja aki ja tkayikmajada'aky.

⁹ Nagyupøkidi mjønjojtp mdøjkjottp, pøni pøn jam memp ja'tp, kidi ti x'ama'at'atti.

¹⁰ Kija' meets idø'øn xu'unt ja mdunkjøøjp sam ja Dios tø mmøø'øyi jøts jade'en mnadyabudøkiyidit nixem niyam pøni sà Dios ja kunuu'lxin køx kida'ak tø mmøø'øyi.

¹¹ Pøni jaa pøn tnigajpxwa'añ ja Dios yja', ja Dios idø'øn ja y'ayuujk ja wyinmaa'ñ ja yiktuujnip. Pøni jaa pøn myigu'uk tpudøkiwya'añ tuki'iyi dø'øn ja tyiktungøxt ja møk'ajtin midit ja Dios yajkpy. Jøts jade'en ja Dios Teety ndamøja'wa'ant ndagunuu'kxyja'wa'ant ja ndunkjøøjp nwindson'ajtin Jesucristo køjxp, pøn tu'ugyi ja øy'ajtin ja møk'ajtin tmøøt'ajtp xemikøjxp. Jade'en idø'øn yjatt.

Ku ja Cristo nbadu'unint, ayo'ombaaajtimp

¹² Meets migu'uktøjk, kidi kuma'ayin xjawiidi ku møk m'ayo'ombaaatti, kidi mnømdi ku jade'en kyapaat'aty.

¹³ M'øyjawip meets idø'øn ne'egi ku meets idø'øn Cristo møøt m'ayo'ombaaaty, jøts nayide'en wyinaty xaxondaknidit ku tnanky'ejxit ja myø'ajtin ja y'øy'ajtin ku wyinaty myeni jadigojk.

¹⁴ Jotkujk meets idø'øn mnayjawiyidit ku myikwingajpxtit myikpagajpxtit Cristo køjxp; jabi ja Diosxi meets ja y'Espiritu Santo mmøøt'ajtip. Axøøk yigaap ja nwindson'ajtin ja tnmadya'akti, ka'ap meets nayide'en, ja'axi meets mwindson'ajtip mwinja'wip.

¹⁵ Møk tsø'ødyu'unin møk payø'øyin ne'egi ñaxy ku nyikjaa'y'o'jkint ku nma'jtsint, ku tigati ndatøjka'ant ndakajpxa'ant midit'ibi adøm xkapaat'ajtip.

¹⁶ Ka'ats ja ne'egi chø'ødyu'uni ku ja Cristo yja' ngu'ayo'ombaaajta'ant. Ndamøja'wa'amp ndagunuu'kxyja'wa'amp adøm idø'øn Dios ja ne'egi.

¹⁷ Ixyam adøm idø'øn ndiidyunk tyuu'na'amp pøn jaty ja Dios ja'ajtidip. Møkts adøm ja ndiidyunk ñajxindit, sats idø'øn ja yja' mye'endit kyida'aktit pøn ja Dios tkabadundip?

¹⁸ Jabi ja øyjaa'yts ja ñitsoojkin ñiyjøjxk tkapattip, sats idø'øn ndejint tyimyajttit pøn ja Dios tkamimadoodip, pøn ja chinaa'yin tyiknajxtip pøky'agujkpy?

¹⁹ Patyts pøn ja Dios yja' tmi'ayo'ombaaajtidip sam ja kø'øm tø tyamidsøkyidi, ka'ap ja mibaat t'ixmatstiat ja y'øyi, tyun'etibym ja'adi, amuum ja y'anmija'win ttamiyoxtit ja Dios pøn yikojidip yiktsoojkidip, nijuuni ja kyamajtstu'udyidi.

5

Ku ja Cristo yjanchja'wibi yikajpxwejti

¹ Ixyam ngajpxwejwa'añ pøn jam mnigubajk'ajtiyidip, ja møjaa'dyøjkti, jabi nayja'abi tunkxi nmøøt'ajtpy, ja ku øts idø'øn kø'ømyi ndyimy'ijxy sà dø'øn ja Cristo y'ayo'ombaaajty. Nbaatp øts nayide'en ja øy'ajtin sam nayide'en ja møjaa'dyøjkti, ku wyinaty ja nwindson'ajtin tø ttukmibaat'aty.

² Paty øts ixyam mee møjaa'dyøjk nnøjmidi jøts yikxon x'ejx'ettit pøn ja Dios yja' tpadu-ujnidip midit meets tø myiktigidøki; kø'ømdsøky idø'øn meets ja xu'unt sam idø'øn ja Dios kø'øm ttsøky'aty, ka'ap akikøjxp jøts ni meengyøjxp ja xkatu'undit.

³ Kidi meets ja mgutujk nugo xamajada'aky, tuda'aky idø'øn ja xuu'mo'odit jøts ja m'øchinaa'yin xuk'ejxpajtin'attit.

⁴ Kuts jade'en wyinaty myeni ja møj ejx'etpi jøts meets xpøkt ja møj øy'ajtin midit niwindem xøøw ja kyudigø'øyin kaja'tp.

⁵ Ixyam meets una'jktøjkti ngajpxwejwamidi, mimadoow meets idø'øn tuki'iyi ja kyutujk ja møjaa'dyøjkti, sam meets niduknax nixem niyam mnagyupøkidit. Jabi jade'ents ja wijkyajpxy wya'añ ku ja Dios ka' ttsøky pøn kø'øm namyøjpikajtidip, jøts ja' tpudøki y'øy'ajtingøjxp pøn tmøøt'ajtp ja tuda'aky'ajtin.

⁶ Ku xmিদuda'aky'attit ja Dios myøk'ajtin, nay ja'ayi dø'øn kø'øm mgunuu'kxyiidip ku ja xøøw jumøjt wyinaty tpaaty.

⁷ Tagidøkidi ja Dios tuki'iyi midit mbamaadyip mbadajtip jabi ja'axi ja tyunk'ajtpy jøts adøm ja xtsojkint.

⁸ Nay'ejx'etidim, wijy kejy nabyikta'agidi; jabi oxit ma'yixy kyøy ja miku', ja mmidsep pøn mduk'ixmatswajniyidip ja mjanchja'win.

⁹ Mimøk'atti, tamøk'atti ja mjanchja'win, ja'myatsti ku nayide'en ja mmigu'uktøjk y'ayo'ombatmidit o madsoo sam meets.

¹⁰ Ku adøm wyinaty tø n'uk'ayo'ombaaajtyindi waani, xjats adøm idø'øn ja Dios xyik'øø'yandit jøts xmøøgyøjxindit ja møk'ajtin jøts jade'en nisa nga'ukjajtinidit.

Xpa'ayo'ondip idø'øn ja Dios ku kawinmaañi xkunuukxindi, jøts ku kø'øm tø xwaadsøø'yim jøts adøm n'ejxindit nbaajtindit ja y'øy'ajtin ja myøj'ajtin xemikøjxp møøt ja Jesucristo.

¹¹ Tu'ugyi dø'øn ja Dios Teety myøk'ajtin møj midit niwindem xøøw ja kyugøjx'ajtin kamemp. Jade'ents idø'øn ja yjatt.

Ja kajpxpoo'kxin midit tyagugøjxiñip

¹² Yjanchpadumpy tuda'aky'ampy ja janchja'win yø Silvano adøm nmigu'uk. Ixyants øts ja ndamigaxi tu'uk ja nøky midit tø nja'ay jøts meets ngajpxwejwa'añ jøts ku Dios kyunuukxin tø mmø'øyidi jøts jade'en'ampy tñanky'ijxyi pøni ti jaty tø xpaatti x'ejxti. Mdsojkiðip meets ja Dios jøts kidi mibaat x'ixmatsti, tu'ugyi yikxon xpanøjkxtit.

¹³ Mdanigajxidip øts ja kajpxpoo'kxin ja Babilonia janchja'wibidi pøn ja Dios tø t'awaawmujkmi nayide'en sam meets. Nayide'en ja mgajpxpoo'kxmiiyidi ja mixy Marcos midit n'u'nkja'wip pøn øts xpudøjkip.

¹⁴ Nagyajpxpoo'kxidi nixem niyam sam tu'ugyi ja jaa'y ñamyayidi Cristo chojkingøjxp.

Jade'en ø nwa'añ jøts ja øy'ajtin xmøøt'attit pøn ja nwindson'ajtim Jesucristo yja'ajtpy. Jade'ents idø'øn yjatt.

JA MYĪMAJTSKPI NØKY MIDI JA PEDRO YJAAY

Ku ja Pedro tnijayi pøn tjanchja'widip ja nwindson'ajtim Jesucristo

¹ Øts idø'øn Simón Pedro nxøøw'ajtpy. Øts ja nwindson'ajtim Jesucristo nmidump jøts øts ja nayide'en ngudanaapy. Ixyam meets ja nøky ndanigaxi pøn nayide'en to xpaatti ja janchja'win sam øøts ja nja', ja'agøjx ku ja nwindson'ajtim Jesucristo tyiyi kya'pxyi.

² Jade'en sam x'ejxtit xnijawidit ja Dios Teety jøts ja nwindson'ajtim Jesús, nayide'en idø'øn mdaja'adiyidit ja y'ø'y'ajtin kyunuu'kx'ajtin.

Ja' midi yiknigajxø'øgyip pøn tjanchja'widip ja Cristo

³ Myøk'ajtingøjx adøm ja Dios Teety xmø'øyim køx kida'ak midi xka'ejtxa'amp jøts jade'en øy tsuj ja ndsinaa'yin nyiknajxint, sam ja ajot'ajtin nayide'en yikmo'ot, jabi tøxi Cristo kuk'ijxyim pøn to xwi'ijxyim xwigø'ønim y'ø'y'ajtingøjx myøk'ajtingøjx.

⁴ Nay yø'øbi køjx adøm nayide'en to xmø'øyim ja y'øybi, ja awejx'ajtin sam idø'øn ku tijy xyiknitsø'okwa'añim ja naxwiñ, ma ja tigø'øyin kadye'eyin y'ity, jøts jade'en ja kyunuu'kxy y'ø'y'ajtin xukpaajtint.

⁵ Pøni nbaatwa'añimp idø'øn ya'at, ja janchja'win idø'øn nmøøt'ajtim; ku ja wyinaty nmøøt'ajtyimp, winets ja tiichinaa'yin ja øchinaa'yin n'ixa'ayint; ku ja wyinaty to nbaajtyim xjats idø'øn nbadøjka'ant sudso ja Dios yja' nnija'wa'ant midi to ttanibiktaagi;

⁶ Kuts ja wyinaty nmøøt'ajtna'am, jøts ja yja' jade'en nbaduujna'ant jøts adøm ja ngø'øm ja' n'ixwejtsint; kuts ja wyinaty jade'en to ndu'ñim xjats idø'øn ja maa'kxujkin nbadøjka'ant jøts nyiktu'unint nixem niyam, jøts ja Dios yja' køx kida'ak jade'en nnadyamiyøjxa'ant;

⁷ Kuts idø'øn nmøøt'ajtna'ant xjats idø'øn ja nmigu'uk adøm nixem niyam møøt nnamyaajya'ant; jøts jade'en ja tsojkin nmøøt'ajtnint midi kamastu'udyim yikja'wip.

⁸ Kuts ya'at xyikmøjdidit xyikyajkidit midi mmøøt'ajttip, ja ti nugo meets ndejint to x'ejxni xnija'wiñi ja nwindson'ajtim Jesucristo? Jabi ka'axi ja mdsinaa'yin nugo xyiknaxtit ya.

⁹ Pønts ya'atpi winmaa'ñ tkaba'ayoodip, jade'en idø'øn tyimyjaty sam tu'uk ja jaal'y kube'ets kugoots y'etwa'añ kø'ømsojkingøjx; ka'ap ja t'ukja'myajtsni ku ja nwindson'ajtim Jesucristo ja pyøjki to tku'oogi jøts ku yam yjapaat'ajtniyi jøts ja chinaa'yin tyiktigajtsnit.

¹⁰ Jade'ents mee migu'uktøjkti, nancky'ejxidi dø'øn ku meets ja Dios to mwi'ijxyidi to mwigø'ñidi, jøts jade'en niti nima ja mjanchja'win kyawinguwøpidit.

¹¹ Jøts jade'en wyinaty agujk jøtkujk mdøjkiñidi ma ja nwindson'ajtim Jesucristo ja kyutujk ja yjaa'y ttanitani, ma ja yiknitsokpi xemikøjx xyik'ejtint.

¹² Paty meets ya'at ejtp ndukja'myats'ett, øy yø xanja'wiñidi øy yø xjadamøk'ajtnidi Dios tyiy'ajtin midi mmøøt'ajttip.

¹³ Øy øts idø'øn ja njawi ku meets njaakajpxwejt, ku njaakujky'att,

¹⁴ jabi tøxi øts ja nwindson'ajtim Jesucristo xuknijawi ku øts tsojk ya'at naxwiñit nmajstutnit.

¹⁵ Tuki'iyi øts yo n'aaw njoøjt nibkta'akt, jøts xja'dyangøxtit yø' kajpxwejin, jøts jade'en ku wyinaty to nja'øø'kni njadigø'ñi, ejtp yø xja'myats'ettit.

Pøn t'ejxtø wyemp y'amp sa Cristo thanky'ejxø ja myø'ajtin

¹⁶ Øy meets mwa'ant ku myikwindaay'atti ku meets to ndukmadøy ja ixpøjkin midi ñigajpxpy ja nwindson'ajtim Jesucristo myøk'ajtin jøts ku ja mye'ent jadigojk. Ka'ap øøts yø kø'øm to nyik'øyi yø' madya'aky, jabi tøxi øøts idø'øn kø'øm ndyimy'ixy ja nwindson'ajtim y'ø'y'ajtin ja myø'ajtin.

¹⁷ N'ejx øøts ku ja Dios Teety tyikjajty jøts ja Cristo ja windsø'jkin winja'win tpaatt, ku ja ñine'kx tyigajch jøts ku amuum chamaambijkyaju'uk agujkp. Nmadoow øøts nayide'en ja Dios Teety y'aaw y'ayuujk ku yide'en wyaañ: "Øts ya'at n'U'nk midi kawinmaañi ndsojknajxpy, midi øts ixyam øy yikxon ndajotkujk'ajtpy."

¹⁸ Kø'ømxi øøts idø'øn ndyimyadøøy ja Dios Teety y'ayuujk midi tsajpjøtpy kidaajk, jabi jamxi øøts wyinaty kojpkøjx midi kunuu'kxy, møøt øøts ja nwindson'ajtim jam wyinaty.

¹⁹ Kidi yø'øypxi dø'øn ja'ayi nugo ejxpajt'ajtp, pø tøxi ja Dios Teety ja kyajpxy tpaduñ midi ja kyugajpxy windi'ixyyp jaadyandøø. Øy'ajtp idø'øn jade'en ku jade'en xu'unt ku xunk'attit yø'øbi kajpxy, yø'øbi ayuujk, midi ja wejin ja kajin xmø'øyimp jøts ja kugoots'ajtin jade'en xmajstuujtint. Jade'ents Cristo ja yja' xagujajamp xagudøø'kxamp kunim ja mye'ent jadigojk jøts kø'øm ñanky'ejxyitnim.

²⁰ Ja ku dø'øn jawyeen kuwani xnijawidit jøts ku ja Dios kyajpxy ka' nugo øy pøngapøn nugo ajawi tja'gyuki,

²¹ jabi ka'axi ja Dios kyugajpxy kyø'øm winmaa'n ttakajpxtøø. Dios Teety miyøxy ja'adi, jøts tñigajpxidi ja yja' sa' jaty ja Espiritu Santo wyinmaa'nmyøøjyidøø.

2

Pøn ñanky'ixpøjkidip ja taay'ajtin

¹ Nayide'en idø'øn Israelit jaa'y y'ejtmidi pøn ñadyiji nañikajpxidip ja Dios kyuga-jpxy; nayide'en meets idø'øn winaagin xnitaayibyajtmidit ja Dios yja', pøn idø'øn kø'øm t'ejxma'tnidip ja nwindson'ajtim midit tø yiknitsø'øgyidi; kø'øm idø'øn ja myøj'ayo'on wyinaty tsojk t'ixax'adi.

² Namay idø'øn jaa'y ja tpabøktit ja y'axøøkpi tsinaa'yin, jøts ja'agøjxpti wenk yiknimadya'akt ja Dios kyajpxy midit yiknitsøojkp.

³ Kuts ja meen ja t'amidit tjøtpidit, jade'en meets idø'øn mwigaadsidit mwibøkidit, ku o tigati kajpxy mdawindaay'atidit meengyøjpx; ja'atp idø'øn ja myøj'ayo'on ja'adi, niti nitsøojkin, jabi jeky'ixpi dø'øn tø yiktanibiktajkiñidi ku jade'en yjattit.

⁴ Ka'ap ja Dios tmaa'kxuujky ja y'ankilistøjkti pøn kamimadoojyidi, jagam idø'øn ja tñajtswojpyi'iñ ma ayodaajk jap, jøts jap kube'ets kugoots tsumy t'awejxti ja tiidyyu'unin.

⁵ Nika'ap nayide'en ja Dios tmaa'kxuujkmi ja jaa'y pøn jeky'ip tsinaamyidøø ku ja Noé yjujky'ajty. Ja kom tuuji dø'øn tyanigajx, jøts jade'en tuki'iyi ja na'xwii'ñit ñijaa'xni ñigomni, jøts jade'en y'o'j'køjxtøø ja ka'øvjaa'dyi. Ja'ayi tyiknitsøojky ja niwixujkpi jaa'y jøts ja Noé pøn ja tiichinaa'yin tñigajpx.

⁶ Nayide'en tyikutujkmaa jøts kyudigø'ødyit ja kajp midit txøøw'ajttøø Sodoma jøts Gomorra, jade'en tyikudigøø, nugo jaam tyiktaañ, jøts jade'en t'ejxpaj'tattit ja ka'øvjaa'y pøn wyinaty ja chinaa'yin tyikna'xwandi'pni.

⁷ Yiknitsøojk ne'egi ja Lot, pøn y'ijty øvjaa'y'ajtp jøts pøn nayide'en tjanch'ødyunja'widip ja y'axøøk tsinaa'yindi.

⁸ Jabom jabom idø'øn ja y'ijty yjotmay'øøky ku t'ixy tñijawi sa' ja'abi jaa'y yjanch'adø'øtstøø.

⁹ Jade'ents idø'øn, maajyip idø'øn ja nwindson'ajtim jøts ja xpudøjka'ant ma ja yigaappi y'axøøkpi xnimajada'akwa'añim wine'en adøm tø nadyamiyojxna'andi ja nwindson'ajtim yja', jøts nayide'en myaa'miyi tyik'ayo'ombaatt øy pøn tundigøøbyidi ku wyinaty ja tiidyyu'unin myiñ kyida'aky.

¹⁰ Yik'ayo'ombaatt ja Dios ja'adi dø'øn pøn kø'øm ja y'axøøk tsojkin tpadundip jøts pøn tteppya'an'ajttip ja nwindson'ajtim kyutujk. Namyikajxidip ja', ap tyimñayjawi'idi; ka' ñadyiji tyimch'øgyidi jøts tka'ømyigajpxti tka'ødyeiti ja kutujk'ajtin midit jap tsajpjøtpy,

¹¹ yam ja ankilistøjkti niti nisa kyawa'andi jam nwindson'ajtim wyingujkp, jawaani møkts ja ne'egidi ja kyutujk.

¹² Nayide'en idø'øn ja'adi sam ja jiyujkindi, niti ja'gyukin tkamøø'tatti, nugo ja yjujky'ajtin yikjujky'atyidi, ja'ayi t'awejx'atti sa' ja myigu'uk tmatstt uk yikmatstt kø'øm, sa' ja o'jkin tigø'øyin tpaattit. Tum wimbet ja tmadoojidi ja Dios yja'. Ka'ap ja tjagyapi ja madoogukin; tyimñayide'en idø'øn ja y'oøktit sam ja jiyujkti nugo ñaxti,

¹³ kyu'ayo'ombaadidip sam ja myigu'uk tø tyik'ayo'ombaatti. Jotkujk idø'øn ja tjanch'ukjawiidi ja y'øbyi yjøkchpi midit pojn najxp; nugo dø'øn ja chø'ødyundi ku meets ja mxøduñ møøt, jøts ñadyiji yjanch'uknankyjotkujk'atyidi jøts meets ja jade'en xpabøkt.

¹⁴ Ka' idø'øn ja tø'øxyøjk ja nugo t'ejxtit, ja' idø'øn ja wyinmaa'n'attip jøts tmøø'tattit; ka' idø'øn ja pøktyyu'unin yjotnaxyidi. Ja win'øø'nik ja'ayi tyunk'ajttip jam ma pøn ja yjanchja'win kyamøjkinidip; tuki'iyi tniwa'anwa'angøjxti ti jaty ja myigu'uk yja'ajttip; ja dø'øn møk ayo'on ja Dios ttukpaadidip.

¹⁵ Abiktyuu' idø'øn tø tpabøknidi ku ja tiidyyu' tø t'ixmatsti. Wa' idø'øn ja y'ejxpajtin pyaduujnidip ja Beor myajnk midit Balaam xyøøw, pøn ñadyiji kyajpxnajx ja Dios yja'. Ya'at jaa'y, o dø'øn ja tigati ttunwaañ, jøts jade'en ja meenjingaap taagyøjpx tpaaty,

¹⁶ kunim idø'øn ja Dios tu'uk ja jachu' tyikajpxt jøts ja pyøky yiktawindsø'ty jøts jade'en ja kyuuun'ajtin tka'ukyikmajada'knit.

¹⁷ Jade'en idø'øn ya'at jaa'dyi sam tu'uk ja tø'øts nøømu'ut ni tukxa'kx ja ñøø. Nayide'en ja'adi, sam ja poop yoots midit katuup, nugo pyøjwidity; jap idø'øn ja kyastigi agoostujpy tø yiktanibiktaajkiñidi.

¹⁸ Jabi tum wenkxi ja myadya'aky ja'adi, tum ja katumbi kyajpxy'ajttip, jøts ja jaa'y twindaay'atti ku ja y'axøøk winmaa'n ttukpadundi yam ja wyinaty na'mnim tø tja'uk'ixmajtsmidit ja'abi tsinaa'yin.

¹⁹ Ja tsinaa'yin ja tyaguwa'andip ma øy sa' y'adøtsnidit. Tø ja kø'øm tñimywanjajtnidi jiyujkin ja axøøkpi tsinaa'yin. Ku pøn nugo tyimykajada'aky yø yjade'embi, janch amøñi dø'øn ja tpaduñ øy yjawi sa' tmijajtni.

²⁰ Jawaani møk idø'øn ja ayo'on tpaattit pøn ja nitso'ok'ajtin tø t'ukpaaty nwindson'ajtim Jesucristo køjxp, jøts jadigojk ja kya'øy'ajtin tpadundøjkigyojmidi.

²¹ Ne'legi øy jeexyip tpaaty ku jeexyip tkanijawidi ja tiichinaa'yin, jøts jade'en jeexyip tka'uk'ixwejtšni ja Dios kyutujk mididi øy mididi wa'ats, mididi wyinaty tø y'ukyikmo'odi.

²² Jabi tøxi dø'øn ja' ayuujk tyiy ku jaa'y y'ukwa'añ ku ja uk ja y'üch jadigojk tniwimbity, jøts ku ja kuch mididi namdseepnim jits ja jadigojk nay jaayi ja mo'onts tsemujkojmi. Jade'en idø'øn yø ndejint yø'øbi jaa'dyi.

3

Ku ja nwindson'ajtim mye'ent jadigojk

¹ Meets migu'uktøjkti, ya'at idø'øn myimajtsk nøky mididi mee ndanija'ayip. Nayide'ents meets ixyam ndanijayi sam jawyeen, jøts ku meets x'ejxkapt ja tiwiyinmaa'n mididi ngajpapatpy.

² Jade'en ø nwa'añ ku meets xja'myatst ja Dios kyugajpxy sa ja y'ayuujk tyikwaañ pøn ja Dios tø ñadyamiyøxyidi, jøts nayide'en xja'myajtšmidit ja nwindson'ajtim kyutujk pøn yiknitsoojkp, sam øøts tø nnigajpxy pøn ja kyudanaabyi'ajttip.

³ Jawyeen idø'øn tymbyaat'aty meets xnijawit ya'at: ku wyinaty myeni kyidakni ja tiidyu'unin, winets idø'øn ja jaa'y kyaxø'øktit mididi tyaxe'ektip tuki'iyi ja Dios yja', jøts nugo tniðsøønidi mididi axøøk wyinmaa'njyøtpty myøøt'ajttip,

⁴ jøts yide'en wya'andit: "¿Samts idø'øn ja Cristo y'ayuujk tø yjajtni kuts idø'øn ja tijj wyimbett jadigojk? ¿Windemnimts idø'øn ja yjatt? Jabi nitits kyamiñ kyaja'aty, jade'eñim y'ity sayim ja n'apteety tyiknaxtøø."

⁵ Kyaja'myajtstip idø'øn yø' ku naæwii'ñit kawinaak ojk tø yjadigach, jabi windi'ixyipxi ja tsajp ejtni jøts ja naajx pyidsiimñim nøøjtpy, Dios Teety y'ana'amingøjxp.

⁶ Kyaja'myajtstip idø'øn nayide'en ku ja Dios kawinaak xøøw anaduu' tkejxy, jøts ja naæwii'ñit jaa'y jade'en kyudigøgyøxtøø.

⁷ Y'awixy'ajttip idø'øn yø', jawaani møj ja ayo'on mididi wyinaty memp sam ja kø'øm tø ttanibiktajkiñi ku tnajtšakaxit ja jønyow. Ja'abi jøøn idø'øn yiktøoyidip ja ka'øyjaa'dyi ku wyinaty ja tiidyu'unin ñaxy.

⁸ Mnija'wip meets nayide'en ku ka'ap ja nwindson'ajtim ja xøøw ja jumøjt tmøjpikta'aky, jade'en ja t'ixy ja tu'ukpi xøøw sam ja tukmilbi jumøjt.

⁹ Kidi meets mwinmay sam winaaqin wya'andi ku ja nugo tyaa'ni ku kyamiñ jadigojk sam ja kyajpxy tø pikta'aky, møk idø'øn tyuda'aky'ajtin ja tyikmajada'aky jøts ja jadine'en xmaa'kxujukyim. Ja' chøjkpy jøts ka'ap pøn nugo wyindigø'øty jøts ja ndsinaa'yin nyiktigajtsint.

¹⁰ Jade'en idø'øn ja nwindson'ajtim jotkumoni ja tyiidyu'unin tmøøtja'att, jade'en sam maa'tspa'an adsu'jkyi koots myiñ yam niti kyayikjøp'ixy. Kuts ja nwindson'ajtim yja'att jade'en, winets idø'øn tsajp pyømemga'akt ku ja kyudigø'øyin tø myeni. Winets tyøøbyøjkøxnidit tuk'ojkyi ja tøø'kxpi tsamamba' mididi jam tsajpwemp, jøts yø naæwii'ñit tuki'iyi tyigøøñit jønyow agujukpy.

¹¹ Jabi jade'enxi dø'øn ja ayo'on ñaxkida'akt ya naæwiiñ, ijadits adøm idø'øn nganadyamiyojxa'ant ja Dios!

¹² Yikyijyidi ja mxøøw ja mjumøjt jøts ja yja' xyikmayidit, jøts jade'en chojkit ja xøøw ja jumøjt ku wyinaty kyudigø'øgyixy jønyow agujukp tuki'iyi mididi jam tsajpwemp jøts ya naæwiiñ;

¹³ ja'ats idø'øn adøm n'awejxindip ja jembyi tsajp ja jembyi naajx mididi ja Dios tø tni'adsowi kø'øm, ma dø'øn niðuki'iyi ja jaa'y ja y'øyi ja tyiibyitu'undit.

¹⁴ Paty meets migu'uktøjkti, ku ya'at xjøp'ijxy'attit, tum ja' meets mdu'ump mididi ja Dios chøjkpy, tsokti ja tudā'aky'ajtin, niæem niyam mnamyayidi jøts jade'en ja Dios mbaadiyidit niti pøky niti kadyeey.

¹⁵ Ja'gyukidi ku ja nwindson'ajtim tsojk kyamiñ, paty idø'øn ja ttuñ jøts nyikmøja'ant nyikmaya'ant ja nitso'ok'ajtin, ja tyuda'aky'ajtin idø'øn ja jade'en yiknigaxi'kpy. Nayide'en meets idø'øn tø mdanija'ayimidi yø'øbi winmaa'yin ja Pablo, adøm nmigu'uk, ku tyiktuñ ja ja'gyukin mididi ja Dios tø myø'øyi.

¹⁶ Tum ya'atpi ixpøjkin idø'øn kyajpx'ijtpy ma ja nøky ja jaa'y ttanijayi, øy idø'øn ja muum tsep ku nja'gyukiwya'anint, jaa dø'øn ja kaja'gyukibidi, jøts pøn ja yjançha'win kamøktaktipnim tum wenk idø'øn ja ixpøjkin ja tjuutti, ka'ap jade'en ja Pablo yjawa'añ ñøkyjøtpty. Nayide'en idø'øn ja ttumidi tuki'iyi ja Dios kyajpxy kyø'ømgudigø'øyingøjxpti.

¹⁷ Paty mee migu'uktøjkti, jabi mnija'wiñidipxi meets ya'at tuki'iyi. Nay'ejx'etidi jøts ka' xpabøktit sa yø' jaa'y wya'andi, ku taagyøjxp myikpøjkiwya'andi ja mjanchja'win.

¹⁸ Ne'egi ja' pawinmaydi sa ja nwindson'ajtim Jesucristo ja tyiy'ajtin xnija'wiyidi. Yikmøjidi ja tsojkin ja pa'ayo'owin midi ja yiknitsokpi tø xmø'øyim, pøn ja y'øy'ajtin myø'ajtin xemikøjxp ejtp. Jade'ents idø'on yjatt.

JA MYĪDU'UKPI NØKY MIDI JA JUAN YJAAY

Ja' midi xyikujky'ajtindip

¹ Ya'atpi nØky øø ngejxpy, jØts mee ndukmadøy ja Jesucristo, ku ja jaayim wyinaty ku cho'ondakijxy tuktsajp'agida'aky. Nay ja' øø tØ n'ixy tØ nmadøy jØts nayide'en øø tØ ndukpaaty ja ngø' ndeky; yø' y'ayuujk yø' wyinmaa'yin adøm ndajujky'ajtyindip.

² Tø ja ñankñigaxi'igiyyi, øøts tØ n'ixy øøts tØ nnijawi, paty mee ndukmadøy ixyam ku ja ejtp møøt chøøni ja Dios Teety, tØts idø'øn ixyam xnimi'iñindi.

³ Tyiñyi øøts ndyimñigajpxy midi øøts idø'øn tØ ndyimy'ixy ndyimyadøy; paty mee ndukmadøy jØts meets m'ett amuki møøt øøts, kumi tyimdyiy tyimyjanch ku øø møøt n'ity ja Dios Teety jØts nayide'en møøt ja y'U'nk Jesucristo.

⁴ Yø'øbi ayuujk yø'øbi winmaa'yin meets ixyam ndanija'ayip jØts yikxon ejtni xoni mwinmaa'ñ y'ettit.

Janch wa'ats ja Dios ejxim ja jajin

⁵ Yø' øøts nnigajpxwampy yø øy'ayuujk yø ømyadya'aky midi øøts ja tØ xukmadøy; jØts ku ja Dios Teety janch øy janch wa'ats ejxim ja jajin, jØts niwine'enin ja ka'øy'ajtin tkamøødi.

⁶ Kuts nwaq'ñindi ku ja Dios Teety nmøøt n'ijtyindi jØts nika' n'ukpaduu'na'andi ja n'ayuujk, nugo adøm ja nmidundigøy adijjchindi. Yø' idø'øn møj taay ku jade'en nugo nwaq'ñindi.

⁷ Kuts ninaq'yindit øy wa'ats ejxim ja Dios Teety chøøni, winets nixem niyam tu'ugyi ja winmaa'ñ nmøøt'ajtindit, jade'en idø'øn ja y'U'nk Jesús xyikpøkwyajjchindi midi jaty ndu'uñindip ku ja wyidsuun wyidajxy.

⁸ Xjats ku nugo nichøky nwaq'ñindi jØts ku ka' ndundigøø'yindi, nugo kø'øm nnawyindaay'ajtya'andi jØts tiy ngakajpxyindi.

⁹ Kuts ndamimadyakøxindit ja Dios Teety nbøky, njøp'ejxindip ja' ku ja ttu'unt midi paat'ajtip, jØts nay ja xpojkpimaa'kxindip jØts nay ja' jatyi xyikwaajtsindip midi jaty adøm ndundigøø'yin'ajtyindip.

¹⁰ Kuts nugo nwaq'nint ku ka'ap nbøky nmøøt'ajtyindi, jade'en idø'øn ja nbiktaajkyindi jØts ku ja tyaa'y ja Dios Teety, niwine'enints jade'en ngamimadoo'ja'ant ja kyajpxy ja y'ayuujk.

2

Jesucristo amuum xnikajpxuujtimp

¹ Meets u'nkti una'jkti, ya'at meets ndukmadøøpy tuki'iyi ku ka'ap mbøkytu'undit, jØts pøni pøn wyinaty sa tyimyajtp paty xnijawidit ku jaa nmøøt'ajtyindi tu'uk ja nikajpxutpi jam Dios Teety wyingujk, ja Jesucristo dø'øn ja' pøn janch, pøn tiy.

² Tø ja Jesucristo tku'ayo'ombaaði adøm ja nbøky, jØts nigidi adømyipti, niduki'iyi dø'øn nayide'en ja naqxwiil'ñit jaa'y.

³ Pøni nbadu'uñindip ja Dios ja kyutujk sa ja tØ xuk'ijxyindi xuknija'wa'andi, jade'en'ampts adøm ja x'u'nkja'wa'ant.

⁴ JØts pøni pøn wamp ku ja y'u'nk'atyiyi ja Dios jØts nika'ap ja tpaduujniyi ja kyutujk, ja' nugo kajpxigøøpy, nugo ja tyaa'y.

⁵ JØts pøni pøn amumjoojt nadyamidøky'ajtip ja Dios, ja'ats tpaduujnip ja Dios kyutujk; jade'ents ja yiknijawi ku nwindson'ajtim ja møøt y'ity.

⁶ Pøni pøn tyimwyamp ku møøt tyimy'ity ja Dios, wants nayide'en tyiknaxy sami Jesús tyiknaxy.

Nbadu'unimp ya'at jembyi ana'amin

⁷ Migu'ukti, ka'ap meets ja jemgyutujk ixyam ndanijayi; nay ja' yø' midi mee tØ xmadowdi xnijawidi ku ja mdsinaq'yin xyiktso'ondaktøø jadigojk.

⁸ Yø' meets ixyam njaaktukmadøøpy, yø kutujk, midi janch øy janch tump, øyajemgyutujk, ja ku ja xem ja yam nnachojkindit jade'en sa ja Cristo ttuun, jØts mbaat'ajtyip meets nayide'en xu'unt. Yø'øbi winmaa'ñ tyikudigøøpy ja ka'ødyunk, jade'ents ja tsinaq'yin y'øyi pyaadi.

⁹ JØts pøni pøn nugo wamp ku ja tpaduñ ja jemchinaq'yin, yam ja myigu'uk ja tmi'ambikñim tmijotma'atynim, ja ka'ødyunk ja wyinaty pyadun'adichpnim.

¹⁰ Pøni pøn twamp ttsojpk ja myigu'uktøjkti øpyøni, ja' idø'øn tpadump ja øchinaq'yin jØts niwine'enin ja pyøky kyanadyukpaadyi jade'en.

¹¹ Jøts pøni pøn ja myigu'uktøk tmi'ajkidip, ja' nugo tsinaapy ka'ødyunk agujkpy, ka' tñijawi pøni ti tyumpy kyajpxy, jade'en ja wyimbejtñi ejxim ja kugots jaa'y.

¹² Meets u'nkti meets una'jkti, ixyam mee nnijayi jøts ndukmadowdi ja'agøjxp ku ja Dios Teety tømbojkpimee'kxyidi Jesucristo køjxp.

¹³ Teetyi taakti, nayide'en meets ixyam ndukmadøy ya'at ayuujk kumi tøm mee xpabiky ja Jesús yja' midì jaayim wyinaty ku cho'ondakijxy tuktsajp'agida'aky. Meets wajtyøjkti meets kiixye'edi, ixyam mee ndukmadøy ya'at ayuujk kumi tøm xmi:majada'akti ja miku' yja'.

Nayide'en meets u'nkti meets una'jkti ndanijayi ya'at ayuujk, kumi tøm m'u'nk'atyidi ja Dios Teety.

¹⁴ Meets teetyi taakti, jade'en meets ixyam ndanijayi ya'at ayuujk kumi tøm xjanchjpabøjkti ja Jesús yja' midì jaayim wyinaty ku cho'ondakijxy tuktsajp'agida'aky. Nayide'en meets wajtyøjkti kiixye'edi ixyam ndanijayi ya'at ayuujk ku ejtp mjanchmøkwinmaydi jøts ku ja Dios Teety kyajpxy y'ayuujk tøm xpabøjkidi amumjoojt, jøts nayide'en ku tøm xmi:majada'akti ja miku' yja'.

¹⁵ Kidi nugo xtsojkti ja pøkyunk ni ja pikta'aky midì ya ejtp naẁwiif. Jøts pøni pøn t'anømp t'adsojpk ja pøkyunk jøts nika' ja Dios Teety ne'egi tsoky'aty jade'en.

¹⁶ Yide'en idøøn ja naẁwiifit jaa'y tjanchøjkti ja pøkyunk midì winmaa'ñjotpy mee'nxidip, jøts midì tymchuj'ejtip tymchujawidip. Ja'ats nugo ja pikta'aky nadyamøja'wiyidip, ja' ja nugo pyawinmay'ejttip midì jaty jaa kayik'ødyump ya naẁwiif, yamts ja Dios Teety ja jade'en tøm tkadanibiktaagi.

¹⁷ Windigøøpy y'ity midì yikpøkyump ya naẁwiif, midì nugo yiktsojka anaxp; jøts pøni pøn tpadump sa jaty ja Dios tsoky, ja'ats y'anmija'win xemikøjxp jujky'atp.

Pøn miðøjpk ja Cristo, jøts pøn ja kamibøjkip

¹⁸ Meets u'nkti una'jkti, tøm jabaat tpaaty ja et ja xøøw ku myenwa'añ tu'uk ja jaa'y pøn ja Cristo møkmyidsep'atwamp, pøn meets nayide'en tøm xñijawi xnimadøy; ixyamts nayide'en tøm kyaxø'knidi namay pøn tmidsep'ajtip ja Cristo, paty jade'en yikni:jawi ku tøm jabaat ja et ja xøøw tpaaty.

¹⁹ Nay adøm nmigu'uk jade'en winaagin adøtstip pøn adøm tøm xmajtstuujtyindi paty ja tmidsep'atwa'andi ja Cristo; nigidits ja' pøn adøm nwinmaa'ñ møøt tuknaxti, ku jeexyip ja'adi, tøm ja jeexyip møøt ndaa'ñindi. Jade'en idøøn jyaty ku winaagin xpuwaajchindi, paty wa'ats yikni:jawi ku ka' yikxon tmøø'tatti ja winmaa'ñ sa adøm nja'.

²⁰ Adømts ja Cristo tøm tuktatøjka'andi ja Espiritu Santo, ja'agøjxp ixyam nnija'wa'andi ja tyiibyi ja yjanchpi.

²¹ Paty meets ixyam nnijayi ku xñijawidi midì tiy midì janch, ka'ap ø nwa'añ ku ka' xñijawidi; wa'ats mee xñijawi ku ja tyiibyi ja yjanchpi ka' nayide'en sa ja taay.

²² ¿Pønts idøøn taay'ajtp? Ja'ats idøøn pøn wamp ku ja Jesús ka' yiknitso'ok'aty. Pø ja'axi tkawamp tkatsojpk ja Dios Teety møøt ja y'U'nk Jesús.

²³ Pøni pøn tkawandip tkatsoktip ja Dios Teety y'U'nk, ja Dios Teety idøøn wyinaty jade'en kayiktsojpk; jøts pøni pøn twandip tsoctip ja y'U'nk Jesús, ja Dios Teety idøøn wyinaty jade'en yiktsojpk.

²⁴ Paty øøts idøøn nnigajpxy jøts xwinmaa'ñ'attit ja øgyajpxy ja øy'ayuujk midì tøm xpabøkti jøts midì yajkpy ja øchinaa'yin; pøni mwinmaa'ñ'ajtip yø', jade'en ja Dios Teety jøts ja y'U'nk Jesús møøt n'ijtyindi.

²⁵ Kumi Jesús køø'm ñi'adso'owi ku ja xmøø'yint ja øchinaa'yin midì xemikøjxp yik-møø't'atp.

²⁶ Ja'agøjxp mee nnijayi ku nugo myikwindaayidit.

²⁷ Pø tøxi ja Jesucristo mmøø'yindi ja Espiritu Santo, paty ka' pyaat'aty jøts pøn jadu'uk mgajpxwejiyidit, pø ja Espiritu Santoxi mee køø'm myikwejiyip myikajiyip midì tiy midì janch jøts ka' tyaa'y. Meets migu'uktøk, jade'en idøøn y'ejxi tyiyi jøts yikxon mdsøønidit mdanidit amuki møøt ja Cristo, jade'en sa køø'm mdukjatyidi ja Espiritu Santo.

²⁸ Jøts jade'en wingujk jotkujk njøp'ejx'ejtindit ku ja mye'ent ja Jesús, jøts jade'en ka' nmitsøødyu'unindit.

²⁹ Pø tøxi meets xñijawi ku ja Jesucristo y'øyi tyiyi, jøts kuwani xñijawidit nayide'en jøts ku pøn øy tyi yjaa'y'aty, ja'ats ja Dios u'nk'ajtyip.

3

Sa ja Dios x'u'nk'ajtyindi

¹ Ejx ja Dios Teety xjanchøjkyindi, jøts ja wya'añ ku ja x'u'nk'ajtyindi x'una'jk'ajtyindi, pø janch jade'enxi adøm. Pø patyimxi adøm ja ka'ødyumbi xka'ejxkajpyindi xkanija'windi kumi ka'ap ja t'ejxti tñijawidi pøni pøn ja Dios Teety.

² Migu'uktøkkti, tō dō'ōn ja Dios x'u'npkijkyindi xmaābyijkyindi; ka'anims xuknijā'wa'andi pōni sudso njaa'y'ajntindit wiingyubety. Ja'ayi nugo nnijā'wa'andi jōts ku ja Jesús ñankñigaxōōkwa'aniyi jadigōjk, jōts jade'en njaa'y'ajntindit njujky'ajntindit nayide'en sam ja', pō yik'ejxpxi ja' sam idō'ōn ja chōōni tyani.

³ Pōni pōn tjōp'ejxp jade'en, ja'ats nay'ejx'ejtip jōts ja pōky kyapaadit, jōts ja jade'en chōōnit sami Jesús wya'ats'atyin.

⁴ Jōts pōni pōn tundigōy'ejtp, ja' Dios kyutujk kyamōjpiktaajkidip, pō yō'ōxi tundigōy'in'ajtp ku ja Dios kyutujk kyayikmimadōy.

⁵ Pō tōxi mee xnijāwi ku ja Jesucristo yā tō myiñ naxwiin jōts adōm xyikpōkwyajtsindit, jōts nayide'en xnijāwidi ku ja janch wā'ats, ni tu'uk ja pōky tkamōōdi.

⁶ Jade'en idō'ōn, pōni pōn mōōt y'ity ja Jesús, ka'ap ja jade'en y'ukpōkyun'adōtsnidi sam ja jaa'y pōn tkidyimñija'widip ja Jesús.

⁷ Meets u'nkti unā'jkti, kidi nugo myikwindāayidi; pōn y'ōybi tyiiby tpadump, yō' idō'ōn ōy jaa'y'ajtp nayide'en sam ja Cristo y'ōy'ajtin wya'ats'atyin.

⁸ Pōnts ejtp tyimdyundigōōpy, ja miku' yja' pyaduujnidip, pō ja'axi jade'en tyiktsō'ondāajk ja pōkyu'unin ja win'ōō'nin. Paty idō'ōn ja Jesús ojts myiñ jōts ja tyikudigō'ōty ja miku' pyōkyu'unin, ja wyin'ōō'nin, sā jaty ja y'adi'ich.

⁹ Ka'ap y'ukpōkyunidi pōn ja Dios u'nk'ajtniyidip, pō ja'axi kō'ōm mōōjyidip ja myōk'ajtin; paty ka' nugo y'ukpōkyun'adōtsnidi, pō Diosxi u'nk'ajtniyidip.

¹⁰ Yide'en'ampy idō'ōn yiknijāwi pōn ja Dios u'nk'ajtidip jōts pōn ja miku' u'nk'ajtidip, kumi ka'ap ja Dios ja tja'aji pōn ja myigu'uk tkatsojktip, jōts pōn tundigōy'ejttip.

Nachojkindip ja xem ja yam

¹¹ Yō'ōbi kajpxy yō'ōbi ayuujk midi mee tō xnijāwi ku ja m'ōchināā'yin xyiktsō'ondāktōō, yō' idō'ōn tyijpy ku nnachojka'andit nixem niyam.

¹² Jōts ku ka'ap jade'en njaa'y'ajntindit sam ja Cain ku ja y'uch ja tyik'ōōjky, ja' pyadumpy ja miku' yja'. ĆTi ja tyuku'o'j'kōō? Ja'agōjxp ku ja tkabaduñ ja miku'.

¹³ Meets migu'uktøkkti, kidi sā xjāwidi ku mmi'ambōjkitidit yō ka'ōdyumbidi.

¹⁴ Tō adōm nmajtsuujtyindi yō ka'ōdyunk jōts ja ōchināā'yin tō nbabijkyindi, jade'en idō'ōn yiknijāwi ku nixem niyam nnachōjky'a'andi. Pōni pōn tkawāmp tkatsojky ja myigu'uk, ja' pyadun'adichp ja ka'ōdyunk.

¹⁵ Jōts nayide'en pōn tmi'ambōjky tmijotmātp ja myigu'uk jade'en ja pyidsōmni sā yikjāā'y'ōōkpi, pō mnijā'wipxi meets ku ka'ap ja yikjāā'y'ōōkpi y'anmijā'win y'ity xemikōjxp, windigōōpy ja'.

¹⁶ Nnijā'windip sā Jesucristo xtsōjkyindi amumjoojt, paty adōm ja xku'o'j'kandi; jōts nayide'en adōm ja xpaat'ajtyindi ndsojkindit ja nmigu'uktøkkti sam adōm tō nyiktsōjkyindi sam adōm tō nyiku'o'j'kandi.

¹⁷ Pōni pōnts jotkujk tyiknāxp, yja'ijxpy ku ja myigu'uk y'ayōywinmay, niwine'enin tkidyimdyā'ayo'ixy ja pyikta'aky midi ja myōōt, Ćsudsots ja nugo wya'āñ jōts ku Dios ja twa'āñ ttsōky?

¹⁸ Meets u'nkti unā'jkti, ka'ap y'ōyi ku nugo nwa'ānindit jōts ku nmigu'uktøkjk ndsōjkyindi; yō' ne'egi ōy ku ndyimbyadu'unindit tiy janch. Yō'ōts jade'en wingaxō'kp ku ja nachoki amumjoojt yikmōōt'aty.

Sudso jotkujk nnayjā'wa'ant Dios wyingujkp

¹⁹ Jade'en idō'ōn yiknijāwi jōts ku nbadu'uñindi ja tyiiby ja yjanchpi, jōts jade'en idō'ōn niti ngagumāā'yindit Dios wyingujkp;

²⁰ kuts kō'ōm nnañi'ōō'na'andit, ku nmaa'yindit ndajindit ku ja Dios tō x'u'npkijkyindi, pō kō'ōmxi ja jade'en tō xtsōjkyindi jōts mōj ja', ja' tuki'iyi tñijā'wip sā adōm njawinmāā'yindi.

²¹ Jōts ku ngamaā'yindit ngatajindit winets ngatsō'jka'andit jam Dios wyingujkp.

²² Ja' adōm tuki'iyi xmō'ōyindip ti jaty adōm n'amidowa'āñindip nbōktsowa'āñindip ja'agōjxp ku nbadu'uñindi sā ja x'ane'emyindi pōni sā ja ttsōky.

²³ Yide'en idō'ōn ja y'ana'amin ku njanchjā'windi ja y'U'nk Jesucristo, jōts nayide'en nachojki'indit nixem niyam sam ja Jesús kō'ōm xa'ane'emyindi.

²⁴ Pōnts jade'en tjanchpadundip ja y'ana'amin, ja'ats ja Dios tmōōt'ejttip jōts ja nayide'en myōōt'ityidi. Jade'en'ampy nnijā'windi kudam ja tō xukatōjka'andi ja y'Espiritu Santo jōts ja jade'en kō'ōm xmōōt'ijtyindi.

4

Ja Espiritu Santo jōts ja' midi tkaminamyajyip ja Cristo

¹ Mee migu'uktøkkti, kidi nugo xnibōjkti ja jaa'y pōn wandip jōts ku ja tñigajpxidi ja Dios y'ōgyajpxy ja y'ōy'ayuujk, ejxti yikxon pōni janchpi tyiiby dō'ōn ja kyajpxtip, pō may adōtstipxi ja jaa'y ja naxwiin pōn windāay'ajttip.

² Yide'ents meets ja xnijawidit: ja' idø'øn ja wyinatyi pøn tjanchja'widip jøts ku Jesucristo ya y'atsnanky'ejxøø tyimyjaa'yin, ja'ats idø'øn ja Dios Teety møøt y'ity.

³ Pønsts jade'en tkamibøjkp ja Jesús, ja'ats idø'øn ja Dios Teety kamøøt'ejtiyip; ja ka'øwyyinmaa'ñ ja ne'egi yiktumpy midi tkaminamyajyip ja Cristo. Tøxi xnimadowdi jøts ku ja mye'ent ja ka'ødyumbi øy juuni; tøts idø'øn ja yjanchmiñ, pø jaanixi ja wyinmaa'ñ ja ya naxwiñ.

⁴ U'nkti unaj'kti, Dios mee mja'ajttip, tøxi xmimajada'akti pøn mwindaay'atwajnidip; pø tyimyøksi ja' pøn mee mmøøt'ejtiyiyip jøts nika'ap ja jade'en myøki ja ka'ødyumbi yja'.

⁵ Ja' ja nugo tyunk'ajttip ja ka'ødyunk ja ka'øwyyinmaa'ñ paty ja tum jap ttuk'ixpøkti ja jaa'y jøts ja jade'en yikmøjawidit.

⁶ Diosts adøm xja'ajtindip jøts ja xmibijkyindi pøn jaty ja Dios møøt'ejtidip. Ja'ats xkamibøjkindip pøn kamøøt'ejtidip ja Dios; jade'en'ampyts nnija'wa'an pøn tpadundip ja y'øybi ja tyiibi jøts pøn tpadundip ja taay'ajtin.

Dios amuum ja tsojk'ajtin myøøt'ajtpy

⁷ Mee migu'ukti, xpaat'ajtindip ejtp nixem niyam nnachojkandit, jabi Dios wyingujkpxi chøøñ ja øchojkin. Pøn ja myigu'uk tsojkp, pøn ja myigu'uk tpa'ayoop, ja'ats idø'øn ja Dios tjanchja'wip jøts ja jade'en y'u'nk'atyiyi.

⁸ Pøn tkatsojkp tkaba'ayoop ja myigu'uk, ja'ats tkidyimyjanchja'wip ja Dios, kumi ejtp ja Dios ttsøky ja jaa'y, ejtp ja tpa'ayøy.

⁹ Jøts adøm ja ojts xani'ejxa'andi sa ja xjanchøjkyindi xpa'ayø'øyindi ku ja tyu'umtpspi U'nk ja ojts xaniguejxyindi, jøts ja øchinaa'yin xmø'øyindi y'oo'kingøjxp.

¹⁰ Yide'en'ampy idø'øn ja Dios chojkin ja pya'ayo'owin y'ejxi tyiyi: pø nigidi adømxi ja tøndsojkyindi nba'ayø'øyindi jawyeen, pø ja'axi adøm kø'øm tø xtyimchøjkyindi jøts ja y'U'nk ja xaniguejxyindi jøts ja xku'ayo'owandit ja nbøky.

¹¹ Migu'uktøjkti, pøni tødam ja Dios xtsøjkyindi, ti kuts adøm nganachøjkyindi nayide'en ja xem ja yam.

¹² Pøn ja Dios tø t'uk'ixy, nipøn ja tka'ixy; pøni nachojka'andipts nabya'ayo'owa'andipts nixem niyam jade'en ja xmøøt'ijtyindi jøts ja jade'en njaaktyimchojkint.

¹³ Nnija'windip ku ja Dios møøt n'ijtyindi jøts xnamyøøt'ejtindip ja nayide'en, ja'agøjxp ku ja tø xuktatøjka'andi ja y'Espiritu Santo.

¹⁴ Tø øøts n'ixy, tø øøts nnijawi wemp'am, paty øø nwa'añ jøts ku ja Dios Teety tø tjanchkexy ja y'U'nk yiknitsokpi ya naxwiñ.

¹⁵ Pønsts tjanchja'wip jøts wya'añ ku ja Jesús Dios U'ngi, ja'ats ja Dios tmøøt'ejtp jøts nayi møøt'ejtip ja nayide'en.

¹⁶ Jade'en'ampy adøm ja tøn nnija'wa'andi jøts ku xjanchøjkyindi xpa'ayø'øyindi ja Dios. Pø ja'axi ejtp tsojkp, pø ja'axi ejtp pa'ayoop; pønsts ja tsojkin yikwingaxi'kpy, ja' ja Dios møøt'ejtip.

¹⁷ Ku jade'en nbadu'unint, jade'en ja nyikmøjtaajkint ja øwyyinmaa'ñ, jøts ja jade'en ngawingudsøj'knt ku ja mye'ent tiidyumbi; ja'agøjxp ku ja nayide'en xukwinmaa'yimp ja tsojkin ja pa'ayo'owin sam ja xtsøjkyindi sam ja xpa'ayø'øyindi.

¹⁸ Niwine'enin ja Dios chojkin ja Dios pya'ayo'owin xkayiktsøj'kandit. Yjaaktyimyiktigøøgyjxpy ja tsø'øgi ja ne'egi, jøts pø yiku'ayo'owipxi ja tsø'øgi ku pøn chø'øgi, ja'ats idø'øn tkayikmøjtøjkpinnim ja Dios chojkin ja Dios pya'ayo'owin.

¹⁹ Ja'agøjxp adøm ja Dios ndsojkyindi kumi jawyeen ja jade'en tø xtsøjkyindi.

²⁰ Pøn nugo wamp: "Ndsøjky øts ja Dios", jøts ni ka'animdims ja myigu'uk ja twa'añ ttsøky, ja'ats idø'øn taayip. Sudso'ampyts ja Dios tjaaktyimchokt, pø ka'axi ja kyaxi'iky, ti ja' net ja yjaaktsokp pø ja myigu'ukxi ja kyatsøjkpy pøn yja'ijxpy wiñ'ajj.

²¹ Jøts ja Dios yide'en xmø'øyindi ja y'ana'amin: pøni pøn ja Dios tsojkkp, nayide'en ja myigu'uk ja twa'ant ttsokt.

5

Sudso'ampy ja ka'ødyumbi yja' xkamimajadaajkint

¹ Pøn jaty tjanchja'widip ku ja Jesús yikejxy ya naxwiñ yiknitsokpi, ja'ats ja Dios Teety u'nk'ajtiyidip; pøni chojktip tam ja Dios Teety jade'en, nayide'ents idø'øn ja tsojktit tpa'ayo'odit pøn jaty ja Dios Teety y'u'nk'ajtpy.

² Kuts ja Dios ndsojkindit jøts ja jade'en ndyimbyadu'unindit sa ja y'ana'amin ja wya'añ, jade'ents ja nnija'wa'ant ku ja nayide'en ndyimchøjkyindi pøn ja yja'ajtpy.

³ Kuts jade'en ndsojkindit ja Dios, ja' idø'øn ja tyijpy ku dø'øn ja y'ana'amin nbadu'uñindi, jøts ka'ap ja mabaat chepi.

⁴ Jøts pøn jaty ja Dios møøt y'ity, ka'ats ja tmibøjkidi ja ka'ødyumbi yja'. Pø paty ja Dios janchja'win xuktamajadaajkyindi jøts ja xkadukmibijkyindi ja ka'ødyumbi yja'.

⁵ Põnts tkamibõjkti ja ka'odyumbi yja', ja'ats idø'øn tjanchja'widip ja Jesús jøts ku ja Dios U'ngi.

Ku ja Jesús yiknigajpxy ku ja Dios U'ngi

⁶⁻⁷ Nnija'windip adøm ku ja Jesús Dios U'ngi, jabi kø'ømxi ja Dios Teety ja tyimnigajpxy ku ja Jesús ñøbejty jøts ku nayide'en wyinaty y'ookwaañimi; jøts ja Espiritu Santo ejtp nayide'en tñigajpxmi, jabi myøøt'ajtpy ja tiy'ajtin ja'.

⁸ Tigøøkts adøm idø'øn ja ejxpajtin nmøøt'ajtyindi midì tñigajpxtip ku ja Jesús Dios'u'nk'aty. Ja myidu'ukpi, ja Espiritu Santo kyajpxy y'ayuujk ja' midì xuknija'wandip ja tyiiby ja yjanchpi. Ja myimajtskpi, ja Dios Teety y'ayuujk ja' midì yikmadoow ku ja Jesús ñøbejty; jøts ja myidigøøkpi, nay ja Dios Teety y'ayuujk ja' midì yikmadoow tsajpjtptpy kyida'aky ku ja Jesús wyinaty y'ookwani.

⁹ Sa ja jaa'y tyiy'ajtin ngupijkyindi, ¿ti Dios idø'øn ja tyiy'ajtin njaakidyimgyupøjkin? Pø ja'axi jawaani tyimdyiy tyimyjanch ku ja tñigajpxy sa ja y'U'nk ja yjajty kyubejty.

¹⁰ Pøn tjanchja'wip ja Dios U'nk, kø'ømst ja tjä'gyuki ja tyi'ajtin; jøts pøn tkajanchja'wip ja Dios ku ja tñigajpxy sa y'U'nk yjajty kyubejty, ja'ats taadvejp ja Dios.

¹¹ Ya'at tyi'ajtin xuknija'windip jøts ku Dios tø xmøø'yindi sa n'anmija'win xemikøjxp yjujky'ajtindit, ja y'U'nkts ja'abi jujky'ajtin tmøøt'ajtp.

¹² Põnts møøt y'ity ja Dios U'nk, yikmøøpys ja'abi jujky'ajtin ja'; jøts pøni ka'ap jade'en yikmøøt'ity, niwindem jade'en ngapaajtindit ja'abi jujky'ajtin.

Ku ja kajpxwejin jøts ja kajpxpoo'kxin y'ukyikyajkni

¹³ Ya'at mee ndanija'ayip wine'enin jam xjanchjawidi ja Dios U'nk, jøts xnijawidit ku ja jam xmøøt'ajtnidi ja jujky'ajtin midì xemikøjxp.

¹⁴ Jade'ents ngawingudsø'jkindi ja Dios ku n'amido'owin nbøktso'owin pøni ti ja kø'øm xamidsojkindip, ja' ja myadøøpy.

¹⁵ Tøts inet nnija'windi ja Dios kudam ja tmadøy ja amidø'owin ja pøktso'owin, jøts nay jatyi x'adsowimbijtyindi pøni ti dø'øn tø n'amidø'oyindi.

¹⁶ Pøni n'ijxyindip nnija'windip ja nmigu'uk ku ja ttundi ja pøky midì ttukja'dyigøøpy ja Dios, jatyiys ngu'amidoo'wandit jøts ja Dios ja myaa'kxukiyit. Jabi jaaxi ja kajabøky midì ja anmija'win tyikwindigøøpy jøts ja Dios tyukja'dyigøy, kidi ja'apts ndijpy.

¹⁷ Tumbøky yø tundigø'oyin kajpxigø'oyin; jamts ja winaagin midì tkayikwindigøøpy anmija'win.

¹⁸ Nnija'windipts ja' pøn ja Dios Teety møøt y'ity, ka'apts ja pøky'agujkpy chøøni; pø Dios U'nkxi axajtujkiyip jøts ja miku' ja sa kyatuniyit.

¹⁹ Pø nnija'windipxi adøm ja' ku adøm ja Dios xja'ajtyindi, jøts may ja'amidi pøn ja miku' tø ñiwangøjxniiyidi.

²⁰ Jøts nay yiknija'wip ja' ku ja Dios U'nk tø xnimii'ñindi, jøts ja tø xuknija'wandi midì tu'ugyi ndios'ajtyindip. Ja' tu'ugyi møøt n'ijtyindi ja y'U'nk Jesucristo. Ja'ats idø'øn tu'ugyi ndios'ajtyindip, ja'ats tyajkp jøts ja n'anmija'win xemikøjxp yjujky'ajtindit.

²¹ U'nk una'jkti, nay'ejx'etiyidi yikxon, kidi nugo o ti xdiospikta'akti, kidi jade'en o ti xwindsø'ogidi. Jade'en idø'øn ja yjatt.

JA MYĪMAJTSKPI NØKY MIDI JA JUAN YJAAY

Ja tÿ'ajtin, ja tsojkin jøts ja pa'ayo'owin

¹ Mets u'nk Ciria, møjaa'y'ajtp øts, ixyamts meets ya'at nøky ndanijayi møøt m'u'nk m'una'jkti wine'enin ja Dios tø m'a'ejxiyidi jøts ja jade'en mja'atyidi. Jade'ents mee ndsøky, jade'ents mee nba'ayø, jøts kidi øtsip tu'ugyi, pø nayide'enxi meets ja mdsøkyidi mba'ayøyidi pøn jaty ja y'øyi tyiibi tpadundip.

² Ja' øts jade'en xyik'adøts p ja ku nmøøt'ajtyindi ja y'øyi tyiibi jøts nijuuni adøm ja xkamajtsuujtyindi.

³ Dios Teety jøts ja Dios U'nk, ja'ats mee mgunuu'kxidip mba'ayoojidip jøts mmø'øyidi ja øy'ajtin ja jotkujk'ajtin tÿ janch sã ja ttsøjkyin.

⁴ Jade'en øts ja m'u'nk ja m'una'jk winaagin njanchtaxonda'aky ku øts ja nbaaty ku øts ja n'ixy tpadundi ja y'øyi tyiibi jade'en sam ja Dios Teety ja tø xa'ane'emyindi.

⁵ Mee migu'uktøjkti, mdyimdyu'undip ja may'ajt jøts ja xem ja yam nmigu'uk ndsojkindit nba'ayo'owindit. Kidi ixyamnim yø jade'en yikmadø, jaayip yø yikmadoosdo'ondakni ku ja ndsinaa'yin nyiktigajchindi.

⁶ Yø' idø'øn tsojkin'ajtp, yø' idø'øn pa'ayo'owin'ajtp ku ja Dios kyutujk nbadu'unin; jøts yø' idø'øn kyutujkin'ajtpy midi tø xmadowdi ku mdsinaa'yin tø xyiktigatsti, jøts xem yam mnachokidit mnabya'ayowidit.

Pømbi win'øø'ndip

⁷ Jats may ixyam ja win'øø'mbidi pøn tkajanchjawidip ja Jesucristo ku ja y'atsnanky'ejxøø jaa'yin. Pønts jade'en win'øø'mp, ja'ats idø'øn tkawamp tkatsojpk ja Cristo.

⁸ Øyim mnay'ejx'etidit, kidi xkamøjpkta'akti ja ixpøjkin midi mee tø nduk'ixpiky. Jade'en Dios øy ti mmo'ojidit pøni ti ja mdamidsojkidip.

⁹ Pønts nugo tyimwyinmay'anajxp nika'ap ja t'uktajotkujk'ajtniyi ja Cristo y'ixpøjkin, ja'ats kamøø'ejtÿp ja Dios; pønts jade'en tjantyimbyadump sã ja y'ixpøjkin wya'añ, ja'ats idø'øn møøt'ejtÿp ja Dios Teety jøts ja Dios U'nk.

¹⁰ Kuts pøn mninøjkxidit mjøn jotp mdøjkjotp, yamts meets ja xanijawi jøts ku wenk ixpøjkin ja tmøødi, kidi meets ja xyiktøki jam mdøjkjotp, jøts kidi meets ja xmo'odi ja kajxpoo'kxin;

¹¹ pønts ja tkajxpoo'kxp, ja'ats idø'øn tpadump ja ka'øy ixpøjkin.

Sã ya'at ayuujk yjøpkixy

¹² Maynim øts ja winmaa'ñ nmøødi midi mee ndukmadoowampy, jøts ka' meets ja nugo ndanijayiwya'añ; ndyimñinøjkxwampy mee kø'øm jøts ixy windani ndukmado'odit, jøts jade'en ndyimdyajotkujk'ajtindit.

¹³ Ja m'uch pøn ja Dios tø y'a'ejxiyi, ja'ats ja y'u'nk ja y'una'jk yam mdanigajxiyÿp ja kajxpoo'kxin. Jade'eñi øts ja ayuujk nguexy, jade'en idø'øn yjatt.

JA MYĪDĪGŌŌKPI NŌKY MIDI JA JUAN YJAAY

Ōy tsuj ja Gayo yiknigajpxy

¹ Mōjāā'y'ajtp ōts, ixyamts ōts ya'at nōky ndanijayi mets migu'uk Gayo, ja'agōjxp ku nijuuni ngaja'dyigōy.

² Migu'uk, wamp ōts jōts ōy yikxon xyiknaxt mōk mōjāāw, nayide'en sam ja Dios ōy tsuj myik'ityi.

³ Njanch'ōyja'wipts ōts, njanchuja'wipts ōts, jōts ku ōts ja jāā'y winaagin xnimendōō pōn nmigu'uk'ajtyindip, jōts ōts ja xamimadya'akti jōts ku mets ōy tsuj mjāā'y'aty sam ja Dios kyajpxy wya'añin.

⁴ Midl'ibi ōts idō'ōn njaaktyimy'ōyja'wip njaaktyimchuja'wip pō nmadōōpxyi ōts jōts ku ōts nmigu'uk ja mōj ja mutsk tpaduujnidi ja Dios kyajpxy.

⁵ Migu'uk, ōy'ajtp ku ōy tsuj mjāā'y'aty ku jade'en nmigu'uk xpudōki pōn jaty tminaxtip tmidōkidip ja Dios kyajpxy ōy ja xjaga'ijxy'aty.

⁶ Tōts ōōts ja winaagin xuknadowdi sā mets ja xtsōky sā mets ja xpa'ayōy. Jāaktyimdyun ja may'ajt jōts ja xjāākpudōkit sam ja Dios tkupikyin, ku ja jam jade'en yja'attit choondit.

⁷ Pō ja'axi ja tō tniidoondi jōts ja jade'en tmiwidejtidi ja Dios kyajpxy, jade'ents ja ka'ap tkupōkti ja pudōjkin midi ja jāā'y ja mōōjyidip pōn jaty tkanija'widipnim ja Dios.

⁸ Patyts adōm xpaat'ajtyindi jōts ja ndyimbyudōjkandit ku ja jade'en tmiyō'ōdyi tminaxti ja y'ōybi ja tyiibi.

Ka'ap y'ōyjaā'y'aty ja mixy Diōtrefes

⁹ Tō meets ja nōky ndanijayi jōts mee ndukmadōy yō'ōbi winmāā'ñ, ja' ku ja mixy Diōtrefes tkamōjpikta'aky ja n'ayuujk ja n'ana'amīn, ja'ats ne'egi kō'ōm nabyiktaajkip windsōn jōts niwine'enin ōts ja xkamimadōy.

¹⁰ Paty ku ōts wyinaty nniikxy, mōk ōts ja ndawingugajpxit ku adōm ja xwingajpxyindi xpagajpxyindi ku ja xnidaay'ajtyindi. Nayide'ents ja tkadajotkujk'aty, yjaaktyimy'ane'empy ja myigu'uk ja', jōts ja ka'ap tkupōktit pōn jaty tmija'ttip tmidso'ondip ja Dios kyajpxy, pōnts ja jade'en tjababadunwamp, jatyits ja tpawōpy jōts ja ka' t'uktuktatōjkifi mā ja Dios kyajpxy yikpatmadōy.

¹¹ Migu'uk Gayo, nijuuni jade'en xkatu'unt sam ja ka'ōdyumbi ttuñ, tum ja ōybi mdu'ump. Pōn jade'en ōy jāā'y'ajtp, ja'ats ja Dios ja'ajtyip, pōnts ka'ōy'ajtp, ja'ats idō'ōn tka'ejxp tkanija'wip ja Dios.

Janch ōyjaā'y'ajtp ja Demetrio

¹² Ōy tsuj yiknimadya'aky ja Demetrio. Nānky'ejxip ku ja tpaduñ ja y'ōybi ja tyiibi. Nayide'ents ōō nwaami, nyiktiidyōjkip ōōts ja nayide'en, pō mnija'widipxi ku ōō ka' ndaayi.

Ja kajpxpoo'kxin midi ya'at nōky tyagugōjxip

¹³ Maynim ōts ja winmāā'ñ nmōōdi midi me ndukmadoowampy, jōts ka' mets ja nugo ndanijayi wya'añ;

¹⁴ ndyimñinōjkxwampy me kō'ōm jōts ixy windani nnagyajpxindit.

¹⁵ Ōy yikxon xyiknaxt. Ixyam nmigu'uk mdaniguexyiyi ja kajpxpoo'kxin pōn jaty yam tsinaadyip. Tunts ja may'ajt jōts nayide'en xkajpxpoo'kxt pōn jaty jam nmigu'uk'ajtyindip.

JA NØKY MIDI JA JUDAS YJAA_Y

Ku ja Judas tñijayi pøn jaty ja Dios tø twi'ixy

¹ Judas'ajtp øts. Øts ja Jacob nmiga'ax'ajtpy. Nmিদumpy øts ja nwindson'ajtim Jesucristo jøts meets ya'at nøky ndanijayi pøn jaty ja Dios tø tyamidsøkyiyi jøts ja yja'atyyit, ku ja tø y'agø'dukyyi y'axajtukyyi ja nwindson'ajtim Jesucristo, ku ja møøt y'etti.

² Mbaaattip yikxon ja Dios kyunuu'kxin jøts øy tsuj mba'ayowiyidit jøts ja øy'ajtin myikmo'odit.

Pøn nugo jawindaay'atwamp

³ Meets migu'uktøjk, o meets ja nøky kawinaak ojk tø njadanijayiwyaa'añ sa dø'on y'ejxi tyiyi ja nitso'ok'ajtin mididi njagyejpyindip, ixyamts mee nñijayi jøts tu'ugyi xyik'ettit ja mjanchja'win mididi ja Dios tu'ugyi tø xmo'øyim, ku ja xja'ajtyindi.

⁴ Jabi tøxi ja jaa'y jam tmidøki ja win'øø'nin jøts meets ja mdukpapunwa'añidi mididi ja tiy'ajtin kyamøøt. Pø wampxi ja Dios kyajpxy jøts ja tyik'ayo'ombaatt sam pyaat'atyyi ku ja kya'øyjaa'y'atti, wandipts ja' øy ja ti ttu'undit maa'kxukidip ja Dios ja'. Ka'ap ja Dios Teety yja' tsojkidi pøn xja'ajtindip møøt ja nwindson'ajtim Jesucristo.

⁵ O meets ja xjanijawi, nduknijawiyampy meets ja jadigojk jøts ku ja Dios Teety ojts tyik'awa'atspidsimsy ja Israelit jaa'y jam Egípto, xjats tyikwindigø y ja' pøn ja kamibøjkiyi kabaduujniyi.

⁶ Jøts nayide'en ja ankilistøjk winaagin ja yja' ka' t'ukpadunidi sam pyaat'atyi, Diosts ja tø myachi jøts ja tø pyikta'agyi agoostujpy, jam ja y'awejxti ku ja tiidyu'unin mye'ent.

⁷ Nayide'ents ja yjajtmidi ja Sodoma kajp jøts Gomorra kajp, jøts mididi jaty jam kajp wingon ejttøø. Øy sa y'adøtstøø, yaa'dyøjk namyøøt'ajtidip tukyaa'dyøjk, tø'oxyøjk namyøøt'ajtidip tuktø'oxyøjk. Jade'ents ja ka'øbyi ttundøø. Jøts ja Dios xemikøjpx tø yik'ayo'ombaadyidi ma xemikøjpx tyø. Jade'ents yø xuk'ixxyimp xuknija'wimp jøts ka'ap jade'en n'adøøtsint.

⁸ Øyi tjanijawidi pøn meets ixyam nugo mwin'øø'nip, kyøøm winmaa'ñjotpy ja jade'en ttundi ku ja kya'øyjaa'y'atti jøts ka' tmøjpiakta'akti ja Dios kyutujk. Nugo twindsø y ja ankilistøjk mididi ja Dios myøøtsinaapy.

⁹ Janch wenk idø'on ja Dios yø'øbi jaa'y twindsowdi, nika'ap ja møj ankilis Miguel twindsøø y miku' jade'en ne'egi, ku ja Moises ñine'kx tyiktsepjajtididi sudso dø'on ja yiktu'unt. Ne'egi yide'eñi ja'ayi tñimaay, "Dios paat'ajtyiyip pøni sa ja mdunwa'añi."

¹⁰ Yø jaa'y mididi mwin'øø'nidip ku yø ti køøm tkaja'gyukidi, ja'ats yø kyajpxtip ka'øy; ja'ayi nugo ñija'widip jøts yø jade'en y'adøøtstit ejxim jiyujkin, kø'ømts yø nugo jade'en ñankwyindigøyidi.

¹¹ Ayo'ombaattip ja'adi ku nay ja' tpadundi sam ja Cain yjaa'y'ajty ku ja myigu'uk ja tyik'øjky. Tundip nayide'en sam ja Balaam jøts ja meen patp tjawidi. Jade'en nøjkk wyindigøyidi sam ja Coré ku y'ookøxti ku ja Dios tmidsepøjktøø.

¹² Nugo mdsø'ødyuñidi meets ma mee mgaadyi m'uukti tukpabøjkipitøjk, ku meets yø ka'ap mnimiñidi amumjoojt, jøts ku yø nugo ku'uxyi kyaydi y'uukti jøts yø jade'en nugo mdaxi'ikyidi, niti windsø'jkin tkabikta'akti, køøm ja ne'egi ñay'ejx'ityidi, ka'ap ja t'ixy pøni ti ja tø yiktaguwanidi. Jade'en ja'adi ejxim ja yoots n'ejxint mididi ka' tyu'uy, jøts nayide'en ejxim tu'uk ja tsa'amguipy mididi katøømip, øy ja tyøøm'ajtin ja tjapaaty, windigø y'ejtmidipts ja jadi'ñi.

¹³ Tum ja ka'øbyi tyundip jøts ne'egi o sa tyimy'adøøtswa'andi tso'ødyumbim. Jade'ents tø tyuu'tigøødyi jøts xemikøjpx jap y'ettit agoostujpy.

¹⁴ Ja møjjaa'y Enoc pøn myiwixujk najtskaxi, ku ja Adan jawyeen, ja' ja Dios kyugajpxy'ajit jøts yide'en tñigajpxy ja ka'øy jaa'y, jøts wyaañ: "Jøts ø n'ixxy ja nwindson'ajtim ku ja mil'ampy tmøøtmiñ ja pyabøjkipitøjk,

¹⁵ jøts pøky pyayø'øwya'añ pøn ka'øyjaa'y'ajttip, pøn tø tyundigøyidi kyajpxigøyidi jøts ku tø twindsowdi ja nwindson'ajtim."

¹⁶ Yø'øbi jaa'y nugo ña'amdi nugo pyagajpxti, ja y'øy'ajtin yø nugo yjayiktunwandip jøts ja jaa'y øy tsuj nadyijyi tñigajpxti ja'agøjpx ku nugo tkajpxwyetswa'andi.

Ku ja pabøjkipitøjk yiktukmadø sa yjaa'y'attit

¹⁷ Meets migu'uktøjk, ja'myatsti sa ja nwindson'ajtim Jesucristo kyudanaabyi mdukmadoojidøø

¹⁸ ku wyandøø yide'en: "Ku wyingøñ jøts ja nwindson'ajtim mye'ent jats kyaxø'øktit ja jaa'y pøn tka'ødyejtip tka'øgyajpxtip ja Dios yja'. Ka'øyjaa'y'ajttip ja' jade'en sa ja køøm ñadyamidsøkyidi."

¹⁹ Yø' nugo tyikwinmaa'nmya'atwamp ja jaa'y; ja'ayi chojktip ja kya'øypi jøts ka'ap Espiritu Santo ja tmøøt'atti.

²⁰ Meets migu'uktøjkti, tu'ugyi mnabyikta'agidit jøts tu'ugyi xyik'ettit ja mjanchja'win midi ja Dios yajkpy. Ku ja Dios x'ajot'attit, ja Espiritu Santo mbudøkiyidip.

²¹ Xtsojkindip ja Dios, xpa'ayo'owindip ja Dios, paty øyim mnay'ejx'etidit sam ja ttsøkyin. Njøp'ejx'ejtindip ku ja nwindson'ajtim Jesucristo xmø'øyint ja øy'ajtin midi xemikøjxp.

²² Yikjotkujk'atti ja' pøn pyamaapy pyadajpy pøni midi'ibi pyabøkp.

²³ Tuu'mo'odi kajpxwejti ku tyundigøydi jøts ka'ap ja ayo'on tpaattit; jøts xpa'ayo'ot nayide'en pøn ka'øyjaa'dyi, øyim mnay'ejx'etidit køøm, jøts ka'ap jade'en xu'undit sam ja'adi.

Ku ja Judas tkajxa'aky ja Dios jøts tyikjøpkijxy ja ñøky

²⁴⁻²⁵ Tu'uk ja Dios møj, pøn tnija'wip, pøn xyiknitso'ok'ajtimp, ja'ats ja myøk'ajtin xa'ejx'ejtimp jøts ka' ndundigø'oyint, jade'en'ampyts agujk jotkujk xukwinguwa'jka'ant ja' wyindump, ku nitu pøky ngamøøt'ajtint. Ja'ats tmøøt'ajtp ja øy'ajtin ja møk'ajtin nwindøn'ajtim Jesucristo køjxp, jaayip ku ja tyiktso'ondakijxy tuki'iyi, jøts kunim ja nayide'en tyikjøpkøxt. Jade'en idøøn ja y'ejxi tyiyi.

YA'AT AYUUK JA JESUCRISTO TYUKNIJA'WI KUMAA'YJØTPY JA JUAN

Ku ja Jesucristo ttuk'ijxy ja Juan sa ja naqxwii'niit yjatt

¹ Ya'at idø'n tiy'ajtin midi ja Dios Teety tyukmadoow ja Jesucristo, jøts ja pyadumbi pyabøjkpi ttuk'ext ttuknijawit sa nøjx yjatt kyubatt tsojk ya naxwiiñ. Nay øts ja tiy'ajtin tuki'iyi tø xuk'ixy tø xuknijawi sa tu'uk y'ankilis tø xukmigajpxy.

² Xjats øts njaadyangijxy tuki'iyi pøni ti jaty ja Dios Teety møøt ja nwindson'ajtim Jesucristo tø xuk'ixy xukmadø.

³ Tya'øy'ajtidip ja Dios kyunuu'kxin pøn ya'at nøky t'ejxp jøts tpadu'unt, nayide'ents ja' pøn tmadoop, pø wingompxi dø'n jøts jade'en yjatt sam yø nøky wya'añ.

Ku ja Juan tnija'ayiyi'ñ pøn jaty ja Dios tjanchja'widip ja niwixujkpi kajp

⁴ Øts Juan, øts meets ya'at nøky ndanija'ayip pøn ja Dios tjanchja'widip, ja niwixujkpi kajp midi jam Asia y'etjotp. Paat meets ja kunuu'kxin øy'ajtin midi ja Dios yajkpy, ja' midi xemikøjxp jujky'ajtp, nayide'ents mgunuu'kxidit ja niwixujkpi ja'win midi møøt y'ity ja Dios Teety.

⁵ Wan mgunuu'kxyidi nayide'en ja nwindson'ajtim Jesucristo pøn tnanky'ejxip ja tiy'ajtin, jøts pøn myijawyeen tø yjujkyøjkjomi jap oo'kpi jutjøtpy. Ja'ats nayide'en tnigutujk'ajtp niduki'iyi ja møj windsøndøjkti ya naxwiiñ. Nayide'en ja Cristo xpa'ayø'øymp sa tø xyikpøkwyaaajchim ku tø wyidsuñ wyidaxy adøm nbøkyøjxp.

⁶ Tøts ja xpiktaajkyim jade'en øyjaa'y møjaa'y, jøts nbadu'unindit ja Dios Teety yja' midi tyeety'ajt nwindson'ajtim. ¡Wan tja'myejchim xemikøjxp ja Dios y'øy'ajtin myøk'ajtin! Jade'en idø'n ja yjatt.

⁷ ¡Meets, uk'ejxti ukmadowdi, jade'en idø'n ja Cristo mye'ent yootsjøtpy! Jøts niduki'iyi n'ejxint, nayide'en ja'adi pøn ja nwindson'ajtim yik'ayo'ombaaaji kruskøjxp; janch ya'axtip janch ji'idyip ja naqxwii'niit jaa'y ku jade'en t'ejxtit. Jade'en idø'n ja yjatt.

⁸ Yide'en ja Dios Teety wya'añ pøn ja myøk'ajtin møj, jøts pøn xemikøjxp jujky'ajtp: “Øts idø'n ja tso'ondaajkin jøts øts nayide'en ja jøpkøjxin'ajtin nyajkpy.”

Ku ja Juan t'ijxy ja Cristo

⁹ Øts Juan, meets nmigu'uk'ajtpy ku ixşam nayide'en ngu'ayo'ombaaajtindi ja nwindson'ajtimgøjxpit, paty adøm xmø'øyim ja øy'ajtin ja tuda'aky'ajtin jøts ja xyik'ejtint ma ja kyutujk xanatanaa'yimp. Jam øts wyinaty ndsumchøøni ma txøøw'aty Patmos jam mejy kyujk'am, ja'agøjxp ku øts ja Dios kyajpxy ngajpxwa'kxi jøts ja Jesucristo yja' nnigajpxi.

¹⁰ Domingi xøøw wyinaty ku øts ja Espiritu Santo adsu'jky xatøki, jøts kumaa'yjøtpy møk øts xjiguyaaaxi ejxim tu'uk ja puxujx,

¹¹ yide'en ja wya'añ:

—Øts idø'n nyiktso'ondaajk tuki'iyi jøts nay øts nyikjøpkøxp. Midi jaty m'ejxp mnijawip, tanijayi pøn ja Dios ja'ajtip ma niwixujkpi kajp jam Asia y'etjotp. Ja' xyøøw ja kajp: Efeso, Esmirna, Pèrgamo, Tiatira, Sardis, Filadelfia jøts Laodicea.

¹² Xjats n'ejxjimbijty pøn øts xmigajpxp, jøts n'ejxpaaaty wixujk ja kandeleeeri midi tum oori.

¹³ Jam wixujkpi kandeleeeri kujk'am n'ijxy tu'uk ja jaa'y jade'en sam adømin, jade'en ja wyet tyek'ok'am paat kyida'aky. Tum oori ja chum kyaxi'iky midi ja'tp kyachwiiñ.

¹⁴ Ja kyubajk, janch amuum poop ja wyaay kyaxi'iky ejxim ja poop pixyìn, ejxim tsap'øøpkyn, jøts ja wyeen jade'en kyaxi'iky ejxim jønyowin.

¹⁵ Ja tyeky, jade'en kyaxi'iky janch amuum tsamamp ejxim ja pujx n'uk'ejxint midi janch tøø'kxp, midi øyip ornijøtpy; ku ja kyajpxy, møk idø'n nmadoo'wint, jade'en ejxim ja møj nøø y'iichin.

¹⁶ Jam y'aga'ngyø'øm tmach'ity wixujk ja maadsa', jøts y'aawjøtpy pyidsimy tu'uk ja yøñchujx midi janch jøpxuu'ñ jøts adsow jøøjp. Jade'en kyaxi'iky ja wyeen ja y'aaw ejxim ja xøøw møk y'añin.

¹⁷ Ku øts n'ijxy jade'en, winets øts ojts øøky nayjawiyi nnaxkida'aky ja' tyekyjø'øm, jøts øts ojts y'aga'ngyø' xanixajy jøts ø xnimaay:

—Kidi mdsø'øgi; øts idø'n, tø nyiktso'onda'aky tuki'iyi nayide'en sa nyikjøpkøxt.

¹⁸ Jujky'ajtp øts idø'n øy tø nja'øøky, xemikøjxp njujky'aty jøts øts ja møk'ajtin njagejpy, jøts øts nyikjujkyøkt pøni pøn tø y'ookti tyigøydi.

¹⁹ Jaadyangøx tuki'iyi midi ixşam m'ijxpy, midi ixşam mnija'wip, jøts midi jatwamp.

²⁰ Jade'en idø'n ja twandijy midì tø x'ixy, ja wixujkpi maadsa' n'aga'ngyøjøm jøts ja wixujkpi kandleeri nayide'en: ja wixujkpi maadsa', yø' twandejp pøn ø ngugajpxy'ajtpy ma øts ja njanchja'wibitøjk jamdi ma wixujkpi kajp jam, jøts ja kandleeri ja janchja'wibitøjk ja'adi, pøn jam'ajttip.

2

Yaq'at ayuujkja nwindson'ajtim tyaniguejxpy ja yjaq'y ma ja wixujkpi kajp: Yide'en jawyeen yiktanija'ayiyii'n ja Efesit jaa'y

¹ Nijayi øts ngugajpxy midì jam Efeso sa øts ixyam nnigajpxy: "Yide'en ja wya'añ pøn jam y'aga'ngyøjøm tmach'ejtp ja wixujkpi maadsa' jøts pøn jam tanaapy wixujkpi kandleeri kujk'am:

² Wa'ats ø nnijawi tuki'iyi pøni ti mdumpy; nnija'wip ø tuki'iyi sa møk mduñ øts køjxp, jøts sa mduda'aky'aty, nayide'en ø nnijawi ku xkagupiky pøn ka'øyjaa'y'ajttip. Tøxi x'ixy tu'uk jaty pøn nugo nadyejidip øts ngudanaabyitøjkti, ka'ap ja tyi'y'ajtin wyingaxi'iky, nugo ja wyindaayidi.

³ Øy møk ja maa'kxujkin tø xjagyepy ku tø xpaduujni øts nja', jøts ku tø xku'ayo'ombaaadi øts køjxp, jøts ka'ap ja jotkøjxin tø xmøøt'aty.

⁴ Tu'uk øts nga'øyjawi mets ja mjaa'y'ajtin: ku mets ka' nayide'en x'uktsojknì sam xyiktso'ondaajky.

⁵ Paty ø nwa'añ, ja'myats pøni ma tø mduu'digøy, jøts xyiktigatst ja mwinmaa'ñ, jøts nayide'en xu'unt sam jawyeen tø xuñin. Pøni ka' xuñ jade'en, nbøjknip øts yø kandleeri midì mmøøt'ajtpy.

⁶ Ots idø'n yjade'eni, mjagyeyjpy nayide'en ja øy'ajtin ku nayide'en xkatsøky ja nicolaítas y'ixpøjkin sam ø ngatsøkyin.

⁷ Madowdi yikxon sam ja Espíritu Santo tmigajpxy pøn ja Dios ja'ajtip, yide'en ja wya'añ: Pøni pøn tmimajadäkp ja miku' yja', ja'ats nmo'op ja øy'ajtin xemikøjxp ma Dios y'ity."

Yide'en ja Esmirnit jaa'y yiktanija'ayiyii'n ja ayuujk

⁸ Nijayi nayide'en øts ngugajpxy pøn jam ejtp ma øts njanchja'wibitøjk jam Esmirna kajpjotp: "Yide'en ja wya'añ pøn tuki'iyi tø tyiktso'onda'aky jøts pøn nayide'en tyikøxp, ja' pøn o'jk jøts yjujkyøjkojmi oo'kpi y'agujkpy:

⁹ Nnija'wip ø tuki'iyi pøni ti mdumpy; pøni sa m'ayøy mwinmay, øy yø meeñ kyidyimy'ity, tø ja Dios mdsuj'ixyi mdsujawiyi ja' wyingujkpy. Nnija'wip øts ku mjemigajpxy midemigajpxy winaagin pøn nugo nadyejip israelit jaa'y, yø' yide'en nugo tjayikma-jada'akwajnidip ja miku' yja', pø ka'axi Dios ja tja'aji.

¹⁰ Kidi mdsø'øgidi pøni sa mjattit mgubattit; yø miku' mnankchumwajniyidip jøts nidu'uk nidu'uk myikjot'ejxtit, jøts xmajtstu'tuttit ja Dios yja'; øy yø mjayik'etidit majk xøøw puxøjkjøtpy, tu'ugvi ja mwinmaa'ñ xyik'ettit o mjadyimy'oookti, øts mee nmo'op ja jujky'ajtin midì xemikøjxp.

¹¹ Madowdi yikxon sa yø Espíritu Santo tnigajpxy pøn ja Dios ja'ajtip, yide'en ja wya'añ: Pøni pøn tmimajadäkp ja miku' yja', ka'ap ja tpaätt t'ext ja ayodaajk. Ka'ap ja y'anmija'win sa yjatt."

Yide'en ja Pérgamit jaa'y yiktanija'ayiyii'n ja ayuujk

¹² Nijayi nayide'en øts ngugajpxy pøn jam ejtp ma øts njanchja'wibitøjk jam Pérgamo kajpjotp: "Yide'en ja wya'añ pøn tmøøt'ajtp ja yøñchujx yjöpuxu'ñ adsow jøøjp:

¹³ Nnija'wip ø tuki'iyi pøni ti mdumpy jøts ku jam ja miku' møk y'ane'emy ma mdsøøni, ka' xja'dyigøy ja mjanchja'win øy øts njanchja'wibitøjk yjadyimy'ø'jky pøn txøøw'ajtp Antipas, pøn øy tsuj xpaduujni øts n'ayuujk.

¹⁴ Yaq'at øts n'øy'ijxpy nga'øy'ijxpy pøni ti mdumpy: jam meets winaagin jam Pérgamo, pøn tkamajtstu'utwamp sam ja Balaam ja y'ixpøjkin jekyip tyik'ity, ja'ats ojts t'agajpxi ja Balac jøts ttukmado'ot ja israelit jaa'y sa tyundigø'ødyit. Ojts ttukmadøy jøts tjøø'kxtit midì tø wynatyt yiktamiyøxy ja maxandsaa, jøts nayide'en o sa pøn ñamyøøt'atiyidit.

¹⁵ Nayide'en meets jam winaagin pøn tkamajtstu'utwamp ja nicolaítas y'ixpøjkin midì øts ngatsøjkpy.

¹⁶ Paty ø nwa'añ, jøts tyiktigatstít ja wyinmaa'ñ; pøni ka'ats, tsojks ø nnøjkxt jøts ndatseptu'unt ja nyøñchujx midì pidsømp n'aawjøjtpy.

¹⁷ Madowdi yikxon sa yø Espíritu Santo tnigajpxy pøn ja Dios ja'ajtip: Pøni pøn tmimajadäkp ja miku' yja', ja'ats nmo'op ja jii'kxy midì yiktejp maná midì yu'uch ejtp; nayide'ents ø nmo'ot ja mutsk tsaq'u'nk midì poop, japts tu'uk ja xøøw kyøxja'ayi midì jemy jøts midì ka' yik'ixy yiknijawi, ja'ayi tu'uk tnija'wip pøn ja yikmøøpy."

Yide'en ja Tiatirit jaa'y yiktanija'ayiyii'n ja ayuujk

¹⁸ 'Nijayi nayide'en ɔts ngugajpxy midi jam ejtp mā ɔts njanchja'wibitɔjk jam Tiatira kajjotp: "Yide'en ja Dios U'nk wya'añ pɔn ja wyeen jade'en kaxɔ'kp ejxim ja jɔn'ayowin, jɔts ja tyeky ejxim tu'uk ja pujx midi janch tɔɔ'kxp tsamamp:

¹⁹ Nnija'wip ɔts tuki'iyi pɔni ti mdumpy, sã mmigu'uk xpa'ayɔy, sã ja Dios kyajpxy xpaduujni, sã xpudɔ'j pɔn ti ka'ejttp jade'en sã mduda'akyjaa'y'aty. Tɔ ɔts nja' xyikmiwɛni xyikaja'aji jawaaani ɔy yam, ka'ap jade'en sam jawyeen tɔ xyiktso'onda'aky.

²⁰ Ya'at ɔ n'ijxpy nga'ɔyja'wip mets kɔjxp: ku xkupiky ja ka'ɔdyɔ'ɔxy Jezabel, pɔn ñadyijyi ja Dios kyajpxy tkajpxip, nugots ja y'ixpɔjkin ja ttawin'iin ɔts ja njanchja'wibitɔjk kuk idɔ'ɔn ɔy o sã pɔn ñamyɔt'atyyit jɔts ku tjɔɔ'kxtit midi tɔ yiktamiyɔxy ja maxandsaa.

²¹ Tɔts ɔts nayide'en njanɔjmi jɔts tyiktigtatst ja wyinmaa'ñ sam pyaat'atyi, ka'ats ja tpadunwa'añ: ka' tmatjstu'utwa'añ ja kya'ɔy'ajtin.

²² ɔts ja nwandu'ump sã ja yuu ja pa'am pyaadyyit, nayide'en niduki'iyi pyaatkɔxyit ja ayo'on pɔn jaty mɔɔt tɔ tyundigɔy.

²³ Nwandu'umps ɔts nayide'en ja y'u'nk ja y'unaj'k pɔn ka'ɔdyɔ'ɔxy'ajttip. Jade'en idɔ'ɔn t'ejxtit tnijawidit niduki'iyi ɔts njanchja'wibitɔjk sam ɔts wa'ats n'ejxkapy sam pɔn tu'uk jadu'uk wyinmaa'ñ tjagyepjy y'am jyotp. Nidu'uk nidu'uk meets ndidyu'undit pɔni sã jaty pɔn tɔ y'adɔ'ɔtsti.

²⁴ Ka'ap ɔts sã nwa'andijy ku ja ka'ɔdyɔ'ɔxy yja' tɔ xkabaduujni ku ja miku' kyootswinmaa'ñ tɔ xkayikmajadaajiki.

²⁵ Padun'etti xemikɔjxp ja winmaa'ñ midi myiktundip kunim ɔ nme'ent.

²⁶ Pɔni pɔn tmimajadaɔkp ja miku' yja' jɔts nayide'en ttu'unt sam ɔ ndsɔkyin, ja'ats nmo'op ja mɔk'ajtin jɔts tnwindson'att niduki'iyi ja naɔwii'ñit jaa'y.

²⁷ Yɔ'ɔbi mɔk'ajtin midi ɔts ja Dios Teety tɔ xmo'ɔy, nay yɔ'ɔts mdaba'ejxtip mdabayɔ'ɔdyip ja naɔwii'ñit jaa'y.

²⁸ Nayide'ents meets nmo'ot ja ɔy'ajtin jɔts meets mɔɔt n'ett xemikɔjxp.

²⁹ Madowdi yikxon pɔni sã jaty ja Espiritu Santo tnɔjmi ja janchja'wibitɔjk pɔn ejtip jam mā niwixujkpi kajp."

3

Yide'en ja Sardisit jaa'y yiktanija'ayiyi'ñ ja ayuujk

¹ 'Nijayi nayide'en ɔts ngugajpxy pɔn jam ejtp mā ɔts njanchja'wibitɔjk jam Sardis kajjotp: "Yide'en ja wya'añ ja' pɔn tkajxp ja niwixujkpi kugajpxy jɔts midi tɔɔ'kɔ'kp ja wixujkpi maadsa': Wa'ats ɔ nnijawi pɔni ti mdumpy. ɔts myiktijy myikwa'añ ku ɔy tsuj mduñ, nnija'wip ɔts ku ka' mduñ.

² Jawidi, nay'ejx'etidi, jɔts ka' jadi'iñi mwindigɔ'ɔdyit; n'ijxpy nnija'wip ɔts midi mdumpy ku ka'ap tyiy'aty Dios wyindump.

³ Ja'myatsti ja ɔy'ayuujk ja ɔyajpxy midi tɔ xmadowdi tɔ xukpɔkti; nay yɔ' mbadu'undip jɔts ja mwinmaa'ñ xyiktigtatst. Ku xkatu'unt sam nwa'añ, winets ɔ nme'ent adsu'jky sam ja maa'tspi myiñ, nika'ap ja xnijawit pɔni juuni nme'ent ejxpi payɔ'ɔbyi.

⁴ O meets yɔ'ɔbi winmaa'ñ tɔ xjababiky, jamts winaagin pɔn ɔy wa'ats jaa'y'ajttip, ja'ats ɔ mɔɔt n'ity xemikɔjxp sam pyaat'atyi.

⁵ Pɔni pɔn tmimajadaɔkp ja miku' yja', ja'ats ja wa'ats'ajtin tsuj'ajtin tpaatp, ka'ats ɔts ja xyɔɔw nyiktigɔjyi midi tɔ yikja'ay jap nɔkyjɔtɔpy mā jap y'ity ja jaa'y xyɔɔw pɔn jujky'ajttip xemikɔjxp. Ngajpxkaxɔ'jkijxpy ɔts ja jam Dios Teety wyindump jɔts jam y'ankilis wyindump.

⁶ Madowdi yikxon pɔni sã jaty ja Espiritu Santo tnɔjmi ja janchja'wibitɔjk pɔn ejtip jam mā niwixujkpi kajp."

Yide'en ja Filadelfit jaa'y yiktanija'ayiyi'ñ ja ayuujk

⁷ 'Nijayi nayide'en ɔts ngugajpxy pɔn ejtp mā ɔts njanchja'wibitɔjk jam Filadelfia kajjotp: "Yide'en ja wya'añ ja' pɔn ɔy'ajtp wa'ats'ajtp, ja janchpi ja tiibi, nayide'en ja mɔk'ajtin tjagyepjy jade'en ejxim ja rey David y'ijty yikutuky: Ku ja tuu' nyik'awa'ach ka' pɔn mibaat tyik'awa'atst.

⁸ Nnija'wip ɔts tuki'iyi pɔni ti mdumpy. Tɔts ja mduu' nyik'awa'ach midi ka' mibaat pɔn tyik'adukt; ɔy ja mɔk'ajtin waani tɔ xjagyepjy tɔts ja n'ayuujk xmo'jpiɔtjaajki, ka'ap ɔ tɔ xkagupiky.

⁹ Jamts winaagin pɔn nugo nadyejip israelit jaa'y jɔts ɔts nja' ñadyijyi xyiktuujni. Ka' tyiy'ajtin, taay ja pyiktakpy ja miku' yja' tyiktuujni, nay ɔts ndukupɔkp jɔts mwindsɔ'ogiyit, m'ejxkapiyit ku mee ndsɔky.

¹⁰ Tɔ ɔts n'ayuujk xpaduujni ku ɔy tuda'aky mjaa'y'atti sã dɔ'ɔn nda'ane'emy, nayide'ents nbɔkji'kpy n'ejxji'kpyts meets m'ɔy'ajtin. Jats yik'ext ku ja mɔk ayo'on ku ja tiidyu'unin ñaxkida'akt jɔts ja payɔ'ɔyin tyunit pɔn jaty tɔ y'ɔy'atti ja naɔwii'ñ.

¹¹ Me'emp øts tsojk. Yik'etim yø mwinmaa'ñ jade'en sa tø xpadañ, ka' pøn mibaat ja Dios yja' mbøjkxiyit.

¹² Pøni pøn tmimajadaqp ja miku' yja', ja'ats møjtokip ma ja Dios, nijuuni ja tkamajst-
stu'uttit; nayide'ents meets ja Dios xyøøw ndawinja'att jøts ja kyajp midi yiktejp jemy
Jerusalen, yø' tsoomp jam Dios wyingukp; ndawinja'apts meets njemxyøøw nayide'en.

¹³ Madowdi yikxon sa yø Espíritu Santo tnøjmi pøn ja Dios ja'ajtip ma niwixujkpi kajp."

Yide'en ja Laodiceit jaa'y yiktanija'ayiyi'ñ ja ayuujk

¹⁴ Nijayi nayide'en øts ngugajpxy pøn ejtp jam ma øts njanchja'wibitøjk jam Laodicea
kajpjotp; "Yide'en ja wya'añ ja' pøn tyakp ja tiy'ajtin, pøn tyiktso'ondakøjk tuki'iyi:

¹⁵ Nnija'wip øts tuki'iyi pøni ti mdumpy, ku nugo ejxingøjxp øts nja' xpaduujni, ka'ap
amumjoojt. jø'y'ajtp ku tu'ugyi xpadu'undit, pøni ka'ats, majtsu'utkts øts!

¹⁶ Kumi ka' xnija'widi pøni midi ndunwandip, nugo mee møk xyikjotkixy, ndyimyajt-
stu'utwampy mee ne'egi.

¹⁷ Nømp mee mwa'añ jøts ku meets jotkujk xyiknaxy, ku niti mgadigø'øxyi; ka'ats
mnayjawi ku niti mga'ijtxyi, ku nugo wimbeets kugoots xyiknaxy.

¹⁸ Yide'ents idø'on ja kajpxwejin nmøø'y, jøts ø x'amido'ot xpøktsot'ot midi øts nmøøt'ajtpy,
jade'ents xpaatt ja øy'ajtin, ja wa'ats'ajtin jøts ja ja'gyujkin.

¹⁹ Jade'engøjxp meets ixyam møk n'ane'emy ku mee nba'ayøy. Møk xwindanidit jade'en
sam øts xmijotimbettit.

²⁰ Ejx ku meets ya ngugajpxi y'ity ya mdøk'agi'y; pøni pøn øts n'ayuujk xmodojp jøts øts
nja' xkupøjkit, ejtpts øts ja møøt n'ett.

²¹ Pøni pøn tmimajadaqp ja miku' yja', møøts øts ja n'ett, jøts øts ja kutujk nmo'ot nayide'en
sam øts ja Dios Teety tø xmøøy ku øts ja miku' yja' nmimajadaajki, møøts øts ja Dios Teety
n'ity.

²² Madowdi yikxon sa ja Espíritu Santo tnøjmi ja janchja'wibitøjk ma jam ja niwixujkpi
kajp."

4

Sa ja Dios Teety yikajxa'aky jap tsajpjøtpy

¹ Ku tø jade'en y'ukjaty jøts n'ejxpaaty ja tsajp y'awa'adsi ejxim ja tøjk'aawin; jøts ja
ayuujk nmadøøy møk sam ja trompeta'an midi øts jawyeen xmigajpx, jøts øts xnimaay:

—Pat yam, jøts nnanky'ejxit tuki'iyi sa yjatwa'añ kyubatwa'añ.

² Tø øts wyinaty ja Espíritu Santo xatøki, kumaa'yjøtpy n'ixy jade'en tu'uk ja tsinaabyajt
jap tsajpjøtpy ejxim ja møj windsøn yja'ajin, jamts chøøni tu'uk ja jaa'y

³ midi jade'en kaxø'kp ejxim ja tsaa midi janch tøø'kxp tsamamp, sa ja jaspe tsaa, uk ja
cornalina tsaa; jamts i'jch tø ñawidityi, jade'en tyi'kxy sam ja esmeralda tsaa.

⁴ Ma ja møj tsinaabyajt jam, jamts ø n'ixy ee'pxmaktaxk ja tsinaabyajt nawidity, jamts
ja møjaa'dyøjk ni'ee'pxmaktaxk chøøni, amuum poop ja wyetti jøts tkujup'atti ja koroni
janch amuum oori.

⁵ Møk ja anaaw ja widsujk pyidi'iky ma møj tsinaabyajt jam; nay jam wyingujkp wixujk
ja jøøn tyøøbyiky, ja niwixujkpi ja'w'in idø'on ja' midi ja Dios Teety møøt y'ity.

⁶ Nay jam møj tsinaabyajt wyindump kyaxi'iky tu'uk ja mejy, janch wa'ats janch tøø'kxp
ejxim keega'an.

Jøts jam nayide'en ja møj tsinaabyajt ñawidityi namaktaxk ja jiyujk midi may ja wyeen
tmøøt'ajtip, kaxø'kp yjøxki'py kaxø'kp wyindujy.

⁷ Ja myidu'ukpi jiyujk, jade'en ja kyaxi'iky ejxim ja tsakaajin; ja myidigøøkpi jiyujk, jade'en ja wyeen ja
y'aaw kyaxi'iky ejxim ja jaa'y'in; jøts ja myimaktaxkpi jiyujk kyaxi'iky ejxim ja weejts
kyakwidityin.

⁸ Tu'uk jaty ja jiyujk tudujk ja kyank tmøøt'aty, may ja wyeen nayide'en kyaxi'iky
yjøxki'py jøts wyindujy; xinaxy tsunaxy ja Dios tjä'myatsti jøts ñøm'etti:

Janch øy janch wa'ats me Dios Teety,

Mets tu'ugyi ja møk'ajtin mjagejpy,

jøts xemikøjxp mjukjy'aty.

⁹ Xjats ku ja jade'en ja nimaktaxkpi jiyujk ttundi, ku ja jade'en tjä'myatsti ja' midi
xemikøjxp ejtp, midi tsinaapy møj tsinaabyajt køjxp,

¹⁰ xjats ja ñi'ee'pxmaktaxkpi møjaa'dyøjk jaty ñagyuxendya'agyi, jøts ja kyoroni
tkiidyakti jam møj tsinaabyajt wyingujkp jøts wya'andi:

¹¹ Mets Dios Teety, mets amuum møj sam pyaat'aty myikwindsøøgit myikwinjawit.

Pø tøxi xyiktso'ondakijxy tuki'iyi mdsojkingøjxp jøts jade'en y'ett.

5

Ja nøky jøts ja Borreek U'nk

¹ Xjats n'ijxy ja' pøn jam tsinaapy møj tsinaadyajkøjxp ku jam tmach'lity y'aga'ngyøjøm tu'uk ja nøky abidity midì ja'ay jøtpy jøts ñikøjxp, wixujk weents ja cha'ayi, jøts ja jade'en y'adukyi.

² Winets ø n'ijxy tu'uk ja møj ankilis jøts ja møk t'amidøy:

—iPøn paat'ajtip tyik'awa'atst yø nøky, jøts t'agø'øtstu'utt yø seeyi?

³ Nipøn ja tkanadyaja'ejxiyi tyik'awa'atst, ni tsajpjøtpy ni naxwiin ni naxpatkipy, nipøn ja tkawin'ejxwa'añ.

⁴ Xjats øts nyaaxni njiñi, nipøn kyayikpaaty pøn tyik'awa'atst ja nøky jøts yik'ext yiknijawit, nipøn ja tka'ukwin'ejxwani.

⁵ Xjats øts xnimaay ja møjaa'y tu'uk:

—Kidi mjanchya'axy, jaa tu'uk pøn tnigubajk'ajtp ja Judajit jaa'y, jøts pøn ja rey David y'apip, yø'øts tø myajada'aky jøts t'agø'øtstu'utt ja wixujkpi seeyi jøts tyik'awa'atst ja nøky.

⁶ Xjats ø n'ijxy tu'uk ja Borreek U'nk tyani ma møj tsinaabyajt jam, ja' kyujk'am ma ja møjaa'dyøjkti, jøts ma ja nimaktaxkpi jiyujk jam. Jamts ja yik'ijxy kyaxi'iky sam ti jyaty kyubety y'ayo'ombaaty. Wixujk ja wyaj tmøøt'aty jøts wixujk ja wyeen; jade'en yø tijy yø wixujkpi ween sam ja niwixujkpi ja'wini midì ja Dios tø tkexy ya naxwiin.

⁷ Xjats ja Borreek U'nk tninijxy pøn wyinaty tsinaapy møj tsinaabyajtkøjxp jøts tpøjki ja nøky midì wyinaty myøøt'ajtpy y'aga'ngyøjøm.

⁸ Ku ja tpijky ja nøky, winets ja nimaktaxkpi jiyujk jøts ja ni'ee'pxmaktaxkpi møjaa'dyøjk ñagyuxendyajkidi jam Borreek U'nk wyingujkpi. Nidu'uk nidu'uk ja møjaa'dyøjk tmøøt'atti ja kow midì yiktejp arpi, jøts nayide'en tkondi ja poom tøy'hi'ñ, tum oori ja', jade'en yø poom tijy sam ja Dios'ajot'ajtin midì kyajpxtip pøn jaty ja Dios Teety ja'ajtip.

⁹ Jamts yide'en ja jemy i'y tyikwandøø:

Mets idø'on mbaat'ajtip yø nøky jøts yø seeyi xkøøtst;

ja pø tøts xniwanguixy niduki'iyi ja jaa'y, o midì kajp o midì ayuujk,

jade'engøjxp ku tø m'ayo'ombaaty ma tø mdsuñ tø mdaxy.

¹⁰ Tø øøts xyikmøjtøki jøts øø nbadu'unt sam ja Dios tsøkyin, jøts øø nwindson'att ja naxwii'ñit.

¹¹ Winets ø n'ixy ja ankilis namay tni'awidetti ma ja møj tsinaadyajk jam, nay jamts wyinaty ja nimaktaxkpi jiyujk jøts ja møjaa'dyøjkti,

¹² møk y'øøwdi tum jade'en jøts wya'andi:

Janch øy ja Borreek U'nk midì tø y'ayo'ombaaty,

paat'ajtip jøts tpaatt ja møk'ajtin ja øy'ajtin, ja wejin ja kajin.

Paat'ajtip yikwinjawit yikwindsøøgit.

¹³ Xjats nmadøy nayide'en ku y'øøwdi niduki'iyi ja naxwii'ñit jaa'y jade'en tsajpjøtpy naxkijxy, jøts jade'en øy ja ma jøts wya'andi:

Janch øy janch møj ja Borreek U'nk,

paat'ajtip yikwinjawit yikwindsøøgit xemikøjxp.

¹⁴ Xjats nayide'en ja nimaktaxkpi jiyujk wyandøø:

—iØts jade'en!

Xjats ja ñi'ee'pxmaktaxkpi møjaa'dyøjk niduki'iyi ñagyuxendyajkøxidi jøts twindsøøgidi ja Dios.

6

Ja wixujkpi seeyi

¹ Jøts ø n'ijxy ja Borreek U'nk ku ja myidu'ukpi seeyi t'ago'otstu'uty ja wixujkpi seeyi, jøts nmadøy tu'uk ja ñimaktaxkpi jiyujk ku møk yjanchwina'añ jade'en sam ja anaawin, jøts yide'en wya'añ:

—iMen x'uk'ixy!

² Jøts ø n'ijxy tu'uk ja poop kawaay, pønts ja tyatsinaajyip, arki ja tu'uk pyagajpy. Tu'uk ja koroni yikmøøy ku tø myajada'aky ma tsep, tyun'adø'øtswampy jøts cho'ongojmi.

³ Xjats ja Borreek U'nk ja myimajtskpi seeyi t'ago'otstu'uty, jøts ja myimajtskpi jiyujk wya'añ:

—iMen x'uk'ixy!

⁴ Jøts jadu'uk ja kawaay kyaxi'iky, tsajpts ja' ñine'kx. Pøn ja ttatsinaapy ja'ats yikmøøy tu'uk ja amøjtsujxyoñ jøts yiktanipijky jøts ja cheptu'unt, jøts niduki'iyi ja naxwii'ñit jaa'y ñañibidøkøxyit, xem ja yam ñanky'oogiyidit, ka'ap ja jotkujk'ajtin ma.

⁵ Xjats ja Borreek U'nk ja myidigøøkpi seeyi t'ago'otstu'uty, jøts ja myidigøøkpi jiyujk wya'añ:

—jMen x'uk'ixy!

Winets ø n'ixy tu'uk ja yøk kawaay, pøn ja ttatsinaapy, tati'i'yn ja wyejts'ijtpy kyøjø'øm.

⁶ Jats ja ayuujk nmadøøy jam ñimaktaxkpi jiyujk kyujk'am, ku wya'añ yide'en:

—Wimbatp nøjx ja trigo jøts nayide'en ja cebada midi amuum tump; aceite jøts ja vino ka' wyimbatt.

⁷ Xjats ja Borreek U'nk ja myimaktaxkpi seeyi t'agø'øtstu'uty, jøts ja myimaktaxkpi jiyujk wya'añ:

—jMen x'uk'ixy!

⁸ Winets ø n'ixy tu'uk ja pu'ts kawaay, pøn ja ttatsinaapy ja'ats yiktaniøjk jøts ja yikjaa'y'oock. Ix'oojk ja pyamiñi pøn tkudanaapy ja ayodaajk. Xjats ja yiktaguwa'anøø jøts tyik'ayo'ombaatt jawaani kagu'ukwa'lxxy ja naxwii'ñit jaa'y, jade'en'ampyts ja tyik'ooock ku tkaxt ja tsep, ja yuu, ja pa'am jøts ja awa'an jiyujk.

⁹ Jats ja Borreek U'nk ja myimagoxkpi seeyi t'agø'øtstuujty, jøts n'ijxy altajr patki'py may ja anmija'windi pøn tø tku'oogidi ja Dios yja'.

¹⁰ Ja'ats kajpxtip møk, jøts ja Dios yiknimaay:

—Janch øy janch wa'ats me Dios Teety, jøts xuñ ja tiy'ajtin. Juuninim xpayø'øty xiidyu'unt ja jaa'y pøn øøts tø xyik'øøky ya naxwiiñ.

¹¹ Jøts yikmøøy ja poop wet jøts yiknimaadyi jøts pyoo'kxiti y'awejxtitnim øy winø'ønin. Wan t'uknamykyidi ja migu'ukøjk pøn tku'ookwajnipnim ja Cristo yja'.

¹² Xjats ku ja Borreek U'nk t'agø'øtstuujty ja myidudujkpi seeyi, xjats ja tsaachmøk uxx ñajxy. Jøts ja xøøw amuum yøk yjajty ejxim tu'uk ja yøk wetin, jøts ja po' tsajpts kyaxi'jky ejxim ja wa'ats tsajpts ni'jpyin,

¹³ jøts ja maadsa'kya'y naxkijxy, jade'en ejxim ja tsaachmøk poj tyikajtskø'y ja ujs tøøm.

¹⁴ Jøts ja tsajp jadi'iñi ñawya'kxkøjxniyi, jade'en ja yjajtni ejxim ja nøky jadi'iñi y'abidejtmuky, jøts ja kojpk jøts ja naajx midi mejy kyujk'am tuki'iyi tyigatskøjxni ma ja y'uk'ijty.

¹⁵ Xjats ja jaa'y kyakwdejtnidi, t'ixaabyi naxwa'knidi ja nayu'utstaajk, tyøjkiñøø tsaaj jutjøtpy tsaaj ankjøtpy øy ma. Jajttip ja windsøndøjk ja kumeendøjk, ja møj ja mutsk. Jajttip ja soldadi wyindsøndøjkti, nayide'ents ja jaa'y pøn mijuy kamijuy tundip.

¹⁶ Jøts wyanidi ku ayo'on jade'en t'ejxti:

—jWan ja kojpk wan ja tsaaj ne'egi xyik'o'jknidi jøts jade'en xka'ukwin'ejxna'ant ja' pøn jam tsinaapy møj tsinaabyajt køjxp, jøts nayide'en ja Borreek U'nk ka' x'ukmøø'ña'ant ja møj ayo'on!

¹⁷ Tøxi ja xøøw jade'en kya'pxy ku ja møj ayo'on jade'en yik'ijxy, nipøn ja jade'en tkamimajada'aky.

7

Ku ja Israelit jaa'y yikmøø'y ja ejxa'an pøn jaty ja Dios tyami'ejxip tyamidsojkip

¹ Ku ja jade'en yjajty jøts ø n'ijxy nimaktaxk ja ankilis ku ja wyinaty tyani naxwii'ñit eskiini køjxp, jamts ja poj ja t'axajtuky jøts ja møk poj ni'wine'en kyanaxkida'akt naxwiingiyjxy mejkyijxy, jøts ja aay jøts ja kipy kyapojwidett.

² Jamts ø n'ijxy jadu'uk ja ankilis xøbidsimbyi myiñ, jap ja Dios syeeyi tmøø'tajtti pøn xemikøjxp jujky'ajtp. Nay ja'ats møk tnimaay ja nimaktaxkpi ankilis midi wyinaty tø yiktanipiky jøts tuki'iyi tyikwindigøøgyøxt tuktsajp'agida'aky, jøts wya'añ:

³ —Uk'awejxti. Kidi xkaxti ja ayo'on kunim øøts ja ejxa'an nbikta'akt jaa'y wyimbojkøjxp nidu'uk nidu'uk, pøn jaty ja Dios yja' tpaduujnidip. Jaanims xyikwindigøøty ja naajx, ja mejy jøts ja aay ja kipy.

⁴ Jade'en ø nnimadøy ku tukmagø'pxy ja wixijky myaktaxk mil tø yik'ejxandi ja israelit jaa'y pøn ja ñimakmajtskpi y'apteety'ajttøø.

⁵ Nimakmajtsk mil idø'øni yik'ejxandi pøn tyatsk'apip ja møjaa'y Judá. Nimakmajtsk mil yik'ejxandi pøn tyatsk'apip ja møjaa'y Rubén jøts nimakmajtsk mil nayide'en pøn tyatsk'apip ja møjaa'y Gad,

⁶ nimakmajtsk mil yik'ejxandi pøn tyatsk'apip ja møjaa'y Aser, nimakmajtsk mil yik'ejxandi pøn tyatsk'apip ja møjaa'y Neftalí, nimakmajtsk mil yik'ejxandi pøn tyatsk'apip ja møjaa'y Manasés,

⁷ nimakmajtsk mil yik'ejxandi pøn tyatsk'apip ja møjaa'y Simeón, nimakmajtsk mil yik'ejxandi pøn tyatsk'apip ja møjaa'y Leví, nimakmajtsk mil yik'ejxandi pøn tyatsk'apip ja møjaa'y Isacar,

⁸ nimakmajtsk mil yik'ejxandi pøn tyatsk'apip ja møjaa'y Zabulón, nimakmajtsk mil yik'ejxandi pøn tyatsk'apip ja møjaa'y José, jøts nimakmajtsk mil yik'ejxandi nayide'en pøn tyatsk'apip ja møjaa'y Benjamín.

Ja mayjaa'y pøn ja poop wet wyet'ajttip

⁹ Ku jade'en nnimadøø y jøts ø n'ijxy janch may jaa'y nikyamachooni. Choondi o magajp, o ti ayuujk tkajpxti pøni sa jadu'uk ja nidu'uk ja kajp ja y'ayuujk tjagyepy; jam twindanidi mā møj tsinaabyajt jøts nay jam mā Borreek U'nk, poop wet wyet'ajttip jøts tixy'aa'y tkøñidi.

¹⁰ Niduki'iyi dø'øn tja'myatsti ja Dios jøts møk wya'andi:

Yø Dios Teety xyknitsø'ok'ajtim,
pøn jam tsinaapy møj tsinaabyajtkøjxp,
nayide'ents ja Borreek U'nk.

¹¹ Jamts ja ankilistøjk nawidity tñadanidi mā møj tsinaabyajt jam, mā ja møjaa'dyøjk jøts mā ja nimaktaxkpi jiyujk, jøts ñagyuxendyaajkidi ja' wyingujkp mā ja møj tsinaabyajt jam; møj tjanchja'myajtsti ja Dios,

¹² jøts wyandøø:

Nmøja'wip øøts, njanchja'wip øøts Dios Teety.

Mets ja møk'ajtin, ja ja'gyukin jøts ja øy'ajtin mmøøt'ajtpy xemikøjxp. Jade'en idø'øn xemikøjxp y'ejxi.

¹³ Jøts nidu'uk ja møjaa'dyøjk wyaañ jøts x'amidøøy:

— Pøn idø'øn yø'ødi ixja poop wetxøødi, mā dø'øn yø choondi?

¹⁴ Jøts ø nnimaay:

— Mets møjaa'y, mnija'wip mets yø'.

Jøts ø xnimaay:

— Yø' dø'øn jap tø ñaxti mā ja møj ayo'on jam, ja Borreek U'nk ñi'jpy tø yikpøkwyachidi.

¹⁵ Paty idø'øn jam y'etti møj tsinaabyajt wyingujkp mā ja Dios chøøni, jamts ja tpaduujnidi ja Dios yja' xinaxy tsunaxy; jøts ja pyøkjø'øgidit xemikøjxp ja' wyingujkp.

¹⁶ Ka'ap ja ayo'on t'uk'eixnidi, kya'ukyu'ooknidi kya'uktøøtsiñidi, ni an niti kya'ukpaajtniyidit,

¹⁷ jade'engøjxp ku ja Borreek U'nk t'eix'ity jøts ttukpaatwa'añ ttuk'eixwa'añ ja wa'ats nøø mididi xyikujky'ajtim xemikøjxp; nayide'ents ja Dios tyiktigø'øty ja yjotmay'o'jkindi.

8

Ja myiwixujkpi seeyi jøts ja poomdø'øy'ii'ñ mididi tum oori

¹ Ku ja Borreek U'nk ja myiwixujkpi seeyi t'agø'øtstuupty, jøts kujkp hora'an y'amongøjxti niduki'iyi jam tsajpøtp.

² Nay jaty n'ijxy ja niwixujkpi ankilis mididi jam tanaadyip Dios wyingujkp ku ja yikmøødy nidu'uk nidu'uk ja puxujx.

³ Jøts jadu'ukpi ankilis myiñ jøts jam tyanaay'øyyii'ñ altajr wyingujkp mididi tum oori, poomdø'øy'ii'ñ ja myimeen, jamts yikmøøy altajr wyingujkp may ja poom, jade'ents ja altajrkøjxp ttawinjøjky; jøts jamts ja nayide'en y'ity y'amido'owin pyøktso'owin ja'adi pøn jaty ja Dios ja'ajtip.

⁴ Jøts ja poom jok jam yja'aty Dios wyindump møøt ja y'amido'owindi ja pyøktso'owindi pøn ja Dios tmøja'widip tjanchja'widip.

⁵ Xjats ja ankilis tñaxajyyii'ñ ja poomdø'øy'ii'ñ jøts tpiktaajky ujts ja jøndsabajk mididi wyinaty altajrkøjxp, jøts tko'widijty jam naxkøjxp; winets ja møk anaaw jøts ja widsuk y'adi'ich, jøts ja tsaachmøk ujk.

Ja ñiwixujkpi puxujx

⁶ Xjats ja niwixujkpi ankilistøjk tjøp'ejxti ttaxu'uxwa'andi ja puxujx.

⁷ Ku ja myidu'ukpi ankilis xyuujxy, jøts ja møk tuu myiñ jøts ja tøtst jøts ja jøøn møøt ja ni'jpy ñaxkidaajky. Jade'en tyøøy ja naxwii'ñit jawaani kyagujkwa'kxy, møøt ja kipy møøt ja ujts kyudigøøy.

⁸ Ku ja myimajtskpi ankilis xyuujxy, winets yjawi tigati ñaxkidaajky jam mejyotp ejxim ja møj kojpkim, ja'ats jam tøøbyøjk; jøts ja mejy wyimbijty jawaani kagujkwa'kxy wa'ats ni'jpyin.

⁹ Jawaani kagujkwa'kxy ja jiyujk kya'ookøxti mididi jam wyinaty tsinaadyip, jøts ja barki nayide'en wyindigøøy.

¹⁰ Ku myidigøøkpi ankilis xyuujxy, winets tu'uk ja maadsa' tsajpwemp kyatska'ay, tyøøy jade'en ejxim ja møj jøønin. Naxkidaajky mā may ja møj nøø yø'ødyi jøts mā ja kom nøø pyidsimy.

¹¹ Ja'abi maadsa' txøøw'ajtp Ajenjo, jøts ja nøø ja tyikma'tnaa. May ja y'ooktøø pøn jaty ja t'uktøø, janch ta'am ja wyimbejtnaa ja nøø.

¹² Ku ja myimaktaxkpi ankilis xyuujxy, xjats ojts waani wyindigøøy ja xøøw, ja po' jøts ja maadsa'. Nayide'en ojts xyaachkugoodsigyijxy sam yø xøøw yø po' wyindigøøyin.

¹³ Winets n'ejxpaaty tu'uk ja ankilis ñaxy tsajp kujk'am, jøts ja møk wya'añ:

—jMeets naxwii'ñit jaa'y, mjanch'ayo'odip meets ku xmado'odit ja puxujx ku ttaxu'uxtit ja nidigøøkpi ankilis!

9

¹ Ku ja myimagoxkpi ankilis xyuujxy, jøts n'ijxy tu'uk ja maadsa', tø wyinaty ñaxkida'aky naxwingijxy. Xjats yikmøøy ja ñi'awaajts ma ja møj jut jam midi nøjxpx ayodaajk.

² Xjats ja møj jut tyik'awaajch xjats ja jok yikxon jap pyidsimy sam møj orni jøtpyin; jøts ja xøøw tyikwingoodsiñaa, ni poj niti tka'ukyikyø'øñi.

³ Jajts jokjøtpy may pyidsømdi ja møj mu' jøts tuki'iyi ja naxwii'ñit twinguyø'øyigyøjxnaa; jade'en ja yikejxy sam ja kajpyin jøts ja naxwii'ñit jaa'y tyik'ayo'ombaatt.

⁴ Ka'ap ja jade'en tø yikexy jøts ja aay ja ujts ja tyikwindigø'øty ya naxwiin. Ja' ja pyayø'øpy pøn jaty ja Dios y'ejxa'anin tø kyabikta'agyi midi yikpiktaktip wyimbojkwemp.

⁵ Ka'ap ja jaa'y tjadyimyk'øøky, ayo'on ja myøøpy jøts ja jajyi ja tøøyi tukmiba'am tsøøni magoxk poljin; jade'en ja pya'am ja tjawidi ejxim ja kajpy xøjpiint.

⁶ Møk ja tjawidi, jadyimwyandip ja' jøts tyimy'looktit; o kø'øm ñanky'oogidit, ka'anims ja y'o'jkin kya'pxti.

⁷ Jade'en ja møj mu' kyaxø'økti ejxim ja møj kawaayin midi nay'a'ejxiyip tseptumbi nøjxxtip; tum jade'en ja kyubajk kyaxø'økti koroni kujupy midi amuum oori, jøts ja wyeen ja y'aaw jade'en kyaxi'iky ejxim ja jaa'yin.

⁸ Jade'en ja wyaay tmøøt'atti ejxim ja tø'øxyøjkin, jøts ja tyøøjts jade'en t'ixy ejxim ja kaajin.

⁹ Tum pujx ja amuum y'ak'ajttip, jøts ku kyajkwidetti jade'en møk yikmadøy ejxim ja maakyareti midi kawaay myinøjxxtip tseptumbi.

¹⁰ Jade'en ja tyu'tst tmøøt'atti ejxim ja kajpyin. Ja'ats ja tyukta'ayo'ombatpy ja jaa'y jøts tukmiba'am tsøøni magoxk po'.

¹¹ Jamts tu'uk ja ankilis midi tso'omp jap ayodaajkjøtpy, ja'ats tniwindsøn'ajtp ja møj mu'; ja'ats txøøw'ajtp Abadón ja hebreit ayuujk, jøts ja griegit ayuujk Apolión midi tyijpy pøn yikwindigøøpy.

¹² Jade'en idø'øn ja myidu'ukpi ayo'on ñajxy; naxkida'akpts ja mimajtskpi ayo'on.

¹³ Xjats ja myidudujkpi ankilis ttaxuujxy ja puxujx, winets pyidsimy ja ayuujk jam nimaktaxkpi tsakaa waj agujk jam altajrkøjxp jam Dios wyingujk.

¹⁴ Xjats ja myidudujkpi ankilis yikniimaay midi ja puxujx tmøøt'ajtp:

—Migaji ja ñimaktaxkpi ankilis midi jamdi ma ja møj nøø midi yiktejp Eufrates.

¹⁵ Xjats ja jade'en yikmigajidøø jøts tyik'ookti jawaani kagujkwa'kxy ja naxwii'ñit jaa'y. Jabi a'ejxixi y'ejtni jøts ja jade'en yjattit ja'abi xøøw ja'abi jumøjt.

¹⁶ Namajtsk magø'pxy millones idø'øn ja ankilis cheptumbi midi idø'øn jade'en yikjaa'y'ooktip, midi kawaagyøjxpti.

¹⁷ Yide'en ø n'ijxy kumaa'yjøtpy ja kawaay, jøts ja' pøn ttatsinaadyip, pujx ja myøøt'ajttip kyachwiin, tsajpts, tsujxk jøts pu'ts jade'en ja kyaxi'iky. Ja kawaay kyubajk jade'en ja kyaxø'økti ejxim ja kaajin jøts ja y'aawjøtpy pyidsimy ja møj jønyow møøt ja jok jøts jøky.

¹⁸ Jøts jade'en'ampyts ja mayjaa'y y'lookøxti, jawaani kagujkwa'kxy idø'øn kyawindigøøgyøxtøø.

¹⁹ Ja'ats idø'øn ja kawaay tya'awa'an'ajtpy ja y'aaw jøts ja tyu'tst; jade'en ja tyu'tst ja t'ixy tsaa'ngyubajkin, jade'ents ja jaa'y ja tyik'ayo'ombaaty.

²⁰ Pønts jaaktandi ka'abyim ja tmajtsu'utti ja ka'ødyunk ja ka'øwyinmaa'ñ. Wyindsø'jkij'ejttip ja miku'tøjkti jøts øy ti awanax agojnax. Nayide'en twindsø'øgidi ja nugo dios agojnax midi oori øyip, midi plati øyip, midi bronce øyip jøts nayide'en midi kipy øyip, ka'ap ja y'ixy, ka'ap ja yø'øy, jøts ka'ap ja myadøy.

²¹ Ni jade'en ja tkamøjpktaajky ku ayo'on tø yjinaxy, yik'ook'adichpim ja myigu'uk ja', jøts ja miku' tunk ttun'adø'øtsti, ñamyøøt'atyidi øy pøn møøt myigu'uktøjkti, jøts myaats'adø'øtsti.

10

Ja ankilis midi tkon'ejtp tu'uk ja mutsk libri'u'nk

¹ Kuts jade'en yjaty jøts ø n'ejxpaaty tu'uk ja møj ankilis. Yoots'agujk kyida'aky jam tsajpwemp jøts ja i'jch jam kyaxi'iky y'agubajk. Jade'en ja wyeen ja y'aaw t'ixy ejxim ja xøøw y'añin, jøts ja tyeky jade'en ejxim ja jønyowin.

² Jam tu'uk ja libri'u'nk tmøøt'aty jøts ja t'agiiybyajky kyøø'øm, jøts ja y'aga'ndyegy ttawinwa'aky ja mejy jøts ja y'anajtyeky naxwingijxy.

³ Jøts ja chap'aay møk ejxim ja møj kaa myu'uyin jøts nay jaty wixujk ojk ja anaaw pyijy.

⁴ Ixyam øts wyinaty njaadyanwa'añ sa ja anaaw wya'añ jøts ø nmadøøy ja ayuujk midi kidakp tsajpwemp jøts ø xnimaay:

—Amaa'tsk'at yø' sam tø wya'añ yø anaaw, kidi xjaadyañ.

⁵ Jøts ja ankilis midi tuktamajndycky tawa'kpajt ja mejy jøts jaduktamajndycky ja naxwii'ñit, ja'ats y'aga'ngyø jam tkonjø'jk,

⁶ jøts ja tkajpxwa'kxy ja Dios tyiy'ajtin pøn tø tyiktso'ondakixy tuki'iyi tuktsajp'agida'aky, jøts yide'en wya'añ:

—Ka' y'ukyø'øñit ja xøøw ja jumøjt;

⁷ kuts xyu'uxt ja myiwixujkpi ankilis, tø wyinaty kya'pxy ja Dios wyinmaa'fi midi ja'ayi tyuknija'wiyii'ñ ja kyugajpxtyøjkti. Ka'ap ja o pøn nugo aja'wi ttuknijawi.

⁸ Xjats ja ayuujk nayide'en nmadoogojmi midi tsajpjøtpy tsoø'mp, jøts ja jadigojk xmigajpxkojmi jøts wya'añ:

—Nøjks atspøjkit ja libri'u'nk midi jam agübyaky kyü'yijtpy ja ankilis, ja' midi tanaapy mejkyøxp jøts naxkixy.

⁹ Jøts ja ankilis nninijky xjats ja libri'u'nk n'amidøøy jøts ø xmo'ot, jøts ø xnimaay:

—Ixya ja libri, ma's jøts x'ixpøkt. Øy tsuj mnayjawiyit ku x'ixpøjk'okwa'ant, ku x'ixpøjkøxnit jøts ja jotmay'øøgyi xpatnit.

¹⁰ Xjats ja libri n'axajiyii'ñ jøts ja n'ixpijky, janch øy janch tsuj øts nja'wiyii'ñ, kuts ja nyikøjxnaa ja libri, jøts ja jotmay'øøgyi xpatnaa.

¹¹ Jøts ø xnimaagyojmi:

—Kuwanı jadigojk xkajpxwa'kxt ja Dios yja' sa chøønidit sa tyanidit niduki'iyi ja naxwii'ñit jaa'y, wan tmøji wan tmutski.

11

Namajtsk ja jaa'y pøn testigi'ajttip

¹ Jøts tu'uk ja kapy nyikmøøy midi yiktakejpxp, jøts ø xnimaay:

—Tani jøts xkejpxit ja Dios chaptøjk møøt ja altajr, jøts nayide'en xmacho'ot pøn jaty jap twindsø'jkip ja Dios.

² Ka'ap yø xkepxt yø tsaptøjk aaw, tsaptøjk øjx jøts ja tsaptøjk paa' ja'agøjxp ku wenk jaa'y myenwa'andi jøts jap wyidettit, jade'ents ja tyikma'attit ma jaty ja wyidettit jap Dios kyajpjøtpy, wixijky myajtsk po' y'ettit jade'en.

³ Ngaxp øts namajtsk ja ngugajpxy midi tum yøk wet twet'ajttip, ja'ats xkajpxip ja nja' tigøøk jumøjt jagujkp.

⁴ Ja namajtskpi kugajpxy, jade'eñi n'ukpiktaajkin ejxim ja olivi kipyin, jøts nayide'en ejxim ja majtskpi kandleeri midi jam ejtp nwindson'ajtim wyingujkp.

⁵ Pøni pøn midundigøøwyajniip, yikpidsømdip ja jøøn ja y'aa'wjøtpy, jade'eñits ja myidseptøjk tyik'ookøxtit tyikwindigøøgyøxtit.

⁶ Yø namajtskpi kugajpxy yjagyajpti ja møk'ajtin jøts ka'ukyiktunit winø'ønin ja Dios yja' tkajpxwa'kxidit. Nayide'en ja nøø tyikajtnidit wa'ats ni'jpyin, jøts tkaxtit kawinaak jøøjp ja pa'am sa ja kø'øm t'a'ejxidit.

⁷ Kuts ja jade'en tkajpxwa'kxkøxtit ja Dios yja', winets tu'uk ja møk awa'an jiyujk pyidsø'ømt jam ayodaajkjotp jøts ja namajtskpi kugajpxy yik'oogyit.

⁸ Jamts ja oo'kpi jadi'iñi tyä'ant, jam ja wyibejpnit jam tuu' kujk'am, nay ja kajp ma ja nwindson'ajtim Jesucristo kyiruspejty. Nugo dø'øen jade'en yø kajp yiktijy Sodoma jøts Egipto.

⁹ Tigøøk xøøw jagujkp yik'ejxtit yiknijawidit ja oo'kpi. Øy pøn jaa'y o magajp mye'endit jøts ka' tnanikyikpidi'igy ja oo'kpi.

¹⁰ Xjats ja naxwii'ñit jaa'y jade'en agujk jotkujk ñajawiyidi, janch nixem niyam o ti ñadyamay'atyidi ja'agøjxp ku tø y'ookti ja'adi pøn møk tø yik'ayo'ombaadyidi pøn ja Dios yja' tkajpxwa'kxidip.

¹¹ Xjats ku myidigøøk xøøw jagujkp'ajty, winets ja Dios tyikjujkyiky jadigojk ja oo'kpi. Janch tsø'jkidøø ja'adi pøn jaty jam wyinaty.

¹² Winets ja namajtskpi kugajpxy møk yikmigajpxti, tsajpjøtpy ja kyajpxy, jøts yiknimaydi: —Pat yam.

Jøts chapajtnidi tsajpjøtpy yoots'agujkpy jøts ja myidseptøjk y'ejxidøø ñija'wiyidøø.

¹³ Jøts nay jatyi ja møk ujx ñajxy, jøts wixujk mil ja jaa'y y'ookti ku ja kajp kyuja'wiyii'ñ kyujejtii'ñ. Janch tsø'jkidip ja' pøn jaty jaaktandøø, jøts ja Dios ja tjanchja'myajtsti midi jap tsajpjøtpy.

¹⁴ Jade'en ja myimajtskpi ayo'on ñajxy; tsojks mye'ent ja myidigøøkpi.

Ja myiwixujkpi puxujx

¹⁵ Xjats ku ja myiwixujkpi ankilis ttaxuuixy ja pyuxujx, jøts møk yikmadøy may ja ayuujk jap tsajpjøtpty jøts wya'añ:

xyam ja kutujk ñaxkida'aky midi ja Dios Teety jøts nwindson'ajtim Jesucristo yja'ajttip; jøts xemikøjxp ja tyiktu'undit ma y'ijty ja naxwii'ñit jaa'y yja' tyiktundi.

¹⁶ Xjats kyuxanidi jøts ñaxkowdi ja ni'ee'pxmaktaxkpi møjaa'dyøjk pøn jam tsinaadyip Dios wyingujk, jøts ja Dios tmøjawiidi twindsø'øgidi,

¹⁷ jøts yide'en wya'andi:

Janch møj me Dios Teety,
tu'ugyi me m'ity xemikøjxp.

Møj øøts nmøjawi ngunuu'kxyjawi ku tø xyikmajada'aky ja mmøk'ajtin

jøts ja mgutujk ma ja naxwii'ñit jaa'y.

¹⁸ Jøts ja naxwii'ñit jaa'y mmijot'ambikyiyi,

tø kya'pxy jøts ja ayo'on xmo'ot jøts nayide'en xiidyu'unt ja oo'kpitøjk.

Jøts xmo'ot ja øy'ajtin pøn jaty ja mja' tø mbadu'unxyi pøn jaty tø tkajpxwa'kxy wan tmøji wan tmutski.

Tø kya'pxy jøts nayide'en xyikwindigø'øty pøn jaty tø tmidundigøy ja naxwii'ñit jaa'y.

¹⁹ Xjats ja Dios chaptøjk y'awaajch jap tsajpjøtpty jøts yik'ixy ja kaaxi ma jap y'ity ja Dios kyutujk. Xjats ja møk uxx ñajxy jøts ja anaaw, jøts ja widsuk jøts ja møk tøtst ñaxkidaajky.

12

Ja tø'øxyøjk jøts ja awa'andsaa'ñ

¹ Xjats winet kyaxi'iky tu'uk ja møj ejxpajt jam tsajpwemp: jamts tu'uk ja tø'øxyøjk tyani po' kyubajk. Jade'en yø møk chamamy sam ja xøøwin, jøts tkujup'aty tu'uk ja koroni midi makmajtsk maadsa' tjagyajp.

² Jøtpyts ja tø'øxyøjk wyinaty, ka'axwampts jøts møk ja y'u'nk ja yik'ayøyi jøts kyaxø'økt.

³ Winets jam tsajpwemp n'ixxy jadu'uk ja ejxpajt: jamts tu'uk ja awa'andsaa'ñ, amuum tsajpts ja ñine'kx jøts wixujk ja kyubajk, majk jaty ja wyaj nidu'uk nidu'uk ja kyubajk tmøøt'aty, jøts ja koroni nayide'en tu'uk jaty tkujup'aty.

⁴ Jøts ja tyu'tst ttabajaa'xkijxy may ja maadsa' jam tsajpwemp, jøts naxkijxy ja tna-jtswøjyii'ñ. Jam tyanaay'øyi'ñ ma ja tø'øxyøjk jam kya'axwa'añ jøts ja y'u'nk jaty' tsu'jtsit ku ja kya'axt.

⁵ Ka'ax ja', mixyu'nk ja', ja'ats nøjkk niwindsøn'aty møk'ampy ja naxwii'ñit jaa'y. Xjats ja y'u'nk ja Dios tpoøknaa jøts ja tyiknijkxy ma ja møj tsinaabyajt jam;

⁶ jøts ja tø'øxyøjk kyeejky, jøts jam ja ñøjknxi ma abak et, ma ja Dios jam wyinaty ja y'et tø t'a'ejxi, jamts ja kya'aty agujk jotkujk, jade'ents jam chøønit tigøøk jumøjt jagujk.

⁷ Xjats ku jade'en yjajty winets ja tsep tyuujni jap tsajpjøtpty. Ja møj ankilis Miguel møøt ja y'ankilistøjk minamyajtsi ja awa'andsaa'ñ møøt ja y'ankilistøjk ja' møøtmi.

⁸ Ka'ap ja myajadaøtø ja awa'andsaa'ñ; ka'ap ja ma y'uk'etnibajtniyi tsajpjøtpty.

⁹ Jøts ja jade'en yikpawojpnaa, yikaxni naxwingijxy. Yø' dø'øn ja møj miku' windsøn midi yiktejp Satanás midi twin'øø'n ja naxwii'ñit jaa'y.

¹⁰ Winets nmadøøy møk ja kajpxy jap tsajpjøtpty midi yide'en wamp:

—Tø ja Dios ja naxwii'ñit jaa'y tyiknitso'ok'aty. Tøts ja myøk'ajtin tnanky'ijxyiyi jøts ja kutujk tmøøy ja Cristo sa ttanitanit ja yjaa'y; tøts ja nayide'en tpawøpy ja' midi xinaxy tsunaxy tni'øø'nip jam Dios wyindump ja' midi tø y'ookti Dios køjxp.

¹¹ Tø tmimajada'akti ja miku' yja', ja'agøjxp ku ja Borreek U'nk tø tkudsumi tkudaxi ja naxwii'ñit jaa'y, jøts ku tø tnigajpxkøxti sa tjanchjawidi ja Dios yja', wan tjaty pøni sa yjaty.

¹² Ejtni xoni meets pøn jap tsajpjøtpty, jøts janch yik'ayow meets pøn ya naxwii'ñ tyiknajxtip. Tø meets ja miku' mnimee'niyidi jøts awa'an'ampy mga'ødyunidit, ñija'wipxi ja' ku tsojk kya'pxt.

¹³ Xjats ku ja awa'andsaa'ñ tjä'wiyii'ñ ku ja ya naxwii'ñ tø yikajxni, xjats ja tø'øxyøjk ja tpayøøy pøn ja y'u'nk wyinaty tø tyikaxi'iky.

¹⁴ Winets ja tø'øxyøjk yikmøøy majtsk ja weejts myøjkajnk, jøts ja kyajknijkxy ma ja y'et ja jam abak etjotp. Jade'en ja tnikejky ja awa'andsaa'ñ. Jamts ja kya'aty yjøø'kxt amgujuk jotkujk tigøøk jumøjt jagujk.

¹⁵ Jøts ja awa'andsaa'ñ ja møj kom nøø tyikpidsii'my y'aawjøtpty, jade'ents ja tø'øxyøjk ja tyikjøøtwa'añ;

¹⁶ jøts ja tø'øxyøjk ja naxwii'ñit pyudøjkiyi. Møj et aaw awaajts, japts ja nøø jadi'iñi tyøtskøjxnaa.

¹⁷ Jade'ents ja awa'andsaa'ñ møk tmi'ambijky ja tø'øxyøjk, jøts ja tmidsepjky ja y'ap ja y'ok. Jade'en idø'øn ja'adi pøn ja Dios yja' tpaduujnidip sam ja nwindson'ajtim Jesucristo tnigajpxy.

13

Namajtsk ja møj ka'øy jiyujk

¹ Jam ø mejy'agø'øm nwa'k'øiyii'ñ jøts ø n'ijxy jam pyidsimy tu'uk møj ka'øy jiyujk. Wixujk ja kyubajk tmøø'taty jøts majk ja wyaj. Tu'uk tu'uk ja wyaj tmøø'taty ja koroni, jøts jam kyubajkøxp yikja'ay ja letri midi ja Dios kya'øyja'wip.

² Jade'en ja kyaxi'iky ejxim ja møj kuxibyiyin, jøts ja tyeky kyaxi'iky ejxim ja osa'an, jøts ja y'aaw ejxim ja kaajin. Ja'ats ja awa'andsaa'ñ møøjyi tuki'iyi ja myøk'ajtin ja kyutujk midi ja wyinaty myøø'tajtpy.

³ Jade'en ja kyubajk tu'uk kyaxi'iky ku janch møj tø chaachi, tyimiyik'ookwajniþ. Ka'ats ja yik'ojki, tsoojk ja'. Kuts ja t'ejxti ja naæwii'ñit jaa'y, ñigyumaap ja tja'widyøø xjats ja tpadundi ja yja'.

⁴ Nayide'ents ja tmøjawidi twindsø'øgidi ja awa'andsaa'ñ, ja'agøjxp ku wyinaty tø tmø'øy ja myøk'ajtin ja kyutujk ja møj ka'øy jiyujk, jøts ja nayide'en yikwindsø'øgi. Yide'en ja wya'andi ja naæwii'ñit jaa'y:

—iþøn jade'en t'uktu'ump sam yø møj ka'øy jiyujk, pønts jade'en ukmajada'akp!

⁵ Xjats ja møj ka'øy jiyujk yikmøøy ja tuu' jøts ja møk'ajtin jøts tjemnøjmit ttenøjmit ja Dios yja', wixijxxy myajtsk po' y'ett.

⁶ Jade'en idø'øn ja ttuun; tuki'iyi tmigajpxigøøy midi ja Dios yja'ajtpy jøts ja xyøøw jøts ja chinaadyaajk, jøts midi ejtp tsajpjøtpy, tuki'iyi ja yikmigajpxigøøgyijxy.

⁷ Nayide'en yikmøøy ja tuu' jøts tmøøtseptu'unt pøn jaty ja Dios yja' tpaduujniþ kunim ja tmimajada'akt; jade'en ja kyutujk yikmøøy jøts tniwindsøn'att niduki'iyi ja naæwii'ñit jaa'y.

⁸ Jøts ja naæwii'ñit jaa'y jade'en twindsø'øgi ja møj ka'øy jiyujk, ja' tpadundip jade'en pøn jaty kajaabyety jap nøkyjøtpy kuuyip ja naæwii'ñit cho'ondaajky. Yø' nøky ja Borreek U'nk myøø'tajtpy midt tø y'øøky adømgøjxp.

⁹ Øy yikxon madowdi.

¹⁰ Pøni pøn ja myigu'uk tsump, nayide'ents ja yiktsu'umt; jøts pøni pøn ja myigu'uk tyik'ookp, nayide'ents ja yjatt. Paty chøkyi mduda'akyyjaa'y'attit jøts x'ajot'attit ja Dios sam pyaāt'aty pøn ja Dios yja' tpaduujniþ.

¹¹ Jøts jadu'uk ø n'ijxy møj ka'øy jiyujk pyidsimy najxjøtpy. Majtsk ja wyaj tmøø'taty jade'en sam ja borreegi wajin, jøts jade'en kyajpxy sam ja møj awa'andsaa'ñ.

¹² Nayide'en ja kyutujk tjagyepy sam ja myiga'øy jiyujk midt ja kyubajk tsaachiyii'ñ, jøts yø tnøjmit ja naæwii'ñit jaa'y jøts yikwinjawit yikwindsø'øgit.

¹³ Nayide'ents ja myilagri'ajtin tnanky'ijxy, møj jøøn tyiktsøøñ tsajpwemp jøts naækjixy tyiknaækida'aky, jøts ja jaa'y ttuk'ixy wyemp amp.

¹⁴ Jade'en'ampy ja jaa'y twin'iiñ ku myilagri'ajtin tnanky'ijxy, xjats ja naæwii'ñit jaa'y tnimaay jøts tyik'øyt ja tsamaxan ja awanax midt t'ejxp jade'en sam ja møj ka'øy jiyujk midt tsaachiyii'ñ.

¹⁵ Xjats ja yikmøøy ja møk'ajtin jøts tyikjujkyøkt tyikajpxt ja tsamaxan, pønts ja kawindsø'jkiiþ, yik'ookp ja'.

¹⁶ Xjats nayide'en ja møj ka'øy jiyujk ja y'ejxa'anin tþiktaajky kyøjø'øm uk wyimbojkwemp tuki'iyi ja naæwii'ñit jaa'y, wan tmøji wan tmutski, wan tkumeeñ jaa'yi, wan t'ayoobi jaa'yi, øy ja yjawindsøndøjkidi, øy ja yjatumbitøjkidi.

¹⁷ Ka'ap pøn mibaat ti tjuy, ti tkajpxy, ti ttøøky, ku ja y'ejxa'anin tkamøø'tatti midt ja møj ka'øy jiyujk tø tþikta'aky. Ja' y'ejxa'anin'ajtpy ja xyøøw jøts ja ñumeri.

¹⁸ Yø'øbi numeri ka'ap yø ø pøn tñijawi; ja' yø tñija'wip pøn yikxon t'a'ejxip. Yø jade'embi numeri, jade'en yø kyajpxy ejxim ja jaa'yxøøwin, tudujk magø'pxy ja tugi'pxyudujk jade'en ja'.

14

Ku ja tukmagø'pxy wixijxxy myaktaxk milbi jaa'y y'øøwdi

¹ Kuts jade'en yjajty jøts ø n'ejxpaaty ja Borreek U'nk jam tyani kojpkøjxp ma yiktijy Siøn. Tukmagø'pxy ja wixijxxy myaktaxk mil ja jaa'y tmøødi pøn wyinaty wyimbojkwemp tø yikþikta'aky ja Dios Teety xyøøw jøts ja Borreek U'nk yja'ami. Ja'ats idø'øn ja y'ejxa'anin'ajttip.

² Jøts nmadøøy møk wyina'añ tsajpjøtpy ejxim ja møj nøø y'iichin jøts ja møk anaawin; jade'en yikmadøøy wyinaa'ñ ejxim ja maagyow midt yikteþ arpi.

³ Jamts ja jemy'iy t'øøwdi ma ja møj tsinaabyajt jam, ma ja nimaktaxkpi jiyujk jam jøts ja møjaa'dyøkti. Niþøn ja'abi iþ tkajaty, ja'ayi tþajttip pøn nitsø'ok'ajtti ya naæwiiñ, tukmagø'pxy ja wixijxxy myaktaxk mil jade'en ja'adi.

⁴ Wa'ats øy tsuj yjaa'y'atti jøts ka'ap ja o pøn tø'øxyøjk tmøøt'atti, tu'ugyi tpadundi ja Borreek U'nk pøni ma ja ñijkxy. Yø' dø'øon ojts jawyeen ñadyamiyøxyidi ma ja Dios Teety jøts ja Borreek U'nk, jade'en yø ttanitsø'ok'atti.

⁵ Ka'ap ja win'øø'nin, ka'ap ja taay'ajtin tjagyapti, øy tsuj wa'ats yjaa'y'atti Dios wyingujpk.

Kyugajpxy'atti ja nidigøøkpi ankilis

⁶ Winets ø n'ejxpaaty jadu'uk ja ankilis mididi kajkwidajtp jam tsajp kujk'am. Ayuujk myimimpy jøts tkajpxwa'kxwa'añ sa ttanitsø'ok'attit ja naẏwii'ñit jaa'y o magajp o ma'ayuujk.

⁷ Jøts møk kyajpxy yide'en:

—Windsø'øgidi winjawidi ja Dios, tø kya'pxni jøts ja tiidyu'unin ñaxkidaknit. Jade'ents windsø'øgidi ja Dios pøn ja tsajp ja naajx tyik'øyiyii'ñ tuki'iyi.

⁸ Xjats jadu'uk ja ankilis pyamiñi mididi waan:

—Tø ja møj kajp Babilonia wyindigøy, ja'agøjpx ku tuki'iyi ja naẏwii'ñit twin'iñ jøts ttaktuñ sam ja kya'øjjaa'y'atti.

⁹ Xjats ja ankilis jadu'uk pyamengojmiyi, jøts ja møk nayide'en wya'añ:

—Pøni pøn ja twindsø'jkp ja ka'ø yiyujk jøts ja y'awanax, jøts jade'en yik'ejxa'andit wyimbojkwemp uk kyøø'øom,

¹⁰ yø'øts ja ayo'on yikmo'odip ja'agøjpx ku ja Dios tø tyikjotma'atti; jade'ents ja jøøn jøts ja jøky tyukpaadidit tyuk'ejxidit Dios y'ankilis wyindump jøts ma ja Borreek U'nk jam.

¹¹ Xemikøjpx ja ayo'on jap t'ejxtit, nijuuni ja poj xyuxy'ajtin tkapaajtidit. Xinaxy tsunaxy ja y'etti pøn tø twindsø'øgidi ja ka'ø yiyujk jøts ja y'awanax, sam ja tø yik'ejxandi nidu'uk ja nidu'uk.

¹² Jade'ents yø chøkyi jøts møk y'ettit tyuda'aky'attit pøn ja Dios ja'ajtidip jøts ja y'ana'amin tpaduujnidi, jøts pøn ja Jesús møøt tu'ugyi ettip.

¹³ Winets nmadøøy møk kyajpxy tsajpjøtpy jøts ø xnøjmi:

—Ja' ya'at: "Pyaa'ajti ja øy'ajtin xondaajkin ku y'oocktit tyigø'ødyit pøn ja nwindson'ajtim Jesucristo tjanchja'widip." Nayide'en ja Espiritu Santo wya'añ jøts y'ejtnit ejtni xoni jøts ja y'øy'ajtin pyudøkiyit nayide'en.

Saja Dios ttiidyunwa'añ ja naẏwii'ñit jaa'y

¹⁴ Xjats ø n'ejxpatkojmi, jam ø n'ixy tu'uk ja jaa'y chøøni poop yootskøjpx, koroni kyujup'ajtpy mididi tum amuum oori, jøts ja møj tsujx tkap'ity.

¹⁵ Jøts jadu'uk ja ankilis pyidsimy ma ja Dios chinaadyaajk jøts møk tmigajpxy mididi jam yootskøjpx tsinaapy:

—Kajpjøøk yø tsujx jøts xyikpidø'økt yø pikta'aky; tiempi yø' jøts pyidø'knit, tø yø myijaani yø pikta'aky mididi naẏwii'ñit'ajtp.

¹⁶ Xjats ja' mididi tsinaapy yootskøjpx, nay jatyits ja møj tsujx ttao'otmuiky ja pikta'aky.

¹⁷ Xjats jadu'uk nayide'en ja ankilis pyidsimy ma ja Dios chinaadyaajk jap tsajpjøtpy, jam tu'uk ja møj tsujx janch jøøjp nayide'en tkapi.

¹⁸ Altajr wyingujpk jadu'uk ja ankilis chøøñ mididi t'ejx'ejtp ja jøøn jam altajrkøjpx. Ja'ats møk tyaxiyii'ñ mididi ja tsujx tmøøt'ajtp, jøts tniimaay:

—Kajpjøøk yø møj tsujx jøts xyikpidø'økt yø uvi tsa'am kumi tø yø myijaani.

¹⁹ Jøts ja ankilis ja tsujx tyiktuun naẏkijxy, jade'ents ja uvi tsa'am tyikpidi'jky, japts ja t'abøkiyii'ñ y'abøjk'ii'ñjøtpy ma yikmøø'kxt, jade'en idø'øon yø tijy ku ja Dios møk ja ayo'on tyiknaẏkida'akt.

²⁰ Jam kajp wingon ja uvi tsa'am yikmi'kxy, jøts ja ni'jpy kom'ampy pyidsimy. Kawaay y'aawgijxy ja yja'aty jadine'en ja kyøjki, jøts yø'øy tigøøk magø'pxy kilometri.

15

Ja wixujk ayo'on mididi ja ankilistøjk yikme'endip

¹ Kuts jade'en yjajty jøts n'ixy tsajpwemp jadu'uk ja ejxpajt, janch adsø'jkibim: jade'ents ja niwixujkpi ankilis tminiñ ja wixujkpi ayo'on mididi tø yiktanipiky, kuts ja ayo'on ñaxt jade'ents ja Dios y'ambøjkin yjøkøxt.

² Jøts ø n'ejxpaaty tu'uk ja mejy janch wa'ats, janch tøø'kxp, jønyowin kyaxi'iky. Jamts mejy'agøøm tyanidi niduki'iyi pøn tø tkabadundi ja ka'ø yiyujk yja' jøts ja y'awanax, sam nayide'en ja numeri tø tkagupøjkidi. Jamts ja kow ja tmøøt'atti mididi ja Dios tø myø'øyidi.

³ Jøts ja t'owdi ja møjjaa'y Moises y'iyi pøn ja Dios kyugajpxy'ajit, jøts ja t'øømididi ja Borreek U'nk yja', mididi nømp:

Tu'ugyi me Dios Teety ja møk'ajtin xjagyepy.

Jøts mididi tø xyik'øyi, janch øy janch tsuj jøts kamidaa'byaadyim;

janch tiy'ajtin ja' midi mdumpy midi mbiktakpy, jøts xnideety'aty xnimøjaa'y'aty ja naxwii'ñit jaa'y.

⁴ zPøn Dios Teety mga'uktso'øgyip, jøts pønts mga'ukwindsø'øgyip?

Pø tu'ugyixi mets mwā'adsi.

Mwinjawiyyip mjanchjawiiypts niduki'iyi ja naxwii'ñit jaa'y,

ja'agøjxp ku mdiy'ajtin xnanky'ijxyi sa mduñ sa mbiky.

⁵ Nay winets ø ne'jxpaajty ku ja Dios chinaadyaajk y'awajch jap tsajpjøtpy ma yikpøkji'iky ja Dios kyutujk.

⁶ Nay japts pyidsømdi ja niwixujkpi ankilis midi myimendip ja wixujkpi ayo'on. Ja' wyet'ajttip ja øybi wet midi janch tøø'kxp janch tsamamp. Midi chum'ajtpy, amuum oori ja', kyachwiiñ ja chum yja'aty.

⁷ Nay winets ja ñamaktaxkpi jiyujk nidu'uk ja niwixujkpi ankilis tmøøy kitu'uk ja kopi midi amuum oori. Ujts ja ayo'on ja tmøøt'aty midi ja Dios yajkpy, midi xemikøjxp jujky'ajtp.

⁸ Jøts nayide'en ma ja Dios chinaadyaajk tø ja jok kawinø'on jap tø tya'tspøjki. Ja Dios myøk'ajtin jade'en adøtsp jøts nipøn jap mibaat kya'uktøjkiñi kunim yjøkøxt ja wixujkpi ayo'on midi ja ñiwixujkpi ankilis yiktamigajxidip.

16

¹ Kuts jade'en yjajty xjats nmadøøy møk kyajpxy jap ma ja Dios chinaadyaajk, xjats ja ñiwixujkpi ankilis tnimaay:

—Nøjx atsyiktawaatstet yø wixujkpi kopi jam naxwingøjxp, ja ayo'on yø myøøt'ajtpy midi ja Dios yajkpy.

² Winets ja myidu'ukpi ankilis tyiktawaajch ja kyopi jam naxwingøjxp, jøts ja jaa'y pyatkøjniyi ja tsamaax jøts ja ka'øbyu'uts. Ja' jajttip niduki'iyi pøn ja ka'øy jiyujk ja y'ejxa'anin tmøøt'ajttip jøts pøn twindsø'jkidip ja y'awanax.

³ Xjats ja myimajtskpi ankilis mejyotp ja kyopi tyiktawaajch, jøts ja yjajtnaa wa'ats ni'jpy ejxim ja jaa'y ñi'jpyin ku pøn chaachi, jøts ja y'oo'køjxni niduki'iyi midi jaty jam tsinaapy mejyotp.

⁴ Jøts ja myidigøøkpi ankilis ja kyopi tyiktawaajch møj nøøjotp jøts ma jaty ja nøømu'ut. Nayide'ents ja wyimbejtnimaa wa'ats ni'jpy.

⁵ Winets nmadøøy ja ankilis midi tniwindsøn'ajtp ja nøø ku wya'añ:

—Me Dios Teety, tiy'ajtin ku jade'en xuñ. Janch øy janch wa'ats mets, jøts xemikøjxp me m'ity,

⁶ ja'agøjxp jade'en yjatti ku mets ja mjanchja'wibitøjk yikjemandi yiktedundi, tø tyik'ookti, kawinø'on tø tyiktsuñ tyiktaxy. Paty mets ja nøø xyikwimbejtni wa'ats ni'jpy jøts yø t'uukti; jade'ents yø pyaat'atyidi.

⁷ Nmadøøy nayide'en ku jap altajrwimpy kyajpxy yide'en:

—Mets Dios Teety, tu'ugyi mets ja møk'ajtin xjagyepy, ku naxwii'ñit jaa'y jade'en tø xpayø'øy, tiy'ajtingøjxp idø'on ja tø xuñ.

⁸ Jøts ja myimaktaxkpi ankilis tyiktawaajch ja kyopi jam xøøw wyingøjxp, jøts ja xøøw ja myøk'ajtin tpijky, jøts ja jaa'y chaaba'oo'kniyi ja xøø'an.

⁹ Øy ja kawinø'on ja xøø'an yjatsa'yidi ni jade'embaats ja wyinmaa'ñi ja tkayiktigatsti. Ni jade'embaat ja Dios tkaja'myatsti ku ayo'on tja'ejxti, ne'egi ja Dios tmigajpxigø'y'adøøtsti.

¹⁰ Jøts ja myimagoxkpi ankilis tyiktawaajch ja kyopi ma ja møj ka'øy jiyujk ja myøtsinaabyajt jam, jøts tuki'iyi kyoodsigyijxy winø'ømbaat t'ane'emy ja yjaa'y. Øy ja ayo'on ja møk tja'ejxti, jadi'iñits ja tjantyimyimajada'akti. Nugo ja tyoojts ja tjanch'atsutsmukti;

¹¹ ni jade'embaats ja tkamajtsu'uty ja kya'øy'ajtin midi ja tyundip, ne'egi ja tmigajpxigø'y'adøøtsti ja Dios pøn jap tsajpjøtpy, ja'agøjxp ku ayo'on ja jade'en ttuk'ijxy.

¹² Xjats ja myidudujkpi ankilis tyiktawaajch ja kyopi møj nøøjotp midi yiktejp Eufrates. Ku jade'en ttuun jøts ja tyijch, jøts ja tuu' jam y'awaajch, jøts ja møj windsøndøjk jam ñajxti midi tsoo'ndip xøøbidsimdsø'ampy.

¹³ Winets ø ni'jxy ku ja miku' pyidsimy jap awa'andsaa'ñi y'aawjøtpy. Nayide'en pyidsømi jap møj ka'øy jiyujk y'aawjøtpy, jøts nayide'enmi jap kugajpxtyøjk y'aawjøtpy midi nadyejidip ku ja Dios tkugajpxy'atti jøts twindaay'atti nugo ja jaa'y. Nidigøøk ja miku' jade'en pyidsømdi ejxim ja pokleenin.

¹⁴ Yø'øbi miku' jade'en ja møj ejxpajt ñanky'ejxip jøts niduki'iyi ja møj windsøndøjk tyiknamyukøxwa'añi pøn ya naxwiiñ. Jade'ents ja tsep t'a'ejxidit ku ja xøøw tpaatt jøts ja Dios tmime'ent ja myøk'ajtin midi ka' pøn tmi'abaaty.

¹⁵ Yide'en ja Dios wya'añ: "Ukmadowdinim, adsu'uky ø nme'ent ejxim ja maa'tspa'an, nipøn tkanijawi. Tya'øy'ajttip ja Dios kyunuu'kxin pøn nay'ejx'ejtidip nabyøkø'jkidip. Ka'ap øts xmidsø'ødyu'unt ku nme'ent."

- ¹⁶ Jøts ja møj windsøndøjk ñamyukøjxidøø ma jam hebreo ayuujk tejti Armagedón.
- ¹⁷ Xjats ja myiwixujkpi ankilis tyiktawaajch ja kyopi pojotp jøts yikmadøøy møk kyajpxy midì tsoo'mp jap tsajpjøtpy ma ja Dios chinaadyaajk, jøts wya'añ:
- Tø y'øiygyixy jøts tyunit jøts yjatit.
- ¹⁸ Jøts møk ñaxkidaajky ja widsuk, jøts wyinanguejky ja anaaw, jøts ja tsaachmøk uyx myiñ midì ka'anìm windii yik'ijxy yiknijawi ya naxwiiñ.
- ¹⁹ Xjats ja møj kajp Babilonia y'ajaabajky tigøøk ween. Jade'en'ampy jade'en ja Dios tyuñidi ku ja kya'øyjaa'y'atti jøts jade'en ambøjkin'ampy tyukji'kxyidi ja ayo'on. Tuki'iyi ja kajp wyindigøøgyixy jøts yjaaø'kijxy ya naxwiiñ.
- ²⁰ Wyindigøøgyixy ja naajx midì jam mejkyujk'am jøts ja kojpk nayide'en yjajty.
- ²¹ Nayide'en ja jaa'y pyajtigøøjyøø ja tøst midì je'mch'ajtp wixijkyx kyili tu'uk tu'uk. Ni jade'en ja jaa'y tkaja'myatsti ja Dios øy yø sa wyan'adøøtsti, øy ja ayo'on møk tø yjayikmo'odi.

17

Ku ja ka'ødyø'øxy tø pyajtniyi ja myiwin'øø'mbi

- ¹ Kuts jade'en yjajty, jøts myiñ nidu'uk ja ñiwixujkpi ankilis midì tmøøt'ajttip ja wixujkpi kopi, jøts ø xnimaay:
- Men, jøts ø n'uktuk'ext sa y'ayo'ombaatt ja ka'ødyø'øxy pøn jam tsinaapy mejwyingøjxp.
- ² Yø møj windsøndøjkti pøn ya naxwiiñ, tø yø tmøøtpøkyundi yø ka'ødyø'øxy. Jade'ents ja naxwii'ñit jaa'dyi tø ttuktuñ ttuknijawi ja kya'øyjaa'y'ajtin, jøts jade'en tu'ugyi tø yikwin'øø'nidi.
- ³ Nayi kumaa'yjotpy ja Espiritu Santo xuk'ijxy ku øts ja ankilis xyiknijkyx jam møj abak etjotp, jamts ø n'ijxy tu'uk ja tø'øxyøjk ttatsøøni tu'uk ja møj ka'øy jiyujk, tsajpts ja' jøts wixujk ja kyubajk, majk ja wyaj tmøøt'aty, amuum ni'ja'ay ja y'ak midì kya'ødyamigajpxy ja Dios.
- ⁴ Jøts ja tø'øxyøjk ja wyet twet'aty tsuu'nk jøts tsajpts, amuum oori xyox'ajtpy, jam n'ijxyimbi nga'ijxyimbi. Jamts ja kopi tu'uk tmach'ity midì amuum oori, ujts ja kopi nayide'en tmøøt'aty midì kyada'øyjaa'y'ajtpy;
- ⁵ Jøts wyimbojkwemp ja letri tmøøt'aty midì ka' nugo ajawi yiknijawi. Yide'en ja tijy: "Ja møj Babilonia midì tñigubajk'ajtp ja ka'ødyø'øxyøjkti, ja ka'ødyunk jøts ja ka'øwyinmaa'ñi."
- ⁶ Jøts nay jaty n'ijxy ku ja ka'ødyø'øxy myu'ugyi, ja ni'jpy tam ja muujkip pøn ja Dios ja'ajtip ku ja Jesús yja' tø tku'oogidi. Nigyumaap njawi ku jade'en n'ijxy.
- ⁷ Xjats ja ankilis xnimaay:
- ¿Tiku nigyumaap xjawi? Ixyam n'uktuknijawit sudso'ampy idø'on yø jade'en tijy yø tø'øxyøjk jøts yø ka'øy jiyujk midì ja tø'øxyøjk tyatsinaapy, midì wixujk ja kyubajk jøts majk ja wyaj.
- ⁸ Yø ka'øy jiyujk midì ixyam m'ijxpy, jekyip yø jaayi y'ijty. Ka'ap yø ixyam ma y'ukyik'ejni; øy jade'en tø yjaty, pidsømgøjmip jap ayodaajkjøtpy jøts ñøjxt ma wyindigøøty xemikøjxp. Jøts ja jaa'y pøn ja xyøøw kayikja'ay jap nøkyjøtpy ma jap y'ity ja jaa'xyøøw midì juky'ajttip xemikøjxp, yø'øts nigyumaap tjawidip ku ja t'ejxkojmidit ja ka'øy jiyujk ku ja nay jaa'yujky'aty.
- ⁹ 'Ukmadow yikxon midì ndukmadowampy: Yide'en yø wixujkpi kubajk twandijy yø wixujkpi kojpk ma yø tø'øxyøjk chøøni.
- ¹⁰ Nayide'en yø wixujkpi kubajk twandijy niwixujk ja windsøndøjkti. Tø wyindigøø nimagoxk, jøts nidu'uk ixyam wyindsøn'aty, jøts jadu'uk ka'anìm ja myiñ. Kuts ja mye'ent, ka'ap ja jeky'y'ett.
- ¹¹ Jøts ja ka'øy jiyujk midì ya ejt naxwiiñ jøts ka' ixyam ma y'uk'ejni, ja' idø'on etp myiduktujkpi windsøn. Ja' idø'on ndejint yjapatpy ja ñiwixujkpi windsøn pøn øy sa tø yikajpxpaaty, jøts jade'eñi ja kyudigøøyin ñaxt.
- ¹² Ja majkpi waj midì tø x'ixy, ja' wyandijpy nimajk ja windsøndi, ka'anìm ixyam ja kutujk yiktanipøkti; pyøktipts ja kyutujk jøts tu'uk hori ja'ayi møøt wyindsøn'attit ja ka'øy jiyujk.
- ¹³ Tu'ugyi ja wyinmaa'ñ tyik'etti yø nimajkpi windsøndi jøts tmo'odit ja myøk'ajtin ja ka'øy jiyujk.
- ¹⁴ Xjats møøt cheptu'undit ja Borreek U'nk, mimajada'akidipts ja' ja'agøjxp ku møk ja myøk'ajtin tjagyepy; nipøn ya naxwiiñ kyajade'eni, pøn ja møøtti kø'øm ja Dios Teety ja tø wya'ijxyidi jøts ja tø yajxyidi, myiduda'aky'ajttip ja'.
- ¹⁵ Jøts ja ankilis nayide'en xnimaay:
- Yø mejy midì tø x'ixy ma yø tø'øxyøjk chøøni, yø' wyandijpy niduki'iyi naxwii'ñit kajp.

¹⁶ Jøts ja nimajkpi windsøndøjkti midì wyandijpy ja ka'øy jiyujk wyaj, ja'ats kyadami'ejxiwyampy ja ka'ødyø'øxy jøts tyiktuu'duktit; jøts jade'eñi tyikwindigø'ødyit jønjøtpy.

¹⁷ Tundi jade'en sam ja Dios kø'øm tø mwĩnmaa'nmyø'øyidi sam ja kø'øm ttsøky, paty tkajpxmuktit ja windsøndøjk jøts ja kyutujk tmo'ot ja ka'øy jiyujk kunim yø ttu'undit jade'en sam ja Dios tø ttanibiktaagi.

¹⁸ Yø ka'ødyø'øxy pøn tø x'ixy, jade'en yø' sam yø møj kajp Babilonia midì niduki'yiyi ja naẓwii'ñit ja windsøndøjk y'ane'empy.

18

Ku ja møj kajp Babilonia wyindigøy

¹ Xjats ku jade'en yjajty winets n'ijxy tu'uk ja ankilis ku ja tsajpjøtpy kyidaajky, møk ja kyutujk tmimiiñ jøts ja naẓwii'ñit tyikjajtaajky ku ja møk tyi'lkxy chamamy.

² Xjats ja ankilis møk kyajpxy jøts wya'añ:

—Tø ja møj kajp Babilonia wyindigøy. Miku' tsinaadyaajk tø wyimbejtñi jøts tum ja ka'øy jiyujk jam tsinaadyip.

³ Ja'agøjxp jade'en yjajty ku ja naẓwii'ñit jaa'y tø ttukpaduñ ja kya'øy'ajtin. Tø ja windsøndøjk møøt y'øyjaa'y'aty kya'øyjaa'y'aty. Pønts atstooktip atsyaktip tø ja ttamøktøjkiñidi ku ja ttookti midì yiktundip ja pøkyumbi.

⁴ Xjats ø nmadøøy jadu'uk ja ayuujk midì tso'omp tsajpjøtpy, xjats wya'añ:

—Pidsømdi meets jam kajpjotp pøn jaty ø nja'ajtpy. Kidi nugo ja pøky xpaatti jøts kidi nayide'en ja ayo'on nugo xpaatti.

⁵ Tø yø jade'embì kajp ja pyøky ñipajtni, xjats ja Dios ka' tja'dyigøy ku jade'en kya'øyjaa'y'atti.

⁶ Wan yø tjaty nayide'en sam yø tø tka'ødyuñ ja naẓwii'ñit jaa'y. Wan jawaani møj tkubety ja kya'øy'ajtin.

⁷ Pø øyxi ñamyikejxyi, møj ñayjawi, wants t'ixy tñijawi nayide'en ja ayo'on. Wampts ja' y'am yjotp: “Windsøn'ajtpyim øts ixyam; ka'ap ø nmay ndajy sam ja ku'økyø'øxyin, ka'ap ø sa ñjatt.”

⁸ Ja'agøjxp tuktoñi nøjx ñaxkida'aky mayjøøjp ja ayo'on: ja o'jkin, ja yuu, ja pa'am, jøts nayide'en nøjx tuki'yiyi tyøøjyø'køxti; ja Dios janch møj ku ja ayo'on jade'en myo'ojidit.

⁹ Jøts ja naẓwii'ñit windsøndøjkti tpaya'axtit tpajø'ødit ja kajp ma ja tø pyøkyundi, ku t'ejxtit ku ja tø yønmajtñiyi, jøts ja jok nugo pyidø'kni.

¹⁰ Jagam ja tsø'øgi y'a'ejxuktit, ja ku ja nayide'en yjattit, jøts yide'en wya'andit:

—iMjanch'ayøøy meets Babilonia! Janch møk ja møk'ajtin y'ity xmøøt'atti. Pø tøxi tuktoñi mwindigøy.

¹¹ Nayide'en ja too'kpi ajuubyitøjk, pyaya'axtip ja', ja'agøjxp ku ka' pøn jade'en y'ukjuuñit sam y'ijtyin, ja tyøøky myimaadyip myidajtip ti jaty ja myøøt'ajttip:

¹² jap oori, jap plati, jap n'ijxyim nga'ijxyim, jap ja øybi wet, tsuu'nk jøts tsajpts; jap nayide'en mayjøøjp ja kipy midì pa'akxukup, jap tsaaðsech tsaaøueegidi, jap bronze jøts ja nugo pujx,

¹³ japts nayide'en ja kanela, to'kx tsøøy, poom, mirra, jøts ja pa'akxukupi, jap ja vino, aceite, y'øybi ariin way jøts ja ariinbajk; jap nayide'en ja jiyujk midì tsimchømp, jap ja borreegi, jap ja kawaay jøts ja karreti. Nay jap ja tumbi jaa'y tyøøgyi pøn tundip sam ja jiyujkin.

¹⁴ Xjats ja too'kpitøjk wya'andit:

—Tø wyindigøøgyixy tuki'yiyi midì y'ijty mdsojktip; tø tyigøøgyixy ja mgumeeñ'ajtin ja mjujky'ajtin, nijuuni jadigojk kya'ukyikpatnit.

¹⁵ Jøts ja too'kpitøjk, tsø'jkidip ja', jøts jagam y'a'ejxuktit ku nayide'en y'ayo'ombaattit, pyaya'axtip pyajø'ødip ja',

¹⁶ jøts wya'andit:

—iMjanch ayøøy meets Babilonia kajp! Janch tsuj meets mgajp y'ijty sam tu'uk ja tø'øxyøjk tsuj ñaxyøxyin, ku øybi wet tpikta'aky wan tsuu'ngi wan tsajpts, kuts o midì'ibi xox tpikta'aky wan ja oori jøts ja tsaaðø'kxpi.

¹⁷ Pø tøxi tuktoñi kyugøxi ja mgumeeñ'ajtin ja mjujky'ajtin!

Jøts nayide'en pøn jaty jam tundip barki jotp, jagamyi ja tyandøø.

¹⁸ Jøts t'ejxpaattøø ja jok ku tø tyøøbyøjkni ja kajp, jøts møk wyandøø:

—iNima jade'en ja kajp ejxim ya'at tø y'ityin!

¹⁹ O sa yja'adø'tsnidi o sa ñadyu'uniiyidi, ja' møk yja'widip ku ja kajp jade'en yjaty, chap'aawdi, jøts wya'andi:

—iMjanch'ayøøy mee Babilonia kajp! iJa mgumeeñ'ajtin ja mjujky'ajtin øø tø ndama-jada'aky pøn jaty ja barki tmøøt'ajttip yam mejyjøøjty, jøts jotmøñ tø mdyimgyudigøødyi!

²⁰ Taxonda'akti meets pøn jap tsajpjøtpy, meets kugajpxtyøjk, meets janchja'wibitøjk, pø tæxi ja wyindigøy ja ka'øgyajp jøts jade'en ja Dios tø tpayø'øy ku tø myika'ødyundi.

²¹ Xjats tu'uk ja møj ankilis tkijji'iky tu'uk ja amuum møj paandsaa jøts ja mejjyotp tkuwibejpiyii'ñ, jøts ja wya'añ:

—Jade'en yø Babilonia kajp wyindigøy ejxim yø tsaä yikuwibejpi mejjyotp, jøts nijuuni xøøw kya'ukyik'ejxni.

²² Nima jadigojk ti kya'ukyikmadooni kajpjøøjty ja xuxpi ja kowbi; nima pøn ti tka'uktunidi, nima pøn kya'ukjøtsnidi.

²³ Niti jaj niti tøø'kx kya'ukaxø'kni jøts jade'en kya'ukyikmadooni sam ti y'ityin xyødundi. Tø yø kajp wyindigøy, øy ja too'kpi yajkpiði tø tjamøø'tatti møj, øy tuki'iyi ja naæwii'ñit kajp tøjawin'øø'nguixy møøtpi ja kya'øy'ajtin.

²⁴ Ja'agøjpx yø kajp jade'en tø yjaty ku jam tø tyik'oockti ja Dios kyugajpxy jøts ja Dios yjanchja'wibitøjk. May ja jaa'y tø tyik'oockti o magajp.

19

¹ Kuts jade'en yjajty jøts nmadøøy ku mayjaa'y kyajpxti jap tsajpjøtpy jøts møk wya'andi: jTu'ugyi adøm nDios Teety janch møj janch øy! Ja'ats tu'ugyi xyikni'tso'ok'ajtindip.

² Tiy'ajtingøjpx ja Dios ttiidyuñ; t'ayo'onmø'øy ja ka'ødyø'øxy, ja'agøjpx

ku ja naæwii'ñit jaa'y tø tyikma'aty ja' kya'øy'ajtingøjpx;

paty ja Dios ja tpayø'øy ku jade'en tø tyik'oockti ja yjanchja'wibitøjk.

³ Xjats jadigojk wyangojmidi:

—janch møj ja Dios! Nijuuni yø kajp kyatøø'y'amø'øty, jok'ejtp yø'.

⁴ Xjats ja ñi'ee'pxmaktaxkpi møjaa'dyøjk jøts ja nimaktaxkpi jiyujk ñagyuxendyaajkidi jam Dios myøtsinaadyaajk wingujk, Dios tja'myatsti jøts wya'andi:

—jJade'en, ku Dios janch møj!

⁵ Jøts yikmadøøy ja kajpxy ja ayuujk ma ja møj tsinaabyajt jam, midi wamp yide'en:

Winjawidi kunuu'kxyjawidi meets ja Dios,

pøn tpadundip pøn twindsø'jkidip

wan tmøjidi wan tmutskidi.

Ku ja Borreek U'nk yikxødu'unt

⁶ Xjats nmadøøy nayide'en ejxim ja mayjaa'y kyajpxyin, sam ja møj nøø øø'tspin wyina'añ jøts ja tsaach møk anaaw, jøts wya'añ yide'en:

jJanch møj ja Dios! Tø ñaxkida'aky ja kyutujk jøts jade'en xniwindsøn'ajtindip.

⁷⁻⁸ Wan t'øy'ajtyim wan txondaajkyim, wan twinja'wa'am wan twindsø'jka'am.

Tæxi tpaaty ja yja' midi yiktejp Borreek U'nk jøts tmøøtsinaawya'añ tmøø'tetwa'añ ja yjanchja'wibitøjk pøn øy'ajttip wan wa'ats jaa'y'ajttip.

Jade'en idø'øn yø tijy sam ja jaa'y ja xøøw ttundi ku y'amajtskidi.

⁹ Xjats ja ankilis xnimaay:

—Ja' jade'en: "Tya'øy'ajttip pøn tø yikway ma ja Borreek U'nk xyøduñ."

Jøts ja yjaakwa'añ:

—Yø' ayuujk midi tø xjaadyañ, tiy janch yø', Dios tyiy'ajtin yø'.

¹⁰ Xjats ø nagyuxendyaajki ankilis wyingukp jøts nwindso'øgiwya'añ, jøts ø xnimaay:

—Ka'ap jade'en m'adø'øtst; pø tu'ugyixi ja Dios Teety yikwindsø'øgi. Nayide'enxi øts ja nwindso'n'ajtim Jesús yja' nbaduujni sam metsin, sats ja mmijanchja'wibitøjkindi. Ja Jesús kyajpxy y'ayuujk nbagajpxa'amp pøn jaty ja Dios ja'ajtiyip.

Ja jaa'y pøn ttatsinaapy ja poop kawaay

¹¹ Xjats ø n'ejxpaaty ja tsajp y'awaajch; jamts kyaxi'jky tu'uk ja poop kawaay, ja'ats ja ttatsinaapy pøn øy pøn tiy'ajtin møøt, jøts tpayø'øwya'añ ttiidyunwa'añ ja naæwii'ñit jaa'y.

¹² Janch tøø'kxp ja pøen ejxim ja jønyowin, jøts kyubajkøjpx may ja koroni tmøø'taty. Jamts ja xyøøw yja'ayi wyimbojkwemp, øy ja pøn tja'ijxy ka'ap ja pøn t'ejxkapy, ja' kø'øm tnija'wip.

¹³ Amuum ni'jpy ja wyet midi wyet'ajtpy, jøts ja xyøøw, Dios kyajpxy ja' Dios y'ayuujk ja'.

¹⁴ May ja myøøtseptumbi tpayø'øyi pøn tso'ondip jap tsajpjøtpy. Amuum poop, øybi wet, wa'ats wet wyet'ajttip jøts tum poop kawaagyøxpti.

¹⁵ Japts y'aawjøtpy pyidsimy tu'uk yøñchujx, janch jøøjp ja', ja'ats tyayiktsaachip ja naæwii'ñit jaa'y ku ja møk tniwindsøn'atwa'añ ja naajx ja kajp; møk ja ayo'on ja payø'øyin tyiknaæwaa'ñ ku ja Dios Teety tø yjanchjot'ambiky.

¹⁶ Yjixki'py ja xyøøw yja'ayi jøts pyuugyixy. Jade'en ja twandijy ku møk ja kutujk tmøø'taty, nipøn ya naæwii'ñ kyajade'eni.

¹⁷ Winets ø n'ijxy tu'uk ja ankilis jam xøøw wyindump, jøts tmigajpxy ja jiyujk midi kajkwidajttip tsajpwemp, jøts wya'añ yide'en:

—Mendi namyukidi jøts xka'adyit x'a'uxidit ja Dios yja',

¹⁸ Jøts xtsu'utstit xjøø'kxtit ja windsøndøjk ja soldaditøjk. Nayide'en xtsu'utstit ja kawaay jøts pøn ja tatsinaajyip. Niduki'iyi xjøø'kxtit pøn ja jaa'y yiktuujnip jøts pøn midundip, wan tmøji wan tmutski.

¹⁹ Xjats ø n'ijxy ja møj ka'øy jiyujk jøts ja windsøndøjk pøn ya naxwiiñ møøt ja syoldaditøjk, ja'agøjxp tø ñamyukyidi ku cheptunwa'andi møøt ja' pøn ttatsinaapy ja poop kawaay.

²⁰ Jøts ja ka'øy jiyujk yiktsuumy møøt ja' pøn nugo win'øø'ndip ñadyijyi ku Dios ja tkajpxnaxpi'aty. Jade'en ñadyijyi tnanky'ejxi ja myilagri'ajtin jøts jade'en ja jaa'y twin'iiñ jøts yikmo'odit ja møj ka'øy jiyujk y'ejxa'anin jøts jade'en twindsø'øgidit ja y'awanax. Xjats ja møj ka'øy jiyujk møøt ja' midu nugo win'øø'mp yikuwibejpidy mejyjotp, ma janchtøøy yjanča'ay ja nøø.

²¹ Ja'ats ja tya'ookøxti ja myigu'uk midu ja yøñchujx tmøøt'ajtp y'aawjøtpy, jøts ja jiyujk ja yjøl'kxkøxiyidi midu kajkwiditjtp.

20

Sa ja kutujk midu tukmil jumøjt etp

¹ Xjats ø n'ijxy tu'uk ja ankilis midu tso'omp tsajpjøtpy, jøts ja tkøñ'ity ja ñi'awaajts ja ayodaajk jøts nayide'en tu'uk ja møj pujkadeen.

² Myajts ja ankilis ja møj ka'øchaa'ñ midu yiktejp møj miku' ja Satanás, jøts yikøxøjch, yikpaxxøjch jøts tukmil jumøjt y'ett

³ y'ayo'ot ma yikuwibejpiyiiñ ayodaajkjøtpy. Jap ñi'adujkepty jøts ja seeyi yikpiktaajky ja agaj, jade'engøjxp jøts ka'ap ja naxwiiñit jaa'y nugo ajawi t'ukwin'øø'nit. Tukmil jumøjt y'ayo'ot, winets yikmajtstu'utt øy winø'ønin.

⁴ Winets ø n'ijxy ja møj windsøndøjk chøøniidi jam møj tsinaabyajtkøjxp. Tø yikmo'odi ja kutujk ja møk'ajtin jøts tiidyu'unin ttu'undit. Nayide'en ja yik'ijxy ja anmija'windi pøn ja kyubajk tø wyinakti, ku ja tkajpxwa'kxti ja nwindson'ajtim Jesús yja'. Jade'ents ja Dios yja' tø tpaduujniidi. Ka'ap ja twindsø'øgidi twinjawidi ja møj ka'øy jiyujk jøts nika'ap ja y'ejxa'anin yikpikta'akti wyimbojkøjxp jøts kyøø'øm. Yik'ijxy ku ja yjujkyøøkøxti jøts tukmil jumøjt møøt wyindsøn'attit ja Cristo.

⁵ Yø'øts jawyeen jujkyøktøø, pønts jaaktandøø jaanims ja yjujkyøktit kunim ja tukmil jumøjt ñaxt.

⁶ Tya'øy'ajtip tyaxondaajkip ja Dios yja' pøn jawyeen jade'en jujkyøktøø. Ja'ats ja Dios ja'ajtidip jøts ka'ap ja y'ayo'odit ku ja myimajtskpi o'jkin ñaxt. Pyadundip ja Dios yja' jøts møøt wyindsøn'attit ja Cristo tukmil jumøjt.

⁷ Ku wyinaty tø kya'pxy tukmil jumøjt winets yikmajtstu'utt ja Satanás.

⁸ Ku pyidsø'ømt, wyin'øø'mp ja' ja naxwiiñit jaa'y. Nøjkx twin'iiñ nayide'en ja kajp ma yiktijy Gog jøts Magog, jøts ñamyukidit ja tseptumbi niduki'iyi ja syoldadi. Janch namay ja'adi, ka'ap ja myachooni.

⁹ Namyujkidøø jam møj jøgyøjxp jøts tnawidejtkøxti ma jam y'etti pøn jaty ja Dios ja'ajtidip, pøn ja chøjky. Xjats ja Dios ja jøøn tnaitskajxyiiñ jap tsajpjøtpy jøts niduki'iyi tyøøgyijxy.

¹⁰ Xjats ja miku' nayide'en yikmaaajch ja'agøjxp ku ja jaa'y nugo twin'iiñ. Nay jam yikpiktaajky mejyjotp ma janchtøøy yjanča'ay ja nøø. Møøt ja' ja møj ka'øy jiyujk, jøts ja' midu nadyejip kugajpxy pøn nugo twin'øø'mp ja naxwiiñit jaa'y. Jamts y'ayo'odit xemikøjxp xinaxy tsunaxy.

Ku ja Dios ttiidyu'unt ja jaa'y ma ja pyoop tsinaabyajt jam

¹¹ Jøts ø n'ijxy tu'uk ja møj tsinaabyajt, poop ja', jam ja Dios chøøni. Xjats ja tsajp, xjats ja naajx tuki'iyi wyindigøøgyijxy Dios wyingujkp, nimä niti kya'uk'ejtni.

¹² Jøts ø n'ijxy ja jaa'y, Dios wyingujkp tyanidi pøn tø y'ookti, ja møj ja mutsk ja'adi. Jamts ja nøky yik'ijxy sa tø yjaa'y'atti nidu'uk nidu'uk. Nayide'ents ja nøky jam yik'ejxmi ma ja xyøøw jap yjaabyetyidi pøn jaty ja Dios yja' tø tpaduujni, xjats jade'en niduki'iyi yikpayø'ødyi.

¹³ Jam ja'adi pøn tø y'ookti mejyjotpy jøts nayide'en pøn tø y'ookti naxkijxy. Jamts ja yikpayø'ødyi tu'uk tu'uk pøni sa tø yjaa'y'atti.

¹⁴ Winets ja Dios tyikjøpkixy ja o'jkin tigø'øyin jøts ka' pøn y'uk'looknit jadigojk. Ja' tøødyip pøn tø tyundigøydi jap mejyjotpy ma janchtøøy yjanča'ay ja nøø.

¹⁵ Ja' jade'en yikpiktaaktip jam, pøn ja xyøøw jap ka'ejtjip nøkyjøtpy, pøn tkabadundip ja Dios yja'.

21

Ku ja tsajp ja naajx jadigojk y'øiyiiñ jemy

¹ Nay winets ø n'ijxy ja jemchajp ja jemñaajx jadigojk; pø tøxi ja tsajp ja naajx wyindigøy midi jawyeen ejt. Nayide'ents ja mejy kya'uk'ejtña.

² Xjats ø n'ijxy tu'uk ja jemgyajp kyida'aky tsajpjøtpty, kunuu'kxy Jerusalén xyøøw'ajtpy, Dios wyingujkp ja chøøñ. Janch tsuj janch xøxy ja kajp, jade'en ja kyaxi'iky ejxim ja jaa'y pyøkwa'añin.

³ Winets nmadøøy møk kyajpxy jap tsajpjøtpty, xjats wya'añ:

—Ejx sa ja Dios tmøøtsinaawya'añ ja naxwii'ñit jaa'y. Ja' amuum ja'ajtidip jøts ja ja' xemikøjxp tmøøt'ett.

⁴ Yiktigø'øpy ja yjotmaydi ja yjotmay'o'jkindi. Ka'ap ja o'jkin y'uk'ejtnit y'ukpaajtniyit, ka'ap ja jajyi tøøyi t'uk'ejxnit; sam tø y'uk'ityin, tø ja ñaxy.

⁵ Xjats ja wya'añ pøn jam tsinaapy møj tsinaabyajtkøjxp:

—Uk'ejxim sa øts tuki'iyi jemy nyik'øyigyøxt.

Xjats jade'en wyangojmi:

—Jaabyat ya'at ayuujk ja'agøjxp ku tyiyi yjanchi, ka' ma ndagudsø'jka'ant.

⁶ Winets øts xnimaagyojmi jøts yide'en wya'añ:

—Tø y'øyigyixy. Øts idø'øn nyiktso'ondaajk tuki'iyi jøts nayide'en nyikjøpkøxt. Pøni pøn tøjøtsip, øts ja nøø ja nmo'op midi yikjujky'ajtp xemikøjxp, jøts may'ajt ja'.

⁷ Pøni pøn tmimajadaajkip ja miku'yja', ja'ats nmo'op ja øy'ajtin; jade'ents øts ja n'u'nk'att jøts nmøøt'ett xemikøjxp.

⁸ Pøn tkawamp øts nja', pøn tkamibøjpk, pøn xkatsojkip øts nja', pøn yikjaa'y'o'kp, pøn ka'øyjaa'y'ajtp, pøn ja miku'yja' tyiktuujnip, pøn twindsø'jkip ja maxandsaa, pøn taay'ajttip, ja' nøjkkøxtip xemikøjxp jam mejyotp ma yjanchtøøy yjancha'ay ja nøø.

Tsuj kyaxi'iky ja jemgyajp Jerusalén

⁹ Winets tu'uk myiñ ja ñiwixujkpi ankilis midi ojts tyikmiñ ja wixujkpi ayo'on ya naxwiiñ, jøts ø xnimaag:

—Men, jøts ø nduk'ext ja janchja'wibitøjk pøn møøt y'ettit ja Borreek U'nk.

¹⁰ Nayi kumaa'yjøtpty ja Espiritu Santo xuk'ijxy, ku øts ja ankilis jam møj kojpkøjxp xyiknijkxy, jøts ø xuk'ijxy ja kunuu'kxy jemgyajp, ja Jerusalén midi kidakp tsajpjøtpty jam Dios wyingujkp.

¹¹ Janch tsuj janch tøk'kxp ja kajp sam ja Dios chinaadyaajkin, jade'en chamamy ejxim ja wa'ats tsaadøø'kxpa'an, tajajnaaxp jade'en sam ja wa'ats keega'an.

¹² Køjxp nabojts'awidity ja kajp jøts makmajtsk ja agaj tjagyepy, jamts ja ankilis tyanidi ma jaty ja agaj. Jam agajkøjxp kyøxja'ayidi ja xyøøw pøn ja Israelit jaa'y y'aadsip kyugojip, namakmajtsk idø'øn ja'adi jøts tu'uk tu'uk ja agaj ja xyøøw tmøøt'ajtti.

¹³ Tigøøk ja agaj tyañ aga'ñ tso'ampy, jøts ja jadigøøkpi agaj tyañ anajy tso'ampy. Xjats ja jadigøøk agaj tyanni winduuy tso'ampy, nayide'en jadigøøk agaj tyañ jixkø'øm tso'ampy.

¹⁴ Makmajtsk ja tsaay yiktapojsøø'ñ ja pøch, jøts tu'uk jaty ja tmøøt'aty ja xyøøw pøn jaty ja Jesús kyudanaabyi'ajtpy.

¹⁵ Ja ankilis midi ø xmimadyakp jam ja takejpx ja tmøødi, tum oori, xjats ttakijpxy winø'ønin ñabojts'awidity ja kajp, jøts nayide'en winø'ønin myøji ja agaj.

¹⁶ Kwadradi ja kajp, ni sudso'ampy kyayøñi kyakoni. Majtsk mil ja majtsk magø'pxy kilometri tuktamajñ jaty, jøts nayide'en kyøxpi.

¹⁷ Winets nayide'en tkijpxy ja pøch, tugui'pxy myaktaxk metri ja myajpx'ajtin tjagyepy. Jade'en ja ankilis tkijpxy sam adøm nguijpxyin.

¹⁸ Amuum jasje tsaat ttpapø, jøts ja kajp amuum oori ja', jøts wa'ats keegi kyaxi'iky.

¹⁹ Ma ja makmajtskpi tsaat tøjktapojsøøñ, mayjøøp ja øybi tsaat'u'nk tøjktaxøxy. Ja myidu'ukpi tsaat tmøøt'aty ja jasje, jøts ja myimajtskpi tsaat tmøøt'aty ja zafiro. Ja myidigøøkpi tmøøt'aty ja ágata, jøts ja myimaktaxkpi tmøøt'aty ja esmeralda.

²⁰ Ja myimagoxkpi tsaat txox'aty ja ónice, jøts ja myidujkpi tsaat txox'aty ja cornalina. Ja myiwixujkpi tsaat txox'aty ja crisólito jøts ja myiduktujkpi txox'aty ja berilo. Ja myidaxujkpi tsaat txox'aty ja topacio jøts ja myimajkpi tsaat txox'aty ja crisoprassa. Ja myimaktu'ukpi tsaat txox'aty ja jacinto jøts ja myimakmajtskpi txox'aty ja amatista.

²¹ Tum perla ja makmajtskpi agaj, jøts amuum oori ja møj tuu' midi najxp kajpjotp, jajp tsamamp ja'.

²² Ka'ap ja tsaptøjk jam yik'ijxy jemgyajpjotp. Ka'ap ja chøkyi, kumi amuum ja Dios ja tkajp'aty møøt ja Borreek U'nk.

²³ Ka'ap ja chøkyi jøts ja xøøw ja po' jam y'a'nt kajpjotp. Kø'øm ja Dios Teety jøts ja Borreek U'nk ja y'aju'uk ja y'ajaj tyikjajt tyiktøø'kxt.

²⁴ Nay ja' tkudøø'kxidip tkujajidip ja naxwii'ñit jaa'y pøn tøjñitso'ok'atti, jøts nayide'en ja windsøndøjkti pøn ja y'øy'ajtin jam tøjminøjkti.

²⁵ Awa'ats jam y'ity ma ja pøch agaj jam. Nijuuni jam kyakoodsi, xiiñ jam y'ity.

²⁶ Xjats jam tminøjkxti ja naxwii'ñit jaa'y ja y'oy'ajtin ja wya'ats'ajtin;

²⁷ ka'ap jam tyøkit pøn ka'oy'ajtip, pøn ja myigu'uk nugo twin'øø'mp twindaay'ajtp jøts o ti tkadami'ejiwya'añ. Ja'ayi jam tøjkidip pøn ja xyøøw jap jaabyety jap nøkyjøtpy, ma jap y'ity ja jaa'y ja xyøøw pøn juky'ajttip xemikøjxp. Ja'abi nøky tmøøt'ajtp ja Borreek U'nk.

22

¹ Xjats ø xuk'ijxy ja ankilis tu'uk ja møj nøø. Midi yik'ukp janch wa'ats ja', ja'ats xyikujky'ajtim xemikøjxp. Janch ti'kxy ja', jøts ja jam pyidsimy ma ja Dios Teety chøøni møøt ja Borreek U'nk.

² Jams ja møj tuu' kujk'am yø'oy ja nøø. Adsow aduuk ja kipy jam yøñ nøøba'am. Ja' tyøøm yiktajuky'ajtp xemikøjxp. Wimbo' wimbo' ja tyøøm'aty jøts ja y'aay tsøøy'aty ja naxwii'ñit jaa'y.

³ Pøn jap tsinaadyip ka' pøn y'ukjemñimaa'yñiyi y'uktenimaa'yñiyi. Ja Dios Teety jam tu'ugyi ejtp møøt ja Borreek U'nk, ja'ats windsø'jkuyidip ja yjanchja'wibitøjk.

⁴ Ejxyidip nijawiyidip wemp'am ja Dios Teety, jøts nay ja xyøøw myøøt'ajtidip wyimbojkwemp.

⁵ Ka'ap ja koots'ajtin jam y'uk'ejtnit; ka'ap ja jaj ka'ap ja xøøw t'ukyiktunit; Dios Teety tkujajip tkudøø'kxip, ja'ats jam windsøn'attip xemikøjxp.

Wingomp ja' ku ja Jesucristo mye'ent

⁶ Winets ja ankilis xnimaay yide'en:

—Tiy janch ya'at ayuujk midi ixyam tø xjaadya, ka' nugo xkudsø'øgit. Nay ja Dios Teety pøn y'ijty tyukajpxwa'kxpy ja kyugajpxy, tøts ja nayide'en tkejxy ja y'ankilis jøts tukmado'ot ja pyadumbi pyabøjkpi sa tsojk yjatwa'añ kyubatwa'añ.

⁷ Nøøm ja nwindson'ajtim:

—iMe'emp øts tsojk! iTya'oy'ajttip tyajotkujk'ajttip pøn ja Dios kyajpxy tmøjpiktaajkip sa yap nøkyjøtpy yjaabyety!

⁸ Xjats øts nmadøøy n'ijxy kø'øm sa øts ya'at nøkyjøtpy tø njaadya. Winets øts ja ankilis wyingujky ngyuxendyaajki sam øts ja xuk'ijxy jøts øts ja nwindso'øgit.

⁹ Jøts øts ja xnimaay:

—Ka'ap jade'en m'adø'øst; pø tu'ugyixi ja Dios Teety yikwindsø'øgi. Nayide'enxi øts ja nwindson'ajtim Jesús yja' nbaduujni sam metsin, sats ja mijanchja'wibitøjkindi, jøts niduki'iyi pøn jaty tmøjpiktakp midi yap nøkyjøtpy jaadya.

¹⁰ Jøts nayide'en ja ankilis xnimaay:

—Ka' nugo x'amaatsk'att ja Dios kyajpxy midi yap nøkyjøtpy jaadya. Wingompxi jøts yjatt kyubatt jade'en.

¹¹ Wan jade'en tjaa'y'atti pøn ka'oy'ajttip, jøts pøn ja Dios yja' tpaduujnip, wañim ja tyikyø'ødyi jade'en ja yjaa'y'ajtin.

¹² Yide'ents ja nwindson'ajtim wya'añ:

—Tsojk ø nme'ent jøts ø nme'ent ja øy'ajtin. Ja'ats ndamay'atp nidu'uk nidu'uk sa tø yjaa'y'atti.

¹³ Øts idø'øn nyiktso'ondaa'jk tuki'iyi jøts nayide'en nyikjøpkøxt.

¹⁴ Tya'oy'ajttip tyajotkujk'ajttip pøn tø ñitso'ok'aty. Awa'ats ja tyuu'di jøts ja tyøkidit jam kunuu'kxy kajpjotp. Jams tpaattit ja kipy midi jam yiktajuky'ajtp xemikøjxp.

¹⁵ Ka'ap jam tyøkidit pøn ka'oyjaa'y'ajttip pøn ja miku' yja' tpaduujnidip, pøn maa'tstip, yikjaa'y'oo'ktip, jøts pøn ja myigu'uk nugo twin'øø'mp.

¹⁶ —Tø øts ja n'ankilis nguexy jøts tuki'iyi yiknigajpxkøxt ya'at Dios kyajpxy, jøts jade'en yiknijawit pøn jaty ja Dios ja'ajtidip jam niwixujkpi kajp. Øts ndeety'ap'ajtpy ja møj windsøn David. Jade'en øts ja naxwii'ñit jaa'y nyikujajtaagi sam ja møj jaxyøøw midi jøpyidsømp.

¹⁷ Xjats ja Espiritu Santo jøts ja nwindson'ajtim yjanchja'wibitøjk wya'andi jøts ø nwindson'ajtim yiknøjmi:

—iMen!

Pøn jaty tmadoop yø'øbi ayuujk wan nayide'en twa'andi:

—iMen!

Jøts pøn ttsojpk ja øy'ajtin ja xondaajkin wan tmiñ jøts tpaatt ja may'ajt.

¹⁸ Ixym ø nnigajpxy pøn jaty yam tmadoop ja Dios kyajpxy sam yap nøkyjøtpy yjaabyety: Pøni pøn nugo tyiktigajtsip ya'at ayuujk jøts ne'egi tiy tijy midi ka' tyi'ajtin, Diosts ja ayo'on mo'øjip sam yap nøkyjøtpy yja'ayi.

¹⁹ Pøni pøn yø Dios y'ayuujk tyiktigajtsip jøts ka'pxy tka'ukajpxnidi sam yap nøkyjøtpy yja'ayi, Diosts ja pøjkifip ja y'oy'ajtin jøts ka' tyøkidit ma ja kunuu'kxkyajp jam midi yø nøky ñigajpxy.

²⁰ Xjats ja nwindson'ajtim wya'añ pøn ya'at tñigajpxp:

—Tsojk nme'ent.

Jøts ø n'adsojimbijty:

—Øy jade'en. ¡Men, nwindsøn'ajtim Jesús!

²¹ Ja nwindsøn'ajtim Jesucristo mgunuu'kxɪdɪp meets niduki'iyi. Jade'en idø'øn ja y'ejxi tyiyi.